


El Nuevo Testamento en el idioma Culina (mádiya)  
del Perú



Kulina: El Nuevo Testamento en el idioma Culina (mádiya) del  
Perú New Testament

## **El Nuevo Testamento en el idioma Culina (mádiya) del Perú**

### **Kulina: El Nuevo Testamento en el idioma Culina (mádiya) del Perú New Testament**

copyright © 2014 Wycliffe Bible Translators, Inc.

Language: Culina (Kulina)

Contributor: Wycliffe Bible Translators, Inc.

All rights reserved.

2020-11-16

---

PDF generated using Haiola and XeLaTeX on 21 Feb 2024 from source files dated 29 Jan 2022

4c7c82dd-1f0f-5341-b6e6-26970c27fee2

## Contents

Mateo . . . . .	1
Maraco . . . . .	84
Roca . . . . .	130
Huano . . . . .	218
Tahimarideni . . . . .	267
Romanodenidsa . . . . .	338
1 Corintodenidsa . . . . .	367
2 Corintodenidsa . . . . .	396
Carasiadenidsa . . . . .	415
Epesodenidsa . . . . .	426
Piripodenidsa . . . . .	438
Corosadenidsa . . . . .	447
1 Tesaronicadenidsa . . . . .	456
2 Tesaronicadenidsa . . . . .	463
1 Timoteodsa . . . . .	467
2 Timoteodsa . . . . .	478
Titodsa . . . . .	485
Piremaodsa . . . . .	490
Ebreodenidsa . . . . .	492
Satiacocca . . . . .	520
1 Pedrocca . . . . .	528
2 Pedrocca . . . . .	537
1 Huanocca . . . . .	542
2 Huanocca . . . . .	549
3 Huanocca . . . . .	551
Jodacca . . . . .	553
Apocalipsis . . . . .	556

## Mateopa Jesocristo tahimari dsodo inajaro

### Mateo

Mateopa Jesocca dodosse. Ajijaro namidsa Jeso madidsapa Mateopa Jesodsa ccaccaridsa najari.

Tahide Jeso pocca dodosse tojahijine pohnadsa huahua najaraccadsapa Roman-odenicca taminecca dodosse tojapojari. Madijadenicca dsiniro mota taminedsa da quinanjine nanaccade tojajari. Mateopa Isaraeri potemahi jodio madija. Imehi onipa Arapeo. Mateo pohua oni ohuahapa Rebi.

Jodiidenipa pohnadeni Idinide Cristo-Mesia tohui madimanajonajari. Jesopa Cristo-Mesia bacco najonajari tahimari jodiideni nahatoqquri nahijine Mateo dsodo inajaro.

#### *Jeso biridideni onideni*

##### *Roca 3.23-38*

<sup>1</sup> Jehe, ajijaro imapi Jesocristo tahimari. Jeso biridi ojariapa Isaraeri potemahi jodiideni quiquinanajaridenicca tamine Dabi. Biridi ohuaha naco Isaraeri potemahi jodiideni huapimacca idi Abarahao. Nadsapa Abarahao potemahi onideni hua inadsa Jeso imenicca maqqui oni bacco inanijine.

<sup>2</sup> Tahidepa Abarahao. Abarahaopa Isahacacca abi.

Isahacapa Jacobocca abi. (Jacoboco oni ohuahapa Isaraeri.)

Jacoboco bedideni ojaria onipa Joda. Pohua, pohua imecotedenidsa: —Isaraeri potemahi jodiideni —quiquinanajari.

<sup>3</sup> Joda bedipa papamade: Pare, Dsara quinajari. Imenideni oninipi Tamara.

Parepa Eserocca abi.

Eseropa Araocca abi.

<sup>4</sup> Araopa Aminadabecca abi.

Aminadabepa Nahasaocca abi.

Nahasaopa Saomocca abi.

<sup>5</sup> Saomopa Bohodsicca abi. Bohodsi imeni oninipi Rahaba.

Bohodsipa Obedecca abi. Obede imeni oninipi Roto.

Obedepa Dsesse-Isahicca abi.

<sup>6</sup> Dsesse-Isahipa Dabicca abi. Najari Dabipa jodiidenicca tamine tojajari.

Pohnuapa Saromocca abi. Saromo imenipi Oria bedimeni bote.

<sup>7</sup> Saromopa Robohuacca abi.

Robohuapa Abiacca abi.

Abiapa Asacca abi.

<sup>8</sup> Asapa Josapatecca abi.

Josapatepa Joraocca abi.

Joraopa Osiacca abi.

<sup>9</sup> Osiapa Joataocca abi.

Joataopa Acasecca abi.

Acasepa Esequiacca abi.

<sup>10</sup> Esequiapa Manasecca abi.

Manasepa Amaocca abi.

Amaopa Josiacca abi.

<sup>11</sup> Josiapa Jeconidenicca abi.

Jeconia, pohua imecotedeni madimanadsapa dsama onihicca madija jadsire ec-cajonamanajaro. Najaridenina deni toquejenadsapa Isaraeri potemahideni tod-sepe toquejenajari. Poccadeni dsama Babironiahuaaji iaccanibaqqui-manadsapa tarabaidasajine medse toquejenajari.

<sup>12</sup> Nadsa nahi dsama onihihuaaji madimanadsa Jeconia bedi tossonajari. Pohua onipa Saratieo.

Saratieopa Sorobabeocca abi.

<sup>13</sup> Sorobabeopa Abiodicca abi.

Abiodipa Eriaquiocca abi.

Eriaquiopa Adsoriacca abi.

<sup>14</sup> Adsoriapa Sadocacca abi.

Sadocapa Aquiocca abi.

Aquiopa Eriodecca abi.

<sup>15</sup> Eriodepa Eriasacca abi.

Eriasapa Mataocca abi.

Mataopa Jacobocca abi.

<sup>16</sup> Jacobopa Dsodsecca abi. Najari Dsodsena Mariacca maqqui tojajaripaja.

Jehe, Dsodsecca amoneje Mariadsana Jeso tossonajari. Najari Jesona —Ia Idinide Cristo-Mesia —ihinanajaro.

<sup>17</sup> Jehe, najaro imapi Jeso biridideni huapi taraha onideni eti ajima-jerajaro. Abarahao onidsama hua idsanapodsapi ajicca tamine Dabi oni bacco inadsapi biridideni 14 quinajari.

Nadsapi Dabi onidsama hua inapomadsapi Jeconia oni bacco inadsapi denima biridideni 14 quinajari. Aja Jeconia madidsapa Isaraeri potemahideni todsepe toquejenadsa dsama Babironiahuaaji iaccanibaqqui-manajari.

Dsotode Jeconia Babironiadsa madidsa pohua onidsama hua inapomadsapi ia Idinide Cristo-Mesia tossonahi bacco inadsapi denima 14 quinajari.

### *Jeso tossonahicca ima*

#### *Roca 2.1-7*

<sup>18</sup> Jesocristo tossonahijinecca imapi ajima napojaro: Jeso imeni Mariapi Dsodse icajihijine tahide imehidenipa jehe canirepojari. Mariapi maqquideje ssamo taccani. Dsodsepa pocca odsahuaji Maria iaccani-jeraccadsapi ponidsa huada-jaraccahi. Naraha ponipi jiajaro. Dio Corime huati tadsapa poni idsonidsa ejedeni nahatodsa huittidsajari. <sup>19</sup> Ponicca maqqui tojahijine Dsodsepa imari bica taja najari. Poni jiani qqui taraha ponidsa ima inassonariniijine jipera tajari. Nadsapa pohua bodi: —Cacomehedsa onebona —najari. <sup>20</sup> Pohua bodi nama naraha pocca huadadsa Diocca dodosse Pohua Atti ccaccaronade ahuatodsa huati tajari: —Dsodse, tiapi tamine Dabi potemahi tijani. Ticappina-jeraji. Maria jiaporaha ticajiniijine oppinera tani. Aja, Maria poni idsonidsa ejedeni huittidsajaripa madijajine jarahi. Dio Corime huati tadsa ejedeni cajijaro —najari. <sup>21</sup> —Nidsa poni bedi tossonadsapa onipa “Jeso” tana. (Ettidsapi: Ia Medsede madija Tonassiajade, inajaro.) Najaripa pocca madija inassi-ajabaqquihitohui, poccadeni imasiri manaconi najidsohue pohuadenidsa inassonari-jeranitohui —najari Dio Atti ccaccaronade atti.

<sup>22</sup> Najaro ima huapima ima tojaponijinepi maittaccadsama Diopa Pohua Atti cacomerabote Isahiadsa huati tadsa Isahiana huati iqquimajaro. <sup>23</sup> Pohua attipa:

—Ticattomama canaji. Dsohuato maqquideje ssamo taraha jiadsapi ejedeni cajinitohui. Poni bedidsapa: Emanohueo, quiquinanahitohui —napohui nade Isahia. (Emanohueo ettidsapi: Dio iadsa madihi, inajaro.)

<sup>24</sup> Nadsapa Dsodsedsa huati huati taha jicadsapa Dsodse nocco tojajari. Dio Atti ccaccaronade attidsa ibora tadsapa Maria icajijaro. <sup>25</sup> Nadsapi pocca amoneje

tojaraha poni idsonicca ejedeni tossona-jaraccadsapa ponidsa huada-jarajari. Poni bedi tossonadsapa Dsodse ejedeni oni hua inajari: —Jeso –najari.

## 2

### *Abadsico bedi tahimari nahatoqquiri napojarideni Jeso qquide jahijonajari*

<sup>1</sup> Jesopa odsa panani onini Berenedsa tossonajari. Najaro odsapi Jodeahuajicca dsamacca. Jeso tossonahicca huajanodsapa tamine Herode dsama Jodeacca madija cacahuade tojajari. Puhuapa odsa panani Jerosaretsa madijari. Nadsapa tamine Herode nahidsa madihi paja naccadsa dsama huaji tanicca madija maji ccajonahihuaji jahijonadsa Jerosaretsa bacco najonamanajari. Pohuadenipa abadsico bedi tahimari nahatoqquiri napojarideni. <sup>2</sup> Jerosaretsa bacco najonamanadsa attidenipa: —¿Nija? ¿Nejecohuaji Isaraeri potemahi aja jodiodenicca tamine tossonajaritta? –najonamanajari. —Iapi maji ccajonahihuaji imadidsa abadsico bedi dsati qqui icanade. Najaro imapi tamine deni tojajari tossonahitohui quinapojaricca ima tojajaro. Najari qquide jaijajonajaro. Ipitodsa jassi inadsa pohuadsa: “Icca tamine” inanijine –quinajari.

<sup>3</sup> Nadsapa tamine Herode najaro ima mittadsapa bodi tocasserajari. Pocca madija nahi Jerosaretsa madimanajarideni ima mittamanadsa naco bodideni cappinamanajari. <sup>4</sup> Nadsapa tamine Herodepa dada toqquimade tamedeni, jodiodenicca marinaja maridedeni naco inequeriqquihijine huahua inabaqquijari. Queriqquimanadsapa pohuadenidsa huati tajari: —Aji Dio Atti dsodo nanidsa ia Idinide Cristo-Mesia tossonahicca imapi ¿nejecoma napojarotte? ¿Nejecohuajina Cristo-Mesia tossonahitohui napojarotte? –nahi nade Herode. <sup>5</sup> Tamine Herodedsa ima ecomeramanajaro: —Jodeahuajicca odsa panani Berenedsana tossonahitohui. Najaro imapi Dio Atti cacomerabote Miqueo dsodo inapojaro. <sup>6</sup> Pohua atti ajama napojari:

“Berenecca ima huati onana. Jodeacca dsamahuaji odsa panani huapi taraha Berenepi ajimani toja-jerani.

Ima bicani deni tojanicca cajinitohui. Nahidsa tamine deni tojahicca tossonahitohui. Puhuapa occa madija Isaraeri potemahideni ecahuabaqquihitohui” napohui nade Dio Atti cacomerabote –quinahi nade jodiodenicca marinaja maridedeni.

<sup>7</sup> Herode najaro ima mittadsapa aja abadsico bedi tahimari nahatoqquiri napojari-denitohui cacomehedsa huahua inabaqquijari, poccadeni ima mittahijine. Jahijonadsapa pohuadenidsa huati tajari: —Aja abadsico bedi dsati qqui ticanamanajaripa ¿nejecoma nadsa cahatojaritta? –nahi nade. Nadsapa pohuadsa abadsico bedi tahimari ecomeramanadsa mittajari. <sup>8</sup> Nadsapa Herode Berenehuaji dosse iqquimabaqquijari: —Berenehuaji jai tijana. Nanihuaji ejedenitohui qqui taridsamanana. Bacco tiquinadsapa ohuadsa huati tanimanana. Ohua naqui pohua qquide occadsa opitodsa ohuittadsa pohuadsa: “Occa tamine” onanijine, onajaro –naraha maidsajari. Tamine ohuahadsa jipera tajari.

<sup>9-10</sup> Herode atti mittamanadsapa jai tojajari. Jai toja, jai toja nanaja abadsico bedi aja qqui icanamanapojari pohuadeni tedsejema cahatopomajari. Cahatopomadsa abadsico bedi tahimari nahatoqquiri napojarideni huatidsemaneri najari. Puhuadeni tedsejema tohuaccadsa ejedeni tossonahicca odsadsa quehenacossajari. <sup>11</sup> Nahidsa jai tojedsimadsapa ejedeni qqui, imeni Maria qqui toquinajari. Puhuadsa huatidsemanadsapa pohuadeni pitodsa jassi tadsa: —Tamine deni tojahi –quinajari. Puhuadeni dsepetaji baho bedeni bicaqquiri najaro itaboridsamanadsa poccadeni daniji ejedenidsa da inaqquimanajaro. Oro huatini ccara tanicca da quinajaro. Ahua

majicone tohuessihi majo bica tajari naco da quinajari. Ahua ohuaha oni mirra majicone majo ocassa tahicca naco da quinajari.

<sup>12</sup> Nadsa dsome nahidsa cahadijadsapa huada cajimanajari. Dio pohuadenidsa huati tajari: —Tamine Herodehuajipi jai tijani-jeraji. Pocca ima oppina tani -najari poccadeni huadadsa. Nama nadsapa poccadeni dsamahuaji jai tojanihijinepa Jerosarecca jahuihuaji jai tojani-jarahi. Jahui onihina jai tojanijari.

*Dsama Ejitohuaji joppa icanamanajaricca ima*

<sup>13</sup> Nadsapa abadsico bedi tahimari nahatoqquiri napojarideni jai tojana jicahi. Dsotodepa Dsodse pocca huadadsa Diocca dodosse Pohua Atti ccaccaronade ahua-todsa atti ajama najari: —Dsodse, nocco tijaji. Huassinaja aja ejedeni imeni tadsajani dsama Ejitohuaji tiaccabaqquijo. Tamine Herodecca dosseniji ejedenitohui qqui naridsamanabote nahi, inanadsoqqe-manahijine. Nani Ejitohuaji timadi-dsanapoccana. Nidsa tiadsa huati onapomadsana ticcanipomanijine bica tani -najari. <sup>14</sup> Nadsapa huassinaja nocco toquejenadsa: —Jina, jidapana dsome icadana -najari Dsodse. Nadsapa dsomeraha ejedeni imeni tadsajani Ejitocca jahui jai tojajari. <sup>15</sup> Ejitohuaji bacco toquinadsapa tamine Herode madiccadsa nahidsa madimana-dsanapocajari. Najaro imapi maittaccadsama Dio huati tapodsa Pohua Atti cacomerabote Osea dsodo inapojaropi ajima najaro: —Occa Ejedeni Ejitohuaji madiraha pohuatohui huahua onajaro -najari Dio Atti Oseajine dsodo nanidsa. Nadsapa tamine Herode dsoqqeahi ima mittamanadsana poccadeni dsamahuaji jahinijari.

*Herode ejedeni inajicaridsahijine dosse inabaqquiridsajari*

<sup>16</sup> Herode dsoqqe-jaraccadsa ima ajima inanajaro. Aja abadsico bedi tahimari nahatoqquiri napojaridenitohui madiraha pohuahuaji jahini-jaradsapa bodi huatomajari: —Ohua icamaidsamanajaro -najari. Nadsapa paja huadirijari. Huadidsapa tamine dsati tossonajari dsori tajarahijine pocca madija dosse inabaqquijari: —Jari, Berenedsa madimanajarideni, Berene huajira tanidsa madiridsamanajarideni naco bedideni maqquideje bedi huajanorideni 2 najari, huajanorideni ajamanicca naco, najarideni huapima tinajicaridsamanahissa tajo -nahi nade Herode. Aja abadsico bedi dsati qqui icanamanapojaricca huajanodsa tocatjaridsajarideni huapima jicaridsahijine. <sup>17</sup> Nama quinadsapa Isaraeri potemahidenicca ejedeni badsiraqquiri najari inajicamanajarijine imehideni, imenideni oji oji quinajari. Najaro imapi pina maittaccadsama Dio Atti cacomerabote Jeremia dsodo inapojarossa najaro tojajaro. Isaraeri potemahidenicca ini maittaccadsama madipojaro onini Raqueo tahimarinidsa dsodo nanipi ajima najaro:

<sup>18</sup> —Odsa panani Ramahuajicca dsamadsa oji imeni tojajaro. Raqueo potemanidenipi bedidenitohui oji oji quinajaro. Ponidenicca ojie naqui huatinideni ssonanijine jiperaqquiri najaro, bedideni jicaridsadsa -napohui nade Dio Atti Jeremiajine dsodo nanidsa.

<sup>19</sup> Nadsapa dsotode tamine Herode dsoqqeahi nattipa dsama Ejitohuaji Dio Atti ccaccaronade Dsodse pocca huadadsa ahuatopomadsa huati tajari: <sup>20</sup> —Dsodse, nocco tijaji. Aja ejedeni imeni tadsajani Isaraeri potemahidenicca dsamahuaji tiaccanibaqquijo. Ejedeni inanadsoqqe-manahijine tohui quinajaridenipa jicahi -nahi nade.

<sup>21</sup> Nadsapa Dsodse nocco tojadsapa najoradsa Isaraeridenicca dsamahuaji ejedeni imeni tadsajani iaccanibaqquijari. <sup>22</sup> Nanihuaji bacco tanimanadsapa Dsodse ima mittajari: —Herode dsoqqedsapa pohua bedi onipa Aquelao najarina dsama Jodeacca tamine tojajari -quinajari. Najaricca ima naqui tabaccora tajaro, pina imehicca imassa nadsapi Dsodse nahihuaji madihijine cappinajari. Naraha pocca huadadsa Dio pohuadsa huati tajari: —Aji Jodeadsapi timadimana-jeraji -nahi

nade. Nadsapa dsama arobeni Carireahuajina tojoppemamanajari. <sup>23</sup> Jai tojadsapa Carireahuaji bacco toquinajari. Nadsapa odsa panani Nasaretidsa madimanajari. Najaro imapi pina Dio Atti cacomeraqquiri najarideni madija Idinide Cristo-Mesia tahimari huati toquinapojarissa najaro: —Pohuadsa: “Nasaretihuaicca” quiquinanahitohui –quinapohui nade Dio Atti dsodo nanidsa.

### 3

*Huano Baotistapa dsama huamonihuaaji madija mari icanabaqquijari  
Maraco 1.1-8; Roca 3.1-9, 15-17; Huano 1.19-28*

<sup>1</sup> Huajano toccahi huapi tadsa madija oni Huanopa dsama arobeni onini Jodeacca huamoni ssono caji, siba caji tanihuaaji madija maride tojajari. Pohuadsa: Baotista, quiquinanajari. (Ettidsapi: Totopade, inajaro.) <sup>2</sup> Mari mari ihicanabaqquiridsa nadsapa ajama nanaridsa najari: —¡Ticcadeni imasiri tineboridsamanaji! ¡Diotohuira tidsanapomanaji! Diocca cacahuehepi iadsa bacco najonabote nani –nanaja najari Huano.

<sup>3</sup> Aji Huanocca imapi maittaccadsama Dio Atti cacomerabote Isahia dsodo inapojaro. Pohua atti ajama napojari:

—Nidsa dsama huamoni ssono caji, siba caji tanihuaaji madijaripa atti mohui tadsa madija huahua huahua ihinajonabaqqui nahitohui.

Pohua attipa: “¡Ia Medsede ccajonabote nahi! ¡Tinajoramanaji!

¡Pohua tedsejema jahui tijinedeni tobicapoji!

Najaroa aji tibodideni pohuatohui tinajoramanaji”

nanaja nahitohui dsama huamonihuaaji madijaripa

–napohui nade Dio Atti Isahiajine dsodo nanidsa.

<sup>4</sup> Nadsama Huanopa dsama huamonihuaaji madidsapa pocca eteropi camello cone ba nani ssequi nadsa huedsajari. Pocca ssoquepi bani etero. Pohua taparipa sese, dsamacca jidsi oquine najari.

<sup>5</sup> Madija huapima Huano atti mittamanahijine jahijonana canajaridenipa odsa panani Jerosarecca, Jodeacca dsamadsa madiridsamanajarideni, hueni Jordaohuaji madiridsamanajarideni naco bacco bacco quinajari. <sup>6</sup> Poccadeni imasiri Diodsa ecomeramanadsapi Huanopa hueni Jordaodsa topa topa ihidsanabaqqui najari.

<sup>7</sup> Naraha dsotode madija huapi taha jahijonahi Huano qqui tajari. Pohuadenipa Isaraeri potemahi jodiodeni mota marinaja onini pariseodsa jehe quinajarideni, mota marinaja onini sadoseodsa jehe quinajarideni totopa tohui quinadsa Huanohuaji jahijonajari. Naraha Huanopa pohuadenidsa huati tajari: —¡Tiadenipi pina maccassa tiquinani. Ticcadeni imapi tabaccora tajaro! Tiadenipi tibodideni cacajiqquimera-jerara: “Huano ia topa todsanabaqquidsapa Diocca najidsohuedsa dsori icanirenitohui” ¿tiquinajaroqui? Naraha tibodideni cacajiqquimera-jeradsapi dsori ticanirejeranitohui. <sup>8</sup> Naraha tettideni ajima tiquinadsana bica tani: “Imasiri onebona. Diotohuira obodi huahuatoma nanijine” tiquinadsapi tibodideni cacajiqquimeranicca

ima ahuato tanijine ima bicanira tinanamanaji, onajaro –najari Huano. <sup>9</sup> —

Naraha tibodidenidsa ajima tiquinanitide: “Icca idipa Abarahaoja najari, Diopa ia tohuattajobaqqui-jarahitohui” titiquina naraha tiadeni ticamaidsanimanajaro. Diopa madijassa najarahi. Pohua jipa tadsapa aji siba huihwitteri naridsajarodsa naco Diopa Abarahao potemahissa naha inahatoridsahijine pajirajari. Paji tiadenipi: “Abarahao potemahi iquejenani” tiquinaraha Diodsa iboraqquiri tiquinejeradsapi tiadeni tohuattajo-baqquihitohui. <sup>10</sup> Nadsapi Diodsa iboraqquiri tiquinejeradsa, ima bicani tinanamana-jeradsa naqui ticcadeni ima pina ahua tabaccora tajaricca imassa najaro. Paji, najari ahua ca cajine dsamipa najorahi. Ahua bono bica tajaradsapa ca



tacaridsa tahi. Ca tacaridsadsapa bobottahuaji hua hua totodsima najari, diji tahijine -nahi nade Huano.

<sup>11</sup> —Ohuapi passodsa tiadeni topa odsanabaqquijaro, imasiri tinebomanadsa Diotohuira tiquinanicca ima ahuato tanijine. Naraha madija dacorajari ccajonabote nahi. Ohuapi tahide mari mari onaporaha aja dsotodecca mamaride ccajonajarina deni tojajari. Najarina Dio Corime tibodidenidsa madihijine tiadenidsa inanarid-sahitohui. Puhuapa pohuadsa toquejena-jarajaridenipa jororoni jiquejeranihuaji hua idsimabaqquihijine pajirajari. Ohuapi ajimani ojani. Pina pocca medsesa onanijinepi opajira-gerani. Pohua amoricca sadaria dsojode naqui opajira-gerani -nahi nade Huano.

<sup>12</sup> —Jehe, ccajonabote najaripa madija icattejidsa-baqquihijine. Pina madija aroso jidsadsa trigo huire tahijine qquero quissa, qquero quissa, qquero quissa inamacos-sajari. Nahi trigo etero, eppe, ede najaripa jojodedsa toccahijine. Nadsapa noccona ecahuajari pocca odsahuaji. Naraha trigo etero, eppe, ede najaripa diji tahijine bobottahuaji hua idsimahitohui. Najaria aja Diodsa iboraqquiri najarajaridenipa jororoni jiquejeranihuaji hua idsimabaqquihitohui. Najaro jororonipi ohuihuira tani -nahi nade Huano.

*Jeso totopa cajjaricca ima  
Maraco 1.9-11; Roca 3.21-22*

<sup>13</sup> Nadsapa Jeso dsama arobeni onini Carireadsa madiraha hueni Jordaohuaji qquedsippajari. Huano madihihuaji bacco dsippadsapa Huanodsa: —Ohua topa tidsanaji -najari Jeso. <sup>14</sup> Naraha Huano attipa: —Ohuapi ajimani ojani. Tiana ohua topa tidsanani bica tani -najari.

<sup>15</sup> Naraha Jesopa: —Epeje, nema nehe ohua topa tidsanaji. Ajjaropi Dio pocca dosseniji nema inanijine -najari Jeso. Nadsapa Huano jehe najari. <sup>16</sup> Nadsapa Jeso topa idsanajari. Jeso passodsa totehemadsa tocattamacossa nanaja meme tohuaba najaro. Dio Corime ahuato taha pina midsorissa naha ccaronajari. Ccaronadsa Jesodsa be tajari. <sup>17</sup> Nadsapa memehuaji atti mittaronajari: —Ajajaripa occa Ejedeni. Pohuadsa ohuati huana tajaro. Pocca ima bica tajarojine ohuatidsejaro -najari Dio.

## 4

*Jeso imasiri inananiijine Satana nattome inaraha jehe najarajari  
Maraco 1.12-13; Roca 4.1-13*

<sup>1</sup> Huano Jeso topa idsanaha jicadsapa Dio Corime Jeso iaqquemorajari, dsama huamoni ssono caji, siba caji tanihuaji iaccajari. Nahihuaji pohua iaccajaripa imasiri totonanade Satanapa Jeso nattome inahijine. Satanapa Jeso imasiri inananiijine dissera tajari. <sup>2</sup> Nadsama Jesopa huamonihuaji madidsapa jiperahi huada 40 naha madidsanapojari. Pohua jipa-jarahicca ssiaja 40, dsome 40 nadsapa pemihissa tajari. <sup>3</sup> Nadsapa Satana Jeso icamaidsahijine pohuadsa bacco tajari. Satana attipa: —Dio Bedi tijadsapi, jari, tijipanijine ajijaro siba pan tojahijine huati tinaji -najari. <sup>4</sup> Naraha manaco Jeso Satanadsa huati tajari: —Dio Atti dsodo nanidsapi ajima najaro: “Dsamatapadsara imadini ojari-gerani. Abi Dio huati tahi imittajarocca ibodidsa tojadsapi pina ijipajarossa najaro. Najarojinena idacorani nadsapi imadijaro” nani Dio Atti dsodo nanipi -najari Jeso.

<sup>5</sup> Nahi dsotode imasiri totonanade Satanapa Jeso odsapa panani bicabote Jerosare-huaji iaccajari. Nanicca Diodsa dada toqquima tetepihuaji inanajari. <sup>6</sup> Nahidsa Satana Jesodsa huati tapomajari: —Jari, Dio Bedi tijadsapi joppa tinaronaneje, namihuaji tissona-geranitohui -najari. —Aji Dio Atti dsodo nanidsapi ajima najaro:

“Diopa pocca dodosse tabaqqi memehuaiccadsa huati tahitohui, tia ecahuananijine. Pohuadeni bijidsa tia dama ijidsamanadsapi temori naqui sibadsa cabiquera-jeranitohui” nani Dio Atti dsodo nanipi –najari Satana Jesodsa. <sup>7</sup> Naraha manaco Jeso huati tapomajari: —Jehe, Dio Atti dsodo nani nema naraha Pohua Atti dsodo nani onihipi ajima najaro: “Tia Medsede Dio nattome tajarajo. Tettidsa: ‘Dio ohuacatamana’ tejeraji” nani Dio Attipi –najari Jeso.

<sup>8</sup> Nahi dsotode Satanapa ssono imeni huaji tanihuaji Jeso iaqqemorajari. Nahi huaji bacco toquinadsa Satanajine dsama huapima Jesodsa ahuato inanaridsajaro. Dsama huapima bica tanicca, odsa panani huapima bica tanicca Jeso dsopi icanaridsajari Satanapa. <sup>9</sup> Nadsapa Satana Jesodsa huati tapomajari: —¡Qqui taneje! Ajijaro dsama huapimapi tiadsa da onanijine. Jehe, obacchohuaji tipitodsa tittadsa ohuadsa tetidsedsa: “Occa tamine” taji. Ohuadsa nema tadsapi ajijaro huapimapi ticca tojanijine, onajaro –najari Satana atti. <sup>10</sup> Naraha manaco Jeso Satanadsa huati tajari: —¡Satana, ajicca ticcaniji! Epejena. Ohuapi tiadsa ohuatidsena onejerani. Dio Atti dsodo nanidsapi ajima najaro: “Ia Medsede Dio Pohuadsara tetidsemanani ojari dsanapoji. Pohua Attidsara iboraqquri tiquinaji” nani Dio Attipi –najari Jeso.

<sup>11</sup> Nadsapa Satana toccanijari. Nanaja Diocca dodosse tabaqqipa najoramanapoja nadsa Jeso acco icamamanahijine jahironajari.

*Jesopa Carireahuaji maride idimajari*  
*Maraco 1.14-15; Roca 4.14-15*

<sup>12</sup> Dsotode Jesopa —Huano Baotista toponi cocorodsa coro idsimamanahi –quinahi ima mittadsapa dsama arobeni onini Carireahuaji toccanijari. <sup>13</sup> Naraha Jesopa odsa panani Nasaretidsa tomasinipoma-jarajari. Odsa panani Capernaohuajina madihijine toccajari, nahi Carireacca coridsa inidihuaji. Jesopa nahihuaji madihijine toccadsapa Isaraeri bedi Dsaborona potemahidenicca dsamabotedsa ccaridsa, Isaraeri bedi Netari potemahidenicca dsamabotedsa naco ccaridsa najari. <sup>14</sup> Jeso nahihuaji madihijinecca imapi maittaccadsama Dio Atti cacomerabote Isahia dsodo inapojaro. Pohua attipa:

<sup>15</sup> —Dsaborona potemahidenicca dsamabotehuaji, Netari potemahidenicca dsamabotehuaji naqui ima bicani cajini.

Ia Idinide nahihuaji madimanajaridenidsa bacco tajari, pina ssiajanissa najari. Nahihuajipa jodio quejena-jarajarideni caji tahi.

Coridsa huapicca dsama, hueni Jordao maji toccahihuajicca dsama onini Carireadsapa Diodsa ssamoqquri naha madimanajari.

<sup>16</sup> Dsidsinidsa madimanadsapa dsoqqehe noppineni cappinamanaraha ssiajani dsati pohuadenidsa tossiajaridsadsapi

Diojine madija tocassiejerahijine tahimarini ahuato inananitohui –napohui nade Dio Atti Isahiajine dsodo nanidsa.

<sup>17</sup> Nahihuaji Jeso bacco tadsana Dio Atti maride tahide idimajari. Madija mari mari ihicanabaqqi nadsa pohua attipa: —Ticcadeni ima Diodsa tecomeramanadsa ticcadeni imasiri tinebomanaji. Diotohuira tidsanapomanaji. Diocca cacahuehepi iadsa bacco najonabote nani –nanaridsa najari Jeso.

*Jesopa aba cocorodedeni 4 quinaha huahua inabaqqijari*  
*Maraco 1.16-20; Roca 5.1-11*

<sup>18</sup> Jeso Carireacca coridsa inidi toccabacossadsa madija pamaha qqui inabaqqijari: Ssino pohua oni ohuaha Pedro, pohua ohuaha Adiri tedseje. Pohuadenipa aba cocorodedeni. Aba corode toquejenaraha Jeso bacco najonajari. <sup>19</sup> Pohuadenidsa huati tajari: —Jina, ohuadsa ticadaridsaji, ohuatimade tiqujenadsapi tiadeni

onahattabaqquinijine. Tahidepi abadsa tidsepedeni ijimanaporaha jidapapi madija ohuadsa toquejenahijinena tidsepedeni ijimananitohui, onajaro -nahi nade Jeso. <sup>20</sup> Najaro ima mittamananaja poccadeni tajapa icanebomanadsa Jesodsa tohuedajari.

<sup>21</sup> Nadsapa denima jai tojabacossanaja Jesopa madija ohuaha pohua imecote tedseje qqui inabaqquijari. Najaridenipa Sebedeo bedideni Satiaco, Huano quinajari. Poccadeni abi quinadsa canoadsa jassi dsajari. Tajapa ssequinimade toquejenaraha Satiaco, Huano tedseje Jeso huahua inabaqquijari. <sup>22</sup> Najarideni naco amadsati poccadeni canoa icanebomana, poccadeni abi inebomana nadsa Jesodsa tohuedajari.

### *Jesopa madija huapi taha mari icanabaqquijari*

<sup>23</sup> Jesopa Carireahuaji ccaridsa ccaridsa naridsajari. Nani Isaraeri potemahi jodiodenicca Dio Atti mamari onihi onihi naridsanihuaji mari mari nanaridsa najari. Pohuapa Diocca cacahuehecca ima bicani ehecomeraridsa najaro. Comaqquri najarideni naco comani onihi, onihi cajiridsamanaraha huapima ihinanomi-ridsabaqqui najari. <sup>24</sup> Pocca imapi dsama Siria nemanehuhuaji madiridsamanajarideni naco mitaridsamanadsapa poccadeni dsama huaji taraha comaqquri najarideni eheccajona-baqquimana najari. Dsamacoma cajimanajarideni, isso sirideni, biji sirideni, comani onihi onihi cajimanajarideni eheccajona-baqquimana nadsa huapima Jeso ihinanomi-ridsabaqqui najari. Madija bodidenidsa Satanacca dodosse tabaqqui tocorimedeni madidsamanajarideni, aja huatiajojo comani cajimanajarideni, aja madija idedeni tone biqueradsa issodeni ssomi toquejenajarideni naco eheccajona-baqquimana nadsa Jeso ihinanomibaqqui najari. <sup>25</sup> Nani Carireahuajicca madiridsamanajarideni mota, dsama arobeni onini Decaporihuaajicca madiridsamanajarideni mota, odsa panani Jerosarecca madimanajarideni mota, dsama arobeni onini Jodeahuajicca madiridsamanajarideni mota, hueni Jordao maji ccajonahihuaji madiridsamanajarideni mota naco huapima Jesotohui disseraqquri nadsa jahijonana canajari.

## 5

### *Ssonohuaji Jeso mari icanabaqquijaricca ima*

<sup>1</sup> Jesopa madija huapima pohuadsa queriqquihi qqui tadsapa ssonohuaji toqqemorajari. Nahidsana maride huittarijari. Jesocca mamari tabaqqupa pohuahuaji huajijira canajari. <sup>2</sup> Nadsapa mari icanabaqquijari.

### *Diopa madijadsa ima bicani inanajarocca ima*

#### *Roca 6.20-23*

<sup>3</sup> —Tiadeni motta tibodideni tobicanijine tipajiramana-jerani nahatoqquri tiquinadsapi Diopa tiadenidsa ima bicani inanajaro. Diocca cacahuehe tiadenidsa tojanitohui.

<sup>4</sup> —Tibodideni huanacossadsa oji tiquinaraha Diopa tiadenidsa ima bicani inanajaro. Dio tibodideni acco camahitohui.

<sup>5</sup> —Tiadenidsa ima tabaccora tanicca bacco taraha tedimana-jeradsa tibodideni: “Nidsa Dio ohua acco camahitohui” tiquinadsapi Diopa tiadenidsa ima bicani inanajaro. Nidsa Djoline dsama dsati tojadsa najaropi ticcadeni cacahuehe tojanitohui.

<sup>6</sup> —Tibodidenipi pina: “Occa ima Diodsa pajiranissa taccaraho, Pohua Attissa onananijine dissera onana” tiquinadsapi Diopa tiadenidsa ima bicani inanajaro. Tibodidenidsa jipa tinajarocca Dio tiadenidsa inananitohui.

<sup>7</sup> —Tiadenipi madijadsa tetideni huanacqquri nadsa pohuadenidsa ima tojadsapi pohuadeni acco ticamabaqquimanadsapa Diopa tiadenidsa ima bicani inanajaro. Diopa tiadenidsa naco huati huana tahitohui, tiadeni acco tocamabaqquihitohui.

<sup>8</sup> —Tibodidenidsa Diotohuira tiquinadsapi ticcadeni ima quejema-jeradsapi Diopa tiadenidsa ima bicani inanajaro. Jidapapa Dio tiadenidsa tojidserajari. Nidsa memehuaajipa Dio Pohua qqui tiquinahitohui.

<sup>9</sup> —Madija ohuaha tijinedeni cajoneradsapa Diopa tiadenidsa ima bicani inanajaro. Diopa tiadenidsa: “Occa ejedenideni” najari.

<sup>10</sup> —Diodsa disseraqquri tiquinadsa Pohua Attissa tinanamanadsapi jehe quina-jarajarideni tiadeni tonajidso-baqquimanaraha Diopa tiadenidsa ima bicani inanajaro. Diocca cacahuehe tiadenidsa tojanitohui.

<sup>11</sup> —Occa madija tiquejenajarojinepi madija tiadeni totamasso-baqquimanadsa, tiadeni tonajidso-baqquimanadsa, ticcadeni ima totabaccoranijine maidsa maidsa quinadsa naco Diopa tiadenidsa ima bicani inanajaro. <sup>12</sup> Tetidsemanaji. “Epejeni bica tani” tiquinaji. Memehuaaji bacco tiquinadsapi Diocca daniji bicabote ticajimananitohui. Maittaccadsama naco Diodsa jiperaqquri najaridenipa aja Dio Atti cacomeraqquri najarideni inajidso-baqquimanaja najonapohui najari –nahi nade Jeso.

*Saho tahimarini, jojororo tahimari*

*Maraco 9.50; Roca 14.34-35*

<sup>13</sup> —Tiadeni aji ohuadsa jehe tiquinajaropi pina sahocca imassa tiquinajaro. Sahopi bani bica tahijine. Aji tiadenipi pina sahossa tiquinajaro, ajijaro dsamacca madija tinanabicabaqqui-manahijine. Saho ajiboni amossi nadsapi ajiboni cajipomanijine ssamo tani. Nadsapi tiadeni naqui ajijaro dsamacca madijadsa ima bicani tinanamanaridsanijine nebomana tiquinejeraji Ticcadeni jeheniji ponima toja-jerana. Saho ponima tojadsapi madija coro quinadsa madijajine ttai ttai toja tani.

<sup>14</sup> —Tiadeni aji ohuadsa jehe tiquinajaropi pina ajijaro dsamacca ssiajanissa tiquinajaro. Ossiejene ticajimanadsapi dsama huapimacca madijadsa otahimari tijinedeni ahuatoridsajaro. Tissiejenedeni ahuato tadsapi pina odsa panani ssono tetepihuaaji ahuato tajarossa najaro. Ssonocca odsa pananipi najimanijine ssamo tani. <sup>15</sup> Jojororo naco toquehessidsapa icanajimahijine jarahi. Sspotodsa boco icanahijine jarahi. Nadsa jojororo toquehessidsapa aja pohua cacahittari nahidsana cacahittari najari, nahi madija odsa bodihuaaji madimanajarideni huapima ssiajani cajimanahijine. <sup>16</sup> Tissiejenedenipi pina najaro ssiajanissa tiquinajaro, madija huapimadsa tossiajabaqquinijine. Ima bicani titinanamana najaro, madija huapima qqui toquinahijine. Nema tinanamanadsapi Abi Dio memehuaaji madijaridsa pohuadsa huatidsemanadsa: “Diopa bica tahi” quinahijine –nahi nade Jeso.

*Jesocca marinajapi: —Dio Atti dsodo nanicca marinaja huapima onapajiranissa tanitohui –najari*

<sup>17</sup> Jesopa denima mari icanabaqquidsapa pohua atti ajama najari: —Tiadenipi: “Jesopa Moisesicca marinaja jicanijine ccajonajari” tiquinejeraji. Tettideni onihi naqui: “Jesopa maittaccadsama Dio Atti cacomeraqquri najaridenijine dsodo nani naqui inajicanijine” tiquinejeraji. Ohuapi najaro marinaja huapima pajiranissa tanijine occajonajaro. <sup>18</sup> Ohuapi pajissara tiadenidsa huati onajaro. Aji meme, nami jiquejeraccadsa Moisesicca marinajapi nebo-jeranitohui. Meme, nami jicadsapi Dio Atti dsodo nanicca marinaja huapima pajiranissa tanitohui. Tohuatti ojarie dsori teje cama-jeranitohui. <sup>19</sup> Nadsama madijadenipa Dio Atti ojariedsa iboqquri nadsapa imasiri cajimanajari. Madija ibo tajari pohua tesse tohuibohuijine mari icanajari attipa: “Diocca dosseniji motapi najo tani, tineboji” nanaja nadsapa najaripa Diocca cacahuehedsa ajamani tojahitohui. Naraha madija ohuaha Diocca dosseniji huapimadsa ibora tajaripa pohua tessedsa: “Diocca dosseniji huapimadsa ibora tinaji” nanaja nadsapa najarina Diocca cacahuehedsa deni tojahitohui. <sup>20</sup> Tiadenidsa

huati onajaro: Diocca cacahuehedsa tiquejenanijinepi Dio Pohua jipa tajaricca tinana-manadsana pocca cacahuehedsa tiquejenanijine tipajiramanani. Aja jodiodenicca marinaja maridedeni, marinaja onini pariseodsa jehe quinajarideni tedsejepa Diocca dosseniji cacahuade disseraqqiri najari. Tiadeni naqui pina najarideni disseraqqiri najarissa tiquinana. Naraha tiadenipi denima tinapajiramananissa tana. Nema tiquinadsapi Diocca cacahuehedsa tiquejenanitohui, onajaro –nahi nade Jeso.

*Jesocca marinajapi: —Huadiepi pina ijinedeni ahuamanahicca imassa najaro –najari*

*Roca 12.57-59*

<sup>21</sup> —Ticcadeni ididenicca marinaja timittamanajonajaropi ajima najaro: “Madijapa tinanadsoqqe-jarajo. Madija tinanadsoqqedsapa ima cacattemade atti tiadsa: ‘Manaco tidsoqqeji’ nahitohui” quiquinanade. <sup>22</sup> Naraha tiadenidsa huati onana: Timecotedsa titessedsa naqui tedidsapi ima ticajinitohui. Ima cacattemahuaji: “Ticca imapi tabaccora tani” quinahitohui. Ticca huadie tinebo-jeradsa timecotedsa denima tatamasso tadsapi ima cacattemadedeni deni toquejenajaridenipa tiadsa ima inassonarimananitohui. Ticca huadie deni tojadsapi timecotedsa tabaccorehema tatamasso taraha ticca imana denima tabaccora tajaro. Nidsa ticca imapi Dio mittahitohui. Ticca ima nema nadsapi jororoni jiquejeranihuaji tijanitohui.

<sup>23</sup> —Nadsama ticca daniji: “Diodsa da onana” tiquinadsa naqui Diodsa da tahijinecca huahuanarihuaji ticca daniji tiaccaraha aji timecotedsa ima tinanapojaro tibodi huato-dsanapoccani. <sup>24</sup> Nadsapi ticca daniji dsojo tidsimaraha Diodsa da tahijinecca huahuanaridsa hua tari-jaraccadsama nahidsa tinebocajo. Nadsapi timecotedsa ticcapi, ticca ima ticattemamananijine. Ticca ima ticattemamanadsa ticajonerapomadsana Diodsa da tahijinecca huahuanarihuaji ticcanipomaji. Nadsana ticca daniji Diodsa da tinahijine hua tarihi bica tahi.

<sup>25</sup> —Nadsama madija ohuahadsa ima tinanadsa naqui pohua attipa: “Tia ohuaccana ima cacattemahuaji” nadsa naco tahide tia tohuacca-jaraccadsama pohua tedseje ticcadeni ima ticattemamanapoji. Pohua huati tinassonapojo, nahi taminehuaji tia tohuacca-jarahijine. Ticcadeni ima ticattemamanapo-jeradsapi ima cacattemahuaji bacco tinadsapi ima tinanajaro manaconi todsepe tijanitohui. Toponi cocorohuaji tia coro idsimamananitohui. <sup>26</sup> Pajissara tiadsa huati onajaro. Nani toponi cocorohuaji timadidsapi amadsati tiqquena-jeranitohui. Ima tinanajaro manaconi nemaneha tinajicanissa tadsana tiqquenanitohui –nahi nade Jeso.

*Jesocca marinajapi: —Tibodidenidsa huananehe tohui tiquinejeraji –najari*

<sup>27</sup> —Ticcadeni ididenicca marinaja timittamanajonajaropi ajima najaro: “Amoneje ticajidsapi amoneje onihipi tija-jeraji. Maqquideje ticajidsapi maqquideje ohuaha tinaja tajarajo” quiquinanade. <sup>28</sup> Naraha tiadenidsa huati onana: Madijapa amoneje onihni qqui tadsa tohuini inacomadsapi pohua bodidsa imasiri inanajaro. Pina amoneje ijajarossa najaro –nahi nade Jeso.

<sup>29</sup> —Nadsama imasiri tinana-jeranijinepi tibodidsa daco tijiradsa poni taji. Poni tejeradsapi ima oppina tani tiadsa ssonarinitohui. Nadsama pina tinocco nahaton-iccadsa tohuini tanicca qqui tinadsapi najarodsa imasiri tinananijine tohuini taraha daco tijiradsa poni taji, imasiri tinana-jeranijine. Nema tadsapi pina tinocco nahatonicca huari, joca, jeo, coro tinajarossa najaro, imasiri tinana-jeranijine. Tinocco ojarie amossi naraha jepeje! tessirema tissiajanitohui. Jororoni jiquejeranihuaji tija-jeranitohui. <sup>30</sup> Nadsama pina tidsepe nahatoniccadsa imasiri tinanabote naraha daco tijiradsa poni taji, imasiri tinana-jeranijine. Nema tadsapi pina tidsepe nahatonicca ca ticajidsajarossa najaro. Tidsepe cajarie amossi canaraha jepeje! tessirema tissiajanitohui. Jororoni jiquejeranihuaji tija-jeranitohui –nahi nade Jeso.



*Jesocca marinajapi: —Ticca amoneje nebomana tejeraji –najari*  
*Mateo 19.9; Maraco 10.11-12; Roca 16.18*

<sup>31</sup> —Ticcadeni ididenicca marinaja timittamanajonajaropi ajima najaro: “Maqquideje: Occa amoneje onebona nadsapa tahide nebohuecca papeo dsodo inadsa ponidsa da inadsa inebodsapi pohuadsa ima nohuerani” quiquinanade. <sup>32</sup> Naraha ohuattipi ajima onajaro: Ticca amoneje tinebodsapi imasiri tinanajaro. Ticca amoneje tinebodsapa maqquideje ohuaha icajidsapa tijine poni naqui imasiri inanajaro. Ponicca maqqui icajidsati naco imasiri inanajaro. Diocca dosseniji naqui ecahuamana-jerajaro. Nadsama ohuattipi: ¡Paji! Ticcadeni amoneje nebomana tejeraji, onajaro. Naraha ticca amoneje maqquideje ohuaha inajadsana “Onebona” tadsa tinebodsapi tiadsa ima nohuerani. Ticca amoneje maqquideje ohuaha inajadsapa poni ponijine imasiri inanajaro. Nadsana tineboni oppinera tani –nahi nade Jeso.

*Jesocca marinajapi: —Pajissa tiquinadsapi pajissehera pajissa tiquinaji –najari*

<sup>33</sup> —Ticcadeni ididenicca marinaja timittamanajonajaropi ajima najaro: “Diodsa: ‘Pajissa ajima onanana’ tadsapi timaidsa-jeradsa aji huati tinajarossa tinanaji” quiquinanade. <sup>34</sup> Naraha ohuattipi ajima onajaro: “Pajissa ajima onanana” tadsapi ticca pajissehepi tohuatti onihi tadsajani huati tina tejeraji. Madijapa maidsamanadsa: “Pajissa huati onajaro” quinadsapa tohuatti onihi tadsajani inatassaqquidsa pina pajissehessa najaro huati toquinaraha maidsamanajari. Pohuadeni attissa inanamana-jeradsa: “Oppinera tani, Dio onidsa huati onapo-jerade” quinaraha Diopa attideni mittajari. Ajana madija attidenipa: “Occa imapi pajissa, memehujicca nahato tahi” quinahipa bica tejerani. Memehujipi Diocca huihuittari. Diopa mittahi. <sup>35</sup> Madija ohuaha attidenipa: “Occa imapi pajissa, ajijaro namipi nahato tani” quinadsa naco bica tejerani. Namipi Dio amori cabarihijinecca huihuittari bedenissa najaro. Diopa mittahi. Madija ohuaha attideni onihi naqui: “Occa imapi pajissa, Jerosarepi nahato tani” quinadsa naco bica tejerani. Jerosarepi Diocca Cattaniji, tamine deni tojahicca odsa panani. <sup>36</sup> Madija ohuaha attideni naco: “Occa imapi pajissa, occa nahatohuema huati onajaro” quinaraha pohuadeni attidsa tatideni amadsati tosohuehue nanijinepi ssamo tani. Pohuadeni tatideni amadsati tonopo-po nanijine naqui ssamo tani. <sup>37</sup> Nadsama tiadenipi pajissa tiquinadsa pajissara: “Jehe, pajissa” tiquinaji. Naraha poni tiquinadsa naqui “Jehe, poni” tiquinaji. ¡Epeje! Nema najarora huati tiquinanijine bica tani. Naraha tettidenipi tohuatti onihi tadsajani tinatassaqquimanadsapi bica tejerani. Najaropi pina mamaisadedeni attidenissa najaro –nahi nade Jeso.

*Jesocca marinajapi: —“Manaco, manaco” tiquinejerana –najari*  
*Roca 6.29-30*

<sup>38</sup> —Ticcadeni ididenicca marinaja timittamanajonajaropi ajima najaro: “Madija ohuahajine tinocco sia tadsapi manaco pohua nocco sia tinanadsapa bica tani. Tino naqui. Madija ohuahajine tino jai tocanadsapi manaco pohua ino jai ticananadsa bica tani” quiquinanade. Manaco manacopi nama najonamanajari. <sup>39</sup> Naraha ohuattipi tiadenidsa ajima onajaro: madijapa tiadenidsa tabaccorehe inanadsapi “Manaco” tiquinejeraji. Madija tipano idanidsa naco “Ohuaccone manaco odana” tiquinejerana, onajaro. <sup>40</sup> Madija attipa: “Ohuadsa ima tinanani” nadsa ima cattedemahuaji tia tohuaccadsa tamine attipa: “Ima tinanajaro manaconi pohuadsa titetepicca da tinaji” nadsapa pohuadsa da tinaji. Titetepicca onihi ssirinijine huatini ccara taraha najaro naqui nema nehe pohuadsa da tinaji, onajaro. <sup>41</sup> Nadsama madija naco benehi huaji tani toccahijine tiadsa huati tadsapa: “Jari, ohua acco ticamaji. Ajicca odsa onihidsa ohua tineboji” nadsapa pohua attissa tinanaji. Pohua tinebohuihuaji tineboraha denima pohua accode ticcanijine bica tani, onajaro. <sup>42</sup> Nadsama madija tiadsa: “Jari,

ohuadsa manaconi jirehe da taji” nadsapa pohuadsa da tinaji. Madija ohuaha atti naco: “Pohuama ohuadsa da taccajo. Nidsa tiadsa da onanihijine” nadsapi teccoccorajaro. Pohuadsa da tinaccajo, onajaro –nahi nade Jeso.

*Jesocca marinajapi: —Tiadeni huadidedeniraha pohuadenidsa tetideni huanaquqiri nana –najari*

*Roca 6.27-28, 32-36*

<sup>43</sup> —Moisesicca marinaja timittamanajonajaropi ajima najaro: “Titededenidsa tetideni huanaquqiri nana” quiquinanade. Ticcadeni ididenicca marinaja timittamanajonajaro naqui: “Tiadeni huadidedenipa manaco ticahadibaquqijo” quiquinanajari. <sup>44</sup> Naraha ohuattipi ajima onajaro: Tiadeni huadidedenidsa naqui pina tetideni huanaquqiri naji. Tiadeni najidsodedenipa Dio pohuadeni bodi acco icamabaquqihijine Diodsa huati huati tiquinana, onajaro. <sup>45</sup> Nadsana tiadenipi Abi Diocca ejedeni tiquejenani ahuato tanijine. Dio memehuaji madijaripa bica tajari. Madija huapimadsa huati huana tajari. Bicaquqiri najaridenidsa huati huana tajari, tabaccoraquqiri najaridenidsa naco huati huana tajari. Dio pocca nahatohue majipa Pohuadsa jehe quinajarideni, Pohua Attidsa iboquqiri najarideni huapimadsa tossiajabaquqijari. Pocca nahatohue passo naqui Dio Pohujine huapimadsa caji taridsajaro. <sup>46</sup> Tiadenidsa ohuatti ajima najaro: Madija tiadenidsa huatideni huanaquqiri najaridenidsara tetideni huanaquqiri nani ojari nadsapi pina madija huapimacca imassa tinanamanajaro. Najarossa tinanamanadsapi nidsa memehuaji Dio tiadenidsa: “Jehe bicaquqiri tiquinani” najarahitohui. Ajana, imasiri cajimanajarideni pina romanodenicca taminecca dosseniji dsinero nanaccadedenipa aja pohuadenidsa huatideni huanaquqiri najaridenidsara huatideni huanaquqiri nahi ojari najari. Paji, pohuadenissa tiquinejerana. Tiadenipi tohuati huanehe denima bica tanicca ticajimanadsana bica tani. <sup>47</sup> Nadsama tiadenipi ticcadeni madijadsa tetidsemanadsa: “¿Nija, bica tinaqui?” tiquinaraha madija ohuahadsa: “¿Nija, bica tinaqui?” tiquinejeradsa pina madija ohuahadenicca madiessa tiquinajaro. Ajana, Diodsa jehe quina-jarajarideni poccadeni madijadsa: “¿Nija, bica tinaqui?” nanaridsamana naraha noccodeni jidsa tajaridsapa: “¿Nija, bica tinaqui?” quina-jarahi. Paji, tiadenipi pohuadenissa tiquinejerana. <sup>48</sup> Ticcadeni Abi Dio memehuaji madijaripa pocca tohuati huanehe pajiranissa tajaro. Tiadeni naqui tinapajiramananissa taji, pina ticcadeni Abi Diocca tohuati huanehessa tinanamanana, onajaro –nahi nade Jeso.

## 6

*Jesocca marinajapi: —Dio Pohuadsa ima bicani tinanamananijinepi ajima tiquinani bica tani –najari*

<sup>1</sup> —Pajissara Dio Pohuadsa tidsepedeni ijimanadsa ima bicani tinanamanadsapi madija qqui toquinahijinera tidsepedeni ijimana tejeraji. Madija tiadeni qqui toquinadsa attidenipa: “A, tijinedeni bica tani. Bicaquqiri tiquinani” quinahitohuira timadimana tejeraji. Paji, attideni nama quinahitohuira timadimanadsapi Abi Dio memehuaji madijaripa najaro ima nahato tapoja najari. Nidsa dsotode pohua baccohuaji tidomodeni huadsapi: “Tijinedeni bica tani. Bicaquqiri tiquinani” najarahitohui. Pocca daniji bicabote naqui tiadenidsa da inejeranitohui, onajaro –nahi nade Jeso.

<sup>2</sup> —Nadsama cappiramanajaridenidsa manaconi jirehe da tinabaquqinijinepi pohuadenidsa teti huana tadsa manaconi jirehe da tinabaquqini bica tani. Naraha madija tijine bica tani qqui toquinadsa: “A, bica tahi. Pohuapa cappiramanajaridenidsa manaconi jirehe da da najari” quinahijine tohuini tadsapi bica tejerani, onajaro. Attideni nama quinahi tohuini tadsapi pina maidsajidede rabotedenissa

tajaro. Pohuadeni naco cappiramanajaridenidsa da da quinaraha huatideni huanacquiri najarajari. Pohuadenipa madija mittamanahijine jodiodenicca Dio Atti mamarihuaji huati huati toquinajari, amossinihuaji naco huati huati toquinajari. Pohuadeni poccadeni imaraha: “Ijine bica tani, bicaquiri inani” quiquinanajari. Madija ohuahadeni attidenipa: “¡Pajissa! Bicaquiri tiquinani” quinahitohuira madimanajari. Naraha ohuapi pajissara tiadenidsa huati onajaro: Najaridenipa tahide tohuini quinahicca cajimanapodsapa nidsa dsotode Dio Pohua baccohuaji domo huadsa najaridenidsa Diopa: “Jehe, epejeni. Bicaquiri tiquinani” najarahitohui. Pocca daniji bicabote naqui da inejeranitohui, onajaro. <sup>3</sup> Naraha tiapi cappiramanajaridenidsa da tinanijinepi ticca ima tecomeraridsa tejeraji. Titesse bica tajaridsa naco ticca ima huati tina-jeraji, onajaro. <sup>4</sup> Ajina, cappiramanajaridenidsa da tinanijinepi madija ohuahadeni qqui toquina-jaradsana da tinani bica tani, onajaro. Nema tadsapi madija ohuahadeni ticca daniji nahatoquiri najararaha Abi Diona nahato tahi. Nidsa dsotode Dio Pohua baccohuaji tedsa tia catidsedsapa: “Jehe, epejeni. Bica tinani” nahitohui. Pocca daniji bicabote naqui tiadsa da inanitohui, onajaro –nahi nade Jeso.

*Jesocca marinajapi: —Diodsa huati tiquinanijinepi ajima tiquinani bica tani –najari Roca 11.2-4*

<sup>5</sup> —Abi Diodsa huati tiquinanijine naqui pina maidsajidede rabotedenissa tiquinejeraji, onajaro. Najaridenipa Diodsa huatide toquejenadsapa pina madija Diodsa diseraquiri najarissa quinaraha maidsamanajari. Nadsa najarideni nama quiquinanajaridenipa jodiodenicca Dio Atti mamarihuaji domo huedsadsa, amossinihuaji domo huadsa naco madija ohuahadeni mittamanahijine Diodsa huatide totoquejena najari. Madija ohuahadeni attidenipa: “A, Diodsa huatide diseraquiri nahi” quinahitohuira mamadimana najari. Noccodeni jo najonahi quinahitohuira madimanajari. Nadsama ohuapi pajissara tiadenidsa huati onajaro: Najaridenipa tahide tohuini quinahicca cajimanapodsapa nidsa dsotode Dio Pohua baccohuaji domo huadsa najaridenidsa Diopa: “Jehe, epejeni. Bicaquiri tiquinani” najarahitohui. Pocca daniji bicabote naqui da inejeranitohui, onajaro. <sup>6</sup> Naraha tiapi Abi Diodsa huati tinanijinepi “Ohua icattaquimana-jerana” tadsa ticca odsa bodihuaji tiqqedsima, noccobiji ticahacossa nadsa tia motta Diodsa huati tinaji. Nema tadsapi madija ohuahadeni ticca huatinaja mittamana-jararaha Abi Diona mittahi. Nidsa dsotode Dio Pohua baccohuaji tedsa tia catidsedsapa: “Jehe, epejeni. Bica tinani” nahitohui. Pocca daniji bicabote naqui tiadsa da inanitohui, onajaro –nahi nade Jeso.

<sup>7</sup> —Diodsa huatide tijadsa naqui ticca huatinaja huati tinadsapi huati tinajaro, huati timanipomajaro, huati timanipomajaro tejeraji, onajaro. Ajana, Diodsa toquejena-jarajaridenipa nama nama quiquinanajari. Tohuini quinahicca tohui pohuadeni cacahuade huatide toquejenadsapa huati toquinajari, huati nimanimanapomajari, huati nimanimanapomajari quiquinanajari. “Nema inadsa etti mittahijine” quiquinanaraha pohuama huati huati toquinajari. <sup>8</sup> Naraha tiadenipi pina pohuadenissa tiquinejerana. Diodsa ponima huati huati tiquinejerana, onajaro. Ajina, ticappiramananicca huapima Dio Pohuadsa huati tiquinejeraccadsama Pohua bodipa nahato tapohui, onajaro –nahi nade Jeso.

*Diodsa huati huati inanijinecca ima Maraco 11.25-26; Roca 11.1-4*

<sup>9</sup> —Nadsama Diodsa huatide tiquejenanijinepi tettidenipi ajima tiquinaji: “Jehe Abi Dio, memehuaji timadijaro, Tiadsa iquejenaropi ticca madija iquejenajaro. Tiapi nahatojide tijirani ojari tani. ¡Bica tinani! Madija huapima: ‘¡Dio, Tiapi deni tijani!’ quinana, inajaro.



<sup>10</sup> Ticca cacahuehe huapimadsa tinanaridsana, inajaro. Pina memehuaji Tiadsa madimanajarideni huapima Tettidsa iboraqquri dsadsanapomana najarissa quinahijine aji namihuaji imadijaro ia huapima naqui Tettidsa iboraqquri inana, inajaro.

<sup>11</sup> Itapari naco huada huajijiradsa iadsa da da tajo.

<sup>12</sup> Madija iadsa tabaccorehe inanamanadsa poccadeni tabaccorehedsa: ‘Epejena, huadi onejerani’ inadsapi manaco icca tabaccorehe epeje tinanaji, Abi Dio. Icca tabaccorehe manaconi najidsohue iadsa tinana-jeraji, inajaro.

<sup>13</sup> Imasiritohui ibodi huatodsas naqui najaro tohuini inejeranijine ia acco ticamabaqquiji, imasiri inana-jeranijine, inajaro. Tabaccorehe jinede Satana pohuahuaaji ia joca todsimanibaqqui-jarahijine ia tecahuabaqquinissa taji, inajaro. [ Tiana ia huapima tecahuabaqqui-dsanapojaro. ¡Daco tijirani! ¡Bica tinani! ihidsanapo najaro. ] Epejeni.”

<sup>14</sup> Nadsama Jesopa pohuadenidsa denima huati tajari: —Jehe, ajina madija tiadsa ima inatabaccoradsa naqui tiapi: “Najaro imadsa ohuati ajimana. Pohuadsa ohuadijerana” taji. Nema tadsana ticca Abi memehuaji madijari ticca imasiridsa huati ajamahitohui. <sup>15</sup> Naraha madija ohuahacca imadsa epeje tejeradsapi ticca Abi Dio naco ticca imasiri epeje inana-jeranitohui, onajaro –nahi nade Jeso.

*Jesocca marinajapi: —Jipehe tinebocossamananijinepi ajima tiquinani bica tani –najari*

<sup>16</sup> —Diodsa huatide tiquejenanijine jipehe tinebocossamanadsapi tipanodeni odsaqquri nejerana, pina tipanodeni bica tadsa timadimanana, onajaro. Naraha tipanodeni odsaqquri nadsapi pina maidsajidede rabotedenissa tiquinarana. Najaridenipa madija ohuahadeni qqui toquinadsa: “A, jipehe nebocossamanahi, Diodsa diseraqquri nahi” quinahijine tohuira quinadsapa pohuadenijine pohuadeni cacahua-manahissa tajaradsapa ocasseraqquri nanaja najari. Nadsama pajissara tiadenidsa huati onajaro: Najaridenipa madija attideni tohuira quinadsapa pohuadeni tohuini quinahicca tahide cajimanapojari. Nadsapa dsotode Dio Pohua bacchohuaji domo huadsa Diopa pohuadenidsa: “Jehe, epejeni. Bicaqquri tiquinani” najarahitohui. Pocca daniji bicabote pohuadenidsa da inejeranitohui, onajaro. <sup>17</sup> Naraha jipehe tinebocossanijinepi tahide tipano ssahua, titati ssiri tadsana jipehe tinebocossani bica tani. <sup>18</sup> Nadsama jipehe tinebocossani madija ohuahadeni ssamoqquri naraha Abi Diodsapi ahuate tani. Pohuana nahato tajari. Nidsa dsotode Pohua bacchohuaji tedsa Diopa tiadsa: “Epejena, ticca ima bica tani” nahitohui. Pocca daniji bicabote naqui tiadsa da inanitohui, onajaro –nahi nade Jeso.

*—Memehuaji Dio madihidsa ima bicanira tinahapimanana –najari Jeso*

*Roca 12.33-34*

<sup>19</sup> —Jehe, aji namidsa timadimanaccadsapi tidsepedenitaji tinahapimananijine tohuinira timadimana tejeraji. Ajina, todsepetaji tinahapimanadsapi poni maccanijine ssari nani caji tani. Motapi ponira majatoni caji tani. Motapi ponira botedsa jadsa tani. Motapi botie toja tani. Nema nadsapi tidsepedenitajipi jica-ca-ca... nemanehe amossi nani caji tani, onajaro. <sup>20</sup> Nadsama aji namidsa timadimanani paji naccadsama Dio Pohua tohuini nahicca tohuira timadimanaji, onajaro. Memehuaji aja Dio madihidsana ima bicani tiadenidsa tohuapiponijinepi ajijaro namidsa tidsepedeni ihijimana naji. Nema tiquinadsapi Diocca daniji bicabote tiadenidsa da inanitohui. Najaro Diocca danijipi poni maccanijine ssari nanijine nohuerani. Majatonijine nohuerani. Bobotide botihijine nohuerahi. Paji jicarinijine naqui nohueranitohui, onajaro. <sup>21</sup> Ajina, tiadenipi ajijaro namicca todsepetaji tohui, dsiniro tohuira timadimaneje nadsapi najarodsara tetidseridsamanajaro. Naraha Dio Pohua tohuini

nahicca tohuira timadimanadsapi Diocca danijidsana tetidsemananitohui, onajaro -nahi nade Jeso.

*Dio ssiejene ibodidsa qquedsimahijine bica tani*

*Roca 11.34-36*

<sup>22</sup> —Inoccopi essiredsa pina jojororossa najaro. Inocco bica tadsapi essire ssiajani ijini. Idsepedsa naqui damade nahato inajaro. Emoridsa naqui ccaridsade nahato inajaro. Icca tarabaidsa naqui ipajirajaro. Ibodi huatode naqui nahato inajaro. <sup>23</sup> Naraha inocco bica tejeradsapi pina inocco dsidsi tajarossa najaro, essire nemanehe issamo tani. Dama inanijine naqui ssamo tani, iccaridsanijine naqui ssamo tani, icca tarabaidsa naqui ssamo tani. Imapi najarossa najaro tibodidenidsa Dio ssiejene toqquedsimadsapi tibodideni ssiajani cajini. Naraha Dio ssiejene toqquedsima-jeeradsapi tibodidenidsa pina dsidsini ijiridsajarossa najaro. Aji tiadenipi: “Nahatoqquiri inani. Ibodi ssiaja tani” tiquinaraha najaro ssiajanipi occa imassa nejeradsapi ssiajani ticajimana-jeerajaro. Dsidsini oppina tanicadsa timadimanajaropaji, onajaro -nahi nade Jeso.

*Diotohui, dsinirotohui imadinijine ssamo tani*

*Roca 16.13*

<sup>24</sup> —Jehe, madija pohua dossede pamahadsa dsepe ijihijinepa pajira-jarahi. Dossede pamaha cajidsapa ojariadsana huati huana tajari. Pohua attidsana ibora tahitohui. Ohuahadsa ajimani huati huana tadsapa pina pohuadsa jipera tajarissa nahitohui. Pohua attidsa ibo tahitohui.

—Madija Diodsa dsepe ijidsapa dsinirotohuira dsepe ijihijine ssamo tahi. Dsinirotohuira huatidsedsapa Diodsa huatidsehijine ssamo tahi. Ima pamehepi Diotohui, dsinirotohui najaripa madihijine ssamo tahi, onajaro -nahi nade Jeso.

*Dio pocca ejedeni ecahuabaquijari*

*Roca 12.22-31*

<sup>25</sup> —Nadsama tiadenidsa ohuattipi: Timadimananijinecca ticappiramanani noppineni ticappinamana tejeraji, onajaro. Pina ¿nejecora ojipapadseje? ¿Nejeco dsamatapa ppejenera dse onapadsaja? ¿Nejecora ohuedsapadseje? tiquinejeraji. Najarotohuipi tibodideni huahuatomacca nejerana, onajaro. Icca madijepi dsamatapaha ojari-jarahi. Icca madiena denima bica tajaro. Essire naqui etero edsanijinea ojari-jeerani. Essirecca imana denima bica tajaro -nahi nade Jeso. <sup>26</sup> —Ajana, meme abarideni memedsa jahiridsajaripa qqui qqui tiquinani. Najaridenicca imadsa tibodideni huatoma-manaji. Pohuadenipa huidsajacca ppa nahi pperaqquri, huidsajacca ppa nahi bono poreraqquri nadsapa nidsa dsotode jipamanahijine ppa nahi bono naco odsadsa ecahuamana-jarajari. Naraha ticcadeni Abi Dio memehuaaji madjaripa pohuadenidsa jipamanahijine da da ihinanajari. Diopa meme abaridenidsa huati huana taraha tiadenidsana denima huati huana tajari. Tiadenidsa naco tijipamananijinecca da da ihinanahitohui. <sup>27</sup> Naraha tiadenipi ¿nejecotohui tibodideni: ¿Denima omadi-dsanapopadseje? tiquinajaro? Najarotohui tibodideni huahuatomacca nadsapi ¿ticcadeni madie denima tinanamananijine nahatoqquiri tiquinaqui? ¡Nahatoqquiri tiquinejerani! Ponima tibodideni huahuatomacca nejerana, onajaro -nahi nade Jeso.

<sup>28</sup> —Nadsama ima onihi naqui: ¿Nejecotohui etero ticajicamanani noppineni ticappinamanajaro? Najarotohui tibodideni huahuatomacca nejeraji. Jari, qqui tiquinanaja mohue ppata taridsajari. Mohuepa tarabaidsera, huepe picocora, etero ssequiquira taraha ppata taridsadsapa pina etero bicani huedsamanajarissa najari.

<sup>29</sup> Ajana, maittaccadsama naco Isaraeri potemahidenicca tamine Saromopa dsepe ssejide radsapa etero bicani huatini ccara tanicca huedsadsapa bica tataja naraha mohuena denima bicaqquri najari, onajaro. <sup>30</sup> ¡Jaho, ticcadeni jehenijipi badsira

tani! ¿Nejecotohui tiadenipi “Dio ia tohuacahua-baqquih” tiquinejerani? Ajina, dseropi etero huedsanijine cappiraraha Diojine poni mohueni cajidsapi pina etero bicani huedsajarossa nani. Dseropi mohueni cajini bica taraha huada huada nadsa dseqqueri nadsapi botta ina tani. Naraha dseropi ajimanicca. Tiadenipi pina aji dserossa tiquinejerani. Diocca cacatidse tabaqqui tiquejenajaro. Nadsama Diopa tedsamananijinecca etero naqui denima tiadenidsa da inanitohui, onajaro –nahi nade Jeso.

<sup>31</sup> —Naraha tiadenipi timadimananijinecca ticappiramanani noppineni ticappinamana tejeraji. Pina ¿nejecora ojipapadseje? ¿Nejeco dsamatapa ppejenera dse onapadsaja? ¿Nejecora ohuedsapadseje? tiquinejerana, onajaro. <sup>32</sup> Diodsa toquejenajarajardenipa nama nama nanaridsamana najari. Poccadeni jijipa tohuira, pohuadeni dsepetaji tohuira bodideni huahuatoma-mana najari. Naraha ticcadeni Abi Dio memehuaji madijari ticajimanani. Pohuapa ticappiramananicca huapima nanahato najari. <sup>33</sup> Diocca cacahuehecca imadsa tibodideni huatomaridsanijine Diotohuira tataridsamana naji. Dio Pohua jipa tahiccadsara tetetidsemana naji, onajaro. Nema tiquinadsana Diojine ticappiramananicca tiadenidsa inanaridsanitohui, onajaro –nahi nade Jeso.

<sup>34</sup> —Jehe, titedsejemadenicca huada tahimarini tohui tibodideni huahuatoma-mana nejerana. Pina: “¿Dsemassa nejeco imara tojapadseje?” titiquina nejerana, onajaro. Jidapanacca ssiaja tahimarinira tibodideni huahuatoma-mana nana, onajaro –nahi nade Jeso.

## 7

### *Madija ohuahacca ima nattome tiquinejeraji*

#### *Roca 6.37-38, 41-42*

<sup>1</sup> —Nadsama tiadenidsa ohuattipi: Madija ticattejidsamana tajarajo. Pina madija ohuahacca ima tiadenidsa bica tejeradsapi: “A, namajide rahi, pocca ima bica tejerani” tiquinejeraji, onajaro. Madijadenidsa tettideni nema tiquinejeradsapi manaco Diopa tiadenidsa: “Ticcadeni ima naqui bica tejerani” najarahitohui.

<sup>2</sup> Madija ohuahacca ima tibodidenidsa huatoma-manajaropi pina pocca ima nattome tiquinajarossa najaro. Naraha madija ohuahacca ima nattome tiquinadsapi manaco ticcadeni ima naqui nattome quinanitohui. Madija ohuahadsa tinanamanajarocca imapi manaco tiadenidsa najarossa inanamananitohui, onajaro. <sup>3</sup> Naraha tiadenipi timecotecca madie pina Diocca dossenijissa nejerani qqui tiquinadsa tettidenipi: “A, tijine bica tejerani” titiquina naraha tiadeni naqui imasiri ticajimanani. Nadsama najaro ticcadeni imapi pina timecote noccodsa ahua majiconi huedsani qqui tinajarocca imassa najaro. Timecotedsa: “A, tinoccodsa ahua majiconi huedsaha, tire oninena” taraha tinoccodsa naqui ahua majiconi imeni huedsani. Qqui tinanissa tejerani, tinocco ahuatora tani. <sup>4</sup> Nadsama tiadenipi imasiri ticajimanadsapi ¿nejecotohui timecotedsara: “A, tijine bica tejerani. Tia acco ocamana, ticca ima tobicanijine” titiquina naraha tiadenipi tahide ticcadeni imaha tijinedeni tobicapojerajaro? <sup>5</sup> ¡Jaho, nema tiquinadsapi pina mamaidsadedenissa tiquinajaro! Ticcadeni ima bica tejeradsapi tahide ticcadeni imaha tinabicamanapoji. Nadsana timecote acco ticamamanahijine tipajiramananitohui, onajaro –nahi nade Jeso.

<sup>6</sup> —Tiadenidsa ohuatti onihi naqui: Madija Dio Atti mittade jiperaqquri najaridenipa pina ettesa, pina porocossa quinajari. Ettedsa bica tanicca da tiquinaraha tiadeni cca naja camahitohui. Poroco naco pohuadsa perla bica tanicca da tiquinaraha ssamo tadsa ttai ttai inanaritohui –nahi nade Jeso.

### *Diodsa huatide dissera inanijinecca ima*

#### *Roca 11.9-13; 6.31*

<sup>7</sup> —Jehe, Abi Diodsa huati huati titiquina naji, onajaro. Dio Pohnadsa huati tiquinadsapi tiadenidsa ticcadeni huatinajassa nehe da inanitohui. Pina tohuini tanicca qquide dissera tinadsapi bacco tinanitohui. Najarossa najaroa Diodsa huatide dissera tinadsapi Pohnadsa ticca huatinaja tiadsa inapajiranissa tanitohui. Pina madijacca odsadsa tiqquedsimanijine tohuini tadsa odsa jinededsa huahua tadsapi tiadsa noccobiji icatabojidsanitohui. Najarossa najaroa Diodsa huati huati tiquinadsapi ticcadeni huatinaja mittahi. <sup>8</sup> ¡Pajissa! Madija Diodsa huati tadsapa Diopa pohnadsa pocca huatinaja da inanitohui. Madija naco Diodsa huatide dissera tadsapa Dio Pohnajine pocca huatinaja inapajiranissa tanitohui. Madijapa pina Diocca noccobijidsa huahua najarissa nadsa Diopa pohnadsa noccobiji icatabojidsanitohui, onajaro.

<sup>9</sup> —Ajana, madijapa pocca ejedeni pan tohui huati tadsapa ¿pohna bedidsa siba da ina taqui? Nohuerani. Tiadenidsapa madija nama najari nohuerahi. <sup>10</sup> Madija ohuaha naco pocca ejedeni aba tohui huati tadsapa ¿pohna bedidsa macca da ina taco? Nohuerahi. <sup>11</sup> Tiadenipi tabaccorehe ticajimanaraha ticcadeni ejedenidsa bica tahicca dade nahatoqqiri tiquinani. Nadsapa ticcadeni Abi Dio memehuaji madijari Pohnadsa huati tiquinadsapi tiadenidsa bica tahicca dade denima jipa tahi, onajaro —nahi nade Jeso.

<sup>12</sup> —Jehe, nadsama tiadenidsa madija huapima ima bicanira inanamananijine tohuini tiquinadsapi madija huapimadsa naqui ima bicanira titinanamana naji, onajaro. Nema tiquinadsana Dio Atti tecahuamananissa tajaro. Aji Moisesicca marinajassa tinamanajararo, Dio Atti cacomerarquiri najaridenicca dsodoniji naqui najarossa tinamanajararo, onajaro —nahi nade Jeso.

### *Jahui pamanicca ima*

#### *Roca 13.24*

<sup>13</sup> —Diocca cacahuehedsa tiquejenanijinepi ohuadsa jehe tiquinanissa taji. Pina noccobiji tojera tanihuaji jai tijedsimajarossa tiquinaji. Madijapa ohuadsa jehe quina-jarajaridenipa pina noccobiji toja tanihuaji jai tojedsimajarissa quinajari. Pina jahui imeni toccade najora tanihuaji jai tojajarissa quinajari. Naraha najaro jahuipi najidsohue jiquejeranihuaji toccajaro. Nahihuajina madija huemaha toquejenajari. <sup>14</sup> Naraha madija ohuadsa jehe quinahissa tajaridenipa noccobiji tojera tanihuaji jai tojedsimajari. Pina jahui bedenihuaji jai tojajarissa quinajari. Najaro jahuihuaji jai tojadsa Diocca cacahuehedsa bacco toquinadsapa camittehe jiquejeranicca caji-manahitohui. Nahihuajipa madija pamadema dsanapojari —nahi nade Jeso.

### *Ahua bono tahimari*

#### *Roca 6.43-44*

<sup>15</sup> —Jehe, tiadenidsa ohuattipi: Paji, madija mamaidsadedeni tiadeni tocamaid-sabaqquihijine bacco toquinahitohui. “Dio tahimari ecomeraridsajaro” quinaraha maidsamanajari. Pohnadenipa pina edede joneqqiri najarissa quinaraha bodidenipa pina dsomaji oppinabotessa quinajari. <sup>16</sup> Poccadeni madie tinocodenidsa qqui tiquinadsa ima bicani inanamana-jeradsapi nahatoqqiri tiquinanijine: mamaidsadedeni quejenajari. Ajina ¿cotihidsa uva bono pore pore quinaco? Nohuerahi. ¿Jessi ininedsa naco iquiera bono pore pore quinaco? Nohuerahi. <sup>17</sup> Ahua ede bica tadsapa bono naco bica taha cahua tahi. Naraha ahua ede bica tajaradsapa bono naco tabaccora taha cahua tahi. <sup>18</sup> Ahua ede bicahidsapa bono tabaccora taha cahua-jarajari. Ahua ede tabaccora tadsapa bono bica taha cahua-jarajari. <sup>19</sup> Ahua huapimapa bono bicahi cappiraridsa-manadsapa ca ippiridsamanadsa botta quinajari. <sup>20</sup> Aji madijacca ima naqui pina ahua bonocca imassa najaro. Madijapa: “Dio tahimari ecomeraridsajaro” quinaraha ima bicani inanamana-jeradsapi mamaidsadedeni quejenajari nahatoqqiri tiquinani —nahi nade Jeso.

*Madija motapa Diocca cacahuehehuaji jai tojamacossa-jarahitohui*

*Roca 13.25-27*

<sup>21</sup> —Madijapa ohuadsa attideni: “Ohua Medsede” quiquinanahi huapi taraha motapa Diocca cacahuehehuaji jai tojedsima-jarahitohui. Occa Abi Dio memehuaji madijari Pohua tohuini nahiccara inanamanajarodenina Diocca cacahuehehuaji jai tojedsimahitohui, onajaro. <sup>22</sup> Nadsapa nidsa madija huapimacca ima Dio icattemanijinecca huada bacco tadsapi ohuattidsa iboqquiri najarideni ohuadsa ajama quinahitohui: “Ohua Medsede, ticca ima huapimapi ohohuacomeraridsa nadija. Tia oni hua onadsa naqui madija bodidenicca tocorimedeni dosse dosse ohoninebaqqui nadija. Tia oni hua onadsa naqui qqui toquinapo-jarajaricca ocanahatori canani huapi tadija” quinahitohui. Naraha najaridenipa Diocca cacahuehehuaji jai tojedsima-jarahitohui, onajaro. <sup>23</sup> Jehe, nidsa dsotode najarideni motadsa ohuattipi: Tiadenidsa onocco jidsa tani. Occa madija tiquejena-jerani. Dio Attidsa iboqquiri tiquinadsapi Pohua tohuini nahicca tinanamana-jerajaro. ¡Aji ohuadsapi huajiji tinaji! onanitohui —nahi nade Jeso.

*Odsa capamajarocca ima*

*Maraco 1.22; Roca 6.47-49*

<sup>24</sup> —Madija ohuatti mittamanadsa ohuattissa inanamanajaropi pina aja madija pocca odsa nahatode nahato tajarissa quinajari. Madijapa pocca odsa icanahatodsapi nami ccara tanihuaji bacco tadsana huehuema ppa idsajaro. Nadsapi odsa daco cajirajaro. <sup>25</sup> Nadsapi passo cca, hueni cappanima, passo toqquomoja, jojode jadsirema jo jo nadsapi odsadsa ssonari ssonari naraha toquehedima-jerajaro. Odsa toquehedima-jerajaropi huehuema nami ccara tanihuaji bacco teje najaro. <sup>26</sup> Naraha madija ohuatti mittamanaraha ohuattissa inanamana-jerajaropi pina aja madija pocca odsa nahatode ssamo tajarissa quinajari. Najari madijapa pocca odsa icanahatodsapi nami ccara tanihuaji bacco tejeradsapi huehuema ssiqui daco nanidsara ppa idsajaro. <sup>27</sup> Nadsapi passo cca, hueni cappanima, passo toqquomoja, jojode jadsirema jo jo neje nadsapi odsa toquehedimajaro. Odsa toquehedimadsapi catirorijarossa najaro —nahi nade Jeso.

<sup>28</sup> Nadsama Jeso iadsa huati huati taha jicadsapa nahidsa madija huapima taharibobo canajari bodidenipa: —A, pocca marinaja bica taha —quinade. <sup>29</sup> Jeso pocca marinaja mari icanabaqquidsapa pohuana nahatojide rajari, atti caji tajararia. Aja jodidenicca marinaja maridedeni attissa najarajari.

## 8

*Huapi jadsimarohi Jeso inanomijari*

*Maraco 1.40-45; Roca 5.12-16*

<sup>1</sup> Jeso ssonohuaji madija mari icanabaqquia jicadsa qquedsippanidsapa madija huapi taha Jeso natti jahidsippanijari. <sup>2</sup> Huapima jahidsippaninaja madija dsamacomoma onini leprajine huapi jadsimarohi Jesohuaji bacco najonajari. Pohua bodipa: —Jesopa deni tojahi, ohuapi ajimani ojani —nadsa Jeso bacchohuaji pohua pitodsa huitta nadsa huati tajari: —Ohua Medsede, ohuapi bica onejeraraha tia jipa tinadsapi ohua tinanabicanijine nahato tinani —nahi nade Jesodsa.

<sup>3</sup> Nadsapa Jeso pohua dsepedsa bara inadsa: —Jehe, jipa onani. Tibicaji, onajaro —nahi nade Jeso. Nanaja amadsati pohua huapicca tomossissi nadsapa tobicajari. <sup>4</sup> Nadsapa pohuadsa Jeso attipa: —Aji tibicanicca ima madijadenidsa huati taridsa tejerana —najari. —Naraha Diodsa dada toqquimahuajina ticcaji, onajaro. Nanidsa tiqquedsimadsapi dada toqquimade ojariadsara tepi tobicani tia nohue tinaji. Nadsapi ticca dsamacoma Diodsa oppina tanicca tomossidsapi ticca daniji Diodsa tojanijine ohuaha ohuaha naha pina edede, ppiriri, oqui najari da da tidsimana.



Pina Moisesicca marinajadsa iboraqquri inajarossa tinanaji, onajaro. Nadsapi huapimadsa ticca ima toppinerani ahuato tadsapi: “Pajissa tibicajaro” quinahijine, onajaro –nahi nade Jeso.

*Romanodenicca soldado dossedecca medse Jeso inanomijari*  
*Roca 7.1-10*

<sup>5</sup> Nahi dsotode Jesopa odsa panani Capernaohuaji bacco tanidsapa romanodenicca soldado dossede Jesodsa ccajonajari. Aja ccajonajaripa pocca dodosse tabaqqui 100 quinajari. Pohua bodipa: —Jeso ohua acco camahijine –nadsa Jesodsa huati tajari. <sup>6</sup> —Ohua Medsede, occa medsepa occa odsahuaji coma taha porijari. Comene dacoradsa ssomi tojamarodsa poripaja –najari.

<sup>7</sup> Nadsapa Jeso: —Jehe, onanomihijine nani occana –najari. <sup>8</sup> Naraha soldado dossede attipa: —Jehe ohua Medsede, tiapi nahatojide tijirani naraha ohuapi ajimani, ssamo onani. Occa odsahuaji ticcanijine jipera tinanitide, onajaro. Naraha ajidsa huati tinadsapi nani occa odsahuajiccaraha, occa medse tettidsa tinanomihijine tipajirani nahato onani –najari nade. <sup>9</sup> —Aji ohua naquì occa taminecca dossenijidsa omadijaro. Manaco soldadodenipa occa dossenijidsa madimanajari. Pohnadenitohui huahua onadsapi jahijona tahi. Dosse dosse onadsa naco ohuattidsa jai toja tahi. Occa medsedsa naquì: “Tidsepe ijiji” onadsa naquì pina aji odossejarossa inana tani. Nema nadsapi ajidsa huati tinadsa occa medse tonomihijine tipajirani, onajaro –nahi nade soldadodeni dossede atti.

<sup>10</sup> Najaro ima Jeso mittadsapa huatidsedsa pohua bodi: —A, pohnapa nahato taha –najari. Nadsapa pohua nattiuhaji jahimissajaridenidsa huati tajari: —Ohuapi pajissara tiadenidsa huati onana: ¡Ajajari bodi namanahapa pajissa nahissa tajari! Tiadeni Isaraeri potemahideni huapimapi tettideni ohomitta naraha ajararissa najari tiadenidsapa nohuerahi. Pajissa tiquinanissa tani ohomitta nejerani –nahi nade Jeso. <sup>11</sup> —Naraha ohuattipi tiadenidsa: Jehe, dsama nemanehedsa madiridsamanajarideni motapa Isaraerideni quejena-jararaha ohuadsa pajissa quinajaridenipa nidsa Diocca ejete jipaqquie imeni tojadsapi nahidsapa huapima jipaqquimanahijine jahijonahitohui. Ticcadeni idideni Abarahao, Isahaca, Jacobo najarideni tedseje pohnadeni naco nani memehuaji Dio pocca cacahuehehuaji pohnadeni naco jipaqquimanahitohui, onajaro. <sup>12</sup> Diopa pocca cacahuehe memehuajicca Abarahao potemahi Isaraeridenidsa tojanijine inanajoraporaha ohuadsa pajissa quina-jaradsapa Dio amossinihuaji hua ininebaqquihitohui. Dsidinidsa toquejenadsa ocasserani ahuamana-dsanapodsapa panodeni todsahi nadsa oji oji quinahitohui, onajaro –nahi nade Jeso.

<sup>13</sup> Nadsama romanodenicca soldado dossedsa Jesopa: —Jehe, epejena! Tiapi tibodi pajissa tanissa tadsapi ticca odsahuaji ticcanina. Nani bacco tinanidsapi tibodi tohuini tanicca tiadsa onanani qqui tinanitohui –nahi nade Jeso. Nanaja huati huati toquinaraha soldado dossede pocca odsahuaji pocca medse amadsati tonomijari quinade.

*Jesopa Pedro massodini inanomijaro*  
*Maraco 1.29-31; Roca 4.38-39*

<sup>14</sup> Jeso Pedrocca odsahuaji toqquedsimadsapa Pedro massodini pori canani Jeso qqui tajari. Coma tajaro, huapini ppocorajaro. <sup>15</sup> Nadsapa Jeso poni dsapanidsa bara nadsapa huapini tonahuihui najaro. Nadsapi totehemadsa Jeso pocca mamari tabaqquima inajipabaqqujari.

*Jesopa comaqquri najarideni inanomiridsa-baqqujari*  
*Maraco 1.32-34; Roca 4.40-41*

<sup>16</sup> Jehe, dsomeme nadsapi madija bodidenidsa Satanacca dodosse tocorime caji-manajarideni Jesohuaji eccajonabaqqujari. Najaridenipa huapi taraha Jeso pohua

attidsara tocorime dosse ininebaqquidsapa jahininejari nade. Comaqquri najarideni naco huapima inanomiridsajari nade. <sup>17</sup> Aji Jesojine nema najaropi pina tahide Dio Atti cacomerabote Isahia itedsejemacca ima ecomerapojarossa inanajaro. Najaroa aji: —Pohuana icca comani onihi onihi naridsajaro idiridsajaro. Icca dsamacoma naqui idiridsadsa pohuadsa tojadsapi inajicanitohui -napohui nade Isahia.

*Madija Jeso huatimade toquejenahijineraha*

*Roca 9.57-62*

<sup>18</sup> Nadsapa Jeso madija pohuadsa queriqquijonahi tohuapihi nahi qqui tadsapa pohua huatimadedenidsa: —Jina, coridsa jippehuaji jaijana -nahi nade.

<sup>19</sup> Nadsapa jai tojabote naraha jodidenicca marinaja maride Jesohuaji ccajonadsapa: —Nija ohua Maride -najari. —Aji ticcaridsadsama ohua naqui tiadsa occana, onajaro -nahi nade. <sup>20</sup> Naraha Jesopa pohuadsa huati tajari: —Ohuadsa ticcaridsanijine tipajira-jeranitide. Ajana dsohuadsosohuapa odinedeni cajiridsamanahi. Ppiriri naco tadsarideni cajiridsamanahi. Aji ohua Madija Bedipi odsa ocappirani. Ohuadanijinecca huahuada ocappirani -nade.

<sup>21</sup> Nadsapa Jesocca mamari ojariapa Jesodsa huati tajari: —Ohua Medsede, occa abi huatiahi ppa odsahijine tahide occa odsahuaji occanipoccana. Nidsa dsotodena tiadsa occaridsanijine ¿jehe taqui? -nahi nade. <sup>22</sup> Naraha Jeso pohuadsa huati tajari: —¡Poni! Jidapana ohuadsa ticcaji -najari. —Aja madijapa Diocca camittehe cappiramanajarideni caji tahi. Pohuadenina madija dsoqquedsa ppa idsamanahijine pajiramanahi -nahi nade Jeso pocca mamaridsa.

*Jesopa jojode inatappa ssodadani inatappa nanicca ima*

*Maraco 4.35-41; Roca 8.22-25*

<sup>23</sup> Nadsapa Jeso canoadsa toqquedsadsa pocca mamari tabaqqui naco pohuadsa jai tojedsadsa pohuadsa jai tojajari. <sup>24</sup> Nadsapa ori toquinaraha amadsati jojode dacorehema ccajona, passo dacorehema ccajona nadsapi coridsa ssoda ssoda najarojine canoadsa passo ssonidsa ssonidsa najaro. Naraha Jesopa huadaja dsanapojari.

<sup>25</sup> Nadsapa Jeso huadahihuaji jai tojeppidsa Jeso cobo cobo quinadsa: —¡Ia Medsede, nocco tijaji! ¡Ia acco ticamabaqquiji! ¡Je icanabote nani! -quinahi nade.

<sup>26</sup> Nadsapa Jeso pohuadenidsa huati tajari: —¿Nejecotohui ticappinamanajaro? Tiadenipi ohuadsa: “Jehe, Jesopa ia tohuacahua-baqquihijine pajirahi” ¿tiquinejeararorane? -nahi nade. Nadsapa totehemadsa jojodedsa, passodsa huati tajari: —¡Epeje taji! -nahi nade. Nadsapi jojode, passo ssoda ssoda najaro naqui joma najaro. Joma nadsapi passo podsippanissa tajaro. <sup>27</sup> Nadsapa pocca mamari tabaqqui huapima: —A ¿nejeco madija? Ajina, jojode passo ssodadani tadsajani pohua attidsa ibora taha -quinahi nade.

*Cadarahuajicca madija bodidenidsa Satanacca dodosse tabaqqui tocorimedeni madidsamanajari*

*Maraco 5.1-20; Roca 8.26-39*

<sup>28</sup> Nadsapa coridsa jippehuaji bacco tajari Jeso. Najaro dsama arobeni oninipi Cadara. Nahihuaji madija pamahapa tonoccobirihuaji mamadimana najari. Najarideni madija bodidenidsapa Satanacca dodosse tabaqqui tocorimedeni madidsamanajarijine huadidi tajari. Nadsapa nahi Cadarahuajicca madija huapimapa tocorime cajimanajarideni noppine cacappinamana nadsa tonoccobirihuajicca jahui jajahi toja najarajari. Naraha Jeso toqquemoradsapa pohuadeni pamaha tonoccobirihuaji huedajonajari, Jesodsa bacco quinajari. <sup>29</sup> Nadsapa Jeso qqui toquinadsapa jadsirema huati huati toquinajari: —Dio Bedi ¿nejecotohuira ticcajonajaro? ¿Ia najidsode ticcajonajaroqui? Dio ia tonajidso-baqquihijinecca huada bacco tejeraccaraha -quinahi nade.

<sup>30</sup> Naraha nahi huajira tanidsa poroco huapi taha jiparidsamanajari. <sup>31</sup> Nadsapa Jesodsa tocorime attidenia: —¡Jaho! Ia dosse tininebaqquidsapi poroco bodidenidsara ia dosse tidsimabaqquiji —quinahi nade Jesodsa.

<sup>32</sup> Nadsapa Jeso: —¡Jehe, porocodsa tiquejenana! —nahi nade. Nadsapa madija bodidenicca tocorime jahininedsapa porocodsana jai tojedsimaridsajari. Nanaja poroco huapimapa coridsa inidi sseberanihuaji domo toqquedsippadsa diri-ri-ri todsippadsapa cojo-jo-jo quinajari. Tocatojedsippajari. Je tocaniredsapa coridsadsa cacotedsanajari.

<sup>33</sup> Nadsapa poroco cacahuadedeni qqui toquinadsa odsa pananihuaji domo toccanijari. Bacco tanimanadsapa ima huapima huati naridsamanajari: —¡Tonoccobirihuaji madimanajarideni bodidenicca tocorimedeni Jesojine jahininepaja! —naridsamanahi nade. <sup>34</sup> Nadsapa nani odsa pananicca madija huapima Jeso qquide jahionajari. Bacco najonamanadsapa poccadeni dsamadsa Jeso toccanijine dossede dissassera tajari: —¡Ticcaniji, aji icca dsamadsapi timadi tejeraji! —quinahi nade.

## 9

### *Jesopa madija ssomi tojahi inabiquemanijari* *Maraco 2.1-12; Roca 5.17-26*

<sup>1</sup> Nadsapa canoadsa jai tojedsanidsapa coridsa jippehuaji pohuadeni ori najonamanapohuihuaji ori tanimanadsa huana tocananimana-pomajari. Jeso pohua mamadi nahi Capernaohuaji bacco tanimanajari nade. <sup>2</sup> Naraha nahihuajipa madija ide tone biqueradsa isso ssomi tojahi pohua taborodsa poridsa Jesodsa eccajonamanajari. Jeso pohuatohui disseraqquri nahi qqui tadsapa pohua bodidsa nahato tajari: —Pajissa, Jesopa madija inanomihijine nahato tahi —quinahi Jeso pohuadsa ahuato tadsapi coma tajaridsa huati tajari: —Otesse, ¡ticappina-jeraji! Aji imasiri tinanajaro huapimapi onanamossini. Jidapapi ticca ima Diodsa tobicani —najari nade.

<sup>3</sup> Jeso atti nama nadsapa jodiidenicca marinaja maridedeni mota mittamanadsapa pohuadenira ssejeje cosseri najari: —Apaja, Jesopa: “Imasiri onanamossina” naha. Pohua attipa: “Ohuapi pina Dio ojani” nanaja najarissa naha. ¡Jesocca imapi bica tejerani, pina Dio itamassojarissa nahi! —quinahi nade. <sup>4</sup> Naraha Jesopa pohuadeni bodidenicca ima nahato tadsapa pohuadenidsa huati tajari: —¿Nejecotohui ohuadsa ima tabaccora taniccara tibodideni huatomanajaro? —nahi nade. <sup>5</sup> —Naraha ¿nejecoma najaro imana tiadenidsa denima najora tani? Aja madija coma tajaricca imasiri onanamossini ¿najora taqui? Coma tajari onanabicahina ¿denima najora tajarorane? <sup>6</sup> Naraha ohua Madija Bedi ojararopi madijacca imasiri onanamossinijine Diocca dacorehe ocajini nahatoqquri tiquinanijinepi, aji namidsa naqui ohuatti ocajini nahatoqquri tiquinanijine coma tajaridsa huati onana —najari. Nadsapa madija ssomi tojahidsa pohua attipa: —¡Titehemaji! ¡Titaboro tididsa ticca odsahuaji ticcaniji! —nahi nade Jeso.

<sup>7</sup> Nadsapa totehemadsa pocca odsahuaji toccanijari nade. <sup>8</sup> Nadsama madija ssomi tojahi tonomihi madija huapima qqui toquinadsapa cappinamanaraha huatidsem-anadsa: —A ¡Diopa bica tahi, bica tahi! —quinajari. —Dio pocca dacorehe madija namihuaji madijaridsa inanani qqui inani —quinahi nade.

### *Ohua onipi Mateo. Otohui Jeso huahua najari* *Maraco 2.13-17; Roca 5.27-32*

<sup>9</sup> Nadsama Jeso jahui ccajonadsa ohua qqui tajari. Ohuapi Mateo. Ohuapi romanodenicca taminecca dosseniji dsiniro nanaccade ojararode. Nahi romanodenidsa dsiniro da tanijine ihinaccamana nanihuajicca odsa bedeni bodidsa ohuittidsaraha



Jeso ohuadsa huati tajari: —Jina, ohuadsa ticcaji -nade. Nadsapi otehemadsa pohuadsa occajarode.

<sup>10</sup> Nahi dsotode occa odsahuaji ijipanijine huahuanaridsa jassi inahuajanid-sapi nahidsa Jeso qquide jahidsimajari. Otessedeni romanodenicca taminecca dosseniji dsiniro nanaccadedeni huapima naco jahidsimajari. Jodiodenicca marinaja ecahuamana-jerajardeni naco iadsama jassi nahuajanijari. Jeso pohua huatimadedeni ia naqui pohuadeni tedseje jipade iquejenajaro. <sup>11</sup> Naraha jodiodeni mota marinaja pariseodsa jehe quinajaridenipa madija bicaqquri najarajardeni tedseje ijipani qqui toquinajari. Najaro imadsa jiperaqquri nadsapa iadsa huati toquinajaride: —A ¿nejecotohui tiadeni maridepa romanodenicca taminecca dosseniji dsiniro nanaccadedeni tedseje, imasiri cajimanajarideni tedseje jipajari? -quinade. (Aja madija nama najarideni tedsejepa jipade oppina tani quiquinanajari, pariseodeni, jodiodenicca marinaja maridedeni tedseje.)

<sup>12</sup> Naraha pohuadeni attideni mittadsa manaco Jeso huati tajari: —Nomiqquri najaridenipa toponi totonanomide tohuini quina-jararaha comaqquri najaridenina toponi totonanomide tohuini quiquinanajari -nade. —Ohuapi pina toponi totonanomidessa onajaro. Madijadenicca ima Diodsa tobicanijine pohuadeni accode occajonajarode. <sup>13</sup> Naraha madijapa: “Iapi bicaqquri inani” quiquinanajaridenicca ima onanabicanijine occajona-jerajaro. Imasiri totonanadedenicca ima onanabicanijinena occajonajaro. Jari, ajijaro ima ticahatteraji. Maittaccadsama Dio Atti cacomerabote Osea dsodo inajaro:

“Tohuati huanehe, acco camehe tohuini onani. Moisesicca marinajassa tinanamanad-sapi ohuadsa ticcadeni bani bedi ono tojahijine da da titiquina naraha madija ohuahadsa tetideni huaneraqquri nadsapi ticcadeni daniji jipera onani. Madija huapimadsa tetideni huaneraqquri nanijinena jipa onani. Pohuadeni acco ticamabaqquimanadsa naco jipa onani” napohui nade Dio -nade Jeso.

*Jesodsa jipehe nebocossanicca ima huati toquinajari*

*Maraco 2.18-22; Roca 5.33-39*

<sup>14</sup> Nadsapa Huano Baotistacca mamari tabaqqui Jesohuaji bacco najonamanadsapa pohuadsa huati toquinajari: —Nija. Iapi Diodsara huati huati idsanaponijine jipehe ihinebocossa nani. Jodiodeni marinaja pariseodsa jehe quinajarideni naco jipehe nenebocossamana naraha ¿nejecotohui ticca mamari tabaqqui tedsejedeni jipehe titinebocossamana nejerajaro? -quinade.

<sup>15</sup> Nadsapa Jeso pohuadenidsa huati tajari: —Dsabissopa amoneje cajibote najari pocca ejete tojadsapi ¿pohuadsa queriqquimanajarideni huatidsemanera taco? Huatidsemana tahi. Dsabisso cajibote najari tedseje huatidsemanadsapa jipehe nebocossamana-jarajari. Naraha nidsa huada onihiccadsa madija ohuahadeni dsabisso cajibote najari inanadsoqque-manahijine pohua iaccamanadsapa pohua tessedenipa jipehe nebocossamanahitohui -nade Jeso. (Aja pohua atti nama najaripa pohuapa pina dsabisso cajibote najari. Jeso pohuadenidsa madiccadsapa pohua huatimadedeni jipehe nenebocossamana najaraccajari, najari.)

<sup>16</sup> —Ima onihi naqui ajima najaro: Etero ssessequidenipi etero jadanidsapi etero dsati ihibedsacossamana nejerajaro. Etero dsatipi etero jadanidsa podsacossadsa dsotode ssabo nadsapi joca naqqui tani. Nadsa etero jadani sseo tapomadsapi denima totabaccora tani -nade Jeso. (Aja pohua atti nama najaripa pocca marinaja pina jodiodenicca marinajassa nejerani. Jeso pocca marinajapi dsati.)

<sup>17</sup> —Ima onihi naqui ajima najaro: Uva ppejene nahatodsatipa bani etero ssequi nahi jadahidsa sso sso ihidsamana najarajari. Uva ppejene nahatodsatipa bani etero jadahidsa sso todsadsa ssicatadsapa jocaquera tajarijine sseo tahi caji tahi. Sseo tadsapa uva ppejene sso taha jica tahi, dsamine naco totabaccoradsapa coro quina

tahi. Naraha uva ppejene dsatipa bani etero ssequi nahi dsatidsara sso sso totodsa nadsana uva ppejenepa ecahuahissa tajari. Aja dsamine naco totabaccora-jarajari -nade Jeso. (Aja pohua atti nama najaripa madija bodi dsati tojadsana Jesocca marinaja dsati ecahuanijine pajirahi, najari.)

*Jairo bedeni tonominicca ima, Amoneje amaissoranaja coma taraha tonominicca ima*

*Maraco 5.21-43; Roca 8.40-56*

<sup>18</sup> Jesopa pohuadeni atti ecomera-dsanapodsapi jodiodenicca Dio Atti mamari-huajicca tamine Jesodsa huati tahijine ccajonajari. Jesohuaji bacco najonadsapa pohua bodi: —Jesopa deni tojahi, ohuapi ajimani ojani -nadsa Jeso baccohuaji pohua pitodsa huitta tocattedsa najari. Nadsapa Jesodsa huati tajari: —Occa ejedeni huatiapaja. Occa odsahuaji ticcadsa tidsepedsa poni bara tadsa tijine camitemanidsa madipomanijine -najari. <sup>19</sup> Nadsapa Jeso pocca mamari tabaqqui tedseje pohua natti jai tojamissajari.

<sup>20-21</sup> Naraha jahuidsa amoneje coma tajaro Jeso toccahi qqui tajaro. Ponipi dsamacoma onini amaissoranaja cajijaro. Poni coma tanicca huajanopa 12 naraha ama jicaquera tanicca tonahanajonajaro. Nadsapi Jeso qqui tadsa poni bodinipi: —Jehe, pocca eterora bara onadsapi onominitohui -najaro. Nadsama Jeso natihujaji toccamissadsa tohuajiressissi nadsa pocca etero iponi bara inajaro. <sup>22</sup> Nadsapa Jeso piti nahuajanidsa qqui taneje amoneje coma tajaro qqui tajari. Qqui tadsapa: —Asi, ticappina tejeraji. Tibodipi ohuadsa: “Jehe, Jeso ohua tonanomihijine pajirahi” tadsapi najaroline jidapapi ticca dsamacoma toccapa -najari Jeso. Nadsapi amadsati amani totappadsapi tonomijaro.

<sup>23</sup> Nadsapa denima tossoiqquimamana dsanapodsapa jodiodenicca Dio Atti mamarihuajicca tamine tadsarihuaji Jeso bacco tajari. Bacco tadsapa madija toqueriqquihii qqui tajari. Ejedeni ppa todsanijine najoramanadsa totorededeni tore tore quinajari, madija motapa jadsirema oji oji camajari, motapa johua johua camajari. <sup>24</sup> Naraha Jeso attipa: —¡Jari, huapima ajijaro odsacca jai tijenaji! Ejedenipi dsoqque-gerani. Huadajaro -najari. Naraha pohuadenipa Jeso atti jaja icanamanajari.

<sup>25</sup> Naraha pohuapa madija dosse ininebaqquidsa Jeso toqquedsimajari. Toqquedsimadsa ejedeni poni dsapani equidi nadsa totehemajaro. <sup>26</sup> Nadsapa najaro dsama arobenihuaji madimanajarideni huapima mittaridsamanajari. Ejedeni camitemaninicca ima tojaribaqquiridsajarode.

*Nocco siri pamaha noccodeni ssire tocanirejaricca ima*

<sup>27</sup> Jesopa ejedenicca odsadsa qquenadsapa toccanijari. Toccani toccani nanaja nocco siri pamaha Jeso natti tohuedamissajari. Tohuedamissadsa huahua tamissamanajari: —¡Dabi Potemahi! ¡Iadsa teti huana taji inaha! -tamissamanajari.

<sup>28</sup> Nadsapa Jeso odsa bacco tadsapa toqquedsimajari. Naraha nocco siri pamaha huedajonajaripa Jesodsa tohuajiressimanadsa Jeso pohuadenidsa huati tajari: —Jari, ohuadsa tibodidenipi ¿nejecoma tiquinani? “Ia tonanomibaqquihijine pajirajari” ¿tiquinajaroqui? -nade. Nadsapa: —Jehe ia Medsede, ia tinanomibaqquinijine nahato tinani, inajaro -quinade.

<sup>29</sup> Nadsapa nocco siri pamaha nocco bara inabaqquidsa Jesopa: —Jehe, ohuadsa pajissa tiquinadsapi tinoccodeni ssire tanitohui -nade. <sup>30</sup> Jeso atti nama nadsapa nocco siri pamaha noccodeni ssire tocanirejari. Nadsapa Jeso pohuadenidsa huati tajari: —¡Paji, ajijaro imapi madijadenidsa tecomamanaji! -nade. <sup>31</sup> Naraha

tohuedanidsapa pohuadeni cacomamana-jarajari. Poccadeni ima ecomeraridsa-manajaro. Najaro dsama arobenihuaji madimanajarideni huapima —Jeso nocco siri pamaha inanomibaqquijari –ima mittaridsamanajari nade.

*Ebeno siri ebeno tobicahicca ima  
Mateo 12.22-24; Roca 11.14-15*

<sup>32</sup> Nocco siri pamaha tocanomiredsa tohuedaniraha manaco ebeno siri eccajona-manajari. Pohua bodidsapa Satanacca dodosse tocorime madidsajarijine atti cappirajari. <sup>33</sup> Naraha Jeso pohua bodicca dosse ininedsapa ebeno biquemanidsapa atti cajipomajari. Nadsapa madija huapima qqui toquinadsapa: —A, bica tahi. ¡Jesopa nahato tahi! –quinajari. Attideni naco: —Aji ia Isaraeri potemahi icca dsamadsa nama nahi qqui qqui inapo-jaraccade –quinade. <sup>34</sup> Naraha jodiodeni mota marinaja pariseodsa jehe quinajarideni attidenia: —Ajana, Jesopa tocorimedenicca tamine Satanacca dacorehe cajijarijinea pocca dodosse tabaqqui dosse ininebaqquijaripaja –quinaraha maidsamanajaride.

*Jesopa dsama huapimacca madijadsa huati cahanari canajari*

<sup>35</sup> Nadsama Jesopa odsa panani onihi, onihi naridsajarodsa, odsa capamema najaro onihi, onihi naridsajarodsa bacco bacco nanaridsa nadsapa poccadeni Dio Atti mamarihuaji mari mari nanaridsa najari. Jesopa Diocca cacahuehecca ima bicani mari mari nanaridsa najari. Comani onihi, onihi cajiridsamanajarideni naco ihinanomi-baqquiridsa najari. <sup>36</sup> Jeso madija pohuatohui jahijonana canahi qqui inabaqquidsapa pohuadenipa pina edede pohuadeni cacahuade jiraha pohuama mamadiri naridsamanajarissa quinajari. Nama quinadsapa Jeso pohua bodidsa: —A, tohuati nahanacquiri nahi –nadsa pohuadenitohui huati cahanariri canaridsajari. Madija huapimapa pohuadeni acco camade, pohuadeni maride cappiramanadsapa pina edede pohuadeni cacahuade nohueradsa nanajidso toquejenajarissa quina tahi. <sup>37</sup> Nadsapa Jeso pocca mamari tabaqquidsapa huati tajari: —Madija Dio jiraha madimanahi huapi taraha pohuadeni maridea huapi tajarahi. Pina huidsajacca ppa nahi bono jica-jarajarissa quinaraha poredea madija pama quinajari. <sup>38</sup> Nadsapi huidsaja jinede Diodsa huati tiquinaji, Pohua Atti maride dosse inabaqquidsapa bono porede tohuapihijine –nade Jeso.

## 10

*Jesocca dodosse tabaqqui inajarodsa pocca nahatohue inanaridsajaro  
Maraco 3.13-19; Roca 6.12-16*

<sup>1</sup> Nadsapa Jeso itohui pocca dodosse tabaqqui 12 inajaro, itohui huahua nadsapa iadsa pocca nahatohue inanaridsajarode. Nadsapi ia naqui madija bodidenicca tocorime dosse inineridsa-baqquihijine ia tonapajira-baqquihissa tajari. Nadsapa iadsa pocca nahatohue inanaridsadsa naqui comaqqui najarideni naco comani onihi, onihi cajiridsamanaraha ihinanomi-ridsabaqqui nahijine ia tonapajira-baqquijaride.

<sup>2</sup> Nadsama ia pocca dodosse tabaqqui iquejenajaropi ia oni huapimapi ajima inajaro: Tahidepa Ssino, oni ohuaha naqui Pedro. Pedro pohua ohuaha onipa Adiri. Madija ohuaha onipa Satiaco. Pohua ohuahapa Huano. Pohuadeni pamahapa Sebedeo bedi. <sup>3</sup> Madija ohuahadeni naco Feripe, Batorome, Tomas, quinajari. Ohuapi Mateo romanodenicca taminecca dosseniji dsiniro nanaccade ojarode. Madija ohuahapa Satiaco. Satiacopa Arapeo bedi. Ohuaha naco Tadeo (pohua oni ohuahapa Joda). <sup>4</sup> Madija ohuaha naco Ssino, pohuadsa romanodeni momohuade quiquinanajari. Madija ohuahapa Joda Iscariote. Najaripa Jeso ccaccorade. Nadsapi 12 inajaro Jesodsa iquejenajarode.

*Jesopa pocca dodosse tabaqqui 12 inajaro madija maride ia dosse taridsabaqquijari Maraco 6.7-13; Roca 9.1-6*

<sup>5</sup> Jesopa pocca dodosse tabaqqui 12 inajaropi pohua tahimari mari icanaridsabaqquihijine ia dosse tabaqquijari. Ia dosse tabaqqui-jaraccadsama ia mari tocanabaqquijaride. Pohua attipa: —Jehe, tiadenipi otahimari madija mari ticanabaqquiridsahijine jai tijadsapi jodio quejena-jarajaridenidsapi jai tija-jeraji. Dsama Samariacca odsa pananihuaji naqui jai tijedsima tejeraji. <sup>6</sup> Naraha Isaraeri potemahi jodiodenihuaajina jai tijani bica tani. Najaridenipa pina edede jano toquejenajarissa quinajari. Jehe, najaridenidsana jajahi tijaridsa naji, onajaro. <sup>7</sup> Najaridenidsara jai tijaridsadsa otahimari tecomeraridsamananissa taji. “Diocca cacahuehepi iadsa bacco najonabote nani” taridsamanana, onajaro. <sup>8</sup> Comaqqui najarideni Diocca dacorehema titinanomi-baqquimana nana. Madija dsoqquem-anajarideni naco Diocca dacorehema pohuadeni titinahatonimana nana. Madija dsamacoma onini leprajine jadsimanajarideni naco Diocca dacorehema huapidenicca titinanomi-baqquimana nana. Madija bodidenidsa Satanacca dodosse tabaqqui tocorime madidsamanajarideni naco bodidenicca dosse dosse titininebaqquimana najo, onajaro. Jehe, tiadenidsapi manaconi jirehe Dio pocca dacorehe tiadenidsa inanajaro. Tiadeni naqui najarideni tobiquemani-manadsapa manaconitohui huati tiquinejeraji, onajaro –nade Jeso.

<sup>9</sup> —Ticcadeni benehidsa naqui dsinero tiaccamana tejeraji. Oro poni, plata poni, ccarara onihi naqui poni. <sup>10</sup> Benehicca saco naqui tiaccamana tejeraji, poni. Ticcadeni etero onihi tedsamananijinecca naqui poni. Temoridenicca ohuahapa tiaccamana tajarajo. Aja tedsamanajarira tiaccamanahi ojari najo. Tiadeni totocahuejidsa ahua naqui tiaccamana tejeraji, poni. Nadsama otahimari maridera tidsepedeni ihijiridsamana nadsapi ticcadeni mamari tabaqquina ticcadeni madiejine tiadenidsa da da nanaridsamana nahi bica tahi –nade Jeso.

<sup>11</sup> —Nadsama odsa panani onihihuaji, odsa capamema najaro onihihuaji naqui bacco tiquinadsapi nahicca madija bica tajari, tiadenidsa jipa tajari tohuira qqui taridsamanana. Madija bica tajari bacco tiquinadsapa najaricca odsadsara timadimanani bica tani. Odsa panani onihihuaji jai tija-jeraccadsama aji bacco tiquinapojarocca odsadsara timadimanana, onajaro. <sup>12</sup> Jehe, nadsama najaro odsadsa madimanageridenidsa jai tijedsimadsapi pohuadenidsa: “¿Nija, bicaqqui tiquinaqui? Diocca jonehe tiadenidsa tojana” tiquinana. <sup>13</sup> Nadsama ticcadeni marinaja mittamanadsa, tiadenidsa bicaqqui nadsapa Diocca jonehe pohuadenidsa tojanitohui. Naraha tiadenidsa, ticcadeni marinajadsa naco jiperaqqui nadsapa Diocca jonehe pohuadenidsa toja-geranitohui. <sup>14</sup> Nadsapa tiadenidsa jiperaqqui nadsa: “Ajidsa timadimanaji” quina-jaradsapa, aja ticcadeni marinaja mittade jiperaqqui nadsa naco najaro odsadsa jai tijeqquimani bica tani. Madija nama quinahicca odsa tinebomanadsapi temoridenicca sadariadsa ssiqui ma tajaro catojanijine pporo pporo tiquinana. Nahi poccadeni ibohue bodideni huatoma-manahijine –nade Jeso. <sup>15</sup> —Jehe, pajissara tiadenidsa huati onana: Nidsaranibote madija huapimacca ima Dio icattemanijinecca huada bacco tadsa Dio pocca najidsohue tojadsapi najaridenidsapa denima oppina tanitohui. Ajina maittaccadsama odsa panani Sodomacca madija, odsa panani onihi Comoracca madija, nahihuaji madija madiridsamanajarideni naco tabaccoraqqui nadsapa Djoline jicaridsapojaripaja. Naraha pohuadenipa nidsa dsama jicadsapi poccadeni imasiri manaconipa najidsohue oppina tajaro pohuadenidsa ssonarinitohui. Naraha ohuattidsa jiperaqqui najaridenidsana najidsohue denima oppina tanicca ssonarinitohui –nade Jeso.

*Najidsohue tojanitohui*

<sup>16</sup> —Jehe ¡tibodideni huatoma-manaji! Ohua tiadeni dosse onabaqquijaropi pina edede dsomaji panahiuaji tiadeni dosse onabaqquijarossa najaro. Jai tijaridsani-huajipi madija tiadenidsa huadiqquiri nahi caji tahi. Nema nadsapi tinoccodeni panaji. Pina macca nocco panajarissa tiquinaji. Naraha tiadenipi tedimana tejerana, pina midsori jone tajarossa tiquinaji, onajaro. <sup>17</sup> ¡Paji, tinoccodeni panaji! Madija huadiqquiri najari aniridsahi. Najaridenipa tiadeni tadamamanadsapa jodiodenicca taminedenihuaji tiadeni tohuaqquedsimabaqqui-manahitohui. Jodiodenicca Dio Atti mamarihuaji naqui tiadeni tacossimanahitohui. <sup>18</sup> Otahimari tiadenidsa tojajaro acconi huadimanadsa dsama cacahuadedenihuaji tiadeni tohuaqquedsimabaqqui-manahitohui. Dsama onihicca dsama onihicca madija tamine deni toquejenajarihuaji naco tiadeni tohuaqquedsimabaqqui-manahitohui. Naraha nema nehe ticcadeni ima tecomeramanadsapi taminedeni, jodio quejena-jarajarideni naco otahimari mitta-manahijine. <sup>19</sup> Nadsama taminedenidsa tiadeni tohuaqquedsimabaqquimanadsapa pohuadenidsa ticcadeni ima tecomeramananijine ¿nejecoma onapadseje? tiquinejerana. Ticappinamana tejerana, onajaro. Nahidsa taminedenidsa tecomeramananijine Dio Pohua Corimena tettideni acco tocamabaqquihitohui. <sup>20</sup> Huati tiquinadsapi tettideniraha ticcadeni Abi Dio Pohua Corimejinena huati tiquinajaro, onajaro –nade Jeso.

<sup>21</sup> —Naraha najidsohuepi tiadenidsaha ssonarini ojari nejeranitohui. Aja ohuadsa jehe quinajaridenipa otahimaridsa toquejenajarijine pohua ohuahadeniraha pohuadenidsa huadiqquiri nadsapa ehccora-baqquimana nahitohui, inajicabaqqui-manahijine. Imehideni naco pohua bedideni otahimaridsa toquejenajarijine bedidenidsa huadiqquiri nadsapa pohuadeni bedideni ehccora-baqquimana nahitohui, inajicabaqqui-manahijine. Bedideni naco imehideni otahimaridsa toquejenajarijine pohuadeni imehidenidsa huadiqquiri nadsapa imehideni ihinajica-baqquimana nahitohui. <sup>22</sup> Occa madija tiquejenadsapi madija huapima tiadenidsa jiperaquiri nahitohui. ¡Naraha tiadenipi dacoco tijiraji! Najaro huadie tinahanamandsanapodsapi dsama jicani bacco tiquinadsa tiadenina ticassiejeranitohui. <sup>23</sup> Naraha tiadenidsa jiperaquiri najarideni tiadeni tonajidso-baqquimanadsapa ¡huassinaja odsa panani onihihuaji tidomodeni toccana! Tiadeni tonajidso-baqquimanapomadsa naco ¡odsa onihihuaji tidomodeni toccapomana! onajaro. Pajissara tiadenidsa huati onajaropi: Nidsa Isaraeri potemahidenicca odsa panani huapimadsa maride jai tijaridsani jiquejeraraha Madija Bedi ohua ohuatomani-pomanitohui, onajaro –nade Jeso.

<sup>24</sup> —Tetideni ajimamana tejerana: Madija pocca mamari tabaqquipa pohuadeni maridedsa deni toquejena-jarahi. Pohuadeni maridena denima nahato tajari. Madijacca dodosse tabaqqui naco pohuadeni dossededsa deni toquejena-jarahi. Naraha pohuadeni dossedena denima nahato tajari. <sup>25</sup> Najarossa najaroa aji madija pohua maridedsa ima ssonaridsapi pohuadsa naqui ima ssonari tani. Nadsapa pohua atti: “Epeje, ohua maridedsa nama quinadsapa ohuadsa naqui nama quinana” nahi bica tani. Madija pohua dossededsa ima ssonaridsapi pohuadsa naqui ima ssonari tani. Aji ohuapi ticcadeni tamine ojani ohua itamassomanadsa pina: “Tiapi tocorimedenicca tamine Beheosebo” quinadsapa tiadeni occa madija tiquejenajarodenidsa naco denima tatamasso quinahitohui –nade Jeso.

—¿Nejecojaridsara ticappinamananijine? –najari Jeso

*Roca 12.2-7*

<sup>26</sup> —Nadsama tiadenidsa jiperaquiri najarideni noppinidenipi ticappinamana tejerana, onajaro. Ajina, jidapana poccadeni tabaccorehe inajimamanaraha nidsa dsotodena ahuato tanitohui. Ima bicani ahuatora tanidsa inanamana, ima bica tejeranicca naqui ahuatora tanidsa inanamana naraha nidsa dsotodena najaro ima



huapima ahuato tanitohui. <sup>27</sup> Aji ohuattipi dsome tiadenidsa huati huati onajaropi nidsa ssiajanidsa tecomeramanaji. Teribodenidsa ojidsa huati huati onajaro naqui nidsa amossinihuajina jadsirema tecomeramanaji, onajaro –nade Jeso.

<sup>28</sup> —Nadsama otahimaridsa tiquejenajarojinepi madija tiadeni tonajicabaqquihijine tohuini quinaraha najarideni noppinedenipi ticappinamana tejeraji. Najaridenipa timedeni jicanijine pajiramanaraha nidsa tijicani nattinipi aji jororoni jiquejerani-huaji ticorimedeni hua todsimabaqquihijine ssamoqquiri nahitohui. Diona tiadeni tonajicabaqquihijine pajirahi. Aji jororoni jiquejeranihuaji ticorimedeni hua todsimabaqquihijine naco pajirahi. Nadsama Dio noppinena ticappinamanaji, onajaro –nade Jeso.

<sup>29-30</sup> —Diopa madija huapimacca ima nahato tajari. Aji, titatideni conani huapima onini huade naco nahato tajari. Diopa tiadeni tohuacahua-baqquihitohui. Puhuapa dsama huapimacca cacahuade naco nahato tajari. Ppiriri naco Dio: “Jehe huatia-jarana” nadsapa huatiera tahi. Naraha Dio: “Jehe huatiana” nadsana huatia tahi. Nadsama ppiriri manaconepa ¿huati ccarata? Huati ccarera tahi. Ppiriri pamaha manaconepa ccarara cajarie da da ihicanamana najaro. <sup>31</sup> Nema nadsapi ¡ticappinamana tejeraji! onajaro. Ppiriripa ajamani toquejenaraha huapima Dio ecahuabaqquijari. Naraha Diopa tiadenidsana denima huati huana tajari. Tiadeni tohuacahua-baqquihissa tahitohui, onajaro –nade Jeso.

*Madija ohuaha mittamanahijine: —Ohuapi Jesocca ojani –quinajarideni tahimari-deni*

*Roca 12.8-9*

<sup>32</sup> —Madija ojariapa madija ohuaha mittamanahijine pohua cacomeradsa: “Ohuapi Jesocca madija ojani” nadsapa manaco ohuapi occa Abi Dio memehuaji madijaridsa ohuacomeranitohui: “Ajajari madijapa occa tojahi” onanitohui. <sup>33</sup> Naraha madijapa madija ohuaha mittamanahijine pohua cacomeradsa: “Ohuapi Jesocca madija ojajerani” nadsapa manaco ohuapi occa Abi Dio memehuaji madijaridsa ohuacomeranitohui: “Najaripa occa madija jarahi” onanitohui –nade Jeso.

*Jesojinepa madija pohuadenira pohuadenira naridsamanajari*

*Roca 12.51-53; 14.26-27*

<sup>34</sup> —Tiadenipi tibodidenidsa: “Jehe, Jesopa ajijaro namidsa jonehe tojaridsanijine ccajonajari” tiquinanitide. Naraha ohuapi madija cajonerara canahijine occajonajerani. Madija cahadirere canahijinera occajonajaro –nade Jeso. <sup>35-36</sup> —Nadsama aji occajonajaropi madija pohuadenira pohuadenira naridsamanahijine. Madija motapa ohuadsa jehe quinajari. Madija motapa ohuadsa jehe quina-jarajari. Nadsama madija ohuadsa jehe najaripa pocca odsadsa madija madimanajarideni ohuadsa jehe quina-jaradsapa pocca huadi toquejenajari. Jehe, occajonajaropi ajima nanitohui: Dsabissopa imehi tedseje cacahadire nahitohui. Bedenipi imeni tadsajani cacahadire nanitohui. Jinomadnipi massodini tadsajani cacahadire nanitohui –nade Jeso.

<sup>37</sup> —Madijapa pocca madijadsa denima huati huana tadsa ohuadsapa ajamani huati huana tadsapa najari madijapa occa toja-jarahitohui. Aja madija pohua imehidsa, pohua imenidsa huati huana taraha ohuadsapa ajamani huati huana tadsapa occa madija toja-jarahitohui. Pohua bedidsa, pohua bedenidsa huati huana taraha ohuadsapa ajamani huati huana tadsapa occa madija toja-jarahi. <sup>38</sup> Madija ohuadsa dissera tajaradsapa occa madija tojahijine pajira-jarahi. Occa madija tojahijinepa otahimarijine ocasserani inahanaraha nema nehe otahimaridsara dissera tajari. Pohuadsa: “Ahua porimacossanidsa tia inanadsoqquena” quinadsa naco pohua attipa: “Epejena odsoqquena. Jeso onebo-jarahi” nadsapa najarina occa madija tojajari. <sup>39</sup> Madijapa pocca madie ohuadsa eccoradsapi pohua inanadsoqquemanaraha camittehe jiquejeraniccapi cajidsanapohuitohui. Naraha madija ohuaha

pocca madie ohuadsa acco tadsa ajijaro namidsa madi-dsanapohuijine tohuinira nadsapa dsoqquehitohui. Dsoqquedsapa camittehe jiquejeranicca caji-jarahitohui -nade Jeso.

*Madijapa tiadenidsa bicaquiri nadsapa Diodsa naco bicaquiri nahi*

*Maraco 9.41*

<sup>40</sup> Jesopa pocca dodosse tabaqquidsa denima huati tajari: —Madijapa pocca odsahuaji jai tijedsimanijine tiadenidsa pohua attipa: “Jehe, Jeso tahimari teccajonamanajaro bica tani. ¡Jai tijedsimaji!” nadsa najari madijapa tiadenidsa bica tadsapa ohuadsa naco bica tajari. Ohuadsa bica tadsapa ohua Cadossede Abi Diodsa naco bica tajari -nade Jeso. <sup>41</sup> —Nadsama madijapa Dio Atti cacomerabotedsa pohua attipa: “Pajissa, Diocca dodosse tijani. Dio Atti tecomeradsapi mittade jipa onani” nadsa najari madijadsapa Dio pocca biquehe inananitohui. Pina Dio pocca biquehe Pohua Atti cacomeraquiri najaridenidsa inandaridsajarossa najaro pohuadsa naqui inananitohui. Nadsama madijapa Djojine madihissa dsanapojaridsa pohua attipa: “Jehe, Diodsa timadinissa dsanapodsapi ohuadsa bica tinani. ¡Occa odsahuaji tiqquedsimaji!” nadsa najari madijadsapa Dio pocca biquehe inananitohui. Pina Dio pocca biquehe madija madimanahissa tajaridenidsa inandaridsajarossa najaro pohuadsa naqui inananitohui -nade Jeso. <sup>42</sup> —Nadsama madijapa occa mamari ojaria ajamani tojajari tohuati nahana tajaridsa pohua bodipa: “Jehe, ajajaripa Jesocca madija, pohuadsa accora onana” nadsa pohuadsa da inadsa bica tani. Passo nahuini dse nahijine da icanadsa naco manaco nidsaranibote Diopa pocca biquehe najari madijadsa inananitohui. ¡Pajissara huati onajaro! -nade Jeso, pocca dodosse tabaqqui jai tojaridsahijine dosse inabaqquidsa.

## 11

*Huano Baotista pocca dodosse tabaqqui tahimarideni*

*Roca 7.18-35*

<sup>1</sup> Jeso pocca dodosse tabaqqui 12 inajaro pohua tahimari maride iquejenaridsanjine ia mari tocanabaqquia jicadsapa madija huapima mari icanabaqqui-ridsahijine ia huapima jaijajarode. Jeso naco iadsama toccajaride. Najaro dsama arobeni onini Carireahuajicca odsa panani onihi, onihihuaaji, odsa capamema najaro onihi, onihi nanihuaaji Dio Atti ehecomeraridsa najarode.

<sup>2</sup> Nadsama Huano Baotistapa toponi cocoro todsimadsa huedsaraha madija attideni: —Cristo-Mesiapa canahatori canahi -quinahi ima mittajari. Mittadsapa pocca dodosse tabaqqui Jesodsa huati toquinahijine dosse inabaqqujari. <sup>3</sup> Nadsapa iahuaji jahijonadsa bacco najonamanadsapa Jesodsa huati toquinajaride: —Ia maride Huanopa tiadsa huatide ia dosse najonabaqqujari. Pohua attipa: “¿Tiapi aja tohui imadijaro Cristo-Mesia tijaqui? ¿Ohuahatohui imadiccanijinerane?” nade Huano atti -quinade.

<sup>4</sup> Nadsapa Huano dosse inajonabaqqujaridenidsa Jeso pohua cacomerajari: —Jehe, ticadanidsa Huanodsa huati tinanimanaji. Aji qqui tiquinajaro, aji timittamanajaro pohuadsa huati tinanimanana -nade Jeso. <sup>5</sup> —Ajima tiquinana: “Madija nocco sirideni nocco ssire tocanirehi. Madija isso sirideni naco tocanomiredsa jahiridsahi. Madija dsamacoma onini leprajine huapideni jadsimarojarideni naco imedeni tobicaridsahi. Madija huaribodeni didiqquri najarideni naco huaribodeni ssire tocanireridsahi. Madija huatajarideni naco camitemani-ridsamanahi, madija tohuati nahanaquiri najarideni naco icassiejeranijinecca ima mari icanabaqquimanadsa mittaridsamanahi” tinanimanana tiadeni maridedsa -nade Jeso. <sup>6</sup> —Aja madija mota attidenipa: “Jesopa Cristo-Mesia jarahi, pocca imapi onihi, Cristo-Mesiacca imassa nejerani” quinaraha madija mota nama quina-jarajari attidenipa: “Pajissa Jesopa

icca Mesia” quinadsa pohuadenidsana Dio pocca biquehe inananitohui. Ajijaro ima huapima Huanodsa huati tinanimanana -nade Jeso.

<sup>7</sup> Nadsapa Huano dosse inajonabaqquijarideni tohuedanihi natti Jesopa pohuadsa queriqquimanajaridenidsa Huano tahimari huati tajari: —Nadsama dsama huamoni ssono caji, siba caji tanihuajipi ¿nejeco qquidera jajahi tija najarotte? Aja madija pocca ima japari tajaro pina boba jojodejine jene jene tocanajarissa najari ¿nama najari qquide jajahi tija najarottarane? Naraha Huano Baotistapa pocca ima japari tejerade. <sup>8</sup> Huamonihuaji jajahi tija nadsapi ¿nejeco qquidera jajahi tija najarotte? Aja madija etero huatini ccara tanicca huedsajari qquide ¿jajahi tija najarottarane? Naraha tiadenipi nahatoqquiri tiquinani: Madija etero huatini ccara tanicca huedsamanajaridenipa taminedenicca odsadsana mamadimana najari. <sup>9</sup> Nadsapa ¿nejecotohuira nanihuaji jajahi tija najarotte? ¿Dio Atti cacomerabottecca marinaja mittade jajahi tija najarottaqui? Jehe ¡pajissa! Pocca marinajatohui jajahi tija najaroa. Huanopa pina Dio Atti cacomeraqquiri najaridenissa naraha pohuapa deni tojajari. Pohua dsepe ijjaripa ima deni tojanicca cajijari. Najaro imapi otahimari Cristo-Mesia tiadeni Idinide oजारopaji. Najaro ima inanajora-ridsapojaropaji. <sup>10</sup> Aja, Huano Baotistapa maittaccadsama pohua tedsejemacca ima Dio Atti cacomerabote Maraquia dsodo inapojaro. Najaropi pina Diopa Cristo-Mesiadsa huati tapojarissa najaro:

“Tahide titahimari tohuaccade madija ojaria titedsejema dosse onapohuitohui.

Nahi mittamanadsa madija bodidenipa titohui najoramanapohuijine, pina tijahine najoramanapojarossa inanamanitohui, onajaro”

napohui nade Dio Atti -nade Jeso atti. <sup>11</sup> —Nadsama pajissara tiadenidsa huati onajaro: Aji namidsa madiridsamanajaridenidsa naco madija ohuaha pina Huano Baotistassa najari nohuerahi. Huano Baotista pohuajinena madija bodideni otahimaritohui Diocca cacahuehecca ima dsati inanajorabaqquipojari. Najarotine Huanopa namidsa madiridsamanajarideni huapimadsa deni tojajari. Naraha nidsa dsotode madijapa Diocca cacahuehecca ima dsati tojani qqui toquinadsa najarodsa toquejenadsapa pohuadenipa Huano Baotistadsa deni toquejenahitohui. Madija ajamani tojajari pina tohuati nahana tajari pohua naco Diocca cacahuehedsa tojadsapa pohua naco Huano Baotistadsa deni tojahitohui -nade Jeso.

<sup>12</sup> —Jehe, Diocca cacahuehecca ima dsati madijadsa tojanijine Huano Baotistapa tahide mari mari najonapojari. Jidapana ohua naqui maride nema onajonarora ajijaropaji. Naraha madijapa Diocca cacahuehecca imadsa jiperaqquiri nadsa pohuadenijine najidsohue ssonari ssonari najonajaropaji. Jicanijine disseraqquiri naraha pajiramana-jarahi. <sup>13</sup> Maittaccadsama Dio Atti cacomeraqquiri najarideni Moisesicca marinajadsa naco Dio Atti ecomerameje najonaponi najaroa aja Huanopaja. Huapima Diocca cacahuehecca ima naqui mari mari nanajonamana najari -nade Jeso. <sup>14</sup> —Nadsama ajijaro ima timittamananijine tipajiramanadsapi: “Jehe, pajissa” tiquinaji. Najaro imapi Huanopa pina Dio Atti cacomerabote nidsa ccajonahitohui quiquinanajaripa Eriassa najari. (Aji Dio Atti dsodo nanidsapi: “Nidsa Ohuatti cacomerabote onipa Eria tiadenidsa dosse onahitohui” napohui nade Dio.)

<sup>15</sup> Nadsama teribodeni ticajimanadsapi ohuatti timittamananissa taji, onajaro -nade Jeso.

<sup>16</sup> —Naraha jidapanana aja madija madiridsamanajaridenipa ¿pina nejecojaridenissa quinajari? -nade. Nadsapa pocca marinaja mittamanahissa tahijine ajijaro namidsa imadinicca imadsa mari icanabaqquijari. Pohua attipa: —Jehe, madija jidapana madiridsamanajaridenipa pina ejedenideni boronidsa jassi tadsa poccadeni ittome tossamodsa ahuaji johua, ahuaji johua quinajarissa najari, onajaro.

<sup>17</sup> Pohuadenipa pohuadeni tessedenidsa: “Jaho, dsobi tiquinanijine totoredsa tore



tore inaraha tetidsemana-jevani, dsobi dsobi tiquinejevani” quinjari. “Ittomedsa naqui tiadeni oji inanabaqquinjine ajie tohuati nahana taniccadsa jiri jiri inaraha tiadenipi oji tiquinehe nejevani” quinjari. <sup>18</sup> Jehe, aja madija jidapana madimanageridenipa pina ejedeni jamimanagerissa quinahi onajaropi Huano Baotista madidsa Dio Atti cacomerade tojadsapa ejetecca jipagquiecca jijipa jipa-jarahi. Ejetecca dsedse dse najarahi. Nadsa johua johua quinaadsa attidenipa: “Huano Baotistacca madie jidsa tani. ¡Pohua bodidsa Satanacca dodosse tocorime madidsajari itidija!” quiquinanjari. <sup>19</sup> Nani dsotode ohua Madija Bedi ojajaroa ejetecca jipagquiecca jijipa ojipa, dsedse dse onadsapa ohuadsa johua johua quinjari attidenipa: “Jaho, madijadsa jipa naridsajide rahi, dsedsejide rahi. Romanodenicca taminecca dosseniji dsinero nanaccadenidsa ccaridsajari. Madija imasiri cajimanageri tedseje naco ccaridsajide rahi” quiquinanjari ohuadsa. Attidenipa Huanodsa, ohuadsa nama quinaraha nidsa imasiri cajimanageridenipa ettidsa iboraqquiri nadsa bodideni cacajiqquimera, imarideni cacajiqquimera nadsapa Diocca nahatohue, pocca pajissehe ahuato tanitohui –nade Jeso.

### *Iboqquiri najaridenicca ima*

#### *Roca 10.13-15*

<sup>20</sup> Jesopa odsa panani onihi onihi naridsajarocca madija poccadeni ibohue tahimarini huati tajari. Poccadeni odsa pananihuaji Jeso pohua canahatori canahicca denima inahatoridsaraha bodideni cacajiqquimera-manaha najaradsapa poccadeni imasiridsa apaja quina-jarajari. <sup>21</sup> Pohua attipa: —Jaho, odsa panani Corasinahuaji timadimanagerodenipi najidsohue oppina tanicca tiadenidsa ssonarinitohui. Jaho, odsa panani Besaidahuaji timadimanagerodenipi naqui najidsohue oppina tanicca tiadenidsa ssonarinitohui. Ajina, ticcadeni odsa pananihuaji ocanahatori canani qqui qqui tiquinaraha tibodideni cacajiqquimerehe nejerade. Naraha maittaccadsama odsa panani Tirohuaji madimanapojaridenipa tabaccoraqquiri najari, aji odsa panani Sidohuaji madimanapojarideni naco tabaccoraqquiri najari pohuadeni huapimapa ocanahatori canani qqui toquinapo-jarajari. Nassa qqui toquinadsapa Diodsa toquejenahijine najomana-jarahitohuiraha. Poccadeni imasirijine bodideni ocassera tadsapa etero jidsa tanicca huedsamanadsa dsippo oconi pohuadeni tatidsa huira huira quinaadsa oji oji quinahitohuiraha –nade Jeso. <sup>22</sup> —Naraha aji Corasinahuaji timadimanagero tiadenidsa, Besaidahuaji timadimanagero tiadenidsa naqui ohuattipi: Nidsa madija huapimacca ima cattermanijinecca huada bacco tadsa Dio Pohua baccokuvaaji tidomodeni huadsapi Tirohuaji madimanageridenidsa Dio pocca najidsohue ajimani tojanitohui. Sidohuaji madimanageridenidsa naco ajimani tojanitohui. Naraha tiadenidsana Dio pocca najidsohue denima oppina tanitohui –nade Jeso.

<sup>23</sup> —Jaho, odsa panani Capernaohuaji timadimanagerodenipi naqui najidsohue oppina tanicca tiadenidsa ssonarinitohui. Dio memehuaji madjaridsa bacco tiquinadsa tiadenidsa Pohua Attipa: “Jehe, tiadenipi bicaqquiri tiquinani” ¿napadsaja? ¡Nama najarahitohui! Ticcadeni ibohuejinepi nami odini huaji tani jicaqquini nohueranihuaji tiadeni hua todsimahitohui. Ajina, ticcadeni odsa pananihuaji ocanahatori canani qqui qqui tiquinaraha tibodideni cacajiqquimerehe nejerade. Naraha maittaccadsama odsa panani Sodomahuaji madimanapojaridenipa imasiri sseqquiri nadsa Diodine memehuajicca dsippo siba quejemani ppocorajarodsa odsa, madija huapima jicajari. Naraha pohuadenipa ocanahatori canani qqui toquinapo-jarajari. Nassa qqui toquinadsapa pohuadeni bodideni cacajiqquimera-manadsa Dio pohuadeni inajica-jarahitohuiraha. Jidapana Sodomadsapi madija madimanahi paja naccahitohuiraha –nade Jeso. <sup>24</sup> —Naraha aji Capernaohuaji timadimanagero tiadenidsa ohuattipi: Nidsa dsama jicadsa huapima imarideni icattermaridsanjine Dio Pohua baccokuvaaji domo huadsapa Sodomahuaji madimanageridenidsa Dio pocca

najidsohue ajimani tojanitohui. Naraha tiadenidsana Dio pocca najidsohue denima oppina tanitohui –nade Jeso.

*Jesopa Imehidsa huati tajari*

*Roca 10.21-22*

<sup>25</sup> Nahi dsotode Jesopa Imehidsa huati tajari: —Jehe Abi, Tiadsa ohuatidsejaro. Tiapi memehuaaji madimanajarideni Cacahuade tija, namihuaaji madimanajarideni Cacahuade tija najaro. Jehe, madija nahatoqquiri najaridenipa ajijaro dsamacca ima tocahatteraraha Tiadsapa jiperaqquiri najari. Nadsama tijinepi ticca pajissehecca ima mittamana-jarahijine pohuadenidsa ahuatora tinanajaro. Naraha madija motadenipa: “Tapi ssamomo inajaro, pina ejedeni bedissa inajaro” quiquinanajaridenidsana ticca ima pajissacca ahuatora tinanajaro. <sup>26</sup> Jehe, Abi ¡pajissa! Tia jipa tinadsapi tijine nema tinanajarode –nade Jeso.

<sup>27</sup> Nadsapa Jeso iadsa huati tapomajari: —Occa Abipa ohuadsa pocca nahatohue huapima inanaridsajaro. Occa Abina pohua motta ohuadsa nahato tahi ojari najari. Occa Abipa nadsama Pohua ojari naha ohuadsa nahato taha nama najonajari. Ohuapi Abi Diocca Ejedeni ojani. Ohua naqui nadsama. Ohua ojari onehe Pohuadsa nahato onajonajaro. Nadsama ohua Dio Bedi ojadssapi madijadeni ohuadsa toquejenajaripa pohuadenidsa jipa onadsapi ojine pohuadenipa Dio Pohuadsa noccodeni tojidserahitohui –nade Jeso.

*Ticcadeni imajine ja tiquejenadsapi Jesodsara tiquejenaji*

<sup>28</sup> —Nadsama ima ccanajani temanadsapi pina ccanajabote jore tiquinadsa ja tiquejenajarossa nadsapi ohuahuaajira jai tijajonaji. Otahimaridsa pajissa tiquinadsapi tibodideni jassi onanabaqquinitohui. <sup>29</sup> Occa marinaja tiadenidsa tojanijinepi ohuadsa tiadeni teccoramanaji, ohuadsa iboraqquiri tiquinanijine, onajaro. Ohuadsa ticahatteraji. Tiadeni Maride ohuapi jone onani, bica onani. Tibodideni onabicaqquinitohui. <sup>30</sup> Occa marinaja tiadenidsa tojanijinepi ojine pajiranissa tani. Ohuadsa pajissa tiquinadsapi pina ppahua taniccassa nani –nade Jeso.

## 12

*Jassinajacca huadadsa Jeso pocca dodosse tabaqqi iapi aroso jidsadsa trigo bono pore idsanapojari*

*Maraco 2.23-28; Roca 6.1-5*

<sup>1</sup> Nadsapi dsotode naqui jassinajacca huada bacco tadsa Jeso, pocca dodosse tabaqqi tedseje huadsaja nocconi jajjeqquimadsa ipemidsapi aroso jidsadsa trigo bono qqui inajari. Dside ippiridsadsa dsojo dsojo icajidseri nadsa pore siqui apa, pore siqui apa inade. <sup>2</sup> Naraha jodiideni mota marinaja pariseodsa jehe quinajaridenipa ia qqui toquinadsa Jesodsa attidenipa: —¡Ajana! Jassinajacca huadadsapi idsepe ijiniijine oppina taraha ticca dodosse tabaqqi trigo bono dside ippiridsamanadsapa pina jassinajacca huada jerajarodsa dsepedeni ijimanajarissa quinaha –quinade.

<sup>3</sup> Nadsapa Jeso pohuadenidsa huati tajari: —¿Naraha tiadenipi aji Dio Atti maittaccadsama dsodo naniccadsa Dabicca ima hua hua titiquina naraha tetideni ajimamanajarorane? Najaro imapi Dabipa pohua tessedeni tedseje pemimanadsapa pan Diodsa da tahicca oppina taraha jipamanajari. <sup>4</sup> Diodsa dada toqquimahuaji toqquedsimadsa cacahuadedsa pan tohui huati tajari. Pan ohuaha nohueradsa Diodsa da tahiccaraha Dabi jipajari, pohua tessedenidsa naco da inabaqquidsapa jipamanajari. Najari pan Diodsa da tahipa dada toqquima cacahuadedenira jijipamana najariraha Dabideni pemimanadsa jipamanajari oppinera tahi –najari Jeso. <sup>5</sup> —Nadsama Moisesicca marinajadsa naqui ¿dada toqquima cacahuade tahimarideni hua hua titiquina naraha tetideni ajimamanajarorane? Aji, maittaccadsama Moisesicca

marinajapi: Jassinajacca huadadsa dada toqquima cacahuadedenipa dsepedeni ijimanaraha pohuadenidsa najaro huadapi oppinera tani, napohui nade Moisesi. <sup>6</sup> Naraha tiadenidsa ohuattipi: Aji Diodsa dada toqquimacca odsapi deni tojanicca tojaccade. Naraha jidapana aja, tiadenidsa madijaripa Abi Diojine pohuana deni tojajari. Jidapanana Diodsa dada toqquimacca odsapi pohuadsa ajimani tojajaro. Najari deni tojajari onajaropi ohuapaji -nade Jeso. <sup>7</sup> —Maittaccadsama Dio Atti cacomerabote Osea dsodo inapojaropi:

“Tohuati huanehe, acco camehe tohuini onani. Ohuadsa ticcadeni bani bedi ono tojahijine da da titiquina naraha madija ohuahadsa tetideni huaneraqquri nadsapi ticcadeni daniji jipera onani.

Madija huapimadsa tetideni huaneraqquri nanijinena jipa onani. Pohuadeni acco acco titicamabaqqumana dsadsanapo nadsa naqui jipa onani” napohui nade Dio. Naraha najaro dsodonijipi timittamana-jerajaro. Nassa timittamanadsapi ima cappiramanajarideni johua ticanabaqqumana-jarahitohuiraha. <sup>8</sup> Aji Madija Bedi ojajaroa jassinajacca huadapi ohuana jinede ojan. Jassinajacca ima cacahuadepi ohuana paji -nade Jeso.

*Madija dsepe siricca ima  
Maraco 3.1-6; Roca 6.6-11*

<sup>9</sup> Nahidsa Jeso toccadsapa Dio Atti mamarihuaji toqquedsimajaride. <sup>10</sup> Nadsapa nahihuajicca madija dsepe siri naco nahidsa huittarijari. Nadsa pariseodenipa Jesodsa huati toquinajari: —Nija, Moisesicca marinajadsa, icca madijacca marinajadsa naqui jassinajacca huadadsa madija coma tajari inanomihijine ¿oppinera taqui? Najaropi pina jassinajacca huada jerajarodsa idsepe ijijarossa naraha -quinajari. Pohuadeni bodipa: —Jidapana jassinajacca huadadsa ajajari dsepe siri inanomidsapa Jesodsa ima inahananijine -quinajari.

<sup>11</sup> Naraha Jesopa: —¡Jari! Manaco ohuatti tecomeramanaji. Ajina, pina ticcadeni edede itide. Jassinajacca huadadsaraha ticcadeni edede odidsa tossonidsimadsapa ¿tidinimana-jaraco? ¡Tidinimanahitohui! onajaro. <sup>12</sup> Naraha ticcadeni ededepa ¿tiadenidsa bica tajaraco? Ededepa bica tahi. Naraha ia madijapi denima bicaqquri inajaro. Nadsapi jassinajacca huadadsa edededsa bica inanani oppinera tadsapi madijadsa naqui bica inanabaqquihijine oppinera tani, onajaro -nade Jeso.

<sup>13</sup> Nadsapa madija dsepe siridsa Jeso attipa: —Jari, tidsepe ohuahuaaji da ticanajonaji -nade. Nanaja pohua dsepe pohuahuaaji da icanadsapi dsepe tocanomijaro. Pina pohua dsepe onihissa camanijaro. <sup>14</sup> Naraha pariseodenipa dsotode nahidsapa jai tojeninedsapa imahaha canajari: —¿Nejecoma inanadsa Jeso inanadsoqquehijine? -quinajari. Nadsapa najaro ima huati toquinahijine queriqquimanajari quinade.

*Maittaccadsama Dio Atti cacomerabotepa Jeso tahimari dsodo inapojaroro*

<sup>15</sup> Jesopa pohua inanadsoqque-manahijine tohuini quinahi nahato tadsapa Dio Atti mamarihuaji nebodsa toccajari. Ia pocca dodosse tabaqqui ia naqui huaji tanihuaji jaijajaro. Nadsapa pohuadsa madija huapi taha jahijonadsapa comaqquri najarideni huapima inanomibaqquijari. <sup>16</sup> Naraha inanomibaqquidsapa pohuadenidsa huati tajari: —Tiadeni onanomibaqquijaro tecomamanana. Aja madija huapimadsa otahimari huati taridsamana tejeraji, onajaro -nade Jeso. <sup>17</sup> Nadsama Jesocca imapi pina maittaccadsama Diojine Pohua Atti cacomerabote Isahia dsodo inapojarossa najaro:

<sup>18</sup> —¡Ticattomama canaji! Ajajaripa tiadeni Idinide tojahijine occa Ejedeni Ohuatidsa ibora tahijine ocattapojari. Pohuatohui ohuati huana tajaro. Pohuapa Ohua catidsehissa tajari.

Ocorime pohuadsa onanadsapi Ohuatti inapajiranissa tanitohui. Pohuapa aja madija tabaccorehe inebomanadsa occa biquehedsa toquejenahijine tahimarini dsama huapimacca madijadsa huati huati naridsahitohui.

<sup>19</sup> Pohuapa pohuadsa jiperaqquiri najarideni tedseje ahuaji huati ahuaji huati quina-jarahitohui. Johuahuera tahitohui. Amossinidsa pohua atti mohui tadsa atti atti najarahitohui.

<sup>20</sup> Pohuapa boba ede jai tahi paja jai inanari-jarahitohui. Naparina jororone cahuidsa jami-mi nadsa naco pohuapa paja icanahuiri-jarahitohui.

(Najaro imapi pina aja madija pohuadsa jehe nahissa tajarajari ettajo-jarahitohui. Madija pocca jeheniji tomijiraraha pohuapa najari acco icamahitohui.)

Nama dsanapodsapa nidsa dsotode pohuajine occa biquehe deni tojadsapi tabaccorehe inajicanitohui.

<sup>21</sup> Nadsama dsama huapimacca madija pohuatohui quinadsa pohua canajoranihitohui madimanajari, najari Dio –napohui nade Isahia.

*Jesocca dacorehe ahuato tajaroraha pohuadsa ima inanamanajaro*

*Mateo 9.32-34; Maraco 3.20-30; 9.40; Roca 11.14-23; 12.10*

<sup>22</sup> Nadsapa madija pohua bodidsa Satanacca dodosse tocorime madidsajari. Najarijine nocco siri, ebena siri nadsapa qqui tajarajari, atti naco cappiraha madijari. Pohua tessedenipa Jesohuaji eccajonamanajari. Nadsama Jesopa pohua bodicca dosse ininedsapa tonomijari. Qqui tapomajari, atti naco cajipomajari. <sup>23</sup> Nadsapa nahihuaicca madija huapima najaro qqui toquinadsapa: —A, bica tahi. ¡Jesopa nahato tahi! –quinajari. Attideni naco: —¿Ajajari Jesopa, tamine Dabi Potemahico? Aja ia Idinide, pohuatohui imadijaro ¿ccaronajarico? –quinajari.

<sup>24</sup> Naraha pariseodeni najaro ima mittamanadsa maidsamanadsa attidenia: —Ajana, Jesopa tocorimedenicca tamine Beheosebocca dacorehe cajijarijinea pocca dodosse tabaqqui dosse ininebaqquijaripaja –quinajari.

<sup>25</sup> Naraha Jesopa pohuadeni bodi nahato tajari. Bodideni huatomanahijine pohuadenidsa ajijaro ima huati huati tajari: —Dsama huapimacca taminepa madija ecahuabaqquiraha dsotode pocca madija cahadiremanadsa ahuaji atti ahuaji atti quinadsapa pocca cacahuehe inassamomanajaro. Nadsapa pocca madija domo tocca tahi. Najarossa najaro odsa pananicca madija cahadiredsapa tojaribaqqui tahi. Ima onihi naqui najarossa najaro madija ojaria pocca odsacca madija cahadiredsapa poccadeni ima tossamonitohui. <sup>26</sup> Ima najarossa najaroa Satanapa pocca dodosse tabaqqui madija bodidsa madidsamanajarideni dosse ininebaqquidsapa pina pohua pocca madija tedseje cahadirejarissa najari. Nama nadsapa pocca dossehe inas-samodsapi sara tabaqquihitohuiraha. ¿Nadsapa pocca dodosse madija bodicca dosse ininehijine jipa taco? Jipera tahi. Aji ohuadsa tettidenipi: “Satanacca dacorehedsa pocca dodosse dosse tininejari” tiquinaraha najaropi pajissa jerani. Nassa najaro pajissa tojadsapi Satana pohua pocca dodosse tabaqqui inajaribaqqui-ridsahitohuiraha.

<sup>27</sup> Ajina, ohuadsa: “Beheosebocca dacorehe ticajini” tiquinaraha ticcadeni mamari tabaqqui naco Satanacca dodosse tabaqqui dosse dosse ihininebaqquimana najari. Naraha pohuadenipa ¿nejecojaricca dacorehedsa nama quinajari? Aja ticcadeni mamari tabaqqui dacorehe cajimanadsapa Satanacca dodosse tabaqqui dosse ininebaqqui-manaraha pohuadenidsa: “Beheosebocca dacorehe ticajimanani” ¿tiquinattaqui? Nema tiquinejerani, onajaro. Nadsama ¿nejecotohui ohuadsa nema tiquinajaro? Tibodidenipi quejemama canajaro –nade Jeso. <sup>28</sup> —Naraha ohuapi Dio Corimecca dacorehe ocajije najaro Satanacca dodosse tabaqqui dosse dosse ohoninebaqquiridsa najari. Nema onanadsapi tiadenidsa ahuato onanajaro: jidapana Diocca cacahuehe tiadenidsa bacco najonaropaji, onajaro –nade Jeso.

<sup>29</sup> —Nadsama Satanapa dacorehe cajiraha ohuapi deni ojajaro. Puhuapa ajamani pina ajijaro ima tiadenidsa huati onabote najarossa najaro. Nadsama bobotidepa: “Odsacca todsepetaji obotina” najariraha odsa jinede dacorabote odsadsa madidsadsapa botihijine pajira-jarahi. Naraha bobotide denima dacoradsapa odsa jinede dama inadsa jore inaquidsapa pohua dsepetaji botihijine pajirahi. Ima najarossa najaroa aji ohua pina bobotide denima dacorajarissa onajaro. Occa dacorehe deni tojadsapi pina Satana jore onaquijarissa nadsa pocca dodosse tabaqqi dosse dosse ohoninebaqqi najaripaja –nade Jeso.

<sup>30</sup> Nadsapa Jeso denima huati huati tajari: —Nadsama madija ohuadsa tojajaradsapa occa huadi tojajari. Pohua naco madija ohuadsa toquejenahijine pohuadeni acco icamabaqqi-jaradsa pohuajine ohuadsa tohuajimanajari, onajaro –nade Jeso.

<sup>31</sup> —Nama nadsapa tiadenidsa ohuattipi: Madija imasiri inanamanaraha nidsa dsotode: “Icca ima inebona” quinadsapa poccadeni imasiri, poccadeni tamassohue Diodsa ecomeramanadsa Diopa poccadeni imasiri huapima epeje inananitohui. Naraha Dio Corime itamassomanadsa, pohuajine tojajarodsas maidsehe huahua quinadsa naco Diopa pohuadeni atti huati ajama-jarahitohui. Poccadeni imasiri epeje inana-jeranitohui –nade Jeso. <sup>32</sup> —Aji ohua Madija Bedi ojajarodsas madija atti atti quinadsa ohua itamassomanaraha nidsa dsotode: “Icca ima inebona” quinadsapa poccadeni imasiri, poccadeni tamassohue Diodsa ecomeramanadsa Diopa poccadeni imasiri epeje inananitohui. Naraha Dio Corime itamassomanadsa pohuajine tojajarodsas maidsehe huahua quinadsa naco Diopa pohuadeni atti huati ajama-jarahitohui. Jidapana imadiccadsama poccadeni imasiri epeje inana-jeranitohui. Nidsa dsotode Dio pocca cacahuehe tojadsa naqui epeje inana-jeranitohui, onajaro –nade Jeso.

*Ahua bono tahimari*  
*Roca 6.43-45*

<sup>33</sup> Nadsama Jesopa ahuacca imadsa mari icanabaqquihijine huati huati tajari: —Ahua bicahi ppa tadsa tecahuahissa tadsapa bono bica taha cahua tahi. Naraha ahua ppa tadsa tecahua-jaradsapa bono tabaccora taha cahua tahi. Nadsama ahua huapima bono cajiridsadsapa bono bicahi cajihi nahato inadsapi: “Najari ahuapa bica tahi” inajaro. Bono tabaccora tahi cajihi nahato inadsapi: “Najari ahuapa tabaccora tahi” inajaro. <sup>34</sup> Jaho, maidsaqqiri tiquinani. Tebenodenipi pina macca ebenossa tiquinajaro. Tibodideni tabaccoraqqiri nadsapi ima tabaccora tajarodsas tebenodenidsa atti atti titiquina najaro. Aja madija huapimapa pohuadeni bodidsa ima caji tadsapi najaro imara huati huati totoquina najari. <sup>35</sup> Nadsama madija bica tajaripa pohua bodidsa ima bicani eahuadsapi ima bicanira huati huati tataja nahitohui. Naraha madija bica tajarajaripa pohua bodidsa ima tabaccora tani eahuadsapi ima tabaccora taniccara huati huati tataja nahitohui. <sup>36</sup> Nadsama tiadenidsa huati onajaro: Ima ponimacca huati huati tiquinadsapi nidsa madija huapimacca ima cattermanijinecca huada bacco tadsa Dio Pohua baccohuaaji tido-modeni huadsapi aji ima ponimacca huati huati tiquinapojarocca huapima dsori teje cama-jeranitohui, onajaro. Diopa tiadenidsa: “Jari, ohuadsa ticcadeni ima tecomeramanaji. ¿Nejecotohui tettideni nema nema titiquina najaro?” nahitohui. <sup>37</sup> Nadsama pina jidacca ahuacca ima huati onajarossa najaro aji tettideni huapima Dio nattome inadsapi tohuatti tabaccora tanicca ticajimanadsapi Diopa: “Tabaccora tinani. Tia onajidsona” nahitohui. Naraha tettideni bica tanicca ticajimanadsapi Diopa: “Bica tinani. Tia ocatidsena” nahitohui, onajaro –nade Jeso.

*Madija tabaccoraqqiri najarideni Jeso canahatori canahijine tohuini quinajari*  
*Maraco 8.12; Roca 11.29-32*

<sup>38</sup> Naraha Jeso atti mittamanadsapa jodiodenicca marinaja maridedeni mota, marinaja pariseodsas jehe quinajarideni mota naco Jesodsas huati toquinajari: —Jari



Mamaride, pajissa Diocca dacorehe ticajidsapi memehuaicca nahatohue bicabote ahuato tinanaji. Qqui inana, inajaro -quinade.

<sup>39</sup> Naraha Jesopa pohuadenidsa huati tajari: —Jidapana timadimanajardeni tabaccoraqquiri tiquinehe timadimanajaro. Tahidepi tettideni: “Diocca iquejenani” tiquinaraha dsotodepi Pohua Atti tinebomanajaro. Aji ocanahatoriri cananijine tohuira huati tiquinaraha occa nahatohue onahatona onejerani. Naraha ocanahatoriri cananica ima ojariena qqui tiquinanitohui. Najaropi Dio Atti cacomerabote Jonasocca imassa najaro. <sup>40</sup> Najaroa aji Jonaso pina huatiajarissa nadsa aba imehi bodidsa huada huatinimade tojari nehe madidsajarissa najaro aji ohua Madija Bedi ojaroponi nidsa ohuatiadsa nami bodihuaji huada huatinimade tojari nehe omadinitohui. Pina Jonasocca imassa najaro ohuadsa tojanitohui -nade Jeso. <sup>41</sup> —Nadsapi nidsa madija huapimacca ima cattermanijinecca huada bacco tadsapi Dio Pohua baccohuaaji tidomodeni huanitohui. Nahidsapa odsa panani Ninibehuaaji madimanajaridenipa ticcadeni ima tiadenidsa inassonarimananijine huati toquinahitohui: “Tapi Jonasocca ima imittadsa ibodi cacajiqquimerade. Naraha tiadenidsapa Dio Atti cacomerabote deni tojajari madiraha pohua atti mittade iboqquiri tiquinajaro. Nema tiquinadsapi Dio tiadeni tohuattajo-baqquidsapa bica tani, inajaro” quinahitohui Ninibecca madija -nade Jeso. <sup>42</sup> —Najaro huadadsa dsama Sebahuaicca tamine amoneje madijaro naqui ticcadeni ima tiadenidsa inassonariniijine huati tanitohui. Poni attinipi: “Ohuapi dsama huaji tanihuaji omadiraha tamine Saromocca nahatohue omittanijine occajonade. Naraha tiadenidsa madijaripa denima nahato taraha pohua atti mittade iboqquiri tiquinajaro. Nema tiquinadsapi Dio tiadeni tohuattajo-baqquidsapa bica tani, onajaro” nanitohui Sebahuaicca tamine amoneje attinipi -nade Jeso.

*Satanacca dodosse tocorime toccaraha ccanipoma tahi*  
*Roca 11.24-26*

<sup>43</sup> Jesopa ima onihidsa mari icanabaqquijari. Pohua attipa: —Nadsama tocorime ojaria madija bodidsa madidsaraha qquenadsapa toccajari. Aji dsama huamo tanihuaji, passo nohueranihuaji pohua madihijine qquide toccadsa qqui qqui naridsaraha pohua madihijine bacco tajarajari. <sup>44</sup> Nadsapa: “Jehe, occa mamadi botehuaji occanipomana” najari tocorime atti. Nadsapa ccanipomajari. Bacco nanidsa madija pohua bodi tohuirehi qqui tadsapa pina odsa johue tocanehue huisso tocanajarossa naraha tomadirajaro. <sup>45</sup> Nadsapa tocorime toccapomadsa pohua tessedeni tocorime 7 quinaha jina inanibaqquijari. Najaridenipa denima tabaccoraqquiri naraha pohua tedseje jai tojedsimajari, madimanahijine. Nadsama ima nema najaro madijadsa tojadsapi pocca madie tabaccora taporaha dsotodepi denima totabaccorajaro. Tiadenidsa najarossa najaro tojanitohui. Jidapana tabaccoraqquiri tiquinehe timadimanajardeni otahimaridsa pajissa tiquinejeradsapi ticcadeni madie denima totabaccoranitohui -nade Jeso.

*Jeso imeni, pohua imecotedeni*  
*Maraco 3.31-35; Roca 8.19-21*

<sup>46</sup> Jehe, Jesopa madijadsa huatide tojaraha amossinihuajipa Jeso imeni, pohua imecotedeni tedseje: —Jesodsa huati inana -quinadsa pahuatohui domo huajari. <sup>47</sup> Nadsa Jesodsa madija ojaria attipa: —Ticca ami, timecotedeni amossinidsa domo huapaja. “Tiadsa huati inana” quinajari -najari.

<sup>48</sup> Naraha pohuadsa huati tajaridsa Jeso attipa: —Occa amipi ¿nejecojarona paji? Ohuemecotedeni naco ¿nejecojaridenina paja? -nade. <sup>49</sup> Aji, ia pocca dodosse tabaqquideni ia dsopi tabaqquidsapa Jeso attipa: —Ajararidenina pina occa amissa, pina ohuemecotedenissa quinajari, onajaro. <sup>50</sup> Madijadenipa occa Abi Dio memehuaaji madijari Pohua jipa tahicca ihinanamana najarodenina pina ohuemecotedenissa

quinajari. Amonejedeni naqui Dio Pohua jipa tahicca ihinanamana najarodenina pina occa amissa, pina ohuemecotedenissa quinajaro, onajaro –nade Jeso.

## 13

*Jesocca marinaja huidsaja ppappadecca ima tadsajani mari icanabaqquijari*

*Maraco 4.1-9; Roca 8.4-8*

<sup>1</sup> Dsotodepa najaro huadadsa Jeso odsadsa qquenadsapa coridsa inidicca ssiqiu-huaji toqquedsippadsa huittajari. <sup>2</sup> Madija huapi taha nahi pohuahuaaji jahidsippadsa Jeso mari icanabaqquihijine canoadsa toqquedsadsapa canoacca huihuittaridsa huittarijari. Nadsama madija huapimapa nahi coridsa inidicca ssiquidsa domo huajari. <sup>3</sup> Nadsapa Jeso pocca marinaja ajijaro namidsa imadinicca ima tadsajani pohuadenidsa huati huati tajari. Pocca imapi ajima najarode:

—Huidsaja ppappadepa pocca huidsaja huirade toccajari. <sup>4</sup> Nocco huira inaridsajari. Naraha motapa jahuihuaji catojaja najari. Nadsapa ppiriri jahironadsa amadsati saca quinajari. <sup>5</sup> Aja nocco huira naridsajari mota naco siba ccababa tanidsa catojajari. Nanidsapi ssiqui bicani badsira taraha nama naha huassinaja moro tajari. <sup>6</sup> Moro taraha jabo huapihuajira toccabaqquijari. Maji ccaponadsapa maji ppoconejine botejari. <sup>7</sup> Nocco mota naco namidsa cotihi caji tahihuaji catojajaria cotihi tedseje paja moro toquinarihi naraha cotihijine ssomi tojajari. <sup>8</sup> Naraha nocco mota huira naridsajaripa nami bicanidsa catojaridsadsapa mororo canaridsadsa bica taha napijari. Bono cajiridsadsapa ede ojariapa bono 100 naha cajijari. Ede ohuahaccapa bono 60 naha cajijari. Ede ohuahaccapa bono 30 naha cajijari. <sup>9</sup> Nadsama teribodeni ticajimanadsapi ohuatti timittamananissa taji, onajaro –nade Jeso.

*Madija motapa Jesocca marinaja mittamana-jarajari*

*Maraco 4.10-12; Roca 8.9-10*

<sup>10</sup> Nadsama ia, pocca dodosse tabaqqui iquejenajaropi Jeso pohuahuaaji huajijira icanadsa ajima inade: —¿Nejecotohui titahimari ajijaro namidsa imadinicca ima tadsajani pohuadeni mari mari titicanaridsabaqqui najaritta? –inade.

<sup>11</sup> Naraha Jeso iadsa ecomerade: —Jehe maittaccadsama Diocca cacahuehecca ima dsati najoraporaha madija inahattabaqqui-jaraccade. Naraha jidapanana Dio Pohuajine pocca cacahuehe tahimarini dsati tiadenidsana ahuato tani. Naraha madija motapa Dio Pohuajine pohuadenidsa ahuatora tadsa mittamana-jarajari –nade. <sup>12</sup> —Ajina, Diocca cacahuehe tahimarini mari ocanaridsabaqquihicca madija tohuattajaripa Djoline najaripa denima tohuattahitohui. Nadsapa najarina denima nahato tahissa tahitohui. Naraha Diocca cacahuehe tahimarini mari ocanaridsabaqquihicca madija mimitta naraha tohuatta-jaradsapa occa marinaja cappirahissa tahitohui. Badsira taha tohuattadsapa najaro naqui amossi nanitohui. <sup>13</sup> Nema najarojine otahimari ajijaro namidsa imadinicca ima tadsajani madijadeni mari ocanaridsabaqquija naridsapohui najari. Pohuadenipa qqii qqii toquinaraha pina qqii toquirahi najaripaja. Diocca dosseniji mimittamana naraha pina mitta-manerahi najari. Pohuadeni bodi naco ssamoqquijari najari. <sup>14</sup> Nadsama poccadeni imapi pina maittaccadsama Dio Atti cacomerabote Isahia dsodo inapojarossa najaro inanamanajaro. Aji Isahia attipa:

“Teribodeni ticajimanaraha pina timittamanerani nanitohui.

Tinoccodeni ticajimanaraha pina qqii tiquirani nanitohui.

<sup>15</sup> Ajajari madija bodideni tossamoridsadsapa paja tossamomanarihi nahitohui.

Huaribodeni moda nahi nadsapa pina mittamanerahi nahitohui.

Noccodeni naco modsi quinadsapa pina noccodeni cappiramanajarissa nahitohui.

Nama quinadsapa qqii toquinahijine ssamoqquijari, mittamanahijine ssamoqquijari,

bodideni tocahatterahijine ssamoqquiri nadsapa bodideni cacajiqquimera-manahijine ssamoqquiri nahi.

Nassa bodideni cacajiqquimera-manadsa ohuadsa toquejenadsapa onabicabaqquihito-huiraha”

nahi nade Dio –nade Jeso.

<sup>16</sup> —Naraha aji tiadenina ohua ocanahatoriri canajaro tinocodenidsa qqui tiquinaridsajaropi Dio tiadenidsa ima bicani inanajaropaji. Teribodenidsa naqui occa marinaja timittamanajaropi Dio tiadenidsa ima bicani inanajaropaji. <sup>17</sup> Pajissara tiadenidsa huati onajaro: Maittaccadsama Dio Atti cacomeraqquiri najarideni, Diodsa iboraqquiri najarideni naco occa nahatohue aji jidapana tiadeni qqui tiquinajarocca qqui toquinahijine tohuini quinaporaha tahide tojicapodsapa qqui toquina-jarajari. Aji occa marinaja timittamanajarocca naqui najaro mittamanahijine tohuini quinaporaha tojicapodsapa mittamana-jarajari –nade Jeso.

*—Huidsaja ppappadecca imapi ajima najarona paji –najari Jeso*

*Maraco 4.13-20; Roca 8.11-15*

<sup>18</sup> Nadsama Jesopa pocca marinaja ajijaro namidsa imadinicca ima tadsajani mari icanabaqquipomadsa naco pohua attipa: —¡Jari, titaharibomananissa taji! Huidsaja ppappadecca imapi ajima najaro: <sup>19</sup> Nocco huira inaridsajari mota jahuihuaji catojajaripa pina madija Diocca cacahuehe tahimarini mittamanaraha ja quina-jaradsa pina mittamanerahi nadsapa bodidenidsa Dio Atti toqquedsima-jerajarossa najaro. Aja ppiriri nocco saca inaridsajaripa pina maidsehe jinede Satana ccajonadsa bodideni inassamobaqquijarissa najaro. Nadsapa Dio Atti pohuadenidsa nohuerajaro.

<sup>20</sup> —Madija ohuaha bodidenicca imapi pina aji siba ccababa tajarocca imassa najaro. Dio Atti mittamanadsa amadsati huatidsemanajari. <sup>21</sup> Pohuadenipa Diodsa jehe dsanapomanahijineraha Dio Atti pohuadeni bodidsa toja-jerajaropi pina siba ccababa tanidsa nocco moro taraha jabo huapihujira toccabaqquijaricca imassa najaro. Nadsama aja maji ppoconejne botejaricca imapi Dio Attidsa jehe quinajar-iijine pohuadenidsa najidsohue ssonaridsa, ocasserani ahuamanadsapa jehe quidsati attidenia: “Epejena, Dio Attipi inebona” quinajari.

<sup>22</sup> —Madija ohuaha bodidenicca imapi pina namidsa cotihi caji tajaricca imassa najaro. Pohuadenipa Dio Atti mittamanaraha pohuadeni dsepedeni ihijimana najarotohuira disseraqquiri nadsapa Dio Atti tocahatterahissa tajarajari. Dsiniro tohuira quinadsa naco najaro imajine Dio Atti huatideni ajamamanajari. Poccadeni jeheniji pina aja nocco moro taraha cotihijine ssomi tojadsapa bono-jarajarissa najaro. Dio Atti mittamanaraha pohuadenijine Dio Atti madija ohuahadenidsa toja-jeranitohui.

<sup>23</sup> —Naraha madija ohuaha bodidenicca imapi pina aji nami bica tajarocca imassa najaro. Dio Atti mittamanadsapa jehe quinahissa tajari. Poccadeni jeheniji napidsapi pina aja nocco nami bicanidsa moro tahissa tadsapa bono cajijari. Ede ojariapa bono 100 naha cajiridsajari. Ede ohuahaccapa bono 60 naha cajijari. Ede ohuahaccapa bono 30 naha cajijari. Aja Diodsa jehe quinahissa tajaripa madija mari icanabaqquiridsadsapa madija ohuaha ohuaha quinaha Diodsa inanabaqqui-manahitohui –nade Jeso.

*Aroso jidsadsa trigo tedseje dsero quejemanicca ima*

<sup>24</sup> Jesopa pocca marinaja ajijaro namidsa imadinicca ima tadsajani madija mari icanabaqquipomajari: —Jehe, Diocca cacahuehe tahimarini onihi naqui pina huidsaja jinede pocca huidsajahuaji nocco bicahi huira inaridsajaricca imassa najaro.

<sup>25</sup> Dsome huapima cahadijadsapa pocca huadi ccajonajaria aroso jidsadsa trigo bicahi tetepidsa dsero nocconi pina trigossa najaro huira inaridsajaro. Huira inaridsaha



jicadsapa aja huidsaja jinededsa huadi tajaripa toccanijari. <sup>26</sup> Nadsapa trigo bicahi moro tajari, bono cajijari. Dsero pina trigossa najaro naqui moro tajaro. <sup>27</sup> Nadsa huidsaja jinedecca dodosse tabaqqui qqui toquinadsa pohuadeni dossede huaji jai tojanidsapa huati toquinajari: “Ia dossede ¿trigo noccora ticca huidsajadsa huira tajarajarittaco? ¿Nejecohuajicca dsero pina trigossa najaro nocconi ccajonajarotte? inajaro” quinajari. <sup>28</sup> Naraha huidsaja jinede attipa: “Jaho, madija ohuadsa huadi tajaripa dsero nocconi huira inaridsajaroa” najari. Nadsa pocca dodosse tabaqqui attidenipa: “Jipa tinadsapi dsero dsoppade jaijanipomana, inajaro” quinajari. <sup>29</sup> Naraha jinede attipa: “¡Poni! Najaro dsero dsoppa tiquinejerana. Trigo naco dsoppa tiquirana” najari. <sup>30</sup> “Apajaccana, pamaha napimanaccana. Nidsa trigo bono jadadsana ahuateo tahitohui. Nadsana bonotohui edema ti tiquinaridsahijine bica tahi. Nadsapa titidedenidsa ajima onanitohui: Jari, tahide dsero ti tiquinapona, onanitohui. Tide jicadsa ponira hua naqquidsapi jore nacossadsana botta tiquinaji, onanitohui. Naraha trigo bicahi bonotohui edema ti tiquinadsapa occa odsahuaji ohuadsa tojahijine jore jore tanimanajo, onanitohui” najari huidsaja jinede atti. Jehe, Diocca cacahuehepi najaro imassa najaro –nade Jeso.

*Jesopa mostaza noccocca ima tadsajani mari icanabaqquijari*  
*Maraco 4.30-32; Roca 13.18-19*

<sup>31</sup> Nadsapa Jeso pocca ima huati tapomahijine ajijaro namidsa imadinicca ima tadsajani mari icanabaqquipomajari: —Diocca cacahuehepi pina mostaza noccocca imassa najaro. Madijapa pocca huidsajadsa mostaza nocco ppa idsajari. <sup>32</sup> Najari mostaza noccopa potera tajari. Ppa nahi nocco ohuaha naco potera tajari caji taraha mostaza noccopa denima potera tahi. Naraha mostaza nocco moro tadsapa huidsajacca ppa nahidsa pohuana deni tojjari. Napidsapa pina ahua imehissa najari. Motaradsapa pohua ininedsa ppiriri pohuadeni tadsari bina tarimana tahi. Jehe, Diocca cacahuehecca ima mari ocanabaqquijaripa pina najaro imassa najaro. Tahidepi madija pamahadsa tojapojaro. Dsotodena madija huapimadsa tojaridsadsapi Diocca cacahuehedsa madija tohuapihitohui –nade Jeso.

*Jesopa pan ssaja tahijine quequejemacca ima tadsajani mari icanabaqquijari*  
*Roca 13.20-21*

<sup>33</sup> Nadsapa Jeso pohua tahimari ajijaro namidsa imadinicca ima tadsajani mari icanabaqquipomadsa naco: —Jehe, Diocca cacahuehe tahimarini onihi naqui pina pan ssaja tahijinecca imassa najaro. Amoneje pan inahatohuijinepa pan ssaja tahijine quequejema levadura trigo ria nahidsa icanejemajari. Ssaja tahijine quequejema badsira taraha trigo ria nahi harina 3 kilopa motarajari. Naraha ssaja tahijine quequejema trigo ria nahi harinadsa tojaribaqquidsapa ssaja tajari. Aji Diocca cacahuehecca ima naqui najaro imassa najaro. Tahidepa madija pamaraha dsotodena Diocca cacahuehecca ima dsama huapimadsa tojaribaqquidsapa madija huapimadsa tojaridsajaro –nade Jeso.

*Jesopa pohua tahimari ajijaro namidsa imadinicca ima tadsajani mari mari ihicanabaqqui najari*  
*Maraco 4.33-34*

<sup>34</sup> Jehe, Jesopa pohua tahimari ajijaro namidsa imadinicca ima onihi onihi najaro tadsajani madija huapima mari mari ihicanabaqqui najari. Pohuadenidsa huati tadsapa ajijaro namidsa imadinicca imadsara mari mari ihicanabaqqui najaride. <sup>35</sup> Jeso nama najaripa aja maittaccadsamacca Dio Atti cacomerabote Jeso tedsejemacca ima dsodo inaponicca najarossa inanajaro. Najaro ima Dio Atti dsodo nanidsa ajima najaro:

—Otahimari ajiaro namidsa imadinicca ima tadsajani mari mari ohocanabaqqui nahitohui.

Dsama onahato-geraccadsama naqui otahimari ahuatora tajonaraha.

Nidsa ojine najaro ima ahuatoridsadsapi madija huapima mari ocanabaqquiridsahitohui

—napohui nade Dio Atti cacomerabote.

*—Aroso jidsadsa trigo tedseje dsero quejemanicca marinajapi ajima najaropaji —najari Jeso*

<sup>36</sup> Nadsapa nahidsa Jeso madija huapima inebobaqquidsapa toqquemoranijari. Odsahuaji toqquedsimanidsapa nahidsa pocca dodosse tabaqquideni iapi pohuahuaaji huajijira inadsa huati inajaro: —Jari, jidacca huidsajacca aroso jidsadsa trigo tedseje dsero quejemani tahimarini huati tinapojaro iadsa huati timanipomaji, imittanissa tanijine, inajaro —nade.

<sup>37</sup> Nadsapa ia mari tocanabaqquijari: —Jehe, ohuapi Madija Bedi ojajaroa pina trigo bicahi huihuidadessa onajaro. <sup>38</sup> Nadsama huidsajapi ajiaro dsamassa najaro. Trigo bicahi noccopa pina madija Diocca cacahuehedsa toquejenajarissa najari. Pohuadenipa Dio Attidsa iboraqquiri najari. Naraha dseropi pina madija Diocca huadi Satana attidsa iboraqquiri najaridenissa najaro. <sup>39</sup> Nadsa dsero nocconi huihuidadepa huidsaja jinedecca huadi Satana. Nadsama nidsa trigo bono jadadsa ti nahijinecca huada bacco tajaropi pina nidsa dsama jicadsa Dio Pohuadsa toquejenajarideni icattejidsa-baqquihijine tahimarissa najaro. Aja trigo titidedenipa Diocca dodosse tabaqqui memehuaajicca. <sup>40</sup> Aji dsero huanagquidsa botta quinajinecca imapi nidsa ajiaro dsama jicadsa madijadsa najarossa najaro tojanitohui, onajaro. <sup>41</sup> Naraha nidsa ohuapi Madija Bedi ojajaroa memehuaaji omadipomadsa occa dodosse tabaqqui memehuaajicca dosse onaronaridsa-baqquidsapa imasiri mamaridedeni, imasiri totonanadedeni tedseje huapima icattejidsabaqqui-manahitohui, Diocca cacahuehedsa toquejena-jarahijine. <sup>42</sup> Najarideni huapimapa jororoni jiquejeranihuaaji hua idsimabaqqui-manahitohui. Nahihuaajipa ocasserani ahuamana-dsanapodsapa panodeni todsahi nadsa oji oji quinahitohui. <sup>43</sup> Nadsama icattejidsa-baqquimanaha jicadsapa madija Dio Pohua jipa tahicca inanamanajarodenina aja Pohuadsa toquejenajarideni huapima Abi Diocca cacahuehedsa madimana-dsanapodsapa pina maji dsibehi tajarissa quinahitohui. Nadsama teribodeni ticajimanadsapi ohuatti timittamananissa taji, onajaro —nade Jeso.

*Todsepetaji huatini ccara tanicca inajimani tahimarinidsa mari icanabaqquijari*

<sup>44</sup> —Jehe, Diocca cacahuehepi pina todsepetaji bicabote huatini ccara tanicassa najaro. Madijapa pajimaranihuaaji qquide ccaridsadsa todsepetaji tonajimani bacco inajaro. Todsepetaji bicabote, huatini ccara tanicca qqui tadsapa najaro todsepetaji denima inajimapomajaro. Nadsapa huatidsedsa toccanijari. Pocca odsahuaji bacco tanidsapa pohua dsepetaji nemanehi manaconitohui da inehe jicajaro. Najaro manaconi cajidsapa aja pohua qquide ccaridsapohuihuaaji toccapomajari. Nadsapa najaro dsama mitta inadsapi pocca tojajaro. Aji todsepetaji bicabote huatini ccara tanicca pohuajine tonajimani naqui pocca tojajaro. Najaro imassa najaro Diocca cacahuehe denima bica tadsapi madija pocca imabote nemanehi inebodsapi Diodsara huatidse-dsanapohuitohui —nade Jeso.

*Bicabote huatini ccara tanicca perla tahimarinidsa mari icanabaqquijari*

<sup>45</sup> —Jehe, Diocca cacahuehe tahimarini onihina naqui pina madija tomattocca huatini ccara tanicca perla mittade tohuini nadsa qquide ccaridsajari. <sup>46</sup> Nadsama perla bicabote huatini ccara tanicca bacco inadsapa jinededsa: “Ohuadsa tecahuaji” nadsa pocca odsahuaji toccanijari. Pohua dsepetaji inequeriqquidsa nemanehi da inadsapa

najaro manaconidsa perla mittade toccapomajari. Mitta inadsapi pocca tojajaro. Jehe, Diocca cacahuehepi najaro imassa najaro. Icca imabote nemaneha inebodsapi Diocca cacahuehe bicabote iadsa tojajaro –nade Jeso.

*Aba cocoro tahimarinidsa mari icanabaquijari*

<sup>47</sup> —Jehe, Diocca cacahuehe tahimarini onihi naqui pina aba cocoro imenibote passo imenihuaji tappa icadsippamanadsa joca icamoranimanadsapa aba ohuaha, ohuaha naha huemajari. <sup>48</sup> Nadsapa aba cocorodsa ijihissa tadsapa ssiquihuajina joca icamoranimanadsapa jassi tadsa aba bica tajarira icattejidsamanadsa dsaminedsa hua idsaridsamanajari. Naraha aba tabaccora tajaripa hua quinajari. <sup>49-50</sup> Najarossa nanitohui nidsa ajijaro dsama jicadsa naqui. Tahidepa Diocca huadidsa toquejenajarideni Dio inajidsobaquihijinepa pina aba tabaccora tajari tocatejidsadessa quinahitohui. Diocca dodosse tabaqqui memehujiccana madija tabaccoraqqui najari icattejidsabaqqui-manaccahitohui. Pohuadenira domo huahitohui. Najaridenipa jororoni jiquejeranihuaji hua todsimabaqquihitohui. Nahihuajipa ocasserani ahuamana-dsanapodsapa panodeni todsahi nadsa oji oji quinahitohui. Naraha ohuadsa toquejenajarideni, aja Dio Pohua jipa tahicca inanamanajarodenina Dio madihihuaji toquejenahitohui, onajaro –nade Jeso.

*Todsepetaji jadani, todsepetaji dsati tadsajani tahimarinidsa mari icanabaquijari*

<sup>51</sup> Nadsapa Jeso iadsa huati tajari: —¿Nija? Occa ima aji tiadeni mari mari ohocanabaqqui najaro ¿timittamananissa taqui? –nade. Nadsapa: —Jehe, imittani –nade, ia huapima.

<sup>52</sup> Nadsapa iadsa Jeso attia: —Nema nadsapi jodiodenicca marinaja maridedeni Diocca cacahuehe tahimarini dsatidsa toquejenadsapa pina odsa jinedessa quinajari. Odsa jinedepa pohua dsepetaji odsa bodihuaji ecahuajaro. Todsepetaji jadani caji, todsepetaji dsati naqui caji najari. Nadsapa pohua bodi nahato tadsa todsepetaji jadani dsojo inine tani. Todsepetaji dsati naqui dsojo inine tani. Nadsama aja Dio Atti maridedeni madija maride toquejenadsapa Dio Atti dsodo napojarocca, Diocca cacahuehe tahimarini dsati tadsajani maride nahatoqqui najari –nade Jeso.

*Jesopa Nasaretihuaji toccanidsa mari icanabaquijari*

*Maraco 6.1-6; Roca 4.16-30*

<sup>53</sup> Nadsama Jesopa pocca marinaja ajijaro namidsa imadinicca ima tadsajani huatide jicadsapa nahihuaji nebodsa <sup>54</sup> pohua napihihuajina toccanjaride. Odsa panani Nasareti bacco tanidsapa poccadeni Dio Atti mamarihuaji toqquedsimadsa mari icanabaquijari. Naraha nahicca madijapa Jeso canahatoriri canahi qqui toquinapo-jaradsa huajo caniredsa attidenipa: —A ¿nejecohuaji tohuattajaritta? –quinade. —¿Nejecojaricca nahatohue Jesodsa tojajarotte? –quinade. <sup>55</sup> —¡Naraha ajararipa ahua nanahatode bedia! Imeni oninipi Maria. Pohua imecotedeni naco: Satiaco, Dsodse, Ssino, Joda quinajaripajade. <sup>56</sup> ¿Pohua caripenedeni naqui aji imadinidsa madimana-jeraqui? Madimanani. Nadsama ¿nejecohujicca nahatohue pohuadsa tojajarotte? –quinade. <sup>57</sup> Nadsapa pohua atti mittade tojiperamanajari. Nadsapa Jeso attia: —Ohuadsa pajissa tiquinejeradsapi pina Dio Atti cacomeraqqui najarideni tahimarissa tinanamanajaro: Madija huapimapa aja Dio Atti cacomerabotedsa: “Pajissa Diocca dossenijia” quiquinanaraha aja pohua dsamariccapa nama quina-jarahi, pocca odsacca naco pohua attidsa jiperaqqui naha nama najonamanajari –nade. <sup>58</sup> Nadsapa nahihuajicca madija Jesodsa pajissa quina-jaradsapa pohua canahato-huajapohui canahicca huapi tejerani. Madija pamahara inanomibaqqujaride.

## 14

### *Huano Baotista dsoqquehicca ima Maraco 6.14-24; Roca 9.7-9*

<sup>1</sup> Nadsapa Jeso canahatori canaridsadsapa pocca ima tojaribaqquijaro. Nadsapa dsama arobeni Carireahuaicca tamine Herodepa Jesocca ima huati huati toquinahi mittadsapa <sup>2</sup> pocca dodosse tabaqquidsa huati tajari. Herode attipa: —Aja canahatori canajaripa Huano Baotista dsoqqueraha nahatonijari. Najaro nahatonihejine canahatori canahi -nahi nade tamine Herode.

<sup>3-4</sup> Nadsama Herode atti nama nadsa tahide pohuajine Huano Baotista inanadsoqqe-manapojari. Najaro imapi ajima najaro: Tahidepa tamine Herode pohua imecote Feripecca amoneje Herodia icajidsa ima tojajaro. Huanopa poccadeni ima mittadsa Herodedsa huati tajari: —Diocca dossenijidsapi timecotecca amoneje tidijidsadsapi bica tejerani -nanaja najari Huano. Najaro ima Herodia mittadsapi Huanodsa huadijaro. Ponicca maqquidsa dosse dosse nadsa tamine Herodepa pocca dodosse tabaqqui idossebaqquidsa Huano dama quinadsapa toponi cocoro todsimadsa coro idsimamanajari. <sup>5</sup> Nadsapa tamine Herodepa Huano Baotista dsoqquehijine tohuini naraha madija noppinedeni cappinajari. Ajana, madijadeni huapimapa: —¡Huano Baotista attipa pajissa! Puhuapa Dio Atti cacomerabote -quinajari huapima.

<sup>6</sup> Naraha huada onihidsa tamine Herode pohua tossonahicca huada bacco tadsa ejete inanajaro. Herodia bedeni dsobi dsobi todsadsapi huapima qqui toquinajari. Nadsapa tamine Herode ponicca dsobinaja bica tani qqui tadsa huatidsedsapa <sup>7</sup> dsohuatodsa pohua attia: —Jari jata, ticca huatinaja ohuadsa huati tinaji. Nadsapi tiadsa da onanitohui -najari. —¡Pajissa! Tia ocamaidsa-jerajaro, ohuattissa onanitohui -nahi nade tamine Herode. <sup>8</sup> Nadsapi dsohuatocca ami attinipi: —Huano Baotista tatitohui huati tinaji -nadsa najarossa inanajaro. Attinipi: —Ohuadsa Huano Baotista tati parato imehidsa huittidsadsa da ticanajo -nani nade dsohuato attini.

<sup>9</sup> Nadsapa Herode pohua bodi jipera taraha pohua atti tahide: —Tia ocamaidsa-jerajaro, ohuattissa onanitohui -nanaja napodsa pohua tessedeni: —Pajissehe huati tajari -quinahijine tohuini nadsapa: —Jehe, Huano matto ca tijidsadsapa paratodsa ponidsa da ticanajo -najari. <sup>10</sup> Nadsapa pocca dodosse toponi cocorohuaji dosse inajari. Nadsapa tamine Herode attidsa Huano matto ca ijidsamanajari. <sup>11</sup> Nadsama tati paratodsa ettidsadsa dsojo icadsimanidsapa dsohuatodsa da icanajari. Nadsapi dsohuato poni imenidsa da icanajari. <sup>12</sup> Nadsapa Huanocca dodosse tabaqquideni assiretohui jahijonadsa dsojo ininemanajari. Nadsapa ppa idsamanajari. Dsotodepa: —Najaro ima Jesodsa huati inana -quinadsa Jesodsa huatide jai tojajari.

### *Jeso madija 5 mil quinajarideni inajipabaqqujari Maraco 6.30-44; Roca 9.10-17; Huano 6.1-14*

<sup>13</sup> Jesopa —Huano Baotista dsoqquehi -quinahi ima mittadsapa pohua motta madihijine madija madide nohuerahihuaji canoadsa jaijaro ia huapima. Naraha madija huapimapa —Jeso toccahi -quinahi ima mittamanadsa odsa onihi onihi naridsanicca madija Jeso pohuatohui coridsa huapi jai tojabacossajari. Dsotorinihuaji jai huajanijari. <sup>14</sup> Nadsapa Jeso canoa huana tocanadsa toqquemorajari. Nanaja madija pohuatohui jai tojajarideni bacco toquinapodsa domo hueri nahi qqui inabaqqujari. Nadsapa pohuadenitohui huati cahanari canadsapa comaqqui najarideni inanomiridsa-baqqujari.

<sup>15</sup> Nadsapa maji toccadsa pocca dodosse tabaqqui iapi Jesodsa huati inade: —Ahuajipa madija madide nohuerahi. Maji toccahi. Madija dosse tinanibaqquijo, ahujipa dsamatapa mitta quinahijine nohuerahi. Aja, odsacca dsamatapa mittade jai tojanina -inade.

<sup>16</sup> Naraha Jesopa: —Jai tojanihijinepa ¡pohua! Ajadsa tiadeni tinaji-pabaqquimanajo -nade. <sup>17</sup> Naraha iapi: —Iadsapa pan 5, aba pama napaja. Denima icappirani -inade. <sup>18</sup> Nadsapa Jeso attia: —¡Apaja! Najari ohuadsa teccajonamanajo -najari.

<sup>19</sup> Nadsapa Jeso madija huapimadsa huati tajari: —Nani dsero caji tanidsa jassi jassi tineri naridsaji -nade. Nadsapa Jeso pan 5 naha inacca, aba pamaha idsaba nadsa memehuaji tocattamacossa nadsa Diodsa huati tajari: —Jehe, epejeni. Ticca daniji iadsa bica tahi -najari. Nadsapa Jeso canahatori canajarijine pan, aba najari tohuapidsa icanabobiridsadsapa pocca dodosse tabaqqui iadsa pan da inabaqquijari. Iana madija jassi jassi teri najaridenidsa pan da inabaqquiridsajaride. <sup>20</sup> Da inabaqquiridsadsa jipamanadsapa accararidsa-manajari. Jipamanahissa taraha mota tojajari. Pan bobí, aba ime mota inaccaniridsa-manadsapa quiqui 12 naha ijiridsajari. <sup>21</sup> Nadsa aja madija jipamanajaridenipa maqquideje 5 mil quinajari. Denima poccadeni amoneje, poccadeni ejedenideni naco jipamanajari.

*Jeso passo tetepi ccajonajaricca ima*

*Maraco 6.45-52; Huano 6.16-21*

<sup>22</sup> Nadsapa canahatori canahicca pan jipamanahi nattipa Jeso pocca dodosse tabaqqui ia coridsa jippehuaji ia dosse tabaqquipojari: —Jari, canoadsa jai tijedsadsa tahide jippehuaji jai tijapoji, onajaro -nade. Naraha Jeso pohuapa nahidsa ibocajari. Nadsapa madija huapimadsa huati tajari: —Epejeni, huapima jai tijanina -nade. <sup>23</sup> Nadsapa madija jai tojanihijine huati taha jicadsapa manaco pohua motta ssonohuaji denima toqquemorajari, imehi Diodsa huati tahijine. Jeso pohua motta nahi ssonohuaji Diodsa huatide tojadsa cadsomejari. <sup>24</sup> Naraha iapi coridsa nocconi ori inaraha jojode itedsejema ccajonadsapi passo ssoda ssoda najarojine canoa quehenacossajaro. <sup>25</sup> Nadsapa ssiajaricossadsa Jesopa qquedsippanidsa passo tetepi iahuaji ccamissajonadsa ia bacco tamissabaqquijari. <sup>26</sup> Nadsapa Jeso passo tetepi ccajonahi qqui inadsapi otessedeni tedseje ijabojo najarode. Pohua noppine icappinadsapi johua johua inade: —¡Tocorime itidija! -inajarode ia huapima.

<sup>27</sup> Naraha iadsa Jesopa: —¡Ticappinamana tejeraji, ohuapi ohua! -nade.

<sup>28</sup> Nadsapa Pedro attia: —Ohua Medsede ¿pajissa tiaqui? Pajissa tijadsapi tiahuaji passo tetepi occanijine ohuadsa huahua taji, onajaro -najari.

<sup>29</sup> Nadsapa Pedrosda Jeso huahua najari: —Jehe, ticcajonaji -najari. Nadsa Pedropa canoadsa huittidsaraha totehemá, passodsá toqquedsippadsapa Jesohuaji passo tetepi toccajari. <sup>30</sup> Naraha jojode dacorajaro, oppina tani qqui tadsa Pedro bodi cappinajari. Cappinadsapa passodsá jaro dsanajari. Jaro dsanadsapa Jesotohui huahua najari: —¡Ohua! ¡Ohua! ¡Ohua Medsede, ohua tidimoraji! -najari Pedro.

<sup>31</sup> Nadsa Jesopa amadsati Pedro dsepedsa dama mari idsanadsapa huati tajari: —Pedro, ticca jeheniji pajiranissa tejerararojine jaro tidsanajaropaji. ¿Nejecotohui ohuadsa: “Jehe, Jesopa passo tetepi occanijine pajirahi” tejerararo? -nade Jeso.

<sup>32</sup> Nadsama canoadsa huededsanidsapa jojode totappajaro. <sup>33</sup> Nani canoadsa jassi idsaraha ia huapima ibodipi: —Jeso deni tojahi, iapi ajimani iquejenani -inadsa Jeso baccohuaji ipitodsá jassi idsadsapi pohuadsa huati inajaro: —Pajissa, tiapi Dio Bedi tijani -inajarode, ia huapima.

*Jenesarehuaji Jesopa comaqquri najari inanomiridsa-baqquijari*

*Maraco 6.53-56*

<sup>34</sup> Dsotode coridsa jippehuaji iaqquejidsadsapi dsama onini Jenesarehuaji bacco inajaro. <sup>35</sup> Nadsapi jajemoradsa nahihuaji madimanajarideni Jeso qqui toquinajari. Nadsapa —Jeso iadsa bacco nahi -quinahi ima tojaridsadsapi comaqquri najarideni pohuadeni tesse eheccejona-baqquimana najaride. <sup>36</sup> Nadsama huapima Jesotohui



disseraqquri nadsa pohuadeni attidenipa: —¡Jeso, ohua tinanomiji! ¡Ticca etero iponira bara onanijine ahuaqi ticcajonaji! —quiquinanajari. Nadsapa pocca etero iponi bara quinarideni huapimapa tocanomireridsahissa tajari.

## 15

### *Jodiodenicca marinajajine Diocca dosseniji huahuattajo tojajaro*

#### *Maraco 7.1-13*

<sup>1</sup> Nadsapa huada onihidsa odsa panani Jerosarehuajicca jodiodeni marinaja pariseodsa jehe quinarideni, jodiodenicca marinaja maridedeni tedseje Jesodsa bacco najonamanajari. Jesocca dodosse tabaqqui pohuadeni dsepe ssahuarahi jipamanahi qqui toquinadsapa Jesodsa huati toquinajari: <sup>2</sup> —¿Nejecotohui ticca dodosse tabaqqui jodio quejenaraha icca ididenicca marinaja ecahuamana-jerajaro? —quinade. —Ajana, pohuadeni dsepe ssahuarahi jipamanadsapa Diodsa bica tejerani, iadsa naqui oppina tani, ihinanajaro —quinade.

<sup>3</sup> Naraha Jesopa: —Jari, tahide ohuatti tecomeramanaji. ¿Nejecotohui tiadenipi Diocca dosseniji nahatoqquri tiquinaraha najaro dosseniji tecahuamananissa tejerajaro? Aji ticcadeni ididenicca marinajadsana disseraqquri tiquinadsapi Diocca dosseniji ponima tinanamanajaro. <sup>4</sup> Ajina, Diocca dossenijipi:

“Ticcadeni abidsa, ticcadeni amidsa tetideni huaqquri nana. Pohuadenitohui tetideni huaqquri nadsa attidenidsa iboraqquri tiquinana” napohui nade.

Pohua atti naqui:

“Madijapa imehidsa, imenidsa imasiri inanadsapi manaco najaripa dsoqquehito-hui”

napohui nade Dio Atti, Moisesijine dsodo nanidsa. <sup>5</sup> Naraha tettidenipi: “Madija imehidsa, imenidsa pohua attipa: ‘Jaho, tiadeni acco ocamabaqquinijineraha ocajijaro huapimapa Diodsa da onahijine onapodsapi tiadeni acco ocamabaqquinijine opajira-jerani’ nadsa pocca abi, pocca ami acco icamabaqqui-jaradsapa bica tani” tiquinaraha. <sup>6</sup> Ticcadeni madijacca marinajadsana “bica tani” titiquina nadsapi tijinedeni Diocca dosseniji huahuattajo tinanamanajaro. <sup>7</sup> Jaho, tiadenipi maidsehe ticajimanani. Maittaccadsama Djohne Pohua Atti cacomerabote Isahiapa ticcadeni imassa nehe dsodo inapojaro. Jidapanana najarossa najarodsa timadimanajaro. Ajana, maittaccadsama Djohne Isahiapa:

<sup>8</sup> “Ajajarideni madijapa ohuadsa: ‘Dio, tiapi bica tinani’ quiquinanaraha pohuadeni bodidenidsa otohui quina-jaraha.

<sup>9</sup> Pohuama ohuadsa jiri jiri quiquinanajari. Pohuadeni maride naco: ‘Dio Atti mari mari inajaro’ quiquinanaraha madijacca marinajara mari mari nanarid-samana najari”

napohui nade Dio Atti —nade Jeso.

### *Tabaccorehe madija bodidsa ahuatomsapi imasiri toja tani*

#### *Maraco 7.14-23*

<sup>10</sup> Dsotodepa Jeso madija pohuahuaji jahijonahijine tohuideni huahua najari. Pohuahuaji bacco najonamanadsa Jesopa: —Jari, ohuatti titaharibobo canaji timit-tamananissa tanijine —nade. <sup>11</sup> —Tiadenidsapi jijipa oppina tahicca caji tahi. Madija nama nahicca jipadsapa tettidenipi: “Diodsa bica tejerani, Moisesicca marinajadsa naqui oppina tani” titiquina najaro. Naraha ohuattipi ajima najaro: Huapima itaparipa dappi inadsa ibodidsa tojadsapa imasiri toja-jerani. Naraha ebenodsa huati huati ihinanajarojinena madijadsa imasiri ihinanamana najaro —nade Jeso.

<sup>12</sup> Nadsapi ia pocca dodosse tabaqqui iquejenaropi madija atti atti quinahi imittadsa manaco Jesodsa huati inajarode: —Nija, jidacca huati tinajarocca ima pariseodeni mittamanadsapa tettidsa nacasseraqquri nahi ¿nahato tinaqui? —nade.

<sup>13-14</sup> Naraha Jeso attia: —¡Epeje! ¡Nama dsanapomanahitohui! Madija occa Abi Dio memehuaji madijaridsa toquejenajaridenipa pina pocca huidsajacca ppa nahissa quinajari. Naraha aja pariseodenipa pina pohuama moro toquinajarissa quinajari. Nadsama huidsaja jinedepa pohuama moro tahicca jaboma dsoppa inadsa ajacca hua inajari. Dio naco najaro imassa inananitohui. Pohuadsa toquejena-jarajarideni aji jororoni jiquejeranihuaji hua idsimabaqquihitohui. Ajana, pohuadeni attipa: “Dio Atti maride iquejenajaropi pina noccodeni siri jahinedeni dsopi icanabaqquijarissa inajaro” quinaraha pohuadeni huapima naco pina noccodeni sirissa quinajari. Pohuama noccodeni siri ohuahadeni jahinedeni dsopide toquejenajari. Nadsama nocco siri pamahapa pohua tesse jahine dsopide tojaridsadsapa odi tohuajarodsa pohuadeni pamahapa tocatojedsimera tahi. Aja pariseodenipa pina najaro imassa inananajaro. Paji, pohuadenidsa tiquejemamana tejeraji, onajaro -nade Jeso.

<sup>15</sup> Nadsa Pedropa Jesodsa huati tajari: —Ia Maride, ticca marinaja aji “Huapima ita- pari dappi inadsa ibodidsa tojadsapa imasiri toja-jerani” tajaropi ¿nejecoma najaro? -nade Pedro. <sup>16</sup> Nadsapa Jeso attia: —¿Tiadeni naqui occa marinaja timittamanajerajaroqui? <sup>17</sup> Timittamananissa tanijinepi tiadeni mari ocanabaqquipomana. Aja ejeridsa toqquedsimajari itapari. Itaparipa idsonedsa totoqquedsima najari. Dsotode miji inadsapa toqqueqquimajari. <sup>18</sup> Naraha ejeridsa qquenajaropi etti. Ettipi ibodi huatodsa ebenojine huati huati inajaro. Najaro huati huati inajarojinena imasiri totoja najaro. <sup>19</sup> Ajina, tabaccorehe huapimapi madija pohua bodidsa ahuatomadsa pohua todossenidsapa imasiri inananajaro. Najaropi pina madija imasiritohui pohua bodi huatojari, madija inanasoqquehijine tohuini najari, madija amoneje cajiraha amoneje onihi ajade tohuini najari, amoneje maqqui cajiraha maqquideje ohuaha najade tohuini najaro, maqquideje tabiraraha amoneje ajade tohuini najari, amoneje tabiraraha maqquideje najade tohuini najaro, najaro ima madija pohua bodidsa ahuatomadsapi imasiri toja tani. Tabaccorehe onihi naqui pina botie tohuini najari, maidsehe huati tahijine tohuini najari, madija tatamasso nahijine tohuini najari. <sup>20</sup> Najaro tabaccorehe huapimajinepi madija pohua bodi totabaccorajari. Najarojinena madija imasiri ihinanamana najaro. Naraha idsepe ssahuarani ijipadsapi ibodidsa imasiri toja-jerani. Aja jodiodeni marinaja pariseodsa jehe quinajarideni, jodiodenicca marinaja maridedeni tedseje attidenipa: “Ia ehuerani icca ima Diodsa tohuirenijinepi huajijiradsa idsepe ssahua ssahua inadsa tohuirenijine” quiquinanaraha ibodidsa imasiri ecahuadsapi idsepera ssahua inaraha imapi tohuirenijine ssamo tani -nade Jeso.

### *Jodio madija jeraraha Jesodsa pajissa najaro*

#### *Maraco 7.24-30*

<sup>21</sup> Nadsapa nahihuaji mari icanabaqquia jicadsapa Jeso toccajari. Odsa panani pamehe Tiro, Sidohuaji toccajari. <sup>22</sup> Nanihuajicca amonejepi Canahacca madija, jodio jerani. Najaro amoneje bacco ijidsade. Jeso qqui tadsapi huahua huahua najaro: — ¡Ohua Medsede, tiapi maittaccadsamacca tamine Dabi Potemahi tijajaro! ¡Otohui teti huana taji! -nade, johua johua nadsa. —Occa ejedeni tocorime cajijaro. Najarijine ponipi ocasserani ahuaadsanapojaro -nade.

<sup>23</sup> Naraha Jeso ponidsa huati tajarajari, joma najari. Nadsapi ia pocca dodosse tabaqquia pohuadsa huati inajaro: —Apaja, ponidsa: “¡Ticcaniji!” taji, inajaro. Aji inattihuaji huahua huahua namissajonajaro tocasserani nani -nade. <sup>24</sup> Nadsapa Jeso attia: —Occa Abi Dio ohua dosse naronajaripa Isaraeri potemahi jodiodenidsara ohua dosse naronajaride. Najaridenipa pina edede jano toquejenajarissa quinajari -nade Jeso.

<sup>25</sup> Naraha ponipi dissera tadsapi joppa namissajaro, tossoqquima, Jeso pohua baccohuaji poni pitonidsa huittajaro. Poni attinipi: —¡Ohua Medsede, ohua

acco ticamaji! -nade. <sup>26</sup> Nadsapa Jeso ponidsa huati tajari: —Madija ohuaha jodio quejena-jarajari tahide acco ocamabaqquipohuijinepa bica tejerani. Najaro imapi pina madija pocca ejedenidenidsa dsamatapa da inaraha idinidsa pocca ettedsana da inajarissa najaro. Naraha Diocca madija jodiidenina tahide acco ocamabaqquipohuijine bica tani -nade Jeso.

<sup>27</sup> Nadsa Jeso attidsa ponipi: —Pajissa, ohua Medsede, naraha ettepa pohua jinedecca huahuanaridsa dsamatapa tabotto catojadsapa pohua naco jipajari. Jodio ojajeraraha ohuadsa ticca acco camehe badsira tehe tinanaji, onajaro -nade Jesodsa.

<sup>28</sup> Attini nema nadsapi ponidsa Jesopa: —Jehe, amoneje, tiapi ohuadsa jehe tanissa tajaro. Ohuadsa tibodipi: “Jehe, Jesopa occa ejedeni inanomihijine pajirahi” tadsapi ticca huatinaja tiadsa onanana, onajaro -nanaja nadsapa ponicca odsahuaji bedeni tonomijaro.

### *Jesopa huapima inanomiridsa-baqqujari*

<sup>29</sup> Jehe, Jeso toccanidsapa Carireacca coridsahuaji toqquedsippanipomajari. Coridsa poni huapi toccabacossajari, ssonohuaji toqquemoradsapa nahi ssonodsa huittajari.

<sup>30</sup> Nadsapa madija huapima Jesotohui ssonohuaji jahimorajari. Jesodsa bacco nimoramanajaridenidsapa isso siri quejemamana, nocco siri quejemamana, biji siri quejemamana, ebena siri quejemamana najari. Comaqquri najari huapi taha quejemamanajari. Nadsapa Jesohuaji comaqquri najarideni pohuadeni tesse eccajonabaqqui-manadsapa pohua baccohuaji ettaridsamanadsa inanomibaqqujari.

<sup>31</sup> Inanomibaqquidsapa madija nahidsa queriqquimanajarideni qqui toquinadsa jabojo quinajari. Aja ebena siriraha atti nimanipomajari. Biji ttomoraha biji cajimani-manapomajari. Isso siriraha issodeni biquemaniridsa-manadsapa jahiridsapomajari. Noccodeni siri naco noccodeni biquemanimanajari. Nadsapa madija attidenipa: — ¡A, Isaraeri potemahi jodiidenicca Diopa bica tahi, deni tojahi! -quinajari, huapima Diodsa huatidsemanadsa.

### *Jeso madija 4 mil quinajarideni inajipabaqqujari*

#### *Maraco 8.1-10*

<sup>32</sup> Nadsapi ia pocca dodosse tabaqqui iquejenajaro Jeso itohui huahua napomad-sapa iadsa huati tajari: —Madija huapimatohui ohuati cahanariri canani. Huada 3 nehe ohuadsa jahiridsadsapa pohuadeni tapari jicajari. Nema nanipi pohuadenidsa: “Jai tijaniji” onanijine jipera onajaro. Pohuadenipa pemi huatiacossaja camarana -nade Jeso.

<sup>33</sup> Naraha pocca dodosse tabaqqui iquejenajaro ettipi: —Naraha iapi madija maddide nohuerahihuaaji iqueriqquidsapi ¿nejecohuaji madija huapima jipamanahijine dsamatapa mitta inapadsaja? -inajarode. <sup>34</sup> Naraha iadsa Jesopa: —¿Nejecoma naha pan ticajimanani? -nade. Nadsapi ettia: —Pan 7 naha icaji, aba bedi pamaha icaji nani -inade.

<sup>35</sup> Nadsapa madija huapimadsa Jeso huati tajari: —Jari, jassi tinaridsaji -najari.

<sup>36</sup> Nadsapa pan 7 naha pohua dsepedsa inacca, aba pamaha idsaba nadsa Jesopa Diodsa huati tajari: —Jehe Abi Dio, epejeni, ticca daniji iadsa bica tahi -nadsapa pan icanabobiridsajari. Icanabobiridsadsapa pocca dodosse tabaqquideni iadsa da inabaqqujari. Iana madija huapimadsa da inabaqquiridsajaride. <sup>37</sup> Nadsapa Jeso canahatori canajarijine pan, aba najari tohuapidsa madija huapima jipamanadsapa accararidsa-manajari. Jipamanahissa taraha mota tojajari. Pan bobi, aba ime mota iana inaccaniridsadsapa quiqui 7 naraha iijiridsade. <sup>38</sup> Aja jipamanajaridenipa maqquideje 4 mil quinajari. Denima poccadeni amoneje, poccadeni ejedenideni naco jipamanajari. <sup>39</sup> Dsotode madija huapimadsa Jeso attipa: —Jehe, jidapanana jai tijaninissa tana -najari. Nadsapa Jeso canoadsa toqquedsanipomajari. Coridsa jippehuaji jaijadsapi dsama Macadaohuaji bacco inajaro.

## 16

*Pariseodeni, sadoseodeni tedsejepa: —Jeso canahatori canahi qqui inana –quinajari Maraco 8.11-13; Roca 12.54-56*

<sup>1</sup> Jesopa dsama Macadaodsa bacco tadsa nahicca Isaraeri potemahi jodiodeni mota marinaja onini pariseodsa jehe quinajarideni, marinaja onini sadoseodsa jehe quinajarideni tedseje pohua qquide jahijonajari. Pohuadeni bodipa: —Jeso nattome inana, pocca ima tossamonijine –quinadsapa Jesodsa huati toquinajari: —Jeso, pajissa Diocca dacorehe ticajidsapi memehuajicca nahatohue bicabote ahuato tinanaji. Qqui inana –quinade. <sup>2</sup> Naraha pohuadenidsa Jeso attipa: —Tiadenipi maji tocca-cca nadsa memehuaji maccohua ssire-re nani qqui tiquinadsapi: “A, dsemassapi meme bica tanitohui” titiquina najaro. <sup>3</sup> Aji dsidsidsamassa naqui memehuaji maccohua diji tadsa tettidenipi: “Jidapapi jojode, passo caji tani” titiquina najaro. Meme qquide nahatoqquiri tiquinaraha aji jidapanacca ima dsati tojajaropi qquide ssamoqquiri tiquinani. Diojine ajijaro dsamadsa Cristo-Mesia dsepe ijiridsahi tiadenidsa ahuato taraha tiadenipi ticahattera-jerajaro –nade Jeso. <sup>4</sup> —Jidapana timadimanajarodeni tabaccoraqquiri tiquinehe timadimanajaro. Tahidepi tettideni: “Diocca iquejenani” tiquinaraha dsotodepi Pohua Atti tinebomanajaro. Tiadenipi ocanahatoriri cananijine tohuira huati tiquinaraha occa nahatohue onahatona onejerani. Naraha ocanahatoriri cananica ima ojariena qqui tiquinanitohui. Najaropi Jonasocca imassa najaro –nade Jeso. (Aja pohua atti nama najaripa Jonaso pina huatiajarissa naraha Diojine tossiajadsa madipomajari.)

Nadsapa nahihuajicca madija inebobaqquidsa Jeso toccapomajari.

*—Paji, marinaja onini pariseo, marinaja onihi onini sadoseo naqui tiadenidsa toja-jerana –najari Jeso*

*Maraco 8.14-21; Roca 12.1*

<sup>5</sup> Nadsapi Jeso pocca dodosse tabaqquideni ia huapimapi coridsa jippehuaji jaijaraha ijipanijine itapari eti ajimadsapi dsojo inajarade. <sup>6</sup> Nadsama nahi canoadsa jassi idsadsa Jeso iadsa huati tajaride: —Tetideni huatoji. Marinaja onini pariseo, marinaja onihi onini sadoseo naqui pina pan ssaja tahijine quequejema tahimarissa najaro. Paji, najaro tiadenidsa toja-jeranijine tiadenipi dacoco tijiraji, onajaro –nade Jeso. <sup>7</sup> Pohua atti nama nadsapa iara ojidsa huati icanirere canade: —¿Nejecotohui pohua atti nama najari? Aji ijipanijine pan icappirajarocca huati tajarirana –inade. <sup>8</sup> Naraha Jesopa ibodi nahato tadsa huati tajari: —Jaho, ticcadeni jehenijipi badsira tani. ¿Nejecotohui ohuadsa: “Jehe, Jesopa ia tonajipabaqquihijine pajirahi” tiquinejerani? ¿Nejecotohui pan ticappiramananica imadsara imahaha ticanajaro? <sup>9</sup> ¿Nejecoma nadsa ticahatteranijine? Tibodideni huatomaji. Madija 5 mil quinaraha pan 5 naha dside onariridsadsa jiparidsamanajaride. Mota tojadsapa quiqui ijiridsahi qqui tiquinaraha ¿tetideni ajimajaroqui? <sup>10</sup> Aja madija 4 mil quinaraha pan 7 naha dside onariridsadsa jiparidsamana-pomajaride. Motapa quiqui ijiridsahi qqui tiquinapomaraha ¿tetideni ajimajaroqui? <sup>11</sup> ¿Nejecotohui occa marinajadsa tibodideni huatoma-jerajaro? Pancca ima huati onejerapa. Aji pariseo, sadoseo najaro marinajassa tinanamana-jeranijine dacoco tijiraji, onajaro. Najaro marinaja pamehepi tojaribaqquii tani. Pina pan ssaja tahijine quequejema tahimarissa najaro –nade Jeso.

<sup>12</sup> Nadsana ibodi huatomajaro. Jesopa pan ijipanijinecca quequejema tahimaridsa ia mari tocanabaqquijaripa marinaja pariseo, marinaja sadoseo iadsa toja-jeranijine huati huati tajari inade.

*—Jesopa Cristo-Mesia –najari Pedro Maraco 8.27-30; Roca 9.18-21*

<sup>13</sup> Dsotode Jeso, pohua huatimadedeni ia inadsa odsa panani Sesarea de Piripohuaji jaijajaro. Jahui jaijadsa Jeso iadsa huati tajari: —Madijapa ohua Madija Bedi otahimari huati huati nanaridsamana nadsapa ohuadsa attideni ¿nejecoma nejecoma quiquinanjari? —nade Jeso iadsa.

<sup>14</sup> Naraha ettipi: —Tiadsa madija motapa: “Hvano Baotista tijani” quiquinanjari. Ohuahadenipa: “Maittaccadsamacca Dio Atti cacomerabote Eria tijani” quiquinanjari. Ohuahadeni naco: “Maittaccadsamacca Dio Atti cacomerabote Jeremia tijani” quiquinanjari. Madija ohuaha attideni naco: “Maittaccadsamacca Dio Atti cacomerabote ohuaha tijani” quiquinanjari —inade Jesodsa.

<sup>15</sup> Nadsapa Jeso iadsa huati tajari: —Naraha tiadenidsapi ¿nejecojari ojan? —nade.

<sup>16</sup> Naraha manaco Pedro huati tajari: —Tiapi Cristo-Mesia tijani. Dio camitta tajari Bedi tijani —nade.

<sup>17</sup> Nadsapa Pedrodsa Jeso attipa: —Jehe Ssino, tiapi Hvanocca ejedeni tijajaro. Diopa tiadsa ima bicani inanjaro. Aji otahimari nahato tinajaropi madijajine jerani. Occa Abi memehuari madijarina otahimari Cristo-Mesia ojan tiadsa ahuate inanjaro. <sup>18</sup> Jidapapi tia onipi “Pedro” onajaro. (Ettidsapi: Siba, inajaro.) Tiapi otahimari mari ticanabaquidsapa ohuadsa pajissa quinajarideni tohuapiridsahitohui. Nadsapi otahimaridsa quequeriqquimana nahijinecca tojaridsanijine. Najaro otahimaridsa quequeriqquimana nahiccapi dacorajaro, pina sibassa najaro. Amossi nanijine ssamo tajaro. Dsoqquehecca dacorehe naqui otahimaridsa quequeriqquimana nahicca inajicanijine pajira-jerajaro. <sup>19</sup> Pedro, occa dacorehe tiadsa onananitohui, tetti dacoranijine. Najaropi pina Diocca cacahuehecca noccobijicca pipico tiadsa da onajarissa nahitohui. Madija otahimari mari ticanabaquidsa pajissa quinadsapa Diocca cacahuehedsa toquejenahitohui. Pina Diocca cacahuehecca noccobiji pahuadenidsa ticanahabajarossa nanitohui. Tetti dacorarojine naqui ajijaro namicca imadsa: “Jehe, bica tani” tadsapi Dio memehuari madijari naco: “Jehe, bica tani” nahitohui. Naraha ima onihidsa: “Najaropi poni, bica tejerani” tadsapi Dio memehuari madijari naco: “Poni, bica tejerani” nahitohui —nade Jeso.

<sup>20</sup> Nadsapa pohua huatimade iadsa Jeso pohua attipa: —Ohuapi Cristo-Mesia ojan madija ohuahadenidsa tecomamanaccana —nade.

*Jesopa pohua dsoqquehicca ima huati tapojari*

*Maraco 8.31–9.1; Roca 9.22–27*

<sup>21</sup> Dsotode Jeso pocca dodosse tabaqqi ia mari tocanabaquidsapa ajama najaride: —Occa Abicca dossenijidsa odsa panani Jerosarehuaji occanitohui. Nanidsa jodiodeni ime jocohuideni, dada toqqumade tamedeni, jodiodenicca marinaja maridedeni quinajaridenijine najidsohue imeni ocasserani onahananitohui. Nadsapi ohua inanadsoqqe-mananitohui. Naraha ohua ppa idsamanaraha huada huatinimade tojari nadsapi Abi Dio ohua nahatonihitohui —nade Jeso.

<sup>22</sup> Naraha Pedroa Jeso iacca-cca nadsa huati tajari: —Jidacca ima huati tinajaro ticca ima nema najaro imapi huati tina tejeraji. Diopa tidsoqquenijine jipera tahi. Dio tia cacahuahi —nahi nade Pedro. <sup>23</sup> Naraha Jeso tahide huajanidsa Pedrodsa huati tajari: —¡Paji, otedsejemapi! Ohua teccocco tejeraji, onajaro. Tettipi pina maidsehe jinede Satana attissa nani. Diocca dossenijidsa ibora onanijineraha tettidsara ibora onadsapi Dio jipa tahicca onana-jeranitohui. Tiapi Dio jipa tahicca ssamo tinani. Madija tohuini quinajariccana nahato tinajaro —nahi nade Jeso Pedrodsa.

<sup>24</sup> Nadsapa Jeso pohua huatimade iadsa denima huati huati tajari: —Aji “Jesocca madija iquejenana” tiquinadsapi tiadeni tohuini tiquinanicca tohui tetideni ajimanaji. Ohuadsara disseraqquri tiquinaji. Madija tiadenidsa: “Ahua porimacosanidsa tidsoqqueji” quinadsa naco: “Jehe, odsoqqueni bica tani. Jeso onebo-jarahi”



titidsanapomana nana, onajaro. <sup>25</sup> Tiadenipi ticcadeni madie ohuadsa teccoramanad-sapi madija tiadeni tonajicabaqqui-manaraha camittehe jiquejeranicca ticajimana-dsanaponitohui. Naraha madija ohuahapa pocca madie ohuadsa eccoccodsapi, pina ajijaro namidsa madi-dsanapohuijine tohuinira nadsapa najaripa dsoqquehitohui. Dsoqquedsapa camittehe jiquejeranicca caji-jarahitohui –nade Jeso. <sup>26</sup> —Madija naco ajijaro namicca biquehe tohuini madidsa, ajijaro dsamacca ima deni tojanicca tohuini madidsa naco huapima pohuadsa tojaraha Diotohui najaradsapa nidsa pohua dsoqquedsa jororoni jiquejeranicca dsori tajarahitohui. Nadsapa pohua cajijaricca huapima ponima tojanitohui. Puhuapa pohua cajijariccadsa camittehe jiquejeranicca mitta inanijine ssamo tani. <sup>27</sup> Naraha ohuapi Madija Bedi ojajaroa nidsaranibote Abi Dio ssiejenema pocca dodosse tabaqqui memehuajicca tedseje occaronapomanitohui. Nadsapa madija madihissa tajari pocca madie tonanabicadsa Diodsa dsepe ijijaripa nidsa pohuadsa denima bica tanicca da onanitohui. Madija ohuadsa dissera tajarajari Diodsa badsira tehe dsepe ijijaripa bica tanicca badsira tehe pohuadsa da onanitohui. Naraha madija ima bica tajarodsa dsepe ijijaradsapa occa daniji cappirahitohui. Madija ima tabaccora tajarodsa dsepe ijijaripa occa najidsohue cajihitohui. <sup>28</sup> Ohuapi pajissara tiadenidsa huati onajaro: Ajidsa tidomodeni huajaro motadenipi tidsoqquemana-jeraccadsama ajijaro titedsejemadenicca ima qqui tiquinanitohui. Najaroa aji ohua Madija Bedi ojajaroa nidsaranibote madija ohuacahuabaqquihijine occa deni tojehema occaronapomanitohui, onajaro –nade Jeso.

## 17

### *Jeso assire tojidsa, jidseremani najari* *Maraco 9.2-13; Roca 9.28-36*

<sup>1</sup> Jeso pohua tedsejemacca ima huati tahi nattini huada 6 nadsa ssonohuaji Jeso toqquemoradsapa Pedro, Satiaco, Huano quinajaridenira iaqquemorabaqquijari. Jai tojemoradsapa ssono tetepihuaji bacco tomoramajari. <sup>2</sup> Nahidsa qqui toquinanaja Jeso pano todsibehijaro pina maji ssiejenessa najari. Pocca etero naqui tonopojaro pina ssiaja tajarossa najaro. <sup>3</sup> Nadsapa qqui toquinanaja Eria, Moisesi tedseje Jesodsa ahuatoma-manadsa imahaha canajari. (Pohuadenipa maittaccadsamacca Dio Atti cacomeraqqui najarideni.)

<sup>4</sup> Nadsapa Pedro Jesodsa huati tajari: —Ohua Medsede, iapi ajidsa iquejenadsa bica tani. Ticcadeni odsa huahuaqquide 3 canehe inahatona. Nadsapi tiadsa, Moisesidsa, Eriadsa cananijine –nahi nade Pedro. <sup>5</sup> Pedro huati huati nanaja pohuadeni tetepihuaji essen dsibehi tajaro ccaronajaro. Ccaronadsapi pohuadenidsa ijihuajanijaro. Nadsapa nahi essen bodidsa atti qquenajaro: —Ajajaripa occa Ejedeni. Pohuadsa ohuati huana tajaro. Pocca ima bica tajarojine ohuatidsejaro. Pohua atti timittamananissa taji –nahi nade Dio.

<sup>6</sup> Nadsapa Pedrodeni atti mohuini mittamanadsa cappinamanadsapa pohuadeni baccuhuaji domodeni pona najari. <sup>7</sup> Nadsapa Jeso pohuadenihuaji ccanijari. Bara inabaqquidsa pohua attipa: —Titehemamanaji, ticappinamana tejeraji –nahi nade. <sup>8</sup> Nadsapa totehemamanadsa qqui toquinanaja Jesodsa madija ohuahapa nohuerajari. Pohua motta hua canajari.

<sup>9</sup> Nadsapa ssonohuaji jahidsippanidsa Jeso pohuadenidsa huati tajari: —Aji ssono tetepidsa qqui tiquinajarocca imapi tecomamanaccana. Ohuapi Madija Bedi ojajaroa nidsa odsoqqueni nattini onahatonidsana najaro ima tecomeramananijine bica tani –nahi nade.

<sup>10</sup> Nadsapa Jesodsa huati toquinajari: —¿Nejecotohui jodiodenicca marinaja maridedeni attipa: “Cristo-Mesia ccajona-jaraccadsama Dio Atti cacomerabote Eriana

tahide ccanipohuitohui” quiquinanajari? –quinahi nade pohua huatimade 3 quinajarideni.

<sup>11</sup> Nama quinadsapa Jesoa: —Pajissa, tahidepa Eria ccanipohuitohui, ima huapima icattermaridsaponijine. <sup>12</sup> Naraha ohuattipi: Eriapa ccanipode, onajaro. Aja Eria dsoqquejari ccanipo-jararaha madija ohuaha pina pohuassa najari ccajonadsa ima icattermaridsapode. Naraha pohuadsa noccodeni jidsaqquri nadsa nacasserehe pohuadsa inanamanade. Najarossa najaro nidsa ohua Madija Bedi ojajaroa ohuadsa naco nama quinadsapa ocasserani onahananitohui –nahi nade Jeso. <sup>13</sup> Pohua atti nama nadsapa pohua huatimadedeni bodideni huatoma-manajari: —Ja... Jehe, Eria tahimariraha imapi Huano Baotistana paja. Pohuana madijacca ima cattemade ccaridsapode –quinahi nade.

*Ejedeni bodidsa tocorime madidsaraha Jeso dosse ininejari*  
*Maraco 9.14-29; Roca 9.37-43*

<sup>14</sup> Nadsapa Jeso, pohua huatimade 3 quinajarideni tedseje jahidsippanidsapa madija toqueriqquihhuaji bacco nanimanajari. Nahidsa madija ojaría Jesodsa huati tahijine ccajonajari. Jesohuaji bacco najonadsapa pohua bodi: —Jesopa deni tojahi, ohuapi ajimani ojani –nadsa Jeso bacchohuaji pohua pitodsa huitta tocattedsa najari. Nadsapa Jesodsa huati tajari. <sup>15</sup> Pohua attipa: —Ohua Medsede, occa ejedenidsa teti huana taji. Huatiajojo comani cajijari. Ocasserani imeni inahanajaro. Najaro comani quidsa nadsapa pitora pitora naridsajari. Dsippodsa naco ssonidsanaja naridsapohui nanaja najari. Passodsa naco je taja naridsapohui nanaja najari –nade. <sup>16</sup> —Nadsama ticca dodosse tabaqquidenidsa occa ejedeni ohuacajonajari naraha inanomimanahijine ssamoqquri napa –nade imehi atti. <sup>17</sup> Nadsapa Jesoa: —Jaho, madija huapima Diodsa jehe tiquinanissa tejerani. Ajijaro namicca ima bica tejeranicca ticajimaneje najaro. Tiadeni mari mari ohocanabaqqui naraha ¿nejecoma nadsa ticahatterapadseje? Ticcadeni jeheniji pajiranissa tejeradsapi ohuadsa ocassera taraha ¿nema nehe onahana-dsanaponijinequi? ¡Jari, ticca ejedeni ohuadsa teccajonajo! –nade Jeso.

<sup>18</sup> Nama nadsapa Jesohuaji ejedeni coma tajari eccajonamanajari. Nadsapa Jeso ejedeni bodicca dosse ininehijine huati tajari: —¡Tocorime tabaccorabote! ¡Ejedeni tinebodsa tiqquenaji, onajaro! –nade. Nadsapa qquenadsa amadsati ejedeni coma tajaripa tonomijari.

<sup>19</sup> Nadsapi dsotode ia pocca dodosse tabaqqui ia motta Jesodsa huati inade: —¿Nejecotohui iaha ajajari ejedeni bodicca dosse ininehijine ipajira-jerapa? –inajarode. <sup>20-21</sup> Naraha Jeso pohua attipa: —Tipajiramana-jerajaropi tibodideni Diodsa jehe tiquinanissa tejerajaro. Pajissara tiadenidsa huati onajaro: Ticcadeni jeheniji badsira tehe pina mostaza nocco badsira tajarissa nehe ticajimanadsapi ssamo tanicca tinanamananijine tipajiramananitohui. Pina ajaro ssonodsa huati tiquinadsa: “Ajiccahuaji ticcaji” tiquinadsapi tettidenidsa ssono poni ehuerani toccanitohui, onajaro. Nadsama ticcadeni jeheniji dacoradsapi tiadenidsa ima ssamo tanicca nohueranitohui, onajaro –nade Jeso.

*Jesopa pohua dsoqquehicca ima huati tapomajari*  
*Maraco 9.30-32; Roca 9.43-45*

<sup>22</sup> Nani dsama arobeni Carireahuaji Jeso tedseje jaijaridsadsa iadsa Jeso huati tajaride: —Aji ohua Madija Bedi ojajaropi nidsa dsotode madija ojaría ohua ccaccoradsapa madija dsepedenidsa ojanitohui. <sup>23</sup> Nadsapi ohua inanadsogque-mananitohui. Ohua ppa idsamanaraha huada huatinimade tojari nadsapi Abi Dio ohua nahatonihitohui –nade Jeso. Najaro ima huati tadsapa ibodi qquedsa nade.

*Diodsa dada toqquimahuaji cacahuanijine madijacca dsiniro mota nanaccadenicca ima*

<sup>24</sup> Nani odsa panani Capernaohuaji bacco inanidsapi iahuaji dsiniro nanaccadedeni bacco quinajari. Pohnadenipa madijacca dsiniro mota ihinaccamana najaro, Diodsa dada toqquimacca odsa ecahuamananijine. Nadsapa Pedrodsa huati toquinajari: —¿Nija? Tiadeni maridepa pocca dsiniro mota Diodsa dada toqquimacca odsa cacahuanijine ¿da da nattaco? —quinahi nade. <sup>25</sup> Naraha Pedropa: —Jehe, da da nahi pohnuapa —nahi nade.

Dsotode Pedro odsahuaji qquedsimanidsapa Jeso dsinirocca ima Pedrodsa huati tojidsapojari: —¿Nija Ssino, nejecoma tani tibodi? Ajijaro namicca tamedenedi ¿poccadeni madijacca dsiniro mota ihinaccamana najaroqui? ¿Madija ohuahadeni poccadeni dsamadsa madimanajaricca dsiniro motana ihinaccamana najarorane? —nade. <sup>26</sup> Nadsapa Pedro ecomerajaro: —Dsama onihicca, dsama onihicca jahijonajaridenicca dsiniro motana ihinaccamana najaro —nade. Nadsapa Jeso atti: —Nama nadsapa tamine pocca dsamacca madija paca paca quiquinana-jarahi. <sup>27</sup> Naraha iapi dsama onihicca madija iquejena-jeraraha Diodsa dada toqquimacca dsiniro nanaccadedenidsa ima ocassera tejeranijine pohnadenidsa dsiniro da inana. Jari, aba corode coridsahuaji tiqquedsippaji. Tahidecca huana tapojari ajaridsa qqui tana. Nanidsapi dsiniro qqui tinanitohui. Najaro dsiniro tididsa dsiniro nanaccadedenidsa da tinadsapi occa, ticca naqui pajiranissa tanitohui —nade Jeso. Nadsapa Pedro Jeso attissa inanajaro.

## 18

*—¿Nejecojarina deni tojajari? —quinajari*

*Maraco 9.33-37; Roca 9.46-48*

<sup>1</sup> Nadsapi ia Jesocca dodosse tabaqqi Jeso pohnuadsa huati inajarode. Ettipi: —Dio memehhuaji madijaricca cacahuehedsapi ¿nejecojarina deni tojajari? —inajarode. <sup>2</sup> Naraha Jesopa ejedenitohui huahua nade. Ejedeni ccajonadsapa idomo huahujanini nocconidsa ejedeni inahua najari. <sup>3</sup> Nadsapa Jeso huati tajari: —Pajissara tiadenidsa huati onana: Tibodi pina ejedeni bodissa nanijine tecajiqquimerajeradsapi Diocca cacahuehedsa tija-jeranitohui. <sup>4</sup> Diocca cacahuehedsa madija denima bica tajaripa: “Deni ojani” najarajari. Pohnuapa pina ajajari ejedenissa najari. Pohnua bodipa: “Ohuapi ajimani ojani, Diodsara ibora onani” nanaja najarina deni tojajari Diodsa. <sup>5</sup> Ajajari ejedenissa najaridsa tetideni huanacquiri nadsapi ohuadsa naqui tetideni huanacquiri najaro —nade Jeso.

*Imasiri tinanadsapi oppina tanihuaji ticcanitohui*

*Maraco 9.42-48; Roca 17.1-2*

<sup>6</sup> Jesopa denima huati huati tajari: —Nadsama madijapa pohnuajine ohuadsa jehe quinajarideni imasiri inanamanadsapi pohnuadsa najidsohue oppina tanicca ssonarinitohui. Ejedeni ohuadsa jehe quinajarideni naco madija imasiri mamaridejine imasiri tocatteradsapa aja imasiri mamaride pohnuadsa najidsohue oppina tanicca ssonarinitohui. Pina ajijaro imassa najaro: Siba ccanajabote pohnua mattodsa ssoque dsanadsa passo imeni dsaja tanihuaji je tahijine cco todsippadsapa oppina taraha najidsohue denima oppina tanicca pohnuadsa ssonarinitohui. <sup>7</sup> Jaho, ajijaro namicca imasiripi jiquejerani. Aji namidsa timadimanajaropi ima tinamananijine caji tani. Paji, nema najarodsa imasiri tinanamana tani. Naraha madijajine imasiri tinamananadsapi pohnuadsa ima denima oppina tanicca ssonarinitohui. Madija nama najaripa manaco Diona inajidsohuitohui.

<sup>8</sup> —Nadsama imasiri tinana-jeranijinepi tibodi daco tijiradsa poni taji. Pina tidsepedsa imasiri tinanabote naraha daco tijiradsa poni taji. Nema tadsapi pina

tidsepe ca ticajidsajarossa najaro. Tidsepe cajarie amossi canaraha Diocca cacahuehedsa timadidsapi tetidsenitohui. Naraha imasiridsa dissera tinadsapi pina tidsepe capamehe ticajijarossa naraha jororoni jiquejeranihuaji tia coro todsimahitohui.

—Nadsama imasiri caji tanihuaji ticcanijine naqui tohuini taraha poni taji. Nema tadsapi pina temori ca ticajidsajarossa najaro. Temori cajariraha Diocca cacahuehedsa timadidsapi tetidsenitohui. Naraha imasiridsa dissera tinadsapi pina temori capamehe ticajijarossa naraha jororoni jiquejeranihuaji tia coro todsimahitohui.

<sup>9</sup> —Nadsama tinocods naqui tohuini tanicca qqui tinadsa imasiri tinananijine tohuini taraha daco tijiradsa poni taji. Nema tadsapi pina tinocco huari, joca, jeo, coro tinajarossa najaro. Tinocco ojariraha Diocca cacahuehedsa timadidsapi tetidsenitohui. Naraha imasiridsa dissera tinadsapi pina tinocco pamehe ticajijarossa naraha jororoni jiquejeranihuaji tia coro todsimahitohui —nade Jeso. <sup>10-11</sup> —Tibodideni tettidenima tiadeni tecahuamananissa taji. Madija ohuadsa pajissa najaridsa tettidenipi: “¡Ssamo tinani!” tiquina tejeraji. Occa madija ajamani tinanabaqquimana tajarajo, onajaro. Occa Abi Dio memehuaji madihidsapa pocca dodosse tabaqqui occa madija cacahuade madimanajari. Najaridenipa Abi Dio Pohua pano naco qqui qqui dsanapomanajari —nade Jeso.

### *Edede amossi najari tahimari*

#### *Roca 15.1-7*

<sup>12</sup> Nadsapa Jeso ia mari tocanabaqquijari: —Ajijaro ima tibodidenidsa ¿nejecoma tiquinani? Jari, tiadenipi ticcadeni edede 100 naha ticajimanadsapa onideni hua tiquinadsa ojaria amossi nadsapa ¿pohuatohui qquide jai tija-jeraqui? Jehe, edede jinedepa pocca edede qquide toccahitohui. Pocca edede 100 naha cajiraha ojaria amossi nadsapa 99 tojajari. Pocca edede 99 naha huamonihuaji inebobaqquidsapa ojaria amossi najari qquide toccahitohui. <sup>13</sup> Pocca edede bacco inanidsapa huatidsehitohui. Pocca edede 99 naha amossihuaja-jaradsa naco huatidse tahi. Pajissara tiadenidsa huati onajaro: Edede jinedepa pocca edede amossi najari bacco inanidsapa denima huatidse tahi. <sup>14</sup> Najarossa najaroa ticcadeni Abi Dio memehuaji madijaria pocca madija ojaria pocca cacahuehedsa amossi nahijinepa jipera tajari. Madijapa Dio Pohuadsa tohuajiraha pohuadsa tojanipomahijine jipa tajari —nade Jeso.

### *Imecote iadsa imasiri inanaraha pocca imadsa eti ajima dsanaponijinecca ima*

#### *Roca 17.3*

<sup>15</sup> Jesopa denima huati huati tajari: —Madija ohuadsa jehe najari timecote tojaraha tiadsa imasiri inanadsapi pohua ojari nadsa mohuaradsa huati ticanana: “Ohuadsa tijine bica tejerani” tana. Nadsapa pohua cacomeradsapa: “Jehe, pajissa tiadsa nema onanade. Ojine bica tejerani. Jidapapi nema onapoma-jeranitohui” nadsapa manaco pohuadsa: “Jehe, epejena, bica tani” tana. Nadsapa timecote tedseje ticatidserapomanijine. <sup>16</sup> Naraha timecotedsa mohuaradsa huati tinaraha mitta-jaradsapa timecote ohuaha pamaha tiaccabaqquina, pohuadeni tedseje pohuadsa huati tiquinanijine. Pohuadeni naco pocca ima mittamanahijine. Nadsapa madija pama itide, huatimade tojari nahitide nahatoto tadsapa bica tahi. Mohuaradsa imahaha ticanadsa pohua huati ticanamananaja mittadsapa: “Jehe, epejena” nadsapa timecote tedseje ticatidserapomanijine. <sup>17</sup> Naraha najarideni atti mitta-jaradsapa otahimaridsa quequeriqquimana najarideni tedseje pohuadsa huati tiquinaji. Pohuadeni atti mittadsapa pocca ima tobicanitohui. Naraha otahimaridsa quequeriqquimana najarideni atti mitta-jaradsapa pina Diodsa jehe quina-jarajaridenissa nahijine. Imasiri cajijari. Pohuapa pina romanodenicca taminecca dosseniji dsiniro nanaccadenissa najari —nade Jeso.

<sup>18</sup> Iadsa denima huati huati tajari: —Pajissara tiadenidsa huati onajaro. Ajijaro namicca imadsa: “Jehe, bica tani” tiquinadsapi Dio memehuaji madijari

naco: “Jehe, bica tani” nahitohui. Naraha ima onihidsa: “Najaropi poni, bica tejerani” tiquinadsapi Dio memehuaiji madijari naco: “Poni, bica tejerani” nahitohui. <sup>19</sup> Pajissara tiadenidsa huati onapomajaro. Ajijaro namidsa tipamehe Diodsa huati tiquinanijine jehe ticaniredsapi occa Abi memehuaiji madijaripa ticcadeni huatinaja mittahitohui. Puhuapa ticcadeni huatinaja tiadenidsa inananitohui. <sup>20</sup> Jehe, ohuadsa jehe tiquinajarodenipi tipama nitide, denima tetimade ojaría itide otahimaridsa titiqueriqqui nadsapi nani tiqueriqquinidsa ohua naqui ohoquejema najaro –nade Jeso.

<sup>21</sup> Nadsapa Pedro Jesodsa tohuajiressidsa pahuadsa huati tajari: —Ohua Medsede, ohuemecotepa ohuadsa tabaccorehe inanajaro. Dsotode naqui ohuadsa imasiri inanajaro. Dsotode naqui ohuadsa tabaccorehe inanapomajaro. Nama dsanapojari. Naraha ohuapi: Puhuadsa ohuadi-jevani, onajaro. Dsotode naqui ohuadipoma-jevani. Dsotode naqui ohuadipoma-jevani. Nema onapomajaro. Nema onapomajaro. Naraha ¿nema odsanaponijinequi? onajaro. Aji pocca nacasserehe ohuadsa onihi, onihi, onihi 7 nehe bacco tadsapi ¿nadsana pahuadsa ohuadinijinequi? –nade Pedro. <sup>22</sup> Naraha Jesopa: —Paji, nema tejeraji. Nacasserehe onihi onihi onihi tassaquini 70 denima 70 denima 70 dsanaporaha “Manaco” tejerana. Titessecca imadsa teti ajima dsanapona, onajaro –nade Jeso.

*Tamine biji accodepa pahuadsa debe najaridsa: —Epejena –najarajari*

<sup>23</sup> Jesopa ajijaro namidsa imadinicca ima tadsajani mari icanabaqquijari. Puhua attipa: —Jehe, Diocca cacahuehecca imapi pina tamine puhua biji accodedenicca cuenta icattermaridsanijinecca imassa najaro. <sup>24</sup> Taminepa puhua biji accodedenicca cuenta icattermanijine huahua inabaqquijari. Jahijonajari, bacco najonamanadsapa tamine biji accode ojariana pocca cuenta deni tojadsapi najarina taminehuaiji iaquedsimamanajari. Najaripa dsiniro imeni pina 10 mil nehe debe najari. <sup>25</sup> Naraha aja debe najari pocca cuenta paca nahijine cappiradsapa tamine puhua biji accodedeni icadossebaqquijari: “Jari, pocca cuenta paca nahijine puhua dsepetaji nemanehe dsinirotohui da tiquinaji. Nadsama puhua, pocca amoneje, pocca ejedeni naco manaconedenitohui da tinabaqquimanajo, madijacca dodosse tabaqqi toquejenahijine. Nadsapa najari manaconedenidsana pocca cuenta jicanijine pajirani” najari tamine atti. <sup>26</sup> Naraha tamine biji accode dsiniro imeni debe najari pocca tamine atti mittadsapa nahi tamine baccohuaiji puhua pitodsa huitta nadsa ojiema huati huati tajari: “Jaho, ohua medsede, nidsa ia da tinabaqqui-jevaccaji. Tia paca onanissa tanitohui, omaidsa-jevani” najari. <sup>27</sup> Nama nanaja taminepa pahuatohui huati tohuanahi nadsa: “Jehe epejeni. Bica tani” najari. “Jidapapi ticca cuenta oneboni. Epeje onani” najari.

<sup>28</sup> —Nadsapa tamine biji accodepa toccaniraha puhua tesse pahuadsa debe najari bacco ijidsajari. Najaripa pahuadsa badsira tehe debe najari, pina dsiniro ccarara 100 najaro. Naraha tamine biji accodepa puhua tesse pahuadsa debe najari bacco ijidsadsapa pahuadsa debe najari acconi ssiporidsa dama niqui inadsa huadiema pahuadsa huati tajari: “¡Jari, ohuadsa ticca cuenta paca taji!” najari. <sup>29</sup> Naraha puhua tessepa puhua pitodsa huitta nadsa ojiema huati huati tajari: “Jaho, otesse, nidsa tia paca onanitohui, omaidsa-jevani” najari. <sup>30</sup> Naraha pahuadsa debe najari attidsa jehe najaradsapa: “¡Poni! Ohua paca tejerade. Nadsapi toponi cocorodsa tedsaji. Ticca cuenta paca tanissa tadsana tiqqenanijine” najari. Nadsapa coro idsimajari.

<sup>31</sup> —Naraha tamine biji accode ohuahadeni puhua tesse inajidsohui qqi toquinadsapa nacasseraqqiri nadsa najaro ima poccadeni taminedsa huati tanimanajari. <sup>32</sup> Nadsapa tamine aja puhua biji accode dsiniro imeni debe najari tohui huahua napomajari. Ccanidsa najaridsa tamine attipa: “Tiapi obiji accode tabaccorabote tijani. Ajina, tiapi dsiniro imeni ohua debe taporaha ohuadsa huati huati tinadsa



ticca debe epeje onanajaro. <sup>33</sup> Naraha tiapi titesse tiadsa debe najaricca debedsa epeje tejerajaro. Ohuapi tiadsa ohuati huana tade. Tia naqui pina ohuassa tadsapi titessecca debedsa epejena tanitohuiraha” najari pocca tamine. <sup>34</sup> Nadsapa tamine huadidsa pohua biji accode inajidsomanahijine dosse inabaqquijari: “Ajaripa ohuadsa pocca cuenta paca najaradsapa tinajidsomana-dsanapojo” najari. “Pocca cuenta nemaneha paca nahissa tadsana toccanihijine, onajaro” najari tamine atti -nade Jeso.

<sup>35</sup> Nadsapa Jeso denima mari icanabaqquijari: —Aja, occa Abi memehuaaji madijari naco tiadenidsa nama nahitohui. Timecote tiadenidsa nacasserehe inanaraha tiadenipi: “Manaco, manaco” tiquinadsapi Abi Dio naco ticcadeni tabaccorehe epeje inana-jeranitohui, onajaro. Titeddenicca ima tiadenidsa ocassera taraha epeje tiquinaji. Pohnadenidsa pina tetideni huanaqquiri naji, onajaro -nade Jeso.

## 19

### *Jesopa amoneje nebo nebocca ima mari icanabaqquijari*

*Maraco 10.1-12; Roca 16.18*

<sup>1</sup> Nadsapa Jeso dsama arobeni Carireahuajicca madija mari icanabaqquia jicadsapa dsama arobeni Jodeahuaji toccajari. Hueni Jordao jippehuaji toccadsapa dsama arobeni Pereaahuaji bacco tajari. <sup>2</sup> Madija sibema pohuadsa jai tojadsapa comaqquiri najarideni Jeso inanomibaqquijaride.

<sup>3</sup> Naraha nahidsapa Isaraeri potemahi jodiodeni mota marinaja pariseodsa jehe quinajarideni Jesodsa jiperaqquiri nadsa pocca marinaja inassamomananijine ima najoramanajari. Jesodsa tohuajiressimanadsapa pohuadsa huati toquinajari: —Aja ¿maqquideje pocca amonejedsa jipera tadsa inebodsapi pohuadsa ima nohuerahui? -quinade.

<sup>4</sup> Naraha Jeso pohuadenidsa huati tade: —Dio Atti dsodo nani hua hua titiquina naraha ¿ajijaro ima tetideni ajimamanajarorane? Maittaccadsama Dio dsama inahatoponipi Pohuajinena madija toquejenapodsapa ajima najaro:

“Maqquideje, amoneje tadsajani inahatobaqquijari. <sup>5</sup> Nema najarojinea maqquideje pohua bedimenidsa tojadsapa imehi imenidenidsa nebo, pohuadenira madimanajari. Nadsapa pamaraha pina ojarijarissa quinajari” nahi nade Dio Atti Moisesijine dsodo nanidsa.

<sup>6</sup> Nadsapa assiredeni pamaraha cacajiredsapa Djojine pina ojarijarissa dsanapohuijine. Nadsama Djojine pina ojarijarissa quinaraha caneboredsapa bica tejerani. Madija ohuaha atti noppine caneboredsa naco bica tejerani -nade Jeso.

<sup>7</sup> Naraha marinaja pariseodsa jehe quinajari attidenipa: —Naraha ¿nejecotohui Moisesicca marinajapi ajima naha? “Maqquideje pocca amoneje inebonijinepi nebohuecca papeo dsodo inadsa ponidsa da inadsa inebodsapi pohuadsa ima nohuerani” nani nade -quinajari.

<sup>8</sup> Naraha Jeso huati tajari: —Najaropi maittaccadsama ticcadeni idideni huari-bodeni sibaqquiri nadsa nebohue tohui quinadsapa Moisesi najaro marinaja pohuadenidsa dsodo inajarode. Naraha Dio dsama inahatoponipi amoneje nebo nebocca imapi nohueraccade. <sup>9</sup> Tiadenidsa huati onana: Ticcadeni amoneje nebo-mana tejeraji. Ticca amoneje tinebodsapa amoneje onihi ticajidsapi imasiri tinanajaro. Diocca dosseniji naqui tecahua-jerajaro. Naraha ticca amoneje maqquideje ohuaha inajadsana “Onebona” tadsa tinebodsapi tiadsa ima nohuerani -nade Jeso.

<sup>10</sup> Nadsapi ia Jeso huatimadedeni pohuadsa huati inade: —Jaho, amoneje ineboni oppina tadsapi ia motta amoneje jirehe imadidsana bica tani -inade.

<sup>11</sup> Nadsapa Jeso iadsa huati tade: —Jehe, naraha madija huapimapa amoneje jiraha pajiramanajarahi. Djojine madija motana najaro imadsa pajiramanajari.

<sup>12</sup> Ima onihi onihi cajimanajaripa amoneje cajimana-jarajaripaja. Mota ojari ojari quinahapa tossonamanapohuidsama amoneje cajimahanijinepa ssamoqquiri najari. Madija motapa pohua ime inajidsomanadsapa amoneje ajade ssamoqquiri najari. Maqquideje motapa pina amoneje ajade pajiramana-jarajarissa quinaha madimanageri. Pohuadeni attipa: “Diodsara idsepe ijidsa icca ima ojari nanijine” quinajari. Ajijaro imapi madija huapimacca jerani. Madija mota ojari ojari quinajaridenicca ima. Pohuadenipa: “Jehe, nema onana” quinadsapa nema ihinanamana najaro -nade Jeso.

*Jesopa: —Abi, ticca biquehe ejedenidsa tinanaji -najari  
Maraco 10.13-16; Roca 18.15-17*

<sup>13</sup> Nadsapa madija poccadeni ejedeni Jesodsa eccajonabaqqui-manajari, —Jeso tatideni bara inabaqquidsa Diodsa huati tahijine -quinadsa. Naraha Jeso huati-madedeni attidenia: —¡Ejedenipa pohua! ¡Jesohuaji teccajonabaqquimana tajarajo! -quinade. <sup>14</sup> Naraha Jeso pohua huatimadedeni attideni mittadsapa: —¡Poni, nema tiquinejeraji! Pohuadeni jahionana, onajaro. Eccajonabaqqui-manahijine tecossamana tejeraji. Madijapa pina ajajari ejedenidenissa quinajarina Diocca cacahuehedsa toquejenahitohui -nade.

<sup>15</sup> Nadsapa ejedeni ojari ojari tatideni bara, inebo, bara, inebo naridsajari. Jicadsapa Jeso toccajaride.

*Madija dsepe sse tajari Jesodsa huati tajari  
Maraco 10.17-31; Roca 18.18-30*

<sup>16</sup> Jesopa denima toccaraha madija pohuahuaaji ccajonajari attipa: —Nija Mamaride ¿nejeco ima bicani onanadsana camittehe jiquejeranicca bacco onanijine? -nade.

<sup>17</sup> Naraha Jesopa: —¿Nejecotohui ohuadsara ima bicanitohui huati tinajaro? Ima bicani jinedepa Diona paja. Pajissa. Naraha camittehe jiquejeranicca bacco tinanijinepi Dio pocca dossenijidsara ibora tinaji -nade.

<sup>18</sup> Naraha dsabisso attipa: —¿Nejecomanajaro Diocca dossenijidsara ibora onanijine, tajaro? -nade. Naraha Jeso attipa: —Diocca dosseniji Moisesi dsodo inajarocca nahato tinani. Najaropi ajima najaro: “Madija tinanadsoque-jarajo. Madija ohuahacca amoneje tija tejeraji. Tiboti tejeraji. Maidsehedsa naqui madijadsa ponima ima tinahana tejeraji” nani Diocca dosseniji. <sup>19</sup> Onihi naqui: “Ticca abi, ticca amidsa bica tinadsa tinamadibaqquihissa tajo. Tinoriccadsa naqui teti huana taji, pina tia tiadsa teti huana tajarossa taji” nani Diocca dosseniji Moisesi dsodo inajaro -nade Jeso.

<sup>20</sup> Naraha dsabisso attipa: —Najaro marinaja huapimapi ohuacahuajonajarode. ¿Naraha nejeco imara ohuadsa dsori taccajaro? -nade.

<sup>21</sup> Naraha Jeso pohuadsa huati tade: —Tipajiranissa tanijinepi ajima taji: Ticcanidsa tidsepetaji nemaneha manaconidsa da tinaridsaji. Nani najaro dsiniropi madija tohuati nahanacquiri najaridenidsa da tinabaqquinijine. Nema tinanadsapi nidsa memehuaaji Diocca biquehe tiadsa tojanitohui. “Nema onana” tadsapi ohuadsara dissera tinaji -nade Jeso.

<sup>22</sup> Naraha dsabisso najaro ima mittadsapa: —Jehe, nema onana -najarajari. Pohua dsepetajitohui, pocca dsinirotohui huati huana tajari. Pohuapa dsepe sse taja nadsapa bodi ocassera taha toccanide.

<sup>23</sup> Nadsapa Jeso ia pohua huatimadedenidsa huati tade: —Pajissara tiadenidsa huati onana: Madija dsepedeni sseqquiri najaridenipa Diocca cacahuehedsa toquejenahijine najo tani. <sup>24</sup> Tiadenidsa huati omanipomana: Pina bani imehibote camellopa etero ssessequi odinidsa toqqueqquimahijine pajira-jarajarissa najari madija dsepe sse tajaripa Diocca cacahuehedsa tojahijine ssamo tani -nade Jeso.

<sup>25</sup> Nadsapi ia pohua huatimadedeni najaro ima imittadsapi ijabojo nadsa huati icanirere canade: —Jaho, madija tocassiejerahijinepa ssamo tani. ¿Nejecojarina tossiapadsaja? —nade. <sup>26</sup> Nadsapa Jeso ia tocattabaqqui nadsa huati tade: —Madijapa ssamomo taraha Diodsapi ssamo tejerani. Pohuajinena madija tocassiejerahitohui —nade.

<sup>27</sup> Naraha Pedropa Jesodsa huati tade: —Ia Maride, iapi tiadsa jaijaridsanijinepi icca odsa, icca madija, huapima ineboridsabaqquide. Nadsapa Dio iadsa ¿nejecora da inapadsaja? —nade.

<sup>28</sup> Naraha Jeso iadsa huati tade: —Pajissara tiadenidsa huati onana: Ohuapi Madija Bedi oजारoa nidsa ajijaro dsama Diojine dsati tojadsapi occaronapomanitohui. Nadsapi deni ojanicca huihuittari bicanidsa ohuittaridsa dosse dosse onanitohui. Nadsana tiadeni 12 tiquinajaro naqui ima cacahuadecca huihuittari 12 nehe cacahitteri najarodsa jassi tinariridsanitohui. Nadsapi icca madija jodiodeni aja icca idi Isaraeri pohua bedi 12 quinajarideni potemahicca ima ticattemamananitohui —nade.

<sup>29</sup> —Nadsama tiadenipi occa madija tiquejenajarojinea ticcadeni odsa ticanebomana, timecotedeni tinebobaqquimana, ticcadeni abi, ami tinebobaqquimana, ticcadeni ejedeni tinebobaqquimana, ticcadeni dsama tinebomana nadsapi nidsa dsotode aji huapima tineboridsa-manajarossa nehe Dio tiadenidsa da inaridsadsapi denima ticajimananitohui. Tetidsemaneri nanitohui, camittehe jiquejeranicca naqui ticajimananitohui —nade Jeso. <sup>30</sup> —Jehe, jidapana tiadenipi ajimani tiquejenaraha ajijaro imadsa tibodideni huatomanaji: Madija jidapana madimanajarideni motapa deni toquejenaraha nidsaranibotepa ajamani toquejenahitohui. Jidapana madimanagerideni mota ajamani toquejenajarideni naco nidsaranibotepa deni toquejenahitohui —nade Jeso.

## 20

### *Huidsaja tatarabaidسادedenicca imadsa mari icanabaqquijari Jeso*

<sup>1</sup> Jesopa pocca marinaja ajijaro namidsa imadinicca ima tadsajani mari icanabaqquijari. Pohua attipa ajama nade: —Diocca cacahuehecca imapi pina huidsaja jinedecca imassa najaro. Pocca huidsajadsa ppa nahi uva pohuara ppa naridsajari. Huidsaja jinedepa dsidsidsamassa qquenadsa pocca huidsajahuaji tarabadsa quinahijine madijatohui toccajari. <sup>2</sup> Bacco inabaqquidsapa pohuadeni tedseje imahaha canajari. Poccadeni dsamacca tarabadsa huada ojarie manaconipi ccarara cajarie 1 denario. “Najaropi bica tani” quinadsapa jehe canirejari. Nadsapa pocca huidsajahuaji tarabadsa quinahijine dosse inabaqquijari.

<sup>3</sup> —Nahi dsotode maji huarijonadsa naco huidsaja jinedepa todsepetaji dada caji tanihuaji toccajari. Nahidsapa madija ohuaha dsepedeni jiraha domo huahi qqui inabaqquijari. <sup>4</sup> Najaridenidsa naco huati tajari: “Tiadeni naqui occa huidsajahuaji tarabadsa tiquinanijine jai tijaji. Tiadenidsa manaconi pajiranissa tehe da onanijine” najari. Nadsapa jai tojajari. <sup>5</sup> Nahi dsotode maji itetepidsa naco huidsaja jinedepa nama napomajari. Maji tohuenajonadsa naco nama napomajari. <sup>6</sup> Nahi dsotode maji toccadsa naco huidsaja jinedepa madija ohuahadenitohui toccapomadsa madija dsepedeni jiraha bacco inabaqquidsapa pohuadenidsa huati tajari: “¿Nejecotohui majidsama ajidsa tidsepedeni jirehe tiquejenajaroneje?” najari. <sup>7</sup> Naraha pohuadeni cacomeramanajari: “Itohui madija huahua quina-jaradsapa” quinajari. Nadsapa pohuadenidsa naco: “Jehe, occa huidsajahuaji tidsepedeni ijimananijine tiadeni naqui jai tijaji” najari. Nadsapa pohuadeni naco jai tojajari, maji toccaraha.

<sup>8</sup> —Nadsapa maji todsidsidsa huidsaja jinede pocca tatarabaidسادedeni cacahuadedsa huati tajari: “Jari, tatarabaidسادedeni huahua tanibaqquijo, poccadeni

tarabaidsa manaconi da tinaridsanijine. Tahidepa aja maji toccadsa tarabaidsa quinajaridenina paca tinabaqquipona. Najarideni nattipa maji tohuenajonahicca paca, maji itetepicca paca, maji huaripohuicca paca tinabaqquina. Nadsana tahide dsidsidsamassa tarabaidsa quinajarideni paca tinabaqquina” najari. <sup>9</sup> Nadsapa dsotode tarabaidsa quinajaridenidsaha pohuadenidsa ccarara cajarie 1 denario da inaridsapojaropi pina tarabaidsa huada ojarie manaconissa nehe da inaridsajaro. Pohuadenidsa pohuadenidsa inanaridsajaro. <sup>10</sup> Nadsapa maji tohuenajonahicca paca, maji itetepicca paca, maji huaripohuicca paca inabaqquia jicadsapa dsidsidsamassa tarabaidsa quinajarideni paca inabaqquihijine najorajari. Naraha pohuadeni bodi attidenipa: “Iapi dsidsidsamassa tarabaidsa inapa. Iapi denima icajinitohuia” quinaraha pohuadenidsa naqui huada ojariecca tarabaidsa manaconissa nehe ccarara cajarie 1 denariora da inaridsajaro.

<sup>11</sup> —Nadsapa huapima najarossa nehe cajiridsamanaraha tahide tarabaidsa quinaridenipa najoramanapojari, huidsaja jinededsa ima idimamanahijine. <sup>12</sup> Nadsapa huidsaja jinededsa pohuadeni attipa: “Maji toccadsa jai tojajaridenipa maji badsira taha tarabaidsa quinaraha pohuadenidsa pina iadsassa nehe da tinabaqquia” quinarari. “Naraha iapi majidsama maji ppoccone eraha icca tarabaidsa manaconi iadsa denima da tejerani. Aja maji toccadsa tarabaidsa quinaridenicca manaconissa nehe icajia” quinarari. <sup>13</sup> Naraha huidsaja jinedepa aja attideni nama quinarideni ojariadsa huati tajari: “Jehe otesse, ticca tarabaidsa manaconi ojine dsori tejerapa. Nadsa tahide huada ojariecca tarabaidsa manaconi tiadsa huati onapopa. Tettiipi: ‘Ccarara cajarie 1 denario ohuadsa bica tani’ ¿tapo-jerajaroqui? Nadsa tahide ‘Bica tani’ tapa” najari huidsaja jinede. <sup>14</sup> “Nadsapi ticca tarabaidsa manaconi ticajini. Epeje, ticcaniji. Dsotode tarabaidsa quinaridenidsa naqui tarabaidsa manaconi pina tiadenidsassa nehe da onanijine jipa onadsapi epeje, nema onanajaro. <sup>15</sup> Occa dsiniropi occa. Ohua tohuini onadsa da onanijine bica tani. Aja pohuadenidsa ohuati huana tadsapi pohuadeni acco ocamabaqquijari. ¿Najaro acconi tijamimanajaro-rane?” najari huidsaja jinede –nade Jeso.

<sup>16</sup> Nadsapa Jeso denima huati tajari: —Jehe, Abi Diopa huati huana tajari pina huidsaja jinedessa najari. Pocca cacahuehe tojadsapi dsotode toquejenajaridenipa pocca biquehe cajimanahitohui. Pina tahide toquejenajarideni cajimanajarissa quinahitohui –nade Jeso.

*Jesopa pohua dsoqquehicca ima huati nimanipomajari*

*Maraco 10.32-34; Roca 18.31-34*

<sup>17</sup> Jeso tedseje odsa panani Jerosarecca jahui jaijadsa pocca dodosse tabaqqui 12 inajaro ia motta pohuadsa iqueriqquinijine ia huahua tabaqquide. Nadsapa jahui jaijadsa iadsa huati huati dsanapodsapa pohua atti ajama najaride: <sup>18</sup> —Aji, Jerosarehuaji jaijemorararopi nahatoqquiri tiquinani. Ohuapi Madija Bedi ojajaroa nidsa Jerosare bacco inadsapi dada toqquimade taminedeni, jodiodenicca marinaja maridedeni quinarideni dsepedenidsa ojanitohui. Ohuadsa: “Dsoqquena, dsoqquena” quinahitohui. <sup>19</sup> Dsotodepi madija ohuaha jodio quejena-jarajaridenidsa ohua da quinadsa najaridenina ohua jaja icanaqquimanajaro, ohua cossi inaqquimanajaro nanitohui. Nadsapi ahua porimacossanidsa ohua inanadsoqque-manadsa ohua ppa idsamananitohui. Naraha huada huatinimade tojari nadsa onahatoninitohui –nade Jeso iadsa.

*Satiaco, Huanodenicca ami Jesodsa huati tajaro*

*Maraco 10.35-45; Roca 22.24-27*

<sup>20</sup> Nadsapi Sebedeo bedimenipi poni bedi pamaha Satiaco, Huano quinadsa Jesohuaji tohuajiressimanajari. Poni bodinipi: —Jesopa deni tojahi, ohuapi ajimani

ojani -nadsa Jeso baccohuaji poni pitonidsa huitta nadsa Jesodsa huati tade: —Ohua Maride, tiadsa huati onanijinea -nade. <sup>21</sup> Naraha Jesopa: —¿Nejeco imara ohuadsa huati tinanijine? -nade. Nadsapi poni attinia: —Ticca cacahuehe bicanihuaji madija cacahuade tittaridsapi occa ejedeni pahimarihijine tinori nahatonihuaji huittari, tinori ssamohuaji huittari quinahijine nama tinanabaqquijo, onajaro -nade Sebedeo bedimeni.

<sup>22</sup> Naraha pohuadenidsa Jesoa: —A, najaro imapi ssamomo tinani. Ohuapi ocasserani ohuabote nani. Ohuadsa najidsohue ssonarinitohui. Aji tiadenipi najidsohue tinahanamananijine ¿tipajiramanaqui? -nade. Naraha pohuadenipa: —Jehe, ia naqui ipajirani -quinade. <sup>23</sup> Nadsapa pohuadenidsa Jesoa: —Jehe, pajissa ocasserani tinahanamananitoahui. Aji ohua najidsohue onahanadsapi tiadeni naqui nidsa dsotode najidsohue tinahanamananitoahui. Naraha memehuaji occa cacahueheda madija cacahuade ohuadsama pahimarihijinepa ohua dosse dosse onejerani. Abi Dio icattejidsa-baqquijaridenina ohuinoridsa pahimarihijine -nade Jeso.

<sup>24</sup> Najaro ima imahaha canahi imittadsapi Jeso huatimade mota 10 inajaroa imecote pamahadsa edijarode. <sup>25</sup> Nadsapa Jeso ia huahua tabaqquidsapa pohuadsa iqueriqquide. Iadsa huati tade: —Tiadenipi madija ohuaha jodio quejenajararidenicca madie nahatoqquiri tiquinani. Poccadeni taminedenipa dossede dacoraqquiri nadsa poccadeni madija dosse dosse quiquinanajari. Deni toquejenajari ohuahadeni naco poccadeni madija dacoreheda ehecahuabaqquimana najari. <sup>26</sup> Naraha aji ohuadsa tiquejenajaropi nema tiquinanijine bica tejerani. Naraha titessedeni ojariapa: “Ohuana deni ojana” nadsapa pohuana huapima bijideni acco icamaridsabaqquihijinena bica tani. <sup>27</sup> Diocca cacahueheda deni tijanijinepi titesse bijideni acco ticamaridsajo. Pina poccadeni medse tijajarossa tanijine. <sup>28</sup> Aji ohua Madija Bedi ojajaropi madija dosse dosse onanijine occajonarajaro. Madija acco ocamabaqquihijinena occajonarajaro. Madija poccadeni imasiri manaconi pohuadenidsa ssonari-jeranijine poccadeni imasiri manaconipi ohuana ohua ohuaccoranitohui -nade Jeso.

*Jesopa nocco siri pamaha noccodeni ssire inanabaqquijari*

*Maraco 10.46-52; Roca 18.35-43*

<sup>29</sup> Nadsapi odsa panani Jericodsa jaijedsima... jaijenaraha Jeso natti madija sibema jahimissajari. <sup>30</sup> Jahui jaijadsapi nocco siri pamaha jahui inididsa pahimajari. —Jeso toqqeqquimahi -quinahi ima mittamanadsapa huahua quinajari: —¡Ia Medsede, Dabi Potemahi! ¡Iadsa teti huana taji, inaha! -quinade.

<sup>31</sup> Naraha madija attidenipa: —¡Poni! ¡Joma tiquinaji! -quinaraha pohuadenipa denima paja huahua toquinarihi huahua toquinarihi najari: —¡Ia Medsede, tamine Dabi Potemahi! ¡Itohui teti huana taji! -quinapomade.

<sup>32</sup> Nadsapa Jeso toccaraha huaha tahi nadsa: —¿Nejecotohuira ohuadsa huahua tiquinajaroneje? -nade. <sup>33</sup> Nadsapa: —Ia Medsede, inocco ssire tinanabaqquiji, inajaro -quinade. <sup>34</sup> Nadsapa Jeso tohuideni huati huana tadsa noccodeni bara inabaqquidsapa amadsati noccodeni ssire-re nade. Nadsapa Jesodsa tohuedade.

## 21

*Jesopa Jerosaredsa bacco todsimajari*

*Maraco 11.1-11; Roca 19.28-40; Huano 12.12-19*

<sup>1</sup> Nadsapi Jesodsa madija huapima jaijade. Odsa panani Jerosarehuaji iajiradsapi odsa capamema najaro onini Betapaquedsa bacco inapojaro. Betapaquepi ssono onini Oribodsa anijaro. Nahidsana Jeso pocca dodosse tabaqqui pamahadsa huati tajaride: <sup>2</sup> —Jari, ajicca odsa capamema nanihuaji ticadapoji. Nanidsapi bojo



namidsadsa bedima ssoque dsanehe huani. Najaro dicca tiquinadsa poni bedima teccanimanaji -nade. <sup>3</sup> —Naraha tiadenidsa madija attipa: “¿Nejecotohui bojo dicca tiquinajaro?” nadsapa pohuadsa huati tiquinana: “Ia Medsede ajaro bojo tohuini nadsapaja” tiquinana. Nadsapa bojo tiadenidsa toccanijine dosse inanitohui -nade Jeso.

<sup>4</sup> Najaro imapi pina maittaccadsama Dio Pohua Atti cacomerabote Sacariadsa huati tapojarissa nehe tojajaro:

<sup>5</sup> —Odsa panani Siodsa madimanajaridenidsa ajima taji: “Qqui tiquinanaja, ticcadeni tamine bicabote tiadenihuaji bacco nahi.

Pohuapa jone tahi, jadsire tohui najarahi. Ajana, bojo imehidsa huittarijona-jarahi. Bojo namidsadsa todsepetaji jojorede bedi idedsa huittarijonahi” -napohui nade Sacaria.

<sup>6</sup> Nadsapa pocca dodosse tabaqqi pamahapa Jeso pohua attissa inanamananijine tohuedajari. <sup>7</sup> Nadsapa bojo namidsadsa imeni bedima bacco toquinadsapa eccanimanade. Bacco nanimanadsapa poccadeni etero huapicca motarajaro ssiti quinadsa bojo idedenidsa bina quinadsa bojo bedidsana Jeso huittarijari. <sup>8</sup> Nadsapa madija huapi taha Jesodsa huatidsemanadsa pohua tedsejema jahui bina idsanapomanajaro, pohuadsa: —Deni tijani -quinahijine. Nadsapa jahuidsa pohuadeni teteppe namidsa hua idsanapomanade. Madija ohuahadenipa birijari eppe ca ippimanadsa hua idsanapomanade. Nadsapa Jeso jahui bina tani motta toccadsanapojari. <sup>9</sup> Madija huapima pohua tedsejema jai tojaja, pohua nattihuaji jahijonaja dsanapomanajari. Pohuadsa huatidsemanadsa huahua dsanapomanajari: —¡Tamine Dabi Potemahi deni tojahi, deni tojahi! -dsanapomanajari. —¡Ia Medsede onima ccajonajaridsa biquehera tojana, tojana! ¡Memehuaji Diodsa madimanajarideni pohuadsa: “¡Deni tijani!” quinana, quinana! -dsanapomanade.

<sup>10</sup> Nadsapa Jeso Jerosarehuaji bacco todsimadsapa nahi odsa pananicca madimanajarideni huapima huatidsemanadsa ahuaaji huahua ahuaaji huahua naridsamanajari: —¿Nejecotaridsa huatidsejona-manajarinaja? -quinajaride. <sup>11</sup> Naraha madija Jeso pohuadsa jahijonajaripa ecomeramanajari: —¡Jehe, ajararipa Jeso! Pohuapa Dio Atti cacomerabote. Dsama Carireahuajicca odsa onini Nasareticca madija. ¡Najaria! -quinade.

*Diodsa dada toqqimacca odsadsa manaconitohui dadadedeni mohua ininebaqqijari*

*Maraco 11.15-19; Roca 19.45-48; Huano 2.13-22*

<sup>12</sup> Nadsapa Jeso Diodsa dada toqqimahuaji toqquedsimade. Najaro odsacca boronidsa madija bani bedi Diodsa da tahijinecca dade toquejenahi qqui tajari. Manaconitohui dadadedeni qqui inabaqquidsapa huapima mohua ininebaqqijari, mimittadedeni naco mohua ininebaqqijari. Dsiniro cacacajiqquimeradedenicca huahuanari naqui hua inaridsajaro, midsori dadadedenicca huihuittari naqui hua inaridsajaro naridsade.

<sup>13</sup> Nadsapa pohuadenidsa Jeso huati tade: —Dio Atti dsodo nanidsa ima ajima najaro: “Occa odsapi Ohuadsa huati huati toquinahijinecca odsa tocajanitohui” naponi nade Dio Atti dsodo nanidsa. Naraha tiadenipi madija titicamajidsa-baqqimana nadsa tijinedenia pina bobotidedenicca quequeriqqui odsassa ticanamanajaro -nade.

<sup>14</sup> Nahi dsotodepa Diodsa dada toqqimahuaji Jesodsa nocco siri jahijona, isso siri jahijona nadsa inanomiridsa-baqquide. <sup>15</sup> Naraha dada toqqimade taminedeni, jodiodenicca marinaja maridedeni quinadsa Jeso canahatori canadsa madija tocanomirehi qqui toquinadsapa jiperaqquri nade. Ejedenideni naco najaro odsacca

boronidsa Jesodsa huatidsemanadsa johua johua quinajari. Ejedeni attidenipa: — ¡Tiapi tamine Dabi Potemahi! ¡Deni tijani, deni tijani! —quinahi mittamanadsapa Jeso deni tojajari accone huadimanajari. <sup>16</sup> Ejedeni attideni pohuadenidsa ocassera tadsa Jesodsa huati toquinajari: —¿Ajajari ejedeni attideni timitta-jerajaroqui? —quinade. Naraha Jesopa: —Jehe, omittani. Attideni omittaraha tiadenina Dio Atti dsodo nanicca hua hua titiquina naraha ¿najaro ima tetideni ajimamanajarorane? Imapi ajima najaro: “Ejedenideni, ejedeni tobaccocca naco tiadsa huatidsemanadsa jiri jiri quinahitohui: ‘¡Bica tinani! ¡Bica tinani!’ quinahitohui” naponi nade Dio Atti dsodo nanidsa —nade Jeso.

<sup>17</sup> Nadsapa Jeso tedseje Diodsa dada toqquimahuaji inebo Jerosare inebo nadsapi odsa capamema najaro onini Betaniahuaji jaijanide. Nanidsa bacco inanidsapi nanidsana icahadijade.

*Jesojine ahua iquiera dseqqueri inanajari*

*Maraco 11.12-14, 20-26*

<sup>18</sup> Huada ssiaja dsidsidsamassa Jerosarehuaji jaijapomadsapi jahuidsapa Jeso pemide. <sup>19</sup> Nadsapa jahui inorinidsa ahua iquiera qqui tadsapa nahihuaji toccajari... bacco tade. Dsaboradsa qqui tadsapa iquiera bono nohuerade. Eppera qqui tajari. Bono nohueradsapa iquieradsa Jeso huati tade: —¡A, apaja! Jidapapi tibonomanijeranitohui. ¡Nohueranitohui! —najari. Nanaja amadsati eppe dseqqueri-ri nade. <sup>20</sup> Naraha pocca dodosse tabaqqi iapi icattomama canadsa ettipi: —A ¿nejecotohui amadsati iquiera dseqqueri najari? —inade.

<sup>21</sup> Nadsapa Jeso iadsa: —Pajissara tiadenidsa huati onajaro: Tiadeni naqui Diodsa jehe tiquinanissa tadsa Pohuadsa huatide tiquejenadsapi tibodideni: “¿Pajissa tojapadseje? Nohueranitide” tiquinejeraji. Nadsana pina ojinessa najaro ahua iquiera dseqqueri tinamanahitohui. Naraha najaro imaha ojari-jerani. Ajijaro ssonodsa naqui huati tiquinadsa: “Ssono, titehemadsa passo imenidsa jaro tidsanaji” tiquinadsapi nema nanitohui. <sup>22</sup> Jehe, Diodsa huati tiquinadsapi tibodidenidsa: “Jehe, Diopa nema inananijine pajirahi” tiquinadsapi aji ticcadeni huatinaja Diojine najarossa inananihitohui —nade Jeso.

*—¿Nejecojaricca dacorehe ticajijaro? —quinajari Jesodsa*

*Maraco 11.27-33; Roca 20.1-8*

<sup>23</sup> Nani dsotode Jerosarehuaji bacco inanipomadsapi Diodsa dada toqquimahuaji jaijedsimapomajaro. Nahidsa Jeso maride tojaraha pohuadsa jiperaqquri najarideni aja dada toqquimade taminedeni, jodiodeni ime jocohuideni quinadsa Jesodsa tohuajjressimanadsa pohuadsa huati toquinajari: —Iadsa ticca ima tecomeraji. ¿Nejecojaricca dacorehe ticajijaro? ¿Nejecojari attidsa dadadedeni mohua tininebaqquijari? —quinade, Jeso pohua cacomerahijine tohuini quinadsa.

<sup>24</sup> Naraha manaco Jeso pohuadenidsa huati tade: —Ohua naqui tiadenidsa huati onana, tecomeramananijine. Ohuadsa tecomeramanadsapi ohua Cadossede oni, occa dacorehe tahimarini tiadenidsa huati onanijine —nade. <sup>25</sup> —Jari, Huanopa ¿nejecojari icadossedsa topa idsanabaqquijaritta? ¿Diojine ttarana, madijajine ttarana? —nade Jeso.

Naraha taminedenipa pohuadenira huati tocanirere canade: —Jaho “Huanocca topaniji Diocca dosseniji” inadsapi Jesopa: “¿Nejecotohui pohuadsa jehe tiquinejerajarotte?” nahitohui iadsa —quinade. <sup>26</sup> —Naraha “Huanocca topanijipi madijacca dosseniji” inadsapi madija iadsa huadimanarana. Aja madija huapima attidenipa: “Huanopa Dio icadossejari. Dio Atti cacomerabotedija” quiquinanade —quinajari taminedeni, madijadeni noppine cappinamanadsa. <sup>27</sup> Nama quinana Jesodsa: — Ssamomo inani —quinade.

Nadsapa Jesoa: —Ohua naqui ohua Cadossede onipa tiadenidsa ohuacomera-jarahi -nade pohuadenidsa.

*Madija bedi pamajaricca imadsa Jeso mari icanabaqqujari*

<sup>28</sup> Jesopa pohuadenidsa denima huati huati tajari: —Ajijaro ima huati onadsapi ¿nejeco imara tibodideni huatoni? Madijapa bedi pamajari. Ojariadsa huati tajari: “Ato, occa huidsaja uva ppa nahihuaji tidsepe ijiji” najari. <sup>29</sup> Naraha bedipa ibo tadsa: “Oqquejerani” najari. Naraha dsotodepa pohua bodi cacajiqquimeradsa uva ppa nahihuaji toccajari. <sup>30</sup> Dsotode pohua bedi dsotodeccadsa naco najarossa najaro huati tapomajari: “Ato, occa huidsaja uva ppa nahihuaji tidsepe ijiji” najari. Pohua bedi dsotodecca attipa: “Jehe abi, occana” naraha tocca-jarajari. <sup>31</sup> Pohua bedi pamaraha ¿nejecojarina imehi attidsa ibora tajari? -nade Jeso.

Nadsapa dada toqqumade tamedeni, jodiodenicca tamedeni quinadsa Jesocca marinaja ecomeramanade: —Tahidecca napaja -quinade. Nadsapa Jeso pohuadenidsa huati tajari: —Pajissara tiadenidsa huati onajaro: Romanodenicca taminecca dosseniji dsiniro nanaccadedeni, amoneje dsinirotohui ponideni dada quinajarodeni naqui Diocca cacahuahedsa toquejenahijine najoramanapojari. Naraha tiadenipi tinajoramana-jerajaro. <sup>32</sup> Ajana, Huano Baotistapa madija madimanahissa tahijine mari icanabaqquiraha tiadenipi pohuadsa pajissa tiquinejerajaro. Manaco ajararideni romanodenicca taminecca dosseniji dsiniro nanaccadedeni “imasiri sseqquiri nahi” tiquinajaro. Amoneje dsinirotohui ponideni da da quinajaro naqui “imasiri sseqquiri nani” tiquinaraha najaridenina Huanodsa pajissa quinajari. Bodideni cacajiqquimerajari. Naraha tiadenipi Huanocca ima timittamana, madija bodi cacajiqquimerahi qqui tiquinaraha tibodideni cacajiqquimera-jerajaro. Pajissa tiquinejerade -nade Jeso.

*Huidsaja cacahuade tabaccoraqquri najaridenicca ima Maraco 12.1-12; Roca 20.9-19*

<sup>33</sup> Jeso attipa: —Ajijaro namidsa imadinicca ima onihi tadsajani tiadeni mari ocanabaqquina. Titaharibobo canaji. Madijapa pocca huidsajadsa uva pohuara ppa inajari. Nadsapi huidsaja inidi siba hua inahuajanijaro. Uva bono ttai nadsa ppejene tojahijine naqui sibadsa odi inahatojaro. Huidsaja cacahuade huittarihijine siba hua tamaroni naqui hua inamarojaro. Najaro huapima jicadsapi huidsaja jinede pocca huidsaja ecahuamananijine madijatohui qqui naridsajari, nahi pocca huidsajadsa tarabadsa quinahijine, ppa nahi uva ecahuamanahijine. Uva bono jadadsapa motapa huidsaja jinededsa tojahijine. Motapa huidsaja cacahuadedeni pohuadenidsa tojahijine. Nadsapa pocca huidsaja ecahuamananijine madija qqui inabaqquidsapa pocca huidsaja pohuadenidsa inebojaro. Nadsapa jinede dsama huaji tanihuaji toccajari. <sup>34</sup> Uva bono jadahicca abadsico bacco tadsapa huidsaja jinede huaji tanidsa madiraha pocca uva bonotohui pocca dodosse tabaqqui dosse inanibaqqujari. <sup>35</sup> Naraha pocca dodosse tabaqqui huidsajahuaji bacco nanimanadsapa huidsaja cacahuadedeni itadamamanajari. Motapa itabaromanajari. Motapa inanadsoqque-ridsamanajari. Motapa sibadsa iquinabaqqui-manajari. <sup>36</sup> Nadsapa huidsaja jinede pocca dodosse ohuahadeni dosse inanibaqqujari. Tahideccassa quinaraha denima huapi taha dosse inanibaqqujari. Huidsaja cacahuadedenihuaji bacco nanimanaraha najarideni naco inajidso-baqquimanajari. Motapa itabaromanajari. Motapa inanadsoqque-ridsamanajari. Motapa sibadsa iquinabaqqui-manajari.

<sup>37</sup> —Nadsapa huidsaja jinede pohua bodipa: “Occa ejedenidsana cappinamanahitohui” nadsa pocca ejedeni huidsaja cacahuadedenidsa dosse inanijari. <sup>38</sup> Naraha huidsajahuaji bacco nanidsapa huidsaja cacahuadedeni pohua qqui toquinadsa pohuadenira huati tocanirejari: “Najaripa huidsaja jinede bedi. Nidsaranibote imehi

dsoqquedsa huidsajapi pohuadsa tojanitohui. Jari, inanadsoqquena, huidsajapi icca tojanijine” quinajari. <sup>39</sup> Nama quinadsapa huidsaja jinede bedi dama quinadsa huidsaja inidihuaji iaccamanadsapa inanadsoqqe-manajari –nade Jeso.

<sup>40</sup> Nadsapa pohuadsa queriqquimanajaridenidsa huati tajari: —Jari, tibodideni huatoji. Huidsaja jinede bacco nanidsapa ¿nejecoma napadsaja huidsaja cacahuadedenidsa? –nade Jeso.

<sup>41</sup> Nadsapa ecomeramanajari: —Jehe, huidsaja jinede pohua bacco nanidsapa huidsaja cacahuadedeni tabaccoraqquri naja najari inajicabaqquihitohui. Pocca huidsajapi madija ohuahadenidsana da inanitohui. Pohuadenina pocca huidsaja ecahuamanadsa pina jinede attissa inanamanadsapi uva bono jadadsa motapa jinededsa da inanimanahitohui –quinade.

<sup>42</sup> Nadsapa Jeso pohua tahimari pohuadenidsa ahuato tanijine pohuadenidsa denima huati tajari: —Tiadenipi Dio Atti dsodo nanicca hua hua titiquina naraha siba huahuattajo tojajaro tahimarini ¿tetideni ajimamanajaroqui? Imapi ajima najaro: “Odsa sibadsa icanahatomananiijinepi nanahatodedenipa siba ojariepi ettajomanani nade.

Naraha dsotodepi najaro sibana odsa daco cajiranijine tojajaro.

Aji siba huahuattajo tojajaropi ia Medsede Diojine deni tojajaro. Najaro imajine Diodsa etidsejaro”

nani Dio Atti dsodo nanidsa

–nade Jeso. <sup>43</sup> —Nadsapi tiadenidsa ajima onajaro: Diopa pocca cacahuehe tiadenidsa tojanijine najoraporaha Pohua Bedi tettajomanadsapa pocca cacahuehepi idininitohui, madija ohuahadenidsana da inanijine. Najaridenina Diodsa iboraqquri nadsa poccadeni madiesa ima bicani ahuato tanitohui. <sup>44</sup> Nadsama siba dacorehe cajjarocca ima onihi naqui ajima nani: Najaro sibadsa madija tohuedimamanadsapa poccadeni ima tossamodsapi assiredeni tajoriridsamanajarissa quinahitohui. Najaro siba madijadsa ssonaridsapi mere tocaniredsapa jamiromanahissa tahitohui –nade Jeso, pohua tahimari huati tadsa. (Aja madija pohuadsa pajissa quina-jaradsapa paja jicarihi nahitohui, najari.)

<sup>45</sup> Nadsapa dada toqqumade taminedeni, marinaja pariseodsas jehe quinajarideni quinadsa Jesocca marinaja mittamanadsapa bodideni nahatoqquri najari: —Jesopa icca ima huati huati tajari, iapi pohua ettajojarijine –quinade. <sup>46</sup> Nadsapa Jesodsas huadimanadsa: —Jeso todsepe inanana –quinaraha madija noppinedeni cappinamanajari, aja madija huapima: —Jesopa Dio Atti cacacomerabote –quiquinanadsa.

## 22

### *Jesopa cajicajicca jipaqqiecca ima tadsajani mari icanabaqquijari*

#### *Roca 14.15-24*

<sup>1</sup> Nadsapa Jeso pocca marinaja ajijaro namidsa imadinicca ima tadsajani madija huapimadsa huati tapomajari. <sup>2</sup> Pohua attipa: —Diocca cacahuehecca ima onihipi pina ajijaro imassa najaro. Tamine deni tojajaripa pocca ejedeni amoneje cajihijinecca jipaqqie inahatojaro. <sup>3</sup> Nadsapa cacajirehicca jipaqqie najoradsa pohua tessedeni jahijonahijine pocca dodosse tabaqqi dosse inabaqquiridsajari. Huati naridsamanadsapa attidenia: “Ohua medsedecca jipaqqie najorani. ‘Jai tijajonaji’ napaja” quinaraha pohua tessedenipa jai tojahijine jiperaqquri najari. <sup>4</sup> Dsotode naco pocca dodosse tabaqqi ohuahadeni dosse inabaqquipomajari. Pohua attipa: “Aja huahua onabaqquipojaridenidsa ajima tiquinaji: ‘Tamine attipa ajama napaja: Jipaqqie onajorani. Occa bohui dsoqqe, occa bohui bedi oquibote dsoqqe nahi. Huapima najorahi, najari. Occa ejedeni cacajirehicca jipaqquietohui jai tijajonaji, napaja tamine’ tiquinana” najari. <sup>5</sup> Nadsapa jai toja, huati toquinaraha pohua

tessedenidsa pina ponimassa najaro. Ohuahapa pocca huidsajahuaji tocca, ohuahapa pohua dsepetaji dadahuaji tocca najari. <sup>6</sup> Motapa taminecca dodosse tabaqqui itadamamanadsa inajidsobaqquimana, inanadsoqque-ridsamana najari.

<sup>7</sup> —Nadsapa tamine huadidsapa pocca soldado icadossebaqquijari, pocca dodosse tabaqqui jicajarideni acconedeni jicahijine. Inajicabaqqui-manadsapa poccadeni odsa naqui botta inaridsamanajaro. <sup>8</sup> Nadsapa pocca dodosse tabaqqui ohuahadenidsa tamine attipa: “Jehe, occa ejedeni cacajirehicca jipaqque najoranissa taraha otesse huahua onabaqquiipojaridenipa occa huatidsehedsa pajiramana-jarahi.

<sup>9</sup> Jari, madijatohui jahui imeni huapimadsa jai tijaridsaji. Nahihuaicca madija huapima bacco tinabaqquimanadsa ajima tiquinaji: ‘Tamine attipa: Occa ejedeni cacajirehicca jipaqquietohui jai tijajonaji, napaja’ tiquinana” najari tamine atti.

<sup>10</sup> Nadsapa taminecca dodosse tabaqqui jahui imeni jai tojaridsadsa madija bacco inabaqqui-manajaridenipa tabaccoraqqui najarideni, bicaqqui najarideni naco inequeriqquimanajari. Nadsapa madija jai tojaja canadsa taminecca odsa bodihuaji madija ijimanajari.

<sup>11</sup> —Nadsapa huapima jipamanadsa taminepa pocca ejedenicca jipaqquedsa queriqquimanajari qquide qquedsimajari. Pocca daniji etero huedsaridsamanaha bica bica quinajari. Naraha madija ojariapa taminecca daniji cacajirehicca etero huedsa-jaraha qquedsimahi tamine qqui tajari. <sup>12</sup> Nadsa taminepa pohuadsa huati tajari: “¿Nija otesse? Occa ejedeni cacajirehicca etero occa daniji huedsaridsamanaraha tiaha tedsani qqui onejeraha. ‘Ohuapi cajicajicca etero jirani oqquedsimana’ ¿tajarorane?” najari. Naraha pohuapa tamine atti mittaraha joma najari. <sup>13</sup> Nadsapa tamine pocca dodosse tabaqquids: “Jari, ajajari madija isso jore, biji jore tiquinajo. Ajicca amossini dsidsinihuaji coro tininemanajo. Nahihuaippa ocasserani ahua-dsanapodsapa pano todsahi nadsa oji oji nahitohui” najari.

<sup>14</sup> —Jehe, Diocca cacahuehecca imapi najarossa najaro. Diopa pocca cacahuehedsa toquejenahijine madija huapima huahua inajonabaqquiraha pamema naha icattejidsabaqquijari, pohuadsa jehe quinahijine —nade Jeso.

—¿Romanodenicca taminedsa icca dsiniro mota da inanijine bica taqui? —quina-jari

*Maraco 12.13-17; Roca 20.20-26*

<sup>15</sup> Dsotodepa Isaraeri potemahi jodiodeni mota marinaja pariseodsa jehe quinajari-deni tohuajimanahi nadsa pohuadenira imahaha canajari. —¿Nejecoma inanadsa Jeso atti inassamodsa pohuadsa ima inassonariniijine? —quinahi nade. <sup>16</sup> Nadsapa pariseodenicca mamari tabaqqui pama, tamine Herodecca madija pama quinadsa Jesodsa huati toquinahijine dosse inabaqquijari. Nadsapa maidsehedsa ajama quinade: —Mamaride, ticca ima iadsa ahuato tani. Pajissara huati huati tinajaro. Pajissa Diocca marinajadsa madija madimanahissa tahijine mari mari titicanabaqqui najari. Madija attideni noppine ticappina-jeradsapi ticca ima onihi toja-jerajaro. Madija deni tojajari, madija dsepe sse tajari, madija ajamani tojajari tedsejepa tiadsa najarissa caniqquimerajari —quinade. <sup>17</sup> —Nadsama ibodi acco ticamabaqquiji. ¿Nejeco imana bica tani tajaro? Romanodenicca tamine deni tojahicca pocca dossenijidsa icca dsiniro mota pohuadsa da inanijine ¿bica taqui? ¿Bica tejerarane? Moisesicca marinajadsa ¿oppina taqui? ¿Oppinera tarane? ¿Tetti nejecoma tani? —quinade.

<sup>18</sup> Jesodsa attideni bica tadsa huati huati toquinaraha poccadeni tabaccorehe pohuadsa ahuato tadsa pohuadenidsa huati tajari: —¡Timaidssamanajaro! ¿Nejecotohui occa ima tossamonijine ohuadsa huati tiquinajaro? <sup>19</sup> Jari, ohuadsa dsiniro ccarara romanodenidsa da tanijinecca nohue ticanamanaji, qqui ocanana —nade Jeso. Nadsapi denario dsojo icanajonamanadsa Jesodsa da icanamanade.



<sup>20</sup> Nadsapa pohuadenidsa huati tapomajari: —Jari, ajijaro ccararadsapi ¿nejecojari corimena anijaro? ¿Nejecojari oni dsodo najaro? —nade Jeso. <sup>21</sup> Nadsapa pohuadsa ecomeramanajari: —Romanodenicca taminedija —quinade. Nadsapa pohuadenidsa Jeso attipa: —Romanodenicca tamine pocca dsiniropi pohuadsa da tinanimanaji. Naraha Diocca tiquejenadsapi Pohua jipa tahiccara Pohuadsa da tiquinaji —nade Jeso.

<sup>22</sup> Jeso atti mittamanadsa jabojo manadsapa: —A, icca ima ecomeraniijine nahato tajaria —quinade. Nadsapa Jesodsa apaja quinadsa jai tojanijaride.

*Nidsa jicamanajarideni nahatonimanadsapa cajicaji nohueranitohui*

*Maraco 12.18-27; Roca 20.27-40*

<sup>23</sup> Najaro huadadsa Isaraeri potemahi jodiideni mota marinaja onini sadoseodsa jehe quinajarideni Jesohuaji bacco quinajari. Poccadeni marinajapi: —Idsoqquedsapi inahatoninijine nohuerani —quiquinanajari. —Najaro imadsa Jeso atti ijine tossamodsa cobara tana —quinadsa Jesodsa najaro ima huati toquinade:

<sup>24</sup> —Mamaride, Moisesicca marinajadsapi ajima nani: “Maqquidejepa amoneje cajiraha ejedeni jiraha dsoqquedsapa pocca amonejepi pohua imecotena icajina, nahi ejedeni cajidsapa pocca ato dsoqquejaricca ejedenissa nahijine” nade Dio Atti Moisesijine dsodo nanidsa. <sup>25</sup> Nadsama tiadsa ima ajima najaro huati inana. Aja iadsapa pohuadeni imecote pohuadenira 7 quinaha madimanajari. Tahideccaha amoneje cajipojari, naraha bedi jiraha dsoqquejari. Nadsapa pocca amonejepi pohua imecotedsa tojajaro. <sup>26</sup> Najari naco pohua ohuaha bedimeni icajiraha ejedeni jiraha dsoqquejari. Dsotodecca naco najaro amoneje icajiraha najari naco ejedeni jiraha dsoqquejari. Najarossa dsanapojaro cajide 7 quinaraha ejedeni jiraha jicajari.

<sup>27</sup> Najarideni jicadsapa poni naqui dsoqquejaro. <sup>28</sup> Nadsapi dsama jicadsa madija inahatonidsapi pohua imecote 7 quinajaripa najaro amoneje icajiqquimanaporaha ¿nejecojarina ponicca maqqui tojapadsaja? —quinade.

<sup>29</sup> Naraha Jeso attipa: —Ticcadeni marinajapi dsori tajaro. Dio Atti nahatoqquri tiquinaraha pajissa tiquinanissa tejerajaro. Diopa pocca dacorehema madija inahatonibagquihijine pajirahi naco ssamoqquri tiquinajaro. <sup>30</sup> Jicamanajarideni nahatonimanadsapa caji caji cana-jarahitohui. Diohuaji madimanadsapa pina Diocca dodosse tabaqqui memehujiccassa quinahitohui. Aja pohuadenipa caji caji cana-jaradsa madimanajari.

<sup>31</sup> —Nadsama Djojine madija nahatonimanahicca imapi Dio Pohua Atti dsodo nanidsa dsodo napojaro. Pohua Atti dsodo nani hua hua titiquina naraha ¿najaro imapi tetideni ajimamanajaroqui? <sup>32</sup> Aji maittaccadsama Abarahao, Isahaca, Jacobo quinajari dsoqquemanahi nattipa Diopa Moisesidsa huati tajari: “Ohuapi Dio, ticca idideni Abarahao, pohua bedi Isahaca, pohua bedi Jacobo quinajaridenicca Dio ojani” nahi nade. Aja Dio Atti nama nadsapa Abarahao deni nahatonimanadsa madimand-sanapohuicca ima ahuateo tajaro. Diopa paja dsoqquemanarihi najaridenicca Dio jarahi. Diopa camittaqquri najaridenicca Dio. Pohuapa jidapana naco poccadeni Dio —nade Jeso.

<sup>33</sup> Najaro ima mittamanadsa madija huapima jabojo quinadsapa: —A, Jesopa nahato tajari —quinajaride.

*Diocca dosseniji deni tojanicca*

*Maraco 12.28-34; Roca 10.25-29*

<sup>34</sup> Marinaja pariseodsa jehe quinajaridenipa ima mittamanajari: —Jesopa marinaja sadoseodsa jehe quinajarideni attideni ajimani inanajaro —quinahi ima mittamanadsapa pohuadenira queriqquidsa imahaha canajari: —Jari, ia naqui Jesodsa huati inana —quinadsa Jesodsa huatide jai tojajari. <sup>35</sup> Najarideni ojaría jodiidenicca mari-naja maride tojajaripa pohua bodidsa: —Jeso nattome onana —najari. Jesodsa bacco

toquinadsapa najaria pahuadsa huati tajari: <sup>36</sup> —Mamaride, Diocca dosseniji huapi tehe Moisesidsa da inaraha ¿nejecojaro dossenijina pocca dosseniji huapimadsa deni tojajaro? –nade.

<sup>37</sup> Naraha Jesopa pahuadsa huati tajari: —Aji Diocca dosseniji deni tojaniccapi ajima najarona paji:

“Tiadeni Medsede Diodsa tetideni huanacquiri naji. Tibodideni huatonissa tadsa, dacoco tijiradsa Pahuadsara disseraquiri tidsanapomanadsapi Pahuadsa tetideni huanacquiri nanijine.”

<sup>38</sup> Najarona Diocca dosseniji deni tojanicca. <sup>39</sup> Diocca dosseniji deni tojanicca onihi pina tahideccassa najaro ajima najaro:

“Tinorideniccadsa tetideni huanacquiri naji, pina tiadenidsa tetideni huanacquiri najarossa naji.”

<sup>40</sup> Najaro Diocca dosseniji pamehedsa pocca dosseniji Moisesijine dsodo najaro huapima tassaquijaro. Dio Atti cacomerabote attideni naqui najaro pamehedsa tassaquijaro –nade Jeso.

—*¿Cristo-Mesiapa nejecojari potemahi tiquinajaro? –najari Jeso*  
*Maraco 12.35-37; Roca 20.41-44*

<sup>41</sup> Marinaja pariseodsa jehe quinajaridenipa Jesodsa queriqquimanahi paja naccadsapa Jeso pahuadenidsa huati tajari: <sup>42</sup> —Cristo-Mesiacca imapi tibodidenidsa ¿nejecoma nani? ¿Pohuapa nejecojari potemahi tiquinajaro? –nade Jeso. Nadsapa ecomeramanajaro: —Pohuapa Dabi Potemahi –quinade. <sup>43</sup> Nadsapa pahuadenidsa Jeso atti: —Naraha tamine Dabipa maittaccadsama madidsa Dio Corimejine pohua tedsejemacca ima huati tadsapa Cristo-Mesiadsa: “Ohua Medsede” napojari. Dabi pohua attipa:

<sup>44</sup> “Ia Medsede Diopa ohua Medsede Mesiadsa huati tajari: ‘Ohuitori nahatonihuaji tittariji. Ohua tedsejepi tohuatti dacorajaro ticajiji’ najari. ‘Nidsaranibote tia huadidenipa ajamani onanabaquihitohui. Poccadeni dacorehepi onajicanitohui’ napohui nade Dio.”

<sup>45</sup> Naraha Cristo-Mesia tamine Dabi Potemahi tojadsapa ¿nejecotohui Dabi pohua potemahidsaraha: “Ohua Medsede” napojaritta? –nade Jeso.

<sup>46</sup> Pahuadenipa najaro ima ecomeramananijine pajiramana-jarajari. Najaro huadadsa Jesojine poccadeni ima tossamoridsadsapi ima onihi Jesodsa huati toquinahijine huapima cappinamanajari.

## 23

*Pina pariseodenicca madiessa, pina jodiodenicca marinaja maridedenicca madiessa tiquinejeraji*

*Maraco 12.38-39; Roca 11.43, 46; 20.46*

<sup>1</sup> Nahi dsotodepa madija queriqquihidsa, ia pocca dodosse tabaqquideni naqui pahuadenidsama iquejemadsa Jeso iadsa huati tajaride: <sup>2</sup> —Jodiodenicca marinaja maridedeni, marinaja pariseodsa jehe quinajarideni tedsejepa Moisesicca marinaja nahatoqquri nadsapa timittamananissa tanijine tiadeni mari mari to-tocanabaquimana najari. <sup>3</sup> Moisesicca marinaja tiadeni mari tocanabaquimanadsapa poccadeni marinajadsa iboraqquri tiquinaji. Naraha pina poccadeni madiessa tiquinejeraji. Pahuadenipa ima bica taniccadsa mari mari quinaraha poccadeni madijepi pina poccadeni marinajassa nejerani. <sup>4</sup> Pahuadeni attipa: “Diocca dossenijidsa ajima tiquinaji” quinaraha poccadeni marinaja najo tanicca inaharimanajaro. Nadsapi pahuadenijine ima toccanajani najaro. Najaro imapi madija ecahuamananijine pajiramana-jarahi. Pahuadeni naco najaro ima madija

ecahuamananjine acco icamabaqquimana-jarahi. <sup>5</sup> Pohuadenipa madija pohuadenihuaji noccodeni jo najonahi nahitohuira madimanajari, madija pohuadeni qqui toquinadsa: “A, Diodsa disseraqquri nahi” quinahijine. Aja jodiideni motapa pohuadeni assaridsa, pohuadeni bijidsa Dio Atti dsodo nani dsaminidsa oro id-samanadsa ssoque ssoque teri najaro. Naraha pariseodeni, jodiidenicca marinaja maridedeni tedsejepa dsamini denima imenicca ssoque ssoque teri najaro, “Dio Atti dsamini denima ahuato tanijine” quinadsa. Poccadeni etero iponidsa naqui cohuanu dequerema cahuiheheri najaro. “Iana denima Diodsa bicaqquri inani” quinaraha. <sup>6</sup> Jipacque imenidsa naqui deni toquejenajaridenicca huihuittaridsa jassi tarihijine tohuini quiquinanajari. Aja Dio Atti mamarihuaji naco jassi tarihijine deni toquejenajaridenicca huihuittari tohuini quiquinanajari. <sup>7</sup> Jahuihuaji jahiridsadsa naco madija pohuadenidsa: “¿Nija, bica tinani? Tiapi deni tijani” quinahijine naco tohuini quiquinanajari. Madija naco pohuadenidsa: “Ohua maride” quinahijine tohuini quiquinanajari.

<sup>8</sup> —Naraha tiadenipi madija tiadenidsa: “Ohua maride” quinahijine tohuini tiquinejerana -nade Jeso iadsa. —Tiadeni Maridepa ojarihi. Nadsapi tiadeni huapimapi timecotedeni tiquejenajaro. Tiadenidsa ojaría deni tojahicca nohuerahi. <sup>9</sup> Aja namidsa madimanajaridenidsa naqui: “Abi” tiquinejerana. Ticcadeni Abi memehuaaji madijarina ojarihi. Najaridsara: “Abi” tiquinaji, onajaro. <sup>10</sup> Madija tiadenidsa: “Ia dossede” quinadsa naqui poni tiquinaji. Tiadeni dossedepa Cristo-Mesia ojarihi. <sup>11</sup> Naraha tiadenidsa madija denima bica tajaripa huapima bijideni accode dissera tajari. Pina ticcadeni medsesa najarina deni tojajari Diodsa. <sup>12</sup> Ajana, madijapa pohua ehuerahi pohua deni tonanadsa: “Ohuana deni ojani” nadsapa nidsa dsotode najaripa Dio ajamani inanahitohui. Naraha madijapa: “Ohuapi ajimani ojani” nadsa pohua imecotedeni accode tohuini naha madijaripa nidsa dsotode najarina Dio deni inanahitohui -nade Jeso.

*Pariseodeni, jodiidenicca marinaja maridedeni tedseje huahuattajo toquejenahijinecca ima*

*Maraco 12.40; Roca 11.37-54; 20.47*

<sup>13</sup> Nadsapa Jeso jodiidenicca marinaja maridedenidsa, marinaja pariseodsa jehe quinajaridenidsa huati tajari: —Jaho, tiadenipi huahuattajo tiquejenanitohui. Majsajidede tijirani. Dio Atti madija mari ticanabaqquimanahissa tadsapa madija Dio Atti tocahatterahijineraha. Dio Atti mari ticanabaqquimanahissa tajaradsa, ticcadeni marinaja najo tanicca tinaharimanadsapi tijinedeni madija Dio Atti tocahatterajarajari. Nema tiquinadsapi pina Diocca cacahuehecca noccobiji ticahacossamanajarossa najaro. Nadsapa madija Diocca cacahueheda jai tojedsima-jarajari. Tiadeni naqui pocca cacahueheda jai tijedsima-jerajaro.

[ <sup>14</sup> —Jaho, jodiidenicca marinaja maridedeni, marinaja pariseodsa jehe tiquinajaro, tiadenipi huahuattajo tiquejenanitohui. Majsajidede tijirani. Tabira tocajamanajarodeni ponideni madimananjineccaraha ticamajsabaqquimanadsa tiadenidsa totoja nadsapi ponidenicca odsa naqui tiadenidsa totocajaridsa najaro. Naraha ticcadeni tabaccorehe ahuatora tanijinepi Diodsa huati huati tiquinadsa ticcadeni huatinaja dequerajaro. Aja madija tiadenidsa: “A, Diodsa disseraqquri nahi” quinahijine. Tiadenina Dio Attima majsadsa tadsapi nidsa Diocca najidsohue denima oppina tanicca tiadenidsa ssonarinitohui -nade Jeso. ]

<sup>15</sup> —Jaho, jodiidenicca marinaja maridedeni, marinaja pariseodsa jehe tiquinajaro, tiadenipi huahuattajo tiquejenanitohui. Majsajidede tijirani. Madija ohuaha jodiidenicca marinajadsa toquejenahijine maride disseraqquri tiquinadsapi dsama onihihuaaji, dsama onihihuaaji maride jajahi tijaridsa najaro. Passo imeni jippehuaji naqui maride jajahi tijaridsa najaro. Madija ohuahadenipa: “Jodiidenissa inana,

Diodsa iquejenanijine” quinaraha tijinedenina ticcadeni marinajadsara toquejenajari. Najarojinena poccadeni ima denima totabaccorajaro. Ticcadeni ima tabaccora tadsapi jororoni jiquejeranihuaji tiquejenanitoahui. Tijinedeni poccadeni ima denima totabaccoradsapi pohuadeni naco jororoni jiquejeranihuaji toquejenahitoahui.

<sup>16</sup> —Jaho, tettidenipi: “Iapi Dio Attidsa madija mari icanabaqquijaripa pina madija jahinedeni dsopide iquejenajarossa najaro” tiquinaraha tiadeni huapimapi noccodeni sirissa tiquinajaro. Huahuattaajo tiquejenanitoahui. Dio Atti mari mari titicanabaqquimana naraha tibodideni huatonissa tejerajaro. Ticcadeni marinajapi ajima najaro: Madijapa madija ohuahadsa huati tajari: “Ohuatti ojine pajiranissa tanitohui, pina Diodsa dada toqquima pajiranissa tajarossa najaro” najari. Naraha pohua attissa inana-jeradsapi: “Epeje, oppinera tani” titiquina najaro. Naraha pohua attipa: “Ohuatti ojine pajiranissa tanitohui, pina Diodsa dada toqquimahuajicca oro pajiranissa tajarossa najaro” najari. Naraha pohua attissa inana-jeradsapi: “Oppina tani” titiquina najaro. <sup>17</sup> Tiadenipi ssamoqquiri tiquinani. Tibodideni huatonissa tejerajaro. ¿Nejecojaro imana deni tojajaro? ¿Diodsa dada toqquimahuajicca orona deni tojajaroqui? ¿Dada toqquimacca odsana deni tojajarorane? Jehe, dada toqquimacca odsana Dio pocca. Najarodsa oro da idsimamanadsana Dio pocca tojajaro. Najaroa aji dada toqquimana deni tojajaropaji.

<sup>18</sup> —Ticcadeni marinaja onihi naqui ajima najaro: Madijapa madija ohuahadsa huati tajari: “Ohuatti ojine pajiranissa tanitohui, pina Diodsa da tahijinecca huahuanari pajiranissa tajarossa najaro” najari. Naraha pohua attissa inana-jeradsapi: “Epeje, oppinera tani” titiquina najaro. Naraha pohua attipa: “Ohuatti ojine pajiranissa tanitohui, pina Diodsa da tahijinecca huahuanaridsa da naqquinaja huapima pajiranissa tajarossa najaro” najari. Naraha pohua attissa inana-jeradsapi: “Oppina tani” titiquina najaro. <sup>19</sup> Tiadenipi ssamoqquiri tiquinani. Tibodideni huatonissa tejerajaro. ¿Nejecojaro imana deni tojajaro? ¿Madijacca da naqquinaja huahuanaridsa huanarjaropi deni tojajaroqui? ¿Diodsa da tahijinecca huahuanarina deni tojajarorane? Huahuanarina Dio pocca. Najarodsa madijacca da naqquinaja hua inarimanadsana Dio pocca tojajaro. Najaroa aji Diodsa da tahijinecca huahuanarina deni tojajaropaji.

<sup>20</sup> —Madijapa madija ohuahadsa huati tadsapa: “Ohuatti ojine pajiranissa tanitohui, pina Diodsa da tahijinecca huahuanari pajiranissa tajarossa najaro” nadsa najaro huahuanaricca ima huati tadsapa najaro huahuanaridsa huanarjaro huapima naqui huati tajari. <sup>21</sup> Madijapa madija ohuahadsa huati tadsa naco: “Ohuatti ojine pajiranissa tanitohui, pina Diodsa dada toqquima pajiranissa tajarossa najaro” nadsa najaropi dada toqquimacca imaha ojari-jerani. Najaropi Diocca ima. Nahidsapa Dio madijari. <sup>22</sup> Madijapa: “Ohuatti ojine pajiranissa tanitohui, pina meme pajiranissa tajarossa najaro” nadsa najaropi memecca imaha ojari-jerani. Nanihuajipi Dio Pohua dosse dosse nahicca huihuittari cahittajaro. Najarodsapa Dio Pohua huittarjari. Memehuaajicca ima huati tadsapa Diocca ima naco huati tajari —nade Jeso.

<sup>23</sup> —Jaho, jodiodenicca marinaja maridedeni, marinaja pariseodsa jehe tiquinajaro, tiadenipi huahuattaajo tiquejenanitoahui. Maidsajidede tijirani. Ticcadeni odsa inorinicca ppa nahi dsamatapa quequejema majo bica tajari pore tiquinadsa naco badsira taraha mota Diodsa da da titiquina najari. Najaropi ticcadeni marinaja ajimaniccaraha tecahuamananissa tajaro. Naraha Diocca dosseniji deni tojaniccapi tecahuamana-jerajaro. Diocca dosseniji deni tojaniccapi madija ticamaidsabaqquimana-jaradsa tettideni pajiranissa tanijine. Madijadsa naqui tetideni huanacquiri nanijine. Maidseraquiri tiquinadsa tettidenissa tinanamandsanaponijine. Jehe, najaro dosseniji tecahuamana-jeradsapi ticcadeni ima dsori tajaro. Aji ticcadeni odsa inorinicca ppa nahi mota Diodsa da da titiquina najari bica

tahi naraha najaro dosseniji ajimanicca aji Diocca dosseniji deni tojanicca tadsajani tecahuamanaji, onajaro. <sup>24</sup> Jaho, tiadenipi pina noccodeni sirissa tiquinajaro. Oppina tahicca dappi tiquina-jarahijine ticcadeni dsedse eterodsa tinaqqeéquima-manadsana dse dse titiquina najaro, “sisipe ssonippahitide” tiquinadsa. Naraha Diocca dosseniji deni tojanicca tecahuamana-jeradsapi pina bani jipahi oppina tahicca camello motararaha nama naha dappi tiquinajarissa najari.

<sup>25</sup> —Jaho, jodiodenicca marinaja maridedeni, marinaja pariseodsa jehe tiquinajaro, tiadenipi huahuattajo tiquejenanitohui. Maidsajidede tijirani. Ticcadeni madijepi pina dsedse, parato huapihuajira ssahua ssahua tiquinajarissa najaro. Naraha tibodidenina pina dsedse parato bodihuaji ssahuarahi oba tajarissa tiquinajaro. Tibodidenidsa tibotimanajarocca ima ijijaro. Tohuini tiquinajarocca naqui ijijaro. <sup>26</sup> Tiadenipi tibodideni huatonissa tejerajaro. Ticcadeni dsedse, ticcadeni parato bodihuaji naco ssahua ssahua tiquinajo. Najaropi aji ticcadeni tabaccorehe tinebomanaji, tibodideni tohuirenijine. Nadsana ticcadeni madie naqui tobicanitohui, onajaro –nade Jeso.

<sup>27</sup> —Jaho, jodiodenicca marinaja maridedeni, marinaja pariseodsa jehe tiquinajaro, tiadenipi huahuattajo tiquejenanitohui. Maidsajidede tijirani. Tiadenipi pina tonoccobiricca siba bica tanijine nopohuidsa sse tiquinadsa bica tajarossa tiquinajaro. Huapihuaji bica taraha bodihuajipi oppina tani. Madija dsoqquehi tonedeni caji, imedeni jadsini obani naqui caji tani. <sup>28</sup> Tiadenipi najarossa tiquinajaro. Madija tiadeni qqui toquinadsapa pina bicaqquri tiquinajarossa naraha tibodidenidsa maidsehe iji, imasiri iji najaro.

<sup>29</sup> —Jaho, jodiodenicca marinaja maridedeni, marinaja pariseodsa jehe tiquinajaro, tiadenipi huahuattajo tiquejenanitohui. Maidsajidede tijirani. Tiadenipi Dio Atti cacomeraqquri napojarideni noccobirideni tetepidsa siba hua tinamaromanajaro. Madija bicaqquri najarideni noccobirideni tetepidsa naqui bica tanijine tijinedeni hua naridsajaro. <sup>30</sup> Naraha tettidenipi: “Maittaccadsama icca idideni madimanapohuidsa imadidsapi nassa pohuadenissa inejeraneje. Icca ididenipa Dio Atti cacomeraqquri najarideni inanadsoqqe-baqquimanadsapa nassa iapi pohuadeni acco icamabaqqui-jaranaja” titiquina najaro. <sup>31</sup> Naraha tettideni nema tiquinadsapi tijinedeni ima ahuato tajaro. Tiadenipi Dio Atti cacomeraqquri najari nanadsoqquededeni potemahi tiquejenajaro. Pohuadenissa tiquinajaro. <sup>32</sup> Nadsapi ticcadeni ididenicca jarehe idimamanapojarrocca najarossa tinanamanadsa jicana –nade Jeso.

<sup>33</sup> —Tiadenipi pina maccassa tiquinani. Ticcadeni ima tabaccora tajaro. “Diocca najidsohue dsori icanirenitohui” ¿tiquinajaroqui? ¿Dsori ticanirejeranitohui! Jororoni jiquejeranihuaji tiquejenanitohui. <sup>34</sup> Nema nadsapi tiadenidsa Dio Atti cacomeraqquri najarideni, Diojine nahatoqquri najarideni, Dio Atti pajissacca mamaridedeni dosse onaridsabaqquihitohui. Naraha motapa tinanadsoqqe-baqquimanahitohui. Motapa ahua porimacossanidsa tinanadsoqqe-baqquimanahitohui. Motapa jodiodenicca Dio Atti mamarihuaji titacossimanadsa biqueramanahitohui. Motapa odsa onihihuaji odsa onihihuaji mohua tinabaqquimanaridsahitohui. <sup>35</sup> Nema tiquinajarojinepi tiadenidsa najidsohue imeni ssonarinitohui. Ajijaro dsamacca madija bicaqquri najari tojicadsa emenedeni toccajaro manaconedeni tiadenidsa ssonarinitohui. Aja tahidepa Abeo bicabotena pohua ohuahajine dsoqquepojari. Najari dsoqquepodsama aja Dio Atti cacomeraqquri najarideni naco inajicamanaja najonapohui najaria aja Berequia bedi Sacaria inanadsoqqe-manahi bacco najonajaropaji. Sacariapa Diodsa dada toqquma bacconihuaji aji Diodsa da tahijinecca huahuanari inorinidsa inanadsoqqe-manajaripaja. <sup>36</sup> Pajissara tiadenidsa huati onajaro: Aja huapima jicajonajarideni manaconedeni jidapana madimanajaridenidsa Diojine najidsohue ssonarinitohui –nade Jeso.



*Jesopa Jerosarecca madijatohui oji oji najari*  
*Roca 13.34-35*

<sup>37</sup> Jesopa odsa panani Jerosarehuaji madimanajaridenicca ima huati tajari: — Ohuapi titohuideni oji oji onadsapi: “Jerosare, Jerosare” ohonanajaro. Maittaccad-sama ticcadeni idideni madimanapodsa naco Dio Atti cacomeraqquiri najarideni inanadsoqque-ridsamanaja najonapohui najari. Diopa pocca dodosse tabaqqui tiadenidsa dosse dosse inajonabaqquiporaha sibadsa tiquinabaqquimanaja najonapohui najari. Naraha ohuapi tiadeni ohuacahuabaqquina, onajaro. Pina tacara poni bedi poni appani dopanidsa ecahuabaqquijarissa onanijineraha tiadenipi ohuadsa jiperaqquiri tiquinajaro. <sup>38</sup> Tetideni huatoji. Diopa tidsamarideni Jerosare inebonitohui. Tiadeni tohuacahuabaqqui-jarahitohui. <sup>39</sup> Ohua naqui, ohua qqui timanimanapoma-jeraccanitohui. Nidsaranibote ima najoranissa tadsa occanipomad-sana ohua qqui tiquinapomanitohui. Nadsana tettidenipi: “Jehe, ajaripa Dio onima ccaronajari. Puhuapa bica tahi, bica tahi” tiquinanitohui –nade Jeso.

## 24

*—Diodsa dada toqquimacca odsa taboridsanitohui –najari Jeso*  
*Maraco 13.1-2; Roca 21.5-6*

<sup>1</sup> Nadsapa Diodsa dada toqquimadsa Jeso qqenadsapa toccadsa ia pohua huati-madedeni pohuadsa iajiressidsa huati inajarode: —Ia Maride, aji dada toqquimahua-jicca odsa huapimapi bicaqquiri naha –inade. <sup>2</sup> Nadsapa Jesoa: —Aji odsa imeni sibadsa nahatoridsani jidapana qqui tiquinaraha pajissara tiadenidsa huati onana: Nidsa dsotode ajijaro odsa huapimapi taboridsehe jicanissa tanitohui –nade Jeso.

*Dsama jicani tohuajiradsa nahatoqquiri inanijinecca ima*  
*Maraco 13.3-23; Roca 21.7-24; 17.22-24*

<sup>3</sup> Nadsapi ssono Oribohuaji jaijemorajaro. Nahidsa Jeso huittaridsapa ia pohua huatimadedeni iara pohuadsa huajijira icanadsa pohuadsa huati inajaro: —Ia Maride, jidacca ima huati tinajaropi ¿nejecoma nadsa tojapadseje? Aji namihuaji ticcaronapomanijinecca ima, aji dsama jicanicca ima tohuajiradsa nahatoqquiri inanijinepi ¿nejecora qqui inapopadseje? –inade.

<sup>4</sup> Nadsapa Jesoa: —Paji, madija tiadeni tocamaidسابаққуирана. <sup>5</sup> Nidsa madija huapi taha pohuama ohua onidsa maidsamanadsapa: “Ohuapi Cristo-Mesia ojani” quiquinanahitohui. Najaridenipa madija huapi taha icamaidsabaqqui-manahitohui.

<sup>6</sup> Ima onihi naqui: “Jadsire tojaridsani” timittamananitohui. Naraha ticappinamana tejerana. Jadsirepi epeje tojaponitohui. Naraha dsamapi jiquejeraccanitohui.

<sup>7</sup> Nadsama madija dsama onihicca, dsama onihicca tedseje jadsire inanamanaridsanitohui. Tamine ohuahacca madija, tamine ohuahacca madija tedseje cahadire-ridserahitohui. Pemi naqui cajiridsanitohui. Namidsadsa naqui tojaridsanitohui.

<sup>8</sup> Najaro ocasserehe tahide tojaporaha denima ocasserehe tojadsanaponitohui.

<sup>9</sup> —Nadsapa tiadeni tadamamanadsapa todsepedsa tiquejenaridsanitohui. Pohuadenijine nanajidso tiquejenadsapi tijicaridsanitohui. Occa madija tiquejenajarojinepi madija huapima tiadenidsa jiperaqquiri nahitohui. <sup>10</sup> Nadsama ohuadsa toquejenajarideni motapa ohuatti nebomanadsa ima ponimacca maidsanijidsara toquejenaridsahitohui. Nama quinadsapa pohuadeni tesse dsoqquehijine ahuaji eccora, ahuaji eccora naridsamanahitohui. Pohuadenira pohuadeni tessedsa ahuaji jipera, ahuaji jipera naridsamanahitohui. <sup>11</sup> Dsama jicanijinepi mamaidside ahuatomaridsa-manahitohui: “Ohuapi Diocca dosseniji, Dio Atti ohuacomerajaro” quiquinanaraha Diocca dosseniji jarahi. Naraha pohuadenipa madija mota huapi taha icamaidsabaqqui-manadsapa huapima attidenipa: “Jari, najaridenicca imadsara iquejenana” quinahitohui. <sup>12</sup> Dsama huapimadsa madijapa imasiri denima denima

inanaridsamananitoahui. Dsama huapimadsa imasiri ijiridsajarojine tohuati huanehepi huatideni ajamamanahitoahui.

<sup>13</sup> —¡Naraha tiadenipi dacoco tijiraji! Najaro huadie tinahanamana-dsanapodsapi tijicaraha ticassiejeranitoahui. Timadimanaccadsa dsama jicani bacco tiquinadsa naqui ticassiejeranitoahui. <sup>14</sup> Naraha dsama jiquejeraccadsama Dio pocca cacahuehecca ima bicani dsama huapimadsa ecomeraridsa-manaccanitoahui. Najaro imapi otahimari madija tocassiejerahijinecca dsama nemanehedsa madiridsamanajarideni mittaridsamanahitoahui. Nadsana dsama jicanicca huada bacco tanitoahui –nade Jeso.

<sup>15</sup> Jesopa dsama jicanicca ima denima ia mari tocanabaqquijari. Pocca marinaja hua tiquinadsapi timittamananissa taji. Pohua attipa: —Nidsa jodio quejenajarajaridenijine Diodsa dada toqquimahuaji oppinabote corime huedsadsapa top-pinanitoahui. Nadsapi pohuadenijine icca madija jodiodenipa icappinaqquimanadsa Diodsa dada toqquima paji inebomanarinitohui. Najaro imapi maittaccadsama Dio Atti cacomerabote Daniel dsodo inapojaro. Najaro ima tojani qqui tiquinadsapi tidomo toccaji, onajaro. <sup>16</sup> Aji dsama Jodeahuaji timadiridsa-manajaropi ssonohuaji tidomo toqquemorana. <sup>17</sup> Madija pocca odsa amossinihuaji ccaridsadsapa pohua dsepetajitohui pocca odsahuaji toqquedsimani-jarana. <sup>18</sup> Madija pocca huidsajahuaji dsepe ijijari naco paja joppa tarina. Pocca eterotohui odsahuaji ccani-jarana. ¡Poni! <sup>19</sup> Jaho, amoneje jiamanajarodeni, bacconideni ijimanajarodeni naqui joppa toquinanijine tohuati nahanaqquiri nanitoahui. <sup>20</sup> Diodsa huati huati tidsanapomanaji, aji najaro ima oppinabote tojadsa tidomo toccadsapi ssirini nohueranijine, jassinajacca huadadsa naqui nohueranijine, onajaro. <sup>21</sup> Najaro ima oppina tanicca bacco nadsapi madija huapima ocasserani imeni inahanamananitoahui. Maittaccadsama Dio dsama inahatoponipi nema nanicca ocasserehe qqui quinapo-jerani. Nohuerani. Ia naqui qqui inejerani paji nani. Nidsa dsotode naqui nema napoma-jeranitoahui. Nohueranitoahui. <sup>22</sup> Najaro ocasserehe nema dsanapodsapi madija tossiajaja camajarahitohuiraha najaro ocasserehecca huada Dio ajimani inananitoahui. Dio pocca madija pohua icattejidsa-baqquijaridenidsa huati huana tadsapa: “Nanidsa epejena, jicana” nahitoahui Dio –nade Jeso.

<sup>23</sup> —Nadsapa madija tiadenidsa pohuama: “Qqui, ajararipaja ia Idinide Cristo-Mesia” quinadsa, madija ohuaha attideni naco: “Qqui, ajaccajarina Cristopaja” quinadsapa pajissa tiquinejerana, onajaro. <sup>24</sup> Madija mamaidsadedeni naco tiadenidsa jahijonahitoahui. Pohuadenipa: “Ohuapi Cristo-Mesia ojani” quinahitoahui. Ohuahadeni naco: “Ohuapi Diocca dosseniji ojani, Pohua Atti ohuacomeranijine” quinaraha maidsamanajari. Pohuadeni bodipa: “Dio icattejidsa-baqquijarideni icamaidsabaqquina” quinadsa poccadeni maidsehe canahatorimana canaridsahitoahui. Madija pohuadenidsa: “Pajissa Diocca dosseniji” quinahijine tohuini quinaraha Dio Pohua icattejidsa-baqquijarideni motapa pohuadenidsa pajissa quina-jarahitohui. <sup>25</sup> Aji huati huati onajarocca imapi nidsaranibote tojanijineraha jidapana tiadenidsa huati onajaropajipa. <sup>26</sup> Nadsama madija attideni: “Ajacca madija madide nohuerahihuaji ia Idinide ccanihi” quinadsapa nani qquide jai tija tejerana. Madija ohuahadeni naco: “Ajaccajaro odsa bodidsa ia Idinide pohua najimahi” quinadsa naco pajissa tiquinejerana, onajaro. <sup>27</sup> Aji ohuapi Madija Bedi ojajaroa nidsa occaronapomadsapi ahuato tanitoahui, pina ssissiede dacorehema ssie nadsa meme nemanehede tossiajabaqquijarossa nanitoahui. <sup>28</sup> Abaridsa toqueriqquinidsa bani huatiahi ponahi nahatoqquiri tiquinajaro. Pina najaro imassa najaro occaronapomadsapi madija huapima nahatoqquiri nahitoahui –nade Jeso.

*Jeso ccaronapomahicca ima*

*Maraco 13.24-37; Roca 21.25-33; 17.26-30, 34-36*

<sup>29</sup> Jesopa ima denima huati huati tajari: —Naraha ocasserehe inahanamanani nattinipi maji ohuihitohui. Abadsico naco cahuihitohui. Memecca abadsico bedi naco catojahitohui. Jidapapa memecca huapima dacoraqquiri naccahi. Naraha dsotodepa meme dsadsa nadsapi huenene huenene canahitohui. <sup>30</sup> Nadsana ohuapi Madija Bedi ojajaroa occaronapomadsapi memehuaaji ahuato tanitohui. Nadsapa dsama huapimacca madija cappinamanadsa oji oji quinahitohui. Nadsapi meme essenima oquejemehe occaronapomani qqui toquinahitohui. Occa dacorehe, occa deni tojehe ahuato tanitohui. <sup>31</sup> Nadsapa occa dodosse tabaqqi memehuaajicca dosse onaridsabaqquidsa jadsirema jei jei quinadsa Dio icattejidsa-baqqipojarideni inequeriqquinibaqqi-manahitohui. Dsama nemanehedsa madiridsamanajarideni huapima ahuajicca, ahuajicca inequeriqquinibaqqi-manahitohui —nade Jeso.

<sup>32</sup> —Jari, ahua iquiera tahimaridsa ticahatteraji. Eppe moro nimanahi qqui tiquinadsapi: “Jehe, dsadsajade tojemanini” titiquina najaro. <sup>33</sup> Pina najaro imassa najaro aji dsama jicani tahimarini huati huati onajaro qqui tiquinadsapi: “Jehe, Jeso ccanihi, pina icca noccobijidsa huajarissa najari” tiquinana, onajaro. <sup>34</sup> Pajissara tiadenidsa huati onajaro: Aji dsama jicani tahimarini huati huati onajarocca madija dsoqquemana-jaraccadsama najaro ima huapima tojanissa tani qqui toquinaccahitohui. <sup>35</sup> Meme, nami naqui jicaridsanissa tanitohui. Naraha ohuattipi jiquejeranitohui. Aji huati huati onajaropi najarossa nanitohui —nade Jeso.

<sup>36</sup> —Occaronapomanicca huada, maji naco madija huapima ssamoqquiri nahi. Diocca dodosse tabaqqi memehuaajicca naco ssamoqquiri nahi. Dio Bedi ohua naqui najaro ima ssamo onani. Naraha Abi Dio Puhuana nahato tahi ojarihi —nade.

<sup>37</sup> —Jehe, ohuapi Madija Bedi ojajaroa nidsa occaronapomadsapi pina maittaccad-sama Nohue madipodsa ppani ccajonajarocca imassa nanitohui. <sup>38</sup> Ppani ccajona-geraccadsama madijadenipa jijipamana najari, dse dse quinajari, caji caji canajari. Nama quiquinanapojaria aja Nohue pocca canoa imenidsa toqquedsimahicca huada bacco tajaropaji. <sup>39</sup> Madija motapa ppani tojanicca huada ssamoqquiri nadsa najoramanapo-jarajari. Nadsapa ppani huassinaja bacco najonadsapi huapima je tocaniredsa jicajari. Najarossa nanitohui nidsa ohua Madija Bedi ojajaroa occaronapomadsa naqui madija mota otohui najoramana-jaradsapa ajijaro namidsa jicahitohui. <sup>40</sup> Jehe, nidsa occaronapomadsapi ima ajima nanitohui: Madija pamaha huidsajadsa dsepedeni ijimanajari. Ojaria otohui najorapojarina iaccamacossanihitohui. Naraha ohuahapa otohui najora-jaradsapa inebohitohui. <sup>41</sup> Amoneje pamehe naqui dododsa dode toquejenajaro. Ojarie otohui najorapojaroni iaccamacossanitohui. Naraha onihipi otohui najora-geradsapi inebonitohui —nade Jeso.

<sup>42</sup> —Nadsama tetideni huatodsa ticattomama canaji. Ohua tiadeni Medsede occaronapomanicca huada ssamoqquiri tiquinani. <sup>43</sup> Ajijaro imadsa tibodideni huatoji: Odsa jinedepa bobotide qquedsimahijinecca huada nahato tapodsapa pocca odsadsa botide qquedsima-jarahijine pocca odsa cacahuade nocco bissahitohuiraha ssamo taja najari. <sup>44</sup> Nema nadsapi tinajoramanehe timadimanaji. Madijapa ohua Madija Bedi ojajaroa occaronapomanicca huada ssamoqquiri nahi. Nidsa huatideni ajamama canadsa bacco onanipomanitohui —nade Jeso.

*Madijacca dodosse ibora tadsapa ima bicani cajihitohui, tabaccora tadsapa nana-jidso tojahitohui*

*Roca 12.41-48*

<sup>45-46</sup> Jesopa ima onihitohui huati tajari: —Madija dsepe ssebotepa huaji tani toccahijine najoradsapa pocca dodosse ojariadsa huati tajari: “Occa madija tecahuabaqquina. Jipamanahijine maji bacco tadsapa taparideni da da titinabaqqi nana” najari. Nadsapa dsepe ssebote toccajari.

—Nadsapa pocca dodosse nahato tadsa, ibora tadsapa madija ecahuabaqquihissa tahitohui, pina pohua dossede attissa inananitohui. Nama nadsapa dsepe ssebote ccanidsa qqui tadsapa pocca dodossedsa ima bicani inananitohui. <sup>47</sup> Nadsapi pajissara tiadenidsa huati onajaro: Madija dsepe ssebotepa pocca dodosse ibora tajaridsa ajama nahitohui: “Tiapi occa odsa, occa huidsaja, odsepetaji huapima tecahuaji” nahitohui –nade Jeso.

<sup>48</sup> —Naraha dsepe ssebotecca dodosse tabaccora tadsapa pohua dossede attissa inana-jeranitohui. Pohua bodipa: “Ohua dossede najocahi, qqui tajarahi” nahitohui. <sup>49</sup> Nadsapa pohua dossedecca dodosse tabaqqui ohuahadeni ihinajidsobaqqui nahitohui. Nadsapa pohua naco noccodeni janoqquri najaridenidsa quejemadsapa jipadera ccaridsadsapa coma tanicca naco dse dse nanaridsa nahitohui. <sup>50</sup> Pocca dodosse tabaccorabotepa pohua dossede ccanihicca maji, huada ssamo tadsa pohuatohui najora-jarahitohui. Nama nanaridsa nanaja dsepe ssebotepa bacco nanihitohui. <sup>51</sup> Nadsapa pocca dodosse inajidsohuitohui. Dsoqquedsapa maidsajidede rabotedeni-huaji inahahitohui. Nahihuaajipa ocasserani ahua-dsanapodsapa pano todsahi nadsa oji oji nahitohui –nade Jeso.

## 25

### *Jesopa dsohuato 10 quinajaro tahimarinidenidsa mari icanabaqquijari*

<sup>1</sup> Nadsapa Jeso madija denima mari icanabaqquijari: —Diocca cacahuehe tojadsapi pina ajijaro imassa nanitohui: Dsohuato 10 quinajaropi dsabisso dsohuato cacajirehicca jipaqquietohui najoramanadsapi ponidenicca jojororo equidiridsamanadsa dsabisso cajibote najari bacco ijidsamanahijine dsome jai tojajaro. <sup>2</sup> Naraha dsohuatodeni mota 5 quinehepi bodinideni huatonissa tejerajaro. Naraha dsohuatodeni mota 5 quinehepi bodinideni huatonissa tajararo. <sup>3</sup> Nadsapi dsohuato bodinideni huatonissa tejerajaropi ponidenicca jojororo iaccamanaraha ppejene jicadsa denima sso idsamanahijine dsojo quina-jarajari. <sup>4</sup> Naraha dsohuato bodinideni huatonissa tajarodenipi ponidenicca jojororo iaccamanadsapa ppejene jicadsa denima sso idsamanahijine dsojo quinajari. <sup>5</sup> Nadsapi jai tojajaro, boronidsa bacco toquinaraha dsabisso cajibote najari najodsapa dsohuatodeni cahadijabote nadsapi nanidsa cahadijajaro.

<sup>6</sup> —Naraha dsome nocconi tojadsana madija jadsirema huahua najari: “¡Dsabisso ccajonahi, ccajonahi! ¡Jai tijajonaji, bacco tijidsamanahijine!” najari. <sup>7</sup> Nadsapi dsohuatodeni huapima nocco toquejenadsa tothemamanadsapi ponidenicca jojororo denima ssiaja tahijine najoramanajaro. <sup>8</sup> Naraha dsohuato bodinideni huatonissa tejerajaropi motadenidsa attinidenia: “Ticcadeni jojororo ppejene badsira taha iadsa da tiquinajo, icca jojororo ohuiridsabote nahi” quinajaro. <sup>9</sup> Naraha dsohuato bodinideni huatonissa tajarodeni attinidenia: “Poni. Tiadenidsa badsira taha sso idsajarahi. Tiadenidsa, iadsa nadsapa pajira-jarahi. Dadahuaji jai tijaccaji, jojororo ppejene ohuaha mitta tiquinahijine” quinajaro. <sup>10</sup> Nadsapi mittade jai tojajaro. Naraha nanihuaji najomanadsapi aja dsabisso amoneje cajihijine bacco najonajari, cacajirehicca jipaqquiedsa toqquedsimajari. Nadsapi dsohuato bodinideni huatonissa tapojarodeni pohuadsa jai tojedsimajaro. Nadsapi noccobiji icahacossajaro. <sup>11</sup> Naraha dsohuatodeni mota 5 quinehepi dadahuaji mittade najomanadsa dsotode bacco nanimanajaro. Amossinidsa domoni huadsa dsabisso cajibote najaridsa huahua quinajaro: “¡Ia, ia! ¡Jaijedsimanijine noccobiji ticanahabaji!” quinajaro. <sup>12</sup> Naraha dsabissopa noccobiji icatabojidsa-jerani. Pohua attipa: “Tiadenidsa pajissa onocco jidsa tani. Occa madija tiquejena-jerani” najari –nade Jeso.

<sup>13</sup> Nadsapa madija huapimadsa Jeso attipa: —Tibodideni huatonissa taji. Ohua occaninicca huada ssamoqquiri tiquinani. Maji naco ssamoqquiri tiquinani. Tinajoramanehe timadimanaji —nade Jeso.

*Jesopa dsiniro inahapimananijinecca imadsa mari icanabaqqijari*

*Roca 19.11-27*

<sup>14</sup> Jesopa ima onihi huati tajari: —Diocca cacahuehe tojadsapi pina ajiaro imassa nanitohui. Madija pocca benehi toccahijinepa pocca dodosse tabaqqi queriqquihijine huahua inabaqqijari. Queriqquidsapa pocca dsinirodsa dsepedeni ijimanahijine pohuadenidsa da inaridsajaro. “Aja occa dsiniro tinahapimanadsa nidsa occanidsapi ohuadsa nemaneha da tanimananijine” najari. <sup>15</sup> Pocca dodosse ojariapa dsiniro inahapinijine nahato tahissa tadsapa pohuadsa ccarara 5 mil nehe da inajaro. Ohuaha naco dsiniro inahapinijine nahato tadsapa pohuadsa ccarara 2 mil nehe da inajaro. Ohuahapa dsiniro inahapinijine ajamani nahato tadsapa pohuadsa ccarara 1 mil nehera da inajaro. Nadsapa dsiniro jinede pocca benehi toccajari.

<sup>16</sup> —Nadsapa ccarara 5 mil nehe cajjaripa amadsati toccajari. Mitta, da, mitta, da naridsajari. Dsepe ijiridsahissa tadsapa 5 mil cajjiporaha denima 5 mil cajjari.

<sup>17</sup> Nadsapa ccarara 2 mil nehe cajjari najari naco mitta, da, mitta, da naridsajari. Dsepe ijihissa tadsapa denima 2 mil cajjari. <sup>18</sup> Naraha ccarara 1 mil nehe cajjaripa nema inana-jerajaro. Najaripa pohua dossedecca dsiniro inajimanijine nami hui idsadsa ppa idsajaro.

<sup>19</sup> —Dsiniro jinedepa huada huapi tadsa ccanijari. Bacco nanidsapa pocca dodosse tabaqqicca ima mittahijine pohuadenidsa huahua najari, poccadeni cuenta icattemanijine. <sup>20</sup> Nadsapa ccarara 5 mil nehe cajjari ccajonajari. Ccarara 10 mil nehe jinededsa da inanijaro. Pohuadsa da inanidsa pohua attipa: “Ohua dossede, ohuadsapi ccarara 5 mil nehe da tade. Naraha qqui taneje, odsepe ijiridsanissa tadsapi denima 5 mil nehe tojajaro” najari. <sup>21</sup> Nadsapa dsiniro jinede attipa: “Jehe, tiapi occa dodosse ohuattidsa ibora tinajaro. Bica tinani. Tiadsa badsira tehe da onaporaha denima tojanijine dissera tinadsapi denima tiadsa da onanitohui. Tiqquedsimaji, etidsena” najari pocca dodossedsa.

<sup>22</sup> —Nadsa pocca dodosse ohuaha ccarara 2 mil nehe cajjari ccajonajari. Pohua attipa: “Jehe, ohua dossede, ohuadsapi ccarara 2 mil nehe da tade. Naraha qqui taneje, odsepe ijiridsanissa tadsapi denima 2 mil nehe tojajaro” najari. <sup>23</sup> Nadsapa dsiniro jinede attipa: “Jehe, tia naqui occa dodosse ohuattidsa ibora tinajaro. Bica tinani. Tiadsa badsira tehe da onaporaha denima tojanijine dissera tinadsapi denima tiadsa da onanitohui. Tiqquedsimaji, etidsena” najari pocca dodossedsa.

<sup>24</sup> —Nadsa pocca dodosse ohuaha ccarara 1 mil nehe cajjari ccajonajari. Pohua attipa: “Ohua dossede, tiapi madijadsa daco tijirajaro. Tiapi tarabajadsa tejeraraha ticca dodosse tabaqqijine titicaji najaro. <sup>25</sup> Nadsapi tinoppine ocappinadsa nami hui odsadsa ticca dsiniro ppa odsajarode. Aja ticca dsiniro tiadsa da onanina” najari. <sup>26-27</sup> Naraha dsiniro jinede attia: “¡Occa dodosse ibobote! ¡Tabaccora tinani! Tettiapi ohuadsa: ‘Madijadsa daco tijirajaro. Tarabajadsa tejeraraha ticca dodosse tabaqqijine titicaji najaro’ taha. Naraha ohuadsa nahato tinadsapi occa dsiniro aji dsiniro ehcahuamana nanihuajina tinebodsas tohuapidsapi occanidsa denima ohuadsa da taninitohuiraha” najari dsiniro jinede atti.

<sup>28</sup> —Nadsapa pocca dodosse tabaqqi ohuahadenidsa huati tajari: “Jari, occa dsiniro ccarara ibobotedsa da onapojaropi tidinimanaji. Tidinimanadsapi madija dsiniro ccarara 10 mil nehe cajjaridsana da tiquinaji. <sup>29</sup> Aja, cajjaripa pohuadsa denima, denima, denima tojadsapi huemani cajjhitohui. Naraha ibobotepa badsira taha cajiraha pohua cajjaricca todininitohui. <sup>30</sup> Nadsama aja occa dodosse ibobotepa



dsidsinihuaji coro tininemanajo. Nahihuajipa ocasserani ahua-dsanapodsapa pano todsahi nadsa oji oji nahitohui” najari dsiniro jinede atti –nade Jeso.

—*Madija ocattejidsa-baqquihitohui –najari Jeso*

<sup>31</sup> Jesopa denima mari icanabaqquijari: —Ohuapi Madija Bedi ojajaroa nidsa occaronapomadsapi occa deni tojehe ossiejenema occaronapomanitohui. Diocca dodosse tabaqqui memehuaajicca ohuadsa jahironahitohui. Nadsapi deni ojanicca huihuittari bicanidsa ohuittaridsa dosse dosse onanitohui. <sup>32</sup> Nadsana dsama huapimacca madija obaccohuaji queriqquihitohui. Nadsapa ohuana madija ocattejidsa-baqquihitohui. Pina edede cacahuadepa pocca edede icattejidsa-baqquijarissa onanabaqquihitohui. Edede cacahuadepa edede bicahi pohuadenira icattejidsabaqqui, edede jidsadsa cabra pohuadenira icattejidsabaqqui najari. <sup>33</sup> Pohua biji nahatonihuajipa edede bicahi pohuara. Pohua biji ssamohuajipa edede jidsadsa cabra pohuara inanabaqquijari. Ohua naqui madija ocattejidsa-baqquidsapa madija bicaqqui najari Dio Pohua jipa tahicca inanamanajarodenipa obiji nahatonihuaji onanabaqquihitohui. Madija tabaccoraqqui najari Dio Pohua jipa tahicca inanamanajarodenina obiji ssamohuaji onanabaqquihitohui.

<sup>34</sup> —Nadsapi ohua tamine ojadsa aja madija obiji nahatonihuaji domo huajari-denidsa huati onanitohui: “Nija, occa Abi tiadenidsa ima bicani inanaridsajaro. Pocca cacahuehe tiadenidsa tojani. Najaropi dsama nahato-jeraccadsama tiadenidsa najorapojaro. <sup>35</sup> Ohuadsa bicaqqui tiquinadsapi opemidsa ohua titapamanade. Obacco dsaridsa ohuadsa passo da ticanamanade. Tiadenihuaji bacco onajonadsa ohuadsa tinoccodeni jidsaqqui naraha: ‘Iadsa timadiccaji’ tiquinade. <sup>36</sup> Etero ocappiradsa naqui ohuadsa da tiquinade. Coma onadsa naqui ohua qquide jajahi tijajona nade. Toponi cocorodsa ohuedsadsa naqui ohua qquide jajahi tijedsima nade” onanitohui pohuadenidsa.

<sup>37</sup> —Nadsapa aja madija bicaqqui najarideni ohuadsa huati toquinahitohui: “Ia Medsede ¿nejecoma nadsa tipemidsa tiadsa dsamatapa da inajaritta? ¿Nejecoma nadsa tibacco dsaridsa tiadsa passo da icanajarotte? <sup>38</sup> ¿Nejecoma nadsa tiadsa inocco jidsa taraha, ‘Iadsa timadiccaji’ inajarotte? ¿Nejecoma nadsa etero ticappiradsa tiadsa da inajarotte? <sup>39</sup> ¿Nejecoma nadsa coma tinadsa tia qquide jajedsimajarotte? ¿Nejecoma nadsa toponi cocorodsa tedsadsa tia qquide jajedsimajarotte? Ssamomo inani” quinahitohui. <sup>40</sup> Nadsapi ohua tamine ojadsapo pohuadenidsa ohuatti ajima onanitohui: “Pajissara tiadenidsa huati onajaro. Aja madija occa tojajari ojaría tohuati nahana tajari acco ticamamanadsapa pina ohua acco ticamamanajarossa najaro” onanitohui, obiji nahatonihuaji domo huajaridenidsa –nade Jeso.

<sup>41</sup> —Naraha obiji ssamohuaji domo huajaridenidsapi ohuatti ajima onanitohui: “¿Aji ohuadsapi huajiji tinaji! Diopa tiadenidsa najidsohue inanajaro. ¿Jororoni jiquejeranihuaji jai tijaji! Najaropi pocca huadi Satanadsa, Satanacca dodosse tabaqquidenidsa najorapojaro. <sup>42</sup> Tiadenipi opemidsa ohua titapamana-jerade. Obacco dsaridsa ohuadsa passo da ticanamana-jerade. <sup>43</sup> Tiadenihuaji bacco onajonadsa ohuadsa tinoccodeni jidsaqqui nadsa: ‘Iadsa timadiccaji’ tiquinejerade. Etero ocappiradsa naqui ohuadsa da tiquinejerade. Coma onadsa naqui ohua qquide jajahi tijajona nejerade. Toponi cocorodsa ohuedsadsa naqui ohua qquide jajahi tijedsima nejerade” onanitohui pohuadenidsa.

<sup>44</sup> —Nadsapa aja madija tabaccoraqqui najaridenipa ohuadsa huati toquinahitohui: “Ia Medsede ¿nejecoma nadsa tipemidsa tiadsa dsamatapa da inajarajaritta? ¿Nejecoma nadsa tibacco dsaridsa passo tiadsa da icana-jerajarotte? ¿Nejecoma nadsa tiadsa inocco jidsa tadsa ‘Iadsa timadiccaji’ inejerajarotte? ¿Nejecoma nadsa etero ticappiradsa tiadsa da inejerajarotte? ¿Nejecoma nadsa coma tinadsa tia qquide jajedsima-jerajarotte? ¿Nejecoma nadsa toponi cocorodsa tedsadsa tia

qquide jaijedsima-jerajarotte? Ssamomo inani” quinahitohui. <sup>45</sup> Nadsapi ohua tamine ojadsapi pohuadenidsa ohuatti ajima onanitohui: “Pajissara tiadenidsa huati onajaro. Aja madija occa tojajari ojaria tohuati nahana tajari acco ticamamana-jaradsapa pina ohua acco ticamamana-jerajarossa najaro” onanitohui pohuadenidsa –nade Jeso.

<sup>46</sup> —Jehe, tabaccoraqquiri najaridenipa najidsohue jiquejeraniccadsa madimana-dsanapohuitohui. Naraha madija bicaqquiri najari Dio Pohua jipa tahicca inamanajarodenina camittehe jiquejeranihuaji madimana-dsanapohuitohui –nade Jeso.

## 26

### *Jeso todsepe tojahijine imahaha canajari*

*Maraco 14.1-2; Roca 22.1-2; Huano 11.45-53*

<sup>1</sup> Jesopa madija mari icanabaqquia jicadsapa ia pohua huatimadenidsa huati tajari: <sup>2</sup> —Nahatoqquiri tiquinani huada pama nadsapi ejete Pascoa tojanitohui. Ohuapi Madija Bedi ojararoa nidsa najaro ejete tojadsapi todsepe ojanitohui. Ahua porimacossanidsa ohua inanadsoqque-mananijine –nade.

<sup>3</sup> Nadsapa Jesodsa jiperaqquiri najarideni aja dada toqquimade tamedeni, jiodeni ime jochuideni tedseje poccadeni tamine deni tojajari onipa Caipa pocca odsa imenidsa queriqquimanajari. <sup>4</sup> Nahidsa imahaha canajari: —¿Nejeco maidseheda Jeso todsepe tojadsa dsoqquehijine? –quinahi nade. <sup>5</sup> Naraha pohuadeni atti onihipi: —Ejete tojadsapi ima nohueraccanijine. Jesodsa madija jipaqquiri najarideni pohua dama inahi qqui toquinadsapa mohua mohua canarana –quinahi nade.

### *Jeso tatidsa majojo sso inarijarocca ima*

*Maraco 14.3-9; Huano 12.1-8*

<sup>6</sup> Jesopa odsa capamema najaro onini Betaniahuaji madidsa Ssino pohuadsa huapi jadsidsi quiquinanajaricca odsadsa toqquedsimajari. <sup>7</sup> Nahi Ssinocca odsadsa jipade jassi inaridsa amoneje Jesodsa tohuajiressijaro, poni dsapanidsa siba onini alabastro nahatoni jojo bicahi dsojo inajonajari. Najari jojodsa majojo bicani huatini ccara tanicca dsojo icadsimajaro. Jesodsa bacco tadsapi tatidsa nemaneha sso inarijaro. <sup>8</sup> Naraha Jesocca dodosse tabaqqui ia qqui inadsapi edijaro. Ettipi: —¿Nejecotohui majojo ponima inajicajaro? –inade. <sup>9</sup> —Najaro majojo nemaneha manaconidsa da icanadsa iadsa da inadsapi madija cappiramanajaridenidsa da iqquimanitohuiraha –inade. <sup>10</sup> Etti nema inadsa Jeso mittadsapa pohua attipa: —Epeje tiquinaji. ¿Nejecotohui ponidsa tedimanajaro? Ponijine ohuadsa nema nadsapi bica tani. <sup>11</sup> Cappiramanajaridenina tiadenidsa madimana-dsanapohuitohui. Naraha ohuapi tiadenidsa omadidsanapo-jeranitohui. <sup>12</sup> Aji majojo ohuassiredsas sso inarijaropi pina odsoqquedsa ohua ppa idsamananijinessa najaro najorapojaro –nade. (Jodiodenipa poccadeni madija dsoqquedsapa nama quiquinanajari.) <sup>13</sup> —Pajissara tiadenidsa huati onajaro: Dsama onihi, dsama onihidsa otahimari madija tocassiejerahijinecca ecomeramanadsapi aji otatidsa majojo sso inarijarocca ima naqui madija mittarid-samanahitohui. Nema nadsapi ponicca ima huatideni ajamamana-jarahitohui –nade Jeso.

### *Jodapa Jeso eccorahijine najorajari*

*Maraco 14.10-11; Roca 22.3-6*

<sup>14</sup> Jesocca dodosse tabaqqui <sup>12</sup> quinajari ojaria oni Joda Iscariotepa dada toqquimade tamedenidsa huatide toccajari. <sup>15</sup> Pohua attipa: —Jari, Jeso tidsepedenidsa onanahijinepa ¿nejecoma nehe ohuadsa da tiquinanijine? –najari. Nadsapa tamedeni dsiniro ccarara plata 30 nehe huatini ccara tanicca Jodadsa da quinajaro. <sup>16</sup> Nadsapa toccanidsa pohua bodi najorajari. Jeso pohuadenidsa eccorahijine inoccodsaridsajari.

*Ia Medsedecca jipagquie**Maraco 14.12-25; Roca 22.7-23; Huano 13.21-30; 1 Corintodenidsa 11.23-26*

<sup>17</sup> Isaraeri potemahi jodiodenicca ejete imeni bacco tajaro, oninipi Pan ssaja tajarahicca. Najaro ejetepi huada 7 nehe jicanijine. Tahidecca huadadsa jipagquie onini Pascoa ihinanamana najaro. (Pascoa ettidsapi: Dio tossoquimajari, inajaro.) Nadsapi najaro huadadsa Jesodsa ia pohua huatimadedeni huati inajaro: — ¿Nejecohuaji Pascoacca jipagquie tiadsa inajoranijine? –inade. <sup>18</sup> Iadsa huati tajari: —Odsa pananihuaji otessecca odsadsa huatide jai tijapoji. Pohuadsa ajima tiquinana: “Ia Maride attipa: ‘Ohuadsa ima tojabote nani’ najari. ‘Nadsapa occa dodosse tabaqqui tedseje ticca odsadsa Pascoacca jipagquiedsa edede bedi ijipagquiniijine’ napaja” tiquinana –nade Jeso. <sup>19</sup> Nadsapi Jesocca dodosse tabaqqui iapi Jeso pohua attissa inajaro. Pascoacca jipagquie dsome ijipagquiniijine inajorajarode.

<sup>20</sup> Nadsapi najaro dsomedsa ia Jesocca dodosse tabaqqui 12 inajaro pohua tedseje huahuanaridsa ijipagquiniijine jassi inahuajanijarode. <sup>21</sup> Jipade iquejenanaja Jeso iadsa huati tajari: —Pajissara tiadenidsa huati onana: Aji tiadeni ojariaha ohua ccaccoradsapa todsepe ojanitohui –nade Jeso. <sup>22</sup> Pohua atti nama nadsapa ibodi qquedsadsa: —¿Ohua Medsede, aji ohuadsaqui? –inaridsajaro. <sup>23</sup> Nadsapa Jeso attia: —Madija ojariapa icca paratodsa pohua naco pocca pandsa depo apa, depo apa nahi. Najarina ohua ccaccorahitohui. <sup>24</sup> Jehe, ohuapi Madija Bedi ojajaroa nidsa odsogquenitohui. Pina maittaccadsama otedsejemacca ima Dio Atti cacomeraqquri najarideni dsodo quinapojarossa onanitohui. Naraha ohua ccaccoradedsa oppina tehe tojanitohui. Jaho, najari maqquideje tossoona-jaradsapa bica taraha, oppina tanicca dsori tahitohuiraha –nade Jeso. <sup>25</sup> Nadsapa Joda Iscariote, Jeso ccaccoradepa Jesodsa huati tajari: —Ohua Maride ¿ohuadsa tajarorane? –naraha Jesoa: —Jehe, tia tetti nema tajaropajia –nade.

<sup>26</sup> Nadsapa jipade iquejenadsa Jeso pan idi nadsa Diodsa huati tajari: —Jehe, Abi Dio ticca daniji iadsa bica tahi –nade. Nadsapa pan icanarobedsa dside jai da, dside jai da inaridsade. Ia pocca dodosse tabaqquidsas huati tajari: —Aja, apa tiquinajo. Ajijaropi ohuemecca ima –nade Jeso.

<sup>27</sup> Dsotodepa dse inahijine dsedse equidi nadsa Diodsa huati tajari: —Jehe, Abi Dio ticca daniji iadsa bica tahi –nade. Nadsapa iadsa da icanadsa iadsa huati tajari: —Aja, dse taridsamanajo, tiadeni huapima. <sup>28</sup> Ajajari dsedsepa ohuemenecca ima. Dio madija tedseje jehe canirehijinecca ima tojanijine. Nidsa ohua odsogquedsa ohuemene toccadsapi najaro jehe canireniji pajissa tojanitohui. Aji ohuemene toccajaropi madija huapimadsa ima bicani tojanijine. Najaropi madija huapimacca imasiri manaconi ohuadsa tojadsapi Diopa poccadeni imasiri epeje inananijine. <sup>29</sup> Ajijaropi tiadenidsa huati onajaro: Uva ppejene dse inajaripa dse onapomajaracchitohui. Nidsa occa Abicca cacahuehe tojanissa tadsa tiadeni tedseje uva ppejene ohuaha dsatira dse inahitohui –nade Jeso.

*Pedro pohua namahisahijine Jeso huati tapojari**Maraco 14.26-31; Roca 22.31-34; Huano 13.36-38*

<sup>30</sup> Pascoacca jipagquie jicadsapi Diodsa jiri inade. Jiri inehe jicadsapi ssono Oribohuaji jaijemoranide. <sup>31</sup> Nahidsa bacco imoradsana Jeso iadsa huati tajari: —Ajijaro dsomepi tiadeni huapima ohua tinebomananitohui. Pina Dio Atti dsodo napojarossa nanitohui: “Nidsa edede cacahuade dsogquedsapa pocca edede tojaribaqquihitohui.” <sup>32</sup> Naraha ohuapi Djohne onahatonitohui. Onahatonidsapi titedsejemadeni dsama arobeni Carireahuajina occaninitohui –nade Jeso.

<sup>33</sup> Naraha Pedro attia: —Huapima tia inebomanaraha ohuapi tia onebo-jeranitohui –nade. <sup>34</sup> Nadsapa Jeso Pedrodsas: —Pajissara tiadsa huati onana: Tiapi ajijaro dsome tacara huahua najaraccadsa ohuadsa: “Onocco jidsa tani” tanitohui. Dsotode naqui:

“Onocco jidsa tani” tapomanitohui. Dsotode naqui nema tapomanitohui –nade Jeso. <sup>35</sup> Naraha Pedroa: —A, ohuapi nema onejeranitohui –nade. —Ima oppina tadsa naqui tiadsa: “Onocco jidsa tani” onejeranitohui. Tiadsama odsogquenijine bica tani –nade Pedro. Ia pohua huatimade huapima naqui etti nema inade.

*Jesopa Jesemanihuaji Diodsa huati huati tajari*

*Maraco 14.32-42; Roca 22.39-46*

<sup>36</sup> Nadsapa Jeso pohua inadsa ahua ppa naridsahi oni Jesemanihuaji jaijajaro. Nanihuaji bacco inadsapi ia pocca dodosse tabaqqi iquejenajaro, iadsa Jeso attipa: —Tiadenipi ajidsa jassi tinaccaji. Ohuapi ajiccadsa Abi Diodsa huati onaccana –nade. <sup>37</sup> Nadsapa pohua huatimade 3 quinaha jina inabaqqijari. Pohnadenipa Pedro, Sebedeo bedideni Huano, Satiaco quinajarideni pohuadsa denima jai tojajari. Nahidsana Jeso bodi qquedsadsapa ojibote najari. <sup>38</sup> Nadsapa pohuadenidsa: —Obodi ocassera tajarojine ohuatiabote-te canani. Tiadenipi ajidsa tibomanaccaji. Ohuadsama tinoccodeni bissaccana –nahi nade Jeso.

<sup>39</sup> Nadsapa Jeso tocca-cca nadsa pohua baccohuaji namidsa pona nadsa Imehidsa huati tajari: —Abi, aji ¿madija tocassiejerahijinecca ima onihi nohueraqui? Nohueradsapi epeje. Madija huapimacca imasiri manaconi najidsohue ohuadsa tojadsapi ocasserani ohuanitohui. Pina dsedse bidabote dse onanijinessa najaro. Najaro onahananijine jipera onaraha ohua jipa onanicca tohui onejerajaro. Tia jipa tinaniccana paji. Najarodsana ibora onajaro –nahi nade.

<sup>40</sup> Nadsapa pohua huatimadedenihuaji ccanijari. Bacco nanidsapa cahadijahira qqui tajari. Nadsapa Pedrodsa Jeso huahua najari: —¿Ticahadijaroqui? ¿Dsome nocconi ocaja-jeraraha tinoccodeni bissade tipajiramana-jerajaroqui? <sup>41</sup> Ticahadija-jeradsa Diodsa huati tiquinaji, ima oppina tehe tojadsapi tijaparimanadsa ima tinanamana-jeranijine. Tibodidenipi ibora taraha tessiredenina mijira tajaro –nahi nade Jeso.

<sup>42</sup> Nadsapa toccanipomadsa Imehidsa huati tapomadsa naco: —Abi, nahato tinani. Madija huapimacca imasiri manaconi ocasserani ohuanijine jipera onaraha tia jipa tinaniccadsana ibora onajaro –nahi nade Jeso.

<sup>43</sup> Nadsapa pohua huatimadedenihuaji ccanipomaraha cahadijahira qqui inabaqqijari, huada comani ahuamanaja nadsa. <sup>44</sup> Nadsapa inebobaqqipomadsa Diodsa huati tapomajari. Pina pohua huati tapohuissa najari huati tapomajari. <sup>45</sup> Nadsapa pohua huatimadedenihuaji ccanipomadsa Jeso attipa: —¿Tiadenipi ticahadija dsanaponijinequi? Ohuapi Madija Bedi ojararoa jidapapi ohua ccaccoradejine imasiri cajimanajarideni dsepedenidsa ojanitohui –nahi nade. <sup>46</sup> Nadsapa: —Jina, titehemamanaji. Ajana, jidapapa ohua ccaccorade ccajonahi –nahi nade Jeso.

*Jeso dama quinajari*

*Maraco 14.43-50; Roca 22.47-53; Huano 18.1-11*

<sup>47</sup> Jeso huati huati naccaraha Joda bacco najonajari. Jodapa Jesocca dodosse tabaqqi 12 quinajarideni ojaria. Pohnana madija huapi taha eccajonabaqqijari. Jadsirecca massito eccajonamana, huahuacca eccajonamana najaro. Pohnadenipa dada toqqumade taminedenicca dosseniji, ime jochuidenicca dosseniji jahijonajari. <sup>48</sup> Jodapa Jeso todsepe inanahijine eccajonabaqqi-jaraccadsama taminedenidsa huati tapojari: —Nidsa pano mose onahitohui. Najarina dama tiquinahijine –napojari nade. <sup>49</sup> Nadsapa huapima jahijonadsa bacco najonamanajari. Nanaja Joda Jesodsa tohuajiressi, pina pajissa pohuadsa bica tajarissa nadsa: —¿Nija ohua Maride? –nanaja pano mose inajaride. <sup>50</sup> Naraha Jesopa Jodadsa: —Otesse, ohuadsa ima tinananijine ticcajonajaro. Nadsapi nema taji –nade. Nadsapa Jesodsa tohuajiressimanadsa dama quinajari. <sup>51</sup> Naraha Jesocca madija ojariana massito

dsoppa jeo, dada toqquimadedenicca tamine deni tojajaricca medse huaribo ca taneje tajo canajaro.

<sup>52</sup> Naraha Jeso najaridsa: —¡Paji! Ticca massito dso ticadsaniji. Jadsirecca massitodsa madija ijine ahuajaripa nidsa dsotode pohua naco jadsirecca massitodsa inanadsoqqe-manahitohui —nade. <sup>53</sup> —Jaho ¿tibodi ssamo tajaroqui? Ohua jipa onadsa Abi Diodsa huati onadsapi pocca dodosse tabaqqui memehuaajicca ohua acco icamamananijine pina soldadodenissa najari 72 mil quinaha dosse inaronabaqquihitohui. <sup>54</sup> Naraha nema onadsapi pina Dio Atti dsodo napojarossa onana-jeranitohui. Aji, ohuadsa ima oppina tanicca tojanijinepi maittaccadsama Djojine dsodo quinapojaro. ¡Epeje! Dio Atti nemaneha onapajiranissa tanijine. Ohua accodetohui huahua onejerana, onajaro —nade Jeso atti.

<sup>55</sup> Nadsapa Jeso pohuatohui jahijonajaridenidsa huati tajari: —¿Nejecotohui tiadenipi ohua dama tiquinanijine jadsirecca massitoma, huahuaccama jai tijajonajaro? Nema tiquinadsapi pina bobotidetohui jai tijajonajarossa najaro. Nadsa tiadenidsama huajijiradsa Diodsa dada toqquimahuaji mari mari ohonanaraha ohua dama tiquinehe nejerade. <sup>56</sup> Naraha epeje, ohuadsa ima tinanamananijinepi pina aji Dio Atti cacomeraqquri najarideni dsodo quinapojarossa najaro tojanijine —nade Jeso.

Naraha ia pocca dodosse tabaqqui huapimapi Jeso inebodsa idomo toccade. Nadsapa Jeso pohua motta ojari naha iaccanimanahi nade.

*Dada toqquimadedenicca tamine deni tojajaridsa Jeso iaccamanajari  
Maraco 14.53-65; Roca 22.54-55, 63-71; Huano 18.12-14, 19-24*

<sup>57</sup> Jeso dama quinadsapa tamine Caipacca odsahuaji iaccamanajari. Pohuapa dada toqquimadedenicca tamine deni tojajari. Nahidsa jodiodenicca marinaja maridedeni, jodiodeni ime jocohuideni huapima queriqquimanahi nade. <sup>58</sup> Naraha Pedropa huajima tohuanamissadsa dada toqquimadedenicca tamine deni tojajaricca boronidsa bacco todsimajari. Caipacca dodosse tabaqquidenidsama huittajari. Pohua bodipa: —¿Jeso nejecoma inanamanahijine? —najari.

<sup>59</sup> Nadsapa dada toqquimade taminedeni, jodiodenicca ima cacattemadedeni deni toquejenajarideni tedseje Jesodsa ima inassonarimananijine tohuini quinadsa madija maidsehe huati toquinahijine tohui qqui naridsamanajari. Aja madija attidenipa: —Jesopa icca marinajadsa oppina tanicca inanapaja —quinadsa taminedeni: —Jehe, najaro imadsa Jeso dsoqquehijine pajirahi —quinahijine. <sup>60</sup> Madijapa maidsehe onihi onihi huati toquinaraha najaro imadsa Jeso dsoqquehijine pajira-jerani. Poccadeni maidsehe najarossa naridsa-jerani. Oppina tanicca jerani. Dsotodecca madija pamahana poccadeni maidsehe najarossa najaro huati toquinajari. <sup>61</sup> Ojaria attipa: —Titaharibobo canaji. Jeso atti ajama nahi omittade: “Aji Diodsa dada toqquimacca odsa madija icanahatomaraha ocatabodsapi huada 3 nadsa ocanahatoninitohui” nade pohua atti —nahi nade. Pohua tesse naco najarossa najaro huati tajari. Attideni nama quinaraha maidsamanajari.

<sup>62</sup> Nadsapa dada toqquimadedenicca tamine deni tojajari totehema, hua nadsa Jesodsa huati tajari: —¿Tiapi tia tecomajaroqui? Tiadsa ima inassonarimanajaropi ¿nejecoma naneje? —nahi nade tamine atti. <sup>63</sup> Naraha Jesopa pohua cacoma najari. Nadsapa tamine huati tapomajari: —Dio camitta tajari onima huati tinaji onadsama iadsa tia tecomeraji: ¿Tiapi Dio Bedi Cristo-Mesia tijaqui? —nahi nade tamine. <sup>64</sup> Nadsapa Jeso: —Jehe, tiadeni ohuadsa nema tiquinajaropaji. Naraha tiadenidsa huati onajaro: Ohuapi Madija Bedi ojararoa nidsa dsotode Dio Dacorabote ohua deni tonanadsapa Pohua inori nahatonihuaji ohuittarini qqui tiquinanitohui. Nidsa meme essenima occaronapomani qqui tiquinanitohui —nahi nade Jeso.



<sup>65</sup> Nanaja dada toqquimadedenicca tamine deni tojajaripa Jeso atti mittadsa huati jami nadsa pocca etero joca taneje sseo najaro. Nadsapa huapimadsa huati tajari: —¡Dio itamassojar! ¡Epeje! Jidapapi pocca ima nahatoto inani. Madija ohuahacca imatohui huati inejerana. Pohua attipa pina: “Ohuapi Dio ojani” najarissa naha. Pohua atti tabaccora tani timittamanani. <sup>66</sup> Jari, tettideni ¿nejecoma tiquinani? —nahi nade Caipa. Naraha huapima: —¡Jehe, pohua atti nama nadsapa dsoqquena inajaro! —quinahi nade.

<sup>67</sup> Nadsapa Jeso panodsa ppito-to ppito-to canajari, idaquimanajari, pohuadeni dsepedsa naco pano ppa inanimanajari nade. <sup>68</sup> —Jari, Cristo-Mesia tijadsapi ¿nejecojari tia idajari? ¡Tecomerajo! —quinahi nade.

*Pedropa Jesodsa: —Onocco jidsa tani —najari*

*Maraco 14.66-72; Roca 22.56-62; Huano 18.15-18, 25-27*

<sup>69</sup> Jesopa odsa bodihuaaji nanajidso tojaraha Pedropa amossinihuaaji boronidsa huittajari. Nadsapi najaro odsacca medse dsohuato ccasonadsapi pohuadsa huati tajaro: —Tiapi Jeso Carireahuajicca huatimade tijadija —nani nade. <sup>70</sup> Naraha huapima mittamanadsa Pedro pohua namajidsajari: —A, ohuapi onocco jidsa tani. Qqui onajarade. Najaro ima ssamo onani ohuapi —nahi nade. <sup>71</sup> Nadsapa Pedro najaro boronidca qquequedsimahuaji toccadsa najaro odsacca medse onihi pohua qqui tadsa huapimadsa huati tajaro: —Ajararipa Jeso Nasaretihujicadsa ccaridsadija —nani nade. <sup>72</sup> Naraha Pedro pohua namajidsapomajari: —Dio nahato tahi pohuadsa onocco jidsa tani —napomahi nade.

<sup>73</sup> Naraha dsotodepa nahidsa toqueriqquijari attidenipa: —¡Pajissade! Tiapi Jesocca tijade. Carireahuajicca tohuatti ticajini —quinahi nade Pedrodca. <sup>74</sup> Nadsapa Pedro huadijari. —Pajissa huati huati onejeradsapi Dio ohua tinajidsoji, onana. Pajissa tiadenidsa huati onajaroa: Najari madijadsa onocco jidsa tani —nahi nade. Nanaja tacara huahua naja najari. <sup>75</sup> Nadsapa Jeso atti Pedro bodi huatomaniari: —Tacara huahua najaraccadsapa tetti tinamajidsani 3 nanitohui —napojari. Aja Jeso atti Pedro bodi huatomajidsapa toqqquenadsa ojijari nade.

## 27

*Tamine Piratodsa Jeso iaccamanajari*

*Maraco 15.1; Roca 23.1-2; Huano 18.28-32*

<sup>1</sup> Ssajadsapi dada toqquimade taminedeni, ime jocohuideni tedseje queriqquimanadsa pohuadenira imahaha canajari. Jehe caniredsapa Jeso dsoqquehijine ima najoramanajari. <sup>2</sup> Nadsapa Jeso biji jore quinadsa tamine Piratohuaji iaccamanajari, —Jeso dsoqquena —quinahijine. Tamine Piratopa romanodeni. Pohuapa jodiodenicca dsama cacahuade tojajari.

*Joda pohua nanadsoqquejari*

<sup>3</sup> Jeso ccaccorade Jodapa —Jeso dsoqquehijine iaccamanajari —quinahi ima mit-tadsapa pohua bodi jabojo najari: —Jaho ¿nejecotohui Jeso ohuaccorajaritta? —najari. Nadsapa dada toqquimade taminedeni, ime jocohuideni, najarideni huapima dsiniro ccarara 30 nehe Joda pohuadsa da quinapojaro pohuadenidsa da inaninijine pohuadenihuaaji toqqquedsimanijari. <sup>4</sup> Pohuadenidsa huati tajari: —Jaho, tabaccorehe onanajaro. Jesopa imasiri cappiraraha ojine tidsepedenidsa tojadsapa dsoqquehitohui —nahi nade Joda. Naraha pohuadenipa: —Epejea, ijine jerani. Ticca imasiripi ticca —quinahi nade. <sup>5</sup> Nadsapa poccadeni daniji ccarara 30 nehe Diodsa dada toqquima bodihuaaji quissa inanijaro. Quissa inanie jicadsapi toccanijari. Dsotodepa pohuajine pohua mattodsa ssoque dsanadsa joppa taronadsa pohua nanadsoqquejari.

<sup>6</sup> Nadsapa dada toqquimade tamededenipa najaro dsiniro ccarara inaccanimanadsa attidenipa: —Ajijaro dsiniro madija dsoqquehijine paca quinajariccapi Diodsa dada toqquimahuajicca dsinirodsa quejemanijine oppina tani. Najaro dsiniropi madija emene toccahijine manaconi —quinahi nade. <sup>7</sup> Nadsapa imahaha canaha jicadsapa najaro dsinirodsa dsama onini: Dsipa nanahatodecca quiquinanahihuaji mitta quinajaro, —Najaro dsamapi manahideni noccobirideni tojanijine —quinadsa. <sup>8</sup> Naraha najaro dsamapi Jodadsa da quinapojarocca dsinirodsa mitta quinadsa najaro dsama onini cacanidsatipi: —Tohuemene manaconidsa mitta nanicca dsama —quiquinanajari. Aji ohua omadidsa ajijaro dsodode ojadsa naco madijapa nama quiquinanahipaja naccahi. <sup>9</sup> Najaro dsama jodiodenicca tamededeni mitta quinajaropi pina maittaccadsama Dio Atti cacomerabote Jeremia dsodo inapojarossa najaro. Najaro imapi ajima najaro:

—Isaraeri potemahideni mota attidenipa: “Jehe, dsoqquehijine eccorahi manaco dsiniro ccarara plata 30 nani pajirani” quinahitohui.

<sup>10</sup> Najaro dsiniro inaccanimanadsapi dsama onini: Dsipa nanahatodecca quiquinanahihuaji mitta quinahitohui, pina Dio ohuadsa huati tajarissa najaro —napohui nade Dio Atti Jeremiajine dsodo nanidsa.

### *Tamine Piratocca ima huahuatihuaji Jeso huajari*

<sup>11</sup> Tamine Piratohuaji Jeso iaccamanadsa nahi Pirato baccohuaji inahuamanajari. Nadsapa Pirato Jesocca ima mittahijine pohuadsa huati tajari: —¿Tiapi jodiodenicca tamine tijaqui? —najari. —Jehe, tetti nema tajaropaji —najari Jeso. <sup>12</sup> Naraha dada toqquimade tamededeni, ime jocohuideni tedseje Piratodsa poccadeni maidsehe huati toquinajari. Naraha Jesopa joma najari. <sup>13</sup> Nadsapa Pirato Jesodsa huati tajari: —Ticca ima bica tejerani quinajari ima huapi tani huati huati toquinaraha ¿timitta-jerajaroqui? —najari. <sup>14</sup> Naraha Jesopa huati tajarajari. —Occa ima ohuacomerana —najarajari. Pohuadsa ima inassonarimanajarodsa naqui: —Pajissa jerani —najarajari. Nohuerahi. Nama nadsapa tamine Piratopa jabojo najari. Pohua bodipa: —¿Nejecotohui pohua cacomajari? —najari.

### *—Baraba qquenana, Jesopa dsoqquena —quinajaricca ima*

#### *Maraco 15.6-20; Roca 23.13-25; Huano 18.38-19.16*

<sup>15</sup> Huajano huajijiradsa jodiodenicca ejete Pascoa tojadsa tamine Piratopa toponi cocorodsa madija huedsamanajari ojaría pohuajine qqueqquenamana najari. Madija huapima tohui quinajarina pohuajine qquenahijine najorajari. <sup>16</sup> Nadsapa toponi cocorodsa huedsajari ojaría onipa Baraba. Pocca ima tabaccora tadsa madija huapima pohuadsa nahatoqquiri najari. <sup>17</sup> Nadsapa Pirato pohuahuaji madija queriqquijonadsa pohuadenidsa huati tajari: —¿Nejecojarina qquenahijine tohui tiquinajaro? ¿Baraba qquenahijineco? ¿Jesodsa “Cristo-Mesia” quiquinanajari tappa onahijinerana? —nade.

<sup>18</sup> Piratopa pohua bodidsa Jesopa ima cappirahi nahato tapojari. Pohua bodipa: —Dada toqquimade tamededenipa Jesocca deni tojehe acconi huadimanadsa ohuadsa eccajonamanajari —najari. <sup>19</sup> Piratopa ima cacattemahuajicca huihuittaridsa huittaricadsa pocca amoneje pohuadsa ima dosse inajonajaro. Poni attinipi: —Najari maqquidejepa bica tajari. Pohuadsa ima tinana-jerana. Dsomedsa Jesocca imajine occa huada oppina tapa —najaro.

<sup>20</sup> Naraha dada toqquimade tamededeni, ime jocohuideni tedsejepa Jesodsa ima inanamananijine najoramanajari. Madija huapimadsa huati naridsamanajari: —“Barabana qquenana” tiquinaji. “Jesopa dsoqquena” tiquinaji —naridsamanahi quinade.

<sup>21</sup> Nadsapa tamine Pirato aja huapima domo huajaridenidsa huati tapomajari: —¿Aja pamaha todsepe toquejenajaripa nejecojarina ojine qquenahijine tohui tiquinajaro? —napomade. Nadsapa huapima johuahua johuahua canajari: —¡Barabana tijine qquenajo, qquenajo! —quinade.

<sup>22</sup> Naraha Piratopa domo huajaridenidsa huati tapomajari: —Jehe, naraha Jesodsa “Cristo-Mesia” quiquinanajaripa ¿nejecoma onanahijine jipaqquri tiquinani? —nade Pirato atti. Naraha huapima johuahua johuahua canapomajari: —¡Najari Jesona ahua porimacossanidsa dsoqquena, dsoqquena! —quinade. <sup>23</sup> —¿Naraha nejecotohui dsoqquehijine? ¿Nejeco imara inanajaro? —nade Pirato atti. Naraha domo huajarideni huapima paja johua toquinarihi nadsa: —¡Ahua porimacossanidsa dsoqquena, dsoqquena! —quinade.

<sup>24</sup> Naraha Pirato pohua bodi huatojari: —Ohuatti pajira-gerani. Pohuadenijine mohuaniji oppina tehe tojabote nani —nade. Nadsapa Pirato pohua dsepe ssahua nahijine passotohui huahua najari. (Pohua dsepe ssahua najaricca imapi: —Ohuapi ima ocappirani —najarissa najaro.) Nadsapa passo dsojo icanajonamanadsa huapima qqui toquinadsa Pirato pohua dsepe ssahuade tojadsapa huati tajari: —Ajajari madija dsoqquehijinepi occa ima jerani. Pohua emene toccahijine jehe onejerajaro. Najaropi ticcadeni ima —nade Pirato. <sup>25</sup> Nadsapa madija huapima attidenipa: —¡Jehe, epeje! Ettijine dsoqquedsa pohua emene toccajaro manaconipi iadsa, icca ejedenidsa tojani bica tani —quinade.

<sup>26</sup> Nadsa tamine Piratopa Baraba qquenahijine huati tajari. Nadsapa pocca soldadodeni Jeso cossi inaquimanahijine icadossebaqqujari. Cossi inaquimanaha jicadsapa icadossebaqquipomajari: —Ahua porimacossanidsa coba tidsanamanahijine tiaccamanajo —nade Pirato.

<sup>27</sup> Nadsapa tamine Piratocca soldadodenipa odsa imeni bodihujicca boronidsa Jeso iaqquedsimamanajari. Nahidsa romanodenicca soldado huapima toqueriqquijari.

<sup>28</sup> Pohuadenipa: —Jeso pina taminessa inanana —quinaraha maidsamanajari. Nadsapa Jesocca etero ssiti quinadsa etero macconi motaranicca pina tamedeniccassa najarodsa Jeso inehedsamanajari. <sup>29</sup> —Jeso taticca pina tamine tatideniccassa nana —quinaraha cotihi atinema jore nahuajanihira ettarimanajari. Pohua dsepe nahatonihujiccadsa naco pina taminecca dsodsopissa naraha ahua ppahua tajarora da quinajaro. Nadsapa jaja icanacquimanahijine pohua baccohujai pohuadeni pitodsa jassi tadsapa: —¡Deni tijani jodiodenicca tamine! —quinaraha maidsamanajari.

<sup>30</sup> Nadsapa ppito inaquimanajari. Pohua dsepecca ahua idinimanadsa najarodsa pohua tatidsa huacca huacca quinajari. <sup>31</sup> Nadsapa maidsehedsa pohuadsa jidsa jidsa quinaha jicadsapa etero macconi motaraniccapi ssiti quinadsa pohua pocca eterora inehedsanimanajari. Nadsapa ahua porimacossanidsa Jeso coba idsanamanahijine iaccamanajari.

*Jeso ahua porimacossanidsa coba idsanamanajari*

*Maraco 15.21-32; Roca 23.26-43; Huano 19.17-27*

<sup>32</sup> Soldadodenipa Jeso iaccamanajaja dsama Sirenecca madija Ssino bacco ijd-samanajari. Jesopa ahua porimacossani dsojo inaraha ja tojadsa soldadodenipa Ssino icadossemanajari: —Manaco tia ajararicca ahua porimacossani dsojo tinaji —quinadsapa manaco Ssinona dsojo inajaro. <sup>33</sup> Nadsapa ssono Cocottahuaji jai tojemora, bacco tomoramanajari. (Ssono onini Cocotta ettidsapi: Totati Tonanissa nani, quiquinanajari.) <sup>34</sup> Nahidsa uva ppejene bidabotedsa quejemahi Jesodsa da icanamanajari, —Pohua comene ojidsama nanijine —quinadsa. Naraha badsira taha ecatama, pohua nade.

<sup>35</sup> Nadsapa ahua porimacossanidsa coba idsanamanajaride. Coba idsanamanaha jicadsapa acca icanamacossa-manajari. Nadsapa Jesocca eterotohui soldadodeni

siba bedenidsa coro coro quinajaride, —¿Pocca etero nejecojaridsana tojanijine? —quinadsa. Najaro sibadsa ittomemanadsapa pocca etero pohuadenidsa ojari ojari naridsajarode. <sup>36</sup> Ittomemanaha jicadsapa nahidsa cacahuade jassi tajaride. <sup>37</sup> Jeso tati tetepihuaji naqui dsodo nani coba idsanamanajaro. Najaro dsodo nanipi: —Ajajaripa Jeso, Jodiodenicca Tamine —najaro. <sup>38</sup> Bobotide pamaha naco Jesodsama topamajonahijine ahua porimacossanidsa cobaba idsanamanade. Ohuahapa Jeso inori nahatonihuaji que, ohuahapa Jeso inori ssamohuaji que tade.

<sup>39</sup> Madija nahi jai tojeqquimajarideni Jesodsa jiperaqquiri nadsa tatamasso quina-jari. Tatideni huide huide quinadsa attidenipa: <sup>40</sup> —Ajina, tetti: “Diodsa dada toqquima ocatabodsapi huada 3 nadsa ocanahatoninitohui” teteje nade —quinade. —Jari, pajissa Dio Bedi tijadsapi tia tinassiajaji. Ahua porimacossanidsa tia tidinidsa ticaronaji —quinade. <sup>41</sup> Nadsapa dada toqquimade tamedeni, jodiodenicca marinaja maridedeni, ime jocoहुideni tedseje Jeso itamassomanajari. <sup>42</sup> Attidenipa: —Ajana, madija ohuaha inassiajabaqquiraha pohua tonassiajadepa ssamo tahi. Pohuapa Isaraeri potemahidenicca tamine tojadsapa ahua porimacossanidsa ccaronana. Nadsana pohuadsa pajissa inanijine —quinade. <sup>43</sup> —Ajana pohuapa Diodsa jehe nahissa tajari. Diopa pajissa pohuadsa huati huana tadsapa jidapanana pohua inassiajana, inajaro. Ajana, pohua attipa: “Ohuapi Dio Bedi ojani” nanaja nade —quinade, jidsa jidsa quinadsa. <sup>44</sup> Bobotidedeni naco pohua inoridsa ahua porimacossanidsa cobaba dsanaraha najaro tohuattissa najarodsa Jesodsa atti atti quinade.

### *Jeso huatiajari*

*Maraco 15.33-41; Roca 23.44-49; Huano 19.28-38*

<sup>45</sup> Maji itetepi tojadsa dsama nemanehetodsidsini najaro. Dsidsi dsanapojaropi maji 3 bacco tajaro. <sup>46</sup> Najari maji 3’dsa Jesopa pohua attidsa jadsirema huahua najari: —Eri, Eri ¿rema sabatani? —nahi nade. (Najaropi: —Abi Dio, Abi Dio ¿nejecotohui ohua tinebojaro? —najari nade.) <sup>47</sup> Naraha nahidsa domodeni huajari mittamanadsapa: —A, maittaccadsamacca Dio Atti cacomerabote Eriadsa huahua nahi —quinahi nade. <sup>48</sup> Nadsapa nahidsa domo huajari ojaria huassinaja joppa tajari, huassa tajari idi, uva ppejene ssicata bidada najaridsa edsippa, ppaja tojadsa bobadsa oro, da icanamacossajari. <sup>49</sup> Naraha madija attidenia: —¡Maqui, nidsa padseje! Pohua inassiajahijine Eria ccajonahitidija. Qqui inaccana —quinahi nade.

<sup>50</sup> Naraha Jeso jadsirema johua napomadsapa huatiajari. <sup>51</sup> Naneje Diodsa dada toqquima bodihuajicca huahuacossa etero sibabote naqui Djojine sseo naronajaro. Carobe najaro. Nami naqui dsadsa najaro. Siba imeni huihwitteri naridsajaro naqui caroberidsajaro. <sup>52</sup> Tonocobiri mota naqui tohuabaridsajaro. Diodsa pajissa quinapojari jicapojarideni huapi taha Djojine nahatonimanahi nade. <sup>53</sup> Nahatonimanadsapa pohuadeni noccobiridsa jahinineridsajari. Naraha dsotode Jeso nahatonidsana najaridenipa odsa panani Jerosarehuaji jai tojedsimanijari. Nahidsa madija huapima pohuadeni qqui inabaqquimanajari.

<sup>54</sup> Nadsapa ssonohuaji soldado tamine, pocca soldadodeni tedseje Jeso cacahuade domo huajaridenipa nami dsadsa nani qqui, oppina tanicca huapima qqui toquinadsapa jabojo quinadsa attideni: —¡Jaho! Pajissa ajaripa Dio Bediraha —quinahi nade.

<sup>55</sup> Amonejedeni naqui huaji tanidsa cattade domoni huajaro. Ponidenipi Jeso dsama arobeni Carireadsa ccaridsapodsa pohua accode pohuadsa jahiridsajaro. <sup>56</sup> Ponidenipi huapi taraha mota oninidenina Maria Madarenahuajicca, Jose Satiacodenicca ami Maria, Sebedeo bedidenicca ami quinajaro.

### *Jeso ppa idsamanajari*

*Maraco 15.42-47; Roca 23.50-56; Huano 19.38-42*

<sup>57</sup> Dsomebote nadsa dsepe ssebote oni Dsodsepa tamine Piratodsa huatide toccajari. Puhuapa odsa panani Arimateahuajicca madija. Puhuapa tahide Jesocca tojapojari. <sup>58</sup> Nadsapa tamine Piratodsa bacco tadsa Jeso assire ppa idsahijine huati tajari nade. Nadsapa Pirato pocca soldadodenidsa huati tajari: —Ajajari madijadsa Jeso assire da tiquinana, ppa idsahijine —nahi nade. <sup>59</sup> Nadsapa nahi Jeso coba dsanaha que tahihuaji bacco toquinadsa Dsodsedsa Jeso assire da quinadsapa etero dsojorani onini lino bica tajarodsa jore inaqquidsapa dsojo inajari. <sup>60</sup> Nadsapa tonoccobirihuaji dsojo inajari. Najaro tonoccobiripi Dsodse dsama mitta inapodsa pohua noccobiri tojanijine tahide sibadsa hui quinapojaro. Najarodsa Jeso assire ibedsajari. Dsodse qqenadsapa siba imeni pata inanijaro, Jeso noccobiridsa huacossanijine. Nadsapa Dsodse toccanijari. <sup>61</sup> Naraha Maria Madarenahuajicca, Maria onihi tadsajanipi ibomanadsa Jeso noccobiricca siba huacossanihuaji tocattanimanadsa pahimaccajaro.

### *Jeso noccobiri dsepedeni panajari*

<sup>62</sup> Nadsapi huada ssiaja, jassinajacca huadadsa dada toqquimade taminedeni, marinaja pariseodsa jehe quinajarideni tedseje tamine Piratodsa huatide jai tojapomajari. <sup>63</sup> Bacco toquinadsapa attidenia: —Ia dossede, ibodi huatomajaro, aja maitta maidsajide rabotepa dsoqqe-jaraccadsama pohua attipa: “Nidsa odsoqquedsapi huada 3 nadsa onahatoninitohui” nanaja nade. <sup>64</sup> Nama nadsapa pohua noccobiri ecahuamananijine ticca soldadodeni dosse tinabaqquijo, dsepedeni panahissa tadsa huada 3 nehe ecahuamananijine. Nama quinadsapa pocca dodosse tabaqqui dsome Jeso assire idinemana-jarahijine. Idinemanadsapa madija huapimadsa maidsamanadsa: “Jeso nahatonihii” quinarana. Jeso pohua madidsa naco maidsa maidsa napojari. Pocca dodosse tabaqqui madija huapimadsa: “Jeso nahatonihii” quinadsapa maidsanijirideni denima tabaccora tarana —quinahi nade. <sup>65</sup> Nadsapa Pirato pohuadenidsa: —Jehe, Jeso noccobiri cacahuade soldado jai tojahijine dossede jipa onani. Tiaccabaqquimanajo, pohua noccobiri mohua quina-jarahijine soldadodeni dsepedeni panahijine —nahi nade. <sup>66</sup> Nadsapa taminedeni soldadodeni tedseje jai tojadsapa siba imenibote huittacossanicca jore nani dsepedeni panahissa tadsapa: —Epejena. Dicca nanijine ssamo tani —quinahi nade. Nadsama jore nani idenidsa modsa nepi quinadsa najaro nepi nadsa tojano niqui todsanajaro. (Najaropi dicca nadsa bararini ahuato tanijine.) Nadsapa taminedeni soldadodeni inebobaqquimanadsapa jai tojanijari.

## 28

### *Jeso nahatonijari*

*Maraco 16.1-8; Roca 24.1-12; Huano 20.1-10*

<sup>1</sup> Nadsapi jassinajacca huada jicani nattini semana tojapomanicca huada tahidecca domingo ssiajajonadsa Maria Madarenahuajicca, Maria onihi tadsajani Jeso noccobirihuaji qquide tohuedajaro. <sup>2</sup> Tohuedaneje... nami jadsirema dsadsa najaro. Aji nami jadsirema dsadsa najaropi ia Medsede Diocca dodosse memehuahijicca ccaronajari. Ccaronadsapa Jeso noccobiricca siba pata inajaro. Nadsapa najaro sibadsa huittari canahi quinade. <sup>3</sup> Puhuapa ssiaja tajari pina ssissiede ssiajanissa najari. Pocca etero nopo tajaro pina huepessa naraha denima nopo tajaro. <sup>4</sup> Soldadodeni najari qqui toquinadsapa pohua noppine cappinamanadsa tacca-cca-cca quinajari. Nadsapa pina cacotajarissa quinajari. <sup>5</sup> Naraha Diocca dodossepa amoneje huedajonajarodenidsa huati tajari: —¡Tiadenipi ticappinamana tejeraji! Jeso qquide ticadajonajaro nahato onani. Puhuapa ahua porimacossanidsa inanadsoqqe-manajari. <sup>6</sup> Naraha ajadsa podsa-jarahi. Puhuapa nahatonipa. Pina pohua dsoqqe-jaraccadsama “onahatoninitohui” nanaja napojarissa najari. Jari, pohua podsahihuaji qquide



ticadedsimaji. <sup>7</sup> Nadsapi huassinaja ticadanidsa pocca dodosse tabaqquidsa huati tinanimanaji: “Jesopa nahatonih” tiquinana. Puhuapa titedsejemadeni dsama arobeni Carireahuaji toccanipohuitohui. Nanihuaji jai tijanidsana pohua qqui tiquinahijine. Epejeni najaro ima tiadenidsa huati onaponi -nahi quinade. <sup>8</sup> Nadsapi Jeso noccobirihuaji nebomanadsa huassinaja Jesocca dodosse tabaqquidsa huatide dsaja tanijaro. Cappinamanaraha huatidsemaneri tanijaro.

<sup>9</sup> Dsaja taniraha nahi jahuidsa Jeso ponidenidsa ahuatomadsa: —Nija -najari. Nadsapi pohuadsa tohuedessidsa huatidsemanadsa ponideni pitonidsa pahimadsa pohua issodsa cahujocossamana nadsa: —¡Ia Medsede, deni tijani! -quinani nade.

<sup>10</sup> Nanaja Jesopa: —¡Ticappinamana tejeraji! Ticadanidsapi ohuemecotedenidsa huati tinanimanana: “Dsama arobeni Carireahuaji jai tojanina. Nanidsana ohua qqui toquinahijine, napaja” tiquinana -nahi nade Jeso ponidenidsa.

### *Soldadodenicca maidsehe*

<sup>11</sup> Mariadeni tohuedanije naraha Jeso noccobiri cacahuade soldadodeni mota naco dada toqquimade taminedenidsa huati tanimanahijine odsa pananihuaji domo toccanijari. Aji nami dsadsa najarocca ima, Diocca dodosse memehuajicca siba pata inajarocca ima naqui, najaro ima huapima soldadodeni qqui toquinajaricca huati tanimanajari. <sup>12</sup> Naraha dada toqquimade taminedeni najaro ima mittamanadsapa ime jocoहुideni tedseje queriqquimanadsa imahaha canajari. Jehe caniredsapa dsiniro huemani soldadodenidsa da inabaqquiridsajaro, pajissa pohuadeni qqui toquinajaripa ecomamananijine. <sup>13</sup> —Aji tiadenidsa dsiniro da inabaqquijaropi maidsehera huati tiquinanijine. Ajima tiquinaji: “Dsome icahadijadsa Jesocca dodosse tabaqquipa Jeso assire idinimanajari” tiquinaji. <sup>14</sup> Nadsapi najaro ima ticcadeni tamine Pirato mittadsapa tiadenidsa huadihitohuiraha ia pohuadsa huati inanissa tadsapi tiadenidsa tojonehitohui -quinahi nade. <sup>15</sup> Nadsapa soldadodeni dsiniro cajimanajaridenipa taminedeni attidenissa inanamanajaro. Najaro poccadeni maidsehepi icca madija jodiodeni motadenidsa tojaridsanissa tajaro. Aji ohua omadidsa ajijaro dsodode ojadsa naco najaro maidsehe motadenipa huati huati quinahi paja naccahi.

### *Jesopa pocca dodosse tabaqqui dosse inabaqquiridsajari*

*Maraco 16.14-18; Roca 24.36-49; Huano 20.19-23*

<sup>16</sup> Nadsapi ia Jesocca dodosse tabaqqui 11 inajaro Carireahuaji jaijanijaro. Pina tahide amonejedenidsa Jeso huati tapojarissa inanajaro. Jeso attipa: —Najaro ssonohuaji jai tijemorana -nadsa najaro ssonohuaji jaijemorajaro. <sup>17</sup> Bacco imoradsapi Jeso qqui inajari. Qqui inadsapa pohuadsa etidsedsa: —¡Tiapi deni tijani, tiapi nahatonie jinede tijani! Aja tiassa najari ohuaha nohuerahi -inade. Naraha mota bodidenipa: —¿Pajissa Jeso nahatonijarico? -quinajaride. <sup>18</sup> Nadsapa Jeso dsaboradsa iadsa huati tade: —Abi Diopa pocca nahatohue huapima memehuajicca, namihuajicca naco ohuacahuaridsahijine pocca dacorehe ohuadsa inanajaro. <sup>19</sup> Nema nadsapi dsama huapimadsa otahimari maride jai tijaridsaji. Madija ohuadsa toquejenahijine maride disseraqquri tiquinaji. “Jehe, Jesodsa iquejenana” quinadsapa Abi Dio onima, ohua Dio Bedi ohua onima, Dio Corime onima passodsa topa topa titidsanabaqquimana nana, onajaro. <sup>20</sup> Aji occa marinaja tiadeni onahattabaqquijaro nemanehedsa iboraqquri nahijine naco mari mari titicanabaqqui-ridsamana nana, onajaro. Ohuapi huada huajijiradsa tiadenidsa ohomadiridsa nanitohui. Nema odsanapojaroa dsama jicani bacco tanitohui -nade Jeso.

Epejeni.

## Maracopa Jesocristo tahimari dsodo inajaro

### Marcos

Maracopa jodiodeni, odsa panani Jerosarecca madija. Pohnuapa Jesocca dodosse jararaha Jesocca dodosse Pedro huatimade tojajari. Pedrodsa ccaridsadsa Jesocca ima tohuattajari quinahi nade. Dsotodepa Pablo, Bernabedenidsa Jeso tahimari maride ccaridsajari.

Maraco dsodo inajaropi: Jesopa madija bedissa naha tossonaraha pohnuapa Dio Bedi. Najaro ima madija mittamanahijine dsodo inajaro. Jodio quejena-jarajarideni Jeso tahimari mittamanahijine pohnuadenidsa dsodo inajaro.

*Huano Baotistapa dsama huamonihuaji madija mari icanabaqqijari*

*Mateo 3.1-12; Roca 3.1-9; Huano 1.19-28*

<sup>1</sup> Ajijaro ima bicanipi Dio Bedi Jesocristo tahimari icassiejeranijinecca. Pohnuaha tahimari madija huapimadsa tojaridsanijine ajima najaro: <sup>2</sup> Maittaccadsama Dio Pohnuaha Bedidsa huati tapojarissa najaro Pohnuaha Atti cacomerabote Isahia dsodo inajaro. Dio Attipa:

—Tahide titahimari tohuaccade madija ojaria titedsejema dosse onapohuitohui. Nahi mittamanadsa madija bodidenipa titohui najoramanapohuijine, onajaro –napohui nade Dio.

<sup>3</sup> —Najarina dsama huamoni ssono caji, siba caji tanihuaji madidsapa atti mohui taha madija huahua huahua ihinajonabaqqui nahitohui.

Pohnuaha attipa: “¡Ia Medsede ccajonabote nahi! ¡Tinajoramanaji!

¡Pohnuaha tedsejema jahui tijinedeni tobicapoji!

Najaroa aji tibodideni pohnuatohui tinajoramanaji” nanaja nahitohui dsama huamonihuaji madijaripa –napohui nade Dio.

<sup>4</sup> Najaria aja madija oni Huanopa dsama huamoni ssono caji, siba caji tanihuaji madija maride tojararipaja. Pohnuadsa: Baotista, quiquinanajari. (Ettidsapi: Totopade, inajaro.) Pohnuaha attipa: —¡Ticcadeni imasiri tineboridsamanaji! –nanaridsa najari. —Tibodideni ajima tiquinaji: “Occa imasiri onebona. Jidapapi Diotohuira odsanapona” tiquinaji. Nadsana totopa ticajiridsamanaji. Nema tiquinadsapi Dio ticcadeni imasiridsa: “Epeje, ohuati ajimani” nahijine –nahi nade Huano.

<sup>5</sup> Madija huapima Huano atti mittamanahijine jahijonana canajaridenipa odsa panani Jerosarecca, Jodeacca dsamadsa madiridsamanajarideni huapima bacco bacco najonamanajari. Poccadeni imasiri Diodsa ecomeramanadsapi Huanopa hueni Jordaodsa topa topa ihidsanabaqqui najari.

<sup>6</sup> Nadsama Huanopa dsama huamonihuaji madidsapa pocca eteropi camello cone ba nani ssequi nadsa huedsajari. Pocca ssoquepi bani etero. Pohnuaha taparipa sese, dsamacca jidsi oquine najari.

<sup>7</sup> Huano mari icanabaqquidsa ajijaro ima huati tajari: —Madija dacorajaripa ccajonabote nahi. Ohuapi tahide mari mari onaporaha aja dsotodecca mamaride ccajonajarina deni tojajari. Ohuapi ajimani ojan. Pina pocca medsessa onanijinepi opajira-jerani. Pohnuaha amoricca sadaria diccade naqui opajira-jerani. <sup>8</sup> Ohuapi passodsa tiadeni topa odsanabaqqujaro. Naraha aja ccajonabote najarina Dio Corime tibodidenidsa madihijine tiadenidsa inanaridsahitohui –nahi nade Huano.

*Jeso totopa caji jaricca ima*

*Mateo 3.13-17; Roca 3.21-22*

<sup>9</sup> Nadsapa Jeso dsama arobeni onini Carireacca odsa Nasaretidsa madiraha huani Jordahuaji qqedsippajari. Bacco dsippadsapa Huano Jeso topa idsanajari. <sup>10</sup> Nadsa Jeso passodsa toتهمadsa tocattamacossa nanaja meme tohuaba najaro. Dio Corime ahuate taha pina midsorissa naha Jesohuaji ccaronajari. <sup>11</sup> Bacco naronadsapa memehuaaji atti mittaronajari: —Tiapi occa ejedeni. Tiadsa ohuati huana tajaro. Ticca ima bica tajarojine ohuatidsejaro –nahi nade Dio.

*Jeso imasiri inananiijine Satana nattome inaraha jehe najarajari*

*Mateo 4.1-11; Roca 4.1-13*

<sup>12</sup> Huano Jeso topa idsanaha jicadsapa Dio Corime Jeso iaqqemorajari, dsama huamoni ssono caji, siba caji tanihuaji madihijine. <sup>13</sup> Jeso madihi inoridsapa bani huadi tahicca caji tajari. Nahidsa Jeso huada 40 naha madidsana imasiri totonanade Satanapa Jeso nattome inajari. Puhuapa Jeso imasiri inananiijine dissera taraha Jesopa Satana attidsa jehe najarajari. Nadsapa Diocca dodosse tabaqqi memehuaicca Jeso acco icamamanajari.

*Jesopa Carireahuaji maride tojapojari*

*Mateo 4.12-17; Roca 4.14-15*

<sup>14</sup> Naraha Huano Baotista toponi cocorodsa coro idsimamanahi nattipa Jeso dsama arobeni Carireahuaji toccanijari. Nahihuaji Diocca ima bicani icassiejeranijinecca mari icanabaqqi-ridsajari. <sup>15</sup> Puhua attipa: —Jidapapi Diocca cacahuehe iadsa bacco najonabote nani. Pina Dio huati tapohuissa najaro. Ticcadeni ima Diodsa tecomeramanadsa ticcadeni imasiri tinebomanaji. Diotohuira tidsanapomanaji. Diocca ima bicani ticassiejeranijineccadsara jehe tiquinanissa taji –nahi nade Jeso.

*Jesopa aba cocorodedeni 4 quinaha huahua inabaqqijari*

*Mateo 4.18-22*

<sup>16</sup> Jeso Carireacca coridsa inidi toccabacossadsa Ssino, pohua ohuaha Adiri tedseje qqii inabaqqijari. Puhuadenipa aba cocorodedeni. Aba corode toquejenaraha Jeso bacco najonajari. <sup>17</sup> Puhuadenidsa huati tajari: —Jina, ohuadsa ticadarid-saji, ohuatimade tiquejenadsapi tiadeni onahattabaqquinijine. Tahidepi abadsa tidsepedeni ijimanaporaha jidapapi madija ohuadsa toquejenahijinena tidsepedeni ijimananitoahui, onajaro –najari Jeso. <sup>18</sup> Najaro ima mittamananaja poccadeni tajapa icanebomanadsa Jesodsa tohuedajari.

<sup>19</sup> Nadsapa denima jai tojabacossanaja Jesopa Sebedeo bedideni Satiaco, pohua imecote Huano tedseje qqii inabaqqijari. Poccadeni tajapa ssequinimade canoadsa jassi dsajari. <sup>20</sup> Nadsapa Satiaco Huano tedseje Jeso huahua inabaqqijari. Najarideni naco amadsati poccadeni abi Sebedeo, pocca tatarabaidadedeni tedseje canoadsa jassi dsadsa inebobaqqimanajari. Nadsapa Satiaco, Huano tedseje Jesodsa tohuedajari.

*Satanacca dodosse tocorime madija bodidsa madidsajari*

*Roca 4.31-37*

<sup>21</sup> Nadsama Jesopa pohua huatimadedeni tedseje Capernaohuaji bacco toquinajari. Nahidsa jassinajacca huadadsa Dio Atti mamarihuaji jai tojedsimadsa Jesopa madija mari icanabaqqijari. <sup>22</sup> Nadsa mittamanadsapa: —A, pocca marinaja bica taha –quinahi nade. Jeso pocca marinaja mari icanabaqquidsapa pahuana nahatojide rajari, atti caji tajaria. Aja jodiodenicca marinaja maridedeni attissa najarajari. <sup>23</sup> Nadsapa Dio Atti mamarihuaji madija pohua bodidsa Satanacca dodosse tocorime cajijari naco huittarijari. Jeso qqii tadsapa pohua bodiccaine jadsirema atti atti najari: <sup>24</sup> —¡Nasaretihuajicca Jeso! ¿Nejecotohuira ticcajonajaro? ¿Icca ima tinajicanijine ticcajonaroqui? Ticca ima nahato onani. Tiapi Diocca Ejedeni Bicabote tijani –nahi nade.

<sup>25</sup> Naraha joma nahijine Jesopa atti dacoradsa huati tajari: —¡Epeje! ¡Didi taji! ¡Najari madijadsa tiqquenaji! —najari. <sup>26</sup> Nadsapa tocorimejine najari madija tohuedimadsapa pitora pitora najari. Nadsapa jadsirema johua johua nadsapa pohua bodicca qquenajari. <sup>27</sup> Nadsapa qqui toquinajaridenia huajo caniredsapa: —A ¿nejecoma najari? —naridsamanahi nade. —Jesocca marinaja pina dsatissa naha. A, atti cajidsa dosse imaha —quinajari. —Tocorime cajijari pohua bodicca Jeso attidsa ibora taha —quinahi nade. <sup>28</sup> Nadsapi Jesocca ima amadsati tojaribaqquijaro. Carireacca dsama pohuadeni inoricca huajirema nahicca madiridsamanajarideni naco pohua tahimari mittaridsamanajari.

*Jesopa Ssino-Pedro massodini inanomijaro*

*Mateo 8.14-15; Roca 4.38-39*

<sup>29</sup> Nadsapa nani jodiogenicca Dio Atti mamarihuaji jahininedsapa Jeso, Satiaco, Huano quinadsa Ssino, Adiridenicca odsahuaji jai tojedsimajari. <sup>30</sup> Nanidsapi Ssino massodini coma tehe, huapini ppocorehe pori canajaro. Naraha nahidsa jai tojedsimadsapa amadsati ponicca dsamacoma tahimarini Jesodsa huati toquinajari. <sup>31</sup> Nadsapa Jeso ponidsa tohuajiressidsa dsapani equidi, joca imadsapi huapini tonahuihui najaro. Tonomidsapi pohuadeni inajipabaqquijari.

*Jesopa comaqquiri najarideni inanomi-ridsabaqquijari*

*Mateo 8.16-17; Roca 4.40-41*

<sup>32</sup> Nadsapa maji tonahuidsas madija comaqquiri najarideni, aja madija bodidenidsa Satanacca dodosse tocorime cajimanajarideni naco eccajonabaqquijari nade. <sup>33</sup> Nadsapa nahicca madija huapima madiridsamanajarideni Ssino, Adiridenicca odsacca noccobijidsa queriqquimanajari. <sup>34</sup> Naraha Jesopa comaqquiri najarideni huapima comani onihi onihi cajiridsamanaraha inanomibaqquijari. Tocorime huapi taha naco dosse ininebaqquijari. Pohuadenipa Jesodsa nahatoqquijari naraha Jeso pohua tahimari ecomeramananijine jiperata dsapa didi inanabaqquijari.

*Jesopa Dio Atti mamari caji taridsajarohuaji mari icanabaqqui-ridsajaricca ima*

*Mateo 4.23; Roca 4.42-44*

<sup>35</sup> Nadsapa ssiajaricossadsa Jeso totehema, odsa pananidsa toqquenadsapa madija madide nohuerahihuaji toccajari, Diodsa huati tahijine. <sup>36</sup> Dsotodena Ssino-Pedro pohua tessedeni tedseje Jesotohui qqui naridsamanajari. <sup>37</sup> Bacco quinadsapa: —Huapima tia qquide jahijonapomapaja —quinahi nade. <sup>38</sup> Naraha pohuadenidsa huati tajari: —Jina, odsa onihihuajina jaijana. Odsa onihicca, odsa onihicca mari ocanabaqqui-ridsahijine occaronajarode —nahi nade Jeso. <sup>39</sup> Nadsapa dsama Carireahuaji ccaridsa ccaridsa naridsajari. Nani Isaraeri potemahi jodiogenicca Dio Atti mamari onihi onihi naridsanihuajicca mari icanabaqqui-ridsajari. Madija bodicca tocorime qquenaridsahijine naco dosse dosse ihinineridsa najari nade.

*Huapi jadsimarajari Jeso inanomijari*

*Mateo 8.2-4; Roca 5.12-16*

<sup>40</sup> Nadsapa madija dsamacoma onini leprajine huapi jadsimarohi Jesodsa ccajonajari. Pohua bodipa: —Jesopa deni tojahi, ohuapi ajimani ojani —nadsa Jeso baccuhuaji pohua pitodsa huitta nadsa Jesodsa huati tajari: —Ohua Medsede, ohuapi bica onejeraraha tia jipa tinadsapi ohua tinanabicanijine nahato tinani —najari. <sup>41</sup> Nadsapa Jeso pohua bodidsa: —Tohuati nahana tahi —nadsa pohua dsepedsa bara inadsa: —Jehe, jipa onani. Tibicaji —najari. <sup>42</sup> Nanaja amadsati pohua huapicca tomossissi nadsapa tobicajari. <sup>43</sup> Nadsapa Jeso pohua dosse inajari. Pohua tobicahicca ima madija ohuahadenidsa huati naridsa-jarahijine naco pohuadsa huati tajari. <sup>44</sup> Jeso attipa: —Aji tibicanicca ima madijadenidsa huati taridsa tejerana —najari. —Naraha Diodsa dada toqqumahujajina ticcaji, onajaro. Nanidsa tiqquedsimadsapi

dada toqquimade ojariadsara tepi tobicani tia nohue tinaji. Nadsapi Diodsa ticca ima bica tejeranicca toppineradsapi ticca daniji Diodsa tojanijine ohuaha ohuaha naha pina edede, ppiriri, oqui najari da da tidsimana. Pina Moisesicca marinajadsa iboraquuri inajarossa tinanaji, onajaro. Nadsapi huapimadsa ticca ima toppinerani ahuato tadsapi: “Pajissa tibicajaro” quinahijine, onajaro -nahi nade Jeso. <sup>45</sup> Naraha aja tobicajaripa toccajari, Jeso pohua inanabicahi tahimari huati naridsajari. Najarojine Jeso pocca nomietohui madija disseraquiri nadsapa odsa panani onihi, onihidsa totoqquedsima najarajari Jeso, pohua qqui toquinahi noppine. Nama nadsapa madija madide nohuerahihujina ccaridsa ccaridsa najari. Naraha madija huapimapa nama naha pohuatohui quinadsapa jajahi toja najari pocca nomietohui.

## 2

### *Jesopa madija ssomi tojahi inabiquemanijari*

*Mateo 9.1-8; Roca 5.17-26*

<sup>1</sup> Nahidsa Jesopa madi madi nanaja odsa panani Capernaohuaji toccanipomadsapa bacco tanijari. Nadsapa madija: —Jeso odsadsa bacco nanihi -quinahi ima mittaridsamanajari. <sup>2</sup> Nadsapa pohuatohui queriqquimanadsa poccadeni odsa boronima, odsa bodima ijiridsa najari. Nadsapa Jeso Dio Atti mari icanabaquijari. <sup>3</sup> Nadsapa madija ide tone biqueradsa isso ssomi tojahipa pohua taborodsa dsojo icanajonamanajari. Pohua tesse ahuaji pama, ahuaji pama najonamanahi nade. <sup>4</sup> Naraha madija siba tadsapa Jeso bacco quinahijine pajiramana-jaradsa odsa tetepihujina iaccamaromanajari. Jeso huedsahi tetepidsa odsa icatabojidsamanajaro. Nahidsana madija ssomi tojahi pohua taborodsa poridsa odsa bodihujaji tappa icanaronamanajari. <sup>5</sup> Jeso pohuatohui dissesera tahi qqui tadsapa pohua bodidsa nahato tajari: —Pajissa, Jesopa madija inanomihijine nahato tahi -quinahi Jeso pohuadsa ahuato tadsapi coma tajaridsa huati tajari: —Otesse, aji imasiri tinanajaro huapimapi onanamossini. Jidapapi ticca ima Diodsa tobicani -nahi nade Jeso.

<sup>6</sup> Naraha nahidsa jodiodenicca marinaja maridedeni naco jassi tariridsajari. Pohuadeni bodipa: <sup>7</sup> —Apaja, Jesopa: “Imasiri onanamossina” naha. Pohua attipa: “Ohuapi pina Dio ojan” nanaja najarissa naha. ¡Jesocca imapi bica tejerani! ¡Pina Dio itamassojarissa nahi! Naraha Dio Pohuana ojarijari imasiri inanamossinijine -quinahi nade jodiodenicca marinaja maridedeni. <sup>8</sup> Nama quinaraha Jesopa pohuadeni bodidenicca ima nahato tadsapa pohuadenidsa huati tajari: —¿Nejecotohui tibodidenidsa nema tiquinajaro? -najari. <sup>9</sup> —Jari, tibodideni huatoma-manaji ¿nejecoma najaro imana tiadenidsa denima najora tani? Aja madija coma tajaricca imasiri onanamossini ¿najora taqui? Coma tajari onanabicahina ¿denima najora tajarorane? <sup>10</sup> Aji ohua Madija Bedi ojararopi tiadenidsa occa ima ahuato onanana. Madijacca imasiri onanamossinijine Diocca dacorehe ocajini. Aji namidsa naqui ohuatti ocajini nahatoquuri tiquinanijinepi coma tajaridsa huati onana -najari Jeso. <sup>11</sup> Nadsapa madija ssomi tojahidsa huati tajari: —Tiadsa huati onadsa: ¡Titehemaji! ¡Titaboro tididsa ticca odsahuaji ticcaniji! -nahi nade Jeso.

<sup>12</sup> Nadsapa totehema, madija huapima cattomama canaraha amadsati pohua taboro idi nadsa pocca odsahuaji toccanijari. Nadsapa madija huapima cappinamanaraha huatidsemanadsapa: —A, ¡Diojine bica tani! -quinajari. —Nema nani qqui qqui inejeraccade -quinajari.

### *Jesopa Rebidsa huahua najaricca ima*

*Mateo 9.9-13; Roca 5.27-32*

<sup>13</sup> Jeso coma tajari inabiquemanihi nattipa coridsa poni huapihujaji toqquedsip-papomajari. Madija sibema pohuadsa queriqquimanadsapa mari icanabaquijari.



<sup>14</sup> Nahidsa Jeso denima toccadsapa madija oni Rebi qq̄ui inajari. Najaripa Arapeo bedi. Pohuapa romanodenicca taminecca dosseniji dsiniro ihinaccamana nanihua-jicca odsa bedeni bodidsa huittidsajari. Nadsapa Jeso pohuadsa huati tajari: —Jina, ohuadsa ticcaji –nadsa Jesodsa toccajari.

<sup>15</sup> Nahi dsotodepa Rebi tadsarihuaji Jeso tedseje jipacquimanahijine madija huapi taha huahuanaridsa jassi nahuajanijari. Nahidsapa romanodenicca taminecca dosseniji dsiniro nanaccadedeni, jodiodenicca marinaja ecahuamana-jerajarodeni naco Jeso pohua huatimadedenidsama jassi nahuajanijari. Najarideni Jesodsa jahiridsajaripa huapi tahi. <sup>16</sup> Naraha jodiodenicca marinaja maridedeni, marinaja pariseodsa jehe quinajaridenipa madija bicaqq̄uri najarajarideni Jeso tedseje jipamanahi qq̄ui toquinajari. Najaro imadsa jiperaqq̄uri nadsapa Jeso huatimadedenidsa atti atti quinajari: —A ¿nejecotohui tia maridepa romanodenicca taminecca dosseniji dsiniro nanaccadedeni tedseje, imasiri cajimanajarideni tedseje jipajari? –quinajari nade. (Aja madija nama najarideni tedsejepa jipade oppina tani quiquinanajari.)

<sup>17</sup> Naraha Jeso pohuadeni attideni mittadsa manaco Jeso huati tajari: —Nomiqquiri najaridenipa toponi totonanomide tohuini quina-jararaha comaqq̄uri najaridenina toponi totonanomide tohuini quiquinanajari. Ohuapi pina toponi totonanomidessa onajaro. Madijadenicca ima Diodsa tobicanijine pohuadeni accode occajonajarode. Naraha madijapa: “Tapi bicaqq̄uri inani” quiquinanajaridenicca ima onanabicanijine occajona-jerajaro. Imasiri totonanadedenicca ima onanabicanijinena occajonajaro –nahi nade Jeso.

*Jesodsa jipehe nebocossanicca ima huati toquinajari*

*Mateo 9.14-17; Roca 5.33-39*

<sup>18</sup> Huano Baotistacca mamari tabaqq̄ui jipehe nebocossamana, jodiodeni marinaja pariseodsa jehe quinajarideni naco jipehe nebocossamana najari, Diodsara huati huati dsanapomanahijine. Nadsapa madija Jesohuaji bacco najonamanadsapa pohuadsa huati toquinajari: —Huano Baotista pocca mamari tabaqq̄ui tedseje jipehe nebocossamanajari. Pariseodenicca mamari tabaqq̄ui naco jipehe nebocossamanaraha ¿nejecotohui ticca mamari tabaqq̄uia jipehe nebocossamanaha najarahi? –quinahi nade.

<sup>19</sup> Nadsapa Jeso pohuadenidsa huati tajari: —Dsabissopa amoneje cajibote najari pocca ejete tojadsapi ¿pohuadsa queriqquimanajarideni jipehe nebocossamana taco? Nebocossamana-jarahi –nahi nade. —Dsabisso cajibote najari tedseje huatidsemanadsapa jipehe nebocossamana-jarajari. <sup>20</sup> Naraha nidsa huada onihicadsa dsabisso cajibote najari iaccamanadsapa pohua tessedenipa jipehe nebocossamanahitohui –nahi nade Jeso. (Aja pohua atti nama najaripa pohuapa pina dsabisso cajibote najari. Pohua huatimadedeni jipehe nenebocossamana najarajari, najari.)

<sup>21</sup> —Ima onihi naqui ajima najaro: Etero ssessequidenipi etero jadanidsapi etero dsati ihibedsacossamana nejerajaro. Etero dsati etero jadanidsa podsacossadsa dsotode ssahua nadsapi joca naqq̄ui tani. Nadsapi etero jadani sseo tapomadsapi denima totabaccora tani –nahi nade. (Aja pohua atti nama najaripa pocca marinaja pina jodiodenicca marinajassa nejerani. Jeso pocca marinajapi dsati.)

<sup>22</sup> —Ima onihi naqui ajima najaro: Uva ppejene nahatodsatipa bani etero ssequi nahi jadahidsa sso sso ihidsamana najarajari. Uva ppejene nahatodsati bani etero jadahidsa sso todsadsa ssicatadsapa jocaquera tajarijine sseo tahi caji tahi. Sseo tadsapa uva ppejene sso taha jica tahi, dsamine naco totabaccoradsapa coro quina tahi. Nadsama uva ppejene dsatipa bani etero ssequi nahi dsatidsara sso sso totodsa najari –nahi nade Jeso. (Aja pohua atti nama najaripa madija bodi dsati tojadsana Jesocca marinaja dsati ecahuanijine pajirahi, najari.)

*Jassinajacca huadadsa Jeso huatimadedenipa aroso jidsadsa trigo bono pore dsanapomanajari*

*Mateo 12.1-8; Roca 6.1-5*

<sup>23</sup> Nadsapa dsotode naco jassinajacca huadadsa Jeso pohua huatimadedeni tedseje huidsaja nocconi motta jai tojeqquimajari. Jai tojeqquimadsapa aroso jidsadsa trigo bono pore ippimanadsa apa dsanapomanajari. <sup>24</sup> Naraha jodiode ni marinaja pariseodsa jehe quinajarideni qqui toquinadsapa pohuadenidsa bica tejeradsa Jesodsa huati toquinajari: —¡Ajana! Tetimadedenipa huidsajacca bono pore quinadsapa pina jassinajacca huada jerajarodsa dsepedeni ijimanajarissa quinaha. Jassinajacca huadadsapi idsepe ijiniijine oppina taraha –quinajari.

<sup>25</sup> Naraha Jeso pohuadenidsa huati tajari: —¿Naraha tiadenipi aji Dio Atti maittaccadsama dsodo naniccadsa Dabicca ima hua hua titiquina naraha tetideni ajimamanajarorane? Najaro imapi Dabipa pohua tessedeni tedseje dsamatapa cappiramanadsa pemimanadsapa pan Diodsa da tahicca oppina taraha jipamanajari.

<sup>26</sup> Aja maittaccadsama Diodsa dada toqquimadedenicca tamine deni tojajari onipa Abiata madidsa nahihuaji Dabi toqquedsimadsa pan tohui huati tajari. Pan ohuaha nohueradsa Diodsa da tahiccaraha Dabi jipajari, pohua tessedenidsa naco da inabaquidsa jipamanajari. Najari pan Diodsa da tahipa dada toqquima cacahuadenira jijipamana najariraha Dabideni pemimanadsa jipamanajari oppinera tahi –nahi nade Jeso.

<sup>27</sup> Naraha Jesopa denima pohuadenidsa huati huati dsanapojari: —Dio madija inahatobaqquijaripa jassinajacca huada madija inapajiramananissa tanijine inahatobaqqui-jarajari. Diopa jassinajacca huada tahimarini huati tapojari jassinajacca huadapi madijadsa bica tanijinena huati tapojari –nahi nade. <sup>28</sup> —Ohua Madija Bedi ojajarona jassinajacca huada jinede ojani. Jassinajacca ima cacahuadepi ohuana paji –nahi nade Jeso.

### 3

*Madija dsepe siricca ima*

*Mateo 12.9-14; Roca 6.6-11*

<sup>1</sup> Naraha Dio Atti mamarihuaji Jeso toqquedsimani-pomadsapa madija dsepe siri naco nahidsa huittarijari. <sup>2</sup> Nadsama jodiode ni marinaja pariseodsa jehe quinajaridenipa Jeso inoccodsamanajari. Jesopa jassinajacca huadadsa madija inanomibaquidsapa pohuadenidsa pina jassinajacca huada jerajarodsa pohua dsepe ijjarissa najari, quinajari. Pohuadeni bodipa: —Jidapana jassinajacca huadadsa ajari dsepe siri inanomidsapa Jesodsa ima inahananijine –quinajari. <sup>3</sup> Naraha Jesopa dsepe siridsa huahua najari: —Titehemadsa ahuaaji ticcajonaji –najari.

<sup>4</sup> Nadsapa dsepe siri ccajonadsa Jesopa madija huapimadsa huati tajari: —Jari, Moisesicca marinaja, icca madijacca marinaja naqui nahatoqquiri tiquinadsapi ohuatti tecomeramanaji. Jassinajacca huadadsapi ¿nejecoma najaro ima inananina “Bica tani” tiquinajaro? Jassinajacca huadadsa madija inabicabaquidsa “Oppina tani” ¿tiquinajaroqui? Madija inajidsobaquidsana “Bica tajaro” ¿tiquinajarorane? –najari. —Jassinajacca huadadsa naco ijine madija tossiajadsa ¿oppina taqui? “Paja dsoqquerina” ¿tiquinajarorane? –najari. Naraha pohuadeni cacomamanajari. Nahatoqquiri naraha cappinamanadsa joma quinajari. <sup>5</sup> Nadsapa Jeso madija huapima jassi nahuajanijari icahadibaquidsa noccodeni icatabaqqui najari. Nadsapa pohua bodi ojijari, huaribodeni sibaqquri nadsa. Nadsapa dsepe siridsa: —Jari, tidsepe ohuahuaji da ticanajonaji –nahi nade. Nadsa pohua dsepe pohuahuaji da icanadsapi tocanomijaro. <sup>6</sup> Naraha pariseodeni jai tojenadsapa tamine Herodecca madija tedseje queriqquimanajari. Nahidsa ima idimamanajaro, Jeso dsoqquehijine.

*Madija huapi taha Jesotohui jahimissajari*

*Mateo 12.15-16; Roca 6.17-19*

<sup>7</sup> Nadsapa Jeso pohua huatimadedenima coridsahuaji jai tojedsippajari. Aja dsama arobeni Carireahuajicca madija naco huapi taha Jesodsa jahimissajari. <sup>8</sup> Madija ohuahadeni naco Jesocca ima mittamanadsa pohua canahatoriri canahi qquide tohuini quinadsa Jesotohui jahimissassa canajari. Madija huapi taha jahijonana canajari. Dsama arobeni Jodeahuajicca, odsa panani Jerosarehuajicca, dsama arobeni Idomeahuajicca, hueni Jordao jippehuajicca, odsa panani Tirohuajicca, odsa panani Sidohuajicca madija naco jahijonana canajari. <sup>9</sup> Nadsapa madija si tocajajari canadsapa Jeso pohua huatimadedenidsa huati tajari: —Canoa qqui ticanamanaji. Nidsa nanidsa oqquedsanijine. Madija huapi taha jahijonahi ia mere inanamanarana —nahi nade. <sup>10</sup> Aja comaqquri najari inanomibaqquidsapa ohuaha tonomi, ohuaha tonomi naridsamanarijine pohuadsa jahijonedsati naco Jeso bara quinahijine pohuahuaji jo todsimahi najari.

<sup>11</sup> Aja madija bodidenicca tocorime Jeso qqui toquinadsapa Jeso baccohuaji pohuadeni pitodsa jassi tadsa attideni dacoradsa johua johua quinajari: —¡Tiapi Dio Bedi tijani! —quinahi nade Jesodsa. <sup>12</sup> Naraha pohua tahimari ecomamananijine Jeso atti dacoradsa huati tajari: —¡Najaro otahimari huati tiquina tejeraji! —nahi nade.

*Jeso pocca dodosse tabaqqui 12 quinajari icattejidsabaqquijari*

*Mateo 10.1-4; Roca 6.12-16*

<sup>13</sup> Jesopa coridsahuaji madija mari icanabaqquia jicadsapa ssonohuaji toqqemorajari. Nadsapa Jeso pohua jipa tahicca madijatohui huahua inajonabaqquidsapa pohuadsa queriqquimanajari. <sup>14</sup> Nadsapa 12 quinahana icattejidsabaqquijari, pohua huatimade toquejenahijine. Najaridenipa Jeso dosse inabaqquiridsadsa pohua tahimari maride jahiridsahijine. Nadsapa Jeso pohuadeni oni icanacanibaqquijari: —Occa dodosse tabaqqui —najari. <sup>15</sup> Pocca dacorehe pohuadenidsa inanaridsajaroa madija bodidenicca tocorimedeni dosse dosse ihininebaqqui nahijine pohuadeni inapajirabaqquijari. <sup>16</sup> Nadsama 12 quinajarideni icattejidsabaqquijari onidenipa ajama quinajari: Tahidepa Ssino. Pohua oni Jesojine icanacanidsatipa: Pedro, najari. <sup>17</sup> Madija ohuaha onipa Satiaco. Pohua ohuahapa Huano. Pohuadeni pamahapa Sebedeo bedi. Najarideni pamahapa Jesojine onideni icanacanidsatipa: Boanereque, najari. (Ettidsapi pina: tottorodecca madija, najari.) <sup>18</sup> Madija ohuahadeni onideni naco Adiri, Feripe, Batorome, Mateo, Tomas quinajari. Madija ohuaha onipa Satiaco. Satiacopa Arapeo bedi. Madija ohuaha onipa Tadeo (pohua oni ohuahapa Joda). Madija ohuaha onipa Ssino, pohuadsa: romanodeni momohuade, quiquinanajari. <sup>19</sup> Madija ohuaha onipa Joda Iscariote. Najaripa Jeso ccaccorade. Najarideni Jeso icattejidsa-baqquijaripa 12 quinaha pohuadsa toquejenajaride.

*Jesocca dacorehe ahuato tajaroraha pohuadsa ima inanamanajaro*

*Mateo 12.24-32; Roca 11.14-23; 12.10*

<sup>20</sup> Nadsapa Jeso odsa bacco tanidsapa madija pohuadsa toqueriqquini-manapomajari. Madija pohuadsa disseraqquri nadsapa pocca mamari tabaqqui tedseje dsepedeni ijimanahissa tajari. Nama quinadsapa jipamanahijine ssamo tajari. <sup>21</sup> Naraha Jeso imeni, pohua imecotedeni tedseje ima mittamanajari: —Jeso bodi tossamohui, jipa-jarahi —quinahi mittamanadsa pohua iaccanimanahijine jahijonajari.

<sup>22</sup> Nahidsa naco odsa panani Jerosarehuajicca jodiodenicca marinaja maridedeni bacco quinajari. Najarideni attidenia: —Tocorimedenicca tamine Beheosebopa Jeso bodidsa madidsajari. Pocca dacorehe cajiarijinea pocca dodosse tabaqqui dosse ininebaqquijaripaja —quinahi nade. Naraha maidsamanajari.

<sup>23</sup> Nadsapa Jeso pohuadenidsa huahua najari. Pohuadeni bodi huatomanahijine ajijaro namidsa imadinicca ima huati huati tajari: —¿Satanapa pohua dosse tonine taco? Nohuerahi -nahi nade. <sup>24</sup> —Dsama huapimacca taminepa madija ecahuabaqquiraha dsotode pocca madija cahadiremanadsa ahuaji atti ahuaji atti quinadsapa pocca cacahuehe inassamomanajaro. Nadsapa pocca madija domo tocca tahi. <sup>25</sup> Najarossa najaro odsa cajariecca madija cahadiredsapa poccadeni ima tossamodsapi tojaribaqqui tahi. <sup>26</sup> Ima najarossa najaroa Satanapa pocca dodosse tabaqqui madija bodidsa madidsamanajarideni dosse ininebaqquidsapa pina pohua pocca madija tedseje cahadirejarissa najari. Nama nadsapa pocca dossehe inassamodsapi sara tabaqquihitohuiraha -najari Jeso.

<sup>27</sup> —Nadsama imasiri totonanade Satanapa dacorehe cajiraha ohuapi deni ojajaro. Pohuapa ajamani pina ajijaro ima tiadenidsa huati onabote najarossa najaro. Nadsama bobotidepa: “Odsacca todsepetaji obotina” najariraha odsa jinede dacorabote odsadsa madidsadsapa botihijine pajira-jarahi. Naraha bobotide denima dacoradsapa odsa jinede dama inadsa jore inaqquidsapa pohua dsepetaji botihijine pajirahi, onajaro. Ima najarossa najaroa aji ohua pina bobotide denima dacorajarissa onajaro. Occa dacorehe deni tojadsapi pina Satana jore onaqquijarissa nadsa pocca dodosse tabaqqui dosse dosse ohoninebaqqui najaripaja -nahi nade Jeso.

<sup>28</sup> Nadsapa Jeso jodiogenicca marinaja maridedenidsa denima huati huati tajari: —Pajissara tiadenidsa huati onajaro: Madija imasiri inanamanaraha nidsa dsotode: “Icca ima inebona” quinadsapa poccadeni imasiri Diodsa ecomeramanadsa Diopa poccadeni imasiri huapima epeje inananitohui. Poccadeni tamassohue huapima naqui Dio epeje inananitohui. <sup>29</sup> Naraha Dio Corime itamassomanadsa, pohuajine tojajarodsas maidsehe huahua quinadsa naco Diopa pohuadeni atti huati ajamajarahitohui. Poccadeni imasiri epeje inana-jeranitohui. Poccadeni ima oppina tajaropi pohuadenidsa nema dsanaponitohui -nahi nade Jeso. <sup>30</sup> Aja Jeso atti nama najaria jodiogenicca marinaja maridedeni maidsamanadsa: —Jesopa Satanacca dacorehe cajijarijine canahatoriri canaridsajari -quinadsapa manaco Jesopa pohuadenidsa ima oppina tani huati tajari.

### *Jeso imeni, pohua imecotedeni*

*Mateo 12.46-50; Roca 8.19-21*

<sup>31</sup> Nadsama Jeso imeni pohua imecotedeni tedseje Jeso pohuahuaji bacco toquinajari. Amossinihuaji domo huadsa huati toquinajari: —Jesodsa huahua tiquinaji -quinajari. <sup>32</sup> Madija Jesodsa jassi tarijarideni pohuadsa huati toquinajari: —Ticca ami, timecotedeni amossinidsa titohui domo huapaja -quinahi nade.

<sup>33</sup> Naraha Jeso pohua attipa: —Occa amipi ¿nejecojarona paji? Ohuemecotedeni naco ¿nejecojaridenina paja? -nahi nade. <sup>34</sup> Nadsapa pohuadsa jassi tarijarideni icatabaqquidsapa pocca madija jararaha: —Ajajaridenina pina occa amissa, pina ohuemecotedenissa quinajari. <sup>35</sup> Madijadenipa Dio Pohua jipa tahicca ihinanamana najarodenina pina ohuemecotedenissa quinajari. Amonejedeni naqui Dio Pohua jipa tahicca ihinanamana najarodenina pina occa amissa, pina ohuemecotedenissa quinajaro, onajaro -nahi nade Jeso.

## 4

### *Jesocca marinaja huidsaja ppappadecca ima tadsajani mari icanabaqquijari*

*Mateo 13.1-23; Roca 8.4-15*

<sup>1</sup> Jesopa coridsa inididsa maride tojapomajari. Madija ohuaha ohuaha quinaha pohuadsa toqueriqquijari. Madija pohuadsa panahicca tojadsapa Jeso coridsacca canoadsana toqquedsadsapa canoacca huihuittaridsa huittarijari. Nadsama madijapa nahi coridsa inidicca ssiquidsa domo huajari. <sup>2</sup> Nadsapa pohuadenidsa ima huapi

tehe mari icanabaqqujari. Pocca marinaja ajijaro namidsa imadinicca ima tadsajani mari icanabaqqujari.

Jesocca marinajapi ajima najaro: <sup>3</sup> —Titaharibobo canaji. Huidsaja ppappadepa pocca huidsaja huirade toccajari. <sup>4</sup> Nocco huira inaridsajari. Naraha motapa jahuihuaji catojaja najari. Nadsapa ppiriri jahironadsa amadsati saca quinajari. <sup>5</sup> Aja nocco huira naridsajari mota naco siba ccababa tanidsa catojajari. Nanidsapi ssiqui bicani badsira taraha nama naha huassinaja moro tajari. <sup>6</sup> Moro taraha jabo huapihuajira toccabaqqujari. Maji ccajonadsapa maji ppoconejine botejari. <sup>7</sup> Nocco mota naco namidsa cotihi caji tahihuaji catojajaria cotihi tedseje paja moro toquinarihi naraha cotihijine ssomi tojajari. Nadsapa bono-jarajari. <sup>8</sup> Nadsapa nocco mota huira naridsajaripa nami bicanidsa catojaridsadsapa mororo canaridsadsa bica taha napijari. Bono cajiridsadsapa ede ojariapa bono 30 naha cajijari. Ede ohuahaccapa bono 60 naha cajijari. Ede ohuahaccana 100 naha cajijari. <sup>9</sup> Nadsama teribodeni ticajimanadsapi ohuatti timittamananissa taji, onajaro -nahi nade Jeso.

*Madija motapa Jesocca marinaja mittamana-jarajari*

*Mateo 13.10-17; Roca 8.9-10*

<sup>10</sup> Nadsapa madija mota jai tojaniraha madija pamaha madimanajaripa Jesocca dodosse tabaggui 12 quinajaridene tedseje Jesodsa huati toquinajari: —Jeso, ajijaro namidsa imadinicca ima tadsajani ia mari ticanabaqqujaropi ¿nejecoma najaro ticca marinaja? -quinahi nade. <sup>11</sup> Naraha Jeso pohuadenidsa huati tajari: —Jehe maittaccadsama Diocca cacahuehecca ima dsati najoraporaha madija inahattabaqqujaraccade. Jidapanana Diojine pocca cacahuehe tahimarini dsati tiadenidsana ahuato tani. Naraha madija motapa ajijaro namidsa imadinicca ima tadsajani pohuadene mari ocanabaqquidsapa mittamana-jarajaripaja. <sup>12</sup> Nama nadsapa Dio Atti cacomerabote Isahia dsodo inapojarossa najaro. Isahia attipa: “Qqui qqui toquinaraha pina qqui toquirahi nahitohui. Pohuadene bodi pina ssamoqquiri najarissa nahitohui.

Diocca dosseniji mimittamana naraha pina mittamanerahi nahitohui.

Mittamana-jaradsapa bodidene naco cacajiqquimeramana-jaradsapa Dio poccadene imasiri epeje inana-jeranitohui”

napohui nade Isahia atti -nahi nade Jeso.

*—Huidsaja ppappadepa imapi ajima najarona paji -najari Jeso*

*Mateo 13.18-23; Roca 8.11-15*

<sup>13</sup> Nadsapa Jeso huati tajari: —Aji occa marinaja ajijaro namidsa imadinicca ima tadsajani tiadene mari ocanabaqquidsapi ¿timittamana-jerajaroqui? Timittamana-jeradsapi occa marinaja ¿nejecoma najarodsana timittamananijine? onajaro -najari.

<sup>14</sup> —Jidacca occa marinajapi ajima najaro: Huidsaja ppappadepa pina Dio Atti mamaridessa najari. Noccopa pina Dio Atti madijadsa totoja najarossa najaro.

<sup>15</sup> Nocco huira inaridsajari mota jahuihuaji catojajaripa pina madija Dio Atti mittamanaraha pohuadene bodi iboqquiri nadsapa bodidenidsa Dio Atti toqquedsima-jerajarossa najaro. Aja ppiriri nocco saca inaridsajaripa pina maidsehe jinede Satana ccajonadsa bodidene inassamobaqqujarissa najaro. Nadsapa Dio Atti pohuadenidsa nohuerajaro.

<sup>16</sup> —Madija ohuaha bodidenicca imapi pina aji siba ccababa tajarocca imassa najaro. Dio Atti mittamanadsa amadsati huatidsemanajari. <sup>17</sup> Pohuadenipa Diodsa jehe dsanapomanahijineraha Dio Atti pohuadene bodidsa toja-jerajaropi pina aja siba ccababa tanidsa nocco moro taraha jabo huapihuajira toccabaqqujaricca imassa najaro. Nadsama aja maji ppoconejine botejaricca imapi Dio Attidsa jehe



quinajarijine pohuadenidsa najidsohue ssonaridsa, ocasserani ahuamanadsapa jehe quidsati attideni: “Epejena, Dio Attipi inebona” quinajari.

<sup>18</sup> —Madija ohuaha bodidenicca imapi pina namidsa cotihi caji tajaricca imassa najaro. Pohuadenipa Dio Atti mittamanaraha <sup>19</sup> pohuadeni dsepedeni ihijimana najarotohuira disseraqquri nadsapa Dio Atti tocahatterahissa tajarajari. Dsiniro tohuira quinadsa naco najaro imajine poccadeni jeheniji maidsehe toja tani. Huapima pohuadeni tohuini quinajaricca tohuira bodideni huatoma-manadsa naco Dio Atti huatideni ajamamanajari. Nama quinajaridenipa poccadeni jeheniji pina aja nocco moro taraha cotihijine ssomi tojadsapa bono-jarajarissa najaro. Dio Atti mittamanaraha pohuadenijine Dio Atti madija ohuahadenidsa toja-jeranitohui.

<sup>20</sup> —Naraha madija ohuaha bodidenicca imapi pina aji nami bica tajarocca imassa najaro. Dio Atti mittamanadsapa jehe quinahissa tajari. Poccadeni jeheniji napidsapi pina aja nocco nami bicanidsa moro tahissa tadsapa bono cajijari. Ede ojariapa bono 30 naha cajijari. Ede ohuahaccapa bono 60 naha cajijari. Ede ohuahaccana 100 naha cajiridsajari. Aja Diodsa jehe quinahissa tajaripa madija mari icanabaqquridsadsapa madija ohuaha ohuaha quinaha Diodsa inanabaqqui-manahitohui -nahi nade Jeso.

### *Jojororo tahimari*

#### *Roca 8.16-18*

<sup>21</sup> Jesopa denima huati tajari: —Nadsama jojororo toquehessidsa ssapotodsa boco icanahijine ¿bica taco? Bica tajarahi. Aja jojororo toquehessidsapa huahuada dopanihuaji tocanajimahijine jarahi. Jojororo toquehessidsapa aja pohua cacahittari nahidsana cacahittari najari, nahi madija huapima ssiajani cajimanahijine.

<sup>22</sup> Nadsama jidapana ima ahuatora tanicca caji taraha nidsa dsotodepi ahuatora tanitohui. Aji jidapana occa marinaja mota ahuatora tadsa timittamana-jeraraha nidsa dsotode tiadenidsa ahuatora tadsana timittamananitohui, onajaro. <sup>23</sup> Nadsapi teribodeni ticajimanadsapi ohuatti timittamananissa taji, onajaro -nahi nade Jeso.

<sup>24</sup> Nadsapa huati tapomajari: —Najaro ohuatti tibodideni huatonissa tadsa tecahuamanaji. Naraha timittamananissa tejeradsapi ticahattera-jeranitohui. Timittamananissa tadsapi ticahattereje dsanaponi nanitohui. <sup>25</sup> Aji tiadeni ohuatti tecahuamanadsapi denima ticahatteranitohui. Naraha occa marinaja timittamanaraha ohuatti tecahuamana-jeradsapi occa marinaja odininitohui, onajaro. Nadsapi tiadeni tiadenira ticamaidsanimanadsa naqui: “Dio Atti ocajini, nahato onani” tiquinaraha najaro naqui odininitohui. Paji, nemamana tejeraji, onajaro -nahi nade Jeso.

### *Diocca cacahuehepi pina nocco moro tajarissa najaro*

<sup>26</sup> Jesopa ima onihi huati tajari: —Jehe, Diocca cacahuehe tojaridsajaropi pina ajijaro imassa najaro. Madijapa dsamatapa nocco huira inaridsajari. <sup>27</sup> Dsomepa huahuada najari, ssiaja nocco tojadsapa onihihuaji dsepe ihiji najari. Naraha dsamatapa noccopa pohua ehuerahi moro moro tajari. Madijapa dsamatapa nocco moro inanahijine ssamo taraha Diona nahato tajari. Diojine moro moro tajari. <sup>28</sup> Jehe, nami bica tadsa tahidepa ede napijari. Dsotodepa mohue toccajari. Dsotodepa bono cajijari. <sup>29</sup> Nadsapa bono jadadsa jinede attipa: “Bono jadahi pore onana” nadsa porede toccajari. Bono pore inajari, jicadsapa pocca odsahuaji eccanijari. Jehe, Diocca cacahuehepi pina najaro imassa najaro -nahi nade Jeso.

### *Jesopa mostaza noccocca ima tadsajani mari icanabaqqujari*

#### *Mateo 13.31-32; Roca 13.18-19*

<sup>30</sup> Nadsama Jeso huati tapomajari: —Tibodideni huatomanaji. ¿Nejecoma najarona paji Diocca cacahuehe? Aji Diocca cacahuehe tahimarini timittamananijinepi ajijaro namidsa imadinicca ima onihidsa tiadeni mari ocanabaqquina -nahi nade

Jeso. <sup>31</sup> —Diocca cacahuehepi pina mostaza noccossa najaro. Mostaza noccopa potera tajari. Ppa nahi nocco ohuaha naco potera tahi caji taraha mostaza noccopa denima potera tajari. <sup>32</sup> Jehe, mostaza noccopa potera taraha ppa idsadsa napidsapa huidsajacca ppa nahidsa pohana deni tojajari. Motaradsapa pohua ininedsa naco ppiriri pohuadeni tadsari eppe nahuinedsa bina tarimana tahi. Jehe, Diocca cacahuehecca ima mari ocanabaqquijari pina najaro imassa najaro. Tahidepi madija pamahadsa tojapojaro, dsotodena madija huapimadsa tojaridsadsapi Diocca cacahuehedsa madija tohuapihitohui -nahi nade Jeso.

<sup>33</sup> Jesopa pohua tahimari ajijaro namidsa imadinicca ima onihi onihi najaro tadsajani mari mari ihicanabaqqui najari. Madija huapimadsa huati tadsapa pohuadeni mittamanahijine pajiraniccara mari icanabaqquijari. <sup>34</sup> Pohuadenidsa huati tadsapa ajijaro namidsa imadinicca imadsara mari mari ihicanabaqqui najari. Naraha dsotode pocca mamari tabaqquidsana pocca marinaja inahattabaqquijari.

*Jesopa jojode inatappa ssodadani inatappa nanicca ima*

*Mateo 8.18, 23-27; Roca 8.22-25*

<sup>35</sup> Najaro ssiajadsa maji tonahuidsas Jesopa pohua huatimadedenidsa huati tajari: —Jina, coridsa jippehuaji jaijana -nahi nade. <sup>36</sup> Nadsapa pohuadsa queriqquimana-jarideni inebobaqquijari. Jesopa najaro canoadsa huittaridsa maride tojaraha maride jicadsa paja iaccamanarihi najari. Madija ohuahadeni naco canoa onihidsa tohuaccamissamanajari. <sup>37</sup> Jai tojadsapa jojode dacorehema ccajona, passo dacorehema ccajona nadsapi coridsa ssoda ssoda najarojine canoadsa passo ssonidsa ssonidsa najaro.

<sup>38</sup> Naraha Jesopa canoa dsotonihuaji pohua tati poponima ibemadsa tohuittamis-sadsa huadajonajari. Nadsapa Jeso pohuadsa huahua quinajari: —¡Ia Maride nocco tijaji! ¡Je icanabote nani! ¿Nema nehe poni ijicanijinequi? -quinajari. <sup>39</sup> Nanaja Jeso nocco tojadsa totehemadsa jojodedsa passodsas huati tajari: —¡Epeje taji! ¡Mohua tejeraji! -nahi nade. Naneje jojode, passo ssoda ssoda najaro naqui joma najaro. Joma nadsapi passo podsippanissa tajaro. <sup>40</sup> Nadsapa pocca mamari tabaqquidsas huati tajari: —¿Nejecotohui ticappinamanajaro? Tiadenipi ohuadsa: “Jehe, Jesopa ia tohuacahua-baqquihijine pajirahi” ¿tiquinejerajarorane? -najari Jeso.

<sup>41</sup> Naraha pohuadenipa cappinamanajari. Bodideni jabojo quinadsa pohuadenira imahaha canajari: —Aja ia Maridepa ¿nejeco madija? Pahuapa jojode, passo ssodadanima quejema naraha jojodedsa: “Epeje taji” nadsa jojode joma naha -quinajari.

## 5

*Jerasahuajicca madija bodidsa Satanacca dodosse tocorime madidsajari*

*Mateo 8.28-34; Roca 8.26-39*

<sup>1</sup> Aja coridsa jippehuaji bacco toquinajaricca dsama oninipi Jerasa. <sup>2</sup> Nahidsana Jesopa toqquemoraraha madija bodidsa Satanacca dodosse tocorime madidsajari tonoccobirihuaji qqenadsa Jesodsas bacco dsippajari. <sup>3-4</sup> Pahuapa tonoccobiri caji tanihuaji mamadi najari. Nadsapa nahi Jerasahuajicca madijapa biji jore quinaraha joca tajojo, joca tajojo najari. Isso naco jore quinaraha ttai tajojo, ttai tajojo najari. Cadenadsa naco jore quinaraha pohuajine tajoppi tajoppi najaro. Jore quinapomadsa naco nama dsanapodsapa pohuaha deni tojadsanapojari. Jore quinadsa ecahuanahijineraha jojorededeni ajamani toquejenadsapa paja inebomanarihi najari. <sup>5</sup> Pahuapa ssiaja ccaridsa, dsome ccaridsa nanaridsa najari. Johua johua nanaridsa najari. Ssonohuaji ccaridsa, tonoccobirihuaji ccaridsa nadsapa sibadsa pohua ime ca jeo, ca jeo tonanamarojari. <sup>6</sup> Nanaja Jeso huaji tanidsa qquemorahi qqui tadsapa joppa najonajari, Jeso baccohuaaji pohua pitodsas huitta

najari. <sup>7-8</sup> Naraha Jesopa amadsati pohua bodiccadsa huati tajari: —¡Tocorime, najari madija tinebojo! —najari. Nadsapa tocorime jadsirema huati tajari: —Jeso ¿nejecotohuira ticcajonajaroneje? ¿Ohua najidsode ticcajonaroqui? Tiapi Dio deni tojajaricca Ejedeni tijani. ¡Dio onima ohua tinajidso tejeraji, onaha! —najari. <sup>9</sup> Naraha Jesopa tocorimedsa huati tapomajari: —¿Tia onipi nejeco? —najari. —Ohua onipi Siba tani, tocorime huapi inani —nahi nade.

<sup>10</sup> Nadsapa madija bodicca tocorimedenia Jesodsa huatide disseraqquri najari: —¡Ajijaro dsama huaji tanihuaji ia dosse tinabaqqui tejeraji, inaha! —quinajari.

<sup>11</sup> Naraha nahi ssono huajira tanidsa poroco huapi taha jiparidsamanajari. <sup>12</sup> Nadsapa tocorimedeni Jesodsa huati toquinapomajari: —Poroco huapimadsana ia dosse tidsimabaqquiji. Nanidsana iquejenana —quinajari.

<sup>13</sup> Nadsapa Jeso: —¡Jehe, porocodsana tiquejenana! —najari. Nadsapa najari madija bodicca tocorime jahininedsapa porocodsana jai tojedsimaridsajari. Nanaja porocopa coridsa inidi sseberanihuaji domo toqquedsippadsa diri-ri-ri todsippadsapa cojo-jo-jo quinajari, tocatojedsippajari. Poroco huapimapa 2 mil quinajari. Coridsadsa je tocaniredsapa cacotedsanajari.

<sup>14</sup> Nadsapa poroco cacahuadedenipa ahuajicca odsa pananihuaji ima joppa tocanajari, ohuahapa huidsajahuaji ima joppa tocanajari. Nama naridsamanajari. Ima inanaridsamanadsapi cattade jahijonana canajari, madija huapima. <sup>15</sup> Nadsapa qquide jahijonadsapa Jeso huahihuaji bacco najonamanajari. Aja madija tocorimedeni cajipojaripa tonomihira qqui toquinajari. Nahidsa huitta canajari. Etero huedsapomajari, bodi huatohue naco cajipomajari. Nadsapa madija huapima cappinamanajari. <sup>16</sup> Qqui toquinapojaridenia aja madija bodicca tocorimedeni jahininejari tahimari huati, poroco tahimari huati toquinajari. <sup>17</sup> Nadsapa poccadeni dsamadsa Jeso toccanihijine dossede dissassera tajari: —¡Ticcaniji, aji icca dsamad-sapi timadi tejeraji! —quinajari.

<sup>18</sup> Nadsapa Jeso toqquedsippanidsapa canoadsa toqquedsanijari. Nadsapa madija tocorime cajiporaha tonomijaripa Jesodsa huahua najari: —¡Ohua naqui tiadsa occana! —najari. <sup>19</sup> Naraha Jeso attipa: —Poni, ticcaniji. Ticca odsahuaji ticca madijadsa tijaniji. Ticca madija huati tinabaqquina: “Onomijaropi Diojine. Diopa ohuadsa huati huana tajari” tinanina —nahi nade Jeso.

<sup>20</sup> Nadsapa toccanidsa pocca ima huati naridsajari. Dsama arobeni Decaporicca odsa huapimadsa pohua tonomihicca ima, Jeso pohua inanomihicca ima huati taridsajari. Nadsapa huapima mittamanadsapa: —A, Diojine bica taha —quinahi nade.

*Jairo bedeni tonominicca ima, Amoneje amaissorana ja coma taraha tonominicca ima*

*Mateo 9.18-26; Roca 8.40-56*

<sup>21</sup> Jesopa pohua huatimadedeni tedseje canoadsa jippehuaji tohuaccanimanajari. Bacco tanimanadsapa madija Jeso qquide jahidsippappa canajari. Jesopa coridsa inididsa huajari. <sup>22</sup> Nanaja jodiodenicca Dio Atti mamarihuajicca tamine ojaría naco ccajonajari. Pohua onipa Jairo. Jesodsa bacco najonadsapa pohua bodipa: —Jesopa deni tojahi, ohuapi ajimani ojani —nadsa Jeso bacchohuaji pohua pitodsa huitta nadsa tocattedsa najari. <sup>23</sup> Nadsapa Jesodsa huati tajari: —Occa ejedeni amoneje bedeni tomijirani. Jina, occa odsahuaji icadaccana. Tidsepedsa poni bara tadsa tonomidsa madipomanijine —nahi nade Jairo. <sup>24</sup> Nadsapa Jeso Jairo tedseje jahui tohuedanijari. Naraha madija huapima Jesodsa cahua ja dsanapojarijine Jeso queberibote dsanapojari.

<sup>25</sup> Madija huapima jai tojahidsa naqui amoneje coma tajaro tohuanajaro. Ponipi dsamacoma onini amaissorana ja cajijaro. Poni coma tanicca huajanopa 12 naraha

ama jicaquera tanicca totonahana dsanapojaro. <sup>26</sup> Coma tadsa toponi totonanomide-denihuaaji ponima totocca naraha tonomi-jerajaro. Denima coma dsanapojaro. Toponi totonanomidedenidsa poni manaconi cajicaridsajaro. <sup>27-28</sup> Naraha Jeso tahimari madija huati huati toquinahi mittajaro. Nema najaroa aji Jesotohui toccajaropaji. Poni bodinipi: —Pocca eterora bara onadsapi onominitohui -najaro. Madija si tocajajari canajonaraha amoneje coma tajaropi Jeso nattihuaaji toccamissadsa tohuajiresissi nadsa pocca etero bara inajaro. <sup>29</sup> Naneje amadsati amani amossi najaro. Nadsapi poni doroni comani tomossini nahato tajaro.

<sup>30</sup> Nadsapa Jeso pohua bodi nahato tajari, pocca dacorehejine madija inanomijaro. Nanaja amadsati Jeso pohua nattihuaaji piti nahuajanidsa huati tajari: —¿Nejecojari occa etero bara inajaroneje? -najari. <sup>31</sup> Naraha pohua huatimadedeni attidenia: —Madija si tocajajari canajonaripa. Naraha tiapi: “¿Nejecojarina ohua bara najari?” tajaro -quinahi nade. <sup>32</sup> Naraha Jeso pohua bara najari tohui ahuaji qqui, ahuaji qqui naridsajari. <sup>33</sup> Nadsapi amoneje cappinehe ccajonadsa tacca-cca canajonarajo. Jeso baccohuaaji poni pitonidsa huitta nadsa poni cacomerajaro: —Ojinepa -najaro. Nadsapi poni amaissoranaa cajijaro Jeso pocca etero bara inadsa amadsati tomossijarocca ima huati tajaro. <sup>34</sup> Nadsapa Jeso ponidsa huati tajari: —Jehe asi, ohuadsa tibodi: “Jehe, Jeso ohua tonanomihijine pajirahi” tadsapi najarojine ticca dsamacomapi toccapa. Ticcanidsapi ticappina tejerana. Najaro comanidsa quidsa tapoma-jeranitohui -najari.

<sup>35</sup> Nahidsa Jeso huati huati taraha, jodiodenicca Dio Atti mamarihuajicca tamine pocca odsacca madija bacco najonamanadsa ejedeni imehidsa huati toquinajari: —Jairo, ticca ejedeni dsoqqueni. Jidapapa ia Maride ccajona-jarana. Dsoqqueni. Epejeni, poni -quinajari. <sup>36</sup> Nama quinaraha Jesopa Jairodsa: —Tibodipi ticappina tejerana. Pina “Jehe, poni tonominijine” tana -nahi nade Jeso atti. <sup>37</sup> Jeso pohua natti jai tojamissajarideni pohuadsa jai toja-jarahijine Jeso eccocobaqquijari. Naraha pohuadsa jai tojahijinepa Pedro, Satiaco, Huano quinajari. Aja Huanopa Satiaco ohuaha. Pohuadenira jina inabaqquijari.

<sup>38</sup> Nadsapa Jairocca odsahuaji jai toja, bacco toquinajari. Bacco toquinadsa pina mohua mohua camajarissa najari Jeso qqui tajari. —Ejedeni dsoqqueni -quinadsa jadsirema oji oji camajari, johua johua camajari. <sup>39</sup> Odsadsa toqquedsimadsapa Jeso huati tajari pohuadenidsa: —¿Nejecotohui ticcadeni ojie dacorajaro? ¿Nejecotohui johua johua ticamajaro? Ejedenipi dsoqque-jerani. Huadani -nahi nade Jeso.

<sup>40</sup> Naraha pohuadenipa Jeso atti jaja icanamanajari.

Naraha Jesopa madija huapima dosse ininebaqquijari amossinihuaji. Nadsapa Jeso, pohua huatimadedeni, ejedeni imehi, imeni quinadsa ejedeni huatiajaro porinihuaji jai tojedsimajari. <sup>41</sup> Nadsapa Jesoa ejedeni dsapani equididsa pohua attidsa huati tajari: —Taritta ccomi -najari. (Najaro ettidsapi: —Ejedeni, titehemaji -najari.) <sup>42</sup> Naneje ejedenipi amadsati camitemanidsapi totehemajaro. Nadsapi ccaridsajaro. Huajanorini 12 najari. Najaro ejedeni ccaridsadsapi madija huapima jabojo quinaraha huatidsemanajari: —A, apaja bica tahi -quinajari. <sup>43</sup> Nadsapa Jeso atti pohuadenidsa: —Ajijaro imapi huati taridsamana tejerana. Poni -najari. Nadsapa Jeso attia: —Ticcadeni ejedeni tinajipamanaji -nahi nade Jeso.

## 6

### *Jesopa Nasaretihuaji toccanidsa mari icanabaqquijari*

*Mateo 13.53-58; Roca 4.16-30*

<sup>1</sup> Nadsapa Jeso pohua madihidsa nebo pohua napihihuajina toccanijari. Pohua huatimadedenima jai tojanijari. <sup>2</sup> Odsa panani Nasareti bacco tanidsapa jassinajacca huadadsa Dio Atti mamarihuaji toqquedsimadsa mari icanabaqquijari. Nadsapa

nahicca jassi tarijarideni mittamanadsapa huajo caniredsapa: —A ¿nejecohuaji tohuattajaritta? —quinajari. —¿Nejecojaricca nahatohue Jesodsa tojajarotte? ¿Nejecoma nadsa madija ihinanomi najari? Pohuapa canahatoriri canahi qqui qqui ihinana-jaraccade —quinajari. <sup>3</sup> —¿Naraha ajararipa ahua cocobade jaraco? ¿Ahua cocobadedija, Maria bedia! Pohua imecotedeni naco: Satiaco, Dsodse, Joda, Ssino quinajaripajade. ¿Pohua caripenedeni naqui aji imadinidsa madimana-jeraqui? Madimanani —quinahi nade. Nadsapa pohua atti mittade tojiperamanajari. <sup>4</sup> Nadsapa Jeso attia: —Ohuadsa pajissa tiquinejeradsapi pina Dio Atti cacomeraqquiri najari-deni tahimarissa tinanamanajaro: Madija huapimapa aja Dio Atti cacomerabotedsa: “Pajissa Diocca dossenijia” quiquinanaraha aja pohua dsamariccapa nama quina-jarahi. Pohua imecotedeni, pocca odsacca naco pohua attidsa jiperaqquiri naha nama najonamanajari —nahi nade. <sup>5</sup> Nadsapa nahihuajicca madija Jesodsa pajissa quina-jaradsapa pohua canahato-huajapohui canahicca huapi tejerani. Madija pamahara bara inabaqquidsapa inanomibaqquijari nade. <sup>6a</sup> Nadsapa pocca odsahuajicca madija jehe quina-jaradsapa Jesopa pohuadenitohui pohua bodi huato-dsanapojari.

*Jesopa pocca dodosse tabaqqui 12 quinaha madija maride dosse inaridsabaqquijari Mateo 10.1-15; Roca 9.1-6*

<sup>6b</sup> Nadsapa odsa onihihuaji odsa onihihuaji Jesopa mari mari naridsa najari. <sup>7</sup> Nadsapa pocca dodosse tabaqqui 12 quinajari huahua inabaqquidsapa dosse inabaqquiridsajari. Ahuajicca jahui topama, ahuaajicca jahui topama, ahuaajicca jahui topama quinahijine dosse inabaqquijari. Jesopa pocca nahatohue pohuadenidsa inaridsajaro. Madija bodidenicca tocorime naco dosse inineridsa-baqquihijine pohuadeni inapajirabaqquijari. <sup>8</sup> Nadsapa benehidsa jai tojadsa pohua attissa inanamananijine Jeso pohuadeni mari icanabaqquijari. Pohua attipa: —Jehe ticcadeni benehidsapi tidsepedenitaji dsojo tiquina tejeraji. Tidsepedenidsapi tiadeni totocahuejidsara dsojo dsojo tiquineri naji. Dsamatapa naco tiaccamana tajarajo. Saco naqui tiaccamana tejeraji. Dsiniro naqui tiaccamana tejeraji. <sup>9</sup> Temoridenicca sadaria naco aja tedsamanajarira ohojariri najo. Ticcadeni etero naqui pamehepi tiaccamana tejeraji, aji tedsamanajarora ohojariri tinanamanaji, onajaro —nahi nade Jeso.

<sup>10</sup> —Nadsama odsa panani onihi bacco tiquinadsapi aji ticadedsimapojarocca odsadsara timadimanaccana. Denima ticada-jeraccadsa najaro odsadsara timadimanaccana. <sup>11</sup> Naraha odsa pananihuaji bacco tiquinadsa madija: “Ajidsapi timadimanaji” quina-jaradsapa, aja ticcadeni marinaja mittade jiperaqquiri nadsa naco najaro odsadsa ticadeqquimani bica tani. Madija nama quinahicca odsa tinebomanadsapi temoridenicca sadariadsa ssiqui ma tajaro catojanijine pporo pporo tiquinana. Nahi poccadeni ibohue bodideni huatoma-manahijine, onajaro —nahi nade Jeso.

<sup>12</sup> Nadsapa pocca dodosse tabaqqui jai tojajari. Madija bodideni cacajiqquimera-manahijine mari icanabaqqui-ridsamanajari. Pohuadeni attipa: —Imasiri tinebomanaji. Diodsara tiquejenaji —quinahi nade. <sup>13</sup> Madija bodidenicca tocorime ohuaha ohuaha naridsajarideni naco dosse dosse ihimaridsamana najari. Madija comaqquiri najarideni naco ihinanomi-ridsabaqquimana najari. Oqui badsira taha tatidenidsa sso sso ihinariridsamana nadsa Diodsa huati huati totoquina nadsapa Diodjine totocanomireridsa najari.

*Huano Baotista dsoqquehicca ima Mateo 14.1-12; Roca 9.7-9*

<sup>14</sup> Nadsama dsama arobeni Carireahuajicca tamine Herodepa Jesocca ima huati toquinahi mittajari. Jeso canahatori canaridsahicca ima naqui tojaribaqquije najaro. Nadsapa Herode attia: —Jesopa Huano Baotista dsoqqueraha nahatonijari.



Najaro nahatonihejine canahatori canahi -nahi nade. <sup>15</sup> Naraha madija ohuaha attidenipa: —Jesopa maittaccadsamacca Dio Atti cacomerabote madipojari Eria ccanipomajari itidija -quinahi nade. Madija ohuaha attideni naco: —Aja Jesopa pina maittaccadsamacca Dio Atti cacomeraqquiri najaridenissa najari -quinahi nade. <sup>16</sup> Naraha tamine Herodepa madija nama quinahi mittaraha pohua attia: —Jesopa Huano. Nahato onani. Soldado ocadossebaqquidsa Huano matto ca ijidsamanaraha nahatonijari -nahi nade.

<sup>17-18</sup> Nadsama Herode atti nama nadsa tahide pohuajine Huano Baotista inanadsoqqe-manapojari. Najaro imapi ajima najaro: Tahidepa tamine Herode pohua imecote Feripecca amoneje Herodia icajidsa ima tojajaro. Huanopa poccadeni ima mittadsa Herodedsa huati tajari: —Diocca dossenijidsapi timecotecca amoneje tidijidsadsapi bica tejerani -nanaja najari Huano. Najaro ima Herodia mittadsapi Huanodsa huadijaro. Ponicca maqquidsa dosse dosse nadsa tamine Herodepa pocca dodosse tabaqqui idossebaqquidsa Huano dama quinadsa toponi cocoro todsimadsa coro idsimamanajari. <sup>19</sup> Herodiapi Huanodsa jipera tadsapi pohua inanadsoqqe-manahijine tohuini nadsa maqquidsa huati taraha poni attinidsa jehe najaracchahi. <sup>20</sup> Herode cappinadsa: —Huanopa bica tahi. Diocca dosseniji -nanaja nadsapa ecahuahissa tajari. Nadsapa Huanocca marinaja mittadsapa pohuadsa bica taraha ibo tadsapa: —¿Nejecoma onapadseje? -najari. Naraha nama naha Huanocca marinaja mittahijine pohuatohui huahua huahua dsanapojari.

<sup>21</sup> Naraha huada onihidsa tamine Herode pohua tossonahicca huada bacco tadsa ejete inanajaro. Nadsapa jipacquimanahijine huahua inabaqquijari, taminedeni, soldado dossededeni, Carireahuajicca ime jocohuideni, pohuadsa jipacquimanahijine. Nadsapi Herodia najorajaro ponicca ima. <sup>22</sup> Herodia bedenipi dsobi nanijine toqquedsimajaro. Nadsapa tamine Herode, pohua tessedeni tedseje ponicca dsobinaja bica tani qqui toquinadsa, ponijine huatidsemanadsapa dsohuatodsa tamine Herode attia: —Jari jata, ticca huatinaja ohuadsa huati tinaji. Nadsapi ticca huatinaja da onanitohui -najari. <sup>23</sup> —¡Pajissa! Dio nahato tahi. Tia ocamaidsa-jerajaro. Occa dsama arobenitohui huati tinadsa naqui tiadsa da onanitohui -nahi nade tamine Herode atti. <sup>24</sup> Najaro ima mittadsa dsohuato toqquenadsapi imenidsa huati tajaro: —Ami ¿nejecora huati onanijine? -najaro. Nadsapi imeni attinia: —Jari jata, Huano Baotista tatitohui huati tinaji -nani nade. <sup>25</sup> Nadsapi taminehuaji huassinaja toqquedsimanidsa ponicca huatinaja huati tajaro: —Jidapanana Huano Baotista tati parato imehidsa huittidsadsa ohuadsa da ticanajo -nani nade. <sup>26</sup> Nadsapa Herode pohua bodi Huano dsoqquehijine jipera taraha pohua atti tahide: —Dio nahato tahi. Tia ocamaidsa-jerajaro -nanaja napodsa aja pohua tessedeni: —Pajissehe huati tajari -quinahijine tohuini nadsa: —Ohuattissa onananitohui -nahi nade. Nadsapa poni attinidsa jehe najari. <sup>27</sup> Nadsapa pocca dodosse dosse inajari, Huano matto ca ijidsadsa tati dsojo icadsimaninijine. Nadsapa pocca dodosse toponi cocorohuaji toccajari, Huano matto ca ijidsajari. <sup>28</sup> Tati paratodsa ettidsadsa dsojo icadsimanidsapa dsohuatodsa da icanajari. Ponina imenidsa da icaniquimajari. <sup>29</sup> Dsotode Huano pohua huatimadedeni ima mittamanadsapa assiretohui jahijonajari. Ppa idsamanahijine dsojo ininemanadsapa siba odinidsa ibedsamanajari.

*Jeso madija 5 mil quinajarideni inajipabaqquijari*

*Mateo 14.13-23; Roca 9.10-17; Huano 6.1-15*

<sup>30</sup> Nadsama Jeso pocca dodosse tabaqqui dosse inabaqquijojarideni jahiniqquijari. Jesodsa poccadeni benehicca ima huati nanimanajari: —Ima bicani dsati mari icanabaqqui-ridsadija. Ticca deni tojehe iadsa tinanajaroline madija coma tajari naco inanomibaqqui-ridsadija -quinahi nade. <sup>31</sup> Nahidsa pohuadeni madimanahihuaji

madija Jeso tohui quinadsa jahijonana canajari. Madija caji tadsa Jeso, pohua huatimadedeni tedseje dsepedeni ijimanahissa tadsapa jipamanahijine pajiramana-jarahi. Nadsapa: —Jina, madija madide nohuerahihuaji jaijana. Nanidsana jassi inaccana -nahi nade Jeso.

<sup>32</sup> Nama nadsapa Jeso pocca dodosse tabaqqui tedsejedeni todidi tanihuaji jassi quinahijine canoadsa tohuaccamanajari. <sup>33</sup> Naraha madija Jeso toccahi qqui toquinadsapa: —A, Jeso pajamarahihuaji toccahijine -quinajari. Nadsapa madija odsa onihi onihi naridsanicca jai tojabacossadsa Jeso tedsejema bacco toquinapojari. Naraha dsotode Jesopa pohua huatimadedeni tedseje canoadsa bacco najonamanajari. <sup>34</sup> Huana tocanamanadsa Jeso toqquemoradsapa madija domo hueri nahi qqui inabaqquijari. Puhuadenipa pina edede pahuadeni cacahuade jiraha pahuama mamadiri naridsamanajarissa quinajari. Nadsapa Jeso pohua bodidsa: —A, tohuati nahanagguiri nahi -nadsa pahuadenitohui huati cahanari canajari. Nadsapa pocca ima onihi onihi nehe pahuadeni mari icanabaqquijari.

<sup>35</sup> Maji toccadsa pohua huatimadedenipa Jeso pahuadsa huati toquinajari: —Jaho, maji toccahi -quinajari. —Ahuajipa madija madide nohuerahi -quinahi nade.

<sup>36</sup> —Madija dosse tinanibaqquijo. Ahuajipa dsamatapa mitta quinahijine nohuerahi -quinajari. —Aji, odsa huajira tanicca dsamatapa mittade jai tojanina -quinahi nade.

<sup>37</sup> Naraha Jeso attia: —Tiadeni tinajipabaqquimanajo -najari. Naraha pahuadeni attipa: —Taparideni mittade jaijanijinepi dsinero huemani pina 200 denario icanajidsana pajiraraha çiana pahuadeni taparideni mittade jaijanijinerane? -quinahi nade. <sup>38</sup> Nadsapa pahuadenidsa huati tajari: —çNejecoma naha pan ticajimanani? çQqui taridsamanajo! -nahi nade Jeso. Pan, aba qqui toquinadsapa pahuadsa huati nanimanajari: —Pan 5, aba pama napaja -quinahi nade.

<sup>39</sup> Nadsapa Jeso madija huapimadsa huati tajari: —Nani dsero napidsati caji tanidsa tiadenira jassi jassi tineri naridsaji -najari. <sup>40</sup> Nadsapa madija 100 quinaha queriqquidsa jassi tajari. Madija 50 quinaha queriqquidsa jassi tajari. Ohuahadeni naco totoqueriqquiri naridsadsa jassi taridsajari. Huapima nama naridsamanajari.

<sup>41</sup> Nadsapa Jeso pohua dsepedsa pan inacca, aba idsaba nadsapa memehuaji qqui tamacossadsa Diodsa huati tajari: —Jehe, epejeni. Ticca daniji iadsa bica tahi -najari.

Nadsapa Jeso canahatori canajarijine pan, aba najari tohuapidsa icanabobiridsadsapa pohua huatimadedenidsa da inabaqquijari. Nadsapa pahuadenina madija jassi jassi teri najaridenidsa da inabaqqui-ridsamanajari. <sup>42</sup> Nadsapa jipamanadsapa accararidsa-manajari. <sup>43</sup> Jipamanahissa taraha mota tojajari. Pan bobi, aba ime mota inaccaniridsa-manadsapa quiqui 12 naha ijiridsajari. <sup>44</sup> Nadsama pan jipamanajaridenipa maqquideje 5 mil quinajari.

### *Jeso passo tetepi ccajonajaricca ima*

#### *Mateo 14.22-33; Huano 6.16-21*

<sup>45</sup> Nadsapa canahatori canahicca pan jipamanahi nattipa Jeso pohua huatimadedeni coridsa jippehuaji dosse inabaqquijojari: —Jari, canoadsa jai tijedsadsapi tahide odsa panani Besaidahuaji jai tijapoji, onajaro -nahi nade. Naraha Jeso pahuapa ibocajari. Nadsapa madija huapimadsa naco huati tajari: —Epejeni, jai tjanina -nahi nade Jeso. <sup>46</sup> Nadsa jai tojanidsapa Jesopa ssonohuaji denima toqquemorajari, imehi Diodsa huati tahijine. <sup>47</sup> Jeso pohua motta nahi ssonohuaji Diodsa huatide tojadsa cadsomejari. Naraha pohua huatimadedenipa coridsa nocconi ori toquinahi paja naccaraha. <sup>48</sup> Nahidsa Jeso qqui icanamissabaqquijari. Ori ori quinaraha jojodejine canoa quehenacossajaro. Ssiajaricossadsa Jeso toqquedsippanidsapa passo tetepi toccamissajari. Pina ssiqui toccajarissa najari. Pahuadeni natti toccamissajari, pahuadeni inori tossoqquimahitohuiraha. <sup>49</sup> Pahuadeni inorihuaji

qqui toquinanaja passo tetepi ccajonahi qqui toquinadsapa johua johua quinajari: — ¡Tocorime itidija! –quinajari. <sup>50</sup> Pohua huatimadedeni huapima qqui toquinadsapa jabojo quinajari. Nadsapa Jeso: —¡Ticappinamana tejeraji, ohuapi ohua! –nahi nade. <sup>51</sup> Nadsapa canoada toqquedsanidsapa jojode totappajaro. Naraha jabojomana najarijine cappinamanahi paja naccajari. <sup>52</sup> Jeso huatimadedenipa Jeso pocca nahatohue aja pan da inabaquidsa inapajira-ridsabaquihui qqui toquinaporaha bodideni ssamoqquiri najari. Pohnadeni bodi Jeso tahimari mittamanahijine pajiramanahissa tajarajari. Bodidenidsa ahuatora tajaro.

*Jenesarehuaji Jesopa comaquiri najari inanomiridsa-baqquijari*

*Mateo 14.34-36*

<sup>53</sup> Nadsapa Jeso pohua huatimadedeni tedseje coridsa jippehuaji tohuaqquejid-samanajari. Dsama onini Jenesare bacco toquinajari. Huana tocanamanadsapa canoa ssoque icadsanamanadsa jai tojemorajari. <sup>54</sup> Nadsapa jai tojemoradsa nahihuaji madimanajarideni Jeso qqui toquinajari. <sup>55</sup> Nadsapa madija comaquiri najaridenitohui domodeni toccaniridsajari. Jeso ccaridsahihuaji comaquiri najari taborodenima ihiccamissa-baqquimana najari. <sup>56</sup> Jesopa odsa onihihuaji toccadsa, dsotode odsa capamanihuaji toccadsa, odsa pananihuaji toccadsa naco madija pohuatohui bacco bacco nanajonamana najari. Huapima comaquiri najari inanomibaqquihijine pohuadsa eheccajona-baqquimana najari. Pohua tedsejema jahuidsa, boronidsa naco ehequibaridsamana najari. Jesodsa huahua huahua quinajari: —¡Jeso ohua tinanomiji! ¡Ticca etero iponira bara onanijine ahuaji ticcajonaji! –quiquinanajari. Nadsapa pocca etero iponi bara quinajarideni huapimapa tocanomireridsahissa tajari.

## 7

*Jodiodenicca marinajajine Diocca dosseniji huahuattajo tojajaro*

*Mateo 15.1-9*

<sup>1</sup> Nadsapa huada onihidsa odsa panani Jerosarehuajicca jodiodeni marinaja pariseodsa jehe quinajarideni, jodiodenicca marinaja maridedeni tedseje Jesodsa bacco najonamanajari. <sup>2</sup> Najari pohuadenina Jesocca mamari tabaqqui pohuadeni dsepe ssahuarahi jipamanahi qqui toquinajari. Najaropi pohuadenidsa bica tejerani. Pina imasiri inanamanajarossa najaro, quiquinanajari. Aja jodiodeni poccadeni ididenicca marinajadsa iboquiri nadsapa oppina tani quiquinanajari. <sup>3</sup> Jodiodeni huapima, pariseodeni naco poccadeni ididenicca marinaja huapi tehe ecahuajonamanajaro. Najaro marinaja motapi jipamanabote nadsapa pohuadeni dsepe ssahua ssahua quiquinanapo najari. Najaropi obani noppineni jerani. Madija ohuaha aja jodio quejena-jarajarideni tedseje quejemamanajari noppine. <sup>4</sup> Jodiodenipa dadahuaji jahinidsa naco tahide pohuadeni dsepea ssahua quinapodsana jijipamana najari. Poccadeni jijipajinecca huapima pina parato, queneco, panera naqui ssahua ssahua quiquinanajari. Diocca dossenijipi nema nejeraraha jodiodeni poccadeni marinaja huapi tehe Dio Attidsa inaharimanajaro.

<sup>5</sup> Nadsapa pariseodeni, jodiodenicca marinaja maridedeni tedseje Jesocca mamari tabaqqui pohuadeni dsepe ssahuarahi jipamanahi qqui toquinadsapa Jesodsa huati toquinajari: —¿Nejecotohui ticca mamari tabaqqui jodio quejenaraha icca ididenicca marinaja ecahuamana-jerajaro? Ajana, pohuadeni dsepe ssahuarahi jipamanadsapa Diodsa bica tejerani, iadsa naqui oppina tani, ihinanajaro –quinahi nade.

<sup>6</sup> Nadsapa Jeso pohuadenidsa huati tajari: —A, tiadeni naqui Diocca dosseniji nahatoqquiri tiquinaraha tecahuamananissa tejerajaro. Tiadenipi maidsehe ticajimanani. Maittaccadsama Diojine Pohua Atti cacomerabote Isahiapa ticcadeni imassa

nehe dsodo inapojaro. Jidapanana najarossa najarodsa timadimanajaro. Ajana, maittaccadsama Diojine Isahiapa:

“Ajajarideni madijapa ohuadsa: ‘Dio, tiapi bica tinani’ quiquinanaraha pohuadeni bodidenidsa otohui quina-jarahi.

<sup>7</sup> Pohuama ohuadsa jiri jiri quiquinanajari. Pohuadeni maride naco: ‘Dio Atti mari mari inajaro’ quiquinanaraha madijacca marinajara mari mari nanarid-samana najari”

napohui nade Dio.

<sup>8</sup> Ajina, madijacca marinajana tiadenidsa denima bica tadsapi Diocca dossenijipi tinebomanajaro –nahi nade Jeso.

<sup>9</sup> Jeso denima huati tapomajari pohuadenidsa: —Ticcadeni madijacca marinajadsa disseraqquri tiquinadsapi Diocca dosseniji ponima tinanamanajaro. <sup>10</sup> Pina ajjaro imassa najaro Diocca dosseniji Moisesi huati iqqumajaro:

“Ticcadeni abidsa, ticcadeni amidsa tetideni huanacquiri nana. Pohuadenitohui tetideni huanacquiri nadsa attidenidsa iboraqquri tiquinana” napohui nade.

Pohua atti naqui: “Madijapa imehidsa, imenidsa imasiri inanadsapi manaco najaripa dsogquehitohui”

napohui nade Dio Atti, Moisesijine dsodo nanidsa. <sup>11</sup> Naraha tiadenidsapi ima ajima najarona bica tajaro: “Madija imehidsa, imenidsa pohua attipa: ‘Jaho, tiadeni acco ocamabaqquinijineraha ocajjaro huapimapa Diodsa da onahijine onapodsapi tiadeni acco ocamabaqquinijine opajira-jerani’ quina tahi.” <sup>12</sup> Nadsa tettidenipi: “Jehe, madija nama nadsapa epeje, poni, pocca abidsa, pocca amidsa da inejerana” tiquinaraha. <sup>13</sup> Ticcadeni madijacca marinaja tipotemanidenidsa mari mari tatajona-mana najarodsana: “Bica tani” titiquina nadsapi tijinedeni Diocca dosseniji pajissacca huahuattajo tojajaro. Ticcadeni madijacca ima najarossa najaro caji tani –nahi nade Jeso.

### *Tabaccorehe madija bodidsa ahuatomsapi imasiri toja tani*

#### *Mateo 15.10-20*

<sup>14</sup> Dsotodepa Jeso madija pohuahuaaji jahijonahijine tohuideni huahua napomajari. Pohuahuaaji bacco najonamanadsa Jesopa: —Jari, huapima ohuatti titaharibobo canaji, timittamananissa tanijine. <sup>15</sup> Tiadenidsapi jijipa oppina tahicca caji tahi. Madija nama nahicca jipadsapa tettidenipi: “Diodsa bica tejerani, Moisesicca marinajadsa naqui oppina tani” titiquina najaro. Naraha ohuattipi ajima najaro: Huapima itaparipa dappi inadsa ibodidsa tojadsapa imasiri toja-jerani. Naraha ebenodsa huati huati ihinanajarojinena madijadsa imasiri ihinanamana najaro. [ <sup>16</sup> Nadsama teribodeni ticajimanadsapi ohuatti timittamananissa taji, onajaro –nahi nade Jeso. ]

<sup>17</sup> Nadsapa Jeso madija inebobaqquidsapa odsadsa toqquedsimajari. Nahidsa pohua huatimadedeni pohuadsa huati toquinajari: —Ia Maride ¿ticca marinaja nejecoma najaro? –quinahi nade. <sup>18</sup> Nadsapa Jeso attia: —¿Tiadeni naqui ohuatti timittamana-jerajaroqui? Nema nadsapi timittamananissa tanijine tiadeni mari ocanabaqquipomana. Aja itapari huapima dappi inadsapa ibodidsa imasiri toja-jerani. <sup>19</sup> Itaparipa ibodi huahuato nanihuaji toqquedsima-jarahi. Itaparipa idsonedsana totoqquedsima najari. Dsotode miji inadsapa toqqueqqumajari –nahi nade Jeso. (Pohua atti nama nadsapa itapari huapima oppinera tahi, najari.)

<sup>20</sup> Jesopa denima huati tajari: —Naraha madija pohua ajaridsa qqunenajaropi pohua bodi huatodsa pohua ebenojine huati huati tajarijinena imasiri totoja najaro. <sup>21</sup> Ajina, tabaccorehe huapimapi madija pohua bodidsa ahuatomsa pohua todossenidsapa imasiri inanajaro. Najaropi pina madija imasiritohui pohua bodi huatojari, maqquideje tabiraraha amoneje ajade tohuini najari, amoneje tabiraraha

maqquideje najade tohuini najaro, botie tohuini najari, madija inanadsoqquehijine tohuini najari. Najaro ima madija pohua bodidsa ahuatomsapi imasiri toja tani. <sup>22</sup> Tabaccorehe onihi naqui pina madija amoneje cajiraha amoneje onihi ajade tohuini najari, amoneje maqqui cajiraha maqquideje ohuaha najade tohuini najaro, madija ohuaha cajjaricca tohuini najari, ima tabaccora tajaro inananihijine tohuini najari, madija icamaidsabaqquihijine tohuini najari. Najaro ima madija pohua bodidsa ahuatomsapi imasiri toja tani. Tabaccorehe onihi naqui pina pohua cacahuade jipera tadsa huapima ponima tohuini najari, madija deni tojehe acconi bodi huadi tajari, madija tatamasso nahijine tohuini najari, pohua bodi "Ohuana bica onajaro, deni ojani" najari, madide ssamo tadsa maidsehecca imadsa pajissa najari. Najaro ima madija pohua bodidsa ahuatomsapi imasiri toja tani. <sup>23</sup> Najaro tabaccorehe huapima madija pohua bodidsa ahuatomsa pohua bodi totabaccorajari. Najarojinena madija imasiri ihinanamana najaro -nahi nade Jeso.

*Jodio madija jeraraha Jesodsa pajissa najaro*

*Mateo 15.21-28*

<sup>24</sup> Nadsapa nahihuaji mari icanabaqquia jicadsapa Jeso toccajari. Odsa panani onini Tirocca dsamahuaji toccajari. Nahihuajicca odsadsa bacco tadsapa mohuaradsa Jeso toqquedsimajari. —Bacco onani madija motadeni ssamoqquri nana -najari. Naraha pohua bacco nahi ima tojaridsajaro. <sup>25</sup> Naneje amoneje —Jeso ajadsa bacco nahi -quinahi ima mittadsapi pohuatohui toqquedsimajaro. Poni bedeni tocorime cajjararo. Imeni bodinipi: —Ajarina occa ejedeni inanomihijine pajirahi -nadsapi Jeso pohua baccuhuaji poni pitonidsa huittajaro. <sup>26</sup> Poni attinipi: —Jeso, occa ejedenidsa tocorime madidsahi. Dosse tininejo, tonominijine, onajaro -nani nade imeni. Naraha najaro amonejepi jodio jerani. Ponipi dsama Siria arobeni Penisiahujicca madija. <sup>27</sup> Nadsapa Jeso ponidsa huati tajari: —Madija ohuaha jodio quejenajarajari acco ocamabaqquipohuijinepa bica tejerani. Najaro imapi pina madija pocca ejedenidenidsa dsamatapa da inaraha idinidsa pocca ettedsana da inajarissa najaro. Ejedenidenipa tahide jipamanapona, onajaro. Aja Diocca madija jodiodenina acco ocamabaqquipohuijine bica tani -nahi nade Jeso. <sup>28</sup> Nadsapi pohuadsa huati tajaro: —Pajissa ohua Medsede, naraha jijipacca huahuanari dopanidsa ejedenicca dsamatapa tabottodsa ette naco jipajari. Jodio ojajeraraha ohuadsa ticca acco camehe badsira tehe tinanaji, onajaro -nani nade Jesodsa. <sup>29</sup> Nadsapa: —Jehe, tetti nema nadsapi bica tani. Ticcanina. Ticca ejedeni bodinicca tocorimepa toqquenahi -nahi nade Jeso.

<sup>30</sup> Nadsapi toccanijaro. Ponicca odsa bacco tanidsa toqquedsimanidsapi poni bedeni tonominira qqui tajaro. Nadsapi mohuaradsa pori canajaro. Tocorimepa toqquenajari. Nohuerajari.

*Madija huaribo didibote, huati tahijine naco ebene ssamo tajari Jesojine tobicajari*

<sup>31</sup> Jesopa odsa panani Tirodsa joppemajari, odsa panani Sidohuaji toccahijine. Nahi Sidodsa tossoqquima, ccahuajanidsapa dsama arobeni onini Decaporidsa ccaridsajari. Dsotodepa Carireacca coridsahuaji bacco tanijari. <sup>32</sup> Nahi Carireadsana Jesodsa madija huaribo didibote eccajonamanajari. Huati tahijine naco ebene ssamo tajari. Ccaccajonadedeni attidenia: —Jeso, itesse tinanabichijine tidsepedsa pohua bara tajo -quinahi nade. <sup>33</sup> Nadsapa Jeso aja huaribo didibote madija sibema domo huahidsapa iacca-cca nadsa pohua dsepedsa huaribo odini ororo icanajaro. Pohua ebene naqui pohua dsepedsa ppito nadsa ebene bara inajari. <sup>34</sup> Nadsama Jeso memehuaji qqui tamacossanaja pohua ssa tocanacossadsa pohua attidsa huati tajari: —¡Eppatta! -najari. (Najaro ettidsapi: —¡Teribo ssire-re naji! -najari.) <sup>35</sup> Naneje pohua huaribo ssire-re najari. Pohua ebene naqui tobicajaro. Nadsapa



huati tahi tobicajari. <sup>36</sup> Nadsapa pohuadsa, pohua tessedenidsa naco Jeso huati tajari: —Ajjaro imapi tecomamanana –najari. Naraha amadsati pohua tahimari ecomeraridsa-manajaro. Jeso attipa: —Tecomamanaji, onapa –napomaraha joma quina-jarajari. <sup>37</sup> Aja, huapima jabojo quinaraha huatidsemanadsa attidenipa: —A, ima deni tojanijinecca qqui inani –quinajari. —Jesocca nahatohuepi huapima bica tani. Ajana, huaribo didi taraha pohuajine huaribo tobicadsapa tohuatti mittajari. Atti cappiraraha pohuajine atti cajijari –quinahi nade.

## 8

### *Jeso madija 4 mil quinajarideni inajipabaquijari*

#### *Mateo 15.32-39*

<sup>1</sup> Nadsapi huada onihidsa naqui madija huapima Jesodsa queriqquipomajari. Madija huapi taraha jipamanahijine dsamatapa jicajari. Najaria aja Jeso pohua huatimadedeni huahua inabaquidsa pohuadenidsa huati tajari: <sup>2</sup> —Madijadsa ohuati cahanariri canani. Huada 3 nehe ohuadsa jahiridsadsapa pohuadeni tapari jicajari. <sup>3</sup> Naraha jipamanahijine poccadeni odsahuaji dosse onanibaquidsapa pemi huatiacossaja camarana. Motadenipa dsamarideni huaji tani –nahi nade Jeso.

<sup>4</sup> Naraha Jeso huatimadedeni attidenia: —Naraha iapi madija madide nohuerahi-huaji iqueriqquidsapi ¿nejecoma inadsa madija inajipabaquihijine? –quinahi nade.

<sup>5</sup> Nadsapa pohuadenidsa huati tajari: —¿Nejecoma naha pan ticajimanani? –nahi nade. Naraha: —Pan 7 naha icajini –quinahi nade.

<sup>6</sup> Nadsapa Jeso madijadsa: —Huapima jassi tinaridsaji –nahi nade. Nadsapa Jeso pan 7 naha pohua dsepedsa inaccadsa Diodsa huati tajari: —Jehe Abi Dio, epejeni, ticca daniji iadsa bica tahi –nadsapa pan icanabobiridsajari. Icanabobiridsadsapa pohua huatimadedenidsa da inabaquijari. Pohuadenina madija huapimadsa da inabaquid-ridsamanajari. <sup>7</sup> Aba bedi naco pamaha cajimanajari. Najari naco idsaba nadsa Jeso Diodsa huati tapomajari: —Jehe Abi Dio, epejeni, ticca daniji iadsa bica tahi –nadsapa idossebaquijari: —Aba naco da tinabaquimanajo –nahi nade. <sup>8</sup> Nadsapa Jeso canahatori canajarijine pan, aba najari tohuapidsa madija huapima jipamanadsapa accararidsa-manajari. Jipamanahissa taraha mota tojajari. Pan bobi, aba ime mota inaccaniridsa-manadsapa quiqui 7 naha ijiridsajari nade. <sup>9</sup> Nadsa madija jipamanajaridenipa 4 mil quinajari. Jipamanaha jicadsapa Jeso dosse inanibaquijari nade. <sup>10</sup> Nadsapa Jeso pohua huatimadedeni tedseje canoadsa jai tojedsajari. Coridsa jippehuaji tohuaccamanadsapa dsama Daomanotahuajina bacco toquinajari.

### *Pariseodeni: —Jeso canahatori canahi qqui inana –quinajari*

#### *Mateo 16.1-4; Roca 12.54-56*

<sup>11</sup> Jesopa coridsa jippehuaji bacco nanipomadsa nahicca Isaraeri potemahi jodi-odeni mota marinaja pariseodsa jehe quinajaridenipa pohua qquide jahionajari. Jesodsa bacco quinadsapa pohua tedseje ahuaaji huati ahuaaji huati quinajari. Pohuadeni bodipa: —Jeso nattome inana, pocca ima tossamonijine –quinadsapa Jesodsa huati toquinajari: —Jeso, pajissa Diocca dacorehe ticajidsapi memehuaajicca nahatohue bicabote ahuaato tinanaji. Qqui inana, inajaro –quinahi nade. <sup>12</sup> Nadsapa Jeso pohua bodi tonacasserahi nadsa jadsirema pohua ssa tocanacossadsa huati tajari: —¿Nejecotohui aja jidapana madija madimanajaridenipa ocanahatoriri cananijine tohuira huati toquinajari? Pajissara tiadenidsa huati onajaro: Jidapana madimana-jaridenidsa occa nahatohue onahatona onejerani –nahi nade Jeso. <sup>13</sup> Nadsapa inebobaquidsa canoadsa toqquedsanipomadsapa pocca dodosse tabaqqui tedseje jippehuaji jai tojajari nade.

—*Paji, jodiodenicca marinaja onini pariseo, tamine Herodecca ima naqui tiadenidsa toja-jerana -najari Jeso*

*Mateo 16.5-12; Roca 12.1*

<sup>14</sup> Coridsa jippehuaji jai tojaraha jipamanahijine poccadeni dsamatapa huatideni ajamamanadsapa dsojo quina-jarahi. Pohuadenipa pan ojaria nahi canoadsa cajimanageraha huapimadsa pajira-jarahi. <sup>15</sup> Nadsama nahi canoadsa jassi dsadsa Jeso pohuadenidsa huati tajari: —Tetideni huatoji. Jodiodenicca marinaja onini pariseo, aji tamine Herodecca ima naqui pina pan ssaja tahijine quequejema tahimarissa najaro. Paji, najaro tiadenidsa toja-jeraniijine tiadenipi dacoco tijiraji, onajaro -nahi nade Jeso. <sup>16</sup> Pohua atti nama nadsapa pohua huatimadedeni pohuadenira ojidsa huati tocanirere canajari: —¿Nejecotohui pohua atti nama najari? Aji ijipanijine pan icappirajarocca huati tajarirana -quinajari. <sup>17</sup> Naraha Jesopa pohuadeni bodi nahato tajari: —¿Nejecotohui pan ticappiramananicca imadsara imahaha ticanajaro? ¿Nejecoma nadsa ticahatteranijine? ¿Nejecoma nadsa occa marinaja timittamananijine? ¿Tibodideni najoqquri najarorane? <sup>18</sup> Tinoccodeni ticajimanageraha ¿qqui tiquinejerajaroqui? Teribodeni naqui ticajimanageraha ¿timittamananagerajaroqui? Tinoccodenidsa qqui tiquinaporaha ¿tetideni ajimama canajarorane? <sup>19</sup> Madija 5 mil quinaraha pan 5 naha dside onariridsadsa jiparidsamanajari. Motapa quiqui ijiridsahi ¿nejecoma naha tidiridsamanatta? -najari. Nadsapa: —Quiqui 12 nade -quinajari. <sup>20</sup> Nadsapa Jeso: —Aja madija 4 mil quinaraha pan 7 naha dside onariridsadsa jiparidsamanajari. Motapa quiqui ijiridsahi ¿nejecoma naha tidiridsamanatta? -najari. Nadsapa: —Quiqui 7 nade -quinajari pohua huatimadedeni. <sup>21</sup> Nadsapa pohuadenidsa Jeso attipa: —Pan ijipanijine ocanahatoriri canani opajirani. Naraha pan ticappiramananicca ima huati onejerapa. ¿Ticahatteranageraccajaroqui? -nahi nade Jeso.

*Nocco siri Jesodsa eccajonamanadsa nocco ssire inanajari*

<sup>22</sup> Nadsapa Jeso pohua huatimadedeni tedseje odsa panani Besaidahuaji bacco toquinajari. Nahicca madijapa Jesodsa nocco siri eccajonamanadsa attidenipa: —Jeso ¿ettidsa jipa tinaqui? Itesse nocco bara tajo, inajaro -quinahi nade. <sup>23</sup> Nadsapa Jeso nocco siri dsepedsa dama inadsa odsa panani huapihuaji iaccajari. Nadsapa pohua nassopedsa nocco siri nocco ppaja inanajari. Nadsana bara inadsa pohuadsa huati tajari: —¿Nija, tinocco tohuatoqui? -nahi nade. <sup>24</sup> Nadsapa pohua nocco ssire-re nadsapa: —Jehe, madija qqui onabaqquiraha pohuadenipa pina ahua domoni ccaridsajarossa quinahi -nahi nade nocco siri.

<sup>25</sup> Nadsapa nocco bara inapomadsapa nocco tohuatonissa tajaro. Huapima qqui taridsahissa tajari. <sup>26</sup> Nadsapa dosse inanijari pocca odsahuaji: —Jehe, ticca odsahuaji ticcaniji. Naraha odsa pananihuajipi tiqquedsimani-jeraccaji -nahi nade Jeso.

*—Jesopa Cristo-Mesia -najari Pedro*

*Mateo 16.13-20; Roca 9.18-21*

<sup>27</sup> Nocco siri tonomihi dsotodepa Jeso pohua huatimadedeni tedseje jai tojajari. Odsa panani Sesarea de Piripo jahuihuaji jai tojadsapa nanihuajicca odsa capamema najaro onihidsa onihidsa jahiridsajari. Nadsa jahui jai tojadsa Jesopa pohua huatimadedenidsa huati tajari: —Madija otahimari huati huati nanaridsamana nadsapa ohuadsa attideni ¿nejecoma nejecoma quiquinanahi? -najari Jeso.

<sup>28</sup> Naraha pohuadeni attipa: —Tiadsa madija motapa: “Huano Baotista tijani” quiquinanajari. Ohuahadenipa: “Maittaccadsamacca Dio Atti cacomerabote Eria tijani” quiquinanajari. Ohuahadeni naco: “Maittaccadsamacca Dio Atti cacomerabote ohuaha tijani” quiquinanajari -quinahi nade Jeso huatimadedeni attidenipa.

<sup>29</sup> Nadsapa Jeso pohuadenidsa huati tapomajari: —Naraha tiadenidsapi ¿nejecojari ojani? —nahi nade. Nadsapa manaco Pedro huati tajari: —Tiapi Cristo-Mesia tijani —najari.

<sup>30</sup> Nadsapa Jeso pohua attipa: —Jehe, bica tani. Naraha occa imapi madija ohuahadenidsa tecomamanaccana —nahi nade.

*Jesopa pohua dsoqquehicca ima huati tapojari*  
*Mateo 16.21-28; Roca 9.22-27*

<sup>31</sup> Jesopa pohua huatimadedeni mari icanabaqquidsapa ajama najari: —Aji ohuapi Madija Bedi ojajaroa nidsa dsotode najidsohue imeni ocasserani ohuanitohui. Jodiodeni ime jocohuideni, dada toqquimade taminedeni, jodiodenicca marinaja maridedeni quinajaridenipa ohua ettajomananitohui. Nadsapi ohua inanadsoqque-mananitohui. Naraha ohua ppa idsamanaraha huada huatinimade tojari nadsapi Abi Dio ohua nahatonihitohui —nahi nade Jeso.

<sup>32</sup> Jeso pohua tedsejemacca ima huati tadsa ahuato tajaro. Naraha Pedroa Jeso iacca-cca nadsa huati tajari: —Jidacca ima huati tinajaro ticca ima nema najaro imapi huati tina tejeraji —nahi nade Pedro. <sup>33</sup> Naraha Jeso tahide huajanidsa pohua huatimadedeni icatabaqqui nadsa Pedroa huati tajari: —¡Paji, otedsejemapi! Ohua teccocco tejeraji, onajaro. Tettipi pina maidsehe jinede Satana attissa nani. Tiapi Dio jipa tahicca ssamo tinani. Madija tohuini quinajariccana nahato tinajaro —nahi nade Jeso.

<sup>34</sup> Nadsapa Jeso denima mari icanabaqquihijine madija huapima, pohua huatimadedenima huahua inabaqquijari. Pohua attipa: —Aji “Jesocca madija iquejenana” tiquinadsapi tiadeni tohuini tiquinanicca tohui tetideni ajimamanaji. Ohuadsara disseraqquri tiquinaji. Madija tiadenidsa: “Ahua porimacossanidsa tidsoqqueji” quinadsa naco: “Jehe, odsoqqueni bica tani. Jeso onebo-jarahi” titidsanapomana nana, onajaro. <sup>35</sup> Tiadenipi ticcadeni madie ohuadsa teccoramanadsapi otahimari madija tocassiejerahijinecca maride tiquejenadsa naqui madija tiadeni tonajicabaqqui-manaraha camittehe jiquejeranicca ticajimand-sanaponitohui. Naraha madija ohuaha pocca madie ohuadsa acco tadsa ajijaro namidsa madi-dsanapohuijine tohuinira nadsapa dsoqquehitohui. Dsoqquedsapa camittehe jiquejeranicca caji-jarahitohui —nahi nade Jeso atti. <sup>36</sup> —Madija naco ajijaro namicca biquehe tohuini madidsa, ajijaro dsamacca ima deni tojanicca tohuini madidsa naco huapima pohuadsa tojaraha Diotohui najaradsapa nidsa pohua dsoqquedsa jororoni jiquejeranihuaji dsori tajarahitohui. Nadsapa pohua cajjaricca huapima ponima tojanitohui. <sup>37</sup> Pohuapa pohua cajjariccadsa camittehe jiquejeranicca mitta inanijine ssamo tani. <sup>38</sup> Aja jidapana madimanajarideni Dio Atti inebomanadsa imasiri ihinanamana najaro. Najarideni noppine madija cappinamanadsapa: “Jesocca madija ojajerani” quina tahi. Occa marinajadsa naco: “Omittana onejerani” quina tahi. Nama quinadsapa manaco ohuatti pohuadenidsa: “Occa madija tiquejena-jerani” onanitohui. Ohuapi Madija Bedi ojajaroa nidsarانبote ajijaro namidsa occaronapomadsapi occa Abi Dio ssiejenema, pocca dodosse tabaqqui memehujicca tedseje occaronapomanitohui. Nadsana: “Onocco jidsa tani pohuadenidsa” onanitohui —nahi nade Jeso.

## 9

*Jeso assire tojidsa, jidseremani najari*  
*Mateo 17.1-13; Roca 9.28-36*

<sup>1</sup> Jesopa pohuadsa queriqquimanajaridenidsa denima huati tajari: —Ohuapi pajissara tiadenidsa huati onajaro. Ajidsa tidomodeni huajaro motadenipi

tidsoqquemana-jeraccadsama Diocca cacahuehe dacorehema ccajonani qqui tiquinanitohui -nahi nade.

<sup>2</sup> Nadsapa Jeso najaro ima huati tahi nattini huada 6 nadsa ssonohuaji toqquemoradsapa Pedro, Satiaco, Huano quinajaridenira iaqquemorabaqquijari. Jai tojemoradsapa ssono tetepihuaji bacco tomoramanajari. Nahidsa qqui toquinanaja Jeso pano todsibehijaro. <sup>3</sup> Pocca etero naqui amadsati todsibehijaro, nopo tajaro. Najaro noponipi madija ssamoqquiri nahi. Madija iapi etero ssabo ssabo inaraha ijine najarossa nanijine pajira-jerani. <sup>4</sup> Nadsapa qqui toquinanaja Eria, Moisesi tedseje Jesodsa ahuatomanadsa imahaha canajari. Pohuadenipa maittaccadsamacca Dio Atti cacomeraqquiri najarideni Jesohuaji ahuatoma-manajari.

<sup>5-6</sup> Nadsapa Pedrodeni cappinamanajari. Naraha Pedro pohua bodidsa: —¿Nejecora huati onanijine? -nanaja pohuama pohua atti Jesodsa: —Ia Maride, iapi ajidsa iquejenadsa bica tani. Ticcadeni odsa huahuaqquide 3 canehe inahatona. Nadsapi tiadsa, Moisesidsa, Eriadsa cananijine -nahi nade Pedro. <sup>7</sup> Naraha amadsati pohuadeni tetepihuaji essen i ccaronajaro. Ccaronadsapi pohuadenidsa ijihuaajanijaro. Nadsapa nahi essen bodidsa atti qquenajaro: —Ajajaripa occa Ejedeni. Pohuadsa ohuati huana tajaro. Pohua atti timittamananissa taji -nahi nade Dio. <sup>8</sup> Nanaja qqui toquinaraha Jesodsa madija ohuahapa domo hua-jarahi. Pohua motta hua canajari.

<sup>9</sup> Nadsapa ssonohuaji jahidsippanidsa Jeso pohuadenidsa huati tajari: —Aji ssono tetepidsa qqui tiquinajarocca imapi tecomamanaccana. Ohuapi Madija Bedi ojajaropi nidsa odsoqqueni nattini onahatonidsana najaro ima tecomeramananijine bica tani -nahi nade Jeso. <sup>10</sup> Pohua atti nama nadsapa madija ohuahadsa huati toquina-jararaha pohuadenira imahaha canajari: —¿Nejecotohuati huati tajari? Pohua attipa: “Onahatoninitohui” naha -quinahi nade.

<sup>11</sup> Nadsapa Jesodsa huati toquinajari: —¿Nejecotohuati jodiodenicca marinaja maridedeni attipa: “Cristo-Mesia ccajona-jaraccadsama Dio Atti cacomerabote Eriana tahide ccanipohuitohui” quiquinanajari? -quinahi nade pohua huatimadedeni.

<sup>12</sup> Nama quinadsapa manaco Jeso pohuadenidsa: —Pajissa, tahidepa Eria ccanipohuitohui, ima huapima icattemaridsaponijine. Naraha ohua Madija Bedi otahimaripi Djoline Pohua Atti cacomeraqquiri najarideni dsodo quinapojaro. Najaroa aji nanajidso ojadisapi ocasserani ohuanitohui. Madija naco ohua jaja icanamananitohui -nahi nade Jeso. <sup>13</sup> —Naraha ohuattipi: Eriapa ccanipode, onajaro. Aja Eria dsoquejari ccanipo-jararaha madija ohuaha pina pohuassa najari ccajonadsa ima icattemaridsapode. Naraha nacasserehe pohuadsa inanamanade. Najaro ima pohuadsa tojajaropi maittaccadsama Dio Atti dsodo napojarossa najaro -nahi nade Jeso.

*Ejedeni bodidsa tocorime madidsaraha Jeso dosse ininejari*

*Mateo 17.14-20; Roca 9.37-43*

<sup>14</sup> Nadsapa Jeso, Huano, Satiaco, Pedro quinajarideni Jeso pohua huatimade mota madimanahihuaji bacco dsippanimanabote nadsa qqui toquinajari. Puhuadeni tesse madimanahidsa madija huapi taha toqueriqqui najari. Nahidsapa jodiodenicca marinaja maridedeni Jesocca madija tedseje ahuaaji huati ahuaaji huati quinajari.

<sup>15</sup> Naraha Jeso bacco nanihi qqui toquinadsa huatidsemanajari: —A, Jeso bacco nanihi -quinadsapa pohuadsa nija quinahijine pohuahuaaji domo toqquejidsajari.

<sup>16</sup> Nadsapa Jeso pohuadenidsa huati tajari: —¿Nija, nejecotohuati ahuaaji huati ahuaaji huati tiquinajaroneje? -nahi nade. <sup>17</sup> Nahidsa madija ojaría Jesodsa huati tajari: —Ohua Maride, occa ejedeni tiadsa ohuaccaronajaripa. Pohua bodidsa tocorime madidsajari. Najarijine atti cappirajari. <sup>18</sup> Pohua dama inadsa jadsirema cco inacosadsapa namidsa edima bohua nadsapa pohua ajari ssabojene tocca tocca najari, ino

ccado-do-do najari, assirema ccara-ra ccara-ra najari. Occa ejedeni nama nama nadsa tetimadedenidsa huati onajaropa: “Occa ejedeni pohua bodicca dosse tininemanajo” onaraha ssamoqquiri napaja -nahi nade imehi atti. <sup>19</sup> Nadsapa Jesoa: —Jaho, madija huapima Diodsa jehe tiquinanissa tejerani. Tiadeni mari mari ohocanabaqqui naraha ¿nejecoma nadsa ticahatterapadseje? Ticcadeni jeheniji pajiranissa tejeradsapi ohuadsa ocassera taraha ¿nema nehe onahana-dsanaponijinequi? -nanaja: —¡Jari, ticca ejedeni ohuadsa teccajonajo! -nahi nade Jeso.

<sup>20</sup> Nama nadsapa pohuahuaaji ejedeni eccajonamanajari. Naraha tocorime Jeso qqui tadsapa ejedeni quidsa inanajari. Namidsa tohuedimajari. Dehue naridsadsapa ajari ssabojene toccajari. <sup>21</sup> Nadsapa coma tajari imehidsa Jeso huati tajari: —¿Pohua coma tahicca abadsico nejecoma canahi? -najari. Naraha imehi attipa: —Badsira tadsamade -nahi nade. <sup>22</sup> —Huajijiradsa quidsa inanadsapa dsippodsa naco ihinassonidsana najari. Passodsa naco ihinassonippa nanaja najari, inanadsoqquehijine. Nadsapi Jeso tiana nahato tinanitide. Iadsa teti huana taji, ia acco ticamabaqquinijine -nahi nade Jesodsa. <sup>23</sup> Naraha Jesopa: —Jaho, tettihi ohuadsa: “Tiana nahato tinanitide” tajaro nema tejeraji. Madijapa pohua bodi Diodsa jehe nahissa tadsapa nahato tajari: “Diopa ima huapima inananiijine pajirahi” najari -nahi nade Jeso. <sup>24</sup> Nadsapa imehia atti mohui tadsa huati tajari: —¡Jehe, Diopa pajirahi! onajaro. Naraha obodi acco ticamaji, occa jeheniji todacorani nanijine -nahi nade.

<sup>25</sup> Nadsapa Jeso qqui tanaja madija pohuadsa queriqquijonahi tohuapihi nahi qqui tadsapa tocorime dosse ininejari. Pohua attipa: —Tocorime, tohuaribo sibehe totonanade, tohuebeno totonassamode, tia dosse omajaro. ¡Ejedeni tinebojo! ¡Tiqquenadsapi tiqquedsimanipoma-jeraji, onajaro! -nahi nade Jeso. <sup>26</sup> Nadsapa tocorime johua najari. Pohuajine ejedeni huatiacossadsa dari-ri-ri nadsapa qque-najari. Nadsapa ejedeni pina huatiajarissa naha ponajari. Nama nadsapa: —Huatiahi -quinajari nade. <sup>27</sup> Naraha Jeso ejedeni dsepedsa dama inadsapa nomi taha inatehema najari.

<sup>28</sup> Nadsa dsotode Jeso odsahuaji toqquedsimanidsapa pohua huatimadedeni motaha: —¿Nejecotohui iaha ajari ejedeni bodicca dosse ininehijine ipajira-jerapa? -quinajari. <sup>29</sup> Nadsapa Jeso attia: —Nama nahicca dosse tininemanahijinepa Diodsa huati tiquinadsana toqquena tahi -nahi nade Jeso.

*Jesopa pohua dsoqquehicca ima huati tapomajari*

*Mateo 17.22-23; Roca 9.43-45*

<sup>30</sup> Nadsama nahidsa nebomanadsapa jai tojanijari. Dsama arobeni Carireahuaji jai tojeqquimajari. Naraha Jesopa pohua toqqueqquimahi madija nahatoqquiri nahijine jipera tadsa pohua cacomadsa toqqueqquimajari. <sup>31</sup> Aja Jeso nema najaripa pohua huatimadedeni pohuadenira maride dsepe ijihijine. Pohua attipa: —Ohuapi Madija Bedi ojajaroa nidsa dsotode madija ojaría ohua ccacoradsapa madija dsepedenidsa ojadapi ohua inanadsoqque-mananitohui. Ohua ppa idsamanaraha huada huatinimade tojari nadsapi Abi Dio ohua nahatonihitohui -nahi nade Jeso.

<sup>32</sup> Naraha pohuadenipa pocca marinaja mittamanahissa tajarajari. —¿Nejecoma tajaro? -quinahitohuiraha cappinamanadsapa Jesodsa huati toquina-jarajari.

*—¿Nejecojarina deni tojajari? -quinajari*

*Mateo 18.1-5; Roca 9.46-48*

<sup>33-34</sup> Nadsapa Jeso pohua huatimadedeni tedseje odsa panani Capernaohuajicca jahui jai tojanidsa Jeso huatimade pohuadenira imahaha tocananijari: —Aji ia huapimapi ¿nejecojarina deni tojajari? -tanimanajari. Odsadsa bacco tanimanadsapa jai tojedsimanijari. Nadsapa Jeso pohua huatimadedeni huati icanabaqquijari: —¿Nejeco imara jahuidsá imahaha ticananijaroneje? -nahi nade. Naraha pohuadeni



bodipa: —Jeso icca imadsa jipera tahitide -quinadsapa ecomeramana-jerani. Tocadidire najari. <sup>35</sup> Nadsapa Jeso huittaridsa pohua huatimade 12 quinajarideni huahua inabaqquidsapa pohuadenidsa huati tajari. Pohua attipa: —Madijapa: “Ohuana deni ojani” najaripa Diodsa bica tajarahi. Madijapa: “Ohuapi ajimani ojani” najarina Diodsa bica tajari. Najaripa madija huapimadsa acco camade dissera tadsapa najarina Diodsa bica tajari. Aji pocca ima bica tadsapi pocca deni tojehe pajissacca ahuato tajaropaji -nahi nade Jeso.

<sup>36</sup> Ejedeni huahua inadsa pohua huatimadedeni jassi nahuajanihi nocconidsa inahua najari. Nadsapa idi, dsojo ijidsadsa pohua huatimadedeni mari icanabaqquijari. <sup>37</sup> Pohua attipa: —Ajajari ejedenissa najaridsa tetideni huanaqquri nadsapi ohuadsa naqui tetideni huanaqquri najaro. Ohuadsa tetideni huanaqquri nadsapi ohua Cadossede Abi Diodsa naqui tetideni huanaqquri najaro -nahi nade Jeso.

—*Madija iadsa huadi tajaradsapa ia acco camajari -najari Jeso*

*Mateo 10.42; Roca 9.49-50*

<sup>38</sup> Nadsapa Huano Jesodsa huati tajari: —Ohua Maride, madija ohuaha tia oni hua nadsa madija bodicca tocorime dosse ininehi qqui inade. Naraha pohuapa iadsa ccaridsa-jaradsa pohuadsa: “Epeje taji. Poni” inade -nahi nade Huano.

<sup>39</sup> Naraha Jeso attipa: —Pohuadsa poni tiquinejeraji. Madija ohua oni hua nadsa canahatoriri canadsapa nidsa dsotode ohuadsa atti tabaccora tajarahitohui. <sup>40</sup> Madija nama najaripa iadsa huadi tajaradsa ia acco camade tojajari -nahi nade Jeso.

<sup>41</sup> —Pajissara tiadenidsa huati onajaro: Aji ohuadsa tiquejenadsapi madijadenipa: “Jehe, pohuadenipa Cristo-Mesiacca madija, pohuadenidsa accora onana” quinadsa tiadenidsa da quinadsa bica tani. Passo dse tiquinanijine da icanamanadsa naqui manaco nidsaranibote Dio pocca biquehe pohuadenidsa inananitohui -nahi nade Jeso.

*Imasiri tinanadsapi oppina tanihuaji ticcanitohui*

*Mateo 5.29-30; 18.6-9; Roca 17.1-2*

<sup>42</sup> Jesopa denima huati huati tajari: —Nadsama madija ojariajine ohuadsa jehe quinajari imasiri inamanadsapi pohuadsa najidsohue oppina tanicca ssonarinitohui. Ejedeni ohuadsa jehe quinajarideni naco madija imasiri mamaridejine imasiri tocahatteradsapa aja imasiri mamaride pohuadsa najidsohue oppina tanicca ssonarinitohui. Pina ajijaro imassa najaro: Siba ccanajabote pohua mattodsa ssoque dsanadsa passo imenihuaji je tahijine cco todsippadsapa oppina taraha najidsohue denima oppina tanicca pohuadsa ssonarinitohui.

<sup>43-44</sup> —Nadsama imasiri tinana-jeraniijinepi tibodi daco tijiradsa poni taji. Poni tejeradsapi ima oppina tanicca tiadsa ssonarinitohui. Pina tidsepedsa imasiri tinanabote naraha daco tijiradsa poni taji. Nema tadsapi pina tidsepe ca ticajidsajarossa najaro. Tidsepe cajarie amossi canaraha Diocca cacahuehedsa timadidsapi tetidsenitohui. Naraha imasiridsa dissera tinadsapi pina tidsepe capamehe ticajijarossa naraha jororoni jiquejeranihuaji ticcanitohui. Najaro jororonipi ohuihuira tani.

<sup>45-46</sup> —Nadsama imasiri caji tanihuaji ticcanijine naqui tohuini taraha poni taji. Nema tadsapi pina temori ca ticajidsajarossa najaro. Temori cajariraha Diocca cacahuehedsa timadidsapi tetidsenitohui. Naraha imasiridsa dissera tinadsapi pina temori capamehe ticajijarossa naraha jororoni jiquejeranihuaji tia coro todsimahitohui.

<sup>47</sup> —Nadsama tinocodsas naqui tohuini tanicca qqui tinadsa imasiri tinananiijine tohuini taraha daco tijiradsa poni taji. Nema tadsapi pina tinocco huari, joca, jeo, coro tinajarossa najaro. Tinocco ojariraha Diocca cacahuehedsa timadidsapi tetidsenitohui. Naraha imasiridsa dissera tinadsapi pina tinocco pamehe ticajijarossa naraha jororoni jiquejeranihuaji tia coro todsimahitohui. <sup>48</sup> Nanihuaji ocasserani

tedsanaponitohui. Timeqquene ssari-ri cadsanaponitohui. Jororoni ohuihuira taniccadsa time ca dsanaponitohui.

<sup>49</sup> —Aji tiadeni huapima Djojine tibodideni tohuirenijinepi pina sahojine bani jadsijarajarissa nanitohui. Pina dsippo jororonijine bani cadsapa jadsijarajarissa nanitohui. <sup>50</sup> Sahopi bica tani. Banidsa huira nadsapi jadsijarahi. Naraha saho ajiboni tomossidsapi tomajidera tani, icca bani naco totabaccora tahi. Ajibo tapomanijine ssamo tani. Tiadenidsa ohuatti pina sahossa onanajaro. Ohuatti ticajimanana, imasiri tinanamana-jeranijine, madija ohuahadeni tinanabicabaqquimanahijine. Titedsedeni tedseje ticajonerara canaji, onajaro –nahi nade Jeso.

## 10

*Jesopa amoneje nebo nebocca ima mari icanabaqquijari*

*Mateo 19.1-12; Roca 16.18*

<sup>1</sup> Jeso odsa panani Capernaodsa nebotsapa dsama arobeni Jodeahuaji toccajari. Hueni Jordao jippehuaji toccadsapa dsama arobeni Pereahuaji bacco tajari. Nahidsapa madija sibema pohnadsa queriqquipomadsapa mari icanabaqquijari. Jesopa nama nanaridsa najari. <sup>2</sup> Nahidsapa jodiodeni mota marinaja pariseodsa jehe quinajarideni Jesodsa jiperacquiri nadsa pocca marinaja inassamomananijine ima najoramanaajari. Jesodsa tohuajiressimanadsapa pohnadsa huati toquinajari: —Aja ¿maqquideje pocca amoneje inebotsapi pohnadsa ima nohueraqui? –quinahi nade.

<sup>3</sup> Nadsapa Jeso attia: —Jari, tecomeramanaji: Maittaccadsama Moisesipa najaro ima mari icanabaqquipojaride. Pocca marinaja ¿nejecoma natte? –nahi nade. <sup>4</sup> Nadsapa pariseodeni attidenipa: —Jehe Moisesicca marinajapi ajima nade: “Maqquidejepa pocca amoneje inebonijinepi nebohuecca papeo dsodo inadsa ponidsa da inadsa inebotsapi pohnadsa ima nohuerani” nadija –quinahi nade.

<sup>5</sup> Nadsapa Jeso huati tajari: —Jehe naraha najaropi maittaccadsama ticcadeni idideni huaribodeni sibaqquiri nadsa nebohue tohui quinadsapa Moisesi najaro marinaja pohnadenidsa dsodo inajarode. <sup>6</sup> Naraha Dio dsama inahatoponipi amoneje nebo nebocca ima nohueraccade. Djojine madija toquejenapodsapa ima ajima najaro: “Maqquideje amoneje tadsajani inahatobaqquijari. <sup>7</sup> Nema najarojinea maqquideje pohua bedimenidsa tojadsapa imehi imenidenidsa nebo, pohnadenira madimanaajari. <sup>8</sup> Nadsapa pamaraha pina ojarijarissa quinajari”

najaro Dio Atti dsodo nanidsa. Nadsapa pajissa assiredeni pamaraha cacajiredsapa Djojine pina ojarijarissa dsanapomanahijine. <sup>9</sup> Nadsama Djojine pina ojarijarissa quinaraha caneboredsapa bica tejerani. Madija ohuaha atti noppine caneboredsa naco bica tejerani –nahi nade Jeso.

<sup>10</sup> Nadsapa Jeso pohua huatimadedeni tedseje odsahuaji jahinipomadsa odsa bodihuaji jassi dsadsapa Jesodsa huati toquinajari: —¿Ticca marinaja nejecoma najaro? –quinahi nade. <sup>11</sup> Nadsapa Jeso pohnadenidsa ima ecomerajaro: —Jehe maqquideje pocca amoneje inebotsa amoneje onihira icajidsapi pocca amoneje tahide inebojarodsa imasiri inanajaro. Nama nadsapa Diocca dosseniji ecahuajerajaro. <sup>12</sup> Amoneje naqui ponicca maqqui inebotsa ohuahara icajidsapa ponicca maqqui tahide inebojaridsa imasiri inanajaro. Nema nadsapi Diocca dosseniji ecahuajerajaro –nahi nade Jeso.

*Jesopa: —Abi, ticca biquehe ejedenidsa tinanaji –najari*

*Mateo 19.13-15; Roca 18.15-17*

<sup>13</sup> Nadsapa madija poccadeni ejedeni Jesodsa eccajonabaqquimanajari —Jeso tatideni bara inabaqquidsa Diodsa huati tahijine –quinadsa. Naraha Jeso huatimadedeni attidenia: —¡Ejedenipa pohua! ¡Jesohuaji teccajonabaqquimana tajarajo! –quinahi nade. <sup>14</sup> Naraha Jesopa pohua huatimadedeni ejedeni tedsejemadeni

huacossamanahi qq̄ui tadsapa huadijari. —¡Poni, nema tiquinejeraji! Pohuadeni jahijonana, onajaro. Eccajonabaqq̄ui-manahijine tecossamana tejeraji. Madijapa pina ajajari ejedenidenissa quinajarina Diocca cacahueheda toquejenahitohui.<sup>15</sup> Pajissara tiadenidsa huati onana: Madijapa pohua bodicca jeheniji pina ejedenicca jehenijissa najaradsapa Diocca cacahueheda toja-jarahitohui –nahi nade Jeso.

<sup>16</sup> Nadsapa Jeso ejedeni idi, dsojo ijidsadsa tatidsa bara nadsa huati tajari: —Abi Dio, ticca biquehe ajajari ejedenidsa tinanaji, onajaro –nahi nade. Ejedeni ohuahadeni naco nama inanabaqq̄ui-ridsajari.

*Madija dsepe sse tajari Jesodsa huati tajari*  
*Mateo 19.16-30; Roca 18.18-30*

<sup>17</sup> Nahi dsotodepa Jeso jahui toccadsa pohuahuari madija ojaría joppa najonajari. Jeso baccohuari pohua pitodsa huitta nadsa huati tajari: —Nija, Mamaride bicahi ¿nejecoma onadsa camittehe jiquejeranicca bacco onanijine? –nahi nade.<sup>18</sup> Naraha Jesopa: —¿Nejecotohui ohuadsa: “Mamaride bicahi” tajaro? Madija bicahi nohuerahi. Diona bica tahi ojarihi.<sup>19</sup> Naraha camittehe jiquejeranicca bacco tinanijinepi Diocca dosseniji Moisesi dsodo inajarocca nahato tinani. ¿Najaro huapima tecahuanissa taqui? Diocca dossenijipi ajima najaro: “Madija tinanadsoqq̄uejarajo. Madija ohuahacca amoneje tija tejeraji. Tiboti tejeraji. Maidseheda naqui madijadsa ponima ima tinahana tejeraji. Madija ticamidsa tajarajo” nani Diocca dosseniji. Pocca dosseniji onihí naqui: “Ticca abi, ticca amidsa bica tinadsa tinamadibaqq̄uihissa tajo” nani Diocca dosseniji Moisesi dsodo inajaro –nahi nade Jeso.

<sup>20</sup> Naraha Jeso baccodsa huittajari attipa: —Mamaride, najaro marinaja huapimapi dsabisso ojadodsama ohuacahuajonajarode –nahi nade.<sup>21</sup> Nadsapa Jeso icattoma nanaja pohuadsa huati tohuanahi nadsa huati tajari: —Naraha ima ojarie tiadsa dsori taccani. Ticcanidsa tidsepetaji nemanehé manaconidsa da tinaridsaji. Nani najaro dsiniropi madija tohuati nahanaqq̄ui najaridenidsa da tinabaqq̄uinijine. Nema tinanadsapi nidsa memehuari Diocca biquehe tiadsa tojanitohui. “Nema onana” tadsapi ohuadsara dissera tinaji –nahi nade Jeso.

<sup>22</sup> Najaro ima mittadsapa pano todsahi najari. —Jehe, nema onana –najarajari. Pohua dsepetajitohui, pocca dsinirotohui huati huana tajari. Pohuapa dsepe sse taja nadsapa bodi ocassera taha toccanijari.

<sup>23</sup> Nadsapa Jeso cattahuajanihi nadsa pohua huatimadedenidsa huati tajari: —¡A, madija dsepedeni sseq̄ui najaridenipa Diocca cacahueheda toquejenahijine najo tani! –nahi nade.<sup>24</sup> Nema najaro ima pohua huatimadedeni mittamanadsa huajo canirejari. Nadsapa Jeso huati nimanipomajari: —Jaho, otessedeni, madija Diocca cacahueheda toquejenahijine najo tani, onajaro.<sup>25</sup> Pina bani imehibote camellopa etero ssessequi odinidsa toqq̄ueqq̄uimahijine pajira-jarajarissa najari madija dsepe sse tajaripa Diocca cacahueheda tojahijine ssamo tani –nahi nade.

<sup>26</sup> Nadsapa Jeso pohua huatimadedeni najaro ima mittamanadsa bodideni jabojomanadsapa huati tocanirere canajari: —Jaho, madija tocassiejerahijinepa ssamo tani. ¿Nejecojarina tossiajapadsaja? –quinahi nade.<sup>27</sup> Nadsapa Jeso pohuadeni icatabaqq̄ui nadsa huati tajari: —Madijapa ssamoqq̄ui naraha Diodsapi ssamo tejerani. Pohuajinena madija tocassiejerahitohui –nahi nade Jeso.

<sup>28</sup> Naraha Pedropa Jesodsa huati tajari: —Ia Maride, iapi tiadsa jaijaridsanijinepi icca odsa, icca madija, huapima ineboridsabaqq̄uide –nahi nade.

<sup>29</sup> Manaco Jeso atti: —Pajissara tiadenidsa huati onana: Madija ohua acco camahijinepa pocca odsa icanebo, pohua imecote inebobaqq̄ui, pocca ami, abi inebobaqq̄ui, pocca ejedeni inebobaqq̄ui, pocca dsama inebo nadsapa otahimari madija tocassiejerahijinecca tojaridsanijine dsepe ijiridsajari.<sup>30</sup> Nadsapa nidsa

dsotode huapima pohua ineboridsajarossa nehe Dio pohuadsa da inaridsadsapi cajipomahitohui. Jidapana ajijaro namidsa pohua madiccadsa huemani cajihitohui. Pohuadsa pina pocca odsa tohuapijarossa nanitohui. Pohua imecotedeni naco tohuapiridsahitohui, pohuadsa pocca amissa najaro cajiridsanitohui. Ejedeni ohuahadeni pina pocca ejedeni toquejenajarissa naridsahitohui. Dsama naqui pina pocca dsamassa najaro pohuadsa tojaridsanitohui. Naraha otahimari pohuadsa tojajarojine pohuadsa najidsohue ssonarinitohui. Nema nanitohuiraha nidsa dsama dsati tojadsapi camittehe jiquejeraniccadsa madi-dsanapohuitohui. Pajissa -nahi nade Jeso.

<sup>31</sup> —Naraha jidapana tiadenipi ajimani tiquejenaraha ajijaro imadsa tibodideni huatomanaji: Madija jidapana madimanajarideni motapa deni toquejenaraha nidsaranibotepa ajamani toquejenahitohui. Jidapana madimanajarideni mota ajamani toquejenajarideni naco nidsaranibotepa deni toquejenahitohui -nahi nade Jeso.

*Jesopa pohua dsoqquehicca ima huati nimanipomajari*

*Mateo 20.17-19; Roca 18.31-34*

<sup>32</sup> Jeso pocca madijama Jerosarecca jahui jai tojadsapa pohuana tahide tojadsanapojari. Pocca dodosse tabaqqupa pohua nattihuaaji jai tojajari. Jeso dsoqquehijine noppine cappinamanadsa huatideni huatoto cadsanapojari. Madija ohuahadeni pohuadeni nattihuaajicca jai tojamissajari naco cappinamanajari. Nadsapa pocca dodosse tabaqqui 12 quinajari pohuadenira huahua inabaqquidsa pohuadsa queriqquijari. Nadsapa jahui jai tojadsa pohuadsa ima tojanijinecca huati huati dsanapojari. <sup>33</sup> Jeso attipa: —Jerosarehuaji jaijemorararopi nahatoqquri tiquinani. Ohuapi Madija Bedi ojararoa nidsa Jerosare bacco inadsapi dada toqqumade tamedeni, jodiodenicca marinaja maridedeni quinajarideni dsepedenidsa ojanitohui. Ohuadsa: “Dsoqquena, dsoqquena” quinahitohui. Dsotodepi madija ohuaha jodio quejena-jarajaridenidsa ohua da quinanitohui, onajaro. <sup>34</sup> Najaridenina ohua jaja icanaqquimanajaro, ohua ppito inaqquimanajaro, ohua cossi inaqquimanajaro nanitohui. Nadsapi ahua porimacossanidsa ohua inanadsoqque-manadsa ohua ppa idsamananitohui. Naraha huada huatinimade tojari nadsa onahatoninitohui -nahi nade Jeso.

*Satiaco, Huano tedseje Jesodsa huati toquinajari*

*Mateo 20.20-28; Roca 22.24-27*

<sup>35</sup> Nadsapa Sebedeo bedideni Satiaco, Huano tedsejepa Jesohuaji tohuajiressimanadsa huati toquinajari: —Ia Maride ¿ettidsa jehe taqui? Icca huatinajassa tinanaji, inajaro -quinahi nade. <sup>36</sup> Manaco pohuadenidsa: —¿Nejeco imara tiadenidsa onanijine? -nahi nade Jeso. <sup>37</sup> Nadsapa pohuadenia: —Ticca cacahuete bicanihuaji madija cacahuete tittaridsapi tinoridsa ipahimarinijine ohuapi tinori nahatonihuaji ohuittari, ocotepa tinori ssamohuaji huittari inanijine ¿jehe taqui? -quinahi nade Jesodsa.

<sup>38</sup> Naraha pohuadenidsa Jesoa: —A, najaro imapi ssamomo tinani. Ohuapi ocasserani ohuabote nani. Ohuadsa najidsohue ssonarinitohui. Aji tiadenipi najidsohue tinahanamananijine ¿tipajiramaquai? -nahi nade. <sup>39</sup> —Jehe, ia naqui ipajirani -quinahi nade. Nadsapa pohuadenidsa Jesoa: —Jehe, pajissa ocasserani tinahanamananitohui. Aji ohua najidsohue onahanadsapi tiadeni naqui nidsa dsotode najidsohue tinahanamananitohui. <sup>40</sup> Naraha memehuaji occa cacahuetsa madija cacahuete ohuadsama pahimarihijinepa ohua dosse dosse onejerani. Abi Dio icattejidsa-baqquijaridenina ohuinoridsa pahimarihijine -nahi nade Jeso.

<sup>41</sup> Naraha Jeso huatinimade mota 10 quinajaridenipa najaro ima imahaha canahi mittamanadsapa Satiaco Huanodenidsa huadimanajari. <sup>42</sup> Nadsapa Jeso huahua

inabaqquidsa pohuadsa toqueriqquidsapa pohuadenidsa huati tajari: —Tiadenipi madija ohuaha jodio quejena-jarajaridenicca madie nahatoqquiri tiquinani. Poccadeni taminedenipa dossede dacoraqquiri nadsa poccadeni madija dosse dosse quiquinanajari. Deni toquejenajari ohuahadeni naco poccadeni madija dacorehedsa ehcahuabaqquimana najari.<sup>43</sup> Naraha aji ohuadsa tiquejenajaropi nema tiquinanijine bica tejerani. Naraha titessedeni ojariapa: “Ohuana deni ojana” nadsapa pohuana huapima bijideni acco icamaridsabaqquihijinena bica tani.<sup>44</sup> Diocca cacahuehedsa deni tijanijinepi titesse bijideni acco ticamaridsajo, pina poccadeni medse tijajarossa tanijine.<sup>45</sup> Aji ohua Madija Bedi ojararopi madija dosse dosse onanijine occajona-jerajaro. Madija acco ocamabaqquihijinena occajonajaro. Madija poccadeni imasiri manaconi pohuadenidsa ssonari-jeranijine poccadeni imasiri manaconipi ohuana ohua ohuaccoranitohui –nahi nade Jeso.

*Jesopa Bartimeo nocco ssire inanajari*

*Mateo 20.29-34; Roca 18.35-43*

<sup>46</sup> Nadsapa Jeso pohua huatimadedeni tedseje odsa Jericodsa bacco toquinajari. Nahidsa toqqequequimadsapa pohua huatimadedeni, madija ohuahadeni naco huapi taha pohuadsa jai tojajari. Nani jahui inididsapa nocco siri huihuitta najari. Pohuapa Timeo bedi, onipa Bartimeo. Pohua dsepe da nadsa: —Ohuadsa dsiniro da tiquinaji –tatacossa najari.<sup>47</sup> Najaria —Jeso Nasaretihuaajicca toqqequequimahi –quinahi ima mittadsapa Jesodsa huahua najari: —¡Jeso, Dabi Potemahi! ¡Ohuadsa teti huana taji onaha! –najari.

<sup>48</sup> Naraha madija motadenipa: —¡Poni! ¡Joma taji! –quinahi nade. Nama quinaraha denima paja huahua tarihi huahua tarihi najari: —¡Tamine Dabi Potemahi! ¡Ohuadsa teti huana taji! –napomahi nade.

<sup>49</sup> Nama nadsapa Jeso huaha tahi nadsa —Jari, huahua tajonamanajo. Ccajonana –nahi nade. Nadsapa nocco siridsa huahua quinajari: —¡Jehe, bica tani! Titehemaji, tiadsa huahua nahi –quinahi nade.<sup>50</sup> Nanaja pohua tetepe ssiti, totehemahi, Jesohuaji toqquessijari.

<sup>51</sup> Nadsapa Jesoa: —¿Nejecora tiadsa onananiijine? –nahi nade. Nadsapa nocco siripa: —Ohua Maride, onocco ssire tinanaji, onajaro –nahi nade.<sup>52</sup> Nadsapa Jeso: —Epeje. Ticcaniji. Tibodi ohuadsa pajissa tadsapi tinomini –najari. Nadsapa Jesojine amadsati pohua nocco ssire tajari. Jerosarecca jahui Jeso denima toccadsapa Bartimeo naco pohuadsa toccajari.

## 11

*Jesopa Jerosaredda bacco todsimajari*

*Mateo 21.1-11; Roca 19.28-40; Huano 12.12-19*

<sup>1</sup> Nadsapa Jeso, pohua huatimadedeni, madija huapima tedsejedeni jai tojajari. Odsa panani Jerosarehuaji tohuajiramanadsapa ssono onini Oribodsa jai tojemorajari. Najaro ssonodsa odsa capamema najaro pamehe anijaro, oninidenipi Betapaque, Betania najaro. Najaro odsa pamehedsa bacco toquinabote nadsa Jeso pohua huatimade pamahadsa huati tajari: <sup>2</sup> —Jari, ajicca odsa capamema nanihuaji ticadapoji. Nanihuajipi bojo namidsadsa napidsati ssoque dsanaha huahi. Najari bojopa idedsa madija huittari-jaraccahi. Najari dicca tiquinadsa teccanimanajo –nahi nade. <sup>3</sup> —Naraha tiadenidsa madija attipa: “¿Nejecotohui bojo dicca tiquinajari?” nadsapa pohuadsa huati tiquinana: “Ia Medsede ajajari bojo tohui nadsapaja. Nidsa eccanihitohui” tiquinana –nahi nade Jeso.

<sup>4</sup> Nadsapa tohuedanaja, jahuidsapa bojopa ssoque dsanahi bacco quinajari, odsa huajira tanidsa. Nadsapa bojo dicca quinajari.<sup>5</sup> Nanaja nahicca madija domodeni huajari attideni: —¿Nejecotohui bojo dicca tiquinajari? –quinahi nade.<sup>6</sup> Naraha



manaco pohuadeni cacomeramanajari: —Ia Medsede tohui nadsapaja –quinahi nade. Nadsapa jehe quinadsa eccanimanajari.

<sup>7</sup> Nadsapa bojo eccanimanajari... Jesohuaji bacco nanimanadsapa poccadeni etero huapicca motarajaro ssiti quinadsa bojo idedsa bina quinadsa nahidsa Jeso huittarijari. <sup>8</sup> Nadsapa madija huapi taha Jesodsa huatidsemanadsa pohua tedsejema jahui bina idsanapomanajaro, pohuadsa: —Deni tijani –quinahijine. Nadsapa jahuidsa pohuadeni tetepe namidsa hua idsanapomanani nade. Madija ohuahadenipa birijari eppe huamonicca ca ippimanadsa hua idsanapomanahi nade. Nadsapa Jeso jahui bina tani motta toccadsanapojari. <sup>9</sup> Madija huapima pohua tedsejema jai tojaja, pohua nattihuaji jahijonaja dsanapomanajari. Pohuadsa huatidsemanadsa huahua huahua dsanapomanajari: —¡Diopa deni tojahi, deni tojahi! ¡Ia Medsede onima ccajonajaridsa biquehera tojana, tojana! –dsanapomanajari. <sup>10</sup> —¡Pohuapa icca idi tamine Dabi Potemahi bicabote! ¡Ia Cacahuade tojahijine ccajonahi! ¡Bica tahi, bica tahi! ¡Memehuaji Diodsa madimanajarideni pohuadsa: “¡Deni tijani!” quinana, quinana! –dsanapomanahi nade.

<sup>11</sup> Nadsapa Jeso Jerosaredsa bacco todsimadsa Diodsa dada toqquimahuaji toccajari. Nahihuaji toqquedsimadsapa qqui naridsahissa tajari. Qqui naridsaha jicadsapa maji toccajari. Nadsapa Jeso pocca dodosse tabaqqui <sup>12</sup> quinajari tedseje Betaniahuaji jai tojanijari, bacco tanimanahi nade.

*Jesopa ahua iquiera bono-jarajaridsa atti ocassera tadsa huati tajari*

*Mateo 21.18-19*

<sup>12</sup> Huada ssiaja nahi Betaniadsa Jeso toccapomadsapa pemijari. <sup>13</sup> Nadsapa huaji tanidsa ahua iquiera eppe cajipomahi qqui tadsa: —Bono naco cajihitide –nahi nade. Naraha nahi bacco tadsapa eppe pohuara qqui tajari. Iquiera eppe cajidsapa bobono najariraha bono-jaraccahi. Pohua bonohuicca abadsico bacco tocana-jaraccajari. <sup>14</sup> Nadsapa Jeso ahua iquieradsa huati tajari: —¡A, apaja! Jidapapi tibono madija jipamanapoma-jarahitohui. ¡Nohuerahitohui! –nahi nade. Nahidsa pohua huatimadedeni mittamanajari.

*Diodsa dada toqquimacca odsadsa manaconitohui dadadedeni mohua ininebaqquijari*

*Mateo 21.12-17; Roca 19.45-48; Huano 2.13-22*

<sup>15</sup> Nadsapa Jeso Jerosarehuaji tocanajoranipomadsa Diodsa dada toqquimahuaji toqquedsimani-pomajari. Najaro odsacca boronidsa madija bani bedi Diodsa da tahijinecca dade toquejenahi qqui tajari. Manaconitohui dadadedeni qqui inabaqquid-sapa huapima mohua ininebaqquijari. Mimittadedeni naco mohua ininebaqquijari. Dsiniro cacacajiqquimeradedenicca huahuanari naqui hua inaridsajaro. Midsori dadadedenicca huihuittari naqui hua inaridsajaro. <sup>16</sup> Madija ohuahadeni naco najaro odsacca boroni motta todsepetaji dsojo dsojo ihiquimamana nejeranijine Jeso ecossajaro nade. <sup>17</sup> Nadsapa Jeso huapima mari icanabaqquijari: —Dio Atti dsodo nanidsa ajima najaro: “Occa odsapi ohuadsa huati huati toquinahijinecca odsa tocanitohui. Dsama huapimacca madija ohuadsa huatide jajahidsima nahijine” naponi nade Dio Atti dsodo nanidsa. Naraha tiadenipi madija titicamajidsa-baqquimana nadsa tijinedenia pina bobotidedenicca quequeriqqui odsassa ticananamanajaro –nahi nade Jeso.

<sup>18</sup> Naraha dada toqquimade taminedeni, jodiodenicca marinaja maridedeni tedseje najaro ima mittamanadsapa Jesodsa jiperaqqui najari. Madija huapimapa Jesocca marinajatohui disseraqqui nadsapa taminedeni, mamaridedeni tedseje Jeso deni tojahi noppine cappinamanajari. —Jesopa deni tojadsa ajimani iquejenarana –quinadsa Jeso dsoqquehijine jara jara quinajari: —¿Nejecoma inanadsa Jeso

inanadsoqquehijine? –quinajari nade. <sup>19</sup> Naraha todsidsidsa Jesopa pocca dodosse tabaqqui tedseje Jerosarelsa jai tojenajari.

*Ahua iquiera bono-jarajari Jeso attijine botejari*

*Mateo 21.20-22*

<sup>20</sup> Nadsapa huada ssiaja dsidsidsamassa ahua iquiera huahihuaji jai tojapomajari. Qqui toquinapomadsapa jaboma botejari. <sup>21</sup> Nadsapa Pedro bodi huatomadsa Jesodsa huati tajari: —¡Ohua Maride, qqui tanaja! Maitta iquiera tettidsa tinajidsojaripa botea –nahi nade.

<sup>22</sup> Naraha Jeso pohuadenidsa huati tajari: —Tibodidenidsa: “Diopa occa huatinajassa inananiijine pajirahi” tiquinaji. <sup>23</sup> Pajissara tiadenidsa huati onajaro: Madijapa ajijaro ssonodsa huati tadsa: “Ssono, titehemadsa passo imenidsa jaro tidsanaji” nadsapa ssono nema nanitohui. Puhuapa jehe nahissa tadsa pohua bodi: “¿Pajissa tojapadseje? Nohueranitide” najaradsapa Diojine ssono jaro dsananitohui, onajaro. <sup>24</sup> Najaroa ohuatti: Diodsa huati tiquinadsapi tibodidenidsa: “Jehe, Diopa nema inananiijine pajirahi” tiquinadsapi ticcadeni huatinaja Diojine najarossa inananiitohui, onajaro –nahi nade Jeso.

<sup>25</sup> —Diodsa huatide tiquejenadsa naqui madija tiadenidsa ima inanapojarotohui tibodideni huatodsapi: “Najaro imadsa ohuati ajimana. Puhuadsa ohuadi-jerana” tiquinaji, onajaro. Nema tiquinadsana ticcadeni Abi Dio memehuaji madijaripa ticcadeni imasiridsa huati ajamahitohui. [ <sup>26</sup> Naraha tibodideni najaridsa epeje tiquinejeradsapi ticcadeni Abi Dio memehuaji madijaripa ticcadeni imasiri epeje inana-jeranitohui, onajaro –nahi nade Jeso. ]

*—¿Nejecojaricca dacorehe ticajijaro? –quinajari Jesodsa*

*Mateo 21.23-27; Roca 20.1-8*

<sup>27</sup> Nahi dsotodepa Jerosarehuaji bacco tanimanapomajari. Nadsapa Diodsa dada toqquimahuaji Jeso toqquedsimadsapa pohuadsa jiperaqquri najarideni aja dada toqquimade taminedeni, jodiodenicca marinaja maridedeni, jodiodeni ime jocohuideni quinadsa Jesodsa tohuajiressimanajari. <sup>28</sup> Nadsapa pohuadsa huati toquinajari: —Iadsa ticca ima tecomeraji. ¿Nejecojaricca dacorehe ticajijaro? ¿Nejecojaricca attidsa dadadedeni mohua tininebaqquijari? –quinahi nade.

<sup>29</sup> Naraha manaco Jeso pohuadenidsa huati tajari: —Ohua naqui tiadenidsa huati onana, tecomeramananiijine. Ohuadsa tecomeramanadsapi ohua dossede oni, occa dacorehe tahimarini tiadenidsa huati onaniijine. <sup>30</sup> Jari, Huanopa ¿nejecojaricca icadossedsa topa idsanabaqquijaritta? ¿Diojine ttarana, madijajine ttarana? Jari, ohuadsa tecomeramanaji –nahi nade Jeso.

<sup>31</sup> Naraha taminedenipa pohuadenira huati tocanirere canajari: —Jaho “Huanocca topanijipi Diocca dosseniji” inadsapi Jesopa: “¿Nejecotohui pohuadsa jehe tiquinejerajarotte?” nahitohui iadsa –quinahi nade. <sup>32</sup> —Naraha “Huanocca topanijipi madijacca dosseniji” inadsapi madija iadsa huadimanarana. Aja madija huapima attidenipa: “Huanopa Dio icadossejari. Pajissa Dio Atti cacomerabote” quiquinanade –quinajari taminedeni, madijadeni noppine cappinamanadsa. <sup>33</sup> Nama quinana Jesodsa: —Ssamooqquri inani –quinahi nade.

Nadsapa Jesoa: —Ohua naqui ohua dossede onipa tiadenidsa ohuacomera-jarahi –nahi nade pohuadenidsa.

## 12

*Huidsaja cacahuade tabaccoraqquri najaridenicca ima*

*Mateo 21.33-44; Roca 20.9-19*

<sup>1</sup> Nadsapa Jeso pocca marinaja ajijaro namidsa imadinicca ima tadsajani mari icanabaqquijari: —Madijapa pocca huidsajadsa ppa nahi uva pohuara ppa inajari. Nadsapi huidsaja inidi siba hua inahuajanijaro. Uva bono ttai nadsa ppejene tojahijine naqui sibadsa odi inahatojaro. Huidsaja cacahuade huittarihijine siba hua tamaroni naqui hua inamarojaro. Najaro huapima jicadsapi huidsaja jinede pocca huidsaja ecahuamananijine madijatohui qqui naridsajari, nahi pocca huidsajadsa tarabadsa quinahijine, ppa nahi uva ecahuamanahijine. Uva bono jadadsapa motapa huidsaja jinededsa tojahijine. Motapa huidsaja cacahuadedeni pohuadenidsa tojahijine. Nadsapa pocca huidsaja ecahuamananijine madija qqui inabaqquidsapa pocca huidsaja pohuadenidsa inebojaro. Nadsapa jinede dsama huaji tanihuaji toccajari. <sup>2</sup> Uva bono jadahicca abadsico bacco tadsapa huidsaja jinede huaji tanidsa madiraha pocca dodosse ojaria pocca huidsajahuaji dosse inanijari, uva bonotohui huidsaja cacahuadedenidsa huati tahijine. <sup>3</sup> Naraha pocca dodosse huidsajahuaji bacco nanidsapa huidsaja cacahuadedeni dama quinadsa idaqquimanajari. Uva bono jiraha dosse inanimanajari. <sup>4</sup> Nadsapa huidsaja jinede pocca dodosse ohuaha dosse inanijari. Huidsaja cacahuadedenihuaji bacco naniraha najari naco inajidsomanadsa tati biquerajari. Itamassomanadsa uva bono jiraha dosse inanimanajari. <sup>5</sup> Nadsapa pocca dodosse ohuaha dosse inanijari. Naraha najaripa inanadsoqqe-manajari. Dsotode naco pocca dodosse tabaqqui dosse inanibaqquihi huapi taraha motadenipa itabaromanajari. Motadenipa inanadsoqqe-ridsamanajari.

<sup>6</sup> —Nadsapa pohuadsa ojaria madicahi, najaripa huidsaja jinede pohua pocca ejedeni. Najaridsapa huati huana tajari. Pohua bodipa: “Occa ejedenidsana cappinamanahitohui” najari. Nadsapa pocca huidsaja cacahuadedenidsa pocca ejedeni dosse inanijari. <sup>7</sup> Naraha huidsajahuaji bacco nanidsapa huidsaja cacahuadedeni pohuadenira huati tocanirejari: “Ajaripa huidsaja jinede bedi. Nidsaranibote imehi dsoqquedsa huidsajapi pohuadsa tojanitohui. Jari, inanadsoqqena, huidsajapi icca tojanijine” quinajari. <sup>8</sup> Nama quinadsapa huidsaja jinede bedi dama quinadsa inanadsoqqe-manadsapa huidsaja idenihuaji cora quinajari —nahi nade Jeso.

<sup>9</sup> Nadsapa Jeso pohuadsa queriqquimanajaridenidsa huati tajari: —Jari, tibodideni huatoji. Huidsaja jinede pohuadenidsa ¿nejecoma napadsaja? Pohuapa bacco nanidsa huidsaja cacahuadedeni inajicadsapa huidsajapi madija ohuahadenidsana da inanitohui —nahi nade Jeso.

<sup>10</sup> Nadsapa Jeso pohua tahimari pohuadenidsa ahuato tanijine Dio Atti dsodo nanicca huati tajari: —Tiadenipi Dio Atti dsodo nanicca hua hua titiquina naraha siba huahuattajo tojajaro tahimarini ¿tetideni ajimamanajaroqui? Imapi ajima najaro: “Odsa sibadsa icanahatomananijinepi nanahatodedenipa siba ojariepi ettajomanani nade.

Naraha dsotodepi najaro sibana odsa daco cajiranijine tojajaro.

<sup>11</sup> Aji siba huahuattajo tojajaropi ia Medsede Diojine deni tojajaro. Najaro imajine Diodsa etidsejaro”

nani Dio Atti dsodo nanicca

—nahi nade Jeso. <sup>12</sup> Nadsapa dada toqquimade taminedeni, jodiodenicca marinaja maridedeni quinadsa Jesocca marinaja mittamanadsapa bodideni nahatoqquri najari: —Jesopa icca ima huati huati tajari, iapi pohua ettajojarijine —quinahi nade. Nadsapa Jesodsa huadimanadsa: —Jeso todsepe inanana —quinaraha madija noppinedeni cappinamanadsapa apaja quinadsa jai tojanijari.

—¿Romanodenicca taminedsa icca dsiniro mota da inanijine bica taqui? —quina-jari

*Mateo 22.15-22; Roca 20.20-26*

<sup>13</sup> Nadsapa jodiodenicca taminedenipa marinaja pariseodsa jehe quinajarideni pama, tamine Herodecca madija pama quinaha dosse inajonabaqqui-manajari, Jesocca ima inassamomanadsa pohuadsa ima inassonarimananijine. <sup>14</sup> Bacco najonamanadsapa huati toquinajari: —Mamaride, ticca ima iadsa ahuato tani. Pajissara huati huati tinajaro. Madija attideni noppine ticappina-jeradsapi ticca ima onihi toja-jerajaro. Madija deni tojajari, madija dsepe sse tajari, madija ajamani tojajari tedsejepa tiadsa najarissa caniqquimerajari. Pajissehera Diocca marinajadsa madija madimanahissa tahijine mari mari titicanabaqqui najari -quinahi nade. — Nadsama iapi romanodenicca tamine deni tojahicca pocca dossenijidsa icca dsiniro mota pohuadsa da inanijine ¿bica taqui? ¿Bica tejerarane? Moisesicca marinajadsa ¿oppina taqui? ¿Oppinera tarane? ¿Tetti nejecoma tani? ¿Paca inanijinequi? ¿Paca inejeranijinerane? -quinahi nade. <sup>15</sup> Jesodsa attideni bica tadsa huati huati toquinaraha poccadeni maidsehe pohuadsa ahuato tadsa pohuadenidsa huati tajari: —¿Nejecotohui occa ima tossamonijine ohuadsa huati tiquinajaro? Jari, ohuadsa dsiniro denario dsojo ticanajonamanaji, qqui ocanana -nahi nade Jeso. <sup>16</sup> Dsojo icanajonamanadsapi Jeso attia: —Jari, ajijaro ccararadsapi ¿nejecojari corimena anijaro? ¿Nejecojari oni dsodo najaro? -nahi nade Jeso.

Nadsapa pohuadsa ecomeramanajari: —Romanodenicca taminedija -quinahi nade. <sup>17</sup> Nadsapa pohuadenidsa Jeso attipa: —Romanodenicca tamine pocca dsiniropi pohuadsa da tinanimanaji. Naraha Diocca tiquejenadsapi Pohua jipa tahiccara Pohuadsa da tiquinaji -nahi nade Jeso.

Nadsapa —Jesocca ima tossamona -quinajarideni jabojojanadsa attidenipa: —A, icca ima ecomeranijine nahato tajaria -quinahi nade.

*Nidsa jicamanajarideni nahatonimanadsapa caji caji cana-jarahitohui*

*Mateo 22.23-33; Roca 20.27-40*

<sup>18</sup> Nadsapa Isaraeri potemahi jodiodeni mota marinaja sadoseodsa jehe quinajarideni Jesohuaji bacco quinajari. Poccadeni marinajapi: —Idsoqquedsapi inahatoninijine nohuerani -quiquinanajari. —Najaro imadsa Jeso atti ijine tossamodsa cobara tana -quinadsa Jesodsa najaro ima huati toquinajari: <sup>19</sup> —Mamaride, Moisesicca marinajadsapi ajima nani: “Maqquidejepa amoneje cajiraha ejedeni jiraha dsoqquedsapa pocca amonejepi pohua imecotena icajina, nahi ejedeni cajidsapa pocca ato dsoqquejaricca ejedenissa nahijine” nade Dio Atti Moisesi dsodo inajaro. <sup>20</sup> Nadsama tiadsa ima ajima najaro huati inana. Aja pohuadeni imecote pohuadenira 7 quinaha madimanajari. Tahideccaha amoneje cajipojari, naraha bedi jiraha dsoqquejari. <sup>21</sup> Dsotodecca naco pohua ohuaha bedimeni icajiraha ejedeni jiraha dsoqquejari. Dsotodecca naco najaro amoneje icajiraha najari naco ejedeni jiraha dsoqquejari. <sup>22</sup> Najaro imapi nema dsanapojaro 7 quinaraha ejedeni jiraha jicajari. Najarideni jicadsapa poni naqui dsoqquejaro. <sup>23</sup> Nadsapi dsama jicadsa madija inahatonidsapi pohua imecote 7 quinajaripa ¿nejecojarina ponicca maqqui tojapadsaja? Huapimapa poni icajiqquimanaporaha -quinahi nade.

<sup>24</sup> Naraha Jeso attipa: —Ticcadeni marinajapi dsori tajaro. Dio Atti nahatoqquri tiquinaraha pajissa tiquinanissa tejerajaro. Diopa pocca dacorehema madija inahatonibaqquihijine pajirahi naco ssamoqquri tiquinajaro. <sup>25</sup> Jicamanajarideni nahatonimanadsapa caji caji cana-jarahitohui. Diohuaji madimanadsapa pina Diocca dodosse tabaqqui memehujicassa quinahitohui. Aja pohuadenipa caji caji cana-jaradsa madimanajari.

<sup>26</sup> —Nadsama Djohne madija nahatonimanahicca imapi Pohua Atti cacomerabote Moisesi dsodo inapojaro. Najaro Dio Atti dsodo nani hua hua titiquina naraha ¿najaro imapi tetideni ajimamanajaroqui? Aji ahua diji tanidsa Diopa Moisesidsa huati tajari: “Ohuapi Dio, ticca idideni Abarahao, pohua bedi Isahaca, pohua

bedi Jacobo quinajaridenicca Dio o jani” nahi nade. <sup>27</sup> Aja Dio Atti nama nadsapa Abarahaodeni nahatonimanadsa madimana-dsanapohuicca ima ahuaato tajaro. Diopa paja dsoqquemanarihi najaridenicca Dio jarahi. Diopa camittaququiri najaridenicca Dio. Pohnuapa jidapana naco poccadeni Dio. Najaroa ticcadeni marinajadsa: “Nahatonie nohuerani” titiquina najaropi dsori tajaro. Pajissa jerani –nahi nade Jeso.

*Diocca dosseniji deni tojanicca*  
*Mateo 22.34-40; Roca 10.25-29*

<sup>28</sup> Jesopa sadoseodeni tedseje ahuaaji huati ahuaaji huati quinana jodiodenicca marinaja maride o jariaha Jeso pohuadenidsa ecomerani bica tani mittadsapa pohua naco Jesodsa huati tajari: —Jari, Diocca dosseniji huapi taraha ¿nejecojaro dossenijina pocca dosseniji huapimadsa deni tojajaro? –nahi nade. <sup>29</sup> Nadsapa pohuadsa Jeso huati tajari: —Aji Diocca dosseniji deni tojaniccapi ajima najarona paji:

“Isaraeri potemahideni, titaharibobo canaji. Ia Medsede Diopa o jarijari. Dio ohuaha nohuerahi. <sup>30</sup> Tiadeni Medsede Diodsa tetideni huanacquiri naji. Tibodideni huatonissa tadsa, dacoco tijiradsa Pohuadsara disseracquiri tidsanapomanadsapi Pohuadsa tetideni huanacquiri nanijine.”

<sup>31</sup> Diocca dosseniji deni tojanicca onihini pina tahideccassa najaro. Deni tojaniccapi ajima najaro:

“Tinorideniccadsa tetideni huanacquiri naji. Pina tiadenidsa tetideni huanacquiri najarossa naji.”

Najaro Diocca dosseniji pamehena deni toquejenajaro. Pocca dosseniji onihini najaro pamehessa nejera jaro –nahi nade Jeso.

<sup>32</sup> Nadsapa Jesodsa jodiodenicca marinaja maride attia: —Jehe Mamaride, tetti pi pajissa. Ia Medsede Diopa o jarihi. Ohuaha nohuerajari. <sup>33</sup> Nadsama Diodsara eti huanacquiri nanijine. Ibodi huatonissa tadsa dacoco ijiradsa Pohuadsara disseracquiri idsanapodsapi Pohuadsa eti huanacquiri nanijine. Inoriccadsa naqui eti huanacquiri nanijine pina aji iadsa eti huanacquiri najarossa inanijine. Najarona denima bica tajaro. Aji icca bani bedi ono tojahijine Diodsa dada toqquimahuaji da da ihinanajaro, icca daniji onihini naqui dada toqquimahuaji ihinebo najaro huapimapi Diodsa bica taraha aji tohuati huanehe pameheccadsa deni toquejena-jerani –nahi nade jodiodenicca marinaja maride atti.

<sup>34</sup> Pocca cacomeraniji bica tanicca Jeso mittadsapa: —Jehe, Diocca cacahuehedsa tijanijine tipajirabote nani –nahi nade Jeso. Jesopa ecomeranissa dsanapodsapa ima onihini pohuadsa huati toquinahijine huapima cappinamanajari.

*—¿Cristo-Mesiapa nejecojari potemahi tiquinajaro? –najari Jeso*  
*Mateo 22.41-46; Roca 20.41-44*

<sup>35</sup> Nadsapa Diodsa dada toqquimahuaji Jeso mari icanabaqquidsapa madija ecomeramananijine huati tajari: —¿Nejecotohui jodiodenicca marinaja maridedeni attidenipa: “Cristo-Mesiapa Dabi Potemahi” quiquinanajari? <sup>36</sup> Naraha tamine Dabipa maittaccadsama madidsa Dio Corimejine pohua tedsejemacca ima huati tadsapa pohua attipa:

“Ia Medsede Diopa ohua Medsede Mesiadsa huati tajari: ‘Ohuainori nahatonihuaji tittariji. Ohua tedsejepi tohuatti dacorajaro ticajiji’ najari. ‘Nidsaranibote tia huadidedenipa ajamani onanabaqquihitohui. Poccadeni dacorehepi onajicanitohui’ napohui nade Dio.”

<sup>37</sup> Naraha madija attidenipa: “Cristo-Mesiapa tamine Dabi Potemahi” quiquinanadsapa ¿nejecotohui Dabipa pohua potemahidsaraha: “Ohua Medsede” napojaritta? –nahi nade Jeso.



Nahidsa Jeso atti mittade madija huapi taha queriqquimanajari. Pocca marinaja mittamanadsa huatidsemanajari.

*Pina jodiodenicca marinaja maridedenicca madiessa tiquinejeraji*

*Mateo 23.1-36; Roca 11.37-54; 20.45-47*

<sup>38</sup> Jesopa madija mari icanabaqquidsa ima ajima najaro huati tajari: —¡Paji, tiadenipi! Pina jodiodenicca marinaja maridedenicca madiessa tiquinejeraji. Pihuadenipa etero dequerajarodsa huedsaridsamanadsa attidenipa: “Iapi pina taminessa inani” quiquinanajari. Aji dadahuajicca jahuidsa jahiridsadsa naco madija pihuadenidsa: “¿Nija, bica tinani? Tiapi deni tijani” quinahijine tohuini quiquinanajari. <sup>39</sup> Dio Atti mamarihuaji jassi tarihijinepa deni toquejenajaridenicca huihuittari tohuini quiquinanajari. Jipacque imenidsa naqui deni toquejenajaridenicca huihuittaridsa jassi tarihijine tohuini quiquinanajari. <sup>40</sup> Nadsama tabira tocajamanajarodeni ponideni madimananijineccaraha icamaidsabaqqui-manadsa pihuadenidsa totoja nadsapi ponidenicca odsa naqui pihuadenidsa totocajaridsa najaro. Naraha poccadeni tabaccorehe ahuatora tanijinepi Diodsa huati huati toquinadsapa poccadeni huatinaja dequerajaro, aja madija pihuadenidsa: “A, Diodsa disseraqqiri nahi” quinahijine. Pihuadenipa Dio Attima mamaidsamana nadsapa nidsa Diocca najidsohue denima oppina tanicca pihuadenidsa ssonarinitohui –nahi nade Jeso.

*Amoneje tabira tocajani ponicca dsiniro Diodsa da inanicca ima*

*Roca 21.1-4*

<sup>41</sup> Nadsapa Jeso Diodsa dada toqquimahuaji madicajari. Pihuapa nahi bodidsa madijacca da naqquinaja dsiniro cocoro todsa cahittarini tadsajanima huittaritari. Madija poccadeni dsiniro coro coro icadsamanani cattoma canajari. Dsiniro sseqquiri najarideni huemani coro icadsamanani qqui tajari. <sup>42</sup> Nadsapi nanidsa tabira tocajani tohuati nahana tajaro ccajonajaro. Poni madinijinecca dsiniro bedeniraha ponicca danijijine capamehe cororo icadsajaro. <sup>43</sup> Nadsama najaro qqui tadsapa pohua huatimadedeni huahua inabaqqujari: —Pajissara tiadenidsa huati onajaro: Ajijaro tabira tocajani cappiradsa tohuati nahana taraha ponicca daniji dsiniro bedeniraha deni tojani. Pina Diodsa denima da inajarossa najaro. Madija ohuahadenipa poccadeni daniji toqueriqquini huapi taraha Diodsapi ajimani tojajarossa najaro. <sup>44</sup> Pihuadenipa sseqquiri nadsa poccadeni dsiniro mota arobeni da quinaraha ajijaro tabira tocajanipi cappiraraha nemaneha da inajaro. Tohuati nahana tani, poni madinijineccaraha da inehe jicajaro –nahi nade Jeso.

## 13

*—Diodsa dada toqquimahuajicca odsa taboridsanitohui –najari Jeso*

*Mateo 24.1-2*

<sup>1</sup> Nadsapa Diodsa dada toqquimadsa Jeso qquenadsapa pohua huatimade ojaría attia: —¡Ohua Maride, qqui taneje! Diodsa dada toqquimahuajicca odsa huapimapi siba bicanidsa nahatoridsani bicaqquri naha –nahi nade pohua huatimade. <sup>2</sup> Nadsapa Jeso: —Aji odsa imeni sibadsa nahatoridsani bicabote jidapana qqui tinaraha nidsa dsotodepi taboridsehe jicanissa tanitohui –nahi nade Jeso.

*Dsama jicani tohuajiradsa nahatoqquri inanijinecca ima*

*Mateo 24.3-28; Roca 21.7-24; 17.22-24*

<sup>3</sup> Nadsapa ssono Oribohuaji Jeso pohua huatimadedeni tedseje jai tojemorajari. Najaro ssonopi Diodsa dada toqquimahuaji ahuato tajaro. Nahidsa Jeso huittadsa Pedro, Satiaco, Huano, Adiri quinajarideni pihuadenira Jesodsa huati toquinajari:

<sup>4</sup>—Ia Maride, jidacca ima huati tinajaropi ¿nejecoma nadsa tojapadseje? Najaro ima tohuajiradsa nahatoqquiri inanijinepi ¿nejecora qqui inapopadseje? –quinahi nade.

<sup>5</sup> Nadsapa Jesoa: —Paji, madija tiadeni tocamaidساباqquirana. <sup>6</sup> Nidsa madija huapi taha pahuama ohua onidsa maidsamanadsapa: “Ohuapi Cristo-Mesia ojani” quiquinanahitohui. Nadsapa madija huapi taha icamaidساباqqui-manahitohui. <sup>7</sup> Ima onihi naqui: “Jadsire tojaridsani” timittamananitoahui. Naraha ticappinamana tejerana. Jadsirepi epeje tojaponitoahui. Naraha dsamapi jiquejeraccanitoahui. <sup>8</sup> Nadsama madija dsama onihicca, dsama onihicca tedseje jadsire inanamanaridsanitoahui. Tamine ohuahacca madija, tamine ohuahacca madija tedseje cahadire-ridserahitohui. Namidsadsa naqui tojaridsanitoahui. Pemi naqui cajiridsanitoahui. Najaro ocasserehe tahide tojaporaha denima ocasserehe tojadsanaponitoahui –nahi nade.

<sup>9</sup> —Paji, ¡tetideni huatomanaji! Madija huadiqquri najari cajiridsahi. Najaridenipa tiadeni tadamamanadsapa jodiodenicca taminedenihuaji ticcadeni ima mittamanahijine tiadeni tohuacquedsimabaqqui-manahitohui. Jodiodenicca Dio Atti mamarihuaji naqui tiadeni itabaromananitoahui. Otahimari tiadenidsa tojajaro acconi huadimanadsa dsama cacahuadedeni baccodenidsa tidomo huanijine tiadeni tohuacquedsimabaqqui-manahitohui. Dsama onihicca dsama onihicca madija tamine deni toquejenajari baccodenuaji naqui tidomo huanijine tiadeni tohuacquedsimabaqqui-manahitohui. Nanidsana ticcadeni ima tecomeramanadsapi taminedenipa otahimari mittamanahijine. <sup>10</sup> Dsama jiquejeraccadsama otahimari madija tocassiejerahijinecca dsama huapimadsa ecomeraridsa-manaccanitoahui. <sup>11</sup> Nadsapa taminedenihuaji tiadeni tohuacquedsimabaqquimanadsapa pahuadenidsa ticcadeni ima tecomeramananijinepi ¿nejecoma onapadseje? tiquinejerana. Ticappinamana tejerana, onajaro. Taminedenidsa ima huatide nahatoqquiri tiquinanijine Dio Pohua Corimena tiadeni acco tocamabaqquihitohui. Dio Corimejine tiadenidsa ima ahuato tadsapi najaro imara huati tiquinaji. Huati tiquinadsapi tettideniraha Dio Corimejinena huati tiquinajaro. <sup>12</sup> Naraha najidsohuepi tiadenidsaha ssonarini ojari nejeranitoahui. Aja ohuadsa jehe quinajaridenipa otahimaridsa toquejenajarijine pohua ohuahadeniraha pahuadenidsa huadiqquri nadsapa ehccora-baqquimana nahitohui, inajicabaqqui-manahijine. Imehideni naco pohua bedideni otahimaridsa toquejenajarijine bedidenidsa huadiqquri nadsapa pahuadeni bedideni ehccora-baqquimana nahitohui, inajicabaqqui-manahijine. Bedideni naco imehideni otahimaridsa toquejenajarijine pahuadeni imehidenidsa huadiqquri nadsapa imehideni ihinajicabaqquimana nahitohui. <sup>13</sup> Occa madija tiquejenajarojinepi madija huapima tiadenidsa jiperaqquri nahitohui. ¡Naraha tiadenipi dacoco tijiraji! Najaro huadie tinahanamana-dsanapodsapi tijicaraha ticassiejeranitoahui. Timadimanaccadsa dsama jicani bacco tiquinadsa naqui ticassiejeranitoahui –nahi nade Jeso.

<sup>14</sup> Jesopa dsama jicanicca ima denima mari icanabaqquijari. (Pocca marinaja hua tiquinadsapi timittamananissa taji.) Pohua attipa: —Nidsa jodio quejenajarajardenijine Diodsa dada toqquimahuaji oppinabote corime huedsadsapa top-pinanitoahui. Nahidsa huedsahipa bica tejerani. Nadsapi pahuadenijine icca madija jodiodenipa icappinaqquimanadsa Diodsa dada toqquima paji inebomanarinitohui. Najaro ima tojani qqui tiquinadsapi tiadeni huapima dsama Jodeahuaji timadiridsamanajaropi ssonohuaji tidomo toqquemorana. <sup>15</sup> Madija pocca odsa amossinihuaji ccaridsadsapa pohua dsepetajitoahui pocca odsahuaji toqquedsimani-jarana. <sup>16</sup> Madija pocca huidsajahuaji dsepe ijijari naco paja joppa tarina. Pocca eterotohui odsahuaji ccani-jarana. ¡Poni! <sup>17</sup> Jaho, amoneje jiamanajarodeni, bacconideni ijimanajarodeni naqui joppa toquinanijine tohuati nahanaqquri nanitohui. <sup>18</sup> Najaro

ima oppinabote tojadsa tidomo toccadsapi ssirini nohueranijine Diodsa huati huati tidsanapomanapoji, onajaro. <sup>19</sup> Najaro ima oppina tanicca bacco nadsapi madija huapima ocasserani imeni inahanamananitoahui. Maittaccadsama Dio dsama inahatoponipi nema nanicca ocasserehe qqui quinapo-jerani. Nohuerani. Ia naqui qqui inejerani paji nani. Nidsa dsotode naqui nema napoma-jeranitoahui. Nohueranitoahui. <sup>20</sup> Najaro ocasserehe nema dsanapodsapi madija tossiajaja camajarahitohuiraha najaro ocasserehecca huada Dio ajimani inananitoahui. Dio pocca madija pohua icattejidsa-baqquijaridenidsa huati huana tadsapa: “Nanidsa epejena, jicana” nahitohui Dio -nahi nade Jeso.

<sup>21</sup> —Nadsapa madija tiadenidsa pohuama: “Qqui, ajararipaja ia Idinide Cristo-Mesia” quinadsa, madija ohuaha attideni naco: “Qqui, ajaccarina Cristopaja” quinadsapa pajissa tiquinejerana, onajaro. <sup>22</sup> Madija mamaisadedeni naco tiadenidsa jahijonahitohui. Pohuadenipa: “Ohuapi Cristo-Mesia ojani” quinahitohui. Ohuahadeni naco: “Ohuapi Diocca dosseniji ojani, Pohua Atti ohuacomeranijine” quinaraha maidsamanajari. Pohuadeni bodipa: “Dio icattejidsa-baqquijarideni icamaidsabaqquina” quinadsa poccadeni maidsehe canahatorimana canaridsahitohui. Madija pohuadenidsa: “Pajissa Diocca dosseniji” quinahijine tohuini quinaraha Dio Pohua icattejidsa-baqquijarideni motapa pohuadenidsa pajissa quina-jarahitohui. <sup>23</sup> Nadsapa ¡paji! Ajijaro ima huati huati onajaropi tetideni ajima-jerana. Najaro huapimapi nidsaranibote tojanijineraha jidapana tiadenidsa huati onajaropajipa -nahi nade Jeso.

### *Jeso ccaronapomahicca ima*

*Mateo 24.29-35, 42-44; Roca 21.25-33; 17.26-30, 34-36*

<sup>24</sup> Jesopa ima denima huati huati tajari: —Naraha ocasserehe inahanamanani nattinipi maji ohuihitohui. Abadsico naco cahuihitohui. <sup>25</sup> Memecca abadsico bedi naco catojahitohui. Jidapapa memecca huapima dacoraqquri naccahi naraha dsotodepa meme dsadsa nadsapi huenene huenene canahitohui. <sup>26</sup> Nadsana ohuapi Madija Bedi oजारoa nidsa meme essenima oquejemehe occaronapomani madija huapima qqui toquinahitohui. Occa dacorehe, occa deni tojehe ahuato tanitohui. <sup>27</sup> Nadsapa occa dodosse tabaqqui memehuaajicca dosse onaridsabaqquid-sapa Dio icattejidsa-baqquipojarideni inequeriqquini-baqquimanahitohui. Dsama nemanehedsa madiridsamanajarideni huapima ahuaajicca, ahuaajicca inequeriqquini-baqquimanahitohui -nahi nade Jeso.

<sup>28</sup> —Jari, ahua iquiera tahimaridsa ticahatteraji. Eppe moro nimanihi qqui tiquinadsapi: “Jehe, dsadsajade tojemanini” titiquina najaro. <sup>29</sup> Pina najaro imassa najaro aji dsama jicani tahimarini huati huati onajaro qqui tiquinadsapi: “Jehe, Jeso ccanihi. Pina icca noccobijidsa huajarissa najari” tiquinana, onajaro. <sup>30</sup> Pajissara tiadenidsa huati onajaro: Aji dsama jicani tahimarini huati huati onajarocca madija dsoqquemana-jaraccadsama najaro ima huapima tojanissa tani qqui toquinacahitohui. <sup>31</sup> Meme, nami naqui jicaridsanissa tanitohui. Naraha ohuattipi jiquejeranitoahui. Aji huati huati onajaropi najarossa nanitohui -nahi nade Jeso.

<sup>32</sup> —Occaronapomanicca huada, maji naco madija huapima ssamoqquri nahi. Diocca dodosse tabaqqui memehuaajicca naco ssamoqquri nahi. Dio Bedi ohua naqui najaro ima ssamo onani. Naraha Abi Dio Pohuana nahato tahi ojarahi -nahi nade.

<sup>33</sup> —Nema nadsapi tetideni huatonissa taji. Occaronapomanijinecca huada ssamoqquri tiquinaraha otohui tinajoramanehe timadimanaji. <sup>34</sup> Ohuapi Madija Bedi oजारoa occaronapomanicca imapi pina ajijaro imassa najaro: Madijapa dsama huaji tanihuaji toccahijine joppemadsapa pocca odsa eahuamananijine pocca medse nahidsa inebobaqqujari. Huapimapa dsepedeni ijimanahijine tarabaisa onihi onihi

cajiridsamanajari. Jinedepa noccobiji cacahuadedsa: “Otohui ticattoma canana” nadsapa toccajari. <sup>35</sup> Odsa cacahuadedeni huapimapa jinede ccanihicca huada ssamoqquri nadsapa najoramanaha madimanajari. “Maji toccadsa ccanihitide, dsome nocconi itide, tacara huahua nadsa itide, ssiajadsa itide” quinajari. Tiadeni naqui occaronapomanicca huadatohui tinajoramanehe timadimanaji, onajaro. <sup>36</sup> Ajana, odsa cacahuadedeni jinedetohui najoramana-jaradsapa nassa cahadijadsa bacco naninaja. Tiadeni naqui ohua occaronapomadsapi tinajoramana-jeradsa bacco onanirana. <sup>37</sup> Nadsapi tiadenidsa ohuattipi ajima onajaro: Occaronapomanicca huadatohui tinajoramanehe timadimanaji. Madija huapima naco nama quinana, onajaro –nahi nade Jeso.

## 14

### *Jeso todsepe tojahijine imahaha canajari*

*Mateo 26.1-5; Roca 22.1-2; Huano 11.45-53*

<sup>1</sup> Jodiodenicca ejete pamehe tohuajirajonajaro. Tahidecca huadadsapi Pascoa tojapojaro. (Ettidsapi: Dio tossoqquimajari, inajaro.) Dsotodepi Pan ssaja tajarahi jipamanajaricca ejete tojapomajaro. Najaro ejete tojanijinecca huada pamehe dsori taccadsapi ajijaro ima tojajaro. Dada toqquimade taminedeni, jodiodenicca marinaja maridedeni quinajaridenipa Jesodsa jiperaqquri najari huapima queriqquidsa: — ¿Nejeco maidsehedsa Jeso todsepe tojadsa dsoqquehijine? –quinahi nade. <sup>2</sup> Naraha pohuadeni atti onihipi: —Ejete tojadsapi ima nohueraccanijine. Jesodsa madija jipaqquri najarideni pohua dama inahi qqui toquinadsapa mohua mohua canarana –quinahi nade.

### *Jeso tatidsa majoyo sso inarijarocca ima*

*Mateo 26.6-13; Huano 12.1-8*

<sup>3</sup> Jesopa odsa capamema najaro onini Betaniahuaji madidsa Ssino huapi jadsidsi quiquinanajaricca odsadsa toqquedsimajari. Nahi Ssinocca odsadsa jipade jassi taridsa amoneje Jesodsa tohuajiressijaro, poni dsapanidsa siba onini alabastro nahatoni jojo bicahi dsojo inajonajari. Najari jojodsa majoyo bicani oninipi nardo dsojo icadsimajaro. Najaro majoyopi passodsa quejemerani, huatini ccara tanicca. Nadsapi jojo bono idejidsadsa Jeso tatidsa nemanenehe sso inarijaro. <sup>4</sup> Naraha nahidsa jassi tarijarideni motaha huadimanadsapa pohuadenira imahahacossieri najari: — ¿Nejecotohui majoyo ponima inajicajaro? –quinahi nade. <sup>5</sup> —Najaro majoyo manaconipi dsinero ccarara 300 denario denima nitide. Iadsa da inadsapi madija cappiramanajaridenidsa da iqquimanitohuiraha –quinahi nade, pohuadenira huati canirere canadsa. Nadsapa ponidsa naco atti quinajari nade. <sup>6</sup> Naraha Jesoa: —Epeje tiquinaji. ¿Nejecotohui ponidsa tedimanajaro? Ponijine ohuadsa nema nadsapi bica tani. <sup>7</sup> Cappiramanajaridenina tiadenidsa madimana-dsanapohuitohui. Tohuini tiquinadsapi pohuadeni tinanabica-baqquimanahijine bica taraha ohuapi tiadenidsa omadidsanapo-jeranitohui. <sup>8</sup> Aji majoyo ohuassiredsas sso inarijaropi pina odsoqquedsa ohua ppa idsamananijinessa najaro najorapojaro –nahi nade. (Jodiodenipa poccadeni madija dsoqquedsapa nama quiquinanajari.) <sup>9</sup> —Pajissara tiadenidsa huati onajaro: Dsama onihini, dsama onihidsa otahimari madija tocassiejerahijinecca ecomeramanadsapi aji otatidsa majoyo sso inarijarocca ima naqui madija mittaridsamanahitohui. Nema nadsapi ponicca ima huatideni ajamamanajarahitohui –nahi nade Jeso.

### *Jodapa Jeso eccorahijine najorajari*

*Mateo 26.14-16; Roca 22.3-6*

<sup>10</sup> Jesocca dodosse tabaqqui 12 quinajari ojaria oni Joda Iscariotepa dada toqquimade taminedenidsa Jeso eccorahijine huatide toccajari. <sup>11</sup> Nadsapa Jodacca ima mittamanadsa huatidsemanajari: —Jehe, Jeso teccorajari manaco dsiniro tiadsa da inana –quinahi nade. Nadsapa Joda toccanidsa pohua bodi najorajari. Jeso pohuadenidsa eccorahijine inoccodsaridsajari.

*Ia Medsedecca jipacquie*

*Mateo 26.17-29; Roca 22.7-23; Huano 13.21-30*

<sup>12</sup> Pan ssaja tajarahicca ejete bacco tajaropi huada 7 nehe jicanijine. Najaro ejetecca huada tahideccadsa jodiodeni pohuadeni motta edede bedi Diodsa da da quiquinanajari. Edede bedi inanadsoqqe-manadsa ibanamanadsapa jipamanajari. Najaro ejete oninipi Pascoa quinajari. Nadsapi najaro huada bacco tadsa Jesodsa pohua huatimadedeni huati toquinajari: —¿Nejecohuaji Pascoacca jipacquie tiadsa inajoranijine? –quinahi nade. <sup>13</sup> Nadsapa pohua huatimadedeni pamahadsa huati tajari: —Odsa pananihuaji ticadapoji. Maqquideje jojoridsa passo dsojo tanihi bacco tiquinadsapa pohua natti ticadamissana. <sup>14</sup> Pocca odsadsa toqquedsimanidsapa nahicca odsa jinededsa huati tiquinana: “Ia Maride attipa: ‘¿Nejecohuajicca coba canahuajaninidsa Pascoacca jipacquiedsa ojipanijine ohuatimadedeni tedseje?’ napaja” tiquinana. <sup>15</sup> Nadsapa pocca odsa tetepicca coba canahuajanini imeni tiadenidsa nohue inanitohui. Nanidsapi huahuanari, huihuittari najoraponi. Nanid-sana jijipa tinajoramanaponijine –nahi nade Jeso. <sup>16</sup> Nadsapa tohuedadsapa pina Jeso pohua huati tajarissa najaro odsa najorani qqui toquinajari. Nanidsa Pascoacca jipacquie dsome jipacquimanahijine najoramanajari.

<sup>17</sup> Jesopa pocca dodosse tabaqqui 12 quinajari tedseje dsomejonadsa jipacquimanahijinecca odsadsa bacco toquinajari. <sup>18</sup> Huahuanaridsa jassi nahujanidsa jipade toquejenadsapa Jeso huati tajari: —Pajissara tiadenidsa huati onana: Ohuadsa jipade tiquejenaraha ojaraha ohua ccaccoradsapa todsepe ojanitohui –nahi nade Jeso. <sup>19</sup> Nama nadsapa pohuadeni bodi qquedsadsa: —¿Aji ohuadsaqui? –naridsamanajari. <sup>20</sup> Nadsapa Jeso attia: —Tiadeni 12 tiquinaraha ojariana icca paratodsa pohua naco pocca pandsa depo apa, depo apa nahi. Najarina ohua ccaccorahitohui. <sup>21</sup> Jehe ohuapi Madija Bedi ojararoa nidsa odsoqquenitohui. Pina maittaccadsama otedsejemacca ima Dio Atti cacomeraqquri najarideni dsodo quinapjarossa onanitohui. Naraha ohua ccaccoradedsa oppina tehe tojanitohui. Jaho, najari maqquideje tossonajaradsapa bica taraha, oppina tanicca dsori tahitohuiraha –nahi nade Jeso.

<sup>22</sup> Nadsapa jipade toquejenadsa Jeso pan idi nadsa Diodsa huati tajari: —Jehe Abi Dio, ticca daniji iadsa bica tahi –nahi nade. Nadsapa pan icanarobedsa dside jai da, dside jai da inaridsajari. Pohua huatimadedenidsa huati tajari: —Aja, apa tiquinajo. Ajijaropi ohuemecca ima –nahi nade Jeso.

<sup>23</sup> Dsotodepa dse quinahijine dsedse equidi nadsa Diodsa huati tajari: —Jehe Abi Dio, ticca daniji iadsa bica tahi –nahi nade. Nadsapa pohuadenidsa da icanadsa dse naridsamanajari. <sup>24</sup> Nadsapa pohuadenidsa huati tajari: —Ajajari dsedsepa ohuemenecca ima. Dio madija tedseje jehe canirehijinecca ima tojanijine. Nidsa ohua odsoqquedsa ohuemene toccadsapi najaro jehe canireniji pajissa tojanitohui. Aji ohuemene toccajaropi madija huapimadsa ima bicani tojanijine. <sup>25</sup> Pajissara tiadenidsa huati onajaro. Aja uva ppejene dse inajaripa dse onapoma-jaraccahitohui. Nidsa memehuaji Diocca cacahuehedsana uva ppejene ohuaha dsatira dse onahitohui –nahi nade Jeso.

*Pedro pohua namahidsahijine Jeso huati tapojari*

*Mateo 26.30-35; Roca 22.31-34; Huano 13.36-38*



<sup>26</sup> Pascoacca jipacquie jicadsapi Diodsa jiri quinajari. Jiri quinaha jicadsapa ssono Oribohuaji jai tojemoranijari. <sup>27</sup> Nahihuaji bacco tomoramanadsana pohuadenidsa Jeso huati tajari: —Tiadeni huapima ohua tinebomananitohui. Pina Dio Atti dsodo napojarodsapi ajima nanitohui: “Nidsa edede cacahuade dsoqquedsapa pocca edede tojaribaqquihitohui.” <sup>28</sup> Naraha ohuapi Diojine onahatoninitohui. Onahatonidsapi titedsejemadeni dsama arobeni Carireahuajina occaninitohui —nahi nade Jeso.

<sup>29</sup> Naraha Pedro attia: —Huapima tia inebomanaraha ohuapi tia onebo-geranitohui —nahi nade. <sup>30</sup> Nadsapa Jeso Pedrodsa: —Pajissara tiadsa huati onana: Tiapi ajijaro dsome tacara huahua nahi pama najaraccadsa ohuadsa: “Onocco jidsa tani” tanitohui. Dsotode naqui: “Onocco jidsa tani” tapomanitohui. Dsotode naqui nema tapomanitohui —nahi nade Jeso. <sup>31</sup> Naraha Pedroa: —¡Nohuerani! ¡Ohuapi nema onejeranitohui! —nahi nade. —Ima oppina tadsa naqui tiadsa “Onocco jidsa tani” onejeranitohui. Tiadsama odsqqueneijine bica tani —nahi nade Pedro. Jeso huatimadedeni huapima naco attideni nama quinahi nade.

### *Jesemanihuaji Jeso Diodsa huati huati tajari*

*Mateo 26.36-46; Roca 22.39-46*

<sup>32</sup> Nadsapa najaro ssonodsa ahua ppa nahi oni Jesemanihuaji jai tojajari. Bacco toquinadsapa Jeso attia: —Tiadenipi ajidsa jassi tinaccaji. Ohuapi ajicadsa Abi Diodsa huati onaccana —nahi nade pohua huatimadedenidsa. <sup>33</sup> Nadsapa Pedro, Satiaco, Huano quinajarideni jina inabaqquidsapa najaridenina pohuadsa denima jai tojajari. Nahidsana Jeso bodi qquedsadsapa ojibote najari. <sup>34</sup> Nadsapa pohuadenidsa: —Obodi ocassera tajarojine ohuatiabote-te canani. Tiadenipi ajidsa tibomanaccaji. Tinoccodeni bissaccana —nahi nade Jeso.

<sup>35</sup> Nadsapa Jeso tocca-cca nadsa pohua bacchohuaji namidsa pona nadsa Imehidsa huati tajari: —Abi, aji ima comabotepi ohuadsa huaji tinanaji. ¿Madija tocassiejerahijinecca ima onihi nohueraqui? Nohueradsapi epeje —nahi nade. <sup>36</sup> Imehidsa huati tapomadsa naco: —Abi, nahato tinani. Madija huapimacca ima manaconi najidsohue ohuadsa tojadsapi ocasserani ohuanitohui. Pina dsedse bidabote dse onanijinessa najaro. Najaro onahananijine jipera onaraha ohua jipa onanicca tohui onejerajaro. Tia jipa tinaniccana paji. Najarodsana ibora onajaro —nahi nade Jeso.

<sup>37</sup> Nadsapa pohua huatimadedenihuaji ccanijari. Bacco nanidsapa cahadijahira qqui tajari. Nadsapa Pedrodsa Jeso huahua najari: —Ssino ¿tedajaroqui? ¿Dsome nocconi ocaja-geraraha tinoccodeni bissade tipajiramana-gerajaroqui? <sup>38</sup> Ticahadija-geradsa Diodsa huati tiquinaji, ima oppina tehe tojadsapi tijaparimanadsa ima tinanamana-geranijine. Tibodidenipi ibora taraha tessiredenina mijira tajaro —nahi nade Jeso.

<sup>39</sup> Nadsapa toccanipomadsa pina Imehidsa huati tapohuissa najari huati tapomajari. <sup>40</sup> Nadsapa pohua huatimadedenihuaji ccanipomaraha cahadijahira qqui inabaqquijari, huada comani ahuamanaja nadsa. Jeso ccanidsa nocco toquejenajari. Naraha pohuadsa huati toquinahijine tossamomanajari. <sup>41</sup> Diodsa huatide tocanajoranipomajari, pohua huatimadedenihuaji ccanipomadsapa: —¿Tiadenipi ticahadija dsanaponijinequi? Epeji, ohuapi Madija Bedi ojajaroa jidapapi ohua ccaccoradejine imasiri cajimanajarideni dsapedenidsa ojanitohui —nahi nade. <sup>42</sup> Nadsapa: —Jina, titehemamanaji. Ajana, jidapapa ohua ccaccorade ccajonahi —nahi nade Jeso.

### *Jodajine Jeso dama quinajari*

*Mateo 26.47-56; Roca 22.47-53; Huano 18.1-11*

<sup>43</sup> Jeso huati huati naccaraha Joda bacco najonajari. Jodapa Jeso pocca dodosse tabaqqui 12 quinajarideniraha. Pohuana madija huapi taha eccajonabaqquijari. Jadsirecca massito eccajonamana, huahuacca eccajonamana najaro. Pohuadenipa

dada toqquimade taminedenicca dosseniji, jodiodenicca marinaja maridedenicca dosseniji, ime jocohuidenicca dosseniji jahijonajari. <sup>44</sup> Jodapa Jeso todsepe inanahijine eccajonabaqqui-jaraccadsama taminedenidsa huati tapojari: —Nidsa pano mose onahitohui. Najarina dama tiquinadsapa biji jore tiquinadsa teccanimanana –napojari nade. <sup>45</sup> Nadsapa huapima jahijonadsa bacco najonamanajari. Nanaja Joda Jesodsa tohuajiressi, pina pajissa pohuadsa bica tajarissa nadsa: —¿Nija ohua Maride? –nanaja pano mose inajari. <sup>46</sup> Nadsapa Jeso dama quinajari. <sup>47</sup> Naraha Jesocca madija ojariana massito dsoppa jeo, dada toqquimadedenicca tamine deni tojajaricca medse huaribo ca taneje tajo canajaro.

<sup>48</sup> Nadsapa Jeso pohuatohui jahijonajaridenidsa huati tajari: —¿Nejecotohui tiadenipi ohua dama tiquinanijine jadsirecca massitoma, huahuaccama jai tijajonajaro? Nema tiquinadsapi pina bobotidetohui jai tijajonajarossa najaro. <sup>49</sup> Nadsa tiadenidsama huajijiradsa Diodsa dada toqquimahuaji mari mari ohonanaraha ohua dama tiquinehe nejerade. Naraha epeje, najaropi pina aji Dio Atti dsodo napojarossa najaro tojanijine –nahi nade Jeso.

<sup>50</sup> Nadsapa pohua huatimade huapimapa Jeso inebomanadsa domo toccajari. Nadsapa Jeso pohua motta ojari naha iaccanimanajari. <sup>51</sup> Naraha dsabissopa pohua tettepedsara pohua teppe nadsa Jeso iaccanimanahi natti toccamissajari. Nadsapa Jeso tohuaccanidedeni pohua qqui quinadsa dama quinaraha <sup>52</sup> pohua tetteppe ssiti, ccoroje joppa tadsapa dsori tajari nade.

*Dada toqquimadedenicca tamine deni tojajaridsa Jeso iaccamanajari*

*Mateo 26.57-68; Roca 22.54-55, 63-71; Huano 18.14*

<sup>53</sup> Jeso dama quinadsapa dada toqquimadedenicca tamine deni tojajarihuaji iaccamanajari. Nadsapa nahidsa dada toqquimade taminedeni queriqquijari, ime jocohuideni, jodiodenicca marinaja maridedeni huapima naco nahidsa toqueriqqui najari. <sup>54</sup> Naraha Pedropa huajima tohuanamissadsa dada toqquimadedenicca tamine deni tojajaricca boronidsa bacco todsimajari. Caipacca dodosse tabaqquidenidsama huittajari. Jassi nahujanidsa dsippodsa pohuadeni dsepe da quinajari.

<sup>55</sup> Nadsapa dada toqquimade taminedeni, jodiodenicca ima cacattemedenedeni deni toquejenajarideni tedseje Jesodsa ima inassonarimananijine tohuini quinadsa madijadsa huati taridsamanajari. Aja madija attidenipa: —Jesopa icca marinajadsa oppina tanicca inanapaja –quinadsa taminedeni: —Jehe, najaro imadsa Jeso dsoqquehijine pajirahi –quinaraha ima oppina tanicca bacco quina-jerani. <sup>56</sup> Madija huapi taha maidsaniji onihi onihi huati toquinaraha poccadeni imapi najarossa naridsa-jerani. <sup>57</sup> Nadsapa madija ohuahadeni totehemamanadsa Jesodsa poccadeni maidsaniji inassonarimanajaro. <sup>58</sup> Attidenipa: —Titaharibobo canaji. Jeso atti ajama nahi imittade. Pohua attia: “Aji Diodsa dada toqquimacca odsapi madija icanahatomanaraha ocatabodsapi huada 3 nadsa ocanahatoninitohui. Najaropi madija icanahatomana-jerani” nade pohua atti –quinahi nade. Pohuadeni atti nama quinaraha maidsamanajari. Pina Jeso attissa nejerani. <sup>59</sup> Naraha pohuadeni pama-hacca ima nemanehipi najarossa nejerani. Najaro imadsa naqui Jeso inanadsoqque-manahijine pajira-jerani.

<sup>60</sup> Nadsapa dada toqquimadedenicca tamine deni tojajari totehema, hua nadsa Jesodsa huati tajari: —¿Tiapi tia tecomajaroqui? Tiadsa ima inassonarimanajaropi ¿nejecoma naneje? –nahi nade tamine atti. <sup>61</sup> Naraha Jesopa pohua cacoma najari. Nadsapa tamine huati nimanipomajari: —¿Tiapi Cristo-Mesia tijaqui? ¿Dio Bicabote Bedi tijaqui? –nahi nade tamine. <sup>62</sup> Nadsapa Jeso: —Jehe, nema onajaro –nahi nade. —Ohuapi Madija Bedi ojajaroa nidsa dsotode Dio Dacorabote ohua deni tonanadsapa Pohua inori nahatonihuaji ohuittarini qqui tiquinanitohui. Nidsa meme essenima occaronapomani ohua qqui tiquinanitohui –nahi nade Jeso atti.

<sup>63</sup> Nanaja dada toqquimadedenicca tamine deni tojajaripa Jeso atti mittadsa huati jami nadsa pocca etero joca taneje sseo najaro. Nadsapa huapimadsa huati tajari: — ¡Epeje! Jidapapi pocca ima nahatoqquiri inani. Madija ohuahacca imatohui huati inejerana. <sup>64</sup> ¡Dio itamassojar! “Ohuapi Dio ojani” najarissa naha. Pohua atti tabaccora tani timittamanani. ¿Jari, tettideni nejecoma tiquinani? –nahi nade Caipa. Naraha huapima: —¡Jehe, pohua atti nama nadsapa dsoqquena inajaro! –quinahi nade.

<sup>65</sup> Nadsapa pohuadsa ppito-to ppito-to canajari, nocco ssoque quinadsapa idaqquimanajari. Nadsapa attidenia: —Jari ¿nejecojari tia idajari? ¡Tecomerajo! –quinahi nade. Nadsapa dada toqquimahuajicca cacahuadedeni Jeso pohuadenidsa tojadsapa pohuadeni naco Jeso idaqquimanajari nade.

*Pedropa Jesodsa: —Onocco jidsa tani –najari*  
*Mateo 26.69-72; Roca 22.56-62; Huano 18.15-29*

<sup>66</sup> Jesopa odsa bodihuaji nanajidso tojaraha Pedropa amossinihuaji boronidsa huittajari. Nadsapi aji dada toqquimadedenicca tamine deni tojajaricca medse dsohuato ccajonajaro. <sup>67</sup> Pedro dsippo jiade tojahi qqui tadsa icattoma nadsapi pohuadsa huati tajaro: —Tiapi Jeso Nasaretihuajicca huatimade tijadija –nani nade. <sup>68</sup> Naraha Pedro pohua namajidsajari: —A, ohuapi onocco jidsa tani. Qqui onajarade. Najaro ima ssamo onani ohuapi –nahi nade. Nadsa Pedropa boroni qqequequedsimahuaji toccadsa huajari. Nanaja tacara huahua najari. <sup>69</sup> Naraha taminecca medsepi Pedro qqui inapomadsa nahidsa toqueriqquijaridenidsa huati tapomajaro: —Ajajari maqquidejepa Jeso huatimadedija –nani nade. <sup>70</sup> Naraha Pedropa pohua namajidsapomajari: —Onocco jidsa tani –napomahi nade.

Naraha dsotodepa nahidsa toqueriqquijari attidenipa: —¡Pajissade! Tiapi Jesocca tijade. Carireahuajicca madija tijaha –quinahi nade Pedrodsa. <sup>71</sup> Nadsapa Pedro huadijari. —Pajissa huati huati onejeradsapi Dio ohua tinajidsoji, onana. Pajissa tiadenidsa huati onajaroa: Pohuadsa onocco jidsa tani. Jidacca najari tahimari huati tiquinajaro ohuapi qqui qqui onajaradija –nahi nade Pedro. <sup>72</sup> Nanaja tacara huahua nimanidsapa Jeso atti Pedro bodi huatomanijari: —Tacara huahua najaraccadsapa tetti tinamajidsani 3 nanitohui –napojari. Aja Jeso atti Pedro bodi huatomanidsapa bodi qqequequedsadsa oji idimajari nade.

## 15

*Tamine Piratodsa Jeso iaccamanajari*  
*Mateo 27.1-16; Roca 23.1-5; Huano 18.28-40*

<sup>1</sup> Ssajadsapi dada toqquimade taminedeni, ime jochuideni, jodiodenicca mari-naja maridedeni, jodiodenicca ima cacattemededeni huapima queriqquimanadsa pohuadenira imahaha canajari. Jehe caniredsapa Jeso biji jore quinadsa tamine Piratohuaji iaccamanajari, —Jeso dsoqquena –quinahijine. Tamine Piratopa romanodeni. Pohuapa jodiodenicca dsama cacahuade tojajari. <sup>2</sup> Nadsapa tamine Piratohuaji Jeso iaqqequequedsimamanadsapa Pirato Jesodsa huati tajari: —¿Tiapi jodiodenicca tamine tijaqui? –najari nade. —Jehe, tetti nema tajaropaji –nahi nade Jeso.

<sup>3</sup> Nadsapa dada toqquimade taminedenipa Piratodsa poccadeni maidsehe huati toquinajari. <sup>4</sup> Nadsapa Pirato Jesodsa huati tapomadsa: —¿Tia tecomera-jerajaroqui? Aja pohuadenipa ticca imapi tabaccora tani huapi tani huati huati toquinaha –najari nade. <sup>5</sup> Naraha Jeso joma najari. Nama nadsapa tamine Pirato jabojo najari. Pohua bodipa: —¿Nejecotohui pohua cacomajari? –najari nade.

*—Baraba qquenana, Jesopa dsoqquena –quinajari*  
*Mateo 27.15-31; Roca 23.13-25; Huano 18.38-19.16*

<sup>6</sup> Huajano huajijiradsa jodiodenicca ejete Pascoa tojadsa tamine Piratopa toponi cocorodsa madija huedsamanajari ojaria pohuajine qqueqquenamana najari. Madija huapima: —Najari qquenana -quinadsapa ihineqquena najari. Piratopa najarossa inananihijine najorajari. <sup>7</sup> Nadsapa toponi cocorodsa huedsajari ojaria onipa Baraba. Barabapa toponi nanajidsodedeni tedseje toponi cocorodsa domo huedsajari. Pohuapa pohua tessedeni tedseje romanodenicca taminedsa jara jara quiquinanadsa madija ojaria ijinedeni ahuamanajari. <sup>8</sup> Nanaja madija huapima tamine Piratodsa huatide jahijonadsa attidenipa: —Ejete Pascoa tojadsapi toponi cocorodsa huedsajari ojaria tijine qqueqquena nade. Najarossa tinanapomaji inajaro -quinahi nade. <sup>9</sup> Naraha Piratoa: —Jehe, aja pohuadsa: “Jodiodenicca tamine” quinajari tappa onahijine ¿jipaqquri tiquinaqui? -nahi nade.

<sup>10</sup> Piratopa pohua bodidsa Jesopa ima cappirahi nahato tapojari. Pohua bodipa: —Dada toqqumade taminedenipa Jesocca deni tojehe acconi huadimanadsa ohuadsa eccajonamanajari -najari. <sup>11</sup> Naraha dada toqqumade taminedenipa Jeso tossiajahijine jiperaqquri nadsa madija huapimadsa huati naridsamanapojari: —“Barabana qquenana” tiquinaji -quinahi nade. Nadsapa huapima Barabatohui johuahua johuahua canajaripaja.

<sup>12</sup> Naraha Piratopa domo huajaridenidsa huati tapomajari: —Jehe, naraha pohuadsa “Jodiodenicca tamine” quinajaripa ¿nejecoma onanahijine jipaqquri tiquinani? -nahi nade. <sup>13</sup> Naraha huapima johuahua johuahua canapomadsapa: —¿Ahua porimacossanidsa dsoqquena, dsoqquena! -quinahi nade. <sup>14</sup> —¿Naraha nejecotohui dsoqquehijine? ¿Nejeco imara inanajaro? -nahi nade Pirato. Naraha domo huajarideni huapima paja johua toquinarihi nadsa: —¿Ahua porimacossanidsa dsoqquena, dsoqquena! -quinahi nade.

<sup>15</sup> Nadsapa tamine Pirato pohuadsa madija huapima huatidsemanahijine Baraba ineqquenajari. Nadsapa pocca soldadodeni Jeso cossi inaqquimanahijine icadossebaqqujari. Cossi inaqquimanaha jicadsapa icadossebaqquipomajari: —Ahua porimacossanidsa coba tidsanamanahijine tiaccamanajo -nahi nade Pirato.

<sup>16</sup> Nadsapa tamine Piratocca soldadodenipa odsa imeni bodihujicca boronidsa Jeso iaqquedsimamanajari. Nahidsa romanodenicca soldado huapima toqueriqquijari. <sup>17</sup> Pohuadenipa: —Jeso pina taminessa inanana -quinaraha maidsamanajari. Nadsapa etero macconi motaranicca pina taminedeniccassa najarodsa Jeso inehedsamanajari. —Jeso taticca pina tamine tatideniccassa nana -quinaraha cotihi atinema jore nahuajanihira ettarianajari. <sup>18</sup> Nadsapa jaja icanaqquimanahijine pohuadsa: —¿Deni tijani jodiodenicca tamine! -quinahi nade maidsamanadsa. <sup>19</sup> Pohua tatidsa ahua ppahua tajarodsa huacca huacca quinajari. Ppito inaqquimanajari. Nadsapa: —Pina taminedsassa inana -quinadsa Jeso bacchohuaji pohuadeni pitodsa huittamana, tocattedsamana, huittamana, tocattedsamana naraha maidsamanajari. <sup>20</sup> Nadsapa maidsehedsa pohuadsa jidsa jidsa quinaha jicadsapa etero macconi motaraniccapi ssiti quinadsa pohua pocca eterora inehedsanimanajari. Nadsapa ahua porimacossanidsa Jeso coba idsanamanahijine iaccamanajari.

*Jeso ahua porimacossanidsa coba idsanamanajari*

*Mateo 27.31-56; Roca 23.26-40; Huano 19.16-30*

<sup>21</sup> Soldadodenipa Jeso iaccamananaja dsama Sirenecca madija Ssinopa huid-sajahuaji ccanidsa soldadodeni bacco ijidsamanajari. Najari Ssinopa Arejadro, Rofodenicca abi. Jeso ahua porimacossani dsojo inaraha ja tojadsa soldadodenipa Ssino icadossemanajari: —Manaco tia ajajaricca ahua porimacossani dsojo tinaji -quinadsapa manaco Ssinona dsojo inajaro. <sup>22</sup> Nadsapa ssono Cocottahuaji Jeso iaqquemoramanajari. (Ssono onini Cocotta ettidsapi: Totati Tonanissa nani, quiquinanajari.) <sup>23</sup> Nahidsa bacco toquinadsa uva ppejene, ahua amani onini

mirra quejemadsa Jesodsa da icanamanajari, —Pohua comene ojidsama nanijine –quinadsa. Naraha Jesopa pohua najari nade.

<sup>24</sup> Nadsapa ahua porimacossanidsa coba idsanamanajari. Coba idsanamanaha jicadsapa acca icanamacossa-manajari nade. Nadsapa soldadodeni: —¿Jesocca etero nejecojaridsana tojanijine? –quinadsa siba bedenidsa coro coro quinajari. Najaro sibadsa ittomemanadsapa pocca etero pohuadenidsa ojari ojari naridsajaro nade.

<sup>25</sup> Dsidsidsamassa maji 9'dsa Jeso coba idsanamanajari. <sup>26</sup> Pohua tati tetepihuaji dsodo nani coba idsanamanajaro. Najaro dsodo nanipi: —Ajararipa Jodiodenicca Tamine –najaro. <sup>27-28</sup> Bobotide pamaha naco Jesodsama topamajonahijine ahua porimacossanidsa cobaba idsanamanajari. Ohuahapa Jeso inori nahatonihuaji que, ohuahapa Jeso inori ssamohuaji que tajari nade.

<sup>29</sup> Madija nahi jai tojeqqumajarideni Jesodsa jiperaqquri nadsa Jesodsa tatamasso quinajari. Tatideni huide huide quinadsa attidenipa: —Ajina tettipi: “Diodsa dada toqquma ocatabodsapi huada 3 nadsa ocanahatoninitohui” teteje nade –quinahi nade. <sup>30</sup> —Jari, tia tinassiajaji. Ahua porimacossanidsa tia tidinidsa ticcaronaji –quinahi nade. <sup>31</sup> Nadsapa dada toqqumade taminedeni, jodiodenicca marinaja maridedeni quinajaridenipa Jeso itamassomanajari: —Ajana madija ohuaha inassiajabaqquiraha pohua tonassiajadepa ssamo tahi. <sup>32</sup> Puhuapa Cristo-Mesia Isaraeri potemahi jodiodenicca tamine tojadsapa porimacossanidsa ccaronana. Nadsana qqui inadsa pohuadsa pajissa inanijine –quinajari. Pohua inoricca naco ahua porimacossanidsa cobaba dsanaraha najaro tohuattissa najarodsa Jesodsa atti atti quinahi nade.

### *Jeso huatiajari*

*Mateo 27.45-56; Roca 23.44-49; Huano 19.28-30*

<sup>33</sup> Maji itetepi tojadsa dsama nemanehetodsidsini najaro. Dsidsi dsanapojaropi maji 3 bacco tajaro. <sup>34</sup> Najari maji 3'dsa Jesopa pohua attidsa jadsirema huahua najari: —Eroi, Eroi ¿rema sabatani? –nahi nade. (Najaropi: —Abi Dio, Abi Dio ¿nejecotohui ohua tinebojaro? –najari nade.) <sup>35</sup> Naraha nahidsa domodeni huajari mittamanadsapa: —¡Titaharibobo canaji! Maittaccadsamacca Dio Atti cacomerabote Eriadsa huahua nahi –quinahi nade. <sup>36</sup> Nadsapa nahidsa domo huajari ojaria huassinaja joppa tajari, huassa tajari idi, uva ppejene ssicata bidada najaridsa edsippa, ppaja tojadsa bobadsa oro, da icanamacossajari. Nadsapa najari attia: — ¡Maqui, nidsa padseje! Pohua idironahijine Eria ccajonahitidija. Qqui inaccana –nahi nade.

<sup>37</sup> Naraha Jeso jadsirema johua nadsapa huatiajari. <sup>38</sup> Naneje Diodsa dada toqquma bodihuajicca huahuacossa etero sibabote naqui Diojine sseo naronajaro, carobe najaro. <sup>39</sup> Nadsapa Jeso bacohuaji soldado tamine Jeso cacahuade huajaripa Jeso huatiahi qqui tadsa: —¡Jaho! Pajissa ajari maqquidejepa Dio Bediraha –nahi nade soldado tamine atti.

<sup>40</sup> Amonejedeni naqui huaji tanidsa cattade domoni huajaro. Ponidenipi huapi taraha mota oninidenina Maria Madarenahuajicca, Jose Satiacodenicca ami Maria, Sarome quinajaro. <sup>41</sup> Mariadenipi Jeso dsama arobeni Carireadsa ccaridsapodsa pohua accode pohuadsa jahiridsajaro. Amoneje onihideni naqui huapi tani. Ponidenipi Jerosarehuaji Jesodsa jahijonajarodeni.

### *Jeso ppa idsamanajari*

*Mateo 27.57-61; Roca 23.50-56; Huano 19.38-42*

<sup>42</sup> Jeso dsoqquehicca huadapi viernes. Jodiodenipa najaro huadadsa poccadeni jassinajacca huadatohui nanajoramana najari. Huada ssiaja sabadopoccadeni jassinajacca huada tojadsapi dsepedeni ihijimana najarajari. Madija dsoqquedsa ppa idsamanahijine naco oppina tani quiquinajari. <sup>43</sup> Nadsapa viernes dsomebote



nadsa odsa panani Arimateahuajicca madija oni Dsodsepa cappinera tadsa tamine Piratodsa huatide toccajari. Pohuapa jodiodenicca ima cacattemadedeni ojaria. Madija huapimapa pohuadsa nahatoqquiri najari. Pohua naco Diocca cacahueheto-hui najoraha madijari.

Nadsapa tamine Piratodsa bacco tadsa Jeso assire ppa idsahijine huati tajari. <sup>44</sup> Naraha Dsodse atti mittadsapa Pirato jabojo najari, —Jeso amadsati huatiahi —quinahi mittadsa. Nadsapa huahua najari soldadodeni tamednsa: —Nija ¿pajissa jidaccadsama dsoqquejarico? —nahi nade Pirato. <sup>45</sup> Nadsapa soldadodenicca taminea: —Jehe, pajissa, dsoqquejaripa —nadsapa Pirato Dsodsedsa: —Jehe, Jeso assire dicca tadsa ppa tidsahijine tiaccao —nahi nade. <sup>46</sup> Nadsapa Dsodse etero dsojorani onini lino, bica tanicca mittade toccajari. Mitta inadsapi Jeso coba dsanaha que tahihuaji tocanajoranjari, Jeso assire dicca inadsa eterodsa jore inaqqujari. Nadsapa Jeso assire tonocobirihuaji dsojo inajari. Nanidsa tonocobirijine sibadsa hui todsimani najorapojaro. Nahidsa Jeso assire dsojo idsimadsa ibedsajari. Siba imeni pata inanidsa Jeso noccobiri odinihuaji ecossajaro nade. <sup>47</sup> Nanidsa Maria Madarenahuajicca, Josecca ami Maria quinajarodeni Jeso assire ibedsahi qqui toquinajaro.

## 16

### *Jeso nahatonijari*

*Mateo 28.1-10; Roca 24.1-12; Huano 20.1-10*

<sup>1</sup> Jassinajacca huada jicadsapi Maria Madarenahuajicca, Maria Satiaco imeni, Sarome quinadsa ahua majiconi majoni bica tajaro mittade jai tojajaro, Jeso assire huira inarimanahijine. <sup>2</sup> Semana tojapomanicca huada tahidecca domingo dsidsidsamassa maji ssido najonadsa Jeso noccobirihuaji ahua majiconi majoni bica tajaro iaccamanajaro. <sup>3</sup> Nadsapi Jeso noccobirihuaji jai tojadsa imahaha cadsanapojaro: —¿Nejecojari ia acco camapadsaja, Jeso noccobiricca siba imeni pata inanijine? —quinani nade. <sup>4</sup> Naraha bacco toquinadsa qqui toquinaneje tonoccobiripi tohuabeje najaro. Siba imenipi pajimaranihuajina huitteje najaro. <sup>5</sup> Nadsapi jai tojedsimadsa qqui toquinaneje dsabisso eterori nopo taha nahatonihuaji huittari canajari. Nadsapi jabojo quinajaro nade. <sup>6</sup> Dsabissopa ponidenidsa huati tajari: —¡Ticappinamana tejeraji! Tidenipi Jeso Nasaretihuajicca qquide jai tijajonajaro. Najaripa ahua porimacossanidsa coba idsanamanadsa dsoqqueraha nahatonijari. Ajadsapa nohuerahi. Jari, pohua ibedsamanahihuaji qqui tiquinajo. <sup>7</sup> Nadsapi jai tijanidsa pohua huatimadedenidsa, Pedrodsa naqui ima huati tinanimanaji. Jesopa titedsejemadeni dsama arobeni Carireahuaji toccanipohuitohui. Nanihuaji jai tijanid-sana pohua qqui tiquinahijine, pina pohua dsoqque-jaraccadsama tiadenidsa huati tapojarissa najaro —nahi nade dsabisso atti. <sup>8</sup> Nadsapi amonejedeni jabojomandasa tacca-cca-cca quinadsa tonoccobirihuaji domoni qquenadsapi domoni toccanijaro. Nadsapi jahui domoni ccanidsapi cappinamaneri nadsa Jeso nahatonihicca ima huati toquina-jeraccani nade.

### *Jesopa Maria Madarenahuajicadsa ahuatomajari*

*Huano 20.11-18*

<sup>9</sup> Jesopa semana tojapomanicca huada tahidecca domingodsa dsidsidsamassa nahatonijari. Nahi dsotodepa Maria Madarenahuajicadsa ahuatomajari. Najaro Mariapi tahide poni bodinidsa tocorime 7 quinaha cajiporaha Jeso dosse ininebaqqujari. <sup>10</sup> Maria Madarenahuajicca Jeso qqui tadsapi pohuadsa jahiridsapo-jaridenidsa huatide joppa nanijaro. Pohuadenipa oji oji camaraha Maria bacco nanidsa Jeso nahatonihic tahimari huati tajaro. <sup>11</sup> Poni attinipi: —¡Jesopa camitemanidsa madipa! ¡Pajissa qqui onapa! —nani nade. Naraha poni attinidsa pajissa quina-jarajari.

*Jesopa pahuadsa pajissa quinajarideni pamahadsa ahuatomajari*

*Roca 24.13-35*

<sup>12</sup> Dsotode naco Jeso pahuadsa pajissa quinajarideni pamahadsa ahuatomajari. Pahuadenipa odsa capamema najarohuaji tohuedadsa jahuidsa Jeso bacco quinaraaha pahuadenidsa jidsa taccajari. Dsotodena noccodeni jidsera najari. <sup>13</sup> Nadsapa tohuedanijari. Jesodsa toquejenajaridenidsa Jeso nahatonihicca ima huati tanimaraaha pahuadeni attidsa naco pajissa quina-jaraha nade.

*Jesocca dosseniji pohua huatimadedenidsa*

*Mateo 28.16-20; Roca 24.36-49; Huano 20.19-23*

<sup>14</sup> Dsotode naco pohua huatimadedeni 11 quinajari jipade toquejenahidsa Jeso ahuatomajari. Pahuadenipa: —Jehe, Jeso nahatonihijine pajirahi -quina-jaradsa huaribodeni sibaqquri nadsa Jeso huati icanabaqquijari: —¿Nejecotohui occa madijapa onahatonini qqui toquinaraaha pahuadeni attidsa pajissa tiquinejerajaro? -nahi nade. <sup>15</sup> Nadsapa denima huati tajari: —Dsama huapimadsa jai tijaridsaji. Madija huapimadsa otahimari madija tocassiejerahijinecca teccoraridsa-manaji -nahi nade. <sup>16</sup> —Nadsapa madija otahimaridsa pajissa quinadsa passodsa totopa cajimanadsapa tocassiejerahitohui. Naraha madija ohuadsa pajissa quina-jarajaridenipa Djojine najidsohue jiquejeranihuaji jai tojahitohui. <sup>17</sup> Ohuadsa pajissa quinajaridenipa ohua onidsa dsepedeni ijimanadsa canahatorimana canahitohui. Canahatorimana canadsapa Diocca dacorehe ahuato tanitohui. Jehe, ohua onidsa huati huati toquinadsapa Satanacca dodosse tocorime dosse ininebaqqui-manahitohui. Tohuatti onihidsa naco huatide nahatoqquri nahitohui. <sup>18</sup> Macca coma tahicca damade pajiramanahitohui. Coma tahicca oni veneno dse quinadsa naco pahuadenidsa comene nohuerahitohui. Madija comaqquiri najarideni naco pahuadeni dsepedsa bara quinadsapa totocanomire nahitohui -nahi nade Jeso.

*Jeso toccamacossanijari*

*Roca 24.50-53; Tahimarideni 1.9-11*

<sup>19</sup> Nadsapa ia Medsede Jeso pohua huatimadedenidsa huati taha jicadsapa memehuaji Dio pohua iaccamacossanijari. Diopa Jeso deni inanadsapa Pohua inori nahatonihuaji inahittarijari, madija ihicadossebaqqui nahijine. <sup>20</sup> Nadsapa Jeso tahimari icassiejeranijinecca pohua huatimadedeni dsama huapimadsa ecomeraridsa-mananijine jai tojaridsajari. Ecomeraridsa-manadsapi ia Medsede acco icambaqquidsa pocca dacorehema canahatorimana canaridsajari. Nama quinadsapa madijadenidsa Jeso tahimari pajissa ahuato tajaro.

Epejeni.

## **Rocapa Jesocristo tahimari dsodo inajaro**

### **Lucas**

Rocapa doctoro, madija comacquiri najari totonanomide. Puhuapa Jesocca dodosse jararaha Jeso dsoqquehi natti pohua tahimari dsodode dissera tajari. Jeso tahimari mittahissa tahijine Jesocca dodosse tabaqquidenidsa huati, pohua huatimade ohuahadenidsa huati, Jeso imeni Mariadsa huati huati naridsadsana pohua tahimari dsodo inajaro. Rocapa pohua tesse Teofiro Jeso tahimari nahato tahijine pohuadsa dsodo inajaro.

Rocacca dsodoniji onihi oninipi: Jesocca dodosse tabaqqui tahimarideni, inajaro. Najaro onini cariacca: Hechos, quinajari. Rocapa Pablodsa ccaridsajari, Jesocristo tahimari icassiejeranijinecca maride.

#### *Rocapa Jeso tahimaritohui dissera tajari*

<sup>1</sup> ¿Nija Teofiro? Tiadsa Jeso tahimari dsodo onajaro. Tahide Jeso pohuadsa toquejenajarideni mota huapi taha pohua tahimari dsodo naridsamanapojaride. Pohua tossonapohui tahimaria aja nahatonidsa Imehidsa toccamacossanihi bacco tajaropaji. Pohua tahimari huapima pajiranissa tanijine quinadsa dsodode disseraqqui najaride. <sup>2</sup> Aja pohua huatimade pohuadsa jajahiridsa najarideni pocca nahatonaja onihi, onihi nehe qqui najonamanajari naqui dsodo quinajari. Aja Jeso pohuadeni mari mari ihicanabaqqui najari naco dsodo quinajari. Puhuadenipa Jesocca marinaja ehecomeraridsamana najaro naqui icahatterajaro. <sup>3</sup> Nadsapi ohua naqui Jeso tahimari dsodo ocadsanaponijine tohuini onadsa aji Jeso pohua tahimaritohui, pocca marinajatohui dissera onajarode. Aji poccadeni dsodoniji huapima naqui hua onaridsajarode. Aja madija Jeso qqui toquinajarideni, pocca marinaja mittamanajarideni, najaridenicca ima naqui omittanissa tanijine onadsa occaridsajarode. Jeso pohua tahimari huapima dsodo quinajarocca onatassaqquidsa ojine tahideccadsama pajissehera dsodo onajonajaroa ajjaropaji. Jehe Teofiro, Jeso tahimari huapima ticajinijine onadsa tiadsa dsodo onajaro. <sup>4</sup> Aji Jeso tahimari tia maridedeni tia mari icanamanajaro huapimapi pajissa nahato tinanijine tiadsa dsodo onajaro.

#### *Dio Atti ccaccaronadepa Huano Baotista tossonahijine tahimari huati tapojari*

<sup>5</sup> Nadsama Herodepa Isaraeri potemahi jodiodenicca dsama onini Jodea cacahuade tojadsa Sacaria naco madicajari. Puhuapa Diodsa dada toqquimade tojajari. Nahihuaji dsepedeni ihijimana najarideni mota onidenipa Abia potemahideni. Sacaria naco Abia potemahideni. Puhuadenipa Diodsa dada toqquimahuaji cacahuade toquejenadsapa madijacca da naqquinaja Diodsa dada ihiqquimamana najaro. Pocca amoneje Sabeopi Arao potemani. <sup>6</sup> Sacaria pocca amoneje tadsajanipa poccadeni ima Diodsa bica tajaro. Ia Medsede Diocca dosseniji naqui ecahuamananissa tajaro. <sup>7</sup> Naraha Sabeopi ccaranije najaro. Maqqui tedseje ejedeni jiraha jadahi tocajamanajari.

<sup>8-9</sup> Diodsa dada toqquimadedeni huapi taraha ojari ojari quinaha bodihuaji totoqquedsimamana, najari nahatohui majo bicabote tohuesside. Tohuessidsapa essene majo bica taha jami-mi canadsapa Diodsa huati huati totoquina najari. Sacariacca madija Abiadeni Diodsa dada toqquima ecahuamanadsapi madija ojaria bodihuaji toqquedsimahijine qqui quinahijineccadsa Sacaria oni bacco quinajari. Nadsapa Sacariana majo bicabote iessihijine bodihuaji dosse idsimamanajari.

<sup>10</sup> Toqquedsimadsapa majo bicabote iessidsa jami-mi cananaja amossinihuaaji madija huapima Diodsa huatide toquejenaja najari.

<sup>11</sup> Sacariapa nahi bodihuaaji madicadsa Diocca dodosse Pohua Atti ccaccaronade pohuadsa ahuatomajari. Majo bicabote tohuessidsa majo toccabaqquihijinecca huahuanari inorini nahatonihuaaji huajari. <sup>12</sup> Nadsapa Sacaria Diocca dodosse qqui inadsapa cappinajari: —¿Nejecora ohuadsa tojapadseje? —najari. <sup>13</sup> Naraha manaco Dio Atti ccaccaronade attipa: —Sacaria ticappina-jeraji, Diopa ticca huatinaja mittahi. Ticca amoneje Sabeopi ejedeni cajinitohui. Tossonadsapa onipa: Huano, tana —najari. <sup>14</sup> —Ticca ejedeni tossonadsapa tetidsenitohui. Madija ohuahadeni naco huatidsemanahitohui. <sup>15</sup> Nadsama najari ticca ejedenipa Diodsa bica taha tojahitohui. Pohuapa uva ppejene dse najarahitohui. Dsedse coma tanicca naco dse najarahitohui. Pohuapa tossona-jaraccadsama Dio Corime pohuadsa tojahitohui. <sup>16</sup> Pohuapa ajama nahitohui: Nidsa Diocca ima ecomeraridsadsapi Isaraeri potemahi jodideni mota huapi taha ia Medsede Diodsa toquejenani-pomahitohui. Nama nahitohui pohuapa. <sup>17</sup> Nadsama Huanopa Dio Corime inadacorahitohui. Pina maittaccadsama Dio Atti cacomerabote Eria Dio Corime inadacorajarissa nahitohui. Pohuapa ia Medsede tedsejema madija bodideni inanajorabaqqui pohuitohui. Nahi aja imehideni bodideni tobicamanadsapa pohuadeni bedidenidsa huatideni huanacquiri nahijine. Aja Diodsa iboqqiri najarideni naco mittamanadsapa Diodsa tohuiboramanahijine. Nidsa pohuajine madijapa ia Medsedetohui najoramanahijine —najari Dio Atti ccaccaronade.

<sup>18</sup> Naraha Sacaria manaco huati tajari Dio Atti ccaccaronadedsa: —¿Nejecoma onadsa ticca ima pajissa tojani nahato onanijine? Ohuapi jadahibote ojani, occa amoneje naqui jadani tocajani —najari Sacaria atti.

<sup>19</sup> Naraha Dio Atti ccaccaronade attipa: —Ohuapi Cabirie Dio madihuaajicca ojani. Dio acco acco ohocama najari. Dio ohua dosse naronajari tiadsa ima bicani huati onanijine. <sup>20</sup> Naraha aji huati onajarodsa pajissa tejeradsapi tetti jirehe timadiccanitohui. Nidsa ejedeni tossonahicca abadsico bacco tadsapa tossonahitohui. Ticca ejedeni tossonadsana tetti ticajipomanijine. Nadsana aji pajissa huati onajaro nahato tinanitohui —najari Dio Atti ccaccaronade Sacariadsa.

<sup>21</sup> Naraha Diodsa dada toqquima huapihuaajicadsa Sacariatohui madimanajarideni attidenipa: —¿Nejecotohui Sacariapa bodihuaaji najojari? —quinajari. <sup>22</sup> Nanaja Sacaria qquenadsapa huati tahitohuiraha atti cappiraha qquenajari. Naraha madija pohuadenidsa ima ahuato teje najaro: —A, Diodsa dada toqquima bodihuaaji Djotine pohuadsa ima ahuato tajaro nitide —quinajari. Nadsapa Sacaria madija nahatoqqiri nahijinepa pohua dsepedsara dsopi dsopi najari, atti cappiradsapa.

<sup>23</sup> Sacariapa nahi Diodsa dada toqquimahuaji madicajari. Aja pocca madija Abi-adeni dsepedeni jicahicca huada bacco tadsapa Sacaria toccanijari pocca odsahuaji.

<sup>24</sup> Nahidsa tomadinimanadsana Sacaria bedimeni Sabeopi jiajaro. Pina ponicca madijacca marinajassa najaro ejedeni idsonidsa huittidsadsapa abadsico 5 canaha ponicca odsahuaji qquena-geraccani. <sup>25</sup> Nani ponicca odsadsa madidsapi poni bodinidsa: —Jidapapi madija ohuadsa: “Ccarani” huahua quina-jarahitohui —najaro. —Jidapapi Djotine ejedeni ocajini. Ohuadsa ima bica tanicca tojani —najaro Sabeo.

### *Dio Atti ccaccaronade Cabirie Jeso tahimari ecomerapojaro*

<sup>26</sup> Nadsapi Sabeo jianicca abadsico 6 canadsa odsa onihuaaji Dio pocca dodosse Pohua Atti ccaccaronade Cabirie dosse inaronapomajari. Najaro odsa oninipi Nasreti, dsama arobeni Carireahuaajicca. <sup>27</sup> Nani Nasaretidsa dsohuato madijaro, poni oninipi Maria. Ponipi maqquideje caji-geraccani, maqquideje ssamo taccani. Najaro dsohuatodsa Dio Cabirie dosse inaronajari, ponidsa huati tahijine. Nadsama najaro dsohuatopi Dsedse icajinjine tahide imehidenipa jehe canirepojari. Dsedsepa

maittaccadsamacca tamine Dabi jinodi potemahi. <sup>28</sup> Nadsapa Dio Atti ccaccaronade Cabirie ccaronadsapa Mariadsa ahuatodsa huati tajari: —Nija Maria, Dio tia catidsehi. Ia Medsede Diopa tiadsa madihi –najari.

<sup>29</sup> Maria pohua atti mittadsapi huajo najaro. Poni bodinidsa: —¿Nejecotohui pohua atti nama najari? ¿Nejeco imara ohuadsa tojapadseje? –najaro. <sup>30</sup> Nanaja Cabirie ponidsa huati tapomajari: —Maria ticappina-jeraji. Diodsa bica tinani. <sup>31</sup> Jidapapa ejedeni tidsonedsa huittidsahitohui. Nadsama ejedeni tossonadsa onipa: Jeso, tana –najari. <sup>32</sup> —Pohuapa denima madija bicahi tojahitohui. Pohuadsa: “Dio memehuai madijaricca Ejedeni” quiquinanahitohui. Ticca ejedenipa ia Medsede Djoline tamine deni tojahicca tojahitohui, pina pocca idi maittaccadsamacca tamine Dabissa nahitohui. <sup>33</sup> Pohuapa pocca madija Isaraeri potemahi ecahuabaqquidsanapohuitohui. Pocca cacahuehe naqui jiquejeranitohui –najari Cabirie atti Mariadsa.

<sup>34</sup> Naraha manaco Maria Cabiriedsa huati tajaro: —Ajijaro imapi ¿nejecoma najaro? Ohuapi maqquideje ocappiraccha, maqquideje ssamo onaccani –najaro.

<sup>35</sup> Naraha manaco Cabirie huati tajari: —Dio Corimepa tiadsa bacco naronahitohui. Dio memehuai madijaripa tiadsa pocca dacorehe inananitohui. Pina meme esseninahuini tiadsa huadsana najarossa nadsapi Diocca dacorehe tiadsa tojanijine. Najaroline ejedeni nahatojaripa imasiri cappira, bodi ssiaja tahitohui. Pohuadsa: “Dio Bedi” quiquinanahitohui. <sup>36</sup> Nadsama aji ticca madija Sabeo naqui jadaniraha ejedeni cajini. Abadsico 6 canaha poni idsonidsa huittidsaccha. Madija huapima ponidsa: “Ccarani” quiquinanaraha jajararo. <sup>37</sup> Diopa ssamo tajarahi –najari Cabirie.

<sup>38</sup> Nadsama Maria poni attinipi: —Jehe, Diocca medse ojan. Pohua Attidsa ibora onani. Aji huati tinajaropi Dio ohuadsa inanana –najaro. Nadsapa Dio Atti ccaccaronade Cabirie toccamacossanijari.

### *Mariapi Sabeo qquide toccajaro*

<sup>39</sup> Nadsapi Maria ponicca madija Sabeo qquide dsama arobeni Jodeahuai huassinaja toccajaro. Ssonohuajicca odsa panani bacco tajaro. <sup>40</sup> Nanihuai Maria bacco tadsapi Sacariacca odsadsa toqquedsimajaro. Sabeodsa: —¿Nija, bica tinaqui? –najaro. <sup>41</sup> Maria nija nani Sabeo mittadsa poni idsonicca ejedeni ttai ttai nadsapa Dio Corime Sabeo bodinidsa tojahissa tajari. Nadsapi Dio Corimejine bodini nahato tajaro. <sup>42</sup> Nadsapi Sabeo poni attini ahuato tadsa Mariadsa huati huati tajaro: —Djoline tiadsa ima bicani tojani. Amoneje huapi taraha tiadsana Dio ima bicani denima inanajaro. Tidsonicca ejedenidsa naco Dio ima bicani inananitohui –najaro Sabeo. <sup>43</sup> —Nadsama ohuapi ajimani ojaraha ohua Medsedecca ami ohuadsa ticcajonajaro. <sup>44</sup> Ohuadsa nija tadsapi ohuidsonicca ejedeni huatidsejari, ttai ttai nahi. <sup>45</sup> Jehe, ia Medsede Dio tiadsa huati tapohuicca ima pajissa tojanijine pajissa tadsapi Dio tiadsa ima bicani inanajaro –najaro Sabeo Mariadsa.

<sup>46</sup> Nadsapi Maria Diodsa huatidsedsa attinipi:

—Obodi ohuattima: Ohua Medsede deni tojajari, bica tahi, onajaro.

<sup>47</sup> Ohua ocorimema Dio ohua Tonassijadedsa ohuatidseri najaro.

<sup>48</sup> Ohuapi Diocca medse ajimanicca ojaraha

aji jidapanadsama madija attidenipa: “Diocca biquehe tiadsa tojani” dsadsanapomana nahitohui.

<sup>49</sup> Dio Dacorabote ohuadsa ima denima bica tanicca inanajaro.

Pohua oni imittadsapi Pohuapa imasiri cappira, Pohua bodi ssiaja tahi nahato inanajaro.

<sup>50</sup> Nadsama Diopa Pohuadsa madija cappinamanadsa, Pohuadsa huahuatidsemana nadsa naco pohuadenidsa huati cahanari canahitohui. Pohuadeni potemahidsa naco nama dsanapohuitohui.



- <sup>51</sup> Dio pocca dacorehema dsepe ihiji najari.  
Aja madija pohuadeni bodi attideni: “Nahato onani, Dio jirehe bica onani”  
quiquinanajaridenipa Dio pohuadeni inajaribaqquihitohui.
- <sup>52</sup> Nadsama tamine dacorabotedeni naco Diopa poccadeni dossehepi inajicaridsani-  
tohui.  
Ajamani toquejenajaridenina Diopa deni inanabaqquihitohui.
- <sup>53</sup> Pemi madimanajaridenidsana huemahi da inahitohui.  
Naraha dsepedeni sseqquiri najaridenipa dsepedeni jiraha Dio pohuadeni dosse  
inanibaqquihitohui.
- <sup>54</sup> Nadsama ia Isaraeri potemahideni Dio Attidsa iboraqquri inajaropi Dio Pohua ia  
acco tocamabaqquihitohui.  
Isaraeri potemahideni iadsa Diopa huati ajama-jarahitohui. Pocca tohuati huane-  
hema iadsa huati cahanari cadsanapohuitohui.
- <sup>55</sup> Jehe, najaro imapi Dio icca ididenidsa huati taja najonapohui najari.  
Icca idi Abarahaodsa, pohua potemahideni huapimadsa huati cahanari canajonajaria  
aja iadsa naco nama nahipaja dsanapojari  
-najaro Maria Diodsa huatidsedsa.
- <sup>56</sup> Mariapi abadsico 3 canaha nani Sabeodsa madicajaro. Nadsapi ponicca  
odsahuaji toccanijaro.

### *Huano Baotista tossonahicca ima*

- <sup>57</sup> Sabeocca ejedeni tossonahijinecca abadsico bacco tocanadsapa maqquideje  
bedi tossonajari. <sup>58</sup> Tossonadsapa poni inorinidsa madimanajarideni, ponicca  
madija quinadsa ponicca odsadsa queriqquijari. —Diopa ponidsa huati huana  
tadsa ejedeni cajijaro -quinahi ima mittamanadsapa ponidsa jahijonajari, poni  
tadsajani huatidsemanahijine. <sup>59</sup> Ejedeni huadari 8 nadsapa jodiodenicca huissinaja  
cajihijine poccadeni madija huapima naco jahijonajari. Pohua oni naco imehi onidsa  
icanacanimanahijine: —Sacaria -quinahijineraha. <sup>60</sup> Imeni attinipi: —Apajana,  
pohua onipa Huano -najaro. <sup>61</sup> Nadsapa attidenia: —Naraha ticca madija oni nama  
nahi nohuerahi -quinajari.
- <sup>62</sup> Nadsapa ejedeni imehidsa: —Ticca ejedeni oni ¿nejecoma nahi jipa tinani?  
-quinadsa pohuadeni dsepedsa dsopi dsopi quinajari. <sup>63</sup> Naraha imehipa pohua bedi  
oni dsodo inahijine ahua ssapa tajarotohui pohua dsepedsa huahua najari. Nadsa  
dsodo inadsapi: —Pohua onipa: Huano -najari. Nadsapa huapima huajo canirejari.
- <sup>64</sup> Nanaja Sacariapa atti cajimanipomajari. Atti cajimanipomadsapa: —¡Diopa bica  
tahi! ¡Pohuadsa ohuatidsejaro! -najari.
- <sup>65</sup> Nanaja Sacaria inoridsa madimanajarideni jabojo quinajari. Nadsapi najaro  
dsama arobeni Jodeacca ssono bedeni namidsa tanidsa madiridsamanajaridenidsa  
naqui ima tojaridsajaro. <sup>66</sup> Nadsapa huapima ima mittaridsamanajaridenipa  
pohuadeni bodia: —¿Nejecoma napadsaja ajajari ejedenipa? -quinajari. Dio pocca  
dacorehema Huano ecahuahissa dsanapojari huapimadsa ahuaato tajaro.

### *Sacaria bodi huatidsejari*

- <sup>67</sup> Nadsama ejedenicca abi Sacariapa Dio Corime pohua bodidsa tojahissa tadsa Dio  
Atti ecomerajaro:
- <sup>68</sup> —¡Diopa bica tahi! ¡Ia Isaraeri potemahideni Medsede deni tojahi!  
Iapi Dio pocca tocattabaqquinaja iquejenajaro. Dio iadsa ccajonahitohui, ia  
todinibaqquihijine. Najarojine Pohuadsa ehetidse najaro.
- <sup>69</sup> Ia Tonassiajade dacorabote iadsa dosse inaronajari.  
Pohuapa maittaccadsamacca tamine Dabi Diodsa iborabote potemahi.
- <sup>70</sup> Diopa maittaccadsama Pohua Atti cacomeraqquri najaridenidsa

ia Tonassiajade ccajonahijine tahimari huati tapodsapa ehecomeramana najonajaro.

<sup>71</sup> Ia Tonassiajadepa ia jaradedenicca jarehedsa ia tonassiajabaqquihitohui.

Iadsa jiperaqquiri najarideni naco huadidi taraha pohuajinena icassiejeranitohui.

<sup>72</sup> Diopa icca ididenidsa huati huana tajari.

Pohuadeni tedseje jehe canirejaricca ima huati ajama-jarajari. Inapajiranissa tanitohui.

<sup>73</sup> Najaropi maittaccadsama icca idi Abarahaodsa Dio huati tapojaripa: “Pajissa Ohuattissa onananitohui” napojari.

<sup>74</sup> Icca ididenidsa huadiqquiri najarideni jara jara ihinabaqquimana naraha Diona inassiajabaqquijari.

Jidapana naqui ia huadide noppine icappina-jeradsa Diodsara iboraqquiri id-sanaponitohui.

<sup>75</sup> Ima jirehe Pohuadsara imadinissa dsanaponitohui.

Icca madie naqui Diocca dossenijidsa pajiranissa dsanaponitohui –najari Sacaria atti.

<sup>76</sup> Nadsapa pohua bedidsa huati tajari:

—Jehe Huano, tiapi occa ejedeni, nidsa tinapidsapi ia Medsede tedsejema madija bodideni tinanajorabaqquipojaripa pohua ccajonahitohui madimanahijine.

Nema tadsapi tiadsa: “Dio memehuaji madijari Atti cacomerabote” quiquinanahitohui.

<sup>77</sup> Huano, tiapi icassiejeranijinecca ima ia Dio pocca madija iquejenajaro iadsa huati tinaridsanitohui.

Dio icca imasiri epeje inanadsapi nidsa pocca najidsohue tojadsa dsori icanirenitohui.

<sup>78-79</sup> Dio iadsa huati cahanari canadsa ia Tonassiajade iadsa dosse inaronabote nahi. Najaripa madija inassiajabaqquihitohui.

Dio tedseje icajoneranijinecca ima naqui ia tonahattabaqquihitohui.

Ia Tonassiajadepa pina dsidsidsamassa maji ccajonadsa ssire najonajarissa najari. Ssiajani dsati iadsa bacco najaro.

Madija dsidsinidsa madiridsamanajaridenipa dsoqqehe noppineni cappinama-naraha

ssiajani dsati pohuadenidsa tossiajaridsadsapi memehuajicca jahui ahuato inanajaro –najari Sacaria atti.

<sup>80</sup> Nadsama Sacariacca ejedeni Huanopa Diocca dacorehema napidsanapojari. Diotohui dissera taja najari. Dsotode denima napidsapa dsama huamoni ssono caji, siba caji tanihuaji madidsanapojari. Nadsapa Dio Pohua jipa tahicca huada bacco tadsa Isaraeri potemahideni mari icanabaqquihijine Huano dosse inajari.

## 2

### *Jeso tossonahicca ima*

#### *Mateo 1.18-25*

<sup>1</sup> Jeso tossona-jaraccadsapa dsama huapimacca imapi ajima najaro: Tahidepa romanodenicca tamine deni tojahicca onipa Acosto pohua bodipa: —¿Nejecoma naha madija madimanahi occa cacahuehedsa? —nadsa madija onideni huapima dsodo naridsamanahijine pocca dosseniji ccaridsajaro. <sup>2</sup> Nadsapa Acostojine dsama huapimacca madija onideni dsodode tahidecca dsodo quinajari. Najari huajanodsa pohua biji accode onipa Quirinio dsama Siriahuaji cacahuade tojajari. <sup>3</sup> Nadsama madija huapima dsama onihi onihidsa mamadimameri naridsamanaraha birididenicca dsamadsa jai tojaniridsajari. Isaraeri potemahideni naco birididenicca dsamadsana pohuadeni oni dsodo quinahijine jai tojaniridsajari. <sup>4</sup> Nadsapa Dsodse. Pohua naco dsama arobeni Carireahuajicca odsa panani onini Nasaretidsa madiraha biridi tamine Dabi madipohuicca odsa panani Berenehuajina toccanijari, pohua oni dsodo nahijine. Berenepi dsama arobeni Jodeacca. <sup>5</sup> Nadsama Dsodsepa Maria

tadsajani Berenehuaji tohuedajari. Mariapi Dsodse pohuadsa da quinaraha ponidsa huada huada najaracchahi. Poni idsonidsa ejedeni huittidsaja najari. <sup>6-7</sup> Nadsapa Berenehuaji bacco toquinaraha odsa ijiridsajaro. Madija huapima tahide bacco toquinapoja najari. Odsa ijiridsadsapi Dsodse pocca amoneje tadsajanipa bohuicca huahuadadsa madimanajari. Nahidsa madimanadsana Mariacca ejedeni comajari. Poni bedi tahidecca tossonajari. Nadsapa etero dsojoranidsa teppe inadsa dsero huanarini tetepidsa ibari najari.

*Dio Atti ccaccaronadepa edede cacahuadedenidsa huati tajari*

<sup>8</sup> Nadsama odsa panani Berene huajira tanidsapa edede cacahuadedeni madimanageri. Pohuadenipa huamonidsa jassi jassi tajari. Dsomepa edede cacahuade noccodeni bibissa najari. <sup>9</sup> Nanaja pohuadenidsa Diocca dodosse Pohua Atti ccaccaronade ahuatojari. Dio Pohua ssiejene tossiabajabacchidsa cappinamanajari. <sup>10</sup> Naraha Dio Atti ccaccaronade pohuadenidsa: —Ticappinamana tejeraji. Tiadenidsa ima bicani huati onana —najari. —Huattidsehe imeni madija huapimadsa tojaridsanijine —najari. <sup>11</sup> —Jidapapa tiadeni Tonassijade tossonahi, tamine Dabicca dsamabote Berenedsa. Pohuapa ia Idinide Cristo-Mesia najari. <sup>12</sup> Nadsama aji occa huatinaja nahatoqquri tiquinanijinepi ajima nani qqui tiquinanitoahui. Ejedeni tossonedsatipa etero dsojoranidsa teppe naha dsero huanarinidsa pori canahitoahui —najari Dio Atti ccaccaronade. <sup>13</sup> Nadsapa ima huati taha jicadsapa Diocca dodosse tabacchi memehujicca huapi taha amadsati ahuatoma-manadsa Diodsa huattidsemanadsa jiri jiri quinajari:

<sup>14</sup> —¡Dio memehujai madijaripa bica tahi, deni tojahi!

Namihujai Pohujine huattidsehe cajiridsani. Dio pocca cacattidse tabacchidsa pocca jonehe tojaridsani —quinajari.

<sup>15</sup> Nadsapa Diocca dodosse tabacchi memehujai jai tojamacossanidsapa aja edede cacahuade attidenipa: —¡Jina, Berenehuaji jaijanina! Ia Medsede iadsa huati tahi qquide jaijanina —quinajari.

<sup>16</sup> Nadsapa huassinaja jai tojanidsapa Maria Dsodse tedseje madimanahidsa bacco toquinajari. Nanaja ejedeni pori canajari dsero huanarinidsa. <sup>17</sup> Nadsapa edede cacahuadedeni ejedeni qqui toquinadsapa aja Diocca dodosse attissa nehe qqui toquinajari. Nadsapa Diocca dodosse ejedeni tahimari pohuadenidsa huati tajaricca ima ecomeramanajaro nahicca madijadsa. <sup>18</sup> Nadsapa madija mittamanadsa: —A, nema najaroraha... —quinajari. <sup>19</sup> Naraha Mariapi ponicca ejedenicca ima Dio ponidsa huati tapojari poni bodinidsa huatini ajima nejerajaro. Edede cacahuadedeni ponicca ejedeni tahimari huati toquinadsa naco najaro ima poni bodinidsa huatini ajima nejerajaro. <sup>20</sup> Nadsapa edede cacahuadedeni huamonihujai jai tojanidsapa Diodsa tohuattidsenimanajari: —¡Abi Dio bica tinani! Tijine ia Idinide tahimari imittadsapi iadsa bica tani. Ia Idinide tossonahi qqui inadsa naco etidseni —tanimanajari. Imapi pina Diocca dodosse huati tapojarissa nehe tojadsapi tohuattidsenimanajari.

*Imehi, imeni tadsajani Diodsa dada toqqimahuaji Jeso dsojo idsimamanajari*

<sup>21</sup> Ejedeni huadari 8 nadsapa jodiodenicca huassinaja cajijari. Nadsapa pohua oni naco icanacanimanageri: Jeso, quinajari. Najari onipa Maria jia-geraccadsa Diocca dodosse ponidsa huati tapojari.

<sup>22-24</sup> Nadsapa Jeso tossonahi natti huada 40 jicani natinipi Dsodse Maria tadsajani aji Moisesicca marinajassa inanamananijine Jerosarehuaji tohuedajari. Amoneje ejedeni tocassonadsa ama toccajarojine Diodsa bica tejerani, Moisesicca marinajadsa naqui oppina tani, quiquinanajari jodiodeni. Nadsapi ponicca ima Diodsa tobicanijinepi ajima nanina bica tajaro: —Ejedeni tossonahi natti huada 40 jicadsapi imenipi Diodsa dada toqqimahuaji toqquedsimadsa ponicca daniji Diodsa da inahijine —nani

nade Dio Atti dsodo nanidsa. Nadsama ponicca daniji Diodsa da inahijinepa ajima nana: —Midsori pamehe amoneje maqqui tedseje dada titiquina nana. Midsori nohueradsapi ococo napidsati pamehe naqui dada titiquina nana –nani nade Dio Atti dsodo nanidsa.

Nadsapa poccadeni ejedeni naco iaccamanajari: —Diodsa da inahijine –quinadsa. Najaro ima naqui Moisesicca marinajadsa dsodo najaro: —Ejedeni maqquideje bedi tossonapojaripa Diocca tojana –nani nade Dio Atti dsodo nanidsa. Nadsapa Dsodse, Maria poccadeni ejedeni Jerosarehuaji dsojo quinajari, Diodsa dada toqquimadedeni qqui toquinadsa Diodsa huati toquinahijine.

<sup>25</sup> Nadsama madija oni Simeopa Jerosarehuaji madijari. Puhuapa bica tajari. Diocca dossenijissa inananihijine dissera tajari. Isaraeri potemahideni Idinide ccajonahitohui madijari. Dio Corimepa Simeodsa madijari. <sup>26</sup> Nadsapa pohua bodidsa ima ahuato inanajaro. Najaro imapi: —Tidsoqqe-jeraccadsama ia Idinide Cristo-Mesia qqui tinahitohui. Diopa Mesia dosse inaronabote nahi –napojari Simeodsa. <sup>27</sup> Nadsapa Dio Corime pohua icadossedsapa Diodsa dada toqquimahuaji toqquedsimajari. Nahidsa madidsapa Jeso imeni imehi tedseje bacco dsimamanajari. Puhuadenipa pina Diocca dosseniji dsodo naniccassa nehe inanamananihijine Jeso iaqquedsimamanajari. <sup>28</sup> Nadsapa Simeo Jeso qqui tadsapa ididsa, dsojo ijidsadsa Diodsa huatidsejari. Puhua attipa:

<sup>29</sup> —Jehe ohua Medsede Dio, jidapanana ohuadsa huati tapojarocca ima bicani tijine pajiranissa tani –najari.

—Jidapapa ajajari ejedeni qqui onahi, najaritohui obodi huahuatoma naccade. Jidapapa Isaraeri potemahideni icca ima tobicanitohui, onajaro.

Nadsama ohuapi jidapanana odsoqquenijine onajorani. Odsoqquedsapi bica tani, onajaro –najari Simeo atti.

<sup>30</sup> —Jehe jidapapa ohua onocodsa qqui onahi ia Idinide.

<sup>31</sup> Puhuapa tossiejehe jinede, madija huapimacca tojahitohui.

<sup>32</sup> Puhuapa pina ssiajanissa najari. Puhua ssiejene tossiajabaqquidsapi Isaraeri potemahi jodio quejena-jarajaridenidsa

Diojine madija tocassiejerahijine tahimarini ahuato inananihitohui.

Jehe Abi Dio, ticca madija ia Isaraeri potemahidenipi iadsa madija huapima attidenipa:

“Ticcadeni dsamadsa ia Idinide tossonadsapa Diojine tiadenidsa ima bicani tojani” quiquinanahitohui –najari Simeo.

<sup>33</sup> Nadsapa Dsodse bedimeni tadsajani Simeo atti mittamanadsapa jabojo quinajari. Nadsapa pahuadeni attipa: —A, icca ejedeni tahimari nahato taha –quinajari bedimeni tadsajani.

<sup>34</sup> Naraha Simeopa pahuadenidsa denima huati huati tajari: —Diocca biquehe tiadenidsa tojadsanapona, onajaro –najari. Nadsama Maria ponidsa naco huati huati tajari Simeo: —Diopa ajajari ejedeni dosse inaronajari, Isaraeri potemahideni icanaroberidsa-baqquihijine. Mota huapi taha pahuadsa jiperaqquri nadsa Dio pahuadeni ettajobaqquidsapa ocasserani ahuanahitohui. Naraha pahuadsa jipaqquri najaridenipa nidsa dsotodepa ima bicani cajimanahitohui, Diodsa madimana-dsanapohuijine. Jehe, ajajari ejedenipa Isaraerideni inassiajabaqquihijine Dio dosse inaronaraha madija motapa pahuadsa jara jara quiquinanahitohui. Pocca marinajadsa naco huattajojo tahitohui. <sup>35</sup> Nama quinadsapa madija bodideni huatohue ahuato tajaro. Madija mota attidenipa: “Diodsapi jipaqquri inajaro” quiquinanaraha pahuadenipa Jesodsa jiperaqquri nadsapa pahuadeni atti pina maidsehessa nani. Diodsa jipaqquri najaripa pajissa jerani.

—Nadsama Maria, ticca ejedenicca imapi tiadsa ocassera tehe tojanitohui. Pina huahuajinadsa tibonoccori pora tocaniqquimajarossa nanitohui –najari Simeo atti.

<sup>36</sup> Naraha nani Diodsa dada toqquimahuaji naqui amoneje jadani madijaro. Poni oninipi Ana. Ponipi Dio Atti ehecomera najaro. Imehi onipa Panohue. Najaripa idi Asera potemahi. Ponipi jadani tocajani. Dsohuatoponipi maqquideje cajiraha huajano 7 nadsapa maqqui dsoqquejari. <sup>37</sup> Nahi maqqui dsoqquedsama tabira madijonajaroa huajanorini 84 bacco tajaripaja. Ponipi Diodsa dada toqquimahuaji madijaro. Amossinihuaji totoqquena nejerani. Ponipi ssiajabote dsome naqui Diotohui nadsapi dissera tajaro. Jipehe naqui huajijiradsa nenebocossa najaro. Diodsa naqui huajijiradsa huati huati teteje najaro. <sup>38</sup> Nadsama Maria Dsodsedenihuaji Ana ccajonadsa ejedeni qqui tadsapi huatidsejaro: —Jehe Abi Dio, jidapanana ticca dosseniji bica tahi qqui onajari, ia Idinide tojahijine –najaro Ana. Nadsapi madija huapimadsa pocca ima huati huati tajaro: —Jidapanana Jerosarecca madija aji ia Isaraeri potemahi iquejenajaro huapimadsa ia Idinide Cristo-Mesia bacco najonahi. Nidsa ia todinibaqquihitohui –najaro Ana attini.

### *Nasaretihuaji Jeso iaccanimanajari*

<sup>39</sup> Nadsapa Dsodse Maria tadsajani ejedeni tossonedsaticca ima aji Diocca dosseniji dsodo najarossa inanamanehe jicadsapi Carireahuaji jai tojanijari, nahi poccadeni odsa Nasaretidsa tomadinimanahijine. <sup>40</sup> Nahidsa madimanadsapa Jeso napsanapopari. Pohua bodi naco tohuatta-dsanapopari. Dio naco Jeso icatidseri najari.

### *Jesopa Diodsa dada toqquimahuaji mamaridedenicca ima ecomerajaro*

<sup>41</sup> Nadsama jodiidenicca ejete imenibote bacco tajaro, oninipi Pascoa (Ettidsapi: Dio tossoniqquimajari, inajaro.) Jeso imehi imeni tadsajanipa ejete tohuajiradsa totohueda najari Jerosarehuaji. Nama dsanapomanajari huajano huajijiradsa. <sup>42</sup> Nadsama Jeso huajanori 12 cajidsapa pohuadenidsa Jerosarehuaji toccajari. Pina huajano huajijiradsa nama dsanapomanajarissa inanamanajaro. <sup>43</sup> Odsa panani Jerosaredsa bacco toquinadsapa ejete qquide madimanaccajari. Ejete jicadsa Jeso imehideni huedaniraha Jesopa Jerosaredsa ibojari. Naraha Maria maqqui Dsodse tedsejepa bedidenitohui huatideni huato-jarajari. <sup>44</sup> Pohuadeni attipa: —Madija siba tajaria, pohua tessedsa ccanihitide –quinajari. Naraha cahadijacossahidsa poccadeni ejedenitohui qquiqquihihi naridsajari. Madija pohuadsa noccodeni jidsera tajaridsa, pohua imecotedenidsa naco huati naridsamanajari. <sup>45</sup> Naraha bacco quina-jaradsapa Jerosarehuaji tohuedanipomajari. <sup>46</sup> Nadsapa pohuatohui qqui naridsamanapomajari. Huada huatinimade tojari nadsana Diodsa dada toqquimahuajina Jeso bacco quinajari. Mamaridedenidsama pohua naco huittari canajari. Jeso pohua naco mamaridedeni imahaha canahidsa taharibo canajari. Pohua naco pohuadenidsa huati huati tajari, poccadeni huatinaja ecomerajaro. <sup>47</sup> Nadsapa huapima Jeso atti mittamanadsapa: —A, nahato tahi –quinajari. —Huati huati tahi imari bica taha –quinajari. <sup>48</sup> Nadsa imehi imeni tadsajani qqui toquinadsapa jabojojanadsa: —A, ajadsana quejemajariraha –quinajari. Naneje imeni attinipi: —Ato ¿nejecotohui iadsa huatirani tibojarotte? Iapi amossi tajaro nitidija inadsa icappinadsa titohui qquiqquihihi inaridsajaro –najaro. <sup>49</sup> Naraha pohua attipa: —¿Nejecotohui otohuira ticadaridsajaro? Ohuadsa ssamomo tinaccajaro nitide. Ohuapi occa Abicca odsadsa odsepe ijijaro –najari Jeso. <sup>50</sup> Naraha huati tahi mittamanaraha Jeso pocca ima mittamana-jaraccajari.

<sup>51</sup> Nadsapa pohuadenidsa toccanijari, poccadeni odsa Nasareti bacco tanimanajari. Imehideni attidsa ibora tajari. Mariapi pocca dacorehe qqui qqui tadsapi poni bodini nahato tajaro. Pohua tahimari huatini ajima nejerajaro. <sup>52</sup> Jesopa tohuattaja



dsanapohui najari. Denima napi dsanapojari. Dio naco icatidseri dsanapojari. Madija naco icatidsemaneri dsanapojari.

### 3

*Huano Baotistapa dsama huamonihuaaji madija mari icanabaquijari*  
*Mateo 3.1-12; Maraco 1.1-8; Huano 1.19-28*

<sup>1</sup> Sacariacca ejedeni Huanopa Dio pohua cadossejaridsa dsepe ijibote nadsa dsama cacahuadedeni ajama quinajari: Odsa panani Romahuaji madimanajaridenicca tamine deni tojahicca onipa Tiberio. Pohuapa dsama huapima ecahuaridsajaro. Pocca cacahuehepi huajano 15 bacco tajari. Pocca dossenijidsapa madija ohuaha, madija ohuaha tamine toquejenaridsajari. Nadsama najaridenipa pocca dossenijidsa dsama cacahuade madiridsamanajari. Isaraeri potemahi jodiodeni madimanahicca dsama oninipi Jodea. Nahicca taminepa Ponsio-Pirato. Isaraeri potemahi mota madimanahicca dsama oninipi Carirea. Nahicca taminepa Herode. Herode pohua ohuaha Feripepa dsama onini Itorea ecahuajaro. Itorea inorinicca naqui ecahuajaro. Najaro dsama oninipi Taraconite. Itorea inorini onihihuaajicca dsama oninipi Abirinia. Nahicca taminepa Risanian.

<sup>2</sup> Nadsama odsa panani Jerosarehuaji dada toqquimadedenicca tamine deni toquejenahi pamaha madimanajari. Onidenipa: Anasa, Caipa, quinajari.

Jehe, najarideni tamedeni toquejenaridsadsa najari huajanodsas Sacariacca ejedeni Huanopa dsama todidi tanidsa madijari. Nanihuajipi dsama huamoni ponira, ssono caji, siba caji tani. Nahihuaji madidsapa Dio pocca dosseniji Huanodsas huati tajari. <sup>3</sup> Nadsapa hueni Jordao inidicca dsama huapima ccaridsadsa madija maride tojajari. Pohua attipa: —¡Ticcadeni imasiri tineboridsamanaji! —nanaridsa najari. —Tibodideni ajima tiquinaji: “Occa imasiri onebona. Jidapapi Diotohuira odsanapona” tiquinaji. Nadsana totopa ticajiridsamanaji. Nema tiquinadsapi Dio ticcadeni imasiridsa: “Epeje, ohuati ajimani” nahijine —najari Huano. (Pohuadsa: Baotista, quiquinanajari. Ettidsapi: Totopade, inajaro.) <sup>4</sup> Nadsama Huanocca imapi maittaccadsama Dio Atti cacomerabote Isahia dsodo inapojaro. Pohua atti ajama napojari:

—Nidsa dsama huamoni ssono caji, siba caji tanihuaji madijaripa atti mohui tadsa madija huahua huahua ihinajonabaqqui nahitohui.

Pohua attipa: “¡Ia Medsede ccajonabote nahi! ¡Tinajoramanaji! ¡Pohua tedsejema jahui tijinedeni tobicapoji!

Najaroa aji tibodideni pohuatohui tinajoramanaji” nanaja nahitohui —napohui nade Dio.

<sup>5</sup> —Pohua atti naco: “Nami totodohuedseri najaro tijinedeni ijrirdsaji, onajaro. Ssono quequehemeri najaro ponanissa tanijine hui tiquinapoji.

Jahui johuidso tajaro naqui tijinedeni borocco tapoji. Jahui ccababa tajaro naqui tijinedeni huire tapoji.

Aji tibodideni naqui pina najarossa tinanamanapoji. Ia Medsedetohui tinajoramanaponijine ticcadeni ima tinanabicamanapoji, tibodideni tinahirerid-samanaji.

<sup>6</sup> Jehe, ia Medsedetohui tinajoramanadsa pohua ccajonadsapa pohuajine madija huapimadsa Diocca daniji tossiejehecca ahuatoto tanijine”

nanaja nahitohui dsama huamonihuaaji madijaripa —napohui nade Dio Atti Isahiajine dsodo nanidsa.

<sup>7</sup> Nadsapa madija huapi taha totopa tohui quinadsa Huano madihihuaji jahijonana canajari. Naraha Huanopa pohuadenidsa huati tajari: —¡Tiadenipi pina maccassa

tiquinani, ticcadeni imapi tabaccora tajaro! Tiadenipi tibodideni cacajiqquimera-jeraraha: “Huano ia topa todsanabaqquidsapa Diocca najidsohuedsa dsori icanirenitohui” ¿tiquinajaroqui? Naraha tibodideni cacajiqquimera-jeradsapi dsori ticanire-jeranitohui. <sup>8</sup> Naraha tettideni ajima tiquinadsana bica tani: “Imasiri onebona. Diotohuira obodi huahuatoma nanijine” tiquinadsapi tibodideni cacajiqquimeranicca ima ahuato tanijine ima bicanira tinanamanaji, onajaro –najari Huano. — Naraha tibodidenidsa ajima tiquinanitide: “Icca idipa Abarahaoja najari, Diopa ia tohuattajobaqqui-jarahitohui” titiquina naraha tiadeni ticamaidsanimanajaro. Diopa madijassa najarahi. Pohua jipa tadsapa aji siba huihwitteri naridsajarodsa naco Diopa Abarahao potemahissa naha inahatoridsahijine pajirajari. Paji tiadenipi: “Abarahao potemahi iquejenani” tiquinaraha Diodsa iboraqquri tiquinejeradsapi tiadeni tohuattajo-baqquihitohui. <sup>9</sup> Nadsapi Diodsa iboraqquri tiquinejeradsa, ima bicani tinanamana-jeradsa naqui ticcadeni imapi pina ahua tabaccora tajaricca imassa najaro. Paji, najari ahua cacajine dsamipa najorahi. Ahua bono bica tajaradsapa ca tacaridsa tahi. Ca tacaridsadsapa bobottahuaji hua hua totodsima najari, diji tahijine –najari Huano.

<sup>10</sup> Nadsapa madija attidenia: —Nadsapi iaha ¿nejecoma inanijine, ibodi cacajiqquimeranicca ima ahuato tanijine? –quinajari Huanodsa. <sup>11</sup> Naraha Huanopa: —Jehe, tiadenipi etero tetepicca pamehe ticajimanadsapi aja madija etero tetepicca cappirajaridsa ojarie da tiquinaji. Nadsama dsamatapa ticajimanadsa naqui madija dsamatapa cappirajaridsa da tiquinajo –najari Huano atti.

<sup>12</sup> Naraha nahidsa naco madija jahijonajari, aja romanodenicca taminecca dosseniji dsiniro nanaccadedeni. Pohuadenipa: —Huano ia topa todsanabaqquina –quinadsa jahijonajari. Huanocca marinaja mittamanadsapa Huanodsa huati toquinajari: —Mamaride, ia naqui ¿nejecoma inanijine, ibodi cacajiqquimeranicca ima ahuato tanijine? –quinajari. <sup>13</sup> Naraha Huanopa: —Jehe, tiadeni naqui aji dsiniro tinacamanadsapi pina taminecca imassa nehera titinaccamana naji, onajaro. Denimapi poni –najari Huano.

<sup>14</sup> Naraha nahidsa soldadodeni naco totopatohui jahijonajari. Huanocca marinaja mittamanadsapa Huanodsa huati toquinajari: —Iaha ¿nejecoma inanijine, ibodi cacajiqquimeranicca ima ahuato tanijine? –quinajari. Naraha Huanopa: —Tiadeni naqui madija pohuadeni dsepedenitajitohui, poccadeni dsinirotohui naqui jabojo tinanabaqquimana-jarajo, onajaro –najari Huano soldadodenedsa. —Nadsama madija ima cappiraraha pocca dsinirotohui pohuadsa ima tinanamanajaro. Naraha tiadenipi nema tiquinejeraji. Ticcadeni cacahuehe manaconi tamine tiadenidsa dsiniro da inajarora epejena. “Najarodsara imadina” tiquinaji, onajaro –najari Huano soldadodenedsa.

<sup>15</sup> Isaraeri potemahidenipa ia Idinide Cristo-Mesiatohui madimana-dsanaponaja Huanocca marinaja mittamanadsapa pohuadeni bodidsa: —¿Huanopa Cristo-Mesiaco? –quinajari. <sup>16</sup> Naraha Huanopa pohua cacomerajari: —Ohuapi passodsa tiadeni topa odsanabaqquijaro. Naraha madija dacorajari ccajonabote nahi. Ohuapi tahide mari mari onaporaha aja dsotodecca mamaride ccajonajarina deni tojajari. Najarina Dio Corime tibodidenidsa madihijine tiadenidsa inanarid-sahitohui. Pohuapa pohuadsa toquejena-jarajaridenipa jororoni jiquejeranihuaji hua idsimabaqquihijine pajirajari. Ohuapi ajimani ojani. Pina pocca medsessa onanijinepi opajira-jerani. Pohua amoricca sadaria diccade naqui opajira-jerani –najari Huano. <sup>17</sup> —Jehe, ccajonabote najaripa madija icattejidsa-baqquihijine. Pina madija aroso jidsadsa trigo huire tahijine qquero quissa, qquero quissa, qquero quissa inamacossajarissa nahitohui. Trigo etero, eppe, ede najaripa jojodedsa toccadsapa noccona ecahuajari pocca odsahuaji. Naraha trigo etero, eppe, ede

najaripa diji tahijine bobottahuaji hua idsimahitohui. Najaria aja Diodsa iboraqquiri najarajaridenipa jororoni jiquejeranihuaji hua idsimabaqquihitohui. Najaro jororoni ohuihuira tani –najari Huano.

<sup>18</sup> Jehe, Huanopa madija Diotohui bodideni huatoma-manahissa tahijine mari icanabaqquija najonapohui najari. Poccadeni imasiri nebomanahijine mari mari ihicanabaqqui najari. Puhuadeni bodi acco acco ihicamabaqqui najari. Pocca marinaja ajima najonajaro: —Ia Idinide ccajonabote nahi. Diocca cacahuehecca ima bicani tojabote nani –nanaridsa najari.

<sup>19</sup> Huanopa tamine Herode naco pocca imasiri nebohujine mari mari ihicana najari. Herodecca imapi tabaccora tajaro. Puhua imecote Feripecca amoneje onini Herodia idijidsadsa pocca amoneje tojajaro. Nadsapa Herodecca ima bica tejeradsa Huanopa Herode mittahijine pahuadsa huati huati tataja naraha Herode pocca imadsa dissera tajari. <sup>20</sup> Puhuapa imasiri sse tapoja naraha ima denima tabaccora tanicca inanajaro. Najaria Huano toponi cocoro todsimadsa coro idsimajaripaja.

*Jeso totopa cajjaricca ima*

*Mateo 3.13-17; Maraco 1.9-11*

<sup>21</sup> Ajijaro imapi Huano coro todsima-jaraccadsa madija topa idsanaridsabaqquipodsapa Jeso naco topa idsanajari. Nahidsa Jeso Diodsa huatide tojadsapa meme naqui tohuaba najaro. <sup>22</sup> Nahidsapa Dio Corime ccaronajari. Ahuato taha pina midsorissa naha Jesohuaji ccaronajari. Bacco naronadsapa memehuaji atti mittaronajari: —Tiapi occa ejedeni. Tiadsa ohuati huana tajaro. Ticca ima bica tajaroline ohuatidsejaro –najari Dio.

*Jeso biridi onideni*

*Mateo 1.1-17*

<sup>23</sup> Jesocca huajano 30 nadsana madija maride tojaridsapojari. Nahihuaicca madija puhua tossonahi tahimari ssamoqquiri nadsapa pahuadsa: Dsodsecca ejedeni, quiquinanajari.

Nadsama Dsodsecca abipa Eri,

<sup>24</sup> Ericca abipa Matata,

Matatacca abipa Rebi,

Rebicca abipa Meriqui,

Meriquicca abipa Janai,

Janaicca abipa Jose,

<sup>25</sup> Josecca abipa Matatia,

Matatiacca abipa Amosi,

Amosicca abipa Nahomo,

Nahomocca abipa Esri,

Esricca abipa Nacai,

<sup>26</sup> Nacaicca abipa Mahata,

Mahatacca abipa Matatia,

Matatiacca abipa Semehi,

Semehicca abipa Joseca,

Josecacca abipa Joida,

<sup>27</sup> Joidacca abipa Joana,

Joanacca abipa Resa,

Resacca abipa Sorobabeo,

Sorobabeocca abipa Saratieo,

Saratieocca abipa Neri,

<sup>28</sup> Nericca abipa Meriqui,

Meriquicca abipa Adi,

Adicca abipa Cosama,  
 Cosamacca abipa Eromodama,  
 Eromodamacca abipa Eri,  
<sup>29</sup> Ericca abipa Josohue,  
 Josohuecca abipa Eriesa,  
 Eriesacca abipa Jorimi,  
 Jorimicca abipa Matata,  
<sup>30</sup> Matatacca abipa Rebi,  
 Rebicca abipa Simeo,  
 Simeocca abipa Joda,  
 Jodacca abipa Jose,  
 Josecca abipa Jonao,  
 Jonaocca abipa Eriaquio,  
<sup>31</sup> Eriaquiocca abipa Merea,  
 Mereacca abipa Mena,  
 Menacca abipa Matata,  
 Matatacca abipa Natana,  
<sup>32</sup> Natanacca abipa Dabi,  
 Dabicca abipa Dsesse-Isahi,  
 Dsessecca abipa Obede,  
 Obedecca abipa Bohodsi,  
 Bohodsicca abipa Sera,  
 Seracca abipa Nahasao,  
<sup>33</sup> Nahasaocca abipa Aminadabe,  
 Aminadabecca abipa Adami,  
 Adamicca abipa Arani,  
 Aranicca abipa Esero,  
 Eserocca abipa Pare,  
 Parecca abipa Joda,  
<sup>34</sup> Jodacca abipa Jacobo,  
 Jacobocca abipa Isahaca,  
 Isahacacca abipa Abarahao,  
 Abarahaocca abipa Tera,  
 Teracca abipa Nacoro,  
<sup>35</sup> Nacorocca abipa Seroco,  
 Serococca abipa Racao,  
 Racaocca abipa Pereque,  
 Perequecca abipa Ebere,  
 Eberecca abipa Sera,  
<sup>36</sup> Seracca abipa Cainana,  
 Cainanacca abipa Arapacade,  
 Arapacadecca abipa Seme,  
 Semecca abipa Nohue,  
 Nohuecca abipa Rameque,  
<sup>37</sup> Ramequecca abipa Matosare,  
 Matosarecca abipa Enoco,  
 Enococca abipa Jaredo,  
 Jaredocca abipa Maharareo,  
 Maharareocca abipa Caino,  
<sup>38</sup> Cainocca abipa Enoso,

Enosocca abipa Sete,  
Setecca abipa Adana,  
Adanacca abipa Dio.

## 4

*Jeso imasiri inananiijine Satana nattome inaraha jehe najarajari*

*Mateo 4.1-11; Maraco 1.12-13*

<sup>1</sup> Huanoo Jesoo topa idsanaha jicadsapa Jesoo bodidsa Dio Corime tojahissa tajari. Hueni Jordaohuaji qquemoranidsapa Dio Corime Jesoo iaccajari, dsama huamoni ssono caji, siba caji tanihuaji madihijine. <sup>2</sup> Nahihuaji bacco tadsapa huada 40 naha madijari. Nahidsa naco imasiri totonanade Satanapa Jesoo nattome inajari. Puhuapa Jesoo imasiri inananiijine dissera tajari. Nadsapa Jesoo jiperahi huadari 40 naha madidsapa pemihissa tajari.

<sup>3</sup> Nadsapa Satana Jesodsa huati tajari: —Dio Bedi tijadsapi, jari, tijipaniijine ajijaro siba dsamatapa tojanijine huati tinaji –najari. <sup>4</sup> Naraha manaco Jesoo Satanadsa huati tajari: —Dio Atti dsodo nanidsapi ajima najaro: “Dsamatapadsara imadini ojari-gerani” –najari Jesoo.

<sup>5</sup> Nahi dsotode imasiri totonanade Satanapa ssono imeni huaji tani tetepihuaji Jesoo iaqqemoradsapa dsama huapima pohuadsa ahuato inanaridsajaro. Satanapa amadsati Jesoo dsama huapima dsopi icanaridsajari. <sup>6</sup> Nadsapa Satana Jesodsa huati tajari: —¡Qqui taneje! Ajijaro dsama huapimapi tiadsa da onaniijine. Tiana najaro dsama huapimacca dosse dosse taniijine. Najaro huapimacca biquehe naqui tiadsa onananiijine. Ajijaro dsama huapimapi occa tojajarode. Nema nadsapi ohua jipa onajarodsa da onaniijine bica tani. <sup>7</sup> Jehe, tipitodsa tittadsa ohuadsa tetidsedsa: “Occa tamine” taji. Ohuadsa nema tadsapi ajijaro huapimapi ticca tojanijine, onajaro –najari Satana atti. <sup>8</sup> Naraha manaco Jesoo Satanadsa huati tajari: —Dio Atti dsodo nanidsapi ajima najaro: “Ia Medsede Dio Pohuadsara tetidsemanani ojari dsanapoji. Pohua Attidsara iboraqquri tiquinaji” nani Dio Attipi –najari Jesoo.

<sup>9</sup> Nahi dsotodepa Satana Jesoo odsa panani Jerosarehuaji iaccajari. Nanicca Diodsa dada toqquima tetepihuaji inanajari. Nahidsa Satana Jesodsa huati tapomajari: —Jari, tiapi Dio Bedi tijadsapi joppa tinaronaneje, namihuaji tissona-geranitohui –najari. <sup>10</sup> —Dio Atti dsodo nanidsapi ajima najaro: “Diopa pocca dodosse tabaqquidsa huati tahitohui, tia ecahuamananiijine. <sup>11</sup> Pohuadeni bijidsa tia dama ijidsamanadsapi temori naqui sibadsa cabiquera-geranitohui” nani Dio Atti dsodo nanipi –najari Satana Jesodsa. <sup>12</sup> Naraha manaco Jesoo huati tapomajari: —Jehe, Dio Atti dsodo nani nema naraha Pohua Atti dsodo nani onhipi ajima najaro: “Ia Medsede ticca Dio nattome tajarajo. Tettidsa: ‘Dio ohuacatamana’ tejeraji” nani Dio Attipi –najari Jesoo.

<sup>13</sup> Ima onihidsa ima onihidsa Satana Jesoo icamaidsaridsaraha Jesopa Diodsa ibora tahissa tadsapa imasiri inaneje cama-gerajaro. Nadsapa Satana maidsehe onihi bodi huatoma-jaradsapa toccanijari. Toccaniraha dsotode Jesoo icamaidsapomahijine madijari.

*Jeso Carireahuaji maride tojapojari*

*Mateo 4.12-17; Maraco 1.14-15*

<sup>14</sup> Jesopa dsama arobeni onini Carireahuaji Dio Corimecca dacorehema ccanijari. Nadsapa nahihuajicca madija huapima Jesoo tahimari huati naridsamanajari. <sup>15</sup> Odsa onihi onihi naridsanihuaji ccaridsadsapa poccadeni Dio Atti mamarihuaji mari mari ihicanaridsabaqqui najari. Madija huapima attidenipa: —Jehe, Jesopa bica tahi –nanaridsamana najari.



*Jesopa Nasaretihuaji toccanidsa mari icanabaquijari*

*Mateo 13.53-58; Maraco 6.1-6*

<sup>16</sup> Jesopa pohua napihi odsa panani Nasaretihuaji ccanijari. Nahidsa madinidsapa jassinajacca huada bacco tadsa jodiodenicca Dio Atti mamarihuaji toqquedsimajari. Pohuapa odsa huapimadsa nama nanaridsa najari. Nadsapa nahidsa querigquimanadsapa pohuana totehemajari, Dio Atti hua inanijine. <sup>17</sup> Nahicca Dio Atti mamari cacahuadena pohuadsa Dio Atti dsodo nani da inajaro. Jeso najaro papeo pico naquuni tappa-ppa inadsa Dio Atti cacomerabote Isahiacca dsodoniji bacco inajaro. Najaroa Cristo-Mesia madija Idinide ccajonahitohui quiquinanajari tahimaripa ajijaropaji:

<sup>18</sup> —Ia Medsede Dio, Pohua Corime ohuadsa tojadsapa pocca dacorehe ocajijaro.

Diopa ohua tocattejidajari, madija tohuati nahanacquiri najaridenidsa ima bicani icassiejeranijinecca huati huati onaridsadsapi ima mimittamana nahijine. Nadsapa pohuadeni bodidenipa: “Occa imasiri ohuadsa ocassera tani” quinadsapa onabicabaquihijine, onajaro.

Dio ohua cadossedsapa aja madija cahacossamanajaridenipa oneqquenabaquihitohui.

Aja imasiri jinede Satanajine madijapa pina cahacossamanajarissa quinaraha poccadeni imasiri epeje onanadsapi pina ojine jahininejarissa nahitohui.

Aja madija noccodeni siri naco noccodeni ssire onanabaquihijine.

Aja madija dsidsinidsa madiridsamanajarideni naco imasiri jinede Satanacca maid-sanijidsa jehe quinaporaha

ossiejene pohuadenidsa bacco tadsapi pohuadeni bodideni ssire onanabaquidsa ohuadsana jehe quinahijine, onajaro.

Madija nanajidso toquejenajarideni naco odinibaquihitohui, onajaro.

<sup>19</sup> Diopa ohua cadossedsa huati onaridsajaro.

Jidapapi madijadsa ia Medsede Diocca ima bicani najorajaro.

Madija tocassiejerahijinepa najorani

—nani Isahiacca dsodoniji Jeso hua inajaro.

<sup>20</sup> Nadsapa Jeso papeo pico naquuni pico inanidsapi Dio Atti mamari cacahuadedsa da inanijaro. Nadsapa Jeso pohuadeni baccohuaji huittarijari. Nadsapa jassi dsajarideni huapima Jeso icattaquimanadsapa pohuadeni mari icanabaquijari.

<sup>21</sup> Nadsapa Jeso huati tajari: —Dio Atti dsodo nani aji hua onajarocca ima Cristo-Mesia ccajonahitohui nanaja najaripa jidapana tiadenidsa madijaripaja —najari Jeso pohua tahimari huati huati tadsa.

<sup>22</sup> Nadsapa madija huapima attidenipa: —A, pohua attipa bica taha —quinajari. —Naraha pohuapa Dsodse bedia —quinajari.

<sup>23</sup> Naraha Jeso huati tapomajari: —Maittaccadsama icca ididenipa ajama quiquinanade: “Toponi totonanomide tijadsapi tia tinanomiji” quiquinanajari. Nadsama tiadeni naqui ocanahatori canani qqui tiquinanijine tohuini tiquinadsapi ohuadsa tettideni nema tiquinanitidija —najari. —Aji odsa panani Capernaohuaji ocanahatori canani ima timittamanadsapi tettideni: “Aji ticca dsamadsa naqui najarossa tinanaji” tiquinajaro nitide —najari Jeso.

<sup>24</sup> Nadsapa denima huati dsanapojari: —Pajissara tiadenidsa huati onajaro: Maittaccadsamacca imapi ajima najonajaro: Dio Atti cacomerabote pocca dsamadsa bacco nanidsa naco pocca madijapa pohua attidsa jiperaquiri najari. Pina jidapana tiadeni naqui ohua aji occa dsamahuaji bacco onanijaroraha ohuadsa pajissa tiquinejerani.

<sup>25</sup> Nadsama pajissara tiadenidsa huati onajaro: Maittaccadsama naco icca idideni Isaraeri potemahidenipa Diodsa jehe quinahissa tajaradsa Diopa dsama onihicca madijadsana canahatori canajari. Aja Dio Atti cacomerabote Eria madiccadsapa huajano huatimade tojari abadsico 6 canaha passo qquejerajaro. Nadsapi madija

huapimadsa pemi tojaridsajaro. Ia Isaraeri potemahi jodiodeni iquejenajaro icca dsamadsa naqui amoneje maqquirinideni jicamanaja najonapohui najarodeni huapi tajaro. <sup>26</sup> Naraha najarodeni huapimapi Eria acco icamabaqquinijine Dio dosse inajarajari. Dsama onihuhajina Dio Eria dosse inajari. Odsa pamema najaro oninipi Sarepetahuajina toccajari. Sarepetapi odsa panani Sido huajira tanidsa odsa tojajaro. Nanicca amoneje jodio jerajaro maqqui dsoqquejarina acco icamajaro. <sup>27</sup> Ajijaro ima naqui nahatoqquiri tiquinani. Maittaccadsama Dio Atti cacomerabote Eriseo madipodsa naco ia Isaraeri potemahi jodiodeni iquejenajaro icca dsamadsa dsamacoma onini leprajine huapideni jadsimarojarideni huapi tajari. Naraha ojaria jodio jarajari oni Nahamapa dsama Siriahuajicca madijaraha Eriseodsa ccajonadsapa pohna tonomihi ojarijari –najari Jeso pohnadenidsa.

<sup>28</sup> Naraha jodiodenipa aja Dio Atti mamaridsa jassi tarijari huapima Jesodsa huadimanajari. Jesocca marinajapi: —Dsama onihicca madija jodio quejena-jararaha Diopa najarideni naco acco icamabaqquijari –nadsapa huadimanajari. <sup>29</sup> Nadsapa najarideni huapima Jesodsa huadimanadsapa mohua ininemanadsa iaqquenamanajari. Poccadeni odsa panani Nasreti denihuaaji iaqqueqquima-manajari. Nasaretipi ssonodsa odsa tojajaro. Nani ssono memedsaranihuaaji iaqquemoramanajari, coro inaronamanahijine. <sup>30</sup> Naraha Jesopa pohnadeni jai tojahi nocconidsa tohuanajari. Cojojohuaaji bacco toquinadsapa: —Jeso coro inaronana –quinaraha madija huapi taraha dsodonijari Jeso. Dsodonidsapa toccanijari.

*Satanacca dodosse tocorime madija bodidsa madidsajari*

*Maraco 1.21-28*

<sup>31</sup> Nadsapa Jeso Capernaohuaaji toqquedsippajari. Capernaopi dsama Carireacca odsa panani. Nanidsapi Dio Atti mamari cajimanajari. Nanihuaaji poccadeni jassinajacca huadadsa Jesopa madija mari icanabaqquijari. <sup>32</sup> Nadsapa pocca marinaja mittamanadsapa: —A, pocca marinaja bica taha –quinajari. Pohnapa atti caji tajarijine nama quinajari.

<sup>33</sup> Nadsapa Dio Atti mamarihuaaji Jeso mari icanabaqquiraha nahidsapa madija bodidsa Satanacca dodosse tocorime cajijari huittarijari. <sup>34</sup> Nadsapa Jeso qqui tadsapa pohna bodiccajine jadsirema atti atti najari: —¡Jaho, Nasaretihuaajicca Jeso! ¿Nejecotohuira ticcajonajaro? ¿Icca ima tinajicanijine ticcajonajaroqui? Ticca ima nahato onani. Tiapi Diocca Ejedeni Bicabote tijani –najari Jesodsa.

<sup>35</sup> Naraha joma nahijine Jeso atti dacoradsa huati tajari: —¡Epeje! ¡Didi taji! ¡Najari madijadsa tiqquenaji! –najari. Nanaja tocorimejine madija pina cco inacossajarissa najari. Aja jassi tariridsajarideni baccohuaaji tohuedimajari. Nahidsa tohuedimadsapa pohna bodicca qquenajari. Naraha pohna inajidso-jaradsapa inabiquera-jarajari. <sup>36</sup> Nadsapa qqui toquinajaridenia huajo caniredsapa pohnadenira huati tocanirere canajari: —¿Nejecoma najaro marinaja cajijari? Ajararipa dacorehe caji, atti caji najaria. Madija bodicca tocorime pohnajine qquenaha –quinajari.

<sup>37</sup> Nadsapa Jeso tahimari huati naridsamanadsapa nahi pohnadeni inoricca huajirema nahicca madiridsamanajarideni naco Jeso tahimari mittaridsamanajari.

*Jesopa Ssino-Pedro massodini inanomijaro*

*Mateo 8.14-15; Maraco 1.29-31*

<sup>38</sup> Nadsapa Jeso aja jodiodenicca Dio Atti mamarihuaaji qquenadsa toccajari, Ssinocca odsahuaji toqquedsimajari. Nanidsapi Ssino massodini coma tajaro, huapini ppocorajaro. Nadsapa Jesodsa huati toquinajari: —Poni tinanomiji –quinajari. <sup>39</sup> Nadsapa Jeso poni icattoma nadsa aji huapini ppocorajarodsa: —Epeje taji –najari. Naneje huapini tonahuihui najaro. Nadsapi amadsati tonomidsa totehemadsapi aja Jeso pocca mamari tabaqqui tedseje inajipabaqquijari.

*Jesopa comaqquiri najarideni inanomiridsa-baqqijari*

*Mateo 8.16-17; Maraco 1.32-34*

<sup>40</sup> Nadsapa maji tonahuidsa aja comaqquiri najarideni cacahuadedeni Jesohuaji eccajonabaqqijari. Poccadeni dsamacoma comani onihi onihi naridsajaro caji-manadsa Jesohuaji eccajonabaqqijari. Nadsapa comaqquiri najarideni bara inaridsabaqqijari. Ohuaha bara inebo, ohuaha bara inebo naridsadsapa tocanomirerid-sajari. <sup>41</sup> Madija bodidenidsa Satanacca dodosse tocorime cajimanajarideni naco Jeso pohuadenidsa huati tadsapa bodidenicca jahininejari. Tocatorimedenia Jesopa madija Idinide Cristo-Mesia pohuadsa nahatoqquri nadsapa johua johua quinajari: —¡Tiapi Dio Bedi tijani! —quinaraha Jesopa pohua tahimari ecomeramananijine jipera tadsapa: —¡Epeje tiquinaji! —nadsa didi inanabaqqijari.

*Jesopa Carireahuaji Dio Atti ecomeraridsajaro*

*Maraco 1.35-39*

<sup>42</sup> Ssiajajonadsa Jesopa nahi odsa pananidsa toqquenadsapa madija madide nohuer-ahihuaji toccajari. Nadsapa madija huapima pohuatohui qqui naridsamanajari. Jeso bacco quinadsapa: —Aji iadsa timadiccaji, odsa onihihuaji tiqquejeraji —quinajari. <sup>43</sup> Naraha pohua attipa: —Ohuapi odsa onihihuaji naqui Diocca cacahuehecca ima bicani mari mari onaridsanijine, onajaro. Nema onanijine occa Abipa ohua cadossejari —najari Jeso.

<sup>44</sup> Aja pohuapa Isaraeridenicca dsama Jodeahuaji Dio Atti mamari onihi onihi naridsanihuaji mari mari nanaridsa najari.

## 5

*Jeso canahatori canajarijine aba huemahi tojjari*

*Mateo 4.18-22; Maraco 1.16-20*

<sup>1</sup> Jesopa Carireahuaji Dio Atti maride ccaridsadsapa Carireacca coridsa onini onihi Jenesare inidihuaji toqquedsippajari. Nahidsapa madija huapi taha jahionajari, Dio Atti mittamanahijine. Nahidsana Jeso quebericossabote najari. <sup>2</sup> Nadsapa Jeso qqui taneje canoa capamehe ijirani ssiquidsa cacoda najaro. Canoa jinededenipa coridsa inididsa tajapa ssahuade toquejenajari. <sup>3</sup> Canoa cajariepi Ssinocca. Najarodsa Jeso toqquedsadsa jinededsa huati tajari: —Ssino, madija domo huahi huajiji canadsa mari ocanabaqquihijine ohua dso ticanacossaccaji —najari. Nadsapa Jeso canoadsa huittidsadsapa madija huapima mari icanabaqqijari.

<sup>4</sup> Nadsapa mari icanabaqquia jicadsapa Ssinodsa huati tajari: —Ticca canoa ajicca coridsa nocconi dsaja tanihuaji ori ticanamanadsa ticcadeni tajapa coro ticadsanamanaji, aba ticajimananijine —najari Jeso. <sup>5</sup> Nadsapa Ssino Jesodsa huati tajari: —Ia Maride, iapi dsome inassijaraha aba icaji nejerani —najari. —Naraha ia ticadossebaqquidsapi icca tajapa coro icadsippana —najari Ssino.

<sup>6</sup> Nadsapa coridsa nocconihuaji ori toquinadsa tajapa coro icadsanamanajaro. Joca icanimoramanadsapi aba ijijari. Ccanaja tajarijine tajapapi ojarie tajo tajo teri najaro. <sup>7</sup> Nadsapa pohuadeni tesse canoa onihicatohui dsepedeni huadsa huadsa quinajari, —Ibiji acco tocamabaqquina —quinadsa. Bacco quinadsa joca icadsamanadsapa aba huemaja najari. Canoa capamaraha ijijari. Najari aba qqunejepa je tocanamanabote najari.

<sup>8</sup> Nadsapa Ssino-Pedro najari aba huemahi qqui tadsapa huajo najari. Nadsapa Ssino Jeso bacohuaji pohua pitodsa huittidsa nadsa huati tajari: —¡Ia Medsede, aji ohuadsapi huaji tinaji! Ohuapi imasiri sse onani —najari. <sup>9</sup> Aja aba huemahi qqui toquinadsa Ssinopa cappinajari, pohua tessedeni naco cappinamanajari. <sup>10</sup> Aja Ssino pohua tesse Sebedeo bedideni Satiaco, Huano quinajarideni naco: —A ¿nejecotohui aba huemajari? —quinajari. Huapima cappinamanaraha Jesopa Ssinodsa huati

tajari: —Ticappina tejeraji. Jidapapi madija maride tijana. Tahidepi aba tiadsa tojahijine tidsepe ihiji naccadija naraha jidapapi madija Diodsa toquejenahijine tidsepe ijidsanaponitohui –najari Jeso Ssinodsa.

<sup>11</sup> Nadsapa ori nanimanajari. Coridsa inidi bacco nanimanadsa canoapi ssoqueque icadsanamanajaro. Nadsapa Jesodsa jai tojahijinepa poccadeni canoa, poccadeni tajapa, poccadeni aba, poccadeni madiejine huapima naqui inebomanadsa Jesodsana jai tojajari.

*Huapi jadsimarojari Jeso inanomijari*

*Mateo 8.1-4; Maraco 1.40-45*

<sup>12</sup> Jesopa dsama arobeni Carirea odsa panani onihidsa onihidsa mari mari naridsadsapa madija dsamacoma onini leprajine huapi jadsimarohi pohuadsa bacco najonajari. Jeso qqui tadsapa pohua bodia: —Jesona deni tojahi, ohuapi ajimani ojani –nadsa Jeso bacchohuaji pohua pitodsa huitta nadsa panopi namidsana bacco tajaro. Nadsapa Jesodsa huati tajari: —Ohua Medsede, ohuapi bica onejeraraha tia jipa tinadsapi ohua tinanabicanijine nahato tinani –najari.

<sup>13</sup> Nadsapa Jeso pohua dsepedsa bara inadsapa: —Jehe, jipa onani. Tibicaji –najari. Nanaja amadsati pohua huapicca tomossissi nadsapa tobicajari. <sup>14</sup> Nadsapa Jeso pohuadsa huati tajari: —Aji tibicanicca ima madijadenidsa huati taridsa tejerana. Naraha Diodsa dada toqquimahuajina ticcaji, onajaro. Nanidsa tiqquedsimadsapi dada toqquimade ojariadsara tepi tobicani tia nohue tinaji. Nadsapi Diodsa ticca ima bica tejeranicca toppineradsapi ticca daniji Diodsa tojanijine ohuaha ohuaha naha pina edede, ppiriri, oqui najari da da tidsimana. Pina Moisesicca marinajadsa iboraqquri inajarossa tinanaji, onajaro. Nadsapi huapimadsa ticca ima toppinerani ahuato tadsapi: “Pajissa tibicajaro” quinahijine –najari Jeso pohuajine huapi tobicajaridsa.

<sup>15</sup> Naraha Jeso pohua tahimaripi ssaja taridsajaro. Najarojine madija huapima Jeso pohua atti mittade jahijonana canajari, madija tocanomirehijine naco jahijonana canajari. <sup>16</sup> Naraha Jesopa pohua motta madija nohuerahihuaji totocca najari, Diodsa huati huati tahijine.

*Jesopa madija ssomi tojahi inabiquemanijari*

*Mateo 9.1-8; Maraco 2.1-12*

<sup>17</sup> Dsotodepa Jeso madija maride tojadsapa jodiideni mota marinaja pariseodsa jehe quinajarideni, jodiidenicca marinaja maridedeni naco mittade jassi taririd-sajari. Najaridenipa dsama arobeni Carireahuajicca odsa huapimacca jahijonarid-sajari, dsama arobeni Jodeahuajicca odsa huapimacca naco jahijonaridsajari, odsa panani Jerosarecca naco jahijonaridsajari. Nadsama Jeso maride tojadsa, madija inanomibaqquihijine naqui Diocca dacorehepi Jesojine ahuato tajaro. <sup>18</sup> Nadsapa madija ide tone biqueradsa isso ssomi tojahipa pohua taborodsa poridsa pohua tessedeni dsojo icanajonamanajari. —Jeso bacchohuaji porihijine odsa bodihuaji dsojo icadsimana –quinajari. <sup>19</sup> Naraha madija siba tadsapa dsojo icadsimamanahijine tojera tadsapi odsa tetepihuajina dsojo icanamaromanajari. Odsa tetepini arobenihuaji icatabojidsamanadsapa madija ssomi tojahi pohua taborodsa poridsa tappa icanaronamanajari. Madija domo huahuajanihi nocconidsa da icanaronamanadsapa Jeso pohua bacchohuaji bacco tocanaronajari. <sup>20</sup> Jeso pohuatohui dissessera tahi qqui tadsapa pohua bodidsa nahato tajari: —Pajissa, Jesopa madija inanomihijine nahato tahi –quinahi Jeso pohuadsa ahuato tadsapi coma tajaridsa huati tajari: —Otesse, aji imasiri tinanajaro huapimapi onanamossini. Jidapana ticca ima Diodsa tobicani –najari Jeso.

<sup>21</sup> Jeso atti nama nadsapa jodiidenicca marinaja maridedeni, pariseodeni tedseje bodideni huatoma-manadsapa: —Apaja, Jesopa “Imasiri onanamossina” naha. Pohua

attipa: “Ohuapi pina Dio ojani” nanaja najarissa naha. ¡Jesocca imapi bica tejerani pina Dio itamassojarissa nahi! Naraha Dio Pohuana ojarijari imasiri inanamossinijine –quinajari. <sup>22</sup> Naraha Jesopa pohuadeni bodicca ima nahato tadsapa pohuadenidsa huati tajari: —¿Nejecotohui tibodidenidsa nema tiquinajaro? –najari. <sup>23</sup> — Jari, tibodideni huatoma-manaji ¿nejecoma najaro imana tiadenidsa denima najora tani? Aja madija coma tajaricca imasiri onanamossini ¿najora taqui? Coma tajari onanabichahina ¿denima najora tajarorane? <sup>24</sup> Naraha aji ohua Madija Bedi ojajaropi madijacca imasiri onanamossinijine Diocca dacorehe ocajini nahatoqquiri tiquinanijinepi, aji namidsa naqui ohuatti ocajini nahatoqquiri tiquinanijine coma tajaridsa huati onana –najari Jeso. Nadsapa madija ssomi tojahidsa huati tajari: — Tiadsa huati onadsa: ¡Titehemaji! ¡Titaboro tididsa ticca odsahuaji ticcaniji! –najari.

<sup>25</sup> Nadsapa amadsati totehemadsa... huapima cattomama canaraha pohua taboro idi nadsa pocca odsahuaji toccanijari. Nadsapa Diodsa tohuatidsenidsa jiri jiri tanijari: —¡Diopa bica tahi, bica tahi! –tanijari. <sup>26</sup> Nadsapa madija huapima cappinamanaraha huatidsemanadsapa: —A, ¡Diojine bica tani! –quinajari. —Aji jidapana qqui inajaropi bica tani –quinajari.

*Jesopa Rebidsa huahua najaricca ima  
Mateo 9.9-13; Maraco 2.13-17*

<sup>27</sup> Nahi dsotodepa Jeso jahui toccadsa romanodenicca taminecca dosseniji dsiniro nanaccade qqui tajari. Pohua onipa Rebi. (Pohua oni ohuahapa Mateo.) Nahi romanodenidsa dsiniro da tanijine ihinaccamana nanihuajicca odsa bedeni bodidsa huittidsadsapa Jeso pohuadsa huati tajari: —Jina, ohuadsa ticcaji –najari. <sup>28</sup> Nadsapa Rebi pocca tarabadsa inebo, Jesodsana toccajari.

<sup>29</sup> Dsotodepa Rebi Jesodsa huatidsedsapa: —¡Jipaqquina –najari. Nadsapa pocca odsahuaji pohua tessedeni Jeso tedseje jipaqquimanahijine dsamatapa huemahi najorajari. Queriqquimanadsa pohua tesse romanodenicca taminecca dosseniji dsiniro nanaccadedeni, pohua tessedeni tedseje jipaqquimanajari. Nahidsa madija ohuahadeni naco Jeso pocca mamari tabaqquima jipamanajari. <sup>30</sup> Naraha nahidsa naco jodiodenicca marinaja pariseodsa jehe quinajarideni, jodiodenicca marinaja maridedeni tedsejepa madija imasiri cajimanajarideni tedseje Jesodeni jipamanahi qqui toquinajari. Najaro imadsa jiperaqquiri nadsapa Jesocca mamari tabaqquidsa atti atti quinajari: —A ¿nejecotohui tiadenipi romanodenicca taminecca dosseniji dsiniro nanaccadedeni tedseje, imasiri cajimanajarideni tedseje tijipamanajaro? –quinajari. (Aja madija nama najarideni tedsejepa jipade oppina tani quiquinanajari.)

<sup>31</sup> Nadsapa Jeso pohuadenidsa huati tajari: —Ponima pohuadenidsa ojipajerajaro. Pohuama otohui huahua quina-jarahi. Nomiqquri najaridenipa toponi totonanomide tohuini quina-jararaha comaqquiri najaridenina toponi totonanomide tohuini quiquinanajari –najari. —Ohuapi pina toponi totonanomidessa onajaro. Madijadenicca ima Diodsa tobicanijine pohuadeni accode occajonajarode. <sup>32</sup> Naraha madijapa: “Iapi bicaqquiri inani” quiquinanajaridenicca ima onanabicanijine occajona-jerajaro. Imasiri cajimanajaridenicca ima onanabicanijinena occajonajaro. Pohuadeni bodideni acco ocamabaqquidsa: “Imasiri inebona” quinahijine, onajaro. Pohuadeni bodi cacajiqquimeradsapa Diocca ima dsatidsa toquejenahijine, onajaro –najari Jeso.

*Jesodsa jipehe nebocossanicca ima huati toquinajari  
Mateo 9.14-17; Maraco 2.18-22*

<sup>33</sup> Naraha nahicca madijapa Jesodsa huati toquinajari: —Huanocca mamari tabaqquipa jipehe nebocossamanadsapa Diodsara huati huati dsadsanapomana



najari. Jodiodeni marinaja pariseodsa jehe quinajaridenicca mamari tabaqqui naco aja Huanocca mamari tabaqquissa quiquinanajari. Naraha ¿nejecotohui ticca mamari tabaqquia jijipaqquimana najari? –quinajari Jesodsa.

<sup>34-35</sup> Naraha manaco Jeso pohua cacomerajari: —Aja dsabisso amoneje cajibote najari pocca ejete najoradsa pohua tessedenitohui huahua nadsapa huapima pohuadsa queriqquidsapa najaridenidsa: “Jipehepi tinebocossamanaccaji” ¿tiquinapadseje? Nema tiquinejeranitohui. Pohua tessedenipa pohuadsa huatidsemanadsa jipaqquimanahitohui. Naraha huada onihiccadsa dsabisso cajibote najari iaccamanadsapa pohua tessedeni jipehe nebocossamanahitohui –najari Jeso. (Nadsama najaro imapi Jeso aja namihuaji madidsapa pohua tessedeni pohuadsa huatidsemanadsa pohua tedseje jijipaqquimana najaripaja. Naraha dsotode pohua inanadsoqqe-manadsapa pohua tessedenipa jipehe nebocossa-manaccahitohui, najaripaja.)

<sup>36</sup> Nadsapa ajijaro namidsa imadinicca ima onihi Jeso pohuadenidsa huati tajari: —Icca etero dsatipi etero jadanidsa podsacossanijinepi beri beri inejerajaro. Icca etero nema inanadsapi icca etero dsati inatabaccorajaro. Najaro etero dsati bobini beri tojidsani mota naqui etero jadanidsa podsacossadsapi najarossa nejerajaro. Jidsa tani. Etero jadanipi tobiquemaninira tani –najari Jeso. (Nadsama aji Jesocca marinajapi pina jodiodenicca marinajassa nejerani. Jeso pocca marinajapi dsati.)

<sup>37</sup> —Ima onihi naqui ajima najaro: Uva ppejene nahatodsatipa bani etero ssequi nahi jadahidsa sso sso ihidsamana najarajari. Uva ppejene nahatodsatipa bani etero jadahidsa sso todsadsa ssicatadsapa jocaquera tajarijine sseo tahi caji tahi. Sseo tadsapa uva ppejene sso taha jica tahi, dsamine naco totabaccoradsapa coro quina tahi. <sup>38</sup> Nadsama uva ppejene dsatipa bani etero ssequi nahi dsatidsara sso sso totodsa najari –najari Jeso. (Aja pohua atti nama najaripa madija bodi dsati tojadsana Jesocca marinaja dsati eahuanijine pajirahi, najari.)

<sup>39</sup> —Ima onihi naqui tiadenidsa huati onana: Madija uva ppejene jadahi dse dse quiquinanadsapa pohuadenipa uva ppejene nahatodsati tohui quiquinanajarajaripaja. “Uva ppejene jadahipa iadsa bica tajari, jidsera tahi” quiquinanajari –najari Jeso. (Nadsama najaro imapi madija poccadeni ima jadani naqui najarossa najaro. Poccadeni ima jadanidsa huatideni huanagquiri nadsapa Jesocca ima dsatidsa: —Najarona denima iadsa bica tani –quina-jarajaripaja. Poccadeni ima jadani nebomanahijinepa jiperaqquri najaripaja.)

## 6

*Jassinajacca huadadsa Jesocca mamari tabaqquipa aroso jidsadsa trigo bono pore dsanapomanajari*

*Mateo 12.1-8; Maraco 2.23-28*

<sup>1</sup> Naraha jassinajacca huadadsa Jesopa pocca mamari tabaqqui tedseje toccajari. Huidsaja nocconi motta jahui toqqeqquimani jai tojeqquimajari. Nahihuajipa aroso jidsadsa trigo bono jadahi caji tajari. Jesocca mamari tabaqqui nahi jai tojeqquimadsapa pore dsanapomanadsa pohuadeni dsepedsa siqui apa, siqui apa, siqui apa dsanapomanajari. <sup>2</sup> Naraha jodiodeni marinaja pariseodsa jehe quinajarideni qqui toquinadsapa pohuadenidsa bica tejeradsa huati icanabaqquimanajari: —¿Nejecotohui jassinajacca huadaraha najaro huidsajacca bono pore tiquinajari? Jassinajacca huadadsapi idsepe ijie oppina taraha –quinajari. Naraha bonopa pamaha pore pore ijidsamaneri najariraha pariseodeni pohuama pohuadenidsa ima inahanamanajaro.

<sup>3</sup> Naraha Jeso pohuadenidsa huati tajari: —¿Naraha tiadenipi aji Dio Atti maittaccadsama dsodo naniccadsa Dabicca ima hua hua titiquina naraha tetideni

ajimamanajarorane? Najaro imapi Dabipa pohua tessedeni tedseje pemimanadsapa pan Diodsa da tahicca oppina taraha jipamanajari. <sup>4</sup> Diodsa dada toqquimahuaji toqquedsimadsa cacahuadedsa pan tohui huati tajari. Pan ohuaha nohueradsa Diodsa da tahiccaraha Dabi jipajari, pohua tessedenidsa naco da inabaqquidsa jipamanajari. Najari pan Diodsa da tahipa dada toqquima cacahuadedenira jijipamana najariraha Dabideni pemimanadsa jipamanajari oppinera tahi -najari Jeso.

<sup>5</sup> Naraha Jesopa denima pohnadenidsa huati tajari: —Madija Bedi ojajaroa jassinajacca huadapi ohuana jinede ojani. Jassinajacca ima cacahuadepi ohuana paji -najari Jeso.

*Madija dsepe siricca ima*

*Mateo 12.9-14; Maraco 3.1-6*

<sup>6</sup> Jassinajacca huada onihidsa naqui Jesopa Dio Atti mamarihuaji toqquedsimadsapa mari icanabaqquipomajari. Naraha nahidsapa madija dsepe nahatonicca ccara tocajani huittarijari. <sup>7</sup> Naraha jodiodenicca marinaja maridedeni, marinaja pariseodsa jehe quinajarideni tedseje Jeso innocodsamanajari. Jesopa jassinajacca huadadsa madija inanomibaqquidsapa pohnadenidsa pina jassinajacca huada jer-ajarodsa dsepe ijijarissa najari, quinajari. Pohnadeni bodipa: —Jidapana jassinajacca huadadsa dsepe siri inanomidsapa Jesodsa ima inahananijine -quinajari.

<sup>8</sup> Naraha Jeso pohnapa pohnadeni bodi nahato tadsapa madija dsepe siridsa huahua najari: —Titehemadsa ahuaaji ticcajonaji -najari. Nadsapa totehemadsa nahihuaji huajari. <sup>9</sup> Nadsapa Jeso huapimadsa huati tajari: —Tiadenidsa huati onana. Moisesicca marinaja, icca madijacca marinaja naqui nahatoqquiri tiquinadsapi ohuatti tecomeramanaji. Jassinajacca huadadsapi ¿nejecoma najaro ima inananina “Bica tani” tiquinajaro? Jassinajacca huadadsa madija inabicabaqquidsa “Oppina tani” ¿tiquinajaroqui? Madija inajidsobaqquidsana “Bica tajaro” ¿tiquinajarorane? -najari. —Jassinajacca huadadsa naco ijine madija tossiajadsa ¿oppina taqui? “Paja dsoqquerina” ¿tiquinajarorane? -najari.

<sup>10</sup> Nadsapa Jeso madija huapima jassi nahujanijari noccodeni icattabaqqui nadsa dsepe siridsa huati tajari: —Jari, tidsepe ohuahuaji da ticanajonaji -najari. Nadsapa pohua dsepe pohnahuaji da icanadsapi dsepe tocabicaajaro. <sup>11</sup> Naraha jassi nahujanijarideni motapa pariseodeni. Pohnadenina Jesodsa huadimanajari. Nadsapa pohnadenira imahaha canadsa: —¿Nejecoma inanadsa Jeso inanadsoqquehijine? -quinajari.

*Jeso pocca dodosse tabaqqi 12 quinajari icattejidsabaqquijari*

*Mateo 10.1-4; Maraco 3.13-19*

<sup>12</sup> Nadsapa najari abadsicodsa Jesopa Diodsa huati tahijine ssonohuaji toqquemorajari. Nahidsa dsome Diodsa huati huati taha cassiaja najari. <sup>13</sup> Cassiajadsapa pocca mamari tabaqqidsa huahua najari. Huapima queriqquimanadsa 12 quinahana icattejidsabaqquijari, pohua huatimade toquejenahijine. Nadsapa Jeso onideni icanacanibaqquijari: —Occa dodosse tabaqqi -najari. <sup>14</sup> Tahidepa Ssino. Pohua oni Jesojine icanacanidsatipa: Pedro, najari. Pedro ohuaha Adiri. Pohnadeni tesse Satiaco, Huano, Feripe, Batorome quinajari. <sup>15</sup> Pohnadeni tesse ohuaha naco Mateo, Tomas, Satiaco quinajari. Satiacopa Arapeo bedi. Pohnadeni tesse ohuaha naco Ssino, pohnadsa: romanodeni momohuade, quiquinanajari. <sup>16</sup> Pohnadeni tesse ohuahapa Joda. Najaripa Satiaco bedi. Jichiccapa Joda Iscariote. Najaripa Jeso ccaccorade. Najarideni Jeso icattejidsa-baqquijaripa 12 quinaha pohnadsa toquejenajari.

*Jesopa madija huapi taha mari icanabaqquijari*

*Mateo 4.23-25; Maraco 3.7-12*

<sup>17</sup> Nadsapa Jeso pocca dodosse tabaqqui 12 quinajarideni tedseje qquedsippaniraha nani deoni huamo tanihuajipa madija huapima Jeso pohuatohui madimanajari. Nahihuaji Jesocca dodosse tabaqqui huapima queriqquimanajari. Nahidsa naco dsama arobeni Jodeacca madija, odsa panani Jerosarecca madija, passo imeni inididsa madimanajarideni, aja odsa panani pamehe Tirocca, Sidohuajicca jahijonana canajari. <sup>18</sup> Huapimapa Jeso atti mittamanaja camahijine jahijonajari. Comaqquri najarideni Jeso inanomibaqquihijine naco jahijonajari. Aja madija bodidenidsa Satanacca dodosse tabaqqui tocorime madidsamanajarideni naco jahijonajari. Pohuadenipa nanajidso toquejenaraha najarideni naco Jesojine tocanomireridsajari. <sup>19</sup> Madija comaqquri najaridenipa: —Jesodsa idsepedsa bara inadsapi icanomirenijine —quinadsa pohuatohui disseraqquri najari. Aja Jeso pocca dacorehe pohuadenidsa tojadsapi huapima tocanomireridsajari.

*Diopa madijadsa ima bicani inanajarrocca ima*

*Mateo 5.1-12*

<sup>20</sup> Jeso pocca dodosse tabaqqui icattabaqqui nadsa huati tajari: —Tiadeni motapi ticappiramanaraha Diotohuira tiquinadsapi Diopa tiadenidsa ima bicani inanajaro. Diocca cacahuehe tiadenidsa tojanitohui.

<sup>21</sup> —Tiadeni mota naqui jidapana tipemimanaraha Diotohuira tiquinadsapi Diopa tiadenidsa ima bicani inanajaro. Nidsa dsotode Diohuaji tiqueriqquidsapi tipajiramananissa tanitohui.

—Tiadeni mota naqui jidapana oji tiquinaraha Diotohuira tiquinadsapi Diopa tiadenidsa ima bicani inanajaro. Nidsa dsotodepi tetidsemaneri nadsa jaja taqquimananitohui.

<sup>22</sup> —Ohuapi Madija Bedi ojajaroa occa madija tiquejenajarojinepi madija ohuadsa jiperaqquri najaridenipa pohuama tiadenidsa naco jiperaqquri nahitohui. Najaro ima tiadenidsa tojadsapi Diopa tiadenidsa ima bicani inanajaro. Madija ohuadsa jiperaqquri najaridenipa aja tiadenidsa naco: “Iadsa tiquejemamana tejeraji” quinadsapa tiadeni dosse dosse tatanibaqquimana nahitohui. Najaro ima tiadenidsa tojadsapi Diopa tiadenidsa ima bicani inanajaro. Nadsama madija tiadeni totamasso-baqquimanadsa naco Diopa tiadenidsa ima bicani inanajaro. Nadsama tiadenipi ohua onidsa tecanimanajarojine aja ohuadsa jiperaqquri najaridenipa tiadeni onidsa naco: “Imittana inejerani, tabaccoraqquri nahi” quiquinanahitohui. Najaro nacasserehe tiadenidsa tojadsa naqui Diopa tiadenidsa ima bicani inanajaro.

<sup>23</sup> Ohuadsa jiperaqquri najarideni biridideni naco maittaccadsama Dio Atti cacomeracquiri najarideni inajidso-baqquimanaja najonapohui najari. Najarideni potemahi jidapana naco tiadeni tonajidso-baqquimanadsa jepeje! Tibodideni ccaracossa tejerana. Pina tetidsemaneri nana, onajaro. Nidsa memehuaaji Dio madihihuaji bacco tiquinadsapi Diocca daniji bicabote tiadenidsa tojanitohui —najari Jeso.

*Diopa madija ettajobaqquihitohui*

<sup>24</sup> Nadsapa madija domo huajaridsa Jeso denima huati huati tajari: —Tiadeni motapi tidsepedenitaji sseqquiri tiquinajarojine Dio tohui tiquinejerani. Jidapana ajijaro namidsa timadimanadsapi tiadeni tohuini tiquinanicca huapima ticajimananaraha nidsa dsotodepi tiadenidsa nohueranitohui. A, tiadenipi tohuati nahanaqquri tiquinani. Diopa oppina tanihuaji tiadeni tonanabaqquihitohui.

<sup>25</sup> —Aji tiadeni mota naqui jidapana jijipa, dsamatapa sseqquiri tiquinajarojine Dio tohui tiquinejerani. Naraha nidsa dsotodepi tipemimananitohui. A, tiadeni naqui tohuati nahanaqquri tiquinani. Diopa oppina tanihuaji tiadeni tonanabaqquihitohui.

—Tiadeni mota naqui ajijaro dsamadsa timadimanaccadsapi ponima jai tijaridsadsa tetidsemaneri, jaja tiquineri naridsadsa: “Jehe, bica tani” tataridsamana

naraha nidsa dsotodepi ocasserani teridsamanadsa oji tiquinanitohui. A, tiadenipi tohuati nahanaqquiri tiquinani. Diopa oppina tanihuaji tiadeni tonanabaqquihitohui.

<sup>26</sup> —Nadsama tiadeni mota naqui aji occa imassa tinanamana-jeraraha madija tiadenidsa: “Jehe, ticcadeni ima bica tani. Tiadenidsa etidsejaro” quiquinanadsa tetidsemanaraha tiadenipi tohuati nahanaqquiri tiquinani. Diopa oppina tanihuaji tiadeni tonanabaqquihitohui. Maittaccadsama Dio Atti cacomeraqquiri najarideni madimanapodsa naco Dio Atti mari icanabaqquihissa taraha poccadeni marinajadsa: “Jehe, bica tani” quina-jarajari. Naraha maittaccadsama naco madija ohuahadeni attidenipa: “Ia naqui Dio Atti cacomeraqquiri inani” quiquinanaraha pohnadeni nanamaidsamana najari. Najaridenidsana madija huapima attideni: “Jehe, ticcadeni ima iadsa bica tani” quiquinanajari, maidsehena pohnadenidsa bica tadsa. Jidapana naco tiadenidsa: “Jehe, bicaqquiri tiquinani” quiquinanajari. Najaridenia ajaripaja jinodideni potemahi –najari Jeso.

*Tiadeni huadidedenidsa tetideni huanaqquiri nana*

*Mateo 5.38-48; 7.12*

<sup>27</sup> —Nadsama aji ohuatti timittamanajarodeni tiadenidsa ajima onajaro: Tiadeni huadidedenidsa pina tetideni huanaqquiri nana. Aja tiadenidsa jiperaqquiri najarideni naco pohnadenidsa pina ima bicanira titinanamana nana, nani tijinedeni ima bica tanijine, onajaro. <sup>28</sup> Aja madija ohuahadeni naco tiadeni totamassobaqquimanadsa: “Tabaccoraqquiri tiquinani” quiquinanaraha pina tettideni bica tadsa pohnadenidsa huati huati tataridsamana nana, onajaro. Aja madija tiadenidsa tabaccorehe ihinanamana nadsa naco pina Diodsara huati huati titiquina nana, nahi Diona inabicabaqquihijine, onajaro. <sup>29</sup> Madija huadidsa tipano idanidsa naco “Ohuaccone manaco odana” tejerana, onajaro. Tiadsa huadi tajaripa pajara tia cahadi, pajara tia cahadi naraha manacopi pohnadsa tedi tejeraji. Nadsama madija ohuahapa ticca etero pamacossajaro qqui tadsa huapicca tohuini inacomadsa: “Ohuadsa da taji” nadsa naco pohnadsa da tinaji. Titetepicca onihi naqui teccoceradsa pohnadsa da tinaji. Nema tiquinadsapi occa marinaja tecahuamanajaro. <sup>30</sup> Madija tidsepetaji mitta nadsa naco pohnadsa da tinaji. Tidsepetaji huatirahi ididsa naco huati tidsima tejeraji. <sup>31</sup> Nadsama tiadenipi madija huapima tiadenidsa ima bicanira inanamananijine tohuini tiquinadsapi madija huapimadsa naqui ima bicanira titinanamana nana, onajaro –najari Jeso.

<sup>32</sup> —Tiadenipi madija tiadenidsa huatideni huanaqquiri najaridenidsara tetideni huanaqquiri nani ojari nadsapi ¿Diopa tiadenidsa: “Jehe, bicaqquiri tiquinani” napadsaja? Nohuerahi. Aja madija imasiridsa disseraqquri najarideni naco pohnadeni tessedsa huatideni huanaqquiri nahi. Naraha pohnadeni tesse jararidenidsapa huatideni huaneraqquiri nahi. <sup>33</sup> Tiadenipi madija tiadeni acco camamanajari-denidsara pohnadeni acco ticamabaqquimanahi ojari nadsapi ¿Diopa tiadenidsa: “Jehe, bicaqquiri tiquinani” napadsaja? Nohuerahi. Aja madija imasiridsa disseraqquri najarideni naco pohnadeni tessedeni acco icamamana tahi. Naraha madija pohnadenidsa noccodeni jidsaqquiri najaridenidsapa pohnadeni acco camade jiperaqquiri nahi. <sup>34</sup> Tiadenidsa madija attipa: “Pohnama ohuadsa da taccajo, nidsa tiadsa da onanihijine” nadsa tibodidenipi: “Jehe, ohuadsa da inanihitohui, nidsa dsotode ocajipomanijine” titiquina nadsapi najaridenidsara da da tiquinani ojari nadsapi ¿Diopa tiadenidsa: “Jehe, bicaqquiri tiquinani” napadsaja? Nohuerahi. Aja madija imasiridsa disseraqquri najarideni naco pohnadeni tessedsa pohnama da quina tahi, dsotode pohnadenidsa ccanipomahijine. Naraha madijapa da naniraqquiri najaridenidsapa pohnama dade jiperaqquiri nahi.

<sup>35</sup> —Naraha tiadenidsa ohuattipi: Tiadeni huadidedenidsa naco tetideni huanaqquiri nana. Tiadeni acco cama-jararideni naco acco ticamabaqquimanana.

Madija naco tiadenidsa: “Pohuama ohuadsa da taccajo” quinadsapa pohuadenidsa da da tiquinana. Dsotode da inanihitohui tibodideni huatomana tejerana. Nema tiquinadsapi manaco Diopa tiadenidsa pocca daniji bicabote da inanitohui. Nadsapi ticcadeni ima naqui ahuato tanijine, aja Abi Dio memehuaji madijaricca ejedeni tiquejenajaro. Pohuapa madija huapimadsa pocca nahatoniji eccocco-jerajaro. Dio Pohuadsa: “Ticca daniji ohuadsa bica tani” quina-jarajaridenidsa aja madija tabaccoraqquiri najaridenidsa naco Abi Diopa huapimadsa huati huana tajari. Ajijaro dsamadsa madimanajarideni huapimadsa Dio pocca nahatonaja inanaridsajaro. <sup>36</sup> Nadsama tiadeni naqui pina ticcadeni Abi Diojinessa tinanamanana. Abi Diopa tohuati huanehe, acco camehema madijadsa huati huana tajari, tiadeni naqui madija huapimadsa tetideni huanagquiri nadsa pohuadeni acco acco titicamabaqquimana nana, onajaro –najari Jeso.

*Madija ohuahacca imadsa: —Tabaccora tani –tiquinejeraji*

*Mateo 7.1-5*

<sup>37</sup> —Tiadenipi madija ticattejidsamana tajarajo. Pina Diocca dossenijissa inana-jerani qqui tiquinadsa: “A, namajide rahi, pocca ima bica tejerani” tiquinejerana. Madijadenidsa tettideni nema tiquinejeradsana manaco Diopa tiadenidsa: “A, ticcadeni ima naqui bica tejerani” najarahitohui tiadenidsa. Aja madija ohuahacca ima tiadenidsa bica tejeradsa naqui tettidenipi: “Pohuapa tabaccora tahi, pohua nanajidso tojahi bica tahi” tiquinejeraji. Nema tiquinejeradsana manaco Diopa tiadenidsa: “Tia naqui tabaccora tinani, nanajidso tijanitohui” najarahitohui. Nadsama madija ohuahacca ima tiadenidsa bica tejeradsa naqui epejena najaro imatohui tibodideni huatomana dsanapo-jerana. Pohuadsa tedimanadsa naqui denima ticahadirejerana, pina ticajonerapomana, onajaro. Nema tiquinadsapi titessedsa ima bica tejerani tinanamanadsa naqui manaco tiadenidsa: “Epejena, huadi onejerani, ohuati ajimani” nahitohui. Diocca ejedeni tiquejenadsapi nidsa dsama jicadsa Dio naco ticcadeni ima huati nimani-jarahitohui. <sup>38</sup> Nadsama tiadenipi madijadsa da tiquinadsa naqui najaropi manaconitohui jerani ponima da tiquinaji. Nema tiquinadsapi Diopa tiadenidsa da inanitohui. Pohuapa tiadenidsa huemani da inanitohui. Pina ticcadeni sacco Pohuajine ijijaro, epejeraha denima ajarini joca inadsa topa icamerijaro, denima quissa icameridsapi ijinissa tajaro. Nadsapi tiadenina huemani ticajimananitohui. Tijinedeni madija ohuahadsa tinanamanajarocca imapi manaco tiadenidsa najarossa najaro inanamananitohui, onajaro. Pina huemahi madijadsa da tiquinadsapi manaco Diopa tiadenidsa huemahi da inahitohui. Madijadsa badsira taha da tiquinadsa naco manaco Diopa tiadenidsa badsira taha da inahitohui, onajaro –najari Jeso.

<sup>39</sup> Nadsama Jesopa ajijaro namidsa imadinicca imadsa mari icanabaqquijari: —Nocco siri pamahapa ¿ojaria pohua tesse eccaridsahijine nahato taco? Nahato tajarahi. Pohua tesse eccaridsadsapa odi tohuajarodsa pamaha tocatojedsimera tahi. Paji, pina nocco sirissa tiquinejerana. Ssamoqquiri tiquinejerana. <sup>40</sup> Ajijaro ima tetideni ajimamana tejerana: Madija pocca mamari tabaqqupa pohuadeni maridedsa deni toquejena-jarahi. Pohuadeni maridena denima nahato tajari. Naraha disseraqqiri nadsa tocahatterahissa tadsana pina pohuadeni maridessa quinahitohui, onajaro. Jehe, nema tiquinana. Ohuadsa ticahatteranissa tana, onajaro –najari Jeso.

<sup>41</sup> Madija ohuahacca imadsa: —Bica tejerani –inejeranijine Jesopa ajijaro namidsa imadinicca ima tadsajani mari icanabaqquipomajari. Pohua attipa: —Tiadenipi timecotecca madie pina Diocca dossenijissa nejerani qqui tiquinadsapi tettideni: “A, pohuajine ima bica tejerani” titiquina naraha tiadeni naqui imasiri ticajimanani. Nadsama najaro ticcadeni imapi pina timecote noccodsa ahua majiconi huedsani qqui tinajarocca imassa najaro. Timecotedsa: “A, tinoccodsa ahua majiconi huedsaha,



tire oninena” taraha tinoccodsa naqui ahua majiconi imeni huedsani. Tinocco ahuatora tadsapi qqui tinanissa tejerani. <sup>42</sup> Nadsama tiadenipi imasiri ticajimanaraha ¿nejecotohui timecotedsara: “A, tijine ima bica tejerani. Tia acco ocamana, ticca ima tobicanijine” titiquina naraha tiadenipi tahide ticcadeni imaha tijinedeni tobicapojerani? ¡Jaho, nema tiquinadsapi pina mamaisadedenissa tiquinajaro! Ticcadeni ima bica tejeradsapi aji ticcadeni imaha tinanabicamanapoji. Nadsana timecote acco ticamamanahijine tipajiramananitohui, onajaro –najari Jeso.

*Ahua bono tahimari*  
*Mateo 7.17-20; 12.34-35*

<sup>43</sup> Jesopa ahuacca imadsa mari icanabaqquihijine huati huati tajari: —Ahua bicahidsapa bono tabaccora tajari cahua-jarajari. Ahua tabaccora tajaridsapa bono bicahi quejemaha cahua-jarajari. <sup>44</sup> Madijapa iquiera bono tohui quinadsapa ¿botani tetehuedsa iquiera bono pore pore quinaco? Nohuerahi. Uva bono tohui quinadsa naco ¿cotihidsa uva bono pore pore quinaco? Nohuerahi. Nadsama ahua huapima bono cajiridsadsapa bono bicahi cajihí nahato inadsapi: “Najari ahuapa bica tahi” inajaro. Bono tabaccora tahi cajihí nahato inadsapi: “Najari ahuapa tabaccora tahi” inajaro. <sup>45</sup> Aji madijacca ima naqui pina ahuacca imassa najaro. Aja madijadenipa pohuadeni bodicca ima nahato inejeraraha poccadeni madie qqui inadsapi pohuadeni bodicca ima naqui iadsa ahuato tajaro. Madija bica tajaripa pohua bodidsa ima bicani cajidsapa ima bicani ihinana najaro. Naraha madija bica tajarajaripa pohua bodidsa ima tabaccora tani cajidsapa imasiri ihinana najaro. Aja madija huapimapa pohuadeni bodidsa ima caji tadsapi najaro imara huati huati totoquina najari –najari Jeso.

*Odsa capamajarocca ima*  
*Mateo 7.24-27*

<sup>46</sup> —Tiadeni motapi ¿nejecotohui ohuadsa “Ohua Medsede” titiquina naraha aji ohuattissa tinanamana-jerani? onajaro. <sup>47-48</sup> Aja madija ohuadsa bacco quinadsa ohuatti mittamanadsapa ohuattissa inanamanajaropi pina aja madija “Odsa bicani ocanahatona” najaricca imassa quinajari. Madijapa pocca odsa icanahatonijinepi odi hui idsimajaro. Nami ccara tanihuaji bacco tadsana huehuema ppa idsajari. Nadsapi odsa daco cajirajaro. Nadsapi ppani imeni bacco nadsa dacorehe ssahaha canadsa odsadsa jiba jiba naraha cojo tocana-jerajaro. Aji huehuemapi nami ccara tanihuaji bacco teje najaro. <sup>49</sup> Naraha madija ohuatti mittamanaraha ohuattissa inanamana-jerajaropi pohuadenipa pina aja madija pocca odsa nahatode ssamo tajarissa quinajari. Najari madijapa pocca odsa icanahatodsapi huehuemajine odi hui todsanipi ssiqui nami ccara tanihuaji bacco tejerajaro. Odipi huaji tejerani. Nadsapi ppani imeni bacco nadsa dacorehema ssahaha canadsa odsadsa jiba jiba nadsapi odsa cojo tocanajaro. Odsa cojo tocanadsa toquehedimadsapi catirorijarossa najaro –najari Jeso.

## 7

*Romanodenicca soldado dossedecca medse Jeso inanomijari*  
*Mateo 8.5-13*

<sup>1</sup> Jeso madija mari icanabaqquia jicadsapa odsa panani Capernaohuaji toccanijari.  
<sup>2</sup> Nahidsapa romanodenicca soldado dossede madijari. Pocca dodosse tabaqqui soldadopa 100 quinajari. Najari pocca odsahuajipa pocca medse coma tajari huatiabote najari. Pohuapa pocca medsedsa huati huana tajari. <sup>3</sup> Nanaja Jeso tahimari mittadsapa nahicca jodiodeni ime jocohuideni mota Jesodsa huati toquinahijine dosse inabaqquijari: —Jeso ahuaaji ccajonahijine huati ticanamanahissa tana, nahi occa medse inanomihijine –najari. <sup>4-5</sup> Nadsapa Jesodsa bacco toquinadsapa huati

toquinahissa tajari: —Aja romanodenicca soldado dossedepa bica tahi. Puhuapa icca madija jodiendenisa naco huati huana tajari. Puhuapa icca Dio Atti mamari naqui pohuajinena icajijaro. Puhuapa iadsa bica tahi. Manaco pohua acco ticamajo, inajaro -quinajari Jesodsa.

<sup>6</sup> Nadsapa Jeso pohuadenisa toccanijari. Odsahuaji bacco tanimanabote naraha romanodenicca soldado dossede pohua tessedeni tahide dosse inabaqquijari, Jeso bacco ijidsamanahijine. Jeso jahuidsa bacco ijidsamanadsapa pohuadsa huati toquinajari: —Soldado dossede attipa ajama napaja: “Ohua Medsede, epeje, occa odsahuaji ticcajona tejeraji. Tiapi nahatojide tijirani naraha ohuapi ajimani, ssamo onani. Occa odsahuaji tiqquedsimanijine jipera tinanitide” napaja -quinajari Jesodsa. <sup>7</sup> —Pohua attipa: “Jeso, ohuapi pina aji tia bica tinajarossa onejerani onadsa tia qquide oqquejerajaro. Naraha tia huati tinadsapi occa medse tonomihitohui, onajaro” napaja -quinajari. <sup>8</sup> —Pohua atti denima naqui: “Aji ohua naqui occa taminecca dossenijidsa omadijaro. Manaco soldadodenipa occa dossenijidsa madimanajari. Puhuadenitohui huahua onadsapi jahijona tahi. Dosse dosse onadsa naco ohuattidsa jai toja tahi. Occa medsedsa naqui: ‘Tidsepe ijiji’ onadsa naqui pina aji ohua odossejarossa inana tani. Nema nadsapi ajidsa huati tinadsa occa medse tonomihijine tipajirani, napaja tiquinana” najari romanodenicca soldado dossede atti -quinajari pohua tessedeni.

<sup>9</sup> Najaro ima Jeso mittadsapa huatidsedsa pohua bodi: —A, pohuapa nahato taha -najari. Tahidehuajanidsa pohua nattiuhaji jahimissajaridenidsa huati tajari: —Tiadenidsa huati onana: Ajajari bodi namanahapa pajissa nahissa tajari. Tiadeni Isaraeri potemahideni huapimapi tettideni ohomitta naraha ajararissa najari tiadenidsapa nohuerahi. Pajissa tiquinanissa tani ohomitta nejerani -najari Jeso.

<sup>10</sup> Romanodenicca soldado dossede pohua tessedeni jai tojanidsa pocca odsahuaji bacco tanimanadsapa pocca medsepa tonomihira qqui toquinajari.

### *Jesopa amoneje tabira tocajani bedi inahatonijari*

<sup>11</sup> Nahi dsotodepa Jeso pocca dodosse tabaqqui tedseje odsa onini Nainahuaji jai tojajari. Madija huapi taha naco pohuadenidsa jai tojajari. <sup>12</sup> Odsa totoqquedsimahuaji bacco toquinabote naraha qqui toquinanaja madija dsoqquehi dsodsojo tocanadsa dsojo icanajonamanajari, ppa idsamanahijine. Aja dsoqquejari imenipi tabira tocajapojaro. Bedi dsoqquedsapa poni motta tojajaro. Poni bedi maqquideje ojari naraha dsoqquejari. Odsahuajicca madija huapima poni huatinimade jahijonajari. <sup>13</sup> Naraha Jesopa ponidsa huati huana tadsapa: —Oji tejeraji -najari. <sup>14</sup> Nadsapa Jeso tohuajiressijari, dsoqquejari dsodsojo tocanadsa bara nadsapa dsojodedeni domo huaha tahi najari. Nanaja Jesopa huati tajari: —Dsabisso, tiadsa huati onana: ¡Titehemaji! -najari.

<sup>15</sup> Nadsapa aja dsoqquejari camittemanidsa totehema, huittari najari. Atti naco cajipomajari. Nadsapa imenidsa Jeso attipa: —Aja, ticca ejedeni tiadsa tojanipomajo -najari. <sup>16</sup> Madija huapima Jesojine dsabisso camittemanihi qqui toquinadsapa cappinamanaraha Diodsa huatidsemanajari: —¡Iadsa Dio Atti cacomerabote nahato tajari bacco nahi, bacco nahi! -naridsamanajari huapima. —Iapi Diocca madija iquejeneje najaro jidapapi Diocca nahatohue aji ia qqui inajaroccapo Dio ia acco tocamabaqquihitohui inajaro -quinajari.

<sup>17</sup> Nadsapa Jesojine dsabisso camittemanidica ima tojaridsadsapi dsama Jodeahuaji madimanajarideni huapima mittaridsamanajari. Poccadeni dsama jicacquinihuaji naqui ima bacco taridsajaro.

*Huano Baotista pocca dodosse tabaqqui tahimarideni  
Mateo 11.2-19*

<sup>18</sup> Huano pocca mamari tabaqqui —Jeso canahatori canahi -quinahi ima mittamanadsapa Huanodsa huati toquinajari. Nadsapa Huano Jeso tahimari mittadsapa pocca mamari tabaqqui pamaha Jesohuaji dosse inabaqquihijine huahua inabaqquijari. <sup>19</sup> Nadsapa pohuadenidsa huati tajari: —Jesodsa ticadaji, pohuadsa ohuatti huati tiquinana. Ajima tiquinaji: “¿Tiapi aji pohuatohui imadijaro Cristo-Mesia tijaqui? ¿Ohuahatohui imadiccanijinerane?” tiquinana Jesodsa -najari Huano. <sup>20</sup> Nadsapa Huanocca dosseniji Jesodsa bacco toquinadsapa pohuadsa huati toquinajari: —Huano Baotista attipa tiadsa huati inanijine ia dosse najonabaqquijari. Pohua attipa: “¿Tiapi aja tohui imadijaro Cristo-Mesia tijaqui? ¿Ohuahatohui imadiccanijinerane? nadija tiquinana” nade Huano atti -quinajari Jesodsa.

<sup>21</sup> Aja pohuadeni Jesodsa huati toquinadsama Jeso pohua dsepe iji iji nahi qqui toquinajari. Madija comagquiri najarideni comani onihi, onihi cajiridsamanajari inanomibaqquijari. Madija bodidenicca tocorime ohuaha ohuaha naridsajarideni naco Jesojine jahinineridsajari. Madija nocco sirideni naco nocco ssire inanaridsajari.

<sup>22</sup> Nadsapa Huano dosse inajonabaqquijaridenidsa Jeso pohua cacomerajari: —Jehe, ticadanidsa Huanodsa huati tinanimanaji. Aji qqui tiquinajaro, aji timittamanajaro pohuadsa huati tinanimanana -najari Jeso. —Ajima tiquinana: “Madija nocco sirideni nocco ssire tocanirehi. Madija isso sirideni naco tocanomiredsa jahiridsahi. Madija dsamacoma onini leprajine huapideni jadsimarojarideni naco imedeni tobicaridsahi. Madija huaribodeni didiqquiri najarideni naco huaribodeni ssire tocanireridsahi. Madija huatijarideni naco camitemmani-ridsamanahi. Madija tohuati nahanaqqui ri najarideni naco icassiejeranijinecca ima mari icanabaqquidsa mittaridsamanahi” tinanimanana tiadeni maridedsa -najari Jeso. <sup>23</sup> —Aja madija mota attidenipa: “Jesopa Cristo-Mesia jarahi, pocca imapi onihi, Cristo-Mesiacca imassa nejerani” quinaraha madija mota nama quina-jarajari attidenipa: “Pajissa Jesopa icca Mesia” quinadsa pohuadenidsana Dio pocca biquehe inananitohui. Ajijaro ima huapima Huanodsa huati tinanimanana -najari Jeso.

<sup>24</sup> Nadsapa Huano dosse inajonabaqquijarideni tohuedanihi natti Jesopa pohuadsa queriqquimanajaridenidsa Huano tahimari huati tajari: —Dsama huamoni ssono caji, siba caji tanihuajipi ¿nejeco qquidera jajahi tija najarotte? Aja madija pocca ima japari tajaro pina boba jojodejine jene jene tocanajarissa najari ¿nama najari qquide jajahi tija najarottarane? Nohueraha. <sup>25</sup> Aji huamonihuaji jajahi tija nadsapi ¿nejeco qquidera jajahi tija najarotte? Aja madija etero huatini ccara tanicca huedsajari qquide ¿jajahi tija najarottarane? Naraha tiadenipi nahatoqqui ri tiquinani: Madija etero huatini ccara tanicca huedsamanajaridenipa taminedenicca odsadsana mamadimana najari. Naraha Huanopa nema najaro madietohui najarajari. Pohuapa camello conera huehuedsa najari. Dsama huamonihuaji mamadi najari. <sup>26</sup> Naraha ¿nejecotohuira pohua cattade jajahi tija najarotte? “Huanopa Dio Atti cacomerabote dacorajari” titiquina nadsa ¿jajahi tija najarottaqui? Jehe pajissa. Pocca marinajatohui jajahi tija najaro. Huanopa pina Dio Atti cacomeraqqui ri najaridenissa naraha pohuapa deni tojajari. Pohua dsepe ijijaripa ima deni tojanicca cajijari. Najaro imapi otahimari Cristo-Mesia tiadeni Idinide ojanijinecca ima inanajora-ridsapojaropaji. <sup>27</sup> Aja, Huano Baotistapa maittaccadsama pohua tedsejemacca ima Dio Atti cacomerabote dsodo inapojaro. Najaropi pina Diopa Cristo-Mesiadsa huati tapojarissa najaro:

“Tahide titahimari tohuaccade madija ojaria titedsejema dosse onapohuitohui.

Nahi mittamanadsa madija bodidenipa titohui najoramanapohuijine,

pina tijahine inajoramanapojarissa inanamananitohui, onajaro”

napohui nade Dio Atti Maraquia dsodo inapodsa.

<sup>28</sup> —Nadsama tiadenidsa huati onajaro: Aji namidsa madiridsamanajaridenidsa naco madija ohuaha pina Huano Baotistassa najari nohuerahi. Huano Baotista pohuajinena madija bodideni otahimaritohui Diocca cacahuehecca ima dsati inana-jorabaqquipojari. Najarojine Huanopa namidsa madiridsamanajarideni huapimadsa deni tojajari. Naraha Diocca cacahuehepi ima onihi cajijaro. Najaroa nidsa dsotode madijapa Diocca cacahuehecca ima dsati tojani qqui toquinadsa najarodsa toquejenadsapa Huano Baotistadsa deni toquejenahitohui. Madija ajamani tojajari pina tohuati nahana tajari Diocca cacahuehedsa tojadsapa pohua naco Huano Baotistadsa deni tojahitohui –najari Jeso.

<sup>29</sup> —Madija huapima Huanocca marinaja mittamanadsapa jodiodeni mota, romanodenicca taminecca dosseniji dsiniro nanaccadedeni naco: “Jehe, pajissa Diopa nahato tahi. Bicaqquiri inejerani. Icca tabaccorehe inebona” quinadsapa Huano topa idsanabaqquijari. <sup>30</sup> Naraha jodiodeni marinaja pariseodsa jehe quinajaridenipa, jodiodenicca marinaja maridedeni tedseje nama quina-jarajari. Huanocca marinajadsa huaribodeni sibaqquiri nadsapa topaniji tohui quina-jarajari. Diopa pohuadenidsa ima dsati bicani inananitohuiraha pohuadenipa ettajomanajaro. <sup>31</sup> Naraha jidapanana aja madija madiridsamanajaridenipa ¿pina nejecojaridenissa quinajari? onajaro. Ohuatti timittamananissa tanijine ajijaro namidsa imadinicca imadsa tiadeni mari ocanabaqquina. <sup>32</sup> Jehe, madija jidapana madiridsamanajaridenipa pina ejedenideni boronidsa jassi tadsa poccadeni ittome tossamodsa ahuaji johua, ahuaji johua quinajarissa najari, onajaro. Pohuadenipa pohuadeni tessedenidsa: “Jaho, dsobi tiquinanijine totoresda tore tore inaraha tetidsemana-jerani, dsobi dsobi tiquinejerani” quinajari. Pohuadeni atti naco: “Ittomedsa naqui tiadeni oji inanaqquiniijine ajie tohuati nahana taniccadsa jiri jiri inaraha tiadenipi oji tiquinehe nejerani” quinajari –najari Jeso. <sup>33</sup> —Jehe, aja jidapana madimanajaridenipa pina ejedeni jamimanajarissa quinahi onajaropi Huano Baotista Dio Atti cacomerade tojadsapa ejetecca jipaqquiecca jijipa jipa-jarahi, dse najarahi nadsa johua johua quinadsa attidenipa: “Huano Baotistacca madie jidsa tani. ¡Satanacca dodosse tocorime pohua bodidsa madidsajari itidija!” quiquinanajari. <sup>34</sup> Dsotodepi ohua Madija Bedi ojararoa ejetecca jipaqquiecca jijipa ojipa, dsedse dse onadsapa ohuadsa johua johua quinajari attidenipa: “Jaho, pohuapa jipajide rahi, dsedsejide rahi. Romanodenicca taminecca dosseniji dsiniro nanaccadedeni, madija imasiri cajimanajarideni naco pohua tesse toquejenajari” quiquinanajari ohuadsa. <sup>35</sup> Huanodsa, ohuadsa attideni nama quinaraha nidsa imasiri cajimanajarideni ettijine bodideni cacajiqquimera, imarideni cacajiqquimera nadsapa Diocca nahatohue ahuatoto tanitohui –najari Jeso.

*Marinaja pariseodsa jehe najari onipa Simon najaricca odsadsa Jeso jipajari*

<sup>36</sup> Madija marinaja onini pariseodsa jehe najaripa Jesodsa huahua najari, pocca odsahuaji inajipahijine. Najaricca odsahuaji Jeso toccadsa toqquedsimadsapa huahuanaridsa huittaritari, jipahijine.

<sup>37</sup> Naraha najaro odsa pananidsapi amoneje huananari madijaro. Ponipi ima mittajaro: —Pariseocca odsahuaji Jeso bacco nahi, nahihuaji jipahijine –quinadsa nanihuaji toqquedsimajaro. Jojo bicahi siba alabastro nahatoni dsojo inajonajari. Najari jojodsa majojo bicani ijijaro. <sup>38</sup> Ojiema Jesodsa bacco tadsapi pohua amorihuaji huadsa oji oji najaro. Nadsapi poni nocconi ppajani ssabororo nadsa Jeso amori ppajaja tocaja najaro. Nadsapi poni tatini conanidsa Jeso amori sse ippijari. Amori sse ippia jicadsapa amoridsa mose najaro. Nani dsotodepi ponicca majojodsa naqui Jeso amori ssohoho icanarijaro.

<sup>39</sup> Naraha aja pariseo Jesodsa huahua najaripa najaro amoneje Jesodsa nema nani qqui tadsa pohua bodipa: —Ajana, Jesopa Dio Atti cacomeracquiri najaridenissa nadsapa madija bodidenicca ima nahato tanaja. Najaro amoneje pohuadsa mari

dsanajaropi madierini tabaccora tajaro. Ponidsa: “Huaji tinaji” nahitohuiraha –najari. <sup>40</sup> Naraha Jeso attipa: —Simon, tiadsa huati onana –najari. Naraha pohua cacomerajari: —Jari Mamaride, huati tinaji –najari.

<sup>41</sup> Jesopa Simon pohua bodidsa atti atti nahi nahato tadsa ima ajima najaro huati tajari: —Maqquideje pamahapa dsiniro dada nanaja nahihuaaji debe quinajari. Ojariapa dsiniro ccarara 500 denario debe najari. Madija ohuahapa 50 denario debe najari. <sup>42</sup> Nadsama pohuadeni pamahapa poccadeni ima tossamodsapi paca quinahijine pajiramana-jarahi. Nadsapa dsiniro dadade attipa: “Jehe, tipajiramana-jeradsapi ticcadeni cuenta ojine dsodo nani sse onanitohui. Nani tiadenidsa: Denima ohua paca tiquinaji, onejeranijine” najari dsiniro dadade atti. Nadsapi poccadeni cuenta jicani.

—Jari Simon ¿nejecoma tani tetti? ¿Nejecojarina dsiniro dadadedsa denima huati huana tajari? ¿Aja denima debe najaripa dsiniro dadadedsa denima huati huana tajarico? ¿Ajamani debe najarina dsiniro dadadedsa denima huati huana tajarirana? –najari Jeso Simonds.

<sup>43</sup> Naraha Simon pohua cacomerajari: —Ssamo onani. Aja denima debe najarina dsiniro dadadedsa denima huati huana tajari itide –najari. Nadsapa Jeso pohuadsa huati tajari: —Jehe pajissa. Tecomeranissa tani –najari.

<sup>44</sup> Nadsapa Jeso amoneje icattoma nadsa Simonds huati tajari: —Qqui, ajijaro amonejeca tohuati huanehepi ahuato tani. Ohuapi ticca odsadsa ogquedsimaraha tiapi ohuadsa pina icca madijacca imassa tinana-jerani. Ohuadsa passo da ticanehe nejerani, ohuamori ssahua onanijineraha. Naraha ajijaro amonejena oji oji nadsapi poni nocconi ppajani toccadsa ohuamori ppajaja tocajadsapi poni tatini conanidsa ohuamori sse ippijaro –najari Jeso. <sup>45</sup> —Tiapi ohuadsa pina icca madijacca imassa tinana-jerani. Icca madijapa itesse jipahijine huahua inadsa bacco nadsapa ipano mose mose ihinanajaro, itatidsa oqui naco sso sso ihinari najari. Opano mose tejeraraha ajijaro amonejena ogquedsimaponidsama ohuamori mose mose dsanapojaro. <sup>46</sup> Otatidsa oqui naco sso tari-jararaha ajijaro amonejena ohuamori majojodsasohoho icanarijaro –najari Jeso. <sup>47</sup> —Jehe, najarojinea aji huati onajaropaji: Ponipi ima sse taporaha ponicca ima tabaccora tanicca Dio sse inadsapi jidapapi ponidsa ima nohuerani. Ponina denima ohuadsa huatini huana tajaro. Madija ohuahadeni naco poccadeni ima tabaccora tanicca Dio sse inadsapi pohuadenidsa ima nohuerani. Naraha madija bodideni: “Icca tabaccorehepi huapi tapo-jerade” quinajaridenia aja ohuadsa badsira taha huatideni huanaquqiri najaripaja, onajaro. Nadsama Simon, najaro ima tibodi huatoji –najari Jeso.

<sup>48</sup> Nadsapa Jeso amonejedsa huati tajari: —Aji, ima tinanapojaropi sse inehe jicajaro. Najaroa aji tibicajaropaji Diodsa –najari.

<sup>49</sup> Naraha nahi huahuanarihuaji Jeso tedseje jipamanahijine jassi tarijarideni pohuadenira huati canirere canajari: —Ajararipa ¿nejecoma najaritta? ¿Nejecotohui pohuapa madija bodicca tabaccorehe tonanamosside nahato taha? –quinajari.

<sup>50</sup> Pohuadeni atti nama quinaraha Jesopa amonejedsa huati tajari: —Tiapi ohuadsa jehe tadsa tossiejehe ticajijaro. Diocca jonehema, pocca cappinerehema ticcaniji –najari Jeso.

## 8

### *Amonejedeni Jeso acco icamamanajari*

<sup>1</sup> Nahi dsotodepa Jeso odsa panani onihihuaaji onihihuaaji mari mari naridsajari. Diocca cacahuehecca ima bicani huati huati naridsajari. Pocca dodosse tabaqqui 12 quinaha pohuadsa jahiridsajari. <sup>2</sup> Amonejedeni naqui Jeso pohuadsa jahiridsajaro. Ponidenipi comaqquiri naporaha Jesojine tocanomireridsajaro. Onihideni naqui



tocorimejine comaqquiri naporaha Jesojine bodinidenicca jahininejari. Najarodeni ojarie oninipi Maria, poni dsamarini onini Madarenadsa cacanijaro. Poni naqui tahidepi tocorime 7 quinajari cajiporaha Jesojine jahininejari. <sup>3</sup> Amoneje onihi naqui Jesodsa ccaridsajaro, oninipi Dsohuana. Ponicca maqqui onipa Cosa. Cosapa tamine Herodecca odsa imeni cacahuade tojajari. Herodecca medsedeni naco dosse dosse najari. Amoneje onihipi Sosana ponidenidsama Jesodsa toccajaro. Amoneje onihideni naqui huapi tehe Jesodsa jai tojajaro. Ponideni huapimapi Jeso acco camade toquejenajaro. Ponidenicca dsinirodsa naqui pohuadeni taparideni mitta mitta nanaridsamana najaro.

*Jesocca marinaja huidsaja ppappadecca ima tadsajani mari icanabaqquijari*

*Mateo 13.1-9; Maraco 4.1-9*

<sup>4</sup> Odsa pananicca madija huapima naco jai tojaja camajari Jeso qquide. Madija huapima pohuadsa queriqquimanadsapa Jeso pocca marinaja mari icanabaqquihijine ajijaro namidsa imadinicca ima tadsajani mari icanabaqquijari. Nadsapa pohuadenidsa ajama najari:

<sup>5</sup> —Jehe, huidsaja ppappadepa pocca huidsaja huirade toccajari. Huidsaja bacco tadsapa huirade tojaridsajari. Cadsu huira, cadsu huira, cadsu huira naridsajari. Aja nocco huira inaridsajari motapa jahuihuaji catojararijine ttai ttai tojaridsajari. Nocco ahahuatori nadsapa ppiriri saca quinajari. <sup>6</sup> Aja nocco huira inaridsajari motapa siba ccababa tanihuaji catojaridsajari. Najari naco moro taraha jabo nami ppaja tanihuaji bacco tajaradsapa maji ppoconejine botejari. <sup>7</sup> Aja nocco mota naco namidsa cotihi caji tahihuaji catojararipa cotihi tedseje paja moro toquinarihi naraha cotihijine ssomi tojajari. <sup>8</sup> Nadsapa nocco mota huira naridsajaripa nami bicanidsa catojaridsadsapa mororo canaridsadsa bica taha napijari. Bono cajiridsadsapa ede ojariapa bono 100 naha cajijari. Ede huapimacca nama naridsajari –najari Jeso.

Jeso huati huati taha jicadsapa pohuadenidsa jadsirema huati tajari: —Nadsama teribodeni ticajimanadsapi ohuatti timittamananissa taji, onajaro –najari Jeso.

*Madija motapa Jesocca marinaja mittamana-jarajari*

*Mateo 13.10-17; Maraco 4.10-12*

<sup>9</sup> Nahi dsotodepa pocca dodosse tabaqqui pohuadsa huati toquinajari: —Jeso, ajijaro namidsa imadinicca ima tadsajani ia mari ticanabaqquijaropi ¿nejecoma najaro ticca marinaja? –quinajari. <sup>10</sup> Naraha Jeso pohuadenidsa huati tajari: —Jehe maittaccadsama Diocca cacahuehecca ima dsati najoraporaha madija inahattabaqquijaraccade. Jidapanana Diojine pocca cacahuehe tahimarini dsati tiadenidsana ahuato tani. Naraha madija motapa ajijaro namidsa imadinicca ima tadsajani pohuadeni mari ocanabaqquidsapa mittamana-jarajaripaja. Nama quinajaripa pina Dio Atti cacomerabote Isahia dsodo inapojarossa najaro. Isahia attipa:

“Qqui qqui toquinaraha pina qqui toquirahi nahitohui. Pohuadeni bodi pina ssamoqqui najarissa nahitohui.

Diocca dosseniji mimittamana naraha pina mittamanerahi nahitohui”  
napohui nade Isahia atti –najari Jeso.

*—Huidsaja ppappadecca imapi ajima najaropaji –najari Jeso*

*Mateo 13.18-23; Maraco 4.13-20*

<sup>11</sup> —Aji occa marinaja ajijaro namidsa imadinicca ima tadsajani tiadeni mari ocanabaqquijaropi ajima najaro: Aja noccopa Dio Attissa najaro. <sup>12</sup> Nocco huira inaridsajari mota jahuihuaji catojararipa pina madija Dio Atti mittamanaraha pohuadeni bodidsa toja-jeraniijine maidsehe jinede Satana ccajonadsapa pohuadeni bodicca Dio Attipi amossi inanaridsajaro. Najaropi pina nocco jahuidsapa catojadsa ahahuatori nadsapa ppiriri saca inaridsamanajarissa najari. Najarossa najaroa

maidsehe jinede Satanajine bodideni inassamobaqquidsapa Diodsa pajissa quina-jaradsa tocassiejera-jarahitohui.

<sup>13</sup> —Madija ohuaha bodidenicca imapi pina aji siba ccababa tajarocca imassa najaro. Dio Atti mittamanadsa huatidsemanaraha pohuadeni bodidsa toja-jerajaro. Najaro imapi pina aja nocco moro taraha siba ccababa teje najaro jabo huapihuajira toccabaqquijaricca imassa najaro. Najaria aja moro todsatiraha maji ppoconejine botejaripaja. Najaro imapi pina madija tahidepa: “Jehe, Dio Atti bica tani” quinaporaha dsotode pohuadenidsa ima ssonaridsa ocasserani ahuamanadsapa: “Epejena, Dio Attipi inebona” quinajari.

<sup>14</sup> —Madija ohuaha bodidenicca imapi pina cotihi tedseje nocco moro tajaricca imassa najaro. Pohuadenipa Dio Atti mittamanaraha pohuadenia ajijaro namicca ima Dio Atti tadsajani icanejemamana-dsanapojaro. Nadsama pohuadenia aja pohuadeni dsepedeni ihijimana najarotohuira disseraqquri nadsapa Dio Atti tocahatterahissa tajarajari. Nadsama madija attidenipa: “Todsepetaji inehemana” quiquinanadsa naco poccadeni jeheniji maidsehe toja tani. Aji namicca ima pohuadeni tohuini quinahiccadsara huahuatidsemana nadsa naco Dio Attipi huatideni ajamamanajari. “Dio Attina denima bica tani” quina-jarajari. Nadsama poccadeni jehenijipi pina aja cotihi tedseje nocco moro taraha cotihijine ssomi tojadsapa bono-jarajarissa najaro. Nama najari madija naco otahimari bicani icassiejeranijinecca pohuadeni tesse mari icanabaqquimana-jaradsapa ohuatti mittamana-jarajaripaja. Poccadeni madiedsa occa marinaja ahuato tejeradsapi pohuadeni tesse ohuadsa pajissa quina-jarajari. Nama quinadsapa pina bononoraqquri najarissa quinajari.

<sup>15</sup> —Naraha madija ohuaha bodidenicca imapi pina aji nami bica tajarocca imassa najaro. Dio Atti mittamanadsapa jehe quinahissa tajari. Pohuadeni bodipa pajissehe tohuini quinajari, bodideni bicaqquri najari. Dio Atti pohuadeni bodidsa ecahuamana-dsanapojaro. Poccadeni jeheniji napidsapi pina aja nocco nami bicanidsa moro tahissa tadsapa bono cajijari. Nadsama pohuadenipa Dio Attidsa disseraqquri nadsa ocasserani ahuamanadsa naco nama naha Dio Attidsara jehe dsanapomanajari. Pohuadenipa madija ohuaha acco acco ihicamabaqquimana nadsapa najarideni naco Diocca ejedeni toquejenajari –najari Jeso atti.

*Jojororo tahimari*  
*Maraco 4.21-25*

<sup>16</sup> —Nadsama jorororo toquehessidsapa boco icanahijine jarahi. Huahuada dopani-huaji naco tocanajimahijine jarahi. Jojororo toquehessidsapa aja pohua cacahittari nahidsana cacahittari najari, nahi madija odsa bodihuaji jahidsimajarideni ssiajani cajimanahijine. Ohuatti naqui najarossa najaro, pina jorororo ssiejene ssiaja tajarissa najari. Aja madija ohuatti cajimanajaridenipa ecomamana-jeranijine, najaro ssiajanipi madija huapimadsa tossiajabaqquinijine, onajaro. <sup>17</sup> Nadsama ima ahuatora tanicca caji taraha nidsa dsotodepi ahuato tanitohui. Aji occa marinaja mota ahuatora tadsa timittamana-jeraraha nidsa dsotodena tiadenidsa ahuato tadsana timittamananitohui, onajaro –najari Jeso.

<sup>18</sup> —Jehe, nadsama ohuatti timittamananissa taji. Paji, occa marinaja timittamanadsapi mohuaradsa ohuatti huapima tiadenidsa tojanissa tanijine timittamananissa taji. “Ponimaha” tiquinejeraji. Aji tiadeni ohuatti tecahuamanadsapi denima ticahatteranitohui. Naraha occa marinaja timittamanaraha ohuatti tecahuamanajeradsapi occa marinaja odininitohui. Occa marinaja tiadenidsa tojapoma-jeranijine, onajaro. Nadsapi tiadenira tiadeni ticamaidsanimanadsa naqui: “Dio Atti ocajini, nahato onani” tiquinaraha najaro naqui odininitohui. Paji, nemamana tejeraji, onajaro –najari Jeso.

*Jeso imeni, pohua imecotedeni*  
*Mateo 12.46-50; Maraco 3.31-35*

<sup>19</sup> Naraha Jeso pohua mari mari nahihuaajipa Jeso imeni, pohua imecotedeni quinadsa pohuahuaaji bacco toquinajari. Bacco toquinaraha madija huapi taja najari pohuahuaaji jai tojedsimahijineraha tojera tajaro. <sup>20</sup> Naraha madija ojaria Jesodsa huati tajari: —Ticca ami, timecotedeni amossinidsa domo huapaja: “Tia qqui inana” quinapaja -najari.

<sup>21</sup> Naraha Jeso pohua attipa: —Aja madija Dio Atti mittamanahissa tadsa Pohua Attissa inanamanajarodenina pina occa amissa, pina ohuemecotedenissa quinajari -najari Jeso.

*Jesopa jojode inatappa ssodadani inatappa nanicca ima*  
*Mateo 8.23-27; Maraco 4.35-41*

<sup>22</sup> Nadsapa Jeso pocca dodosse tabaqqui tedseje canoadsa jai tojedsadsa nahi canoadsa pohuadenidsa huati tajari: —Jina, coridsa jippehuaji jaijana -najari.

<sup>23</sup> Nadsapa tohuaccamanaraha Jesopa huadaja dsanapojari. Huatideni ajamama canaraha jojode dacorehema ccajona, passo dacorehema ccajona nadsapi coridsa ssoda ssoda najaro, canoadsa passo ssonidsa ssonidsa najarojine je tocanamanabote najari. <sup>24</sup> Nadsapa Jeso huadahihuaaji jai tojeppidsa nocco tojahijine cobo quinajari: —¡Ia Maride, ia Maride! ¡Nocco tijaji! ¡Je icanabote nani! -quinajari. Nadsapa Jeso totehemadsa jojodedsa, passo ssodadanidsa huati tajari: —¡Epeje taji! -najari. Nadsapi jojode, passo ssoda ssoda najaro naqui joma najaro. Joma nadsapi passo podsippanissa tajaro. <sup>25</sup> Nadsapa Jeso pocca dodosse tabaqquidsa huati tajari: —Tiadenipi ohuadsa: “Jehe, Jesopa ia tohuacahua-baqquihijine pajirahi” ¿tiquinejerajarorane? -najari Jeso. Naraha pohuadenipa cappinamanajari. Bodideni jabojo quinadsa pohuadenira imahaha canajari: —Aja ia Maridepa ¿nejeco madija? Pohuapa jojode, passo ssodadanima quejema naraha jojodedsa: “Epeje taji” naneje joma naha -quinajari.

*Jerasacca madija Satanacca dodosse tocorime cajijari*  
*Mateo 8.28-34; Maraco 5.1-20*

<sup>26</sup> Jojode jicadsa denima tohuaccamanadsapa dsama Carirea jippehuaji bacco toquinajari. Pohuadeni huana tocanamanahihuaajicca dsama oninipi Jerasa. <sup>27</sup> Nahidsa Jeso toqquemoradsapa nahicca odsacca madija ojaria pohuadsa bacco najari. Najari madijapa Satanacca dodosse tocorime cajijari. Najaripa tocorimejine ccoroje mamadi najari. Odsadsa madi-jarahi. Tonoccobirihuaajina mamadi najari. <sup>28-29</sup> Huajijiradsa tocorimejine totodacora najari. Nahi odsa pananicca madijapa ecahuamanahijine cadenadsa biji jore quinaraha tocorimejine dacoradsa cadena joca tajojo, joca tajojo najari. Isso naco cadenadsa jore quinaraha ttai tajojo, ttai tajojo najari. Dsama huaji tanihuaji madija madide nohuerahihuaaji naco tocorimejine joppa tajari.

Nadsapa Jeso toqquemoraraha najari madija naco qquedsippajari. Jesodsa bacco dsippadsapa madija bodicca tocorime toqquenahijine pohuadsa huati tajari: —¡Tocorime, tiqquenaji! ¡Najari madija tinebojo! -najari. Nadsapa Jeso bacchohuaji pohua pitodsa huitta nadsa jadsirema johua johua najari: —Jeso ¿nejecotohuira ticcajonajaro? ¿Ohua najidsode ticcajonajaroqui? Tiapi Dio deni tojajaricca Ejedeni tijani. ¡Epejena, ohua najidso tejeraji! -najari. <sup>30</sup> Nadsapa Jeso huati tapomajari: —¿Tia onipi nejeco? -najari. Naraha pohua cacomerajari: —Ohua onipi Siba tani -najari. Pohuadenipa huapi taja najari pohua bodidsa madidsamanajari. <sup>31</sup> Pohua bodiccana Jesodsa huati toquinajari: —¡Jaho, ia dosse tininebaqqui-jeraji! ¡Nami odini huaji tanihuaji ia hua tidsima-jeraji, inaha! -quinajari. <sup>32</sup> Naraha nahi ssono huajira tanidsa poroco huapi taha jiparidsamanajari. Nadsapa tocorimedeni Jesodsa

huati toquinapomajari: —Porocodsana iquejenaccana –quinajari. Nadsapa Jeso: — ¡Jehe, porocodsana tiquejenana! –najari. <sup>33</sup> Nadsapa najari madija bodicca tocorime jahininedsapa porocodsana jai tojedsimaridsajari. Nanaja porocopa coridsa inidi sseberanihuaji domo toqquedsippadsa diri-ri-ri todsippadsapa cojo-jo-jo quinajari, tocatojedsippajari. Je tocaniredsapa coridsadsa cacotedsanajari.

<sup>34</sup> Nadsapa poroco cacahuadedenipa aja poroco tocatojedsippahi qqui toquinadsapa ahuajicca odsa pananihuaji ima joppa tocanajari, ohuahapa huidsajahuaji ima joppa tocanajari. Nama naridsamanajari. <sup>35</sup> Nadsapa madija huapima qquide jahijonana canajari. Jesohuaji bacco najonamanadsapa aja madija bodicca tocorime jahininedsa tonomihira qqui toquinajari. Nahi Jeso huahidsa huitta canajari. Etero huedsapomajari, bodi huatohue naco cajipomajari. Nadsapa madija huapima cappinamanajari. <sup>36</sup> Qqui toquinapojari denia aja madija tocorime cajiraha tonomihicca ima madija huapimadsa huati toquinajari. <sup>37</sup> Nadsapa dsama Jerasahuajicca madija huapima cappinamanadsa poccadeni dsamadsa Jeso toccanihijine dossede dissassera tajari: — ¡Ticcaniji, aji icca dsamadsapi timadi tejeraji! –quinajari. Nadsapa Jeso canoadsa toqquedsanidsapa tohuaccanimanajari. <sup>38</sup> Naraha jai tojani-jaraccadsa aja madija bodicca tocorime jahininedsa tonomihipa Jesodsa huati tajari: —Jeso, tiadsa occana ¿jehe taqui? –najari. Naraha Jeso pohuadsa: —Poni, tiboji –najari. <sup>39</sup> —Ticca odsahuajina ticcanina. Ticca madijadsa aji Djojine tinominicca ima huati tinanina –najari. Nadsa toccanidsapa nahicca odsa pananicca madija huapimadsa aja pohua tonomihicca, Jeso pohua inanomihicca ima huati taridsajari.

*Jairo bedeni tonominicca ima, Amoneje amaissorana ja coma taraha tonominicca ima*

*Mateo 9.18-26; Maraco 5.21-43*

<sup>40</sup> Nadsapa Jeso coridsa jippe pohuadeni nattihuaji jai tojanidsapa bacco tani-manajari. Bacco tanimanadsapa nahicca madija huapima huatidsemanadsa: — ¿Nija, ticcanijaroqui? Iadsa bacco tanidsapi bica tani –quinajari. Pohuatohui madimanapoja najari. <sup>41</sup> Naraha nahidsa Jeso bacco nanidsatiraha Jairo naco nahihuaji bacco najonaja najari. Pohuapa jodiodenicca Dio Atti mamarihuajicca tamine. Pohuapa Jesohuaji bacco nadsapa pohua bodipa: —Jesopa deni tojahi, ohuapi ajimani ojani –nadsa Jeso baccohuaji pohua pitodsa huitta tocattedsa najari. Nadsapa Jesodsa huati tajari: —Jina, occa odsahuaji icadaccana. Occa ejedeni tomijirapaja –najari. <sup>42</sup> Jairo bedenipi ojari najaro, ponicca huajanopa 12 naraha huatiabote najaro. Nadsapa Jeso Jairocca odsahuaji toccajari. Madija pohua toccahi qqui toquinadsapa madija huapima pohuadsa jai tojaja najari. Si tocajajari cadsanapoja najari Jesopa mere tabote dsanapojari.

<sup>43</sup> Madija huapima jai tojahidsa naqui amoneje coma tajaro tohuanajaro. Ponipi dsamacoma onini amaissorana ja cajijaro. Poni coma tanicca huajanopa 12 naraha ama jicaquera tanicca tonahanajonajaro. Toponi totonanomidedenidsa totocca naraha tonomi-jerajaro. <sup>44</sup> Naneje ponipi Jeso qqui tadsapi Jeso nattihuaji toccamisadsa tohuajiressissi nadsa pocca etero iponi bara inajaro. Nahi poni bara inahidsa amadsati amani totappajaro.

<sup>45</sup> Nanaja Jeso pajadsa huati najari: —¿Nejecojarina ohua bara najarinaja? –najari. Naraha manaco madija huapimapa: —Iapi nohue ijirani –quinajari. Naraha Pedro atti: —Ia Maride, madija huapi taja najari. Tiapi ahuaji bai, ahuaji bai quinajaria –najari Pedro. <sup>46</sup> Naraha Jeso pohua cacomerajari: —Madija ohua bara nahi nahato onani. Occa dacorehe pohuadsa tojani nahato onani –najari. <sup>47</sup> Naraha amonejepi poni cacomaraha Jesojine ima tojani mittadsapi: —Jehe, nahato tahi –nadsapi cappinadsa tacca-cca canehe Jeso baccohuaji poni pitonidsa huitta nadsa ponicca ima ecomerajaro. Aji poni Jesocca etero bara inadsa amadsati amani

tomossijarocca ima huati tadsa madija huapima mittamanajari. <sup>48</sup> Naraha Jeso ponidsa huati tajari: —Jehe asi, ohuadsa tibodi: “Jehe, Jeso ohua tonanomihijine pajirahi” tadsapi najarojine ticca dsamacomapi toccapa. Ticcanidsapi ticappina tejerana –najari.

<sup>49</sup> Jesopa amonejedsa huati huati tahipaja naraha jodiodenicca Dio Atti mamarihua-jicca tamine pocca odsacca madija ojaria bacco najonajari. Ejedeni imehidsa huati tajari: —Jairo, ticca ejedenipi huatiapaja. Ia Maride Jesodsa huati tidsima tejeraji: “Epejena occa odsahuaji tiqquejeraji” tana –najari. <sup>50</sup> Naraha Jeso ima mittadsapa Jairodsa huati tajari: —Tibodipi ticappina tejerana. Pina “Jehe, poni tonominijine” tadsapi ticca ejedeni tonominitohui –najari.

<sup>51</sup> Nadsapa Jeso Jairocca odsahuaji bacco tadsapa aja Jeso pohuadsa jahijonajari-denipa Jairocca odsadsa jai tojedsima-jarahijine Jeso eccoccobagquijari. Naraha jai tojedsimahipa Jeso pohua, Pedro, Huano, Satiaco, aji ejedeni imehi imeni todsimamanajari. <sup>52</sup> Madija huapima nahidsa queriqquimanajarideni oji oji camajari. Ponitohui huatideni huanacquiri nadsapa poccadeni ojiema johua johua quinajari. Naraha Jeso pohuadenidsa huati tajari: —Ojimana tiquinejeraji. Ejedenipi dsoqquejerani. Huadajaro –najari. <sup>53</sup> Naraha pohuadenipa ejedeni huatiani nahatoqquri nadsapa Jeso atti jaja icanamanajari.

<sup>54</sup> Naraha Jesopa ejedeni huatijaro porinihuaji toqquedsimadsa dsapanidsa mari nadsa jadsirema huahua najari: —¡Ejedeni, titehemaji! –najari. <sup>55</sup> Naneje ejedeni ponipi camitemani-pomadsapi amadsati totehemajaro. Nadsapa Jeso attia: —Ticcadeni ejedeni tinajipamanaji –najari. <sup>56</sup> Ponicca abi ami jabojo quinaraha huatidsemanajari. Naraha Jeso pohua attipa: —Ajijaro imapi huati taridsamana tejerana. Poni –najari pohuadenidsa.

## 9

### *Jesopa pocca dodosse tabaqqui 12 quinaha madija maride dosse inaridsabaqqijari Mateo 10.5-15; Maraco 6.7-13*

<sup>1</sup> Jesopa pocca dodosse tabaqqui 12 quinajaridenidsa huahua nadsa queriqquijari. Jesopa tocorimedsa pohuana denima atti dacorajari. Najaro pohua atti dacorehe pocca dodosse tabaqquidsa inanajaro. Pohuadenidsa huati tadsa naco ajama najari: —Ohuatti, occa nahatohuema tiadenidsa onanana, aja madija bodidenicca tocorime ohuaha ohuaha naridsajarideni naco dosse dosse titimaridsa-baqquimana nahijine, onajaro. Madija huapima comani onihi onihi naha cajiridsamanajaridenicca naqui titinanomi-baqquimana nahijine, onajaro –najari Jeso. <sup>2</sup> Pohuadeni motta jai tojaridsahijine Jesopa pohuadeni dosse inabaqqijari: —Diocca cacahuehecca ima tecomeraridsamanana. Madija comaqquri najarideni tiadenidsa bacco quinadsa naco titinanomi-baqquimana nana –najari.

<sup>3</sup> Pohuadenidsa denima huati tajari: —Ticcadeni benehidsa naqui tiadeni to-tocahuejidsa ahua dsojomana tiquinejeraji. Ticcadeni saco, ticcadeni dsamat-apa, ticcadeni dsiniro, najaro huapimapi tiaccamana tejeraji. Ticcadeni etero naqui pamehepi tiaccamana tejeraji. Aji tedsamanajarora ohojariri tinanamanaji.

<sup>4</sup> Nadsama odsa panani bacco tiquinadsapi aji jai tijedsimapojarocca odsadsara timadimanaccaji. Nani odsa pananihuaji ticcadeni marinaja jicadsapi odsa panani onihihuaji denima jai tijapomaji. <sup>5</sup> Nadsama odsa panani onihihuajiccapa tiadenidsa: “Ajidsa timadimanaji, Diocca cacahuehecca ima imittanijine” quina-jaradsapa nani poccadeni odsa pananihuajipi tinebomanadsa jai tijeqquimani bica tani, onajaro. Jai tijeqquimadsa naqui temoridenicca sadariadsa ssiqui ma tajaro catojanijine pporo pporo tiquinana. Nahi poccadeni ibohue bodideni huatoma-manahijine –najari Jeso.



<sup>6</sup> Nadsapa poccadeni benehidsa jai tojabacquiridsajari. Odsa panani huapimadsa ima bicani icassiejeranijinecca mari mari nanaridsamana najari. Madija comacquiri najarideni naco ihinanomi-ridsabaqquimana najari.

*Huano Baotista dsoqquehi naticca ima*  
*Mateo 14.1-12; Maraco 6.14-28*

<sup>7</sup> Nadsama dsama arobeni Carireahuajicca tamine Herodepa Jesocca ima huati toquinahi mittajari. —Jesopa canahatori canajari –quinahi mittadsapa Herode pohua bodidsa: —¿Ima nejecoma najarona paji? –najari. Madija motadeni attidenipa: —Aja canahatori canajaripa Huano Baotista nahatonijari –quiquinanajari. <sup>8</sup> Madija ohuaha attideni naco: —Maittaccadsamacca Dio Atti cacomerabote Eria nahatonijari –quiquinanajari. Madija ohuaha attideni naco: —Maittaccadsamacca Dio Atti cacomerabote ohuaha nahatonijari itide –quiquinanajari. <sup>9</sup> Naraha Herode attipa: —Ohuana ocadossebaqquidsa Huanopa matto ca ijidsamanajaride. Nadsama aja canahatori canajari pohua tahimari ohuadsa huati huati totoquina najaripa ¿nejecoma najari napaja? –najari. Atti nama nadsapa Jeso qqui tahijine dissera tajari.

*Jeso madija 5 mil quinajarideni inajipabaqqujari*  
*Mateo 14.13-21; Maraco 6.30-44; Huano 6.1-14*

<sup>10</sup> Jesocca dodosse tabaqqui bacco nanimanadsapa poccadeni benehicca ima huati nanimanajari. Nahi dsotodepa Jeso pohuadeni pohuadenira odsa panani Besaidahuaji iaccabaqqujari. <sup>11</sup> Nadsama madijadenipa Jeso toccahi nahatoqquri nadsapa dsotode jai tojamissajari. Bacco toquinadsapa Jeso pohuadenidsa huati tajari: —¿Nija, bacco tajonamanajaroqui? –najari. Nadsapa Diocca cacahuehecca ima mari icanabaqqujari, aja comacquiri najarideni naco inanomiridsa-baqqujari.

<sup>12</sup> Naraha Jesocca dodosse tabaqqui 12 quinajarideni maji toccahi qqui toquinadsapa Jesodsa huajiressimanadsa pohuadsa huati toquinajari: —Ajajari madijadeni huati tinabaqquijo tocahadijanina. Pohuadeni tapari naco odsa onihihuaji mitta naridsamanana. Aja iadsapa dsamatapa nohuerahi –quinajari.

<sup>13</sup> Naraha Jesopa: —Tiadeni tinajipabaqquimanajo –najari pohuadenidsa. Naraha pohuadeni attipa: —Naraha pan 5, aba pama naha icajini. Denima icappirani –quinajari. —¿Nadsapa pohuadeni tapari odsa pananihuaji mittade jaijanijinerane? –quinajari. <sup>14</sup> Aja madija Jesohuaji queriqquijaripa maqquideje 5 mil quinajarijine pocca dodosse tabaqquideni inajipabaqqui-manahijinepa pajiramana-jarajari. Naraha Jeso pohuadenidsa huati tajari: —Aja madija huapima jassi taridsahijine huati tinabaqquimanajo. Madija 50 naha tinequeriqquimana, ohuaha 50 naha tinequeriqquimana naridsadsa jassi jassi teri tinanaridsa-baqquimanajo, jipade najoraridsamanahijine. Nama tinanaridsa-baqquimanajo –najari Jeso.

<sup>15</sup> Nadsapa nama inanaridsabaqquidsapa madija huapima jassi taridsajari.

<sup>16</sup> Nadsapa Jeso pan 5 naha inacca, aba pamaha idsaba nadsa Jeso memehuaji tocattamacossa nadsa Diodsa huati tajari: —Jehe, epejeni. Ticca daniji iadsa bica tahi –najari. Nadsapa Jeso canahatori canajarijine pan, aba najari tohuapidsa icanabobiridsadsapa pocca dodosse tabaqquidsa da inabaqqujari. Pohuadenina aja madija jassi jassi teri najaridenidsa da inabaqqui-ridsamanajari. <sup>17</sup> Da inabaqquiridsamanadsa jipamanadsapa accararidsa-manajari. Jipamanahissa taraha mota tojajari. Pan bobì, aba ime mota inaccaniridsa-manadsapa quiqui 12 naha ijiridsajari.

*—Jesopa Cristo-Mesia –najari Pedro*  
*Mateo 16.13-20; Maraco 8.27-30*

<sup>18</sup> Nahi dsotodepa Jeso Diodsa huati tahijine pocca dodosse tabaqqui tedseje pohuadeni motta madija nohuerahihuaji jassi tajari. Nahidsa Jesopa pohuadenidsa

huati tajari: —Madija otahimari huati huati nanaridsamana nadsapa ohuadsa attideni ¿nejecoma nejecoma quiquinanahi? —najari Jeso pohuadenidsa.

<sup>19</sup> Naraha pohuadeni attipa: —Tiadsa madija motapa: “Huano Baotista tijani” quiquinanajari. Ohuahadenipa: “Maittaccadsamacca Dio Atti cacomerabote Eria tijani” quiquinanajari. Ohuahadeni naco: “Maittaccadsamacca Dio Atti cacomerabote ohuaha nahatonijari” quiquinanajari —quinajari Jesocca dodosse tabaqqi attidenipa.

<sup>20</sup> Nadsapa Jeso pohuadenidsa huati tapomajari: —Naraha tiadenidsapi ¿nejecojari ojani? —najari. Nadsapa manaco Pedro huati tajari: —Tiapi Diocca dosseniji Cristo-Mesia tijani —najari.

<sup>21</sup> Nadsapa Jeso attipa: —Jehe, bica tani. Naraha najaropi madija ohuahadenidsa tecomamanaccana —najari.

*Jesopa pohua dsoqquehicca ima huati tapojari*  
*Mateo 16.21-28; Maraco 8.31-9.1*

<sup>22</sup> Jesopa pocca dodosse tabaqqidsa denima huati huati tajari: —Aji ohuapi Madija Bedi ojajaroa nidsa dsotode najidsohue imeni ocasserani ohuanitohui. Jodiodeni ime jocohuideni, dada toqqumade taminedeni, jodiodenicca marinaja maridedeni quinajaridenipa ohua ettajomananitohui. Nadsapi ohua inanadsoqqe-mananitohui. Naraha ohua ppa idsamanaraha huada huatinimade tojari nadsapi Abi Dio ohua nahatonihitohui —najari Jeso.

<sup>23</sup> Nadsapa Jeso madija huapimadsa huati tajari: —Aji “Jesocca madija iquejenana” tiquinadsapi tiadeni tohuini tiquinanicca tohui tetideni ajimamanaji. Ohuadsara disseraqqiri tiquinaji. Madija tiadenidsa: “Ahua porimacossanidsa tidsoqqueji” quinadsa naco: “Jehe, odsoqqueni bica tani. Jeso onebo-jarahi” titidsanapomana nana huajijiradsa, onajaro. <sup>24</sup> Tiadenipi ticcadeni madie ohuadsa teccoramanadsapi madija tiadeni tonajicabaqqi-manaraha camittehe jiquejeranicca ticajimana-dsanaponitohui. Naraha madija ohuaha pocca madie ohuadsa acco tadsa ajijaro namidsa madi-dsanapohuijine tohuinira nadsapa dsoqquehitohui. Dsoqquedsapa camittehe jiquejeranicca caji-jarahitohui —najari Jeso atti. <sup>25</sup> —Madija naco ajijaro namicca biquehe tohuini madidsa, ajijaro dsamacca ima deni tojanicca tohuini madidsa naco huapima pohuadsa tojaraha Diotohui najaradsapa nidsa dsoqquedsa jororoni jiquejeranihuaji dsori tajarahitohui. Nadsapa pohua cajijaricca huapima ponima tojanitohui. <sup>26</sup> Nadsama aji tiadenipi madija ohuaha noppinedeni ticappinamanadsa: “Jesocca madija ojajerani” tiquinadsapi aji occa marinajadsa naqui: “Omittana onejerani” tiquineje camadsapi manaco ohuatti tiadenidsa: “Occa madija tiquejena-jerani” onanitohui. Ohuapi Madija Bedi ojajaroa nidsaranibote ajijaro namidsa occaronapomadsapi occa deni tojehema, occa Abi Dio ssiejenema, Diocca dodosse tabaqqi memehujicca dacorehema occaronapomanitohui. Nadsana: “Onocco jidsa tani tiadenidsa” onanitohui. <sup>27</sup> Naraha ohuapi pajissara tiadenidsa huati onajaro. Ajidsa tidomodeni huajaro motadenipi tidsoqquemana-jeraccadsama Diocca cacahuehe qqui tiquinanitohui —najari Jeso.

*Jeso assire tojidsa, jidseremani najari*  
*Mateo 17.1-8; Maraco 9.2-8*

<sup>28</sup> Jeso pohua tedsejemacca ima huati tapohui jicani huada 8 nani nattinipi ajijaro ima tojajaro. Jeso pocca Abi Diodsa huati tahijine ssonohuaji toqquemoradsapa Pedro, Huano, Satiaco quinajaridenira iaqquemorabaqqijari. Jai tojemoradsapa ssono tetepihuaji bacco tomoramanajari. <sup>29</sup> Nahidsa Jeso Diodsa huatide tojanaja pano todsibehihi najari. Pohua pano todsibehidsapa pocca etero naqui tonopo-po nadsapi todsibehijaro. <sup>30</sup> Nadsapa cattomama cananaja nahihuaji madija pamaha

Jesodsa imahaha canajari. Najaridenipa Moisesi, Eria tedseje. Pohnadenipa mait-taccadsamacca Dio Atti cacomeraqquri najarideni Jesohuaji ahuatoma-manajari. <sup>31</sup> Pohnadenihuaji tossiabajabacqui najaro, Dio madihuaajicca ssiajani pohnadenidsa ahuatohujanijaro. Jesopa madija huapimacca tabaccorehe manaconi tojahijine Jerosaredsa inanadsocque-manahijinecca ima imahaha canajari Moisesi, Eria, Jeso quinadsa. <sup>32</sup> Naraha Pedro, Huano, Satiaco quinajaridenipa cahadijabote, noccodeni ssire-re nadsa Jeso pohua ssiejene qqui, pohnadsa madija pamaha ahuatoma-manahi qqui toquinajari.

<sup>33</sup> Moisesi, Eria tedseje Jesohuaji tohuedanibote nadsa Pedro Jesodsa huati tahijineraha pohua bodi ssamo tadsa pohnama pohua attipa: —Ia Maride, iapi ajidsa iquejenadsa bica tani. Ticcadeni odsa huahuaqquide 3 canehe inahatona. Nadsapi tiadsa, Moisesidsa, Eriadsa cananijine –najari. <sup>34</sup> Pedro huati huati taja naraha essenipi pohnadeni tetepihuaji ccaronajaro. Ccaronadsapi pohnadenidsa ijihuajani nadsa cappinamana najari. <sup>35</sup> Nadsapa nahi essen bodidsa atti qqunenajaro: —Ajajaripa occa Ejedeni. Pohnadsa ohuati huana tajaro. Pohnapa madija Idinide tojahijine ocattejidsapojaride. Pohna atti timittamananissa taji –najari Dio.

<sup>36</sup> Najari atti jicadsapa qqui toquinanaja Jeso pohua motta hua canajari. Naraha Pedrodenipa pohnadeni qqui toquinajaricca ima ecomamana naccajaro. Madija ohuahadsa huati naridsamana-jaraccahi.

*Ejedeni bodidsa tocorime madidsaraha Jeso dosse ininejari*

*Mateo 17.14-21; Maraco 9.14-29*

<sup>37</sup> Huada ssiaja ssonohuaji jai tojedsippanidsapa madija sibema Jeso bacco ijidsabaqquijari. <sup>38</sup> Nahidsa madija ojaría Jesodsa huahua najari: —¡Ohua Maride, jari occa ejedeni qqui taccajo! Occa ejedeni ajajari ojarihi –najari. <sup>39</sup> —Tocorime pohua dama inadsa johua johua najari. Pohna bodi tossamodsapa pitora pitora nanaja nadsapa pohua ajari ssabojene tocca tocca najari. Tocorime pohua inajidsoja najari, apaja inana-jarahi. <sup>40</sup> Ticca dodosse tabaqquidsa huati onadsa: “Occa ejedeni tinanomimanajo” onaraha pajiramana-jarahi –najari imehi atti.

<sup>41</sup> Nadsapa Jesoa: —Jaho, madija huapima Diodsa jehe tiquinanissa tejerani. Ajijaro namicca ima bica tejeranicca ticajimaneje najaro. Tiadeni mari mari ohocanabaqqui naraha ¿nejecoma nadsa ticahatterapadseje? Ticcadeni jeheniji pajiranissa tejeradsapi ohuadsa ocassera taraha ¿nema nehe onahana-dsanaponijinequi? –nanaja: —¡Jari, ticca ejedeni ohuadsa teccajonajo! –najari Jeso.

<sup>42</sup> Naraha ejedeni Jesohuaji tohuajiradsapa tocorimejine namidsa tohuedimajari. Pohnajine pitora pitora naraha Jeso pohua dosse ininejari. Pohna attipa: —¡Tocorime tabaccorabote! ¡Ejedeni tinebodsá tiqqunenaji, onajaro! –najari. Nadsapa qqunenadsa amadsati ejedeni tonomijari. Nadsapa Jeso ejedeni imehidsa inananijari. <sup>43a</sup> Nadsapa madija huapima jahijonajaridenipa jabojo quinaraha huatidsemanajari: —A, nama nahi qqui qqui inapo-jarade. Diocca nahatohuepi deni tojani –quinajari.

*Jesopa pohua dsoqquehicca ima huati tapomajari*

*Mateo 17.22-23; Maraco 9.30-32*

<sup>43b</sup> Madija huapimapa Jeso ejedeni inanomihicca ima imahaha cananaja Jesopa pocca dodosse tabaqquidsa huati tajari: <sup>44</sup> —Aji ima huati huati onajaropi timit-tamananissa taji: Ohuapi Madija Bedi ojajaroa nidsa dsotode madija ojaría ohua ccaccoradsapa madija dsepedenidsa ojanitohui –najari.

<sup>45</sup> Naraha pocca dodosse tabaqquipa aja Jeso huati huati tajari mittamanahissa tajarajari. Djojine Jesocca imapi ahuatora tajaro, mittamana-jaraccahijine. —¿Nejecoma tajaro? –quinahitohuiraha cappinamanadsapa Jesodsa huati toquina-jarajari.

—¿Nejecojarina deni tojajari? –quinajari  
*Mateo 18.5; Maraco 9.33-37*

<sup>46</sup> Nadsapa Jesocca dodosse tabaqqupa pohuadenira imahaha canajari. Ahuaji huati, ahuaaji huati quinadsa attideni ajama quinajari: —Aji ia huapimapi ¿nejecojarina deni tojajari? –quinajari. <sup>47</sup> Naraha Jesopa pohuadeni bodi nahato tapojari. Nadsapa ejedeni idi nadsa, pohua inoridsa inahua najari. <sup>48</sup> Nadsapa pohuadenidsa huati tajari: —Ajajari ejedenissa najaridsa tetideni huanagquiri nadsapi ohuadsa naqui tetideni huanagquiri najaro. Ohuadsa tetideni huanagquiri nadsa naqui ohua Cadossede Abi Diodsa tetideni huanagquiri najarossa najaro. Aja madija ejedenidsa huati huana tadsapa pohua tessedsa naco huati huana tajari. Najaripa madija huapimadsa acco camade dissera tadsapa pohua atti naco: “Ohuapi ajimani ojani, Diodsara ibora onani” nanaja najarina Diodsa bica tajari. Pocca ima bica tadsapi pocca deni tojehe pajissehecca ahuaato tajaropaji –najari Jeso.

—Madija iadsa huadi tajaradsapa ia acco camajari –najari Jeso  
*Maraco 9.38-40*

<sup>49</sup> Nadsapa Huano Jesodsa huati tajari: —Ohua Medsede, madija ohuaha tia oni hua nadsa madija bodicca tocorime madidsajari dosse ininehi qqui inade. Naraha pohuapa iadsa ccaridsa-jaradsa pohuadsa: “Epeje taji. Poni” inade –najari Huano. <sup>50</sup> Naraha Jeso attipa: —Pohuadsa poni tiquinejeraji. Pohuapa occa ima inatabaccorajerajaro. Madija nama najaripa iadsa huadi tajaradsapa ia acco camade tojajari –najari Jeso.

*Samaritanodenipa Jesodsa nacasseraquiri najari*

<sup>51</sup> Jesopa memehuaaji toccamacossanihijine tohuajiradsa huati tajari: —Jerosarehuaaji occana. Ima ohuadsa oppina taraha nema nehe occana –najari. <sup>52</sup> Nadsapa dsama Samariacca odsa pamema nanihuaji huati toquinahijine Jesopa pohua tedsejema madija dosse inabaqqupojari: —Nanihuajicca odsadsa edacossanijine huati tiquinana –najari. <sup>53</sup> Nadsapa jai tojajari, bacco toquinadsa huati toquinaraha samaritanodenipa odsa dade jiperaquiri najari. Pohuadenipa —Jesopa Jerosarehuaaji toccahitohui –quinahi ima nahatoquiri nadsa nahidsa Jeso huadahijine jiperaquiri najari.

<sup>54</sup> Naraha pocca dodosse tabaqqui pamaha Satiaco Huano tedsejepa samaritanodeni atti: —Jeso ajadsa huadahijine jiperaquiri inani –quinahi ima mittamanadsapa Jesodsa huati toquinajari: —Ia Maride, iapi memehujicca jororonidsa jicahijine Diodsa huahua inana ¿jehe taqui? –quinajari. (Pina maittaccadsama Eriajine taminecca dodosse tabaqqui nama inanabaqquidsa jicajarissa inanabaqquina.) <sup>55</sup> Attideni nama quinadsapa Jeso icattabaqqui nadsa pohuadenidsa huati tajari: —¿Nema tiquinejeraji, poni! –najari. —Occa tiquejenajaropi “manaco” inejerana. [ <sup>56</sup> Ohuapi madija nanadsoqquede occajona-jerajaro. Madija onassiajabaqquihijinena occajonajarode ] –najari Jeso. Nadsapa denicca odsa pamema najarodsana jai tojajari.

*Madija Jeso huatimade toquejenahijineraha*  
*Mateo 8.19-22*

<sup>57</sup> Jahui jai tojadsapa madija ojaría Jesodsa huati tajari: —Ohua Medsede, tiadsa occaridsana onajaro –najari. —Tiadsa occaridsadsapi tia onebo nejeranijine –najari. <sup>58</sup> Naraha Jesopa pohuadsa huati tajari: —Ohuadsa ticcaridsanijine tipajira-jeranitide. Ajana dsuhuadsosuhuapa odinedeni cajiridsamanahi. Ppiriri naco tadsarideni cajirid-samanahi. Naraha aji ohua Madija Bedi ojararopi odsa ocappira, ohuadanijinecca huahuada ocappira nani –najari Jeso.

<sup>59</sup> Nadsapa Jeso madija ohuahadsa huati tajari: —Ohuadsa ticcaridsaji, tia naqui occa dossenijidsa tidsepe ijinijine –najari. Naraha pohua attipa: —Jehe ohua

Medsede, occa abi huatiahi ppa odsahijine occa odsahuaji occanipoccana. Nidsa dsotodena tiadsa occaridsanijine ¿jehe taqui? –najari. <sup>60</sup> Naraha Jeso pohuadsa huati tajari: —Madijapa Diocca camittehe cappiramanajarideni caji tahi. Pohuadenina poccadeni madija dsogquedsa ppa idsamanahijine pajiramanahi. Naraha tiapi ohuadsa ticcaridsaji. Diocca cacahuehecca ima tecomeraridsanijine. Icca benehi inajorani –najari Jeso.

<sup>61</sup> Madija ohuaha naco Jesodsa huati tajari: —Ohua Medsede, ohua naqui tiadsa occaridsana. Naraha tahidepi occa odsahuaji occaniccana. Nidsa nanihuaji occa madijadsa occanicca ima huati onabaqquiccana –najari. <sup>62</sup> Naraha Jeso najaridsa naco huati tajari: —“Occa odsahuaji occaniccana” tadsapi Diocca cacahuehedsa tidsepe ijiniijine tipajira-gerani. Najaro imapi pina bani ssitedecca imassa najaro. Madija bani ssite inahijine pocca bobadsa joca icanaraha pohua nattihuaji qqui tanidsapa bani ssite inajarahitohui. Bani ssite inahijinepa banihuaji paja tocattarihi nadsana bica tahi –najari Jeso.

## 10

### *Jesopa pocca mamari tabaqqi 72 quinaha dosse inaridsabaqquijaricca ima*

<sup>1</sup> Jeso pocca mamari tabaqqi mari icanabaqquia jicadsapa pohuadenidsa: — Odsa panani onihi onihi nanihuaji mari ocanabaqqui-ridsahijine –najari. Pocca mamari tabaqqi pohua tedsejema dosse inabaqquiridsapojari: —Madija otahimari mittamanapohuijine –nadsapa pocca mamari tabaqqi 72 quinaha Jeso icattejidsabaqquijari pohua tedsejema pama pama naha dosse inabaqquiridsapojari. <sup>2</sup> Nadsapa pohuadenidsa huati tajari: —Madija Dio jiraha madimanahi huapi taraha pohuadeni maridea huapi tajarahi. Pina huidsajacca ppa nahi bono jica-jarajarissa quinaraha poredea madija pama quinajari. Nadsapi huidsaja jinede Diodsa huati tiquinaji, Pohua Atti maride dosse inabaqquidsa bono porede tohuapihijine –najari Jeso. <sup>3</sup> Nadsapa denima huati tajari: —Jai tijabaqquiridsaji. Naraha aji tiadeni dosse onabaqquijaropi pina edede bedi dsomaji panahihuaji tiadeni dosse onabaqquijarossa najaro. <sup>4</sup> Jai tijaridsadsapi sacco, dsiniro huahuadsa, sadaria naco tiaccamana tajarajo. Jahui jai tijadsa naqui “Ahuajicca madijadsa qqui ijidsaccana” tiquinejerana. Madija jahuidsa qqui tiquinadsa naco “Huati icanaccana” tiquinejerana. <sup>5</sup> Madijacca odsadsa bacco tiquinadsa jai tijedsimadsa jinededenidsa huati tiquinadsapi ajima tiquinana: “Diocca jonehe tiadenidsa tojaji” tiquinana, onajaro. <sup>6</sup> Nadsapa aja odsa jinede pajissa Diocca jonehe tohuini nadsa Diocca jonehe pohuadsa tojanijine. Naraha madija ohuahapa Diocca jonehe tohuini quina-jaradsapa epejena pohuadenidsa toja-geranitohui. <sup>7</sup> Nadsama aja odsa jinede: “Aji occa odsadsa timadimanaji” nanaridsamana nadsapa nani poccadeni odsahuajira timadimanaccana. Odsa panani onihihuaji jai tija-geraccadsapi odsa onihihuaji, onihihuaji ticahadjaridsa tejeraji, tijiparidsamana tejeraji, onajaro. Aji odsa bacco tiquinapojarodsara tiadeni totonajipabaqqi nadsa poccadeni dsamatapa titijipamana nana. Poccadeni passo, ahua bono ppejene ocassa tajari naco dse dse titiquina nana, onajaro. Nadsama madija Dio Atti maridera dsepe ijihissa tadsapa manaconi jirehe tiadeni totonajipabaqqimanana nana. Aji tidsepedeni ijiridsamanadsapi najaropi ticcadeni marinaja manaconissa najaro. <sup>8</sup> Odsa panani onihihuaji bacco tiquineje naridsaponi nadsapi nahicca madija: “Ticcadeni marinaja imittana” quinajarideni tiadenidsa: “Aja tijipamanaji” quinajaridenidsara titijiparidsamana nana. <sup>9</sup> Nahicca madija comagquiri najarideni naco tinanomibaqquimanaja naridsapohui nana. Pohuadenidsa huati tiquinadsa naqui: “Tiadenidsa Diocca cacahuehepi huajira tani” titiquina nana, onajaro –najari Jeso.



*Madija iboqquri najaridenipa caji tahi*

*Mateo 11.20-24*

<sup>10</sup> Jesopa pocca mamari tabaqqidsa denima huati tajari: —Nadsama odsa panani onihihuaji bacco tiquinadsa naqui tiadenidsa: “Ajidsapi timadimana tejeraji” nanaridsamana nadsapa jahui jai tijeqquimadsa pohuadenidsa ajima tiquinana: <sup>11</sup> “Tiadenipi Diocca cacahuehecca ima mittade jiperaqquri tiquinadsapi epejena jaijeqquimanijine” tiquinana. “Tidsamaridenicca ssiqui emoridsa matajaro naqui catojanijine pporo inana, nani ticcadeni ibohue tibodideni huatoma-mananijine” tiquinana. “Naraha tiadenipi ¡timittamananissa taji! Diocca cacahuehe tiadenidsa huajira taraha...” tiquinana, onajaro. <sup>12</sup> Ajina, nidsa dsama jicadsa Diopa dsama huapima ima manaconi huati tadsapa najaro odsa pananica madija occa marinaja mittade jiperaqquri nadsapa najidsohue imenidsa madimanahitohui. Ajina, maittaccadsama odsa panani Sodomacca madijapa imasiri sseqquri nadsapa Djotine jicaridsapojari. Naraha pohuadenipa nidsa dsama jicadsapi poccadeni imasiri manaconipa najidsohue oppina tajaro pohuadenidsa tojanitohui. Naraha occa marinaja mittade jiperaqquri najaridenidsana najidsohue denima oppina tanicca tojanitohui, onajaro –najari Jeso.

<sup>13</sup> —Jaho, madija odsa panani Corasinahuaji timadimanajarodenipi najidsohue oppina tanicca tiadenidsa ssonarinitohui. Jaho, madija odsa panani Besaidadsa timadimanajarodeni naqui najidsohue oppina tanicca tiadenidsa ssonarinitohui. Ticcadeni odsahuaji ocanahatori canani qqui qqui tiquinaraha tibodideni cacajiqquimerehe nejerade. Ajina, maittaccadsama odsa panani Tirohuaji madimanapojarideni tabaccoraqquri najari. Aji odsa panani Sidohuaji madimanapojarideni naco tabaccoraqquri najari. Pohuadeni huapimapa aji ocanahatori canani qqui toquinapo-jarajari. Nassa qqui toquinadsapa Diodsa toquejenahijine najomanajarahitohuiraha. Poccadeni imasirijine bodideni ocassera tadsapa etero jidsa tanicca huedsamanadsa dsippo oconidsa jassi tadsa oji oji quinahitohuiraha –najari Jeso. <sup>14</sup> —Naraha nidsa madija huapimacca ima cattermanijinecca huada bacco tadsa Dio Pohua baccohuaji tidomodeni huadsapi Tirohuaji madimanajaridenidsa Dio pocca najidsohue ajimani tojanitohui. Sidohuaji madimanajaridenidsa naco ajimani tojanitohui. Naraha tiadenidsana Dio pocca najidsohue denima oppina tanitohui.

<sup>15</sup> —Jaho, madija odsa panani Capernaohuaji timadimanajarodeni naqui najidsohue oppina tanicca tiadenidsa ssonarinitohui. Dio memehuaji madijaridsa bacco tiquinadsa tiadenidsa Pohua Attipa: “Jehe, tiadenipi bicaqquri tiquinani” ¿napadsaja? ¡Nama najarahitohui! Ticcadeni ibohuejinepi nami odini huaji tani jicaqquni nohueranihuaji tiadeni hua todsimahitohui –najari Jeso.

<sup>16</sup> Naraha denima pocca mamari tabaqqidsa huati huati tajari: —Tiadenipi otahimari tecomeraridsamanadsapi madija tettidenidsa jehe quinadsapa ohuadsa naco jehe quinajari. Nadsama madija ohuahadeni tiadeni tohuattajo-baqquidsapa ohuadsa naco huattajojo tajari. Ohuadsa huattajojo tadsapa aja ohua cadossejaridsa naco huattajojo tajari –najari Jeso atti, pocca mamari tabaqqi jai tojaridsahijine dosse inabaqquijaridsa.

*Jesocca mamari tabaqqi 72 quinajarideni jahiqquinijari*

<sup>17</sup> Jesocca mamari tabaqqi 72 quinajarideni jahiqquinidsapa huatidsemaneri nanidsa Jeso pohuadsa huati toquinajari: —Ia Medsede, tia onima huati inadsapi Satanacca dodosse tocorime ettidsa iboraqquri nadija –nanimanajari.

<sup>18</sup> Nadsapa manaco Jeso pohuadenidsa huati tajari: —Jehe, ohuana Diocca huadi Satana memehuaji Djotine ssonaronahi pina ssissiedessa naronahi qqui onajaride. <sup>19</sup> Occa dacorehe tiadenidsa onanaridsajaropi aja Satanacca dacorehe cajimanageridenidsa tiadenina deni tiquejenanitohui. Nadsama oppina tanicca pina macca

ttai tinanaquimanadsa tiadeni cca todsa-jarahitohui. Dsorima ssidede naco ttai tinanaquimanadsa tiadeni ttodi todsa-jarahitohui. Satana pohua, pocca dacorehe cajimanajarideni naco tiadeni tonajidsobaquimana-jarahitohui. <sup>20</sup> Naraha tocorime tettidenidsa iboraququiri nadsa tetidsemanaraha najaro imapi ajimani. Ima denima bica taniccapi ajima nani: Occa madija tiquejenadsapi tiadeni onipi memehuaji Diocca papeodsa dsodo naridsani. Najaro imadsana denima tetidsemanaji, onajaro -najari Jeso.

*Jesopa Imehidsa huati tajari, pocca mamari tabaqquidsa naco huati tajari*  
*Mateo 11.25-27; 13.16-17*

<sup>21</sup> Huati taha jicadsapa Jeso Dio Corimejine huatidseri nadsa Imehidsa huati tajari: —Jehe Abi, tiadsa ohuatidsejaro. Tiapi memehuaji madimanajarideni Cacahuade tija, namihuaji madimanajarideni Cacahuade tija najaro. Jehe, madija nahatoqquri najaridenipa ajijaro dsamacca ima tocahatteraraha Tiadsa jiperaququiri najari. Nadsama tijinepi ticca ima pajissacca mittamana-jarahijine pohuadenidsa ahuatora tinanajaro. Naraha madija motadenipa: “Iapi ssamoqquri inajaro, pina ejedenissa inajaro. Dio, ia acco ticamabaquqiji, iatta naccaraho” quiquinanajari. Jehe, nadsama tijinepi ticca ima pajissacca mittamanahijine pohuadenidsana ahuato tinanajaro. Jehe Abi, ipajissa! Tia jipa tinadsapi tijine nema tinanajarode, onajaro. Nadsama tijinepi ohuadsa bica tani, onajaro -najari Jeso. <sup>22</sup> Nadsapa pocca mamari tabaqquidsa huati tapomajari: —Occa Abipa ohuadsa pocca nahatohue huapima inaridsajaro. Occa Abina pohua motta ohuadsa nahato tahi ojari najari. Occa Abipa nadsama Pohua ojari naha ohuadsa nahato taha nama najonajari. Ohuapi Abi Diocca Ejedeni ojani. Ohua naqui nadsama. Ohua ojari onehe Pohuadsa nahato onehe nema onajonajaro. Nadsama ohua Dio Bedi ojadapi madijadeni ohuadsa toquejenajaripa pohuadenidsa jipa onadsapi ojine pohuadenipa Dio Pohuadsa noccodeni tojidserahitohui -najari Jeso. <sup>23</sup> Nadsapa Jeso pocca mamari tabaqqui icattabaqqui nadsa huati tajari: —Aji ohua ocanahatoriri canajaro tinoccodenidsa qqui tiquinaridsajaropi Dio tiadenidsa ima bicani inanajaropaji. Ohuapi madija Idinide ojeje najaro aji tiadeni tinoccodenidsa qqui tiquinajaropaji. Dio naco tiadenidsa ima bicani inanajaropaji. <sup>24</sup> Maittaccadsama Dio Atti cacomeraququiri najarideni, jodiodenicca taminedeni naco occa nahatohue aji jidapana tiadeni qqui tiquinajarocca qqui toquinahijine tohuini quinaporaha tahide tojicapodsapa qqui toquina-jarajari. Aji occa marinaja timittamanajarocca naqui najaro mittamanahijine tohuini quinaporaha tojicapodsapa mittamana-jarajari -najari Jeso.

*Diocca dosseniji deni tojanicca*  
*Mateo 22.34-40; Maraco 12.28-34*

<sup>25</sup> Jassi nahujanidsa aja jodiodenicca marinaja maride pohua bodipa: —Jeso nattome onana -nadsa totehemadsa huati tajari: —Mamaride ¿nejecoma onadsa camittehe imadi-dsanaponicca bacco onanijine? -najari. <sup>26</sup> Naraha pohuadsa Jeso huati tajari: —¿Nejeco ima hua hua tatte Diocca dosseniji dsodo nanidsa? Hua tadsapi ¿nejeco imara tiadsa ahuato tatte? -najari Jeso.

<sup>27</sup> Nanaja jodiodenicca marinaja maridepa Dio Atti ecomerajaro: —“Tiadeni Medsede Diodsa tetideni huanacquiri naji. Tibodideni huatonissa tadsa, dacoco tijiradsa Pohuadsara disseraququiri tidsanapomanadsapi Pohuadsa tetideni huanacquiri nanijine. Tinoridencadsa naqui tetideni huanacquiri naji, pina tiadenidsa tetideni huanacquiri najarossa naji” nade Dio Atti dsodo nanidsapi -najari jodiodenicca marinaja maride atti.

<sup>28</sup> Nadsapa pohuadsa Jeso huati tajari: —Huati tinani bica tani. Nema tidsanapodsapi Diodsa timadinitohui -najari.

<sup>29</sup> Naraha jodiodenicca marinaja maride pohua bodi attipa: —¿Nejecojaridenina ohuitoricca? Najaro Moisesicca marinaja Dio Atti dsodo nanipi ¿ohuacahuanissa tajaroqui? —najari. Nadsapa Jesodsa huati tajari: —Diocca dosseniji najarossa onananijineraha ¿nejecojaridenina ohuitoricca? —najari jodiodenicca marinaja maride.

### *Samaritano tahimari*

<sup>30</sup> Jodiodenicca marinaja maride attipa: —¿Nejecojaridenina ohuitoricca pohuadsa ohuati huana tanijine? —nadsapa Jeso manaco pohuadsa ajijaro ima huati tajari: —Jodiodeni ojariapa odsa panani Jerosarecca jahui odsa Jericohuaji toccanihuaji toccajari. Toccaraha... bobotidedeni dama quinadsa idaquimanaha, huatiabote nadsa eterori ssiti quinehe jica nadsa jahui inorinidsa inebomanadsa jai tojanijari. <sup>31</sup> Naraha dada toqquimadepa huati ajama canaha jahui toccanaja madija biquerajari ponacossahi qqui taraha toccarihuaja-dsanapojari. <sup>32</sup> Nahi dsotode naco dada toqquimade bijideni accode rehuitadeni quiquinanajari ojaría najaro jahui toccajari. Najari naco madija biquerajari ponacossahi qqui taraha toccarihuaja-dsanapojari. <sup>33</sup> Nadsapa madija ohuaha dsama onini Samariacca madija naco najaro jahui toccajari. (Aja Samariacca madijadenidsa: samaritano, quiquinanajari. Pohuadenipa jodiodeni tedseje ahuaji jipera ahuaji jipera quinajari.) Nadsapa samaritano quiquinanajari ojaría najaro jahui toccadsa madija biquerajari ponacossahi qqui tadsapa pohuatohui huati huana tajari, pocca madija jararaha. <sup>34</sup> Nadsapa samaritano uva bono ppejene ahua oquini icanejemadsa bobotidedenijine biquerajari ecanajijari. Pocca bejo jore inacossadsapa pocca bojodsa ibarijari. Nadsapa odsa onihihuaji iaccajari, nahidsa ecahuahijine. <sup>35</sup> Naraha huada ssiaja samaritano toccabote nadsa odsa jinededsa ccarara denario capamehe dahaha icanajaro. “Coma tajari tecahuana. Nidsa occanipomadsa tiadsa aja tecahuajari manaconi mota tojadsapi da onapomanijine” nahi nade samaritano attipa —najari Jeso jodiodenicca marinaja maridedsa.

<sup>36</sup> Naraha Jeso pohuadsa denima huati huati taccajari: —Aja madija 3 quinajaripa dada toqquimade, Rehuita, samaritano quinajaridenipa ¿nejecojarina paja aja bobotidedenijine biquerajaridsa pina pohua inoriccassa najari? —najari Jeso.

<sup>37</sup> Nadsapa jodiodenicca marinaja maride ecomerajaro: —Aja madija biquerajaridsa huati huana tajarina paja —najari. Nadsapa pohuadsa: —Jehe, ticcanidsapi nema tidsanapoji —najari Jeso.

### *Jesopa Marta Mariadenicca odsadsa maride tojjari*

<sup>38</sup> Jesopa pocca dodosse tabaqqi tedseje poccadeni benehidsa denima jai tojeqquimadsapa odsa capamema nanidsa bacco toquinajari. Nanidsapi amoneje onini Marta madijaro. Najarona Jesodsa huahua najaro: —Occa odsadsa timadiccapi —najaro. Nadsapa Jeso toqquedsimajari. <sup>39</sup> Martacca eso Maria naqui nanidsa madijaro. Jeso maride tojadsapa Mariapi pohua atti mittade huittajaro. <sup>40</sup> Naraha Martapi ponicca odsa bica tocananijine, huapima jipaqquimanadsa bica tanijine dsapani ijiridsajaro. Dsapani jica-jeradsa ponidsa tonajoni nadsa Jesodsa huati tajaro: —Ohua Medsede, ohua motta occa odsadsa odsepe ijini. Ohuemecote ohua acco cama-jeradsapi ¿tiadsa bica taqui? Ponidsa huati tinaji, ohua acco camaccanijine —najaro.

<sup>41</sup> Naraha Jeso Martadsa huati tajari: —Marta, tiapi ticca odsa bica tocananijine, jijipa naco tinajoranijine najarotohuira teti huatojaro. <sup>42</sup> Naraha ima onihina denima bica tajaro. Najarotohuina teti huatonijine bica tajaro. Mariapi ima denima bica tajarocca icattejidsajaro. Jehe, epejena. Ponipi occa marinaja mittana. Tiahuaji dosse onejerani —najari Jeso.

# 11

## *Diodsa huati huati inanijinecca ima*

*Mateo 6.9-15; 7.7-11*

<sup>1</sup> Jesopa pocca dodosse tabaqqui tedseje dsama onihihuaji maride ccaridsadsapa Diodsa huatide tojajari. Huatide jicadsa pocca mamari ojariapa Jeso pohuadsa huati tajari: —Jari, ia naqui Diodsa huati huati inanijine ia mari ticanabaqquiji, pina Huano pocca mamari tabaqqui mari icanabaqquijarissa tinanaji –najari.

<sup>2</sup> Nadsapa Jeso pohuadenidsa huati tajari: —Diodsa huati tiquinadsapi ajima tiquinaji:

“Jehe Abi Dio, iapi ticca ejedeni Tiadsa huati inajaro.

Jehe, Tiapi nahatojide tijirani ojari tani. ¡Bica tinani!

Madija huapima: ‘¡Dio, Tiapi deni tijani!’ quinana, inajaro.

Ticca cacahuehe huapimadsa tinanaridsana, inajaro.

<sup>3</sup> Itapari naco huada huajjiradsa iadsa da da tajo.

<sup>4</sup> Madija iadsa tabaccorehe inanamanadsa poccadeni tabaccorehedsa: ‘Epejena, huadi onejerani’ inadsapi manaco icca tabaccorehe epeje tinanaji, Abi Dio. Icca tabaccorehe manaconi najidsohue iadsa tinana-jeraji, inajaro.”

*Jesopa: —Diodsa huatide disseraqqiri tiquinaji –najaricca ima mari icanabaqquijari*

<sup>5-6</sup> Jesopa Diodsa huatide tocahattehijine denima mari icanabaqquijari: —Ajima najaro imadsa tiadeni mari ocanabaqquina. Dsome nocconi titesse huaji tanicca bacco nadsa titapahijine nohueradsapa titesse tinoridsa madjaridsa huahua tajaro: “Otesse huaji tanicca bacco najonahi. Naraha otapari nohuerahi, pohuadsa da onahijine ocappirani. Ohuadsa pan huatimade tojari naha da tajo” tajaro. <sup>7</sup> Naraha odsa bodicca pohua cacomerajari: “Ohuadsa huahua tejeraji, noccobiji cahacossani. Occa ejedeni ohuinoridsa cahadijahi. Tiadsa da onahitohuiraha otehemanijine tojera tani” najari tinoricca –najari Jeso. <sup>8</sup> —Naraha tiadenidsa huati onajaro: Tinoriccapa titesseraha pohuadsa huahua tapodsapa qquena-jarahi. Naraha ticappina-jeradsa huade dissera tinadsana qquenahitohui. Qquenadsapa ticappiranicca tiadsa da inahitohui –najari Jeso. <sup>9</sup> —Nadsama ohuapi tiadenidsa huati onajaro: Abi Diodsa huati huati titiquina naji, onajaro. Dio Pohuadsa huati tiquinadsapi tiadenidsa ticcadeni huatinajassa nehe da inanitohui. Pina tohuini tanicca qquide dissera tinadsapi bacco tinanitohui. Najarossa najaroa Diodsa huatide dissera tinadsapi Pohuapa ticca huatinaja tiadsa inapajiranissa tanitohui. Pina madijacca odsadsa tiqquedsimanijine tohuini tadsa odsa jinededsa huahua tadsapi tiadsa noccobiji icatabojidsanitohui. Najarossa najaroa Diodsa huati huati tiquinadsapi ticcadeni huatinaja mittahi. <sup>10</sup> ¡Pajissa! Madija Diodsa huati tadsapa Diopa pohuadsa pocca huatinaja da inanitohui. Madijapa Diodsa huatide dissera tadsapa Dio Pohuajine pocca huatinaja inapajiranissa tanitohui. Madijapa pina Diocca noccobijidsa huade dissera tajarissa nadsapa Dio pohuadsa noccobiji icatabojidsanitohui, onajaro.

<sup>11</sup> —Ajana, madijapa pocca ejedeni aba tohui huati tadsapa ¿pohua bedidsa macca da ina taco? Nohuerahi. Tiadenidsapa madija nama najari nohuerajari.

<sup>12</sup> Madija ohuaha pocca ejedeni tacara nappanitohui huati tadsa naco ¿pohua bedidsa dsorima da ina taco? Nohuerahi. <sup>13</sup> Tiadenipi tabaccorehe ticajimanaraha ticcadeni ejedenidsa bica tahicca dade nahatoqqiri tiquinani. Aji tiadeni naqui ticcadeni Abi Dio memehuaji madjaridsa huati tiquinadsapi tiadenidsa bica tahicca dade denima jipa tahi. Pohua Corime tohui tiquinadsa naqui Pohuadsa huati tiquinadsapi tiadenidsa da inahitohui, onajaro –najari Jeso.

*Jesocca dacorehe ahuato tajaroraha pohuadsa ima inanamanajaro*  
*Mateo 9.32-34; 12.22-32; Maraco 3.20-27; 9.40*

<sup>14</sup> Nadsapa madija pohua bodidsa Satanacca dodosse tocorime madidsajarijine ebene siri tojajari. Atti cappiraha madijari. Naraha Jesojine ebene siri bodicca qqenadsapa ebene biquemanidsa atti cajipomajari. Nadsapa nahihuaajicca madija qqui toquinadsapa: —A, bica tahi. ¡Jesopa nahato tahi! —quinajari. <sup>15</sup> Naraha nahihuaajicca madija ohuahadeni pohuadsa pajissa quina-jaradsa mota attidenia: —Ajana, Jesopa tocorimedenicca tamine Beheosebocca dacorehe cajijarijinea pocca dodosse tabaqqui dosse ininebaqquijaripaja —quinaraha maidsamanajari. <sup>16</sup> Naraha mota bodidenia: —Jeso nattome inana. ¿Nejecojaricca dacorehe cajijari? —quinadsapa Jesodsa huati toquinajari: —Jari, pajissa Diocca dacorehe ticajidsapi memehuaajicca nahatohue bicabote ahuato tinanaji. Qqui inana, inajaro —quinajari Jesodsa. <sup>17</sup> Naraha Jesopa pohuadeni bodi nahato tajari. Pohuadeni bodi huatomanahijine pohuadenidsa ajijaro ima huati huati tajari: —Dsama huapimacca taminepa madija ecahuabaqquiraha dsotode pocca madija cahadiremanadsa ahuaji atti ahuaji atti quinadsapa pocca cacahuehe inassamomanajaro. Nadsapa pocca madija domo tocca tahi. Najarossa najaro odsa cajariecca madija cahadiredsapa poccadeni ima tossamodsapi tojaribaqqui tahi. <sup>18</sup> Ima najarossa najarora Satanapa pocca dodosse tabaqqui madija bodidsa madidsamanajarideni dosse ininebaqquidsapa pina pohua pocca madija tedseje cahadirejarissa najari. Nama nadsapa pocca dossehe inassamodsapi sara tabaqquihitohuiraha. ¿Nadsapa pocca dodosse madija bodicca dosse ininehijine jipa taco? Jipera tahi. Aji ohuadsa tettidenipi: “Beheosebocca dacorehedsa pocca dodosse dosse tininejari” tiquinaraha najaropi pajissa jerani. Nassa najaro pajissa tojadsapi Satana pohua pocca dodosse tabaqqui inajaribaqquiridsahitohuiraha. <sup>19</sup> Ajina, ohuadsa: “Beheosebocca dacorehe ticajini” tiquinaraha ticcadeni mamari tabaqqui naco tocorime dosse dosse ihininebaqquimana najari. Naraha pohuadenipa ¿nejecojaricca dacorehedsa nama quinajari? Aja ticcadeni mamari tabaqqui dacorehe cajimanadsa tocorime dosse ininebaqqui-manaraha pohuadenidsa: “Beheosebocca dacorehe ticajimanani” ¿tiquinattaqui? Nema tiquinejerani, onajaro. Nadsama ¿nejecotohui ohuadsa nema tiquinajaro? Tibodidenipi quejemama canajaro —najari Jeso. <sup>20</sup> —Naraha ohuapi Diocca dacorehe ocajije najaro Satanacca dodosse tabaqqui dosse dosse ohoninebaqquiridsa najari. Nema onanadsapi tiadenidsa ahuato onanajaro: jidapana Diocca cacahuehe tiadenidsa bacco najonajaropaji, onajaro —najari Jeso atti.

<sup>21</sup> —Nadsama Satanapa dacorehe cajiraha ohuapi deni ojajaro. Pahuapa ajamani, pina ajijaro ima tiadenidsa huati onabote najarossa najaro. Aja madija dacorajaripa dsepe cajidsa pocca odsacca huapima ecahuanissa tajaro. <sup>22</sup> Pohua bodipa: “Odsepe ocajidsapi daco ojirani” naraha madija ohuaha denima dacorajari bacco nadsapa odsa jinede dama inajari. Dsepecca equididsa jinede biji jore inadsapa pohua dsepetaji huapima inaccadsa da inabaqquijaro. Ima najarossa najarora aji occa dacorehe deni tojadsapi Satana jore onaqquidsapa pocca dodosse tabaqqui dosse dosse ohoninebaqqui najaripaja —najari Jeso.

<sup>23</sup> Nadsapa Jeso denima huati huati tajari: —Nadsama madija ohuadsa tojaradsapa occa huadi tojajari. Pohua naco madija ohuadsa toquejenahijine pohuadeni acco icamabaqqui-jaradsa pohuajine ohuadsa tohuajimanajari, onajaro —najari Jeso.

*Satanacca dodosse tocorime toccaraha ccanipoma tahi*  
*Mateo 12.43-45*

<sup>24</sup> Jesopa ima onihidsa mari icanabaqquijari. Pohua attipa: —Nadsama tocorime ojaría madija bodidsa madidsaraha qqenadsapa toccajari. Aji dsama huamo tanihuaji, passo nohueranihuaji pohua madihijine qquide toccadsa qqui qqui



naridsaraha pohua madihijine bacco tajarajari. Nadsapa: “Jehe, occa mamadi botehuaji occanipomana” najari tocorime atti. <sup>25</sup> Nadsapa ccanipomajari, bacco nanidsa madija pohua bodi tohuirehi qqui tadsapa pina odsa johue tocanehue huisso tocanajarossa najaro. <sup>26</sup> Nadsapa tocorime toccapomadsa pohua tessedeni tocorime 7 quinaha jina inanibaqquijari. Najaridenipa denima tabaccoraqquri naraha pohua tedseje jai tojedsimajari, madimanahijine. Nadsama ima nema najaro madijadsa tojadsapi pocca madie tabaccora taporaha dsotodepi denima totabaccorajaro –najari Jeso.

*Huatidsehe icajinicca ima*

<sup>27</sup> Nadsapa Jeso maride tojadsapa amoneje madija sibemadsa quejemajaropi jadsirema huahua najaro: —Jehe, ticca amidsapi ima bicani tojani. Ponipi bedi nahato tajari inanapidsapa huatidsehe cajini –najaro amoneje attini.

<sup>28</sup> Naraha Jeso huati tajari: —Jehe, naraha madijapa Dio Atti mittamanadsa najarossa inanamanadsapi najaridenidsana ima bicani tojanitohui. Huatidsehe naqui cajimanahitohui –najari Jeso.

*Madija tabaccoraqquri najarideni Jeso canahatori canahijine tohuini quinajari*

*Mateo 12.38-42; Maraco 8.12*

<sup>29</sup> Nadsapa Jesodsa madija toqueriqquija dsanapohui najari. Nanaja madija si tocajari canadsa mari icanabaqquidsapa ajama najari: —Nadsama aja jidapana madija madimanajaridenipa tabaccoraqquri nadsa ocanahatoriri cananijine tohuira huati toquinaraha occa nahatohue onahatona onejerani. Naraha ocanahatoriri cananicca ima ojariena ahuato onananitohui. Najaropi Dio Atti cacomerabote Jonasocca imassa najaro. <sup>30</sup> Najaroa aji Jonaso pina huatiajarissa naraha Djojine tossiajadsa madipomajari. Pocca ima odsa panani Ninibehuaji madimanapojarideni mittamanadsapa: “Jehe, ajajaripa Diocca dosseniji, Dio Atti imittanijine” quinade. Najarossa najaro imadsa Diopa madija jidapana madimanajarideni inahattabaqquihitohui. Aji ohua Madija Bedi ojararopi nidsa ohuatiadsa Djojine ossiajadsapi omadipomanitohui. Pina Jonasocca imassa najaro ohuadsa tojanitohui, onajaro –najari Jeso. <sup>31</sup> —Nadsapi nidsa madija huapimacca ima cattermanijinecca huada bacco tadsapi Dio Pohua baccouhaji tidomodeni huanitohui. Nanidsapi dsama Sebahuaji tamine amoneje madijaropi ticcadeni ima tiadenidsa inassonariniijine huati tanitohui. Poni attinipi: “Ohuapi dsama huaji tanihuaji omdiraha tamine Saromocca nahatohue omittanijine occajonade. Naraha tiadenidsa madijaripa denima nahato taraha pohua atti mittade iboqquri tiquinajaro. Nema tiquinadsapi Dio tiadeni tohuattajo-baqquidsapa bica tani, onajaro” nanitohui Sebahujicca tamine amoneje attinipi –najari Jeso. <sup>32</sup> —Najaro huadadsa odsa panani Ninibehuaji madimanajarideni naco ticcadeni ima tiadenidsa inassonarimananijine huati toquinahitohui: “Iapi Jonasocca ima imittadsa ibodi cacajiqquimerade. Naraha tiadenidsapa Dio Atti cacomerabote deni tojarari madiraha pohua atti mittade iboqquri tiquinajaro. Nema tiquinadsapi Dio tiadeni tohuattajo-baqquidsapa bica tani, inajaro” quinahitohui Ninibecca madija –najari Jeso.

*Dio ssiejene pina jojororossa najari*

*Mateo 5.15*

<sup>33</sup> —Nadsama jojororo naco toquehessidsapa ahuatora tanihuaji tocanajimahijine jarahi. Sspotodsa naco boco icanahijine jarahi. Jojororo toquehessidsapa aja pohua cacahittari nahidsa cacahittari najari, nahi madija odsa bodihuaji jahidsimajarideni ssiajani cajimanahijine. Najarossa najaro Dio ssiejene tiadenidsa bacco teje nadsapi tibodideni tossiajaridsani –najari Jeso. <sup>34</sup> —Inocopi essiredsa pina jojororossa najaro. Inocco bica tadsapi essire ssiajani ijini. Idsepedsa naqui damade nahato

inajaro. Emoridsa naqui ccaridsade nahato inajaro. Icca tarabaisda naqui ipajirajaro. Ibodi huatode naqui nahato inajaro. Naraha inocco bica tejeradsapi pina inocco dsidsi tajarossa najaro, issamo tani. Dama inanijine naqui ssamo tani, iccaridsanijine naqui ssamo tani, icca tarabaisda naqui ssamo tani. Imapi najarossa najaro tibodidenidsa Dio ssiejene toqquedsimadsapi tibodidenidsa ssiaja taridsani. Naraha Dio ssiejene toqquedsima-jeeradsapi tibodidenidsa pina dsidsini ijiridsajarossa najaro -najari Jeso. <sup>35</sup> —Aji tiadenipi: “Nahatoqquiri inani. Ibodi ssiaja tani” tiquinadsapi ipaji! onajaro. Najaro ssiajanipi occa imassa nejeradsapi ssiajani ticajimana-jeerajaro. Dsidsini oppina tanicadsana timadimanajaropaji, onajaro. <sup>36</sup> Naraha tibodidenidsa Dio ssiejene ijidsapi, aji dsidsinicca ima oba tanicca tibodideni tecahuamana-jeeradsapi, otahimari Diocca ima tibodidenidsa ahuatoto tanissa tanitohui. Pina jojororo ssiejene tiadenidsa tossiajabaqquijarissa nahitohui -najari Jeso.

*Pariseodeni, jodiodenicca marinaja maridedeni tedseje huahuattajo toquejenahicca ima*

*Mateo 23.1-36; Maraco 12.38-40; Roca 20.45-47*

<sup>37</sup> Jesopa madija mari icanabaqquia jicadsapa marinaja pariseodsa jehe najari ojaria Jesodsa huati tajari: —Occa odsahuaji tijipanijine ticcajonaji -najari. Nadsapa Jeso najaricca odsadsa toqquedsimajari. Jipahijine huahuanaridsa huittaritari. <sup>38</sup> Nadsapa pariseopa pohua dsepe ssahua najari, —Oppina tahicca bara onahitide -nadsa. Nama nama quiquinanajari marinaja onini pariseodsa jehe quinajarideni huapima. Naraha Jesopa pohua dsepe ssahuarahi huittaridsa pariseo qqui tadsapa huajo najari. <sup>39</sup> Naraha pohuadsa Jeso huati tajari: —Marinaja pariseodsa jehe tiquinajaro, ticcadeni madiepi pina dsedse, parato huapihuajira ssahua ssahua tiquinajarissa najaro. Naraha tibodidenina pina dsedse parato bodihuaji ssahuarahi oba tajarissa tiquinajaro. Tibodidenidsa tibotimanajarocca ima ijijaro. Tohuini tiquinajarocca ima naqui ijijaro. <sup>40</sup> ¡Ssamooquiri tiquinani! Diopa essire nemaneha inahatojaro. Pohuapa ¿ibodi nahato tajaraco? Ibodi nahato tahi. <sup>41</sup> Nema nadsapi ticcadeni tabaccorehe tinebomanaji, tibodideni tohuirenijine. Nadsapi maidsehedsa dsiniro denima tiadenidsa totoja nejeranijine. Madija tohuati nahanaqquiri najarideni naco acco acco titicanabaqquimana najo. Nadsana ticcadeni madie naqui tobicanitohui, onajaro.

<sup>42</sup> —Jaho, marinaja pariseodsa jehe tiquinajaro, tiadenipi huahuattajo tiquejenanitoahui. Ticcadeni odsa inorinicca ppa nahi dsamatapa quequejema majo bica tajari pore tiquinadsa naco badsira taraha mota Diodsa da da titiquina najari. Najaro ticcadeni marinaja ajimaniccaraha tecahuamananissa tajaro. Naraha Diocca dosseniji deni tojaniccapi tecahuamana-jeerajaro. Diocca dosseniji deni tojaniccapi madija ticamaidsabaqquimana-jaradsa tettideni pajiranissa tanijine. Diodsa naqui tetideni huanaaquiri nanijine. Jehe, najaro dosseniji tecahuamana-jeeradsapi ticcadeni ima dsori tajaro. Aji ticcadeni odsa inorinicca ppa nahi mota Diodsa da da titiquina najari bica tahi naraha najaro dosseniji ajimanicca aji Diocca dosseniji deni tojanicca tadsajani tecahuamanaji, onajaro.

<sup>43</sup> —Jaho, marinaja pariseodsa jehe tiquinajaro, tiadenipi huahuattajo tiquejenanitoahui. Ticcadeni Dio Atti mamarihuaji jassi tinarinijinepi deni toquejenajaridenicca huihuittari tohuini titiquina najaro. Aji dadahuajicca jahuidsai jai tijaridsadsa naqui madija tiadenidsa: “¿Nija, bica tinani? Tiapi deni tijani” quinahijine naqui tohuini titiquina najaro.

<sup>44</sup> —Jaho, tiadenipi huahuattajo tiquejenanitoahui. Tiadenipi pina madija ppa todsahibote noccobiri tohuatorajarossa tiquinajaro. Madijapa najaro tonoccobiri tetepihuaji jai tojeqquimadsapa madija nahidsa ppa todsaraha ssamooquiri nahi. Nama quinadsapa ima oppina tanicca pohuadenidsa tojajaro. Madija tiadeni qqui

toquinadsapa pina bicaqquiri tiquinajarossa naraha tibodidenicca tabaccorehepi ssamoqquiri najari –najari Jeso.

<sup>45</sup> Naraha jodiidenicca marinaja maride ojaria Jesodsa huati tajari: —Mamaride, tetti nema nadsapi iadsa naqui ima tinahanajaroa –najari.

<sup>46</sup> Naraha Jesoa: —Jehe, jodiidenicca marinaja maridedeni tiadeni naqui huahuattajo tiquejenanitohui. Tettidenipi: “Diocca dossenijidsa ajima tiquinaji” tiquinaraha ticcadeni marinaja najo taniccara tinaharimanajaro. Nadsapi tijinedeni ima toc-canajani najaro. Najaro imapi madija ecahuamananijine pajiramana-jarahi. Tiadeni naqui najaro ima madija ecahuamananijine acco ticamabaqquimana-jarahi.

<sup>47</sup> —Jaho, tiadenipi huahuattajo tiquejenanitohui. Tiadenipi Dio Atti cacomeraqquiri napojarideni noccobirideni tetepidsa siba hua tinamaromanajaro, “Poccadeni ima bica tade, eti ajima-jerana” tiquinadsa. Naraha najaridenipa ticcadeni ididenijine jicaridsajari. <sup>48</sup> Pohuadeni noccobiri tetepidsa siba hua tinamaromanadsapi pina ticcadeni ididenicca imadsa jehe tiquinajarossa najaro. Pohuadenijine Dio Atti cacomeraqquiri najarideni jicaridsajari. Tijinedenina pohuadeni noccobirideni nahatoridsajaro.

<sup>49</sup> —Nadsama Diopa Pohua bodi nahato tapodsapa ajama najari: “Madijadenidsa Ohuatti cacomeraqquiri najarideni dosse onabaqquihitohui. Occa dodosse tabaqqui naco pohuadenidsa dosse onabaqquihitohui. Naraha motapa inajicamanahitohui. Motana jicahijine itaqquidso-ridsamanahitohui” napohui nade Dio. <sup>50</sup> Nadsama aji jidapana timadimanajaropi tiadenidsa najidsohue imeni ssonarinitohui. Aja dsama inahatopodsama Pohua Atti cacomeraqquiri najarideni tojicadsa emenedeni toccajaro manaconedeni tiadenidsa ssonarinitohui. <sup>51</sup> Aja tahidepa Abeona pohua ohuahajine dsoqquepojari. Najari emene toccapodsama aja Dio Atti cacomeraqquiri najarideni naco inajicamanaja najonapohui najaria aja Sacaria inanadsoqque-manahi bacco najonajaropaji. Sacariapa Diodsa dada toqquima bacconihuaaji aji Diodsa da tahijinecca huahuanari inorinidsa inanadsoqque-manajaripaja. Jehe, pajissara tiadenidsa huati onajaro: Aja Dio Atti cacomeraqquiri najarideni huapima jicajonajari manaconedeni jidapana timadimanajarodenidsa Djojine najidsohue ssonarinitohui.

<sup>52</sup> —Jodiidenicca marinaja maridedeni tiadeni naqui huahuattajo tiquejenanitohui. Dio Atti madija mari ticanabaqquimanahissa tadsapa madija Dio Atti tocahatterahijineraha. Dio Atti mari ticanabaqquimanahissa tajaradsa, ticcadeni marinaja najo tanicca tinaharimanadsa naqui tijinedeni madija Dio Atti tocahattera-jarajari. Nema tiquinadsapi pina Diocca cacahuehecca noccobiji ticahacossamanajarossa najaro. Nadsapa madija Diocca cacahuehedsa jai tojedsima-jarajari. Tiadeni naqui pocca cacahuehedsa jai tijedsima-jerajaro –najari Jeso.

<sup>53</sup> Jesopa poccadeni ima huati taha jicadsapa najaro odsadsa toqquenadsa toccajari. Naraha jodiidenicca marinaja maridedeni pariseodeni tedsejepa poccadeni ima acconi huatideni jamimanajari. Nadsapa najaro huadadsa Jesocca ima tossamonijine ima idimamanadsa huada huajijiradsa pohuadsa ima onihidsa huati, ima onihidsa huati dsanapomanajari. <sup>54</sup> Jeso ima bica tejeranicca ecomeraniijine tohuini quinadsa pohuadsa huati huati dsanapomanajari. Pohuadsa ima inassonarimananijine disseraqquiri naraha Jesopa ima pajiranissa taniccara ehecomera najaro.

## 12

—Paji, pariseodenicca imassa tinanamana-jeraji –najari Jeso  
Mateo 10.26-27

<sup>1</sup> Isaraeri potemahi jodiodeni mota marinaja pariseodsa jehe quinajaridenipa Jesocca marinaja inassamomananijine disseraqquri naraha madija Jeso pocca marinajatohui queriqquidsapa denima tohuapi, denima tohuapi najari. Madija panahicca tohuapihi dsanapodsapa pohuadeni amori ahuaji ttai, ahuaji ttai quinajari. Naraha nahidsa Jesopa pocca dodosse tabaqquidsana tahide huati tapojari: —Pariseodenipa mamaisamana najari. “Dio Atti cacahuade iquejenani” quinaraha poccadeni marinaja Moisesicca marinajadsa inaharimanajaro. Poccadeni madie naqui Dio Attissa nejerani. Poccadeni ima najimehecca caji tani. Najaro poccadeni marinaja, poccadeni madie maidsehecca totojaribaqqui najaro. Pina pan ssaja tahijine quequejemacca imassa najaro. Paji, poccadeni imassa tinanamana-jeranijine dacoco tijiraji. <sup>2</sup> Nadsama madija huapima poccadeni maidsehecca imapi inajimamanaraha nidsa dsotodepi ahuate tanitohui. Ima ahuate tanicca huapimapi ahuate manitohui. Aji ima bicani ahuate tanidsa inanamanajaro, aji ima bica tejeranicca ahuate tanidsa inanamanajaro naqui ahuate tanitohui. <sup>3</sup> Nadsama dsome ima huati huati tiquinadsa naqui nidsa dsotodepi ssiajanidsana ticcadeni imapi ahuate tanitohui. Odsa coba canahuajanini bodidsa ima ojidsa huati huati tiquinadsa naqui dsotodepi amossinihuajina madija huapima mittamanahijine ticcadeni ima madija ohuahana jadsirema ecomeramanitohui, onajaro –najari Jeso.

—¿Nejecojaridsara ticappinamananijine? –najari Jeso

*Mateo 10.28-31*

<sup>4</sup> —Nadsama otessedeni, ohuatti tecomeraridsamanadsa ticcadeni madiepi pina occa marinajassa tinamanadsapi madija ohuahadenipa tiadenidsa: “Jicana, jicana” quiquinadsapa ticappinama tejerana. Madijapa tiadenidsa: “Jicana” quinadsapa timedeni jicanijine pajiramanaraha tijicani nattinipi tiadeni tonajidso-baqquipomahijine ssamoqquri nahi. Aji jororoni jiquejeranihuaji tiadeni hua todsimabaqquihijinepa ssamoqquri nahi. Nadsama tiadenipi pohuadenidsa ticappinama-jeraji, onajaro. <sup>5</sup> Naraha Diodsana ticappinamanaji. Pohuapa: “Tijicaji” nadsapa tijicanitohui. Najarina tijicani nattini naco tiadeni tonajidso-baqquihijine nahato tajari. Pohuapa aji jororoni jiquejeranihuaji tiadeni hua todsimabaqquihijine naco nahato tajari. Madijadsapi ticappinama tejeraji naraha Diodsana ticappinamanaji, onajaro –najari Jeso.

<sup>6-7</sup> —Diopa madija huapimacca ima nahato tajari. Aji titatideni conani huapima onini huade naco nahato tajari. Diopa dsama huapimacca cacahuade nahato tajari. Ajina: “Ppiriri mitta onana” tiquinadsapi ppiriri da da quinahihuaji dsiniro bedenidsa ppiriri mitta mitta titiquina najari. Ppiriri 5 nahapa ccarara capamehedsa mitta mitta titiquina najari. Naraha ppiriripa huati ccarera tahiccaraha Diopa ppiriri naco ecahuabaqquijari. Ppiriri naco pohua dsoqquehicca huada bacco tejeraccadsapi dsoqque-jaraccahi. Nadsama tiadenipi ticappinama tejeraji, onajaro. Ppiriripa ajamani toquejenaraha Diopa pohuadeni ecahuabaqquijari. Naraha Diopa tiadenidsana denima huati huana tajari. Tiadeni tohuacahua-baqquihissa tahitohui, onajaro –najari Jeso.

*Madija ohuahadeni mittamanahijine: —Ohuapi Jesocca ojani –quinajarideni tahimarideni*

*Mateo 10.32-33; 12.32; 10.19-20*

<sup>8</sup> —Nadsama ohuapi tiadenidsa huati onajaro: Madija ojariapa madija ohuaha mittamanahijine pohua cacomeradsa: “Ohuapi Jesocca madija ojani” nadsapa manaco ohuapi Madija Bedi ojajaroa Diocca dodosse tabaqqui memehujicca mittamanahijine pohuadenidsa ohuacomeranitohui: “Ajajari madijapa occa madija tojahi” onanitohui. <sup>9</sup> Naraha madijapa madija ohuaha mittamanahijine pohua cacomeradsa: “Ohuapi Jesocca madija ojajerani” nadsapa manaco ohuapi Diocca dodosse tabaqqui

memehuaicca mittamanahijine ohuacomeranitohui: “Najaripa occa madija jarahi” onanitohui –najari Jeso.

<sup>10</sup> —Aji ohua Madija Bedi oजारodsa madija atti atti quinadsa ohua itamassomanaraha nidsa dsotode: “Icca ima inebona” quinadsapa poccadeni imasiri, poccadeni tamassohue Diodsa ecomeramanadsa Diopa poccadeni imasiri epeje inananitohui. Naraha Dio Corime itamassomanadsa, pohuajine toजारodsa maidsehe huahua quinadsa naco Diopa pohuadeni atti huati ajama-jarahitohui. Poccadeni imasiri epeje inana-jeranitohui.

<sup>11</sup> —Naraha jodiopenipa nidsa otahimari tiadenidsa toजारo acconi huadimanadsapa poccadeni Dio Atti mamarihuaji tiadeni tohuagquedsimabaqqui-manahitohui. Tiadeni tonajidso-baqquimanahijine ima cacattenedenihuaji, taminedenihuaji naqui tiadeni tohuagquedsima-baqquimanadsapa ticcadeni ima tecomeramananijine ¿nejecoma onapadseje? tiquinejerana. Occa marinaja tecomeramananijine naqui ticappinamana tejerana. <sup>12</sup> Nani pohuadeni tedsejema terimanadsa huati tiquinanjinepi Dio Corimena tiadeni tonahattabaqquihitohui, onajaro –najari Jeso.

*—Paji, tidsepetaji tohuapinijine tohuira tibodideni huato-jeraji –najari Jeso*

<sup>13</sup> Nadsapa aja madija panahicca ojaría Jesodsa huati tajari: —Mamaride, occa atodsa huati tinaji. Aja occa abi dsoqquejari dsepetajibote mota ohuadsa pohuadsa nanijine. Occa atodsaha ojari nani –najari. <sup>14</sup> Naraha manaco Jeso attipa: —Otesse, ohuapi ticca abi dsoqquejari dsepetajibote ticca atodsa, tiadsa nanijine cacahuade ojajerani –najari Jeso pohuadsa.

<sup>15</sup> Nadsapa Jeso huapimadsa huati tajari: —Paji, todsepetaji acconi tedimana tejeraji. Tibodideni tecahuamanaji, aji tidsepedeni tossenijine tohuira tibodideni huato-jeraji. Najaro tidsepetaji huemadsa tetidsemanehe timadimanani ojari-jerani. Diotohuira timadimananina bica tajaro –najari Jeso.

<sup>16</sup> Nadsapa Jeso pohuadenidsa ajijaro namidsa imadinicca ima huati tajari: —Madija dsepe sse tajari nami bicani cajidsapa pocca huidsajacca porede toquejenadsapa huemahi pore pore quiquinanajari. Aroso jidsadsa trigo mota totoja najari. <sup>17</sup> Nadsapa dsepe sse tajari bodipa: “¿Nejecoma onanijine? Occa huidsajacca trigo mota cacahuahijine odsa onihi ocappirani” najari. <sup>18</sup> Nadsapa pohua bodi huatojari: “Jehe jidapanana nahato onani. Occa trigo huadsaridsajaricca odsara otaboridsadsa denima ojine odsa motaraqquiri naridsana. Nani najarodsana occa trigo, aja huapima ocajjaricca ohuacahuaridsahijine” najari. <sup>19</sup> Pohua bodidsa naco: “Nadsapi aji ohua otahimari huati onanijine: Jehe, jidapapi sse onani. Huajano huapi taha omadinijine opajirani. Jehe, nadsapi pina jassi onana. Pina ojipa, dse onajaro ohuatidseri ohuatidseri naridsana, onanitohui” najari. <sup>20</sup> Naraha Diopa pohuadsa huati tajari: “Tiapi ssamo tinani. Ajijaro dsomedsa tidsoqquenitohui” najari. “Aja tidsepetaji, aja huidsajacca bonoma tecahuaridsajaripa tidsoqquedsapi ¿tiadsa nama dsanapopadsaja? ¡Nohuerahi! Tidsepetajipa madija ohuahadsana tojaridsahitohui” najari Dio. <sup>21</sup> Imapi nema najaro madija pohua tonanabicahijine todsepetaji inehemaraha Diodsapa pina cappirajarissa najari, Diodsa huatidse-jaradsa –najari Jeso.

*Dio pocca ejedeni ecahuabaqqujari*

*Mateo 6.25-34*

<sup>22</sup> Nadsapa Jeso pocca dodosse tabaqquidsa huati tajari: —Tiadenidsa ohuattipi: Timadimananijinecca ticappiramanani noppineni ticappinamana tejeraji, onajaro. Pina ¿nejecora ojipapadseje? ¿Nejecora ohuedsapadseje? tiquinejeraji. Najarotohuipi tibodideni huahuatomacca nejerana, onajaro. <sup>23</sup> Icca madiepi dsamatapaha



ojari-jarahi. Icca madiena denima bica tajaro. Essire naqui etero edsanijinea ojari-  
 jerani. Essirecca imana denima bica tajaro –najari Jeso. <sup>24</sup> —Jari, tosicocca imadsa  
 tibodideni huatoma-manaji. Tosicopi huidsajacca ppa nahi pperagquiri, huidsajacca  
 ppa nahi bono poreraquiri nadsapi nidsa dsotode jipamananijine ppa nahi bono  
 naco odsadsa ecahuamana-jarajari. Naraha Diona ponidenidsa jipamananijine da  
 da ihinanajari. Diopa tosicodenidsa huati huana taraha tiadenidsana denima  
 huati huana tajari. Tiadenidsa naco tijipamananijinecca da da ihinanahitohui.  
<sup>25</sup> Naraha tiadenipi ¿nejecotohui tibodideni: ¿Denima omadi-dsanapopadseje?  
 tiquinajaro? Najarotohui tibodideni huahuatomacca nadsapi ¿ticcadeni madie  
 denima tinanamananijine nahatoquiri tiquinaqui? ¡Nahatoquiri tiquinejerani!  
<sup>26</sup> Najaro nahatohue ssamoquiri tiquinara Diodsapi najora tani. Nadsama  
 ¿nejecotohui ima onihitohui, ima onihitohui tibodideni huahuatoma najaro? Pina  
 Dio tiadeni tohuacahuabaquijarajarissa najari. Naraha “Jehe, Diona nahato tahi ia  
 cacahuabaquihitohui” tiquinana, onajaro.

<sup>27</sup> —Jari, qqui tiquinanaja mohue ppata taridsajari. Naraha mohuepa tarabaidsera,  
 huepe picocora, etero ssequiquira taraha ppata taridsadsapa pina etero bicani hued-  
 samanajarissa najari. Ajana maittaccadsama naco Isaraeri potemahidenicca tamine  
 Saromopa dsepe ssejide radsapa etero bicani huatini ccara tanicca huedsadsapa  
 bica tataja naraha mohuena denima bicaquiri najari. <sup>28</sup> ¡Jaho, ticcadeni jehenijipi  
 badsira tani! ¿Nejecotohui tiadenipi “Dio ia tohuacahua-bagguihi” tiquinejerani?  
 Ajina, dseropi etero huedsanijine cappiraraha Diojine poni mohueni cajidsapi  
 pina etero bicani huedsajarossa nani. Dseropi mohueni cajini bica taraha huada  
 huada huada nadsa dseqqueri nadsapi botta ina tani. Naraha dseropi ajimanicca.  
 Tiadenipi pina aji dserossa tiquinejerani, Diocca cacatidse tabaqqi tiquejenajaro.  
 Nadsama Diopa tedsamananijinecca etero naqui denima tiadenidsa da inanitohui,  
 onajaro. <sup>29</sup> Naraha tiadenipi ticappinamaneri naridsa-jeraji. “¿Nejecora ojipa-  
 padseje? ¿Nejeco dsamatapa ppejenera dse onapadsaja?” tiquinejerana, onajaro.  
<sup>30</sup> Ajijaro dsamacca madija Diods toquejena-jarajarideni huapimapa nama nama  
 nanaridsamana najari. Poccadeni jijipa tohuira pohuadeni dsepetaji tohuira bodideni  
 huahuatoma-mana najari. Naraha tiadenipi Abi bicahi ticajimanani. Pohuapa  
 ticappiramananicca huapima nanahato najari. <sup>31</sup> Diocca cacahuehecca imadsa  
 tibodideni huatomaridsanijine Diotohuira tataridsamana naji. Nema tiquinadsana  
 Diojine ticappiramananicca tiadenidsa inanaridsanitohui, onajaro –najari Jeso.

—*Memehuaji Dio madihidsa ima bicanira tinahapimanana –najari Jeso*

*Mateo 6.19-21*

<sup>32</sup> —Nadsama tiadenipi occa edede, occa cacacahua tabaqqi tiquejenajaropi  
 ticappinamana tejeraji. Aji tiadeni ohuacahua-bagquijaropi tipamema naraha  
 occa Abipa tiadenidsa: “Aji occa cacahuehepi tiadenidsa onanajaro” najari.  
<sup>33</sup> Nadsama ohuatti tiadenidsa ajima najaro: Tidsepedenitaji manaconitohui da  
 tinaridsamanaji. Najaro manaconi dsiniropi madija cappiramanajaridenidsa da  
 tinabaqqi-ridsamanaji. Aji tidsepedenitaji, dsiniro naqui ¿nejecodsara techua-  
 manadsa ticajimana-dsanaponijine? ¿Aji dsiniro dsamini totabaccorarera tanicca caji  
 taqui? Nohuerani. Naraha cappiramanajaridenidsa da tinabaqquiridsa-manajaropi  
 pina memehuaji aja Dio madihidsana ima bicani tiadenidsa tinahapimanapojarossa  
 najaro. Najaropi Diocca daniji bicabote jiquejeranicca tiadenidsa da inanitohui.  
 Najaro Dio pocca danijidsapa bobotide botihijine nohuerahitohui, poni maccanijine  
 naqui ssari nanijine nohuerani. <sup>34</sup> Ajina, tiadenipi ajijaro namicca todsepetaji  
 tohui, dsiniro tohuira timadimaneje nadsapi najarodsara tetidseridsamanajaro.  
 Naraha Dio Pohua tohuini nahicca tohuira timadimanadsapi Diocca danijidsana  
 tetidsemananitohui, onajaro –najari Jeso.

*Ia Medsede ccanipomahitohui inajorehe imadinijinecca ima*

*Mateo 24.43-44*

<sup>35-36</sup> Jesopa pohua ccaronapomahitohui najoramanahijine mari icanabaqquijari. Pohua attipa: —Tiadenipi tinajoramanaji, pina madija pohuadeni medsede caji-cajicca ejetehuaji toccadsa “dsome bacco nanihitohui” quinadsa poccadeni etero huedsamana, jojororo iquehessimana nadsa najoramanajarissa tiquinaji, onajaro. Ajana pocca dodosse tabaqqui pohuatohui najoramanadsa bacco nanidsapa nocco-bijidsa coba coba nadsa amadsati icatabojidsamananitoahui. <sup>37-38</sup> Dsome nocconi bacco nanihitide, ssiajajonadsa itide ssamoqquiri naraha noccodeni bissadsa pohuadeni medsede bacco nanidsapa pohuadenipa ima bicani cajimanahitohui. Pajissara tiadenidsa huati onajaro: Pohuadeni medsede pohuadenidsa huatidsedsapa: “Huahuanaridsa jassi tahuajaniji” nahitohui. Nadsapa jipamanahijine pohuana taparideni dsojo dsojo nahitohui, pina poccadeni dodossessa nahijine.

<sup>39</sup> —Nadsama tiadenipi ajijaro imadsa tibodideni huatoji: Odsa jinedepa bobotide ccajonahijinecca maji nahato tapodsapa pocca odsadsa botide qquedsima-jarahijine pocca odsa ecahuanissa tanitohuiraha ssamo taja najari. <sup>40</sup> Naraha tiadenipi tinajoramanehe timadimanaji. Madijapa ohua Madija Bedi ojajaroa occaronapomanicca huada ssamoqquiri nahi. Nidsa huatideni ajamama canadsa bacco onanipomanitohui –najari Jeso.

*Madijacca dodosse ibora tadsapa ima bicani cajihitohui, tabaccora tadsapa nanajidso tojahitohui*

*Mateo 24.45-51*

<sup>41</sup> Nadsapa Pedro huati tajari: —Ia Maride ¿aji titohui inajorehe imadinijinecca ima huati huati tinajaropi iadsaha ojarinijinequi? ¿Madija huapimadsarane? –najari.

<sup>42-43</sup> Nadsapa Jeso pohuadenidsa ima onihi huati tajari: —Madija dsepe ssebotepa huaji tani toccahijine najoradsapa pocca dodosse ojariadsa huati tajari: “Occa madija tecahuabaqquina. Jipamanahijine bacco tadsa pohuadeni tapari da da titinabaqqui nana” najari. Nadsapa dsepe ssebote toccajari.

—Nadsapa pocca dodosse nahato tadsa, ibora tadsapa madija ecahuabaqquihissa tahitohui, pina pohua dossede attissa inananitohui. Nama nadsapa dsepe ssebote ccanidsa qqui tadsapa pocca dodossedsa ima bicani inananitohui. <sup>44</sup> Nadsapi pajissara tiadenidsa huati onajaro: Madija dsepe ssebotepa pocca dodosse ibora tajaridsa ajama nahitohui: “Tiapi occa odsa, occa huidsaja, odsepetaji huapima tecahuaji” nahitohui –najari Jeso.

<sup>45</sup> —Naraha dsepe ssebotecca dodosse tabaccora tadsapa pohua dossede attissa inana-jeranitohui. Pohua bodi attipa: “Ohua dossede ccanihijine najoccahi, qqui tajarahi” nahitohui. Nadsapa pohua dossedecca dodosse tabaqqui maqquideje inajidsobaqqui, amoneje inajidsobaqqui nahitohui. Jipadera ccaridsadsa coma tanicca dse dse naridsadsapa comani ahahua nahitohui. <sup>46</sup> Pocca dodosse tabaccorabotepa pohua dossede ccanihicca maji, huada ssamo tadsa pohuatohui najora-jarajari. Nama nanaridsa nanaja dsepe ssebote bacco nanidsapa pocca dodosse inajidsohuitohui. Dsoqquedsapa iboqquri najaridenihuaaji inananitohui –najari Jeso.

<sup>47</sup> —Jehe madijapa pohua dossede atti nahato taraha pohua attissa inananijine ibo tadsapa nanajidso inananitohui. <sup>48</sup> Naraha madija ohuahapa pohua dossede atti ssamo tadsapa pohuajine bica tejeradsapi cossi cossi inebo nahitohui. Jehe, Dio naco madijadsa dosse dosse najari. Pocca dossenijissa inanadsana bica tani. Diopa iadsa: “Occa madija tecahuabaqquina” nadsa pocca madija ecahuabaqquihissa tadsana bica tani –najari Jeso.

*Jesojinepa madija pohuadenira pohuadenira naridsamanajari*

*Mateo 10.34-36*

<sup>49</sup> —Nadsama ajijaro namidsa occaronajaropi pina dsippo diji tajarossa onanadsa madija huapimadsa ssonariridsanijine. Nidsa imasiri manaconi ojanijinepi Diocca najidsohue madijadsa ssonariridsanitohui. Jaho, najaro ima jidapana ohuadsa toja naccaraho, onajaro. <sup>50</sup> Aji ohua imasiri manaconi ojanijinepi najidsohue imeni onahanaccanitohui. Najaro imapi nahato onaraha najaro ima ohuadsa toja-jeraccadsapi aji nacassera onajaropaji. <sup>51</sup> Tiadenipi tibodideni: “Jehe, Jesopa ajijaro namidsa jonehe tojaridsanijine ccajonajari” ¿tiquinajaroqui? Naraha ohuapi najarotohui occajona-jerani. Madija motapa ohuadsa jehe quinajari, madija motapa ohuadsa jehe quina-jaradsapa pohuadenira pohuadenira naridsamanahitohui. <sup>52</sup> Aja jidapana naco odsa cajariecca madija 5 quinajari pamahapa pohuadenira, huatimade tojari najaripa pohuadenira quinajari. Nama quinajaripa cahadire cahadire naha nama dsanapomanahitohui. <sup>53</sup> Nadsama ojine madija pohuadenira pohuadenira quinadsapa ajima nanitohui: Dsabissopa imehidsa huahuadi nahitohui. Imehipa bedidsa huahuadi nahitohui. Imenipi bedenidsa huahuadi nanitohui. Bedeni naqui imenidsa huahuadi nanitohui. Massodinipi jinomadindsa huahuadi nanitohui. Jinomadini naqui massodinidsa huahuadi nanitohui –najari Jeso.

*Meme qquide nahatoqqiri naraha pohuadenidsa ima dsati tojani qquide ssamoqqiri najari*

*Mateo 16.1-4; Maraco 8.11-13*

<sup>54</sup> Jesopa madija huapimadsa ima denima huati huati tajari: —Maji toccahiuaji meme essen caji tani qqui tiquinadsapi: “Passo ccabote nani” titiquina najaro. Nadsapi nema neneje najaro. <sup>55</sup> Dsama napicossanihuajicca jojode jojo najonani qqui tiquinadsa naqui: “Icca dsamadsa ppocoranitohui” titiquina najaro. Nadsapi nema neneje najaro. <sup>56</sup> Jaho, tiadenipi pina maidsajidede rabotedenissa tiquinajaro. Meme qquide nahatoqqiri, nami qquide nahatoqqiri tiquinaraha aji jidapanacca ima dsati tojaropipi qquide ssamoqqiri tiquinani. Najaropipi Djine ajijaro dsamadsa Cristo-Mesia pohua dsepe ijiridsahi tiadenidsa ahua to taraha ticahattera-jerajaro –najari Jeso.

*Aja tia huadidepa huati tinassonapona nanicca ima*

*Mateo 5.25-26*

<sup>57</sup> —¿Nejecotohui tiadenipi ima bica taniccara ticattejidsamana-jerajaro? –najari Jeso. <sup>58</sup> —Nadsama madija ohuahadsa ima tinanadsa naqui pohua attipa: “Tia ohuaccana ima cacattemahuaji” nadsa naco tahide tia tohuacca-jaraccadsama pohua tedseje ticcadeni ima ticattemamanapoji. Pohua huati tinassonapojo, nahi taminehuaji tia tohuacca-jarahijine. Ticca ima ticattemamanapo-jeradsapi ima cacattemahuaji bacco tinadsapi ima tinanajaro manaconi todsepe tjanitohui. Toponi cocorohuaji tia coro idsimamananitohui. <sup>59</sup> Tiadsa huati onajaro. Nani toponi cocorohuaji timadidsapi amadsati tiqquena-jeranitohui. Ima tinanajaro manaconi nemaneha tinajicanissa tadsana tiqquenanitohui –najari Jeso.

## 13

*Tibodideni cacajiquimera-jeradsapi tijicaridsanitohui*

<sup>1</sup> Jeso mari mari naraha madija jahijonajaridenia aja tamine Pirato dsama Carireacca madija inajicajaricca ima Jesodsa huati toquinajari: —Carireacca madijapa Jerosarehuaji Diodsa dada toqquimadsa poccadeni da naqquinaja iaqquedsima-manajari. Bani ette tojahicca Diodsa da quinahijine ssipori huisside toquejenaraha tamine Piratocca dodosse tabaqquideni bacco todsimamanadsapa ijinedeni ahua-manajari. Pohuadenijine bani bedi dade toquejenajari emenedeni bani bedi emene tedseje quejemajaro –quinajari Jesodsa.

<sup>2</sup> Naraha manaco Jeso pohuadenidsa huati tajari: —Tettidenipi: “Carireacca madijapa imasiri sseqquiri nadsa oppina tanidsa jicajari” ¿tiquinajaroqui? Aja “Carireacca madija motapa imasiri badsira tehe cajimanadsapa pohuadenidsa ima oppina tehe bacco nejerajaro” tiquinanitidija. <sup>3</sup> Naraha imapi nema nejerani. Tiadeni huapima Dio Attidsa ibobo tinadsa tibodideni cacajiqquimera-jeradsapi dsoqqehe jiquejeranicca bacco tiquinanitoahui –najari Jeso.

<sup>4</sup> —Ima onihi naqui ajima najaro: Jerosaredsa passojine hui todsani onini Siroe inorinidsa siba hua nahuajanijaro tirocossadsa madija 18 naha jicajari. Najaridenidsa naqui tettidenipi: “Imasiri sseqquiri nadsa oppina tanidsa jicajari” ¿tiquinajaroqui? Aja “Jerosarecca madija motapa imasiri badsira tehe cajimanadsapa pohuadenidsa ima oppina tehe bacco nejerajaro” tiquinanitidija. <sup>5</sup> Naraha imapi nema nejerani. Tiadeni Dio Attidsa ibobo tinadsa tibodideni cacajiqquimera-jeradsapi dsoqqehe jiquejeranicca bacco tiquinanitoahui –najari Jeso.

### *Ahua iquiera bono-jarahicca ima*

<sup>6</sup> Jesopa ajijaro namidsa imadinicca imadsa mari icanabaqquijari, madijadeni bodi cacajiqquimera-jeradsapa jicahi noppine bodideni huatohuijine. Pohua attipa: —Maqquideje ojariapa pocca huidsajadsa ahua iquiera ppa todsahi huajari. “Nanihuaji occana, ahua iquiera bono cajihitide” najari. Naraha nahihuaji bacco tadsapa bono cahua najarajari. <sup>7</sup> Nadsapa huidsaja cacahuadedsa huati tajari: “Huajano tahideccadsa qquide occajona, huajano dsotodeccadsa qquide occajona, jidapana naqui qquide occajona naraha bono qqui onajaraha. ¡Ca tinajo! Pohuama nahidsa hua dsanapona onejerani” najari. <sup>8</sup> Naraha huidsaja cacahuadepa manaco huidsaja jinededsa huati tajari: “Ohua medse, ca inajaraccana. Ajari huajanodsa jabohuaji hui onahuajanidsa ahua huahuassa tadsajani ocanejemahijine” najari. <sup>9</sup> “Nama onanadsa bonohitidija. Naraha bono-jaradsana ca tahijine” najari huidsaja cacahuade –najari Jeso.

### *Jesopa jassinajacca huadadsa amoneje ideni jocadsajaro inanomijaro*

<sup>10</sup> Nadsama dsotodepa jassinajacca huadadsa Jesopa Dio Atti mamarihuaji toqquedsimadsapa madija mari icanabaqquijari. <sup>11</sup> Nanidsa naqui amoneje coma tajaro qquedsimajaro. Satanacca dodosse tocorimejine poni ideni jocadsajaro. Huanissa tanijine ssamo tani. Huajano 18 naha nema najonajaro. <sup>12</sup> Naneje Jeso qqui inadsapi poni ccajonanijine huahua najari. Bacco nadsapi: —Asi, ticca dsamacoma tomossini –najari Jeso.

<sup>13</sup> Nadsapa pohua dsepedsa bara inadsa amadsati ideni tobicajaro. Nadsa huanissa tadsapi huatidsedsa Diodsa jiri jiri najaro: —Jehe, Tiapi bica tinani, bica tinani –najaro Diodsa. <sup>14</sup> Naraha Jeso jassinajacca huadadsa madija inanomidsapa Dio Atti mamaricca tamine jipera tajari. Aja jodiodenipa: —Jassinajacca huadadsa madija dsepedeni ijimanahijinepa oppina tani –quiquinanajari. Nadsapa Dio Atti mamaricca taminepa huadi tadsa madija queriqquimanajaridenidsa huati tajari: —Huada 6 nehe idsepe ijini bica tani. Najaro huada 6 nehe ticanomirenijine jai tijedsimaji. Naraha jassinajacca huadadsa toponi totonanomidetohui jai tijedsima tejeraji ¡poni! –najari Dio Atti mamaricca tamine atti. Pohua atti nama nadsapa Jesodsa ima inanajaro. Jassinajacca huadadsa madija inanomibaqquidsapa pina pohua dsepe ijijarissa najari.

<sup>15</sup> Naraha Jeso taminedenidsa huati tajari: —¡Mamaidsadedeni, ponima huati tiquinajaro! ¿Jari, tiadeni naqui ticcadeni bohui, ticcadeni bojo, ticcadeni odsadsa ssoque ssoque dsaneri naridsadsapa jassinajacca huadaraha madone dicca tiquinadsa passo dse quinahijine passohuaji joca joca titiquina nejeraqui? Najaropi jassinajacca huadadsa tidsepedeni ijimana tani. Naraha: “Najaropi icca bohui nomiqquiri

nahijine, oppinera tani” titiquina najaro –najari Jeso. <sup>16</sup> —Nadsapi jassinajacca huadadsa ticcadeni bohui tecahuabaqquidsapa aji amoneje jassinajacca huadadsa onanomidsa naqui oppinera tani. Ponipi Abarahao potemahije najaro pina tiadenissa naraha ponipi huajano 18 nehe tabaccorehe jinede Satanajine ideni siri tojehe madijaro. Ponipi huajano huapi tahi coma tajaro. Satanapa pina poni ssoque idsanajarossa najaro. Nadsama jassinajacca huadadsaraha ponipi Satana ssoque idsanaraha tappa inanijine bica tani, onajaro. ¿Naraha tiadenidsapi bica tejeraqui? –najari Jeso Dio Atti mamaricca taminedenidsa huati tajari.

<sup>17</sup> Ima nema najaro huati tadsapa pohuadsa huadiqquiri najarideni cappinamanajari. Naraha madija motapa amoneje tonomini qqui toquinadsa Jesocca nahatohue bicani, deni tojanicca qqui toquinadsapa huatidsemanajari.

*Jesopa mostaza noccocca ima tadsajani mari icanabaquijari*  
*Mateo 13.31-32; Maraco 4.30-32*

<sup>18</sup> Nadsama najaro ima jicadsa Jeso attipa: —Tibodideni huatomanaji. ¿Nejecoma najarona paji Diocca cacahuehe? Aji Diocca cacahuehe tahimarini timittamananijinepi ajijaro namidsa imadinicca ima onihidsa tiadeni mari ocanabaququina –najari Jeso madijadenidsa huati tadsa. <sup>19</sup> —Diocca cacahuehepi pina mostaza noccossa najaro. Mostaza noccopa potera taraha madija huadsajadsa ppa idsadsa napidsapa pina ahua imehissa najari. Motaradsapa pohua ininedsa ppiriri pohuadeni tadsari bina tarimana tahi. Jehe, Diocca cacahuehecca ima mari ocanabaquijaripa pina najaro imassa najaro. Tahidepi madija pamahadsa tojapojaro. Dsotodena madija huapimadsa tojaridsadsapi Diocca cacahueheda madija tohuapihitohui –najari Jeso.

*Jesopa pan ssaja tahijine quequejemacca ima tadsajani mari icanabaquijari*  
*Mateo 13.33*

<sup>20</sup> Jeso huati tapomajari: —Aji, Diocca cacahuehecca ima timittamananijine ima onihi tadsajani tiadenidsa huati onana. <sup>21</sup> Diocca cacahuehepi pina pan ssaja tahijinecca imassa najaro. Amonejepi pan inahatohuijinepa pan ssaja tahijine quequejema oni levadura aja trigo ria nahidsa ijine icanejemajari. Ssaja tahijine quequejema badsira taraha trigo ria nahi harina 3 kilopa motarajari. Naraha ssaja tahijine quequejema trigo ria nahi harinadsa tojaribaqquidsapa ssaja tajari. Aji Diocca cacahuehecca ima naqui najaro imassa najaro. Tahidepa madija pamaraha dsotodena Diocca cacahuehecca ima dsama huapimadsa tojaribaqquidsa madija huapimadsa tojaridsajaro –najari Jeso.

*Noccobiji tohuabaccadsa jai tijedsimanijine tinajomana tejeraji*  
*Mateo 7.13-14, 21-23*

<sup>22</sup> Nadsama Jesopa Jerosarehuaji pocca benehidsa toccadsapa odsa panani onihidsa, onihidsa mari icanabaquija dsanapohui najari. <sup>23</sup> Madija mari icanabaqquidsapa nahicca madija ojaría pohua bodi huatodsa Jesodsa huati tajari: —Ohua Medsede ¿madija tocassiejerahijine naco ipama najaroqui? –najari Jesodsa.

Nadsapa Jeso atti huapimadsa: <sup>24</sup> —Dacoco tijiraji. Noccobiji tojera tanihuaji jai tijedsimanijinepi tinajomana tejeraji. Aji occa imadsa jehe tiquinanijine Diocca cacahueheda tiquejenanijine naqui tinajomana tejeraji. Tiadenidsa ohuattipi ajima onajaro: Nidsa dsotodepi madija huapi taha: “Jaijedsimana, Jesodsa iquejenana” quinahitohuiraha ohuadsa toquejenahijine pajiramana-jarahitohui, onajaro. <sup>25</sup> Tahide ohuadsa jai tijedsima-jeradsapi nidsa dsotodepa odsa jinede najoradsa totehema, noccobiji ecossani nadsapi jai tijedsimanijine ssamo tanitohui. Nadsapi amossinidsa tidomo huadsa noccobijidsa coba coba tiquinadsa odsa jinededsa: “Noccobiji iadsa ticatabojidsaji” tiquinaraha pohuapa: “Tiadenipi ¿nejecohuajicca tiquejenani?” nahitohui tiadenidsa. <sup>26</sup> Nadsapi ima huati ticadsanamananitohui:



“Nadsa timadidsama ia qqui tinabaqquide. Tiadsa ijipaqquidsa ocaassa tanicca naqui dse inade. Icca odsa boronidsa naqui ia mari ticanabaqquide” tiquinanitohui, onajaro. <sup>27</sup> Naraha odsa jinedepa manaco tiadenidsa huati tahitohui: “Naraha ohuapi jai tijajonanihuaji ssamo onani. Tiadenipi jidsaqquri tiquinani” nahitohui. “Imasiri ticajimanadsapi ohuadsa timadimana-jeraji. ¡Ajicca jai tijaji!” nahitohui, onajaro.

<sup>28</sup> —Nadsapi Diocca cacahuehedsa huati tinadsa ticattomama canadsapi ticcadeni idideni Abarahao, Isahaca, Jacobodenipa, aja Dio Atti cacomeraqquri najarideni tedseje, huapima nahidsa madimanahi qqui tinabaqquimanaraha tiadenipi huahuat-tajo tiquejenanitohui. Tiadenipi ocasserani temanadsanapodsapi tipanodeni todsani nadsa oji oji tiquinanitohui. <sup>29</sup> Nadsapa dsama nemanehedsa madiridsamanajarideni naco Diocca cacahuehehuaji jahijonana canahitohui. Motapa Isaraerideni quejena-jararaha ohuadsa pajissa quinajarideni naco jahijonana canahitohui. Dio pocca cacahuehedsa queriqquimanadsapa pocca jipaqquiecca ejete imenidsa huahuanaridsa jassi nahuajanihitohui. <sup>30</sup> Nadsapa madija mota ajijaro dsamadsa madimanaccadsapa Dio Atti cajimanapojari. Naraha najarideni arobedeni motapa Diocca cacahuehedsa toquejena-jarahitohui. Madija ohuaha naco ajijaro dsamadsa madimanaccajari-denipa Dio Atti cajimanapo-jarajari. Naraha dsotodena Dio Atti pohuadenidsa bacco tadsa pohuadeni motapa Diocca cacahuehedsa toquejenahitohui –najari Jeso.

*Jesopa Jerosarecca madijatohui oji oji najari*  
*Mateo 23.37-39*

<sup>31</sup> Jeso huati huati taja naraha jodiodeni marinaja onini pariseodsa jehe quinajarideni bacco najonamanadsa pohuadsa huati toquinajari: —Ajidsapi timadi tejeraji. ¡Ajicca ticcaji! Tamine Herodepa: “Tia onanadsoqquena” nahi –quinajari Jesodsa.

<sup>32</sup> Naraha manaco Jeso pohuadenidsa pohua cacomerajari: —Najari dsomaji huadibotedsa huati tiquinaji: “Jeso attipa ajama nahi” tiquinana. “Tibodi huatoji. Jidapana, dsemassa naqui, madija bodidenicca tocorime dosse onineridsa-baqquihitohui, madija tocanomirehijine. Comaqquri najarideni naco onanomibaqquihijine. Huada onihidsana odsepe jicanitohui. Najarotohui occaronajarode nadija” tiquinana Herodedsa –najari Jeso. <sup>33</sup> —Nema nehe nani occanitohui. Occa imapi najorapode. Jidapanapi ajidsa odsepe ijiccani. Dsemassana denima occanitohui. Huada ssiajapi denima occapomanitohui. Huada onihicadsa naqui nema odsanapojaroa Jerosare bacco onanitohui. Aja Dio Atti cacomeraqquri najarideni naco Jerosarehuajina jijicamana najari. Odsa onihihuaji odsoqqueniinepi bica tejerani –najari Jeso.

<sup>34</sup> Nadsama Jesopa odsa panani Jerosarehuaji madimanajaridenicca ima huati tajari: —Ohuapi titohuideni oji oji onadsapi: “Jerosare, Jerosare” ohonanajaro. Maittaccadsama ticcadeni idideni madimanapodsapa naco Dio Atti cacomeraqquri najarideni inanadsoqqe-ridsamanaja najonapohui najari. Diopa pocca dodosse tabaqqi tiadenidsa dosse dosse inajonabaqquiporaha sibadsa tiquinabaqquimanaja najonapohui najari. Naraha ohuapi tiadeni ohuacahuabaqquina, onajaro. Pina tacara poni bedi poni appani dopanidsa ecahuabaqquijarissa onanijineraha tiadenipi ohuadsa jiperaqquri tiquinajaro. <sup>35</sup> Tetideni huatoji. Diopa tidsamarideni Jerosare inebonitohui. Tiadeni tohuacahuabaqqui-jarahitohui. Ohua naqui ohua qqui timanimanapoma-jeraccanitohui. Nidsaranibote ima najoranissa tadsa occanipomadsana ohua qqui tiquinapomanitohui. Nadsana tettidenipi: “Jehe, ajaripa Dio onima ccaronajari. Pohuapa bica tahi, bica tahi” tiquinanitohui –najari Jeso.

## 14

*Jesopa madija jitemarojari inanomijari*

<sup>1</sup> Jassinajacca huadadsa Jesopa pariseodeni taminecca odsahuaji jipade toccajari. Nahidsapa pariseo ohuahadeni naco jipamanajari. Puhuadenipa Jeso inocodsamanajari: —Nidsa pocca ima dsori tadsapi pahuadsa ima inassonarinijine –quinajari. <sup>2</sup> Nahi Jeso tedsejemapa madija jitemarodsa coma tajari qquedsimajari. <sup>3</sup> Nadsapa Jeso najari qqui tadsapa pariseodenidsa, jodiidenicca marinaja maridedenidsa naco huati tajari: —Jari, Moisesicca marinajadsa, icca madijacca marinajadsa naqui jassinajacca huadadsa madija coma tajari inanomihipa “Oppinera tani” ¿tiquinaqui? “Oppina tani” ¿tiquinajarorane? –najari Jeso.

<sup>4</sup> Naraha puhuadenipa joma quinajari. Nadsapa Jeso madija coma tajari bara inadsa tonomijari. Nadsapa: —Ticcaniji –najari pahuadsa. <sup>5</sup> Nadsapa Jeso pariseodenidsa huati tapomajari: —Jari, tiadenipi jassinajacca huadadsa idsepe ijiniijine “oppina tani” tiquinaraha pina ticcadeni ejedeni itide, ticcadeni bohui itide passojine hui todsanidsa tossonippadsapa ¿joca timoranimana-jaraco? Naraha coma tajari onanomijaripa pina najaro imassa najaroa –najari Jeso.

<sup>6</sup> Naraha pariseodeni, jodiidenicca marinaja maridedeni Jesodsa ima inassonari-mananiijine tohuini quinadsapa puhuadeni cacomamanajari.

### *Jipacquiedsa jahidsimajaridenicca ima*

<sup>7</sup> Nadsapa nahi pariseodenicca taminecca odsadsa jipacquimanahijinepa deni toquejenajaridenicca huihuittari bica tanicca tohui icattejidsaridsa-manajaro. Puhuadeni bodipa: —Jehe, ohuana bica onani –quinahicca ima ahuato tanijine deni toquejenajaridenicca huihuittaridsa jassi tarijari. Nama naridsamanahi Jeso qqui tadsapa puhuadeni mari icanabaqquijari, ajijaro namidsa imadinicca imadsa.

<sup>8</sup> —Jari, tiadenidsa huati onana, timittamananiijine –najari. —Madijapa pina cacajirehijinecca jipacquie tojabote nadsapa tiadenidsa huahua nadsa jai tija tani. Naraha nanihuaji jai tijedsimadsa jassi tinariniijine huihuittari deni toquejenajaridenicca huihuittaridsa huittarimana tejeraji. Deni toquejenajaridenicca huihuittaridsa tittarimanadsapi nidsa dsotode madija tiadenidsa deni tojjajari bacco nahitide. <sup>9</sup> Nadsapa odsa jinede tiadsa huati tahitohui: “Ticca huihuittaridsapa ajararina huittarina” nahitidija. Nadsa tibodi cappinadsapi ajamani toquejenajaridenicca huihuittaridsa tittarirana, onajaro. <sup>10</sup> Naraha ticca ima bica tanijinepi madija pahuadsa tijipanijine titohui huahua nadsa aja ajamani toquejenajaridenihuaji tittarinina bica tani. Nadsapa odsa jinede tia qqui tadsa: “A, otesse, denima bica tanihuaji tittariji” nahitohui. Nadsama aja huapima jassi nahuajanijarideni qqui toquinadsapa odsa jinede denima bica tanihuaji tia dosse tahitohui. Nadsapa: “Jehe, pahuapa denima bica tajari” quinahitohui tiadsa. <sup>11</sup> Najaro imadsana Diocca cacahuehecca madie ticahatteraniijine. Madijapa: “Ohuapi deni ojani” nadsa Diopa najari ajamani inahitohui. Naraha madijapa: “Epejena, ajimani ojani naqui bica tani” nadsapa najarina Dio deni inahitohui –najari Jeso.

<sup>12</sup> Jesopa marinaja onini pariseodsa jehe quinajaridenicca tamine Jeso pahuadsa jipahijine huahua najaridsa huati tajari: —Jehe, madija tiadsa jipacquimanahijine jipa tinadsapi titessedenitohui, timecotedenitohui, ticca madijatohui huahua tejerana. Tinocco jidsera tajaridenitohui, dsiniro sseqquiri najaridenitohui, najaridenitohuipi huahua tejerana. Manaco puhuadenipa tijipanijine tiadsa huahua quinahitohui. Nadsapi puhuadenidsa ima bicani tinanajaro manaconi ticajini. <sup>13</sup> Naraha madija tiadsa jipacquimanahijine jipa tinadsapi aja madija cappirajarideni, madija siri toquejenajarideni, aja madija isso sirideni, madija nocco sirideni, nama najaridenitohuira huahua tana. <sup>14</sup> Nema tadsapi tibodi tetidsenitohui. Puhuadenipa manaco tiadsa jipacquie inahatomananiijine pajiramana-jarahi, ssamoqquri najari. Naraha nidsa Diopa pocca madija inahatonibaqquidsana manaco Puhuana tiadsa ima bicani inananitohui –najari Jeso.

*Jesopa jipaqqie imenicca ima tadsajani mari icanabaqqijari*

*Mateo 22.1-14*

<sup>15</sup> Nadsapa nahidsa jipade jassi tarijarideni ojaria Jesocca marinaja mittadsapa Jesodsa huati tajari: —Nidsa Diocca cacahuehedsa madija toquejenadsa Diocca jipaqquinaja imenidsa jipamanadsapa Dio pohnadenidsa ima bicani inananitohui —najari.

<sup>16</sup> Naraha Jesopa pocca marinaja ajijaro namidsa imadinicca ima tadsajani pohnadsa huati tajari: —Jehe, madija dsepe sse tajaria: “Jipaqqie imeni onahatona” nadsapa madija huapi taha huahua inabaqqijari. <sup>17</sup> Jijipa najoradsapa jipaqqie jinede pohna tessedenitohui pocca dodosse dosse inajari, pohna tessedenidsa: “Ohua medsede atti: ‘Jijipa najorahi, jai tijajonaji’ napaja” nahijine.

<sup>18</sup> —Nadsapa pohna tessedenidsa huatide ccaridsaraha “Idsepe ijini” naridsamanajari. Pohnama huati toquinajari. Tahidecca attipa: “Ohuapi huidsaja tojanijine dsama mitta onajaro, najaro qquide occabote nani. Tia medsedecca jipaqquedsa occanijine opajira-jerani. Epejena, otohui timadi tejeraji” najari. <sup>19</sup> Nadsapa jipaqqie jinedecca dodosse madija ohuahadsa naco huati taraha najari naco: “Odsepe ijini. Occa bohui mitta odsati 10 quinajari ojine papamacosseri nadsa occa huidsajacca nami boto nanijine nattome onabaqquiccana, onajaro. Tia medsedecca jipaqquietohui occanitohuiraha odsepe ijini” najari. <sup>20</sup> Nadsa huahua inapojari ohuahadsa naco huati taraha najari naco: “Ohuapi oqqejerani. Tia medsededsa huati tinana: Aji ohuapi amoneje ocajidsatije najaro. Epeje, ticca jipaqquedsa oqquedsima-jerani” najari.

<sup>21</sup> —Nadsapa jipaqqie jinedecca dodosse toccanijari, poccadeni ima huapima huati tanijari. Jipaqqie jinedepa najaro ima mittadsa huadijari. Pocca dodossedsa huati tajari: “Nema nehe huassinaja odsa pananihuaji ticcaji. Nanihuajicca jahui onihni onihicca madijatohui qqui taridsaji. Aja dsinero cappiramanajarideni, madija siri toquejenajarideni, pina isso siri tojajari, nocco siri tojajari najarideni ahuaji teccanibaqquijo” najari. <sup>22</sup> Nadsapa dsotode pocca dodosse madija huapima eccanibaqqijari. Jipaqqie jinededsa huati tajari: “Jehe ohua medsede, tettissa onanaraha ticca odsapi cajinissa tejeraccani” najari. <sup>23</sup> Nadsapa jipaqqie jinede huati tapomajari: “Jari, jahui onihni odsa panani inidihuajicca jahui ticcaridsaji. Madija ohuahadeni teccanibaqquijo, jahidsimahijine. Occa odsa cajinijine, onajaro” najari. <sup>24</sup> “Aja madija huahua onabaqquipojaridenipa occa jipaqquedsa jai tojedsima-jarahitohui. Occa jijipa ecatamamana-jarahitohui” najari jipaqqie jinede —najari Jeso, Diocca cacahuehecca ima mari icanabaqquidsa.

*—Occa madija tiquejenanijine ajima tiquinana —najari Jeso*

<sup>25</sup> Nadsapa Jeso pocca benehidsa toccadsapa madija huapi taha pohnadsa jai tojamissajari. Nadsapa Jeso cattahuajanihi nadsa pohnadenidsa huati tajari: <sup>26</sup> —Madijapa ohuadsa tojahijine tohuini naraha pohnapa pocca madijadsana denima huati huana tadsa, ohuadsapa ajamani huati huana tadsapa najaripa occa tojahijine pajira-jarahi. Madijapa pocca abi, pocca ami, pocca amoneje, pocca ejedenideni naco, pocca ato naco, pocca asi naqui, pocca esodeni naco, ojari itide, huapi tahitide, ima onihni pina ohuattissa nejeranicca pohnadsa huati toquinadsa pohnadeni attidsana ibora tadsapa occa madija tojahijine pajira-jarahi. Occa madijapa ohuattidsana iboraqquri najari. Madija naco pohna pocca madiedsa denima huati huana tadsapa ohuadsa ajamani huati huana tajari. Pina ohuattissa inana-jeradsapi occa madija tojahijine pajira-jarahi. <sup>27</sup> Madija ohuadsa dissera tajaradsapa occa madija tojahijine pajira-jarahi. Occa madija tojahijinepa otahimarijine ocasserani inahanaraha nema nehe otahimaridsara dissera tajari. Pohnadsa: “Ahua porimacossanidsa tia

inanadsoqquena” quinadsa naco pohua attipa: “Epejena odsoqquena. Jeso onebo-jarahi” nadsapa najarina occa madija tojajari –najari Jeso.

<sup>28</sup> Jeso denima huati huati tajari: —Jehe, occa dodosse tabaqqui tiquejenanijinepi ponima “Jesocca ojana” tiquinejerana. Tahidepi tibodideni huato-mananissa tapoji. Pina ajijaro imassa najaro: Tettidenipi: “Odsa imeni nami macconi botta tanidsa ocanahatona” tiquinadsapi ¿nejecoma titiquinapo najaro? Jehe, tahidepi: “Odsa manaconipi ajima nanitide” titiquinapo najaro. Nadsapi: “Occa odsa cajicanissa tanijine ¿occa dsiniro pajirapadseje?” titiquinapo najaro. <sup>29</sup> Naraha tahidepi ticca odsa canahatonijine manaconi nattome tapo-jeradsapi dopanihuaajicca nami macconi botta tani hua inariridsamanajarodsara ticca dsiniro jicaqqunitidija. Najarods dsiniro jicadsapi ticca odsa cajica-jeranitohui. Nadsapi madija huapima tia jaja icanaqquimananitohui. <sup>30</sup> Attidenipa: “Ajajari madijapa odsa icanahatoraha cajican-issa tanijine ssamo tajari” quinahitohui –najari Jeso.

<sup>31</sup> —Nadsama ima onihipi ajima najaro: Tamine pamaha dsama onihicca dsama onihicca tedseje cahadirehijine poccadeni soldado tedseje najoraridsamanajari. Tamine ojariapa pocca soldado 10 mil naha cajijari, naraha tamine ohuahaccapa denima huapi tajari, 20 mil naha cajijari. Nadsapa aja soldado 10 mil naha cajijaripa aja tamine soldado 20 mil naha cajijari tedseje bacco tocanire-jaradsama ¿pohua bodipa nejecoma napopadsaja? Jehe, pohua bodi huatopohuitohui: “Ohuapi aja tamine soldado 20 mil naha cajijari tedseje icahadiredsapi ¿deni ojadpadseje? ¿deni ojajerapadseje?” nahitohui najari tamine. <sup>32</sup> Nadsama: “Occa soldado 10 mil nadsapa deni ojajeranitohui” nadsapa aja tamine soldado 20 mil cajijari jahijonahi huaji taccadsama pohuadsa ima dosse inajaro: “Icahadire-jerana. Ijicarana. ¿Nejecora tiadenidsa da inadsa icajoneranijine?” nahitohui –najari Jeso.

<sup>33</sup> —Jehe, ima najarossa najaroa tiadeni naqui occa madija tiquejenanijine tahide tibodideni huato-mananissa tapoji, onajaro. “¿Jesocca ojadsapi huapima oneborid-sanijine opajirapadseje?” tiquinaji. Aji ticajimanajarocca huapima tinebomananijine iboqquri tiquinadsapi occa madija tiquejenanijine tipajiramana-jeranitohui –najari Jeso.

### *Saho tahimarini*

#### *Mateo 5.13; Maraco 9.50*

<sup>34</sup> —Nadsama sahopi bica tani. Banidsa coro idsippadsapi ajibo tajaro. Aba jads-jarahijine naco sahodsa huira inajari. Naraha saho ajiboni tomossidsapi tomajidera tani, icca bani naco totabaccora tahi. Ajibo tapomanijine ssamo tani. Saho ajiboni tomossidsapi ponima tojajaro. <sup>35</sup> Namidsa huira inadsapi sahojine icca ppa nahi moro tajarahi. Ahua huassa tajaridsa quejemadsa naqui sahojinepi ppa nahi moro tajarahi. Nadsama saho ponima tojadsapi nebojaro. Najaro imapi pina tiadeni naqui ajijaro dsamacca madijadsa ima bicani tinanamanaridsajaro. Nema tidsanapomanana. Nema tinanamana-jeradsapi ticcadeni jeheniji ponima tojarana. Nadsama teribodeni ticajimanadsapi ohuatti timittamananissa taji –najari Jeso.

## 15

### *Edede amossi najari tahimari*

#### *Mateo 18.12-14*

<sup>1</sup> Nadsapa aja romanodenicca taminecca dosseniji dsiniro nanaccadedeni, imasiri sseqquiri najarideni tedsejepa: —Jesocca marinaja imittana –quinadsa Jesohuaji jahijonajari. <sup>2</sup> Naraha jodiodeni mota marinaja pariseodsa jehe quinajarideni, jodiodenicca marinaja maridedeni tedsejepa aja imasiri sseqquiri najaridenidsa Jeso quejemahi qqui toquinadsapa jiperaqquri najari. Nadsapa atti atti quinajari: —Ajana, ajajari madijapa imasiri sseqquiri najaridenidsa nija nahi taji. Pohuadeni

tedseje naco jipajari. Naraha iapi pohuadeni tedseje ijipanijinepi oppina tani, inajaro -quinajari.

<sup>3</sup> Naraha manaco Jeso pohuadenidsa ajijaro namidsa imadinicca ima tadsajani mari icanabaqquijari. <sup>4</sup> Pohua attipa: —Jari, tiadenipi ticcadeni edede 100 naha ticajimanadsapa onideni hua tiquinadsa ojaria amossi nadsapa ¿pohuatohui qquide jai tija-jeraqui? Jehe, edede jinedepa pocca edede qquide toccahitohui. Pocca edede 100 naha cajiraha ojaria amossi nadsapa 99 tojajari. Pocca edede 99 naha huamonihuaji inebobaqquidsapa ojaria amossi najari qquide toccajari. Nadsapa qqui qqui naridsanaja pocca edede bacco inanijari. <sup>5</sup> Bacco inanidsapa pohua mattodsa ibari nanijari. Nadsapa huatidsenijari. <sup>6</sup> Nadsapa odsa bacco nanidsapa pohua tesseltohui huahua najari: “¡Occa edede amossi najaripa bacco onanihi! ¡Occa odsahuaji jai tijajonaji, etidsenijine!” najari. <sup>7</sup> Nadsama pajissara tiadenidsa huati onajaro: Najarossa najaro madija imasiri sseqquiri najaridenipa pina edede jano tojadsa amossi najarissa quinajari. Naraha ojaria: “Diodsa ojanijine, occa ima onebona” nadsapa Diopa pocca dodosse tabaqqui memehuaajicca tedseje huatidsemana tahi. Aja madija tahide Diodsa toquejenapojaridenicca imadsa naco memehuaajiccapa huatidsemana tahi. Naraha aja madija Diodsa tojedsatidsapa denima huatidsemana tahi -najari Jeso.

*Amoneje ponicca dsiniro amossi cananicca ima*

<sup>8</sup> Nadsapa ima onihi naqui huati tajari: —Amonejepi dsiniro ccarara 10 nehe cajiraha ponicca dsiniro cajarie amossi canadsapi ¿qquide dissera tejeraqui? Dissera tajaro. Jojororo iquehessidsa ponicca odsadsa johue naridsajaro. Ponicca dsiniro-tohui mohuaradsa qqui naridsanissa tajaro. <sup>9</sup> Bacco icananidsapi poni tassanitohui, poni inoriniccatohui huahua najaro: “¡Ohuadsa tetidsemanaji! Occa dsiniro amossi canaraha bacco ocananini” najaro -najari Jeso. <sup>10</sup> —Nadsama ohuapi tiadenidsa huati onana: Najarossa najaroa madija imasiri sse tajaripa: “Diodsa ojanijine, occa ima onebona” nadsapa Dio pocca dodosse tabaqqui tedseje huatidsemana tahi -najari Jeso.

*Madija pohua bedi jano tojaraha bacco nanipomahicca ima*

<sup>11</sup> Jesopa dsoqquejari dsepetajibotecca imadsa huati huati najari: —Madijapa pohua bedi pamajari. <sup>12</sup> Dsotodeccapa imehidsa huati tajari: “Abi, tidsepetaji, ticca dsiniro, ticca dsama huapima nidsa tidsoqquedsapi icca tojanijine tade. Nadsapi aji occapi tidsoqque-jeraccadsama ohuadsa arobeni da taji” najari. Nadsapa imehi pohua bedi pamahadsa pohua dsepetaji, pocca dsama icanaroberidsadsa pohuadenidsa da inaridsajaro. <sup>13</sup> Naraha huada onihidsapa pocca abicca daniji aji dsama cajidsati, pohua dsepetaji cajidsati naqui dsinirotohui da inaridsajaro. Nadsapa dsiniroma dsama huaji tanihuaji toccajari. Nadsapa dsama huaji tanicca odsa bacco tadsapa ejetetohui, dsodsobitohui, amonejetohui naridsajari.

<sup>14</sup> —Nadsapa pocca dsiniro nemanehi inajicajaro. Naraha najari huajanodsa pemi naqui tojaridsajaro. Dsamatapa naco bonoridsa-jarajari. Nadsapa dsabisso pemijari. <sup>15</sup> Tarabaidstohui nahihuaajicca madijadsa huati tajari. Nahihuaajicca madija pohuadsa: “Occa poroco tecahuabaqquijo” nadsa pocca poroco madimanahihuaaji dosse inajari. (Naraha dsabissopa jodioja nadsa poroco cacahuade pohuadsa ocassera taraha nama naha poroco ecahuajari.) <sup>16</sup> Pohuadsa dsamatapa da quina-jaradsa pemidsapa: “Poroco tapari ojipa naccaraho” nanaja naraha poroco tapari pina imissa najaro naqui pohuadsa da quinehe nejerani.

<sup>17</sup> —Nadsapa bodi huatomajari: “Occa abicca odsadsapa tatarabaidssadedeni caji taraha pohuadenidsa dsamatapa mota totoja nade. Naraha ohuapi ajihuaji pemi, ohuatiabote nani” najari pohua bodi. <sup>18</sup> Nadsapa pohua bodi huatomajari: “A, occa



abicca odsahuaji occanina. Bacco onanidsapi pohuadsa occa ima huati onanijine: Abi, ojine ima tabaccora tani Diodsa. Tiadsa naqui ojine ima tabaccora tani, onanijine” najari pohua bodidsa. <sup>19</sup> “Nadsama: Abi jidapapi ohuadsa: ‘Occa ejedeni’ tejeraji. Tiapi bica tinaraha ojinepi ima bica tejerani, onanitohui. Naraha jidapapi ticca dodosse ojanijine ¿jipa tinaqui? onanitohui” najari pohua bodidsa.

<sup>20</sup> —Nadsapa pocca abihuaji toccanijari. Toccanijari... bacco tanibote nadsa pocca abipa huaji taraha pocca ejedeni ccanihi qqui tajari. Qqui tadsapa pocca ejedenidsa huati huana taja najari. Joppa tojidsajari, dama, icahuajocossa, pano mose inajari. <sup>21</sup> Naraha bedi attipa: “Abi, ojine ima tabaccora tani Diodsa. Tiadsa naqui ojine ima tabaccora tani. Abi, jidapapi ohuadsa: ‘Occa ejedeni’ tejeraji. Tiapi bica tinaraha ojinepi ima bica tejerani” najari imehidsa.

<sup>22</sup> —Naraha pocca abipa bedi atti mittaraha pina mitterahi najari. Pocca dodosse tabaqquidsana huati tajari: “¡Huassinaja occa ejedeni etero bicanidsa tinehedsamanajo! ¡Todsepecca naqui dsepe tinahanamanajo, amoricca naco tinehedsamanajo!” najari. <sup>23</sup> “Bohui napidsati oqui tajari naco teccanimanadsa tidamanajo, ijipaqquinijine” najari. <sup>24</sup> “Etidsenijine bica tani. Occa ejedeni pina dsoqquejarissa naraha madinipomahi. Puhuapa pina jano tojajarissa naraha bacco nanipomahi” najari. Nadsapa pocca odsacca huapima huatidsemanajari.

<sup>25</sup> —Naraha pohua bedi tahideccapa huidsajahuaji dsepe ijidsa ccandinaja odsa huajiranidsa mittajari. Tire tire camaja, tore tore camaja najari, pocca abicca odsadsa dsodsobi tojajaro. <sup>26</sup> Naraha pohuapa pocca abicca medsetohui huahua najari. Ccajonadsapa pohuadsa huati tajari: “¿Nejecotohui icca odsadsa ejete tojajaro?” najari. <sup>27</sup> Naraha imehicca medsepa pohuadsa huati tajari: “Timecote bacco nanijari. Nomi, bica taha ccandisa ticca abi bohui bedi oquibote inanadsoqquejari” najari.

<sup>28</sup> —Naraha pohuapa jamijari. Odsahuaji toqquedsimanide jipera tadsapa pocca abina qquenajari. Qquenadsapa bedidsa huati huati tajari, toqquedsimanihijine. <sup>29</sup> Naraha manaco imehidsa huati tajari: “Ohuapi tiadsa huajano huapi taha odsepe ijijaro. Ticca dosseniji aji jipa tinajarocca ohuadsa dosse dosse tajarossa onanaraha ohuadsa bani ette tojahi da taha najarahi, otessedeni tedseje ohua naqui ohuatid-senijineraha” najari imehidsa. “Bani huati ccarera tahicca pina edede jidsadsa cabra bedi naco ohuadsa da taha najarahi, otessedeni tedseje ijipaqquinijineraha. <sup>30</sup> Naraha ticca ejedeni aja ticca dsiniro ponima amoneje pehiqquiri najarodenidsa inajicajaro pohuadsana bohui bedi oquibote tinanadsoqquejari” najari imehidsa.

<sup>31</sup> —Nadsapa manaco imehi pohuadsa huati tajari: “Ato, tiapi ohuadsa timadid-sanapojaro. Odsepetaji, occa huidsaja, occa bani ette tojahi, occa odsa najari huapimapa ticca” najari. <sup>32</sup> “Naraha jidapapi ijipaqquidsana etidsenijine bica tani. Ticca eso dsoqquejarissa naraha jidapapa ima dsatidsa madinihi. Puhuapa jano tojaraha qqui imanihi” najari pohua bedidsa -najari Jeso.

## 16

### *Madijapa pohua dossedecca dsiniro ecahuaraha ponima inajicajaro*

<sup>1</sup> Nadsapa Jeso pocca dodosse tabaqquidsana ajijaro namidsa imadinicca ima onihidsa huati tajari: —Jehe, madija dsepe ssebotepa pohua cajijaricca huapima pohua biji accode ojaria ecahuajaro. Naraha pohua biji accodepa pohua pohuajine pocca cacahuehe tossamojaro. Nadsapa madija ohuahadenia dsepe ssebotedsa huati toquinajari: “Tibiji accodepa ticca dsiniro ponima inajicajaro” quinajari. <sup>2</sup> Nadsapa dsepe ssebote pohua biji accodedsa huahua nadsa huati icanajari: “Nija, ticca ima ohuadsa huati toquinajari. Ponima occa dsiniro tinajicani quinahi ima omittani. ¿Ticca cacahuehe nejecoma tinanajaro? Ohuadsa ticca cacahuehecca dsodo nani

huapima tinajoradsa ohuadsa da tani, onajaro. Nadsama tiapi denima tecahuaji onejerani" najari pohuadsa.

<sup>3</sup> —Nadsapa aja pohua biji accodepa pohua ehuerahi bodi huatojari: "Jidapapi ¿nejecoma onapadseje? Ohua dossede ohuadsa jipera tadsapa odsepe ijinijine nohueradsapi ocappiranitohui" najari. "Huidsaja ppa onanijinepi opajira-jerani. Madijadenicca dsiniro manaconi jirehe mitta onanijine naqui cappina onani. <sup>4</sup> Pina ajima onana. Ohua dossededsa debe quinajaridenicca debe ajimani onanaridsana. Nadsana ohuadsa huatidsemanadsa nidsa tarabadsa ocappiradsapi aji ima onajorapojarojine ohuadsa: 'Aji occa odsadsa timadiji' quinahitohui" najari pohua bodidsa.

<sup>5</sup> —Nadsapa pohua dossededsa debe quinajaridenitohui huahua najari. Ojaria huahua ccajona, ojaria huahua ccajona najari. Nadsapa tahide ccajonapojaridsa huati tajari: "Ohua dossededsa debe tani ¿nejecoma natte?" najari. <sup>6</sup> Nadsapa huati tajari: "Ahua oribo bono oquine jojori imeni 100 nehe debe onajaridija" najari. Nadsapa dsepe ssebote biji accode attipa: "Aji ticca cuenta dsodo nani tiadsa da onanina. Ajidsa huassinaja tittaridsa ticca cuenta 50'ra dsodo taji" najari. <sup>7</sup> Nadsapa dsotodeccadsa naco huati tajari: "Tia naqui ¿ohua dossededsa nejecoma nehe debe tajaritta?" najari. Naraha pohua attipa: "Aroso jidsadsa trigo saco 100 naha debe onajaridija" najari. Nadsapa pohuadsa huati tajari: "Aji ticca cuenta dsodo nani tiadsa da onanina. Ajidsa huassinaja tittaridsa 80'ra dsodo taji" najari. Nama nama najari debe quinajarideni huapimadsa.

<sup>8</sup> —Naraha dsepe ssebotepa pohua biji accodejine pohuadsa debe quinajaridenicca debe ajimani inanaridsani ima mittadsapa pohua attia: "Jehe, obiji accodepa pohua tedsejemacca ima maidsehedsa najorapohuijine bodi nahato tajari" najari. Jehe imapi nema najaro. Madijapa pohuadeni tessedenidsa maidsamanahijine bodideni nanajoramanapo najari. Naraha Diocca madijapa pohuadeni tessedenidsa maidsamanahijine najoramanapohuijine ssamoqquiri nahi -najari Jeso.

<sup>9</sup> —Tiadenidsa huati onajaro: Ajijaro namicca ticajimanajarocadsa madija acco ticamabaqquimanajo. Nema tiquinadsapi titessedeni tohuapihitohui. Nidsa dsotode Dio madihihujicca mamadi jiquejeraniccadsa timadimanadsapi ticcadeni accorehe manaconipi Dio pocca biquehena tiadenidsa inanaridsanitohui.

<sup>10</sup> —Madijapa cacahuaniji badsira tehe ecahuadsa maidsa-jaradsapa nidsa dsotode cacahuaniji deni tojanicca ecahuanijine "Bica tahi" quinahitohui. Naraha cacahuaniji badsira tehe ecahuadsa maidsadsapa cacahuaniji deni tojaniccadsa "Jehe pohua ecahuana" quina-jarahitohui. <sup>11</sup> Najarossa najaroa ajijaro namicca biquehe tecahuamanaraha maidsadsa tinadsa tijinedeni toccanissa tejeradsapi Diopa pocca biquehe pajissacca tiadenidsa: "Tecahuamanaji" najarahitohui. <sup>12</sup> Madija ohuahacca dsiniro tecahuamananissa tejeradsapi ticcadeni dsiniro naqui tecahuamananissa tejeranitohui. Nema nadsapi ticcadeni dsiniro tiadenidsa da quina-jeranitohui.

<sup>13</sup> —Nadsama tiadenipi tiadeni dossede pamahadsa tidsepedeni ijimananijinepi tipajiramana-jerani. Tiadeni dossede pamaha ticajimanadsapi ojariadsana tetideni huanacquiri najaro. Pohua attidsana iboraqquiri tiquinanitohui. Ohuahadsapi ajimani tetideni huanacquiri nadsapi pina pohuadsa jiperaqquiri tiquinajarossa nanitohui. Pohua attidsa ibobo tinanitohui.

—Diocca tiquejenadsapi dsinirocca dodosse tiquejenanijine ssamo tani. Dsiniro-tohuira tetidsemanadsapi Diodsa tetidsemananijine ssamo tani. Ima pamehepi Diotohui, dsinirotohui, timadimananijinepi ssamo tani -najari Jeso.

<sup>14</sup> Jeso maride tojadsa marinaja pariseodsa jehe quinajarideni naco nahidsa quejemamanadsa taharibobo canajari. Pohuadenipa dsinirodsana huatideni huanacquiri najari. Naraha Jeso atti nama nahi mittamanadsapa pohuadsa ssamoni huahua quinajari. <sup>15</sup> Nadsapa Jeso manaco pohuadenidsa huati tajari: —Tiadenipi

madija noccodenidsa bicaqquiri tiquinaraha Diopa tibodideni nahato tajari. Madija huapimapa tiadenidsa: “Bicaqquiri nahi” quinaraha pajissa jerani. Ticcadeni madiedsapa Dio jipera tahi –najari Jeso.

*Diocca cacahuehecca ima dsatina Moisesicca marinaja inapajiranissa tajaro*

<sup>16</sup> —Maittaccadsama Moisesicca marinaja nemanehe, Dio Atti cacomeraqquiri najaridenicca dsodoniji naqui mari mari quinjaja najonapohui najaria aja Huano Baotistapaja. Nadsana Diocca cacahuehecca ima bicani madijadsa tojanijine Huano Baotistapa tahide mari mari najonapojari. Jidapana ohua naqui maride nema onajonajaroa ajijaropaji. Naraha madijapa Diocca cacahuehecca imadsa jiperaqquiri nadsa pohuadenijine najidsohue ssonari ssonari najonaraha nama naha madija Diocca cacahuehedsa totoquejena najaripaja.

<sup>17</sup> —Ajina ¿meme, nami jicanijine najora taqui? Najo tani. Naraha Moisesicca marinaja jicanijinepi denima najo tani. Jicanijinepi ssamo tani. Dio Atti dsodo nanicca marinaja huapima pajiranissa tanitohui. Tohuatti ojarie dsori teje cama-jeranitohui.

<sup>18</sup> —Naraha tiadenipi Diocca dosseniji Moisesidsa huati tapojaricca imadsa madija mari ticanabaqquiraha tijinedenia tojidsajaro. Diocca dosseniji pajissaccapi ajima najarona paji: Maqquidejepa pocca amoneje inebodsa amoneje onihira icajidsapi imasiri inanajaro. Nama nadsapa Diocca dossenijipi ecahua-jerajaro. Madija ohuaha naco aji amoneje ponicca maqqui inebojaro “Ocajina” nadsa icajidsapi imasiri inanajaro. Nama nahipa Diocca dosseniji ecahua-jerajaro –najari Jeso.

*Madija dsepe sse tajari Lasaro tedseje tahimarideni*

<sup>19</sup> Jesopa ima onihi huati huati tajari: —Madija dsepe sse tajaripa etero bicani huehuedsa najari. Huada huajjiradsa ejete ihinana najaro. Pohua tessedeni tedseje jijipa bica tahiccara jijipamana najari. <sup>20</sup> Naraha madija tohuati nahana, huapi jadsimaro najaripa nahi dsepe ssebotecca noccobijidsa huihuitta najari. Pohua onipa Lasaro. <sup>21</sup> Dsepe sse tajaricca jijipa motatohui huihuitta najari. Pohua huapi jadsijarijine naco ette eno eno quiquinanajari. <sup>22</sup> Nadsapa tohuati nahana tajaripa dsoqquejari. Dsoqquedsapa Diocca dodosse tabaqqi memehuaajicca iaccamacossanimanajari. Nahihuaajipa Isaraeri potemahi jodiodeni huapimacca idi Abarahaohuaji bacco tajari. Nadsapa Abarahao tedseje memehuaajicca dsama bicaniidsa madimanajari. Dsotode dsepe sse tajari naco dsoqquedsa ppa idsamanajari. Naraha pohuapa paja jicamanarijaridenihuaji bacco tajari.

<sup>23</sup> —Nadsama dsepe sse tajaripa paja jicamanarijaridenihuaji madidsapa ocasserani ahuajari. Nahihuaji madidsapa huaji taraha Lasaro Abarahao tedseje qqui inabaqqui-jari. <sup>24</sup> Nadsapa Abarahoadsa huahua najari: “¡Idi Abarahao, ohuadsa teti huana taji! Lasaro ohua acco camahijine pohua dsepe cote passodsa iquehedsippa nadsa dosse tajonajo, ohuebeno tonahuini nanijine. Ohuapi aji jororoni ppocoranidsa ocasserani ohuani” najari. <sup>25</sup> Naraha Abarahao pohuadsa huati tajari: “Neppe, teti huatomaji. Tahide namihuaji timadiponipi bicani tepode. Naraha Lasaropa ocasserehedsa madipode. Jidapapi Lasarodsa ima bicani tojajaro. Naraha tiapi ocasserani tinahanajaro” najari Abarahao dsepe ssebotedsa. <sup>26</sup> “Ima onihi naqui tia timadi ia imadi nani nocconihuajipi cojojo imeni cahuaajiquimanihuaji imadijarossa najaro. Aja imadinihuajicca madija tiadenihuaji bacco toquinahijine ssamo tani. Manaco nahihuajicca madija iahuaji bacco najonahijine ssamo tani. Nadsama Lasaro tiahuaaji dosse onahijine naco ssamo tani” najari Abarahao.

<sup>27</sup> —Naraha dsepe sse tajari huati tapomajari: “Idi Abarahao, Lasaro nami-huaji dosse tinaronanijo, occa abicca odsahuaji ohuemecotedenidsa huati tahijine.

<sup>28</sup> Nadsama ohuapi ohuemecote 5 quinaha ocajidija. Pohuadenidsa ohuatti Lasaro

huati tanihijine: ‘Paji Diocca dossenijidsa iboqquiri tiquinadsapi nacasserehehuaji bacco tiquinanitohui’ nahijine pohuadenidsa” najari dsepe ssebote atti.

<sup>29</sup> —Naraha Abarahao huati tapomajari: “Dio Atti Moisesi dsodo inajaro, Dio Atti cacomeraqquiri najarideni dsodo quinajaro naqui cajimanahi. Najaro ima mittamanadsa bodideni cacajiqquimera-manahijine pajiramanahi” najari. <sup>30</sup> Naraha dsepe ssebote attia: “Jehe idi Abarahao, najaro dsodo nani cajimanaraha najarodsa pajissa quina-jarajari. Naraha madija dsoqquejari nahatonidsa pohuadenihuaji huatide toccanidsana pajissa quinahitohui, poccadeni imasiri inebomananijine” najari dsepe ssebote atti.

<sup>31</sup> —Naraha Abarahao attia pohuadsa: “Dio Atti Moisesijine dsodo nani cajimana, Dio Atti cacomeraqquiri najaridenijine dsodo nani naqui cajimana nahi. Najaro Dio Atti mittamana-jaradsapa aja madija dsoqqueraha nahatonijari attidsa naco mittamana-jarahitohui. Pajissa quina-jarahitohui” najari Abarahao atti –najari Jeso.

## 17

### *Imasiri tinanadsapi oppina tanihuaji ticcanitohui*

*Mateo 18.6-7, 21-22; Maraco 9.42*

<sup>1</sup> Nadsapa Jeso pocca dodosse tabaqquidsa huati tajari: —Aji namidsa timadimanageropi ima tinanamananijine caji tani. Paji, nema najarodsa imasiri tinanamana tani. Naraha madijajine imasiri tinanamanadsapi pohuadsa ima denima oppina tanicca ssonarinitohui. Madija nama najaripa Diona inajidsohuitohui. <sup>2</sup> Nadsama madija ojarajine ohuadsa jehe quinajari imasiri inanamanadsapi pohuadsa najidsohue oppina tanicca ssonarinitohui. Ejedeni ohuadsa jehe quinajarideni naco madija imasiri mamaridejine imasiri tocahatteradsapa aja imasiri mamaride pohuadsa najidsohue oppina tanicca ssonarinitohui. Pina ajijaro imassa najaro: Siba ccanajabote pohua mattodsa ssoque dsanadsa passo imenihuaji je tahijine cco todsippadsapa oppina taraha najidsohue denima oppina tanicca pohuadsa ssonarinitohui. <sup>3</sup> Paji! Tiadenipi tiadeni tecahuamananissa taji, imasiri tinanamana-jeranijine –najari Jeso.

—Nadsama timecote ohuadsa jehe najari tiadsa imasiri inanadsapi manaco mohuaradsa pohua huati ticanajo: “Ohuadsa tijine ima bica tejerani” tana. Nadsapa pohua cacomeradsapa: “Jehe, tiadsa nema onade. Ojine bica tejerani. Jidapapi nema onapoma-jeranitohui” nadsapa manaco pohuadsa: “Jehe, epejena, tiadsa ohuadi-jerani” tana, onajaro. <sup>4</sup> Nadsapa timecote ohuadsa jehe najari tiadsa tabaccorehe inanajaro. Dsotode tiadsa imasiri inanapomajaro. Dsotode naqui tiadsa tabaccorehe inanapomajaro. Nama dsanaporaha pocca imasiri jicani nattinipa pohua atti tiadsa: “Epeje, ojine tiadsa bica tejerani. Jidapapi nema onapoma-jeranitohui” nadsapa manaco pohuadsa tetti: “Jehe, epejena, tiadsa ohuadi-jerani” taji, onajaro. Huada ojariedsa nama dsanapojari 7 nehe bacco taraha nema nehe pocca imasiridsa epeje tidsanapoji, onajaro –najari Jeso.

### *Diodsa jehe inanissa tadsapi ima najo taniccadsa ipajiranissa tanijinecca ima*

<sup>5</sup> Nadsapa Jesodsa pocca dodosse tabaqquipa huati toquinajari: —Ia Medsede, icca jeheniji Diodsa todacorani nanijine iadsa denima tinanaji –quinajari.

<sup>6</sup> Nadsapa manaco ia Medsede pohuadenidsa huati tajari: —Ticcadeni jeheniji badsira tehe pina mostaza nocco badsira tajarissa nehe ticajimanadsapi ssamo tanicca tinanamananijine tipajiramananitohui. Pina ajijaro ahuadsa huati tiquinadsa: “Ahua, tia motta jeo tinadsa passo imeni inididsana tia ppa tidsana” tiquinadsapi ahua tettidenidsa ibora tanitohuiraha –najari Jeso.

### *Diodsa idsepe ijie jicanissa tadsapi —Deni ijani –inejeranijine*

<sup>7</sup> —Madijacca tatarabaidssade tarabaidssahuaji ccaccani nadsa pohua dossede attipa ¿nejecoma napadsaja? Pina huiddsaja ppade ccanidsa, pina edede cacahuade ccanidsa nadsapa pohua dossede: “Jehe, ajidsa tittaridsa tijipaji” ¿napadsaja? Nama najarahitohui pocca tatarabaidssadedsa. <sup>8</sup> Pohua dossede attipa ajama nahitidija: “Ohuadsa dsamatapa ppe tadsa, ojipanijine tinajoradsa jijipa hua tarijo. Nidsa ohuajari jicani nattinina manaco tijipanijine” nahitohui -najari Jeso. <sup>9</sup> —Nadsapa tatarabaidssade pohua dossede attissa inanadsa pohua dossede attipa: “Jehe, tijine bica tani” ¿napadsaja? Nama najarahitohui. Najaropi pocca tarabaidssade epeje. <sup>10</sup> Nadsama tiadeni naqui Diocca dosseniji tecahuamananissa tadsapi tettideni: “Epeje, najaropi ia icca idsepe ijie” titiquina nana. “Iapi deni iquejena-jerani. Ia dossedecca tatarabaidssade iquejenani” titiquina nana -najari Jeso.

*Jeso madija 10 quinajari lepra cajimanajarideni inanomibaqqujaricca ima*

<sup>11</sup> Nadsapa Jeso pocca benehidsa Jerosarehuaji toccajari. Dsama arobeni onini Samaria, dsama arobeni onihi onini Carirea tadsajani ttomoqquinihuaji ccaridsajari. <sup>12</sup> Nadsapa nanihuajicca odsa capamema nahihuaji Jeso bacco tajari. Nahidsapa madija 10 quinajari dsamacoma onini leprajine huapideni jadsimanahi madimanageri. Nadsapa Jesohuaji jai tojajari, pohuadsa huajiji nadsa domo hua najari. <sup>13</sup> Jadsirema pohuadsa huahua quinajari: —¡Jeso, ia Medsede, iadsa teti huana taji! -quinajari.

<sup>14</sup> Nadsapa Jeso pohuadeni qqui inabaqquidsapa pohuadenidsa huati tajari: —Diodsa dada toqqumadedenihuaji jai tijedsimadsa pohuadenidsa tepideni nohue tiquinaji -najari. Nadsapa pohuadeni huapi nohuede jahui jai tojaninaja tocanomirejari.

<sup>15</sup> Nadsapa ojaría pohua huapi tobicahi qqui tadsapa dsodonijari. Huatidsedsa jadsirema: —¡Diopa bica tahi, bica tahi! -nanijari. <sup>16</sup> Jesodsa bacco nanidsapa —Jehe bica tinani -nahijine Jeso bacchohuaji pohua pitodsa huitta, tocattedsa nadsa assari namidsa bacco tajaro. Nadsama aja madija dsodonijaripa dsama Samariacca. <sup>17</sup> Nadsapa Jeso huati tajari: —Naraha aja ¿madija 10 quinajaripa tocanomire-jaraco? Tocanomireraha mota 9 quinajaridenipa ¿nejecohuaji? -najari Jeso. <sup>18</sup> —Ajararipa icca madija jodio jararaha pohuapa dsodonidsa Diodsa huatidsenijari. Motapa Diodsa: “Jehe, tijine icanomireni bica tani” nanimanagerahi -najari Jeso.

<sup>19</sup> Nadsapa pohuadsa Jeso huati tajari: —Titehemadsa ticcaniji. “Jehe, Dio ohua tonanomihí pajirahi” tadsapi tinomijaro -najari Jeso.

*Diocca cacahuehepi ajima nehe tojanitohui*

*Mateo 24.23-28, 36-41*

<sup>20</sup> Nadsapa marinaja pariseodsa jehe quinajarideni Jesodsa huati toquinajari: —¿Nejecoma nadsa Diocca cacahuehe tojapadseje? -quinajari. Naraha Jeso pohuadenidsa huati tajari: —Diocca cacahuehepi ahuatora tani, innocodsa qqui inejerani. <sup>21</sup> Madijapa: “Qqui taji, Diocca cacahuehe ajidsa bacco nani, ajicadsa bacco tani” quina-jarahitohui. Diocca cacahuehepi jidapana tiadenidsa tojaridsani -najari Jeso.

<sup>22</sup> Dsotodepa pocca dodosse tabaqquidsapa huati tajari: —Ohuapi Madija Bedi ojajaroa nidsa occaronapomanicca huada bacco tani tohuini tiquinadsapi: “Jaho, najaro huada qqui inaccaraho” tiquinaraha nohueraccanitohui. <sup>23</sup> Naraha madija tiadenidsa maidsamanadsapa ajama quinahitohui: “Qqui tiquinajo, Cristo-Mesia ajadsa bacco nanihi, ajaccadsa bacco nanihi” quiquinanahitohui. Naraha madija attideni nama quinadsapa: “Jina qqui inana” tiquina tejerana. ¡Poni! <sup>24</sup> Ohuapi Madija Bedi ojajaroa occaronapomanicca huada bacco tadsapi ahuato tanitohui. Pina ssissiede memedsa ssie nadsa meme nemanehé tossiajabaqqujarossa nanitohui.



<sup>25</sup> Naraha ohuapi Madija Bedi ojajaroa tahide ima onihi, onihi najaro ocasserani onahaponitohui. Jidapana madija madimanajarideni naco ohua ettajomanaponitohui –najari Jeso.

<sup>26</sup> —Ohuapi Madija Bedi ojajaroa nidsa occaronapomadsapi pina maittaccadsama Nohue madipodsa ppani ccajonajarocca imassa nanitohui. <sup>27</sup> Madijadenipa jijipamana najari, dse dse quinajari, caji caji canajari. Nama quiquinanapojaria aja Nohue pocca canoa imenidsa toqquedsimahicca huada bacco tajaropaji. Naraha madija motapa ssamoqquiri nadsa ppani bacco najonadsapi huapima je tocaniredsa jicajari. <sup>28</sup> Dsotode Abarahaocca ejedeni ohuaha Rote odsa panani Sodomahuaji madidsa naco pina aji Nohue madipohuicca imassa napomajaro. Madijadenipa jijipamana najari, dse dse quinajari, todsepetaji mitta mitta quinajari, poccadeni dsamatapa da da quinajari, poccadeni huidsaja ppa ppa quinajari, poccadeni odsa ihinahatomanajaro. <sup>29</sup> Naraha Rotepa Sodomadsa nebodsa joppa taraha najaro huadadsa Djojine memehujicca jororoni azufre quejemani Sodomahuaji catojadsapi madija huapima jicajari. <sup>30</sup> Jehe, ohuapi Madija Bedi ojajaroa occaronapomanicca huada naqui najarossa nanitohui. Pina Nohue madipodsassa, pina Rote madipodsassa najaro. Nidsa dsotode ajijaro namidsa jidsera onanipomadsa madija mota otohui najoramana-jarajardenipa jicahitohui –najari Jeso.

<sup>31</sup> —Nadsama najaro huada bacco tadsapi madija pocca odsa amossinihuaji ccaridsadsapa pohua dsepetajitohui pocca odsahuaji toqquedsimani-jarana. Madija ohuaha pocca huidsajahuaji dsepe ijijari naco pocca odsahuaji toccani-jarana. <sup>32</sup> Aji Rotecca amonejicca ima tetideni ajimamana-jerana. Ponidsa Dio Attipa: “Tinattihujipi qqui tani tejerana” naraha poni nattinihuaji qqui nanidsapi siba tojajaro. <sup>33</sup> Madijapa pocca madie Diodsa acco tadsa ajijaro namidsa madi-dsanapohuijine tohuinira nadsapa dsoqquehitohui. Dsoqquedsapa camittehe jiquejeranicca caji-jarahitohui. Naraha madijapa pocca madie Diodsa eccoradsapi pohua inanadsoqque-manaraha camittehe jiquejeranicca cajidsanapohuitohui –najari Jeso.

<sup>34</sup> —Jehe, nidsa occaronapomanijine ima ajima nanitohui: Madija pamaha dsome huahuadadsa cahadijaraha ojaria otohui najorapojarina iaccamacossanihitohui. Naraha ohuahapa otohui najora-jaradsapa inebohuitohui. <sup>35</sup> Amoneje pamehe dododsa dode toquejenajaro naqui. Ojarie otohui najorapojarona iaccamacossanihitohui. Naraha onihipi otohui najora-jeradsapi inebonitohui. [ <sup>36</sup> Maqquideje pamaha huidsajahuaji dsepedeni ijimanajari naco. Ojaria otohui najorapojarina iaccamacossanihitohui. Naraha ohuahapa otohui najora-jaradsapa inebohuitohui –najari Jeso. ]

<sup>37</sup> Najaro ima Jeso huati huati taha jicadsapa pocca dodosse tabaqqui pohuadsa huati toquinajari: —Ia Medsede, ajijaro imapi ¿nejecoma nanidsana tojapadseje? –quinajari. Naraha Jeso pohua cacomerajari: —Abaridsa toqueriqquinidsa bani huatiahi ponahi nahatoqquiri tiquinajaro. Pina najaro imassa najaro occaronapomadsapi madija huapima nahatoqquiri nahitohui –najari Jeso.

## 18

### *Ima cacattemade amoneje tabira tocajajaro acco icamajarocca ima*

<sup>1</sup> Jesopa ajijaro namidsa imadinicca imadsa pocca dodosse tabaqqui mari icanabaqqujari. Madija Diodsa huatide disseraqquri nahijine, —Diopa ohuatti mittajarahi –quina-jarahijine huati huati tajari. <sup>2</sup> Nadsapa ima ajima najaro huati tajari: —Odsa pananihuajipa ima cacattemade madijari. Pihuapa Dio noppine cappinajarajari. Madijadsa naco cappina-jarajari. <sup>3</sup> Najaro odsa pananidsa amoneje maqqui dsoqquejari madijaro. Ponipi huajijiradsa ima cacattemadedsa huatide totocca

najaro: “Ohua acco ticamaji” naneje najaro. “Madijacca nacasserehe onahana-dsanaponi” naneje najaro. <sup>4</sup> Naraha pohuapa poni acco camade ibojide rajari. Naraha dsotodena bodi huatodsa ajama najari: “Diodsa ocappina-jerani madijadenidsa naqui ocappina-jerani. <sup>5</sup> Naraha aji amoneje tabira tocajajaro ohuadsa tonajo huati cajiradsapi poni acco ocamana. Acco ocama-jeradsapi poni attini ohuadsa tocasseraqqunitohui” najari ima cacattemade ibobote. Nadsapa poni acco camade tohuiborajari –najari Jeso.

<sup>6</sup> Nadsapa ia Medsede Jeso attipa: —Jehe, ima cacattemade bica tajarajaripa atti nama najari. <sup>7</sup> Pohua atti nama naraha Diopa nama najarajari. Pohuapa bica tajari. Pocca tocattejidsabaqquinaja attideni mittajari. Pohuadenipa Diodsa ssiaja huati, dsome huati totoquina najari. Nadsapa ¿Dio pohuadeni acco icamabaqquihijinepa najopadsaja? Najo-jarahitohui. <sup>8</sup> Najaroa tiadenidsa huati onajaropaji: Diopa najo-jaradsa tiadeni acco tocamabaqquihitohui, onajaro. Naraha ohuapi Madija Bedi ojararoa nidsa occanipomadsapi ¿occa madijapa Dio Pohuadsa huatide disseraqquri nahipaja napadsaja? Pohuadeni naco: “Jehe, Dio ohua acco camahi” ¿quiquinanahipaja napadsaja? onajaro –najari Jeso.

*Marinaja pariseodsa jehe najaricca ima, romanodenicca taminecca dosseniji dsiniro nanaccadecca ima tadsajani*

<sup>9</sup> Jesodsa queriqquimanajari mota bodidenipa: —Jehe, ohuapi Moisesicca marinaja ohuacahuanissa tajaro, bica onani –quiquinanajari. Najari bodideni naco: —Madija ohuassa quina-jarajaridenipa Moisesicca marinaja ecahuamananissa tejerani, bicaqquri najarahi –quiquinanajari. Naraha Jesopa najarideni bodicca ima nahato tadsapa ajijaro namidsa imadinicca ima huati tajari.

<sup>10</sup> —Madija pamahapa Diodsa huati toquinahijine dada toqquimahuaji tohuededsimajari. Ojaria Diodsa dissera tajari, pohuapa marinaja onini pariseodsa jehe najari. Ohuahapa imasiri sse tajari, pohuapa romanodenicca taminecca dosseniji dsiniro nanaccade. <sup>11</sup> Nadsapa marinaja pariseodsa jehe najari huadsa Diodsa huati tadsapa ajama najari: “Jehe Abi Dio, tiadsa bica onajaro, ohuapi pina madija ohuahadenissa onejerani. Pina bobotidedenissa, pina mamaidsadedenissa, pina amonejecca cahassibotedenissa onejerajaro. Pina ajajari romanodenicca taminecca dosseniji dsiniro nanaccadessa onejerani. Bica onajaro” najari. <sup>12</sup> “Ohuapi semana huajijiradsa jipehe ohonebocossa najaro. Ohuapi occa dsiniro ohuadsa totoja najaro mota naqui tiadsa da da ohodsanapo najaro” najari.

<sup>13</sup> —Naraha romanodenicca taminecca dosseniji dsiniro nanaccadepa huajima huajari. Madija ohuahadenipa tocattamacossamanadsa Diodsa huati huati toquinaraha pohuapa cappinaja najari tocattedsa najari. “Tabaccora onani” najari. Pohua attipa: “Abi Dio, ohuadsa teti huana taji. Ohuapi imasiri ocajini” najari taminecca dosseniji dsiniro nanaccade –najari Jeso.

<sup>14</sup> Najaro ima huati taha jicadsapa aja —Bica onani –quiquinanajaridenidsa Jeso attipa: —Nadsama ohuapi tiadenidsa huati onajaro. Ajajari maqquideje imasiri sse tajaripa pohua bodi tobicadsapa pocca odsahuaji toccanijari. Pocca ima Dio sse ineje najaro, Diodsa tobicajari. Naraha madija ohuaha marinaja pariseodsa jehe najaripa Diodsa bodi tobica-jarajari. Pocca ima mota tabaccora taniccapi Diodsa huati tajaradsapa pocca ima Dio sse inejereje najaro. Jehe, madijapa: “Occa biquehe qqui tiquinaji” nanaja najaripa Diodsa ajamani tojahitohui. Naraha madijapa: “Ohuapi ajimani ojan” nanaja najarina Dio deni inanahitohui –najari Jeso.

*Jesopa: —Abi, ticca biquehe ejedenidsa tinanaji –najari*  
*Mateo 19.13-15; Maraco 10.13-16*

<sup>15</sup> Nadsapa madija poccadeni ejedeni badsiraqquri najarideni Jesodsa eccajonabaqqui-manajari, —Jeso tatideni bara inabaqquidsa Diodsa huati tahijine –quinadsa. Naraha Jesocca dodosse tabaqqui qqui toquinadsapa attidenia: — ¡Ejedenipa pohua! ¡Jesohuaji teccajonabaqquimana tajarajo! –quinajari. <sup>16</sup> Naraha Jeso pohuapa ejedenitohui huahua najari. Pohua huatimadedenidsa pohua attipa: —Pohuadeni jahijonana, onajaro. Eccajonabaqqui-manahijine tecossamana tejeraji. Madijapa pina ajajari ejedenidenissa quinajarina Diocca cacahuehedsa toquejenahitohui –najari Jeso. <sup>17</sup> —Pajissara tiadenidsa huati onana: Madijapa pohua bodicca jeheniji pina ejedenicca jehenijissa najaradsapa Diocca cacahuehedsa toja-jarahitohui –najari Jeso.

*Tamine dsepe sse tajari Jesodsa huati tajari*

*Mateo 19.16-30; Maraco 10.17-31*

<sup>18</sup> Madija ojaría tamine tojajaripa Jesodsa huati tajari: —Nija Mamaride bicahi ¿nejecoma onadsa camittehe jiquejeranicca bacco onanijine? –najari. <sup>19</sup> Naraha manaco Jeso pohuadsa huati tajari: —¿Nejecotohui ohuadsa: “Mamaride bicahi” tajaro? Madija bicahi nohuerahi. Diona bica tahi ojarihi. <sup>20</sup> Naraha camittehe jiquejeranicca bacco tinanijinepi Diocca dosseniji Moisesi dsodo inajarocca nahato tinani. ¿Najaro huapima tecahuanissa taqui? Pocca dossenijipi ajima najaro: “Madija ohuahacca amoneje tija tejeraji. Madija tinanadsoque-jarajo. Tiboti tejeraji. Maidsehedsa naqui madijadsa ponima ima tinahana tejeraji. Ticca abi, ticca amidsa bica tinadsa tinamadibaqquihissa tajo” nani Diocca dosseniji Moisesi dsodo inajaro –najari Jeso.

<sup>21</sup> Naraha tamine attipa: —Najaro dosseniji huapimapi dsabisso ojadodsama ohuacahuajonajarode –najari. <sup>22</sup> Naraha Jeso tamine atti mittadsapa pohuadsa huati tajari: —Naraha ima ojarie tiadsa dsori taccani. Ticcanidsa tidsepetaji nemanene manaconidsa da tinaridsaji. Nani najaro dsiniropi madija tohuati nahanaqquri najaridenidsa da tinabaqquinijine. Nema tinanadsapi nidsa memehuaji Diocca biquehe tiadsa tojanitohui. “Nema onana” tadsapi ohuadsara dissera tinaji –najari Jeso.

<sup>23</sup> Naraha taminepa najaro ima mittadsa: —Jehe, nema onana –najarajari. Pohua dsepetajitohui, pocca dsinirotohui huati huana tajari. Pohuapa dsepe sse taja nadsapa bodi ocassera taha hua canajari. <sup>24</sup> Tamine bodi ocassera tahi Jeso qqui tadsapa huati tajari: —¡A, madija dsepedeni sseqquri najaridenipa Diocca cacahuehedsa toquejenahijine najo tani! –najari. <sup>25</sup> —Pina bani imehibote camello etero ssessequi odinidsa toqqequimahijine pajira-jarajarissa najari. Madija dsepe sse tajaripa Diocca cacahuehedsa tojahijine ssamo tani –najari Jeso.

<sup>26</sup> Nadsapa Jeso atti nama nahi mittamanadsapa madija attidenia: —Jaho, madija tocassiejerahijinepa ssamo tani. ¿Nejecojarina tossiapadsaja? –quinajari. <sup>27</sup> Naraha Jeso attipa: —Madijapa ssamomo taraha Diodsapi ssamo tejerani. Pohuajinena madija tocassiejerahitohui –najari.

<sup>28</sup> Naraha Pedropa Jesodsa huati tajari: —Ia Maride, iapi tiadsa jaijaridsanijinepi icca odsa, icca madija, huapima ineboridsabaqquide –najari.

<sup>29</sup> Manaco Jeso pohuadenidsa huati tajari: —Pajissara tiadenidsa huati onana: Madija ohuadsa dsepe ijihijinepa pocca odsa icanebo, pocca amoneje inebo, pohua imecote inebobaqqui, pocca abi, ami inebobaqqui, pocca ejedeni inebobaqqui nadsapa Diocca cacahuehe madijadsa tojaridsanijine dsepe ijiridsajari. <sup>30</sup> Nadsapa nidsa dsotode huapima pohua ineboridsajarossa nehe Djojine cajipomahitohui. Jidapana ajijaro namidsa pohua madicadsa huemani cajihitohui. Nidsa Djojine dsama dsati tojadsa naqui camittehe jiquejeraniccadsa madi-dsanapohuitohui –najari Jeso.

*Jesopa pohua dsoqquehicca ima huati nimanipomajari*  
*Mateo 20.17-19; Maraco 10.32-34*

<sup>31</sup> Jesopa pocca dodosse tabaqqui 12 quinajari tedseje Jerosarecca jahui jai tojadsa pohuadenira huahua inabaqquidsa pohuadsa queriqquijari. Nadsapa pohuadenidsa huati huati dsanapojari: —Aji odsa panani Jerosarehuaji jaijemoraropopi nahatoqquri tiquinani. Ohuapi Madija Bedi ojararoa nidsa Jerosare bacco inadsapi aja Dio Atti cacomeraqquri najarideni otahimari dsodo quinapojaropopi ohuadsa tojanitohui, onajaro. <sup>32</sup> Ohuapi madija ohuaha jodio quejena-jarajarideni dsepedenidsa ojanitohui. Najaridenina ohua jaja icanaqquimanajaro, ohua itamassoqquimanajaro, ohua ppito inaqquimanajaro nanitohui. <sup>33</sup> Nadsapi ohua cossi inaqquimanadsapi ahua porimacossanidsa ohua inanadsoqqe-manadsa ohua ppa idsamananitohui. Naraha huada huatinimade tojari nadsa onahatoninitohui —najari Jeso.

<sup>34</sup> Naraha pocca dodosse tabaqquidsa Jeso pohua tahimari huati huati taraha mittamana-jarajari. Pohuadeni bodidsa najaro ima ahuatora tajaro. Pohuadenipa: —Ja, pohua dsoqquehijinecca ima huati tajari —quina-jarajari.

*Jesopa Jericocca madija nocco ssire inanajari*  
*Mateo 20.29-34; Maraco 10.46-52*

<sup>35</sup> Jesopa odsa panani Jericohuaji tohuajirajonadsapa jahui inididsa madija nocco siri huihuitta najari. Pohua dsepe da nadsa: —Ohuadsa dsiniro da tiquinaji —tatacossa najari. <sup>36</sup> Nadsapa madija huapima pohuahuaji jai tojeqquimama canahi mittadsapa huati tajari: —¿Nejecotohui madija huapima jai tojeqquimama canajari? —najari. <sup>37</sup> Naraha pohuadsa huati toquinajari: —Jeso Nasaretihuajicca huajirajonahi —quinajari. <sup>38</sup> Nadsapa nocco siri huahua najari: —¡Jeso, Dabi Potemahi! ¡Ohuadsa teti huana taji, onaha! —najari.

<sup>39</sup> Naraha madija tahidejonamanajari attidenia: —¡Poni! ¡Joma taji! —quinajari. Naraha denima paja huahua tarihi huahua tarihi najari: —¡Tamine Dabi Potemahi! ¡Ohuadsa teti huana taji! —napomajari.

<sup>40</sup> Nanaja Jeso ccajonaraha mittadsapa huaha tahi nadsa: —Jari, nocco siri ahujai teccajonamanajo —najari. Nadsa eccajonamanadsapa pohuadsa huati tajari: <sup>41</sup> —¿Nejecora tiadsa onananiijine? —najari. Naraha nocco siripa: —Ohua Medsede, onocco ssire tinanaji, onajaro —najari.

<sup>42</sup> Nadsapa Jeso: —Jehe, tinocco ssire tana. Tibodi ohuadsa pajissa tadsapi tinomini —najari. <sup>43</sup> Nadsapa Jesojine amadsati pohua nocco ssire tadsapa Jesodsa toccajari. Diodsa huatidseri dsanapojari. Madija huapima naco pohua nocco tonomihi qqui toquinadsapa huatidsemanadsa: —¡Diopa bica tahi, bica tahi! —quinajari.

## 19

*Saqueo tahimari*

<sup>1</sup> Jesopa odsa panani Jerosarehuaji toccahijine tahidepa odsa panani Jericodsaha bacco tapojari. Nadsapa Jerico nocconi toqqueqquimahijine toqquedsimajari. <sup>2</sup> Naraha nahidsapa maqquideje dsepe ssebote madijari, pohua onipa Saqueo. Pohuapa jodiodeniraha romanodenicca taminecca dosseniji dsiniro nanaccadedenicca tamine tojajari. <sup>3</sup> Nadsapa —Jeso ccajonahi —quinahi mittadsapa Saqueo bodipa: —Jeso qqui onana —najari. Naraha pohuapa tere tajariijine, madija huapi tadsapa Jeso qqui inajarajari. <sup>4</sup> Nadsapa Saqueo madija jai tojeqquimahi qqui tadsapa tedsejemadenina joppa tajari: —Aji ahuadsa occamarodsa Jeso toqqueqquimahi qqui onana —nadsa ahuadsa toccamarojari. <sup>5</sup> Naraha Jeso Saqueo huittarihuaji toqqueqquimadsapa Saqueo ahuadsa huittarihi qqui tajari. Nadsapa Saqueo

huahua najari: —¡Saqueo, huassinaja ticcaronaji! Ohuapi jidapana ticca odsahuaji omadiccana, onajaro –najari.

<sup>6</sup> Nadsapa Saqueo huassinaja ccaronadsa Jesodsa: —Jehe, occa odsadsa timadiccaji –najari. Saqueo pocca odsahuaji Jeso iaccanidsapa tohuatidsenijari. <sup>7</sup> Naraha madija huapimapa Jeso Saqueooca odsadsa toqquedsimahi qqui toquinadsapa pohuadenira imahaha canajari: —A, Jesopa imasiri ssebotecca odsadsaraha toqquedsimaha. Jeso nama nadsapa iadsa bica tejerani –quinajari jodiodeni atti, aja romanodenicca taminecca dosseniji dsiniro nanaccadedenidsa jiperaqquri nadsa.

<sup>8</sup> Nadsapa odsadsa jassi todsanaja Saqueo totehemadsa ia Medsededsa huati tajari: —Jehe ohua Medse, jidapapi ajima onana: Aja cappiramanajaridenidsa odsepetaji arobeni ocanarobenissa taridsadsapi pohuadenidsa da onaridsana. Nadsama aja ocamaidsabaqquijaridenidsa naqui pina aja ocamaidsabaqquijojarissa nehe pohuadenidsa da omanina. Nadsapi pohuadenidsa najarossa nehe denima da, denima da, denima da omaniridsanijine –najari.

<sup>9</sup> Nadsapa Jeso madija huapima mittamanahijine huati tajari: —Jehe, jidapana ajajari maqquidejepa pocca imasiri inebodsa Diodsa pajissa nadsapa pina maittaccadsama pocca idi Abarahao Diodsa pajissa najarissa najari. Nadsapa pohua, pocca odsacca madijadsa naqui Diocca tossiejehe tojaridsani ahuato tani –najari Jeso atti. <sup>10</sup> —Nadsama aji ohua Madija Bedi ojararopi madija jano toquejenajarideni pina ajajari maqquidejessa quinajari qquide occajonajaro. Imasiricca dodosse toquejenajarissa quinaraha onassiajabbaqquihijine. Huapima ohuadsa pajissa quinadsapa camittehe jiquejeranicca cajimanahijine –najari Jeso.

*Jesopa dsiniro inahapimananijinecca imadsa mari icanabaqquijari*

*Mateo 25.14-30*

<sup>11</sup> Jesopa Saqueooca huati huati tahidsa madija queriqquimanajarideni mittamanajari. Jeso Jerosarehuaji tohuajirajonadsa pohuadeni bodi attidenipa: —Nidsa Jeso Jerosaredsa bacco tadsapa amadsati Diocca cacahuhe tojanitohui –quinaraha najaro ima tojanijine jerani. Nadsapa Jeso pohuadeni bodi huatomanahijinepa ajijaro namidsa imadinicca imadsa mari icanabaqquijari.

<sup>12</sup> Jeso attipa: —Dsama huapimacca tamine deni tojahicca dsama onihicca deni toquejenajarideni ojariadsa huahua najari: “Tia ocattejidsajaro, ticca dsama arobeni cacahuade tijanijine. Ohuadsa huatide ahuaji ticcajonaji” najari. Nadsapa huaji taraha pohuahuaji huatide toccahijine najorajari. Pohua bodipa: “Nidsa occanidsa ohuapi occa dsamacca tamine ojanitohui” najari. <sup>13</sup> Nadsapa toccabote nadsa pocca dodosse tabaqqui mota 10 quinaha huahua inabaqquijari. Nadsapi dsiniro ccarara huatini ccara tanicca 10 najaro pohuadenidsa ojari ojari nehe da inaridsajaro. Nadsapa pohuadenidsa huati tajari: “Ajijaro dsinirodsa mitta, da, mitta, da taridsamanana, dsiniro tohuapinijine. Nidsa occanidsapi ohuadsa nemanehe da tanimananijine” najari. <sup>14</sup> Aja tamine tojahijinepa tamine deni tojahicca madihihuaji toccajari. Naraha toccahi nattipa pocca dsamacca madijapa pohuadsa jiperaqquri nadsapa madija dosse inabaqquimanajari, tamine deni tojahiccadsa huati toquinahijine. Bacco toquinadsa attidenipa: “Aja ticattejidsajaripa icca tamine tojahijine jiperaqquri inani” quinajari, dsama huapimacca tamednsa.

<sup>15</sup> —Naraha tamine deni tojahiccapa attidenidsa jehe najaradsa pohua icattejidsajaripa tamine inanajari. Nadsapa tamine tojadsapa pocca dsamadsa dosse dosse nahijine toccanijari. Bacco nanidsapa pocca dodosse tabaqqui pohuadenidsa dsiniro da inaridsajarodenidsa huahua najari, “¿Dsiniro nejecoma nehe tojani?” nahijine.

<sup>16</sup> Nadsapa tahide qquedsimapojaria pohuadsa huati tajari: “Ohua dossed, ticca dsiniro ccarara cajariraha ojine deni tojadsapi 10 nehe tojani” najari. <sup>17</sup> Nadsapa tamine tojedsati manaco pohuadsa huati tajari: “Jehe, tiapi occa dodosse bica tinani.



Ohuattidsa ibora tinadsapi occa dosseniji ima bedeniraha tijine toccanissa tadsapi odsa panani 10 najarocca cacahuade tjanitohui” najari. <sup>18</sup> Pocca dodosse ohuaha naco qquedsimadsa huati tajari: “Ohua dossedede, ticca dsiniro ccarara cajariraha deni tojadsapi 5 nehe tojani” najari. <sup>19</sup> Nadsapa tamine tojedsati manaco pohuadsa huati tajari: “Jehe, tiapi odsa panani 5 najarocca cacahuade tjanitohui” najari.

<sup>20</sup> —Naraha pocca dodosse ohuaha qquedsimadsapa pohuadsa huati tajari: “Ohua dossedede, ajijaropaji ticca dsiniro. Eterodsa jore onacquinissa tadsa ohuacahuajaro. <sup>21</sup> Ohuapi tinoppine ocappinajaro. Tiapi madijadsa daco tijirajaro. Tiapi tarabaidsa tejeraraha ticca dodosse tabaqquijine titicaji najaro” najari. <sup>22</sup> Nadsapa manaco tamine tojedsati attipa: “¡Occa dodosse tabaccora tinani! Tia tettijine tiadsa ima ssonarijaro. Aji ohuattidsa ibo tinadsapi ohuadsa bica tejerani. Tettiapi ohuadsa: ‘Madijadsa daco tijirajaro. Tarabaidsa tejeraraha ticca dodosse tabaqquijine titicaji najaro’ taha. Naraha occa ima nahato tinadsapi <sup>23</sup> ¿nejecotohui occa dsiniro tohuapiniijine dsiniro ehecahuamana nanihuaji da tidsima-jerajaro? Nassa occanidsapi aji occa dsiniro tohuapijarocca tadsajani ocajinitohuiraha” najari tamine atti. <sup>24</sup> Nadsapa aja pocca dodosse tabaqqui domodeni huaridsajaridsa huati tajari: “Jari, occa ccarara tidinimanadsa ccarara 10 cajjaridsana da tiquinaji” najari tamine atti. <sup>25</sup> Naraha pohuadeni attipa: “Ia dossedede, najaripa ccarara 10 nehe cajia” quinajari. <sup>26</sup> Naraha tamine attipa: “Epejena, ohuapi tiadenidsa huati onajaro: Madija occa dossenijidsa dissera tadsapa pohuadsa denima tojanitohui. Naraha aja madija occa dossenijidsa dissera tajaradsapa cappirahissa tahitohui. Badsira tehe cajiraha najaro naqui todininitohui. <sup>27</sup> Nadsama aja ohuadsa huadiqqui najarideni tamine ojanijine jiperacquiri najarideni ohuahuaji teccajonabaqquimanadsa obacchohuaji domo huadsapa tinajica-baqquimanajo” najari tamine tojedsati atti –najari Jeso.

### *Jesopa Jerosarelsa bacco todsimajari*

*Mateo 21.1-11; Maraco 11.1-11; Huano 12.12-19*

<sup>28</sup> Jesopa ima huati huati taha jicadsapa denima jai tojajari, Jerosarehuaji bacco toquinahijine. <sup>29</sup> Tahidepa ssono onini Oribodsa jai tojemorajari. Najaro ssonodsa odsa capamema najaro pamehe anijaro, oninidenipi Betapaque, Betania najaro. Najaro odsa pamehedsa bacco toquinabote nadsa pocca dodosse tabaqqui pamahadsa huati tajari: <sup>30</sup> —Jari, ajicca odsa capamema nanihuaji ticadapoji. Nanihuajipi bojo namidsadsa napidsati ssoque dsanaha huahi. Najari bojopa idedsa madija huittari-jaracchi. Najari dicca tiquinadsa teccanimanajo –najari. <sup>31</sup> —Naraha tiadenidsa madija attipa: “¿Nejecotohui bojo dicca tiquinajari?” nadsapa pohuadsa huati tiquinana: “Ia Medsede ajajari bojo tohui nadsapaja” tiquinana –najari Jeso.

<sup>32</sup> Nadsapa tohuedanaja, bojo napidsati ssoque dsanaha huahi qqui quinajari, pina aja Jeso huati tajarissa najaro. <sup>33</sup> Bojodsa bacco toquinadsapa dicca quinana jinedepa: —¿Nejecotohui occa bojo dicca tiquinajari? –najari. <sup>34</sup> Naraha manaco pohuadeni cacomeramanajari: —Ia Medsede tohui nadsapaja –quinajari. Nadsapa jinede jehe nadsa eccanimanajari.

<sup>35</sup> Nadsapa bojo eccanimanajari... Jesohuaji bacco nanimanadsapa poccadeni etero huapicca motarajaro ssiti quinadsa bojo idedsa bina quinadsa nahidsa inahittari-manajari Jeso. <sup>36</sup> Nadsapa Jeso bojodsa toccahi tedsejema pohuadsa jahiridsajarideni poccadeni etero jahui bina idsanapomanajaro, pohuadsa: —Deni tijani –quinahijine. Nadsapa Jeso jahui bina tani motta toccadsanapojari. <sup>37</sup> Nadsapa ssono Oribo jahui toqquedsippanihuaji bacco tabote nadsa pocca dodosse tabaqqui, pohuadsa jahiridsajarideni huapima Jeso canahato-huajapohui canahi qqui toquinapoja najari-ijinea Diodsa tohuatidsemana-dsanapojari. Jiri jiri dsanapomanaja mohua mohua dsanapomanaja najari. <sup>38</sup> Attidenipa: —¡Ia Medsede onima ccajonajaridsa biquehera tojana, tojana! ¡Pohuapa ia Isaraeri potemahideni icca tamine! ¡Pohuadsa

biquehera tojana, tojana! –dsanapomanajari. —Memehuaji Dio icca imadsa cajoneri canahi, canahi, najaro jonehe tojaridsanijine. ¡Memehuaji Diodsa madimanajarideni pohuadsa: “¡Deni tijani!” quinana, quinana! –quinajari, huahua dsanapomanadsa.

<sup>39</sup> Nadsapa nahi odsa pananihuajicca madija huapima Jesocca madija tedseje toqueriqqui najari. Naraha nahidsa jodiodeni mota marinaja pariseodsa jehe quinajarideni quejemamanajari. Najarideni motaha Jesodsa huati toquinajari: —Mamaride, ticca dodosse tabaqqi huati tinabaqqiyo. Nama nama quinahipa oppina tani. Pohuadeni joma tinabaqqiyo –quinajari. Aja pariseodenipa Jesodsa huatidsemanahijine jiperaqqiri najari.

<sup>40</sup> Naraha Jesopa pohuadenidsa huati tajari: —Tiadenidsa huati onana: Aja occa dodosse tabaqqi joma onanabaqqidsapa aji jahui inidicca sibana Diodine mohua mohua quinanitohui. Occa ima huati toquinanitohui –najari Jeso.

<sup>41</sup> Nadsapa Jeso Jerosarehuaji tohuajiradsa najaro odsa panani qqui tadsapa nahicca madijatohui oji oji najari. <sup>42</sup> Pohua attipa: —A, jidapana tiadenidsa Diocca jonehe tojanitohuiraha ssamoqqiri tiquinajaro. Jehe, ajijaro jonehe pajissacca tohuini tiquinejeradsa najaroline Diocca ima tiadenidsa ahuato tejerajaro. <sup>43</sup> Nema tiquinadsapi nidsa ima oppina tehe tiadenidsa tojanitohui. Jerosarecca siba hua nahuajanini memedsararaha idenihuaji ticcadeni huadidenipa nami ppa inamaro-manadsa siba hua nahuajanini tetepi bacco toquinadsa cottajahuajanimanaha jicadsapa tiadenidsa ssonarimanahitohui. <sup>44</sup> Nadsapi tijicaridsanitohui. Ticcadeni odsa siba hua tamaroni huapima naqui pohuadenijine cco-cco bototo tohuedi, cco-cco bototo tohuedi naridsanitohui. Tiadeni Tonassijade Cristo-Mesia tiadenidsa Dio dosse inaronaraha tibodideni pajissa tiquinejerajaro. Nema tiquinadsapi ima oppina tehe tiadenidsa tojanitohui –najari Jeso.

*Diodsa dada toqqimacca odsadsa manaconitohui dadadedeni mohua ininebaqqijari*

*Mateo 21.12-17; Maraco 11.15-19; Huano 2.13-22*

<sup>45</sup> Nadsapa Jeso Jerosaredda bacco todsimadsa Diodsa dada toqqimahuaji toqquedsimajari. Najaro odsacca boronidsa madija bani bedi Diodsa da tahijinecca dade toquejenahi qqui tajari. Manaconitohui dadadedeni qqui inabaqqidsapa huapima mohua ininebaqqijari. <sup>46</sup> Nadsapa pohuadenidsa huati tajari: —Dio Atti dsodo nanidsa ajima najaro: “Occa odsapi ohuadsa huati huati toquinahijinecca odsa tocajanitohui” naponi nade Dio Atti dsodo nanidsa. Naraha tiadenipi madija titicamaisa-baqqumana nadsa tijinedenia pina bobotidedenicca quequeriqqui odsassa ticanamanajaro –najari.

<sup>47</sup> Jesopa huada huajijiradsa Diodsa dada toqqimahuaji mari mari ihicanabaqqi najari. Naraha dada toqqimade taminedeni, jodiodenicca marinaja maridedeni, odsa panani Jerosarecca deni toquejenajarideni quinadsa Jesodsa jiperaqqiri nadsa pohuadeni attipa: —¿Nejecoma inanadsa Jeso inanadsoqquehijine? –quiquinana-jari. <sup>48</sup> Jeso dsoqquehijine tohuini quinaraha madijapa Jesocca marinaja pohuadenidsa bica tadsa mittade dissassera taja najari. Nadsapa inanadsoqque-manahijine pohuadenidsa ssamo tajaro.

## 20

*—¿Nejecojaricca dacorehe ticajijaro? –quinajari Jesodsa*

*Mateo 21.23-27; Maraco 11.27-33*

<sup>1</sup> Jesopa huada huajijiradsa Diodsa dada toqqimahuaji madija huapima mari mari ihicanabaqqi najari. Ima bicani icassiejeranijinecca Jeso madija mari icanabaqqiraha pohuadsa jiperaqqiri najarideni aja dada toqqimade taminedeni, jodiodenicca marinaja maridedeni, jodiodeni ime jocohuideni quinadsa Jesodsa

tohuajressimanajari. <sup>2</sup> Nadsapa pohuadsa huati toquinajari: —Iadsa ticca ima tecomeraji. ¿Nejecojaricca dacorehe ticajijaro? ¿Nejecojari attidsa dadadedeni mohua tininebaqquijari? –quinajari, Jeso pohua cacomerahijine tohuini quinadsa.

<sup>3</sup> Naraha manaco Jeso pohuadenidsa huati tajari: —Ohua naqui tiadenidsa huati onana. Ohuadsa tecomeramanaji. <sup>4</sup> Huanopa ¿nejecojari icadossedsa topa idsanabaqquijaritta? ¿Diojine ttarana, madijajine ttarana? ¿Tettideni nejecoma tiquinani? –najari Jeso.

<sup>5</sup> Naraha taminedenipa pohuadenira huati tocanirere canajari: —Jaho “Huanocca topanijipi Diocca dosseniji” inadsapi Jesopa: “¿Nejecotohui pohuadsa jehe tiquinejerajarotte?” nahitohui –quinajari. <sup>6</sup> —Naraha “Huanocca topanijipi madijacca dosseniji” inadsapi madija sibadsa ia toquinabaqquirana. Aja madija huapima attidenipa: “Huanopa Dio icadossejari. Dio Atti cacomerabotedija” quiquinanade –quinajari taminedeni, madijadeni noppine cappinamanadsa. <sup>7</sup> Nama quinadsapa taminedeni Jesodsa huati toquinajari: —Huano madija topa idsanabaqquihijine pohua dossedepa ssamomo inani –quinajari.

<sup>8</sup> Nadsapa Jesoa: —Ohua naqui ohua dossede onipa tiadenidsa ohuacomera-jarahi –najari.

*Huidsaja cacahuade tabaccoraqquri najaridenicca ima  
Mateo 21.33-44; Maraco 12.1-11*

<sup>9</sup> Dsotode Jesopa pocca marinaja ajijaro namidsa imadinicca ima tadsajani madija mari icanabaqquijari: —Madijapa pocca huidsajadsa ppa nahi uva pohuara ppa inajari. Nadsapi pocca huidsaja ecahuamananijine madijatohui qqui naridsajari, nahi pocca huidsajadsa tarabadsa quinahijine, ppa nahi uva ecahuamanahijine. Uva bono jadadsapa motapa huidsaja jinededsa tojahijine. Motapa huidsaja cacahuadedeni pohuadenidsa tojahijine. Nadsapa pocca huidsaja ecahuamananijine madija qqui inabaqquidsapa pocca huidsaja pohuadenidsa inebojaro. Nadsapa jinede dsama huaji tanihuaji toccajari. Nahidsa madi-dsanapoccahijine. <sup>10</sup> Uva bono jadahicca abadsico bacco tadsapa huidsaja jinedepa huaji tanidsa madiraha pocca dodosse ojaría pocca huidsajahuaji dosse inanijari, huidsaja cacahuadedeni uva bono mota pohuadsa da quinahijine. Naraha pocca dodosse huidsajahuaji bacco nanidsapa huidsaja cacahuadedenipa inajidsomanajari. Uva jiraha dosse inanimanajari. <sup>11</sup> Nadsapa huidsaja jinede pocca dodosse ohuaha dosse inanijari. Huidsaja cacahuadedenihuaji bacco naniraha najari naco inajidsomanajari. Itamassomanadsa uva jiraha dosse inanimanajari. <sup>12</sup> Nadsapa pocca dodosse ohuaha dosse inanijari. Naraha najaripa inabiqueramanadsa huidsaja inidihuaji jadsirema joca coro ininemanajari.

<sup>13</sup> —Najari toccanidsapa huidsaja jinede attipa: “¿Nejecoma onanijine? A, jehe, ajima onana. Occa ejedeni ohua obonoccoriccana dosse onanina. Najaridsana cappinamanahitohui” najari. <sup>14</sup> Nadsapa dosse inanijari, toccaniraha huidsajahuaji bacco nanidsa huidsaja cacahuadedenipa pohua qqui toquinadsapa pohuadenira huati tocanirejari: “Ajaripa huidsaja jinede bedi. Nidsaranibote imehi dsoqquedsa huidsajapi pohuadsa tojanitohui. Jari, inanadsoqquena, huidsajapi icca tojanijine” quinajari. <sup>15</sup> Nama quinadsapa huidsaja jinede bedi dama quinadsa huidsaja inidihuaji joca quinadsa inanadsoqque-manajari –najari Jeso.

Nadsapa pohuadsa queriqquimanajaridenidsa huati tajari: —Jari, tibodideni huatoji. Huidsaja jinede pohuadenidsa ¿nejecoma napadsaja? <sup>16</sup> Pohuapa ima mittadsapa pocca huidsajahuaji toccanipomahitohui. Manaco pocca huidsaja cacahuadedeni inajicaridsahitohui. Pocca huidsajapi madija ohuahadenidsana da inanitohui –najari Jeso.

Naraha pohuadsa queriqquimanajaridenia najaro ima mittamanadsapa: —¡Jaho, najaro ima iadsa toja-gerana! –quinajari.

<sup>17</sup> Nadsapa Jeso pohuadeni icattabaqqui nadsa huati tajari: —Tettidenipi: “Najaro ima iadsa toja-jerana” tiquinaraha pajissa tojanitohui. Najaro imassa najaro Dio Atti dsodo nanidsa dsodo napojaro. Imapi ajima najaro:

“Odsa sibadsa icanahatomananijinepi nanahatodedenipa siba ojariepi ettajomanani nade.

Naraha dsotodepi najaro sibana odsa daco cajiranijine tojajaro”

nani Dio Atti dsodo nanidsa dsodo napojaro. <sup>18</sup> Nadsama najaro siba dacorehe cajijarodsa madija tohuedimamanadsapa poccadeni ima tossamodsapi assiredeni tajoriridsamanajarissa quinahitohui. Najaro siba madijadsa ssonaridsapi mere tocaniredsapa jamiromanahissa tahitohui –najari Jeso, pohua tahimari huati tadsa. (Aja pohua atti nama najaripa madija pohuadsa pajissa quina-jaradsapa paja jicarihi nahitohui, najari.)

<sup>19</sup> Nadsapa dada toqquimade taminedeni, jodiodenicca marinaja maridedeni quinadsa Jesocca marinaja mittamanadsapa bodideni nahatoqquiri najari: — Jesopa icca ima huati huati tajari, iapi pohua ettajojarijine –quinajari. Nadsapa Jesodsa huadimanadsa: —¡Jari, jidapana Jeso todsepe inanana! –quinaraha madija noppinedeni cappinamanadsa dama quina-jarajari.

*—¿Romanodenicca taminedsa icca dsiniro mota da inanijine bica taqui? –quina-jari*

*Mateo 22.15-22; Maraco 12.13-17*

<sup>20</sup> Nadsapa dada toqquimade taminedeni, jodiodenicca marinaja maridedeni quinadsa Jeso inoccodsamanajari. Attidenipa: —Jesopa romanodeni jiperaqquiri nahicca huati tadsapa romanodenicca dosseniji cacahuadsa huati inanijine, nahi pohua dsepedsa tojahijine –quinajari. Nama quinadsapa poccadeni madija mota Jesodsa huati toquinahijine dosse inabaqquimanajari. Pohuadenipa pina pajissa Jeso pohua attitohuissa quinaraha pohuadeni bodidsa maidsehe najoramanajari. Nadsapa Jesodsa tohuajiressimanajari. <sup>21</sup> Pohuadenipa Jesodsa ajama quinajari: — Nija, Mamaride, ticca marinajapi toccanissa tajaro nahatoqquiri inani. Ticca ima dsori torani naridsajaro. Madija attideni noppine ticappina-jeradsapi ticca ima onihi toja-jerajaro. Madija deni tojajari, madija dsepe sse tajari, madija ajamani tojajari tedsejepa tiadsa najarissa caniqquimerajari. Pajissara Diocca marinajadsa madija madimanahissa tahijine mari mari titicanabaqqui najari –quinajari Jesodsa. <sup>22</sup> — Nadsama iapi romanodenicca tamine deni tojahicca pocca dossenijidsa icca dsiniro mota pohuadsa da inanijine ¿bica taqui? ¿Bica tejerarane? Moisesicca marinajadsa ¿oppina taqui? ¿Oppinera tarane? ¿Tetti nejecoma tani? –quinajari maidseheda.

<sup>23</sup> Pohuadsa ima inassonarimananjine huati toquinaraha Jeso poccadeni maidsehe nahato tajari. Nadsapa pohuadenidsa huati tajari: <sup>24</sup> —Jari, dsiniro denario ohuadsa nohue ticanamanaji –najari. Nohue icanamanadsapa huati tapomajari: —Jari, ajijaro ccararadsapi ¿nejecojari corimena anijaro? ¿Nejecojari oni dsodo najaro? –najari Jeso. Naraha pohuadeni attipa: —Romanodenicca taminedija –quinajari.

<sup>25</sup> Naraha Jeso attipa: —Romanodenicca tamine pocca dsiniropi pohuadsa da tinanimanaji. Naraha Diocca tiquejenadsapi Pohua jipa tahiccara Pohuadsa da tiquinaji –najari Jeso.

<sup>26</sup> Naraha taminedeni, mamaridedeni quinajaripa Jeso atti cobara inanamanadsa madija queriqquimanajari huapima mittamanahijine tohuini quinaraha pajiramana-jarajari. Jabojomanadsa attidenipa: —A, icca ima ecomeranjine nahato tajaria –quinadsa todidimana najari.

*Nidsa jicamanajarideni nahatonimanadsapa cajicaji nohueranitohui*

*Mateo 22.23-33; Maraco 12.18-27*

<sup>27</sup> Nadsapa Isaraeri potemahi jodiodeni mota marinaja onini sadosesda jehe quinajarideni Jeso madihihuaji jahijonajari. Poccadeni marinajapi: —Idsoqquedsapi inahatoninijine nohuerani —quiquinanajari. <sup>28</sup> —Najaro imadsa Jeso atti ijine tossamodsa cobara tana —quinadsa Jesodsa najaro ima huati toquinajari: —Mamaride, Moisesicca marinajadsapi ajima nani: “Maqquidejepa amoneje cajiraha ejedeni jiraha dsoqquedsapa pocca amonejepi pohua imecotena icajina, nahi ejedeni cajidsapa pocca ato dsoqquejaricca ejedenissa nahijine” nade Dio Atti Moisesijine dsodo nanidsa —quinajari. <sup>29</sup> —Nadsama tiadsa ima ajima najaro huati inana: Aja pohuadeni imecote pohuadenira 7 quinaha madimanajari. Tahideccaha amoneje cajipojari, naraha bedi jiraha dsoqquejari. <sup>30</sup> Dsotodecca naco pohua ohuaha bedimeni icajiraha ejedeni jiraha dsoqquejari. <sup>31</sup> Dsotodecca naco najaro amoneje icajiraha najari naco ejedeni jiraha dsoqquejari. Najarossa dsanapojaro cajide 7 quinaraha ejedeni jiraha jicajari. <sup>32</sup> Najarideni jicadsapa poni naqui dsoqquejaro. <sup>33</sup> Nadsapi dsama jicadsa madija nahatonimanadsapa pohua imecote 7 quinajaripa najaro amoneje icajiqquimanaporaha ¿nejecojarina ponicca maqqui tojapadsaja? —quinajari.

<sup>34</sup> Naraha Jeso attipa: —Jidapana aja namidsa madimanajaridenipa caji caji cacana nadsa madimanaccajari. <sup>35</sup> Naraha nidsa dsotode madijapa memehuai Dio madihihuaji madimanadsapa nama quinapoma-jarahitohui. Caji caji canapoma-jarahitohui. Aja Diodsa iboraqquri najaridenipa Dio inapajirabaqquihissa taja nadsa pohuadeni inahatonibaqquihitohui. <sup>36</sup> Nadsapa pohuadenipa dsoqquemanapoma-jarahitohui. Pina Diocca dodosse tabaqqui memehujiccassa quinahitohui. Diocca nahatonihe cajimanadsapa Diocca ejedeni toquejenajari.

<sup>37</sup> —Nadsama Diojine madija nahatonimanahicca imapi Moisesi dsodo inajaro. Aji ahua diji tani tahamarinidsa Moisesipa ia Medsede Dio Atti dsodo inajaro: “Ohuapi Dio, ticca idideni Abarahao, pohua bedi Isahaca, pohua bedi Jacobo quinajaridenicca Dio ojani” nahi nade, Moisesijine dsodo nanidsa. <sup>38</sup> Aja Dio Atti nama nadsapa Abarahaodeni nahatonimanadsa madimana-dsanapohuicca ima ahuato tajaro. Diopa paja dsoqquemanarihi najaridenicca Dio jarahi. Diopa camittaqquri najaridenicca Dio. Pihuapa jidapana naco poccadeni Dio. Pihuadsa huapima madimana-dsanapojari —najari Jeso.

<sup>39</sup> Jodiodenicca marinaja maridedeni motana Jesodsa huati toquinajari: —Jehe Mamaride, imapi najarona paji —quinajari.

<sup>40</sup> Nadsapa aja huati toquinapojaripa cappinamanadsapa apaja quinajari.

—¿Cristo-Mesiapa nejecojari potemahi tiquinajaro? —najari Jeso

*Mateo 22.41-46; Maraco 12.35-37*

<sup>41</sup> Jesopa madija bodideni huatoma-manahijine pohuadenidsa huati tajari: —¿Nejecotohui madija attidenipa: “Cristo-Mesiapa Dabi Potemahi” quiquinanajari?

<sup>42</sup> Naraha tamine Dabipa maittaccadsama madidsa pocca jjiridsa pohua tedsejemacca ima dsodo inapojaro. Dabicca dsodonijipi ajima najaro:

“Ia Medsede Diopa ohua Medsede Mesiadsa huati tajari: ‘Ohuinori nahatonihuaji tittariji. Ohua tedsejepi tohuatti dacorajaro ticajiji’ najari. <sup>43</sup> ‘Nidsaranibote tia huadidedenipa ajamani onanabaqquihitohui. Poccadeni dacorehepi onajicanitohui’ napohui nade Dio.”

<sup>44</sup> Naraha madija attidenipa: “Cristo-Mesiapa tamine Dabi Potemahi” quiquinanadsapa ¿nejecotohui Dabipa pohua potemahidsaraha: “Ohua Medsede” napojaritta? —najari Jeso.

*Pina jodiodenicca marinaja maridedenicca madiessa tiquinejeraji*

*Mateo 23.1-36; Maraco 12.38-40; Roca 11.37-54*



<sup>45</sup> Madija huapima taharibobo canadsa Jesopa pocca dodosse tabaqquidsa huati huati tajari: <sup>46</sup> —¡Paji, tiadenipi! Pina jodiodenicca marinaja maridedenicca madiessa tiquinejeraji. Pihuadenipa etero dequerajarodsa huedsaridsamanadsa attidenipa: “Tapi pina taminessa inani” quiquinanajari. Aji dadahuaajicca jahuidsa jahiridsadsa naco madija pihuadenidsa: “¿Nija, bica tinani? Tiapi deni tijani” quinahijine tohuini quiquinanajari. Dio Atti mamarihuaaji jassi tarihijinepa deni toquejenajaridenicca huihuittaridsa jassi tarihijine tohuini quiquinanajari. Jipaqque imenidsa naqui deni toquejenajaridenicca huihuittaridsa jassi tarihijine tohuini quiquinanajari. <sup>47</sup> Nadsama tabira tocajamanajarodeni ponideni madimananijineccaraha icamaidsabaqqui-manadsa pihuadenidsa totoja nadsapi ponidenicca odsa naqui pihuadenidsa totocajaridsa najaro. Naraha poccadeni tabaccorehe ahuatora tanijinepi Diodsa huati huati toquinadsapa poccadeni huatinaja dequerajaro, aja madija pihuadenidsa: “A, Diodsa diseraqquri nahi” quinahijine. Pihuadenipa Dio Attima mamaidsamana nadsapa nidsa Diocca najidsohue denima oppina tanicca pihuadenidsa ssonarinitohui –najari Jeso.

## 21

*Amoneje tabira tocajani ponicca dsiniro Diodsa da inanicca ima  
Maraco 12.41-44*

<sup>1</sup> Jesopa Diodsa dada toqqumahuaji dsepedeni sseqquiri najarideni dsiniro dade toquejenajari qqui inabaqquijari. Poccadeni dsiniro da naqquinajacca bahodsa hua idsamanajaro. <sup>2</sup> Nanihuaaji naqui amoneje tabira tocajanipi poni madinijinecca dsiniro bedeniraha ponicca danijijine capamehe cororo icadsajaro. <sup>3</sup> Nadsapa Jeso pihuadsa toqueriqquijaridenidsa huati tajari: —Pajissara tiadenidsa huati onana: Ajijaro amoneje tabira tocajani ponipi cappiraraha ponicca daniji dsiniro bedeniraha deni tojani. Pina Diodsa denima da inajarossa najaro. Naraha aja huapima dsepedeni sseqquiri najaridenicca danijipi pina ajimani Diodsa da quinajarossa najaro. <sup>4</sup> Pihuadenipa poccadeni dsiniro mota arobeni da quinajaro. Naraha ponipi cappirajaro, tohuati nahana tajaro. Poni madinijineccaraha da inehe jicajaro –najari Jeso.

*—Diodsa dada toqqumahuajicca odsa taboridsanitohui –najari Jeso  
Mateo 24.1-2; Maraco 13.1-2*

<sup>5</sup> Jesocca dodosse tabaqquipa Diodsa dada toqqumahuajicca odsa qquide bica tocanadsa imahaha canajari: —A, siba noponi bicabotedsa nahatoridsajaro. Madijacca daniji oro dsibehi tajarodsa nehebedsoridsajaropi bicaqquri nani –quinajari. <sup>6</sup> Naraha Jeso attipa: —Aji odsa imeni sibadsa nahatoridsani jidapana qqui tiquinaraha nidsa dsotodepi taboridsehe jicanissa tanitohui –najari Jeso.

*Dsama jicani tohuajiradsa nahatoqquri inanijinecca ima  
Mateo 24.3-28; Maraco 13.3-23*

<sup>7</sup> Nadsapa Jesocca dodosse tabaqqui pihuadsa huati toquinajari: —Ia Maride, jidacca huati tinajaropi ¿nejecoma nadsa tojapadseje? Najaro ima tohuajiradsa nahatoqquri inanijinepi ¿nejecora qqui inapopadseje? –quinajari.

<sup>8</sup> Nadsapa Jesoa: —Paji, madija tiadeni tocamaidasabaqqui-manarana. Nidsa madija huapi taha pihuama ohua onidsa maidsamanadsapa: “Ohuapi Cristo-Mesia ojani” quiquinanahitohui. “Jidapana dsama jicanicca bacco tani” quiquinanahitohui. Naraha najarideni attidsa jehe tiquinejeraji. <sup>9</sup> Nadsama madija dsama onihicca, dsama onihicca tedseje jadsire imeni inahatomanani tahimarini timittamanadsa naqui ticappinamana tejerana. Ticcadeni dsamahuaji, dsama onihihuaji

naco huadiqquiri najarideni taminedenicca cacahuehe najidsoridsamanahi timitamanadsa naqui ticappinamana tejerana. Najaro ima oppina taniccapi tahide tojaporaha dsama jicanijinepi nohueraccanitohui –najari Jeso.

<sup>10</sup> Jesopa denima huati huati tajari: —Nadsama madija dsama onihicca, dsama onihicca tedseje jadsire inanamana-ridsanitohui. Tamine ohuahacca madija, tamine ohuahacca madija tedseje cahadire-ridserahitohui. <sup>11</sup> Nadsama namidsadsa imeni naqui caji tanitohui, pemi naqui cajiridsanitohui. Dsamacoma naqui dsama onihidsa, dsama onihidsa cajiridsanitohui. Nadsapi memehuaaji naqui oppina tanicca ahuatodsa tijabojomananitohui. Najaro qqui tiquinadsapi dsama jicanicca bacco tani nahatoqquiri tiquinanitohui –najari Jeso.

<sup>12</sup> —Naraha aji ima huapima huati huati onajarocca toja-jeraccadsama tiadenidsa ima tojaridsaponitohui. Madija huadiqquiri najarideni tiadeni tadamamanadsapa tiadeni tonajidsobaqqui-manahitohui. Jodiodenicca Dio Atti mamarihuaaji tiadeni tohuaqquedsimabaqqui-manahitohui, toponi cocorodsa naqui tiadeni corotodsima-baqquimanahitohui. Otahimari tiadenidsa tojajaro acconi huadimanadsa dsama onihicca dsama onihicca madija tamine deni toquejenajarihuaaji tiadeni tohuaqquedsimabaqqui-manahitohui. Dsama cacahuadedenihuaaji naco tiadeni tohuaqquedsimabaqqui-manahitohui. <sup>13</sup> Nani pohuadeni dsepedsa tiquejenadsa taminedenidsa ticcadeni ima tecomeramanadsapi otahimari naqui mittamanahijine.

<sup>14</sup> —Nadsama ticcadeni ima tecomeramanadsapi tiadenidsa ima ssonari-jeranijine tibodideni titinajoramanapo nejerana. <sup>15</sup> Tettideni tecomeramananijinepi tiadeni acco ocamabaqqunitohui, tiadeni huadidedeni tettideni inassamomana-jeranijine, ima huatide nahatoqquiri tiquinanijine. Nadsapa pohuadeni attina tettidenidsa ajimani tojanitohui. <sup>16</sup> Naraha tiadeni huadidedeni naco ticca abi itide, ticca ami nitide, timecotedeni itide, ticca madija itide, titesse itide pohuadenipa otahimari tiadsa tojajaro acconi huadimanadsa todsepe tiquejenanijine tiadeni eccoramana-ridsanitohui. Tiadeni mota naqui tiadeni inanadsoqque-maneje camaridsanitohui. <sup>17</sup> Occa madija tiquejenajarojinepi madija huapimapa tiadenidsa jiperaqquri nahitohui. <sup>18</sup> Naraha Dio tiadeni tohuacahua-baqquihitohui. Pohua jipa tadsa naco titatideni conani ojarie amossineje cama-jeranitohui. <sup>19</sup> Nadsama tiadenidsa ohuattipi: ¡Dacoco tijiraji! Najaro huadie tinahanamana-dsanapodsapi tiadenina ticassiejeranitohui –najari Jeso.

<sup>20</sup> Jesopa dsama jicanicca ima denima mari icanabaqquijari: —Nidsa dsotode ticcadeni odsa panani Jerosare huapihuaaji jajadsirededeni cottajahuajanimanaha jica nahi qqui tiquinadsapi: “Jerosare jicanicca huada bacco tani” tiquinana. <sup>21</sup> Nadsama aji dsama Jodeahuaaji timadiridsa-manajaropi ssonohuaaji tidomo toqqemorana. Jerosaredsa timadimanajaro naqui tidomo toccana. Aji huidsajadsa timadimanajaropi odsa pananihuaaji jai tijani tejerana, tijicarana.

<sup>22</sup> —Najaro ima oppinabote tojajaropi Jerosarecca madija iboqquiri nadsapa Diocca najidsohue pohuadenidsa ssonarinitohui. Pina Dio Atti dsodo napojarossa nehe tojanitohui. <sup>23</sup> Najaro ima oppina tajaro bacco nadsapi amoneje jiamanajarodeni, bacconideni ijimanajarodeni naqui joppa toquinanijine tohuati nahanaqquiri nanitohui. Jehe, ajijaro dsamacca madija Diocca najidsohuejine ocasserani ahuanahitohui. Diocca huadie imeni ajajari madijadenidsa ssonarinitohui. <sup>24</sup> Jadsirejinecca massitodsa motadenipa jicaridsahitohui. Motadeni naco jajadsirededeni itadamanaridsadsa pohuadeni dsepedsa toquejenadsapa dsama onihihuaaji dsama onihihuaaji iaccanibaqqui-ridsamanahitohui. Nadsapa jodio quejena-jarajarideni deni toquejenadsapa Jerosare inatabaccoramananitohui. Pohuadenijine Jerosarepi pina ttai ttai tojajarossa nanitohui. Naraha dsotodepi poccadeni huajano Jerosarehuaaji madimanahijine pajiranissa tadsapi najidsohue jicanitohui –najari Jeso.

*Jeso ccaronapomahicca ima**Mateo 24.29-35, 42-44; Maraco 13.24-37*

<sup>25</sup> Jesopa ima denima huati huati tajari: —Ima nahatoqquiri tiquinaponijinepi maji, abadsico, abadsico bedi najaridenipa tojidsaridsahitohui. Aja memehua-jicca tojidsaridsadsapa namihuaaji madimanajarideni jabojo quinahitohui. Coridsa imenicca passo poni ssodadani tojidsadsapi mohuini oppina tajarojine madija huapima jabojo quinahitohui. <sup>26</sup> Jidapapa aja maji, abadsico, abadsico bedi naco dacoraqquiri naraha najaro ima tojadsapi meme dsadsa nadsa memecca huapima huenene huenene canahitohui. Madijapa: “¡Iadsa dsama oppina tani! ¿Nejecoma napadseje?” quinadsa cappinamanadsapa tossamoridsamanaja huahuatia cos-samanerinaja camahitohui. <sup>27</sup> Nadsana ohuapi Madija Bedi ojajaroa meme essenima oquejemehe occaronapomani madija huapima qqui toquinahitohui. Occa dacorehe, occa deni tojehe ahuato tanitohui. <sup>28</sup> Madija ohuahapa cappinaridsa-manaraha tiadeni occa madijapi aji huati onajaro qqui tiquinadsapi pina tetidsemanana. Memehuaaji ticattamacossassa canana. Ohuapi tiadeni odinibaqquinijine titohuideni occaronanitohui —najari Jeso.

<sup>29-30</sup> Nadsapa ajijaro namidsa imadinicca imadsa pohuadeni mari icanabaqqujari: —Jari, ahua iquiera tahimaridsa ticahatteraji. Ahua iquiera, ahua huapima naco eppe moro nimanihi qqui tiquinadsapi: “Jehe, dsadsajade tojemanini” titiquina najaro. <sup>31</sup> Pina najaro imassa najaro aji dsama jicani tahimarini huati huati onajaro qqui tiquinadsapi: “Jehe, Diocca cacahuehe tohuajirajonani” tiquinana, onajaro —najari Jeso.

<sup>32</sup> —Pajissara tiadenidsa huati onajaro: Aji dsama jicani tahimarini huati huati onajarocca madija dsoqquemana-jaraccadsama najaro ima huapima tojanissa tani qqui toquinacahitohui. <sup>33</sup> Meme, nami naqui jicaridsanissa tanitohui. Naraha ohuattipi jiquejeranitohui. Aji huati huati onajaropi najarossa nanitohui —najari Jeso.

<sup>34</sup> —Paji tiadenipi tiadeni tecahuamananissa taji, tibodideni ccaracossa-jeranijine. Aji bica tejeraraha tohuini tiquinajaroccapa tineboridsamanaji. Aji dse tiquinadsa comani teteridsamana najaro naqui tineboridsamanaji. Aji timadimananicca tohuira tibodideni huahuato najaro naqui tineboridsamanaji. Najaro tinebomana-jeradsa dsama jicanicca huada amadsati bacco tadsapi huajo ticanirenitohui. <sup>35</sup> Najaro huada bacco tadsapi pina tajapa abadsa cassonaridsa tohuittamanajarissa tiquinarana. Dsama jicanicca oppinehepi ajijaro dsama huapimacca madijadsa ssonarinitohui. <sup>36</sup> Najaro noppineni tinajoramanehe timadimanaji, onajaro. Diodsa huati huati titidsanapomana naji, aji ima oppina tehe tojadsa dsori ticanirenijine. Ohuapi Madija Bedi ojajaroa nidsa occaronapomadsapi ima jirehe obaccohuaji tidomodeni huanijine naqui Diodsa huati huati titidsanapomana naji, onajaro —najari Jeso.

<sup>37</sup> Jesopa huada huajjiradsa Diodsa dada toqquimahuaji maride totoja najari. Dsomedsapo Ssono Oribo quiquinanahihuaaji totoccani najari. Nahidsa huahuada najari. <sup>38</sup> Naraha madija huapimapa dsidsidsamassa Diodsa dada toqquimahuaji bacco bacco nanajonamana najari, Jesocca marinaja mittamanahijine.

**22***Jeso todsepe tojahijine ima najoramanajari**Mateo 26.1-5, 14-16; Maraco 14.1-2, 10-11; Huano 11.45-53*

<sup>1</sup> Jodiodenicca ejete imeni tohuajirajonajaro, oninipi Pan ssaja tajarahicca. Najaro ejete onini onihipi Pascoa. (Ettidsapi: Dio tossoiqquimajari, inajaro.) Najaro ejete toja-jeraccadsapi ajijaro ima tojajaro. <sup>2</sup> Dada toqquimade taminedeni, jodiodenicca marinaja maridedeni quinajaridenipa Jesodsa jiperaqquiri nadsa attidenia: —¿Jeso nejecoma inanadsa dsoqquehijine? —quinajari. Naraha pocca madija noppine

cappinamanajari. —Jeso dama inahi qqui toquinadsapa mohua mohua canarana –quinajari.

<sup>3</sup> Nadsapa Joda. Pohuapa Jesocca dodosse tabaqqui 12 quinajari ojaría. Pohua oni ohuahapa Iscariote. Pohua bodidsa imasiri mamaride Satana toqquedsimadsapa pohuana Jeso eccorahijine bodi najorajari. <sup>4</sup> Nadsapa dada toqquimade taminedeni, nahicca odsa cacahuadedeni quinajaridenidsa Joda huatide toccajari. —Jeso tidsepedenidsa onanahijine, onajaro –nadsa pohuadeni tedseje Jeso dama quinahijine imahaha canajari. <sup>5</sup> Nadsapa huatidsemanadsa: —Jehe, nema tadsapi tiadsa dsiniro da inanitohui –quinajari. <sup>6</sup> Nadsapa Joda jehe nadsa bodi najorajari. Toccanidsapa Jeso pohuadenidsa eccorahijine inoccodsaridsajari. Pohua bodipa: —Madija nohue quiradsa Jeso dama tiquinajo, onanijine –najari.

### *Ia Medsedecca jipaqqwie*

*Mateo 26.17-29; Maraco 14.12-25; Huano 13.21-30; 1 Corintodenidsa 11.23-26*

<sup>7</sup> Pan ssaja tajarahicca ejete bacco tapojaropi huada 7 nehe jicanijine. Najaro ejetecca huada tahideccadsa jodiodeni pohuadeni motta edede bedi Diodsa da da quiquinanajari. Edede bedi inanadsoque-manadsa ibanamanadsapa jipamanajari. Najaro ejete oninipi Pascoa quinajari. <sup>8</sup> Nadsa Jesopa Pedro Huano tedseje dosse inabaqquijari: —Jidapana Pascoacca jipaqqwie tinajoramanapoji, dsome ijipaqquinijine –najari. <sup>9</sup> Naraha pohuadeni attipa: —¿Nejecohuaji inajoranijine? –quinajari.

<sup>10-11</sup> Naraha Jeso pohuadenidsa huati tajari: —Jerosarehuaji ticadapoji. Nahidsa madija jojoridsa passo dsojo tanihi qqui tiquinadsapa najari natti ticadamissadsa pocca odsa bacco tiquinana. Nadsapi nahicca odsa jinededsa huati tiquinana: “Ia Maride attipa: ‘¿Nejecohuajicca coba canahuajaninidsa Pascoacca jipaqqwiedsa ojipanijine occa dodosse tabaqqui tedseje?’ napaja” tiquinana. <sup>12</sup> Nadsapa pocca odsa tetepicca coba canahuajanini imeni tiadenidsa nohue inanitohui. Nanidsapi huahuanari, huihuittari najoraponi. Nanidsana jijipa tinajoramanaponijine –najari Jeso. <sup>13</sup> Nadsapa tohuedadsapa pina Jeso pohua huati tajarissa najaro odsa najorani qqui toquinajari. Nanidsa Pascoacca jipaqqwie dsome jipaqquimanahijine najoramanajari.

<sup>14</sup> Jipamanahijinecca maji bacco tadsapa Jeso pocca dodosse tabaqqui tedseje jipamanahijine huahuanaridsa jassi nahujanijari. <sup>15</sup> Nadsapa Jeso pohuadenidsa huati tajari: —Obodipi: Ocasserani ohua-jeraccadsama occa dodosse tabaqqui tedseje Pascoacca jipaqqwiedsa ijipaqqui naccaraho, ohodsanapo najaro. <sup>16</sup> Nadsama ajijaro ejetecca jipaqqwiepi ojipapomanijine huaji taccani. Nidsa Diocca cacahuehe tojadsana nanidsana ijipaqquipomanitohui –najari Jeso.

<sup>17</sup> Nadsapa Jeso dsedse equidi nadsa Diodsa huati tajari: —Jehe Abi Dio, ticca daniji iadsa bica tahi –najari. Nadsapa pohuadenidsa huati tajari: —Aja, tiadeni huapima dse tiquinajo. <sup>18</sup> Ajijaropi tiadenidsa huati onajaro: Diocca cacahuehe tojanijinecca huada bacco tejeraccadsapi uva ppejene dse onapoma-jaraccahitohui –najari Jeso.

<sup>19</sup> Nahi dsotodepa pan pohua dsepedsa idi nadsa Diodsa huati tapomajari: —Jehe Abi Dio, ticca daniji iadsa bica tahi –najari. Nadsapa icanarobedsa dside jai da, dside jai da inaridsajari. Nadsapa Jeso huati tajari: —Ajijaropi ohuemecca ima. Ticassiejeranijinepi ohua ohuana ohua ohuaccoranijine. Nidsa ohua nohue ojiradsa naqui ohuadsa tetideni ajimamana nejeranijine ajima titinanamana nana, onajaro. Aja pan ocanabobiridsadsa tiadenidsa da onaridsadsa tijipamanajaropi titiqueriqquimana nadsa nema titidsanapomana nanijine, onajaro –najari.

<sup>20</sup> Jipaqquimanahi natti naco dsedse equidi nadsa huati tapomajari: —Ajajari dsedsecca imapi Dio madija tedseje jehe canirehijinecca ima dsati tojanijine. Nidsa ohua odsoqquedsa ohuemene toccadsapi najaro jehe canireniji dsati pajissa

tojanitohui. Aji ohuemene toccajaropi tiadenidsa ima bicani tojanijine. Najaropi ticcadeni imasiri manaconi ohuadsa tojadsapi ticassiejeranijine –najari Jeso.

<sup>21</sup> —Nadsa aji ijipagquinidsa ohua ccaccorade naco ajijaro huahuanaridsa ohuadsama jipade huittarihi. <sup>22</sup> Naraha ohuapi Madija Bedi ojajaroa nidsa odsogquenitohui. Pina Diojine maittaccadsama otedsejemacca ima najorapojarossa onanitohui. Naraha ohua ccaccoradedsa oppina tehe tojanitohui –najari Jeso.

<sup>23</sup> Nadsapa pohuadenira huati tocanirere canadsa: —¿Nejecojarina Jeso dsogquehijine madija dsepedenidsa inanahijine? –naridsamanajari Jeso huatimadedeni.

*—¿Nejecojarina iadsa deni tojajari? –quinajari*

*Mateo 20.25-26; Maraco 10.42-43*

<sup>24</sup> Jesocca dodosse tabaqqui pohuadenira ahuaji huati ahuaji huati quinadsapa: —¿Nejecojarina iadsa deni tojajari? –quinajari. <sup>25</sup> Naraha Jeso pohuadenidsa huati tajari: —Madija ohuaha jodio quejena-jarajaridenicca tamine huapimapa dossede dacoraqquri nadsa poccadeni madija dosse dosse quiquinanajari. Dodossede ohuahadeni naco deni toquejenadsapa attideni dacoradsa poccadeni madija dosse dosse nanaridsamana najari. Pohuadenidsa poccadeni madija attidenipa: “Ia acco camade tiquejenani. Iadsa bica taniccara tinanamanajaro” quinaraha maidsa maidsa quinajari. <sup>26</sup> Naraha aji ohuadsa tiquejenajaropi pina najari taminedenissa tiquinejeraji. Aji tiadeni deni tijeje camajaropi pina dsabisso dosseheda ibora tajarissa tiquinadsana bica tani. Madija dossede tijadsa naqui: “Ohuana deni ojani” tejeraji. Ticca madija bijideni acco ticamabaqquridsahina bica tajaro. <sup>27</sup> Ajaro namicca madijapa “Ojipana” nadsapa pocca huihuittaridsa huittaridsa pocca medsena jijipa dsojo dsojo najari, pohua medsedecca huahuanaridsa hua inarihijine. Naraha tiadenidsa huati onajaro: ¿Nejecojarina deni tojajari? ¿Madija huihuittaridsa huittaripari deni tojajarico? ¿Pocca medsena deni tojajarirana? Aja huittaripari deni tojajari. Pocca medsepa ajamani tojajari. Naraha ohuapi tiadeni Medsede ojaraha pina ticcadeni medse ojajarossa najaro, tibijideni acco ocamabaqquijaro. Tiadeni naqui nema tiquinana, onajaro –najari Jeso.

<sup>28</sup> —Aji ohuapi ocasserani ohuadsa, madija ohuadsa ima oppina tanicca inamanadsa naqui tiadenipi ohuadsa paji timadimananini dsanapojaro. Ohuatimade disseraqquri tiquinajaro. <sup>29</sup> Nema najaroa aji ohua tiadenidsa onananihijinepi pina aji occa Abi ohuadsa inanajarossa najaro. Ohuadsama tiadeni naqui madija dossede tiquejenanitohui, onajaropaji. Pina occa Abi ohuadsa huati tapojarissa najaro, ohua cadossejarissa najaro: “Nidsa madija dsama huapimacca dossede tijanitohui” napode. <sup>30</sup> Nidsa occa cacahuehe bacco tadsa huapimacca tamine ojadsa naqui tiadenipi occa huahuanari aji ohua ojipanihuaji ohuadsama tijipamandasanapitohui. Ticcadeni cacahuehe icca madija jodiodeni aja icca idi Isaraeri pohua bedi 12 quinajarideni potemahi tecahuabaqqui-manaridsadsapa poccadeni tamine tiquejenanitohui. Nadsama tiadenipi pohuadeni dossedecca huihuittari 12 quinajarodsas ima cattemade jassi tinariridsanitohui –najari Jeso.

*Pedro pohua namaihsahijine Jeso huati tapojari*

*Mateo 26.30-35; Maraco 14.26-31; Huano 13.36-38*

<sup>31</sup> Jesopa Ssino-Pedrodsas huati tajari: —Ssino, tibodi huatoji. Satanapa titohuideni tonacomabaqquihi. Pohuapa titohuideni Diodsa huati tajari, tiadeni nattome tabaqquihijine. Pina aroso jidsadsa trigo etero toccahijine qqhero huira, qqhero huira quinajarissa najari ohua tinebomananijine tiadenidsa ocasserehe inananitohui.

<sup>32</sup> Naraha Ssino, titohui Diodsa huati huati onajaro, ohua tinebo-jeranijine. Ohuadsa epeje tanitohuiraha, otohura tapomadsapi timecotedeni aja ohuadsa jehe quinajaridenicca jeheniji todacoranijine pohuadeni acco ticamabaqquijo, onajaro –najari Jeso.



<sup>33</sup> Naraha Ssino attia: —Ohua Medsede, ohuapi nema onejeranitohui. Toponi cocorodsa tia coro idsimamanadsa naqui ohua naqui onajorani, tiadsama ohuedsanijine. Tiadsama odsoqquenijine naqui onajorani –najari.

<sup>34</sup> Naraha manaco Jeso attia: —Pedro, tiadsa huati onana: Nidsa ajijaro dsome ssiajaricossanihuaji tacara huahua najaraccadsa tetti tinamaidsanitohui. Ohuadsa: “Onocco jidsa tani” tanitohui. Dsotode naqui: “Onocco jidsa tani” tapomanitohui. Dsotode naqui nema tapomanitohui –najari Jeso.

*Ima oppina tanicca Jesodsa tojabote najaro*

<sup>35</sup> Nadsapa Jeso pocca dodosse tabaqquidsa huati tajari: —Madija maride tiquejenaridsanijine tiadeni dosse onabaqquipodsa jai tijaridsade. Ticcadeni sacco, ticcadeni dsiniro, ticcadeni sapato najari jirehe jai tijaridsaji onadsapi ¿nejecora ticappiramanatte? –najari Jeso. Naraha pohuadeni cacomeramanajari: —Nohuerade. Icappira nehe jaijaridsa-jerade –quinajari.

<sup>36</sup> Nadsapa Jeso pohuadenidsa huati tapomajari: —Naraha jidapapi occa dosseniji tahidessa nejerani. Jidapapi sacco, dsiniro ticajimanadsapi tiaccamanaji. Nadsama jadsirecca massito ticappiramanadsa naqui ticcadeni ssirinijinecca huehuadsa da tiquinadsa mitta tiquinaji. <sup>37</sup> Nadsapi otedsejemacca ima tiadenidsa huati onana: Dio Atti dsodo naponiccapi pajissa ohuadsa tojanitohui. Pohua Atti cacomerabote Isahia dsodo inaponipi ajima najaro: “Nidsa madija attidenipa: ‘Ajajaripa tabaccoraqquri najaridenidsama quejemajari’ quinahitohui” napohui nade Isahia. Najarossa najaropi ohuadsa madija attideni nama quinahitohui –najari Jeso.

<sup>38</sup> Naraha pohuadeni attipa: —Ia Maride, ajidsapi jadsirecca massito capamehe icajini –quinanaja Jesopa: —Jehe, najarodsapi tipajiramanani –najari.

*Jesemanihuaji Jeso Diodsa huati huati tajari*

*Mateo 26.36-46; Maraco 14.32-42*

<sup>39</sup> Nadsapa Jeso huati taha jicadsapa odsadsa toqquenadsa ssono Oribohuaji toqqemorajari. Aja pohua huajijiradsa totocca nahihuaji toccajari. Pocca dodosse tabaqqui naco pohuadsa jai tojemorajari. <sup>40</sup> Aja pohuadeni quequeriqquimana nahihuajicca ahua oribo ppa nahi dopehuaji bacco toquinadsapa pohuadenidsa huati tajari: —Jari, Diodsa huati huati tiquinaji, aji ticappinamanadsa ima tinanamanageranijine –najari Jeso.

<sup>41</sup> Jesopa pocca dodosse tabaqqui jassi tahidsa toqqeqquimajari, cahuaiqquima nadsa pohua pitodsa huittadsa Diodsa huati huati tajari. <sup>42</sup> Ajama najari: —Abi, jipa tinadsapi otedsejemacca ima oppina tanicca ohuadsa toja-jerana, onaraha. Madija huapimacca ima manaconi najidsohue ohuadsa tojadsapi ocasserani ohuanitohui. Pina dsedse bidabote dse onanijinessa najaro. Najaro onahananijine jipera onaraha ohua jipa onanicca tohui onejerajaro. Tia jipa tinaniccana paji. Najarodsana ibora onajaro –najari Jeso.

<sup>43</sup> Nanaja nahi Jeso pohua Diodsa huati huati tahihuaji Diocca dodosse memehujicca ahuatajari. Najaripa Jeso acco icamadsa inadacorajari. <sup>44</sup> Naraha Jeso pohua bodi ocassera-ra canajari. Diodsa huatide todacorahi nadsapa taniccojari. Pohua taniccone toccadsa namidsa catojadsapi pina ama motarehe ssaboro ssaboro najarossa najaro.

<sup>45</sup> Diodsa huati taha jicadsapa pocca dodosse tabaqquihuaji ccanijari. Bacco nanidsapa cahadijahira qqui tajari. Bodideni oji quinajarijine tocamiijireradsapa cahadijajari. <sup>46</sup> Naraha pohuadenidsa huati tajari: —¿Nejecotohui ticahadijajaro? Nocco tiquejenadsa Diodsa huati huati tiquinaji. Ima oppina tehe tojadsapi tijaparimanadsa ima tinanamanageranijine, onapa –najari Jeso.

*Jeso dama quinajari**Mateo 26.47-56; Maraco 14.43-50; Huano 18.1-11*

<sup>47</sup> Jesopa huati huati naccaraha madija huapi taha bacco najonamanajari. Jodana tahidejonajari. Puhuapa Jeso pocca dodosse tabaqqui 12 quinajari ojariaraha pohuana Jesohuaji tohuajiressi, pano mose inajari. <sup>48</sup> Naraha Jeso attipa: — Joda, ohuapi Madija Bedi ojajaroa ¿opano mose tajaropi aja ohuadsa huadiqquri najaridenidsa ohua teccorajaroqui? –najari.

<sup>49</sup> Naraha aja Jeso huatimadedeni attidenia: —Ia Medsede ¿massitodsa itacarid-saco? –quinajari. <sup>50</sup> Nadsapa Jesocca madija ojariana dada toqquimadedenicca tamine deni tojajaricca medse huaribo nahatonihujicca ca taneje tajo canajaro. <sup>51</sup> Naraha Jeso attia: —¡Apajana, denima ca tejeraji! –najari. Nadsapa taminecca medse huaribo bara icanadsapa huaribo tocabiquemanijari.

<sup>52</sup> Jesotohui jahijonaridenipa aja dada toqquimade tamedeni, Diodsa dada toqquimahuajicca cacahuadedeni, ime jocoहुuideni quinajari. Najaridenidsa Jeso huati tajari: —¿Nejecotohui tiadenipi jadsirecca massitoma, huahuaccama jai tija-jonajaro? Nema tiquinadsapi pina bobotidetohui jai tijajonarossa najaro. <sup>53</sup> Nadsa tiadenidsama huajijiradsa Diodsa dada toqquimahuaji ohoquejema naraha ohua dama tiquinehe nejerade. Naraha ohuadsa ima tinamananijinepi dsidsinidsara jai tijajonajaro. Jidapapi tijinedeni dsidsini jinede deni tojajari –najari Jeso. Nadsapa Jeso dama quinajari.

*Pedropa Jesodsa: —Onocco jidsa tani –najari**Mateo 26.57-58, 69-75; Maraco 14.53-54, 66-72; Huano 18.12-18, 25-27*

<sup>54</sup> Nadsapa Jeso dama quinadsa dada toqquimadedenicca tamine deni tojajaricca odsahuaji iaccamanajari. Naraha Pedropa Jeso iaccamanahi nattideni huajima tohuanamissajari. <sup>55</sup> Odsadsa bacco toquinadsapa boronidsa dsippo inadsamanadsa jiade jassi nahuajanijari. Pedro naco pohuadenidsama huittabacossajari. <sup>56</sup> Naraha najaro odsacca medse dsohuato Pedro dsippodsa huittahi qqui tadsa icattoma nadsa aja jassi nahuajanijaridenidsa huati tajaro: —Ajajaripa Jesodsa ccaccaridsa nade –najaro. <sup>57</sup> Naraha Pedropa pohua namaidajari: —Dsohuato, ohuapi pohuadsa onocco jidsa tani –najari.

<sup>58</sup> Nahi dsotode madija ohuaha naco Pedro qqui tadsapa: —Tia naqui Jesocca madija tijani –najari. Naraha Pedropa pohua namaidapomajari: —Ohuapi najaricca madija ojajerani –najari.

<sup>59</sup> Nahi dsotode maji ojaría tossoñiqquimadsa madija ohuaha attipa: —¡Pajissade! Ajajaripa Jeso huatimadedija. Puhuapa dsama arobeni Carireahuajicca madija jidsera tahi –najari. <sup>60</sup> Naraha manaco Pedro pohuadenidsa huati tajari: —¿Nejecoma najaro imara huati huati tiquinajaro? Ohuapi najaro ima ssamo onani –najari. Pedropa najaro ima huati huati nanaja tacara huahua najari.

<sup>61</sup> Nanaja Jesopa cattahuajanihi nadsa Pedro icattoma najari. Nadsapa Pedro pohuadsa Jeso huati tapojaricca ima bodi huatomanijari: —Nidsa ajijaro dsome ssiajaricossanihuaji tacara huahua najaraccadsa tetti tinamaidasani 3 nanitohui –napohui nade. <sup>62</sup> Najaro ima Pedro bodi huatomanidsapa toqquenajari. Pohua motta oji oji najari.

*Jesodsa jidsa jidsa quinajari**Mateo 26.67-68; Maraco 14.65*

<sup>63</sup> Jeso cacahuadedenipa huadiedsa jidsa jidsa quinajari. Jeso huaccade jo narihi najari. <sup>64</sup> Nocco ssoque quinadsa naco pohuadsa huati toquinajari: —Jari ¿nejecojari tia idajari? ¡Tecomerajo! –quinajari. <sup>65</sup> Attideni tabaccora tajarodsa itamassoqquimanajari.

*Jodiodenicca ima cacattemahuaji Jeso pohua cacomerajari*

*Mateo 26.59-66; Maraco 14.55-64; Huano 18.19-24*

<sup>66</sup> Ssajadsapi jodiodeni ime jochuideni, dada toqquimade taminedeni, jodiodenicca marinaja maridedeni quinadsa queriqquimanajari. Nadsapa jodiodenicca ima cacattemadedeni deni toquejenajarideni quequeriqquimana nahihuaji Jeso iaccamanajari. Nahihuaji huapima jai tojedsimadsa pohuadsa huati toquinajari: <sup>67</sup> —Cristo-Mesia tijadsapi iadsa tia tecomeraji: “Ohuapi Cristo-Mesia ojani” taji -quinajari.

Naraha Jesopa: —Tiadenidsa: “Ohuapi Cristo-Mesia ojani” onadsapi ¿ohuadsa pajissa tiquinapadseje? Pajissa tiquinejerani nahato onaponi. <sup>68</sup> Manaco tecomeramananijine tiadenidsa huati onadsapi ¿tecomeramanapadseje? Tecomeramanajeranitohui -najari. <sup>69</sup> —Ohuapi Madija Bedi ojajaroa nidsa dsotode Dio Dacorabote ohua deni tonanadsapa Pohua inori nahatonihuaji ohuittarinitohui. Nanihuaji ohuittaridsapi Abi Pohua tedseje dosse dosse onanitohui -najari Jeso.

<sup>70</sup> Naraha pohuadeni attia: —Nema tadsapi ¿tiapi Dio Bedi tijaqui? -quina-jari Jesodsa. Naraha Jeso pohua cacomerajari: —Jehe, tiadeni ohuadsa nema tiquinajaropaji -najari. <sup>71</sup> Nadsapa pohuadeni attia: —Jidapapi pocca ima huati toquinahijine madija ohuahatohui huahua inejerana. ¡Epeje! Pohua pohua cacomeradsa pohua atti oppina tanicca imittanissa tani -quinajari. Nadsapa najaro imadsa dsoqquehijine najoramanajari.

## 23

*Tamine Piratodsa Jeso iaccamanajari*

*Mateo 27.1-2, 11-14; Maraco 15.1-5; Huano 18.28-38*

<sup>1</sup> Nadsapa jodiodenicca taminedeni nahidsa queriqquimanajari huapimapa totehemamanadsa tamine Piratohuaji Jeso iaccamanajari. Tamine Piratopa romanodeni. Pohuapa jodiodenicca dsama cacahuade tojajari. <sup>2</sup> Tamine Piratohuaji bacco toquinadsa pohuadsa poccadeni maidsehe huati toquinajari: —Jesojinepi ima bica tejerani, pocca ima ajima nani -quinajari. —Jeso madija inequeriqquidsa mari icanabaqquidsapa romanodenicca cacahuehedsa tojiperamanajari. “Iara ia ecahuana” quinajari. Pocca marinaja naqui: “Romanodenicca taminedsa ticcadeni dsiniro mota naqui paca tiquinejeraji” nanaja nahi. Nadsama pohua atti onihi naqui: “Ohuapi Cristo-Mesia, ticcadeni tamine deni tojahicca ccajonahitohui quiquinanajari ojani” nahi naco imittani -quinajari.

<sup>3</sup> Nadsapa Pirato Jesodsa huati tajari: —¿Tiapi jodiodenicca tamine tijaqui? -najari. —Jehe, tetti nema tajaropaji -najari Jeso.

<sup>4</sup> Naraha Piratopa dada toqquimade taminedenidsa, nahidsa madija queriqquimanajarideni huapimadsa huati tajari: —Ajajaripa icca dsamacca marinaja inajidsoje cama-jerani. Ima oppina tanicca inana-jerani. Tettidenidsa onajidsohuijine pajira-jerani -najari Pirato. <sup>5</sup> Naraha pohuadenipa denima jadsirema johua johua quinajari: —Ajajari madija mari mari naridsadsapa pohuajine mohuaniji tojaridsani. Dsama Carireahuaji mari mari napojari. Nahi dsotode naco aji icca dsama Jodeahuaji mari mari naridsadsapa ajadsa bacco najonajari -quinajari.

<sup>6</sup> Madija attideni: —Dsama Carireahuaji mari mari napojari -quinahi mittadsapa Pirato attia: —¿Ajajaripa Carireaccaco? -najari. <sup>7</sup> Nadsapa jehe quinahi mittadsapa tamine Herodehuaji Jeso iaccamanahijine dosse inajari. Herodepa Carireahuajicca cacahuaderaha Jerosaredsa huada pamehe madicajari. Nadsapa Herodehuaji Jeso iaccamanajari.

*Tamine Herodedsa Jeso iaquedsimamanajari*

<sup>8</sup> Tamine Herodehuaji Jeso iaqquedsimamanajari. Aja Herodepa tahide Jeso tahimari mimitta napodsapa: —Jeso qqui onaccaraho -nanaja najari. Nadsapa pohuahuaaji Jeso iaqquedsimamanahi qqui tadsapa huatidsejari. —Jehe, jidapanana pohua canahatori canahi qqui onanitohuia -najari. <sup>9</sup> Nadsapa Herode Jesocca ima mittahijine pohuadsa huati huati dsanaporaha Jesopa pohua cacoma najari. <sup>10</sup> Naraha nahihuaji naco dada toqquimade tamedenedi, jodiodenicca marinaja maridedeni tedsejapa dissassera tadsa ima onihi, ima onihi huati toquinadsapa: — ¡Jesopa tabaccora tahi! ¡Tinajidsojo, tinajidsojo! -quinajari. <sup>11</sup> Nadsapa Herode pocca soldadodeni tedseje Jeso momohua inanamanajari. Jesodsa maidsamanadsapa etero bica taniccadsa inehedsamanajari. Pina taminessa inanamanadsa pohuadsa jidsa jidsa quinajari. Nadsapa Herodepa tamine Piratohuaji Jeso dosse inanipomajari. <sup>12</sup> Tahidepa Herode Pirato tedseje ahuaji jipera ahuaji jipera quinapojari. Naraha Jeso ahuaji dosse, ahuaji dosse quinadsapa najaro huadadsa cajonerajari.

*—Jeso dsoqquehi bica tahi -quinajari*

*Mateo 27.15-26; Maraco 15.6-15; Huano 18.39-19.16*

<sup>13</sup> Nadsapa tamine Piratopa dada toqquimade tamedenedi, jodiodeni ime jochuideni, madija ohuahadeni naco huahua inajonabaqquidsa queriqquijonajari. <sup>14</sup> Nadsapa pohuadenidsa huati tajari: —Aja Jeso ohuadsa teccajonamanapodsapa tettidenipi: “Pohuajine mohuaniji tojaridsani” tiquinaraha tiadeni tinoccodenidsa pohuadsa huati onapa. Pocca ima omittadsapi pina tettidenissa nejerani. Pohuadsapi ima nohuerani -najari. <sup>15</sup> —Tamine Herode naco pocca ima mittaraha pocca ima tabaccora tanicca nohueradsa ohuahuaaji dosse inanipomajari. Aja Jesopa ima tabaccora tanicca inana-jeradsapi pohuapa dsoqquehijine bica tejerani. <sup>16</sup> Nama nadsapa pina ocadossebaqquidsa cossi inaqquimanaha jicadsapa dosse onanina, toccanijine -najari tamine Pirato.

<sup>17-18</sup> Naraha madijapa Pirato: —Jeso toccanijine -nahi mittamanadsa huapima johuahua johuahua canajari: —¡Najaripa dsoqquena! ¡Aja coro todsimapojari Barabana tijine qquenajo! -quinajari. [ Aja huajano huajijiradsa ejete Pascoa tojadsapi Piratojine toponi cocorodsa madija huedsamanajari ojaría qqueqquena najari. ] <sup>19</sup> Naraha Baraba pohuajinena odsa panani Jerosaredsa madija inequeriqquidsa romanodenidsa mohua mohua quinadsa coro idsimamanajari. Pohuajine naco madija dsoqquejari.

<sup>20</sup> Piratopa Jeso tappa inahijine tohuini nadsa madija huapimadsa huati tapomajari: —Jeso apaja onanana. Pohuadsapi ima nohuerani -najari. <sup>21</sup> Naraha pohuadenipa jadsirema johuahua johuahua canapomajari: —¡Ahua porimacossanidsa dsoqquena, dsoqquena! -quinajari.

<sup>22</sup> Naraha Pirato pohuadenidsa huati tapomajari: —¿Naraha nejecotohui dsoqquehijine? ¿Nejeco imara inanajaro? Jesocca ima omittadsapi imari tabaccora tanicca nohuerani. Pohua inanadsoqquehijinepa bica tajarahi. Jesopa pina ocadossebaqquidsa cossi inaqquimanadsapa apaja onanadsa toccanijine, onajaro -najari Pirato.

<sup>23</sup> Naraha madijadenipa Jeso ahua porimacossanidsa dsoqquehijine tohuini quinadsapa dacoco radsa denima johuahua johuahua canapomajari. Nama dsanapomanadsapa pohuadenina deni toquejenajari. <sup>24</sup> Nadsapa Piratopa pohuadeni attidsa jehe najari. <sup>25</sup> Madija Baraba qquenahijine jipaqquri nadsapa Piratojine qquenajari. Aja Barabapa madija inequeriqquidsa romanodenidsa mohua mohua naridsamanadsa coro todsimajari. Pohuapa madija ijine ahuahiraha ijinedeni qquenajari. Naraha Jesona dsoqquehijine pohuadenidsa eccorajari. Pina pohuadsa huati toquinapojari issa inananiijine Jeso dsoqquehijine icadossebaqqujari.

*Jeso ahua porimacossanidsa coba idsanamanajari*  
*Mateo 27.32-44; Maraco 15.21-32; Huano 19.17-27*

<sup>26</sup> Soldadodenipa Jeso iaccamananaja dsama Sirenecca madija Ssinopa huidsajahuaji ccanidsa bacco ijidsamanajari. Jeso ahua porimacossani dsojo inaraha ja tojadsa soldadodenipa Ssino dama ijidsamanadsa icadossemanajari: —Manaco tia ajaricca ahua porimacossani dsojo tinaji –quinajari. Nadsapa ahua porimacossani Ssino johuidsa ibarimanadsa Jeso natti dsojo inamissajaro.

<sup>27</sup> Madija huapi taha Jeso natti jai tojajari. Amoneje naqui nani toquejemamanajarodeni Jesotohui oji oji dsanapomanajaro, jadsirema johua johua dsanapomanajaro. <sup>28</sup> Naraha Jesopa ponidenihuaji qqui nanidsa huati tajari: —Aji Jerosarecca amoneje tiadenipi otohui oji oji tiquinejeraji. Aji tiadeni titohuideni, aji ticcadeni ejedenitohuira oji oji tiquinana –najari. <sup>29</sup> —Aji otohui oji oji tiquinajaropi nidsaranibote aji Jerosaredda ima oppina tanicca bacco nadsa nanidsana pina aji otohui oji oji tiquinajarossa tiquinanitohui. Najaro huada bacco tadsapi madijapa ajama quinahitohui: “Amoneje ccaranipi bicani ahuamanani ojimana-jerani. Ejedeni cappiramanajarojine ojimana-jerajaro. Ponideni dsojorinidsa ejedeni tomide nohue quirajaro naqui ojimana-jerajaro” quiquinanahitohui. <sup>30</sup> Ima oppina tani bacco nadsa madijapa cappinamanadsa ajama quinahitohui: “Jaho, ssono imeni dequerajaro iahuaji cojo naronaccaraho, bodi iquejenadsapi nani oppina tanicca qqui inejeranijine” quinahitohui. <sup>31</sup> Aji ohuapi imasiri onana-jeraraha ohua inajidsomanajaro. Naraha aja Jerosarehuaji madimanajarideni imasiridsa disseraqqiri nadsapa najidsohue pohnadenidsa denima oppina tanitohui –najari Jeso.

<sup>32</sup> Madija pamaha naco Jesodsama topamajonahijine iaccabaqquimanajari. Pohnadenipa botijidede raja, madija inanadsoqquemana najarideni. <sup>33</sup> Ssono Totati Tonanissa nani quiquinanahihuaji bacco tomoramanadsapa ahua porimacossanidsa que tahijine Jeso coba idsanamanajari. Coba idsanamanaha jicadsapa acca icanamacossa-manajari. Aja botijidede raja, madija inanadsoqquemana najarideni naco coba idsanamanaridsajari. Ahua porimacossani onihidsa, onihidsa naridsamanajari. Ohuahapa Jeso que tahi inori nahatonihuaji, ohuahapa Jeso que tahi inori ssamohuaji quinajari.

[ <sup>34</sup> Nadsapa Jeso Imehidsa huati tajari: —Abi, pohnadenipa ohuadsa ssamoqqiri nadsa ohua inanadsoqqe-manaraha epejena. Aji ocasserani ohujaro manaconipi pohnadenidsa tinana-jerana, onajaro –najari Jeso. ]

Nadsapa soldadodeni Jesocca eterotohui siba bedenidsa coro coro quinajari, —¿Pocca etero nejecojaridsana tojanijine? –quinadsa. Najaro sibadsa ittome-manadsapa pocca etero pohnadenidsa ojari ojari naridsajaro. <sup>35</sup> Madija huapima nahidsa cattade domo huajari. Taminedeni naco nahidsa cattade domo huadsa attideni tabaccora tadsa Jesodsa jidsadsa jidsadsa canajari: —Ajana, madija ohuaha inassiajabaqqiraha jidapanana pohua tonassiajana. Pajissa madija Tonassiajade Cristo-Mesia tojahijine Dio icattejidsadsapa nama nahi qqui inana. Nahato taranaja –quinajari.

<sup>36</sup> Soldadodeni naco Jesodsa jidsadsa jidsadsa canajari. Nadsapa jai tojessidsa uva ppejene ssicata, bidada najari Jeso dse nahijine da icanamacossa-manajari, —Pohua comene ojidsama nanijine –quinadsa. <sup>37</sup> Attideni onihi naqui: —Tiapi jodiodenicca tamine tijadsapi tia tinassiajaji –quinajari.

<sup>38</sup> Jeso tati tetepihuaji naqui dsodo nani coba idsanamanajaro. Najaro dsodo nanipi: —Ajaripa Jodiodenicca Tamine –najaro.

<sup>39</sup> Naraha botijidede raja, madija inanadsoqquemana najarideni Jeso inoridsa cobaba dsanajari ojaría Jesodsa atti tabaccora tadsa jidsa jidsa najari: —Tiapi Cristo tijadsapi tia tinassiajaji. Ia naqui ia tinassiajabaqqiji –najari. <sup>40</sup> Naraha aja coba



dsanajari ohuaha attia: —¡Paji, nema tejeraji! ¿Diodsa ticappina-jerajarorane? Tia naqui ahua porimacossanidsa coba dsanahi tijaraha ¿nejecotohui tetti nema tajaro? <sup>41</sup> Aji iapi ponima ocasserani ejerani. Inajidsojarojine ocasserani ejaro. Naraha ajajari maqquidejepa najidso-jararaha ocasserani ahujari –najari. <sup>42</sup> Nadsapa Jesodsa huati tajari: —Jeso, ticca cacahuehehuaji bacco tinadsa ohuadsa teti huato nana –najari. <sup>43</sup> Manaco Jeso pohuadsa huati tajari: —Pajissara tiadsa huati onajaro. Aji jidapana ohuadsama memehujicca dsama bicanihuaji timadinijine –najari.

### *Jeso huatijari*

*Mateo 27.45-56; Maraco 15.33-41; Huano 19.28-30*

<sup>44</sup> Maji itetepi tojadsa dsama nemanehetodsidsini najaro. Dsidsi dsanapojaropi maji 3 bacco tajaro. <sup>45</sup> Maji todsidsidsapa Diodsa dada toqquima odsa imeni bodihuajicca huahuacossa etero sibabotepi Diodsine sseo naronajaro, carobe najaro. <sup>46</sup> Maji najarissa nadsa ssonohuaji Jesopa jadsirema huati tajari: —Abi, ticca cacahueheda ojapomanijine, onajaro –nadsapa Jeso huatijari.

<sup>47</sup> Nadsapa soldado tamine Jeso cacahuadepa dsama todsidsini nani qqui, Jeso huatiahi qqui tadsapa: —¡Dio bica tahi, deni tojahi! –najari. Pohua attipa: —Pajissa, ajajari maqquidejepa bica tahi. Ima cappirajari –najari.

<sup>48</sup> Nadsapa madija huapima Jeso cattade domo huajaridenipa maji todsidsihi qqui, Jeso huatiahi qqui toquinadsapa cappinamanadsa domo toccanijari. Pohuadeni bacco huaccacca huaccacca tocananijari: —¡Jaho, icca dsamadsa ijine bica tejerani, bica tejerani! –tanimanajari. <sup>49</sup> Naraha aja Jesodsa huatideni huanacquiri najaridenipa huaji tanidsa qquide domo huajari. Amonejedeni naqui pohuadenidsama domoni huajaro. Najarodenipi Jeso Carireadsa ccaridsapodsa pohuadsa jahiridsajaroa Jeso pohuadsa Jerosarehuaji jahijonajaro.

### *Jeso ppa idsamanajari*

*Mateo 27.57-61; Maraco 15.42-47; Huano 19.38-42*

<sup>50-51</sup> Nahidsapa madija bicabote madijari. Pohua onipa Dsodse, dsama Jodeacca odsa panani Arimateahuajicca madija. Pohuapa Diocca dosseniji inapajiranissa, pocca ima toccanissa tajaro. Dsodsepa Diocca cacahuehetohui naco najoraha madijari. Pohuapa jodiodenicca ima cacattemadedeni ojaría. Pohua tesse ima cacattemadedeni: —Jeso dsoqquena –quinaraha pohuapa jehe najarajari. Pohua tessedeni Jeso inajidsomanadsa naco najidsode jipera tajari.

<sup>52</sup> Dsodsepa Jeso assire ppa idsahijine tamine Piratohuaji huatide toccajari. Bacco tadsapa Piratodsa huati tajari: —Jeso assire ppa odsahijine ¿jehe taqui? –najari.

<sup>53</sup> Nadsapa Pirato jehe nadsa Dsodse nahi Jeso coba dsanaha que tahihuaji tocanajoranijari. Jeso assire dicca inadsa etero dsojorani onini linodsa jore inacquijari. Jore inacquia jicadsapa tonoccobirihuaji dsojo inajari. Najaro tonoccobiripi sibadsa hui todsimajaro. Najarodsapa madija dsoqquehi podsa-jaraccahi. Najarodsapa Jeso ibedsajari. <sup>54</sup> Najaro huada viernepi jodiodenipa poccadeni jassinajacca huada sabadotohui najoramanajari. Najaro jassinajapi dsomeme nadsa bacco bacco tajaro.

<sup>55</sup> Aji amoneje Jeso pohuadsa Carireahuaji jahijonajarodenipi Jeso assire tonoccobirihuaji Dsodse dsojo inadsapa ponideni naqui nani jai tojajaro. Jai tojamissadsapi tonoccobiridsa Jeso assire ibedsahi qqui toquinajaro. <sup>56</sup> Nadsapi odsahuaji jai tojanidsa majojo majoni bica tajaro, ahua majiconi majoni bica tajaro najoramanajaro. (Pina jodiodeni poccadeni madija dsoqquejari assiredsas sse inamaromanajari, huira inamaromanajarissa inanamananijine najoramanajaro.) Nadsapi jassinajacca huada tojadsapi jassi quinajaro, pina Moisesicca marinajassa inanamanajaro.

## 24

### *Jeso nahatonijari*

*Mateo 28.1-10; Maraco 16.1-8; Huano 20.1-10*

<sup>1</sup> Semana tojapomanicca huada tahidecca domingo dsidsidsamassana amone-jedenipi Jeso noccobirihuaji qquide jai tojanipomajaro. Ahua majiconi majoni bica tajaro najoramanapoje najaro iaccamanajaro. <sup>2</sup> Bacco toquinadsapi qqui toquinaneje tonoccobiripi tohuabeje najaro. Siba imenipi pajimaranihuajina huitteje najaro. <sup>3</sup> Nadsa jai tojedsimadsa qqui toquinara ha Jeso assirepa podsa najarajari. <sup>4</sup> Nadsapi jabojo manadsa: —¿Nejecoma najari? —quinajaro. Nanaja madija pamaha eterorideni ssiaja tajaro ponideni inorinidsa ahuatoma-manajari. <sup>5</sup> Nadsapi cappinamananissa tadsa ponideni pitonidsa jassi, tocattedsamana, namidsa assarinideni bacco tajaro. Najarideni pamaha ponidenidsa huati toquinajari: —¿Nejecotohui Jeso qquide ahua jai tijajonajaro? Paja dsoqquemanarihi najaridenina pohuadeni noccobiridsa podsamana tahi. Naraha Jesopa camittemanidsa madihi —quinajari. <sup>6</sup> —Tibodideni huatomaniji. Dsama arobeni Carireahuaji timadimanapodsa tiadenidsa pocca ima huati huati nanaja napode. <sup>7</sup> Pohua attipa: “Ohuapi Madija Bedi ojararoa nidsa dsotode madija ojaría ohua ccacoradsapa imasiri sseqquiri najarideni dsepedenidsa ojanitohui. Ahua porimacossanidsa ohua inanadsoqque-mananitohui. Ohua ppa idsamanaraha huada 3 nadsa onahatoninitohui” napode pohua atti —quinajari.

<sup>8</sup> Nadsapi Jeso atti bodinideni huatoma-manajaro. <sup>9</sup> Tonoccobirihuaji jahinidsa odsahuaji bacco nanimanadsapi Jesocca dodosse tabaqqui 11 quinajaridenidsa ima huati toquinajaro. Jesocca madija motadenidsa naqui huati naridsamanajaro. <sup>10</sup> Ponideni oninipi Maria Madarenahuajicca, Dsohuana, Maria Satiaco imeni quina-jaro. Amoneje onihideni naqui ponidenidsa quejemamanajaro. <sup>11</sup> Naraha Jesocca dodosse tabaqqui ima mittamanadsapa pohuadenidsa jidsa tajaro, pina ponideni bodini tossamojarossa najaro. Ponideni attinidsa pajissa quina-jarajari.

<sup>12</sup> Naraha Pedropa nama naha Jeso noccobirihuaji joppa tajari. Bacco tadsapa tonoccobiri bodihuaji tocattedsima nanaja Jeso assire jojore naqqui eteroa podseje nanira qqui tajari. Nadsapa Pedro pocca odsahuaji bodi huatohua toccanijari.

### *Emao jahuidsa*

*Maraco 16.12-13*

<sup>13</sup> Najaro ssiajadsa Jeso huatimadedeni pamaha odsa capamema najaro onini Emaohuaji tohuedajari. (Aji Jerosaredsa maji 3’dsa ticcadsapi maji 6’dsa Emao bacco tinani.) <sup>14</sup> Nadsapa najarideni pamaha najaro jahui tohuedajaria Jeso tahimari huahuatiti dsanapojari, aji ima huapima mittamanajari, aja pohuadeni qqui toquinajaricca ima huahuatiti dsanapojari. <sup>15</sup> Jahuidsa ahua jai huati huati huati dsanapomananaja Jeso naco pohuadenidsa bacco tadsapa huapima jai tojajari. <sup>16</sup> Najaripa Jeso pohuaraha pohuadsa noccodeni jidsa tajari. <sup>17</sup> Nadsapa Jeso pohuadenidsa huati tajari: —¿Nejecoma imara ahua jai huati huati huati tidsanapomanajaro jahui motta? —najari. Nadsapa ba nanaja panodeni todsahi najari.

<sup>18</sup> Najari madija pamajarideni ojaría Cleopa pohuana Jesodsa huati tajari: —Tia naqui Jerosarehuaji Pascoacca ejetetohui timadiraha ¿ima dsati ssamo tinajaroqui? Aji Jerosarecca ima dsati huapima nahatoqquri inaraha ¿tiaha ssamo tinani ojarí tajarorane? —najari.

<sup>19</sup> —Naraha imapi ¿nejecoma najaro? —najari Jeso. Naraha Cleopa pohua tesse tedseje huati toquinajari: —Jeso Nasaretihuajicca pohuadsa ima inanamanajaro tahimarinipi ajima najaro: Pohuapa Dio Atti cacomerajide rabote. Diocca dacorehejine pocca marinaja bica tajaro. Diocca dacorehejine canahatori canarid-sajari naco bica tajari. Madija huapimadsa, Diodsa naco pocca ima bica tade.

<sup>20</sup> Naraha dada toqquimade taminedeni, ia jodiodeni icca taminedeni quinadsa Jeso dsoqquehijine romanodenidsa da quinajari. Pohuadenina idsahuamanahi dsotodepa ahua porimacossanidsa coba idsanamanadsa inanadsoqque-manajari. Nama inanamanade. <sup>21</sup> Naraha Isaraeri potemahi jodiodeni iapi icca dsamadsa iara imadinijine aja “Jeso pohuajinena icca cacahuehe tojapomanijine” inajaro ibodidsa. Naraha pohua huatiahicca huadapi jidapapi huadari 3 nani. <sup>22</sup> Naraha iadsa amoneje queriqquimanajarodenijine ijabojo najaro. Ponidenipi ssiajaricossadsa Jeso cahuahihuaji jai tojajaro. <sup>23</sup> Naraha pohua assire qqui quina-jarahi. Nadsama amonejedenipi jahinidsa huati nanimanajaro: “Diocca dodosse tabaqqui memehua-jicca qqui inabaqqupa. Iadsa attidenipa: ‘Jesopa nahatonih’ quinapaja” quinajaro. <sup>24</sup> Nadsapa itesse pamaha tohuedajari Jeso cahuahihuaji. Pohuadeni naco pina aji amoneje ponideni attinidenissa nehe qqui toquinaraha Jesopa qqui quina-jarahi -quinajari Cleopadeni.

<sup>25</sup> Nadsapa Jeso huati tajari: —¡A, tiadenipi ssamomo tinajaro! Dio Atti cacomer-aqquri najaridenicca marinaja dsodo quineje najonaponi najaro nemanehhe Dio Atti dsodo nanidsa dsodo napojaro titimittamana naraha ¿nejecotohui pajissa tiquinanijine tibodideni najoqquri nani? <sup>26</sup> Dio Atti dsodo nanidsa ajijaro ima ahuaato tajaro: Najaroa aji madija Tonassiajade Cristo-Mesiatohui imadijaro ocasserani ahuahitohui, madijacca tabaccorehe manaconi tojahijine. Ocasserani ahua-jaradsa dsoqque-jaradsapa Diocca deni tojehe pohuadsa ahuaato-jeranitohuiraha. Pajissa najidsohue imeni ocasserani ahuaadsa dsoqquedsapa nahatonidsa Imehihuaji toccamacossanijari. Nadsapa pocca Abi Dio pocca deni tojehe pohuadsa inanajaro -najari Jeso.

<sup>27</sup> Nadsapa Dio Atti dsodo nanicca pohuadeni bodi huatoma-manahijine mari icanabaqqujari Jeso. Tahidepa Moisesicca marinajadsa Cristo-Mesia tahimari dsodo nanidsa Jeso pohua tahimari pohuadeni mari icanabaqqujari. Dio Atti cacomeraqquri najaridenijine pohua tahimari dsodo najonamanajaricca dsodoniji naqui mari icanabaqqujari.

<sup>28</sup> Odsa capamema najaro Emao bacco toquinadsa Cleopadenidsa Jeso attipa: —Jehe, ajidsa tibomanaji. Ohuapi denima occani -najari. Pohua atti nama nadsapa tosoniqquimahitohuiraha <sup>29</sup> Cleopadenipa Jeso pohuatohui quinadsa pohuadsa huati toquinajari: —Iadsa tiboccaji. Maji toccahi, dsomebote nani -quinajari.

Nadsapa pohuadenidsa ibojari Jeso. Pohuadenidsama odsadsa toqquedsimajari. <sup>30</sup> Nadsapa jipamanahijine jassi taridsa Jeso pan ididsa Diodsa huati tajari: —Jehe Abi Dio, tiadsa etidsejaro. Ticca daniji iadsa bica tinanajari, inajaro -najari. Icanarobedsa pohuadenidsa da inaridsajari. <sup>31</sup> Nanaja noccodeni ssire-re nadsa Jeso jidsera nimananijari. Naraha amadsati amossi najari. <sup>32</sup> Nadsapa pohuadenira huati tocanirejari: —¿Nejecotohui pohuapa jahuids a qqui inajonaraha innoco jidsa tapa? Iadsa huati huati najonadsa Dio Atti dsodo nani ia mari tocanabaqquidsa ibodi etidsepa -quinajari.

<sup>33</sup> Nadsapa huassinaja totehemamanadsa Jerosarehuaji tohuedanijari. Bacco tanimanadsapa Jesocca dodosse tabaqqui 11 quinajarideni pohuadeni tesse tedseje queriqquimanahihuaji tohuededsimajari. <sup>34</sup> Queriqquimanajaridenipa aja huededsimajaridenidsa huati toquinapojari: —¡Jesopa pajissa nahatonijari! Ssino attipa: “Qqui onahi” napa -quinajari.

<sup>35</sup> Manaco Emaohuaji tohuedajarideni poccadeni ima huati nanimanajari. Aja jahuids Jeso pohuadenidsa huati huati dsanapojaricca ima huati, odsadsa Jeso pan icanarobedsa pohuadenidsa da inaridsadsa noccodeni jidsera najari naco huati toquinajari.

*Jesopa pocca dodosse tabaqquidsa ahuaatomajari*  
*Mateo 28.16-20; Maraco 16.14-18; Huano 20.19-23*

<sup>36</sup> Aja Jeso qqui toquinajaricca ima imahaha canaraha nahi nocconidsa Jeso ahuatomajari. Pohuadenidsa: —Nija, ticappinamana-jeraji. Diocca biquehera tiadenidsa tojana -najari Jeso.

<sup>37</sup> Naraha jabojojanadsa bodidenipa: —¡Corime itidija! -quinadsa cappinamana-jari. <sup>38</sup> Naraha Jeso pohuadenidsa huati tajari: —¿Nejecotohui ticappinamanajaro? ¿Nejecotohui tibodideni tossamojaro, pina ohuadsa pajissa tiquirani naha? -najari. <sup>39</sup> —Jari, ohuamori qqui, odsepe qqui tiquinaji. Ohuapi ohua. Ohueme bara tiquinaji, nadsana nahatoto tinanijine. Aji icorimepi ime cappira, tone cappira nahi naraha ohuapi ohueme ocaji, otone ocaji nani qqui tiquinani -najari Jeso. <sup>40</sup> Nadsapa pohua dsepe nohue, pohua amori nohue najari.

<sup>41</sup> Nadsapa huatidsemanaraha pohuadeni bodipa: —¿Pajissa, Jeso nahatonijarico? -quinajari. Nadsapa nahatoqquiri nahijine Jeso pohuadenidsa huati tajari: —¿Ajidsa ojipanijine ticajimanaqui? -najari.

<sup>42-43</sup> Nadsapa pohuadsa aba ibanahi bobi da quinadsa pohuadeni dsepecca ididsapa cattomama canaraha jipajari. <sup>44</sup> Nadsapa pohuadenidsa huati tajari: —Aji ima ohuadsa tojajaropi pina tiadenidsa occaridsaponi huati onapojarossa najaro tojajaro. Najaropi Dio Atti dsodo naponiccassa najaro. Aji Moisesi otahimari dsodo inapojaropi najarossa najaro. Dio Atti cacomeraqquiri najarideni naco otahimari dsodo quinapojari. Ajie jijiridedeni naco otahimari dsodo quinapojari. Najaro huapimapi maittaccadsama dsodo quinaja najonapohui najari. Najarossa najaro Diojine ohuadsa tojajaro -najari Jeso.

<sup>45</sup> Nadsapa Dio Atti dsodo naponicca mittamanahissa tahijine bodideni acco icamabaqquijari. <sup>46</sup> Pohua atti naco: —Jehe, Dio Atti dsodo nanidsapi otahimari. Najaroa aji madija Idinide Cristo-Mesia quiquinanajari ccajonadsapa ocasserani imeni inahananitohui. Madija inanadsoqqe-manadsa ppa idsamanaraha huada 3 nadsa nahatonihitohui. <sup>47</sup> Najaro pohua tahimari ecomeraridsa-manadsapi madija bodideni cacajiqquimera-manahijine naco huati toquinahitohui. Nadsapa madija pohuadeni bodi cacajiqquimera-manadsa: “Occa imasiri onebona” quinadsapa Dio poccadeni imasiri epeje inananitohui. Najaro ima bicanipi madija huapima mit-taridsamanahijine Cristo-Mesiapa pocca dodosse tabaqqui mari naridsamanahijine dosse inaridsabaqquihitohui. Tahidepa Jerosaredsa mari icanabaqquimanahitohui, dsotodepa dsama huapimadsa maride jai tojaridsahitohui. Najari Cristo-Mesiapa ohua. Otahimari maridepa ohua occa madija dosse onabaqquihijine -najari Jeso. <sup>48</sup> —Nadsama tiadeni occa dodosse tabaqqui tiquejenajaropi ohua Cristo-Mesia ojani nahatoqquiri tiquinani. Odsoqqueraha onahatonini pajissa tinoccodenidsa qqui tiquinajaro. Nema nadsapi otahimari tecomeraridsamanaji. <sup>49</sup> Naraha tahidepi Jerosaredsa timadimanaccaji. Nidsa occa Abi Dio huati tapojarissa najari ohuana tiadenidsa dosse onaronahitohui. Najari Dio Corimena tiadenidsa tojaridsahitohui. Pohuapa Dio memehuaji madijaricca dacorehe tibodidenidsa inananaridsanitohui. Nadsana otahimari mari taridsamananijine -najari Jeso.

### *Jeso toccamacossanijari*

#### *Maraco 16.19-20; Tahimarideni 1.9-11*

<sup>50</sup> Nadsapa Jeso pohua huatimadedeni odsa pananidsa iaqquenabaqquijari. Odsa capamema najaro onini Betania tohuajiranidsa domo huajari. Nahidsa pohua huatimadedenitohui pocca Abi Diodsa huati tajari. Pohua dsepe memehuaji da tamacossadsa: —Jehe Abi, ajararideni tecahuabaqquijo. Ticca biquehe pohuadenidsa tinanaridsaji -najari. <sup>51</sup> Pohuadenitohui Diodsa huati huati tanaja toccamacossanijari. Imehi Dio memehuaji iaccamacossanijari. <sup>52</sup> Nadsapa pohua huatimadedeni attidenipa: —¡A, Jesopa bica tahi! ¡Deni tojahi! -quinajari. Nadsapa Jerosare-huaji huatidsemaneri tanimanajari. <sup>53</sup> Huajijiradsa Diodsa dada toqquimahuaji

quequeriqquimana dsanapojari. Diodsa huatidsemanadsa jiri jiri quinajari. Pohua Atti mimittamana najari, Pohuadsa huati huati dsadsanapomana najari.



## Huanopa Jesocristo tahimari dsodo inajaro Juan

Huanopa aba cocorode tojaporaha Jeso pohuadsa huahua nadsapa pocca dodosse tojajari. Puhuapa Carireacca madija. Pocca abipa Sebedeo. Ajajari Huanopa Huano Baotista jarahi.

Huanopa Jeso tahimari dsodo inajaro, madija Jesodsa: —Pajissa, Jesopa Dio Bedi –quinahijine. Pocca dsodonijipi: Jesopa Dio Atti, pohua naco Dio, najaro. Jesopa pina edede cacahuadessa najari, pina jahuissa najari Diodsa bacco inanijine. Jesopa Dio Corime iadsa dosse inaronahitohui huati tajari dsodo inajaro.

Ajajari Huanopa dsotode Jesodsa jehe quinajaridenidsa ima teppe 3 nehe dsodo inajaro. Najaropi Huanocca ima teppe tahidecca (1 Huano), dsotodecca (2 Huano), dsotodemanicca (3 Huano) inajaro.

Dsotode jadahi tocajadsa naco Dio Corimejine pohuadsa ahuato inanajarrocca ima dsodo inajaro. Najaropi Apocalipsis.

### *Jesopa Dio Attiraha madija tojajari*

<sup>1</sup> Jesopa ajijaro nami nahato-jeraccadsama nadsama madipojari. Puhuapa Dio Atti. Puhuapa nadsama Diodsa madipojari. Pohua naco Dio. <sup>2</sup> Nami nahato-jeraccadsama Jesopa Diodsa madiridsapojari. <sup>3</sup> Nadsama aji huapima tojaridsajaropi Jesona inaridsajaro. Jeso nohueradsapa nassa aja namicca huapima tojaridsa-jaranaja. <sup>4</sup> Nadsama Jeso pohuapa camittehe jinede. Najaricca camittehena madijadsa ssiajani tojaridsajaro. <sup>5</sup> Najaro ssiajanina dsidsinihuaji jororo canadsa tossiajabaqquijaro. Nadsama dsidsinipi Jeso ssiejene inadsidsinijinepi ssamo tani.

<sup>6-7</sup> Maqquideje onipa Huano. Pohuadsa: Baotista, quiquinanajari. (Ettidsapi: Totopade, inajaro.) Puhua Dio icadossedsa: —Jesona ssiajani jinede –naridsahijine. Nama naridsadsa ssiajani jinede Jesodsa pajissa quinahijine. <sup>8</sup> Huanopa ssiajani jinede jarahi. Puhuapa ssiajani jinedecca ima cacomerade madijari. <sup>9</sup> Ssiajani pajissapi aji namihuaji bacco naronajaro. Najaro ssiajanina madija huapimadsa tojaridsajaro.

<sup>10</sup> Ssiajani jinedea aja namidsa ccaronadsa madijaripaja. Aja huapima cajiridsajaripa puhua inahatoridsajari. Naraha madijapa pohuadsa noccodeni jidsaqquri najari. <sup>11</sup> Pocca madijadsa bacco naraha pohuadsa jiperaqquri najari. <sup>12</sup> Naraha madija Jesodsa pajissa nadsa: —Jeso ohuadsa tojana –nadsapa najaridsana Dio huati huati tajari: —Occa ejedeni tijajaro bica tani –nanaja najari. <sup>13</sup> Madija Diocca ejedeni toquejenahijinecca imapi pina madija tossonajaricca imassa nejerani. Pina maqquideje amoneje tohuini nadsa inajiadsa ejedeni dsati tossonajaricca imassa nejerani. Naraha Diojine pocca ejedeni toquejenajaripa Dio Puhujinena bodideni dsati totoja najaro.

<sup>14</sup> Dio Attiraha assire tojadsapa Jeso iadsa madijaripaja. Pocca nahatonijipi bicabote deni tojani qqui inade. Nadsama pocca nahatohuepi ojariana nahato tajari. Abi Dio Bedina ojarihi. Puhuapa huati huana tadsa ia todinibaqquijari. Puhuapa pajissehe jinede. <sup>15</sup> Nadsama aja Huanopa Jeso tahimari ecomeraridsajaropi: —Najari tahimaria huati onapjarode: Ohua mari mari onaporaha aja dsotode mari mari najarina deni tojajari. Puhuapa nadsama madipojari, ohonanapode –nade Huano atti.

<sup>16</sup> Nadsama pocca biquehepi puhujine iadsa huapi tehe tojeje dsanaponi najaro. <sup>17</sup> Nadsama maittaccadsama Moisesipa Diocca dosseniji mari mari napojari. Najaro pocca marinaja huarijonania aji iadsa bacco najaropaji. Nadsama jidapapa

Jesocristona Diocca tohuati huanehe, pocca pajissehe iadsa ahuato inanajaropaji. <sup>18</sup> Nadsama madija iapi Dio qqui inaja cama-jarahi. Pohua Bedi ohojaridejinena Abi Diodsa nahatoqquri inajaro. Pohuapa Dio bonoccoriccaja najari.

*Huano Baotista Jeso tahimari ecomerapojaro*

<sup>19</sup> Nadsapa odsa panani Jerosarecca jodiodenicca taminedeni attipa: —¿Huanopa aja tohui imadijaro ia Idinide Cristo-Mesiaco? —quinadsa Diodsa dada toqqumade, pohuadeni biji accode rehuitadeni tedseje huahua inabaqquimanajari. Nadsapa pohuadenidsa: —Huano madihihuaji jai tijaji, pohuadsa huati tiquinadsa: “Tiapi ¿nejecojari tijani?” tiquinana —quinadsa dosse inabaqquimanajari. <sup>20</sup> Nadsapa jai toja, bacco toquinadsapa poccadeni tamine attideni Huanodsa huati iqquimamanajaro. Naraha Huano pohua cacoma-jarajari. Amadsati pohua cacomerade: —Ohuapi Cristo ojajerani —nade.

<sup>21</sup> Naraha pohuadsa huati toquinapomade: —Nadsapi ¿nejecojari tijani? ¿Maittaccadsamacca Dio Atti cacomerabote Eria tijaqui? —quinade. Naraha Huanopa: —Ohuapi Eria ojajerani —nade.

Nadsapa: —¿Moisesicca dsodonijidsa aja Dio Atti cacomerabote dsotode ccajonahitohui quiquinanajari tijaqui? —quinade. Naraha Huanopa: —Ohuapi najari ojajerani —nade.

<sup>22</sup> Naraha denima Huanodsa huati toquinapomade: —Nadsapi ¿nejecojari tijani? —quinapomade. —Jari, iadsa ticca ima tecomeraji. Tetti imittadsapi ia dosse najonadedenidsa huati inaninijine —quinade Huanodsa.

<sup>23</sup> Naraha Huanopa pohua cacomerade: —Ohuapi dsama huamoni ssono caji, siba caji tanihuaji ohuatti mohui tadsa madija huahua huahua ohonajonabaqqui najari. “¡Ia Medsede tedsejema jahui tijinedeni tobicapoji! Najaroa aji tibodideni pohuatohui tinajoramanaji” ohonanajaro. Najaro imapi maittaccadsama Dio Atti cacomerabote Isahia huati tapojari —nade Huano atti.

<sup>24</sup> Aja Huanodsa huati toquinajarideni dosse najonadedenipa Isaraeri potemahi jodiodeni mota marinaja onini pariseodsa jehe quinajari. Nadsapa poccadeni dodosse tabaqqui Huanodsa huati toquinapomajari. <sup>25</sup> Pohuadeni attipa: —Tettipi: “Cristo ojajerani. Eria ojajerani. Dio Atti cacomeraqquri najarideni ojaría ojajerani” tadsapi ¿nejecotohui passodsa madija topa topa titidsanabaqqui najaritta? —quinade.

<sup>26</sup> Naraha Huano pohua cacomerade: —Ohuapi passodsara topa topa ohodsanabaqqui najari. Naraha madija ohuaha tiadenidsa madiraha pohuadsa tinoccodeni jidsaqquri naccani. <sup>27</sup> Najarina deni tojajari. Ohuapi tahide mari mari onaporaha pohuapa dsotode mari mari najonahitohui. Ohuapi ajimani ojani. Pina pocca medsessa onanijinepi opajira-jerani. Pohua amoricca sadaria diccade naqui opajira-jerani —nade Huano atti.

<sup>28</sup> Ajijaro imapi odsa capamema najaro onini Betaniadsa qqui inapode. Betaniapi hueni Jordao maji ccajonahihuaji anijaro. Nahihuaji Huano Baotista madija topade tojadsana pohuadsa huatide jahijonajari.

*Jesopa Diocca daniji pina Edede bedissa najari*

<sup>29</sup> Nani Betaniadsa imadiccadsapi najaro huada ssiajadsa Huano Jeso ccajonahi qqui tadsa iadsa huati tajaride: —¡Qqui tiquinajo! ¡Ajajaripa Diocca daniji madija huapimadsa! Pohuapa Diocca Edede Bedi bicabote Diodsa da da inajarissa najari. Nidsa dsoqquedsapa pohuana madija huapimacca imasiri inanamossinitohui —nade.

<sup>30</sup> —Nadsa pohua tahimaripi tiadenidsa huati huati onapode: Ohuapi tahide mari mari onaporaha aja madija dsotode mari mari najonajarina deni tojajari. Ohuapi ajimani ojani. Pohuapa nadsama tahide madipojari, ohonanade. <sup>31</sup> Ohuapi pohuadsa ssamo onade. Naraha Isaraeri potemahideni tiadenipi pohuadsa nahatoqquri

tiquinaniijinepi Dio ohua cadossedsa madija passodsa topa topa onajaropaji -nade Huano.

<sup>32</sup> Huanopa tahide Jeso topa idsanadsa Dio Corime Jesodsa ccaronahi qqui tadsa iadsa huati tajaride: —Ohuapi Dio Corime qqui onade. Pina midsorissa naha ccaronadsa Jesodsa be tahi qqui onade. <sup>33</sup> Ohuapi pohuadsa nahato onapo-jerade. Naraha passodsa topa odsanabaqquihijinepa Dio ohua cadossedsa ohuadsa huati tapojaride: “Ocorime ccaronadsa madijadsa be tahi qqui tinahitohui. Najarina Ocorime madijadsa inanaridsahitohui” napode Dio ohuadsa. <sup>34</sup> Jehe, najaripa pajissa ohua qqui onadsa huati onajaro: Ajararipa Dio Bedi, onajaro -nade Huano atti.

### *Jesocca mamari tabaqqui tahidecca*

<sup>35</sup> Huada ssiajadsa Huano Baotista pohua huatimade pamaha tedseje domo hua pomade. <sup>36</sup> Nahidsana Jeso toqqueqqumahi Huano qqui tadsa pohuadenidsa huati tajaride: —¡Qqui tiquinajo! ¡Ajararipa Diocca daniji madija huapimadsa! Pihuapa Diocca Edebe Bedi Diodsa da da inajarissa naraha icca imasiri manaconi tojahijine Dio iadsa eccorajari -nade Huano iadsa.

<sup>37</sup> Nadsapa Huano huatimade pamaha ima mittamanadsapa Jesodsa tohuedamisade. <sup>38</sup> Jeso natti tohuedamissaraha Jeso pohua natti qqui naninaja pohuadeni huedajonahi qqui inabaqquijaride. Nadsapa Jeso pohuadenidsa huati tade: —¿Nejecotohui ticadajonajaro? -nade. Naraha: —Ia Maride ¿nejecohuaji timadijaro? -quinade. <sup>39</sup> Naraha Jeso: —Jina, qqui tiquinaji -nade pohuadenidsa. Nadsapa jai tojajari. Maji toccadsana pohua madihihuaji bacco toquinadsapa qqui toquinade. Nahi pohuadsa jassi todsadsapa dsomejarode.

<sup>40</sup> Jehe, Huano huati tahi mittamanadsapa Jesodsana toquejenajaride. Ojaripapa Ssino-Pedro imecote Adiri. <sup>41</sup> Nadsapa Adiri Jesocca odsahuaji qquenadsapa pohua imecote Ssinotohui toccajaride. Pohua imecote Ssinohuaji bacco tadsapa huati tajari: —¡Ssino, iapa aja tohui imadijaro Mesia bacco inahi! -najari. (Jodio attidenidsapa: Mesia, quinaraha dsama Cresiaccia madija attidenidsapa: Cristo, quinarari. Madija ettidsapa: Madija Tonassiajade tojahijine Dio pohua icattejidsapojari, inajaro.)

<sup>42</sup> Nadsapa Adiri pohua imecote Jesohuaji eccanijari. Jeso Ssino qqui tadsapa pohuadsa huati tade: —Tiapi Huanocca ejedeni Ssino tijani. Ssino tijaraha jidapapi tia oni onihira hua onana -najari. Nadsapa pohua oni hua inadsapa: —Sepa -nade. (Jodio attidenidsapa: Sepa, quinaraha dsama Cresiaccia madija attidenidsapa: Pedro, quinarari. Madija ettidsapa: Siba, inajaro.)

### *Natanahe Feripe tedseje Jeso huatimade toquejenajari*

<sup>43</sup> Huada ssiajapa Jeso: —Dsama arobeni onini Carireahuaji occana onajaroa -nade. Nahihuaji toccadsana Jeso Feripe bacco inadsa pohuadsa huati tajari: —Jina, ohuadsa ticcaridsaji, ohuatimade tijadsapi tia onahattanijine -nade.

<sup>44</sup> Nadsapa Feripepa Besaida odsa pananicca. Pedro, Adiri naco najaro odsa pananicca. <sup>45</sup> Feripepa pohua tesse Natanahetohui toccajari. Bacco inadsa pohuadsa huati tajari: —Iapi Moisesicca dsodonijidsa tahimari ihimitta najari bacco inahi -najari. —Dio Atti cacomeraqquri najarideni pohua tahimari dsodo quinarari. Pohua onipa Jeso, Dsodsecca ejedeni. Pihuapa odsa panani Nasaretihuajicca -najari Feripe. <sup>46</sup> Naraha Natanahe attipa: —A ¿Nasaretihuajicca madijapa bica tajari caji taco? -najari. Nadsapa Feripe Natanahedsa: —Jina, nidsa qqui tinahitohui -nade.

<sup>47</sup> Nadsapa Natanahe Jesohuaji toccadsapa Jeso Natanahe ccajonahi qqui ijidsadsapa pocca ima naqui pohuadsa ahuato tajaro. Nadsapa Jeso Natanahe tahimari huati tade: —Qqui, aja maqquideje ccajonajaripa pajissa Isaraeri potemahi. Icca ididenicca marinaja ecahuanissa tajaro. Pihuapa maidsera tahi -nade Jeso. <sup>48</sup> Naraha Natanahe atti Jesodsa: —¿Nejecoma nadsa ohua qqui tinadsa ohuadsa nahato tinajaro? -nade.

Naraha Jeso Natanahedsa huati tade: —Nadsa Feripe tiadsa huati tajaraccadsa ahua iquiera dopedsa teni tia qqui onapa -nade Jeso. <sup>49</sup> Naraha Natanahepa: —Ia Maride, ¡tiapi Dio Bedi tijani! ¡Tiapi Isaraeri potemahidenicca tamine tijani! -nade. <sup>50</sup> Naraha manaco Jeso pohuadsa huati tade: —¿Iquiera dopedsa teni tia qqui onapa onajarodsa ohuadsa pajissa taqui? -nade. —Nidsa, nahatonaja deni tojanicca huapi tani qqui tinanitohui -nade Jeso Natanahedsa.

<sup>51</sup> Nadsama Jesopa ima denima huati huati tade iadsa: —Pajissara tiadenidsa huati onajaro: Nidsa meme tohuabani naqui qqui tiquinanitohui. Aji ohua Madija Bedi ojajaro ohuadsa Diocca dodosse tabaqqui memehujicca jahirona jai tojamacossani, jahirona jai tojamacossani nahi naco qqui tiquinanitohui -nade Jeso.

## 2

### *Jeso canahatori canapojari*

<sup>1</sup> Huada 3 bacco tadsapi Canahuaji cajicajicca ejete tojajaro. Canapi dsama arobeni onini Carireacca odsa panani. Jesocca ami naqui nani ejete qquide toccajaro. <sup>2</sup> Jeso pohua huatimadedeni ia naqui nanidsa jaijedsimade. Cajicajicca ejete jinede iadsa jina nadsa jaijedsimajarode. <sup>3</sup> Naraha uva ppejene jicadsa Jesocca amipi: —Uva ppejene jicaha -nade Jesodsa. <sup>4</sup> Nadsapa Jeso atti: —Ami ¿nejecotohui ohuadsa huati tinajaro? Occa ima ahuaato onananijine bacco tejeraccaraha -nade Jeso. <sup>5</sup> Naraha imenipi jijipa dsodsojodedenidsa huati tade: —Jeso tiadenidsa huati tadsapa pohua attissa tinanamanaji -nade.

<sup>6</sup> Naraha nanidsapi siba imeni passojine ccohue todsaridsani 6 nehe cajimanajaride. Najarodsapa jodiodeni —Icca ima bica tanijine -quinadsa pohuadeni dsepetaji ettippamana, idimoramana nanaja najari. Najaro siba imeni ccohue todsani ojariedsapi passo 80 litro ijijaro nitide. <sup>7</sup> Nadsapa Jeso jijipa dsodsojodedenidsa huati tade: —Siba ccohue todsaridsanidsa passo tinajiridsamanaji -nade. Nadsapi najarodsa passo inajiridsamanadsapi iponihuaaji bacco bacco teri nade. Nadsapa Jeso canahatori canajarijine passoraha uva ppejene inanajari. <sup>8</sup> Nadsapa Jeso: —Jari, jidapapa badsira taha huana ticadsanamanadsa cajicajicca ejete cacahuadedsa dsojo ticanamanajo, ecatamahijine -nade. Nadsapa uva ppejene huana icadsanamanadsa dsojo icanamanade, pina Jeso attissa inanamanajaro. <sup>9</sup> Nadsapa ejete cacahuadedsa da icanamanadsapa aja passoraha uva ppejene tojajari badsira taha ecatama nade. Naraha ejete cacahuadepa ssamo tadsa pohua bodi: —¿Nejecohujicca uva ppejene? -najari. Naraha uva ppejene dsodsojode pohuadenina passo ponira dsojo dsojo inanimanajarojine nahatoqquiri nahi. Nadsapa ejete cacahuade aja cacajirebote najaridsa huati tade: <sup>10</sup> —Madija huapimapa ejete inahatomanadsapi tahide uva ppejene bica tahiccara da da ihicanaridsa-baqquimana nanaja najari. Madija accaramanadsana ajamani majidera tahicca da da ihicanaridsa-baqquimana najari -nade. —Naraha tiapi uva ppejene denima bica tahiccara teccocobaqqui, dsotodena da ticanabaqquijarirana -nade ejete cacahuade atti.

<sup>11</sup> Ajijaro imapi Carireahuajicca odsa panani Canadsa Jeso tahidecca canahatori canapojari. Najaropi Jeso pocca deni tojehe ahuaato inanapojaro. Nadsapi pohua huatimadedeni iapi Jesodsa pajissa inajarode.

### *Capernaodsa madijari*

<sup>12</sup> Nadsapi coridsa inidicca odsa panani Capernaohuaji jaijedsippade. Jeso pohua, pocca ami, pohua imecotedeni, pohua huatimadedeni ia huapima jaijedsippade. Nanidsapi huada pamehe imadide.

*Diodsa dada toqqimacca odsadsa manaconitohui dadadedeni mohua ininebaqqui-jari*

<sup>13</sup> Jodiodenicca ejete imeni onini Pascoa tohuajiradsapi Jesopa Jerosarehuaji toccade. <sup>14</sup> Naraha nani Jerosarehuajicca Diodsa dada toqquimadsapi manaconitohui dadadedeni dade toquejenahi Jeso qqui inabaqquijari. Bohui, edede, midsori da da quiquinanajari. Dsiniro cacajiqquimera-manahijine naco dade huihuittariri naridsajari. <sup>15</sup> Nama quinahi Jeso qqui tadsapa cocossi amadsati inahatojaride. Ijinedeni poponeri najari inaccaridsadsa inahapicossa, ppiro-ro nadsa itacossiridsa-jaride. Nadsapa Diodsa dada toqquimahuaajicca dadadedenipa amossinihuaji mohua ininebaqquide. Poccadeni ededema, poccadeni bohuima domo toqquenajaride. Dsiniro cacajiqquimera-manahijine dsiniro naqui maca maca imeri naridsade. Huahuanari naqui cco cco icanacossieri naridsade. <sup>16</sup> Midsori dadadedeni naco dosse ininebaqquide: —¡Ajicca huapihuajina ticcadeni midsori dsojo dsojo tininemanaji! ¡Aji occa Abi tadsaridsapi dada tinanamana tejeraji! —nade Jeso. <sup>17</sup> Nadsapi pohua huatimadedeni iapi eti huatomajarode: —Dio Atti dsodo napojaropi: “Ticca odsa acconipi ohuana ocasserani ohuanitohui” nanaja napode —inade. <sup>18</sup> Naraha dsotodepa jodiodeni Jeso huati icanamanade: —¿Nejecojari tia cadossedsa nema nema tajaro? ¡Jari, ticanahatori canaji! Qqui inadsana pajissa inanijine —quinade.

<sup>19</sup> Naraha pohuadenidsa Jeso huati tade: —Jari, ajijaro Diocca odsa ticanajid-somanehe cajicaneje huada 3’pi ocanahatomanie cajicanitohui —nade. <sup>20</sup> Naraha jodiodeni Jesodsa huati toquinapomade: —¡A, apaja! Ajijaro odsa Diodsa dada toqquimapi huada huajano 46 naha dsepedeni ijimanade. Naraha tettipi: “Ajijaro odsa huada 3’pi ocanahatomanie cajicanitohui” taha. ¡Nema ticanana-jerani! —quinade.

<sup>21</sup> Najaro odsacca ima huati tajaripa pohua assire tahimarini huati tajaride. <sup>22</sup> Iapi pohua huatimadedeni Jeso dsoqquedsa nahatonidsana eti huatomajaropajide. Najaropi pohua huati tadsa imittapojarode. Nadsapi Dio Atti dsodo napojarocadsa denima jehe pajissa idsanapojarode. Jeso huati huati tajari imittapojarodsa naqui jehe pajissa inajarode.

### *Jesodsapi madija huapimacca ima ahuato tajaro*

<sup>23</sup> Jesopa ejete Pascoatohui Jerosaredsa madiccadssapa canahatoriri canaridsa-jaride. Pocca nahatohue qqui toquinadsapa madija mota pohuadsa pajissa quinade. <sup>24-25</sup> Naraha Jesopa pohua bodidsa nahato tajari: —Ohuadsa pajissa quinahissa tahi —najarajari. Puhuapa madija bodicca ima mittahijine pohuadenidsa: —¿Nejecoma nani tibodidenicca ima? —najarajari. Madija pohuadeni bodicca ima pohuadsa huatide nohueraraha pohua ehuerahi nahato tajari.

## 3

### *Nicodemopa dsome Jesodsa ccahuajajari*

<sup>1</sup> Isaraeri potemahi jodiodeni dossede ojaría onipa Nicodemo. Puhuapa mari-naja onini pariseodsa jehe najari. <sup>2</sup> Najaripa dsomeraha Jesodsa huati tahijine ccajonajari. Bacco najonadsapa: —Mamaride, iapi nahatoqquiri inapode. Tiapi Diocca dosseniji ticcajonajaro madija maride. Nahatohue pina aji ticcassa najaropi madija Dio pohuadsa tojahissa tajarina cajijari. Puhuadsa Dio nohueradsapa caji-jaraha —nade Nicodemo. <sup>3</sup> Naraha Jeso Nicodemodsa huati tajari: —Pajissara tiadsa huati onana: Madija Diocca cacahuehedsa tojahijinepa tossonapomadsana Diodsa tojahitohui. Tossonapoma-jaradsapa Diocca cacahuehedsa toja-jarahitohui —nade Jeso Nicodemodsa.

<sup>4</sup> Naraha manaco Nicodemo huati tajari Jesodsa: —Madija jadahi ijaraha ¿ne-jecoma inadsa pina ejedeni inehe issonapomanijine? ¿Icca ami dsahuanidsa ittidsapomadsapi issonapoma taqui? —nade Nicodemo. <sup>5</sup> Naraha manaco Jeso



Nicodemodsa huati tajari: —Pajissara tiadsa huati onana: Madija bodidenicca imasiri tohuireridsadsapi madija Dio Corimecca nahatonajadsa toquejenadsapa Diocca cacahuehedsa toquejenajari. Naraha madija nama quina-jaradsapa Diocca cacahuehedsa toquejena-jarahi. <sup>6</sup> Maqquideje ejedeni inahatojaripa madija tojajari. Naraha Dio Corimejine nahatojaripa Pohua Corime pohnadenidsa totoja najari. Dio Corime pohnadenidsa tojaridsadsapa pina tossonapomajarissa quina tahi -nade. <sup>7</sup> —Nadsama tiadsa huati onana. Ohuattipi: Pina ejedeni tossonedsatissa tiquinapomaji onajarodsapi huajo tejeraji. <sup>8</sup> Dio Corimejine madija bodi dsati tojadsapi pina jojodecca imassa najaro. Jojodepi qqui inejeraraha jojode ponijinena ahahuato najaro. Jojodepi poni jipa tanihuaji tocca tani. Poni mohuini naqui imitta tani. “¿Nejecoma nanicca ccajonajaro?” taraha ssamo tinani. “¿Nejecoma nani toccajaro?” ina tani. Dio Corimejine madija bodi nahatodsati tojadsa naco qqui inajararaha pocca madie dsati tojani nahato inajaro -nade Jeso Nicodemodsa.

<sup>9</sup> Naraha manaco Nicodemo Jesodsa huati tapomajari: —¿Najaro imapi nejecoma najaro? -nade. <sup>10</sup> Manaco Jeso pohua cacomerade: —Tiapi Isaraeri potemahi jodiideni maride tijaraha ¿najaro ima ssamo tinajaroqui? <sup>11</sup> Pajissara tiadsa huati onana: Iapi Diojine madija bodideni dsati toquejenahi nahatoqquiri inajaro. Aji madijacca madie dsati tojani qqui inajaro naqui tiadenidsa huati huati ihinanaraha timittamana-jerajaro. <sup>12</sup> Aji namicca icca madieccama tiadeni mari ocanabaqquiraha pajissa tiquinejerani. Aji memehujicca Diocca ima ponira tiadenidsa huati onadsa naqui pajissa tiquinejerajarorane -nade.

<sup>13</sup> —Nadsama aja namicca madija ojariapa memehujaji toccamacossaja cama-jarahi. Naraha aji Madija Bedi ojajarona ohuapi memehujicca occaronajaro. <sup>14</sup> Nadsa maittaranibote dsama huamoni ssono caji, siba caji tanihuaji icca madija jahirid-sapodsapa Moisesi macca corime bronco inahatodsa ahuaadsa que inanahi quinade. Madijapa maccajine jicahitohuiraha macca corime que tanihuaji qqui quinadsapa totocassiejera najari. Nadsama aji Madija Bedi ojajarora ohua naqui ahuaadsa ohua que inanamanadsapi nema onanitohui -nade. <sup>15</sup> —Nadsama madija huapima ohuaadsa pajissa quinajaridenipa camittehe jiquejeranicca cajimana-dsanapohujine -nade Jeso.

### *Diopa madijadsa huati cahanari canajari*

<sup>16</sup> —Diopa madijadsa huati cahanari canahi. Pohua Bedi ojari naraha da inadsapa huapima pohnadsa pajissa quinajaridenipa tocassiejerahijine. Camittehe jiquejeranicca naco cajimana-dsanapohujine. <sup>17</sup> Diopa Pohua Bedi madija dsahuade dosse inaronajari. Madija tonassiajadera dosse inaronajari -nade.

<sup>18</sup> —Nadsama pohnadsa pajissa quinajaridenipa idsahuabaqquijarahitohui. Naraha aja pohnadsa pajissa quina-jarajaridenicca imapi Dio Pohnadsa ahuaato taridsaponi. Naraha Dio Attipa: “Occa ejedeni ohoharide. Pohnadsa pajissa tiquinejeradsapi ticcadeni imapi ohuaadsa tabaccora tani. Nidsa ticcadeni ima nema tidsanapomanadsapi najidsohue jiquejeranihuaji tiquejenanitohui” nahi Dio -nade Jeso. <sup>19</sup> —Nadsama Dio Bedidsa pajissa quina-jarajaridenipa poccadeni tabaccorehepi ajima najaro: Ssiajani aji namidsa bacco naronaraha madija motapa dsidsinidsara jipaqquiri najari. Pohnadenipa ima tabaccora tanicca ihinanamana nadsapi ssiajanidsapa jiperaqquiri najaripaja. <sup>20</sup> Madija motapa pohua pohnadeni tonatabaccora-manadsapa ssiajanidsa huattajoqquiri najari. Pohnadenipa ssiajanidsa huajijira canaha najarahi, poccadeni ima huapimadsa ahuaato tajaro noppineni. <sup>21</sup> Naraha madija pajissehedsa madimanadsapa ssiajanitohuira quinajari. Pina Diocca dosseni-jissa inanamanadsapi pohnadeni dsepe ijiridsajarima ahuaato tanijine -nade Jeso.

### *Huanopa Jesocca ima ecomerapomajaro*

<sup>22</sup> Nani dsotodepi dsama arobeni Jodeahuaji Jeso toccadsapa pohua huatimadedeni iapi pohuadsa jaijade. Nanidsa imadidsana madija topa idsanabaqquijaride. <sup>23</sup> Naraha Huano naco odsa Enohuaji madija topa idsanabaqquija najari. Najaropi odsa Sarimadsa huajira tani. Enodsana passo dsaja tanicca caji tajaro. Nahidsana madija jajahijona najari, Huanocca topanijitohui. <sup>24</sup> Huanopa toponi cocorodsa coro idsimamana-jaraccadsama nahidsa madijari.

<sup>25</sup> Nadsapa Huano huatimadedenipa jodio ojaria tedseje bodideni tohuiremanahijinecca ima ahuaji huati ahuaji huati quinajari. <sup>26</sup> Nadsapa Huano huatimadedeni jai tojanidsapa Huanodsa huati toquinade: —Ia Maride, maitta hueni Jordao jippehuaji tiadsa bacco tajari pohua tahimari huati huati titinanajaripa madija topade tojahi. Huapima pohuahuaji jajahi toja nahi —quinade.

<sup>27</sup> Naraha Huano pohuadenidsa huati tade: —Diopa madija dsepe ijihijine pohuadsa da inejeradsapi nama najarahi. Naraha Dio madija dsepe ijihijine pohuadsa da inadsapi dsepe ijie cajihi —nade. <sup>28</sup> —Nadsa ohuatti timittamanade: Ohuapi Cristo-Mesia ojajerani ohonanade. Diopa Jeso tedsejema ohua cadossepjaride. <sup>29</sup> Ohuapi pina dsabisso amoneje cajibote najari pohua tessessa onajaro. Dsabisso cacajirehijinecca ejete bacco tadsapa pohua tesse naco pohuatohui madijari. Pohua tessesa aja cacajirejari atti mittadsapa huatidse tahi. Najaroa ohua naqui Jesodsa madija toquejenadsa omittadsapi ohuatidseri najaro. <sup>30</sup> Jeso deni tojajadsanapohui nadsapa bica tani. Ohua ajimani ojanini naqui bica tani, onajaro —nade Huano.

### *Jesopa memehujicca ccaronajari*

<sup>31</sup> Nadsapa Huano pohua huatimadedenidsa denima huati tajari: —Memehujicca ccaronajaripa aja namihujicca madijassa najarahi. Pahuapa deni tojahi. Ajijaro namiccapa namicca. Ajijaro namicca imara huati huati totoquina najari. Memehujicca ccaronajaripa huapimadsa deni tojajari. <sup>32</sup> Pahuapa memehujicca qqui tajari, mittajari naqui ecomeraridsajaro. Naraha madija huapimapa pocca huatinajadsa pajissaha quina-jarahi. <sup>33</sup> Naraha pohua attidsa pajissa quinajarina: “Jehe, Diopa pajissehe jinede” quinajari. <sup>34</sup> Pahuana Dio icadossejari, huati huati nanaridsa najari. Najarina Dio Atti huati tahissa tajari. Dio Pohua Corime pohuadsa da ineje najaro inapajiranissa tajaro. <sup>35</sup> Imehipa Bedidsa huati huana tajari. Pohua Bedidsa pocca nahatonaja huapima pohuadsa inanajaro. <sup>36</sup> Nadsapa Pohua Bedidsa pajissa quinajaridenina camittehe jiquejeranicca cajimana-dsanapohuijine. Naraha pohuadsa iboqquri najaridenipa camittehe cajimana-jarahitohui. Dio Pahuana najidsohue jiquejeraniccadsa inanabaqquihitohui —nahi nade Huano Baotista.

## 4

### *Jeso Carireahuaji tojoppemanijari*

*Mateo 4.12; Maraco 1.14; Roca 4.14*

<sup>1</sup> Nadsapa Jesodsa madija tohuapijaricca ima tojaridsajaro. Nadsapi jodiodeni mota marinaja onini pariseodsa jehe quinajaridenidsa ima bacco tajaro: —Jesodsa toquejenajarideni tohuapihi. Huano Baotistadsa ajamani. Jesona madija denima topa topa ihidsanabaqqui najari —nanaridsamana nahi ima mittamanajari. <sup>2</sup> (Naraha Jeso pahuapa madija topa topa ihidsanabaqqui najarahi. Pohua huatimadedenina madija topa topa ihidsanabaqqui najari.) <sup>3</sup> Nadsapa Jesodsa: —Marinaja pariseodsa jehe quinajarideni titahimari mittamanahi —quinadsapa dsama arobeni Jodeadsa joppemanijari, dsama arobeni Carireahuaji toccanipomahijine.

### *Samariahuajicca amoneje Jeso tedseje bacco tocanirejari*

<sup>4</sup> Jodeadsa jajianijaro jahuipi dsama arobeni Samariahuaji tossoiqquimani Carirea bacco tanijaro. <sup>5</sup> Najaro jahui jajianidsapi Samariacca odsa panani oninipi Sicadsa

iajirajonajaro. Najaro odsapi maittaccadsama Jacobocca dsamabote huajira tajaro. Jacobo pohua dsamaribotepi pohua bedi Josedsa da inapojaro nade. <sup>6</sup> Nanidsana —Jacobocca passojinebote —quiquinanajari hui todsajaro. Najaro passojine hui todsanidsa bacco inapojaro. Maji itetepi bacco tabote nadsa Jeso ja tojajonadsa, passojine hui todsani inorinidsa huittarijaride.

<sup>7-8</sup> Nahidsa Jeso huittariraha ia pohua huatimadedenipi odsa pananihuaji jaijajaro, itapari mittade. Naraha nahi passojine inorinidsa Jeso huittaridsa Samariacca madija amoneje passotohui ccajonajaro nade. Nadsapa Jeso ponidsa huati tajari: —Ohuadsa ticca passo dse onana —nahi nade.

<sup>9</sup> Jeso atti nama nadsapa ponidsa jidsa tajarossa najaro. Aja, jodiodenipa samaritanodeni dsepedenitajidsapa: —Dsedede oppina tani —quiquinanade. Nadsapi amoneje Jesodsapa huati tajaro: —¿Nejecotohui tiapi jodiodeni tijaraha ohuadsara passo mitta tajaro? Ohuapi Samariacca madija ojani —nani nade. <sup>10</sup> Naraha manaco Jeso ponidsa huati tajari: —Diocca daniji nahato tinadsapi aja tiadsa passo mitta todsajaridsa manacora ohuadsa passo mitta tidsanitohuiraha ssamo tinajaro. Naraha ohuadsa nahato tinadsa ohuadsa huati tinadsapi passo camittehecca tiadsa da onanitohuiraha —nahi nade Jeso.

<sup>11</sup> Naraha amoneje poni attinipi: —¿Nejecodsara passo huana ticadsananijine? Hui todsanicca passopi huaji tani. ¿Nejecohuajicca passo camittehecca ohuadsa da ticananijine? —nani nade. <sup>12</sup> —Ajijaro passojine hui todsanipi maittaccadsama Jacobo iadsa inebojaro. Ajijaro passopi Jacobo dse dse napojari. Pohua bedideni naco ajijaro passodsapa dse dse quinapojari. Poccadeni bani ette tojahi naco ajijaro passodsapa dse dse quinapojari. ¿Naraha tiana deni tijajarorane, Jacobona ajamanirana? —nani nade. <sup>13</sup> Naraha manaco Jeso ponidsa huati tajari: —Ajijaro passopi dse inaraha ibacco dsaripoma tani —nahi nade. <sup>14</sup> —Nadsa aji ohua passo da ocanajaro dse quinahipa baccodeni dsarimanapoma-jarahitohui. Aji occa daniji passona madija bodidenidsa jiquejeranitohui. Camittehe jiquejeranicca tojanijine —nahi nade Jeso.

<sup>15</sup> Naraha amoneje attinipi: —Jari aji ohuadsa huati tinajaro passo ohuadsa da ticanaji, obacco dsaripoma-jeranijine. Nani ajijaro passotohui ohocajona nejeranijine —nani nade. <sup>16</sup> Naraha Jeso ponidsa huati tapomajari: —Ticcanidsa ticca maqquidsapa huati tinanidsa ahuaji ccajonana —nahi nade Jeso. <sup>17</sup> Naraha poni attinipi: —Maqquideje ocappirani —nani nade. <sup>18</sup> Naraha Jeso ponidsa huati tapomajari: —Jehe “Maqquideje ocappirani” tadsapi pajissa. Naraha ticca maqquipa 5 quinahi. Jidapanacca naco ticca maqqui jarahi. Tetti nema nadsapi pajissa —nahi nade Jeso. <sup>19</sup> Naneje amoneje attinipi: —Tiapi Dio Atti cacomerabote tijani —nani nade. <sup>20</sup> —Icca abidenipa ajijaro ssonodsana Diodsa huahuatidsemanapo najari. Nadsa jodio tiadeni tettidenipi: “Jerosaredsana Diodsa tetetidsemana nani bica tani” tiquinajaro —nani nade.

<sup>21</sup> Naraha manaco Jeso amonejedsa huati tajari: —Amoneje, ohuatti timittaji. Nidsa imapi cacajiquimeranitohui. Aji ssonohuaji Diodsa tetetidsemana najaropi nebonitohui. Aja Jerosarehuaji Diodsa huahuatidsemana nahihuaji naqui nebonitohui —nahi nade. <sup>22</sup> —Samaritano tiadenipi Diodsa tetetidsemana naraha, najaro imapi ssamoqquiri tiquinani. Naraha jodiodeni iana pajissa Diodsa ehetidse najaro. Ia jodiodenidsa tossiejehe ccajonapojaronana madija huapimadsa tojaribaqquijaro. <sup>23</sup> Jidapapi ima dsati bacco tani. Madija pajissa Abidsa huatidsemanaha madimanajaridenipa pohuadeni bodicca pajissehema Dio Pohuadsa jehe quinadsapa huatidsemanahitohui. Abipa madija nama quinajaridenidsapa jipa tahi. <sup>24</sup> Diopa assire jarahi, corime. Nadsama madija Dio Pohuadsa huatidsemanajaripa pohuadeni corimema huatidsemanahina bica tani. Maidsamana-jaradsa huatidsemanahina bica tani onajaro —nahi nade Jeso.

<sup>25</sup> Naraha amoneje attinipi: —Jehe, ohuapi nahato onani: Mesia pohua oni ohuahapa Cristo quinajari. “Najari ccajonahitohui” quinahipa ohomitta nade. Nidsa pohua bacco nadsapa pocca marinaja huapima iadsa ahuato inananitohui –nani nade. <sup>26</sup> Nadsapa Jeso ponidsa huati tade: —Ohuapi Mesia tiadsa huati huati onajaro –nani nade.

<sup>27</sup> Naraha pohua huatimadedeni iapi Jeso pohua huittarihidsa bacco inanineje Jesopa amonejedsa huati huati tahi qqui inadsapi ijabojo nade. Ibodidsa: —¿Nejecotohuira ponidsa huati huati tajari? –nade. Jeso pohuadsa naqui: —¿Nejeco imara poni tadsajani huahuatiti tinajaroneje? –inanitohuiraha huati inejerade. <sup>28</sup> Nadsapi amoneje ponicca jorori inebo, odsa pananihuaji toccanide. Odsa panani bacco tanidsapi madija huapimadsa huati tanijaro: <sup>29</sup> —Jari, aja magquideje nahatobote occa ima huapima ohuadsa huati huati tajari qqui tiquinajo. Puhuapa aja tohui imadijaro ia Idinide Cristo-Mesia itidija –nani nade. <sup>30</sup> Nadsapa najaro odsa pananicca madija mota jahininedsa Jesohuaji jahijonajari.

<sup>31</sup> Amoneje odsa pananihuaji huati huati teje naraha iassa Jesodsa: —Ia Maride, tijipaji –nade. <sup>32</sup> Naraha Jesopa: —Jijipa ohuaha ocajini –nade iadsa. <sup>33</sup> Nadsapi iara imahaha icanadsa: —¿Madija ohuaha pohuadsa jijipa dsojo inajonajari itide? –nade. <sup>34</sup> Nadsapa Jeso iadsa huati huati tajari: —Ohuapi Dio ohua cadossejari. Pohua jipa tahicca odsepe ijijaro. Najaropi pina occa jijipassa najaro. Dio Pohua dsepe ihiji nahicca najaro onajicanijine, onajaro. Najaropi occa jijipa –nade Jeso. <sup>35</sup> —Naraha tettidenipi ajima tiquinani: “Abadsico 4 canadsana huidsajacca ppa nahi bono jadahi pore nahi bica tahi” tiquinaraha ohuattipi: ¡Ajana qqui tiquinanaja! Aja huidsajacca ppa nahipa jadabote tojahi. Pore nahi bica tahi –nade. —Madija Dio Atti mittamanahijinepa najoramanahi. Pina huidsajacca ppa nahi jadajarissa quinahi. <sup>36</sup> Madija huidsajacca ppa nahi bono porede dsepedeni ihijimana najaripa ima bicani cacajimana najari. Puhuadenijinena madija camittehe jiquejeranicca cacajimana najari. Nadsapa huidsaja ppadedeni, bono porededeni tedsejepa huatidsemana tahi. <sup>37</sup> Nadsama ajijaro imapi pajissa: Huidsaja ppadedenipa ohuaha, huidsajacca bono jadadsa porededenipa ohuaha quinajari. <sup>38</sup> Nadsama ohuapi huidsajacca bono jadahi porede tiadeni dosse onabaqquina. Aja ticcadeni ppaniji jarahi. Najaridsapa madija ohuahadenina dsepedeni ijimanapojari. Naraha tidsepedeni ijimanajarocca huapimapi tassaqqujaro. Aja dsepedeni ijimanapojaricca naqui tiadenidsa ima bicani tojani –nade Jeso iadsa.

<sup>39</sup> Nadsapi amoneje Samariacca odsa panani Sicahuaji Jesocca ima huati huati tadsa madija mota huapi taha Jesodsa pajissa quinajari. Aji amoneje poni attinipi: —Aja otahimari huapima nahato tajari, ohuadsa huati huati tapa –najaro mittamanadsapa pajissa quinajari. <sup>40</sup> Nadsapa Samariacca madijadeni iahuaji bacco najonamanadsapa Jesodsa huati toquinade: —Iadsa timadiccaji –quinade. Nadsapi nanidsa icca huada pamaccanijine imadiccade. <sup>41</sup> Jeso nahidsa ibodsapa madija denima Jeso atti mittamanadsapa pohuadsa pajissa quinade. <sup>42</sup> Nadsapa amonejedsa huati toquinade: —Tahidepi tettidsaha “Jesopa Cristo-Mesia” inapojaro. Naraha jidapapi Jeso pocca marinaja imittadsapi pohuadsa pajissa inajaro. Tettidsaha imittani ojarijerani. Jidapapi pocca marinaja imittadsapi nahatoqquri inani: “Puhuapa dsama huapimacca madija Tonassiajade” inajaro –quinade.

<sup>43</sup> Nadsapi dsama arobeni Samariadsa icca huada pama nadsapi Jeso pohuadsa jaijanide dsama arobeni Carireahuaji. <sup>44</sup> Nahidsana Jeso Dio Atti cacomeraqquri najarideni tahimarideni huati tajaride: —Poccadeni madijapa puhuadenidsa: “Deni tijani” quina-jaraha nama najonamanajari –najaride Jeso. <sup>45</sup> Nadsapa Carireahuaji bacco nanidsapa icatidsemaneri nade. Aja odsa panani Jerosarehuaji madimanapodsapa ejete Pascoadsa pohua canahatori canahi qqui toquinapoja najari.

*Canahuaji toccanidsa tamine biji accodecca ejedeni inanomijari*

<sup>46</sup> Carireacca odsa panani Canahuaji ejetedsa Jeso pohuajine passoraha uva ppejene ihinana nanihuaji jaijanipomajaro. Naraha tamine biji accode bedipa odsa onihi Capernaohuaji coma tajari. <sup>47</sup> Naraha tamine biji accodepa: —Jeso dsama arobeni Jodeahuaji ccanidsa Carireadsa bacco nanihi –quinahi ima mittadsapa Canahuaji ccajonajari Jesodsa. Bacco najonadsapa Jeso pohuadsa huati tade: —Occa odsahuaji ohuadsa ticcaccaji, occa ejedeni dsoqquebote nahi tinanomihijine –nade. <sup>48</sup> Naraha Jeso attipa: —Tiadenipi ocanahatori canani qqui tiquinejeradsapi ohuadsa pajissa tiquinejerani. Qqui qqui tiquinapo-jerajarrocca ahuaato onana-jeradsa naqui ohuadsa jehe tiquinejerani –nade. <sup>49</sup> Naraha tamine biji accodepa: —Ohua Medsede, occa ejedeni dsoqque-jaradsama ticcaccaji –nade.

<sup>50</sup> Nadsapa Jeso pohuadsa huati tade: —Ticcaniji, ticca ejedenipa dsoqque-jarahi, tonomihi –nade. Nadsapa Jeso pohua attidsa pajissa nadsapa toccanide. <sup>51</sup> Nadsapa toccanijari, huada ssiaja pocca odsa bacco tanibote naraha pocca medsedeni bacco ijidsabaqqujari. Nadsapa huati toquinajari: —¡Ticca ejedenipa tonomidija! Madihi –quinahi nade. <sup>52</sup> —¿Maji nejecodsa occa ejedenipa tonomijaritta? –nahi nade. —Maittadsama maji itetepidsa huapi ppocone totappajaridija –quinahi nade. <sup>53</sup> Nadsapa imehi bodi huatojari: —Maittadsama maji itetepidsa Jeso huati tajaride: “Ticca ejedenipa tonomihi” najaride –nahi nade. Nadsapa tamine biji accode pocca odsacca huapima naco Jesodsa pajissa quinajari nade.

<sup>54</sup> Ajijaro imapi Jeso Jodeahuaji ccanidsa Carireadsa bacco nanidsapa nahi Carireadsa canahatori canapomajari.

## 5

*Passo inorinidsa coma tajari Jesojine tonomijari*

<sup>1</sup> Jodiodenicca ejete bacco tapomadsapi Jeso Jerosarehuaji toccanipomajaride. <sup>2</sup> Nani Jerosarehuajipi edede ihieqquedsimamana nahicca noccobiji huajira tanidsa siba ppajani tohuittidsanani dsaja tajaro. Najaro passo onini jodiodeni atti ebreodsapi: Besata, quiquinanajari. Nani passo inorinidsapi madija comaqquri najaridenicca odsa 5 canehe cacahitteri najarode. <sup>3</sup> Najaro odsadsapa madija comaqquri najarideni domo podsaridsa, noccodeni siri domo podsaridsa, issodeni siri domo podsaridsa, idedeni tone biqueradsa issodeni ssomi toquejenajarideni domo podsaridsa najaride. Puhuadenipa: —Passo ccomororo canadsa opodsippadsa onominijine –quiquinanajari. [ <sup>4</sup> Aji passo ccomororo cacana najaropi Diocca dodosse memehujicajine huajiji tadsa ccomororo cacana najaro, quiquinanajari. Passo ccomororo canadsa madija tahide toqquedsippapodsa podsippajarina totonomimana najari, quiquinanajari nade. ] <sup>5</sup> Naraha nahicca comaqquri najarideni ojariapa huajano 38 naha coma tajari. <sup>6</sup> Najarina ponahi Jeso qqui inadsa nahidsa coma taha maitta madirahi ima mittadsapa pohuadsa huati tajaride: —¿Tinominijine jipa tinaqui? –nade. <sup>7</sup> Naraha pohua cacomerade: —Jehe, jipa onaraha passo ccomororo canadsa ohua napodsippade ocappiradsa ajidsa onominijine ssamo tani –nade. —Passohuaji ccobo odsipparaha mijira onadsapi madija ohuahadenina tahide bacco bacco totodsippamanapo najari –nade. <sup>8</sup> Nadsapa Jeso aja coma tajaridsa huati tade: —¡Titehemaji! Titaboro tididsa ticcaniji –nade.

<sup>9</sup> Nanaja amadsati tonomidsapa totehema, pohua taboro idi toccani-ni naraha najaro huadapi sabado tojajarojine pohua taboro dsojode oppina tani, quiquinanajari. <sup>10</sup> Nadsapa jodiodenipa pohuadsa: —A, jidapapi icca jassinajacca huada sabadoraha titaboro dsojo taridsani. Najaro imapi bica tejerani –quinade. <sup>11</sup> Naraha tonomijaripa pohua cacomerade: —Ohua tonanomide attipa: “Titaboro tididsa ticcaniji” nadsapa



-nade. <sup>12</sup> Naraha: —¿Nejecojarina tiadsa: “Titaboro tididsa ticcaniji” najarinaja? -quinade.

<sup>13</sup> Naraha tonomijaripa pohua tonanomide oni ssamo tajari: —¿Nejecojarinaja? -nade. Aja Jeso madija inanomihidsapa madija huapi taja najari. Nahi pohuadenidsa quejemadsapa amossi najari. <sup>14</sup> Dsotodena Jeso pohua inanomijaripa Diodsa dada toqquimahuaji bacco inajari. Nahidsana pohuadsa huati tajaride: —Jidapapi tinomidsama imasiri tinanapoma-gerana. Imasiri tinanapomadsapi denima ocasserehe tiadsa ssonarinitohui -najaride Jeso pohua inanomijaridsa.

<sup>15</sup> Nadsapa tonomijari jodiodenidsa huatide toccajari: —Jesona ohua tonanomijari -nahi nade. <sup>16</sup> Naraha pohua atti nama nadsapa jodiodeni Jeso jara quinajari, inanadsoqqe-manahijine. Sabado huajjiradsa madija ihinanomibaqqui nadsapa pohuadsa huadimanajaride. <sup>17</sup> Naraha nidsa dsotodena Jesopa pohuadenidsa huati tade: —Occa Abipa dsepe ijhipaja nadsapa ohua naqui nema onajaro -nade.

<sup>18</sup> Jeso atti nama nahi mittamanadsapa jodiodeni paja icahadimanarihi nade. Attidenipa: —Sabadopi oppina tani inajarodsa ibora tajaradsapa madija inanomihi -quinajari. Jeso pohua atti onihi naqui: —Diopa occa Abi -nahi mittamanadsapa pohuadenidsa pina Diossa nahi quinadsa Jeso dsoqquehijine tohui inacomamanajari.

### *Dio Bedipa Imehi tedseje canahatoqquimerajari*

<sup>19</sup> Naraha Jesopa jodiodenidsa pohua tahimari ecomerade: —Pajissara tiadenidsa huati onajaro: Dio Bedipa pohua ehuerahipa nahatora tahi. Naraha pocca Abicca nahatohue qqui tadsana pohua naco nema inanajaro. Pina Imehicca nahatohuessa najaro ihinahato najaro Bedi naco -nade. <sup>20</sup> —Imehi pohua Bedidsa huati huana tadsapa pohuadsa pocca nahatohue nohue inajaro. Najaro nahatohue Abijinepi denima denima dsanaponitohui. Najaro qqui tiquinadsapi huajo ticanirenitohui -nade. <sup>21</sup> —Abi inahatonibaqquijaripa camittehe pohuadenidsa da da ihinaridsa najaro. Najarossa najaro pocca Ejedeni naco pohua jipa tajaridsa pocca camittehe da da ihinaridsa najaro. <sup>22</sup> Abipa Pohua Bedidsa dacorehe da inadsapi Pohua Bedi icadossejari: “Tiana madija poccadeni imasiri manaconi pohuadenidsa tinassonariji” najari. Nadsapa Abi Diopa madija poccadeni imasiri manaconi pohuadenidsa inassonari-geranitohui. Pohua Bedina pohuadenidsa inassonarinitohui. <sup>23</sup> Nadsana dsama huapimacca madijapa Dio Bedidsa: “A, nahato tahi” quinahijine. Pina Imehidsa: “A, nahato tahi” quinajarissa quinahijine. Naraha Pohua Bedidsa: “Nahato tahi” quina-jaradsapa pocca Abi pohua Cadossedsa naco: “Nahato tahi” quina-jarajarissa najari -nade Jeso.

<sup>24</sup> —Pajissara tiadenidsa huati onana: Ohuatti mittamanajaridenipa aja ohua Cadossed Abi Diodsa pajissa quinadsa naco camittehe jiquejeranicca cajimanasanapohuitohui. Poccadeni imasiri manaconipi pohuadenidsa ssonari-geranitohui. Tahide Diodsa ssamoqquri nadsapa pina dsoqquemanajarissa quinaraha najaro inebomanadsa camittehe jiquejeraniccadsa toquejenajari -nade. <sup>25</sup> —Pajissara tiadenidsa huati onana: Jidapapi ima bacco nabote nani: Diodsa ssamoqquri najarideni naco Dio Bedi ohuatti mittamanahitohui. Ohuattidsa iboraqquri nadsapa camittehe jiquejeranicca cajimanahitohui -nade. <sup>26</sup> —Abi Diopa camittehe jinede. Ohuapi Pohua Bedi ohuadsa naqui camittehe da inajaro. <sup>27</sup> Occa Abijine ohuatti ocajijaropi nidsa dsama jicadsa madijadenicca imasiri manaconi pohuadenidsa onassonarinitohui. Ohuapi Madija Bedi ojajarode. <sup>28</sup> Ajijaro ima timittamanadsapi huajo ticanire-geraji. Nidsa aja jicapojarideni ohuatti mittamanadsapa nahatonimanahitohui. <sup>29</sup> Nadsapa bicani inanamanehe jicajarideni nahatonimanadsapa camittehe jiquejeraniccadsa toquejenahitohui. Naraha imasiri inanamanehe jicajarideni nahatonimanadsapa poccadeni imasiri manaconi idsahua-baqquidsapa najidsohue jiquejeraniccadsa madimana-dsanapohuitohui -nade Jeso.

*Abi naco Pohua Bedi tahimari ecomerajaro*

<sup>30</sup> Jesopa jodiendenisa huati huati dsanapojaride: —Nadsama ohua mottapi madija poccadeni imasiri manaconipi pohuadenisa onassonari-jerajaro. Abi Dio Pohua Atti omittadsana imarideni ohocattema najaro. Ohuapi ohua motta ohua tohuini onanicca onana-jerajaro. Naraha aja ohua Cadossede Pohua Attissa onanadsana imarideni ocattemadsa onapajiranissa tajaropaji. <sup>31</sup> “Ohuapi Dio Bedi ojani” onajaro ohua motta huati huati onadsapi tiadenipi ohuadsa: “Pohua motta pohua atti iadsa ehecomera najaro pajissa jerani” titiquina najaro –nade Jeso. <sup>32</sup> —Naraha otahimari cacomeradepa ohuaha madihi. Najaripa Huano. Pahuapa otahimari pajissara huati huati tajari nahato onajaro –nade Jeso. <sup>33</sup> —Nadsama Huanocca imatohui dosse tinabaquimanapodsa naco otahimari ecomerajaro. Pahuapa pajissacca imara huati huati tajari –nade pohuadenisa.

<sup>34</sup> —Naraha madija otahimari cacomerade nohueradsa naqui epeje. Ohuapi Dio Bedi ojani otahimari ima onihidsa naqui ahuato tajaro. Aji otahimari Huano ecomerapojarocca tiadenisa huati huati onajaropi tossiejehe ticajimananijine. Huanocca huatinajadsa pajissa tiquinapodsapi ohuadsa naqui pajissa tiquinanijineraha. <sup>35</sup> Huanopa pina jorororo toquehessidsa jororo canapojarissa najari. Pohua jororonepa aja pocca huatinaja tiadenisa bica tade. Pahuadsa tetetidsemana naraha amossi nadsapa epeje tiquinade. <sup>36</sup> Nadsama Huanocca huatinajapi ajimani. Occa nahatohuena deni tojajaro. Occa nahatohuepi occa Abicca dosseniji. Najaro nahatohuejinena ima ahuato tajaro: Pajissa occa Abi ohua cadossejari.

<sup>37</sup> —Nadsama Abi ohua cadossejarijinena occa ima ahuato tani qqui tiquinajaropaji. Naraha Pohua Atti mohuini timittamana-jerani. Pohua assire naco qqui tiquinajarahi. <sup>38</sup> Pohua Atti naqui tibodidenisa madidsa-jerani, Abi Dio icadossejaridsa pajissa tiquinejerarojine. <sup>39</sup> Nadsama tiadenipi Dio Atti dsodo nani timittamananissa tanijine hua hua titiquina nani. Tettidenipi: “Dio Atti dsodo nanidsa camittehe jiquejeranicca bacco inanijine” titiquina najaropi nani Dio Atti dsodo nanidsa otahimari anini. <sup>40</sup> Naraha tiadenipi ohuadsa pajissa tiquinejerajaro. Pajissa tiquinadsapi camittehe jiquejeranicca ticajimana-dsanaponitohuiraha –nade.

<sup>41</sup> —Madija attidenipa: “Tiapi deni tijani. Bica tinani” quinahijine occajonajerajaro. <sup>42</sup> Ohuapi tibodideni nahato onani: Diocca tohuati huanehepi tiadenisa nohuerani. <sup>43</sup> Ohuapi occa Abi onima pocca dosseniji occajonajarode. Naraha tiadenipi ohuadsa: “Iadsa tijaji” tiquinejerani. Naraha madija ohuaha pohua pocca imadsa ccajonajaridsapa: “Iadsa tijaji” tiquinanitohui. <sup>44</sup> Naraha ¿nejecoma tiquinadsa ohuadsa pajissa tiquinanijine? Tiadenipi aja titessedeni tiadenidsa: “Tijine ima bica tani” quinahitohuina tiquinajaro. Naraha Diona ojarihi. Pohua Attipa tiadenidsa: “Tijine ima bica tani” nahijine tohuinipi tibodideni huatoma-jerani. <sup>45</sup> Tibodidenipi ajima najaro: “Dsama jicadsa Cristo-Mesia iadsa ima inassonariniijine Abi Diodsa huati tahitohui” tiquinaraha aja tiadenisa ima inassonariniijinepi Moisesina paja. Tibodidenipi: “Moisesicca marinaja eahuanissa tadsapi icasiejeranitohui” tiquinaraha tecahuamananijinepi tipajirama-jerani. <sup>46</sup> Nadsama Moisesipa otahimari dsodo inapojaro. Moisesidsa jehe tiquinadsapi ohuadsa naqui jehe tiquinanijineraha. <sup>47</sup> Naraha Moisesicca dsodonijidsa pajissa tiquinejeradsapi ¿nejecoma nadsa ohuattidsa pajissa tiquinanijine? –nade Jeso.

## 6

*Jeso madija 5 mil quinajarideni inajipabaquijari*

*Mateo 14.13-23; Maraco 6.30-44; Roca 9.10-17*

<sup>1</sup> Nani dsotodepi dsama arobeni Carireacca coridsa onini onihipi Tiberiacca coridsa quiquinanajari jippehuaji Jeso pohuadsa jaijarode. <sup>2</sup> Madija huapima

naco Jesotohui inatti jajahimissa najaride. Pocca nahatohuedsa comacquiri najarideni tonomiridsamanahi qqui toquinapoja najarijine Jeso pohuatohui quinajari. <sup>3</sup> Nadsapa Jeso ssonohuaji toqquemoradsa pohua huatimadedeni ia naqui pohuadsa jaijemorade. Nanidsa jassi inadsapi Jeso naco iadsama huittajaride. <sup>4</sup> Ajijaro ima toजारोपी jodiodenicca ejete onini Pascoa bacco tabote nadsade. <sup>5</sup> Nanidsa jassi inadsana madija bacco namissamanahi Jeso qqui inabaquijaride. Nadsapa Jeso pohua huatimade Feripedsa huati tade: —¿Nejecohuaji madija huapima jipamanahijine taparideni mitta inapadsaja? —nade Jeso. <sup>6</sup> Jesopa madija inajipabaquihijine nahato taporaha ecomadsa: —¿Feriipe atti nejecoma nahi? —nadsa huati tajari. <sup>7</sup> Naraha Feriipe attipa: —Dsiniro huemani pina 200 denariodsa madija taparideni mitta inadsapa badsira badsira taridsaraha motadenipa dsori tocanirehitohui —nade.

<sup>8</sup> Naraha Jeso huatimade ojaría onipa Adiri, pohuapa Ssino-Pedro ohuaha najarina dsabisso pan cajihí qqui tadsapa Jesodsa huati tajaride: <sup>9</sup> —Ajajari dsabissona pan 5, aba pama naha cajiraha madija huapima jipamanahijine pajira-jarahi. Madijapa huapi tahi —nade.

<sup>10</sup> Nadsapa Jeso iadsa huati tade: —Madija jassi taridsahijine huati tinabaquimanajo —nade. Nadsapa huati inabaquidsa nahi dsero bica tanidsa jassi taridsade. Maqquideje pohuarapa 5 mil quinajaride. <sup>11</sup> Nadsapa Jeso pan inaccadsa Diodsa huati tajari: —Jehe, epejeni. Ticca daniji iadsa bica tahi —najari. Nadsapa Jeso canahatori canajarijine pan tohuapidsapa madija jassi jassi teri najaridenidsa da inabaquirdsade. Aba naco najarissa inanajari. Nadsapa huapimadsa inapajirabaquihissa tade. <sup>12</sup> Madija huapima jipamanaha accaramanadsapa Jeso iadsa huati tade: —Mota tojadsapa tinaccaniridsa-manajo. Mota tinebomana tajarajo —nade. <sup>13</sup> Nadsapa pan 5 najari jipamanajari ajarideni mota inaccaniridsadsapa quiqui 12 naha ijrirdsade.

<sup>14</sup> Nadsapa Jeso canahatori canahi qqui toquinadsapa imahaha canade: —Pajissa ajaripa Dio Atti cacomerabote. Maittaccadsama ima imittapojaropi: “Ajijaro dsamadsa bacco nahitohui” quiquinanapode —quinade huapima. <sup>15</sup> Nadsapa madija attideni: —Jari, Jeso dama inadsa icca tamine tojahijine iaccanina —quinaraha Jeso pohuadsa nama quinahijine nahato tapodsapa madija inebobaquippomadsa pohua motta madihijine ssonohuaji denima toqquemorade.

### *Jeso passo tetepi ccamissajari*

*Mateo 14.22-33; Maraco 6.45-52*

<sup>16</sup> Nadsapi maji amossi nabote nadsa Jeso huatimade iapi coridsahuaji jaijedsipajarode. <sup>17</sup> Jesotohui imadidsapi dsomebote tojaraha Jeso qquedsippa-jaradsapa canoadsa jaijedsadsa coridsa jippehuajicca odsa panani Capernaohuaji iaccade. <sup>18</sup> Nadsapi coridsa nocconi iaccaraha jojode jo jo nadsapi coridsa ssoda ssoda nade. <sup>19</sup> Nani coridsa nocconi iaccanaja inattihuaji passo tetepi Jeso ccajonahi qqui inadsapi icappina nade. <sup>20</sup> Naraha pohua cacomerade: —¡Ticappinamana tejeraji, ohuapi ohua! —najonade. <sup>21</sup> Nadsapi etidsedsa pohuadsa: —Canoadsa tiqquedsaji —inade. Nadsapi amadsati Capernaohuaji bacco inade.

### *Jesotohui quinajarideni Capernaohuaji jahimissajari*

<sup>22</sup> Najaro ssiajadsa madija mota aja coridsa jippehuaji ibomanajarideni huatideni huatomadsa: —Jeso huatimadedenipa canoa cajarie caponajarodsa jai tojaraha Jesopa pohuadenidsa tocca najarade —quinajari. <sup>23-24</sup> Nadsapa nahidsa Jesotohui, pohua huatimadedenitohui qqui naridsamanaraha bacco inabaquimana-jaradsapa: —Jina, jippehuaji jaijana —quinanaja odsa panani Tiberiahuajicca canoa onihi bacco bacco canajona-manajaro quinade. Nahi Jeso pohua Diodsa huati tadsa: —Jehe, epejeni. Ticca daniji iadsa bica tahi —napodsa pan da da ihinabaqqi nahi huajira

tanihuaji huana huana canajona-manajaro. Nadsapa nahidsa ibomanajarideni najaro canoa onihidsa onihidsa jai tojedsaridsadsapa Capernaohuaji jahimissajaride Jesotohui.

*Jesopa madimana-dsanapohuijinecca pan tojajari*

<sup>25</sup> Jesotohui dsotode jahimissajarideni canoa onihidsa bacco bacco namissamanade. Nadsapa Jesodsa huati toquinade: —Ia Maride ¿nejecoma nadsa ahuaji bacco tajonajarotte? —quinade. <sup>26</sup> Naraha Jeso pohuadenidsa huati tade: —Jehe, pajissara tiadenidsa huati onana: Ohuapi tiadeni onajipabaquidsa teccaramanajarojine otohui tiquinajaro. Naraha occa marinaja, ocanahatori canani timittamananissa tejeradsapi najaro occa marinajatohui ohua qquidso tajonamana-jerani —nade Jeso pohuadenidsa. <sup>27</sup> —Naraha tiadenipi ticcadeni jijipa jicaca tahicca tohuira tibodideni huato-jeraji, onajaro. Jijipa jicaquera tahicca tohuira tibodideni huatomanaji —nade. —Ohuapi Madija Bedi ojajaroa jijipa jicaquera tahiccara tiadenidsa da onaridsahijine, onajaro. Nadsama najaro cacahuehepi occa Abi Dio ohuadsa da inadsa occajonajaro —nade Jeso.

<sup>28</sup> Naraha manaco pohuadsa huati toquinade: —Dio jipa tahicca inananiijinepi ¿nejecoma inanijine? —quinade. <sup>29</sup> Naraha Jeso pohuadenidsa huati tapomade: —Diopa ajima tiquinadsana jipa tajari. Aji ohua Diocca dossenijidsa pajissa tiquinadsana Dio jipa tahi —nade.

<sup>30</sup> Naraha manaco pohuadsa huati toquinapomade: —¿Nejecora innocodsa ticana-hatori canani qqui inadsa tiadsa pajissa inanijine? ¿Nejecora tinahatohuijine tipajirani? Qqui inana —quinade. <sup>31</sup> —Jari, pina maittaccadsama icca idideni dsama huamonihuaji Moisesidsa jahiridsadsapa jijipa oni mana jijipamana nahi quinade. Najaro ima Dio Atti dsodo nanidsapi ajima najaro: “Pohuadenidsa memehuaajicca pan da inadsapa jijipamana najari” quiquinanade —quinade Jesodsa.

<sup>32</sup> Naraha Jeso pohuadenidsa huati tapomade: —Pajissara tiadenidsa huati onana: Najari pan memehuaajiccapa Moisesicca daniji jarahi. Abi Diona pohuadenidsa da da nanaja najari. Naraha jidapanaccapa memehuaajicca pan pajissacca occa Abi Dio tiadenidsa da inajari. <sup>33</sup> Najaripa Diocca daniji memecca ccaronajari, dsama huapimadsa camittehe jiquejeranicca da inaridsanijine —nade Jeso. <sup>34</sup> Naraha pohuadeni attipa: —Jari, Mamaride, najari pan iadsa da da tidsanapojo —quinade.

<sup>35</sup> Naraha Jeso pohuadenidsa huati tade: —Aji ohuapajia pan timadimana-dsanaponijinepi. Ohuadsa pajissa quinajaridenipa pemimana-jarahitohui, baccodeni naco dsarimana-jarahitohui. <sup>36</sup> Nadsa tahide tiadenidsa huati huati onapode. Ohua qqui tiquinaraha ohuadsa pajissa tiquinejerani, onapode. <sup>37</sup> Naraha ohuapi occa Abicca daniji ohuadsa jahionajarideni huapimapa ohuattajobaqqui-jarahitohui. <sup>38</sup> Aji ohua memehuaaji occaronajaropi ohua ohua motta tohuini onanicca onananiijine jerani. Occa Abi ohua cadossejari. Pohua jipa tahicca tohuini onadsa odsepe ijiridsajaro. <sup>39</sup> Ohua cadossejari pohua jipa tahiccapi ajima najaro: Abi Dio ohuadsa madija inanabaqquijaripa ohuacahuabaqquihissa tadsapa amossi naja cama-jarahitohui. Nidsa huada jicarinicca bacco tadsapi huapima onahatoni-baqquihitohui. <sup>40</sup> Nadsama occa Abi Pohua jipa tahicca onihipi ajima najaro: Madija huapima Dio Bedi qqui toquinadsa pohuadsa pajissa quinadsapa camittehe jiquejeranicca cajimanahitohui. Nidsa huada jicarinicca bacco tadsapi najarideni huapima onahatoni-baqquihitohui —nade Jeso.

<sup>41-42</sup> Nadsapa jodiodeni Jeso atti: —Ohuapi pan memehuaajicca occaronajaro —nahi mittamanadsapa pohuama attitti cosseri nade: —Ajajari Jesopa Dsodse bediraha “Ohuapi memehuaaji occaronajaro” naha. ¿Pocca abi amidenidsa innoco jidsaqquri najaroqui? ¡Nahatoqquri inani! —quinade.

<sup>43</sup> Naraha Jesopa pohuadenidsa huati tade: —¡Ponima attitti ticossajaropi tinebomanaji! <sup>44</sup> Occa Abi Dio ohua Cadossedepa madija ohuadsa inanabaqquijaradsapa ohuadsa toquejena-jarahi. Naraha occa Abi ohuadsa inanabaqquijaridenina ohuadsa totoquejena najari. Najaridenipa nidsa huada jicariniccadsa onahatoni-baqquihitohui, onajaro. <sup>45</sup> Dio Atti cacomeraqquiri najarideni dsodo quinapojarodsa naqui ajima nani: “Diona madija huapima mari icanabaqquihitohui” quinapohui nade. Najaroa aja madija huapima Abi Dio Atti mittamanadsa tocahatterajaridenina ohuadsa totoquejena nahitohui.

<sup>46</sup> —Nadsama madija huapimapa Abi qqui toquina-jararaha ojariana Abi qqui tajari. Najaropi ohua. Ohuapi Dio pocca occajonajaro. <sup>47</sup> Ohuapi pajissara tiadenidsa huati onajaro: Madija ohuadsa jehe quinajaripa camittehe jiquejeranicca cajimana-dsanapohuitohui, onajaro –nade Jeso.

<sup>48</sup> —Jehe, ohuapi pan timadimana-dsanaponijinecca. <sup>49</sup> Nadsa maittaccadsama ticcadeni idideni dsama huamonihuaji jahiridsadsapa pan oni mana jipamanapojaripa huapima jicaridsajari. <sup>50</sup> Naraha aja pan memehujicca ccaronajari tahimari huati huati onajaro jipamanajaridenipa jicamana-jarahijine, onajaro. <sup>51</sup> Ohuapi pan camittehecca ojani memehujicca occaronajaro. Najari pan madija jipamanajaripa madimana-dsanapohuijine, onajaro. Tiadenidsa pan da onajaripa ohuassire. Madija dsama huapimacca tocassiejerahijinepa ohuana ohua ohuaccoranitohui –nade Jeso.

<sup>52</sup> Nadsapa jodideni Jeso atti mittamanadsa pohuadenira ahujahi huati ahujahi huati quinajaripa: —¿Pohua pohua assire nejecoma inanadsa ia tonajipabaqquihijine? ¡Ssamo tani! –quinajaride.

<sup>53</sup> Naraha Jeso pohuadenidsa huati tade: —Pajissara tiadenidsa huati onapomana: Ohuapi Madija Bedi ojajaroa ohueme tijipamana-jeradsapi camittehe jiquejeranicca ticappiramananitohui. Ohuemene dse tiquinejeradsa naqui camittehe jiquejeranicca ticappiramananitohui. <sup>54</sup> Naraha ohueme jipamanajarideni, ohuemene dse quinajaridenina camittehe jiquejeranicca cajimana-dsanapohuitohui. Nadsapa nidsa huada jicarinicca bacco tadsapi najaridenina onahatoni-baqquihitohui, onajaro. <sup>55</sup> Nadsama ohuemepi jijipa pajissacca, ohuemene naqui dsedse pajissacca ojani. <sup>56</sup> Aja ohueme jipamanajarideni, ohuemene dse quinajaridenipa ohuadsa madirid-samanajari. Ohua naqui pohuadenidsa omdiridsajaro. <sup>57</sup> Abi Dio camitta tajarina ohua dosse naronajaride. Najari Pohujine camitta onajaro. Najarossa onanajaroa madija ohua jipamanajaridenipa najaro camittehe jiquejeranicca cajimanahijine. <sup>58</sup> Aja pan memehujicca ccaronajari tahimari huati onajaropi pina pan oni mana ticcadeni idideni jipamanajarissa najarahi. Ididenipa najari mana jipamanaraha najaridenipa tojicahi. Naraha aji ohuapi pan memehujicca ojajaro. Najari pan jipamanajaridenipa madimana-dsanapohuitohui –nade Jeso.

<sup>59</sup> Najaro imapi Capernaohujicca Dio Atti mamarihuaji Jeso madija mari icanabaqquijaride.

### *Jeso attina camittehe jiquejeranicca*

<sup>60</sup> Nadsapa Jesocca marinaja pohua ime tahimarini mittamanadsapa aja pohuadsa jahiridsajarideni motapa imahaha canade: —Aja Jeso huati huati tajaripa imittanijine najo tani. ¿Nejecojarina mittadsa jehe nahijine? –quinade. <sup>61</sup> Pohuadenira attitti cosseri nahi Jeso nahato tadsapa pohuadenidsa huati tade: —¿Aji ima huati huati onajaropi tiadenidsa ocassera tajarocqui? <sup>62</sup> Naraha ohuapi Madija Bedi ojajaroa nidsa omadiponihuaji occamacossanini qqui tiquinadsapi ¿nejecoma tiquinapadseje? Nadsana tibodideni huatomanitohui. <sup>63</sup> Dio Corimena madijadsa camittehe da inajaro. Madijapa pohua tessedsa camittehe da inanijine ssamo tani. Ohuatti tiadenidsa huati huati onajaropi Dio Corimecca daniji. Camittehe jiquejeranicca tiadenidsa da inanijine pajirani. <sup>64</sup> Naraha tiadeni motapi ohuattidsa pajissa tiquinejeraccani



-nade Jeso. Madija mota pohuadsa pajissa quina-jarajaridenidsa naco nahato tapojari. Pohua ccaccoradedsa naco nahato tapojari. <sup>65</sup> Nadsapa denima huati tajari: —Najaroa ohuattipi: Occa Abi Diopa madija ohuadsa inanabaqqui-jaradsapa ohuadsa toquejena-jarahi. Naraha occa Abi ohuadsa inanabaqquijaridenina ohuadsa totoquejena najari -nade Jeso.

<sup>66</sup> Jeso najaro ima huati huati tadsapa madija pohuadsa jahiridsajarideni huapi taraha motapa jai tojaniridsade. Jeso pohuadsa jahiridsaraha ineboqqui-manajaride. <sup>67</sup> Nadsapa Jeso pohua huatimade 12 inajarodsa huati tade: —¿Tiadeni naqui: “Jaijanina” tiquinaqui? -nade. <sup>68</sup> Naraha Ssino-Pedro pohua cacomerade: —Ia Medsede ¿nejecojaridsara jaijanijine? Tettina ojarini camittehe jiquejeranicca. <sup>69</sup> Iapi tiadsaha pajissa inapode. Tiadsana nahatoqquri inajaro: Tiapi Diocca Ejedeni Bicabote tijani -nade Pedro. <sup>70</sup> Nadsapa Jeso huati tapomade: —Aji 12 tiquinajaropi tiadeni ocattejidsa-baqquijarode. Naraha ojariapa pina occa huadi Satanassa nahi -nade.

<sup>71</sup> Aja Jeso huati tajaripa Simon Iscariote bedi Joda tahimari huati tajaride. Jeso pohua huatimade 12 inaraha najari ojariana Jeso ccaccorade tojararide.

## 7

### *Jeso pohua imecote pohuadsa pajissa quina-jarajari*

<sup>1</sup> Nahi dsotodepa dsama arobeni Carireadsana Jeso madiccadsa odsa onihi, onihidsa mari mari naridsajaride. Dsama arobeni Jodeahuajipa jodiideni Jeso pohua dsoqquehijine tohui quinadsapa nahihuaji madide jipera tajari. <sup>2</sup> Naraha jodiidenicca idideni odsa huahuaqquidecsa madiridsamanapojaridenicca ejete tohuajirajarode. <sup>3</sup> Nadsapa Jeso pohua imecotedenipa pohuadsa huati toquinade: —Ajidsapi timadi tejeraji. Jodeahuaji ticcaji. Nahihuaji madimanajari titohui quinajaridenidsa naqui ticca nahatohue nohue nohue taridsaji -quinade. <sup>4</sup> —Madija ohuaha nahatohue cajimanajaridenipa pohuadeni tahimari tojaridsanijinepi poccadeni nahatohue ihinajimamana nejerajaro. Madija huapima qqui toquinahijine nahatohue ahuato ihinanamana najaro. Tia naqui nahatohue ticajidsapi madija huapima qqui toquinahijine nema taridsaji -quinade pohua imecote attideni. <sup>5</sup> Jeso pohua imecotedeniraha pohuadsa pajissa quina-jaradsapa attideni nama quinajaripaja. <sup>6</sup> Naraha Jeso pohua imecotedenidsa huati tade: —Tiadenipi huada ponimaccadsa tohuini tiquinaraha otahimari tojaridsanijinecca huada bacco tejeraccani -nade. <sup>7</sup> —Nadsama tiadenidsapa ajjarodsamacca madija nacasseraqquri najarahi. Naraha ohuadsana nacasseraqquri najari, ohuapi poccadeni imasiri cacomera onadsa. <sup>8</sup> Nadsapi tiadenira ejetehuaji jai tijaji, ohuapi oqquejerani. Ohuadsa nahatoqquri nahijinecca huada bacco tejeraccani -nade.

<sup>9</sup> Jeso atti nama nadsapa Carireadsa ibojaride.

### *Jesopa Odsa huahuaqquidecca ejetedsa quejemajari*

<sup>10</sup> Nadsapa Jeso imecotedeni ejetetohui jai tojadsapa pohua naco dsotode nahi madija huapi tahidsa toquejema-dsanapode. Naraha pina pohuadenidsa toqquerahi nahijine pohua cacomajaride. <sup>11</sup> Nadsa ejete tojadsapi jodiideni taminedenipa Jeso bacco quinahijine qqui naridsamanadsapa: —¿Nejecohuaji maqquideje nahatobotepa? -quinajaride. <sup>12</sup> Nadsapa madija huapima Jeso pohua tahimari imahaha canade. Madija motapa: —Najaripa maqquideje bicabotea -quinade. Naraha madija ohuahadenipa: —Iadsapa bica tajarahi. Pohuapa toponi mamajidsade -quinade. <sup>13</sup> Naraha Jesodsa jipaqquri najaripa jodiideni noppine cappinamanadsa ojidsa imahaha canade.

<sup>14</sup> Ejete mota tohuanaccaraha Diodsa dada toqquimahuaji Jeso toqquedsimadsa madija mari icanabaqquijaride. <sup>15</sup> Nahidsa Jeso mari icanabaqquidsana jodiodeni huajo caniredsa imahaha canajaride. —¿Nejecoma nadsa tohuattajaritta? Mari mari ihicanamana najararaha -quinade.

<sup>16</sup> Naraha Jesopa pohuadenidsa huati tade: —Occa marinajapi occa jerani, ohua Cadossedejine -nade. <sup>17</sup> —Aji tibodidenipi: “Pocca marinajapi ¿Diocca dossenijiqui? ¿Pohua motta pohua attirane?” tiquinajaro nitide. Naraha Dio Pohua jipa tahiccara tinanamanadsapi otahimari tiadenidsa ahuato tanitohui: Occa marinajapi Diocca. <sup>18</sup> Aja madija pocca ima huati huati tataja najaripa madija ohuaha pohuadsa: “A, tiapi nahato tinani” nahijine huati huati tataja najari. Naraha madija ohuaha huati huati tataja najaripa: “Ajijaro imapi ojine jerani, ohua cadossedecca ima, pohuadsara tetidsemanaji” najari. Najarina pajissacca ima huati huati tataja najari. Maida-jarajari -nade Jeso.

<sup>19</sup> —Naraha ¿Diocca dosseniji Moisesi dsodo inajaropi tiadenidsa nohuerajarot-taqui? Ticajimanaraha najarodsa iboqquiri tiquinajaro. ¿Nejecotohuira ohua tinanadsogquemananijine tohuini tiquinajaro? Najaropi Diocca dosseniji jerani -nade Jeso.

<sup>20</sup> Nadsapa madija huapima Jesodsa huati toquinade: —Tiapi tocorime ticajijarojine mona tijajaro nitidija. ¿Naraha nejecojarideni “Tia inanadsogquena” quinajari? -quinade.

<sup>21</sup> Naraha Jeso pohuadenidsa huati tade: —Icca jassinajacca huada sabadodsa occa nahatohueajari naraha huajo ticanirejarode. <sup>22</sup> Aji Moisesicca marinajadsapi: “Maqquidejedenipa huissinaja cacajimana nahijine” napohui nade. (Naraha najaro imapi Moisesi huati tadsa jerani. Abarahao madipodsama nema najonajaro.) Najaroa aji ejedeni huadari 8 nadsapa sabadoraha huissinaja titinacajibaqquimana najaripaja. <sup>23</sup> Tibodideni huatomanaji: Pina Moisesicca marinajassa titinamana nanijine sabadodsa maqquideje bedi huissinaja titinacajimana naraha ¿aji ojinepi bica tejeraqui? Ojinepa sabadodsa madija assire namanaha tonomiraha ¿nejecotohui ohua ticahadimanajaro? <sup>24</sup> Nadsapi ajijaro ima tibodideni huatonissa taji. Ponima “Tabaccora tani” tiquinejeraji. Ima nattomede tiquejenadsa pajissara nattome tiquinanissa taji -nade Jeso.

### *Jesopa Diocca dosseniji ccaronajari*

<sup>25</sup> Nadsapa Jerosarehuaji madimanajarideni motaha Jeso qqui toquinadsa imahaha canajaride: —“¿Ajajaria inanadsogquena” quiquinanajarico? <sup>26</sup> ¡A, naraha aja madija mari mari najonaha! Taminedenipa: “Mari tejeraji” quina-jarajarirana. ¿Icca taminedenipa: “Pajissa, Cristo-Mesia” quinajarico? -quinade. <sup>27</sup> —Naraha iapi ajajari madija pohua ccajonahihuajipa nahatoqquiri inani. Nassa Cristo-Mesiapa pohua ccajonahihuaji ssamoqquiri inaneje -quinade.

<sup>28</sup> Jesopa nahi Diodsa dada toqquimahuaji maride tojaraha pohuadeni atti mit-tadsa jadsirema huati tajaride: —¡Jehe, tiadenidsa jidsera onajarorane! ¡Ohua occajonanihuaji naqui nahatoqquiri tiquinajaroraneje! Naraha ohuapi occa imadsa occajona-jerani. Aja ohua Cadossedena pajissehe jinede. Naraha tiadenipi Pohuadsa tinoccodeni jidsaqquri nani -nade. <sup>29</sup> —Naraha ohuapa qqui onaja najari, nani Pohuahuaaji occajonajaro. Pohuana ohua cadossejaride -nade Jeso.

<sup>30</sup> Nadsapa nahidsa Jeso pohuadeni dsepedsa tojahijine dama quinahitohuiraha dama quina-jarade. Jeso dsoqquehijinecca ima Djojine najo taccajaro.

### *Jodiodeni motapa: —Jeso dama inana -quinajari*

<sup>31</sup> Naraha madija mota pahuadsa pajissa quinajaridenipa imahaha canade: — Jesocca nahatohue deni tojajaro. Pina Cristo-Mesiacca ima imittapojarossa nani. Najarina Cristo-Mesia pohua. Nidsa madija ohuaha pina Jeso canahatori canajarissa najarahitohui –quinade. <sup>32</sup> Madija —Jesopa Cristo-Mesia –quinajari imahaha canadsa jodiodeni mota marinaja onini pariseodsa jehe quinajarideni mittamanadsapa dada toqquimade tamededeni tedseje nahihuaajicca cacahuadedeni Jeso dama quinahijine dosse inabaquimanajari: —Jeso dama tiquinadsa teccanimanana –quinajari. <sup>33</sup> Jai tojadsapa Jesodsa bacco toquinajari. Naraha Jeso pahuadenidsa huati tade: —Ohuapi tiadenidsa badsira tehe omadi naccanijine. Nidsa dsotodepi aja ohua Cadossedsa occaninitohui. <sup>34</sup> Nadsapi otohui qqui taridsamananitohui, naraha ohua bacco tiquinejeranitohui. Ohua omadinihuaji “Bacco inana” tiquinaraha nanihuaji bacco tiquina-jeranitohui –nade Jeso.

<sup>35</sup> Najaro ima madija mittamanadsapa pahuadenira imahaha canade: —¿Dsama nejecoma nahihuaji toccahijine iadsa: “Ohua bacco tiquinejeranitohui” naha? –quinade. —¿Jodiodeni dsama onihihuaji tojaribaquijaridenihuaji toccahijineco? ¿Nahihuaajicca jodio quejena-jarajarideni mari icanabaquihijineco? –quinade. <sup>36</sup> —Pohua atti ¿nejecoma najari? Aja “Otohui qqui taridsamanaraha ohua bacco tiquinejeranitohui. Omadinihuaji naqui ‘Bacco inana’ tiquinaraha nanihuaji bacco tiquinejeranitohui” najari –quinade.

### *Passo camittehecca huati tajari Jeso*

<sup>37</sup> Odsa huahuaqquidecca ejete huada jicaniccana denima bica tajaro. Najaro huadadsana Jeso huadsa jadsirema huati huati tajaride: —Tibacco dsaridsapi ohuadsa ticcajonadsa dse taji –nade. <sup>38</sup> —Madija ohuadsa pajissa najaripa passo camittehecca cajihitohui. Najaro pohua bodicca qquenadsapi tojaribaquinitohui. Najaropi Dio Atti dsodo nanidsa dsodo napojaro –nade Jeso.

<sup>39</sup> Aja Jeso huati tajaripa pahuadsa madija pajissa quinajaridenina Dio Corime cajimanahitohui, najari. Naraha Jesopa dsoqqe, nahatoni, toccamacossani najaracadsapa Dio Corime tojaridsa-jaraccajaripajade.

### *Jeso tahimarijine madija carobemanajari*

<sup>40</sup> Jeso huati huati tahi mittamanadsapa madija mota pahuadenira imahaha canade: —Pajissa ajajari madijapa Dio Atti cacomerabotea –quinade. <sup>41</sup> Naraha madija mota attidenipa: —Ajajaripa Cristo-Mesia –quinade. Naraha madija mota attidenipa: — ¡Nohuerahi! Cristo-Mesiapa Carireahuajicca jarahi. <sup>42</sup> Aji Dio Atti dsodo napojaro dsapi ima ajima najaro: “Mesiapa tamine Dabi Potemahi. Dabicca dsamabote odsa panani Berenehuajina ccajonahitohui” nani Dio Atti dsodo napojarodsa –quinade.

<sup>43</sup> Najaroa aji Jeso tahimarijine madija carobemanajaride. <sup>44</sup> Madija motapa: —Toponi cocorohuaji Jeso dsojo inana –quinaraha cappinamanadsa dama quinarade.

### *Jodiodeni tamededeni huadimanajari*

<sup>45</sup> Nadsapa marinaja pariseodsa jehe quinajarideni, dada toqquimade tamededeni quinadsa odsa bodihuaji queriqquimanadsa nahi Diodsa dada toqquimacca cacahuadedeni Jeso damade jai tojaraha Jeso jiraha bacco nanimanadsa tamededeni huati toquinajari: —¿Nejecotohui teccanimana-jarajari? –quinahi nade. <sup>46</sup> Naraha cacahuadedeni huati toquinajari: —Jeso attipa deni tojadsa pina madija ohuaha attissa najaradsapa –nanimanahi nade. <sup>47</sup> Nadsapa pariseodeni cacahuadedenidsa huati toquinapomajari: —¿Tiadeni naqui Jeso tiadeni tocamidsabaquijari itidija? <sup>48</sup> Naraha ¿jodiodenicca tamededeni Jesodsa jehe naja camajarico? Nohuerahi ¿Pariseodeni naco Jesodsa jehe naja camajarico? Nohuerahi. <sup>49</sup> Aja madija pahuadsa

jahiridsajaridenipa iassa quina-jarahi. Pohnadenipa Dio Atti ssamoqquiri nahi. Najidsohue jiquejeraniccadsa toquejenahitohui –quinahi nade.

<sup>50</sup> Naraha aja pariseodeni ojaria oni Nicodemo dsome Jesodsa huatide toccaahuajarina pohnadenidsa huati tajari: <sup>51</sup> —¡Titaharibobo canaji! Icca marinajapi ajima ihinanajaro: Madija pocca ima ecomera-jeraccadsapi idsahua-jaraccahi. Tahidepa madija tahimaritohui huati inaridsadsa, pocca ima nahato inadsa, tabaccora tahi ahuato tadsana ihidsahua najari –nahi nade Nicodemo. <sup>52</sup> Naraha Nicodemodsa huati toquinajari: —¿Tia naqui Carireahuajicca tijajaro nitidija? Carireacca imatohui Dio Atti hua timaninissa taji. Carireahuajipa Dio Atti cacomeraqquiri najarideni qqenaja cama-jarahi –quinahi nade Nicodemodsa. <sup>53</sup> Nadsapa poccadeni odsahuajaji tai tojaniridsahi quinade.

## 8

### *Amoneje maqqui cajiraha maqquideje ohuaha inajajaricca ima*

<sup>1</sup> Nadsapi ssono Oribohuaji Jeso toqquemoradsa pohnadsa jaijemorade. <sup>2</sup> Huada ssiaja jaijedsippanidsapi Diodsa dada toqquimahuaji Jeso toqquedsimapomadsa madija ecahua-huajanimana najaride. Nahidsa Jeso huittaridsa madija mari icanabaqquijaride.

<sup>3</sup> Nahidsana jodiodenicca marinaja maridedeni, marinaja pariseodsa jehe quinajarideni tedsejepa amoneje eccajonamanajaro. Ponipi maqqui cajiraha maqquideje ohuaha najade tojadsa qqui toquinadsapa johua icanabaqquimanajari. Nadsapa amoneje dama quinadsa Jesodsa eccajonamanajaro. Jeso boronidsa mari mari nahihuaji inahuamana najarode. <sup>4</sup> Nadsapa pariseodeni Jesodsa huati toquinade: —Mamaride, ajijaro amonejepi maqqui cajiraha maqquideje ohuaha inajahi qqui inadsa tiadsa eccajonajaro. <sup>5</sup> Moisesicca marinajadsapi: “Amoneje maqquideje ohuaha najadsapi dsoqquena. Sibadsa tiquinaqquimanaji” nade. ¿Naraha tettipi nejecoma tani? –quinade Jesodsa.

<sup>6</sup> Nama quinajaripa pohnadeni bodi: —Jeso ima dsori inanadsapi pohnadsa ima inassonarinijine –quinajari. Naraha Jesopa tocattedsa nadsa ssiquidsa pohua dsepedsa dsodo dsodo nade. <sup>7</sup> Jesopa ssiquidsa dsodode tojaraha pariseodeni denima huati dsanapomananaja Jeso totehemadsa pohnadenidsa huati tade: —Jehe, tiquinaqquimanaji. Naraha imasiri cappirajarina tahide siba ididsa iquinapona –nade Jeso.

<sup>8</sup> Nadsapa tocattedsanipomadsa ssiquidsa denima dsodode tojapomade. <sup>9</sup> Naraha Jeso atti mittamanadsa bodideni huatodsapa maqquideje jadahidenina tahide toqquena, toqquena jicamana nade. Huapima naco jai tojenaha jicadsapa Jeso pohua, amoneje poni tadsajanira ba najaride. <sup>10</sup> Nadsapa Jeso totehemadsa aji amoneje huajarodsa huati tade: —Asi ¿nejecodsa jidacca madija tia ccaccajonadedenipa? ¿Najarideni ojariapa imasiri tinanani manaconi tiadsa: “Tia onanadsogquena” naja cama-jaraco? –nade Jeso. <sup>11</sup> Naraha Jesodsa huati tade: —Ohua Medsede, nohuerapaja –nade. Naraha Jeso ponidsa huati tapomade: —Jehe, ohua naqui tidsoqqueji onejerani. Nadsama ticcanina. Jidapapi maqquideje ohuaha naja tejerana. Imasiri tinanapoma tejerana –nade Jeso.

### *Jeso ssiejenepe madija huapimadsa ahuatoridsajaro*

<sup>12</sup> Jeso madija huapima mari icanabaqquipomajari: —Ohuapi dsama huapimadsa ossiejene ahuatoridsajaro. Madija ohuadsa toquejenajaripa ossiejene cajimanahi. Ossiejene cajimanadsapa camittehe jiquejeranicca naco cajimanahi. Nadsama camittehe jiquejeranicca cajimanadsapa imasiricca dsidsinidsa toquejena-jarahitohui –nade Jeso. <sup>13</sup> Naraha marinaja pariseodsa jehe quinajari attideni Jesodsa: —Tia

motta titahimari tetecomera najaro. Ia motta itahimari ecomerani bica tejerani, inajaro -quinade.

<sup>14</sup> Naraha Jeso pohuadenidsa huati tade: —Jehe, ohua motta otahimari ohua-comeraraha ohuattipi pajissa. Ohuapi ohua occajonanihuaji nahato onani. Ohua jara onanihuaji naqui nahato onani. Naraha tiadenipi occajonanihuaji ssamoqquiri tiquinani. Ohua jara onanihuaji naqui ssamoqquiri tiquinani -nade Jeso. <sup>15</sup> — Naraha tiadenipi ajijaro namidsa madimanajaridenicca marinajadsara madijacca ima nattomede nahatoqquiri tiquinajaro. Madijajine ima bica tejerani tiadenidsa ahuato tadsapi: “Pocca ima tabaccora tani. Icca marinajassa nejerani” titiquina naraha ohuapi nema onejerani. Madijacca ima nattome onejerani. <sup>16</sup> Naraha ohua madijacca ima nattome onanijinepi ohua motta nattome onejerani. Occa Abi ohua Cadossede tedsejena madijadenicca ima nanattome ihinanajaro. Nema inajaropi madijacca imadsa: “Tabaccora tani” onadsapi ohuattipi pajissa. <sup>17</sup> Naraha ticcadeni marinaja dsodo nanidsapi: “Madija pamaha qqui toquinajari poccadeni ima najarossa najaro ecomeramanadsapi pohuadeni attidsa pajissa tiquinaji” nade. <sup>18</sup> Ohuapi ohua motta otahimari ohohuacomera naraha Abi ohua Cadossede naco otahimari ehecomera najaro -nade Jeso.

<sup>19</sup> Naraha Jesodsa huati toquinapomade: —Ticca abipa ¿nejecohuaji madijari? -quinade. Naraha Jesopa pohuadenidsa huati tapomade: —Ohuadsa tinoccodeni jidsa tani, occa Abidsa naqui tinoccodeni jidsa tani. Ohuadsa tinoccodeni jidsera tadsapi occa Abidsa naqui tinoccodeni jidsera tanitohuiraha -nade Jeso.

<sup>20</sup> Najaro imapi Diodsa dada toqquimahujicca dsiniro huahuadsa baho cacahittidseri naridsanihuaji mari icanabaqquijaride. Nahidsapa Jeso dama quina-jaraccade, pohuadsa ima tojanijinecca huada bacco tejeraccadsa.

—*Ohua occaninihuaji jai tijanijine tipajiramana-gerani -najari*

<sup>21</sup> Naraha Jeso pohuadenidsa huati tapomade: —Ohuapi occaninitohui. Occanidsapi otohui qqui taridsamananitohui. Naraha ohua occaninihuaji jai tijanijinepi tipajiramana-gerani. Tiadenipi ticcadeni imasirima tijicanitohui -nade Jeso.

<sup>22</sup> Naraha jodiodenipa: —¿Pohua nanadsoqquehijineco? ¿Nejecotohuiraha “Ohua occaninihuaji jai tijanijinepi tipajiramana-gerani” naha? -quinade.

<sup>23</sup> Nadsapa Jeso pohuadenidsa huati tade: —Tiadenipi ajijaro namicca tiquejenani. Naraha ohuapi ajijaro namicca ojajerani. Ohuapi memehujicca ojani. <sup>24</sup> Aji ohuatti tiadenidsa: “Ticcadeni imasirima tijicanitohui” onajaropi ohuadsa pajissa tiquinejerajaro. Ohuapi aji huati huati onajaro ojani onajarodsa pajissa tiquinejeradsa naqui ticcadeni imasirima tijicaridsanitohui, onajaro -nade Jeso.

<sup>25</sup> Naraha manaco Jesodsa huati toquinade: —Tiapi ¿nejeco madija tijani? -quinade. Naraha Jesopa: —Ohuapi tahide otahimari tiadenidsa huati huati onajonajaroa aji jidapana tiadenidsa huati huati onajaropaji. <sup>26</sup> Nema nadsapi ticcadeni tabaccorehe huapima tiadenidsa huati onadsapi tiadenidsa ima ssonarinitohuiraha nema onejerani. Naraha ohua cadossejarina pajissa huati huati tajari. Pohuapa ohuadsa huati huati tahi omittadsana ajijaro dsamacca madijadsa huati huati ohogquima najaro -nade Jeso.

<sup>27</sup> Naraha pohuadenipa Jeso pocca Abi Diocca ima huati huati tajaripa mitta-manahissa tajarajari. <sup>28</sup> Najarojine Jeso denima huati tapomajaride: —Ohuapi Madija Bedi ojajaroa nidsa ahua porimacossanidsa ohua acca ticanamacossa-manadsa que onanitohui. Nadsana nahatoqquiri tiquinanitohui: Aji huati huati onajaro ojani onajaropi pajissa. Ohua mottapi ohua jipa onanicca onana-gerani. Occa Abi ohua mari canadsana huati huati ohonanajaro. <sup>29</sup> Nadsama ohua Cadossedepa ohuadsa madihi. Occa Abipa ohua motta ojanijine ohua nebo-jarahi, huajijiradsa Pohuadsa bica tanicca ohonana nadsapi -nade.



<sup>30</sup> Najaria Jeso huati huati tadsapa madija mota huapi taha pohuadsa pajissa quinajaride.

*Ohuahadenipa Diocca ejedeni toquejenajari, ohuahadenipa imasiricca medse toquejenajari*

<sup>31</sup> Nadsapa Jeso jodiodeni mota pohuadsa pajissa quinajaridenidsa huati tade: — Ohuattidsa disseraqquri tiquinadsapi pajissa occa tiquejenanitohui -nade. <sup>32</sup> — Occa tiquejenadsapi pajissehera nahatoqquri tiquinanitohui. Najaro pajissehe nahatoqquri tiquinadsapi tiadeni medse tabaccora tajaridsa medse tiquejena-jeranitohui -nade Jeso.

<sup>33</sup> Naraha manaco Jesodsa huati toquinade: —Iapi Abarahao potemahi iquejenajaro. Medse iquejena-jerehe nema inajonajaro. Naraha ¿nejecotohui iad-sara: “Medse tiquejena-jeraniijine” tajaro? -quinade. <sup>34</sup> Naraha manaco Jeso pohuadenidsa huati tade: —Pajissara tiadenidsa huati onana: Madija imasiri inanadsapi najaro imasiricca medse tojarari. <sup>35</sup> Madija medse tojararipa pohua medsedecca medse tojaraha pohua medsededsa nama dsanapojara tahi. Medse tojararipa pina madija pohua pocca ejedenissa najarahi. Madijacca ejedenipa pocca abidsa nama dsanapojari. <sup>36</sup> Nadsama Dio Bedina tiadeni tappa tabaqquidsapa pajissa medse tiquejena-jerehe timadimananiijine onajaro. <sup>37</sup> Jehe, tiadenipi Abarahao potemahi tiquejenani nahato onani. Naraha ohuattidsa pajissa tiquinejeradsapi ohua tinanadsoqquemanabote nani. <sup>38</sup> Nadsama ohuapi occa Abi ohuadsa nohue inajarocca huati huati ohonanajaro. Naraha tiadenipi ticcadeni abi huati huati tataja nahi titimittamana najarora najarossa titinanamana najaro -nade Jeso.

<sup>39</sup> Naraha manaco huati toquinade: —¡Icca abipa Abarahao! -quinade. Naraha Jeso huati tapomade: —Pajissa Abarahao potemahi tiquejenadsapi pina Abarahao-jinessa tinanamananitohuiraha. <sup>40</sup> Dio pajissa ohua mari canajaricca tiadenidsa huati huati onajaroraha ohua tinanadsoqquemanabote nani. Abarahaojinepi ima nema nejerani. ¡Nohuerani! <sup>41</sup> Naraha tiadeni naqui pina ticcadeni abijinessa tinanamanajaro -nade Jeso. Naraha manaco huati toquinajari: —¡Abi ohuaha icappirani! ¡Icca Abipa Diona ojarihi! -quinade.

<sup>42</sup> Naraha Jeso pohuadenidsa huati tade: —Pajissa Dio ticcadeni abi tojadsapa nassa ohuadsa naqui tetideni huanacquiri nanitohuiraha nema tiquinejerani. Ohuapi Diohuaji occajonajaro aji omadini. Ohuapi ohua ehuerani occajona-jeraraha Abi Dio ohua cadossedsa occajonajarode. <sup>43</sup> Naraha ¿nejecotohui ohuatti timittamananissa tejerajaro? Occa imadsa jiperaqquri tiquinadsapi aji timittamananissa tejerajaropaji. <sup>44</sup> Ticcadeni abipa Diocca huadi Satana. Pohuadsa tiquejenani. Pohua jipa tahicadsa disseraqquri tiquinajaropaji. Satanapa ijine ahuahijinera tohuattapoja najari. Pajissa huati tahijinepa ssamo tahi. Pohuapa maidsehe jinedeja najari. Najaria maidsehedsa huati huati nanaja najaripaja. <sup>45</sup> Najarojine tiadenidsa pajissara huati huati onaraha tiadeni naqui ohuadsa pajissa tiquinejerajaropaji. <sup>46</sup> ¿Nejecojarina imasiri ocajini ecomeraniijine nahato tahi? Nohuerahi. Ohuapi pajissara huati huati onadsapi ohuadsa pajissa tiquinaniijine bica taraha ¿nejecotohui ohuadsa pajissa tiquinejerajaro? <sup>47</sup> Madija Diocca quejenajaripa Dio Atti mittamanahijine jipacquiri najaripaja. Naraha Diocca tiquejena-jeradsapi aji Dio Atti mittade jiperaqquri tiquinajaropaji -nade Jeso.

*Cristopa tahide madipojari, Abarahaopa dsotode*

<sup>48</sup> Naraha manaco jodiodeni Jesodsa huati toquinade: —Tiapi samaritano tijani. ¡Tiadsa jiperaqquri inani! Jidacca huati inapojaropi pajissa. Tocarime ticajijaro nahatoqquri inani -quinade Jesodsa. <sup>49</sup> Naraha Jeso huati tapomade: —Ohuapi tocorime ocappirani. Ohuapi: “Occa Abipa deni tojahi” ohonanajaro. Naraha

tiadenipi ohuadsa: “Jesopa deni tojahi” titiquina nejerani. <sup>50</sup> Naraha ohuapi madija ohuadsa: “Deni tijani” quinahijine tohuini onejerajaro. Naraha ojariana ohuadsa: “Deni tijani” quinahijine jipa tajari. Pohuana occa ima huapima nahato tajari. Pohuana madijacca ima huapima tocattejidsade nahato tajari. <sup>51</sup> Nadsama ohuapi pajissara tiadenidsa huati onajaro: Ohuattidsa iboraqquiri tiquinadsapi paji tijicarini nejeranitohui –nade Jeso.

<sup>52</sup> Nadsapa manaco jodiodeni huati toquinade: —Jidapapi nahatoqquiri inani tocorime ticajijaro. Abarahaopa maittaccadsama dsoqquepohui. Dio Atti cacomeraqquiri najarideni naco jicaridsahi. Naraha tia tettiipi: “Ohuattidsa iboraqquiri tiquinadsapi paji tijicarini nejeranitohui” taha. <sup>53</sup> ¿Ajina tiapi icca idi Abarahaodsa deni tijajarorane? Abarahaopa dsoqquepohui. Dio Atti cacomeraqquiri najarideni naco jicaridsapohui. Naraha tiapi tibodi: “Ohuapi deni ojani” ¿tajaroqui? –quinade Jesodsa.

<sup>54</sup> Naraha Jeso pohuadenidsa huati tapomade: —Ohua mottapi ohua deni onanani pajira-jerani. Naraha occa Abi ohua deni tonanadsana pajirani. Occa Abipa Dio. Pohuadsa: “Icca Dio” tiquinaraha. <sup>55</sup> Pohuadsa ssamoqquiri tiquinani. Ohuana Pohuadsa nahato onani. “Nahato onejerani” onadsapi mamajidsade ojani, pina tiadenissa onanitohuiraha. Naraha ohuapi pajissa Pohuadsa nahato onajaro. Pohua Attidsa naqui ibora onajaropaji. <sup>56</sup> Nadsama ticcadeni idi Abarahaopa maittaccadsama occajonanicca ima nahato tapodsapa huatidsedsa otohui madijari. Pajissa Djojine occaronani qqui tadsapa huatidseri najaride –nade Jeso.

<sup>57</sup> Naraha jodiodenipa Jesodsa huati toquinapomade: —Tiapi ticca huajano 50 bacco tajararaha ¿Abarahao qqui tinajarittaco? –quinade. <sup>58</sup> Naraha Jeso pohuadenidsa huati tapomade: —Pajissara tiadenidsa huati onajaro: Ohuapi Abarahao tossonajaraccadsa tahide omadipojarode –nade Jeso.

<sup>59</sup> Nadsapa jodiodeni huadimanadsa siba nacca-cca quinade, Jeso iquinaqqui-manahijine. Naraha Diodsa dada toqquimahuaji madija huapi taja najari. Jesopa najari madijadenidsa quejemadsa amossi najaride. Diodsa dada toqquimahuaji toqquenajari.

## 9

### *Jesopa nocco siri nama naha tossonahi nocco ssire inanajari*

<sup>1</sup> Jeso itedseje ccaridsadsapa maqquideje nocco siri qqui inade. Najaripa nama naha tossonajari. <sup>2</sup> Nadsapi ia pohua huatimadedeni huati inade: —Ia Maride ¿nejecotohui ajajari maqquidejepa nocco siri tossonajari? ¿Imehidenicca imasiri manaconico? ¿Pocca imasiri manaconirana? –inade. <sup>3</sup> Naraha Jeso iadsa huati tade: —Pocca imasiri manaconi jarahi. Imehidenicca imasiri manaconi jarahi. Nama naha tossonajari, nahi dsotodepa Diocca nahatohuejine tobicahi ahuato tahijine. <sup>4</sup> Nema nadsapi ssiaja taccadsama ohua cadossejaricca dosseniji idsepe ijina, onajaro. Nidsa dsomedasapi idsepe ijinijine ssamo tani. Nidsa odsoqquedsapi pina dsomejarossa nanitohui. <sup>5</sup> Najaroa aji namihuaji omadiccadsapi ajijaro namidsa madimanajaridenicca ssiajani ojaccani –nade Jeso.

<sup>6</sup> Najaro ima huati taha jicadsapa Jeso pohua nassope namidsa ppito inadsa sica sica inadsa maqquideje nocco siri nocco sse inajaride. <sup>7</sup> Nadsapa Jeso nocco siri dosse inade: —Ajicca siba hui todsanicca passo onini Siroedsa tinocco ssahua tana –nade. (Siroe ettidsapi: Dosse tahi, inajaro.) Nadsapa toqquedsippajari, pohua nocco ssahua nadsa pocca odsahuaji toccanidsapa nocco ssire taha toccanide. <sup>8</sup> Nadsapa pohua inoricca madija, ohuahadeni tedseje nocco tobicahi qqui toquinajari. Pohuadenipa dsinirotohui huihuitta nahi qqui qqui toquinapoja najari pohua tahimari imahaha canajaride: —¿Ajajaripa danijitohui huihuitta najari jaraco? –quinade. <sup>9</sup> Naraha

madija ohuahapa: —Najaridija -quinade. Naraha madija ohuahapa: —Najari jarahi. Pina najarissa najari -quinade. Naraha pohua attipa: —Jehe, ohuapi ohua -nade.

<sup>10</sup> Nadsapa pohuadsa huati toquinade: —¿Nejecoma tadsa tinocco ssire tajaro? -quinade. <sup>11</sup> Naraha pohuadenidsa huati tade: —Aja maqquideje oni Jeso quinajari ssicarini inahatodsa onocco sse inajaropa. Nadsapa ohuadsa: “Ajicca passo Siroedsa tinocco ssahua tana” nadsa oqquedsippadsa onocco ssahua onadsapi onocco ssire tajaropa -nade. <sup>12</sup> Nadsapa pohuadsa huati toquinade: —Naraha najari maqquidejapa ¿nejecohuajinaja? -quinade. Naraha: —Ssamo onani -nade.

*Marinaja onini pariseodsa jehe quinajarideni nocco ssire nimanihidsa huati huati toquinajari*

<sup>13-14</sup> Jesopa jodiidenicca jassinajacca huadadsa ssicarini inahatodsa madija nocco siri nocco ssire inanajari. Najaro jassinajacca huadadsa nama najarijine madijadenipa nocco ssire nimanihi iaccamanajaride, marinaja pariseodsa jehe quinajaridenihuaji. <sup>15</sup> Nadsapa najaridenina aja nocco ssire nimanihidsa huati toquinade: —¿Tia nejecoma tonanadsa tinocco ssire tajarotte? -quinade. Nadsapa: —Jehe, ssicarinidsa onocco sse inajaro. Nadsapi passodsa ssahua onadsa onocco ssire tajarodija -nade. <sup>16</sup> Nadsapa pariseodeni mota attidenipa: —A, najari madijapa Dio icadosse-jarahi. Jassinajacca huadadsa: “Odsepe iji-jerana” najarahi -quinade. Naraha mota attidenipa: —Canahatori canadija bica tahi. Madija imasiri cajimanajaridenipa nama quina-jarahi -quinade. Nama quinadsapa Jeso tahimarijine carobemanajaride.

<sup>17</sup> Nadsapa nocco ssire nimanihidsa huati toquinapomade: —¿Tiapi nejecoma tani tinocco ssire tonanadsapi? -quinade. Naraha nocco ssire nimanihi attipa: —Ohuattipi Dio Atti cacomerabote, onajaro -nade.

<sup>18</sup> Naraha jodiidenicca taminedenipa Jesojine nocco ssire nimanihidsa: —¿Pajissa jarahitidija! Nadsama nocco bicahiraha -quinade. Nadsapa nocco ssire nimanihi imehi imenidenitohui huahua quinade. <sup>19</sup> Huedajonadsapa pohuadenidsa huati toquinade: —¿Ajajaripa ticcadeni ejedenico? “Najaria nocco siri tossonahi” ¿tiquinajarottaqui? Naraha jidapapa nocco ssire tajarirana -quinade. <sup>20</sup> Nadsapa imehi imenidenipa huati toquinade: —Ajajaripa icca ejedeni nocco siri tossonajaride nahatoto inani. <sup>21</sup> ¿Naraha nejecoma nadsa nocco ssire tajari? Ssamomo inani. Pohua nocco ssire tonanade naco ssamomo inani. Pohuadsara huati tiquinaji, pohuapa ejedeni jarahi. Pihuana nahato tahi -quinade imehi imeni attideni.

<sup>22</sup> Aja imehi imenidenipa cappinamanajarijine: —Pohuadsara huati tiquinaji -quinajaride. Jodiidenicca taminedeni atti nahatoto tapoja najari. Aja madija Jesodsa: —Najaripa pajissa Cristo-Mesia -nadsapa ettajohuitohui. —Icca Dio Atti mamarihuaji qquedsimapoma-jarahijine -quinapoja najari. <sup>23</sup> Najaria imehi imeni attidenipa: —Pohuadsara huati tiquinaji, pohuapa ejedeni jarahi -quinajaripajade.

<sup>24</sup> Nadsapa jodiidenicca taminedeni nocco ssire nimanihi pohuadsa huahua quinapomade. Ccajonadsapa pohuadsa huati toquinade: —Diopa tetti mittahi. Pajissara iadsa huati tinaji. Iapi nahatoqqui inani: Najari maqquidejapa imasiri jinede -quinade. <sup>25</sup> Naraha manaco huati tade: —Ohuapi ssamo onani. Imasiri cajihitide, caji-jarahitide. Ajijaro imana nahato onani ojarini. Tahidepi onocco siriraha jidapapi qqui onani -nade.

<sup>26</sup> Naraha pohuadsa denima huati toquinapomade: —¿Tia nejecoma tonanajari? ¿Nejecodsara tinocco tonanabicajari? -quinade jodiidenicca taminedeni. <sup>27</sup> Naraha huati tapomade: —Nadsa huati onaporaha ohuatti timittamana-jerajaro. ¿Nejecotohui ima huati huati omacca nanitohui tiquinajaro? ¿Tiadeni naqui pocca tiquejenanijinerane? -nade.

<sup>28</sup> Nadsapa jodiodenicca taminedeni huadiedsa nocco ssire nimanishi itamasso-manadsa huati toquinade: —¡Tiapi najari maqquidejeca tijana! Naraha iapi Moisesicca mamari tabaqqui iquejenajonajaro. <sup>29</sup> Iapi Moisesidsa Dio huati tapo-jaripa nahatoqquri inani. Naraha najari maqquidejedsapi nahatoqquri inejerani. ¿Nejecoma nahiccatta? -quinade jodiodenicca taminedeni.

<sup>30</sup> Naraha nocco ssire nimanishi huati tade: —¡A, ticcadeni ima jidsa tani! Pohua ccajonahihuaji ssamoqquri tiquinaraha, pohuapa onocco ssire tonanajari.

<sup>31</sup> Nahatoqquri inani: Aja madija imasiri cajijari attipa Dio mitta-jarahi. Naraha madija Diodsa dissera tajari, Dio jipa tahicca inanadsana pohua atti Dio mittahi.

<sup>32</sup> Maittäccadsama dsama nahatoponidsama maqquideje nocco siri tossonahi nocco ssire inanamanahi ima ihimittajona nejerajarode. <sup>33</sup> Nassa najari maqquideje Diocca jaradsapa ssamo tanaja -nade nocco ssire nimanishi atti.

<sup>34</sup> Nadsapa manaco huati toquinade: —Tiapi imasirima tissonaraha ¿nejecotohui iara ia mari ticanabaqquijaro? -quinadsapa nocco ssire nimanishi mohua quinade: —¡Icca Dio Atti mamarihuaji tiqquedsimanipoma tejeraji! -quinade.

### *Jesodsa pajissa quina-jarajaridenipa pina noccodeni sirissa quinajari*

<sup>35</sup> Jodiodeni poccadeni Dio Atti mamaridsa nocco ssire nimanishi qquedsimanipomajarahijine mohua quinahi Jeso mittajaride. Nadsapa pohua tedseje bacco tocanire-pomadsapa pohuadsa huati tade: —¿Tiapi Madija Bedidsa pajissa taqui? -nade.

<sup>36</sup> Naraha nocco ssire nimanishi Jesodsa huati tade: —¿Nejecojarina paja Madija Bedi? nani pohuadsa pajissa onanijine -nade. <sup>37</sup> Naraha Jeso pohuadsa huati tade: —Nadsa ohua qqui tinaha, ohuapi Madija Bedi ojani. Ohuadsa huati huati tinajaro -nade.

<sup>38</sup> Nadsapa nocco ssire nimanishi pohua nocco ssire tonanade bacchohuaji pohua pitodsa huitta nadsa: —Jehe ohua Medsede, tiadsa pajissa onani -nade Jesodsa huatidsedsa. <sup>39</sup> Nadsapa Jeso huati tade: —Ohuapi ajijaro dsamadsa occajonajaro madija huapimacca ima cattemade. Nahi noccodeni siripa noccodeni ssire onanabaqquidsa qqui toquinahijine. Naraha noccodeni bicahi qqui toquinajaridenipa noccodeni sirissa quinahijine -nade Jeso. (Jeso atti nama najaripa pohuadsa pajissa quina-jarajaridenipa pina noccodeni sirissa quinajari.)

<sup>40</sup> Naraha jodiodeni mota marinaja pariseodsa jehe quinajari nahidsa queriqquimanajarideni Jeso atti mittamanajari. Nadsapa Jesodsa huati toquinade: —¿Naneje inocco sirirane? -quinade Jesodsa. <sup>41</sup> Naraha manaco Jeso pohuadenidsa huati tade: —Nassa tinoccodeni siridsapi ticcadeni imasiri nohueranitohuiraha “Iapi inocco bicani” tiquinadsapi ticcadeni imasiri tiadenidsa jiquejeraccani -nade Jeso.

## 10

### *Edede cacahuadecca ima*

<sup>1</sup> Nadsapa Jeso huati tapomade: —Pajissara tiadenidsa huati onajaro: Madijapa aja edede tadsaricca noccobijidsa toqquedsima-jaradsa noccobiji nohueranihuajina joppa todsimajaripa bobotide. <sup>2</sup> Naraha aja madija edede tadsaricca noccobijidsa toqquedsimajaripa edede cacahuade pohua. <sup>3</sup> Edede cacahuade edede tadsarihuaji bacco tadsapa pocca dodosse noccobiji icatabojidsa tani. Ededepa cacahuade atti mittamana tahi. Pocca edede onidenidsa huahua nadsapa iaqquenabaqqui tahi.

<sup>4</sup> Nadsa pohuajine edede jahininedsa cacahuadepa tahide toja tahi. Ededepa pohuadeni cacahuade atti nahatoqquri nadsapa pohua natti jai toja tahi. <sup>5</sup> Naraha madija ohuaha nattipa jai tojera tahi. Atti jidsa tadsa, pohuadeni cacahuade attissa najaradsapa domo tocca tahi -nade Jeso.

<sup>6</sup> Jeso edede tahimari huati tajaripa pocca madija tahimari huati, pohua tahimari huati taraha nahidsa madija domo huajari mittamanaraha pohuadenidsa ssamo tajararo.

### *Jesopa edede cacahuade bicahi*

<sup>7</sup> Nadsapa Jeso madija mittamanahijine huati tapomade: —Pajissara tiadenidsa huati onana: Ohuapi edede tadsarihuajicca noccobiji ojani. Najaro noccobijidsapa edede jajahi tojedsima najari. <sup>8</sup> Ohua occajona-jeraccadsapi bobotidedenina jahijon-apojari. Naraha ededepa bobotidedenidsa huaribodeni sibaqquri najari —nade Jeso.

<sup>9</sup> —Ohuapi noccobiji ojani. Madija ohuadsa jajahidsima najaripa tossiejehe cajimanahitohui. Pohuadenipa pina occa ededessa quinajari. Dsomepa edede pohuadeni tadsaridsa jajahi tojedsimani nadsa cacahuadepa nahidsa ehечahuabaqqui najari. Ssajapa cacahuade ehечquenabaqqui najari, dsero bicani jipamanahijine. Ohuapi occa madija ohuacahuabaqquihissa tajari —nade Jeso.

<sup>10</sup> —Aja bobotidepa botihijine, toponi nanadsoqquehijine, toponi tonatabaccorahijinera ccajona tahi. Naraha ohuapi toponi tonassiajadera occajonajaro, madija bodidenidsa madie bicanicca cajimanahissa tahijine. <sup>11</sup> Ohuapi edede cacahuade bicahi. Edede cacahuade bicahipa pocca edededsa tossiejehe da ina tani. Pocca edede tocassiejerahijinepa pohuana pohua ccaccora tahi. <sup>12</sup> Naraha madija ohuahapa manaconitohuira edede ecahuabaqquidsа dsomaji ccajonahi qqui tadsapa edede inebobaqqui... joppa tahi caji tahi. Pohuapa edede jinede jarajari. Nadsapa edede inebobaqquidsapa dsomaji edededsa ssonaridsapa motapa tojaribaqqui tahi. <sup>13</sup> Aja edede cacahuade manaconitohuira tarabaidsa najaripa edededsa huati huana tajarajarijine inebobaqqui tahi —nade.

<sup>14-15</sup> —Naraha ohuapi edede cacahuade bicahi ojani. Nema onajaropi madija ohuadsa toquejenajaripa ohuacahuabaqquijari. Occa Abipa ohuadsa nocco jidsera tahi. Ohua naqui occa Abi Pohuadsa onocco jidsera tani. Najarossa najaro ohuapi occa edededsa onocco jidsera tajararo. Manaco occa edede ohuadsa noccodeni jidseraqquri najari. Nadsama ohuapi occa edede tocassiejerahijinepa ohuana ohua ohuaccoranjine. <sup>16</sup> Edede ohuahadeni naco huapi taha ocajini. Aja tadsaricca jarahi. Najarideni naco ohuaccani-baqquihijine. Pohuadenipa ohuattidsa iboraqquri nahi. Nadsapa cacahuade ojariadsana queriqquihijine. Nadsapa ojariqquimanahitohui —nade Jeso. (Pohua atti nama najaripa madija jodio quejena-jarajarideni naco pohuadsa toquejenahijine.)

### *Jeso pohua dsoqquehicca ima*

<sup>17</sup> —Ohua ohuaccoradsa odsoqqueraha occa camittehe ohuadsa tojapomanitohui. Najaro ima onananiijine ibora onadsapi occa Abipa ohuadsa huati huana tajari —nade.

<sup>18</sup> —Aji odsoqquejaro naqui madija ohuahajine jerani. Ohuana ohua ohuaccoradsa ohua inanadsoqque-mananitohui. Occa camittehe ohuaccoranjine opajirani. Occa camitteheda bacco onanipomanijine naqui opajirani. Ajijaro dossenijipi occa Abijine —nade Jeso.

### *Ima inapamamanajaro*

<sup>19</sup> Nadsapa jodideni najaro ima mittamanadsapa Jeso tahimarijine carobem-anajaride. <sup>20</sup> Nadsapa mota huapima imahaha canade: —¿Nejecotohui pocca ima imittanijine? Satanacca dodosse tocorime cajijari. Pohua bodi tossamojaria —quinade. <sup>21</sup> Naraha madija motapa: —Madija tocorime cajidsapa atti nama najarahi. ¿Tocorimepa madija nocco siri nocco ssire inana taco? —quinade.

### *Jodidenipa Jesodsa huattajoqquri najari*



<sup>22</sup> Dsadsajade bacco tadsapi Jesopa odsa panani Jerosaredsa madijari. Nahidsa madidsapa jodiodenicca Dada toqquima Diocca tocajanipomajarocca ejete bacco tade. <sup>23</sup> Nadsapa Jeso Diodsa dada toqquimacca boroni inidi tetepini cajini onini Portico de Saromodsas ccaridsajari. <sup>24</sup> Nahidsana jodiodenipa Jeso icahuahuajanimanadsa huati icanacquimanajaride: —¿Nejecoma nadsa ticca ima nahatoqquiri inanijine? Tiapi Cristo-Mesia tijadsapi iadsa tia tecomeranissa taji, inajaro –quinade.

<sup>25</sup> Naraha Jeso huati tade: —Nadsa huati huati ohonanaha. Naraha tiadenipi jehe tiquinejerani. Aji ohonahato najaropi occa Abicca deni tojehedsa ohonahato najaro. Aji occa nahatoniji qqui tiquinadsapi najarolinea aji occa ima nahatoqquiri tiquinajaropaji. <sup>26</sup> Naraha tiadenipi pajissa tiquinejerani. Occa edede tiquejena-jerajaro. <sup>27</sup> Occa ededepa ohuatti nahatoqquiri nahi. Manaco ohua naqui pohuadenidsa onocco jidsera tani. Pohuadenipa ohuadsa jahiridsajari. <sup>28</sup> Ohuapi pohuadenidsa camittehe jiquejeranicca da onaridsajaro. Pohuadenipa paja dsoqquemanari-jarahitohui. Pohuadenipa ohuacahuabaqquihissa tajari. Odsepeccapa idinibaqquimana-jarahitohui. <sup>29</sup> Aja ohuadsa toquejenajaridenipa occa Abina ohuadsa inanaridsajari. Occa Abina deni tojajari. Naraha huapima motadenipa ajamani toquejenahi. Abi pohua dsepedsa toquejenadsapa idinibaqquimana-jarahitohui. <sup>30</sup> Ohua occa Abi tedsejepi pina ojariassa inajaro –nade Jeso.

<sup>31</sup> Nadsapa jodiodeni siba nacca-cca quinapomade Jeso iquinaqqui-manahijine. <sup>32</sup> Naraha Jesopa pohuadenidsa huati tade: —Occa Abicca dacorehema madijadsa ima bicanira onanaridsajaro qqui tiquinajaroa. Naraha ¿nejecoma najaro occa nahatoniji acconi ohua tiquinaqquimananijine? –nade Jeso.

<sup>33</sup> Naraha jodiodeni huati toquinade: —Ticca nahatoniji bicani acconipi tiadsa edijerani. Naraha Diodsa tettiopi oppina tajarojinena “Tia iquinaqquina” inajaro. Tiapi madija tijaraha “Dio oiani” teteje nadsa –quinade jodiodeni.

<sup>34</sup> Naraha Jeso pohuadenidsa huati tapomade: —Maittaccadsama Diopa madija ima cacattemade toquejenajaridenidsa huati tajari. Pohua Atti pohuadenidsa: “Tiadenipi diodeni tiquejenajaro, ohonanade” nahi nade Dio Pohua Atti dsodo naniccadsa. <sup>35</sup> Aji Dio Atti dsodo naniccadsa nahatoqquiri inani. Najarodsas: “Maidsehe” inanijine oppina tani. Diopa pocca dosseniji cajimanajaridenidsa huati tajari. Pohuadenidsa: “Tiadenipi diodeni” nahi nade Dio. <sup>36</sup> Naraha Diopa ohua tocattejidsadsa ajijaro namidsa ohua dosse naronajari. “Ohuapi Dio Bedi oiani” onajaroraha ¿nejecotohui ohuadsa: “Tettiopi oppina tani Diodsa” tiquinajaro? <sup>37</sup> Occa nahatohue pina occa Abijinessa nejeradsapi ohuadsa pajissa tiquinejeraji. <sup>38</sup> Naraha occa nahatohue pina occa Abijinessa nadsapi najarodsana pajissa tiquinaji. Ohuattidsa pajissa tiquinejeraraha nidsa tibodideni huatonissa tadsapi occa ima ahuato tanitohui. Abipa ohuadsa, ohuapi Abidsa, iapi pina ojarijarissa inajaro –nade Jeso.

<sup>39</sup> Nadsapa Jeso dama quinapomahitohuiraha toqquenadsa dsori tajaride.

### *Jeso toccanijari hueni Jordaohuaji*

<sup>40</sup> Nadsapa Jeso hueni Jordaohuaji jippehuaji toccanipomajari. Nahidsa Huano madija topa topa ihidsanabaqquipo nahidsa ibojaride. <sup>41</sup> Nahidsa madidsapa madija huapi taha Jeso qquide jai tojajari. Nahidsana Huano Baotista tahimari bodideni huatomamanadsa imahaha canajaride: —Jehe, pajissa. Huanopa canahatori cana-jararaha pocca huatinajapi Jeso tahimari huati tapossa nadija –quinade.

<sup>42</sup> Nadsapa nahidsa Jeso pohuadsa madija huapi taha pajissa quinajaride.

<sup>1</sup> Odsa capamema najaro onini Betaniadsa madija coma taha madijari onipa Lasaro. Nanidsapi Maria poni onihi Marta tadsajani madimanajarode. <sup>2</sup> Najaro Maria Lasaro caripenepi majojodsa Jeso amori capamehe ssohoho icanaridsa poni tatini conanidsa amori sse sse ihippi najaro. <sup>3</sup> Nadsapa Lasaro coma tadsa caripenedeni Jesodsa ima dosse inajonamanajarode: —Pohuadsa teti huana tajaro coma tahi -quinade. <sup>4</sup> Najaro ima Jeso mittadsapa huati tajari: —Lasaro coma tajaripa paja dsogquerihijine jarahi. Najaropi Diocca deni tojehe ahuato tanijine, Dio Bedicca deni tojehe naqui ahuato tanijine -nade. <sup>5</sup> Jesopa Martadsa, Mariadsa, Lasarodsa huati huana tajari. <sup>6-7</sup> Naraha Jeso —Lasaro coma tahi -mittadsapa nahi pohua madihidsa najocajari. Huada pamehe tossoiqquimadsana Jeso pohua huatimadedeni iadsa huati tade: —Jina, Lasaro qquide jodiidenicca dsama Jodeahuaji jaijapomana -nade.

<sup>8</sup> Naraha pohuadsa huati inade: —Ia Maride, maittadsama onihima nadsa nahihuaicca jiodideni attidenipa: “Sibadsa tia iquinaquina” quinade. ¿Nanihuaji ticcanipomanijinequi? ¡Paji, tidsoqquerana! -nade. <sup>9</sup> Naraha Jeso attipa: —Nohuerani. Huada ojarie maji ssiejene 12 horas cajijaro. Maji ssiejene ssiaja tadsa iccaridsadsapi emori doi cana-jerani, dsama ssiaja tajarojine. <sup>10</sup> Naraha dsomepi dsidsi tani. Dsome iccaridsadsapi emori doi cana tani -nade.

<sup>11</sup> Nadsapa denima huati tapomade: —Itesse Lasaro huadaraha huahua onadsa nocco tojahitohui -nade. <sup>12</sup> Naraha Jesodsa huati inade: —Ia Maride, Lasaro huadadsapa nidsa tonomihitohui -nade. <sup>13</sup> Jesopa Lasaro huatiahicca imana huati taraha ssamoqquiri inadsapi: —Lasaropa huadajari -inajarode. <sup>14</sup> Imittanissa tejeradsapi Jeso iadsa huati nimanijaride: —Lasaropa huadahi onaraha huadajarahi, huatijari. <sup>15</sup> Naraha nanihuaji omadi-jeradsa huatiadsapa epeje, bica tani. Ohuatidsejaro. Nani tiadeni qqi tiquinadsa ohuadsa pajissa tiquinanjine. Jari, jidapanana nanihuaji jaijana -nade. <sup>16</sup> Naraha Tomas, pohua tessedeni pohuadsa: Baba quiquinanajaria iadsa huati tade: —Jina, ia naqui nani jaijana, pohuadsama ijica nana -nade.

### *Jesopa nahatonie jinede camittehe jinede najari*

<sup>17</sup> Nadsapi odsa onini Betaniadsa bacco inanipomade. Nanidsa bacco inanidsapi Jeso ima mittajaride: —Lasaro ppa idsamanahicca huadapi 4 nani -quinade. <sup>18</sup> Betaniapi odsa panani Jerosaredsa huajira tajaro, dsidsidsamassa babacco. <sup>19</sup> Nema najaro jiodidenipa Maria Martadenicca odsahuaji jajahi toja najari, huatinideni inassonabaqquimananjine. <sup>20</sup> Marta —Jeso ccajonahi -quinahi ima mittadsapi qqenadsa iaccanijine ccajonajaro. Naraha Mariapi nani odsa bodidsa ibojaro.

<sup>21</sup> Marta Jeso bacco inadsapa pohuadsa huati tade: —Ohua Maride, ajidsa timadid-sapi ohuemecote dsogque-jaranaja. <sup>22</sup> Naraha nema nehe Diodsa huati tinadsapi ticca huatinajassa inananitohui nahato onani -nade Marta Jesodsa. <sup>23</sup> Naraha Jeso attipa: —Timecote nahatonihitohui -nade. <sup>24</sup> Naraha Marta huati tade: —Jehe, nidsa dsama jicadsa jicapojarideni huapima assiredenima Dio inahatonibaqquihitohui. Nahidsa Lasaro naco nahatonihitohui. Najaro imapi nahato onaponi -nade Marta.

<sup>25</sup> Naraha manaco Jeso Martadsa huati tade: —Ohuapi nahatonie jinede ojani. Ohuapi camittehe jinede ojani. Ohuadsa jehe quinadsapa jicaraha ojine camitemanimana-pomahitohui -nade. <sup>26</sup> —Ohuadsa jehe quinajaridenipa paja jicarihi najarahitohui. Jicaraha nahatonimanadsapa madimana-dsanapohuitohui. ¿Najaro imadsa pajissa taqui? -nade Jeso Martadsa. <sup>27</sup> Nadsapi Jesodsa huati tade: —Jehe ohua Medsede, nahato onani tiadsa. Tiapi Cristo-Mesia, Dio Bedi tijani, aji namihuaji ticcajonanitohui quiquinanapode -nade Marta.

### *Lasaro pohua noccobirihuaji Jeso ojijari*

<sup>28</sup> Nadsapi Marta Mariatohui odsahuaji toqquedsimanidsapi ahuatoranidsa Mariadsa huati tajaro: —Ia Maride bacco najonahi titohui huahua napaja -nani nade. <sup>29</sup> Maria ima mittadsapi totehema, qquenadsa Jeso qquide ccajonajaro. <sup>30</sup> Jesopa ponidenicca odsahuaji bacco tajaracchahi. Nahi Marta poni bacco inahidsa madiccade. <sup>31</sup> Jodiiodeni Maria poni huatini inassonamananijine ponicca odsadsa queriqquimanajaridenipa toccani qqui toquinadsapa nattini jahijonajaride, —Lasaro cahuahihuaji ojide toccajaro nitide -quinadsa. <sup>32</sup> Naraha Maria Jeso huahihuaji bacco nadsapi poni pitonidsa huitta nadsa pohuadsa huati tade: —Ia Medsede, ajidsa timadidsapi nassa ohuemecote dsoqque-jaranaja -nade.

<sup>33</sup> Nadsapa Jeso Maria oji oji nani qqui, jodiiodeni ponidsa jahijonajarideni oji quinahi qqui tadsapa bodi qquedsajaride. <sup>34</sup> Nadsapa Jeso pohuadenidsa huati tade: —¿Nejecohuaji tequibedsamanatta? -nade. Nadsapa: —Jina, qqui tajo -quinade. <sup>35</sup> Nadsapa Jeso ojide. <sup>36</sup> Nadsapa jodiiodeni: —A, pajissa Lasarodsa huati huana tajariraha -quinade. <sup>37</sup> Naraha jodiiodeni motapa imahaha canade: —Jesojinepa nocco jijirade nocco ssire nimanide. Jeso ajadsa madidsapa nassa Lasaro dsoqque-jaranaja -quinade.

### *Lasaro nahatonijari*

<sup>38</sup> Naraha Jeso bodi qquedsapomadsapa Lasaro noccobirihuaji toqquessijari. Pohua noccobiripi ssono bacconidsa tohuajarode. Noccobiridsapi siba huacossajaro. <sup>39</sup> Naraha Jeso: —Siba cco tijidsamanaji, tohuabanijine -nade. Naraha aja dsoqquejaricca asi Marta attinipi: —A, ia Medsede, pohua dsoqquehicca huada 4 najaro. Bettene jirahi -nade. <sup>40</sup> Naraha Jeso attipa: —Tiadsa huati huati onapode. ¿Timitta-jerajarottarane? Pajissa tadsapi Diocca deni tojehe qqui tinanitohui, ohonanade -nade Jeso.

<sup>41</sup> Nadsapi siba cco ijidsamanade. Nadsapa Jeso memehuaji tocattamacossa nadsa huati tade: —Abi, ohuatti timittadsapi epejeni bica tani, onajaro. <sup>42</sup> Huajijiradsa ohuatti titimitta nani nahato onaraha ajadsa madija madimanajarideni ohuadsa: “Pajissa Diocca dosse naronaniji” quinahijine tiadsa nema onajaro -nade. <sup>43</sup> Nadsapa Diodsa huati taha jicadsapa jadsirema huahua nade: —¡Lasaro tiqquenaji! -nade. <sup>44</sup> Nanaja Lasaro huatiaraha Jesojine camitemanidsa qquenade. Assire eterodsa jore tamarohua nama naha qquenade. Pano naco eterodsa teppe nade. Nadsapa Jeso: —¡Dicca tiquinajo, toccanijine! -nadsa nama inanamanade.

### *Jeso todsepe tojahijine ima najoramanajari*

#### *Mateo 26.1-5; Maraco 14.1-2; Roca 22.1-2*

<sup>45</sup> Nadsapa jodiiodeni Mariadsa queriqquimanajari motapa Jesojine Lasaro camitemanihi qqui toquinadsa Jesodsa pajissa quinade. <sup>46</sup> Naraha motadeni Jesodsa jiperaqquri najaridenina marinaja pariseodsa jehe quinajaridenihuaji jai tojajari. Jesojine Lasaro camitemanihicca ima pohuadenidsa huati toquinajari. <sup>47</sup> Nanaja pariseodeni, dada toqquimade taminedenipa najaro ima mittamanadsapa poccadeni ima cacattemadedeni deni toquejenajaridenidsa huahua quinajari, pohuadenidsa queriqquimanahijine. Queriqquimanadsapa pohuadenidsa huati toquinajari: —¿Iapi nejecoma inapadseje? Jeso canahatoriri canahi. Pocca deni tojehe ahuato tani -quinahi nade. <sup>48</sup> —Naraha Jeso nama dsanapohuijine inebodsapa huapima pohuadsa pajissa dsanapomanahitohui. Nema nadsapi icca dada toqquimahuajipi romanodeni botta icanamananitohui. Icca dsamacca icca cacahuehe inajicamananitohui -quinahi nade.

<sup>49</sup> Naraha ima cacattemadedeni ojaría onipa Caipa, najarina najari huajanodsa dada toqquimadedenicca tamine deni tojajari madijari. Pohuapa huapimadsa huati tajari: —¡Tiadenipi ssamoqquri tiquinani! <sup>50</sup> Tibodidenidsa ajijaro ima ahuato

tejerani: Madija ojaría huapima manaconedeni dsoqquehina bica tahi, ia icca dsamacca huapima naco inajicamana-jeranijine –nahi nade Caipa.

<sup>51</sup> Naraha najaro imapi Caipa pohua mottacca jerani. Puhuapa dada toqquimad-edenicca tamine deni tojajarijine Dio Corime pohuadsa huati tajari. Caipa pohua attidsapi Jeso tahimari iadsa ahuato tajaro. Najaroa aji Jesopa pocca madija jodiideni huapima tocassiejerahijinepa dsoqquehitohui. <sup>52</sup> Naraha Jesopa jodiideni pohuadeni motta manaconedeni tojahijine jarahi. Huapima Diocca madija madiridsamanajari-deni manaconedeni naco tojahijine. Nadsapi Diocca ejedeni madiridsamanajarideni ijariqquinissa taniijine.

<sup>53</sup> Nadsapi najaro huadadsa, aja Caipa atti: —Jehe dsoqquehi bica tahi –nadsa ima cacattemededeni huapima Jeso dsoqquehijinecca ima idimamanapodsapa ima najoranijine imahaha imahaha cadsanapojari.

<sup>54</sup> Jeso ima nema nani mittadsapa jodiideni madimanahihuaji ahuatonidsa ccarid-sade jipera tajari. Nadsapa Jodeahuaji nebo, odsa onini Efrainhuaji madihijine toccajaride. Efrainpi dsama huamoni ssono caji, siba caji tani huajira tanidsa anijarode. Nanidsana ia pohua huatimadedeni Jeso tedseje imadijarode. <sup>55</sup> Nanidsa imadidsana jodiidenicca ejete imenibote onini Pascoa tohuajirajarode. (Pascoa ettidsapi: Dio tossoiqquimajari, inajaro.) Nahi Jerosaredsa madija dsama onihicca, dsama onihicca jahijonana canajari. Diodsa da quinahijine queriqquini-pomajari, ejete Pascoatohui najoramanapohuijine. <sup>56</sup> Madija —Jeso qqui inana –quinadsapa Jesotohui qqui naridsamanajari. Diodsa dada toqquimadsa naco pohuadenira huati tocanirere canajari: —¿Ejetedsa Jesopa ccajona-jarapadsaja? –quinahi nade.

<sup>57</sup> Naraha pariseodenipa dada toqquimade taminedeni tedseje attideni najoramanapoja najari: —Jeso qqui tiquinadsapa iadsa huati tiquinana, nahi dama inahijine –quinajari nade.

## 12

### *Jeso amori majojodsa Maria sso icanarijaro*

#### *Mateo 26.6-13; Maraco 14.3-9*

<sup>1</sup> Jodiidenicca ejete onini Pascoa tohuajirajonadsa huada 6 nehe dsori taccadsapi Jeso inadsa odsa capamema najaro onini Betaniadsa bacco inanipomade. Nahidsapa Lasaro madijari. Puhuapa dsoqqueraha Jeso pohua inahatonijaride. <sup>2</sup> Nahi Betaniadsana Jeso jipahijine najoramanajari. Lasaro caripene Martapi dsamatapa qqquerode tojajaro. Lasaropa huahuanarihuaji jassi tarijaridenidsama Jeso tedseje jipamanajaride. <sup>3</sup> Naraha Lasaro caripene onihi Mariapi majojajo majoni bica tajarodsa Jeso amori ssohoho icanarijaro. Najaro majojajo oninipi nardo. Najaro majojopi passodsa quejemerani, huatini ccara tani. Nadsapi poni tatini conanidsa amori sse ippijaride. Odsa bodidsa majojajo majoni tocca nade.

<sup>4</sup> Naraha Jeso huatimade ojaría Joda Iscariote Jeso ccaccorade tojahijine pohua attia: <sup>5</sup> —¿Nejecotohui najaro majojopi manaconitohuira da icana-jerajaro? Najaro majojajo manaconidsa da icanadsapi dsiniro ccarara 300 denario iadsa da inadsa madija cappiramanajaridenidsa da iqquimanitohuiraha –nade Joda.

<sup>6</sup> Joda atti nama nadsapa pina cappiramanajaridenidsa huati huana tajarissa naraha pohuapa dsinirotohuira bodi huatojari. Puhuana botijide rajari. Puhuadeni huapimacca dsiniro pahuana ecahuaraha motapi pohuadsa ihinana najaro. <sup>7</sup> Naraha Jeso attipa: —Epejina, poni sso icanarijaro bica tani. Najaropi pina odsoqquedsa ohua nema inanamanadsa ohua ppa idsamananijinessa najaro najorapojaro –nade. (Jodiidenipa poccadeni madija dsoqquedsapa nama quiquinanajari.) <sup>8</sup> Nadsapa Jeso denima huati tajari: —Madija cappiramanajaridenina tinoridenidsa madimana-dsanapohuitohui. Naraha ohuapi tiadenidsa omadidsanapo-jeranitohui –nade Jeso.

—*Lasaro naco dsoqquena –quinajari*

<sup>9</sup> Jeso Betaniadsa bacco nanipomahi jodiodeni mittamanadsapa mota huapi taha Jeso qquide jahijonajari nade. Jeso qquidea ojari-jarahi. Lasaro qquide naco jahijonajari. Lasaropa Jeso pohua inahatonija najari. <sup>10-11</sup> Lasarocca imajine jodiodeni motapa Jesodsana pajissa quinajari nade. Nama quinadsapa Diodsa dada toqquimahuajicca taminecca imadsa apaja quinajari. Nadsapa dada toqquimade taminedeni attipa: —Lasaro naco dsoqquena –quinahi nade.

*Jeso Jerosaredsa bacco todsimadsapa huapima pohuadsa huatidsemanajari*  
*Mateo 21.1-11; Maraco 11.1-11; Roca 19.28-40*

<sup>12</sup> Nadsapi ejete onini Pascoatohui madija dsama onihicca naco Jerosarehuaji jahijonana canajari. Huada ssiajapa ima mittamanajari: —Jeso aja Jerosaredsa bacco nabote nahi –quinadsa huatidsemanajari. <sup>13</sup> Nadsapa poccadeni huatidsehe bica tanijine birijari eppe ti quinadsa —Jeso bacco ijidsana –quinadsa jahijonajari. Madija motapa birijari eppedsa jahui bina inajonamanajaro, —Jahui bica tanijine –quinadsa. Madija motapa birijari eppe dsojojo dsojojo canajonadsa huahua najonamanajari: —¡Diopa deni tojahi, deni tojahi! ¡Ia Medsede onima ccajonajaridsa biquehera tojana, tojana! –najonamanajari. —¡Pohuapa ia Isaraeri potemahideni icca tamine! ¡Pohuadsa biquehera tojana, tojana! –najonamanajaride.

<sup>14</sup> Jesopa jahuidsa bojo namidsadsa qqui tadsapa najaridsa tohuittari-dsanapojaride. Najaropi pina Dio Atti cacomerabote Sacaria dsodo inapojarossa najarode:

<sup>15</sup> —Odsa panani Siohuaji timadimanajaropi ticappinamana tejeraji. Ajana ticcadeni taminepa bojo namidsadsa napidsatidsa bacco najonahitohui –napojaro Dio Atti dsodo nanidsa.

<sup>16</sup> Najaro imapi Dio Atti dsodo napojarodsa ahuato taporaha tahide ia pohua huatimadepi ibodidsa ima ahuato tejeraccade. Dsotodena Jeso porimacossanidsa dsoqquedsa nahatonihicca nattina Dio Atti dsodo napojarocca ima ibodidsa ahuatoma-jarode. Nadsana ettipi: —Jehe, nema najaropi Jeso pohuadsana tojani qqui inapode –inajarode.

<sup>17</sup> Madijapa Lasaro ppa todsaraha Jeso huahua nadsa nahatonijari qqui toquina-jaridenipa pohua tahimari huati nimanimana-pomajaride. <sup>18</sup> Nadsapa madija huapimapa: —Jeso jahuidsa bacco ijidsana –quinadsa Jesotohui jahijonajari. Pohuadenipa —Jeso canahatori canahi –quinahi ima mittamanapoja najari. <sup>19</sup> Naraha jodiodeni mota marinaja pariseodsa jehe quinajaridenipa pohuadeni ehuerahi imahaha canajari nade: —Ajina, iapi ijoneridsani taji. Pohuaha deni tojahi. Madija huapima pohuadsa toquejenahi –quinahi nade.

*Dsama Cresiahuajicca madijapa: —Jeso qqui inana –quinajari*

<sup>20</sup> Dsama Cresiaccia madija sibera taha naco Jerosaredsa bacco najonamanade. Najarideni naco Pascoacca ejetedsa Diodsa huatidsemanahijine jahijonajaride. <sup>21</sup> Jeso huatimade Feripe bacco quinadsapa pohuadsa huati toquinajari. Feripepa dsama arobeni Carireacca madija. Odsa Besaidadsa madijari. Nadsapa pohuadsa huati toquinajari: —Jeso qqui inana –quinahi nade. <sup>22</sup> Nadsapa Feripe pohua tesse Adiritohui toccajari, Cresiadenicca ima huati tahijine. Nadsapa Jeso madihihuaji ima huatide tohuedajari.

<sup>23</sup> Nadsapa Jeso pohuadenidsa huati tajari: —Aji ohuapi Madija Bedi ojajaroa occa deni tojehe ahuato tanijinepi tohuajirani –nade. <sup>24</sup> —Jehe, pajissara tiadenidsa huati onajaro: Aroso jidsadsa trigo nocco namidsa dappo tiquinadsapa imepa bote tahi. Nocco namidsa tojadsa moro tahijine accora tadsapa pohua ime boteraha bodicca moro tajarina nocco tohuapi tahi. Naraha nocco pohua ime



acco tadsapa bodicca moronine-jarajari -nade. <sup>25</sup> —Madija naco pocca madie ajijaro namiccadsa huati huanera tadsa ohuadsa eccoradsapi Diohuaji camittehe jiquejeranicca cajidsanapohuitohui. Naraha madija pocca madiedsa huati huana tadsa ohuadsa acco tadsapa camittehe jiquejeranicca caji-jarahitohui. <sup>26</sup> Madija occa dossenijidsa iboraqquiri nadsapa ohua nebomana-jarahijine. Ohuadsa jahiridsa-dsanapohuijine. Ohua omadinidsana pohuadeni naco madimanahijine. Madija occa dossenijidsa iboraqquiri najaridenipa Abi Dio Pahuana pohuadenidsa: “Bicaqquiri tiquinani” nahitohui -nade Jeso.

*Jesopa: —Odsoqquedsana ima bicani tojaridsanitohui -najari*

<sup>27</sup> Amadsati Jesodsa ocasserehe ssonaridsa pohua attipa: —¡Jaho, ojabojeriri canani! ¿Nejecoma onanijine? “Abi, ajijaro ima bacco tabote nani ohua tinassiajaji” ¿onanijinequi? Naraha ohuapi ajijaro imatohui occajonajarode. <sup>28</sup> ¡Abi, ticca deni tojehera ahuato tana! -nade. Naneje memehuaji atti mittaronade: —Ohuapi occa deni tojehe ahuato onanapode. Jidapana naqui occa deni tojehe ahuato onanapomanijine -nade atti memehuaji. <sup>29</sup> Nadsapa nahidsa madija domo huajari huapima mohuini mittamanadsapa: —Ttottorode -quinaraha motapa: —Dio Atti ccaccaronade pohuadsa huati huati tajari -quinade.

<sup>30</sup> Naraha Jesopa: —Najaro mohuini ohua omittanijine jerani. Tiadeni timitamananijine mohuini mittaronajaro. <sup>31</sup> Ajijaro dsamacca ima tabaccora tadsapi Dio idsahua-baqquihitohui. Najidsohue naqui najorahitohui. Ajijaro dsamacca tabaccorehe dodossed Satanapa huahuattajo tojahitohui. <sup>32</sup> Naraha nidsa madijajine que onadsana madija huapimapa ohuadsana toquejenahitohui -nade Jeso. <sup>33</sup> Najaro ima Jeso huati tadsana ahuatomajarode, pohua ahua porimacossanidsa dsoqquehicca ima.

<sup>34</sup> Naraha madija ohuaha attidenia: —Icca Dio Attidsa hua inadsapi “Mesiapa madi-dsanapohuitohui” nanipi imittade. Naraha tiapi: “Madija Bedi acca icanamacossa-manadsapa que tahitohui” teteje naha. Nadsapa ¿nejecoma najarina Madija Bedi? -quinade.

<sup>35-36</sup> Naraha Jeso attia: —Ohuapi ssiajani oiani. Ossiejene tiadenidsa ahuato taccani. Naraha tiadenidsa badsira tehe omadiccani. Tiadenidsa omadiccadsama ohuadsa jehe tiquinaji, ohuadsa tiquejenanijine. Najaro imapi ssiaja taccadsama jai tijaridsaji. Nani dsidsinijine tijabojomana nejeranijine. Aja madija dsidsinidsa ccaridsadsapa pohua jahine ssamo tahi -nade.

Najaro ima Jeso huati huati taha jicadsapa pajamarahihuaji toccajari, madija pohua qqui toquina-jarahijine.

*Jodiodeni motapa Jesodsa pajissa quina-jarajari*

<sup>37</sup> Jodiodenipa pohuadeni noccodsa Jeso canahato-huajapohui canaridsahi qqui toquinaraha pohuadsa pajissa quina-jarade. <sup>38</sup> Nama quinajaripa pina Dio Atti cacomerabote Isahia dsodo inapojarossa inanamanajaro. Isahia attipa: —A, ia Medsede, icca imadsa pajissa naja cama-jarahi. ¿Nejecojaridenidsana Diocca dacorehe ahuato tapadseje? -napohui nade.

<sup>39</sup> Jehe, jodiodenipa Jeso canahato-huajapohui canahi qqui toquinaraha pajissa quinahijine bodideni ssamoqquiri nade. Isahiapa poccadeni ima onihi naqui dsodo inapojaro:

<sup>40</sup> —Diopa noccodeni ecossabaqquijari, qqui toquina-jarahijine.

Diopa bodideni inassamobaqquijari, tohuattamana-jarahijine.

Dio Attipa: “Bodideni cacajiqquimeradsapa onabicabaqquihitohuiraha bodideni cacajiqquimera-manaha najarahi”

-napohui nade Isahia dsodo inapojaro.

<sup>41</sup> Isahiapa Jesocca deni tojehe qqui tapodsapa tahimari dsodo inapojaropaji.

<sup>42</sup> Naraha jodiodenicca taminedeni motapa Jesodsa pajissa quinaraha marinaja pariseodsa jehe quinajarideni noppine pohuadeni cacomamanajari, —Icca Dio Atti mamarihuaji ia tohuattajobaqqui-manarana –quinadsa. <sup>43</sup> Pohuadeni bodipa: —Madija iadsa huatidsemanana –quinajari. Dio pohuadenidsa huatidsehijine tohuini quina-jarajari.

*Jeso attidsa iboqquri najaridenipa najidsohuedsa toquejenahitohui*

<sup>44</sup> Nadsapa Jeso jadsirema huati huati tade: —Ohuadsa pajissa najaripa ohuadsaha pajissa nahi ojari-jarahi. Occa Abi ohua dosse naronajaridsa naco pajissa najari. <sup>45</sup> Madija ohua qqui tajaripa ohua Dosse naronade naco qqui tahi. <sup>46</sup> Ohuapi ssiajani jinede ojani aji namihuaji occaronajaro, ohuadsa pajissa quinajaridenipa dsidsinidsa madimana-jarahijine. <sup>47</sup> Naraha madija ohuatti mittamanaraha pina ohuatti mittamanerahi najarideni naco odsahuabaqqui-jarahi. Ohuapi madija dsahuade occarona-jerade. Madija tocassiejerahijinera occaronajarode. <sup>48</sup> Madijapa ohuadsa huattajoqquri najari. Ohuatti mittamanaraha iboqquri nadsapa dsama jicadsa Abi Dio imasiri manaconi huatide tojadsapa pohuadenidsa ajama nahitohui: “Tiadenipi occa ejedeni atti mittade jiperaqquri tiquinadsapi najidsohue jiquejeraniccadsa tiquejenanitohui” nahitohui. <sup>49</sup> Naraha ohuapi ohua mottacca ima huati huati ohona nejerani. Abi ohua Cadossedena: “Ajima najaro ima mari ticanabaqquina” nadsa huati huati onajaropaji. <sup>50</sup> Naraha ohuapi nahato oneje najaro. Abi pocca dossenijipi camittehe jiquejeranicca. Aji huati huati onajaropi Abi ohua cadossejaricca –nade Jeso.

## 13

*Jeso pohua huatimade amorideni ssahua inabaqqujari*

<sup>1</sup> Pascoacca jipaqquie tojanijine huada ojarie dsori taccaraha Jesopa pohua tedsejemacca ima nahato tapojari: ajijaro namidsa madide nebohujinecca huada bacco tabote nani. Ajijaro nami inebodsa Imehihuaji tojanipomahijine. Jesopa pocca madija ajijaro namidsa madimanajaridenidsa huati huana taha nama najonajaria pohua dsoqquehi bacco tajaripajade.

<sup>2</sup> Dsome ijipanijine inajoraraha tahide imasiri mamaride Satanajine Simon Iscariote bedi Joda bodi najorajari, Jeso todsepe inahahijine. <sup>3</sup> Jesopa Dio Pohuahuaaji ccaronahicca nahato, Diohuaji toccamacossani-hijinecca nahato, Pohua Imehicca deni tojehe cajihi naco nahato tajari. <sup>4</sup> Najaro pocca deni tojehecca ima iattanijine ia mari tocanabaqqujaride. Jipade iquejenanaja Jeso totehemadsapa pocca etero huapiccapi ssiti inadsa tohuamori ssesera pohua dorodsa ssoque inade. <sup>5</sup> Nadsapa tasao imehidsa passo sso idsadsa pohua huatimadedeni ia emori ssahua tabaqqujaride. Nadsapa pohua dorocca etero ssoque nacossajarodsa emori sse tabaqqujaride.

<sup>6</sup> Naraha Ssino-Pedro amori ssahua inahijineraha: —Ohua Medsede ¿ohuamori ssahua tanijinequi? –nade. <sup>7</sup> Naraha Jeso attia: —Aji jidapana temorideni ssahua onaridsajarocca imapi ssamo tinaraha nidsa dsotodena timittanitohui –nade. <sup>8</sup> Naraha Pedro attipa: —¡Ohuapi poni! Ohuamori ssahua taji onejerani –nade. Naraha Jeso attipa: —Temori ssahua onejeradsapi occa tija-geranitohui –nade. <sup>9</sup> Naraha Ssino-Pedropa: —¡Ohua Medsede ohuamoria ojari-gerana, odsepe ssahua, otati ssahua taji! –nade. <sup>10</sup> Naraha Jesopa pohuadsa huati tade: —Japi idsatipi huire inajaro, ia ssahua imanipoma-gerani. Naraha emorina ssahua ssahua ihmiani nanijine –nade. —Tiadenipi tibodideni huireqquri naraha huapima gerani –nade Jeso. <sup>11</sup> Jesopa pohua ccaccorade nahato tapoja najari. Najaria aja: —Huapima huireqquri tiquinejerani –najaripajade.

<sup>12</sup> Emori ssahua tabaqquia jicadsapa pocca etero huedsapomadsa huahuanaridsa tohuittarinide. Nadsapa iadsa huati tade: —¿Aji temorideni ssahua onaridsajarocca imapi nahatoqqui tiquinaqui? <sup>13</sup> Tiadenipi ohuadsa huahua titiquina nanipi: “Ia Maride, ia Medsede” titiquina najaropi pajissa. <sup>14</sup> Nema onajaroa ohuapi tiadeni Medsede, tiadeni Maride ojaraha pina ticcadeni medsessa onadsa temorideni ssahua onaridsajaro. Najaropi tiadeni naqui temorideni ahuaji ssahua ahuaji ssahua tataridsamana nana. <sup>15</sup> Ajijaro marinajapi tiadeni mari ocanabaqquijaro. Pina aji ojinessa tinanamananijine, onajaro. <sup>16</sup> Jehe, pajissara tiadenidsa huati onajaro: Madija pocca medsedenipa pohuadeni medsededsa deni toquejena-jarajari. Pohuadenipa ajamani toquejenajari. Madija pocca dodosse tabaqqui naco pohuadeni dossededsa deni toquejena-jarajari. Pohuadenipa ajamani toquejenajari. <sup>17</sup> Nadsapi ajijaro ima timittamananissa tadsa nema tinanamanadsapi tetidsemananitohui, onajaro.

<sup>18</sup> —Ajijaro imapi tiadeni huapimadsa huati onejerani. Ohuapi nahato onani. Aja ocattejidsa-baqquijaripa occa toquejenahitohui. Naraha pina Dio Atti dsodo napojarossa nehe tojanitohui: “Ohuadsama jipa jipa najarina ohuadsa ima inanani-tohui” napojaro Dio Atti dsodo nanipi. <sup>19</sup> Najaro ima ohuadsa toja-jeraccadsama tiadenidsa huati onapojaro. Nidsa najaro ima tojani qqui tiquinadsapi ohuadsa pajissa tiquinanitohui. Ohuapi ohua –nade Jeso. (Pohua atti nama nadsapa: Ohuapi Dio, najari.) <sup>20</sup> —Pajissara tiadenidsa huati onajaro: Madija occa dossenijidsa jahiridsajaridenidsa: “Jai tijedsimaji” quinadsapa pina ohuadsa: “Tiqquedsimaji” quinajarissa najari. Madija ohuadsa jehe quinadsapa ohua cadossejaridsa naco jehe quinajari –nade Jeso.

*Jesopa pohua Joda eccorahijinecca ima ahuato inanapojaro*

*Mateo 26.21-25; Maraco 14.18-21; Roca 22.21-23*

<sup>21</sup> Jeso ima huati taha jicadsapa bodi qquedsajari. Ima ahuato inananiijine huati tajari: —Pajissara tiadenidsa huati onana: Aji tiadeni ojariapa ohua ccacorahitohui –nade.

<sup>22</sup> Nadsapi pohua huatimadedeni iara qqui icanirere canade. —¿Nejecojaridsa Jeso atti nama najari? –nade. <sup>23</sup> Nadsapa pohua huatimade ojaraha Jeso pohuadsa huati huana tajaria pohua inoridsa jipajaride. <sup>24</sup> Nadsapa Ssino-Pedro aja Jeso inoridsa huittarijaridsa pohua dsepedsa: —¿Nejecojaridsa atti nama najari? huati ticanajo –nade. <sup>25</sup> Nadsapa aja Jeso inoridsa huittarijaripa Jesodsa huajira tadsa pohuadsa huati tade: —¿Nejecojari? –nade Jesodsa. <sup>26</sup> Naraha Jesoa: —Aja pan arobe bani ppejenedsa ohuedsippa pohuadsa da onana. “Najaripajaha” tiquinanijine –nade. Nadsapa pan arobe edsippa, Simon Iscariote bedi Jodadsa da inade. <sup>27</sup> Nadsapa Joda pan arobe idija, pohua bodidsa Satana jaro nade. Nadsapa Jeso Jodadsa huati tade: —Aji “ima onanana” tajaropi amadsati tinanaji –nade.

<sup>28</sup> Naraha huapima jipade jassi inarijaropi aja Jeso Jodadsa huati tajari imittaraha ibodi ssamoqqui inade. —¿Nejecotohui nama najari Jesopa? –nade. <sup>29</sup> Jodapa icca dsiniro cacahuadeja najari. Naraha itesse mota attidenipa: —Jehe, ejetejinecca mittade Jeso dosse inajari itide. Cappiramanajaridenidsa da tanijine toccajari itide –quinade.

<sup>30</sup> Nadsapa Joda pan jipaha jicadsapa dsomeraha toccade.

*Jesocca dosseniji dsati*

<sup>31</sup> Joda toccahi nattipa Jeso huati tade: —Ohuapi Madija Bedi ojajaroa jidapanana occa deni tojehe qqui tiquinanitohui. Diocca deni tojehe naqui ohuadsana ahuato tanitohui. <sup>32</sup> Diocca deni tojehe ohuadsa ahuato tadsapi manaco Dio occa deni tojehe ahuato inanani-tohui. Najaropi bacco tabote nani. <sup>33</sup> Occa ejedenideni, jidapapi

tiadenidsa omadinijine huada huapi tejerani. Ohua nohue ojiradsapi tiadenipi otohui qqui taridsamananitohui. Najaropi maitta tahide jodiodenicca taminedenidsa huati onajarossa najaro tiadenidsa huati onajaro. Ohua occanihuajipi jai tijanijine ssamoqquiri tiquinani. <sup>34</sup> Nadsama ajjaropi occa dosseniji dsati: Tiadenipi tetideni cahanerara canana. Pina aji ohua tiadenidsa ohuati huana tajarossa najaro tiadeni naqui ohuadsa pajissa quinajaridenidsa tetideni huanacquiri nana, onajaro. <sup>35</sup> Pajissa tetideni cahanerara canadsapi ticcadeni ima aji occa madija tiquejenani madija huapimadsa ahuato tanijine –nade Jeso.

*Pedro pohua namaidshicca ima Jeso ahuato inanapojaro*  
*Mateo 26.3-35; Maraco 14.27-31; Roca 22.31-38*

<sup>36</sup> Naraha Ssino-Pedropa Jesodsa huati tade: —Ia Medsede ¿nejecohuaji ticcanijine? —nade. Naraha Jeso Pedrodsa huati tade: —Aji ohua occanihuajipi jidapapi ohuadsa tiqqejeranitohui. Naraha dsotodena omadinihuaji ticcanitohui –nade. <sup>37</sup> Naraha Pedropa Jesodsa huati tapomade: —Ia Medsede ¿nejecotohui jidapapi tiadsa oqqejeranijine? Naraha tissiajanijinepi ohuana onajorani, ohua ohuaccoranijine –nade. <sup>38</sup> Naraha Jeso Pedrodsa huati tade: —¿Pajissa ossiajanijine tia teccorapadseje? Naraha ohuapi pajissara tiadsa huati onajaro: Nidsa dsotodepi tacara huahua najaraccadsa tia tinamaidsanitohui. Ohuadsa: “Onocco jidsa tani” tanitohui, “onocco jidsa tani” tapomanitohui, “onocco jidsa tani” tapomanitohui –nade Jeso Pedrodsa.

## 14

*Jesopa: —Jahui ojani. Ojinena Abidsa bacco bacco toquinahijine –najari*

<sup>1</sup> Nahi dsotodepa Jeso iadsa denima huati huati tade: —Tibodidenidsa ticappinama tejeraji. Diodsara pajissa tiquinanissa taji. Ohuadsa naqui pajissa tiquinanissa taji. <sup>2</sup> Occa Abicca odsahuaji timadimananijinepi mamadi caji tani. Timadimananijine mamadi nohueradsapi nassa tiadenidsa huati onaponeje onade. Nadsama ohuapi ticcadeni mamadi onanajoranijine Abihuaji occaninitohui. <sup>3</sup> Abihuaji occanidsa ticcadeni mamadi onanajoradsapi titohuideni occaronapomanitohui. Nadsapi ohua ohomadi nanidsa tiadeni naqui timadimananijine tiadeni ohuaccani-baqqunitohui. <sup>4</sup> Tiadenipi aji occanihuaji ojahine nahatoqquiri tiquinani –nade Jeso.

<sup>5</sup> Naraha Tomas attia: —Ia Maride ¿nejecohuaji ticcanijine? Najaro imapi ssamoqquiri inani. ¿Nejecoma nadsa najaro tijahine nahatoqquiri inanijine? —nade. <sup>6</sup> Naraha Jeso huati tade: —Ohuapi jahui ojani. Ojinena madija Abidsa bacco toquinahijine. Ohuapi pajissehe jinede ojani. Ohuapi camittehe jinede ojani. Nassa ohua nohue ojiradsapi madijapa Abidsa bacco toquina-jaranaja. <sup>7</sup> Ohuadsa tinoccodeni tojidseradsapi occa Abidsa naqui tinoccodeni tojidseranitohui. Aji jidapana ohua qqui tiquinajaropi Abidsa tinoccodeni tojidserajonajaro –nade.

<sup>8</sup> Naraha Feripe attipa: —Ia Maride, jari, icca Abi ia qqui tinanabaqquiji. Najari qqui inadsapi epejena, denima inejerani –nade. <sup>9</sup> Naraha Jeso Feripedsa huati tade: —Feripeco, ohua tiadenidsa maitta omadijonerade naraha ¿ohuadsa tinocco tojidsera-jeraccaqui? Aja madija ohuadsa nocco tojidserajaripa occa Abidsa naco nocco tojidserajari, onajaropajia. Naraha ¿nejecotohuira ohuadsa: “Icca Abi ia qqui tinanabaqquiji” tajaro? <sup>10</sup> Ohuapi Abidsa, Abipa ohuadsa, inajaropi Abi Dio Pohua ojarihi. ¿Naraha najarodsapi pajissa tejeraqui? Aji ohuatti huati huati ohonanajaropi ojine jerani. Occa Abina ohuadsa madijari. Pohuana ohua totocanahato najari. <sup>11</sup> Nadsama ohuattipi: “Ohuapi Abidsa, Abipa ohuadsa” onajarodsapa pajissa tiquinaji. Naraha najarodsapa pajissa tiquinanijine ssamo tadsapi aji occa nahatohue qqui tajonamanapojarodsapa: “Pajissa Jesopa Dio Bedia” tiquinaji –nade Jeso.

*—Nohue ojiradsa naqui tiadenidsa ima bicani da da onanitohui –najari Jeso*

<sup>12</sup> —Ohuapi pajissara tiadenidsa huati onana: Ohuadsa: “Pajissa ia tonas-sajabaqquihijine” tiquinadsapi pina aji ojinessa tinanamananitohui. Occa Abi madihihuaji occanini onattipi pina ojinessa tinanamanaraha denima bica tanicca tinanamananitohui. <sup>13</sup> Diodsa huati tiquinadsa ohua onima huati huati titiquina nadsapi da da onanitohui. Nani Abi Diocca deni tojehe tiadenidsa ahuato onananijine.

<sup>14</sup> Jehe, ohuadsa huati huati tiquinadsapi ticcadeni huatinajassa onananitohui –nade.

<sup>15</sup> —Jehe, ohuadsa tetideni huanacquiri nadsapi occa dossenijissa tinanamanana.

<sup>16</sup> Nadsama ohuapi Abidsa huati onanitohui. Nahi tiadeni Acco Camade ohuaha dosse inaronahijine. Najaripa Pohua Corime Pajissehe Maride tiadenidsa madihipaja nahijine. <sup>17</sup> Diodsa jehe quina-jarajari ajijaro dsamacca tohuini quinajaridenidsapa Pohua Corime Pajissehe Maride pohuadenidsa toja-jarahitohui. Pohuadenipa Dio Corime qqui toquina-jarahi. Pohuadsa ssamoqquri nahi. Naraha tiadenidsapa jidsera tahi. Najaripa tiadenidsa madihi. Tiadenidsa madi-dsanapohuitohui.

<sup>18</sup> —Ohuapi tiadeni ohuaquibo-baqqunitohui. Naraha tiadenidsa omadipomani-jine occanipomanitohui. <sup>19</sup> Naraha nidsa denimapi ajijaro dsamacca madijapa ohua qqui tomanimana-jarahitohui. Naraha tiadenipi ohua qqui timanimananitohui. Odsosqueraha onahatonidsapi omadinitohui. Nema onadsapi tiadeni naqui tinahatonimanadsa timadimanapomanitohui. <sup>20</sup> Jehe, occanipomadsapi tibodideni huatoma-mananitohui: Ohuapi occa Abidsa. Tiadenipi ohuadsa. Ohua naqui tiadenidsa, onajaro. <sup>21</sup> Occa marinaja tiadenidsa tojadsa nema tinanamanadsapi ticcadeni ima ahuato tanijine: Pajissa ohuadsa tetideni huanacquiri nani. Ohuadsa tetideni huanacquiri nadsapi occa Abi naco tiadenidsa huati huana tahitohui. Ohua naqui tiadenidsa ohuati huana tanitohui. Tiadenidsa ahuato onanitohui –nade Jeso.

<sup>22</sup> Nadsapa Joda (ajajaripa Joda Iscariote jarahi) najari huati tajari: —Ia Maride ¿nejecotohui iadsara ahuato tinanijine naraha ajijaro dsamacca madijadsapi ahuato tinejeranijine? –nade. <sup>23</sup> Naraha Jeso huati tade: —Madija ohuadsa huatideni huanacquiri nadsapa ohuatti ecahuamananitohui. Nadsapa Abi naco pohuadenidsa huati huana tahitohui. Occa Abi tedseje pohuadenidsa imadinitohui. <sup>24</sup> Madija ohuadsa huatideni huaneraqquri nadsapa ohuatti ecahuamana-jeranitohui. Aji ima timittamanajaropi ohuatti jerani, Abi Dio ohua Cadossedede Atti.

<sup>25</sup> —Aji tiadenidsa omadidsama huati huati onajaropaji. <sup>26</sup> Naraha nidsa nohue ojiradsapi Abi Dio tiadeni Acco Camade dosse inaronahitohui. Najaripa Dio Corime pina ojinessa inanantohui. Denima tiadeni mari tocanabaqquihitohui. Aji huati huati onajarocca naqui pohuajine tibodideni huatomanissa tanitohui –nade.

—*Occanibote nani, dacoco tijiraji –najari*

<sup>27</sup> —Nadsama ohuapi occanibote nani. Tibodideni bicaqquri nanijine tiadenidsa occa jonehe da onaridsani, pina ajijaro dsamacca madija pohuadeni tohui quinahic-cassa nejerajaro. Nadsama occa daniji ticajimanadsapi tibodideni huatoto canejeraji. Occaninitohui onajaro noppineni naqui ticappinamana-jeraji, onajaro. <sup>28</sup> Ohuapi occanini, ocanajorani-pomanitohui onanipi timittamanade. Occa Abi Pohuana deni tojajari. Pajissa ohuadsa tetideni huanacquiri nadsapi occa Abihuaji occanina onadsa tetidsemananijine bica taraha nema tiquinejerajaro.

<sup>29</sup> —Jehe, aji itedsejemacca ima huati huati onajaro toja-jeraccadsama tiadenidsa huati onajaro. Nidsa najaro ima tojadsapi ohuadsa: “Pajissa huati tajaria” tiquinanitohui. <sup>30</sup> Naraha ohuapi occa ima denima tiadenidsa huati odsanapo-jerana. Ajijaro dsamacca dodossedede Satanapa bacco nabote nahi. Naraha pocca dacorehepi ohuadsa deni toja-jerani. <sup>31</sup> Nema nehe ohua ohuacoradsapi odsosquenitohui. Nema onajaropi madija huapima nahatoqquri nahijine: Ohuapi occa Abidsa ohuati huana tajaro. Pohuapa ajijaro imatohui ohua cadossedesapa Pohua Attidsa ibora onajaro –nade Jeso.



Maride jicadsapa: —Jina, jaijana –nade iadsa.

## 15

### *Jesocca marinaja uva ede tahimari*

<sup>1</sup> Nadsapa Jeso iadsa denima huati huati tade: —Ohuapi uva ede pajissacca ojani. Occa Abipa huidsajacca uva cacahuadessa najari. <sup>2</sup> Ohuapi huidsajacca uva edessa onadsapi madija ohuadsa toquejenajaridenipa pina uva ininessa quinajari. Nadsama uva inine cabononora tajaripa uva cacahuade ca icajidsa tahi. Naraha uva inine ohuaha cacabono najarina denima cabono-dsanapohuijine uva cacahuadepa ininedsa moroninedsatira ba ba ihippi najari. Eppe bote naco pore pore ihinanajari. Nadsapa inine huire tadsapa bono cajidsanapohuijine. <sup>3</sup> Aji tiadeni naqui najarossa tiquinajaro. Ohuatti tiadenidsa huati onajarojine huireqquri tiquinajaro. Nadsapi tibonomananiijine tinajoramanajaro. <sup>4</sup> Nadsama ohuadsa paji timadimanarini naridsaji. Ohuapi tiadenidsa paji omdirini nanitohui. Inine edeccana cacabono najari. Inine pohua mottapa cabononora tahi. Najarossa tiquinajaro. Tiadeni ohuadsa timadimananissa tejeradsapi ima bicani tinanamananiijine tipajiramana-jeranitohuiraha.

<sup>5</sup> —Nadsama ohuapi uva ede ojani. Tiadenipi uva inine tiquejenani. Ohuadsa timadimananissa tadsapi tiadenidsa omadinitohui. Nadsama tiadenipi pina uva inine cacabonojide rajarissa tiquinajaro. Nassa tiadenidsa omadi-jeradsapi ima bicani tinanamana-jeranitohuiraha. <sup>6</sup> Ohuadsa madimanahissa tajarajaripa huahuattajo toquejenahitohui, pina uva inine ca toppidsa hua tajarissa quinahitohui. Uva inine dseqqueri nadsa inaccamanadsapa botta botta tajarissa quinahitohui.

<sup>7</sup> —Naraha ohua tinebomana-jeradsa occa marinaja naqui tinebomana-jeradsapi tohui tiquinaniccatohui ohuadsa huati huati titiquina nana. Nadsapa ticcadeni huatinaja tiadenidsa tojahitohui, onajaro. <sup>8</sup> Jehe, Dio Attissa tinanaridsamanadsapi pina uva inine cacabonojide rajarissa tiquinaniijine. Nema tinanamanani madija qqui toquinadsapa occa Abidsa: “Jehe, Diopa bica tahi” quinahijine. Jehe, nema tinanamanadsapi pajissa occa madija tiquejenani ahuato tanitohui –nade Jeso.

### *Jeso pocca mamari tabaqqidsa: —Otessedeni –najari*

<sup>9</sup> —Ohuapi tiadenidsa ohuati huana tehe nema onajonajaro. Pina Abi ohuadsa huati huana tajarissa onajaro. Occa tohuati huanehedsa tiajimana tejeraji. <sup>10</sup> Occa dossenijidsa iboraqquri tiquinadsapi occa tohuati huanehedsa timadimanani paji nanijine. Aji pina ohua occa Abicca dossenijidsa ibora onadsa pocca tohuati huanehema omdiridsajarossa tiquinaji, onajaro.

<sup>11</sup> —Aji huati onajaropi occa huatidsehe tiadenidsa onananiijine. Occa huatidsehe tibodidenidsa pajiranissa tanijine, onajaro. <sup>12</sup> Ajjaropi tiadenidsa occa dosseniji: Pina tetideni cahanerara canaji. Pina aji ohua tiadenidsa ohuati huana tajarossa tiquinaji. <sup>13</sup> Tohuati huanehe deni tojajaropi ajima najarona paji: Madija pohua tesse tocassiejerahijinepa pohuana pohua ccaccorajarina paja. <sup>14</sup> Nadsama occa dossenijissa tinanamanadsapi otesse tiquejenani. <sup>15</sup> Jidapapi tiadenidsa: “Occa medsedeni” onejerani. Madija medse inanabaqquijaripa pocca medsedeni pocca ima ssamoqquri najari. Naraha ohuapi occa Abi ohuadsa huati huati tajari nemanehe tiadenidsa ohuacomerajaro. Najaroa aji tiadenidsa: “Otessedeni” onajaropaji.

<sup>16</sup> —Tiadenipi otohui tiquinapo-jeraraha ohuana tiadeni ocattejidsa-baqquijaro. Nani tiadenina ohuatti mari ticanabaqquiridsahijine. Nahi madija ohuadsa toquejenahijine. Najaro imapi pina uva inine huajijiradsa cacabono najarissa tiquinanitohui. Najari bonopa madija Diodsa toquejena-dsanapojari. Nema nadsapi ohua onima huati huati titiquina nadsapi Abipa ticcadeni huatinaja tiadenidsa da da nanaja

nahitohui. <sup>17</sup> Nadsama ajijaropi tiadenidsa occa dosseniji: Tetideni cahanerara canaji, onajaro –nade Jeso.

*Ajijaro namicca imadsa madimanajaridenipa Jesodsa huattajojo, pohua huatimadenidsa huattajojo tajari*

<sup>18</sup> —Ajijaro namicca imadsa madimanajaridenipa tiadenidsa jiperaqquiri nadsapa tibodideni huatomanaji: Pohuadenipa ohuadsa jiperaqquiri napojari. <sup>19</sup> Tiadenipi ajijaro namicca imadsa timadimanadsapi pohuadenipa tiadenidsa jipaqquiri nahitohuiraha nema tiquinejerajaro. Ajijaro namicca imadsa timadimanaporaha ohuapi tiadeni ocattejidsabaqquijaro, ajijaro namicca imatohui timadimana-jeranijine. Jidapapi ajijaro namicca imatohui timadimana-jerajarojine tiadenidsa jiperaqquiri najari. <sup>20</sup> Aji tiadenidsa huati onapojarocca tetideni huatoma-manana. Medsedenipa pohuadeni medsededsa deni toquejena-jarahi. Ohuadsa jara jara quinadsapa tiadenidsa naco jara jara quiquinanahitohui. Occa marinajadsa jehe quinadsapa ticcadeni marinajadsa naco jehe quinahitohui. <sup>21</sup> Jehe occa tiquejenarajarojine jidacca huati onapojaro huapima tiadenidsa nama quinahitohui. Occa Abi ohua Cadossededsa noccodeni jidsaqquiri nadsa nama quinajari.

<sup>22</sup> —Nadsama pohuadenidsa huatide occajona-jeradsapi pohuadenipa ima cappiramanahitohuiraha. Pohuadenidsa huati onaraha pajissa quina-jaradsapa ima cajimanajari. Pohuadenijinena poccadeni ima inatabaccoramanajaro. <sup>23</sup> Ohuadsa huattajojo tadsapa occa Abidsa naco huattajojo tajari. <sup>24</sup> Nadsama ojinepi pina madija ohuahajinessa nejerani. Occa nahatohue denima bica tanicca qqui toquinajaradsapa ima cappiramanahitohuiraha. Naraha occa nahatohue bica tani qqui qqui toquinaraha pajissa quina-jaradsapa ima cajimanajari. Nama quinadsapa ohuadsa huattajojo, Abidsa naco huattajojo tajari. <sup>25</sup> Nadsama poccadeni imapi pina Dio Atti dsodo napojarossa najaro inanamanajaro: “Tabaccorehe onana-jeraraha pohuama ohuadsa huattajojo tajari” najaro Dio Atti dsodo nanidsa.

<sup>26</sup> —Tiadeni Acco Camade tiadenidsa dosse onaronahitohui. Pohuapa Abihuaajicca, pohua oni ohuahapa Dio Corime Pajissehe Maride. Nidsa najari ccaronadsana otahimari tiadenidsa ahuatoma ahuatoma nanitohui. <sup>27</sup> Tiadeni naqui otahimari tecomera-ridsamananitohui. Aji, ohuadsa tiquejenapodsa ohua qqui tajonamanajarojine jidapana otahimari nahatoqquri tiquinanissa tani –nade Jeso atti.

## 16

*Jeso huatimadedeni tedsejemadenicca ima huati tapojari*

<sup>1</sup> —Aji tiadenidsa huati onajaropi ticcadeni jeheniji tinebomana-jeranijine. <sup>2</sup> Jodio poccadeni Dio Atti mamarihuaji jai tijedsimapoma-jeranijine tiadenidsa: “Ahuajipi jai tijedsima tejeraji” quiquinanahitohui. Nidsa ima onihi naqui tiadenidsa ssonarinitohui. Madija pohuadeni tocamaidasani-manadsa bodidenipa: “Ohuapi Diocca ima ohuacahuanissa tana” quinadsapa tiadeni inanadsoqque-maneje camanitohui. <sup>3</sup> Ajijaro imapi nema inanamananitohui. Pohuadenipa Abidsa noccodeni jidsaqquiri, ohuadsa naco noccodeni jidsaqquiri najari. <sup>4</sup> Nidsa aji huati huati onajaro tiadenidsa bacco tadsapi tibodideni huatoma-mananitohui: “Ja, Jeso atti nama napode” tiquinanitohui. Najaro imapi tiadenidsa huati onapo-jerade, tiadenidsa omadiridsaccani onadsa –nade Jeso.

*Dio Corimepa ia Acco Camade*

<sup>5</sup> —Naraha jidapanana ohua Cadossedehuaaji occanini onadsapi tiadenipi ohuadsa huati tineje cama-jerani. “¿Nejecohuaji ticcaninijine?” tiquinejerani. <sup>6</sup> Naraha occanini onani timittamanadsapi oji tiquinabote nadsa tibodideni huanacossajaro. <sup>7</sup> Pajissara tiadenidsa huati onana: Ohua occanidsapi tiadenidsa ima bicani tojanijine.

Occani-jeradsapi tiadeni Acco Camade nohuerahitohui. Naraha occanidsana tiadeni Acco Camade dosse onaronahitohui –nade.

<sup>8</sup> —Nidsa tiadeni Acco Camade bacco naronadsapa ajijaro dsamacca madijadeni imasiri cajimanahi pohuadenidsa ahuato inananitohui. Ima onihi naqui: Imasiri cappiramanajaridenina Diodsa toquejenahijine pajiramanahi ahuato inananitohui. Ima onihi naqui: Imasiri cajimanajaridenipa Dio ettajobaqquidsa nanajidso toquejenahijine ahuato inananitohui. <sup>9</sup> Tiadeni Acco Camadepa madija ohuadsa pajissa quina-jaradsapa imasiri cajimanahi pohuadenidsa ahuato inananitohui. <sup>10</sup> Ima onihipi: Imasiri cappiramanadsa Diodsa toquejenahijine pajiramanajaripa aji ohuapi imasiri jirehe omadidsa occa madie pajiranissa tajarojine. Nema onadsapi Diohuaji occaninitohui. Nadsapi ohua qqui tiquinapoma-jeranitohui. <sup>11</sup> Ima onihi: Dio huahuattajo inanabaqquidsa nanajidso toquejenahijine ahuato inajaropi tahide ajijaro dsamacca dodossede Satana Diojine huahuattajo tojapojaripaja –nade Jeso.

<sup>12</sup> —Denima tiadenidsa ima huati onanijine ima ocajiraha najaro huapima timittamananijine tipajiramana-jeraccani. <sup>13</sup> Naraha nidsa tiadeni Acco Camade Dio Corime Pajissehe Maride bacco naronadsana ima huapima pajissaccara tiadenidsa inanadsanaponijine. Najaropi pohua mottacca ima jerani, Abi Dio huati tajari mittadsa tiadenidsa huati toqquimahitohui. Itedsejemacca ima naqui tiadeni tonahattabaqquihitohui. <sup>14</sup> Pohuadsa occa ima ahuato onanadsa tiadenidsa ahuato inananitohui. Nadsapa pohuajine ohuadsa: “Jehe, Jesopa nahato tahi, deni tojahi” tiquinanitohui. <sup>15</sup> Occa Abicca huapimapi ohua naqui occa. Najarojine ohuattipi: Dio Corimedsa ahuato onanadsapi tiadenidsa ahuato inananitohui, onajaro –nade Jeso.

### *Poccadeni ojiepi huatidsehe tojanitohui*

<sup>16</sup> —Nidsa dsotodepi ohua qqui timanimana-jeranitohui, naraha denimapi ohua qqui timanimana-pomanitohui –nade Jeso.

<sup>17</sup> Nadsapi ia pohua huatimadedeni iara imahaha icanade: —¿Nejecotohui atti nama najari? –inade. —¿Nejecotohuira iadsa: “Nidsa dsotodepi ohua qqui timanimana-jeranitohui, naraha denimapi ohua qqui timanimana-pomanitohui” napa? ¿Nejecotohuira iadsa atti: “Ohuapi occa Abi madihihuaji occaninijine” nanaja najarinaja? <sup>18</sup> ¿Nejecotohuira pohua attipa: “Nidsa dsotodepi” nanaja najarinaja? Pohua huati huati tajaripa ssamoqquri inani –inade pohua huatimadedeni iapi.

<sup>19</sup> Naraha Jesopa pohua bodi nahato tapoja najari. Iapi pocca imatohui pohuadsa huati inanitohuiraha manacora iadsa huati tajaride: —Nadsa tiadenidsa huati onapopa: Nidsa dsotodepi ohua qqui timanimana-jeranitohui. Naraha denimapi ohua qqui timanimana-pomanitohui, onajarojinea aji tiadeni motta imahaha ticana-jaropaji. <sup>20</sup> Nadsapi pajissara tiadenidsa huati onana: Tiadenipi oji tiquinanitohui. Tibodideni naqui ocassera tanitohui. Naraha madija ajijaro namicca imadsa madimanajarideni huapimapa huatidsemanahitohui. Tiadenipi tibodideni ocassera taraha ticcadeni ojiepi huatidsehe tojanitohui. <sup>21</sup> Ajijaro imapi pina amoneje idsoni comajarossa najaro. Ejedeni comene nacassera taraha tossonahi nattipa comene huatini ajima najaro. Nadsapi ponicca ejedeni tossonajarijine ponipi huatidsejaro. <sup>22</sup> Tiadeni naqui nema tiquinanitohui. Ocasserani temanaraha dsotodepi tiadeni qqui omanibaqqui-pomanitohui. Nadsapi tibodidenidsa huatidsehera tojanitohui. Najaro huatidsehepi madija ohuahajine tossamo-jeranitohui, onajaro.

<sup>23</sup> —Nidsa dsotodepi tohui tiquinaniccatohui ohuadsa huati tiquinejeranitohui. Pajissara tiadenidsa huati onana: Tohui tiquinaniccatohui ohua onima Abidsana huati tiquinadsapi Abina tiadenidsa da da ihinananitohui. <sup>24</sup> Tiadenipi ohua onima Abidsa huati huati titiquina nejeraccani. Nadsapi ohua onima Abidsa huati huati titiquina naji, ticajimananijine. Nani ticcadeni huatidsehe pajiranissa tanijine –nade Jeso.

*Jesopa ajijaro dsamacca imadsa deni tojajari*

<sup>25</sup> —Occa marinaja ajijaro namidsa imadinicca ima tadsajani tiadenidsa mari mari ohonanajaro. Naraha nidsa dsotodepi occa marinaja ajijaro namicca ima tadsajani tiadenidsa huati onapoma-jeranitohui. Abi tahimari ahuato tanijinena tiadenidsa huati onanitohui. <sup>26</sup> Najaro huada bacco tadsapi tiadenina ohua onidsa huati huati titiquina nani bica tani. Nadsama ohuapi ticcadeni huatinaja Abidsa huati oqquima-jerani. Puhuapa tettideni mittahi. <sup>27</sup> Abipa tiadenidsa huati huana tahi. Ohuadsa tetideni huana tadsa: “Pajissa Diohuaji ccaronajari” tiquinadsapi Abipa tiadenidsa huati huana tahi. <sup>28</sup> Ohuapi Abi madihihuaji omadiraha ajijaro namihuaji occaronajarode. Jidapapi ajijaro dsama onebodsas Abihuaji occamacossaninitohui, onajaro –nade Jeso.

<sup>29</sup> Nadsapi ia pohua huatimadedeni pohuadsa huati inade: —Jehe, jidapanana huati tinanissa tani. Ajijaro namicca ima jirehe huati tinadsapi imittani –inade. <sup>30</sup> —Tiapi ima huapima nahatojide tijirani nahatoqquiri inajaro. Jidapapi tiadsa imatohui huati inejeradsa naqui, ibodicca icca huatinaja nahato tinani, inajaro. Najarojinea pajissa Diohuaji ticcaronani nahatoqquiri inajaro –inade Jesodsa.

<sup>31</sup> Naraha Jeso iadsa huati tade: —¿Jidapanana pajissa tiquinanissa tajaroqui? <sup>32</sup> Jidapapi ohuadsa ima tojabote nani. Tiadenipi ticcadeni odsahuaji jai tijanirid-sanitohui. Ohua tiaquibonimananitohui. Nadsapi ohua motta ojanitohui. Naraha ohuapi ohua motta jerani. Abipa ohuadsa madih. <sup>33</sup> Aji ima huapima tiadenidsa huati onajaropi tibodideni huatoto cana-jeranjine. Ohuadsa tiquejenadsapi jonehe, huatidsehe pajissacca ticajimananitohui. Ajijaro dsamadsa timadimanaccadsapi ocasserani temanaraha dacoco tijiraji. “Epeje inana” tiquinejerana. Ajijaro namicca dodossedepa ajamani tojahi. Ohuana pohuadsa deni ojani –nade Jeso.

## 17

*Jeso pocca Abidsa huati tajari*

<sup>1</sup> Najaro ima huati taha jicadsapa Jeso memehuaaji qqui tamacossadsa Diodsa huati tade: —Abi, jidapanana onajorehe jicani. Memehuaajicca deni tojehe ticca ejedenidsa da taji. Nahi ticca ejedenipa ticca nahatohue deni tojehecca ahuato inananjine huapimadsa. <sup>2</sup> Aji ohua ticca ejedenipi madija huapimadsa tijine tamine ojajaro. Aja ohuadsa tinanabaqquijaridenipa pohuadenidsa camittehe jiquejeranicca da onaridsanjine. <sup>3</sup> Najaro camittehe jiquejeranicca cajimanahijinepa Tiadsa noccodeni tojidserajari. Tiana Dio ojari tajaro. Tiana ia Cacahuade pajissacca. Aji ohua Jesocristo ohua dosse taronajaropi ohuadsa naco noccodeni jidseraqquri nahi. Madija Tiadsa, ohuadsa pajissa quinadsapa camittehe jiquejeranicca cajimanahitohui.

<sup>4</sup> —Nadsama ticca deni tojehepi ahuato onanajaro ajijaro dsamadsa. Aji ohua ticadossejaro huapimapi onajicanissa tani. <sup>5</sup> Abi, dsama nahato-jeraccadsama Tia tedseje deni tojehe icajjarode. Jidapapi najaro ohuadsa tinanajini, onajaro –nade Jeso.

*Jeso pohua huatimadedenitohui Diodsa huati tajari*

<sup>6</sup> —Jehe, madijapa ajijaro namicca imadsa madimanaraha tidinibaqquidsas ohuadsa tinanabaqquijari. Najarideni onahattabaqquidsas ticca imadsa nahatoqquiri nahi. Najaridenipa ticcaraha ohuadsa tinanabaqquijari. Tettidsa iboraqquri nadsa ticca marinaja ecahuamananissa tani. <sup>7</sup> Jidapapa nahatoqquiri nahi aji huapima ocajijaro naqui ticca daniji. <sup>8</sup> Aji ohuadsa Tetti da tajaropi pohuadenidsa da onaridsani. Najaropi pohuadenidsa tojani. Pohuadenipa Tiahuaji occajonanicca ima tocahatterara canahi. Pohuadenipa ohuadsa: “Pajissa Dio dosse inaronajari” quinahi.

<sup>9</sup> —Ohuapi najaridenitohui Tiadsa huati onajaro. Ajijaro namicca imasiridsa madi-manajaridenitohuipi huati onejerajaro. Aja ohuadsa tinanabaqquijaridenitohuira Tiadsa huati huati onajaro. Pohnadenipa ticca. <sup>10</sup> Aja occa huapimapa ticca. Ticca huapima naco occa, inajaro. Occa deni tojehepi pohnadenidsa ahuato tajaro.

<sup>11</sup> —Jidapapi ajijaro namidsa omadidsanapo-jerani. Tiahuaji occaniraha aja pohnadenipa ajijaro namidsa madimanaccatohui. Jehe, Abi bicabote tijani. Aja ohuadsa tinanabaqquijaridenipa ticca dacorehedsa tecahuabaqquijo, huapima ojariqquimanahijine. Pina Tia ohua tedseje ijariqquijarossa quinahijine. <sup>12</sup> Ajijaro namidsa pohnadenidsa omadiridsadsapi aji ticca dacorehe ohuadsa tinanajarodsa ohuacahuabaqquihissa tajari. Pohnadenipa ojaria amossinaja cama-jararaha ojariana paja amossi narihi nahitohui. Najaripa najidsohue jiquejeranihuaji tojahitohui, pina aji Tetti dsodo napojarossa nehe tojanitohui.

<sup>13</sup> —Jidapapi Tiahuaji occanina. Naraha ajijaro namidsa omadiccdsama ajijaro ima Tiadsa huati huati onajaro, nahi pohnadenipa pina aji occa huatidsehe ocajijarossa najarodsa huatidsemaneri nahijine. <sup>14</sup> Nadsama ticca marinajapi pohnadenidsa onanaridsaraha ajijaro namicca madijaha pohnadenidsa huattajojo tajari. Pohnadenipa ajijaro namicca imadsa toquejena-jarahi. Pina ohua ajijaro namicca ojajerajarossa quinajari. <sup>15</sup> Naraha Tiadsa: “Pohnadeni tiaccamacossinabaqquijo” onejerani. Imasiri jinede Satanacca maidsehedsa tojaparimana-jarahijine onadsa “Tecahuabaqquijo” onajaro. <sup>16</sup> Ohuapi ajijaro namicca ojajerani. Pohnadeni naco pina aja ohuassa quinajari. Ajijaro namicca quejena-jarahi. <sup>17</sup> Ticca pajissehedsara tinanabaqquijo, onajaro, imasiri jirehe madimanahijine. Tetti pajissa ponira. <sup>18</sup> Ajijaro namidsa omadinijinepi Tiana ohua ticadossejarode. Najarossa najaro ohuapi pohnadeni ocadossebaqquijari, ajijaro namicca madija motadeni mari icanabaqqui-ridsahijine, onadsa. <sup>19</sup> Occa madie nemanehi Tiadsa accora onajaro. Aja occa mamari tabaqquideni naco pina ohuassa quinahijine poccadeni madie nemanehi Tiadsa accoraquiri nahijine dissera onajaro. Ticca pajissehedsara madimana-dsanapohuijine -nade Jeso.

### *Pohnadsa pajissa quinajaridenitohui Diodsa huati tajari*

<sup>20</sup> —Ohuapi occa mamari tabaqqui bodideni acco ticamabaqquijo onadsa Tiadsa huati huati onaraha dsotodedeniccatohui naqui Tiadsa huati huati onajaro. Nidsa occa mamari tabaqqui otahimari eccoraridsa-manadsapi madija ohuaha dsotodedenicca naco ohuadsa pajissa quinahitohui. <sup>21</sup> Najarideni naco ojariqquimanahissa tahijine, Abi, pina ohua Tia tedseje ijariqquijarossa quinahijine Tiadsa huati onajaro. Pohnadeni naco iadsa ojariqquimanahissa tahijine, onajaro. Nahi ajijaro dsamacca madijapa ohuadsa: “Pajissa Dio dosse inaronajari” quinahijine. <sup>22</sup> Aji occa deni tojehe ohuadsa da tajaropi pohnadenidsa naqui da onaridsani. Nahi pohnadenipa ojariqquimanahissa tahijine, pina ia ijariqquijarossa quinahijine, onajaro. <sup>23</sup> Ohuapi pohnadenidsa, Tiapi ohuadsa inajaro. Nahi pohnadenipa ojariqquimanahissa tahijine. Nadsapa ajijaro dsamacca madija nahatoqquiri nahijine ticca dosseniji occa-jonajarode. Ajijaro ima naqui nahatoqquiri nahijine: Tiapi pajissa quinajaridenidsa teti huana tajaro. Pina ohuadsa teti huana tajarossa najaro.

<sup>24</sup> —Nadsama Abi, ohuadsa tinanabaqquijaripa occaridsanihuaji ohuadsa jahiridsahijine, ticca daniji occa deni tojehe qqui toquinahijine onadsa. Najaro deni tojehepi dsama inahato-jeraccadsama Tiapi ohuadsa teti huana tadsa ohuadsa da tajarode. <sup>25</sup> Abi, ticca imapi pajiranissa tani. Ajijaro namicca madija Tiadsa noccodeni jidsaquiri nahi. Naraha ohuapi Tiadsa onocco jidsera tani. Aja ohuadsa toquejenajaridenipa nahatoqquiri nahi: Ohuadsa: “Ajajaripa Diocca dosseniji” quiquinanajari. <sup>26</sup> Nadsapa ojine Tiadsa noccodeni jidseraquiri nahi. Naraha denima noccodeni tojidsera-dsanapohuijinepa nema odsanaponitohui. Aji



ohuadsa tohuati huanehe ticajijaropi pohuadeni naco cajimanahijine. Ohua naqui pohuadenidsa omadiridsanijine -nade Jeso atti pocca Abidsa huati huati tadsa.

## 18

### *Jeso dama quinahi*

*Mateo 26.47-56; Maraco 14.43-50; Roca 22.47-53*

<sup>1</sup> Jeso Imehidsa huati taha jicadsapa Jeso pohua huatimade iapi pohua tedseje bijini oni Sedro jippehuaji jaijajarode. Aja Jeso itedseje toqquedsimahiuajipi ppa nahi caji tade. <sup>2</sup> Joda Iscariotepa Jeso ccaccorade, pohua naco nahihuaji nahato tajari. Nanihuajipi Jeso pohua huatimade iapi pohua tedseje maitta ihiqueriqqui rade. <sup>3</sup> Nahihuajina Jodapa romanodenicca soldado, dada toqquimahuajicca cacahuadedeni tedseje eccajonabaqquijaride. Dada toqquimade taminedeni, marinaja onini pariseodsa jehe quinajarideni tedseje dosse inajonabaqqui-manajari. Bacco najonamanadsapa dsepedenima jahijonade. Jojororo, huahuacca, huahuajina, massito najonamanajaride. <sup>4</sup> Jesopa pohua todsepe tojahijine nahato taporaha pohuatohui jahijonajaridenihuaaji toccadsa huati tade: —¿Nejecojaritohui jai tijajonajaro? -nade. <sup>5</sup> Naraha pohuadeni cacomeramanade: —Jeso Nasaretihuaajiccatohui jaijajonajaro -quinade. Naraha Jeso pohua cacomerade: —Ohuapi aji -nade. Aja Jeso pohua ccaccorade Joda naco pohuadenidsama quejemade. <sup>6</sup> Jesopa —Ohuapi aji -nadsa pohuadeni nattihuaaji ttiri tanimananaja edima bohua bohua bohua quinade namidsa.

<sup>7</sup> Naraha Jeso pohuadenidsa huati tapomade: —¿Nejecojaritohui jai tijajonajaro? -napomade. Naraha pohuadenipa: —Jeso Nasaretihuaajiccatohui -quinade. <sup>8</sup> Naraha Jeso huati tapomade: —Nadsa huati onapopa: “Ohuapi aji” ohonanapa. Otohui tiquinadsapi aja ohuatimadenipa pohuadeni jai tojaniridsana, onajaro -nade.

<sup>9</sup> Najaropi pina Jeso Imehidsa huati tapodsa: —Abi, aja ohuadsa tinanabaqquijaripa amossinaja cama-jarana -napojarissa inananiijine. <sup>10</sup> Naraha Ssino-Pedropa pohua nacoricca massito dsoppa taneje jeo, taminecca medse oni Maoco huaribo nahatonihuajicca ca taneje tajo canade. Maocopa dada toqquimadedenicca tamine deni tojajaricca medse. <sup>11</sup> Naraha Jesopa Pedrodsa huati tade: —Ticca massito tinacoridsa dso ticadsaniji. Ajijaro imapi occa Abicca dosseniji ocasserani ohuanijine. Pohua Attidsa ibo onejerani -nade Jeso. <sup>12</sup> Nadsapa soldado huapima poccadeni tamine tedseje, jodiodeni mota aja Diodsa dada toqquimahuajicca cacahuadedeni quinadsa Jeso dama quinadsapa biji jore quinade.

### *Tamine tahidecca Anasahuaji Jeso iaccamanajari*

*Mateo 26.57-58; Maraco 14.53-54; Roca 22.54*

<sup>13</sup> Nadsapa dada toqquimadedenicca taminebote onipa Anasacca odsahuaji iaccamanade. Pohuapa Caipacca coco. Caipapa najari huajanodsa dada toqquimadedenicca tamine deni tojajari. <sup>14</sup> Caipana jodiodenidsa huati tapojaride: —Madija ojaria huapima manaconedeni dsoqquehina bica tahi, ia icca dsamacca huapima naco inajicaridsamana-jeranijine -napojaride Caipa atti.

### *Pedro pohua namaidsapohuicca ima*

*Mateo 26.58, 69-70; Maraco 14.54, 66-68; Roca 22.55-57*

<sup>15</sup> Ohuapi Huano, Ssino-Pedro tedseje Jeso natti icadamissade. Dada toqquimadedenicca tamine deni tojajaricca boronidsa Jeso iaqquedsimamanajaride. Aja taminepa ohuadsa nocco jidsera tajariijine pocca boronidsa oqquedsimajarode. <sup>16</sup> Naraha Pedropa taminecca boroni huapihuaji siba hua nahujaninicca nocco-bijidsa huade. Naraha oqquenadsa najaro odsacca medse noccobiji cacahuade tojajarodsa huati onadsapi Pedro naco qquedsimade. <sup>17</sup> Naraha Pedro qquedsimadsa

najaro odsacca medse dsohuato noccobiji cacahuade huajaropi pohuadsa huati tade: —¿Tiapi aja dama quinajari huatimade tija-jeraqui? —nade. Naraha Pedro pohua namaisadsa: —Ohuapi najaricca ojajerani —nade.

<sup>18</sup> Nadsapa dsome tossirini nadsa tamine deni tojajaricca dodosse tabaqqui, Diodsa dada toqquimahujicca cacahuadedeni tedseje dsippo inadsamanadsa jia quinajaride. Pedro naco nahi huapima domo huahihuaji pohuadenidsama jia najaride.

*Dada toqquimadedenicca tamine deni tojapojari tahidecca Jeso pohua cacomerahijine huati icanajari*

*Mateo 26.59-66; Maraco 14.55-64; Roca 22.66-71*

<sup>19</sup> Naraha dada toqquimadedenicca taminebote Anasana Jesodsa pocca mamari tabaqquicca imatohui huati, pocca marinajatohui huati tajari: —¿Ticca marinaja naqui nejecoma najaro imara mari mari titicanabaqqui najaritta? —nade tamine atti. <sup>20</sup> Naraha Jeso huati tade: —Nadsa madija huapima mittamanahijine mari mari ohocanabaqquiridsa nade. Jodiodeni quequeriqquimana nahihuaji aji icca Dio Atti mamarihuaji, aji Diodsa dada toqquimahujari mari mari ohocanabaqquiridsa nade. Ohuapi cacomehedsa huati huati ohonana-jerade. <sup>21</sup> Nadsapi ¿nejeco imatohui ohuadsa huati tinajaro? Aja occa marinaja mittamanajaridenidsara huati tinaji: “¿Jesocca marinajapi nejecoma nejecoma najarotte?” taji pohuadenidsa. Pohuadenipa occa marinaja nahatoqquri nahi —nade Jeso. <sup>22</sup> Jeso atti nama nadsapa pohua inorihuaji huajari Diodsa dada toqquimahujicca cacahuadepa Jeso pano pohua dsepedsa idanide. Nanaja Jesodsa pohua attipa: —Iapi dada toqquimadedenicca tamine deni tojajaridsapi nema inejerajaro —nade. <sup>23</sup> Naraha Jeso attia: —Jehe, jidacca huati huati onajaro ohuatti tabaccora tadsapi huapima mittamanahijine huati tinaji. Naraha jidacca huati onajaro tabaccora tejeradsapi ¿nejecotohui opano tidanijaroneje? —nade Jeso atti.

<sup>24</sup> Nadsapa tamine Anasa attipa: —Manaco Caipahuaji toccana —nadsapa Jeso biji jore nahi nama naha Caipahuaji iaccamanade. Caipapa dada toqquimadedenicca tamine deni tojajari.

*Pedro pohua namaisapomajaricca ima*

*Mateo 26.71-75; Maraco 14.69-72; Roca 22.58-62*

<sup>25</sup> Jesopa odsa bodihuaji nanajidso tojaraha Pedropa boronidsa dsippo jiade tojajari. Nadsapa nahi dsippo jiade toquejenajarideni Pedrodsa huati toquinajaride: —¿Tiapi ajajari maqquideje huatimade tija-jeraqui? —quinajaride. Naraha Pedro pohua namaisapomade: —Ohuapi najaricca ojajerani —nade.

<sup>26</sup> Naraha dsotode naco dada toqquimadedenicca tamine deni tojajaricca dodossepa Pedrodsa huati tade. Najaripa Pedro pohujine huaribo ca tocajidsajaricca madija. Najari attia: —¿Tiapi aja ahua ppa nahihuaji dama quinajari tedseje tia qqui onajerattaqui? —nade Pedrodsa. <sup>27</sup> Naraha Pedro pohua namaisapomadsapa: —Ohua jerade —nanaja tacara huahua najaride.

*Tamine Piratodsa Jeso iaccamanajari*

*Mateo 27.1-2, 11-14; Maraco 15.1-5; Roca 23.1-5*

<sup>28</sup> Ssiajadsa dsidsidsamassapi Jeso Caipacca odsadsa iaqquenamanadsapa manaco tamine Piratocca odsahuaji iaccamanajaride. Tamine Piratopa romanodeni. Pohuapa jodiodenicca dsama cacahuade tojajari. Naraha ejete Pascoa bacco teje najaro Piratocca odsa bodihuaji jai tojedsima-jerade. Ia jodiodeni icca marinajapi: —Pascoacca jipaqquedsa ijipa-jeraccadsa jodio quejena-jarajaridenicca odsahuaji iqquedsimanijine oppina tani —ihinanajaro. Najaro noppineni cappinamanadsapa Piratocca odsa bodihuaji jai tojedsima-jarajaride. <sup>29</sup> Najaria aja Pirato qqquenadsa

pohuadenidsa huati tajaripaja: —Ajajari maqquidejepa ¿nejeco ima cajidsa tecajonamanajari? —nade. <sup>30</sup> Manaco Piratodsa huati toquinade: —Pohuajine tabaccora tejeradsapi tiadsa eccajona-jararaha —quinade. <sup>31</sup> Naraha Pirato attipa: —Ticcadeni ima cacattemahuajira tiaccamanajo. Pocca ima tabaccora tadsapi tiadenina tinajidsomanajo. Pina ticcadeni marinajassa tinanamanaji —nade. Naraha jodiodenipa —Jeso dsoqquehitohui —quinadsa Piratodsa huati toquinapomade: —Ia jodiodenipi madija inanadsoqquehijinepi icca cacahuaniji jerani. Romanodeni tiadenina ticcadeni cacahuanijina paji. Madijacca ima tabaccora tadsapi tiadenina titinanadsoqquemana najari —quinade. <sup>32</sup> Nadsama najaropi pina Jeso pohua dsoqquehijinecca ima pohua huati huati tapojarissa nehe tojajarode.

<sup>33</sup> Nadsapa Pirato pocca odsahuaji toqquedsimani-pomade. Toqquedsimanidsapa Jeso huahua idsimadsa huati tade: —¿Tiapi jodiodenicca tamine tijaqui? —nade. <sup>34</sup> Naraha Jeso Piratodsa huati tade: —¿Najaropi tibodi huatodsa ohuadsa tetti nema tajaroqui? ¿Madija huati toquinahi timittadsarane? —nade. <sup>35</sup> Naraha Pirato huati tade: —¿Ohuapi jodio ojaqui? ¡Jodio ojajerani! ¿Nejecoma nadsa ticca madijacca marinajadsa ima tinanajaro nahato onanijine? Aja ticca dsamacca madija, dada toqqumade taminedeni tedseje ohuadsa tia eccajonamanajaro. ¿Nejeco ima tinanadsatte? —nade Pirato. <sup>36</sup> Naraha Jeso pohua cacomerade: —Occa cacahuehepi ajijaro dsamacca jerani. Nassa jodiodeni ohua dama quina-jeraniijine occa mamari tabaqqi jodiodeni tedseje cahadirenaja. Naraha ajijaro dsamacca jerani —nade. <sup>37</sup> Naraha Pirato attia: —¿Tetti nema tadsapi tamine tijaqui? —nade. Naraha Jeso pohua cacomerade: —Pajissa ohuapi tamine, aji huati tinajaropaji. Nadsama ohuapi ajijaro dsamadsa ossonajaropi pajissara huati huati ohonabaqqi nahijine occajonajarode. Huapima pajisseheda jipaqquri najaridenina ohuati mittamanajari —nade Jeso. <sup>38a</sup> Naraha manaco Pirato pohua cacomerade: —¿Nejecoma najarona pajissehe? —nade Jesodsa.

*Jeso tappa inahijineraha Barabana tohui quinajari*  
*Mateo 27.15-21; Maraco 15.6-11; Roca 23.17-19*

<sup>38b</sup> Najaro huati taha jicadsapa tamine Pirato qquenapomadsapa jodiodenidsa huati tapomade: —Jehe, ohuapi ajajari maqquidejepca ima omittadsapi tabaccora tanicca nohuerani. <sup>39</sup> Naraha aji ticcadeni ejete Pascoa tojadsapi toponi cocorodsa coro todsimajarideni ojaría qquenahijine tohui tiquinadsapi ohuadsa huati huati titiquina nade. ¿Nejecojarina tappa onadsa qquenahijine tohui tiquinajaro? Aja ¿“jodiodenicca tamine” quiquinanajaripa tappa onahijineco? —nade Pirato. <sup>40</sup> Naraha jodiodenipa johuahua johuahua canapomade: —¡Najaripa pohua! ¡Tappa tinajarajo! ¡Paja coro todsimapojari Barabana tijine qquenajo! —quinade Piratodsa. Naraha Baraba pohuapa toponi nanajidsoderaha.

## 19

*—Porimacossanidsa Jeso coba tidsanamanana —quinajari*  
*Mateo 27.22-23; Maraco 15.12-14; Roca 23.20-22*

<sup>1</sup> Nadsapa tamine Pirato soldado icadossebaqquidsa Jeso cossi quinade.  
<sup>2</sup> Soldadodeni Jeso taticca cotihi atinema icohuamanaha jicadsapa tatidsa ettari-manade. Nadsapa etero macconi motaranicca pina tamineccassa najarodsa Jeso inehedsamanade. <sup>3</sup> Nadsapa Jesodsa jai tojessidsa pohuadsa maidsamanajari: —¡Jodiodenicca taminepa bica tahi, bica tahi! —quinade. Nadsapa pano idanimanade.

<sup>4</sup> Nadsapa Pirato qquenapomadsa jodiodenidsa huati tade: —Jari, ohuattidsa Jeso eqquenamana-pomahijine. Pohua qqi tiquinadsapa nahatoqquri tiquinanijine: Ohuapi najari maqquidejepca ima omittadsapi pocca ima tabaccora tanicca

nohuerani -nade. <sup>5</sup> Nadsapa Jeso tatidsa cotihi atinema huittari, taminecca etero macco tajaro huedsa naha eqquenamanade. Nadsapa Pirato atti: —¡Jari, ajajari maqquideje qqui tiquinajo! -nade. <sup>6</sup> Naraha dada toqquimade tamedeni, Diodsa dada toqquima odsa cacahuadedeni tedseje Jeso qqui toquinadsapa paja johua toquinarihi nade: —¡Ahua porimacossanidsa dsoqquena, dsoqquena! -quinade. Naraha Piratopa: —¡Tiadenina tiaccamanadsa ahua porimacossanidsa coba tidsanamanana! Ohuadsapi pocca ima tabaccora tanicca nohuerani -nade. <sup>7</sup> Naraha jodiodenipa poccadeni ima huati toquinade: —Iapi icca marinaja ecahuadsapi Jesopa inanadsqquena, inajaro. Pohua attipa: “Ohuapi Dio Bedi ojani” nanaja naraha najaro ima iadsa bica tejerani inajaro -quinade.

*Jeso pohua cacomerahijine tamine Pirato huati tapomajari*

<sup>8</sup> Tamine Piratopa jodiodeni attideni: —Jesopa Dio Bedi ojani nahi -quinahi mittadsapa denima cappinade. <sup>9</sup> Nadsapa Jesodsa huati tahijine pocca odsahuaji toqquedsimani-pomade. Jesodsa pohua attipa: —Tiapi ¿nejecohuajicca tijani? -nade. Naraha Jesopa pohua cacoma nade. <sup>10</sup> Naraha Pirato attia: —¿Ohuadsapi tia tecomajaroqui? -nade. —¿Ohuadsa ssamo tinajarorane? Ohuapi ajijaro dsamacca daco ojirajaropi ohuatti ocajini. Tiqquenanijine huati onadsapi tiqquenanitohui. Tidsoqquena onadsa naqui, tia coba idsanamananitohui -nade Pirato atti. <sup>11</sup> Naraha Jesopa pohua cacomerade: —Tiapi ohuadsa deni tija-jeraraha Dio tia cadossedsa deni tijadsa tetti ticajijaro -nade. —Tijine ohuadsa tabaccora taraha aja ohua ccaccajonadedenicca imana denima tabaccora tajaro -nade. <sup>12</sup> Nadsama Pirato Jeso atti nama nahi mittadsapa Jeso tappa inahijinecca imatohui huati tapomaraha jodiodenipa johua johua quinade: —¡Jeso tappa tinadsapa romanodenicca tamine deni tojahicca pohua tesse tija-jerani! Madija attipa: “Ohuana tamine ojani” nadsapa romanodenicca tamine deni tojahicca huadi tojajari -quinajari Piratodsa.

*Piratopa Jeso dsoqquehijine pohua eccorajari*

*Mateo 27.24-26; Maraco 15.15; Roca 23.23-25*

<sup>13</sup> Tamine Pirato jodiodeni atti nama quinahi mittadsapa Jeso amossinihuaji iaqquenamanapomahijine huati tajaride. Nadsapa Piratopa ima cacatemahuajicca huihuittaridsa huittarijaride. Pocca huihuittaripi pocca huahuari deni toja nahihuaji huittarijaride. Nanidsapi siba ppa naridsani, sseque tajaro. Jodiodeni atti ebreodsapi: Gabata, quiquinanajari. <sup>14</sup> Najaro huadadsapa jassinajacca huadatohui najoramanapojaride. Najaro jassinajacca huada sabadopi ejete Pascoacca jassinaja tojanijine. Nadsapa maji itetepi bacco tadsa Pirato jodiodenidsa huati tade: —¡Aja pajaha ticcadeni tamine! -nade. <sup>15</sup> Naraha jodiodenipa johuahua johuahua canadsapa: —¡Dsoqquena, dsoqquena! ¡Ahua porimacossanidsa coba tidsanajo! -quinade. Naraha Pirato attipa: —¿Ohua ticcadeni tamine coba odsanahijineco? -nade. Naraha dada toqquimade tamedeni pohuadeni cacomeramanade: —¡Najaripa icca tamine tojana inejerani! ¡Romanodenicca tamine deni tojahiccara ojarina inajaro! -quinade. <sup>16</sup> Nadsapa Pirato pohuadenidsa Jeso da inade. Ahua porimacossanidsa coba idsanamanahijine soldadodeni iaccamanade.

*Jeso ahua porimacossanidsa coba idsanamanajari*

*Mateo 27.32-44; Maraco 15.22-32; Roca 23.26-43*

<sup>17</sup> Nadsapa Jeso iaccamanadsapa pohua coba dsanahijine ahua porimacossani dsojo inade. Ssono Totati Tonanissa nani quiquinanahihuaji jai tojemorajari. Najaro ssono onini jodiodeni atti ebreodsapi: —Cocotta -quiquinanajaride. <sup>18</sup> Nahidsana Jeso ahua porimacossanidsa coba idsanamanajaride. Jesopa nahi madija cobaba dsanahi nocconidsa tojaride. Pohua inoridsa ahuaqui ahuaqui quinade. <sup>19</sup> Nadsapi ima dsodo nani tamine Pirato dosse inajonadsa Jeso tetepihuaji coba idsanamanajarode. Najaro

dsodo nanipi: —Jesopa Nasaretihuaicca, Jodiodenicca Tamine –najarode. <sup>20</sup> Najaro dsodo nanipi jodiodeni huapima hua quinade. Aja Jeso coba dsanahihuaipipi odsa panani huajira tade. Najaro ima dsodo nanipi jodiodeni pohuadeni atti ebreodsas, dsama Cresiacca madija attidenidsa, romanodeni attidenidsa najarode. <sup>21</sup> Naraha dada toqquimade taminedeni qqui toquinadsapa tamine Piratohuaji jai tojanidsa huati toquinade. Pohuadeni attipa: —Aji tijine dsodo nani “Jodiodenicca Taminepi” dsodo tejeraji. “Ajajari maqquideje attipa: ‘Ohuapi jodiodenicca tamine ojaní’ nanaja nade” najarora dsodo taji –quinade. <sup>22</sup> Naraha Piratopa: —Ojine dsodo najaropi, epeje –nade. <sup>23</sup> Nadsapa soldadodeni Jeso coba idsanamanaha jicadsapa eteroripi soldado 4 quinajarideni inaccamanadsa pohuadenidsa pohuadenidsa naridsade. Pocca etero dequericca naqui idimanade. Naraha najaropi ssequirani nemaneha ba naronani. <sup>24</sup> Nadsapa soldadodeni pohuadenira imahaha canadsapa: —Jehe, ssoja inari-gerana. Itesse ojariadsa tojanijine siba bedenidsa coro coro inadsa qqui inana. ¿Nejecojaridsana tojanijine? –quinade. Najaro imapi Dio Atti dsodo napojarossa inanamanajarode. Imapi ajima najaro: —Occa eteropi icajaribaqqi-mananitohui –naponi nade Dio Atti dsodo nanidsa. —Occa etero dequericca naqui ¿nejecojaridsa tojanijine? quinadsa siba bedenidsa coro coro quinahitohui –naponi nade Dio Atti dsodo nanidsa. Soldadodenipa pina najarossa inanamanajarode.

<sup>25</sup> Nadsama nahi Jeso coba dsanahidsapa Jeso pocca ami, poni imanicotani, poni tassani Cleopacca amoneje Maria, Maria Madarenahuaicca quinadsa domoni huajarode. <sup>26</sup> Nanidsa Jeso pocca ami huani qqui tajaride. Ohuapi Jeso huatimade. Ohuadsana Jeso huati cahanari canajaride. Ohuapi Jesocca ami inorinidsa ohuani Jeso ohua qqui tadsapa imenidsa huati tajaride: —Ami, aja tinoricca huajaripa ticca ejedeni tojana –nade Jeso. <sup>27</sup> Pohua huatimade ohuadsa naco huati tajaride: —Aji occa amipi ticca ami tojana –nade. Nama nadsapa pohua huatimade ohuapi Jesocca amipi occa odsahuajina onamadjarode.

### *Jeso huatiajari*

*Mateo 27.45-56; Maraco 15.33-41; Roca 23.44-49*

<sup>28</sup> Pohuadenidsa huati taha jicadsapa Jeso pohuajine huapima inapajiranissa tani nahato tajari. Dio Atti dsodo napojarossa inanijine naqui huati tade: —Obacco dsarini –nade. <sup>29</sup> Naraha nahidsa uva ppejene ssicatahi jojodsa cajimanajaride. Uva ppejene ssicatahidsa huassa tajari edsippamana, ahua isopo ininidsa oro quinadsapa Jeso ajaridsa da inamacossamanade. <sup>30</sup> Jesopa uva ppejene ssicatahi so inaha jicadsapa huati tade: —Huapima jicanissa tani –nade. Nadsapa tocattedsa nadsa huatiade.

### *Jeso ejinamanajari*

<sup>31</sup> Jeso dsoqquehicca huadapi viernes. Najaro huadadsa jodiodenipa jassinajacca huadatohui najoramanapojari. Ahua porimacossanidsa assiredeni coba dsanamanahi paja naccahijine jiperaqqiri najari. Najaro jassinajacca huada sabadopí ejete Pascoacca jassinaja ima deni tojanicca. Nadsapa jodiodenipa tamine Piratodsa huati toquinade: —Soldado ticadossebaqquidsas coba dsanamanajarideni issodeni iaquidejidsa-ridsamanana. Cacotadsapa assiredeni naco dicca quinaridsana –quinade. Pirato jehe nadsapa soldado icadossebaqqujari. <sup>32</sup> Nadsapa soldado coba dsanamanajarideni issodeni iaquidejidsa-ridsamanahijine jai tojade. Bacco toquinadsapa tahide Jeso inoricca cobaba dsanajari issodeni iaquidejidsa-ridsamanapode. <sup>33</sup> Naraha Jeso huatiahi qqui toquinadsapa pohua isso iaquidejidsa-manajarade.

<sup>34</sup> Jesopa huatiaraha nama naha ppari huahuajinadsa soldado dso tanaja, pora, emene qquena, passo qquena nade.

<sup>35</sup> Ajijaro tiadenidsa huati onajaropi ohua onocodsas qqui onajaro. Tiadenidsa pajissara huati onajaro Jesodsas jehe tiquinanijine. Ohuapi nahato onajaro ohuattipi



pajissa. <sup>36</sup> Jeso tone idejidsamana-jarajaricca imapi Dio Atti dsodo napojarocca imadsa pajiranissa tani. Nani Dio Atti dsodo napojaropi: —Tone ojaría jai inanamana-jarahitohui –naponi nade Dio Atti dsodo nanidsa. <sup>37</sup> Dio Atti dsodo napojaró onihí naqui: —Ejinamanahi naco cattomama canahitohui –naponi nade Dio Atti dsodo nanidsa, inade.

*Jeso ppa idsamanajari*

*Mateo 27.57-61; Maraco 15.42-47; Roca 23.50-56*

<sup>38</sup> Jeso ejinamanahi nattipa Dsodse odsa Arimateahuajicca madijapa Jeso assire ppa idsahijine tamine Piratodsa huati tajaride. Pohuapa Jesoccaraha jodiodeni noppine pohua cacomadsa madijari. Nadsapa Pirato jehe nadsa Dsodse tocanajoranidsa Jeso assire dicca inadsapa dsojo inade. <sup>39</sup> Nicodemo naco nahidsa bacco nade. Najaripa tahide dsomeraha Jesodsa qquide toccadsa pohuadsa huati huati tajaride. Najarina 30 kilo majoyo eccajonajarode. Najaro majojopi ahua amani tada tani onini mirra, ahua onihí majiconi onini aloé quejemajaro. Majoni bica tajaró. <sup>40</sup> Dsodsepa Nicodemo tedseje Jeso assire etero dsojorani onini linodsa jore inaqquimanade, ahua majiconi majoni bica tajaró icanejemamanadsa. Jodiodenipa poccadeni madija dsoqquedsapa poccadeni ppanijipi nama nama quiquinanajaride. <sup>41</sup> Nadsama nahi Jeso coba dsanahi huajira tanidsapa ppa nahi caji tajaride. Nanidsapi tonocobiri dsati sibadsa hui todsimani anijarode. Najarodsapa madija dsoqquehi podsa-jaraccahi. <sup>42</sup> Jodiodenicca jassinajacca huada bacco tabote najarójine najaro tonocobiri huajira tanicadsa Jeso assire ibedsamanajaride.

## 20

*Jeso nahatonijari*

*Mateo 28.1-8; Maraco 16.1-8; Roca 24.1-8*

<sup>1</sup> Nadsapi semana tojapomanicca huada tahidecca domingo dsidsidsamassa dsidsi tani paji naraha Maria Madarenahuajiccapi Jeso noccobirihuaji toccajarode. Bacco tadsapi qqui taneje tonocobiripi tohuabeje najaro. Sibapi pajimaranihuajina huitteje najaro nade. <sup>2</sup> Nadsapi Maria joppa nanijaro, Ssino-Pedro ohua inajarodenidsa bacco nanijarode. Ohuapi Jeso pohua huatimade. Ohuadsana denima huati huana tajari. Maria attinipi ajima nanide: —¡Jeso noccobiri tohuabapa! Pohua assire idinemanadsa dsojo quinajarirana. ¿Nejecohuaji ibamananaja? Ssamomo inani –nanide Maria Madarenahuajicca attini.

*—¿Pajissaqui? –quinadsa Pedro Huano tedseje qquide dsaja tajari*

*Roca 24.9-12*

<sup>3</sup> Nadsapi Jeso huatimade ohua Pedro tedseje ima imittadsapi dsaja inade, Jeso noccobirihuaji. <sup>4</sup> Ipamehe dsaja inaraha Jeso huatimade ohuana huassi oneje najaro. Jeso noccobirihuaji bacco onapojarode. Naraha Pedropa dsotode bacco namissade. <sup>5</sup> Nadsama Jeso huatimade ohuapi odihuaji ocattedsimaneje Jeso jojore naqqui eteroa qqui onaraha oqquedsima-jerade. <sup>6</sup> Naraha dsotodecca Ssino-Pedro bacco namissadsana Jeso noccobiri bodihuaji toqquedsimade. Pohua naco qqui taneje Jeso assire jojore naqqui eteroa podseje nanira qqui tajaride. <sup>7</sup> Pohua tati teteppepi pajimaranidsana padsoninehe podseje nani naqui qqui tajaride. <sup>8</sup> Dsotode ohua naqui oqquedsimadsana qqui onadsana: —Pajissa Jesopa nahatonijaria –onade. <sup>9</sup> Iapi Dio Atti dsodo naponicca ihimittapo naraha iadsa pina ponimassa nade. Najaro ima dsodo napojaropi: —Dsoqqueraha, nahatonihitohui –napojarode. <sup>10</sup> Nadsapi icca odsahuaji icadanide.

*Jesopa Maria Madarenahuajicadsa ahuatomajari*

*Maraco 16.9-11*

<sup>11</sup> Maria Madarenahuajiccapi nani Jeso noccobiri huapihuaji ibodsa oji oji najaro. Oji oji naneje odi bodihuaji tocattedsima najaro. <sup>12</sup> Nanaja Diocca dodosse tabaqqui memehujicca eterorideni nopopo taha pamidsadsa canahi nade. Jeso assire podsahijinedsa pamidsajari nade. Ohuahapa tatijinehuaji huittari, ohuahapa amorijinehuaji huittari najari. <sup>13</sup> Nadsapa Diocca dodosse tabaqquipa Mariadsa huati toquinajari: —¿Nejecotohui oji oji tajaro? —quinahi nade. Naraha Mariapi poni cacomerajaro: —Ohua Medsede dsojo ininemanajari. Amossi nadsa oji oji onajaro. ¿Nejecohujina ibamanahi? —nani nade.

<sup>14</sup> Najaro huati tehe jica, poni idenihuaji qqui tanaja Jeso hua canahi nade. Mariapi Jeso qqui taraha nocconi jidsa tajaro. <sup>15</sup> Naraha Jeso ponidsa huati tajari: —¿Nejecotohui oji oji tajaro? ¿Nejecotaritohui qqui qqui taridsajaro? —nani nade. Naraha Maria poni bodinipi: —Ajararipa ahujicca ahua mohue ppa nahi cacahuade itide —nani nade. Nadsapi pohuadsa huati tajaro: —¿Tiana aja dsoqquejari assire dsojo tininejari itide? Jehe tadsapi ¿nejecohuaji tinebonaja? Ohuana tohui occadsa dsojo onanihijine, onajaro —nani nade.

<sup>16</sup> Naraha manaco Jesopa ponidsa huati tajari: —¡Maria! —nani nade. Naneje pohuahujaji qqui napomadsa jodiodeni atti ebreodsa huati tajaro: —¡Raboni! —nani nade. (Ettidsapi: ohua Maride, najaro.) <sup>17</sup> Naraha Jeso attia ponidsa: —Ohua mari tidsana-jeraji. Occa Abihuaji occamacossani-jeraccani. Pina ticcanidsa ohuatti ohue-mecotedenidsa huati tinanina: “Jeso attipa: ‘Occa Abi Diohuaji occamacossanina. Najaripa ticcadeni Abi Dio’ napaja” tinanina —nani nade Jeso.

<sup>18</sup> Nadsapi Maria Madarenahuajicca toccanidsa pohua huatimadedenidsa bacco tanidsapi huati tajaro: —¡Ia Medsede qqui onapa! —nanijaro. Pocca ima naqui huati nanide.

*Jeso pohua huatimadedenidsaha ahuatonipojari (Tomas pohuadenidsa nohueracadsa)*

*Mateo 28.16-20; Maraco 16.14-18; Roca 24.36-49*

<sup>19</sup> Jeso nahatonihicca huada najaro dsomedsa pohua huatimadedeni iapi odsadsa iqueriqquijarode. Noccobiji ecossaridsade, jodiodenicca taminedeni noppine. Nadsapi jassi inahuajaniraha Jesopa nahi nocconidsa ahuatomadsa iadsa huati tade: —Nija, ticappinamana-jeraji. Diocca biquehera tiadenidsa tojana —nade Jeso. <sup>20</sup> Najaro huati taha jicadsapa pohua dsepe capamehecca perecojine nohue, pohua pparicca huahuajinajine nohue inade. Iapi ia Medsede pajissa qqui inadsapi etidsede. <sup>21</sup> Nadsapa Jeso huati tapomade: —Ticappinamana-jeraji. Diocca biquehera tiadenidsa tojana. Pina occa Abi ohua dosse naronajarissa najaro ohua naqui tiadeni dosse onaridsabaqquina —nade. <sup>22</sup> Nadsapa Jeso iahuaji jappo nadsa huati tade: —Dio Corimera ticajimanaji. <sup>23</sup> Dio Corime ticajimanadsa madijacca imasiridsa: “Epeje, eti ajimani” tiquinadsapi jicani. Dio naco najaricca imasiridsa huati ajamahi. Naraha madijacca imasiridsa: “Epeje, eti ajimani” tiquina-jeradsapi pocca imasiri jiquejerani. Dio naco najaricca imasiridsa huati ajama-jarajari —nade.

<sup>24</sup> Nadsapa Jeso huatimadedeni ia 12 inajaro ojariapa Tomas. Pohua tessedenipa pohuadsa: Baba quiquinanajari. Jeso ahuatonipodsapa Tomas iadsa nohueradsade. <sup>25</sup> Naraha dsotode Jeso huatimadedeni iapi Tomasdsa huati inade: —Maitta ia Medsede qqui inade —inaraha Tomas attipa: —Pohua dsepecca qqui onadsa odsepedsa perecojine odinidsa oro onadsana pajissa onanitohui. Pparicca toponi huahuajinajinedsa naqui odsepedsa oro onadsana pajissa onanitohui —nade Tomas.

*Jeso ahuatonipomajari (Tomas qqui tadsa)*

<sup>26</sup> Nadsapi huada 8 nani nattini Jeso huatimadedeni iqueriqquipomade. Nadsapa Tomas iadsama quejemade. Noccobiji ecossaridsaraha jassi inahuajanini nocconidsa Jeso ahuatopomade. Nadsapa iadsa huati tapomade: —Nija, tiadenidsa Diocca

jonehera tojaji -napomade Jeso. <sup>27</sup> Nadsapa Tomasdsa huati tade: —Tomas, odsepecca opparicca qqui taji. Tidsepedsa perecojine, huahuajinajine odinidsa oro taji -nade. —“Pajissa onejerani” tejeraji. Pina jehe taji -nade Jeso. <sup>28</sup> Nadsapa Tomas atti: —¡A, ohua Medsede, occa Dio! -nade. <sup>29</sup> Naraha manaco Jeso Tomasdsa huati tade: —Ohua qqui tinadsa pajissa tajaro. Madija ohuahapa ohua qqui toquina-jararaha ohuadsa pajissa quinajari. Najaridenidsana Diopa ima bicani inanaridsanitohui -nade Jeso.

*Ajijaro papeo dsodo onajaropi Jesodsa: —Pajissa, Dio Bedi -tiquinanijine*

<sup>30</sup> Nadsama ajijaropi Jeso huatimade ia imadiridsadsa Jeso canahato-huajapohui canaridsajaride —Pajissa, Dio Bedi -inanijinede. Aja canahatori canajaricca ima motapi huapi taraha ajijaro papeodsapi dsodo onejerani. <sup>31</sup> Nadsama ajijaro ojine papeodsa dsodo najarodsa naqui —Pajissa Jesopa Cristo-Mesia, Dio Bedi -tiquinanijine, onajaro. Pajissa tiquinadsapi ticassiejeranijine, onajaro.

## 21

*Jeso pohua huatimadedenidsa ahuatoni-pomajari*

<sup>1</sup> Dsotode naco dsama arobeni Carireacca coridsa onini Tiberia inididsa Jesopa pohua huatimadedeni iadsa ahuatoni-pomajaride. <sup>2</sup> Nanidsa iqueriqquijaropi Jeso pohua huatimade 7 inade. Ssino-Pedro, Tomas (pohua tessedeni pohuadsa: Baba quiquinanajari), Natanahé (dsama Carireacca odsa panani Canacca madija), Sebedeo bedi ohua, ocote Satiaco, denima Jeso pohua huatimade ohuaha pama nade. <sup>3</sup> Ssino-Pedropa: —Aba corode occana -nade. Naraha: —Ia naqui tiadsa jajiana -inade. Nadsapi jajedsippadsa canoa imenidsa jajedsade. Nadsapi najaro dsomedsa aba coro inaraha nohuerade.

<sup>4</sup> Nadsapi ssiajajonadsa Jeso ssiquidsa huahi qqui inaraha ssamoqquiri inade. <sup>5</sup> Naraha Jeso iadsa huahua nade: —Dsabissodeni ¿aba ticajimanaqui? -nade. Naraha: —Aba nohuerahi -inade. <sup>6</sup> Nadsapa Jeso attia: —Nani tibijideni nahatoni-huaji tajapa coro ticadsippamanaji -nade. Nadsapi Jeso attissa inanamanadsa tajapa coro icadsippadsapi aba ijijari. Joca icanimoraraha ipajira-jerade.

<sup>7</sup> Nadsapi ohuapi Jeso huatimade ohuadsana huati huana tajari. Ohuattia Pedrodsa: —¡A, najaripa ia Medsede! -onade pohuadsa. Nadsapa Ssino-Pedropa pocca etero bodiccadsara aba coro coro naridsaraha ohuatti mittadsapa huassinaja pocca etero huedsa, joppa, cojo nadsa ssiquihuaji cona tajaride. <sup>8</sup> Naraha Jeso huatimade mota iapi canoadsa jajjade. Tajapa abama ori icanade. (Ssiquipi huaji tejerade, pina 100 metrossa najarode.)

<sup>9</sup> Nadsapi ssiquidsa bacco inadsa jajjemoradsapi qqui inanaja pan aba naha dsippo jadari tanidsa huadsana nade. <sup>10</sup> Nadsapa Jeso atti: —Aba jidapana coro nahi mota teqqemoramanajo -nade. <sup>11</sup> Nadsapa Ssino-Pedro canoadsa toqquedsanidsa tajapa equidi, ssiquihuaji joca icanimorade. Tajapadsapa aba birirajari 153 naha tocahuajaride. Aba huapi taraha tajapapi tajoppi nejerade. <sup>12</sup> Nadsapa Jeso pohua huatimadedeni iadsa huahua nade: —Nija, tijipamanaji -nade. Naraha iapi: —¿Nejeco madija tijani? -inanitohuiraha huapima icappinaqquide. Naraha ibodidsapi: —Ia Medsede -inade. <sup>13</sup> Nadsapa Jeso ccajonajari, pan idi nadsa iadsa da inaridsade. Aba naco da inaridsade.

<sup>14</sup> Jesopa huatiaraha nahatonijari. Nahatonihí dsotodepa pohua huatimadedeni iadsa ahuatoni-jari. Dsotode ahuatoni-pomajari. Dsotode ajijaro imadsa iadsa ahuatoni-pomajari, nade.

*Jesopa Pedro pohua cacomerahijine huati huati tajari*

<sup>15</sup> Najaro ssiaja dsidsidsamassa ijipehe jicadsa Jesopa Ssino-Pedrodsa huati tade: —Ssino, Huano bedi tijani ¿tiana tibodidsa denima ohuadsa teti huana tajaroqui? ¿Titessedenipa ohuadsa poccadeni tohuati huanehe ajimani tojajaro tajaroqui? —nade. Nadsapa Pedro: —Jehe ohua Medsede, tiana nahato tinajaro tiadsa jipa onani —nade. Nadsapa Jeso Pedrodsa: —Nadsama occa edede bedi tititapabaqqui nana —nade.

<sup>16</sup> Naraha denima huati tapomade: —Ssino, Huano bedi tijani ¿tiapi ohuadsa teti huana tajaroqui? —napomade. Naraha Pedro huati tapomade: —Jehe ohua Medsede, tiana nahato tinajaro tiadsa jipa onani —nade. Nadsapa Jeso attia: —Nadsama occa edede tecahuabaqquina —nade.

<sup>17</sup> Naraha Jesopa pohuadsa huati tapomade: —Ssino, Huano bedi tijani ¿tiapi ohuadsa jipa tinajaroqui? —napomade. Jesopa Pedrodsa huati tajari, huati nimanijari, huati nimanipomajari nadsapa Pedro pohuadsa tocasserani nadsa bodi qquedsajari. Nadsapa pohua cacomerade: —Ohua Medsede tiana nahato tinehe jicajaro. Nahato tinajaro tiadsa jipa onani —nade. Nadsapa Jeso huati tade: —Occa edede tititapabaqqui nana, onajaro. (Aja Jeso atti nama najaripa “Occa madija mari mari titicanabaqqui nana” najari.) <sup>18</sup> Ohuapi pajissara tiadsa huati onajaro: Dsabisso tijadsapi ticca etero tedsadsa tia tohuini tanihuaji titicca naraha jadahi ticajadsapi tibiji da tadsa madija ohuahana ticca etero tia nehedsahitohui. Jipera tinaraha nani motta tia iaccamananitohui —nade Jeso. <sup>19</sup> Jeso ima huati tajaripa: —Pedro ajama nadsa dsoqquehitohui —najari. Pocca dsoqquehe nema nadsapi huapimadsa Diocca deni tojehe ahuato tanijine. Nadsapa Jeso attia: —¡Ohuadsa dissera tinaji! —nade Pedrodsa.

*Pedropa Jeso pohua huatimade pocca cacatidsecca imatohui huati tajari*

<sup>20</sup> Nadsapa Pedro pohua nattihuaji qqui naninaja, Jeso huatimade ohua pohuadeni natti occamissajarode. Ohuadsana Jeso huati huana tajari. (Ohuana ejete Pascoacca dsome tahideccadsa ijipaqquidsa Jeso inoridsa ohuittaridsa pohuadsa huati onajarode: —¿Nejecojarina tia ccaccorahijine? —onade Jesodsa.) <sup>21</sup> Nadsapa Pedro ohua qqui tadsapa Jesodsa huati tade: —Ohua Medsede ¿ajajaripa nejecoma napadsaja? —nade. <sup>22</sup> Naraha Jesopa: —Jipa onadsapi Huanopa ajijaro dsamadsa madi-dsanapohuipaja nadsa occanipomadsa naco madihipaja onanahitohuiraha najaropi ticca cacahuehe jerani. Ohuadsara dissera tinaji —nade Jeso Pedrodsa. <sup>23</sup> Nadsapi imecote huapimadsa ponima ima tojaridsajarode. —Jeso huatimade Huanopa huatia-jarahitohui —nanaridsamana najaride. Naraha Jeso attipa: —Dsoqque-jarana —najararaha, Jeso pohua attipa: —Jehe, jipa onadsapi Huanopa occanipomadsa madihipaja nahitohuiraha najaropi ticca cacahuehe jerani onajaroraha —najaride Jeso. Aja Jeso huati huati tajaripa ohua Huano occa ima.

*—Jeso tahimari dsodo onajaropi pajissa —najari Huano*

<sup>24</sup> Ajijaro ima nemanehipi pajissa. Jeso huatimade ohua qqui onajaro dsodo onajaro. Nadsama najaropi nahatoqquri inajaro. Najaropi pajissa. <sup>25</sup> Nadsama aji Jeso inahatoridsajaro naqui huapi taraha najaro motapi dsodo onejerani. Obodidsa ohuattipi najaro tohuatti huapima dsodo onehe jicadsapi papeo dsama huapima ijiridsanitohuiraha. Epejeni.

## **Jesocca dodosse tabaqqui tahimarideni**

### **Los Hechos de los Apóstoles**

Ajijaro imapi Roca dsodo inajaro. Rocapa doctoro. Puhuapa Jeso tahimari dsodo inapojaro. Najaro papeopi dsodode onidsa Roca, inajaro. Dsotodena Jesocca dodosse tabaqqui dsepedeni ijiridsamanajari tahimarideni dsodo inajaro. Jesodsa jehe quinajarideni tohuapi-dsanapojari tahimarideni naqui dsodo inajaro.

Rocapa Jesodsa ccaridsa-jararaha Jesocca dodosse Pablodsa ccaridsadsa Pablo tahimari, Jesocca dodosse tabaqqui ohuahadeni tahimarideni naqui dsodo inajaro. Puhadenidsa huati tadsa puhadeni tahimari mittajari. Ajijaro imapi Roca pohua tesse Teofirodsa dsodo inajaro, Jesocca dodosse tabaqqui tahimarideni nahato tahijine.

#### *Dio Corime madijadsa tojaridsahijine tahimari huati tapojari Jeso*

<sup>1-3</sup> ¿Nija Teofiro? Ohuapi Roca. Tiadsa Jesocristo tahimari dsodo onapojaro. Aja pohua dsepe ihiji najaricca ima dsodo, aja madija mari mari ihicanabaqqui najaricca ima dsodo onajonajaroa pohua toccamacossanihi bacco tajaropaji. Jesopa dsoqquedsa ppa idsamanaraha nahatonidsapa memehuaji toccamacossanijaraccadsa pocca dodosse tabaqquidsa aja pohua icattejidsa-baqquiipojaridenidsa ahahuatoni najari. Puhadenidsa madiridsapomaccajari. Jesodsana Dio Corime madidsa pocca dossenijicca ima puhadenidsa huati huati tataja najari. Pocca bejo naqui puhadenidsa nohue inadsapi: —Jehe, Jesopa pajissa assire madinipomajari –quinajari. Nadsapa huada 40 nehe puhadenidsa madiridsapomadsa naco Diocca cacahuehecca ima mari mari ihicanabaqqui najari.

<sup>4</sup> Nadsama pocca dodosse tabaqquidsa madiridsapomadsa naco ajijaro ima puhadenidsa huati tajari: —Jehe, aji odsa panani Jerosare tinebomana-jeraji. Occa Abi huati tapojaricca ima bicani pajissa tiadenidsa tojanijine tohuini timadimanaccaji. Najaro imapi tiadenidsa huati onapode. <sup>5</sup> Tahidedsama tibodideni cacajiqquimeradsapi: “Occa imasiri onebona” tiquinadsapi Huanopa passodsa tiadeni topa todsanabaqquiraha nidsa huada onihidsana Dio Puhua Corime tiadenidsa da inaridsadsapa tibodideni denima cacajiqquimeranitohui. Diopa tibodideni dsati inanaitohui –najari Jeso.

<sup>6</sup> Huada onihidsa Jesodsa queriqquipomadsapa pocca dodosse tabaqqui puhuadsa huati toquinajari: —Ia Medsede, maittaccadsama icca idideni Isaraeridenicca cacahuehe jicaporaha ¿jidapana tijine tojapomanijinequi? –quinajari. <sup>7</sup> Naraha Jeso puhadenidsa huati tajari: —Tettidenipi: “¿Nejecoma nadsa ia Isaraeridenicca cacahuehe tojapomapadseje?” ¿tiquinajaroqui? Naraha najaro imapi ticcadeni jerani. Abi Dio Puhua nahato tajari. Nidsa Puhua jipa tadsa ticcadeni cacahuehe tojapomanitohui. <sup>8</sup> Naraha Dio Corime ccajonabote nahi. Tibodidenidsa tojaridsadsana pocca dacorehe ticajimanaitohui. Nadsana otahimari maride tiquejenaridsanijine. Aji timadimananicca odsa panani Jerosaredsa maride tiquejena, ticcadeni dsama Jodeadsa maride tiquejena, Jodea inorinicca dsama Samariadsa maride tiquejena naridsanijine, onajaro. Aja dsama huaji tanicca madiridsamanajarideni naco huapima otahimari mittaridsamanahijine teccoraridsa-manana. Aji ohuadsa jai tijaridsadsa qqui tiquinajarocca ima, occa marinaja timittamanajarocca ima naqui mari ticanabaqquiridsana, onajaro –najari Jeso.

*Jeso Imehihuaji toccamacossanijari*



<sup>9</sup> Jeso pocca ima huati huati taha jicadsapa pohua huatimadedeni cattomama canaraha toccamacossanijari. Meme essenidsa tohuatorajari. <sup>10</sup> Nadsama Jeso pohua huatimadedeni memehuaji tocattamacossassa cananaja pohuadeni inoridsa maqquideje pamaha eterorideni nopoqquri naha ahuatomanajari. <sup>11</sup> Pohuadeni attipa ajama quinajari: —Aji dsama Carireacca madija ajidsa timadimanajarodeni ¿nejecotohui memehuaji ticattamacossassa canajaro? Aja Jesopa tiadenidsa madi-  
raha Dio idinimacossanijari, memehuaji madipomahijine. Aja toccamacossanihi qqui tiquinajaripa ccanipomadsa naco najarissa nahitohui. Meme essenima quejemaha namihuaji ccaronapomahitohui –quinajari.

<sup>12</sup> Nanaja Jesocca dodosse tabaqquipa ssono Oribodsa queriqquiraha: —Jina, Jerosarehuaji jaijedsippanina –quinajari. Aja pohuadeni jahidsippanihicca ssonopi Jerosaredda huajira tani, pina jassinajacca huadadsapi huajira tanidsa ccaridsade oppinera tani, quiquinanajari. <sup>13</sup> Nadsapa odsahuaji bacco nanimanadsapa odsa tetepihuajicca coba canahuajaninidsana jai tojamaronidsapa nahidsa madimanajari. Nahidsa madidepa: Pedro, Huano, Satiaco, Adiri, Feripe, Tomas, Batorome, Mateo, Arapeo bedi Satiaco, Ssino, pohuadsa romanodeni momohuade quiquinanajari, Satiaco bedi Joda quinajari. <sup>14</sup> Odsa tetepiccadsa madimanadsana huajijiradsa Diodsa huatide totoqueriqqui najari. Jeso imecotedeni, pohua imeni Maria, amoneje onihi naqui nahi pohuadenidsama Diodsa huatide totoqueriqqui najari.

### *Matia Jesocca dodosse tabaqquidsa tojjari*

<sup>15</sup> Nadsapa huada onihidsa Diodsa huatide queriqquipomajari. Madija 120 quinaha queriqquimanajari. Nadsapa Pedro totehemadsa pohuadenidsa huati tajari: <sup>16</sup> —Jehe ohuemecotedeni, Dio Atti dsodo naponiccapi pajissa tojjaro. Maittaccadsama Dio Corimepa tamine Dabidsa Jodacca ima ahuaato inanapodsa Dabi huati tapojari. Najaria aja Jodajine Jeso todsepe tojjaripaja. Najaroa aji ia qqui inajaropaji. <sup>17</sup> Jodapa Jeso icattadsapa pina aja iassa narahade. Pohua dsepe ijijari naco pina aji iccassa narahade. <sup>18</sup> Naraha Jodapa pocca tabaccorehe manaconi dsiniro cajjaridsa dsama mitta inajaro. Nahidsa pohua tatihuaji tohuedimadsapa assire sseo tajari, idsone naqui ccodo tadsapi dsoqquejari. <sup>19</sup> Nadsapa odsa panani Jerosarecca madija najaro ima mittamanadsapa pocca dsama icanacanimanajaro: Aseodama, quinajari. (Ettidsapi: Tohuemene pina sso tabaqquini nani, inajaro.) <sup>20</sup> Najaroa maittaccadsama tamine Dabi madidsa pocca jijiridsa Dio Atti dsodo inapojaro:

“Pocca dsama, pocca odsa naqui totabaccorana. Nahidsapa madide nohuerana”  
napohui nade.

Dabicca jijiri onihidsa naqui ajima naponi nade:

“Pohua dsepe ijijaripa madija ohuahana dsepe ijina” napohui nade –najari Pedro.

<sup>21</sup> —Nadsapa aja Joda dsepe ijjariccadsa madija ohuaha dsepe ijihijine qqui inana. Aja ia Medsede Jeso iadsa ccaridsadsa iadsama jahiridsajarideni ajadsa madimanahi.

<sup>22</sup> Najarideni ojaría ¿nejecojarina Huano Jeso passodsa topa idsanapohuidsama qqui najonajaria Jeso pohua toccamacossanihi qqui tajaritta? Najarina iadsama Jeso nahatonihí tahimari eccoraridsanijine, onajaro –najari Pedro.

<sup>23</sup> Nanaja Pedro atti mittamanadsapa madija pamaha onideni hua inabaqquimanageri: —Aja Dsodse, Matia quinajaridenina paja –quinajari. Dsodse oni ohuahapa Barsaba, oni ohuaha naco Justo quiquinanajari. <sup>24-25</sup> Nadsapa Diodsa huati toquinadsapa ajama quinajari: —Ia Medsede Dio, tiapi madija bodideni qquide nahatojide tijirani. Tiapi tetti ¿nejecoma nani? Ajadsa madija pamaha icattejidsa-baqquihi ¿nejecojaridsana jipa tinani? ¿Nejecojarina aja Joda dsepe ijjariccadsa tojjahijine? Jodapa imasiri inanadsa ia tonebobaqquidsa Dio Tijine pohua tedsejemacca ima tinanajoraponihuaji tojahi –quinajari. <sup>26</sup> Nadsapa pohuadeni pamahadsa: —¿Nejecojarina Joda dsepe ijjariccadsa tojjahijine? –quinadsa siba bedeni pamehe

idsabamanadsa: —Ajaropi Dsodsecca, ajaropi Matiacca –quinadsa dsaminidsa icodidsamana nadsa qqusedse qqusedse quinadsa ojarie ssonadsapi: —Matiana paja –quinajari. Nadsapa Matia Jesocca dodosse tabaqquidsa tojjari. Nadsapa 12 quinapomajari.

## 2

### *Dio Corime madijadsa tojaridsapojari*

<sup>1</sup> Nadsapi jodiodenicca ejete imenibote bacco tajaro. Ejete oninipi Pentecostes. Najaro huadadsa Jesodsa jehe quinajarideni queriqquimanajari. <sup>2</sup> Naraha amadsati memehuaaji mohuini pina jojode dacorajarossa nehe mittaronadsapi nani odsa bodihuaaji queriqquihidsa naqui jadsirema mohui tajaro. <sup>3</sup> Nadsapi pohuadenidsa pina jororonissa nehe ahuatomaridsajaro. Tojaribaqquidsapi pohuadenidsa cajororori naridsajaro. <sup>4</sup> Nadsapa pohuadeni bodidsa Dio Corime tojaridsahissa tadsapa Diocca nahatohue cajimanajari. Ojariapa tohuatti jidsa tajarodsa huati, ohuahapa tohuatti jidsa tajaro onihidsa huati, ohuahapa tohuatti onihidsa huati huati naridsamanajari. Dio Corimejine nama naridsamanajari huapima.

<sup>5</sup> Nadsapa jodiodeni Diodsa disseraqquri najarideni dsama onihicca, dsama onihicca nahi Jerosaredsa queriqquimanajari. <sup>6</sup> Najarideni huapima mohuini oppina tani mittamanadsapa domo ccajonajari. Amossinihuaaji queriqquijonamanajari. Nadsapa queriqquimanajarideni aja odsa bodicca huati huati toquinahi attideni mittamanajari. Tohuatti onihi, onihi cajiridsamanaraha poccadeni madija attideni jidsera neje camadsapa huajo canirejari. <sup>7-8</sup> Nadsapa aja odsa huapihuaaji domo huajari attidenia: —A... ¿Nejecotohui pohuadenipa dsama Carireahuajiccaraha tohuatti onihi, onihidsa huati huati toquinajari? Etti imittaridsaha –quinajari. <sup>9</sup> —Aji iqueriqquinidsapa Partohuajicca, Mediahuajicca, Eramihuajicca, Mesopotamihuaajicca, Jodeahuajicca, Capadosiahuaajicca, Pontohuajicca, Asia arobenihuaajicca, <sup>10</sup> Pirijiahuaajicca, Pafiriahuaajicca, Ejitohuajicca, Libia arobenihuaajicca odsa panani Sirene huajira tanidsa madimanajarideni naco mittamanajari. Nadsapa odsa panani Romahuajicca, <sup>11</sup> Cretahuajicca, Arabiahuaajicca naco mittamanajari. Motadenipa jodio madija pohuara, naraha motadenipa madija ohuaha jodio quejena-jararaha jodiodenicca marinajadsa toquejenajari. Iapi dsama huapimacca madija tedseje iquejemama canaraha ettidsa huati huati toquinajari: “Diopa bica tahi, canahatori canahi” quinajari. Diocca ima ettidsa huati huati toquinadsa imittapa –quinajari amossinidsa domo huajarideni attideni.

<sup>12</sup> Huapima jabojo quinadsapa imahaha canajari: —¿Nejecotohui nama quinajari? Iapi ¿nejecoma inapadseje? –quinajari. <sup>13</sup> Naraha madija motapa jidsa jidsa quinadsa: —Coma tanicca dse quinadsa noccodeni janoqquri nadsa mohua mohua camajari –quinajari.

### *Pedro jodiodenidsa huati tajari*

<sup>14</sup> Nadsapa aja Jesocca dodosse tabaqqui 11 quinajaridenidsa: —Noccodeni janoqquri najari –quinahi ima mittamanadsapa totehemamanadsa Pedrona jadsirema huati huati tajari: —Jehe ohuemecotedeni, Isaraeri potemahi jodio iquejenajarodeni, aji dsama Jodeahuajicca, dsama huaji tanicca madija aji odsa panani Jerosaredsa ejete qquide jai tijajonajarodenima pina ohuatti titaharibobo canaji. <sup>15</sup> Tettidenipi: “Noccodeni janoqquri najari” tiquinaraha iapi inocco janoraqquri nani. Maji huari dsatidsapa jodiodeni iapi inocco jano tanijine dsedse coma tanicca dse dse ihina nejerani –najari Pedro atti. <sup>16</sup> —Naraha aji timittamanajaropi maittaccadsama Dio Atti cacomerabote Johueo madipodsa dsodo inaponi nade.

Najaroa aji timittamanajaropaji. Najaroa aji qqui tiquinajaropaji. Diona Johueodsa huati tadsa dsodo inapojaro:

<sup>17</sup> “Ohua Dio Ohuattipi: Nidsa dsama jicanicca huada tohuajiradsapi Ocorime naqui madijadsa onanaridsanitoahui. Ticcadeni ejedeni dsabisso, dsohuato naqui Ohuatti ecomeraridsa-mananitoahui.

Dsabissodeni, jadahideni naco occa ima pajissacca pohuadenidsa nohue onadsapi poccadeni huadassa nadsa qqui qqui toquinahitoahui.

<sup>18</sup> Nema nadsapi aja ohuadsa iboraqquiri najarideni maqquidejedeni, amonejedeni naqui pohuadenidsa

Ocorime da onaridsadsana otahimari ecomeraridsa-mananitoahui. Ohuatti naqui huati iqquima-mananitoahui.

<sup>19</sup> Nidsa memehuaji ocanahatori canani qqui tiquinadsa naqui tijabojomananitoahui. Namihuaji occa dacorehe onanadsa naqui emenedeni toccaridsanitoahui.

Diji tani jororoni naqui jororo canaridsadsapi essen dacorehema toccamacossadsapi meme todsidsini nanitoahui.

<sup>20</sup> Maji ohuihitohui, abadsico naco tocamacohua pina tohuemenessa canahitoahui. Ohuapi tiadeni Medsede, occa huada deni tojanicca, denima bica tanicca bacco tejeraccadsapi najaro oppinehe huapima onanaridsaponitoahui.

Nadsana ohuadsa iboqquiri najarideni onajidsobaqquihitoahui. Ohuadsa iboraqquiri najaridenina onassiajabaqquihitoahui.

<sup>21</sup> Naraha aja madijapa: ‘Ohua Medsede, ohua naqui tiadsa ojanijine ohua tidiniji’ quinaridenina tocassiejerahitoahui”

nahi nade Dio Atti Johueo dsodo inapodsa –najari Pedro.

<sup>22-23</sup> Nadsapa denima huati huati tajari: —Jehe ohuemecote Isaraeri potemahi jodio iquejenajarodeni, ohuatti titaharibobo canaji. Aja Nasaretihuaicca Jesopa Djojine pajissa canahatori canahi qqui tiquinade. “Pohuapa pajissa Dio dosse inaronajari” titiquina nanijineraha tinanadsoqquemanajari. Naraha Abi Diopa tahide nahato tapojari: “Ajima nanitoahui” napojari: “Occa ejedeni madija tabaccoraqquiri najarideni dama quinadsa ahua porimacossanidsa inanadsoqque-manahitoahui” napohui nade. Najaro imaha aji ia imadidsa qqui inajaropaji. Tijinedeni najarossa tinanamanajaropaji. <sup>24</sup> Jesopa dsoqqueraha Djojine nahatonijari. Dsoqquehe comanipi pohuadsa mari dsanaraha Djojinena Jeso tappa inajari. Dsoqquehepi pohuadsa mari dsananijine ssamo tani. <sup>25</sup> Maittaccadsama tamine Dabi naco Jeso tahimari dsodo inapojaro. Pina Jeso attissa inanapodsa ima ajima najaro:

“Ohua Medsede Dio, otedsejema tia qqui qqui ohonanajaro. Ohuadsa ticcaridsadsapi ticca dacorehe ocajidsa ocappina-jerani.

<sup>26</sup> Nadsapi obodi huatidsedsa jiri jiri onajaro. Ohueme ohuassirema odsoqquenijine ocappina-jerani. Odsoqqueni nattinipi ima bicani tojanitoahui. Najarotohuira obodi huahuatoma najaro.

<sup>27</sup> Odsoqquedsa naqui ocorime dsoqquemanajari-pojaridenihuaji tinebo-jeranitoahui. Tijine ohueme naqui namidsa jadsijerani. ‘Ajaripa occa ejedeni bicabote’ tanitoahui.

<sup>28</sup> Aji camittehe imadi-dsanaponijinecca naqui ohua mari ticanajaro. Tiadsa omadidsapi ticca huatidsehe naqui ocajinitohui”

nahi nade Dabi dsodo inapodsa –najari Pedro.

<sup>29</sup> Nadsapa denima huati huati tajari: —Ohuemecotedeni, pajissara tiadenidsa huati onana. Tamine Dabipa maittaccadsama dsoqquedsapa ppa idsamanajari. Pohua noccobiri naqui jidapana ecahuamanani paji naccani. <sup>30</sup> Nadsama Dabipa Dio Atti cacomeraboteja najari nahato tapojari. Pohuadsa Dio huati tapodsapa: “Pajissara tiadsa huati onajaro. Tipotemani ojariapa tamine deni tojahicca tojahitoahui” napohui nade Dio. <sup>31</sup> Najarojine Dabi pina Jeso nahatonihii qqui tapojarissa nadsa huati

tapojari. Najaria aja Cristo-Mesia quiquinanajaripa “dsoqquedsa ppa idsamanaraha pohua ime jadsi-jeranitohui. Pohua corime naco dsoqquemana-pojaridenihuaji inebo-jarahitohui” napohui nade Dabi atti. <sup>32</sup> Najaria aja Jesocristo Djojine nahatonihii qqui inajaripaja. <sup>33</sup> Abi Dio Pohuajinea toccamacossanijaripaja. Najaria Djojine Jesocristo deni inanadsapa pohua attidsa madija huapima iboraqquiri nahijinepa Dio Pohua inori nahatonihuaji inahittarijaripaja. Diopa pina pohua huati tapojarissa najaro Pohua Corime Jesodsa da inajaropi manaco madijadsa da inaridsahijine. Nadsapa Jeso Dio Corime iahuaji dosse inaronajari. Najarijinena aji mohuini oppina tehe pina jojode dacorajarossa najaro timittamanajaro. Pina jororonissa najaro naqui qqui tiquinajaropaji. Pohua Corimejinea aji tohuatti onihidsa huati huati inadsa timittamanajaropajipa. <sup>34-35</sup> Naraha Dabipa memehujaji toccamacossa-jararaha ajaro ima dsodo inapojaro:

“Diopa Ohua Medsededsa huati tajari:

‘Ohuitori nahatonihuaji tittariji. Ohua tedsejepi tohuatti dacorajaro ticajiji.

Nidsa tia huadidedenipa ajamani onanabaqquihitohui. Poccadeni dacorehe onajican-  
itohui.

Nidsa ojinepa tiadsa attideni naco: Ohua Medsede, quinahitohui, onajaro’ ”  
nahi nade Dio –najari Pedro.

<sup>36</sup> —Jehe Isaraerideni huapima, tiadenidsa pajissara huati onajaro, tibodideni huatomaridsa-manaji. Jesopa tinanadsocquemanaaraha Djojine nahatonidsapa aja ia Medsede Cristo-Mesia tojaripaja –najari Pedro atti.

<sup>37</sup> Najaro ima mittamanadsapa jadsirema bodideni ocassera tadsa oji quinabote najari. Nadsapa Pedrodsa, Jesocca dodosse tabaqqi ohuahadenidsa naco huati toquinajari: —Jaho, imecotedeni, iana ¿nejecoma inapadseje? –quinajari.

<sup>38</sup> Nadsapa Pedro pohuadenidsa huati tajari: —Ticcadeni imasiri tinebomanaji, Diodsa tiquejenanijine. Nadsana Dio ticcadeni imasiri epeje inanadsapi totopa ticajimanani bica tani. Jesocristo onidsa totopa ticajimanaji. Nadsana Dio Pohua Corime tibodidenidsa tojaridsahijine. <sup>39</sup> Pina Dio Pohua huati tapojarissa najaro: “Ocorime tiadenidsa da onaridsanijine” napohui nade. Nadsapa tiadenidsa, ticcadeni ejedenidsa, tipotemanidenidsa naco Pohua Corime da inaridsahitohui. Aja dsama huaji tanicca madiridsamanajaridenidsa naco Pohua Corime da inaridsahitohui. Ia Medsede Dio huahua inabaqquijaridenidsana Pohua Corime da inaridsahitohui –najari Pedro.

<sup>40</sup> Nadsapa Pedro denima huati huati tajari. Pohua attidsa jehe quinahijine huatide dissera tajari: —Nidsa Diocca huadie tojadsapi pohuadsa iboqqi najarideni dsori tocanire-jarahitohui. Jicahitohui. Najaridenidsa tijimanani naji –najari Pedro.

<sup>41</sup> Pedro atti mittamanadsa jehe quinajaridenipa amadsati totopa cajimanajari. Najaro huadadsa denima Jesodsa toquejenahipa 3 mil quinajari.

<sup>42</sup> Nadsapa Jesocca dodosse tabaqqicca marinaja mittamana-dsanapojari. Huapima queriqquimanadsapa catidserara canajari, jijipacquimana najari, Jesodsa bodideni huatomahijine naco pan dside narihi jijipamana najari. Diodsa naco huati huati dsadsanapomana najari.

### *Jesodsa toquejenajaridenicca madie*

<sup>43</sup> Nadsapa Jesocca dodosse tabaqqidsa Diocca dacorehe bacco tadsapi naha-toqqi najari. Dio pocca nahatohue pohuadenidsa tojaridsadsapi aja madija comaqquiri najarideni naco ihinanomi-baqqumana najari. Nadsapa madija huapima Diocca dacorehe qqui toquinadsapa: —A, ima bicani tojaridsani –quinajari.

<sup>44</sup> Nadsama Jesodsa jehe quinajarideni bodideni pina ojariqqumanaadsapa pohuadeni dsepetaji, pohuadeni tapari naco pohuadeni tessedsa ahujaji da ahujaji da quiquinanajari. <sup>45</sup> Pohuadeni dsepetaji mota naqui manaconidsa da quinadsapi

dsiniro cacajimana najari. Najaro dsiniropi pohuadeni tesse cappiramanajaridenidsa da da quiquinanajari. <sup>46</sup> Diodsa dada toqquimahuaji naco jajahi tojedsima najari. Poccadeni odsahuaji naco ahuaji jipa, manaco ahuaji jipa nanaridsamana nadsapa bodideni pajissehema huatidsemaneri nanaja najaripaja. <sup>47</sup> —Abi Diopa bica tahi —quiquinanajari. Madija ohuahadeni naco aja Jesodsa jehe quinajarideni qqui toquinadsapa: —Bicaqquri nahi —quiquinanajari. Nadsapa ia Medsede Jeso pohuajine pohuadsa jehe quidsati denima tohuapija dsanapohui najari. Huada ssiaja madija ohuahadeni, huada ssiaja madija ohuahadeni dsanapomanajari: —Jesopa ohua tonassiajahi —quiquinanajari.

### 3

#### *Isso siri tobicahicca ima*

<sup>1</sup> Nadsapa huada onihidsa Pedro Huano tedseje Diodsa dada toqquimahuaji maji tohuenajonajari pina 3’dsa tohuededsimajari. Najari majidsa jodiodeni Diodsa huatide jajahi tojedsima najari. <sup>2</sup> Nahidsa maqquideje isso siri nama naha tossonahipa huittajari. Pocca madija huajijiradsa ihinequemana nadsa noccobiji onini Bicani quiquinanahi inorinidsa ihinahittamana najari. Nahihuaji madija jajahi tojeqquma nadsapa: —Ohuadsa da tiquinaji —tatacossa najari. <sup>3</sup> Nanaja isso siripa Pedro Huano tedseje huedajonahi qqui inabaqquijari. Bacco najonamanadsapa: —Jari, ohuadsa dsiniro da tiquinaji —najari pohuadenidsa. <sup>4</sup> Nadsapa isso siri qqui toquinadsapa Pedro pohuadsa huati tajari: —Jari, iahuaji qqui taji —najari. <sup>5</sup> Pohua bodi: —Ohuadsa dsiniro da quinanjine nitide —nadsapa pohuadenihuaji qqui najari. <sup>6</sup> Naraha Pedro attipa: —Ohuapi dsiniro ocappirani. ¡Nohuerani! Naraha Abi Diojine nahatohue ocajidsapi tia acco ocamanijine. Nasaretihujicca Jesocristo onima huati onajaro. ¡Titehemadsa ticcaridsaji! —najari. <sup>7</sup> Nadsapa Pedro isso siri dsepe nahatonihujicadsa dama nadsa joca imadsapa totehemajari. Diojine pohua amori, amori cocorini naqui tobicajaro. <sup>8</sup> Nanaja isso siri ccaridsahi tobicadsapa joppa joppa naridsajari. Nadsapa Pedrodenidsama Diodsa dada toqquimahuaji toqquedsimajari. Huatidseri nadsa joppa joppa nadsa: —¡Diopa bica tahi! ¡Diopa deni tojahi! —naridsajari. <sup>9</sup> Nadsapa Diodsa dada toqquima bodidsa ccaridsadsapa madija ohuahadeni qqui toquinajari. Diodsa huatidsehi naco mittamanajari. <sup>10</sup> Najaridenipa jabojo quinaraha huatidsemanajari. Attidenipa: —A, ajaria Noccobiji Bicani quiquinanahidsa dsinirotahui huihuittacossa naccade —quinajari.

#### *Pedro Portico de Saromods huati huati tajari*

<sup>11</sup> Naraha isso siri tobicahipa Pedro Huanodenidsa dissera tadsapa pohuadenidsa maridsanaja naridsajari. Aja Diodsa dada toqquimacca boroni inidihuaji tetepini cajini oninipi Portico de Saromo quiquinanahidsa isso siri tobicahi qquide huapima queriqquijari. Nanidsapi tetepini cajini oninipi Portico de Saromo quiquinanahidsa madijapa: —A... ¿nejecoma najari? —naridsamanajari. <sup>12</sup> Naraha Pedro madija queriqquihui qqui tadsapa pohuadenidsa huati tajari: —Ohuemecote Isaraerideni ¿nejecotohui ia cattade tiqueriqquijaro? Aja isso siri tobicadsa tibodidenipi: “Pohuadeni ehuerahi dacorehe cajimanajari. ¡Nahatoto tajariraha!” ¿tiquinajaroqui? “Aja pohuadenipa Diodsa bicaqquri nadsa isso siri inabicamanahi” ¿tiquinajarorane? Naraha ia ijine jarahi. Diojinena tobicajari —najari Pedro.

<sup>13</sup> —Icca Abi Diopa, icca idideni Abarahao, pohua bedi Isahaca, pohua bedi Jacobo quinajaridenicca Dio. Pohuajine isso siri tobicadsapa Pohua Bedi Jeso deni inana-jaripaja. Najari Jesoa tijinedeni todsepe tojajaride. Tamine Pirato attipa: “Jeso tappa onadsa toccanijine” naraha tiadenipi tettajomanadsa: “¡Ahua porimacossanidsa dsoqquena dsoqquena!” tiquinadsa dsoqquejaride —najari Pedro. <sup>14</sup> —Jesopa pohua



bodi ssiaja, pocca ima borocco taraha pohnadsa pajissa tiquinejeradsapi tamine Piratodsa huati tiquinajaro: “Barabana tappa tinajo” tiquinajarode, pohnapa toponi nanadsoqquederaha. <sup>15</sup> Tiadeni camittehe jinede tinanadsoqquemanaraha Djojine nahatonidsa Dio Pohnahuaji toccamacossanijaride. Iapi pajissa qqui inajaroa aji nahatoqquiri inajaropaji. <sup>16</sup> Najari Dio Bedi Jesocristo pohnajinena jidacca isso siri tobicajaripaja. Ia ettipi: “Jesopa pajissa canahatori canahi” inadsapi pohnana isso siri inabicaahi qqui tiquinajaripaja –najari Pedro.

<sup>17</sup> —Jehe occa madijadeni, tiadenidsa ohuattipi: “Tijinedeni Jeso dsoqquejari” onaraha tibodideni ssamoqquiri napodsa tinanadsoqquemanajari nahato onajaro. Diodsa dada toqquimade taminedeni naco bodideni ssamoqquiri nadsa Jeso inanadsoqque-manajaride. <sup>18</sup> Naraha Diopa madija Tonassijade tojahijine pohna icattejidsapojari ocasserani ahnadsa dsoqquehijine nahato tapojari. Maittaccadsama Pohna Atti cacomeraqquiri najaridenidsa naco Cristo-Mesia dsoqquehi tahimari huati tapodsa dsodo quinapojaro. Najaro imassa najaro toजारode, pina aji Dio huati tapojarissa najaro tinanamanajaropaji.

<sup>19</sup> —Najarojinea tiadenidsa ohuattipi: Jidapapi tibodideni cacajiqquimeraji, Diodsa tiquejenaji, onajaro. Nema tiquinadsapi Dio ticcadeni imasiri sse inanitohui. Nadsapa ia Medsede Dio tibodideni jassi tonanabaqquihitohui. <sup>20</sup> Pohna Bedi Jeso icattejidsapojaripa tiadenidsa dosse inaronapomahitohui. Najaria aja tiadeni Idinide Cristo-Mesia toजारipaja. <sup>21</sup> Jidapapa Jesocristo memehnaji madiccahi, naraha nidsa Dio Pohna jipa tadsa dosse inaronapomahitohui. Nadsana dsama huapima inabiquemaninitohui. Najaro ima naqui maittaccadsama Dio Atti cacomeraqquiri najarideni dsodo quinapojaro. <sup>22</sup> Najaro imapi Moisesi icca ididenidsa dsodo inapojaro:

“Ia Medsede Djojine icca madija ojaria Pohna Atti cacomerabote tojahitohui, pina ohuassa inanahitohui. Najari attidsapi ibobora tinaji. <sup>23</sup> Naraha pohna attidsa madija ibobo tajaripa Dio ettajobaqquihitohui. Pocca madija toquejenajarahitohui” napohui nade Moisesi.

<sup>24</sup> Nadsama Moisesi dsoqquehi natti Dio Atti cacomerabote Samohue naco najaro imassa najaro huati tajari. Aja Samohue dsoqquehi natti naco Dio Atti cacomeraqquiri najarideni huapima naco huati najonamanajari. <sup>25</sup> Nadsama tiadenipi najarideni potemahi tiquejenani. Poccadeni dsodoniji aji Dio huati tapojaricca ima bicani jidapana tiadenidsa toजारo. Diopa idideni tedseje jehe canirepojari naqui tiadenidsa toजारopaji. Aja idi Abarahodsa Dio Attipa:

“Tipotemani dsotodecca naco pohnajine ajijaro dsamacca madija huapimadsa ima bicani tojaridsanitohui”

napohui nade Dio. <sup>26</sup> Najaria Dio Pohna Bedi tahide tiadenidsa dosse inaronapodsa pina madijassa naha tossonajaripajade. ¿Nejecotohui Pohna Bedi aja namihnaji dosse inaronajari? Pohna Bedijine tiadeni huapima ima bicanihnaji tiquejenanijine, aja pohnapa tiadeni acca inahnajani-baqquidsapi aji ticcadeni imasiri tinebomananijine –najari Pedro pohna imecote Israeri potemahidenidsa.

## 4

### *Ima cattemadedenidsa Pedro Huano tedseje bajari*

<sup>1</sup> Nadsapa Pedro Huano tedseje ima huatide toquejenaccaraha dada toqquimade motadeni bacco najonamanajari. Dada toqquima cacahuededenicca tamine qquedsima, jodiodeni mota marinaja onini sadoseodsa jehe quinajarideni naco jahidsima najari. <sup>2</sup> Najaridenina Pedrodennidsa huadimanajari. Pedro pohnadenipa Jesocristojine madija tocassiejerahijine tahimari maride toquejenajari. —Jesopa dsoqqueraha Djojine nahatonijaride. Pohnajinepa madija naco nahatonimanahitohui

–quinahi mari icanabaqquiraha taminedenipa najaro imadsa jiperaqquiri nadsa huadimanajari. <sup>3</sup> Nadsapa Pedro dama, Huano dama quinadsa toponi cocorodsa cororo idsimamanajari. Nadsapa: —Maji toccahi, dsemassana imarideni icattemanijine –quinajari. <sup>4</sup> Naraha motadenipa Pedrodenijine Dio Atti mittamanadsa pajissa quinajari. Najarideni aja jehe quinapojarideni tedsejepa huapi tajari. Maqquideje pohuara 5 mil quinajari. Amonejedeni, ejedenidenipa huarahi.

<sup>5</sup> Huada ssiajapa imahaha canahijine jodiodeni taminedeni, ime jocohuideni, jodiodenicca marinaja maridedeni quinadsa Jerosaredsa queriqquimanajari. <sup>6</sup> Anasa naco nahi pohuadenidsama quejemajari. Pohuapa dada toqquimadedenicca tamine deni tojajari. Pohuapa taminedenicca tamine. Caipa naco nahidsa quejemajari. Pohuapa Anasadsa: Coco, najari. Anasa pohua imecotedeni naco nahidsa quejemamanajari. Ojaria onipa Huano, ohuaha onipa Arejadro, denima huapi taha nahidsa quejemamanajari. <sup>7</sup> Nadsapa Pedro Huano tedseje huedenadsa hueda-jonahijine tohuideni madija dosse quinajari. Nadsapa eccajonabaqqui-manadsa queriqquimanahi nocconidsa bajari. Nadsapa pohuadenidsa huati toquinajari: —Jari, toponi tonabicadepe ¿nejecohuajicca ticahatterajarotte? Ticcadeni nahatohuepi ¿nejecohuajicca ticajimanajarotte? Aja isso siri tinabicamanajaricca ima iadsa tecomeramanaji –quinajari taminedeni atti.

<sup>8</sup> Nadsapa Pedrodsa Dio Corime tojahissa tajarijine cappinera tadsa ecomerajaro: —Jehe taminedeni, ime jocohuideni, tiadenidsa huati onana. Titaharibobo canaji. <sup>9</sup> Tettidenipi: “¿Nejecoma tiquinadsa isso siri tinabicamanajaritta?” tiquinajaro. Tettideni onihi naqui: “¿Nejecohuajicca dacorehedsa toponi tonabicade ticahatterajarotte?” tiquinajaro. <sup>10</sup> Jehe, nadsama najaro imapi tiadenidsa huati onana. Ica madija Isaraerideni huapima naco bodideni nahatoqquiri nahijine huati onana. Iapi: “Pajissa Nasaretihuaajicca Jesocristo atti dacorani” inajaro. Pohua onima isso siridsa: “Titehemadsa ticcaridsaji” inadsapi Jesojine isso siri tonomijaripaja. Najaria aja tobicahi qqui tiquinajaripaja. Najari Jesopa tijinedeni ahua porimacossanidsa coba tidsanamanadsa dsoqqueraha Djojine nahatonijaripaja. Pohuajinea aji nahatohue icajjaropaji. <sup>11</sup> Najari Jesopa tettajomanaraha Djojine madija huapimadsa deni tojajari. Jeso tettajomanahipa pina ajijaro imassa najaro. Najaro imapi Dio Atti dsodo nanidsa ajima najaro:

“Odsa sibadsa icanahatomananijinepi nanahatodedenipa siba ojariepi ettajomanani nade.

Naraha dsotodepi najaro sibana odsa daco cajiranijine tojajaro.”

Jeso attidsa teribodeni sibaqquiri nadsapi najaro imassa tinanamanajaro. ¡Jesopa tettajomanaraha Djojine deni tojaripaja! <sup>12</sup> Madija ohuahapa icca imasiri inatapanijine nohuerahi. Diocca daniji Jesona ia Idinide ojarijari. Dsama huapimadsa madija ohuaha ia tonassiajabaqquihijine nohuerahi. Nidsaranibote Diocca huadie tojadsapi Jeso pohuana ia dsori tonanabaqquihijine ojarijari –najari Pedro.

<sup>13</sup> Nadsapa Pedro Huano tedseje pohuadeni cacomeramanadsa taminedenipa huajo caniredsa: —A ¿iadsa cappinenera tajarico? –quinajari. Pedrodenicca madie tahide nahatoqquiri nadsapa: —A, pohuadenipa pohuama madimanaccade. Moisesicca marinaja, Dio Atti cacomeraqquiri najaridenicca dsodonijidsa ssamomo taccade. Jeso huatimade toquejenadsapa tocahatterajari itidija –quinajari. <sup>14</sup> Nadsapa taminedeni Pedro Huano tedseje idsahuabaqqui-manahitohuiraha nahi inoridenidsapa isso siri tobicahi huahi paja nadsapa apaja quinajari. <sup>15</sup> Nadsapa Pedro, Huano, isso siri tobicahi quinadsa taminedeni dosse ininebaqqui-manajari. Nadsapa jai tojenahi nattidenipa pohuadenira imahaha canajari: <sup>16</sup> —¿Nejecoma inanabaqquihijine? Naraha pohuadenijine isso siri tobicaha. “Maidsehe” inejerana. Aja Jerosarecca madija huapima qqui toquinaja nahi –quinajari. <sup>17</sup> —Naraha Jeso tahimari denima

tojaridsa-jeranijine ajima inana: “Paji, tipamajonarana” inana, cappinamanahijine. Nadsana Jeso tahimari denima mari dsanapomana-jarahijine –quinajari taminedeni atti.

<sup>18</sup> Nadsapa Pedro, Huano, isso siri tobicahi quinajaridenitohui huahua quinapomajari. Jahidsimanipomadsa taminedeni pohuadenidsa huati toquinajari: —Epeje tiquinaji! Jesocristo tahimari mari maripi tinebomanaji –quinajari. <sup>19</sup> Naraha manaco Pedro Huano tedseje pohuadenidsa huahuatiti tajari: —Diopa tettideni mittahi. “Ettidsara ibobora tana” ¿tiquinajaroqui? Nema tiquinadsapi “Dio Atti tinebomanaji” tiquinajaro nitide –quinajari. —Jari, najaro ima tibodideni huatomamanaji. Tettideni nema tiquinadsapi ¿Diodsa bica tapadseje? <sup>20</sup> Naraha iapi Dio Attidsara dissessera inanitohui. Dio Atti ecomanijinepi jipepera inani. Aji ia qqui inajaro, ia imittajaro maride inebo-jeranitohui –quinajari Pedrodeni.

<sup>21-22</sup> Nadsapa taminedeni atti pohuadenidsa: —Paji tipamajonarana –quinajari. Denima jara inabaqquimanadsapa tappa inabaqquimanajari. Taminedenipa Pedro Huano tedseje inajidso-baqquimanahitohuiraha madijadeni noppine cappinamanajari. —Iadsa huadimanarana –quinajari. Aja Diocca canahatori canehejine isso siri tobicahi huapima qqui toquinadsapa: —Diopa bica tahi –quinaja nadsa taminedeni cappinamanajari. Nadsama isso siripa huajano huapi taha tonomi-jararaha huajanori 40 denima cajidsana tobicajari.

### *Diocca dacorehe cajimanahijine Pohuadsa huati toquinajari*

<sup>23</sup> Nadsapa taminedeni Pedro Huano tappa inabaqquimanadsapa tohuedanijari. Jesodsa jehe quinajaridenidsa bacco tanimanadsapa dada toqquimade tamine attideni huati, ime jocohui attideni huati tanimanajari. <sup>24</sup> Nadsapa najaro ima mittamanadsapa huapima Diodsa huatide toquejenajari. Poccadeni huatinajapi ojariqquijarossa nadsa Diodsa huati toquinajari: —Abi Dio nahatojide tijirani. Tiana meme tinahato, dsama tinahato, coridsa tinahato, huapima tinahatoridsajari –quinajari. <sup>25</sup> —Maittaccadsama naco icca ididenicca tamine Dabi aja ticca medse Ticorimejine bodi nahato tadsa ajijaro ima dsodo inapojaro:

“¿Nejecotohui madija ohuahadeni huapima huadiqquri najari?

¿Nejecotohui icca madija Isaraerideni naco tabaccorehe inanamananijine bodideni huahuatoma-mana najaritta?” napohui nade.

<sup>26</sup> “Aja dsama huapimacca taminedeni huadie inanamananijine toqueriqquidsa ia Medsede Diodsa jara jara quinajari.

Madija Tonassijade tojahijine Dio icattejidsapojaridsa naco jara jara quinajari” napohui nade Dabi.

<sup>27</sup> Najaro imassa najaro tojajarode. Aji Jerosaredsa queriqquimanadsa tamine Herode, tamine Ponsio-Pirato, dsama onihicca madija, icca madija Isaraerideni quinadsa naco ticca Ejedeni Bicabote inanadsoque-manahijine ima najoramana-jaride. Najaria aja Jeso tiadsa ibora tajari ticattejidsapojari, ia Tonassijade Cristo-Mesia tojahijineraha pohuadsa huadiqquri nade. <sup>28</sup> Abi Dio, Tettiipi Dabijine dsodo nani maittararaha taminedeni najarossa inanamanajaro –quinajari.

<sup>29</sup> —Jidapana naqui, ia Medsede Dio, ia qqui tinabaqquiji. Iadsa huadiqquri najari. Iapi ticca dodosse tabaqqi iquejenaraha iadsa jara jara quinahi. Nadsapi ticca dacorehera iadsa da taji, nani icappina-jeradsa tetti ecomeraridsanijine. <sup>30</sup> Nadsama ticca dacorehe iadsa tinanaridsadsapi comaqquri najarideni naco titinanomibaqqi najo. Ticca Ejedeni Bicabote Jesocristo oni deni tojahijine naco ticanahatoriri canaji, inajaro –quinajari Diodsa huati toquinadsa.

<sup>31</sup> Diodsa huatide jicadsapi najaro odsa jene jene canajaro. Nadsapa Dio Corime pohuadenidsa tojaridsahissa tajarijine cappinamana-jaradsa Dio Atti ecomeraridsamanajaro.

### *Huapima poccadeni ojariqqujari*

<sup>32</sup> Nadsapa Jesodsa jehe quinajarideni huapima poccadeni ima najarossa caniqquimeradsapa jehe canirere canajari. Puhuadeni dsepetaji naqui puhuadeni attipa: —Ohua mottacca -quina-jarajari. Todsepetaji, dsamatapa naco huapima poccadeni ojariqqujari. Najarossa nadsa puhuadeni dsepetaji dade accoraqquri najari. <sup>33</sup> Nadsama Jesocca dodosse tabaqqi puhuadenipa ia Medsede Jeso nahatonihii qqui toquinajaricca ima huati huati dsanapomanajari. Diocca dacorehejine attideni dacoradsapa taharibobo canajarideni bodidenidsa huana tajaro. Nadsapi Diocca huatidsehe, pocca tohuati huanehe naqui huapimadsa tojaridsajaro. <sup>34</sup> Nadsapa huapima cappiramana-jarajaripaja. Poccadeni dsama, odsa naqui cacajimameri najaria aji dsinirotohui da da quiquinanajari. <sup>35</sup> Najaro dsiniropi Jesocca dodosse tabaqquidsda da da quiquinanajaro. Nadsapa Jesocca dodosse tabaqquipa cappiranajaridenidsa da da ihigquimamana najaropaji.

<sup>36</sup> Nadsapa madija oni Dsdse naco najarossa najaro inanajaro. Puhuapa re-huitadeni. Dsama bedeni passo imenidsa huittidsacossani onini Sipredsa tossonajari. Jesocca dodosse tabaqqi pahuadsa: Bernabe, quiquinanajari. (Ettidsapi: Toponi nanahatidsede, inajaro.) <sup>37</sup> Bernabepa pohua madihicca dsama mota da inajaro dsinirotohui. Nadsapi pocca dsiniro Jesocca dodosse tabaqquidsda da inajaro.

## 5

### *Ananiapa bedimeni tadsajani ima inanamanajaro*

<sup>1</sup> Naraha madija ohuaha oni Ananiapa bedimeni Sapira tadsajani poccadeni dsama da quinajaro. <sup>2</sup> Najari madija bedimeni tadsajanipa poccadeni dsama manaconi dsiniro motapi puhuadenidsa eahuamanajaro. Ananiapa pohua motta dsiniro motara Jesocca dodosse tabaqquidsda dsojo idsimadsa puhuadenidsa da inajaro. Puhuadenidsa: —Aja, icca dsama manaconi dsiniro nemaneha -najari. Naraha maidsajari.

<sup>3</sup> Naraha Pedro pahuadsa huati tajari: —Anania ¿nejecotohui maidsehe jinede Satana attidsara ibora tinadsa Dio Corimedsa timaidsajaro? Ticca dsama manaconi motapi tinajimajaro. <sup>4</sup> ¿Ticca dsamapi ticca jeraqui? Ticca dsama da tinadsa ¿manaconi naqui ticca dsiniro jeraqui? Najaro dsiniropi ticcaraha ¿nejecotohui tibodidsa maidsehe tohuini tajaro? “Madija ocamaidsabaqquina” taraha Diodsana timaidsajaro -najari Pedro.

<sup>5</sup> Nadsapa Anania Pedro atti nama nahi mittadsapa huatiajari. Edima... bohua najari. Nadsapa Anania huatiahicca ima huapima mittamanadsapa cappinaridsamanajari. <sup>6</sup> Nadsapa najaro odsacca dsabisso madimanajarideni toتهمamana, Anania assire jore inaqquimanadsa dsojo ininemanajari, ppa idsamanahijine.

<sup>7</sup> Nadsapa maji 3 tossonigquimadsa Anania dsoqqueraha bedimeni ssamo tadsa ccajonajaro. <sup>8</sup> Nadsapa Pedro ponidsa huati tajari: —¿Ticcadeni dsama manaconipi dsiniro ajima nehe tiadenidsa da quinajaroqui? -najari. Nadsapi Sapira attini: —Jehe, manaconi najarossa nehe da quinade -najaro.

<sup>9</sup> Naraha Pedropa: —Jaho ¿nejecotohui Dio Corimedsa maidsadsa tinajaro? Tiadeni pamehe: “Dio Corime nattome inana, icca maidsehe qqui tajarahi” ¿tiquinajarorane? Jari, qqui taneje, ajacca jahinijaripa ticca maqqi ppade jahinijari. Nidsa tia naqui tia ppa idsamananijine tia dsojo quinanitohui -najari.

<sup>10</sup> Naneje Sapira naqui huatiadsa edima... bohua najaro. Dsabisso jahinidsa qqui toquinaneje huatiani poneje najaro. Nadsapi poni naqui dsabissodeni dsojo ininemanajaro, maqqi inoridsa ppa idsamananijine. <sup>11</sup> Nadsapa Jesodsa toquejenajaridenidsa oppinehe imeni tojjaro. Madija huapima ima mittamanadsapa Dio noppine cappina-ridsamanajari.

*Jesocca dodosse tabaqqipa canahatorimanana canajari*

<sup>12</sup> Nadsama Jesocca dodosse tabaqqipa Diocca dacorehe pohnadenidsa tojaridsadsapi nahatoqquri najari. Canahatorimanana canadsapa Jerosarecca madija qqui toquinajari. Aja Jesodsa toquejenajaridenipa Diodsa dada toqquima boroni inidi tetepini cajini Portico de Saromo quiquinanahidsa quequeriqquimana najari. <sup>13</sup> Naraha madija mota Jesodsa jehe quina-jarajaridenipa Jesocca madijadsa quejemamanahijine cappinaqquri naraha pohnadeni attipa: —Jesodsa jehe quinajaridenipa bicaqquri nahi –quinajari. <sup>14</sup> Nadsapa madija mota maqquideje amoneje quinaha ia Medsede Jesodsa jehe quidsati tohuapijari. <sup>15</sup> Nadsapa madija comaqquri najarideni huapima taborodenidsa dsojo dsojo icanajonamanajaripaja. Jahui inididsa pohnadeni taborodsa poporiri naridsajari. Pedro tedsejema: —Nidsa Pedro aja toqqueqquimadsa majidsa pohna corime pohna nahuine iadsa bacco tadsapi icanomirenitohui –quinajari. <sup>16</sup> Madija Jerosare huajira tanidsa madimanagerideni, odsa capamema najaro onihicca, onihicca naco bacco najonamanajari, comaqquri najarideni eccajona-baqquimanajari, madija bodidenidsa Satanacca dodosse tabaqqi tocorime cajimanajarideni naco eccajona-baqquimanajari. Nadsapa najarideni tocanomireridsajari, tocorimedeni naco jai tojenaridsajari.

*Jesocca dodosse tabaqqipa najidsohue inahanamanajaro*

<sup>17</sup> Naraha aja dada toqquimadedenicca tamine deni tojararipa pocca madija tedseje comaqquri najarideni tocanomirehi ima mittamanadsapa huadimanajari. Aja pohnadenipa marinaja onini sadosedsa jehe quinaja najari. <sup>18</sup> Najari pohnadenina soldado icadossebaqquidsas Jesocca dodosse tabaqqi itadamamanadsapa toponi cocorodsa hua idsimamanajari. <sup>19</sup> Naraha dsome nocconi tojadsa Diocca dodosse memehuaicca ahuatodsapa toponi cocorodsa noccobiji icatabojidsadsa iaqquenabaqquidsapa dosse inanibaqquijari. <sup>20</sup> —Jai tijaniji, Diodsa dada toqquimahuaji ima huati tinanimanaji. Madija huapima camittehe jiquejeranicca cajimanahijine ima mari ticanabaqquimanana –najari Diocca dodosse memehuaicca. <sup>21</sup> Nadsapa pohna attidsa iboraqquri nadsapa dsidsidsamassa Diodsa dada toqquimahuaji jai tojedsimadsa madija mari icanabaqquimanajari.

Naraha dada toqquimadedenicca tamine deni tojararipa pohnadsa queriqquimanajarideni naco Jesocca dodosse tabaqqi toponi cocorodsa jahininehi ssamoqquri naja najari. Nadsapa jodiodenicca ima cacattemadedeni deni toquejenajarideni queriqquimanahijine huahua inabaqquimanajari. Nadsapa dada toqquimadedeni mota, ime jochuideni mota naco, aja jodiodenicca marinaja maridedeni mota jahijonadsa queriqquimanajari. Nadsapa poccadeni medsedeni dosse inabaqquimanajari toponi cocorohuaji. —Jesocca dodosse tabaqqi teccanibaqqi-manajo –quinajari. <sup>22</sup> Nadsapa jai tojarari, toponi cocorohuaji bacco toquinadsa qqui toquinaraha Pedrodeni amossihuaaja najari. Nadsapa domo ccanidsa ima huati nanimanajari: <sup>23</sup> —Noccobijipi pico cadsacossanissa tani, bodicca noccobiji cacahuadedeni naco huahueri naridsahi. Icatabojsadsa jajedsimaraha Jesocca dodosse tabaqqipa nohue quirapa. Qqui inabaqqi-jarahi –nanimanajari. <sup>24</sup> Nadsapa dada toqquimade taminedeni, nahicca odsa cacahuadedenicca tamine tedseje najaro ima mittamanadsapa huajo canirejari. Imahaha canadsa: —Jaho ¿nejecoma quinajari? ¿Nejeco ima tojapadseje? –quinajari. <sup>25</sup> Nanaja ojarria qquedsimadsa taminedenidsa huati tajari: —Maitta toponi cocorodsa hua todsimajaripa Diodsa dada toqquimahuajina madija maride toquejenapa –najari. <sup>26</sup> Nanaja Diodsa dada toqquimacca odsa cacahuadedenicca tamine, pocca dodosse tabaqqi tedseje ima mittamanadsapa Jesocca dodosse tabaqqitohui jai tojarari. Bacco inabaqquimanadsapa mohuaradsa jina inanibaqquimanajari. Sibadsa pohnadeni iquinabaqquimanahi noppine cappinamanadsapa Jesocca dodosse tabaqqi inajidsobaqquimana-jarajari.



<sup>27</sup> Nadsapa ima cacatemadedeni queriqquimanahihuaji eccanibacqui-manadsapa dada toqquimadedenicca tamine deni tojajari pohuadenidsa huati huati tajari: <sup>28</sup> — Madija mari mari tinebomanaji, inade. Naraha ¿nejecotohui mari mari tinebomanajerajaro? Jidapapa aja Jerosarecca huapima ticcadeni marinaja tocahatteraridsahi. Tijinedeni najari madija emene toccajaricca ima iadsa ssonarini. Aji tettidenipi: “Jodiodenijine Jesocristopa dsoqquejari” titiquina naraha ettipi: “Ijine jarahi” inajaro –najari tamine deni tojajari atti.

<sup>29</sup> Nadsapa Jesocca dodosse tabaquipa tamine atti ecomeramanajari. Pedrona huati tajari: —Ia huapima Diocca madija iquejenadsapi tahidepi Pohuadsaha iboraqquri inanina bica tani, dsotodena madija attidsa iboraqquri inanijine. Naraha madijacca dossenijipi pina Diocca dossenijissa nejeradsapi Diocca dossenijidsara iboraqquri inanina bica tani. <sup>30</sup> Abi Diopa icca ididenicca Dio. Najarijinena Jeso nahatonijaripaja. Tijinedeni ahua porimacossanidsa dsoqquedsa ppa tidsamanaraha nahatonijari. <sup>31</sup> Diopa pocca dacorehe Jesodsa inanadsapi deni inanajaripaja. Dio Pohua inori nahatonihuaji Jeso inahittaridsapa Pohuajine madija huapimacca tamine tojajari. Dio Pohuajine madija Tonassiajade tojaripaja. Ia Isaraerideni Tonassiajade tojadsapa pohuajine ibodi cacajiqquimeradsapi Diodsa iquejenajaro. “Icca imasiri inebona” inadsapi Pohuapa icca imasiridsa: “Ohuati ajimani” najari. <sup>32</sup> Iapi Jeso tahimari nahato inadsapi pajissara huati inajaro. Aji inoccodsa qqui inajaro, eribodsa imittajarora tiadenidsa ecomeraridsajaro. Dio Corime naco nahato tajari pajissehera mari icanabaqqujari. Najaria aja Dio Pohua Attidsa iboraqquri najaridenidsa Pohua Corime da inaridsajari –najari Pedro, Jesocca dodosse tabaqqui tedseje.

<sup>33</sup> Nadsapa taminedeni najaro ima mittamanadsapa nacasseraqquri nadsa huadimanajari. —¡Jari, jicana! –quinajari. <sup>34</sup> Naraha ima cacatemadedeni queriqquimanahi ojaría totehemadsa pohua tessedenidsa huati tajari. Pohuapa Moisesicca marinaja mamaride, marinaja onini pariseodsa naco dissera tajari. Huapima pohuadsa: —Bica tahi –quiquinanajari. Pohua onipa Camarieo. Najari totehemadsa Jesocca dodosse tabaqqui amossinihuaji dosse imabaqqujari. <sup>35</sup> Nadsapa taminedenidsa huati tajari: —Paji, occa madija Isaraerideni. “¿Pohuadenidsa nejecoma inanijine?” tiquinadsapi mohuaradsa tibodideni huatoma-manaji. Ima tojarana. <sup>36</sup> Tibodideni huatoma-mananissa taji. Ajana, maittadsama onihima nadsa Teoda madicadsa pohua atti: “Ohuapi nahato onani” nanaja nadsapa madija 400 quinaha pohuadsa toquejenajaride. Naraha madijajine Teoda dsoqquedsa pocca madija tojaribaqquidsapa pocca ima jicaqquijarode –najari Camarieo atti taminedenidsa. <sup>37</sup> —Nahi dsotode madija onideni dsodode toquejenadsa naco Carireahuajicca Joda ccajonajari. Romanodeni mohua inabaqquimanahijine madija inaqueriqquiraha dsoqquedsapa tojaribaqqujari. <sup>38</sup> Nadsama tiadenidsa ohuattipi: Epejena, ajararidenipa tinebobaqquimanajo, onajaro. Poccadeni ima Diocca jeradsapi nidsa jcanitohui. <sup>39</sup> Naraha pohuadenipa Diocca dosseniji nitidija. Pajissa Diocca ima tojadsapi Diocca ima tinajicamananijine ssamo tani. ¡Paji! Diodsapi jaramana tiquinejeraji. ¡Poni! –najari Camarieo taminedenidsa huati huati tadsa.

<sup>40</sup> Nadsapa Camarieo atti mittamanadsapa apaja quinadsa Jesocca dodosse tabaqqui jahidsimanihijine huahua quinajari. Nadsapa itacossimanadsa ipodeni da inabaqquimanajari. —Jidapapi Jesocristo tahimari mari maripi tinebomanaji –quinadsapa dosse inanibaqquimanajari. <sup>41</sup> Naraha Jesocca dodosse tabaquipa ima cacatemadedeni queriqquimanahidsa jai tojenadsapa huatidsemaneri toninem-anajari. Jeso onidsa toquejenarijine najidsohue inahanamananijine pajiramanahi Dio nahato tapojarijine najidsohue ecossa-jerajaro. <sup>42</sup> Nadsapa huajijiradsa maride toquejena-dsanapojari. Diodsa dada toqquimahuaji maride toquejena, poccadeni odsahuaji naco maride toquejena dsanapomanajari. —Ia Medsede Cristo-Mesiatohui

imadjaropi aja Jesocristopaja. Pohnadsa pajissa tiquinadsapi ticassiejeranijine –quinajari Jesocca dodosse tabaqqui attideni.

## 6

### *Dsamatapa dadadedeni 7 quinaha onideni hua inabaquimanajari*

<sup>1</sup> Jehe, nahidsapa Jesodsa jehe quinajarideni denima tohuapija dsanapohui naraha pohnadenijine ima bica tejerajaro. Pohnadeni huapimapa jodiodeni. Motapa dsama Cresiacca madija attideni nahatoqquri najari, motapa pohnadeni attira nahatoqquri najari. Pohnadeni atti oninipi: ebreo. Nadsapa dsama Cresiacca tohuatti nahatoqquri najaridenipa atti atti quinajari: —Aja dsamatapa inatas-saqquimanajaripa cappiramanajarodenidsa da quinahissa tajarajari –quinajari. — Icca madija tabira tocajamanajarodenidsa dsamatapa ajamani da da quiquinanajari. Naraha jodiodeni pohnadeni atti ebreo nahatoqquri najaridenicca madija tabira tocajamanajarodsana dsamatapa denima da da quiquinanajari –quinajari. <sup>2</sup> Nadsapa Jesocca dodosse tabaqqui 12 quinajarideni najaro imadsa jiperaqquri nadsa Jesodsa jehe quinajaridenitohui huahua quinajari, ima cattemade queriqquimanahijine. Jehe quinajarideni queriqquimanadsapa pohnadenidsa huati toquinajari: —Ia dsamatapa dade iquejenadsapi Dio Atti mari inanissa tejerarana –quinajari. <sup>3</sup> —Nadsapa dsamatapa dade toquejenahijine madija 7 quinaha ticattejidsabaquimanajo. Pohnadenipa Dio Corimecca dacorehe cajimanajari. Bicaqquri, bodideni nahatoqquri najaridenira dsamatapadsa dsepedeni ijimanahijine qqui tinabaquimanajo. Iadsa teccajonabaquimanadsapa huapima qqui toquinadsa pohnadenidsa: “Jehe, dsamatapa dade tiquejenana” inanijine –quinajari. <sup>4</sup> —Nadsapi iana Diodsara huati huati idsanaponijine. Dio Atti naqui mari mari ihicanabaqqui nahijine, inajaro –quinajari Jesocca dodosse tabaqqui.

<sup>5</sup> Nadsapa huapima: —Jehe, bica tani –quinadsapa dsamatapa dadade toquejenahijine icattejidsabaquimanajari. Onidenipa: Esteba, Feripe, Procoro, Nicano, Timao, Paomena, Nicora quinajari. Estebapa Jesodsa jehe nahissa dsanapojari, Dio Corimecca dacorehe naco cajijari. Nicorapa odsa panani Atioquiacca madija jodio jararaha jodiodenicca marinajadsa tojapojari. <sup>6</sup> Nadsapa aja icattejidsabaquimanajaripa Jesocca dodosse tabaqqui 12 quinajaridenidsa eccajonabaquimanajari. Nadsapa Jesocca dodosse tabaqqui baccohuaaji domo huadsa dsamatapa dadade toquejenahijine pohnadenidsa bara quinadsa Diodsa huati toquinajari. — Jehe Abi Dio, ajararideni dsamatapa dadade toquejenahijine pohnadeni acco ticamabaquina –quinajari. Nama quinadsapa aja Jesocca dodosse tabaqqui attidenipa: —Jehe, jidapapi najaro tarabadsa pohnadenidsa tojani –quinajari.

<sup>7</sup> Nadsapi Dio Atti tojaribaqquijaro. Odsa panani Jerosarecca madija Jesodsa jehe quinajari tohuapijari. Dada toqquimadedeni naco Jesodsa jehe quinahi huapi tajari.

### *Esteba*

<sup>8</sup> Estebapa Diocca tohuati huanehe caji, Diocca dacorehe naqui caji nadsapa canahatori canajari. Madija huapima Esteba canahatori canahi qqui qqui dsanapomanajari. <sup>9</sup> Naraha jodiodeni motapa Esteba tedseje ahuaji huati ahuaji huati quinajari. Nahi Jerosaredda pohnadeni quequeriqquimana nahihuaajicca oninipi: Medse toquejenaporaha tappa tabaqquihicca icanacanimanajaro. Pohnadenipa odsa Sirenecca, odsa Arejadriacca, dsama Ciliciahuaajicca, dsama Asiahuaajicca quinajari. <sup>10</sup> Najaridenipa Esteba tedseje ahuaji huati ahuaji huati quinaraha deni toquejenajarahi. Dio Corimejine Estebapa nahato tajari, atti bica tajari. <sup>11</sup> Nadsapa pohnadeni atti ajimani tojadsa Estebadsa huadimanadsapa ima inanaridsamananijine cacomehedsa madija ohuahadeni paca inabaquimanajari. Pohnadenidsa: —Ajima tiquinaji

–quinajari. —Esteba atti imittadsapi pohua atti tabaccora tadsa Moisesicca marinajadsa tatamasso najari. Diodsa tatamasso nahi naco imittani, tiquinana –quinajari. <sup>12</sup> Nadsapa imasiri huahuatidedeni jai tojaridsadsapa najaro ima madija huapimadsa huati naridsamanajari. Ime jocohuidenidsa, jodiodenicca marinaja maridedenidsa naco huati toquinajari. Nadsapa huadimanadsa domo ccajonajari, Esteba dama quinadsapa jodiodenicca ima cacattemadedeni deni toquejenajaridenihuaji iacca-manajari, ipo da quinahijine. <sup>13</sup> Nahihuaji Estebadsa huadimanajaridenipa madija ohuahadeni maidsehe huati toquinahijine qqui inabaqqui-manapomajari. Najarideni attidenipa: —Aja Estebapa Diodsa dada toqquimadsa Moisesicca marinajadsa naco atti tabaccora tadsa huati huati tajari –quinajari. <sup>14</sup> —Ima onihi naqui huati tadsa imittajaro, aja Nasaretihuajicca Jeso attipa ajima nani najari: “Diodsa dada toqquimapi madijadenijine canahatoraha ocatabona” nanaja najari. “Jodiodenicca madie tahidecca aji Moisesi icca idideni mari icanabaqquipojaricca ima naqui ojine cacajiqquimerana” nanaja najari –quinajari, maidsamanadsa.

<sup>15</sup> Nadsapa aja ima cacattemadedeni, Estebadsa huadimanajarideni naco huapima Esteba icattomamana nadsapa pohua pano todsibehia, pina Diocca dodosse memehujicca panossa nahi qqui toquinajari.

## 7

<sup>1</sup> Nadsapa dada toqquimadedenicca tamine deni tojajaripa Estebadsa huati tajari: —Aja madija huati toquinajari attidenipa ¿pajissaqui? –najari.

<sup>2</sup> Nadsapa Esteba huati tajari: —Ohuemecotedeni, taminedeni tedseje, titaharibobo canaji, occa ima huati onana –najari. —Icca Abi Dio Bicabote deni tojajari pahuapa icca idi Abarahaodsa ahuatopojari. Aja Abarahaopa Mesopotamiadsa madiccadsa odsa panani Aranahuaji tocca-jaraccadsa Dio pahuadsa huati tajari. <sup>3</sup> Pohua attipa: “Jari, ticca dsama tinebo, ticca madija tinebobaqqui najo. Dsama onihi tia dsopi ocanadsa nanihuaji ticcaji, nanidsana timadinijine” najari Dio. <sup>4</sup> Nadsapa Abarahao caldeadenicca dsama Mesopotamiadsa madiporaha inebodsa odsa panani Aranahuaji toccajari. Bacco tadsapa nahidsana madijari. Nahidsa pocca abi Tera dsoqquedsapa odsa panani Arana inebodsa aji icca dsamahuaji Dio Abarahao dosse inajonajari –najari Esteba. <sup>5</sup> —Naraha Abarahao ahujari bacco nadsapa pohua madihijinecca dsama Dio pahuadsa da inejeraccani. Madija ohuahadenicca dsamadsa madicajari. Ejedeni naco cappiraccajari. Naraha Dio Attipa ajama najari: “Abarahao, nidsa dsotode ajijaro dsamapi ticca dsama tojanijine, tipotemanicca naqui tojanijine” najari. <sup>6</sup> Ima onihi naqui Abarahaodsa Dio huati tajari: “Nidsa tipotemani naco dsama onihidsa madiridsamanahitohui. Najaro dsamadsa madiridsamanadsapa nahicca madijacca dodosse toquejenahitohui. Pahuadeni dossededenidsa tarabaidsa dsanapomanadsapa huajano 400 naha nanajidso toquejena-dsanapoccahitohui” nahi nade Dio. <sup>7</sup> “Naraha ticcadeni madija nanajidsodedenipa manaco Ohuana onajidsobaqquihitohui. Tipotemani najaro dsamadsa ojine jahininedsapa ajijaro dsamadsa bacco najonamanahitohui. Nadsapa ajijaro dsamadsa Ohuattidsa iboraqquiri nadsapa Ohuadsa huahuatidsemana nahitohui” nahi nade Dio Abarahaodsa –najari Esteba. <sup>8</sup> —Diopa Abarahao tedseje jehe canirejari. Najaro jehe canirenijipi Abarahaocca madija Dio Pahuadsa toquejenahi ahuatopquiri nahijine Diopa Abarahao icadossejari. Pohua Attipa: “Abarahao, tia, ticca madijama occa madija tiquejenani ahuatotanjinepi huissinaja ticajimanana” najari. Nadsapa pohua bedi Isahaca tossonadsapa huadari 8 nadsa imehijine Diocca tojahi ahuatotahijinecca huissinaja cajijari. Dsotode naco Isahaca pohua bedi Jacobo tossonadsa najari naco huissinaja cajijari. Jacobo bedi 12 quinajarideni naco huissinaja cajimanajari. ¡Najaridenipa ia Isaraeri potemahideni icca idideni paja! –najari Esteba.

<sup>9</sup> —Aja icca idideni Jacobo bedidenipa pohuadeni ohuaha Josedsa huahuadimana najari. Nadsapa huadiedsa da quinajaripaja. Da quinadsapa aja mitta quinajari-denina dsama Ejitohuaji iaccamanajari. Naraha Diopa Jose ecahuajari. <sup>10</sup> Jose tossiajadsapa Diojine pohuadsa ocassera tanicca jicajaro. Diojine naco Jose nahato tajari, pohua atti naco bica tajari. Nadsapa Ejitodenicca tamine Diojine Josedsa huati huana tajari. Najari tamedesa: Paraho, quiquinanajari. (Ettidsapi: tamine, inajaro.) Nadsapa Parahojine Josepa Ejitocca dsama cacahuade tojajari. Parahocca odsa naqui ecahua, pohua dsepetaji ecahua, pocca dodosse tabaqqi naco ecahuabaqqijari –najari Esteba.

<sup>11</sup> —Nadsapi Ejitohuaji pemi tojajaro. Jacobocca dsama Canahahuaji naqui najarossa najaro. Nadsapa huapima pemijine ocasserani ahumanadsapa oji quinajari. Najaria aja icca idideni dsamatapa cappiramanadsa pemimanajaripaja quinade. <sup>12</sup> Naraha Jacobo “Ejitohuaji dsamatapa huemahi” quinahi mittadsapa nahihuaji pohua bedideni aja icca idideni dosse inabaqqijari. Jai tojadsapa dsamatapa mitta quinadsa eccanimanajari. <sup>13</sup> Naraha Ejitohuaji dsamatapa mittade jai tojapomadsana Jose pohua cacomerajaripaja: “Ohuapi ticcadeni eso ojani” nahi nade Jose ohuahadenidsa. Nadsana tamine Paraho Josecca madija tahimarideni mittajari. <sup>14</sup> Nadsapa Jose pohua ohuahadeni dosse inanabaqqijari: “Occa abi, pocca madijama teccajonabaqquimanana, ajidsa timadimananjine” nahi nade. Nadsapa Jacobo pocca madija 75 quinajarideni Ejitohuaji jai tojajari quinade. <sup>15</sup> Najaria Jacobo pocca madijama Ejitohuaji toccajaripaja, madimanahijine. Nadsapa nahidsana Jacobo huatajari, pohua bedideni aja icca idideni naco nahidsana jicajari. <sup>16</sup> Potemahidenipa biridideni assiredeni jadsimana-jarahijineccadsa huira quinadsapa ecahuabaqquimanajari. Nahi dsotode huajano huapi tadsana ppa idsabaqquimanahijine odsa panani Siquemehuaji iaccanibaqqi-manajari. Nanihuaji maittaccadsama poccadeni idi Abarahaona Amoro bedidenidsa dsama mitta inapojaro, tonoccobirijine quinade. Nanidsana siba odini hui todsanidsa biridideni hua idsaridsamanajari quinade –najari Esteba.

<sup>17</sup> —Maittaccadsama aja Abarahao madidsama Dio Attipa pohuadsa: “Ajijaro dsamapi tipotemanicca tojanijine” napohui nade. Dio huati tapojaricca tohuajirabote nadsa icca madija Isaraeridenia nahi Ejitohuaji tohuapijaripaja quinade. <sup>18</sup> Naraha huajano huapi taha tossoqquimadsa Ejitocca tamine ohuaha tojajaripa pina tamine tahideccassa najarajari. Aja Jose naco dsoqquedsapa tamine tojedsatipa Josecca ima ssamo tajari. <sup>19</sup> Najari taminepa icca idideni ihicamaisabaqqi najari, ihinajidsobaqqi nanaja najari quinade. Pohua atti naco: “Aja maqquideje bedi tossoadsapa titinebomana najo, jicahijine. Nadsana tohuapi-jarahijine” nanaja nahi nade Ejitocca tamine atti –najari Esteba.

<sup>20</sup> —Nadsama najari tamine madidsa Moisesi tossoajari. Ejedeni tojapodsama Diopa pohuadsa huati huana tajari. Imehipa bedimeni tadsajani poccadeni ejedeni abadsico 3 canaha odsadsa inajimamanajari, dsoqquehi noppine. <sup>21</sup> Nahi dsotodepa huani inidihuaji quiquidsa pods nadsa icanebomanajari. Naraha tamine Paraho bedenina qqii inadsapa dsojo inanijari, inanapihijine. Pina ponicca ejedenissa inanajari. <sup>22</sup> Najari Moisesi napidsapa pina Ejitocca madijassa najari. Pohua mari icanamanadsapa Ejitocca tohuattehe huapima tohuattajari. Nadsapa huatide nahato, dsepe ijihii naco nahatojide rajaripaja. <sup>23</sup> Najaria aja Moisesi pocca huajano 40 bacco tadsana pohua bodipa: “Occa madija Isaraerideni qquide occaridsana” najari nade. <sup>24</sup> Nadsapa Moisesi qquide ccaridsadsa Ejitocca madija Isaraeri dsabisso inajidsohui qqii tajari. Isaraeri dsabisso ima cappiraraha inajidsodsapa Moisesi: “A, occa madija acco ocamana” nadsa Moisesipa Ejitocca madija inanadsoqquejari. <sup>25</sup> Aja Moisesi pohua bodipa: “Jidapanana occa madija nahatoqquri nahi. Ohuapi occa



madija Isaraerideni nanajidso toquejenadsanapo-jarahijine Dio ohua cadossejari” najari nade. Naraha pocca madijapa poadsa ssamoqquiri najari. <sup>26</sup> Huada ssiajadsa Moisesi toccapomadsa naco Isaraerideni pamaha poadenira cahadirehi qqui tajari. Nadsapa cahadire-jarahijine: “Onajonebaqquina” najari. Nadsapa poadenidsa huati tajari: “Epeje tiquinaji. Tiadenipi tia tiadeniraraha ¿nejecotohui ticanajidsorejaro?” najari Moisesi. <sup>27</sup> Naraha nanajidsode huadidsapa Moisesi cco inacossajari. “¿Nejecojari tia cadossedsa ia huatide ticcajonajaro? ¿Tiapi icca tamine tijajarorane?” najari. <sup>28</sup> “¿Tiapi ohua tinanadsogguenijinequi? ¿Pina maitta Ejitocca madija tinanadsogquejarissa onanijinequi?” nahi nade nanajidsode atti. <sup>29</sup> Nadsapa: “Ejitocca madija tinanadsogquejari” nahi ima Moisesi mittadsapa cappinadsa joppa tajari. Dsama onini Madianahuaji madihijine toccajari. Nahicca madijapa pocca madija quejena-jararaha poadenidsa madidsapa amoneje cajijari. Ejedeni naco maqqui pamaha cajijari –najari Esteba.

<sup>30</sup> —Nahi madianadenicca dsamadsa huajano 40 naha madijari. Najaro dsama huamonihuajicca ssono oninipi Sinahi. Nahi adami huajira tanidsa ccaridsadsapa ahua bedeni poni ehuerani diji tani qqui tajari. Nani ahua diji tani bodidsa Diocca dodosse memehujicca ahuatohui qqui tajari. <sup>31</sup> Nadsapa Moisesi jabojo najari: “¿Nejecotohui nema najaro?” najari. Nadsapa qquide tohuajiresidsa ia Medsede Dio Atti mittajari: <sup>32</sup> “Ohuapi Dio. Ticca idideni Abarahao, pohua bedi Isahaca, pohua bedi Jacobo quinajaridenicca Dio ojani” nahi nade Moisesidsa. Nadsapa Moisesi jororo cananihuaji atti mittadsapa cappinajari. Tacca-cca canadsapa jororo cananihuaji qqui nimani-jaraha nade –najari Esteba.

<sup>33</sup> —Nadsapa ia Medsede poadsa huati tajari: “Ohuadsa: ‘Deni tijani’ tadsapi temoricca sadaria ssititi ticanajo. Aji tenihuajipi ssiqqi bica tajaro. Ajidsapi Ohua ohuajaro” najari Moisesidsa. <sup>34</sup> “Occa madija Isaraeridenipa Ejitodenijine nanajidso toquejenahi qqui onani, bodideni oji quinahi naco ohomitta nani. Najaroa aji occaronajaropaji, occa madija odinibaqquihijine, onadsa. Ejitodenicca najidsohue inahanamanadsanapo-jeraniijine, onajaro. Jari, ticcaniji. Ejitohuaji tia dosse onanina” nahi nade Moisesidsa –najari Esteba.

<sup>35</sup> —Tahidepa Isaraerideni Moisesi ettajomanadsapa: “¿Tiapi icca tamine tijajarorane?” quinaporaha Diopa Moisesi Isaraeridenicca tamine tojahijine tohui incomajari. Moisesi pocca madija idinibaqquihijine Dio poadsa huahua najari. Aji ahua bedeni diji tehe jororo canani bodidsa Diocca dodosse memehujicca ahuatodsa Diopa Moisesi pocca madijahuaji dosse inanijaripaja. <sup>36</sup> Moisesipa icca idideni Ejitohuaji eqquenabaqquijari. Pahuapa Diocca nahatohue cajija nadsa canahatori canaridsajari. Aja tahide Ejitodsa canahatori canajari, dsotodepa aji coridsa imeni oninipi Macconi quinahidsa naco canahatori canajari. Dsotode aji dsama huamonihuaji huajano 40 naha eccaridsa-baqquidsa naco Moisesipa canahatori canaridsajari. <sup>37</sup> Icca idideni Isaraeridenidsa ajama napojari: “Nidsa Diojine icca madija ojaría Pohua Atti cacomerabote tojahitohui, pina ohuassa inahanitohui” nahi nade. <sup>38</sup> Moisesi naco pocca madija aja icca idideni Isaraerideni tedseje madija madide nohuerahihuaji madiridsamanajari. Pohua naco Dio Atti mittade ssono Sinahihuaji toqquemorajari. Nahi ssonodsana Diocca dodosse memehujicca atti mittadsa icca ididenidsa huati iqquimajaro. Najaropi Dio Atti iadsa camittehe da inanijinecca. Najaro ima iadsa bacco najonajaropaji –najari Esteba.

<sup>39</sup> —Naraha icca ididenipa Moisesi attidsa iboqquri najari. Moisesi ssonohuaji Dio Attitohui toqquemoradsa nattipa poadsa huattajoqquri najari. Bodidenidsapa: “Ejitohuaji imadiniccaraho” quinajari nade. <sup>40</sup> Nadsapa Moisesi ohuaha Araodsa huati toquinajari: “Jari, ia cacahuade icajinijine corime tinahatoridsajo, inajaro. Najaridenina itedsejema ia tocanahatobaqquidsa jajamissanijine” quinajari.



“Moisesipa Ejitodsa imadiraha ia jina najonabaqquiraha ssonohuaji ccani-jarahi. Huatiajari ranaja” quinajari. <sup>41</sup> Nadsapa pohuadeni cacahuade bohui bedi corime orodsa inahatomanajaro. Nadsapa edede inanadsoqque-manadsa poccadeni nahatonaja baccohuaji botta quinajari. “Ajima inadsana ia cacahuade huatidsehitohui” quinajari. Poccadeni nahatonajaraha najaridsa queriqquidsa huatidsemanajari nade -najari Esteba.

<sup>42</sup> —Nadsapa pohuadenijine ima nema nadsapi Dio pohuadenidsa apaja najari. Aja pohuadeni motta Dio jiraha madimanadsapa maji, abadsico, abadsico bedi najaridenidsara: “Ia cacahuade” quiquinanajari. Najaro imapi Dio Atti cacomeraququiri napojarideni dsodo quinapojaro:

“Isaraerideni, madija madide nohuerahihuaji huajano 40 naha jai tijaridsaraha ¿Ohuadsa bani ono tojahijine da da tiquinattaco? Nohuerade. Ohuadsa da da tiquinajarade” nahi nade Dio.

<sup>43</sup> “Naraha dsama onihicca dio pohuamacca, aja ‘maji cacahuade’ quiquinanajari onipa Morocadsara tetetidsemana nadija. Pohua corime pohua tadsaridsa huedsajari tinahatomanadsa teccaridsamanadsapa pohuadsa tetidsemanadsa ‘ia medsede’ titiquina nadija.

Dio pohuamacca ohuaha naco ‘abadsico bedi cacahuade’ quiquinanajari onipa Repana. Najaricca abadsico bedi corime ticanahatomanadsa naco tipitodenidsa jassi jassi tinadsa naqui ‘ia medsede’ titiquina nadija.

Nema tiquinadsapi dsama onihicca medse tiquejenanijine tiadeni dosse onabaqquini-tohui. Ajicca dsama Babironia denihuajina tiadeni onebobaqquiniijine, ohuadsa iboququiri tiquinadsapi”

napohui nade Dio Atti -najari Esteba.

<sup>44</sup> Nadsapa Esteba denima huati huati tajari: —Nadsama icca idideni naco madija madide nohuerahihuaji madiridsamanadsapa Dio Pohua tadsari eheccaridsamana najaro quinade. Najarodsana Dio Attipa: “Tiadenidsa omadijaro” nahi ahuato inaridsajaro. Diopa Moisesi icadossedsa Pohua tadsari icca idideni icanahatomanajaro. Pina Dio tadsari corimani Moisesidsa nohue icanapojarossa najaro bani etero ssequi nahidsa icanahatomanajaro quinade -najari Esteba.

<sup>45</sup> —Najaro Dio tadsaripi icca idideni potemahideni ecahuajonamanajaro. Dsotode ididenicca dsama tojanijinehuaji Josohue eccajonabaqquidsapa Dio tadsari bani etero ssequi nahicca naco eccajonamanajari. Ajijaro dsamadsa bacco najonamanadsapa madija ohuahana madimanahira qqui toquinajari. Naraha jadsire inanamanadsapi Djotine deni toquejenajari. Ajadsa icca idideni madimanahi huajano huapi taraha Dio tadsari cajimanahi paja naccahi. Dsotode Dabi icca idideni Isaraeridenicca tamine tojadsa naco icca ididenipa Dio tadsari bani etero ssequi nahicca inebomana-jaracchahi quinade. <sup>46</sup> Nadsama Diopa Dabidsa huati huana tajari. Dabi pohua naco Diodsa huati huana tadsapa Pohuadsa: “Jehe Abi Dio, tiapi icca idi Jacobocca Dio tijani. Tiadsa odsa bicani ocanahatona, nanidsana timadinijine. Nanidsa naqui ia Isaraerideni tiadsa ehetidse dsanaponijine” napohui nade tamine Dabi atti. <sup>47</sup> Naraha Diopa jehe najarajari. Dabi bedi Saromona Diodsa odsa bicani icanahatojaro quinade. <sup>48</sup> Naraha icca Dio memehuaji madijaripa: “Madijadenicca nahatonijidsapa omadina” najarahi. Dio Atti cacomerabote Isahia dsodo inaponipi ajima najaro:

<sup>49-50</sup> “Ohuapi Dio. Meme, nami, huapima aniridsajarocca ohohuacahua najaro.

Memepi occa huihuittari. Nanidsana occa cacahuehe cacahuade ohuittarijaro.

Namipi ohuamori cabarinijinecca huihuittari bedenissa najaro.

¿Ohuadsa odsa bicani ticanahatomananijinequi?” nahi nade ia Medsede.

“¿Nejecohuaji omadinijine pajirani?

Nadsa Ohuana meme, nami, huapima onahatoridsajarode” nahi nade Dio.

<sup>51</sup> Nadsapa Esteba nahidsa queriqquimanajaridenidsa denima huati tajari: — ¡Naraha tiadenipi tibodideni iboqquri, teribodeni sibaqquri nani! ¡Dio Corimesda naqui huattajojo tinani, pina ticcadeni ididenissa tiquinani! <sup>52</sup> Aja ticcadeni idideni ¿Dio Atti cacomeraqquri najarideni ihinajidsobaqqumana najarattaco? Ihinajidsobaqqumana najari. Ihinajica-baqqumana najari naco. Dio Atti cacomeraqquri najaridenipa Dio Attira huati toquinaja najonapohui. Najaria aja madija Tonassiajade Bicabote ccajonahitohui quiquinanajaripaja. Najaria Mesia quiquinanajaripa pocca ima borocco, Diodsa ibora tajaripaja. Nadsama najaro imapi pajissa tojajaro aja Cristo-Mesia ccajonajaripajade. Najaria ccajonedsatiraha Pohua Attidsa jehe tiquinejeradsa dsoqquehijine teccoramanadsapa tinanadsoqueumanajaripajade. <sup>53</sup> Tiadenipi Moisesicca marinaja ticajimanani, aji Diocca dodosse tabaqqi memehujicca Moisesidsa da quinajaro. Naraha pocca marinajadsa naqui iboqquri tiquinajaro -najari Esteba.

<sup>54</sup> Najaro ima taminedeni mittamanadsapa panodeni todsahi nadsapa huatideni jamijari. <sup>55</sup> Naraha Estebapa pohua bodidsa Dio Corime tojahissa tajarijine memehuaqi qqui tamacossadsa Dio ssiejene qqui tajari. Jesocristo Imehi inori nahatonihuaqi huahi naco qqui tadsapa pohuadenidsa huati tajari: <sup>56</sup> —¡Qqui! ¡Memehuaqi tohuabani qqui tiquinaji! Madija Bedi pohua Imehi Dio inori nahatonihuaqi huahi qqui onahi -najari Esteba. <sup>57</sup> Naraha denima mittamanahijine jiperaqquri nadsa pohuadeni huaribo moda quinadsa johuahua johuahua canajari. Estebadsa ssonarimanadsapa dama quinajari. <sup>58</sup> Nadsapa inanadsoque-manahijine odsa panani idenihuaqi iaqquenamanajari, sibadsa iquinaqqui-manahijine. Esteba quinade ppahuaqquri nahijine poccadeni etero motaranicca ssiti quinadsa madija ojaría oni Saorodsa da inaqqumajararo, ecahuanijine. Nadsapa sibadsa iquinaqqumajarari. <sup>59</sup> Iquinaqqumananaja: —Jehe ohua Medsede Jeso, ocorimepi tiadsa tojana -najari Esteba. <sup>60</sup> Nadsapa pohua pitodsa huitta nadsa jadsirema huati tajari: —Ohua Medsede, poccadeni imasiri manaconi pohuadenidsa tinana tejeraji -najari. Pohua atti nama nadsapa huatiajari.

## 8

<sup>1-2</sup> Nadsapa Saoro Esteba dsoqquehi qqui tadsapa huatidsejari. Naraha madija Jesodsa disseraqquri najaridenina Esteba dsoqquedsapa ppa idsamanajari. Nadsapa Esteba tohui huatideni huanacquiri nadsa huapima oji quinajari.

### *Jesodsa jehe quinajarideni najidsohue noppineni tojaribaqqujari*

Nadsapi najaro huadadsa Esteba dsoqquedsapa Jerosarecca Jesodsa jehe quinajaridenidsa najidsohue tojaridsajaro. Nadsapa jehe quinajarideni huapima nanajidso toquejenadsapa tojaribaqqujari. Naraha Jesocca dodosse tabaqqi 12 quinajaridenipa domo toccabaqqui-jarajari. Aja domo toccabaqquijaridenipa dsama arobeni Jodeahuaji jai toja, dsama arobeni Samariahuaji jai toja najari. <sup>3</sup> Naraha Saoropa jehe quinajarideni Jeso tahimari nebomanahijine dissera tajari. Odsa huapimadsa toqquedsimaja naridsapohui nadsapa maqquidejedeni itadama, amoneje itadama naridsadsa toponi cocorohuaji joca joca inabaqquidsa hua hua ihidsimabaqqi najari.

### *Dsama arobeni Samariadsa Jeso tahimari mari icanabaqqujari*

<sup>4</sup> Naraha aja Jerosaredsa domo toccajarideni odsa onihuaqi bacco taridsamanadsapa Jesocristo tahimari icassiejeranijinecca eccoraridsa-manajaro. <sup>5</sup> Feripe naco najidsohue noppineni joppa tajari. Pohuapa Samariahuaji toccadsa odsa panani bacco tadsapa Jesocristo tahimari maride tojajari. <sup>6</sup> Nadsapa Diojine Feripe canahatori canahi qqui toquinadsapa nahicca madija huapima pocca marinaja mittamanahissa tajari. <sup>7</sup> Aja canahatori canadsapa madija bodidenidsa Satanacca

dodosse tabaqqui tocorime cajimanajari naco inanomibaqquijari. Madija bodidenicca tocorime jahininedsapa johua johua quinajari. Madija isso sirideni naco inanomibaqquijari. Madija idedeni tone biqueradsa issodeni ssomi toquejenajarideni naco inanomibaqquijari. <sup>8</sup> Feripejine nama nahi qqui toquinadsapa nahi odsa pananicca madija huatidsemanajari.

<sup>9</sup> Naraha nahidsa naco dsoppineje madijari, onipa Simao. Pohua attipa: —Ohuapi dsoppineje nahatojide ojirani, ojari onani –nanaja najari. Samariacca madija ihicamaisabaqqui nadsapa —A, nahato tahi –quiquinanajari. <sup>10</sup> Nadsapa Simaodsapa madija huapima ejedenideni naco attideni: —Ajaripa pina Diossa najari –quinadsapa pohua onipa Diocca Nahatohue Dacorabote icanacanimanajari. <sup>11</sup> Huajano huapi taha canahatori cacana nadsapa pohuadsa pajissa quiquinanajari. <sup>12</sup> Naraha Feripepa Diocca cacahuehecca ima bicani huati huati tajari. Jesocristo onina deni tojajari huati huati tadsa naco mittamanadsapa manaco najaro imadsana pajissa quinajari. Jesodsa pajissa quinadsapa maqquidejedeni amonejedeni naqui passodsa topa idsanabaqquijari. <sup>13</sup> Nadsapa Simao naco Jeso tahimari mittadsa jehe nadsapa totopa cajijari. Nadsapa Feripedsa ccaridsajari. Feripe canahatori canaridsahi Simao qqui tadsapa: —A... bica tahi –najari.

<sup>14</sup> Nadsama Jesocca dodosse tabaqqui Jerosaredda madimanajari ima mittamanajari: —Samariahuajicca madijapa Dio Attidsa pajissa quinahi –mittamanadsapa Pedro Huano tedseje Samariahuaji tohuedahijine dosse inabaqquimanajari. <sup>15</sup> Nadsapa tohuedajari, nahi Samariadsa bacco toquinadsapa Diodsa huati toquinajari, Pohua Corime madija bodidenidsa tojaridsahijine. <sup>16</sup> Aja Feripe mari icanabaqquipodsa ia Medsede Jeso onidsa totopa cajiridsamanaporaha Dio Corimepa pohuadenidsa tojaraccajari. <sup>17</sup> Naraha Pedro Huano tedseje pohuadenidsa bara quinadsa Diodsa huati toquinadsapa Dio Corime bodidenidsa tojaridsajari.

<sup>18</sup> Naraha pohuadenidsa bara quinadsa Dio Corime bodidenidsa tojaridsahi Simao qqui tadsapa najaro nahatohue tohuini nadsa: —Tiadenidsa dsiniro da onana –najari. <sup>19</sup> Pedrodenidsa huati tajari: —Ohuadsa ticcadeni nahatohue da tiquinaji, onajaro. Ohua naqui aji ticcadeni dacorehessa onanijine. Madijadsa bara onadsa Dio Corime pohuadenidsa totojaridsa nana –najari Simao. <sup>20</sup> Naraha Pedropa pohuadsa huati tajari: —¡Paji! Tibodipi: “Diocca daniji dsinirodsa mitta onana” tadsapi tia ticca dsiniroma najidsohue jiquejeranihuaji ticcanitohui. <sup>21</sup> Tibodicca tabaccorehepi Diodsa ahuato tajaro. Nema tadsapi Diocca daniji tiadsa tojaritanitohui. <sup>22</sup> Jari, tibodi nema dsanapo-jeranijine ticca imasiri tineboji. Tibodicca tabaccorehe jicanijinepi ia Medsededsa huati tinaji. Pohua jipa tadsa ticca imasiri epeje inananitohui. <sup>23</sup> Tibodidsa icca nahatohue acconi tedini nahato onani. Tiapi ticca imasiri tia jore naqquijarossa najaro –najari Pedro Simaodsapa.

<sup>24</sup> Nanaja Simao: —Jaho, jidacca huati tiquinajaro aji dsiniroma najidsohuehuaji oqquejeranijine ohuadsa Diodsa huati tiquinaji –najari Pedrodenidsa.

<sup>25</sup> Nadsapa nahi Samariadsa Jesocca dodosse tabaqquipa Jesocristo tahimari maride nama dsanapomanajari. Aja pohuadeni qqui toquinajaricca mittamanajaricca naco huati huati totoquina najari. Nadsapa odsa panani Jerosarehuaji jahinidsa naco aja Samariacca odsa capamema naridsanihuaji Jesocristo tahimari icassiejeranijinecca maride toquejena nanijari.

*Feripe dsama Etiopehuajicca tamine bijini accode tedseje bacco tocanirejari*

<sup>26</sup> Nahi dsotode naco Diocca dodosse memehuajicca Feripedsa ahuatodsa huati tajari: —Feripe, aji coridsa imenihuaji tiqquedsippaji, madija madide nohuerahicca jahuihuaji ticcana. Najaropi Jerosarecca jahui odsa panani onini Gasahuaji toccajaro. Nadsapi Gasahuajina ticcaji –najari. <sup>27</sup> Nadsapa najaro jahui Feripe toccadsapa

dsama Etiopehuajicca madija qqui tajari. Puhuapa Etiopecca tamine bijini accode deni tojahicca. Nahato tajari. Etiopecca dsiniro naqui pohana eahuajaro. Puhuapa Diotohui nadsa Jerosarehuaji ccajonajari, Diodsa dada toqquimadsa huatidsehijine. <sup>28</sup> Nadsapa pocca odsa Etiopehuaji toccanijari. Pocca nami jojoppadedsa tohuittarinidsa bojo joca icananimanadsapa maittaccadsama Dio Atti cacomerabote Isahiajine dsodo nani hua hua tanijari. <sup>29</sup> Nadsama Feripe tedseje bacco tocanirebote nadsapa Dio Corime Feripedsa huati tajari: —Jari, huassinaja ticcadsa ajicca nami jojoppade inorinina tianaji -najari. <sup>30</sup> Nadsapa huassinaja toccamissajari, bacco tajari. Nadsapa tamine bijini accode inorina toccanidsapa Isahiacca dsodoniji hua hua tanihi mittajari. Nanaja Feripe huati tajari: —¿Nija, najaro ima hua tadsapi timittanissa taqui? -najari. <sup>31</sup> Naraha tamine bijini accode attipa: —Ohua maride nohueradsapi ¿nejecoma nadsa omittanijine? -nadsapa Feripedsa huahua najari: —Nija, ticcamaroji, ipahimarina -najari. <sup>32</sup> Aji Dio Atti hua inajaropi ajima najaro: —Pohua iaccamanajari, pina edede inanadsoqqe-manahijine pohua dsodsoqqe nahihuaji iaccamanajarissa najari.

Pohua najidsode baccodenihuaji didi najari, pina edede cone beri quinadsa didi najarissa najari.

<sup>33</sup> Puhuapa ajamani inanamanajari. Imasiri caji najararaha imasiri manaconi pahuadsa inanamanadsapi inanadsoqqe-manajari.

¿Nidsaranibote pohua potemahi tahimarideni huatide anipadsaja? Nohueranitohui. Pohua potemahi cappiraha dsoqquedsapa ajijaro dsamadsa amossi najari -nahi nade Dio Atti.

<sup>34</sup> Nadsapa Etiopehuajicca tamine bijini accodepa Feripedsa huati tajari: —Jari, ohua mari ticanaji. Isahiacca dsodonijidsa ¿nejeco madijara pina ededessa nahijine? ¿Isahia pohua itide, madija ohuaharana? Ssamo onani -najari tamine bijini accode.

<sup>35</sup> Nadsapa Feripe najaro Dio Atti aji Isahiacca dsodonijidsa Jeso tahimari huati huati najonajaripa aji Jesojine icassiejeranijinecca ima bacco tajaro. <sup>36</sup> Nadsapa denima tohuedadsapa passo qqui toquinajari. Tamine bijini accodepa: —Ajicajaro passodsa totopa ocajinijine ¿oppinera taqui? -najari. [ <sup>37</sup> Nadsapa Feripe atti: —Pajissa jehe onani tadsapi oppinera tani -najari. Nadsapa tamine bijini accodepa: —Obodipi: Jesocristopa Dio Bedi onani -najari. ] <sup>38</sup> Nadsama Feripe jehe nadsa tamine bijini accodepa pocca nami jojoppade cahittahijine huati tajari. Cahittadsa tohuededsippadsa Feripe tamine bijini accode topa idsanajari. <sup>39</sup> Nadsapa topa, idimora nadsa huedemoranihara Dio Corimejine Feripe amadsati dsama onihihuaji toccajari. Naraha tamine bijini accodepa Feripe qqui imani-jararaha pohua motta tohuatidsenijari. <sup>40</sup> Naraha Feripepa odsa panani Asotodsana ahuatomajari, huaji taraha. Nadsapa Asotodsa joppemadsa odsa capamema naridsanihuaji naqui Jeso tahimari icassiejeranijinecca mari mari naridsajaria odsa panani Sesareahuaji naqui huaji taraha bacco tajaripaja.

## 9

### *Saoro naco Jesodsa tojjari*

<sup>1</sup> Nadsama Saoropa Jesodsa jehe quinajarideni jicahijine jara jara dsanapojari. Nadsapa dada toqquimadedenicca tamine deni tojjaridsa huatide toccajari. <sup>2</sup> Nadsapa najari tamededsa Saoro huati tajari: —Nija Tamine Caipa ¿ohuattidsa jehe taqui? Aja Jesodsa jehe quinajarideni otadamahijine odsa panani Damascohuaaji ohua dosse tinaji, onajaro. Ohua dosse tinanijine jipa tinadsapi ticca ima teppe dsodo tadsa Damascohuaaji dsojo onanijine. Nahi Damascohuaaji jodiodenicca Dio Atti mamari onihi onihicca tamededenidsa nohue onaridsanijine. Nadsapi Jesodsa jehe quinajari maqquideje, amonejedenima otadamadsa bijideni jore onabaqquidsa aji

Jerosarehuaji ohuaccani-baqquihitohui -najari Saoro. <sup>3</sup> Nadsapa tamine Caipa jehe nadsa pocca ima teppe Saorodsa da inadsa Damascohuaji dsojo inajaro.

Toccaraha Damasco bacco tabote nadsa memehuaicca ssiajani amadsati pohuadsa bacco naronadsapi pohua inoridsa ssiajahuajani najaro. <sup>4</sup> Nadsapa Saoro tohuedimajari. Namidsa ponadsa atti mittajari: —Saoro, Saoro ¿nejecotohui occa madija nanajidso taridsajaro? Aja occa madija nanajidso taridsajaropi pina ohua nanajidso taridsajarossa najaro -najari. <sup>5</sup> Nanaja Saoro huati tajari: —¿Tiapi nejecojari? -najari. Naraha: —Ohuapi Jeso. Ohua tinajidsojaro. <sup>6</sup> Jidapapi titehemadsa, odsa panani Damascohuaji ticcaji. Nanidsana occa ima, aji ohuadsa tidsepe ijiniijinecca ima timittanijine -najari.

<sup>7</sup> Aja Saoro pohuadsa jai tojajarideni naco atti mohuini mittamanaraha assirepa qqui quina-jarahi. Jabojo quinadsapa attideni jiraha domo huajari. <sup>8</sup> Nadsapa Saoro namidsa ponaraha totehema, nocco ssire-re naraha nocco siri tojaha totehemajari. Nocco nohueradsapa bijidsa dama quinadsa odsa panani Damascohuaji iaccamanajari. <sup>9</sup> Nahidsa huadari 3 naraha nocco tobica-jaraccahi. Dsamatapa jipa-jaraccahi, passo naco dse najaraccahi.

<sup>10</sup> Nahi Damascodsa Jesodsa jehe najari madijari onipa Anania. Puhuapa pina pocca huadassa nadsa ia Medsede Jeso ahuatodsa pohuadsa huahua najari: —¡Anania! -najari. —¿Ja? Ohuapi aji, ohua Medsede -najari.

<sup>11</sup> Nadsapa Jeso pohuadsa huati tajari: —Anania, titehemaji. Ajicca jahui onini Borocobote quiquinanahihuaji ticcaji. Nahi Jodacca odsadsa bacco tinadsapi odsa panani Tarsocca madija qqui tinahitohui, pohua onipa Saoro. Puhuapa otohui nadsa ohuadsa huatide tojajari. <sup>12</sup> Ohuapi pina pocca huadassa nadsa pohuadsa ima ahuato onanapa. Najaro imapi aja madija oni Anania ccajonadsa tinocco bara inadsa tinocco tobicapomanitohui, onapa pohuadsa -najari Jeso.

<sup>13</sup> Naraha Anania: —Jaho, ohua Medsede, najari maqquidejepa aja Jerosarecca tiadsa toquejenajari bicaqquri najarideni inajidsobaqquihi quinahi ima omittade. <sup>14</sup> Jidapana naco Jerosarecca dada toqquimade taminedenicca ima teppema ccajonajaripa tiadsa jehe inajarodenitodsepe iquejenanijine ia damade ccajonajari -najari Anania.

<sup>15</sup> Naraha ia Medsede Jeso Ananiadsa: —Jari, nema nehe ticcaji, pina ohuattissa tinanaji. Saoro ocattejidsajari. Puhuapa occa imadsa dsepe ijiridsahitohui. Dsama huapimacca madija, taminedenima mari icanabaqquihijine. Isaraeridenidsa naco otahimari mari icanabaqquihijine. Nadsapa otahimaridsa: “Jehe, Jesopa pajissa Dio Bedi” quinahijine, onajaro. <sup>16</sup> Puhuapa otahimari maride tojaridsaraha ocasserehe oppina tanicca inahanaridsanitohui. Najaro ima naqui nidsa pohuadsa nohue onanitohui -najari Jeso Ananiadsa.

<sup>17</sup> Nadsapa Anania Jeso attidsa ibora tadsapa toccajari. Jodacca odsahuaji bacco tadsapa toqquedsimadsa Saorodsa bara nadsa huati tajari: —Ohuemecote Saoro, jahui ticcajonaraha ia Medsede Jesocristopa tiadsa ahuatode. Najari ohua dosse najonadsa occajonajaro, tinocco biquemaninijine, Dio Corime tibodidsa tojahijine -najari Anania.

<sup>18</sup> Nadsapa Saoro noccodsa bara nadsa amadsati pina aba eterossa naha catojad-sapa nocco biquemanipomajari. Saoro totehemadsa passohuaji toqquedsippadsapa totopa cajijari. <sup>19</sup> Nadsapa jipadsa todacorapomajari. Nahi Damascocca Jesodsa jehe quinajaridenidsa huada huatinimade tojari naha madicajari.

### *Saoropa Damascodsa Jeso tahimari maride tojajari*

<sup>20</sup> Nadsapa Saoro amadsati jodiidenicca Dio Atti mamarihuaji maride tojajari. — Jesopa Dio Bedi -naridsajari pohuadenidsa. <sup>21</sup> Nadsapa madija huapima Saorocca marinaja mittamanadsapa: —A ¿pohua bodi cacajiqquimerajari ttarana? Nadsa



najaripa Jerosarecca madija Jesodsa toquejenajari nanajidso naridsaccade. Ahuaji ccajonadsa naco Jesodsa jehe quinajarideni itadamadsa dada toqquimade tamindenidsa iaccanibaqquihitohui quiquinanaraha ¿najari jaraco? –quinajari.

<sup>22</sup> Naraha Saoropa Diocca dacorehe cajidsa pohua atti bica tadsa huati huati tajari: —Jesopa aja Cristo-Mesiatohui imadijaropaji –naridsajaria aja Damascohuaajicca jodiodeni pohuadsa atti atti quinaraha ajamani toquejenadsa tossamomanadsapa joma quinajaripaja.

<sup>23</sup> Nadsama dsotode naco jodiodeni pohuadenira imahaha canadsa: —Jari, Saoro dsoqquena –quinajari. <sup>24</sup> Naraha Saoropa pohuatohui najoramanahi ima mittajari. Odsa pananicca siba sse nahuajaninicca totoqqueqquimacca noccobijidsa pohuatohui cacassiamana najari. <sup>25</sup> Naraha najaro dsomedsa Jesodsa jehe quinajaridenipa quiqui imenidsa Saoro inahittidsamanadsa odsa pananicca siba sse nahuajaninicca noccobiji bedenidsa mohuaradsa madodsa tappa icanaronamanajari. Nama inamanadsapa Saoro inassiamanajari.

### *Saoro Jerosaredda madipomajari*

<sup>26</sup> Nadsama Saoro odsa panani Jerosarehuaaji toccanidsa bacco tanidsapa Jesodsa jehe quinajaridenidsa quejemahijineraha pohua noppine cappinamanajari. Jesodsa tojajari tahimari mittamanaraha pajissa quina-jarajari. <sup>27</sup> Naraha Bernabena Jesocca dodosse tabaqquidsapa Saoro iaccajari. Pohua tahimari pohuadenidsa huati huati tajari: —Ajajaripa Damasco jahui toccaraha ia Medsede pohuadsa ahuatodsa atti mittajari. Nahi dsotodepa cappinera tadsa Damascohuaaji Jeso tahimari maride tojajari –najari Bernabe. <sup>28</sup> Nadsapa pohua noppine tocappinermanadsa pohuadenidsa ccaridsajari, pohuadenidsa madijari. Nadsapa Saoro cappinera tadsa nahi Jerosaredda ia Medsede Jesocristo tahimari mari icanabaqquihissa tajari. <sup>29</sup> Naraha jodiodeni mota dsama Cresiaccia tohuatti nahatoqquri najarideni Saoro tedseje imahaha canadsapa ahuaaji huati ahuaaji huati quinajari. Huadimanadsapa dsoqquehijine tohui disseraqquri najari. <sup>30</sup> Naraha Jesodsa jehe quinajaridenipa Saoro inanadsoqque-manahijinecca ima mittamanadsapa odsa panani Sesarehuaaji pohua iaccamanajari. Nahi Sesaredda bacco toquinadsapa Saoro pocca odsa panani Tarsohuaaji dosse inanimanajari.

<sup>31</sup> Nadsama Jesodsa jehe quinajaridenidsa madija ohuahadenicca najidsohue totappadsapi jonehedsa madiridsamanajari. Aji dsama arobeni Jodeahuaaji, dsama arobeni Carireahuaaji, dsama arobeni Samariahuaaji naqui najidsohue totappajaro. Nadsapa Dio Corimejine poccadeni jeheniji todacorani dsanapojaro. Jesodsa jehe quidsati naco tohuapija dsanapohui najari. Huapima ia Medsede tohuira bodideni huatomamana-dsanapodsapa madimanahissa tajari.

### *Pedro Enea inanomijari*

<sup>32</sup> Pedro naco Jesodsa jehe quinajarideni qquide ccaridsajari. Odsa panani onini Ridahuajicca jehe quinajaridenidsa bacco tajari. <sup>33</sup> Nahidsa maqquideje ide tone biqueradsa isso ssomi tojajari bacco inajari, onipa Enea. Pohuapa huajano 8 naha coma tajari. Ccaridsa-jarahi. Pohuajinedsa popori najari. <sup>34</sup> Nadsapa Pedro pohuadsa huati tajari: —Enea, Jesocristojine tinomini. Titehemaji, ticca huahuada mohuaradsa domo taqquijo –najari.

Nanaja amadsati totehemadsa ccaridsajari. <sup>35</sup> Nadsapa Ridacca madija huapima, dsama arobeni Saronahuajicca madija naco Enea tonomihi qqui toquinadsapa bodideni cacajiqquimera-manajari. Nadsapa huapima ia Medsededsa toquejenajari.

### *Tabita huatiaraha Djojine camitemanijaro*

<sup>36</sup> Nadsama Jodea arobenihuaaji odsa panani Jopedsapu amoneje Jesodsa jehe najaro madijaro, oninipi Tabita. Dsama Cresiaccia madija attidenidsapi: Dorca. Ponipi

amoneje bicani madijaro, ima bicani inaridsajaro. Madija cappiramanajarideni acco acco ihicamabaqqui najari. <sup>37</sup> Naraha Tabita quidsa nadsapi huatiajaro. Huapini passodsa ssahua quinadsapi odsa tetepihuaicca coba canahuajaninidsana ibarimanajaro. <sup>38</sup> Nadsama odsa panani Joepi Ridahuaji huajira tajaro. Jopecca Jesodsa jehe quinajaridenipa Pedro Ridahuaji madijari quinahi mittamanadsapa Pedrotohui maqquideje pamaha dsaja tajari. Nadsapa Pedrodsa bacco toquinadsa huati toquinajari: —Huassinaja icca odsahuaji ticcaccaji —quinajari.

<sup>39</sup> Nadsapa Pedro pohnadenidsa toccajari. Odsa bacco tanimanadsapa Tabita porinihuaji iaqquedsimamanajari. Nani Tabita porinidsa poni tassani tabira tocjamanajarodeni domoni huaridsa oji oji quinajaro. Ponidenicca eteropi Tabitacca ssequinaja Pedrodsa nohue quinajaro. Poni madicadsa poni tassanidenidsa ssequi inaridsajaro. <sup>40</sup> Naraha Pedropa huapima amossinihuaji dosse ininebaqquidsa pohua pitodsa huitta nadsa Diodsa huati tajari. Nadsapa totehemadsa aji huatiajarodsa huahua najari: —Tabita, titehemaji —nanaja nocconi ssire-re nadsa Pedrodsa cattoma nadsa totehema, huittari najaro. <sup>41</sup> Nadsapa dsapanidsa Pedro joca imadsapi totehemajaro. Nadsapa aji amoneje camittemanijaro qqui toquinahijine Jesodsa jehe quinajaridenitohui amonejedenitohui huahua najari. Qqui toquinadsapa huatidsem-anajari. <sup>42</sup> Nadsama najaro imapi Jopehuajicca madija huapima mittaridsamanajari. Nadsapa Jopehuajicca madija mota denima Jesodsa jehe quinajari. <sup>43</sup> Nadsapa Pedro nahi Jopehuaji huadari huapi taccahijine nahicca bani etero nanadacomade oni Ssino tadsaridsa madicajari.

## 10

### *Pedro Coronerio tedseje*

<sup>1</sup> Nadsama odsa panani Joepi huajira tanidsa odsa panani onini Sesareadsapa maqquideje madijari, pohua onipa Coronerio. Pohnapa romanodenicca soldado dossede, pocca dodosse tabaqqui 100 quinajari. Pohnadenidsa: —Dsama Itariahuajicca soldadodeni —quiquinanajari. <sup>2</sup> Coroneriopa madija bicahi, Diodsa dissera tajari. Pohnapa jodio jararaha pohua pocca madijama Diodsa jipaqquri nadsa Dio Attidsa iboraqquri najari. Aja Coroneriopa jodiodeni tohuati nahanaqquri najaridenidsa naco accora tajari. Diodsa huatide naco nenebo najarajari. <sup>3</sup> Nadsapa maji tohuenajonadsa pina 3'dsa Coronerio pocca huadassa nadsa Dio Atti ccaccaronade ahuatojari. Coroneriodsa qquedsimadsa huahua najari: —¡Coronerio! —najari. <sup>4</sup> Nanaja Coronerio cattoma nadsapa cappinadsa huati tajari: —¿Nejecora ohuadsa huati tinanijine? —najari. Nadsapa pohnadsa huati tajari: —Diopa titohui huati ajama-jarahi. Tetti mittahi, aja tohuati nahanaqquri najaridenidsa naqui accora tinani qqui tahi. <sup>5</sup> Jari, odsa panani Jopehuaji madija dosse tinabaqquijo Ssinotohui, pohua oni ohuahapa Pedro. Najaripa pohnadenidsa ccajonahijine. <sup>6</sup> Pohna pina pohua onissa najaricca odsadsa madijari. Najari Ssinopa bani etero nanadacomade. Pohnapa coridsa imeni inididsa madijari —najari.

<sup>7</sup> Nadsapa Dio Atti ccaccaronade Coroneriodsa huati huati taha jicadsapa toc-camacossanijari, amossi najari. Nadsapa Coronerio pocca tatarabadsade pama, soldado ojari najaridenidsa huahua najari. Soldadopa Diodsa dissera tajari, Coronerio biji accode tojajari. <sup>8</sup> Nadsapa pocca ima huati tahissa tadsapa Jopehuaji dosse inabaqquidsa jai tojajari.

<sup>9</sup> Huada ssiaja jahui jai tojajari, maji itetepi tojadsa Jopehuaji bacco toquinabote najari. Maji najarissa nadsa Pedropa Diodsa huati tahijine Ssinocca odsa tetepihuaji toccamarojari. <sup>10</sup> Pedropa pemidsa jipahijine tohuini naraha pohua tapari ppede najomanaccadsa Diodsa huatide tojanaja pina pocca huadassa naraha Djojine pajissa qqui tajari. <sup>11</sup> Nadsapa qqui taneje meme tohuaba nadsa pina etero imenissa

najaro ahuaji ssoque dsanani pama, ahuaji ssoque dsanani pama nehe namihuaji ccaronajaro. <sup>12</sup> Nadsama aji etero ssoque caniqquimani bodidsapi bani cajidsamaro najari. Bani dsamacca, odsacca, eppe cajiicca, pohua baccodsa ccaridsajaricca najari. (Bani motapa bani siri, aja Moisesicca marinajadsa: —Tijipamana tejeraji —nahicca.) <sup>13</sup> Nadsapa memehuaaji atti mittaronahi Pedro mittajari: —¡Pedro, titehemaji! Ticca bani titabarojo, tijipanijine —najari.

<sup>14</sup> Naraha Pedropa: —Ohua Medsede, ¡poni! Bani oppina tahiccapa Moisesicca marinajadsa: “Ajajaripa tijipamana tejeraji” nade. Ohuapi bani nama nahicca ohojipa nejerani —najari. <sup>15</sup> Naraha Pedrodsa huati tapomajari: —Pedro, pajissa Diopa: “Ajajari bani tijipamana tejeraji” naporaha jidapapa Dio Pohuajine toppinerahi. Nadsapi Diojine toppinerahicadsa: “Oppina tahi” tejeraji —najari Dio Atti ccaccaronade Pedrodsa.

<sup>16</sup> Aja bani tahimari huati nimanahi 3 nadsapa aji etero ssoque caniqquimanipi memehuaaji toccamacossanijaro. <sup>17</sup> Nadsapa Pedro pocca huadassa najaro qqui tajaridsa bodi huatoto canadsa: —¿Nejecotohui nama nahi qqui onajari? —najari. Nanaja Coronerio dosse inajonabaqquijarideni aja Jopedsa bacco quinajaridenipa: —¿Nejecohuajina Ssino madijari? —najonamanajari. Nadsapa Ssinocca odsacca siba sse nahuajinicca noccobijihuaaji bacco quinajari. <sup>18</sup> Nadsapa bacco quinadsapa huahua quinajari: —¿Ssino-Pedropa ajadsa madijarico? —quinanaja: —Jehe, ajadsa madihi —quinajari.

<sup>19</sup> Pedropa odsa tetepihuaji bodi huatoto cananaja Dio Corime pohuadsa huati tajari: —Madija 3 quinaha titohui bacco quinahi. <sup>20</sup> Titehemaji, ticcaronadsa pohuadenidsa ticcana. Ticappina-jeraji, aja titohui bacco quinajaridenipa ohua dosse onajonabaqquijari —najari Pedrodsa.

<sup>21</sup> Nadsapa Pedro ccaronadsa pohuadeni qqui tadsapa huati tajari: —Aja tohui jai tijajonajaropi aji ohuapaji. ¿Nejecotohuira jai tijajonajaro? —najari Pedro.

<sup>22</sup> Nadsapa pohuadeni attia: —Coronerio ia dosse najonabaqquijari. Pohuapa soldadodeni dossede, madija bicabote. Jodio jararaha Diodsa ibora tajari. Jodiodeni naco pohuadsa: “Ima bicani cajihi” quiquinanajari. Najaria aja Dio Atti ccaccaronade pohuadsa ahuatodsa: “Ticca madija Pedrotohui dosse tinabaqquijo, ticca odsahuaji ccajonadsa pocca ima timittanijine” nadsa ia dosse najonabaqquijari —quinajari.

<sup>23</sup> Nadsapa Pedro: —Jehe, bica tani. Aji occa odsadsa timadimanaccaji, dsemassana tiadenidsa occanijine —najari. Nadsapa huada ssiajana Pedro Coronerioca dodosse tabaqquidsa toccajari. Jopehuajicca Jesodsa jehe quinajarideni mota naco jai tojajari pohuadenidsa.

<sup>24</sup> Nadsapa huada ssiajana odsa panani Sesareadsa bacco tanimanajari. Nahid-sapa Coronerio, pocca madija, pohua tessedeni quinadsa Pedrotohui madimanageri. <sup>25</sup> Nanaja Pedro Coronerioca odsadsa bacco tadsa toqquedsimabote naraha Coronerio qquenadsapa Pedro baccohuaaji pohua pitodsa huitta najari. Pohuadsa huatidsedsa: —Deni tijani —nahijineraha. <sup>26</sup> Naraha Pedropa Coronerio dsepedsa joca imadsa: —Titehemaji, ohuapi Dio ojajerani. Ohua naqui madija aji tiassa onajaro —najari.

<sup>27</sup> Nadsapa Coronerio tedseje huahuatiti tajari. Odsa bodihuaji tohuededsimadsa odsa bodidsa madija queriqquimanahi huapi tahi qqui tajari. <sup>28</sup> Nadsapa Pedro pohuadenidsa huati tajari: —Ohuapi jodio madija ojani. Nadsama aji jodiodenicca imapi nahatoqquiri tiquinani. Occa madijapa madija ohuaha jodio quejenajarajaridenidsa iquejemanipina jidapana tiadenidsa qquide oqquedsimadsapi oppina tani quiquinanade. Naraha Dio ohua mari canadsapa ajama najari: “Jidapapi madija ohuahadenidsa iquejemaninaqui oppinera tani. Pohuadenidsa: Oppina tahi, tejeraji” nade ohuadsa. <sup>29</sup> Nema nadsapi ohuadsa huahua tadsa Diojine ocappina-jeradsa

occajonajaropaji. Nadsama ¿nejecotohui ohuadsa huahua tajarotte? Jidapana ohuadsa huati tinaji, omittanijine –najari Pedro.

<sup>30</sup> Nadsapa Coronerio Pedrodsa huati tajari: —Aji maittadsama onihima nadsa jidapapi huada 4 nani occa odsahuaji Diodsa huatide ojadsapi maji tohuenajonadsa pina 3’dsa Dio Atti ccaccaronade ohuadsa ahuatodsa qqui onajaride. Pocca eteropi dsibehi tajaro. <sup>31</sup> Nadsapa ohuadsa huati tade: “Coronerio, Diopa titohui huati ajamajarahi. Tetti mittahi, tohuati nahanaqquiri najaridenidsa accora tinani naqui Diopa qqui tahi. <sup>32</sup> Jari, odsa panani Jopehuaji madija dosse tinabaqquijo Ssinotohui, oni ohuahapa Pedro. Pohua onissa najaricca odsadsa madijari. Najari Ssinopa bani etero nanadacomade. Pohuapa coridsa imeni inididsa madijari” nade ohuadsa. <sup>33</sup> Nadsapa huassinaja occa madija titohui dosse onabaqquijaripaja. Aji ia qquide ticcajonani ibora tinadsa bacco tajonadsapi etidsejaro. Jari, jidapana Dio tedsejema iqueriqquidsa ia Medsede tia mari canajaricca ima huati tinaji, imittanijine –najari Coronerio.

### *Pedropa Coronerioca odsadsa Jeso tahimari maride tojajari*

<sup>34</sup> Nadsapa manaco Pedro pocca ima huati huati tajari: —Jehe, jidapana pajissa omittajaropi Dio: “Jodiodenira ojarimanana” najarajari. <sup>35</sup> Diopa dsama huapimacca madijadsa huati cahanari canahi. Pohua Attidsa madija iboraqquiri nadsa ima bicani inanaridsamanadsapi Dio pohnadenidsa jipa tajari. <sup>36</sup> Diopa ia Isaraeridenidsa ima bicani huati najonajari. Najaroa aji Jesocristojine Dio iadsa tojonejaripaja. Pohuajinena Diocca huadie dsori icanirenitohui. Pohuana madija huapima Medsededeni. <sup>37-38</sup> Tiadenipi ajijaro ima nahatoqquiri tiquinani. Najaroa aji Nasaretihujicca Jeso tahimari. Tahidepa Huano pocca ima eccoraridsadsa pohua attipa: “Ticcadeni imasiri tinebomanaji, totopa ticajimanaji” napojari. Nadsapa madija topa idsanabaqquijaripaja. Nahi dsotodepa Jeso naco Huano topa idsanajari. Topa, idimora nadsapa Dio Pohua Corime Jesodsa inanahissa tajari. Dio pocca dacorehe naqui Jesodsa inananissa tajaro. Nadsapa Jeso ima bicani inanaridsajaropaji. Tahidepi dsama arobeni Carireahuaji ima bicani inanaridsajaro, dsotode dsama arobeni Jodea nemanehedsa naqui ima bicani inanaridsajaro. Imasiri jinede Satanajine madija ocasserani ahuamanajari naco inanomibaqquiri-ridsajari. Jesopa Dio pohnadsa madijarijine nama naridsajaripaja. <sup>39</sup> Nadsama ia naqui Jesocca dodosse tabaqqui pohnadsa jaijaridsadsa odsa panani Jerosaredsa dsepe ijihhi qqui, jodiodenicca dsama Jodea nemanehedsa dsepe ijiridsahi naco qqui qqui inajarode. Naraha dsotodepa jodiodeni ahua porimacossanidsa coba idsanamanadsa inanadsoqque-manajari. <sup>40</sup> Naraha huada 3 nadsa Djojine Jeso nahatonipomajari. Nahi dsotode naco Djojine iadsa ahuatoniari. <sup>41</sup> Madija huapimadsapa ahuatoni-jararaha iadsana ahahuatoni najaride. Diopa tahide ia tocattejidsabaqquipojaria aji pajissacca ima ecomeraridsanijine iadsa ahuatoni inajaropaji. Iapi Jeso nahatonidsapa pohua tedseje ijiparidsajaro, dsedse bica tahicca dse inaridsajaro najarode. <sup>42</sup> Najaria pohua tahimari madija huapimadsa ecomeraridsanijine ia tocadossebaqquijaripaja. Abi Dio Pohua Bedi dosse inaronajaripa madija huapimacca ima cacattemade tojahijine. Nahi nidsaranibote Jeso pohua ccanipomadsa jicapojarideni inahatonibaqquidsapa aja camittaqquiri najarideni tedseje imarideni icattemanitohui. <sup>43</sup> Najaria Jeso pohua tahimari maittaccadsama Dio Atti cacomeraqquiri najarideni dsodo najonamanajaripa ajama quiquinanajari: “Ia Idinide icca imasiri inanamossinijine nahato tahi ojari nahi. Pohnadsa pajissa inadsapi icca imasiri inanamossi tani” quinapohui nade. Najaro imapi madija huapimadsa tojajaro –najari Pedro.

### *Jodio quejena-jararidenidsa Dio Corime tojaridsajari*

<sup>44</sup> Nadsapa Pedro huati huati tahi Coronerio pocca madijama taharibobo cananaja Dio Corime bodidenidsa tojaridsajari. <sup>45-46</sup> Nadsama Dio Corimejine pohuadenipa tohuatti jidsa tajarodsa huati huati toquinajari. Diodsa huatedsemanadsa attidenipa: —¡Diopa bica tahi! ¡Diopa nahatojide rahi! —quinajari. Nadsama Jopehuajicca Jesodsa jehe quinajarideni Pedrodsa jahijonajaripa jodiodenija najari. Pohuadenipa aja madija ohuahadeni jodio quejena-jararaha tohuatti jidsa tajarodsa huati huati toquinahi mittamanadsapa: —A, madija ohuaha quejenaraha Dio Corime pohuadenidsa tojaridsajari —quinajari. <sup>47</sup> Nadsapa Pedro huati tapomajari: —Aja Coronerioca madijapa madija ohuaha quejenaraha Diojine Pohua Corime bodidenidsa tojaridsajari. Pohuadenipa Dio Corime cajimanajari, pina iassa quinahi. Nadsapa totopa cajimanahijine bica tani. ¿Nejecojari pohuadenidsa: “Totopa cajimana-jarana” nahijine? Nohuerahi —najari Pedro.

<sup>48</sup> Nadsapa Coronerio pocca madijama totopa cajimanahijine Pedro icadossebaqqujari: —Jari, Jesocristo onima totopa cajimanana —nadsapa topa idsanabaqqujari. Dsotodepa Pedrodsa huati toquinajari: —Jari, iadsa timadiccaji —quinajari. Nadsapa Pedro huada pamehe pohuadenidsa madijari.

## 11

### *Jerosarecca naco Pedro tahimari mittamanajari*

<sup>1</sup> Nadsama dsama arobeni Jodeadsa madimanajarideni aja Jesocca dodosse tabaqqui ima mittamana, Jesodsa jehe quinajari ohuahadeni naco ima mittamana najari: —Madija ohuaha jodio quejena-jararaha Dio Atti mittamanadsapa pajissa quinahi —quinajari. <sup>2</sup> Naraha Pedropa odsa panani Sesareahuaji ccanidsa odsa panani Jerosarehuaji bacco nanidsapa jodiodeni Jesodsa jehe quinajarideni mota pohuadsa huadimanajari. <sup>3</sup> Nadsapa Pedrodsa huati toquinajari: —¿Nejecotohui jodio quejena-jararaha poccadeni odsadsa tiqquedsimadsa pohuadenidsa tijipajarotte? Moisesicca marinajadsa nema inanipi oppina tani nahato tinaraha —quinajari Pedrodsa.

<sup>4</sup> Naraha Pedropa pocca ima tahideccadsama pohuadenidsa ecomerajonajaro: <sup>5</sup> —Jehe, ohuapi Jopehuaji omadidsa Diodsa huatede ojaraha pina occa huadassa naraha Diojine pajissa qqui onajarode. Meme tohuaba nadsa pina etero dsojoranissa nehe ssoque caniqquimehe ohuadsa bacco naronani qqui onajarode. <sup>6</sup> Najaro etero ssoque caniqquimani bodihuaji qqui onanissa tadsapa bani cajidsamaro nade. Dsamacca bani, odsacca bani, bani eppe cajimanajarideni, bani pohuadeni baccodsa jahiridsajarideni, huapima qqui onade. Jodiodeni iadsa bani oppina tahiccama quejemade. <sup>7</sup> Nanaja memehuaji atti omittadsapa: “¡Pedro, titehemaji! Ticca bani titabarojo, tijipanijine” nade. <sup>8</sup> Naraha pohuadsa ajima onade: “Ohua Medsede, ¡poni! Ohuapi bani oppina tahicca ohojipa nejerani” onade. <sup>9</sup> Naraha memehuaji ohuadsa huati tapomade: “Ajajari banipa Diojine toppinerahi. Nadsapi Diojine toppinerahiccadsa: Oppina tahi, tejeraji” nade ohuadsa. <sup>10</sup> Nadsapa ima huati nimanahi 3 nadsapa etero ssoque caniqquimanipi banima memehuaji toccamacossanijarode.

<sup>11</sup> —Nanaja odsa panani Sesareacca madija 3 quinaha otohui dosse inajonabaqqujarideni omadinicca odsadsa bacco quinajari. <sup>12</sup> Nadsapa Dio Corime ohuadsa huati tade: “Ticappina-jeradsa pohuadenidsa ticcaji” nade ohuadsa. Nadsapi aja Jopehuajicca Jesodsa jehe quinajarideni 6, ohua inadsa pohuadenidsa jajjade. Nadsapi Coronerioca odsahuaji bacco inadsa jajjedsimade. <sup>13</sup> Nadsapa Coronerio pocca ima iadsa huati tade. Pohua attipa: “Dio Atti ccaccaronade occa odsa bodihuaji ahuatodsa huesda nadsa ohuadsa ajama najari nade: “Ticca madija Jopehuaji dosse tinabaqquijo, Ssino-Pedro ahuaaji ccajonahijine. <sup>14</sup> Najari ahuaaji ccajonadsapa tiadenidsa ticassiejeranijinecca ima huati tahijine. Najaro imadsa



tia, ticca odsacca madijama ticassiejeranijine' nade Dio Atti ccaccaronade ohuadsa" najari Coronerio atti. <sup>15</sup> Nadsapi pohuadenidsa huati huati onanaja Dio Corime pohuadenidsa tojaridsajaride. Pina iadsa tojaridsapohuissa najaride. <sup>16</sup> Nadsapi aji Jeso huati huati tajari obodi huatomade: "Huanopa tahide passodsa tiadeni topa todsanabaqquijari. Naraha dsotodena Dio Corime tibodidenidsa tojaridsahitohui" nade Jeso. <sup>17</sup> Nadsapi ia Medsede Jesocristodsa jehe inadsapi Dio Pohua Corime iadsa tojaridsapojaride. Najarossa najaro pohuadenidsa naco Dio Corime inanaridsajari. Nadsapa madija ohuahadeni naco Diodsa toquejenadsapa ohuapi Diodsa: "Tijine bica tejerani" onanijine opajira-jevani, onajaro –najari Pedro.

<sup>18</sup> Nadsapi najaro ima Jodeacca madija aja jodiodeni Jesodsa jehe quinajarideni mota mittamanadsapa poccadeni huadie nebomanajari. Nadsapa Diodsa huatidsemanajari: —Jehe, jodio quejena-jararaha Diopa pohuadenidsa naco huati huana tajari. Diojine bodideni cacajiqquimeradsa Jesodsa pajissa quinadsapa camittehe jiquejeranicca cajiridsamanahi. ¡Diopa bica tahi! ¡Diopa deni tojahi! –quinajari.

### *Jesocristo pohua tahimari Atioquiadsa bacco tajaro*

<sup>19</sup> Nadsama Esteba dsoqquehi nattipa Jesodsa jehe quinajarideni mota nanajidso toquejenadsa ahuaji domo tocca, ahuaji domo tocca naridsajaria aja dsama Penisiahuaaji bacco, dsama Siprehuaaji bacco, odsa panani Atioquiahuaji bacco toquinajaripaja. Nahidsa bacco taridsamanadsapa Jeso tahimari icassiejeranijinecca ima nahihuaajicca jodiodenira mari icanabaqquimanajari. <sup>20</sup> Naraha Jesodsa jehe quinajarideni domo toccajari motapa odsa panani Atioquiahuaji jai tojadsapa jodio quejena-jarajarideni naco Jeso tahimari icassiejeranijinecca mari icanabaqquimanajari. Maridedenipa dsama Siprehuaajicca madija pama, odsa panani Sirenecca madija pama quinajari. <sup>21</sup> Nadsapa ia Medsede Diocca dacorehe pohuadenidsa tojadsapi mari quinahissa tajari. Nadsapa Atioquiacca madija aja jodio quejena-jarajari huapima bodideni cacajiqquimera-ridsadsapa ia Medsede Jesodsa pajissa quinajari.

<sup>22</sup> Nadsama odsa panani Jerosarecca Jesodsa jehe quinajarideni ima mittamanadsapa Bernabe Atioquiahuaji dosse quinajari, qqui inabaqquihijine. <sup>23</sup> Nadsapa Bernabe Atioquiahuaji bacco tadsa Dio pohuadenidsa ima bicani inanani qqui tadsapa huatidsejari. Nadsapa pohuadenidsa huati tajari: —Diodsa pajissa tidsanapomanana. Tibodideni dacoradsa ia Medsededsa disseraqquri tiquinaji –najari. <sup>24</sup> Bernabepa bica tajari, Dio Corimecca dacorehe cajijari. Jesodsa naco jehe nahissa dsanapojari. Nama nadsapa Atioquiacca madija huapi taha ia Medsede Jesodsa jehe quinajari.

<sup>25</sup> Nahi dsotodepa Bernabe Saorotohui odsa panani Tarsohuaji toccajari. <sup>26</sup> Pohuadsa bacco tadsapa Atioquiahuaji jina inanijari. Bacco nanimanadsapa nahicca Jesodsa jehe quinajaridenidsa huajano ojaría madimanadsa madija huapima mari icanabaqquimanajari. Nadsapa nahi Atioquiadsana Jesodsa jehe quinajaridenidsa: Cristocca madija, icanacanibaqqui-manapojari.

<sup>27</sup> Nadsapa najari huajanodsa Jerosarecca Dio Atti huahuati toqquimadedeni Atioquiadsa bacco quinajari. <sup>28</sup> Pohuadeni naco aja madija toqueriqquihidsa quejemamanadsa ojaría ima huati tahijine totehemajari, pohua onipa Acabo. Pohuapa Dio Corimejine bodi nahato tadsa huati huati tajari: —Nidsa icca dsama huapimadsa pemi tojanitohui –najari. (Najaropi dsotode Romacca madija oni Claudio dsama huapimacca tamine madidsa pemi toजारopajide.) <sup>29</sup> Nadsapa Atioquiacca Jesodsa jehe quinajarideni Acabo atti: —Pemi tojanitohui –nahi mittamanadsapa: —Jodeacca Jesodsa jehe quinajarideni acco icamabaqquina –quinajari. Imahaha canadsapa: —Ipajiranissa tanicca da inaqquina. Pina huemani cajihpa denima da inana, badsira tehe cajihpa badsira tehe da inana –quinajari. <sup>30</sup> Nadsapa poccadeni daniji da inaqquimanadsapi Bernabe Saoro tedseje Jodeahuaji eccanimanajaro.

Bacco nanimanadsapa Jerosarecca Jesodsa jehe quinajarideni cacahuadedenidsa da quinajaro.

## 12

### *Satiaco inanadsoqqemana, Pedro toponi cocorodsa coro idsimamana najari*

<sup>1</sup> Nadsama pemi toja-jeraccadsapi dsama arobeni Jodeahuaji jodiodenicca tamine Herode madijari. Najaripa Jesodsa jehe quinajarideni inajidsobaqquihijine pocca madija icadossebaqquidsapa itadamamanajari. <sup>2</sup> Nadsapa pohua attidsa Huanocca ato Satiaco toponi huahuajinadsa inanadsoqqe-manajari. <sup>3</sup> Najari dsoqquedsapa jodiodeni huatidsemanajari. Huatidsemanahi tamine Herode qqui tadsapa: —Pedro naco dama tiquinajo –najari pocca madijadsa. Jodiodenicca ejete imenibote onini Pan ssaja tajarahicca (onini onihipi Pascoa) najaro ejetecca huadadsa Herode atti nama najari. <sup>4</sup> Nadsapa Pedro dama quinadsa toponi cocorodsa coro idsimamanajari. Nadsapa soldado huapima Pedro ecahuamanajari. Tahide 4 quinaha ecahuamanapojari. Dsotode 4 quinaha ecahuamana, dsotode 4 quinaha ecahuamana, dsotode 4 quinaha ecahuamana najari. Tamine Herode attipa: —Nidsa ejete Pascoa jicadsana Pedrocca ima cattermanijine huahua onana. Nadsana toponi cocorodsa qquenadsapa madija huapima qqui toquinadsa dsoqquehijine –najari. <sup>5</sup> Nadsapa Pedro toponi cocorodsa huedsaraha Jesodsa toquejenajaridenipa odsa onihihuaji Pedrotohui Diodsa huati huati dsanapomanajari.

### *Diojine Pedro toponi cocorodsa qquenajari*

<sup>6</sup> Najaro dsomedsa Pedropa toponi cocoro bodidsa huedsajari. Cadena pamacosadsa biji jore quinadsapa soldado ahuaji hua ahuaji hua nahi nocconidsa Pedro huittidsadsa huadajari. Pohua cacahuade ohuahadenipa noccobijidsa bajari. Huada ssiajana Herodepa Pedrocca ima cattermade huahua nahijineraha najaro dsomedsa Pedro amossi najari. <sup>7</sup> Nahi toponi cocorodsa ia Medsede Diocca dodosse memehujicca ahuatodsapa tossiajabaqqui najaro. Pedro huadaraha pparidsa dipi nadsa: —¡Huassinaja titehemaji! –nanaja bijicca cadena jeohujaja najari. <sup>8</sup> Nadsapa: —Jari, ticca etero tedsaji, temoricca sadaria naco tedsajo –najari. Huedsadsapa Diocca dodosse huati tapomajari: —Ticca etero motaranicca naqui tedsadsa onatti tiqquenaji –najari.

<sup>9</sup> Nadsapa Diocca dodosse tahide tojeninejari, Pedropa najari natti toqquenaraha pohua bodipa: —A, ajaropi pina occa huadassa nani –najari. Diocca dodosse pajissa pohua eqquenajariraha Pedropa ssamo tajari. <sup>10</sup> Nadsapa noccobiji cacahuade huahueri naridsaraha deniccadsa tossoqquimani, deniccadsa tossoqquimani tanimanajari. Noccobiji amossinihuajiccapi ppejo nahatoni huacossaraha nahihuaji bacco tanimanadsapa noccobiji poni ehuerani tohuabajaro. Nadsapa tohuedemanidsapa jahui tohuedadada... Diocca dodosse amossi najari.

<sup>11</sup> Pedropa qquenadsa bodi huatomajari: —A, jidapapi qqui onani pajissaraha Diocca dodossejine oqquenajaro. Ohua jarade jodiodeni naco Herode ohua inanadsoqquehijine tohuini quinaraha jidapapi dsori onani –najari Pedro.

<sup>12</sup> Nadsapa Pedro aja pohua pajissa qquenajaricca ima bodi huatomahissa tadsapa Mariacca odsahuaji toccajari. Ponipi Huanocca ami, aja Huano pohua oni ohuahapa Maraco. Nahi Mariacca odsadsapa madija Diodsa huatide toqueriqquija najari. <sup>13</sup> Nahidsa bacco tadsapa toqquedsimahijine amossinihuajicca noccobijidsa coba coba nadsa huahua najari. Mariacca medse Rode mittadsa —¿Nejecojari huahua najari? –nadsapi qquide qquenajaro. <sup>14</sup> Nanaja Pedro atti ponidsa jidsera nadsapi huatidsedsa noccobiji taborani joppa todsimanijaro. Attinipi: —¡Pedro ccanihi!

¡Amossinihuaajicca noccobijidsa huajari! -najaro. <sup>15</sup> Naraha bodideni pajissa quinaradsa: —Timajidsajaro, ccani-jarahi -quinajari. Naraha Rode attinia: —¡Pajissa najaripa! -najaro. Naraha: —Najari jarahitide. Pohua cacahuade Diocca dodosse memehuaajicca itide -quinajari.

<sup>16</sup> Naraha Pedropa coba coba nahi paja najari. Nadsapi noccobiji icatabojid-samananeje Pedro jidsera nadsapa jabojo quinajari. <sup>17</sup> Nadsapa imahaha cosseri naraha Pedro pohua dsepe da nadsa: —Joma tiquinaccaji. Occa ima huati onaccana -najari. Nadsapa Diojine pohua qquenahicca ima pohuadenidsa huati huati tajari. Jicadsapi: —Aji occa ima Jesodsa jehe quinarajidenicca tamine Satiacodsa huati tiquinana, aja imecotedeni huapimadsa naqui huati taridsamanana, occa ima nahatoqquiri nahijine -najari Pedro. Nadsapa nahicca madija inebobaqquidsa odsa onihihuaaji toccajari.

<sup>18</sup> Naraha aja Pedro cacahuade soldadodenipa cassiajamanadsa qqui toquinaraha amossi nadsapa jabojo quinajari. Ssamoni ahuamanadsapa: —¿Nejecohuaji ajadsa huedsajaripa? ¿Nejecoma nadsa joppa tajarinaja? -quinajari. <sup>19</sup> Tamine Herodepa: —¡Pohuatohui qqui taridsamananissa taji! -najari. Naraha qqui imanimanajaradsapa Herodepa soldadodenidsa huati tajari: —¿Nejecoma nadsa Pedropa amossi najaritta? -najari. Naraha ssamoqquiri nadsa pohuadeni cacomamanadsapa tamine Herode attipa: —¡Jari, tiadenipi tijicaji! -najari. Nadsapa pohuadeni jicahijine iaqquenabaqquimanajari. Nahi dsotodepa tamine Herode dsama arobeni Jodeadsa madiraha toccajari, odsa panani Sesareadsana madicahijine.

### *Tamine Herodepa dsoqquejari*

<sup>20</sup> Naraha tamine Herodepa odsa panani Tirocca madijadsa huadi, odsa panani Sidocca madijadsa naco huadi tajari. Herodecca madijapa najaridenidsa dsamatapa dada quinaadsa jijipamana naraha tamine Herode pohuadenidsa huadidsapa dsamatapa dada apaja quinajari. Naraha pohuadenira queriqquimanadsapa: —Jina, tamine Herodedsa jajedsimadsa icajonerapomana -quinajari. Naraha tahidepa tamine Herode biji accode onipa Barastodsaha jai tojedsimapojari. Pohuadsa attidenipa: —Jari, tamine Herode iadsa tojonemahijine ia acco ticamabaqquiji -quinajari Barastodsa. Nadsapa Barasto Herodedsa huati tajari. <sup>21</sup> Naraha Herodepa Barastodsa: —Nidsa huada onihidsana imarideni omittanijine -najari. Nadsapa najaro huada bacco tadsa pocca ima huati tahijine tamine Herode pocca etero bicani huedsadsapa madija queriqquimanahihuaaji toqquedsimajari. Nadsapa pocca huihuittari bicanidsa huittaridsapa ima huati huati tajari. <sup>22</sup> Tamine Herodecca ima mittamanadsapa huatidsemanadsa johua johua quinajari: —¡Ajajari attipa pina Dio Attissa najari! ¡Madija atti jarahi! -quinajari. <sup>23</sup> Tamine Herodepa pocca madija pohuadsa huatidsemanadsa nama quinaraha: —Nema tiquinejeraji, ohuapi Dio ojajerani -najarajari. Nadsapa Diocca dodosse memehuaajiccaine Herode amadsati quidsa najari. Pohua ime maccadsa ssari quinaadsapa huatiajari.

<sup>24</sup> Tamine Herode madicadsa pohuajine najidsohue tojaridsaraha Dio Atti dsama huapimadsa tojaridsadsapi madija Jesodsa toquejenajari tohuapiridsajari.

<sup>25</sup> Nadsapa Bernabe Saoro tedsejepa odsa panani Atioquiahuaajicca da naqquinaja Jerosarehuaaji iaccanimanadsa da quinehe jicadsapi Atioquiahuaaji tohuedanijari. Huano pohuadsa Maraco quiquinanajari naco pohuadenidsa toccajari.

## 13

### *Bernabe Saoro tedseje dsama onihihuaaji Dio Atti maride huedaridsahijine*

<sup>1</sup> Nadsama odsa panani Atioquiacca Jesodsa jehe quinarajidenidsa queriqquimana najaripa Dio Atti huahuati toqquimadedeni, Dio Atti mamaridedeni

naco. Pohuadeni onidenipa: Bernabe, Simeho-Sohuehi, Rosio Sirenehuajicca, Saoro, Manahe quinajari. (Manahepa dsama arobeni Carireacca tamine Herode tedseje canapirejari.) <sup>2</sup> Nadsapa toqueriqquimanadsa jipehe nebocossamanadsa Diodsara huatidsemananaja pohuadenidsa Dio Corime huati tajari: —Jari, Bernabe Saoro tedseje ticattejidsabaqquimanajo. Pohuadenidsa huahua onajaropi dsama onihi, onihidsa Ohuattidsa dsepedeni ijimanahijine –najari.

<sup>3</sup> Nadsapa dsotode jipehe nebocossamana-pomadsa Bernabe Saoro tatidenidsa bara quinadsa Diodsa huati toquinadsapa: —Ticadaji –quinajari.

*Bernabe Saoro tedseje Siprehuaji Dio Atti maride toquejenajari*

<sup>4</sup> Nadsama Dio Corime Bernabe Saoro tedseje dosse inabaqquidsapa passo imeni inidicca odsa panani Sereosiahuaji tohuededsippajari. Nadsapa canoa imenibote etero ssoque caniqquimani cajiniccadsa tohuededsadsa iaccabaqqui-manajari, dsama huittidsacossani onini Siprehuaji tohuedajari. <sup>5</sup> Najaro dsamadsa bacco toquinadsapa odsa onini Saraminadsa huana tocanamanajari. Nahidsa jodiodenicca Dio Atti mamari onihihuaji, onihihuaji Dio Atti maride toquejenaridsajari. Aja Huano pohuadsa Maraco quiquinanajari naco pohuadeni biji accode ccaridsajari.

<sup>6</sup> Nadsapa najaro dsama huittidsacossani Sipredsa maride jahiridsadsapa odsa onihi onini Papo bacco toquinajari. Nahi Papodsapa jodiodenicca dsoppineje bacco quinajari. Pohua onipa Barieso. Pohua attipa: —Dio Atti huati toqquimade nahato onani –nanaja naraha maidsajari. <sup>7</sup> Aja pohuapa dsama cacahuade Serjio-Paoro tedseje caberajari. Nadsama Serjio-Paoropa bodi nahatojide rajari. Najaria aja Dio Atti mittahijine jipa tadsa Bernabe Saoro tedseje huahua inabaqquijari. <sup>8</sup> Naraha dsoppineje Barieso, pohua oni dsama Cresiaccia tohuattidsa: Erima quiquinanajari, najaripa pohua tessse Serjio-Paoro Diodsa tojahijine jipera tadsa pocca imara huati huati najari. Pohua attipa: —Pohuadeni attidsa jehe onejerani. Tia naqui jehe tejeraji –najari Barieso-Erima. <sup>9</sup> Nadsapa Saoro, aja pohua oni ohuaha hua quinahipa Pablo quiquinanajari, pohua bodidsa Dio Corimecca dacorehe tojanissa tadsa dsoppineje icattoma nadsa huati tajari: <sup>10</sup> —¡Maidsajide tijirani! Tabaccora tinani, pina maidsehe jinede Satanassa tajaro. Ima bicani huahuaadide tijajaro. Ia Medsedecca marinajapi borocco taraha tijine johuidso tajaro. ¿Nejecotohui ticca imadsa epeje tejerajaro? <sup>11</sup> Naraha jidapapi Dio tia najidsodsapa tinocco siri tojana. Huada huapi tehe maji ssiejene qqui tina-jarahitohui –najari Pablo Barieso-Erimadsa.

Nadsapa amadsati nocco todsidsidsa pohua inequenimanahijine madijatohui pohuama bara naridsajari. —Ohua acco ticamamanaji –naridsajari. <sup>12</sup> Nadsapa dsama cacahuade Serjio-Paoro aja Pablo atti Barieso-Erimadsa huati tajari pajissa tojani qqui tadsapa Jeso tahimaridsa pajissa najari. Ia Medsede Jeso tahimari Pablodenicca marinajadsa: —A, poccadeni marinaja bica tani –najari.

*Pablo Bernabe tedsejepa dsama Pisidiacca odsa panani Atioquia bacco toquinajari*

<sup>13</sup> Nadsapa Pablo pohua tessedeni tedseje odsa panani Papo jippehuaji canoa imenibotedsa tohuaccamanadsapa dsama onini Pafiriadsa huana tocanamanajari. Nahi huana tocanamanahicca odsa oninipi Perje. Nahidsana Huano Pablodeni inebobaqquidsa pohua motta Jerosarehuaji toccanijari. <sup>14</sup> Naraha Pablodeni Perjedsa tojoppemamanadsapa pohuadeni amoridsa dsama arobeni onini Pisidiahuaji tohuedajari. Nani Pisidiacca odsa panani onini Atioquia bacco toquinajari. Nadsapa jassinajacca huada bacco tadsapi jodiodenicca Dio Atti mamarihuaji tohuededsimadsa pahimarijari. <sup>15</sup> Nadsapa Dio Atti mamaricca taminedeni Moisesicca marinaja hua quinajaro. Dio Atti cacomeraqquiri najaridenicca dsodoniji naqui hua quinajaro. Najaro jicadsapi Dio Atti mamaricca taminedenia poccadeni madija ojaria icadossemanadsa Pablodeni huati tajari: —Imecotedeni, Diodsa denima

etidsenijine ima bicani ticajimanadsapi jidapana huati tiquinaji. Ticcadeni ima imittana, quinapaja taminedeni –najari.

<sup>16</sup> Nadsapa Pablo pocca ima huati tahijine totehemadsa pohua dsepe da najari, tocadidire nahijine. Nadsapa pohuadenidsa huati huati tajari: —Jehe occa madija Isaraerideni, madija ohuahadeni Diodsa iboraqquiri tiquinajaro naqui titaharibobo canaji. <sup>17</sup> Ia Isaraeridenicca Diopa icca idideni icattejidsa-baqquijari. Pohuajinena icca idideni madija ohuahadenicca dsama onini Ejitodsa madimanadsapa tohuapi-jaripaja. Ejitocca taminejine pohuadenidsa ima oppina taraha, Diopa dacoraja najari. Pohuajine Ejitohuaji jahininejaripaja. <sup>18</sup> Nadsapa madija nohuerahihuaji huajano 40 naha jahiridsadsa naco Pohuadsa jehe quinahissa tajararaha Diopa paja inebobaqquirihi najarajaripaja. <sup>19</sup> Nadsapa icca ididenicca dsamabote Canahahuaji madimanahijine Diopa pohuadeni acco icamabaqquijari. Madija ohuahadeni tohuatti onihi onihi cajimanajarideni madimanahi 7 quinaraha Djojine jicaridsajari. Nadsapa icca ididenidsa: “Ajijaro dsamapi ticcadeni tojana” najari Dio. <sup>20</sup> Nadsapa pohuadeni madiridsamanajaricca huajano huapimapa 450 najari. (Aja Ejitohuaji huajano 400 naha madimanajari, madija nohuerahihuaji huajano 40 naha jahiridsajari, dsotode Canahahuaji bacco toquinadsa huajano 10 naha nahicca madijadsa jadsire inanamanajaro.)

—Nadsama huajano 450 jicadsana icca idideni imarideni cattemade tojahijine Diopa onideni hua inajonabaqquijari. Ojaria dsoqquedsapa ohuaha oni hua inajari. Najari dsoqquedsa naco ohuaha oni hua inajari. Nama dsanapomanajari. Ima cattemade jicahiccapa Dio Atti cacomerabote Samohuepaja. <sup>21</sup> Nadsama Samohue madidsapa icca idideni pohuadsa huati toquinajari: “Iapi tamine deni tojahicca tohuina inani” quinajari. Attideni nama quinadsapa Djojine Saoro tamine tojadsapa huajano 40 naha dosse dosse najaripaja. Aja Saoropa Benjamin potemahi Quis bedi. <sup>22</sup> Nahi dsotodepa Dio Saorodsa apaja nadsa Djojine Dabina tamine tojajari. Nadsapa Dabidsa ajama najari Dio Attipa: “Dsesse-Isahi bedi Dabina madija bicahi. Pohua bodipa pina obodissa najari. Pohuapa ohuattissa inana-dsanaponitohui” nahi nade Dio Atti.

<sup>23</sup> —Nadsama aja tamine Dabi Potemahipa Jesopaja. Najarina ia Isaraerideni Tonassiajade tojahijine Dio dosse inaronajari. Pina tahide Dio Pohua huati tapohuissa najaro. <sup>24</sup> Jeso maride toja-jaraccadsama tahidepa Huano Baotistana Isaraerideni huapima mari icanabaqquipodsapa ajama najari: “Jari, Diodsa tiquejenanijinepi ticcadeni imasiri tinebomanaji. Nadsana passodsa tiadeni topa odsanabaqquina” nahi nade Huano atti. <sup>25</sup> Nadsama Huanopa pohua dsoqquehicca huada tohuajiradsapi pocca mamari tabaqquidsapa tahide huati tapojari: “Aja tohui timadimanajaropi, aji ohuadsara: ‘Tia paji nitide’ titiquina najaro. Naraha ohuapi najari ojajerani. Aja tohui timadimanajaropi onatti ccajonahitohui. Ohuapi ajimani ojani. Pina pocca medsessa onanijinepi opajira-jerani. Pohua amoricca sadaria diccade naqui opajira-jerani” napohui nade Huano –najari Pablo.

<sup>26</sup> —Jehe ohuemecotedeni, aji tiadenipi Abarahao potemahi tiquejenani titaharibobo canaji. Aji motapi madija ohuaha tiquejenaraha Dio Attidsa iboraqquiri tiquinani titaharibobo canaji. Diopa ia huapimadsa pocca ima icassiejeranijinecca inaridsajaropaji. <sup>27</sup> Naraha aja Jerosaredsa madimanajaridenipa poccadeni taminedenima Jeso qqui toquinaraha bodideni ssamoqquiri najari. “Jesopa Diocca dosseniji ia Idinide” quina-jarajari. Najaro imapi Dio Atti cacomeraqquiri najarideni dsodo quinaporaha mittamana-jarajari. Poccadeni Dio Atti mamarihuaji jassinajacca huadadsa Dio Atti cacomeraqquiri najaridenicca dsodoniji mittamana mittamana naraha: “Jeso dsoqquena, dsoqquena” quinajaripaja. Nama quinadsapa pina Dio Atti cacomeraqquiri najarideni dsodo quinapojarossa nehe inanamanajaro.



<sup>28</sup> Pohuadenipa: “Jeso ima inanajaro manaconi dsoqquena” quinaraha ima cap-pirahissa tajari. Naraha tamine Piratodsa huati toquinadsa: “Jeso dsoqquena” quinadsapa pohuadeni attidsa jehe nadsapa dsoqquehijine icadossebaqqijari. <sup>29</sup> Nadsapa Jeso inanadsoqque-manajaripa pohua dsoqquehijine tahimari Dio Atti dsodo napojarocca nemanehi inapajiramananissa tajaro. Ahua porimacossanidsa idironamanadsa sibadsa tonocobirijine hui todsanidsa ibedsamanajari. <sup>30</sup> Naraha Jesopa huada 3 nadsa Djojine nahatonijari. <sup>31</sup> Nahatonidsapa pohua huatimadedeni aja Carireahuaji pohuadsa jahiridsadsa Jerosarehuaji bacco toquinajaridenidsa huada huapi taha ahahuatoni najari. Najarideni attidenipa: “Tapi Jeso camitemanihi qqui inade. Ia qqui inajari najaro ima ecomeraridsajaro” quiquinanajaripaja –najari Pablo.

<sup>32</sup> —Nadsama ohua Bernabe tedseje naqui Jeso tahimari icassiejeranijinecca tiadenidsa huati inajaropaji. Maittaccadsama Abi Diopa icca ididenidsa najaro ima huati tapojari. <sup>33</sup> Jidapana iapi najarideni potemahi iquejenajarodsa najaro ima pajissa tojajaro. Najaria Dio Pohua Bedi Jeso inahatonijaripaja, pina maittaccadsama tamine Dabi pocca jijiri dsotodeccadsa dsodo inapojaro:

“Neppe, tiapi occa Ejedeni tijani. Jidapana ticca Abi ojajaro. Tiadsa camittehe da onajaro”

nahi nade Dio. <sup>34</sup> Nadsama Abi Dio Pohua Bedi dsoqquedsa inahatonidsapa dsoqquepoma-jarahijine huati tajari. Pohua ime naqui jadsijeranjine huati tapojari. Najaro imapi Dio Atti cacomerabote Isahia dsodo inapojaro:

“Occa huatinaja pajissehe bicani nemanehi Dabidsa huati onapojaropi tiadenidsa pina ohuattissa onananitohui”

nahi nade Dio. <sup>35</sup> Najaro imapi tamine Dabicca jijiri onihidsa naqui ajima najaro:

“Ticca Ejedeni Bicabote tijine pohua ime namidsa jadsijeranjine”

naponi nade Dabi dsodo inapojaro. <sup>36</sup> Nadsama aji Dabi dsodo inapojaropi pocca ima jerani nahato inani. Aja tamine Dabipa Diodsa ibora tadsa huajano huapi taha icca idideni ecahuabaqquihissa tajari. Naraha huatiadsa ppa idsamanadsapa pocca abideni jicapojaridenissa najarohuaji tojajari. Pohua ime naqui battadsa jadsijaro. <sup>37</sup> Naraha Djojine Jeso nahatonijaripa pohua imena batta-jerajaro. Najaricca ima Dabi dsodo inapojaro –najari Pablo.

<sup>38</sup> —Ohuemecotedeni, tiadenipi ajijaro ima ticahatteraji: Jesodsa iquejenadsapi pohuajine Diopa icca imasiridsa: “Epeje, ohuati ajimani” najari. Najaro imapi tiadenidsa ecomerajaropaji. <sup>39</sup> Jesodsa pajissa inadsapi pohuajine imasiri ia tappa tabaqquijaro. Naraha Moisesicca marinajapi najarossa nejerani. Najaropi icca imasiri ia tappa tabaqquinijine pajira-jerajaro.

<sup>40</sup> —¡Paji, Dio Atti cacomeraqqui najarideni dsodo quinapojarossa najaro tiadenidsa ssonarirana! Aja Dio Atti cacomerabote Abaco pocca dsodonijidsa ajijaro ima dsodo inajaro:

<sup>41</sup> “Jari, Ohuati jaja ticanamanajarodeni ticattomama canaji. ¡Ojine qqui tiquinadsapi oppinani temanadsa tijicanitohui! Nidsa timadimanaccadsama ojine jabojuhue imeni pajissa tojanitohui. Tiadenidsa najaro ima tojanijine huatide caji taraha pajissa tiquinejeranjine”

napohui nade Dio –najari Pablo.

<sup>42</sup> Nadsama najaro ima maride jicadsapa Pablo Bernabe tedseje jodiodenicca Dio Atti mamarihuaji huedenadsapa pohuadenidsa queriqquimanajarideni huati toquinajari: —Jassinajacca huada bacco tapomadsa Jeso tahimari ia mari ticanabaqquipomanijine ticadajonapomana –quinajari. <sup>43</sup> Nadsapa queriqquimanaha

jicadsa jodiodeni motapa Pablodenidsa jai tojajari. Jodio quejena-jararaha jodio-denicca marinajadsa toquejenajarideni naco jai tojajari, ima denima mittamanahijine. Nadsapa Pablodeni attidenia: —Jesodsa pajissa tiquinadsapi bica tani, nema tidsanapomanana. Dio tiadenidsa huati cahanari canahicca ima tinebomana-jerana –quinajari Pablodeni huati huati toquinadsa.

<sup>44</sup> Nadsapa jassinajacca huada onihi bacco tapomadsa queriqquimanapomajari. Odsa pananica madija huapima Dio Atti mittade pohuadenidsa queriqquimana-jari. <sup>45</sup> Naraha jodiodeni motapa Pablo Bernabe attidenitohui madija huapi taha queriqquimanahi qqui toquinadsapa najaro acconi huadimanajari. Nadsapa attideni tabaccora tadsa atti atti quinajari: —Ticca imapi pajissa jerani, ponima huati huati tinajaro. ¡Ticcaniji, tabaccora tinani! –quinajari Pablodsa. <sup>46</sup> Naraha Pablo Bernabe tedsejepa cappinenera tadsa pohuadenidsa huati toquinajari: —Tahidepi aji icca madija jodiodeni tiadenidsana Dio Atti icassiejeranijinecca ima eccoraponijine Dio ia tocadossebaqquidsapa nema inanajaro. Naraha tiadenipi timittamananijine jiperaqquri tiquinadsapi pajissa tiquinejerajaro. Nema tiquinejeradsapi tettideni pina: “Iapi Diocca camittehe jiquejeranicadsa imadi-dsanaponijine ipajira-jerani” tiquinajarossa najaro. Jidapapa aja jodio quejena-jarajaridenira mari icanabaqquina, inajaro. <sup>47</sup> Abi Diopa madija huapima maride iquejenanijine Pohua Atti dsodo naponicadsa ia tocadossebaqqujari. Najaroa aji Pohua Atti cacomerabote Isahiacca dsodonijidsa ajima najaro:

“Ojine tiadeni pina ssiajanissa tiquinadsapi jodio quejena-jarajaridenidsa madija tocassiejerahijine tahimari ahuato tinanamananijine mari mari titicanabaqquiridsamana nadsapi dsama nemanehedsa madiridsamanajarideni tocassiejerahijine, onajaro”

napohui nade Dio –najari Pablo.

<sup>48</sup> Pablo atti nama nadsapa jodio quejena-jarajarideni mittamanadsapa huatidsemaneri najari: —Ia Medsede Jeso tahimari bica tani, bica tani –quinajari. Nadsama aja camittehe jicaquera tanicca cajimanahijine Dio icattejidsabaqqujojarideni Jesodsa jehe quinajaripaja.

<sup>49</sup> Nadsapa ia Medsede tahimari icassiejeranijinecca najaro dsama arobeni nemanehedsa tojaridsajaro. <sup>50</sup> Naraha jodiodeni motapa Pablodenidsa huadimanadsa denima mari mari quinahijine jiperaqquri nadsapa ima inanaridsamanajaro. Pohuadenijine nahi Atioquia odsa pananica cacahuadedeni Pablodenidsa huadimanajari. Amonejedeni toquejenajaro aji Diodsa iboraqquri najaro ponideni naqui Pablodenidsa huadimanadsa ima ssaja taridsadsapi poccadeni dsama arobenihuaji mohua ininebaqquimanajari. <sup>51</sup> Nadsapa Pablo Bernabe tedseje najaridenicca tabaccorehe ahuato tanijine pohuadeni amoricca ssiqui catojanijine pporo pporo quinadsapa: —¡Epejena! Ticcadeni ima tabaccora tani –quinadsa odsa panani Iconiohuajina tohuedajari.

<sup>52</sup> Naraha nahi Atioquiacca Jesodsa jehe quinajarideni huatidsemaneri najari. Dio Corime naco pohuadeni bodidsa tojaridsahissa tajari.

## 14

### *Pablo Bernabe tedseje Iconiodsa bacco toquinajari*

<sup>1</sup> Nadsama Pablo Bernabe tedseje odsa panani Iconiodsa bacco toquinadsapa jodiodenicca Dio Atti mamarihuaji totohuededsima nadsa mari mari ihicanabaqqui najari. Attideni bica tadsa Jeso tahimari mari icanabaqquidsapa jodiodeni mota huapi taha, jodio quejena-jarajarideni naco mota huapi taha pajissa quinajari. <sup>2</sup> Naraha jodiodeni mota aja Jesodsa jehe quina-jarajaridenipa jodio quejena-jarajaridenidsa huati naridsamanajari, Pablodenidsa tojiperamanahijine. Nadsapa pohuadeni attijine najarideni naco Pablodenidsa huadimanajari. <sup>3</sup> Nama quinaraha Pablo Bernabe

tedseje nahi pohnadenidsa madimana-dsanapojari. Ia Medsede Jesojine cappinenera tadsa Dio madijadsa huati cahanari canahi tahimarini mari icanabaqqui-dsanapojari. Nadsapa najaro ima pajissa ahuato tanijine Dio Pablodenidsa pocca nahatohue da inadsapi canahatorimanana canaridsajari. <sup>4</sup> Naraha nahi odsa pananicca madija ima inapamamanadsapi motapa: —Jodiodeni Jesodsa jehe quina-jarajaridenicca imana bica tani -quinajari. Naraha motadeni naco: —Jeso tahimari maridedenicca imana bica tani -quinajari. <sup>5</sup> Naraha Pablodenidsa jiperaqquiri najarideni aja jodiodeni mota, jodio quejena-jarajarideni tedseje, poccadeni taminedenima quejemamanadsa ima najoramanapojari: —Pablodeni damama inadsa inajidsobaqquidsa sibadsa iquinabaqquina, topamajonahijine -quinajari. <sup>6</sup> Naraha Pablo Bernabe tedseje ima mittamanadsapa dsama onihi Licaoniahuaji dsaja tajari. Najaro dsamacca odsa panani onini Listaradsa bacco toquinajari. Dsotode naco odsa onihi Derbedsa bacco toquinapomajari. Odsa pamema najarodsa naqui bacco taridsamanajari. <sup>7</sup> Najaro dsama Licaoniahuaji huedaridsadsapa Jeso tahimari icassiejeranijinecca mamariri naridsajari.

*Pablo Bernabe tedseje Listaradsa nanajidso toquejenajari*

<sup>8</sup> Nadsapa nahi odsa panani Listaradsa madija amori siri qqui quinajari. Pohnapa nama naha tossonajari, ccaridsahijine ssamo tajari. <sup>9</sup> Aja amori siripa Pablocca marinaja taharibode huittajari. Nanaja Pablopa amori siri icattoma nadsa pocca jeheniji nahato tajari. Aja pohna bodipa: —Jehe, Jesopa ohua tonanomihijine pajirahi -najari. <sup>10</sup> Nadsapa Pablo pohnadsa jadsirema huahua najari: —¡Titehemaji! ¡Tenissa taji! -nanaja amadsati totehema, ccaridsa najari.

<sup>11</sup> Nadsama amori siri Pablo attidsa Djojine tobicahi madija qqui toquinadsapa dsama Licaoniacca madija pohnadeni attidenidsa johua johua quinajari: —¡Jidapapa ia cacahuade memehujicca madija toquejenadsa bacco naronamanahi, bacco naronamanahi! -quinajari. <sup>12</sup> Nadsapa pohnadeni cacahuade memehujicca onidsa icanacanibaqqui-manajari. Bernabepa pohnadeni cacahuade deni tojahicca Seo onidsa cacanjari. Pablopa huatijide rajarijine pohnadeni cacahuadedenicca ima huahuatide Hermese onidsa cacanjari. <sup>13</sup> Nadsapi najaro odsa panani Listaradsa pohnadeni cacahuade Seodsa poccadeni daniji dada toqquimahijinecca odsa cajimanajari. Odsa pananicca jahui bacco todsimaponi inidihuaji cahittajaro. Nadsapa Seodsa poccadeni daniji dada toqquimade tamine pocca madija tedseje Pablodenidsa huatidsemanadsapa: —Icca daniji pohnadenidsa da inana -quinajari. Nama quinadsapa bohui maqqui pamaha eccajonabaqquimana, mohue nahatohui tomattocejine naco eccajonamana najari. Pablodenidsa: —Ia cacahuade tiquejenani -quinadsa bohui inapamajona-manahijineraha.

<sup>14</sup> Naraha Bernabe Pablo tedseje pohnadenidsa madija huatidsemanadsa bohui inapamajona-manahijine quinahi mittamanadsapa jabojo quinajari. Bodideni ocassera tadsa poccadeni etero mattonidsa joca sseo quinadsapa madija domodeni huahihuaji dsaja todsimajari. Attideni dacoradsa huati toquinajari: <sup>15</sup> —¿Nejecotohui ticcadeni ima iadsa nema tinanamanajaro? ¡lapi madija, aji tiadenissa inani! Tiadenidsa ima bicani icassiejeranijinecca huatide icadajonajaro. Aji ponima iadsa: “Ia cacahuade Seo, Hermese” titiquina najaropi ¡tinebomanaji! Ticcadeni dio pohnamaccadsa: “Ia cacahuade” titiquina najaropi tinebomanaji. Dio camitta tajarid-sara pajissa tiquinaji. Pohna huapima inahatoridsajaro. Meme inahato, dsama inahato, passo imeni inahato najaro. Meme abari inahato, dsama abari inahato, passo abari inahato, ia huapima naqui ia tonahatobaqquijari. <sup>16</sup> Naraha maittaccadsama Diopa madija huapima eccocobaqqui-jaradsapa poccadeni ima tohuira disseraqqiri nadsa nama najonamanajari. <sup>17</sup> Nama quinaporaha Dio Pohnajine pocca biquehe huapimadsa ahuato dsanapojaro. Pohnajine passo tiadenidsa ccahacca-cca najaro,

dsamatapa naco moro moro tajari. Pohuajine jijipa titicajimana dsanapojaro, Pohuajine naqui tetetidsemana najaro. Najaro huapimadsa tibodidenipi: “Dio madihi” titiquina nanijineraha –quinajari Pablodeni.

<sup>18</sup> Pablodenipa huati huati quinaraha mittamana-jarajari. Bohui naco inapamajon-ahijine disseraqquri naraha Pablodeni denima huati huati quinadsa mittamanadsapa: —Epejena, pohua –quinajari.

<sup>19</sup> Nanaja Atioquiacca, Iconioca jodiodeni aja Pablodenidsa jiperaqquri najarideni nani Listaradsa bacco najonamanajari. Najaro odsa pananicca madijadsa huati naridsamanadsa Pablodenidsa ima inanamanapomajaro. Nadsapa pohuadenijine Listaracca madija naco Pablodenidsa huadimanajari. Nadsama aja huadimanageridenina Pablo dsoqquehijine sibadsa iquinaqquimanajari. Iquinaqquimanadsa Pablopa pohuadenidsa pina paja huatiarjarissa nadsa odsa panani huapihuaji joca coro quinadsa: —Jidapapa dsoqquehi –quinajari. <sup>20</sup> Naraha aja Jesodsa jehe quinajaridenipa Pablo ponahihuaji qquide jahijona, bacco najonamanadsa domo huahuajaninaja Pablo totehemadsa odsahuaji toccanijari. Huada ssiajapa Pablo Bernabe tedseje Derbehuaji tohuedajari. <sup>21</sup> Nahi Derbehuaji bacco toquinadsa naco Jeso tahimari icassiejeranijinecca mari icanabaqquidsapa madija mota huapi taha Jesodsa pajissa quinajari.

### *Pablo Bernabe tedseje dsodonimanajari*

Nadsapa Derbehuaji maride jicadsa pohuadeni nattihuaji dsodonimanadsapa Listaradsa bacco, Iconiodsa bacco, Atioquiadsa naco bacco nanimanajari. <sup>22</sup> Huedanidsa naco Jesodsa jehe quinajarideni huatidsemanahijine bodideni acco icamabaqquiridsapomajari. Pablo attidenia: —Jesodsa pajissa tidsanapomanaji. Djojine ticca-deni jeheniji todacorani dsanaponitohui. Ocasserani teridsamanaraha nema nehe tinahanamanaridsana. Tidenidsama ia naqui ocasserani inahananitohui. Nema inadsana Diocca cacahuehedsa bacco inanijine, inajaro –quinajari. <sup>23</sup> Nadsapa aja odsa panani onihi, onihi naridsajarocca Jesodsa jehe quinajarideni cacahuadedeni toquejenahijine icattejidsa-baqquimanajari. Dio pohuadeni acco icamabaqquihijine jipehe nebocossamanadsa Pohuadsa huati toquinajari: —Abi Dio, ajararideni acco ticamabaqquina, ticca Ejedenidsa jehe quinajarideni ecahuabaqqui-manahijine –quinajari.

<sup>24</sup> Nahi dsotodepa Pablo Bernabe tedseje dsama arobeni Pisidia tossoqquimanimanadsapa dsama Pafiria bacco tanimanajari. <sup>25</sup> Aja Pafiriacca odsa panani Perjedsa Dio Atti maride toquejena nanimanajari. Nahi dsotodepa odsa panani onihi Atarihuaji bacco dsippanimanajari. <sup>26</sup> Nadsapa dsama Siriacca odsa panani Atioquiahuaji tohuedanihijine canoa imenibotedsa tohuededsanidsapa tohuaccanimanajari. Najaro odsa pananidsapi tahide pohuadeni tojoppema-manapohuijine Jesodsa jehe quinajarideni Diodsa huati toquinapojari, Dio pocca tohuati huanehema pohuadeni ecahuabaqquihijine. Nadsapa Pablo Bernabe tedseje Dio Atti eccoraridsamanehe jicadsapi najaro odsa pananihuaji huedanijari. <sup>27</sup> Atioquiadsa bacco nanimanapomadsapa Jesodsa jehe quinajarideni queriqquihijine huahua inabaqquimanajari. Queriqquimanadsapa Jeso tahimari maride pohuadeni huedaridsahicca ima huapima huati huati toquinajari. Djojine jodio quejena-jarajarideni bodideni najorahissa tadsa Jesodsa jehe quinajari tahimarideni naco huati huati toquinajari. <sup>28</sup> Nadsapa nahi Atioquiacca Jesodsa jehe quinajaridenidsa abadsico huapi taha madimanasanapojari.

<sup>1</sup> Nadsapa Pablo Bernabe tedseje odsa panani Atioquiadsa madimanaccadsa dsama Jodeacca madija bacco quinajari, Jesodsa jehe quinajarideni maride jahijonajari. Poccadeni marinajapi ajima najaro: —Aji, jodiodenicca huissinaja pina Moisesicca marinajassa najaro tetideni ajimadsapi oppina tani. Najaro huissinajadsa jiper-aqquri tiquinadsapi ticassiejera-jeranitohui –quinajari Jodeacca madija. <sup>2</sup> Naraha Pablo Bernabe attidenipa: —Nema nejerani, oppinera tani –quinajari. Nadsapa Moisesicca marinaja nahatoqquiri najarideni tedseje ahuaji huati ahuaji huati quinajari. Naraha poccadeni ima tobica-jeradsapi Atioquiacca madija attidenia: —Jari, najaro ima huatide imecotedeni Jerosarehuaji dosse inabaququina, aja Jesocca dodosse tabaqquidsa huati toquinahijine. Nahicca Jesodsa jehe quinajarideni cac-ahuadedeni tedseje ajijaro ima icattemamananijine –quinajari. Nadsapa icattejidsa-baqquimanajari Pablo, Bernabe, nahi Atioquiacca Jesodsa jehe quinajarideni pama quinadsa odsa panani Jerosarehuaji dosse inabaqquimanajari.

<sup>3</sup> Nadsapa aja icattejidsa-baqquijaridenipa Atioquiacca Jesodsa jehe quinajarideni attidenidsa Jerosarehuaji jai tojjari. Dsama arobeni Penisiadsa bacco toquinadsapa nahicca Jesodsa jehe quinajaridenidsa Pablodeni huati toquinajari: —Jehe, icca benehidsapi jodio quejena-jararaha poccadeni ima nebomanadsa jidapapa Abi Diodsana toquejenaridsadija –quinajari. Dsama arobeni Samariadsa bacco toquinadsa naco najaro ima huati naridsamanajari. Nadsapa Jesodsa jehe quinajarideni huapima poccadeni ima mittamanadsapa huatidsemanajari.

<sup>4</sup> Nama najonamanajaria Jerosare bacco toquinajaripaja. Bacco toquinadsapa Jerosarecca Jesodsa jehe quinajarideni, Jesocca dodosse tabaqqui, Jesodsa jehe quinajarideni cacahuadedeni quinadsa huapima pohuadeni qquide queriqquidsa: —¿Nija, bicaqquri tiquinaqui? –quinajari. Nadsapa Pablo Bernabe tedseje pohuadenidsa huati toquinajari: —Jehe, icca benehidsa Dio Atti maride icadaridsadsapa Djojine jodio quejena-jarajarideni naco Jesodsa pajissa naridsamanade –quinajari. <sup>5</sup> Naraha jodiodeni marinaja pariseodsa jehe quinajarideni mota Jesodsa jehe quinajari Pablodenicca ima mittamanadsapa totehemamanadsa huati toquinajari: —Aji ettipi madija ohuahadeni naco jodio quejena-jararaha ia Medsede Jesodsa jehe quinadsapa huissinaja cajimanana, inajaro. Moisesicca marinajadsa iboqquri nadsapa oppina tani –quinajari.

<sup>6</sup> Nadsapa Jesocca dodosse tabaqqui Jesodsa jehe quinajarideni cacahuadedeni tedseje queriqquimanapomajari, najaro ima icattemamananijine. <sup>7</sup> Nadsapa huapima ahuaji huati, ahuaji huati, ahuaji huati quinajari manaco Pedro totehema nadsa pohuadenidsa huati tajari: —Ohuemecotedeni, occa ima tiadenidsa jidsera tapode. Aja madija ohuahadeni naco jodio quejena-jararaha pohuadenidsa Pohua Atti ohuaccoranjine Abi Diopa ohua tocattejidsajaride. Jeso tahimari icassiejeranijineccadsa pajissa quinahijine ohua cadossejaride. <sup>8</sup> Diopa madija bodideni nahato tajari. Jodio quejena-jarajarideni Jesodsa pajissa quinahi Dio nahato tadsapa pohuadenidsa Pohua Corime inanaridsajari. Pina iadsa Pohua Corime inanaridsapojari naja. Nama nadsapa Dio Pohuajine jodio quejena-jarajarideni naco pocca madija toquejenahijine jipa tahi ahuaato inanajaro. <sup>9</sup> Diopa pina iadsa inanajarossa najaro pohuadenidsa naqui nema inanajaro. Aja Pohuajine Jesodsa pajissa quinadsapa pohuadeni bodi inahirebaqquijari. <sup>10</sup> Naraha tiadenipi ¿nejecotohui tibodidenidsa: “Dio Pohuajine bica tejerani” tiquinajaro? “Dio nattome inana, ettidsa huadi-jarahitide” ¿tiquinajaroqui? Aji tettidenipi: “Jodio quejena-jarajarideni Jesodsa pajissa quinadsapa Moisesicca marinaja nemanehedsa iboraqquri nana” tiquinajaro. Naraha icca ididenipa Moisesicca marinajadsa iboraqquri nahijine pajiramana-jarajari. Ia naqui najaro marinajadsa iboraqquri inanissa tanijinepi ipajira-jerani. Nadsapa imecotedeni jodio quejena-jarajaridenidsa: “Moisesicca marinaja nemanehedsa iboraqquri tiquinaji”



tiquinadsapi pina madija mijira tajaridsa: “ccanajabote jore tinajo” tiquinajarossa najaro. <sup>11</sup> Naraha nema tiquinejeraji, inajaro. Ia Medsede Jesona pocca tohuati huanehema pocca dacorehema ia tonassijabaqquijari. Najaro imadsa pajissa inajaro. Jodio quejena-jarajarideni naco pina iassa quinajari. Jesopa pocca tohuati huanehema pocca dacorehema pohuadeni naco inassijabaqquijari –najari Pedro atti.

<sup>12</sup> Nadsapa madija huapima tocadidire nadsa taharibobo canadsapa manaco Bernabe Pablo tedseje poccadeni ima huati toquinajari. Aja jodio quejena-jarajaridenidsa Dio Atti maride huedaridsadsapa Dio canahatori canaridsajari tahimari huati huati toquinajari.

<sup>13</sup> Poccadeni ima jicadsapi manaco Satiaco huati tajari: —Ohuemecotedeni, ohuatti titaharibobo canaji. <sup>14</sup> Ssino-Pedro iadsa huati tapojaricca imapi ajima najaro: “Diopa jodio quejena-jarajaridenidsa pocca tohuati huanehe ahuato inanapojaro. Pohuajine jodio quejena-jarajarideni mota pocca madija toquejenahijine icattejidsa-baqqipojari” nade Ssino-Pedro. <sup>15</sup> Ima najarossa najaropi maittaccadsama Dio Atti cacomerabote Amo dsodo inapojaro:

<sup>16</sup> “Ia Medsede Dio Attipa ajima najaro: ‘Jehe, Dabi Potemahi jodiodenicca cacahuehepi jicani. Pina odsa toquehedimajarossa najaro.

Naraha nidsa occanipomadsapi Dabi potemahipa ohuacahuabaqqui-pomahitohui.

Ojine poccadeni cacahuehe tojemaninijinepi pina odsa jaca camanijarossa nanitohui.

<sup>17</sup> Nama onanabaqquidsapa madija huapima aja jodio quejena-jarajarideni naco pohuadeni Medsede Otohui qqui naridsamanadsapa Ohuadsa bacco quinahitohui.

Occa madija toquejenana, onadsa ocattejidsa-baqquihitohui’ napohui nade Dio Atti maittaccadsama.

<sup>18</sup> Jehe, ia Medsede Diopa maittaccadsama Pohua Atti iadsa huati najonajari, itedsejemacca ima nahatoqquiri inanijine” nahi nade Dio Atti cacomerabote.

<sup>19</sup> —Nadsama ohuattipi ajima onajaro: Madija ohuahadeni jodio quejena-jarajaripa poccadeni ima jadani nebomanadsa bodideni cacajiqquimeradsa Diodsa toquejenaridsajaridenipa ijine ocasserani ahuamana-jarana. Pohuadenidsa: “Moisesicca marinajadsa iboraqquiri tiquinana” inejerana onajaro. <sup>20</sup> Nadsapi pohuadenidsa ajijaro imara dsodo inana: Aja siba nahatonidsa bani da tahiccapa mitta tiquina tajarajo, tijipamananijine oppina tani. Bani ssipori niqwi nahi dsoqquedsa emene tocca-jarahicca naco tijipamana tejeraji. Bani emene tijipamanahijine naco oppina tahi. Huananehe naqui tinebomanaji. Pina maqquideje amoneje cajiraha amoneje onihi aja ajapi poni. Amoneje maqquideje cajiraha maqquideje ohuaha naja najapi poni. Tabiradeni naco pohuama aja aja canaridsera-jarana. Najaro imara pohuadenidsa dsodo inana, onajaro. <sup>21</sup> Najaro ima huapima Moisesicca marinajadsa dsodo nanipi dsama huapimadsa tojaribaqquijaro. Najaro marinaja maittaccadsama mari mari quinapojaripa jidapana iadsa bacco najonajaro. Icca dsamadsa, dsama onihidsa, dsama onihidsa naqui jassinajacca huadadsa Dio Atti mamarihuaji pocca marinaja mari mari quinahi paja naccahi –najari Satiaco.

### *Jodio quejena-jarajaridenidsa ima dsodo quinajaro*

<sup>22</sup> Nadsapa Jesocca dodosse tabaqqwi, Jesodsa jehe quinajarideni naco, pohuadeni cacahuadedeni tedseje huapima attidenipa: —Jehe, ajima inana. Najaro ima Atioquiacca imecotedenidsa dosse inana. Pablo Bernabe tedseje dsojo inanimanani-jine bica tani –quinajari. Nadsapa poccadeni madija pamaha naco Pablodenidsa tohuedahijine icattejidsa-baqquimanajari. Ojaria onipa Joda, pohua oni ohuahapa Barsaba. Pohua tesse icattejidsamanajari onipa Sila. Pohuadeni pamahapa Jesodsa

jehe quinajaridenidsa deni toquejenajari. <sup>23</sup> Nadsapa pohuadenidsa ima teppe dosse quinajaropi ajima najaro:

—Nija imecote jodio tiquejena-jerajardeni ¿bicaquiri tiquinaqui? Iapi Jesocca dodosse tabaqqui odsa panani Jerosarehuaji Jesodsa jehe quinajarideni cacahuadedeni inadsa tiadenidsa icca ima dsodo inajaro. Aji odsa panani Atioquiadsa timadimanajarodenidsa, dsama Siriadsa timadimanajarodenidsa, aji dsama Ciliciadsa timadimanajarodenidsa naqui icca ima dosse inajaro. <sup>24</sup> Aji ima imittajaropi: Icca dsama Jodeahuajicca madija tiadenihuaji jai tojajaridenicca marinajajine ocasserani temanani imittani. Attidenipa: “Jodiidenicca huissinaja ticajimanaji, Moisesicca marinajassa tinanamananijine” quinadsapa ssamoni temanajaro. Naraha najaridenipa ia dosse inabaqqui-jarade. <sup>25</sup> Nadsama imahaha icanadsa jehe icaniredsapi: “Imecotedeni Atioquiahuaji huatide dosse inabaqquina” inadsapi ahuaicca imecotedeni pamaha icattejidsabaqquidsa tiadenihuaji dosse inabaqquihitohui Bernabe Pablo tedseje. Jehe, Bernabe Pablotenipa imecote bicaca tajari, pohuadenidsa eti huana tajaro. <sup>26</sup> Pohuadenipa ia Medsede Jesocriso tahimari maride toquejenaridsadsa oppinani ahuaridsamanaraha attidenipa: “Ipamajonadsa naqui bica tani” quinajari. <sup>27</sup> Nadsama ia dosse inabaqquihijinepa Joda Sila tedsejena icca ima iaccamanadsa tiadenidsa huati toquinahitohui. <sup>28</sup> Dio Corime ibodi acco camadsapa etti ajima inajaro: Aji Moisesicca marinaja nemaneha tibodidenidsa ccanaja tadsapi Moisesicca marinaja mota deni tojaniccadsara iboraqqui tiquinaji, inajaro. Najaropi ajima najaro: <sup>29</sup> Aja madija icca Diodsa toquejena-jarajaridenicca bani poccadeni siba nahatonidsa da tahiccapa mitta tiquina tajarajo, tijipamananijine oppina tani. Bani ssipori niqiu nahi dsoqquedsa emene tocca-jarahicca naco tijipamana tejeraji. Bani emene naco tijipamanahijine oppina tahi. Huananehe naqui tinebomanaji. Pina maqquideje amoneje cajiraha amoneje onihi aja ajapi poni. Amoneje maqquideje cajiraha maqquideje ohuaha naja najapi poni. Tabiradeni naco pohuama aja aja canaridsera-jarana, inajaro. Tiadenipi aji icca dsodonijissa tinanamanadsapi bica tani, inajaro. Epejeni icca ima –quinajari poccadeni ima teppedsa.

<sup>30</sup> Nadsapa Joda Siladenidsa poccadeni ima da quinadsapi: —Dio onima jai tjanissa tana –quinajari. Nadsapa Pablo, Bernabedeni tohuedanidsapa Joda, Sila tedseje pohuadenidsa tohuedajari. Atioquiadsa bacco tanimanadsapa nahihuaicca Jesodsa jehe quinajarideni tedseje queriqquimanadsa pohuadenidsa ima teppe da quinajaro. <sup>31</sup> Nadsapa Jesodsa jehe quinajarideni ima teppe hua quinadsa ima bicani mittamanadsapa huatidsemanajari. <sup>32</sup> Joda Sila tedsejepa Dio Atti huahuati toqquimadedeni toquejenadsapa Jesodsa jehe quinajaridenidsa Dio Atti huati iqquimamanajaro. Poccadeni huatinaja dequeraniccadsa huati huati toquinadsapa Jesodsa jehe quinajari bodideni inahatidse-baqquimanadsa poccadeni jeheniji todacorani najaro. <sup>33</sup> Nadsapa nahidsa madimana-dsanaponaja pohuadeni dosse inabaqqui-manapojaridenihuaji tohuedanijine Atioquiacca Jesodsa jehe quinajari Jodadeni dosse inanibaqquimanajari. Attidenipa: —Jehe, Dio pocca jonehema tiadeni tohuacahua-baqquihissa tahitohui –quinajari. [ <sup>34</sup> Naraha Silapa ibohuijine tohuini nadsa toccani-jarajari. ] <sup>35</sup> Pablo Bernabedeni naco Atioquiadsa madimanaccajari. Pohuadenipa Atioquiacca Dio Atti mamaridedeni tedseje ia Medsede tahimari icassiejeranijinecca mari mari dsanapomanajari.

### *Pablo pocca benehi dsotodecca*

<sup>36</sup> Nadsapa nahi Atioquiadsa madimana-dsanaporaha Pablop Pablo Bernabedsa: —Jina, Dio Atti mari icanabaqqui pohuihuaji icadapomana. Aja imecotedeni Jesodsa jehe quinajarideni ¿nejecoma quinahi? –najari Pablo.

<sup>37</sup> Nanaja Bernabepa Huano pahuadsa Maraco quiquinanajari pahuadenidsa toccahijine tohuini najari. <sup>38</sup> Naraha Pablo attipa: —Najaripa pohua. Tahidena ibiji accode tojaraha dsama Pafiriahuaaji ia tonebobaqquide, denima Dio Atti maride iquejena-dsanaponijineraha -nade. <sup>39</sup> Nadsapa imahaha canaraha jehe canirejaradsa pahuadeni queneboredsapa ahuaji toccade ahuaji toccade quinajari. Nadsapa Bernabe Maraco tedseje canoa imenidsa tohuedajari. Dsama bedeni passo imenidsa huittidsacossani onini Siprehuaaji bacco toquinajari. <sup>40</sup> Naraha Pablopa: —Silana ohuadsa toccana -nadsapa tohuedahijine Jesodsa jehe quinajarideni Diodsa huati toquinajari: —Abi Dio, ajajarideni tecahuabaqquihissa tana. Ticca tohuati huanehema huedaridsahissa tahijine -quinajari. Nadsapa tohuedajari. <sup>41</sup> Tohuedadsapa dsama Siriadsa bacco toquinadsa maride toquejena, denimacca dsama Ciliciadsa bacco toquinadsa maride toquejena dsanapojari. Nahihuaajicca Jesodsa jehe quinajarideni inahatidsebaqquija dsanapohui najari.

## 16

### *Timoteopa Pablo Siladeni huatimade tojajari*

<sup>1</sup> Nadsapa Pablo Sila tedseje odsa panani Derbedsa bacco toquinajari. Denima tohuedajaripa odsa panani Listaradsa bacco toquinajari. Nahidsapa Timoteo madijari. Puhuapa Jesodsa jehe napojari. Pohua imeni naqui Jesodsa jehe napojaro. Ponipi jodio, naraha imehipa dsama Cresiaccia madija. <sup>2</sup> Nadsapa aja Listaracca Jesodsa jehe quinajarideni attideni, odsa panani Iconiocca Jesodsa jehe quinajarideni attideni naco: —Timoteopa dsabisso bicahi -quiquinanajari. <sup>3</sup> Nadsapa Pablo attipa: —Timoteopa ia acco tocamabaqquihijine iadsa toccana -najari. Naraha Timoteo imehipa jodio jaraha dsama Cresiaccia madijaha nadsapa huapima pahuadsa nahatoqquri najari. Cresiaccia madijapa jodiodenicca huissinaja cappiramanadsapa Timoteo naco huissinaja cappirajari. Nadsapa Pablo attia: —Timoteo iadsa toccadsapa jodiodeni iadsa jiperaqquri nahitohui. Nadsapa huissinaja cajidsana toccahi bica tahi -nadsa Timoteo amadsati huissinaja cajijari. <sup>4</sup> Nadsapa jai tojadsapa odsa panani onihidsa jai tojedsima, odsa panani onihidsa jai tojedsimadsanapojari, aja Jesodsa jehe quinajarideni maride. Aja Jesocca dodosse tabaqqui Jerosarecca Jesodsa jehe quinajarideni cacahuadedeni quinadsa ima teppe dsodo quinajarocadsa mari icanabaqqui-ridsajari. <sup>5</sup> Nama quinadsapa madija Jesodsa jehe quinajaridenipa poccadeni jeheniji todacorani najaro. Madija ohuahadeni naco huada huajijiradsa Jesodsa toquejena toquejena dsanapodsapa tohuapijari.

### *Pablocca huadadsa Masedoniacca madija huati tajari*

<sup>6</sup> Nadsapa dsama Asiahuaaji jai tojahijineraha nahihuaaji mari quinahijine Dio Corime ecossadsa jai toja-jarajari. Nadsapa dsama Pirijiahuaaji mari mari tossoqquimamana, dsama Carasiahuaaji mari mari tossoqquimamana dsanapojari. <sup>7</sup> Nadsapa dsama onih Misia inorinidsa bacco toquinajari. —Dsama Bitiniahuaaji issoqquimamana -quinaraha nahihuaaji Jeso Corime ecossajaro. <sup>8</sup> Nadsapa nahi Misiadsa tossoqquimamanadsapa passo imeni inidihuaaji jai tojedsippadsa odsa panani Troadehuaaji bacco toquinajari. <sup>9</sup> Nahi Troadedsa cahadijadsana Pablopa pina pocca huadassa naha cajijari. Djojine dsama Masedoniahuaajicca madija nahi Masedoniadsa ahuatodsa huahi qqui tajari. Pahuadsa huahua najari: —Jari, icca dsamahuaji ticcajonaji, ia acco ticamabaqquinijine -najari Masedoniacca madija. <sup>10</sup> Nadsapa pocca huadassa nadsa qqui tajarijine Masedoniahuaaji jai tojahijine najoramanajari. Aji ohua Roca naqui pahuadenidsa occanijine onajorajaro. Diocca dosseniji ibodidsa ahuatodsa tadsapi pajissa nanihuaaji Jeso tahimari icassiejeranijinecca mari icanabaqquihijine nahatoqquri inajarode.

*Pablo Sila tedsejepa Piripodsa madimanajari*

<sup>11</sup> Nadsapi odsa panani Troadedsa ijoppemadsapi canoa imenidsa jaijajaro. Passo imeni nocconihuaaji iaccajaro. Ojari iaccarini nadsapi dsama huittidsacossani onini Samotrasiadsana huana icanade. Huada ssiaja iaccapomadsapi passo imeni inidicca odsa Neaporihuaaji huana icanade. <sup>12</sup> Nanidsa jaijemoradsa jaijajaropi odsa panani Piripodsa bacco inade. Najaro odsa pananipi Romacca colonia tojajaro. Dsama Masedonia arobenihuaajicca odsa panani deni tojanicca, bica tanicca. Nanidsa huada pamema nehe imadijaro. <sup>13</sup> Nadsapi jassinajacca huada bacco tadsa Dio Atti mami odsa nohueradsapi odsa panani amossinihuaaji jaijenajaro, hueni inidihuaajina jaijedsippade. Nahihuaaji Diodsa huatide totoqueriqqui najari itide inadsa. Nanihuaaji bacco inadsap amoneje ponidenira queriqquimanani qqui inabaqquidsapi ia naqui ponidenidsama nanidsa jassi inadsa Dio Atti mari icanabaqquijarode. <sup>14</sup> Ponideni tassani ojariepi odsa panani Tiatirahuaajicca. Oninipi Lidia. Ponipi etero dsojorani huatini ccara tanicca dadade. Najaro etero cocoro todsippapi pina amaidadassa najaro. Najaro amonejepi Dio Attidsa ibora tajaro. Ia Medsede Jeso poni bodini acco icamadsapi Pablocca marinaja ponidsa bica tadsa mittanissa tajaro. <sup>15</sup> Nadsapi Lidia Jesodsa pajissa nadsapi totopa cajijaro. Ponicca odsacca madija naco huapima totopa cajiridsamanajari. Nadsapi poni attini iadsa: —Aji ohuadsa tibodideni: “Ia Medsededsa pajissa nani” tiquinadsapi jina, occa odsahuaji timadimanaji -nade. Iadsa huatide dissera tadsapi ponicca odsadsa imadijarode.

*Dsohuatopi Pablodeni natti toccamissajaro*

<sup>16</sup> Nadsapi huada onihidsa aja Diodsa huati huati totoquina nahihuaaji jaijedsippa-nipomadsapi dsohuato madija tedsejemadenicca ima nahato tajaro jahuidsa bacco ijidsade. Ponipi najaro odsa pananicca madijadenicca medse. Poni bodinicca tocorimejine nahato tajaro. Najaria aja poni medse tonanadedeni ihidossemana nadsapi madija tedsejemadenicca ima huati huati tadsa dsiniro cacajimana najari. <sup>17</sup> Najaro dsohuatopi Pablo, ia inajaro inatti motta huahua cajamissaponi nade. Poni attinipi ajima nade: —¡Ajajaridenipa Dio memehuaaji madijari Attidsa iboraqqui nahi, nahi! ¡Ajajaridenipa Dio tiadeni tonassiajabaqquihijine tahimarini tiadeni mari tocanabaqqui-manahitohui, mari tocanabaqqui-manahitohui! -nanamissa najarode. <sup>18</sup> Huajijiradsa inatti motta nema nema nanajona nadsapi poni attini mittade iadsa tocasserani nadsa Pablo pohua natti qqui tanidsa dsohuato bodinicca tocorimedsa huati tade: —Jesocristo onima huati onana: ¡Tiqquenaji! onajaro -nade Pablo. Pohua atti nama nanaja tocorimepa amadsati qquenajaride.

<sup>19</sup> Nanaja aja dsohuato poni medse tonanadedeni poni bodinicca nahatobote amossi nahi qqui toquinadsapa: —¡Jaho! Nema nadsapi ¿dsiniro icappirapadseje? Jidapapi poni bodinicca nahatobote cappirani -quinajari. Nadsapa Pablo dama, Sila dama quinadsa odsa panani nocconihuaaji iaccabaqqui-manajari, ima cacattemadedenidsa huati toquinahijine. <sup>20</sup> Ima cacattemadedenihuaaji bacco toquinadsapa huati toquinajari: —¡Qqui, ajajari jodiidenipa icca odsa pananicca madijadsa mohua mohua naridsamanapaja! -quinajari. <sup>21</sup> —Poccadeni ididenicca madie tahimarini mari mari quinajari. Naraha iapi romanodeni iquejenadsapi poccadeni ididenicca madie tahimarinidsa jehe inejerani. Najarodsa iboraqqui inejerani. Iadsa oppina tani -quinajari.

*Pablodeni toponi cocoro todsimadsa cororo idsimamanaraha tappa inabaqquimanageri*

<sup>22</sup> Nadsapa madija huapima Pablodenidsa huadimanadsa itabaromanahijineraha ima cacattemadedenipa soldadodenina icadossebaqquijari: —¡Jari, eterorideni ssiti taridsamanadsa titabaromanajo! -quinajari. <sup>23</sup> Nadsapa itabaromanajari, cacotabote

nadsa toponi cocorodsa cororo idsimamanajari. Nadsapa toponi cocoro cacahuad-edsa huati toquinajari: —Ajarideni tecahuabaqquihissa tajo, dsaja tajarahijine —quinajari. <sup>24</sup> Nadsapa toponi cocoro cacahuadepa ima cacattemadedeni attideni mittadsapa bodiccadsana iaqquedsimabaqquijari. Issodeni ahuadsa cabasso nadsa jore caniqquimadsa pamidsadsa canajari.

<sup>25</sup> Nadsapa Pablo Sila tedseje dsome nocconiraha Diodsa huahuatiti dsajari, Diodsa huatidsemanadsa jijiriri dsadsapa toponi cocorocca madija mittamanajari. <sup>26</sup> Naneje nami jadsirema dsadsa najaro. Toponi cocoro todsimacca odsapi sibadsa canahatonije najaro dacoraraha poni cahittanicca nami dsadsa nadsapi najaro odsa naqui dsadsa canajaro. Nadsapi noccobiji naqui tohuabajaro, domo huedsajarideni issodenicca, bijidenicca cadena naco jeo huajaridsajari. <sup>27</sup> Nanaja toponi cocoro cacahuade nocco tojadsa qqui taneje noccobiji tohuabani qqui tadsapa: —¡Jaho domo tocchahi! —najari pohua bodi. Nadsapa toponi cocorodsa domo huedsajarideni domo tocchahi manaconipa pocca tamededeni pohua inanadsoqqe-manahi noppine cappinadsa pohua huajinahijine pocca toponi huahuajina equidi najaro. <sup>28</sup> Naraha Pablo pohuadsa huahua najari: —¡Paji! ¡Tia tejina tejeraji! Iapi huapima aji jassi idsani —najari.

<sup>29</sup> Nadsapa toponi cocoro cacahuade jojororotohui huahua nadsa jojororo eccajonamanadsapa piri todsimamanajari. Nadsapa toponi cocoro cacahuade bodihuaji joppa todsimanaja jabojo najarijine tacca-cca najari. Pablo Sila baccodenuhuaji pohua pitodsa huitta najari. <sup>30</sup> Nadsapa toponi cocoro bodihuaji pahimidsaraha eqquenabaqquidsapa huapiccadsana pohuadenidsa huati tajari: —Jaho, ohua naqui ossiajanijinepi ¿nejecoma onanijine? —najari.

<sup>31</sup> Naraha manaco pohuadsa huati toquinajari: —Ia Medsede Jesodsa pajissa tadsapi tissiajanitohui. Ticca madija naco Jesodsa pajissa quinadsapa tocassiejerahitohui —quinajari Pablo Sila tedseje.

<sup>32</sup> Nadsapa toponi cocoro cacahuade pocca madija jahijonadsa Pablodeni ia Medsede Jeso tahimari mari icanabaqquimanajari. Nadsapa huapima mittamanajari. <sup>33</sup> Nadsapa dsome nocconiraha toponi cocoro cacahuade passohuaji iaccabaqquid-sapa bejorideni ssahua inaridsajaro. Nadsapa najaro dsomedsa pocca madija huapima totopa cajimanajari. <sup>34</sup> Topade jicadsapa toponi cocoro cacahuadepa pocca odsahuaji Pablodeni inajipabaqquijari. Diodsa jehe nadsapa huatidseri najari. Pocca odsacca huapima naco Diodsa jehe quinadsapa huatidsemaneri najari.

<sup>35</sup> Najaro ssiajadsa ima cacattemadedenipa Pablo Sila tedseje tappa inabaqquimanahijine soldado pamaha toponi cocoro cacahuadedsa huatide dosse inabaqquimanajari. Tohuedadsapa toponi cocoro cacahuadedsa huati toquinajari: —Aja ima cacattemadedeni attidenipa: “Pablo Sila tedseje tappa tinabaqquina” quinapaja —quinajari. <sup>36</sup> Nadsapa toponi cocoro cacahuade Pablodsa huati tajari: —Jidapana ima cacattemadedeni attidenidsa tiadeni tappa onabaqquinijine. Tiadenidsa ima nohuerani. Mohuaradsa ticadenaji —najari.

<sup>37</sup> Naraha Pablopa soldadodenidsa huati tajari: —¡Icadena-gerani! Ajina, iapi romanodeni iquejenaraha icca ima cattemerani ia huaccade soldadodsa ia tocadossebaqquidsapa ia itabaromanajaro. Madija huapima naco ia qqui toquinade. Nadsapa ia itabaromanadsapa ecotabote nadsa toponi cocorohuaji ia coro todsimabaqquijaride. ¿Naraha jidapana naqui icca ima cattema-geraraha najimehedsa ia dosse tomani-baqquihijineco? ¡Poni, iapi najimehedsa icadena-gerani! Ima cacattemadedeni jahijonadsa pohuadenira ia tappa tabaqquimanahijine huati tinanimanana —najari Pablo.



<sup>38</sup> Nadsapa soldado pamaha ima cacattemadedenihuaji tohuedanidsa Pablocca ima huati tanimanajari. Aja Pablo Siladenipa romanodeni quejenahi ima cacattemadedeni mittamanadsapa jabojo quinajari. <sup>39</sup> Nadsapa ima cacattemadedeni cappinamanadsa toponi cocorohuaji jai tojajari, bacco toquinadsapa Pablotenidsa huati toquinajari: —¡Jaho! Ijine tiadenidsa ima bica tejerani. Jidapapi icca ima nanidsa epejena –quinajari. Nadsapa Pablo Sila tedseje eqquenabaqquidsapa mohuaradsa pohuadenidsa huati toquinajari: —Jidapapi aji icca odsa pananidsapi timadimana tejerana. Ajicca odsa panani onihihuajina ticadana –quinajari. <sup>40</sup> Nadsapa toponi cocorohuaji huedenadsapa Lidia madinihuaji tohuedanijari. Nadsapa nahidsa Jesodsa jehe quinajari bodideni acco icamabaqquidsapa huatidsemaneri najari. Nadsapa denima tohuedajari.

## 17

### *Tesaronicahuaji mohuaniji tojajaro*

<sup>1</sup> Nadsapa Pablo Sila tedseje tohuedajari, odsa panani Apiporidsa tosstoniqquimamana, odsa panani onihi Aporonidsa tosstoniqquimamana dsanapojari. Nadsapa odsa panani Tesaronicadsa bacco toquinajari. Nahicca jodiidenipa Dio Atti mamari cajimanajari. <sup>2</sup> Aja Pablopa benehidsa ccaridsadsapa huajjiradsa jodiidenicca Dio Atti mamarihuaji toqquedsima toqquedsima naridsajari. Nama nanaridsa nadsapa nahi Tesaronicadsa naco jodiidenicca Dio Atti mamarihuaji totoqquedsima najari. Semana 3 naha madiccadsapa jassinajacca huadadsa Dio Atti maride totoqquedsima najari. Nahidsa Pablo jodiideni tedseje imahaha canajari. Pablopa Dio Atti maittaccadsama dsodo napojarocadsa mari icanabaqquijari. <sup>3</sup> Cristo-Mesiacca ima pohuadenidsa ahuato tanijine mari icanabaqquijari. Pohuadenipa Mesiatohui madimanajari. Mesiapa ocasserani ahuadsa dsoqquehitohui, dsotode nahatonihitohui, quiquinanajari Dio Atti cacomeraqqui najarideni. Najaro ima Pablo mari icanabaqquidsapa pohua atti jodiidenidsa: —Aja Jeso tahimari tiadeni mari ocanabaqquijaropi aja icca Mesiapaja –najari.

<sup>4</sup> Nadsapa jodiideni mota Jesodsa jehe quinadsapa Pablo, Siladenidsa toquejenajari. Dsama Cresiacca madija Diotohui quinajarideni huapi taha Jesodsa jehe quinajari. Nani Cresiahuajicca amonejedeni dsapanideni sseqquiri najaro mota huapi tehe naqui Jesodsa jehe quinajaro. <sup>5</sup> Naraha jodiideni mota Jeso tahimaridsa jiperaqqui najaridenipa poccadeni madija Jesodsa toquejenajari acconedeni huadimanajari. Najaridenipa odsa pananicca madija ibohuedsa tabaccorehedsa madiridsamanajarideni huahua inabaqquimanajari. Nadsapa najarideni tedseje huapima domo ccaridsadsa mohua mohua naridsamanajari. Odsa pananicca madija huapima pohuadenijine domo qquenadsapa ahuaji johua ahuaji johua quinajari. Aja domo ccaridsajaridenipa Pablo Siladenitohui Jasonacca odsahuaji bacco toquinadsapa mohua todsimamanajari. Pabloteni jocaca ininebaqquimanadsa madijadenidsa dahaha inabaqquimanadsapa inajidso-baqquimanahijineraha. <sup>6</sup> Naraha Jasonacca odsadsa Pablo Sila tedseje nohue quiradsapa Jasonara dama, pohua tesse Jesodsa jehe quinajari pamaha damama quinadsa odsa pananicca taminehuajina iaccabaqqui-manajari. Bacco toquinadsapa momohuadedenipa taminedenidsa poccadeni maidsehera huati toquinajari: —¡Icca dsamahuaji madija ohuaha bacco quinahi! ¡Pohuadenipa dsama onihidsa, dsama onihidsa ima inatabaccora-ridsamanadsa jidapapa aja idsamaridsa bacco quinajari! <sup>7</sup> ¡Aja Jasona joca idsimajaripa pocca odsadsa ecahuabaqquihi! –quinajari, johuahua johuahua canadsa. —Aja madija ohuaha jahijonajaripa icca tamine deni tojahicca marinajadsa iboqqui najari. Icca madija mota naco pohuadeni attijine tohuibomanahitohui. “Jidapapa tamine ohuaha tojahi, pohua onipa Jeso” quinahi imittani –quinajari maidsamanadsa.

<sup>8</sup> Nadsapa najaro ima mittamanadsapa nahicca queriqquimanajarideni tamedeni tedseje huadimanajari. <sup>9</sup> Naraha Jasona pohua tesse tedseje poccadeni ima cattemajeraccadsa tamedenipa pohuadenidsa huati toquinajari: —Dsaja tinajeranijine iadsa ticcadeni dsiniro da tiquinaccaji -quinajari. —Nadsapi nidsa ticcadeni ima cattemehe jicadsana ticcadeni dsiniro da inaninijine -quinajari. Nadsapa Jasona pohua tesse tedseje tamedenidsa dsiniro da quinadsapi tappa inabaqquidsa jai tojanijari.

### *Pablo Sila tedsejepa Bereahuaji*

<sup>10</sup> Naraha najaro dsomedsa Tesaronicacca Jesodsa jehe quinajaridenipa huassinaja Pablo Sila tedseje dossesse quinajari, odsa panani Bereahuaji tohuedahijine. Tohuedadsapa Bereadsa bacco toquinadsa nahidsa madimanajari. Nadsapa jodiogenicca Dio Atti mamarihuaji tohuededsima najari, Jeso tahimari maride. <sup>11</sup> Jodiogeni Bereadsa madimanajaridenipa bicaqquri najari, pina aja Tesaronicacca huadiqquri najaridenissa quina-jarajari. Dio Atti mittamanedsatija najari tohuini quinajari. Nadsapa huajijiradsa Dio Atti dsodo napojarocca huade toquejenajari. Pohuadeni bodipa: —¿Pablo attipa pajissaqui? ¿Pina aji ima dsodo napojarocassa naqui? -quinajari. <sup>12</sup> Nadsapa jodiogeni mota huapi taha pajissa quinajari. Cresiacca madija naco mota huapi taha pajissa quinajari. Aji amoneje dsapanideni sseqquri najarodeni, maqquideje naco huapi taha pajissa quinajari. <sup>13</sup> Naraha aja Tesaronicacca jodiogeni mota Jeso tahimaridsa jiperaqquri najaridenia ima mittamanajari: —Pablo Sila tedsejepa Bereacca madija naco Dio Atti mari icanabaqquihi -quinahi mittamanadsapa huadimanapomajari. Nadsapa Bereahuaji jai tojajari. Bacco toquinadsa nahihuajicca madija Pablotenidsa huadimanahijine ima inanamanapomajaro. Mohua mohua naridsamanadsapa Bereacca madija ssamoni ahuamanajari. <sup>14</sup> Naraha Jesodsa jehe quinajarideni ima mittamanadsapa Pablo huassinaja dsama onihihuaji dosse quinajari. Nahi Bereacca madija naco pohuadsa jai tojajari. Nadsapa Pablo Bereacca madija quinadsa passo imeni inidihuaji jai tojedsippajari, poni huapi jai tojabacossahijine. Naraha Sila Timoteo tedsejepa nahi Bereadsa madimanaccajari. <sup>15</sup> Nadsapa Bereacca madija Pablo iaccamanadsapa odsa panani Atenahuaji bacco toquinadsa nahidsana Pablo inebomanajari. Jahinidsapa Pablocca ima huati nanimanajari: —Pablo attipa: “Sila Timoteo tedseje huassinaja huedajonana” napaja -quinajari.

### *Pablopa Atenahuaji*

<sup>16-17</sup> Pablopa Sila Timoteodeni tohui odsa panani Atenadsa madijari. Nahidsa madidsapa jassinajacca huadadsa Dio Atti mamarihuaji totoqquedsima najari, Jeso tahimari maride. Nahidsapa jodiogeni, jodio quejena-jarajari Diodsa jipaqquiri najarideni tedseje quequeriqqui nadsa pohuadeni mari mari ihicanabaqqui najari.

Naraha Pablo nahidsa madidsa najaro odsa panani siba nahatoni ijiridsani qquri taridsadsapa bodi nacassera tajari. Nama nadsapa huada huajijiradsa todsepetaji dadade madija caji tahihuaji aja nahidsa madija jahiridsajaridenima Jeso tahimaridsa imahaha canadsa ahuaji huati ahuaji huati quinajari. <sup>18</sup> Nadsapa madija mota marinaja epicoriodsa jehe quinajarideni, marinaja estoicodsa jehe quinajaridenipa Pablo tedseje ahuaji huati ahuaji huati quinajari. Nadsapa mota attidenia: —Ajajari attijide rabotepa ¿nejeco imara iadsa huati huati tajarinaja? -quinajari. Madija ohuaha attideni naco: —¿Dsama onihicca madijadeni cacahuade tahimari eccoraridsajaro raneje! -quinajari. Nama nama quiquinanajari. Pablopa ima bicani icassiejeranijinecca huati huati tajari, Jeso nahatonijari tahimari huati huati tajariraha pohuadenipa mittamana-jarajari. <sup>19</sup> Nadsapa Pablodsa: —Jina, ajicca ssono Areopacohuaji ticca ima huati tinanissa tanijine iadsa tiqquemoraji -quinadsapa

iaqqemoramanajari. Nahidsana huada huajjiradsa nahatoqquiri najarideni totoqueriqqui najari, imahaha canahijine. Ssono bacco tomoramanadsapa pohuadsa huati toquinajari: —Jari, ticca ima imittana. ¿Nejeco imara huati huati tinajaroneje? —quinajari. <sup>20</sup> —Ticca marinaja imittapo-jerajaro, iadsa pina ima jidsa taniccassa najaro. Denima imittanijine jipapa inani —quinajari. <sup>21</sup> Aja Atenacca madija, dsama onihicca nahidsa madimanajarideni naco Pablodsa nama nama quiquinanajari, aji ima dsati tohuinira quiquinanajari.

<sup>22</sup> Nadsapa nahi Areopacodsa Pablaa totehemadsa pocca ima huati tajari: —Jehe Atenacca madija, tiadenidsa huati onana. Ticcadeni siba nahatoni jiquejerani qqui onaridsani. Ticcadeni daniji botta botta tahijinecca siba hua tamaroni naqui qqui onaridsani. Tiadenipi tiadeni cacahuadedeni tohuideni disseraqquri tiquinani qqui onani —najari. <sup>23</sup> —Jehe, ticcadeni odsadsa occaridsadsa ticcadeni nahatoniji tiadeni cacahuadedenidsa da tiquinahijinecca huahuanari qqui onaridsajaro. Huahuanari ojarie huapinidsa dsodo nanipi ajima najaro: “Dio ohuahapa oni ssamoqquiri inaccani” titiquina najaro dsodo nanidsa qqui onajaro. Jehe, tettidenipi bica tani. Aja Dio ohuaha oni ssamoqquiri tiquinaccajaripa pohuadsa tetetidsemana najaropaji. Najari pocca imaha tiadenidsa ohuacomerajaropaji —najari Pablo.

<sup>24</sup> —Ajijaro dsamapi Dio inahatojaro. Aja huapima caji taridsajari naco Dio inahatoridsajari. Pohua inahatoridsajaripa Dio Pohuana huapima ecahuajaro. Meme ecahua, nami ecahua najaro. Diopa madijacca nahatonijidsa madiridsa-jarahi. Pina odsadsa, siba nahatonidsa, Diopa nama nahidsa madiridsa-jarahi. <sup>25</sup> Diopa cappiraha madi-jarahi. Pohua biji accode tohui najarajari. Pohua ehuerahi nahatojide rahi. Pohuana camittehe jinede. Pohuajinena jappopponi icajidsapi jassi jassi ihinanajaro. Pohuana icappira-jeranijine huapima iadsa da da ihinaridsa najaropaji —najari Pablo.

<sup>26</sup> —Diopa madija ojaria inahatopojari. Najaria aja icca idi tahideccapaja. Dio Pohuajine madija huapimapa najari potemahi toquejenajaripaja. Najari pohua potemahia madija dsama onihidsa toquejena, dsama onihidsa toquejena, dsama onihidsa toquejena naridsajaria dsama huapimadsa madiridsamanajaripaja. Diopa nahato tapodsa madija icattejidsa-baqqujari: “Ajajaridenipa ajijaro dsamadsa madimanahijine, dsama onihidsa madimana-jarana. Ajaccajaridenina ajicajaro dsamadsa madimanahijine, dsama onihidsa madimana-jarana” naridsapojari. Diopa Pohua jipa tadsa dsama onihi deni inana tani. Dsama onihi naqui ajimani inana tani. Nama naridsajari. <sup>27</sup> Dio madija inahatobaqqujaripa Dio Pohua tohui quinahijine. Dio Pohua tohui quinadsa qqui naridsamanajaridenipa Dio Pohuadsa bacco toquinahijine itide. Naraha Diopa madija huapimadsa huaji tajarahi. Iadsa huajira tahi. Tiadenidsa huajira tahi. Ohuadsa naco huajira tahi. <sup>28</sup> Abi Dio Pohuajinena aji imadijaropaji. Pohuajine jajajaridsa najaropaji. Pohuajine iquejenaridsajaropaji. Najaroa aji ticcadeni ajie nahatobotedeni jiri icanamanapodsapi: “Dio Pohua potemahi iquejenajaro” quinapojari. <sup>29</sup> Nadsama aji iapi Dio ia tonahatobaqqujari. Dio Pohua potemahi iquejenani. Nadsapa ibodidsa: “Diopa pina madijacca nahatonajassa nahi” inejerana. Diopa pina huatini ccara tanicca oro nahatonissa najarahi. Pina dsibehi tanicca plata nahatonissa najarahi. Pina ccara tanicca siba nahatonissa najarahi. Nema naniccapi madija pohua bodidsa: “Ohua cacahuade corime onahatona. Ajima onanana” nadsa ihinahato najaropaji. <sup>30</sup> Madijapa Diodsa ssamoqquiri naporaha Dio pohuadeni inajidsobaqquija najonapohui najarajari. Dio Pohuana madijacca imasiri inahanajonaporaha jidapapi dsama huapimacca madijadsa Pohua Attia: “Ticcadeni imasiridsa epeje tiquinaji, tibodideni tecajiqquimera-ridsamanaji” najaripaja Dio. <sup>31</sup> Diopa madija huapimacca ima icattemanitohui. Nidsa Dio Pohua jipa tahicca huada bacco tadsapi dsama huapimacca madijadenicca ima pocca pajissehedsa nattome inanitohui. Madija huapimacca ima cattedepa Dio icattejidsapojari. Najaria aja

Pohua Bedi dsoqqueraha Dio Pohuajine nahatonijari. Madija huapima pohuadsa: “Pajissa, najaripa madija Tonassiajade tojahijine Dio icattejidsapojari” quinahijine –najari Pablo atti.

<sup>32</sup> Naraha Atenacca madija aja jicajarideni nahatonimanahicca ima mittamanadsapa motapa jaja quinajari. Naraha madija motapa: —Huada onihidsa ticca ima imittapomana –quinajari Pablodsa.

<sup>33</sup> Nadsapa Pablo madija quequeriqquimana nahidsa apaja nadsapa odsahuaji qquedsippanjari. <sup>34</sup> Naraha nahicca quequeriqquimana najari motapa Pablocca imadsa pajissa quinadsa pohuadsa toquejenajari. Madija ojaria onipa: Dionisio. Pohuapa nahato tajari. Ssono Areopacohuaji quequeriqqui najari. Amoneje ojarie naqui oninipi Damarisa. Madija mota naco Jeso tahimaridsa pajissa quinajari.

## 18

### *Pablopa Corintohuaji*

<sup>1</sup> Dsotodepa Atenadsa Pablo joppemadsapa odsa panani onihi Corintohuaji toccajari. <sup>2</sup> Najaro odsa pananihuaji Pablo bacco tadsapa jodio madija bacco inabaqqujari. Onidenipa Aquira, bedimeni oninipi Prisira quinajari. Aquirapa dsama arobeni Pontohuajicca madijaraha dsama Itariadsa madipojari. Naraha dsama Itariacca tamine Claodio jodiodenidsa jipera tadsapa nanicca odsa panani deni tojanicca onini Romadsa madimana-jarahijine jodiodeni huapima dosse ininebaqqujari. Nadsapa Aquira bedimeni tadsajanipa Itariahuaji nebomanadsa Corintohuaji bacco toquidsati madimanajari. Nahidsa Aquira bedimeni tadsajani madimanadsana pohuadeni qquide Pablo toccajari. <sup>3</sup> Nadsapa Pablo Aquiradenicca tarabaidsa nahato tadsapa pohuadenidsa madicajari. Pohuadenipa etero siba tanicca odsajine ssequide dsepedeni ijimanajari. <sup>4</sup> Nadsapa Pablo jassinajacca huadadsa jodiodenicca Dio Atti mamarihuaji jodiodeni, jodio quejena-jarajarideni tedseje quequeriqquimana nadsa Jeso tahimaridsa jehe quinahijine mari mari ihicanabaqqui najari.

<sup>5</sup> Nanaja Sila Timoteo tedsejepa dsama Masedoniahuaji huedajonadsa bacco najonamanajari. Nadsapa Pablo dsepe ijiraha nebodsa Dio Attira majidsama mari mari ihicanabaqqui najari. Jodiodeni mittamanahijine pocca marinajapi: —Madija Tonassiajade aja Cristo-Mesia quiquinanajaripa Jesopaja –najari. <sup>6</sup> Naraha Jeso tahimaridsa jiperaqquri nadsapa Pablo itamassoqquimanajari. Nadsapa Pablo pohuadenidsa apaja nahi ahuato tahijine pocca etero ppoto ppoto nadsa huati tajari: —¡Epeje! Nema tiquinadsapi tijinedenina imasiri tiadenidsa tinassonarimanajaro. Dio tiadeni tonajidso-baqquidsapi ojine jerani. Jidapapa jodio quejena-jarajarira mari ocanabaqquina –najari Pablo.

<sup>7</sup> Nadsapa Pablo Dio Atti mamarihuaji qquenadsa pohua tesse Tisio-Justocca odsadsa toqquedsimajari. Pohua naco Diodsa huatidse-dsanapojari, Dio Atti mamari inorinidsa madijari. <sup>8</sup> Jodiodenicca Dio Atti mamarihuajicca tamine onipa Crispo, pocca amoneje, pocca ejedeni huapima naco ia Medsede Jesodsa pajissa quinajari. Nahi Corintocca madija mota huapi taha naco Pablocca marinaja mittamanadsa Jesodsa pajissa quinadsapa totopa cajiridsamanajari.

<sup>9</sup> Nadsapa najaro dsomedsa Pablopa pina pocca huadassa naha cajijari. Diojine ia Medsede Jeso pohuadsa ahuatodsapa huati tajari: —Pablo, ticappina-jeraji. Ohuatti teccoraridsaji. Ohuatti tecoma tejeraji –najari. <sup>10</sup> —Ohuapi tia ohuacahuaridsanitohui. Ajijaro odsa pananidsapa ohuadsa toquejenajarideni huapi tahi. Nadsapi madija tia inajidsomana-geranitohui, onajaropaji –najari Jeso. <sup>11</sup> Nadsapa Pablo Corintocca madija Dio Atti mittamanahijine mari mari ihicanabaqqui nadsapa huajano ojaria najica, denima huajano arobe madijari.

<sup>12</sup> Naraha tamine Carionapa dsama arobeni onini Acaia ecahuadsa Pablo odsa panani Corintodsa madiccadnsapa jodiideni mota pohuadsa huadimanajari. Dama quinadsa tamine Carionadsa iaccamanajari, ima cacattemahuaji idsahuamanahijine. <sup>13</sup> Nadsapa tamine Carionadsa huati toquinajari: —Ajajari madijapa icca madija mari icanabaqquidsapa: “Diodsa tiquejenaji” nanaridsa nadsapa icca madija mota pohua attidsa jehe quinahi. Naraha pocca marinajapi jidsa tani. Pina icca marinajassa nejerani. Pina romanodenicca marinajassa nejeradsa naqui oppina tani –quinajari Carionadsa. <sup>14</sup> Nadsapa manaco Pablo pocca ima huati tabote naraha tamine Cariona pohuana jodiidenidsa huati tajari: —¡Epejena! Pina botiecca ima huatide, pina toponi nanajidsodecca ima huatide ohuadsa jai tijedsimadsapi ticcadeni ima mittade jipa onanitoahiraha ticcadeni imapi najarossa nejerani. <sup>15</sup> Tiadenina ajararicca marinajadsa jiperaqquri tiquinajaro. “Icca marinajassa nejerani” tiquinadsapi tiadeni ehuerani ticattemamanaji. Occa cacahuehepi onihi. Ticcadeni ima cattemade jipera onani –najari tamine Cariona jodiidenidsa. <sup>16</sup> Nadsapa ima cacattemahuaji mohua ininebaqqujari.

<sup>17</sup> Nadsapa boronidsa jodiideni motapa poccadeni Dio Atti mamarihuajicca tamine dama quinadsa idaqquimanajari. Pohua onipa Sostene. Ima cacattemacca boronidsa idaqquimanaraha Carionapa qqui taraha najaro imadsa jipera tadsapa pina qqui torahi najari.

*Pablo Atioquiahuaji toccanijari, dsotode naco benehi onihidsa tojoppemapomajari*

<sup>18</sup> Nadsapa odsa panani Corintodsa Pablo huada huapi tehe madisanapojari. Dsotode naco odsa panani Atioquiahuaji toccanijari: —Occanini –nadsa Jesodsa jehe quinajaridenipa: —Jehe ticcaniji –quinadsapa Pablo dsama Siriahuaji toccanijari. Aquira, pohua bedimeni Prisira tadsajani naco pohuadsa tohuedajari. Nadsama jai tojanidsapa odsa panani Secreahuaji bacco toquinajari. Nahidsana Pablopocca huatinaja Diodsa inapajiranissa tanijine pohua tati ccohua tahijine tati ssa cananissa tajaro. Pohua tati ssa canehe cajicadsapi jai tojedsippanidsa jai tojanijari. <sup>19</sup> Nadsapa jai tojanijari, odsa panani Epeso bacco toquinajari. Nahidsa Aquira bedimeni tadsajani madimanahijine inebobaqquidsapa Dio Atti mamarihuaji toqquedsimajari, jodiidenidsa Dio Atti maride. <sup>20</sup> Nadsapa jodiideni Pablodsa: —Iadsa timadiccaji –quinaraha pohuapa jipera tajari. <sup>21</sup> Pohuadenidsa huati tajari: —Occanini. Naraha nidsaranibote Dio jipa tadsa tiadeni qquide occanipomanitohui –najari. Nadsapa: —Jehe ticcaniji –quinajari. Nadsapa canoa imenidsa toqquedsanidsapa Epesohuaji nebotsa tojoppemapomajari. <sup>22</sup> Nadsapa odsa panani Sesareadsa bacco tanidsapa odsa panani Jerosarehuaji toqquemoranijari, Jesodsa jehe quinajaridenidsa nija naridsahijine. Nahi dsotodepa Atioquiahuaji toccanijari.

<sup>23</sup> Nadsapa Atioquiadsa bacco tanidsa nahidsa madijari. Madihi pohua idi nadsapa tobenehipomajari. Dsama arobeni Carasiahuajicca odsa pananidsa, odsa capamema najarodsa naco, dsama arobeni Pirijiahuajicca odsa pananidsa, aji odsa cajari cajari najarodsa naco qquide ccaridsapomajari. Jesodsa jehe quinajarideni huapima inahatidsebaqquidsapa poccadeni jeheniji todacorani najaro.

*Apolo Dio Atti maride tojjari*

<sup>24</sup> Nadsapa Aquira bedimeni tadsajani Epesodsa madimanadsapa jodio madija onipa Apolo Epesodsa bacco najonajari. Pohuapa dsama Ejitocca odsa panani Arejadriadsa napijari. Pohuapa ima huatide nahato, Dio Atticca naco nahato tajari. <sup>25</sup> Aja Arejadriadsa madidsa Jeso tahimari tohuattajari. Nadsapa Apolo huatidseri nadsa Jeso tahimari mari mari naridsajari. Epesocca madija naco mari icanabaqquihissa taraha pohuapa Jeso tahimari nemanehi ssamo tajari. Aja Huano mari mari napojaricca nahato, madija poccadeni imasiri nebomanadsa



totopa cajimanajari nahato tajari. Najarora nahato tahi ojari najari. <sup>26</sup> Nadsapa Apolo cappina-jaradsa jodiodenicca Dio Atti mamarihuaji Jeso tahimari maride tojajari. Naraha Aquira bedimeni Prisira tadsajani Apolocca marinaja dsori tani mittamanadsapa poccadeni odsahuaji jina inanimanadsa Jeso tahimari denima mari icanamanajari.

<sup>27</sup> Apolopa dsama arobeni Acaiahuajicca madija mari icanabaqquihijine tohuini nadsa Epesocca Jesodsa jehe quinajarideni pohua toccahijine acco icamamanajari. Aja odsa panani Corintocca Jesodsa jehe quinajarideni pohuadsa bicaqquiri nahijine naco poccadeni ima dsodo quinadsa dosse quinajaro. Nadsapa Apolo Corintohuaji bacco tadsa Diocca tohuati huanehejine Jesodsa pajissa quinajarideni acco icamabaqquijari, poccadeni jeheniji todacorani nanijine. <sup>28</sup> Aja Apolopa madija huapima mittamanadsa jodiodeni mota Jesodsa jiperaqquiri najarideni tedseje ahuaji huati ahuaji huati quinajari. Puhuapa Dio Atti nahato tadsa pocca marinaja dacoradsapa najarideni attideni ajamani tojadsa pohuana ima ecomera ecomera dsanapojaro. Dio Atti maittaccadsama dsodo napojarocadsa mari mari nadsapa pohuajine ajijaro ima ahuato tajaro: —Cristo-Mesia quiquinanajaripa Jesopaja –najari.

## 19

### *Pablopa Epesohuaji*

<sup>1</sup> Nadsapa Apolo nahi Corintodsa madiccadsa Pablo tobenehipomajari. Ssono huapi tani toporimojaja dsanapohui nadsapa tabodihuaji toqquedsippajari, odsa panani Epesodsa bacco tajari. Nahidsapa Jesodsa jehe quinajaridenidsa bacco tajari. <sup>2</sup> Nadsapa Pablo pohuadenidsa huati tajari: —¿Tiadenipi Jesodsa jehe tiquineje Dio Corime tiadenidsa tojaridsa nattaco? –najari. Naraha pohuadeni cacomeramanajari: —Ssamocquiri inani. Dio Corimecca ima iadsa huatide no-huerade –quinajari. <sup>3</sup> Naraha Pablo pohuadenidsa huati tajari: —¿Nejecojaricca imadsa totopa ticajiridsamanajarotte? –naraha pohuadeni attipa: —Iapi pina Huano Baotistacca marinajassa inanadsa totopa icajiridsajarode –quinajari. <sup>4</sup> Nadsapa Pablo: —Jehe, aja Huanocca topaniji cajiridsamanajaridenipa poccadeni imasiri nebomanapodsana totopa cajiridsamanajari. Huano huati tapohui naco atti ajama napojari: “Nidsa, dsotode bacco najonajaridsa naco pohuadsa jehe quinahitohui” napohui nade. Nadsama aja dsotode bacco najonajari onipa Jeso –najari Pablo.

<sup>5</sup> Nadsapa najaro ima mittamanadsapa attideni: —Jehe, totopa icajipomana. Ia Medsede Jeso onima ia topa todsanabaqquihijine –quinadsapa totopa cajirid-samanapomajari. <sup>6</sup> Nadsapa Pablo Diodsa huati taja nadsa Jesocristodsa to-quejenajarideni pohua dsepedsa bara inebo, bara inebo naridsanaja Dio Corime pohuadenidsa tojaridsahissa tajari. Nadsapa Dio Corimejine tohuatti jidsa tajarodsa huati huati toquinajari. Dio Atti naqui bodidenidsa ahuatodsa huati iqquimamana-jaro. <sup>7</sup> Nadsapa pohuadenidsa Dio Corime tojaridsajaridenipa 12 quinajari.

<sup>8</sup> Nadsapa Pablo abadsico 3 canaha jodiodenicca Dio Atti mamarihuaji maride toqquedsima toqquedsima dsanapojari. Pablopa cappinera tadsa Diocca cacahuehecca ima mari mari ihicanabaqqui najari. Madija pajissa quinahijine pocca marinaja bica tadsa mari mari najari. <sup>9</sup> Naraha madija motapa Jeso tahimaridsa huaribodeni sibaqquiri nadsapa madija huapima mittamanahijine jadsirema Jeso tahimaridsa tatamasso quinajari. Nadsapa Pablo, Jesodsa jehe quinajarideni tedseje: —Jina, odsa onihihuajina iqueriqquina –quinajari. Nadsapa jodiodenicca Dio Atti mamarihuaji nebomanadsa madija oni Tiranocca odsa ima huahuatihuajina jai tojajari. Nahidsana huada huajiradsa Pablo Dio Atti mari mari ihicanabaqqui najari. <sup>10</sup> Nadsapa maride nama dsanapojari huajano pamaha. Najaria aja dsama Asiacca madija huapima ia Medsede tahimari mittaridsamanajari. Jodiodeni, jodio quejena-jarajarideni naco.

<sup>11</sup> Djojine Pablopa canahatori canehe deni tojanicca ahuato inanaridsani madija qqui qqui toquinajari. <sup>12</sup> Madijapa aji etero pohuadeni dsepe ssesse, pohuadeni pano ssesse naqui Pablo huapi tajojaro comagquiri najaridenihuaaji dsojo inaniridsamanagero. Comagquiri najaridenidsa ibarimanadsapi tocanomireridsa najari. Nama quinadsapa Satanacca dodosse tabaqqui tocorimedeni naco jahinineridsajari.

<sup>13</sup> Nadsapa jodio toponi totonanomidedeni naco madija bodidenidsa Satanacca dodosse tabaqqui tocorimedeni madimanajari dosse ininebaqqui-manahijine jahiridsa najari. Ia Medsede Jeso onidsa nama quinahijine tohuini quinadsapa tocorimedsa attidenia: —Jari, aja Pablo mari mari najaricca Jeso onima huati inadsa tiqquenaji, inajaro -nanaridsamana najari. <sup>14</sup> Nama naridsamanajarideni motapa Esqueba bedi 7 quinajarideni. Esquebapa jodio. Pohuapa dada toqquimade tamine. <sup>15</sup> Nadsapa huada onihidsa Esqueba bedi madija pohua bodidsa tocorime madijaridsa nama quinapomaraaha aja pohua bodicca tocorime huati tajari: —Jehe, Jeso attipa nahato onani, Pablo atti naco nahato onani. Naraha tiadenipi ¿nejecojari madija tiqquejenani? -najari. <sup>16</sup> Nadsapa pohua bodidsa tocorime madijaripa toponi totonanomidedenihuaaji joppa tadsa jadsirema itabaroridsajari. Aja 7 quinajari huapimadsa deni tojajari. Eterorideni ssoja inaridsehe jica, inabiquerabaqquidsapa ccorojedeni domo toqquenajari. <sup>17</sup> Nadsapa odsa panani Epesocca madija huapima najaro ima mittamanadsapa jodiideni cappinamana, jodio quejena-jarajarideni cappinamana naraha attidenipa: —Ia Medsede Jesocristona bica tahi, deni tojahi -quinajari.

<sup>18</sup> Nadsapa Jesodsa jehe quinajarideni naco cappinamanadsapa poccadeni imasiri ecomeraridsa-mananijine jahijonana canajari. Madija huapima mittamanahijine madija ojaria pocca imasiri ecomerajaro, madija ohuaha pocca imasiri ecomerajaro, madija ohuahadeni naco nama naridsamanajari. <sup>19</sup> Aja dsoppinejedeni naco Jesodsa jehe quinadsapa poccadeni papeo aji dsoppinejecca ima tocahatterahijinecca eccajonamanadsa madija huapima cattomama canadsa amossinidsa botta quinajaro. Nadsapi najaro papeo manaconipi hua quinadsa pina dsiniro ccarara 50 mil tojajaro. <sup>20</sup> Diocca dacorehe nema nadsa aji Jeso tahimari madija huapimadsa ssaja taridsadsapi Jesodsa toquejenahi tohuapijaripaja.

<sup>21</sup> Nadsama najaro ima jicadsapa Pablo bodi huatomadsa huati tajari: —Odsa panani Jerosarehuaji occapomana -najari. —Naraha tahidepi Masedoniahuaji occa, Acaiahuaji occa napona. Nadsana Jerosarehuaji occapomanijine. Dsotode naqui Romahuaji occanijine -najari. <sup>22</sup> Pablo atti nama naraha najaro dsama arobeni Asiadsa madicajari. Naraha pohua biji accode pamaha Timoteo Erasto tedseje Masedoniahuaji tahide tohuedahijine dosse inabaqquijari.

### *Epeshuaji mohuaniji tojajaro*

<sup>23</sup> Aja odsa panani Epesocca madijapa Jeso tahimari mittamana-dsanaporaha motapa jiperaqquri nadsa mohua mohua quinadsapa pohuadenijine ima toppinajaro. <sup>24</sup> Tahidepa madija oni Demetrio huadidsapa pohua tessedenidsa huati tajari. Aja Demetriopa dsibehi tanicca plata dsepe ihiji najari. Nadsama Epesocca madija motapa siba nahatoni onini Artemisadsa: —Ia cacahuade -quiquinanajari. Najaro corimani, ponicca huihuittidsa odsa corimani naqui plata dsibehi tanicadsa Demetrio ihinahato najaro, dadajine. Najaro tarabadsadsa pohua biji accodedeni tedseje dsiniro cacajimana najari. Sseqquiri najaripaja. <sup>25</sup> Demetriopa siba nahatoni corimani nanahatodedeni queriqquihijine huahua inabaqquijari. Queriqquimanadsapa pohuadenidsa huati tajari: —Jehe, aji icca nahatonijidsa dsiniro ihicaji naraha nidsa najaro da da inejeradsapi dsiniro icappiranitohui -najari. <sup>26</sup> —Tiadenipi aja Pablo mari mari naridsajaricca imapi ¿ssamomo tinajarorane? Pablocca marinajapi ajima najaro: “Madijajine siba nahatonipi Dio jarahi” nanaja najari. Najaria aja

Pablo attidsa madija ibobora tadsapa ia cacahuade Artemisadsa tojiperamanajaripaja. Najaria aja imadini Epesocca madija mota naco Pablodsa toquejenajari, icca dsama Asiacca madija mota naco Pablodsa toquejenaridsajaripaja. <sup>27</sup> Pohnadenijine ima nema nadsapi iadsa tabaccora tani. Aji icca dadajine idsepe ihiji najaro naqui jicani-tohui. Nidsa ia cacahuade Artemisadsa madija apaja quinahitohui. Nidsa icca dsama Asiahuaji madiridsamanajarideni, aja dsama onihihuaji madiridsamanajarideni naco ponidsa jiperaqquri nadsapa ponicca ima ajimani tojanitohui. Ponicca huihuittidsa odsa naqui paji inebomanarini nanitohui, onajaro –najari Demetrio.

<sup>28</sup> Nadsapa Demetrio atti mittamanadsapa huadimanadsa johua johua quinajari: —¡Epesocca madija cacahuade Artemisa deni tojani, tojani! –quinajari. <sup>29</sup> Nadsapa odsa pananicca madija huapima mohua mohua quinahi mittamanadsapa pohnadeni naco huadimanajari. Domodeni ccaridsadsa mohua mohua naridsamanajari. Nadsapa Pablo huatimade Masedoniacca madija pamaha onideni Caio Aristaco tedseje damama quinadsa ima huahuatihuaji iaccabaqqi-manajari. <sup>30</sup> Nadsapa Pablo madija mohua mohua camahihuaji huatide toccahijineraha Jesodsa jehe quinajaridenia: —¡Poni, ticca tejeraji! –quinajari. <sup>31</sup> Asiacca taminedeni mota naco Pablodsa huatideni huanaqquri nadsapa madija ojaría huassinaja dosse inajona-manadsa joppa najonajari, Pablodsa: —¡Poni! ¡Nanihuajipi ticca tejeraji! –nahijine. <sup>32</sup> Nadsapa huapima queriqquimanahidsa ima onihí, ima onihidsa pohnadenira ahuaji johua, ahuaji johua naridsamanajari. Naraha madija queriqquimanajarideni motapa ssamoqquri nadsa: —¿Nejeco imatohuira iqueriqquijaro? –quinajari.

<sup>33</sup> Nadsapa jodiodeni poccadeni madija Arejadro huapimadsa huati tahijine aja mohua mohua camajari baccodenuhaji cco ininemanajari. Pohnapa: —Aji ia jodiodeni iapi ima inana-jerani –nahijine pohna dsepe memehuaji da icanadsa huadsa huadsa naraha tocadidire najarajari. <sup>34</sup> Aja Arejadro pohna naco jodiodenija najari pohna qqi toquinadsa pohnadsa noccodeni jidseraqquri nadsapa attideni: —A, najari naco jodiodeni, ia cacahuade Artemisadsa huahuatidse najarahi –quinadsapa paja mohua toquinarihi najari. —¡Epesocca madija cacahuade Artemisapi deni tojani, tojani! –quinajari. Pohnadeni atti pina ojariqquijarossa nadsa johua johua quinajari. Nama namara hora pamaha tossoniqqumaraha nama dsanapomanajari.

<sup>35</sup> Naraha odsa pananicca madija deni tojahicca ima dsodsodode ccajonadsa madija joma inanabaqquidsá huati tajari: —Jehe Epesocca madijadeni, icca imapi dsama huapimacca madija nahatoqquri nahi: Iapi ia cacahuade Artemisacca huihuittidsa odsa ecahuanissa tajaro. Ia cacahuade Artemisapi memehuaji madiraha poni corimani iahuaji ssonajarode. Najaro tahimarini naqui huapima nahatoqquri nahi. <sup>36</sup> Nadsama ¿najaro imadsa nejecojari “Maidsaniji” nahi? Maidsehe huade nohuerahi. Nadsapi ticadidireji. Ponima mohua mohuapi epeje tiquinaji –najari. <sup>37</sup> —Nadsama ajararideni pamaha teccajona-baqquimanaraha ia cacahuade Artemisacca huihuittidsahuaji inatabaccoramana-jerani. Ponidsa naco tatamasso quiquinanajarahi. <sup>38</sup> Aja siba nahatoni corimani nanahatodedeni Demetrio pohna tessedeni tedseje madija ohuahadsa huadimanadsa naco ima cacattemahuajira poccadeni ima huatide jai tojedsimana, onajaro. Nahidsa ima cacattemadedeni huajijiradsa jassi jassi dsadsadsa najari. Nahidsana madija huapima poccadeni ima huatide jajahi tojedsima najari. <sup>39</sup> Nadsama tiadeni mota naqui ima onihí ticajimanadsapi ima cacattemadedeni najaro ima ecahuamana-jeradsapi nidsa icca odsa pananicca taminedeni madija huapima queriqquimanahijine huahua quinadsana ticcadeni ima huati huati titiquina naji –najari. <sup>40</sup> —Nadsama ajijaro mohuaniji ponimaccapi oppina tani. Icca tamine romanodeni attidenipa: “Iadsa jara jara quinajari itidija” quinapadsaja, onajaro. Ticcadeni mohuaniji nema dsanapodsapi ¿nejecoma

onapadseje pohuadenidsa? –najari odsa pananicca ima dsodsodode. <sup>41</sup> Pocca ima huati taha jicadsapa: —Jai tijaniji –nadsa madija huapima jai tojaniridsajari.

## 20

### *Pablopa dsama Masedoniadsa bacco, dsama Cresiadsa bacco tapomajari*

<sup>1</sup> Odsa panani Epesodenicca mohuaniji jicadsa Pablopa Jesodsa jehe quinajarideni queriqquimanahijine huahua inabaqquijari. Nadsapa atti bica tadsa pohuadenidsa huati tajari, bodideni huatidsemanahijine. Nahi dsotodepa pohua attia: —Jidapapi Masedoniahuaji occapomana –nadsapa: —Jehe, ticcaji –quinadsa toccajari. <sup>2</sup> Nahi Masedoniahuajicca Jesodsa jehe quinapojaridenidsa bacco taridsapomadsa mari icanabaqquipomajari. Atti bica tadsa inahatidse-baqquiridsajari. Dsotodepa Cresiahuaji bacco tapomajari. <sup>3</sup> Nahidsapa abadsico 3 canaha madicajari. Dsotodepa dsama Siraahuaji canoa imenidsa toccanihijineraha Pablo pohua inajidsomanahijine jodiodeni najoramanahi quinahi mittajari. Nadsapa: —Dsamana occaninijine –nadsa pohua natti Masedoniahuaji todsodonijari. <sup>4</sup> Nadsama Pablodsa jai tojajaridenipa Bereahuaji madijari Piro bedi Sopatero tocca, Tesaronicacca pamaha Aristaco tocca, Secondo tocca, Derbehuajicca Caio tocca, Timoteo tocca, Asiahuajicca Tiquico, Trofimo tedseje tohueda, aji ohua Roca naqui Pablodsa occajarode. <sup>5</sup> Nadsapa motadenia tahide odsa panani Troadehuaji jai tojapojari. Troadedsa bacco toquinapodsapa itohui madimanajaride. <sup>6</sup> Naraha iapi jodiodenicca ejete imenibote Pan ssaja tajarahicca jicadsana aji odsa panani Piripodsa ijoppemajaro. Canoa imenidsa iaccadsapi icca huada 5 nadsana Troadedsa itessedeni bacco inabaqquide. Nanidsapi huada 7 nehe imadjarode.

### *Pablopa odsa panani Troadehuaji*

<sup>7</sup> Nadsapi jassinajacca huada jicadsapi najaro dsomedsa aja Jeso dsoqquehi tahimari ibodi huatomanijine, pan dside narihi ijipanijine iqueriqquijarode. Pablo attipa: —Dsemassapi denima jaijanijine –nadsa Jesodsa jehe quinajarideni mari icanabaqquidsapa dsome nocconi tojade. <sup>8</sup> Nadsama iapi odsa capamacossajaro tetepihujicca coba canahuajaninidsa iqueriqquijarode. Nahidsapa jojororo caji tajari, cajororori naridsajaride. <sup>9</sup> Nahidsana dsabisso oni Eotico noccobiji terere tanihuaji huittari canajaride. Naraha Pablocca marinaja dequeradsapi dsabisso huadajari. Odsa tetepihujicca coba canahuajanini huaji taraha huatiajo nadsapa namihuaji ssonajaride. Idimamanaraha huatiahira idimamanajari. <sup>10</sup> Naraha Pablo joppa taronajari, dsabisso huatiajari huapidsa pori, icahuajocossa, totehema nanaja dsabisso camittemanjaride. Nadsapa Pablo pohuadenidsa huati tade: —Oji oji tiquinejeraji, camittemanihi –nade.

<sup>11</sup> Nadsapa Pablo ccamaronipomadsa pan dside inaridsa iadsa da inaridsadsapa apa inade. Nadsapa Pablo denima maride tojadsapa icassiajade. Nadsapa maride jicadsa toccajari. <sup>12</sup> Nanaja dsabisso camittemanihipa pocca odsahuaji iaccanimanadsa huatidsemaneri tanimanade.

### *Troadedsa tojoppemamanapomadsa odsa Miretohuaji bacco toquinajari*

<sup>13</sup> Nadsapa Pabloa: —Ohuapi jahui occana. Tiadenipi canoa imenidsa jai tijaji. Odsa pamema najaro onini Asaodsa otohui timadimanaccana –najari. Nadsapa Pablo jahui toccadsa iapi canoa imenidsa iaccajaro... Asaodsa bacco inade. <sup>14</sup> Nahi Asaodsa Pablo bacco nadsa canoa imenidsa qquedsadsapa iaccapomade. Iaccadsapi odsa pamema najaro onini Mitirenedsa huana icanade. <sup>15</sup> Huada ssiaja ijoppemapomadsapi dsama huittidsacossani Quiodsa huana icanade. Nanidsa ijoppemapomadsapi odsa panani Epesodsapi issoniqquimade. Dsama huittidsacossani Samosodsana huana icanade. Nanidsa ijoppemapomadsapi odsa panani huajira tanicca odsa pamema najaro onini

Miretods huana icanapomade. <sup>16</sup> Pablopa aji jodiodenicca ejete Pentecostes bacco tabote nadsa najaro qquide tohuini nadsa: —Dsama Asiahuaji inajo-jeraccana, huassinaja odsa panani Jerosarehuaji jaijana -nade. Najarojine Epesodsapi huana icana-jerajarode.

*Epesocca Jesodsa jehe quinajarideni cacahuadedenidsa Pablo huati tajari*

<sup>17</sup> Nadsama Miretods imadidsapi Pablo Epesohuajicca Jesodsa jehe quinajarideni cacahuadedenitohui madija dosse inade: —Ohua qquide jahijonana -nadsa. <sup>18</sup> Bacco najonamanadsapa Pablo pahuadenidsa huati tade: —Maittaccadsama ticcadeni dsama Asiahuaji bacco onapodsapi ohua qqui tiquinade. Tiadenidsa omadidsa naqui omadinissa tani nahatoto tinani. <sup>19</sup> Ia Medsede Jesocristocca medse ojadssapi pohua tahimaridsa odsepe ijiridsade. Obodipi deni ojani ohonana-jerade. Ocasserehejine oji oji onaraha nema nehe odsepe ihiji nade. Ajina odsoqquenijine jodiodeni occa madijaraha ohua dama quinabote nadsa naqui ocasserani ohuaridsade. <sup>20</sup> Naraha ohuapi ocappina-jeradsa nema nehe timadimananissa tanijinecca tiadeni maride dissera onajaro. Madija quequeriqquimana nahihuaji huapima mittamanahijine naqui mari mari ohocanabaqqui nade. Odsa cajari cajaridsa naqui tiadeni mari mari ohocanabaqquiridsa nade. <sup>21</sup> Aji jodiodeni, jodio quejena-jarajaridenidsa naqui Jesocristo tahimari mari mari onaridsadsapi ohuatti ajima ohonanajarode: “Ticcadeni imasiripi tinebomanadsa Diodsara iboraqquri tiquinaji. Ia Medsede Jesocristods pajissa tiquinaji” ohonanajarode.

<sup>22</sup> —Naraha jidapapi Jerosarehuaji occana. Dio Corime ohuadsa huati tapode: “Odsa panani Jerosarehuaji ticcana” nadsapa Pohua Attidsa ibora onajaro. Naraha ohuadsa ima tojanitohui. ¿Nejeco imara inanamananijine? Ssamo onaccani. <sup>23</sup> Naraha ima ojariepi nahato onani. Jerosarehuajipi ocasserehe imeni onahananitohui. Dio Corime ohuadsa huati tajari: “Cadenadsa tia jore quinadsa tia coro idsimamananijine titohui najoramanahi” napode. Odsa huapima occaridsadsa naqui najaro ima Dio Corime ohuadsa huati huati tataja napode. <sup>24</sup> Naraha ohuapi najaro imadsa ocappina-jerani. Ohua inanadsoqqe-manadsa naqui epeje, bica tani. Ohua Medsede Jesocristo ohua cadossejaricca imadsa ohuatidsedsapi ojine pajiranissa tanijine, onajaro. Aja ohua cadossejaripa Dio madijadsa huati cahanari canahicca ima bicani mari mari ohonanajaropajide.

<sup>25</sup> —Nadsama ima onihi obodidsa nahato onajaro naqui. Aji tiadeni occa mamari tabaqqui Diocca cacahuehe tahimarini tiadeni mari mari ohocanabaqqui najaropi ohua qqui timanimanapoma-jeranitohui. <sup>26-27</sup> Najarojine aji jidapana tiadenidsa huati onajaropaji. Aji Dio Pohuajine madijadsa inananiijinecca ima nemaneha mari mari onajaro motapi ohuacoma nejerajaro. Naraha madija motadeni ohuatti mittamanaraha pajissa quina-jaradsapa pahuadenijine Diocca huadie pahuadenidsa ssonarinitohui. Pahuadeni emene toccajaropi ojine jerani, onajaro.

<sup>28</sup> —Nadsama ohuattipi tiadenidsa ajima onajaro: Diodsa timadimananissa tanijinepi tiadeni tecahuamanaji. Jesodsa jehe quinajarideni, aja tiadenidsa quequeriqqui najarideni naco tecahuabaqqui-manahissa tajo. Dio Corimejine pahuadeni cacahuade tiquejenajaro. Diocca madija pahuadeni manaconepa Dio Pohua Bedi dsoqquedsa pohua emene toccajaro. Najarojine pahuadeni tecahuabaqqui-manahissa tajo, onajaro. <sup>29</sup> Nidsa ohua nohue ojiradsapi madija ohuahadeni tiadenidsa bacco quinadsapa poccadeni marinaja maidsehecca mari icanabaqqui-ridсахitohui. Pahuadenipa pina dsohuadsohua huadibote bani bedi itaccaridsadsa jicajarissa quinahitohui. Tiadenidsa ssonarimanadsa Jesodsa jehe tidsanapomana-jeraniijine disseraqquri nahitohui. <sup>30</sup> Aji tiadeni titiqueriqquimana najaro motadeni naco maidseheda toquejenahitohui. Poccadeni maidsehera mari mari quinadsapa aja Jesodsa jehe quinajari pahuadenidsara toquejenahijine tohuini quinajari.



<sup>31</sup> —Nema nadsapi tiadeni huapimadsa ohuattipi: ¡Paji! Poccadeni maidsehedsa pajissa tiquina tejeraji. Tibodideni huatoma-manaji. Ohuapi tiadenidsa omadidsapi tiadeni ohuacahuabaqquinissa tade. Huajano 3 naha tiadeni maride ojadssapi dsomema mamari, ssiajama mamari onade. Timadimananissa tanijine onadsa occa ojiema tiadenidsa huati huati onajarode.

<sup>32</sup> —Ohuemecotedeni, jidapapi Diodsa timadimanana, tiadeni onebobaqquini. Dio tiadeni tohuacahua-baqquihissa tahijine Pohuadsa huati huati ohonanajaro. Diopa madijadsa huati cahanari canahi tahimari tiadenidsa huati onajarode. Pocca tohuati huanehe tahimarinijinena ticcadeni jeheniji todacorani nanitohui. Dio Pohua huati tapojaricca ima bicani tiadenidsa da inanitohui. Najaropi aja pocca madija toquejenahijine icattejidsa-baqquijari huapimadsa da inaridsanitohui. Pina pohua huati tapojarissa najari –najari Pablo.

<sup>33</sup> Nadsapa denima huati tajari: —Ohuapi ticcadeni dsiniro tohui, ticcadeni etero tohui onejerade. <sup>34</sup> Tiadenipi occa madie nahatoto tinade. Ohuapi ohua odsepedsa tarabadsa onadsapi dsiniro ohocaji najaro. Najaro dsinirodsa otapari mitta, ohua accodedenidsa mitta ohonaridsa najarode. <sup>35</sup> Nema onadsapi occa madie ahuato onanadsa qqui tiquinajaro. Odsepe ijidsa ohocaji najaro. Nadsapi ocajidsa madija cappiramanajaridenidsa naqui da da odsanaponijine opajirani. Tiadeni naqui nema tiquinani bica tani. Nadsapi pina ia Medsede Jesocristo attissa tinanamananijine: “Madija iadsa manaconi jirehe da quinadsapa etidse tani. Naraha ia naqui madija ohuahadsa manaconi jirehe da inadsana denima etidsejaro” –najari Pablo.

<sup>36</sup> Pablo pocca ima huati taha jicadsapa aja Epesohuajicca Jesodsa jehe quinajari-deni cacahuadedenima Diodsa huati toquinahijine pohuadeni pitodsa jassi tajari. <sup>37</sup> Nadsapa huapima Pablo oji icanaqquimanadsa icahuajocossamana, pano mose quinajari. <sup>38</sup> Nadsapa Pablo attia: —Ohua qqui timanimana-jeranitohui –napodsa pohuatohui bodideni huatoma-manadsa bodideni huanacossajari. Nadsapa Pablo canoa imenidsa toccahijine qquide jahidsippade.

## 21

### *Pablocca benehi odsa panani Jerosarehuaji*

<sup>1</sup> Nadsapa imecotedeni inebobaqquidsa canoa imenidsa jaijedsadsa paji iac-carijaropi dsama bedeni huittidsacossani Cosodsa huana icanade. Huada ssi-aja jaijapomadsapi dsama bedeni huittidsacossani Rodadsa huana icanapomade. Nanidsa ijoppemapomadsapi odsa panani Pataradsa huana icanade. <sup>2</sup> Nanidsa canoa imeni onihi dsama arobeni Penisiahuaji tohuaccanijine canajorani qqui icanade. Nadsapi najarodsana jaijedsadsapi jippehuaji iaqquejidsade. <sup>3</sup> Nadsapi passo imeni nocconi iquejenadsa dsama onihi huittidsacossani qqui inade, oninipi Sipre. Naraha najaro dsamadsapi issoniqquimade. Denima iaccajaropi dsama Siriadsa bacco inade. Nanicca odsa panani Tirodsana huana icanadsapi canoa imenicca todsepetaji inebomananijine najomanadsa jaijemoraccade. <sup>4</sup> Nani Tirodsa Jesodsa jehe quinajarideni bacco inabaqquijaride. Nadsapa: —Iadsa timadimanaccaji –quinadsapa pohuadenidsa huada 7 nehe imadide. Nadsapa Dio Corimejine Jesodsa jehe quinajaridenidsa Pablo tedsejemacca ima ahuato inanadsa Pablodsa huati toquinajari: —Jerosarehuaji tiqquejerana. Ticcadsapi ocasserani tenitohui –quinade. <sup>5</sup> Naraha nanidsa icca huada 7 nadsapi Jerosarehuaji jaijanijine ijoppemapomade. Canoa imenihuaji jaijedsippanidsapi pohuadeni naco maqquideje, amoneje, ejedeni huapima ia qquide jahidsippade. Nadsapi nani ssiquidsa ipitodsa jassi inadsa Diodsa huatide iquejenade. <sup>6</sup> Diodsa huatide jicadsa: —Jaijani –inadsapi: —Jehe, jai tijaji –quinade. Canoa imenidsa jaijedsanidsapi pohuadenipa poccadeni odsahuaji jai tojemorande.

<sup>7</sup> Nadsapi odsa panani Tirodsa iaccajaropi odsa capamema najaro onini Toremaid-adsa huana icanade. Nanidsa jaijemoradsa naqui Jesodsa jehe quinajarideni qqui inabaqquide. Nanidsa naqui pohuadenidsa huada ojarie imadide. <sup>8</sup> Huada ssiaja iaccapomadsapi odsa panani Sesareadsa bacco inade. Nanidsapi Feripecca odsahuaji jaijade. Pohuapa totapari dadade 7 quinajari ojarie. Pohua naco madija Jesodsa jehe quinahijine mari mari naridsajari. Iapi pocca odsadsa imadijarode. <sup>9</sup> Feripecca ejedenipi tabira 4 quinajaro. Ponidenipi Dio Atti huahuati toqquimadedeni. <sup>10</sup> Nanidsa icca huada tohuapinidsa dsama Jodeacca madija Dio Atti huahuati toqquimade Acabo bacco najonajaride. <sup>11</sup> Nadsapa iadsa bacco najonadsa Pablocca ssitora dicca inadsa Acabo pohua biji pohuajine jore, pohua isso jore nadsa Pablo tedsejemacca ima iadsa huati huati tajaride: —Dio Corime ohuadsa huati tajari ajama nahi: “Nidsa Jerosarehuaji bacco tiquinadsapi ajijaro ssitora jinedepa jiodideni dama quinadsa biji jore, isso jore quinadsa jodio quejena-jarajaridenidsa da quinadsapa todsepe tojahitohui” najari. Aji, ohua jore onajaropi ssitora jinede nama inanamanahitohui —nade Acabo atti.

<sup>12</sup> Nadsapi najaro ima ia, Sesareacca Jesodsa jehe quinajaridenima imittadsapi oji inabote nadsa Pablodsa huati huati inade: —¡Jerosarehuaji tiqquejeraji! —inade. <sup>13</sup> Naraha Pablo attipa iadsa ajama nade: —¿Nejecotohui oji oji tiquinajaro? Nema tiquinadsapi tijinedeni ohua naqui titohuideni obodi oji onani. Naraha ohuapi nema nehe Jerosarehuaji occanitohui. Ia Medsede Jesocca ojadsapi epeje, nema nehe ohua jore quinadsa naqui ohuadi-jeranitohui. Ohua inanadsoqqque-maneje ohua inanadsoqqque-manejereje nanitide. Nema nehe onajorani. Jeso oni deni tojanijinepi ohua nema inanamanana, onajaro —nade Pablo.

<sup>14</sup> Nadsapa Pablo ettidsa jehe najaradsapa denima huati inejerade. Nadsama ettipi: —Abi Dio, Pohuana nahato tahi. Ia Medsede Pohua jipa tahiccana bica tani —inade.

<sup>15</sup> Dsotode huada onihidsapi idsepetaji inajorehe jicadsa Jerosarehuaji jaijade. <sup>16</sup> Imecotedeni Sesareacca mota naco iadsa jai tojaride. Jerosarehuaji bacco inadsapi pohuadenina Masonacca odsahuaji ia tonequebaqqqui-manajaride. Aja Masonapa dsama huittidsacossani Siprehuajicca madija. Tahidedsama Jesodsa jehe napojari. Najaricca odsadsa imadijarode.

*Pablopa Jerosarecca Jesodsa jehe quinajarideni cacahuadedenidsa qquide toccajari*

<sup>17</sup> Odsa panani Jerosareadsa bacco inadsapi imecotedeni nahi Jerosarecca huatidsemanadsapa iadsa: —¿Nija, bacco tajonamanajaroqui? —quinade. <sup>18</sup> Huada ssiajapi Pablo inadsa Jerosarecca Jesodsa jehe quinajaridenicca tamine Satiacodsa qquide jaijade. Nahidsa Jesodsa jehe quinajarideni cacahuadedeni huapima queriqquimanajaride. <sup>19</sup> Nanidsa bacco inadsapi Pablo pohuadenidsa nija nadsapa pocca benehicca ima nemaneha pohuadenidsa huati huati tade: —Diocca dacorehe ohuadsa tojadsapi jodio quejena-jarajarideni naco Jesodsa jehe naridsamanajari —nade Pablo. <sup>20</sup> Nanaja Pablocca ima mittamanadsapa Diodsa huatidsemanadsa: —¡Diocca imana bica tani, bica tani! —quinade.

Nadsapa Satiacodeni Pablodsa huati toquinade: —Jehe imecote, tiapi nahato tinani: Ajadsa naco jiodideni Jesodsa toquejenajari jica-jarahi. Naraha pohuadenipa Moisesicca marinajadsa disseraqqqui nahi paja naccahi. <sup>21</sup> Titahimari mittamanajari, aja icca madija jiodideni dsama huaji tanihuaji jodio quejena-jarajaridenicca dsamadsa madiridsamanajarideni mari ticanabaqqquiridsajari. Naraha titahimari pohuama huati huati quinajaridenipa ajama quinajari: “Pablo mari mari nanaridsa najaripa Moisesicca marinaja ecahuamana-jeranjine, ejedeni maqquideje huissinaja cajimana-jarahijine, jiodidenicca madie inebomananjine naqui mari mari nanaridsa najari” quinajari. <sup>22</sup> Nadsapi ¿nejecoma inanijine? inajaro. Pohuadenipa bacco tajonani mittamanadsapa tiadsa ima inanamanarana —quinade Satiaco, Jesodsa

jehe quinajarideni cacahuadedeni tedseje. <sup>23</sup> —Nema nadsapi pina ettissa tinanani bica tani. Aja iadsapa maqquideje 4 quinaha poccadeni huatinaja Diodsa huati toquinapojari inapajiramananissa tanijine najoramanahi. <sup>24</sup> Tia naqui pohnadenidsa tiquejemana. Diodsa dada toqquimahuaji pohnadeni tiaqquedsimabaqquina. Tia naqui pohnadenidsama pina aji jodiodenicca marinajassa tinanaji. Nadsama poccadeni huatinaja inapajiramananissa tadsa poccadeni danijijine edede bedi manaco tiana da tinaji, inajaro. Najaro jicadsapi dada toqquimadena tatideni ssa inarid-sahitohui, tatideni ccohuaqquiri nahijine, aji poccadeni ima madija huapimadsa ahuato tanijine. Jehe Pablo, pohnadenidsa tiquejemadsapi jodiodeni mota tia qqui toquinadsapa ajama quinahitohui: “Jaho, ima imittapojaropi maidsaniji ttaraneje. Pablopa Moisesicca marinajapi ecahuani, nebo-jarahi” quinahijine –quinade Satiaco, Jesodsa jehe quinajarideni cacahuadedeni tedseje.

<sup>25</sup> —Naraha etti onihipi aja jodio quejena-jarajari Jesodsa jehe quinajaridenidsa icca ima teppedsa dsodo inapodsapi ajima inapode: “Aji icca imara ticahatteraji. Aja madija icca Diodsa toquejena-jarajarideni poccadeni siba nahatonidsa bani da da quiquinanajaripa mita tiquina tajarajo, tijipamananijine oppina tahi. Bani ssipori niqwi nadsa dsoqquedsa emene tocca-jarajari naco tijipamana tejeraji. Bani emene naco tijipamananijine oppina tani. Huananehe naqui tinebomanaji. Pina maqquideje amoneje cajiraha amoneje onihipi aja ajapi poni. Amoneje maqquideje cajiraha maqquideje ohuaha naja najapi poni. Tabiradeni naco pohnama aja aja canaridsera-jarana” inade dsodo inadsa –quinajari Satiaco, Jesodsa jehe quinajarideni cacahuadedeni tedseje.

### *Pablo todsepe tojjari*

<sup>26</sup> Nadsapa pohnadeni attissa inananiijine Pablopa maqquideje 4 quinaha Diodsa dada toqquimahuaji iaccabaqquijari. Huada ssiajapa Diodsa dada toqquima huapihuaji pina jodiodenicca marinajassa inanamanajaro. Naraha Pablopa dsotode pohna motta Diodsa dada toqquima bodihuaji toqquedsimajari, poccadeni ima huati tahijine. Nadsapa dada toqquimadedsa pohna attia: —Nidsa huada 7 nehe jicadsapi jajedsimapomanitohui. Nadsana icca da naqquinaja da onadsapi icca ima Diodsa huati inapojarocca jicanijine –najari.

<sup>27</sup> Nadsapa huada 7 nehe bacco tabote nadsa Pablopa pohna motta Diodsa dada toqquimahuaji toqquedsimapomajari. Naraha dsama Asiahuajicca jodiodeni nahi bodihuaji jai tojedsimadsa Pablo qqui toquinadsapa pohnadsa huadimanajari. Pohnadenipa Pablodsa noccodeni jidsera najari. Poccadeni dsamahuaji maride ccaridsadsa tahide pohnadsa huadimanapojari. Nadsapa najarideni huadimanapomadsapa Pablodsa ima inanamanajaro. Johua johua quinadsa Pablo dama quinajari. Madija huapima pohnadsa huadimanahijine attidenipa ajama quinajari: <sup>28</sup> —¡Jari, icca madija Isaraerideni, ibiji acco ticamamanaji! –quinajari. —Ajajari madijapa dsama onihihuaji ccaridsadsa madija huapimadsa mari mari naridsaraha pocca marinajapi tabaccora tani. Ia Isaraeridenidsa madija tojiperamanahijine mari mari najari. Moisesicca marinaja nebomanahijine mari mari najari. Diodsa dada toqquima naqui madija ettajomananijine mari mari najari. Jidapana pohna icca Diodsa dada toqquimahuaji jodio quejena-jarajarideni eqquedsimabaqquijari. ¡Najaropi oppina taraha! ¡Pohnadenijinea Diocca odsa toppinani, toppinani! –quinajari.

<sup>29</sup> Aja nama quinajaripa tahide amossinihuaji Pablo pohna tesse Trofimo tedseje huehuedaridsa nadsa qqui toquinapojari. Trofimopa odsa panani Epesohuajicca madija. Pohnapa jodio jaradsapa pohnadsa noccodeni jidseraqquijari najari. Pablopa Diodsa dada toqquimahuaji Trofimo eqquedsima-jararaha pohnama attideni: —Jodio quejena-jarajarideni eqquedsimabaqquijari –quinajari.

<sup>30</sup> Nadsapa johua johua quinahi mittamanadsapa madija huapima domo ccajonajari. Pablo dama quinadsapa Diodsa dada toqquima amossinihuaji joca ininemanadsa toqquedsimani-jarahijine noccobiji huassinaja icahacossamanajaro. <sup>31</sup> Nadsapa Pablo inanadsoqqe-manahitohuiraha romanodenicca soldadodenicca tamine deni tojahicadsa ima bacco tajaro: —¡Jerosarecca madija mohua mohua quinapaja! —quinajari. <sup>32</sup> Nadsapa soldadodenicca taminepa pocca soldado dossededeni, poccadeni dodosse tabaqquma huahua inabaqquidsapa mohua mohua quinahihuaji domo toccajari. Bacco toquinadsapa huadimanajarideni Pablo idaqquimanaraha soldadodenicca tamine, pocca soldadodenima jahijonahi qqui toquinadsa inebomanajari. <sup>33</sup> Nadsapa soldadodeni bacco najonamanadsapa poccadeni tamine attidsa Pablo dama quinadsa cadena pamadsa jore quinajari. Nadsapa Pablo najidsodedenidsa soldadodenicca tamine huati tajari: —¿Ajajaripa nejeco madijanaja? ¿Nejeco imara inanajaroneje? —najari. <sup>34</sup> Naraha aja johua johua quinajarideni ima onihidsa, ima onihidsa ahuaji johua ahuaji johua naridsamanadsapa soldadodenicca tamine ima mittahissa tajarajari. Nadsapa taminea: —¡Jari, icca odsahuaji tiaccanimanajo! —najari. <sup>35</sup> Naraha poccadeni totoccamaro bacco tanimanabote naraha madija Pablo inajidsomanahijine disseraqquri nadsapa pohuadenijine oppina tajaro. Nadsapa soldadodeni Pablo idimamana, meme da quinadsa iaccanimanajari. <sup>36</sup> Naraha nattidenihuaji jahijonajaria: —¡Dsoqquena! ¡Dsoqquena! —quinajari.

### *Pablo jodiodenidsa huati tajari*

<sup>37</sup> Nadsapa noccobiji memehujicadsa bacco tamaronimanadsapa Pabloa soldadodenicca tamednsa huati tajari: —¡Nidsa padseje! tiadsa huati onaccana ¿jehe taqui? —najari. Naraha Pablo Cresiacca madija attidsa huati tadsa tamine mittadsapa pohuadsa huati tajari: —A ¿dsama Cresiacca madija atti nahato tinaqui? —najari. —Jehe, nahato onani —najari Pablo. <sup>38</sup> Nadsapa tamine attia: —Naraha jodiodeni tiadsa huadimana nadsa ohua: ¿Tiapi dsama Ejitocca madija tijaroqui? onapa. Aja huajano tahideccadsa toponi huahuajina dsodsojodedeni 4 mil quinaha madija madide nohuerahihuaji querieqquimanajari, romanodenidsa jadsire inanamananijine. ¿Najarideni tamineridenibote tijaroqui? onaraha —najari romanodenicca soldadodenicca tamine deni tojahicca.

<sup>39</sup> Naraha Pablo attipa: —Ohuapi najari ojajerani. Ohuapi jodio madija, dsama Ciliciahuaji ossonajarode. Occa odsa pananipi Tarso. Najaropi odsa panani imeni. Madija huapima nahatoqquri nahi. ¿Ohuattidsa jehe taqui? Occa madijadsa huati onaccana, onajaro —najari.

<sup>40</sup> Nadsapa tamine jehe nadsa Pabloa noccobijidsa huaridsa pohua dsepe memehujaji da icanajaro, tocadidirehijine. Tocadidire nadsapa jodiodenidsa huati tajari. Pohuadeni atti ebreodsas huati huati tajari.

## 22

<sup>1</sup> Nadsapa Pablo huati tajari: —Jehe ohuemecotedeni, ime jochuideni, tiadenidsa occa ima huati onana, titaharibobo canaji. Ohuadsa: “Tabaccora tinani” tiquinaraha ohuapi ima ocappirani, nohuerani —najari. <sup>2</sup> Nadsapa Pablo pohua attidsa huati huati tadsapa jodiodeni pohuadeni atti ebreo mittamanadsapa denima tocadidire najari. Nadsapa Pablo attia: <sup>3</sup> —Ohuapi jodio madija ojan, dsama Ciliciacca odsa panani Tarsodsas ossonajaro —najari. —Naraha aji odsa panani Jerosaredsana onapjarode. Nadsama ohua maridepa Camarieopaja. Madija huapima pohua oni nahatoqquri nahi. Pohuapa icca ididenicca marinaja maride bica tajari. Icca ididenicca marinaja ohua mari canahissa tade. Ohuapi najaro imadsa ibora onade. Nadsama Diotohui naqui dissera onade. Pina jidapana tiadeni Diodsa disseraqquri tiquinajarossa onajarode. <sup>4</sup> Nadsama ohuapi aja Jesodsas jehe quinajarideni onajidsobaqquihijine

tohuideni occaridsadsa otadamadsapa ohuattidsa toponi cocorohuaji coro coro ihid-simabaqquimana nade. Maqquideje, amonejedenima jicahijine ohonanaccade. <sup>5</sup> Aji occa imapi dada toqquimadedenicca tamine deni tojajari, ime jocohuideni tedseje nahatoqquiri nahi. Pohnadenidsa: “¿Pajissaqui?” tiquinadsapi: “Jehe, pajissa, nama naridsaccade” quinahitohui. Pohnadenidsa naqui huati onadsapi pohnadeni atti ima teppedsa dsodo nani ohuadsa da quinadsapi odsa panani Damascuhuaji poccadeni ima ohuaccajarode. Nahi Damascocca jodiodenicca taminedenidsa nohue onarid-sanijine dsojo onajarode. Najaro imadsa Damascocca Jesodsa jehe quinajarideni qqui onabaqquidsa otadamadsa aji Jerosarehuaji ohuaccani-baqquidsapa inajidso-baqquimanahijine onadsa occajarode.

*Pablo Jesodsa tojajaricca ima huati tajari*

<sup>6</sup> —Nadsapi Damasco jahui occajaro... maji itetepidsa Damasco bacco onabote naraha memehuajicca ssiajani dacorehe amadsati ohuadsa bacco naronadsapi ohuitori nemanehedsa ssiajahujani nade. <sup>7</sup> Nadsapi ohuedima, namidsa opona nadsa ohuadsa huahua nahi omittade: “Saoro, Saoro ¿nejecotohui occa madija nanajidso taridsajaro? Aja occa madija nanajidso taridsajaropi pina ohua nanajidso taridsajarossa najaro” nade ohuadsa. <sup>8</sup> Naraha manaco pohnadsa huati onade: “¿Tiapi nejecojari?” onade. Nadsapa: “Ohuapi Nasaretihuajicca Jeso ojani, tiapi ohua tinajidsojaro” nade ohuadsa. <sup>9</sup> Nadsama aja ohuadsa jai tojajarideni naco ssiajani qqui toquinadsa huajo canireraha Jeso ohuadsa huati tahi mohuini mittamanaraha pocca ima mittamana-jarade. <sup>10</sup> Nadsapi pohnadsa huati onade: “Ohua Medsede ¿nejecoma onapadseje?” onade. Naraha ohuadsa huati tade: “Titehemadsa odsa panani Damascuhuaji ticcaji. Nanidsana occa ima, aji ohuadsa tidsepe ijiniijinecca ima timittanijine” nade ohuadsa. <sup>11</sup> Nadsama ohuapi ssiajani dsibehibotejine onocco siri tojadsapi ohuatimadedeni odsepedsa ohua joca quinadsana Damascuhuaji bacco onade.

<sup>12</sup> —Naraha nahi Damascodsapa madija oni Anania madijari. Pohnapa Moisesicca marinajadsa ibora tajari. Damascocca jodiodeni pohnadsa: “Madija bicahi” quiquinanajari. <sup>13</sup> Nadsapa Anania ohua qquide ccajonajari, bacco nadsa ohuadsa huati tade: “Ohuemecote Saoro, tinocopi ssire tana” nanaja onocco ssire-re, Anania paja qqui onarihi nade. <sup>14</sup> Nadsapa Anania denima ohuadsa huati tade: “Abi Diopa icca ididenicca Dio, najaria aji Dio pocca dossenijissa tinananijine tia tocattejidsajari. Pocca Ejedeni Bicabote qqui tinahijine naqui tia tocattejidsajari. Pohna atti huati tahi naqui timittanijine Dio tia tocattejidsajari” nade ohuadsa. <sup>15</sup> “Nadsama Dio Pohnajine qqui tinajaro, timittajaro naqui madija huapimadsa tecomeraridsanijine. <sup>16</sup> Jari, jidapapi totopa ticajiji. Denima tinajo-jerana. Ia Medsede pohnadsa huati tinaji, tia tonassiajahijine, ticca imasiri epeje inananijine” nade Anania atti ohuadsa –najari Pablo.

*Pablo Jeso pohna dosse inajaricca ima huati tajari*

<sup>17</sup> Nadsapa Pablo denima huati huati tajari: —Nadsapi odsa panani Jerosarehuaji bacco onanidsa Diodsa dada toqquimahuaji oqquedsimadsa Diodsa huatide ojadapi Djoline ohuadsa pina occa huadassa naraha pajissa qqui onade. <sup>18</sup> Ohua Medsede Jeso ohuadsa ahuatodsapa ohuadsa huati tade: “Aji Jerosarehuajipi tinebodsapa huassinaja ticcaji. Aja Jerosarecca madijapa otahimari mari ticanabaqqui tajarajo. Occa imadsa huaribodeni sibaqquiri nahi” nade. <sup>19</sup> Naraha ohuapi Jerosaredsa pohna tahimari mari ocanabaqquihijine tohuini onadsa pohnadsa huati onade: “Ohua Medsede, ajajari madijadenipa occa madiacca ima nahatoqquiri nahi. Aja jodiodenicca Dio Atti mamari onihi onihihuaji ohoccaridsa nadsapi tiadsa jehe quinajarideni ohotadama naccade. Ohonajidsobaqqui nadsapa aja toponi cocorodsa coro coro ohodsimabaqqui



nahi naco nahatoqquiri nahi. <sup>20</sup> Aja ticca medse, tetti huahuati naridsade Esteba iquinaqquimanadsa emene toccadsa naco nani dsaboradsa cattade ohua nade. 'Dsoqquena, dsoqquena' quinadsapa jehe onade. Aja Esteba quinade ppahuaqquiri nahijine naco eterorideni motaranicca ssiti quinadsa eterorideni ohuacahuade occa ima naco nahatoqquiri nahi" onade ohua Medsededsa. <sup>21</sup> Naraha manaco ohua Medsede ohuadsa huati tade: "Epeje, ticcaji. Jidapapi dsama huaji tanicca madija jodio quejena-jarajarideni mari ticanabaqquihijine tia dosse onajaro" nade ohuadsa -najari Pablo.

*Pablo cossi quinahijineraha: —Romano madija ojani -najari*

<sup>22</sup> Nadsapa jodiodeni mohuaradsa taharibobo canaraha Pablo: —Jodio quejena-jarajarideni maride occanijine -nahi mittamanadsapa denima mittade jiperaqquiri nadsa paja mohua toquinarihi najari. —Jari ¡dsoqquena, dsoqquena! ¡Atti nama nahipa madi-jarana! -quinade. <sup>23</sup> Huadimanadsa johuahua johuahua cananaja poccadeni etero motaranicca ssiti quinadsa ppoto ppoto quinadsapa Pablohuaji ssiqui naqui quina quina quinajari. <sup>24</sup> Nanaja romanodenicca soldadodenicca tamine deni tojahicca pocca soldadodenidsa huati tajari: —¡Ajaripa odsa bodihuaji joca tidsimamanajo! -najari. Nadsapa odsa bodidsa Pablo cossi inaqquimanahijine icadossebaqquijari: —Jari, cossi taqquimanajo. ¿Nejecotohui jodiodeni pohuadsa johuahua johuahua canajari? Cossi taqquimanadsana iadsa pocca ima ecomeraniijine -najari.

<sup>25</sup> Nadsapa Pablo cossi quinahijine biji jore, isso jore quinaraha Pablo soldadodeni dossededsa huati tajari: —Tiapi ohuadsa nahato tinejerajaro nitide. Ohuapi romano madija ojaha. Ima cacattemadehuaji ohua tiaccamana-jeraraha ohua cossi tadsapi ¿oppinera taqui? Oppina taraha -najari. <sup>26</sup> Nadsapa aja Pablo atti mittadsapa soldadodeni dossede pocca taminedsa huati tahijine joppa tanidsa huati tanijari: —Tetti ¿nejecoma tani? Ajaccajari madijapa: "Romano madija ojani" napa -najari pocca taminedsa. <sup>27</sup> Nadsapa romanodenicca soldadodenicca tamine deni tojahicca Pablodsapa huatide toccajari: —¿Pajissaqui? ¿Tiapi romano madija tijaqui? -najari. Nadsapa: —Jehe, ohuapi pajissa romano madija ojani -najari Pablo. <sup>28</sup> Nadsapa soldadodenicca tamine atti: —Ohuapi romanodeni ojanijine manaconi dsiniro huemani da onadsana romanodeni ojarode -najari. Naraha Pablo attipa: —Ohuapi romano madija ojadssapi dsiniro da onejerade. Ossonaponidsama romano ojani -najari Pablo.

<sup>29</sup> Nadsapa soldadodeni Pablo cossi quinabote najaridenipa Pablo atti mittamanadsapa tohuaji-baqquiqqui nade. Poccadeni tamine naco cappinajari. Pohua attidsa romano madija cadenadsa jore quinajari, cossi inaqquimanadsapa pohuadsana ima ssonarinitohuiraha. Pohuadsa oppina tadsa apaja najari.

*Pablopa jodiodenicca ima cacattemadedenidsa toqquedsimajari*

<sup>30</sup> Huada ssiajapa romanodenicca soldadodenicca tamine atti: —¿Nejecotohui jodiodenipa Pablodsapa huadiqquiri najari? -nadsapa Pablocca cadena dicca inadsa pohuadsa huati tajari: —Nidsa, huahua onabaqquidsa queriqquimanadsana ticca ima icattemamananijine -najari. Nadsapa dada toqquimade taminedeni, jodi-odenicca ima cacattemadedeni deni toquejenajarideni tedseje queriqquimanadsa romanodenicca soldadodenicca tamine Pablo iaqquedsimadsapa taminedeni baccodeni huaji huajari.

## 23

<sup>1</sup> Nadsapa Pablo jodiodenicca ima cacattemadedenihuaji tocatta nadsa huati tajari: —Ohuemecotedeni, ohuapi obodi bica tadsa omadinissa tajaroa aji jidapana omadijaropaji. Diodsa naqui occa madie ahuato tajaro -najari Pablo.

<sup>2</sup> Naraha dada toqquimadedenicca tamine deni tojajari Ananiapa nahi Pablo inoridsa madija domo huajarideni icadossebaqquijari: —¡Ajari ppa tidsimamanajo! -najari. <sup>3</sup> Naraha Pablo pahuadsa huati tajari: —¡A, tiapi mamaisade! ¡Nidsa manaco Diopa tia ppa tacossahitohui! Ima cacattemade tijaraha ima oppina tani titinana najaro. Moisesicca marinaja nahato tinadsapi pina occa imara ticattemanitohuiraha. Ohuajari ppa idsimamananijine ticadossebaqquidsapa Moisesicca marinaja dsori tinanajaro -najari.

<sup>4</sup> Naraha nahi Pablo inoridsa madija domo huajari attidenia: —¿Nejecotohui Diodsa dada toqquimadedenicca tamine deni tojajaridsa tetti tabaccora tadsa huati tinajaro? -quinajari.

<sup>5</sup> Nanaja Pablo pahuadenidsa huati tajari: —Ohuemecotedeni, pahuapa dada toqquimadedenicca tamine deni tojajari ssamo onadsa pahuadsa atti atti onajaropa. Aji Dio Atti dsodo nanidsapi: “Madijadenicca taminedsa tamassomana tejeraji” nani. Najaro ima nahato onaraha -najari Pablo.

<sup>6</sup> Nadsapa Pablo bodi nahato tajaria aja jodiodeni motaha aja marinaja onini pariseodsa jehe quinajaridenipaja. Poccadeni marinajapi onihi eahuamanajaro. Jodiodeni motaha aja marinaja onini sadosedsa jehe quinajaridenipaja. Poccadeni marinajapi onihi eahuamanajaro. Nadsapa pariseodeni pahuadsa huatideni huanacquiri nahijine Pablopa jadsirema huati tajari: —Ohuemecotedeni, ohuapi marinaja pariseodsa jehe onani, occa abi naco jehe najari. Nadsama ohuapi aja jicajaridenipa nahatonimanahitohui ohonanajaro. Najaro occa imajinea ohuadsa huadiqquri najaridenipa ohua inajidsomananijine tohuini quiquinanajari -najari Pablo.

<sup>7</sup> Pablocca ima nema nani mittamanadsapa pariseodeni, sadosedeni tedseje pahuadenira huadimanadsa dsahua dsahua canajari. Nadsapa ima cacattemadedeni ima inapamamanadsapa jehe canire-jarajari. <sup>8</sup> Aja marinaja sadosedocapi: —Idsoqquedsapi inahatoninira tani, Diocca dodosse tabaqqi memehuaajicca naco nohuerahi, icorime naqui nohuerani -quiquinanajari. Naraha marinaja pariseocapi: —Idsoqquedsapi inahatoni tani, Diocca dodosse tabaqqi memehuaajicca naco madimanahi, icorime naqui icajini -quiquinanajari. <sup>9</sup> Nadsapa sadosedeni pariseodeni tedseje poccadeni marinaja acconi cahadiredsapa jadsirema dsahua dsahua canajari. Nadsapa jodiodenicca marinaja maridedeni mota aja marinaja pariseodsa jehe quinajaridenina Pablo atti acco icamamanahijine tothemamana najari. Nadsapa huati toquinajari: —Ajajari madijapa imasiri cappirahi. ¿Nejecotohui tinajidsomanahijine? Tocatorime itide, Diocca dodosse memehuaajicca itide pahuadsa huati tajari -quinajari.

<sup>10</sup> Naraha huadimanadsa denima paja mohua toquinarihi nadsapa soldadodenicca tamine cappinajari. Pablo ahuaji joca ahuaji joca quinahi qqui tadsa pohua bodipa: —A, inatajorimanadsa dsoqquerana -nadsa pocca soldadodeni jahijonahijine huahua najari: —¡Pablo inanadsoqqe-manabote nahi! ¡Qqui tiquinajo! Dama tiquinadsa icca odsahuaji tiaccanimanajo -najari. Nadsapa poccadeni odsadsa huedsapomajari Pablo.

<sup>11</sup> Najaro dsomepi ia Medsede ahuatodsa Pablo inoridsa hua najari. Pahuadsa huati tajari: —¡Pablo, daco tijirana! Aji ojine qqui tinajaro, timittajaro naqui aji Jerosaredsa tecomeraridsajaropi nidsa odsa panani Romahuaji naqui tecomerapomanitohui -najari.

*Pablo dsoqquehijine najoramanajari*

<sup>12</sup> Huada ssiajapa jodiodeni mota queriqquipomadsa pohuadenira Pablo inanadsoqque-manahijine jehe canirejari. Nadsapa attidenia: —Pablo inanadsoqque-jaraccadsama ijipa-jeraccana, dse inejeraccana -quinajari. —Aji ettissa inana-jeradsapi Dio ia tonajidso-baqquidsa bica tani, inajaro -quinajari. <sup>13</sup> Nadsama aja —Pablo inanadsoqquena -quinajaridenipa madija 40 denima queriqquimanajari.

<sup>14</sup> Nadsapa dada toqquimade taminedeni, ime jocohuideni tedseje pohuadenidsa huatide jai tojajari: —Iapi ima inajorajaro, Pablo inanadsoqquehijine. Inanadsoqque-jaraccadsama ijipa-jeraccana, inajaro. Ettissa inana-jeradsapi Dio ia tonajidso-baqquidsa bica tani, inajaro -quinajari. <sup>15</sup> Nadsapa: —Jari, ajima inana: Tiadenipi ima cacattemededeni tedseje aja romanodenicca soldadodenicca taminedsa timaidsamanana. Ajima tiquinaji: “Pablocca ima icattemanissa tanijine pohua atti denima imittana, inadsa Pablo ahuaaji teccajonapomana” tiquinadsa eccajonamapomahijine. Nadsama iapi aji jahuidsa inajoradsa iaqqeéquima-manadsapa Pablo inanadsoqquehijine -quinajari.

<sup>16</sup> Naraha Pablo pohua jidobadipa bijedi jodiodeni jara quinahicca ima mittadsapa soldadodenicca odsahuaji bijedidsa huatide toccajari. Bacco tadsa toqquedsimadsapa Pablodsa pohua jara quinahicca ima huati tajari. <sup>17</sup> Nadsama Pablopa romanodenicca soldadodeni dossede ojariadsa huahua nadsapa pohuadsa huati tajari: —Jari, ajajari dsabisso ticca taminedsa tiaccanijo, pocca ima huati tahijine -najari.

<sup>18</sup> Nadsapa pocca taminehuaji dsabisso iaccanidsapa pocca taminedsa huati tajari: —Aja Pablo toponi cocorodsa huedsajaripa ohuadsa huahua nadsa atti ajama najari: “Ajajari dsabissopa ticca taminedsa tiaccanijo, pocca ima huati tahijine” nadsa ohuaccajonaripaja -najari.

<sup>19</sup> Nadsama romanodenicca soldadodenicca tamine deni tojahiccapa dsabisso biji dama, madija ohuaha mittamana-jarahijine madija nohuerahihuaji iacca-cca nadsa huati tajari: —Nija ¿nejeco imara ohuadsa huati tinanijine? -najari.

<sup>20</sup> Nadsapa dsabisso attipa: —Jehe, jodiodeni occa coco inanadsoqque-manahijine jehe canirehi omittadsa huatide occajonararo. Dsemassapa poccadeni ima cacattemededenidsa Pablo tiaqquedsimapomahijine tiadsa huati toquinahitohui: “Pablocca ima icattemanissa tanijine pohua atti denima imittaccana” quinahitohui.

<sup>21</sup> Naraha pohuadeni attidsa jehe tejerana -najari. —Madija 40 quinahitide, denima itide, jahui inididsa pohuadeni tonajimamanadsa occa coco tossoqquimadsapa inanadsoqque-manahitohui. Nadsama attidenipa ajama quinahi omittapa: “Inanadsoqque-jaraccadsama ijipa-jeraccana, dse inejeraccana. Ettissa inana-jeradsapi Dio ia tonajidso-baqquidsa bica tani” quinapaja -najari. —Najaro ima najoramanajari. Jehe tanitohui madimanacchahi -najari Pablo jidobadi.

<sup>22</sup> Naraha soldadodenicca taminea: —Jehe, epeje, omittani. Ticcanina. Naraha: “Soldadodenicca taminedsa huati onapa” tejerana. Tecomana, onajaro -najari.

*Pablo inanadsoqquemana-jarahijine dsama cacahuade Ferishuaji iaccamanajari*

<sup>23-24</sup> Nadsapa soldadodenicca tamine aja dsama arobeni Jodea cacahuade Feridsa Pablo dosse inahijine soldadodeni dossede pamaha huahua inabaqquijari. Hueda-jonadsapa pohuadenidsa huati tajari: —Ticcadeni soldadodeni tinanajoraridsa-baqquimanajo. Nidsa dsome 9’dsa odsa panani Sesareahuaji jai tijaji -najari. —Soldado 200 quinaha pohuadeni amoridsa jai tojana. Bojo idenidsa naco 70 quinaha jai tojana. Huahuajinama jai tojahijine naco 200 quinaha jai tojana. Bojo ojariedsana Pablo toccahijine. Pablo tecahuamanahissa tadsa dsama cacahuade Ferishuaji bacco tahijine -najari. <sup>25</sup> Nadsama soldadodenicca taminepa dsama cacahuade Feridsa ima teppe dsodo inajaro.

<sup>26</sup> —Nija dsama cacahuade bicahi Feris. ¿Bica tinaqui? Ohuapi Claodio Risia tiadsa occa ima dsodo onajaro. <sup>27</sup> Ajajari madija tiadsa dosse onajaripa jodiodeni dama quinadsa inanadsoqqe-manahijineraha pohua attipa: “Romano madija ojani” nahi omittadsa ohua occa soldadodenima pohua ecahuajari. <sup>28</sup> Nadsama obodipi: ¿Nejeco ima cajidsa jodiodenipa pohua onajidsohuijine tohuini quinajari? onadsa poccadeni ima cacattemadedenidsa ohuaqquedsimajari. <sup>29</sup> Nahihuaji imarideni omittajaropi Pablo pocca imapi jodiodenicca marinajassa nejeradsa pohuadsa huadiqquiri najari. Puhuapa huadie cappiraraha “Dsoqquena” quinajari. Naraha ima tabaccora tani cappiradsa dsoqquehijine bica tejerani, onajaro. “Coro todsimana” quinaraha ima cappiradsapa coro todsimahijine ssamo tani. <sup>30</sup> Naraha jodiodeni motapa: “Pablo inanadsoqquena” quinahi ima omittadsapi huassinaja tihuaji dosse onajari. Nadsapi jodiodenidsa huati onajaro: “Pablodsa huadiqquiri tiquinadsapi dsama cacahuadehuaji jai tijaji, pohuadsana ticcadeni huadie tecomeramananijine” onajaro. Jehe, epejeni, occa ima. Ohua onipi: Claodio Risia –najari pocca ima teppedsa.

<sup>31</sup> Nadsapa soldadodeni dsome Pablo iaccamanadsapa odsa panani Atipatridsa bacco toquinajari. Pina poccadeni tamine pohuadeni dosse inabaqquipohui attissa inanamanajaro. <sup>32</sup> Huada ssiajapa soldado pohuadeni amoridsa jai toजारidenipa pohuadeni tadsarihuaji dsodonimanajari. Naraha bojodsa jai toजारipa Pablodsa jai tojaccahi. <sup>33</sup> Nadsapa odsa panani Sesareadsa bacco toquinadsapa dsama cacahuade Ferishuaji jai tojedsimadsa ima teppe da quinajaro. Pablo naco pohuadsa inebomanajari. <sup>34-35</sup> Nadsapa Ferispa ima teppe hua inehe jicadsapa Pablodsa huati tajari: —¿Nejeco dsamahuajicca tijani? —nadsa Pabloa: —Dsama Ciliciahuajicca ojani –najari. Nadsapa: —Nidsa tia jaradedeni bacco najonamanadsana ticca ima omittanijine –najari Feris. Nadsapa pocca dodosse tabaqqi icadossebaqquijari, tamine Herode tadsaribotedsa Pablo ecahuamanahissa tahijine.

## 24

### *Dsama cacahuade Ferispa Pablocca ima mittajari*

<sup>1</sup> Nadsapa Ferisdsa Pablo madihicca huada 5 nadsapa tamine Ananiapa odsa panani Sesareadsa bacco najonajari. Puhuapa odsa panani Jerosarehuajicca dada toqquimadedenicca tamine deni toजारari. Puhuadsa jahijonahipa ime jochuideni mota, ima huahuati toqquimade nahatobote ojari najonamanajari. Ima huahuati toqquimade onipa Teotoro. Nadsama najaridenipa dsama cacahuade Ferishuaji jai tojedsimajari, Pablodsa ima inassonarimananijine.

<sup>2</sup> Nadsapa Pablo naco huahua quinadsa qquedsimadsapa Teotoro poccadeni huadie huati tajari Ferisdsa: —Nija tamine Feris. Tiapi bica tinadsa tijine jonehedsa imadinissa dsanapojarode. Nahato tinadsapi icca dsama Jodea huapima naqui tijine tobicaridsajaro. <sup>3</sup> Jehe tamine bicahi Feris, tijine iadsa bica tadsapi “Bica tinani, deni tijani” inajaro. <sup>4</sup> Aji tiadsa huatide naqui jaijajona-jeraraha iadsa ima tojadsa tiadsa jaijajonajaro. Tiadsa icca ima najo tejeranijine ima badsira tehe huati onana. Bica tinadsapi titaharibo canaji –najari Teotoro. <sup>5</sup> —Ajajari madijapa ima ponima inanaridsajaro. Puhuajine dsama huapimacca jodiodeni huadimanadsa mohua mohua naridsamanajari. Puhuapa Nasaretihuajicca Jesodsa toquejenajarideni aja Nasareno quiquinanajaridenicca tamine toजारari. <sup>6</sup> Puhuajine Diodsa dada toqquimahuaji oppina tehe tojabote naraha pohuapa dama inade. [ Nadsapi iqueriqquidsa aji ia jodiodeni icca marinaja hua inadsa najarodsa pocca ima icattemana inajarode. <sup>7</sup> Naraha romanodenicca soldadodenicca tamine Risia ccajonadsa pocca soldadodeni dacorehema jahidsimadsapa Pablo dama quinadsa iaccanimanade. <sup>8</sup> Nadsapa Risia attipa iadsa: “Nahi dsama cacahuade Ferisdsana

Pablo tidsahuamanajo” nadsa tiadsa ia dosse najonabaqquijaride. ] Jari, tiana pohuadsa huati tinaji. Pohua atti timittadsa attidenidsa pajissa tanitohui –najari Teotoropa. <sup>9</sup> Nahidsa jodiodeni toqueriqquijarideni attideni naco: —Teotoro attipa pajissa, Pablocca imapi tabaccora tani –quinajari.

<sup>10</sup> Nadsapa manaco Pablo huati tahijine Feris pohua dsepe Pablohuaji da icanadsa Pablo huati tajari: —Jehe tamine Feris, tiana occa ima timittanijine jipa onajaro, tiapi huajano huapi taha ajijaro dsamadsa madimanajaridenicca ima titicattema najaro. <sup>11</sup> Maittadsama onihima nadsa Jerosarehuaji bacco onanijaro. Jidapapi huada 12 bacco tani. Nanidsa bacco onanipodsapi Diodsa ohuatidsenijine dada toqquimahuaji oqquedsimade. Jipa tinadsapi nahidsa madimanajaridenidsa huati tinadsa “Pajissa pohua qqui inade” quinahitohui. <sup>12</sup> Naraha aja jahijonajaridenipa ima ponima onanaridsani qqui toquina-jararaha ohuadsa huadimanajaride. Ohuapi madija tedseje ahuaji atti ahuaji atti inejerade. Diodsa dada toqquimahuaji naqui madijadsa mohua mohua onejerade. Jodiodenicca Dio Atti mamarihuaji naqui mohua mohua onejerade. Aji odsadsa, amossinihuaji naqui mohua mohua onaridsa-jerade. <sup>13</sup> Nema nadsapi pohuadeni atti tossamojaro, ojine ima nohueradsa. Pina pohuadeni huati toquinajarissa najaro ahuatomanijine ssamo tani –najari Pablo.

<sup>14</sup> —Naraha ohuapi ima ojarie ocajjaropi ajima onajarode: Abi Diopa, aja icca ididenicca Dio, Pohuadsara ibora onajaro. Naraha Diocca dosseniji dsatidsa pajissa onadsapi ajajari jodiodeni mota najarodsa: “Jidsa tani, tabaccora tani” quinaraha. Ohuapi Moisesicca marinaja huapimadsa naqui pajissa onajaro. Dio Atti cacomeraqquri najaridenicca dsodonijidsa naqui pajissa onajaro. <sup>15</sup> Ohuapi aji tohuini omadijaropi pina ohuemecote jodiodeni tohuini madimanajarissa najaro. Najaro aji jicajaridenipa Diojine nidsa nahatonimanahitohui, ihinanajaropaji. Bicaqquri najarideni jicajari naco nahatonimanahitohui. Tabaccoraqquri najarideni jicajari naco nahatonimanahitohui, ihinanajaropaji. <sup>16</sup> Najaro tohuini onadsapi obodi huire tehe oadinijine dissera onajaro. Dio ohua qqui, madijadeni naco ohua qqui toquinadsapa ocappina-jerajaro –najari Pablo.

<sup>17</sup> —Jehe, nadsapi huajano huapi taha dsama onihihuaji occaridsade. Nadsama nahihuajicca madijadeni ohuadsa dsiniro da quinadsa ohuaccanijaro, ohuemecote Jerosarecca jodiodeni cappiramanajaridenidsa da onaridsanijine. Ohua naqui Diodsa da onanijine occanijarode. <sup>18</sup> Nema onadsapi Diodsa dada toqquimahuaji oqquedsimajaropajide. Pina ia jodiodeni icca marinajassa ihinana najaro onanajarode. Najaro jicadsapi occa daniji Diodsa dade oqquedsimadsa ohua qqui toquinajari. Madija huapi taha ohuadsa jai tojedsima-jarajari. Ojine naco madija mohua mohua cama-jarajari. <sup>19</sup> Naraha dsama Asiahuajicca jodiodeni nahidsa ohua qqui toquinadsapa ohuadsa huadimanajaride. Najaridenina tiahuaji jahijonadsa poccadeni huadie tiadsa huati toquinahijine bica taraha, onajaro. <sup>20</sup> Naraha Asiahuajicca jodiodeni nohue quiradsapa ajadsa domo huajaridenina jidapana tiadsa huati toquinana, onajaro. Nahi jodiodenicca ima cacattemededeni deni toquejenajaridenidsa oqquedsimadsa tabaccora tanicca onanajaro qqui toquinajari huati toquinana, onajaro. <sup>21</sup> Aji ima ojarie huati onajarora huati toquinahitide. Aja pohuadeni bacchohuaji ohuadsa jadsirema ohuatti ajima onajarode: “Jicajaridenipa nahatonimanahitohui ohonanajarojinea ohua inajidsomananijine tohuini quinajari” onajarode. Najaro tiadsa huati toquinahijine itide –najari Pablo.

<sup>22</sup> Nadsapa dsama cacahuade Feris najaro mittadsapa: —Epejeccani, denimapi huada onihidsana –najari. Jesocristodsa jehe quinajarideni tahimari aji —Diocca dosseniji dsati –quiquinanajari pohuadsa jidsera tajaro. Nadsapa Pablodsa huati tajari: —Nidsa, soldadodenicca tamine Risia ahuaji bacco nadsa ticca ima ocattemanijine –najari. <sup>23</sup> Nadsama soldado dossededsa huati tajari: —Pablopa toponi



cocorohuaji cadena jiraha tecahuahissa taccana -najari. —Pohua tessedeni naco pohuadsa qquide jahijonahijine oppinera tani. Pohua cappirahicca eccajonamanahijine naco oppinera tani. Dosse tinanibaqqui tajarana -najari Feris atti.

<sup>24</sup> Nadsapa huada onihidsa Ferispa Sesareahuaji bacco nanijari, pocca amoneje Drosira tadsajani. Ponipi jodio madija. Ferispa Pablotohui huahua nadsa pohuadenihuaji eccanimanajari. Nadsapa Pablo Jesocristodsa jehe inani tahimarini mari icanabaqquidsapa taharibobo canajari. <sup>25</sup> Nadsama Pablo mari icanabaqquidsapa ima 3 nehe huati tajari: —Madija imari borocco tanina bica tajaro -najari. —Madija imasiri inana-jeranijine pohua pohua cacahuade nahato tajarina bica tajari -najari. —Nidsaranibote Diohuaji huapima idomo huadsa Diona icattejidsa-baqquihitohui -najari Pablo maride tojadsa. Naraha Feris mittadsa cappinadsapa Pablodsa: —Epejena, ticcanina. Nidsa odsepe jirapomadsapi titohui huahua onapomanitohui -najari. <sup>26</sup> Feris pohua bodipa: —Pohua tappa onahijine ohuadsa dsiniro da inanitide -nadsapa huajijiradsa Pablodsa huati tahijine pohuatohui huahua huahua naraha dsiniro da inejerajaro. <sup>27</sup> Nama dsanapodsapa huajano pamaha tossoiqquimajari. Nadsapa tamine Feris dsama cacahuade nebotsapa Porsio-Festona dsama cacahuade tojajari. Naraha Feris pohuadsa jodiodeni huatidsemana-dsanapohuijinepa Pablo tappa inajarajari.

## 25

### *Dsama cacahuade dsati Festopa Pablocca ima mittajari*

<sup>1</sup> Nadsapa Festo dsama cacahuade tojahijine odsa panani Sesareahuaji bacco najari. Nahi Sesareadsa madiraha huada 3 nadsa odsa panani Jerosarehuaji toccajari. <sup>2</sup> Nahidsa bacco tadsa dada toqquimade taminedeni, jodiodeni ime jochuideni tedsejepa dsama cacahuade dsatidsa jai tojedsimajari, Pablo tahimari huati toquinahijine. —Pablocca imapi tabaccora tani -quinadsa huati huati toquinajari. <sup>3</sup> Pohuadeni attipa: —Jari tamine Festo ¿ettidsa jehe taqui? Pablocca ima huassinaja ticattemanijine Jerosarehuaji eccanimanahijine huahua tana. Denima inajo-jerana -quinajari. Nama quinaraha jahui inididsa madija pohuadeni tonajimamanadsa Pablo inanadsoqqe-manahijine najoramanapojaripa ecomamanajari. <sup>4</sup> Naraha Festopa pohuadeni attidsa jehe najarajari. Pohua attipa: —Pablopa Sesareahuaji toponi cocorodsa huedsahi. Ohua naqui aji Jerosaredsa occa huada huapi tejerani. Nani Sesareahuaji occanibote nani -najari. <sup>5</sup> —Najarojine tiadenidsa ajima onajaro: Ticcadeni taminedeni mota Sesareahuaji ohuadsa jai tojanina, onajaro. Pablopa imasiri cajija caji-jaraja nahitide. Nani Sesareadsana ticcadeni ima aji “Pablocca imapi tabaccora tani” tiquinajaro ohuadsa huati nimanimana-pomahijine, onajaro -najari Festo.

<sup>6</sup> Nadsapa nahi Jerosaredsa Festo pocca huada 8 nitide, 10 nitide, nadsana Sesareahuaji toccanijari. Bacco tanidsapa huada ssajana ima cacattemahuaji toqquedsimadsa nahidsa ima icattemanijine huittarijari. Nadsapa Pablo eccajonamanahijine huahua najari. <sup>7</sup> Nadsa Pablo bacco dsimadsapa Jerosarehuajicca jodiodeni jahijonajaridenia Pablo icahuahuajanimanadsa tamine Festodsa huati toquinajari. Imasiri onihi, onihi huati huati toquinaraha attidenipa pajissa jerani. Pina pohuadeni huati toquinajarissa najaro Festo qqui tahijine nohueradsapi ssamo tani.

<sup>8</sup> Nadsapa Pablo manaco huati tajari: —Ohuapi jodiodenicca marinaja onajidso nejerade. Jerosarehuajicca Diodsa dada toqquimahuaji naqui onajidso nejerade. Romanodenicca tamine deni tojahicca pohuadsa naqui ima onana nejerade -najari.

<sup>9</sup> Nadsapa tamine Festo jodiodeni inahatidsebaqquihijine Pablodsa huati tajari: —Jerosarehuaji ticcanidsa nanidsana ticca ima ocattemanijine ¿jipa tinaqui? -najari.

<sup>10</sup> Naraha Pablo attipa: —Ohuapi romanodenicca ima cacattemahuaji ohuedsajaroa. Ajidsana occa ima cattemanijine bica tani, onajaro. ¡Jerosaredsapi poni! Occa madija jodiodeni naco ohonajidsobaqqui najaradija. Najaro imapi nahato tinani -najari. <sup>11</sup> —Tabaccorehe onanadsapi occa tabaccorehe manaconi odsogquenijine bica tani. Naraha attideni pajissa jeradsapi pohuadenidsa ohua teccoramananijine bica tejerani, onajaro. Ohuapi romanodenicca tamine deni tojahiccana occa ima icattemanijine tohuini onani -najari Pablo.

<sup>12</sup> Nadsapa Festo pohua biji acco camadedeni tedseje imahaha canajari. Nadsana Pablodsa: —Jehe, tiapi romanodenicca tamine deni tojahiccana ticca ima icattemanijine tohuini tadsapi najaridsa ticcanitohui -najari Festo atti.

*Festopa tamine Aquiripadsa Pablocca ima huati tajari*

<sup>13</sup> Nadsama huada onihidsapa romanodenicca dsama arobeni onihihuajicca tamine onipa Aquiripa pohua caripene Berenise tadsajani odsa panani Sesareahuaji hueda-jonajari, dsama cacahuade Festodsa qquide. <sup>14</sup> Nahidsa poccadeni huada huapi tadsa Festopa tamine Aquiripadsa Pablo tahimari huati tajari ¿pohua atti nejecoma napadsaja? nadsa. Festo attipa: —Dsama cacahuade ojaponipi toponi cocorodsa madija ojaría bacco onapode. Dsama cacahuade Feris inebodsapa manaco ohuana ohuacahuajaride -najari. <sup>15</sup> —Naraha dsama cacahuade ojapodsapi Jerosarehuaji occadsa jodiodeni dada toqquimade tamedeni, poccadeni ime jochuidenima Pablodsa huadiqquiri nahi paja nadsapa ohuadsa huati toquinade: “Pablocca imapi tabaccora tani. Ticca dodosse tabaqqi ticadossebaqquijo, Pablo inanadsoqque-manahijine” quinajari. <sup>16</sup> Naraha pohuadenidsa ohuattipi: Iapi romanodeni iquejenadsapi madija pohuama ihinanadsoqque najarajari. Ima cacattemahuaji huapima queriqquimanadsa tahide pohua huadidedeni poccadeni ima huati toquinapodsapa manaco pohua pocca ima ecomerajaro. Nadsana ima cacattemade: “Jehe, dsoqquena” nadsapa dsoqquehi bica tahi. Naraha: “Dsoqque-jarana” nadsapa dsoqquehijine ssamo tani, ihinanajaro, onade pohuadenidsa. <sup>17</sup> Nema onajarojinea Jerosarehuajicca jodiodeni ahuaji jahijonadsapa huada ssiaja ima cacattemahuaji oqquedsimajaro, inajo-jeranijine onadsa. Ima cacattemacca huihuittaridsa ohuittaridsapi Pablotohui huahua onajarode. <sup>18</sup> Obodipi: Imasiri oppina tanicca inanajaro nitide, onaraha pohua huadidedeni huati toquinadsapa nema nanicca huati toquinajarade. <sup>19</sup> Pohuadeni attidenipa: “Pablopa icca ididenicca marinajassa nejerajaro mari mari naridsajari. Pohuapa aja jodio madija onipa Jeso najaricca imadsa pajissa naraha najari Jesopa dsoqquejari” quinajari. Naraha Pablo attipa: “Jesopa camittemanidsa madihi paja nahi” najari. <sup>20</sup> Najaro ima ohuadsa ssamo tadsapi epeje onade. Nadsapi Pablodsa huati onade: “Jerosarehuaji ticcanidsa nanidsana ticca ima ocattemanijine ¿jipa tinaqui?” onade. <sup>21</sup> Naraha Pablopa: “Ohuapi romanodenicca tamine deni tojahiccana occa ima icattemanijine tohuini onani” nade. Nadsapa: “Jehe, toponi cocorodsa timadiccana. Nidsa icca tamedesa tia dosse onanitohui” onade -najari Festo, Aquiripadsa huati tadsa.

<sup>22</sup> Nadsapa tamine Aquiripa attia: —Jari Festo, ohua naqui Pablo atti omittana -najari. Nadsapa: —Jehe, dsemassana pohua atti timittanitohui -najari Festo.

<sup>23</sup> Nadsapa huada ssiaja tamine Aquiripa, Berenise tadsajani madija huapima: —A... tamine deni tojahicca -quinahijine tamedenicca etero huatini ccara tanicca huedsamanadsapa ima cacattemahuaji huededsimajari. Pohuadeni tedseje romanodenicca soldadodenicca tamedeni, odsa pananica deni toquejenajarideni jahidsimadsa ima cacattema bodihuaji queriqquimanajari. Nadsapa Festo Pablo eccajonamanahijine huahua najari. <sup>24</sup> Pablo qquedsimadsapa Festo atti: —Jehe tamine Aquiripa, aji iadsa tiqueriqquimanajaro naqui jidapana timittamananijine tiadenidsa huati onana. Aja qqi tiquinajaripa jodiodeni huapima pohuadsa

huahuadimana najari. Odsa panani Jerosarehuaji occadsa naco pocca ima ohuadsa huati toquinajari. Aji odsa panani Sesareadsa naco ohuadsa huati toquinajari. Huatide disseraqquri nadsa johua johua quinadsapa pohuadsa: “Dsoqquena, dsoqquena” quiquinanajari. <sup>25</sup> Pohua huadidedeni attideni omittaraha pohuapa imasiri cappirahi. Pohua ima inana-jeradsapi inajidsomanadsa inanadsoqque-manahijinepa oppina tani. Pohua atti naco: “Romanodenicca tamine deni tojahiccana occa ima icattemanijine” nadsapa ohuapi jehe onade. Nadsapa nahihuaji dosse onahitohui, onajaro –najari Festo. <sup>26</sup> —Naraha icca tamedsa pohua dosse onadsapa ima teppema dosse onahitohuiraha pocca imasiri tahimarini ssamo onadsapi ¿nejeco imara occa tamedsa dsodo onapadseje? onajaro. Najarojine Pablotohui huahua onajaropa. Jari, jidapana pocca ima timittamanaji. Tamine Aquiripa, tia naqui pocca ima timittadsapi pocca imasiri tiadsa ahuato tanitide. Nema nadsapi pocca imasiri tahimarini nahato onadsa occa ima teppedsa dsodo onanijine. <sup>27</sup> Madija toponi cocorodsas huadsadsapa pocca imasiri tahimarini ssamo onadsapi ¿icca tamine deni tojahicca pohuahuaji dosse onahi bica taco? Bica tajarahi. Imasiri tahimarini dsodo onejeradsapi pina pohuama dosse onajarissa nahitohui –najari Festo.

## 26

### *Tamine Aquiripadsa Pablo pocca ima huati tajari*

<sup>1</sup> Nadsapa tamine Aquiripa Pablodsas huati tajari: —Jari, manaco ticca ima huati tinaji, imittana –najari.

Nadsapa Pablo huati tahijine pohua dsepe meme da icanadsa huati tajari: <sup>2</sup> —Jehe tamine Aquiripa, tiadsa occa ima huati onadsa timittanijinepi ohuatidsejaro. Jodiodeni occa ima tabaccora tani quinadsa ohua idsahuamanaraha tiadsa occa ima huati onadsapi ima onana-jerani nahato tinanitohui –najari. <sup>3</sup> —Jehe, tiapi jodiodeni tahimari nahatojide tijirani. Tiadsa naqui icca madija jodiodenicca madie jidsera tani. Iapi jodiodeni icca imadsa jehe icanirenissa tejerani. Jodio arobedenipa ima onihidsa jehe quinajari, jodio arobedeni ohuahapa ima onihidsa jehe quinajari. Ima nema nani nahato tinadsapi occa ima mohuaradsa titaharibo canaji –najari Pablo.

### *Pablopa Jesodsas toja-jaraccadsa pocca ima huati nimanijari*

<sup>4</sup> —Aja jodiodeni huapimapa occa madiicca ima nahatoqquri najari. Ohuapi ejedeni ojadsama pohuadenidsa omadiridsajarode. Tahidepi occa dsama Ciliciahuaji ossonadsa ohua qqui toquinapojari. Dsotode dsabisso ojadsapo odsa panani Jerosarehuaji omadidsa naqui ohua qqui najonamanajaria ajijaropaji. <sup>5</sup> Jehe, pohuadenipa tahidedsama ohuadsa nahatoqquri najonahi. Marinaja onini pariseodsas jehe onapojarocca ima naqui nahatoqquri naraha tiadsa huati toquina-jarajari. Iapi marinaja pariseodsas jehe inajaropi pina jodio motadenissa inejerani. Iapi jodiodeni icca marinajadsa denima disseraqquri inajaro. <sup>6</sup> Naraha jidapana tibaccodenihuaji ohuajaro, occa ima ticattemamananijine ohuadsa huahua tiquinajaro. Ohua ohuati: Jicajaridenipa nahatonimanahitohui, pina Dio icca ididenidsa huati tapojarissa najaro. Najaro tojanijine tohuini omadijaro. Nema onadsapi ohuadsa huahuadimana najari. <sup>7</sup> Icca madija jodiodeni aja icca idi Isaraeri pohua bedi 12 quinajarideni potemahi huapima jicajarideni Djotine nahatonimanahi qqui inabaqquihijine tohuini imadi-dsanapojaro. Pina Dio huati tapojarissa najaro tohuini imadijaro. Najarojinea jodiodeni Diodsa iboraqquri nadsa dsome ssiaja, dsome ssiaja dsepedeni ihijimana najari. Naraha tamine Aquiripa, ohua naqui najarotohui onajorarojine jodiodeni motaha ohuadsa huahuadimana nadsa odsosqquenijine tohuini quiquinanajari. <sup>8</sup> Naraha ¿nejecotohui tiadenia jicajaridenipa Djotine nahatonimanahijinecca imadsa pajissa tiquinejerajaro? –najari Pablo.

*Pablo Jesodsa jehe quinajarideni inajidsobaqquijaricca ima huati nimanijari*

<sup>9</sup> —Nadsama ohua naqui tahidepi Nasaretihuaicca Jeso tahimaridsa pajissa onejeraccade. Jesocca ima jicanijine naqui dissera onade. Ohuapi Jesodsa jehe quinajarideni ohonajidsobaqqui nadsapa: Bica tani, ohonanaccade. <sup>10</sup> Ohuapi Jerosaredda nema onaridsade. Dada toqquimade taminedeni ohua icadossemanadsa naqui Jesodsa jehe quinajarideni huapi taha otadamadsapa toponi cocorodsa coro coro ohodsimabaqqui naccade. Jesodsa jehe quinajarideni inajicamanadsa naco: Jehe, bica tani, ohonanaccade. <sup>11</sup> Nema onaridsajaroa jodiodenicca Dio Atti mamarihuaji huapima quequeriqquimana najarideni onajidsobaqquihijine tohuideni ohoccaridsa naccade. Jesodsa jehe quinajari nebomanahijine tohuini onadsa pohuadeni ohonajidsobaqqui najaride. Pohuadenidsa huadi onadsa nacassera onadsapi odsa panani huaji tanicca onihi onihihuaji naqui tohuideni ohoccaridsa naccade –najari Pablo.

*Pablopa Jeso pohuadsa ahuatopohuicca ima huati nimanijari*

<sup>12</sup> —Nadsapi Jesodsa jehe quinajarideni damade nema onaridsadsapi odsa panani Damascohuaji occajarode, otadamahijine. Dada toqquimade taminedeni ohuadsa: “Jehe, titadamahijine ticcaji” quinadsapa pohuadeni atti ima teppedsa dsodo quinadsapi poccadeni ima teppema occajarode. <sup>13</sup> Jehe, nadsama tamine Aquiripa, najaro ima tiadsa huati onana. Ohuapi jahui occajaro... maji itetepidsa Damasco bacco onabote naraha memehuaicca ssiajani dacorehe amadsati ohuadsa bacco naronadsapi ohuitori nemanehedsa, aja ohuadsa jai toजारideni inorideni nemanehedsa naqui ssiajahujaniridsa nade. Majipa dsibehi taraha ajamani. Aji ohua qqui onajarona denima dacorajaro. <sup>14</sup> Iapi huapima iedimaridsade. Nadsama ohuapi etti ebreodsa omittade: “Saoro, Saoro ¿nejecotohui occa madija nanajidso taridsajaro? Aja occa madija nanajidso taridsajaropi pina ohua nanajidso taridsajarossa najaro” nade. “Nema tadsapi tia tinatabaccorajaro. Pina bohui pohua momohua bono ssacarajaridsa ttai nanidsa bohui pohua pohuajine biquerajarissa tajaro” nade. <sup>15</sup> Naraha manaco pohuadsa huati onade: “¿Tiapi nejecojari?” onade. Naraha: “Ohuapi Jeso. Tiapi ohua tinajidsojaro” nade ohuadsa. <sup>16</sup> Nadsapa ohuadsa: “Titehemaji, aji tiadsa ohuatomajaropi ohuadsa tidsepe ijinijine. Occa ima naqui tecomeraridsanijine onadsa titohui huahua onajaro. Aji jidapana ohua qqui tinajaropi najaro occa ima tecomeraridsanijine. Nidsa tiadsa ohuatopomadsa ohua qqui tinapomajaro naqui tecomeraridsanijine. <sup>17</sup> Aja jodiodenidsa timadiridsadsapi tia ohuacahuaridsanitohui. Jodio quejena-jarajaridenidsa timadiridsadsa naqui tia ohuacahuaridsanitohui, madija tia inanadsoqquemana-jeranijine. Jidapapi jodio quejena-jarajaridenidsa tia dosse onanijine. <sup>18</sup> Pohuadenipa pina dsidsinidsa jahiridsaraha tia dosse onajaropi noccodeni ssire tinanabaqquihijine. Nahi dsidsini nebomanadsapa Dio ssiejenedsana madimanahijine. Imasiri totonanade Satanacca dossehedsa toquejenaraha nebomanadsapa Diodsara toquejenahijine. Ohuadsa pajissa quinadsapa poccadeni imasiri onanamossinijine. Bodideni onahirebaqquidsa naco nidsa memehuaaji Diodsa toquejenadsapa pocca medse bicaqqui najarideni tedseje pocca biquehe cajimanahitohui” nade Jeso ohuadsa –najari Pablo.

*Pablopa Jesocca dossenijidsa ibora tajari*

<sup>19</sup> Nadsapa Pablo attia: —Tamine Aquiripa, aji huati onajaropi Djojine pina occa huadassa nehe ocajijaro Jeso ohuadsa ahuatodsapa pohua attidsa ibo onejerajaropaji. <sup>20</sup> Tahidepa odsa panani Damascohuaji Diodsa toquejenahijine huati onabaqquijopjaride. Dsotode odsa panani Jerosarecca naco huati onabaqquijaride. Ajijaro dsama Jodea huapimacca naco huati onabaqqui-ridsajaride. Jodio quejena-jarajarideni naco huati onabaqqui-ridsajaride. “Tibodideni tecajiqquimeramanadsa ticcadeni imasiri

tinebomanaji. Diodsara tiquejenaji” ohonanade. “Ticcadeni jeheniji, tibodideni cacajiqquimera-manani ahuato tanijinepi Dio Attidsara iboraqquiri tiquinaji. Ima bicanira tinanaridsamanaji” onadsa mari mari ohocanabaqqui najaride. <sup>21</sup> Nema onaridsajaroa aji Diodsa dada toqquimadsa jodiodeni ohua dama quinadsa ohua inanadsoqque-mananijine disseraqquiri najaride. <sup>22</sup> Naraha Dio ohua acco camadsapa maride dissera onajaroa aji dissera onanipaji najaropaji. Najaroa aji Dio Pohuajine ajidsa ohuajaropaji. Aji huati onajaropi pajissara huati onajaro madija huapima ajamani toquejenajarideni, deni toquejenajarideni naco mittamanahijine, onajaro. Occa marinajapi jidsera tani. Maittaccadsama Moisesi, aja Dio Atti cacomeraqquiri najarideni naco najarossa najaro huati toquinapojari. Pohuadeni tedsejemacca imapi aji imadidsama pajissa tojajaropaji. <sup>23</sup> Najaro imapi ajima najaro: “Mesiapa najidsohue imeni tonahanadsa huatiahitohui. Ppa idsamanaraha nahatonihitohui. Jicapojarideni huapimapa nidsa dsotodena nahatonimanahitohui. Naraha Mesiapa tahide nahatonipohuitohui. Nahatonidsapa pina dsidsinidsa ssiajani tossiajabaqquijarossa nadsa pohuana icassiejeranijine tahimarini ahuato inanadsapa jodiodeni, jodio quejena-jarajarideni noccodeni ssire inanabaqquihitohui” quinapojari Dio Atti cacomeraqquiri najarideni attidenipa –najari Pablo.

*Tamine Aquiripa Jesodsa jehe nahijine Pablo pohuadsa huati huati taraha jehe najarajari*

<sup>24</sup> Pablopa ima cappirahi huati huati taraha Festo jadsirema atti atti najari: — ¡Pablo, tiapi tissamojaro! ¡Papeo huajide tijiradsa tibodi tossamojaro! –najari.

<sup>25</sup> Naraha Pablo attipa: —Nohue ojirani, tamine Festo, obodi tossamo-gerani. Pajissara tiadsa huati onajaro. Occa ima borocco tani, ssamo tejerani –najari Pablo. <sup>26</sup> —Aja tamine Aquiripa ajadsa huittarihi, pohuadsapi occa huatinaja jidsera tani. Najaroa aji ocappina-geradsa pohua mittahijine huati huati onajaropaji. Jehe tamine Aquiripadsapi Jeso tahimari huapima pohuadsa jidsera tani ohuapi nahato onani. Aji Jesodsa ima inanamanajaropi ahuatorehedsa ima inanaridsamanajerajaro. Huapima qqui toquinaridsajaride –najari Pablo. <sup>27</sup> Nadsapa: —¿Nija tamine Aquiripa, Dio Atti cacomeraqquiri najarideni dsodo quinapojarodsa pajissa tejeraqui? Pajissa tani nahato onani –najari Pablo.

<sup>28</sup> Naraha tamine Aquiripa: —A, tetti: “Amadsati Cristodsa tojana” ¿tajarorane? –najari.

<sup>29</sup> Nadsapa Pablo attia: —Jehe, epejena amadsati naqui bica tani. Dsotode naqui bica tani. Tiadeni huapimapi pina ohua Jesodsa jehe onajarossa tiquinanijine Diodsa huati huati ohonanajaro. Naraha cadena jirehe, onajaro –najari Pablo.

<sup>30</sup> Nadsama Pablo pohua atti jicadsapa tamine Aquiripa, Berenise, dsama cacahuade Festo, aja pohuadenidsa queriqquimanajarideni quinadsa totehemamanajari. <sup>31</sup> Nadsapa tohuajimanahi nadsa pohuadeni ehuerahi imahaha canajari: —Aja Pablopa madija ihinajidsobaqqui najaradsapa dsoqquehijine ssamo tahi. Toponi cocorodsa huedsahijine naco huedsahijinepa nohuerahi –quinajari.

<sup>32</sup> Nadsapa Aquiripaha Festodsa: —Pablopa tappa inahi bica taraha pohua attipi: “Romanodenicca tamine deni tojahicca pohuana occa ima icattemanijine” nadsapa tappa inahijine ssamo tani –najari.

## 27

*Odsa panani Romahuaji Pablo dosse quinajari*

<sup>1</sup> Nadsama: —Dsama Itariahuaji Pablo dosse inana, nahidsapa icca tamine deni tojahiccana pocca ima icattemanijine –quinadsapa romanodenicca soldado dossede Joriodsa huati toquinajari. Aja Jorio pocca dodosse tabaqqupa 100 quinajari.



Najaridenipa soldado 600 quinajari mota. Pohnadenidsa: —Tamine deni tojajari Acostocca soldadodeni —quiquinanajari. Nadsapa najaridsa huati toquinajari: —Jari Jorio, toponi cocorodsa domo huedsajarideni, Pablo quinadsa Itariahuaji tiaccabaquimanajo —quinadsapa aji ohua Roca naqui pohnadenidsa occajarode. <sup>2</sup> Itesse Aristaco naco iadsa toccade. Pohnapa dsama Masedoniacca odsa panani Tesaronicahuajicca madija. Nadsama nani odsa panani Sesareacca jahuidsia ia huapima jaijedsippadsa odsa panani Adaramitiohuajicca canoa imeni etero ssoque caniquimani cajinicca dsama Asia jippehuaji tohuaccabote nani qqui icanade. Nadsapi najaro canoa imenidsa jaijedsadsa iaccajarode. <sup>3</sup> Huada ssiajapi odsa panani Sidohuaji huana icanade. Nadsapa Pablo cacahuade Joriopa pohnadsa huati huana tadsa: —Titeddeni qquide tiqquemorani bica tani —nade. Nadsapa pohna tessedenidsa Pablo toqquemoradsapa inajipamanade. Pohna cappirahicca naco pohnadsa da quinajari. <sup>4</sup> Nadsapi huada ssiaja Sidodsa ijoppemapomade. Naraha jojode dacorehe iahuaji jo najonadsapi canoa paji tohuaccarini nanijine ssamo tade. Nadsapi dsama bedeni passo imenidsa huittidsacossani Sipre inidihuajina tohuaccarode. Najaro dsama bedeni huittidsacossajaroline jojode ojidsama nadsapi canoa imeni tohuaccanissa tade. <sup>5</sup> Nadsapi Sipredsa iaqqequequimadsapi passo imenihuajina iaqqequejidsade. Dsama Ciliciadsa issoniquima, dsama arobeni Pafriadsa issoniquima, dsotodepi dsama Risiahuaji bacco inade. Nanicca odsa panani Miradsana huana icanade.

<sup>6</sup> Nadsapa nahidsa romanodenicca soldado dossede canoa imeni onihitohui qqui naridsadsapa odsa panani Arejadriacca canoa imeni Itariahuaji tohuaccanijine qqui icanade. Pohnapa najarodsa ia tohuaccabotsabaqquidsapa iaccapomade. <sup>7</sup> Nadsapi canoa imeni tohuaccaraha jojode jadsirema iahuaji jo najonapomadsapi canoa imeni tohuaccaraha najo tocanajaro. Huada huapi tani inajo-dsanapodsapi odsa panani Quinido huajira tanidsa bacco inade. Nadsapi jojodejine denima paji tohuaccarini nanijine ssamo tani. Nadsapi passo nocconidsa dsama huittidsacossani onini Cretahuajina acca icanamanadsa jojode ia cco tocajidsabaqquide. Nadsapi nanicca odsa panani Saomonadsapi icassoniqqumade. <sup>8</sup> Denima Creta inidihuaji iaccadsa naqui najo taraha iacca... iacca... canoa imeni huahuana tocana oninipi Bueno Puertohuaji bacco inajarode, aji odsa bedeni Rasea huajira tanidsa. (Bueno Puerto ettidsapi: Huahuana tocana bicani, inajaro.)

<sup>9</sup> Nadsapa huada huapi tani inajonadsa dsadsajadecca abadsico bacco tocanade. Dsadsajadedesapi passo imenidsa canoa imeni tohuaccani oppina tajaroline Pablo nahato tadsa canoa imeni ahaccadedenidsa huati tade: <sup>10</sup> —Jehe otessedeni, denima jaijadsapi oppinabote bacco inanitohui. Icca canoa imenipi cobara tocananitohui. Nadsapi todsepetaji naco amossihuajahitohui. Ia naqui ijicarana —nade Pablo. <sup>11</sup> Naraha romanodenicca soldado dossede Pablo attidsa huaribo siba tajari. Pohnapa canoa imeni jinede atti, ahaccade attidenira mittajaride. <sup>12</sup> Nani huahuana tocana Bueno Puertopi dsadsajadedsa bica tejerani nahatoqquri najari. Jojode passo, jojode passo dsanapojaro noppineni cappinamanadsa: —Jina, denima iaccana —quinade. Huapimapa Creta inidihuaji tohuaccamanadsa odsa Fenisedsa bacco toquinahijine tohuini quinajari. —Nani Fenisedsa bacco inadsapi nanidsana imadiccana, dsadsajade jicadsana jaijapomanijine —quinade.

### *Jojode dacorehe ccajonajaro*

<sup>13</sup> Nadsama jojode jadsirema iahuaji jo najonajaro cacajiquimeradsapi ojidsama inattihuaji ccajonajaro. Nadsapi: —Jehe, jidapapi bica tani —quinadsa ppejo ccanajabote idimoranimanadsapi icca canoa imeni tohuaccapomade. Nadsapi Creta inidima nani iaccapomade. <sup>14</sup> Iaccaraha dsotodepi dsamahuajicca jojode dacorabote ccajonapomadsa canoa imenidsa ssonari ssonari nade. Najaro jojode oninipi:

Norodeste, icanacanimanajaro. Canoa arobenihuaji ssonarijaro. <sup>15</sup> Jojodepi iadsa dacoradsa passo nocconihuajina iaccade, nanihuajipi jipepera inaraha. Nadsapi jojode poni ccajonanihuaji acca icanaraha jojode dacoradsapi epeje inade. Nadsapi jojode poni toccanihuajina johuidso icadsanapode.

<sup>16</sup> Nadsapi dsama bedeni huittidsacossani Caoda icassoniqquimadsa jojodepi ojidsama nade, dsama huacosseje najaro. Nadsapi nanidsa canoa bedenipi canoa imeni inorinidsa ssoque cadsanani je tocanani noppineni cappinamanadsa: — Joca icanamacossanina –quinade. Passo ijijarohne najo taraha nema nehe joca icanamacossanimanade. <sup>17</sup> Nadsapi canoa imeni tetepinidsa jore icadsanamanade. Cotanihuaji soca coro idsippamanadsa canoa dopanihuaji joca inajonamanadsapi daco cajiranijine nocconidsa ssoque idsanamanade. Dsotodepa ssiqui quehemama canajaro onini Siretedsa doi canadsa cabararini noppineni cappinamanadsa ahua jore canani tappa icanamanade. Canoa nattinidsa tabo tocanadsapi ojidsama tohuaccajaro. Jojode toccanihuajira tohuacca-dsanapojaro. <sup>18</sup> Jojode dacorajaro nebo-jeradsapi icca canoa imeni jadsirema ahuaaji pati ahuaaji pati canade. Huada ssiajadsa naqui nema cadsanapodsapi todsepetaji mota, dsamatapa mota naco hua idsippamanade. Nadsapi: —Canoa imeni tocappahuani nana –quinaraha nema cadsanaponi paji nade. <sup>19</sup> Ssiajapomadsa naqui nema cadsanaponi paji nadsapi canoa imeni tothuaccarinicca mota dicca quinadsapi hua idsippamanade. <sup>20</sup> Nadsapi huada huapi taraha maji qqui inajarade. Dsome naqui abadsico bedi qqui inajarade. Tahidepi: —Icassiejeranitohui –inaporaha passo jojode dacorehema tabaccora dsanapodsapi: —Ajidsa ijicanitohui –inade.

<sup>21</sup> Huada huapi taraha ijipa-jerade. Nadsapa Pablo totehemadsa huati tade: — Jehe otessedeni, tahide Cretadsa tiadenidsa huati onapode: “Denima jajjadsapi oppinabote bacco inanitohui” onaporaha ohuattidsa jehe tiquinejeradsapi oppinabote bacco inani taji. Nassa ohuattidsa jehe tiquinadsapi tidsepedenitaji pohuama hua tidsippamana-jaranaja. Tiadeni naqui ocasserani temana-jejanitohuiraha. <sup>22</sup> Naraha jidapapi tiadenidsa huati onana: Ticappinamana-jeraji. ¡Dacoco tijiraji! Icca canoa imeni cabararidsa amossi canaraha ijica-jejanitohui. Huapima icassiejeranitohui –nade Pablo. <sup>23</sup> —Aja Dio ohua dosse naridsajaripa ohua Medsede. Najaria aja dsome Pohua Atti ccaccaronade ohuadsa dosse inaronadsa ahuatopa. <sup>24</sup> Ohuadsa huati tadsapa: “Pablo ticappina-jejan” napa. “Tiapi odsa panani Romahuaji bacco tinanitohui, tamine deni tojahicca baccohuaji tedsa: Ohuapi aji ohuani, tanitohui” napa ohuadsa. “Nema tadsapi Diojine aja tiadsa jahijonajarideni naco tocassiejerahitohui” napa –nade Pablo. <sup>25</sup> —Jehe otessedeni, tibodideni pina tetidsemanaji. Ohuattipi: Diopa maidsera tahi, onajaro. Nadsama aja Pohua huati huati tahi omittajaropi Dio Pohujine nema nanitohui. Pocca dodosse memehujicca attissa inananitohui. <sup>26</sup> Naraha passo nocconidsa dsama bedeni huittidsacossanidsa cobara icananitohui –napode Pablo.

<sup>27</sup> Nadsapi passo imeni onini Adriatico nocconihuaji jojodejine ahuaaji iacca, ahuaaji iacca nadsapi icca huada 14 nadsa dsome nocconiraha canoa imeni ahaccadedeni attipa: —A, dsama tohuajirajonanitide –quinade. <sup>28</sup> Nadsapa: —Todsejerajonanitide –quinadsa ssiquitohui nattome quinade. Siba socadsa ssoque dsanani tappa idsippamanade. Nadsapi passo 36 metro cajide. Denima nattome quinapomadsapi ajimani tojajaro: 27 metro tojajonade. <sup>29</sup> Nadsapa passo bodicca sibadsa canoa imeni huacca canani noppineni cappinamanadsa ahaccadedeni canoa imeni dsotonihuaji ppejo 4 nehe hua idsippamanade. Ppejopi soca imenidsa ssoque toppidsa passodsa hua idsippamanadsa poni inoni ssiquidsa jaro nadsapi canoa imeni ahuaaji tohuacca, ahuaaji tohuacca nejeranijine. Nadsapa: —Jaho, ssiaja naccaraho –quinadsa

majitohui madimana-dsanapode. <sup>30</sup> Naraha ssiaja-jeraccadsama canoa imeni ahaccadedeni attidenia: —Ppejo onihi canoa imeni cotanihuaji hua idsippana –quinaraha pohuadenipa maidsamanade. Pohuadenipa: —Idomo toccana –quinadsapa canoa bedenira tappa icanaronamanade. <sup>31</sup> Naraha Pablo qqui tadsapa pohua cacahuade romanodenicca soldado dossededsa, aja pocca soldadodenidsa naco huati tajari: —Jaho, canoa imeni ahaccadedeni ajadsa madimana-jaradsapa tiadeni ehueranipi ticassiejera-jeranitohui –nade Pablo. <sup>32</sup> Nadsapa canoa ahaccadedeni domo tocca-jarahijine soldadodenia canoa bedeni madoni ca ippimanade. Canoa bedeni passodsa cassonippadsapi tocatabode.

<sup>33</sup> Nadsapi ssijabote nadsa jipamanahijine Pablo huati inabaqquide: —Jehe, jidapana huada 14 nehe tossoniqquimaraha oppina tadsapi ticattomama canajarojine tijipamananissa tejerani. <sup>34</sup> ¡Jari, jidapapi tijipamanaji! Tidacoramanani nadsapi ticassiejeranitohui. Ticappinamana-jeraji. Tibejoje cama-jeranitohui. ¡Nohuerani! Bacco tiquinanissa tanitohui –nade Pablo. <sup>35</sup> Nadsama atti jicadsapa pan bobi idi nadsa huapima mittamanahijine Diodsa: —Jehe, epejeni bica tani –nade. Nadsapa pan dside, jai, apa nade. <sup>36</sup> Pablo nama nahi qqui toquinadsapa bodideni badsira tehe tobicahi nadsa pohuadeni naco jipamanade. <sup>37</sup> Ia huapima canoa imeni bodinidsa imadinipi 276 inade. <sup>38</sup> Nadsapa ajarideni jicadsapa dsamatapa mota, aroso jidsadsa trigo sacocca hua idsippamanade: —Canoa imeni tocappahuani nana –quinadsa.

<sup>39</sup> Ssiajaponi ahaccadedenipa dsama qqui toquinaraha noccodeni jidsa tajari. Naraha ahuaji qqui, ahuaji qqui quinadsapa toqquidohujanicca ssiqui bicani qqui toquinadsa: —Jina, nanihuaji iaqquedsimadsa huana icanana –quinade. <sup>40</sup> Nadsapi ppejo madoni ca ippimanadsapi passo bodidsa inebomanade. Canoa imeni dsotoni huahuacossa naqui acca acca quinapomahijine ssoque dsanani dicca quinade. Cotanihuajicca ahuadsa etero imeni ssoque dsanani dicca quinadsa joca inamacossanimanadsapi jojodejine tohuaccapomade. Nadsapi toqquidohujanihuaji iaqquedsimade. <sup>41</sup> Naraha passo bodicca quequehemeri najarodsa cassonari cassonari dsanapode. Denimacca ssiquidsapi canoa imeni cobara canade. Cotanipi toquehemora nade. Naraha dsotonihuajipi passo jibabani dacorajaro ssonari ssonari nadsapi cabararijarode.

<sup>42</sup> Nadsapa soldadodeni: —Toponi cocorodsa hua todsimajarideni cona cona toquinadsa domo toccarana –quinadsa: —Jari, tojicana –quinade. <sup>43</sup> Naraha romanodenicca soldado dossedepa Pablo dsoqquehijine jipera tadsapa jehe najarade. Nadsapa dicca inabaqquidsa dosse inabaqquide: —Jari, conade nahatoqquri tiquinadsapi tahide passodsa joppa tidsippamanapoji, ssiquihuaji cona cona tiquinanijine –nade. <sup>44</sup> —Naraha conade ssamoqquri tiquinadsapi tabla qqui tiquinaji. Aji canoa imeni arobenidsa naqui titiporimeneri nadsa tibijidenidsa cona cona tiquinaji, ssiquihuaji bacco tiquinanijine –nade romanodenicca soldado dossedede atti. Nema inadsapi ia huapima dsama bacco inadsa icassiejerade.

## 28

### *Dsama huittidsacossajaro oninipi Maotadsa madimanajari*

<sup>1</sup> Passo imenidsa huapima icassiejeradsapi aji ssiquihuaji bacco bacco inajaro. Ssiquihuaji bacco bacco inanicca dsama oninipi Maota. <sup>2</sup> Nahihuajicca madija madimanajaridenipa iadsa huatideni huanacquiri nade. Nanidsa bacco idsatiraha passo cca, ssirini toja nadsapi dsippo imeni inadsamanadsa iadsa huahua quinade: —Nija, aji dsippodsa jia tiquinaji –quinade. <sup>3</sup> Nadsapa Pablo ahua tabi eccaniququidsa hua idsanade. Naraha maccapa dsippo ppoconi noppineni qquenadsa Pablo dsepedsa cca todsadsapa dsepedsa que tade. <sup>4</sup> Naraha nahidsa madija madimanajarideni Pablo dsepedsa macca que tahi qqui toquinadsapa pohuadenira

imahaha canade: —A, pohnapa madija inanadsoqquedsa itide. Passodsapa je tajararaha jidapapa ia cacahuade Diquejine dsoqquehitohui -quinade. (Dique ettidsapi: imasiri manaconi totonanade.) <sup>5</sup> Naraha Pablopa pohua dsepe dissa nadsapa macca dsippodsa ssonidsanade. Naraha Pablopa macca comene ahua najarade. <sup>6</sup> Pohnadeni bodidenidsa attidenipa: —Jite tojahitide, amadsati huatiadsa tohuedimahijinerana -quinajari. Naraha pohua cattade madimana, madimana naraha Pablo huatia-jaradsapa bodideni cacajiqquimera-manade. Pohnadenipa dio huapi taha cajimanajarijine Pablodsa: —Ajaripa dio ohuaha -naridsamanade.

<sup>7</sup> Nadsama aji dsippo jia inani huajira tanidsapa najaro dsamacca tamine madijari. Pohna onipa Pobllo. Najaripa iadsa: —Jina, occa odsahuaji jaijana -nade. Nadsapi huada 3 nehe pohnadsa imadide. Pohnapa iadsa accora, bica tade. <sup>8</sup> Naraha Pobllo imehipa coma taha porijari. Huapi ppocoraja, miji miji taja najaride. Najari qquide Pablo toqquedsimadsapa Diodsa huati tajari. Pohna dsepedsa bara inadsapa tonomide. <sup>9</sup> Nama nahi mittamanadsapa najaro dsamacca comacquiri najarideni huapima jahionadsa Diojine tocanomireridsade. <sup>10</sup> Nadsama iadsa bicaquiri nadsapa poccadeni daniji huapi tehe iadsa da inacquimanade. Dsotode benehidsa jaijapomanijine naqui icappira nejeranijine huema nehe iadsa da quinapomade.

### *Romahuaji jai tojahijine Maotadsa joppemamanajari*

<sup>11</sup> Nani dsama bedeni Maotadsa abadsico 3 canaha imadidsapi ijoppemapomanijine odsa panani Arejadriacca canoa imenidsa jaijedsade. Najaro canoa imeni jinededeni naco dsadsajade jicanijine nahi Maotadsa najomanaccaja najaride. Poccadeni canoa imeni cotanidsapa pohnadeni cacahuade corime pamaha barijari, onideni Casto, Poro quinajari. Canoa ahaccadedeni attidenipa: —Ia cacahuade papamade -quinajari. Najaro canoa imenidsa jaijedsadsapi iaccapomade. <sup>12</sup> Nadsapi dsama bedeni passo imenidsa huittidsacossani onihicca odsa panani Siracosadsa bacco inade. Nanidsa icca huada 3 nade. <sup>13</sup> Nadsapi najaro dsamadsa denima issoniqquimadsapi passo imeni inidima nani iaccabacossade. Dsama Itariacca odsa panani Rejio bacco inade. Huada ssiajapi inattihuaji jode ccajonadsapi iaccapomade. Dsome ssiajapomadsapi najaro jodejine huassinaja odsa panani Poteori bacco inade. Nanidsapi canoa imeni icanebodsapi jaijemorade. <sup>14</sup> Nadsapi najaro odsa pananidsa Jesodsa jehe quinajarideni bacco inabaqquide. Pohnadeni attipa: —Jari, iadsa semana ojarie timadimanaccaji -quinadsa pohnadenidsa huada 7 nehe imadide. Dsotodepi odsa panani Roma jahini jaijapomade. <sup>15</sup> Jaijanaja Romahuajicca Jesodsa jehe quinajarideni tahimari mittamanadsa bacco ijidsabaqquihijine itohui jahionajari. Motadenipa odsa capamema najaro onini Foro de Apiodsa bacco ijidsabaqquide. Motadeni ohuahapa odsa capamema najaro onini Tres Taberna quinahidsa bacco ijidsabaqquide. Nadsapa Pablo qqui inabaqquidsapa bodi huatidsede. Diodsa naco: —Jehe Abi Dio, epejeni. Tiapi bica tinani -nade. <sup>16</sup> Nadsapi odsa panani Romahuaji bacco idsimadsapi Pablopa pohnara madihijine taminedeni jehe quinajari. Pablo pohua cacahuade soldado ojari ojari dsanapomanadsa madijaride.

### *Pablopa Romahuaji*

<sup>17</sup> Nadsapa nahidsa Pablo huada 3 nehe madidsapa jodiodenicca taminedeni madimanajari huahua inabaqquide. Queriqquimanadsapa pohnadenidsa huati tajari: —Jehe ohuemecotedeni, ohuapi jodiodeni ohonajidsobaqqui najarade. Icca ididenicca madie tahimarinidsa naqui nanacassera onejerade. Nohue ojiraraha odsa panani Jerosaredsa jodiodeni occa madijaraha ohuadsa huadiquiri nadsa ohua dama quinadsapi romano dsepedenidsa ohua inanamanajarode. <sup>18</sup> Nadsapa nahi Jerosaredsa romanodenihua huati icanamanade. Ohuadsa huati toquinaha jicadsa attidenipa ajama quinade: “Pohnapa ima cappirahi, madija nanajidso

najarahi. ¿Nejecotohui dsoqquehijine?” quinade. Attideni nama quinadsapa “Pablo tappa inana” quinade. <sup>19</sup> Naraha jodiideni ohuadsa huadiqquri nadsapa romanoden: “Pablopa ima cappirahi” quinahi ima mittamanadsapa pajissa quina-jarajari. Nadsapa romanodenicca dsama cacahuade tedseje jehe canire-jarajarijine romanodenicca tamine deni tojahiccana occa ima icattemanijine onadsa huati onajarode. Aja occa madija jodiidenidsa naqui occa huadie nohuereje najaro. <sup>20</sup> Najaro timittamananijine onadsa titohuideni huahua onajarode. Jaho, pohuadeni qqui onabaqquidsapa pohuadenidsa huati onanijine, onade. Aji tiadenipi jidapanana cadenadsa ohua jore quinani qqui tiquinajaro. Ia Isaraeridenipi ia Idinide tohui inajorani. Najaridsa jehe onadsapi ohua dama quinajarode –nade Pablo.

<sup>21</sup> Nadsapa Pablosa huati toquinajari: —Naraha Jerosarecca madijapa titahimari ima teppe naqui iadsa dosse inajonamana-jerade. Imecote jodiideni ahuaji bacco najonamanajarideni naco “Pablocca ima tabaccora tani” quina-jarade. <sup>22</sup> Naraha aji ima dsati mari mari tajaropi dsama huapimadsa: “Bica tejerani” nanaridsamana nahi ihimitta najaro. Nama quinadsapa: Ticca ima imittaccaraho, ihinanajarode –quinajari jodiidenicca taminedeni.

<sup>23</sup> Nadsapa pocca marinaja mittamanahijine huada ojarie icattejidsamanade. Najaro huada bacco tadsa dsidsidsamassa Pablocca odsahuaji huapima queriqquimanade. Nadsapa Pablo Diocca cacahuehe tahimarini, Jeso tahimari naco mari icanabaqquijari. Jeso tahimaridsa pajissa quinahijine dissera tajari. Moisesicca marinajadsa, Dio Atti cacomeraqquri najaridenicca dsodonijidsa naqui mari icanabaqquijari. Najaro maridepi majidsamaraha dsomedsana apaja quinade.

<sup>24</sup> Nadsama jodiideni mota Pablo attidsa huatidsemanadsa pajissa quinade. Naraha motapa pajissa quina-jarade. <sup>25</sup> Nadsama huapima jehe canire-jaradsa motapa: —Jina jaijanina –quinaraha Pablo pohua atti jicanicca pohuadenidsa ajama nade: —Jaho, tiadenipi pina ticcadeni ididenissa tiquinajaro. Maittaccadsama Dio Corime icca ididenidsa huati tajari. Pohua Atti cacomerabote Isahia dsodo inapojaro tijinedeni pajissa tojajaro. <sup>26</sup> Aja Dio Attipa:

“Occa madijadsa Ohuatti tecomeraridsaji. Pohuadenidsa ajima onajaro:

Teribodeni ticajimanaraha pina timittamanerani nanitohui.

Tinoccodeni ticajimanaraha pina qqui tiquirani nanitohui.

<sup>27</sup> Ajajari madija bodideni tossamoridsadsapa paja tossamomanarihi nahitohui.

Huaribodeni moda nahi nadsapa pina mittamanerahi nahitohui.

Noccodeni naco modsi quinadsapa pina noccodeni cappiramanajarissa nahitohui.

Nama quinadsapa qqui toquinahijine ssamoqquri, mittamanahijine ssamoqquri, bodideni tocahatterahijine ssamoqquri nadsapa bodideni cacajiqquimera-manahijine ssamoqquri nahi.

Nassa bodideni cacajiqquimera-manadsa ohuadsa toquejenadsapa onabicabaqquihi-tohuiraha” nahi nade Dio –nade Pablo.

<sup>28</sup> —Jehe occa madijadeni, nahatoqquri tiquinanijine tiadenidsa huati onajaro. Jidapapa jodio quejena-jarajaridenidsana Dio ia tonassijabaqquihijinecca ima tojaridsanitohui. Najaridenina mittamanahissa tahitohui –nade. [ <sup>29</sup> Nadsapa Pablo atti jicadsa jodiidenipa pohuadenira ahuaji atti ahuaji atti quinadsapa jai tojanide. ]

<sup>30</sup> Nadsapa huajano pamaha tossoqquimaraha Pablo odsa panani Romadsa madihipaja naccade. Pohua madihicca odsa manaconi naqui jinededsa da da dsadsanapo nahipaja naccade. Pohua qquide jajahijona nadsa naco madija ihinahatidsebaqqui nade. <sup>31</sup> Pohua qquide jajahijona nadsa naco Diocca cacahuehe tahimarini, ia Medsede Jesocristo tahimari naco mari mari ihicanabaqqui nade. Pablopa cappinajaradsa pohua attidsa naco ssonacossade nohueradsa mari mari ihicanabaqqui najaride.



## **Pablopa Romanodenidsa ima teppe dosse inajaro Romanos**

Pablopa Romahuaji madimanajari Jesodsa toquejenajaridenidsa ima teppe dsodo inajaro. Pohuapa nahihuaji tocca-jaraccadsa pohuadenidsa dsodo inapojaro. Pohuadeni qquide, pohuadeni maride tohuini naraha dsotodena pohuadenihuaji toccajari. Dsotodena pocca benehicca imapi Roca dsodo inajaro (Tahimarideni capítulos 27–28).

Romahuajicca madija mota huapi taha jodio quejena-jarajarideni. Poccadeni odsa panani deni tojanicca, bica taniccapi Roma. Najaro odsa pananicca madijapa jodiodenicca dsama cacahuade toquejenaridsajari.

Romacca madija motapa Jeso tahimari mittamanadsa pajissa quinajari. Nadsapa Dio jipa tahiccassa inanamananijine, poccadeni ima Diodsa bica tanijine Pablo pohuadenidsa dsodo inajaro.

Romanodenidsa Pablo attipa: —Moisesicca marinajadsa iboraqquri tiquinadsapi ticassiejera-jeranitohui. Najarodsa timadimanadsapi ticcadeni ima Diodsa pajiranissa tanijine ssamo tani. Jesocristodsa pajissa tiquinadsana Dio tiadeni tonassijabaqquridhitohui –najari Pablo pocca ima teppedsa.

### *Pablo nija najari*

<sup>1</sup> ¿Nija ohuemecotedeni? Ohuapi Pablo, Jesocristocca medse, tiadenidsa occa ima dsodo onajaro. Jesocristocca dodosse ojanijinepi Dio otohui huahua najaride. Najaroa aji pocca ima bicani madija tocassiejerahijinecca mari mari ohocanabaqquridsa nahijine omadijaro.

<sup>2</sup> Maittaccadsama najaro imapi Diojine Pohua Atti cacomeraqquri najarideni huati toquinapojari. Pohua Atti dsodo nanidsapi anini. <sup>3</sup> Najaro ima bicanipi aja Dio Pohua Bedi Jesocristo tahimari. Pina madija bedissa naha tossonajaripa tamine Dabi potemahidsana tossonajari. <sup>4</sup> Dio Corimejinena Jesocristocca ima ahuato inanajaro. Jeso dsoqquedsapa Dio pocca dacorehema inahatonijari. Najarojinena ima ahuato tajaro: Ia Medsede Jesocristopa Dio Bedi.

<sup>5</sup> Najarina ohuadsa huati huana tadsa ohua cadossejari, dsama huapimacca madija pohua oni mittaridsamanahijine. Ohuattipi: —Jesocristodsa pajissa tiquinanissa taji. Pocca marinajadsa iboraqquri tiquinaji –ohonaridsa nanijine ohua cadossejaride. <sup>6-7</sup> Romahuaji timadimanajaro tiadenidsa naqui Jesocristo tahimari bacco tajaro. Dio titohuideni huati cahanari canadsapa Jesocristocca madija tiquejenanijine titohuideni huahua najaride. Aja icca Abi Dio, ia Medsede Jesocristo tedseje tiadenidsa ima bicani inanamana-dsanapona, onajaro. Icca Abi Diocca jonehe naqui tiadenidsa tojadsanapona. Ia Medsede Jesocristocca jonehe naqui tiadenidsa tojadsanapona, onajaro.

### *Pablopa: —Romahuaji occana –najari*

<sup>8</sup> Jehe, tahide titohuideni Jesocristo onima Diodsa huati huati ohonanadsapi: —Jehe Abi Dio, epejeni. Tijine bicaqquri nahi –ohonanajaro. Ia Medsede Jesocristodsa jehe tiquinadsa pohua attidsa iboraqquri tiquinadsapi titahimarideni huati huati quiquinanahi ohomittaridsa najaro. Dsama huapimacca madija attideni: —Romanodenicca jehenijipi dacorani –nanaridsamana nahi omittadsa titohuideni Diodsa huati huati ohonanajaro. <sup>9</sup> Obodi ohuassirema Diodsa odsepe ihiji najaro. Pohua Bedi tahimari icassiejeranijinecca maride dissera onajaro. Diopa occa ima qqui tahi, nahato tahi. Najaroa titohuideni Diodsa huati huati ohodsanapo najaro.

<sup>10</sup> Tiadeni qquide occanijine Diodsa huati huati ohonanaraha jehe najaraccahi. Dio ohuattidsa jehe nadsapa nidsa tiadenihuaji bacco onanitohui. <sup>11</sup> Tiadeni qqui onabaqquinijine tohuini onani. Tiadenidsa Dio Atti ohuacomersapi Pohua Corimejine Pohuadsa jehe tiquinajaro todacorani nanijine, onajaro. <sup>12</sup> Aji tiadeni Jesocristodsa jehe tiquineje, ohuassa Jesocristodsa jehe oneje nadsapi tiadeni tedseje icatidserara cananijine, onajaro.

<sup>13</sup> Ohuemecotedeni, nahatoqquri tiquinanjine onadsa huajijiradsa ohuapi nani occanijine occa benehi ohonajora naraha occa benehi huajijiradsa tossamo tossamo dsanaponi. Nidsa tiadenihuaji occadsa tiadeni mari ocanabaqquidsapi ticcadeni madija ohuaha naco Jesocristodsa toquejenahijine, onajaro. Ajana jodio quejenajarajardeni dsama onihihuajicca, dsama onihihuajicca mari ocanabaqquiridsapod-sapa Jesocristodsa toquejenana canade. Tiadenihuaji ima najarossa nanijine jipa onajaro. <sup>14</sup> Jesocristo otohui huahua najaripa: —Madija dsama huapimacca otahimari mittamanahijine maride ticcaridsaji –najaride. Nadsapi pina odsa pananidsa madimanajaridenidsa, dsama dopedsa madimanajaridenidsa naco pohua tahimari mittamanahijine maride occaridsajaro. Aja papeo nahatoqquri najaridenidsa, papeo ssamoqquri najaridenidsa naqui Jesocristo tahimari mittaridsamanahijine maride onebo-jerajaro. <sup>15</sup> Najarojinea Romahuaji timadimanajaro naqui Jesocristo tahimari icassiejeranijinecca tiadeni mari ocanabaqquinijine jipa onajaro.

### *Jesocristo tahimarina dacorabote ojarini*

<sup>16</sup> Ohuapi Jesocristo tahimari icassiejeranijinecca ohuacomeranijinepi ocappinajarajaro. Ohuapi nahato onani: Jesocristo tahimaripa Diocca dacorehe madija tocassiejerahijine, onajaro. Tahidepi jodidenidsa, dsotodepa jodio quejenajarajardenidsa naco Jesocristo tahimari dacorajaro. Huapima najarodsa jehe quinadsapa tocassiejerahijine. <sup>17</sup> Aji Jesocristo tahimaridsana Dio ia tonanabica-baqquihijinecca ima ahuato tajaro. Jesocristodsa pajissa inadsapi pohua tahimarijine imasiri inanajaro manaconipi jicani. Icca jeheniji najaro ojarijaropi Jesocristo tahimari iadsa tojajaro. Dio Atti dsodo nanidsa ajima najaro: —Madija bica tajari Diodsa pajissa najaripa najaro jehenijima madi-dsanapohuitohui –nahi nade Dio.

### *Madija huapima ima inanamanani ahuato tajaro*

<sup>18</sup> Madija imasiri totonanadedeni cajiridsahi. Nidsa Diocca najidsohue oppinabote memehuai ccaronadsa pohuadenidsa ssonarinitohui. Najaridenipa poccadeni tabaccorehejine pajissacca ima tocahatterahijine ssamoqquri nahi. <sup>19</sup> Dio tahimariipi ahuatoridsajaro. Pohuadenidsa naqui ahuato tani. Djojine pohuadeni bodi nahatoqquri najari. <sup>20</sup> Diopa innocodsa qqui inajarahi. Pocca ima naqui innocodsa qqui inejeraraha dsama Dio inahatoponidsama pocca dacorehe jiquejeranicca, pocca deni tojehe huapimadsa ahuatjonajaro. Pocca nahatohue qqui inaridsajaropi najaro imadsa ibodi huahuatoma nadsapi Diocca ima iadsa ahuato tajaro. Naraha madija imasiri tohui quinajaridenipa: —Dio tahimari iadsa ahuato tejerani –quiquinanaraha pohuama maidsamanajari. <sup>21</sup> Pohuadenipa Dio Pohuadsa bodideni nahatoqquri naraha Diodsa: —Bica tinani, deni tijani –quiquinana-jarajari. —Epejeni. Tijine iadsa ima bica tani –quiquinana-jaradsa naco pohuadeni bodipa ima ponimaccadsara toquejenaridsajari. Bodideni tossamoridsadsapa dsidsinidsa toquejenajari. <sup>22</sup> Attidenipa: —Nahatojide ojirajaro –quiquinanaraha ssamoqquri nahi. <sup>23</sup> Madijapa huatia tahi. Naraha Diopa huatiehera tajari. Pocca deni tojehe huapimadsa ahuato taraha Pohuadsa jehe quina-jaradsapa madija huatiahaqquri najarideni corime inahatomanadsa najaridsana: —Ia cacahuade –quiquinanajari. Aja bani eppe cajihi corime naco inahatomanana, namidsa jajahiridsa najari aja biji caji isso caji najarideni corime inahatomanana, pohuadeni baccodenidsa jajahiridsa

najari corime naco inahatomana nadsa poccadeni nahatonajadsa: —Ia cacahuade —quiquinanajari.

<sup>24</sup> Najarojinea Dio inebobaqqujari. Pohuadeni bodidsa tabaccorehe tohuini quinadsapa huananehecca imadsa toquejenajari. Pohuadeni tesse tedseje huananehe oppina tanicca inanamanajaro. <sup>25</sup> Diocca imapi pajissaccaraha Diocca imadsa huattajojo tajari. Maidsehetohuira disseraqquri najari. Dio inahatoridsajari corime inahatomanadsa najaridsa huahuatidsemana nadsapa: —Ia cacahuade —quiquinanajaripaja. Pohuadeni Nahatode Diodsara huatidsemanahijine bica taraha nama quinarajari. Pohuadsa: —¡Bica tinani, deni tijani! —ihidsanapo nanijine bica tani. Pajissa nema nana.

<sup>26</sup> Naraha madija pohuadeni cacahuade ohuahadsa disseraqquri nadsapa Dio inebobaqquidsa poccadeni huananehe oppina tanicadsa toquejenajari. Aji amoneje ponidenicca maqqui najade jiperaqquri najaropi ponidenira ima oppina tanicca inanamanajaro. <sup>27</sup> Maqquideje naco poccadeni amoneje ajade jiperaqquri najaripa pohuadeni tesse tedseje ima oppina tanicca inanamanajaro. Najaro imadsa disseraqquri nadsapa poccadeni ima oppina tajaro. Nama quinadsapa pohuadeni imedsa comani ihinahanamana najaropaji, poccadeni huananehe manaconi.

<sup>28</sup> Diodsa bodideni huatohuijine jiperaqquri nadsa Dio Attipa: —Apajana. Pohuadeni bodi pohuadeni tohuini quinadsapa nama naha madimana-dsanapohuijine —najari. Najaria madija huapima ima bica tejeranicca inandaridsamanajaropaji.

<sup>29</sup> Najaria madija pohuadeni bodidenidsa imasiri sseqquri naha madimana taja, imasiri inanamanadsa huatidsemana taja najari. Poccadeni dacorehema: —Ohuana denima ocajina —quina taja, —Madija ohuahacca ima onatabaccorana —quina taja najari. Pohuadenipa madija ohuahacca deni tojehe acconi bodideni huadiqquri najari. Pohuadenipa madija inanadsosquemana tahi. Amadsati naco cahadire tahi. —Icamaisabaqquina —quina tahi. Tabaccorehe denima tabaccora tanicca tohuini quina tahi. Pohuama madija ohuahacca ima ahuatoranidsa huati iqquimamana tani.

<sup>30</sup> Madija ohuahadenicca ima totabaccoranijine huatijidede raja, Diodsa jiperaqquri naja najari. Madija ohuahadsa attideni bica tajaradsa atti atti quina taja, madija ohuahadenipa: —Iana bicaqquri inajaro —quina taja, madija ohuahadenipa: —Iana deni iquejenani —quinajari huati huatijidede raja najari. Pohuadeni bodidsa ima tabaccora tanicca inahatomana teje, imehideni attidsa naco iboqquri naja najari.

<sup>31</sup> Pohuadenipa ima bicani mittamanahijine jiperaqquri najari. Pohuadeni attipa: —Tiadenidsa nabica onanitohui —quiquinanaraha mamaidsamana najari. Poccadeni madijadsa naco huatideni huanagquri najarahi. Madija ohuahadsa naco huatideni huanagquri najarahi. Huadiecca naco huatideni ssonaneraqquri najari. Poccadeni madijacca ima tossamodsas naqui: —Tia acco ocamana —quina-jarahi. <sup>32</sup> Madija nama quinaridenipa Dio Atti mittamanaporaha. Aja Dio Attia: —Imasiri inamanajarodenipa paja jicarihitohui —nahi nahatoqquri najari. Naraha pohuadeni cacahuamana-jaradsapa imasiri inanamana-dsanapojaro. Madija ohuahadeni imasiri inanamanani qqui toquinadsa naco: —Jehe, bica tani —quiquinanajari.

## 2

### *Diopa madijacca ima cattemade tojadsapa pajissara huati tahitohui*

<sup>1</sup> Imasiripi ajima nani onadsa tiadenidsa dsodo onajaro, nani nahatoqquri tiquinanijine. Madija ohuahadsa: —Ticcadeni ima tabaccora tani —tiquinadsapi tijinedeni ticcadeni imasiri ahuatotohui. ¿Nejecotohui madija ohuahacca imara huati huati titiquina najaro? Najaro imassa tinamanajarojine Diocca najidsohue tiadenidsa ssonarinitohui. <sup>2</sup> Madija ima inanamanadsapi Dio Attipa: —Tijinedeni ima tabaccora tani —najari. Nadsapa pohuadeni inajidsobaqquihitohui. Iapi nahatoqquri

inani: Diopa poccadeni ima nahato tajaria pajissara huati tajari. <sup>3</sup> Naraha ticcadeni imapi ¿nejecoma nejecoma najaro? Tiadenipi: —Madija ohuahacca ima bica tejerani, Dio inajidsohuitohui –tiquinaraha tiadeni naqui pina pocca imassa tinanamanadsapi ¿Diocca najidsohue dsori ticanirepadseje? Dsori ticanirejeranitohui. <sup>4</sup> Diopa tiadenidsa huati huana tajari. Biquehe huapi tanicca tiadenidsa inaridsajaro. Dio Pohuadsa pajissa tiquinanijine tinajomanadsa naqui titohuideni denima madicajari. Naraha najaro ima huapimapi tiadenidsa pina ponimassa najaro. Aji Djotine ima bicani tiadenidsa tojajaropi tibodideni cacajiqquimeranijine. <sup>5</sup> Naraha tiadenipi Diodsa iboqquri tiquinajaro. Tibodideni cacajiqquimeranijine jiperaqquri tiquinadsapi ticcadeni imasiri manaconi najidsohue onihi onihi nehe tinehemamanajaro. Nidsa dsotode Diocca huadie tojanijinecca huada bacco tadsapi tiadenidsa najidsohue ssonarinitohui. Dio Pohua tedsejema tidomo huadsa Dio ticcadeni ima manaconi inapajiranissa tani ahuato inananitohui.

<sup>6</sup> Nidsa Diopa huapimadsa poccadeni ima manaconi pohuadenidsa da inanitohui. <sup>7</sup> Madija ima bicani inanamanajarodenidsapa Dio pocca camittehe jiquejeranicca da inaridsanitohui. Pohuadenipa Diocca deni tojehetohui madimanajari. Pohuadenidsa Dio: —Occa ejedenideni, bicaqquri tiquinani –nahijine tohuini quinajari. Camittehe jiquejeranicca tohuini naco madimanajari. <sup>8</sup> Naraha madijapa poccadeni ima tohuinira disseraqquri najaridenidsana Diocca huadie ssonarinitohui. Najaridenipa Diocca ima pajissaccadsa iboqquri najari. Tabaccorehena pohuadenidsa bica tajaro. <sup>9</sup> Tabaccorehe inanamanajaro huapimapa najidsohue tonahanamanahitohui, ocasserehe tonahanamanahitohui. Jodiodenidsa, jodio quejena-jarajaridenidsa naqui ssonarinitohui. <sup>10</sup> Naraha ima bicanira inanamanajarodeni huapimadsana Dio pocca deni tojehe inananitohui. Pohuadenidsa: —Occa ejedenideni, bicaqquri tiquinani –nahitohui. Pocca jonehe naqui pohuadenidsa tojanitohui. Jodiodenidsa, jodio quejena-jarajaridenidsa naco nama nahitohui. <sup>11</sup> Dio Pohuadsa jodiodenicca ima, jodio quejena-jarajaridenicca ima tadsajanipi najarossa caniqquimerajaro. Jodiodenidsara denima huati huana tahi ojari najarahi.

*Djotine jodio quejena-jarajari bodideni nahatoqquri inanabaqqipojari*

<sup>12</sup> Nidsa dsama jicanijinecca huadadsana Diopa madija huapimacca ima icattemanitohui. Diocca dosseniji Moisesidsa da inajaro cappiramanaha madimanajaridenicca imapi Moisesicca marinajadsa icattema-jeranitohui. Naraha imasiri inanamanajarojine paja dsoqquemanarihihuaji najidsohue tonahanamana-dsanapohuitohui. Moisesicca marinaja cajimanajaridenipa najaro marinajadsa imarideni icattemanitohui. <sup>13</sup> Aja madija Moisesicca marinaja mittamanaraha pina najarossa inanamanajeradsapi Diodsa tobicamana-jarajari. Diopa pohuadenidsa: —Imasiri ticajimanani –najari. Naraha Moisesicca marinaja mittamanajarideni pina najaro marinajassa inanamanadsapi Diodsa tobicamanajari. Diopa pohuadenidsa: —Imasiri ticappiramanani –najari.

<sup>14</sup> Naraha jodio quejena-jarajaridenipa Moisesicca marinaja cappiramanaraha pina najarossa inanamanadsapi pohuadenidsa ajijaro ima ahuato tajaro: Djotine bodideni nahatoqquri najari. Pohuadenipa bodideni huatomanahissa tadsapa ima bicani nahatoqquri nahijine. <sup>15</sup> Nadsapi poccadeni madiedsa ima ahuato tajaropi pohuadeni bodidsa Diocca dosseniji cajimanajari. Bodideni huatomadsapa ima bica tanicca nahatoqquri, ima tabaccora tanicca nahatoqquri najari. <sup>16</sup> Nidsa Dio madijadenicca ima nattome inabaqquihijinecca huada bacco tadsana Jesocristo idossehitohui. Nadsana madija bodidenidsa ima ecomamanajaro Jeso ahuato inananitohui. Najaro ima tojanijinepi Jesocristo tahimari icassiejeranijinecca mari mari ohonanajarodsa huati huati onapode.

### *Jodiodenipa Moisesicca marinaja cajimanaraha*

<sup>17</sup> Jodiodeni mota tettidenipi: —Iapi jodio iquejenani. Diocca dosseniji Moisesidsa da inajaropi icajini. Icca Diona deni tojajari. Pohuana ia tocattejidساباqquijari -titiquina najaro. <sup>18</sup> Tettidenipi: —Iapi Dio Pohua jipa tahicca nahatoqquri inajaro. Moisesicca marinajajine ima bicani icattejidsanijine naqui icahatterani -titiquina najaro. <sup>19</sup> Tettideni naqui: —Iapi Dio Atticca ssiajani cajimanahijine inahattabaqquihijine ipajirani. Pina noccodeni siri jahinedeni dsopi icanabaqquijarissa, pina dsidsinidsa jahiridsajarideni piri icanabaqquijarissa inajaro -titiquina najaro. <sup>20</sup> Tettideni naqui: —Moisesicca marinaja icajidsapi nahatoqquri inani. Pajissehecca ima iadsa ahuato tani. Madija ssamoqquri najari pina ejedenissa quinajarideni inahattabaqquihijine nahatoqquri inani -titiquina najaro.

<sup>21</sup> Tiadenipi Moisesicca marinaja ticajimanaraha ¿nejecotohui najaro marinajassa nehe tinanamana-jerajaro? Tiadenipi madija ohuaha mari mari titicanabaqquimana naraha tiadenipi tiadeni mari ticananimanehe nejerani. Tettidenipi madija ohu-hadenidsara: —Botimana tiquinejeraji -titiquina naraha tiadeni naqui ¿botiraqquri tiquinaqui? Botiqquri tiquinani. <sup>22</sup> Tettideni onih naqui: —Amoneje onih ajamana tiquinejeraji -titiquina naraha tiadeni naqui ¿amoneje onih ajajera tinaqui? Amoneje onih ajaja tinani. Siba nahatonidsa naqui jiperaqquri tiquinajaro. Naraha tiadenipi aja siba nahatonidsa dada tahicca titibotimana nahi. <sup>23</sup> Tettideni onih naqui: —Moisesicca marinaja bicabote icajini -titiquina naraha Moisesicca marinaja tecahuamananissa tejeradsapi tijinedeni madija ohuaha attidenipa: —Diocca imapi bica tejerani -quiquinanajari. <sup>24</sup> Najaro imapi Dio Atti dsodo nanidsa ajima napojaro: —Tijinedeni jodio quejena-jarajaridenipa Diodsa attideni ocassera tadsa atti atti quinajari -nani nade Dio Atti dsodo nanidsa.

<sup>25</sup> Jodio tiquejenadsapi huissinaja ticajimanajaro. Moisesicca marinaja tecahuamananissa tadsapi Diopa tiadenidsa ima bicani inananitohui. Naraha Moisesicca marinaja tecahuamananissa tejeradsapi ponima huissinaja ticajimanajaro. Diopa tiadenidsa huatidse-jarahitohui. <sup>26</sup> Aja jodio quejena-jarajaridenipa huissinaja cappiramanaraha pina Moisesicca marinajassa inanamanadsapi pohuadenina pina pajissa jodiodenissa quinajari. Ima bicani cajimanahi. <sup>27</sup> Naraha jodiodenipa huissinaja cajimanaraha motapa Moisesicca marinaja ecahuamananissa tejerani. Nidsa dsama jicadsa jodiodenicca huissinaja cappiramanaraha Moisesicca marinajassa inanamanajarodenina aja Moisesicca marinaja dsori inanamanajarodenidsa huati toquinahitohui: —Moisesicca marinaja nahatoqquri tiquinaraha najarossa tinanamana-jerajaro -quinahitohui. Pohuadenijine poccadeni imasiri ahuato tanitohui. <sup>28</sup> Madijapa jodiodenicca etero huedsamanadsa jodio toquejenahi ahuatoqquri najari. Imedenidsa huissinaja cajimanadsa naco jodio toquejenahi nahatoqquri inajaro. Naraha madija jodio tojajaripa pohua huapicca, pohua imeccaha ojari-jerani. <sup>29</sup> Madija pajissa jodio tojadsapa pohua bodi Diodsa ibora tajarina paja. Pohua bodi Dio inahiredsapa pina huissinaja cajijarissa najari. Moisesicca marinajadsa bodi tobica-jararaha Dio Corimejinena bodi tobicajari. Najarojine Diopa pohuadsa jipa tajari. Madija attideni pohuadsa: —Bica tinani -quina-jarahitide naraha Diona: —Bica tinani -najari.

## 3

<sup>1</sup> —Nadsama jodio iquejenajaropi ¿ima nejecoma najarona iadsa denima bica tajaro? ¿Iapi ponima jodio madija iquejenaqui? -tiquinanitidija. —Huissinajacca ima icajidsapi ¿Diojine iadsana denima ima bica tanicca icajiqui? -tiquinanitidija. <sup>2</sup> Jehe, ima bicanipi ia jodiodenidsana onih, onih nehe Diojine icajipojaro. Ima bicani deni tojaniccapi Diojine icca madijadsana Pohua Atti tojapojaro. Najaroa aji Pohua



Atti cacahuade iquejenajaropaji. <sup>3</sup> Naraha icca madija motana Dio Atti ecahuamana-jerajaro. Nama quinaraha ¿Diopa ia jodiodenidsa Pohua Attissa inana-jerapadseje? <sup>4</sup> Nohuerahi. Diopa maidsera tajari. Madija huapimapa maidsaqqiri naraha Diopa maidsa-jarahi. Ima pajissara ihinana najaro. Dio Atti dsodo nanidsapi ajima najaro: —Huapimadsa ahuato tanitohui. Tiapi pajissehe ponira huati huati tinajaro. Madija attideni Tiadsa: “Ticca ima pajiranissa tejerani” quinaraha Tiana deni tijanitohui. Tettina pajiranissa tajaro —nani nade Dio Atti dsodo nanidsa.

<sup>5</sup> Madija attidenipa ajama quinahitide: —Icca imasirijine Diocca ima pajiranissa tani ahuato tajaro. Ijine ima nema nadsapi ¿nejecotohui Dio ia tonajidso-baqqujari? —quinajari. <sup>6</sup> Naraha iapi nema inejerana. Oppina tani. Diopa tabaccora tajarahi. Diopa bica tahi. Nassa Diocca ima pajiranissa tejeradsapi madija huapimacca ima cattermade pajira-jaranaja. <sup>7</sup> Madija ohuaha attidenipa: —Maidsehe huati onadsapi najarodsa Diocca pajissehe denima ahuato tani. Ijine Diocca pajissehe ahuato tadsapi madijapa: “Jehe, Diopa bica tahi” quinahitohui. Icca maidsehe nema nadsapi ¿nejecotohui Dio iadsa: “Ticcadeni imasirijine najidsohuedsa tiquejenaji” najari? —quinajari. <sup>8</sup> Attideni nama quinajaripa nassa poccadeni marinaja onihi inanamanajaro. Pina: —Imasiri inanadsapi ima bicani ahuato tanitohui —quinajarissa najaro. Madija mota attidenipa: —Pablodenina najaro ima mari mari ihicanabaqqi najari —quinajari. Naraha maidsamanajari. Nidsa dsama jicadsa madija nama quinajaridenipa najidsohuedsa toquejenadsapa bica tani, onajaro.

### *Ia huapimapi imasiri inanajaro*

<sup>9</sup> Naraha ¿jodio iana denima bicaqqiri inajaroqui? Nohuerani. ¿Madija ohuahapa poccadeni biquehe ajimaniqui? Nohuerahi. Ia huapimapi imasiri icajiridsani. Tiadenipi ima dsodo onapojarodsa timittamanaponi. Aja jodiodeni, jodio quejenajararideni ia huapima imasiri inananiijinepi imasiri iadsa dacorani. <sup>10</sup> Dio Atti dsodo nanidsapi:

—Madija ima bicani tonanahijine nohuerahi.

Dio qqi inabaqquidsapa ojaría imasiri cappirajari nohuerahi.

<sup>11</sup> Madija bodi nahato tajari nohuerahi.

Madija Diotohui najari naco nohuerahi.

<sup>12</sup> Huapima Diodsa tohuajimanajari.

Pohuama jajahiridsa najari.

Madija ojaría ima inanabicanijine nohuerahi.

<sup>13</sup> Madija attideni oppina tadsapi ssiporideni pina tonocobiri tohuabajarossa najaro.

Pohuadeni ebenodsa naco madija icamaidsabaqqi-manajari.

Ipodenidsa madija inatabaccoramanajari pina macca comabote madija cca idsadsa comene ahuajarissa quinajari.

<sup>14</sup> Pohuadeni ajaridsa tohuatti bida tajaro qqequequena najaro.

Madija ihitamassomana najari.

<sup>15</sup> Amorideni huassiqqiri najari, tohuemene toccanijine tohui.

Madija ijinedeni ahuamanahijine najoramanaha madimanajari.

<sup>16</sup> Ajana, pohuadenipa madija ohuahacca madie tonatabaccora-manajari.

Pohuadenijine madija ocasserani ahahuamana najari.

<sup>17</sup> Jonehedsa madimanahijine ssamoqqiri najari.

<sup>18</sup> Dio noppine cappinaqqiri nadsapa bica taraha pohuadenipa Diodsa cappiner-aqqiri najari. Bodideni huatohuissa tajarahi

—naponi nade Dio Atti dsodo nanidsa.

<sup>19</sup> Nahatoqqiri inani: Diopa pocca dosseniji huapimapi jodiodenidsana da inajaro. Naraha pocca dosseniji nemaneha ecahuamananissa tanijine pajiramana-jarahi. Ima

nema nadsapi: —Bicaqquiri inani —quinahijine ssamo tani. Nidsa Diopa ajijaro dsamacca madija huapimacca ima cattermade tojadsapa Moisesicca marinajadsa imarideni icattermanitohui. Nadsapi madija ia huapimapi icadidire nanitohui. <sup>20</sup> Madija attidenipa: —Iapi Moisesicca marinaja ecahuanissa tani —quinaraha Dio Attipa: —Jehe, ima ticappiramanani —najarahitohui. Moisesicca marinajajinepi imasiri nahato inajaro. Najaro cacahuade ipajira-jeradsapi ia huapima imasiri icajini ahuato tajaro.

### *Icassiejeranijinepi Jesocristodsa pajissa inajaro*

<sup>21</sup> Naraha jidapapi Dio iadsa ima onihi ahuato inanajaro: Moisesicca marinaja jirehe icca ima Dio Puhadsa tobicanijine pajirani. Najaro imapi Moisesicca marinaja nemanehedsa nema napojaro. Dio Atti cacomeraqquiri najari ohuahadeni naco huati toquinapojarijaja. <sup>22</sup> Madija Jesocristodsa pajissa quinajarideni huapimadsana Dio ajama najari: —Ohuadsa bicaqquiri tiquinani —najari. Diodsapa jodiodeni, jodio quejena-jarajaridenicca imapi najarossa caniqquimerajaro. <sup>23</sup> Madija huapimapi imasiri icajiridseje najaro. Diocca deni togehedsa iquejenanijine ipajiranissa tejerajaropaji. <sup>24</sup> Aji icca imasiri manaconi najidsohue icajinitohuiraha Jesocristo pohuajinena Dio ia tappa tabaqquijari. Dio iadsa huati huana tadsa manaconi jirehe iadsa: —Tiadenidsapi ima nohuerani. Ohuadsa bicaqquiri tiquinani —najari. <sup>25</sup> Diopa Pohua Bedi Jesocristo dsoqquehijine eccoradsapa madija huapimadsa nohue inajaro: Pohuapa imasiridsa huadi tajari. Ahua porimacossanidsa Jeso emene toccajaropi icca imasiri manaconi da inajaro. Itohui Jeso dsoqquejari tahimaridsa pajissa inadsapi Dio iadsa: —Jidapapi ticcadeni imasiridsa ohuati ajimani —najari. Diopa nama najaria iadsa nohue inajaro: Pohuajine pajiranissa tani. Aja tahide Jesocristo dsoqque-jaraccadsama Diopa madijacca imasiri qqui taraha pina qqui torahi najari. <sup>26</sup> Pohuapa nama najaria —Amadsati onajidsobaqquina —najarajari. Mohuaradsa poccadeni imasiri inahanajonajaro. Jidapapi ima pamehe Dio Pohuajine iadsa ahuato tajaro: Jidapapi Dio Pohuajine pajiranissa tajaro. Jesocristodsa pajissa quinajaridenidsa: —Tiadenidsapi ima nohuerani —nadsa naco Pohuajine pajiranissa tajaro.

<sup>27</sup> Madija Moisesicca marinaja ecahuamananissa tadsapi attidenipa: —Ojine ima pajiranissa tani —quina tahi Diodsa. Naraha attideni ponima tojajaro. ¿Ima nejecoma najarojine attideni ponima totoja najaro? Madijacca ima Diodsa tobicanijinepi madijajine jerani. Jesocristodsa pajissa nadsana pocca ima Diodsa totobica najaro. <sup>28</sup> Najarojine ettipi: Madijacca ima Moisesicca marinaja jirehe Diodsa tobicani pajirani, inajaro. Jesocristo tahimaridsa pajissa inadsapi Dio Atti iadsa: —Jidapapi ticcadeni imasiri manaconi tiadenidsa nohuerani —nahitohui, inajaro.

<sup>29</sup> ¿Diopa jodiodeni pohuadeni mottacca Dioco? ¿Dsama onihicca madijadenicca Dio jaraco? Naraha imapi ahuato tani. Diopa dsama huapimacca Dio. <sup>30</sup> Diopa ojarihi. Madija jodiodenicca huissinaja cajimanajari Jesocristodsa: —Pajissa, ohua Tonassajade —quinadsapa Dio pohuadenidsa: —Jidapapi ticcadeni ima tiadenidsa nohuerani —nahitohui. Jodio quejena-jarajarideni Jesocristodsa pajissa quinadsa naco Diopa pohuadenidsa ima najarossa inananitohui. <sup>31</sup> Nadsama Jesocristodsa pajissa inadsapi ¿Moisesicca marinajapi ponima tojanijinequi? Ponima toja-jerani. Jesocristodsa pajissa inadsapi Moisesicca marinaja inapajiranissa tajaro.

## 4

### *Abarahao tahimaridsa icahatterajarocca ima*

<sup>1</sup> Icca idi Abarahaopa ¿nejeco imadsara Diodsa tobicajaritta? <sup>2</sup> Ima bicanidsa pohua dsepe ijijarijine Diodsa tobica-jarahi. Aja pohua dsepe ijijarijine Diodsa tobicadsapa

nassa: —Ohua ojine Diodsa obicajaro –nahitohuiraha imapi nema nejerani. <sup>3</sup> Naraha Dio Atti dsodo nanidsapi ajima najaro: —Abarahaopa Diodsa pajissa nadsana Diopa: “Abarahaopa ohuadsa bica tahi” –najari.

<sup>4</sup> Ajijaro namicca imapi ajima najaro: Madija tarabaidsa najaripa pohua tarabaidsa najari manaconi cajijari. Naraha tarabaidsa dossedepa pohuadsa: —Aja, tiadsa manaconi jirehe da onana –najarahi. Tarabaidsa dossedepa: —Aja, tiadsa ticca tarabaidsa manaconi da onajaro –najari. <sup>5</sup> Naraha Diopa madija imasiri cajijaridsa: —Tiapi ohuadsa bica tinani –nahi caji tahi. Nama najaripa madija pohua dsepe ijijarijine jerani, ima bicani inanajarojine jerani. Najari madijapa Diodsa: —Pajissa Dio madihi –nadsana Dio Attia: —Ajajari madijapa ohuadsa bica tahi –najari. Diodsa pajissa najarijine pocca ima Diodsa pajiranissa tajaro. <sup>6</sup> Najaro imapi maittaccadsama tamine Dabi naco huati tapojari: —Madija pohua dsepe ijijaripa Diodsa pohua tonanabica-jararaha Diodsa pajissa nadsana Dio pohuadsa: “Bica tinani” najari. Nadsapa najari madijapa huatidseri dsanapojari –nahi nade Dabi. <sup>7</sup> Dabi pohua huati tapojaricca imapi Dio Atti dsodo nanidsa ajima najaro:

—Madijacca imasiri Dio sse inaridsadsapi huatidsemaneri najari.

Poccadeni tabaccorehedsa: “Epeje, ohuati ajimani” nadsa naco huatidsemaneri najari.

<sup>8</sup> Imasiri inanamanapojarocca ima Dio inajicadsapi huatidsemaneri najari –nahi nade Dio Atti Dabijine dsodo nanidsa.

<sup>9</sup> Aji ¿najaro huatidsehepi jodiidenicca huissinaja cajimanajaridenidsara ojarini-jinequi? ¿Madija jodiidenicca huissinaja cappiramanajaridenidsa naqui tojaridsanijinequi? Naraha ettipi: Abarahao Diodsa pajissa nadsapa: —Abarahaopa ohuadsa bica tahi –najari, inajaro. <sup>10</sup> Naraha ¿nejecoma nadsa Diopa: —Abarahaopa bica tahi –najaritta? ¿Abarahao huissinaja cajidsattaco? ¿Huissinaja caji-jaradsattaco? Naraha huissinaja caji-jaraccadsama Diopa: —Abarahaopa ohuadsa bica tahi –napojari. <sup>11</sup> Dsotodena Abarahaodsa Dio huati tajari: —Huissinaja ticajiji –najari. Najaro huissinaja cajidsapa Abarahao Diodsa jehe napohuicca ima ahuato tajaro. Nadsapa madija ohuahadeni naco huissinaja cappiramanaraha Diodsa jehe naridsamanadsapa Abarahaopa pina poccadeni abissa najaripaja. Najaridenidsa naco Dio Atti: —Ohuadsa bicaquiri tiquinani –najari. <sup>12</sup> Madija huissinaja cajimanajarideni naco Diodsa pajissa quinadsa pina Abarahao huissinaja cappiraccadsa Diodsa pajissa najarissa quinadsapa Abarahaopa pina poccadeni abissa najari.

*Diopa Pohuadsa pajissa quinajaridenidsa pina Abarahaodsa huati tapojarissa inananitohui*

<sup>13</sup> Maittaccadsama Diopa Abarahaodsa huati tapojari: —Tiadsa, tipotemanidsa ima bicani onananitohui. Tiadenidsa dsama nemaneha da onanitohui –napojari. Naraha pocca huatinajapi Abarahao Diocca dosseniji ecahuanissa tajarojine jerani. Abarahaopa Diodsa pajissa najarijinena pohuadsa tojajaro. Pocca jehenijijinena Dio Attia: —Abarahaopa bica tahi –nanaja najari. <sup>14</sup> Aja Dio huati tapojaricca ima bicanipi Pohuadsa pajissa quinajaridenidsa tojajaro. Aja madija Diocca dossenijidsa iboraquiri najaridenidsana pocca huatinaja tojadsapi nassa Diodsa pajissa quinajaridenicca jehenijipi ponima tojanitohuiraha. Diocca huatinaja naqui ponima tojanitohuiraha. <sup>15</sup> Madijapa Diocca dosseniji ecahuanamananissa tanijine pajiramanajarahi. Dsori inanamanadsapi najidsohuedsa bacco toquinahitohui. Naraha najaro dosseniji nohueradsapi madija dsori inanamananijine pohuadenidsa nohuerani.

<sup>16</sup> Naraha Dio huati tapojaricca ima bicani Abarahao potemahidsa tojajaropi Diodsa pajissa quinadsana pohuadenidsa tojajaro. Moisesicca marinaja cajimanajaridenipa pina Abarahao Diodsa pajissa najarissa quinadsapa Diocca huatinaja pohuadenidsa tojajaro. Ia naqui pina Abarahao Diodsa pajissa najarissa inadsapi Diocca huatinaja

iadsa tojajaro. Nema nadsapi Abarahaopa ia pajissa inajaro huapimacca abi tojajari, inajaro. <sup>17</sup> Dio Atti dsodo nanidsapi ima ajima najaro: —Ojine dsama huapimacca abi tijajaro –najari Dio Abarahaodsa. Diopa madija huatiahi Pohuajine camittemanihi pajirajari. Ajijaro dsamapi nohueraporaha Dio Pohuana inahatojaro. Aja dsamacca cajiridsajari naco nohueraraha Dio Pohuana inahatoridsajari. Najaridsana Abarahao pajissa najari.

<sup>18</sup> Abarahao jadahi tocaja, bedimeni jadani tocaja nadsana Dio pahuadsa huati tajari: —Tipotemani ticajinitohui –najari. Ejedeni cajimanahijine tossamomanaraha Abarahaopa Diodsa pajissa nadsa: —Ohua opotemanipa huapi taha ocajinitohui –najari. Nadsapa pina Dio huati tajarissa najaro tohuini madijari. Nama nadsapa dsama huapimacca abi tojajaripaja. Pina pahuadsa Dio huati tapojarissa najaro: —Tipotemanipa tohuapihitohui, pina abadsico bedi huapi tajarissa nahitohui –najari.

<sup>19</sup> Abarahaocca huajano 100 bacco tabote naraha Diodsa pajissa najaripa nebo najarajari. Pohua bodipa: —Odsoqquenicca huajira tani. Sara dsoqquenicca naqui huajira tani –najari. —Sara ejedeni cajinijinepi tossamoni –najari. Naraha Diocca huatinajadsapa pajissa dsanapojari. <sup>20</sup> Diocca huatinajadsa Abarahaopa: —¿Pajissaqui? Pajissa jeranitide –najarajari. —Diojinepi pajiranissa tanitohui –nadsana pocca jeheniji deni tojadsanapojaro. Diodsa huatidseri dsanapojari.

<sup>21</sup> Abarahao pohua bodidsa nahato tajaripa: —Dio pocca huatinaja pajiranissa tajaropi dacorehe cajijari –najari. <sup>22</sup> Najarojinea Dio: —Abarahaopa ohuadsa bica tahi –najaripaja.

<sup>23</sup> Abarahaopa Diodsa pajissa nadsa Diopa pahuadsa: —Bica tinani –najari dsodo napojaropi Abarahao pahuadsa ojari-gerani. <sup>24</sup> Najaro imapi iadsa naqui dsodo najaro. Ia naqui ia Medsede Jeso Nahatonide Diodsa pajissa inadsapi Pohuapa iadsa: —Bicaqquri tiquinani –najari. <sup>25</sup> Diopa Pohua Bedi da inadsa dsoqquejari, icca imasiri manaconi. Inahatonijaripa iadsa: —Imasiri ticappiramanani –nahijine.

## 5

### *Jesojine Dio tedseje icajonerajaro*

<sup>1</sup> Ia Medsede Jesocriso itohui dsoqquejaricca imadsa pajissa inadsapi Diopa: —Tiadenidsa ima nohuerani –najari. Najaroa aji Dio tedseje icajonerajaropaji.

<sup>2</sup> Cristodsa pajissa inadsapi pohuajine Dio iadsa catidse tahi. Najaroa aji Dio Pahuadsa disseraqquri inajaropaji. Nidsa Dio dsamarihuajipi pocca deni tojehe iadsa tojanitohui inadsa ehetidse najaro. <sup>3</sup> Naraha itedsejemacca ima bicanidsaha etidseni ojari-gerani. Aji ocasserani ejarodsa naqui etidsenijine. Ajijaro ima nahatoto inani: Ocasserani ejaropi denima idacocorani nanijine, ocasserehe tonahanade iattanijine.

<sup>4</sup> Idacocorani nadsapi Diopa: —Tijinedeni bica tani –najari. Nadsapi ijine Diodsa bica tani nahatoto inadsapi itedsejemacca ima bicani iadsa tojanijine naqui ibodidsa ahuatoto tajaropaji. <sup>5</sup> Aji itedsejemacca ima bicani tohuini imadijaropi maidsehe toja-geranitohui. Dio Pohua Corime iadsa da inajaripa ibodidsa pocca tohuati huanehe inananissa tajaro.

<sup>6</sup> Iapi ijine icassiejeranijine ipajira-geradsapi tohuati nahanacqquri inapode. Naraha Dio ima inanajorapojarocca huada bacco tadsa Cristo dsoqquejaripa madija imasiri sseqquri najaridenicca imasiri manaconi dsoqquejari. <sup>7</sup> Madijapa pohua tessedsa ima oppina tehe tojadsa pahuadsa: —Dsoqquena –quinadsa pohua tesse tossiajahijine: —Ohuara odsoqquena –nahijinepa cappina tahi. Pohua ccaccoraja, pohua ccaccora-geraja nahitide. Naraha pohua tesse madijari bica taraha pahuadsa: —Dsoqquena –quinadsapa najari tossiajahijine madija ojari ojari naha pohua ccaccora tahi. <sup>8</sup> Naraha Dio iadsa huati cahanari canahi nahatoqquri inanijinepi imasiri sseqquri inaraha Cristopa itohui pohua ccaccorajari. <sup>9</sup> Icca imasiri manaconi Cristo

emene toccajarojinena Dio iadsa: —Jidapapi ticcadeni ima ohuadsa tobicani –najari. Nidsa pocca najidsohuecca huada bacco tadsapi ima bicani denima icajinitohui. Pocca najidsohue iadsa ssonari-geranitohui. <sup>10</sup> Tahide imasiri icajie imadipodsapi Dio tedseje icahadirehe imadipoccade. Nema inadsa imadiporaha Dio Pohua Bedi icca imasiri manaconi dsoqquedsana Dio Pohua tedseje icajonerajaropaji. Jidapapa Cristo nahatonia camitta taha madidsapa ia tonassiajabacquihitohui, inajaro. <sup>11</sup> Najaro ima bicania iadsa ojari-gerani. Diodsa naqui huatidsehe imeni icajini. Ia Medsede Jesocristojinena Dio tedseje icajonerajaro.

### *Adana Cristo tedseje tahimarideni*

<sup>12</sup> Dsama nahatoponipa Adanaha madipojari. Adana pohana ibohuedsa imasiri inanapojaro. Adanapa ojari naha madiporaha pohanajine madija huapimadsa imasiri dsapa teje najonaponi najaropaji. Najaria aja madija huapima imasirima madi-jonamanadsapa jadahi tocjamanadsa huatiamanaja najonapohui najaripaja. <sup>13</sup> Imasiripi Moisesicca marinaja nohueraccadsama tahide madija imasiri inanarid-samanapojaro. Aji Moisesicca marinaja nohueraccadsapi madijadsa: —Imasiri ticajini –quinahijine nohueraccani. <sup>14</sup> Naraha nema nehe Adana madipodsama imasiri inanamanajarodenipa dsoqqeche inahanajonamanajaroa aji Moisesicca marinajadsa bacco toquinajaripaja. Adana natti madimanajaridenijinepi pina Adanajine imasiri toजारossa nejeraraha nama naha imasiri cajimanajari.

Adanapa madija ohuaha dsotode ccajonahijine tahimari ahuato inanapojari. Najaripa Diocca daniji Jesocristo. <sup>15</sup> Naraha Adanacca danijipi pina Diocca danijissa nejerani. Adanapa ojariraha pocca imasirijine aji huapima eheta najaropaji. Diopa madijadsa huati cahanari canadsa manaconi jirehe icca ima tobicanijine pocca ejedeni Jesocristo da inajari. Pohanapa ojariraha pohanajine camittehe icajijaro. <sup>16</sup> Diocca danijipi pina madija ojariacca imasirissa nejerani. Adanacca imasiri ojari napodsapi Dio madija huapimadsa: —Imasiri ticajiridsamanani. Nanajidso tiquejenanitohui –najari. Madijapa imasiri sseqquiri naraha Diocca daniji-jinena huapimacca imasiri jicaridsajaro. Nadsapa Dio madijadsa: —Tiadenidsa ima nohuerani –najari. <sup>17</sup> Madija ojariacca imasirijinea eheta najaropaji. Dsoqqehepi ajijaro dsama nemanehedsa dacorajaro. Huapimadsa deni toजारo, pina tamine deni toजारissa najaro. Najaro imassa naraha ima denima bica tajaropi madija ojaria Jesocristona pocca madijadsa camittehe dsati da inajaro. Nadsapa pohanadenina dsoqquehedsa deni toquejenajari. Nama quinahijinepa Dio pohanadenitohui huati cahanari canadsa poccadeni ima manaconi jirehe inapajiranissa tajaro.

<sup>18</sup> Adanacca imasirijine madija huapimadsa najidsohue toजारo. Najarossa najaro Jesocristocca ima bicaniijine madija najidsohuedsa dsori tocanirejari. <sup>19</sup> Madija ojaria Diodsa ibo tadsapa madija huapimadsa imasiri toजारidsajaro. Naraha madija ojaria Diodsa ibora tadsapa pohanadsa pajissa quinajaridenicca imasiri Djojine jicaridsajaro. Pohanadenidsa Dio Attia: —Jidapapi ohuadsa bicaqqquiri tiquinani –najari.

<sup>20</sup> Dio pocca dosseniji Moisesidsa da inajaropi madijacca imasiri pohanadenidsa denima ahuato tanijine. Nadsapi imasiri denima inanamanaraha Diocca tohuati huanehena deni toजारo. Diopa madijadsa huati cahanari cadsanapojari. <sup>21</sup> Imasiri dacorajarojinea aji eheta najaropaji. Naraha Diocca tohuati huanehe denima dacoradsapi Dio pohua icadossedsa ia Medsede Jesocristojine icca imasiri jicajaro. Nadsapi icca ima Diodsa tobicajaro. Ia Medsede Jesocristojine camittehe jiquejeranicca icajidsanaponitohui, inajaro.

## 6

*Cristodsa ijariqquijarocca ima*



<sup>1</sup> Aji ima imittajaropi madija imasiri denima inanamanaraha Diocca tohuati huanehena madijadsa denima dacorajaro. Nadsama ¿iapi nejecoma inanijine? Diocca tohuati huanehetohui inadsapi ¿imasiri inananiijinequi? <sup>2</sup> ¡Poni! ¡Imasiri inana-jerana! Pina aja madija dsoqquedsa imasiri ssamo tajarissa inajaro. Nema inadsapi ¿imasiri inana-dsanaponijinequi? Nohuerani. <sup>3</sup> ¿Totopacca imapi nahatoqquiri tiquinejerajaroqui? Totopa icajidsapi Jesocristo pohuadsa ijariqquijaro. Pina pohua tedseje ecotajarossa najaro. <sup>4</sup> Passodsa ia topa idsanamanadsapi pina Cristo tedseje ia ppa idsamanajarossa najaro. Aja Cristo ppa idsamanaraha Abi Dio pocca deni tojehe bicabotema Cristo inahatonijari. Ia naqui Cristo pohua tedseje ecotaraha pohua tedseje inahatonijarossa najaro. Najaroa aji madie dsati icajijaropaji.

<sup>5</sup> Cristodsa ijariqquijaropi pina pohua huatiajarissa inajaro. Cristo nahatonidsa naco pina pohua tedseje inahatonijarossa inajaro. <sup>6</sup> Ajijaro ima nahatoqquiri inajaro: Icca madie jadani naqui pina Cristo ahua porimacossanidsa huatiajarissa najaro. Najaro jicadsapi ia tohuini inanicca tabaccorehe naqui jicajaro. Iadsa ajimani tojadsapi pina ia dossedessa napoma-jerani. Nema nadsapi imasiridsa imadidsanapo-jeranitohui. <sup>7</sup> Pina madija dsoqquedsa imasiri denima inananiijine ssamo tajarissa inajaro. <sup>8</sup> Cristo pohua tedseje ecotajaropi pajissa pohua tedseje imadinitohui, inajaro. <sup>9</sup> Iapi nahatoqquiri inani: Cristo huatiaraha nahatonijaripa huatiapoma-jarahitohui, inajaro. Ehetia najarocca imapi dacoraraha Cristodsapi dacora-jerani. <sup>10</sup> Cristopa dsoqquehi ojari naraha najarodsa imasiricca dacorehe pohuadsa jicanissa tani. Nadsapa camittemanidsa Diocca deni tojehe ahuato tanijine madijari. <sup>11</sup> Nadsama iapi ibodidsa ajima inana: Pina ecotajarossa nadsana imasiricca dacorehe iadsa jicani. Jidapapi Jesocristodsa ijariqquidsapi Dio Pohua tohui nahiccara inananiijinena imadijaro.

<sup>12</sup> Aji imasiripi tessiredeni dsoqqueqqe taniccadsa dossede dacorajaro. Tabaccorehe tinanamananiijine tiadeni dosse dosse najarossa najaro. Najarodsa poni tiquinaji, timedenidsa tohuini tiquinanicca tinanamana-jeraniijine. <sup>13</sup> Tessiredeni ima tabaccora taniccadsa teccoramana tejeraji. Tessiredeni Diodsara teccoramanaji. Tiadenipi pina madija dsoqqueraha nahatonidsa madijarissa tiquinajaro. Nadsapi tessiredeni ima bicanidsana teccoramanaji. <sup>14</sup> Nema tiquinadsapi imasiri tiadenidsa dacora-jeranitohui. Jidapapi Moisesicca marinajadsa timadimana-jerani. Diocca tohuati huanehedsana timadimanajaro.

*Madijacca dodosse tabaqqi toquejenajaridenicca ima tadsajani mari icanabaqqi-jari*

<sup>15</sup> Jidapanapi Moisesicca marinajadsa imadi-jerani. Diocca tohuati huanehedsana imadijaro. Nema inaraha ¿imasiri inanani bica taqui? Bica tejerani. ¡Poni! Nema inejerana. <sup>16</sup> Tiadenipi nahatoqquiri tiquinajaro. Madijacca dodosse tabaqqi tiquejenadsapi pina tiadeni dossede attissa tinanamananiijine pohuadsa tiadeni teccoramanajaro. Tiadeni dossede attidsa iboraqquiri tiquinadsapi pocca dodosse tiquejenajaro. Najaro imassa najaroa tabaccorehe tinanamananiijine iboraqquiri tiquinadsapi pina imasiricca dodosse tiquejenajarossa najaro. Nema tiquinadsapi paji tijicarinitohui. Naraha Diodsara iboraqquiri tiquinadsapi Pohuadsa ima bicani tinanamana-dsanaponitohui. <sup>17</sup> Ima bicani ticattejidsamanadsapi Diodsa ohu-atidsedsa: —Jehe Abi Dio, tijine bica tani –onajaro. Tahidepi pina imasiricca dodosse tabaqqi tiquinaporaha jidapapi Jesocristo tahimari tiadeni mari tocanabaqqi-manadsana ticcadeni huatidsehema iboraqquiri tiquinajaro. <sup>18</sup> Nadsapi imasiricca dodosse tabaqqi tiquinejeraniijine Dio tiadeni todinibaqquidsapa ima bicanidsara tidsepedeni ijimanajaro. <sup>19</sup> Aji huati huati onajaropi timittamananiijine najo tani onadsa ajijaro namicca ima tadsajani tiadeni mari ocanabaqquijaro. Tahidepi tessiredeni huananehedsa teccoramanapojaro. Ima onihi tabaccora tajarodsa naqui

tessiredeni teccoramanadsapi pina imasiricca dodosse tabaqquissa tiquinapode. Naraha jidapapi Jesocristojine ticcadeni ima cacajiqquimerani. Tessiredeni ima bicanidsara teccoramanaji. Nani bicaqquri tiquinadsa Diotohuira timadimana-dsanapodsapi pocca dossenijidsara iboraqquri tiquinanijine.

<sup>20</sup> Pina imasiricca dodosse tabaqquissa tiquinapodsapi ima bicanidsa tidsepedeni ijimana-jeraccade. <sup>21</sup> Naraha imasiri tinanamanadsapi ¿nejecora bica tanicca titicajimana najarotte? Nohuerani. Jidapapi aji imasiri tinanamanapojarodsapi ticappinamanani. Najaro imasiridsapi dsoqqehe jiquejeranicca najidsohuedsa timadimana-dsanaponitohuiraha. <sup>22</sup> Jidapapi pina imasiricca dodosse tabaqquissa tiquinejerani. Diodsara tidsepedeni ijimanani. Najaro imana deni tojanicca ticajimanajaro. Jehe, Diodsara tidsepedeni ijimana-dsanapodsapi bicaqquri tiquinadsa Pohuatohuira timadimana-dsanaponijine. Nani camittehe jiquejeranicca naqui ticajimana-dsanaponijine. <sup>23</sup> Icca imasiri manaconipi dsoqqehe jiquejeranicca. Naraha Diocca danijipi camittehe jiquejeranicca. Ia Medsede Jesocristodsa iquejenadsapi Diocca daniji icajini.

## 7

### *Cajicajicca imadsa mari icanabaqqujari*

<sup>1</sup> Ohuemecotedeni, tiadenipi Moisesicca marinaja nahatoqquri tiquinani: Madija madiccadsapa Moisesicca marinaja pohuadsa dacoraccani. <sup>2</sup> Najaro ima ahuato tanijinepi cajicajicca imadsa tiadeni mari ocanabaqquina, onajaro. Moisesicca marinajadsapi ajima najaro: Amoneje maqquideje cajidsapi ponicca maqqui madiccadsapa pohuadsara madiccani bica tani. Najaro cajicajicca marinaja ponidsa dacoraccani. Naraha ponicca maqqui dsoqquedsapa cajicajicca marinaja ponidsa nohuerani, jicani. <sup>3</sup> Aja ponicca maqqui madiccadsapa maqquideje ohuaha inajadsapi ponicca maqquidsa imasiri inanajaro. Cajicajicca marinaja dsori inanajaro. Naraha ponicca maqqui dsoqquedsana cajicajicca marinaja ponidsa jicani. Maqquideje ohuaha cajinijine oppinera tani.

<sup>4</sup> Ohuemecotedeni, tiadeni naqui pina Cristo tedseje ecotajarossa nadsapi Moisesicca marinaja iadsa dosse dosse napojaropi jicani. Jidapapi ia dossede marinaja onihi icajinijine bica tani. Nadsapi aja Cristo dsoqqueraha nahatonijaricca dodosse iquejenani. Nema nadsapi Diodsa idsepe ijiridsanijine bica tani. <sup>5</sup> Icca ima tabaccora tajaroma imadipodsapa Moisesicca marinaja ia mari tocanabaqquidsa imitaraha najarojine imecca imasiri denima tohuatodsapi denima tohui ibodi huahuato naccade. Najaro imasirima imadidsapi dsoqqehe jiquejeranicca najidsohuedsa imadi-dsanaponijineraha. <sup>6</sup> Naraha jidapapi Moisesicca marinaja iadsa dacora-jerani. Ia dosse dosse naporaha jicani. Moisesicca marinajadsapi ecotajaro. Jidapapi Moisesicca marinajabotedsa Diodsa idsepe ijijerani. Dio Corimecca daniji icca madie dsatidsana Diodsa idsepe ijidsanapojaro.

### *Imasiripi iadsa madini*

<sup>7</sup> Jari, aji Moisesicca marinaja imittadsa ibodicca imasiri tohuatojaro onajaropi ¿Moisesicca marinajapi imasiri onajaroqui? ¡Nema onejerani! Pocca marinajadsa imasiri onanacca ima ohuattajaro. Pocca marinaja omitta-jeradsapi nassa imasiricca ima nahato onejeraneje. Imapi ajima najaro: Madija ohuaha dsepetaji tohuini onacomadsapi obodi: —Imasiri jerani —onaraha Diocca dosseniji Moisesidsa da inajaro ojariepi: —Madija ohuaha dsepetaji tohuini tinacomamana tejeraji —nani omittadsapi nahato onajaro. <sup>8</sup> Moisesicca marinaja nohueradsapi imasiricca dacorehe ahuatoma-jeranitohuiraha. Naraha madija ohuaha dsepetaji

tohuini tinacomamana tejeraji omittadsapi occa imasiri ahuatomajaro. Obodidsa tabaccorehe tohuini onajarojine onoccodsa qqui onajaro tohuini ohonacoma najaro.

<sup>9</sup> Tahide Moisesicca marinaja omitta-geradsapi pina bica onadsa omadijarossa najaro. Naraha dsotode madija ohuaha dsepetaji tohuini tinacomamana tejeraji omittadsapi imasiri onanani ohuadsa ahuatō tajaro. Dsoqqehe jiquejeranicca naqui ohuadsa ahuatō tajaro. <sup>10</sup> Moisesicca marinajajinepi camittehe jiquejeranicca ohuadsa tojanijineraha najaro dsori onanadsapi dsoqqehe jiquejeraniccana ohuadsa tojajaro. <sup>11</sup> Imasiripi mamaisadessa najaro. Moisesicca marinajadsa ohua camaisajaro. Omadi-dsanaponijinecca ima tohuini onaraha imasiripi dsoqqehe jiquejeraniccahuajina ohua tonanajaro.

<sup>12</sup> Moisesicca marinajapi bica tani, imasiri cappirani. Diocca dosseniji huapima Pohuajine pajiranissa tajaro, bica tani. <sup>13</sup> Naraha aji Moisesicca marinaja bicaniijine ¿dsoqqehe jiquejeranihuaji occanijinequi? Nohuerani. Imapi nema nejerani. Diocca dosseniji ojarie dsori onanadsa imasiri onanajarojinena dsoqqehe jiquejeranihuaji occanijine. Moisesicca marinaja bicaniijinepi imasiricca ima ohuadsa ahuatō tajaro: Imasiripi oppina tani, tabaccora tajaro.

<sup>14</sup> Moisesicca marinajapi Diocca daniji bicani nahatoqquiri inajaro. Naraha ohuapi ohueme ocajie omadidsapi imasiri ohuadsa dacorajaro. Pina ohua dossedessa najaro. Poni tohuini naniccara onananiijine ohua cacadosse najaro. <sup>15</sup> Najaro obodi huatodsapi: —¿Nejecotohui obodicca ima jidsa tajaro? —onajaro. Ohua jipa onanicca bica taniccara onana-gerajaro. Tohuajari nadsa taniccara onanajaro. <sup>16</sup> Ohua jipera onanicca onanadsapi ima ohuadsa ahuatō tani: Moisesicca marinajapi bica tani. <sup>17</sup> Naraha aji ohua jipera onanicca onanajaropi ohua motta ojine jerani. Imasiri obodidsa madidsajarojine ohua ocadossenijaro. <sup>18</sup> Ohuapi ohuadsa ima bicani nohuerajaro nahato onani. Ohueme ocajie omadije najaro imasiri sse onani. Ima bicani onananiijine tohuini onaraha nema onana-gerani. <sup>19</sup> —Ima bicani onanana —onaraha ima bicani onana-gerani. Ohuapi ima tabaccora tajaro tohuini onejeraraha tabaccorehe ohonana najaro. <sup>20</sup> Nadsapi obodi huatojaro: Ohua jipera onanicca onanajaropi ohua motta ojine jerani. Imasiri obodidsa madidsajarojine ohua ocadossenidsa nema onanajaro.

<sup>21</sup> Obodi huatomadsapi ajijaro ima ocajijaro ohuadsa ahuatō tani: —Ima bicani onanana —onaraha ima tabaccora taniccara onanajaro. <sup>22</sup> Obodipi Diocca dosseniji Moisesidsa da inajaro tohuini onani. <sup>23</sup> Naraha ohuemepi ima onihi cajijaro. Ohuemedsa imasiri dacorajarojine obodicca ima bicani tadsajani pina cahadirejarossa najaro. Imasiri deni tojadsapi pina poni dsapanidsa ojararossa najaro. Ohua jore naqquijaro. <sup>24</sup> ¡Jaho, tohuati nahana onaponi! Ohuemepi dsoqqehe jiquejeranihuaji ohua tohuaqqejeraniijine ¿nejecojarina ohua dicca nahijine pajirahi? <sup>25</sup> Ia Medsede Jesocristona ohua dicca nadsapa Diodsa ohuatidsedsa: —Jehe, tijine bica tani —onajaro. Nadsama occa imapi ajima nani: Obodipi Diocca dossenijidsa ibora tajaro. Naraha ohuemena imasiri onananiijine ibora tajaro.

## 8

### *ICCA MADIE DSATIPi Dio Corime ia mari tocanabaqqujari*

<sup>1</sup> Nadsama Jesocristodsa iquejenajaropi Dio icca imasiri manaconi iadsa inassonari-geranitohui. <sup>2</sup> Jesocristodsa iquejenajaropi Dio Corimena ia dosse dosse najari. Camittehe jiquejeranicca iadsa inanadsapi imasiridsa imadi-gerajaro. Dsoqqehe jiquejeranicca ima naqui iadsa nohuerani. <sup>3</sup> Najaro ima bicaniipi Diojinena iadsa tojajaro. Moisesicca marinajajine jerani. Moisesicca marinajapi ecahuanissa tanijine ipajira-gerani. Madija iapi ibodidsa tabaccorehe tohuini inehe imadijaro. Najarodsa Diopa: —Tabaccora tani. Najarojine najidsohue ticajimananitohui —nanaja najari.

Naraha najaro imasiri tomossinijinepi Dio Pohua Bedi dosse inaronajari. Pina madija essire icajjarossa naha cajidsapa pohua assiredsana icca imasiri manaconi Djojine ssonarijaro. <sup>4</sup> Dio nama nadsapa pocca dosseniji bicabote inapajiranissa tehe imadinijine. Nema inanijinepi ibodicca tabaccorehe tohuini inejeradsa imadijaro. Dio Corimecca dossenijidsana ibora inadsa imadijaro.

<sup>5</sup> Naraha Jesocristodsa toquejena-jarajaridenipa bodidenidsa tabaccorehe tohuini quinaha madimanajari. Najaria aja najaro tabaccorehe tohuira bodideni huahuatoma-mana najaripaja. Naraha aja Jesocristodsa toquejenaridenipa Dio Corime pohuadenidsa madijaria aja Dio Pohua jipa tahicca ima tohuira bodideni huahuatoma-mana najaripaja. <sup>6</sup> Naraha aja pohuadeni bodicca tabaccorehe tohui bodideni huahuatoma-mana najaripa paja dsoqquemanarhicca najidsohue pohuadenidsa tojanitohui. Naraha Dio Corimejine Dio Pohua jipa tahicca tohui bodideni huahuatoma-mana najaripa madimana-dsanapohuijinecca ima cajimana-jari. Jonehema madimanahissa tajari. <sup>7</sup> Aja pohuadeni bodicca tabaccorehe tohui bodideni huahuatoma-mana najaripa Dio ihicahadimana najari. Pocca marinajadsa iboraqquri nahijinepa ssamoqquri nahi. <sup>8</sup> Madija pohuadeni bodicca tabaccorehedsa iboraqquri najaridenipa Dio inahatidsemanaha najarahi.

<sup>9</sup> Naraha tiadenipi tibodidenicca tabaccorehe tohuini tiquinehe timadimanagerani. Pajissa Dio Corime tiadenidsa madidsapa Pohuajine Dio jipa tahicca imatohuira timadimanani. Naraha madija Cristo Corime cappirajaripa Cristocca jarahi. <sup>10</sup> Tessiredenipi imasirijine tidsoqquemanaraha ticorimedenina madimana-dsanaponitohui. Cristo tibodidenidsa madijarijine Diopa: —Tiatenipi ohuadsa bicacqquri tiquinani —najari. <sup>11</sup> Diopa Jeso inahatonijaria Pohua Corime tibodidenidsa madijari. Nadsapa Pohua Corime tiadenidsa madijarijine Jesocristo Nahatonide Pohuana tessiredenidsa camittehe jiquejeranicca da inaridsanitohui.

<sup>12</sup> Ohuemecotedeni, ia dossede icajini. Najaripa Dio Corime. Nema nadsapi ibodicca tabaccorehedsa ibora inejerana. Najaropi icca ima jerani. <sup>13</sup> Tabaccorehe tohuini tiquinaniccadsa iboraqquri tiquinadsapi dsoqquehe jiquejeranihuaji timadimana-dsanaponitohui. Naraha Dio Corimecca dossenijidsana iboraqquri tiquinadsapi tabaccorehe tohuini tiquinajarocca tinajicamanajaro. Nadsapi camittehe jiquejeranihuaji timadimana-dsanaponitohui.

<sup>14</sup> Huapima Dio Corimecca dossenijidsa iboraqquri tiquinadsapi Diocca ejedeni tiquejenani. <sup>15</sup> Dio Pohua Corime tiadenidsa inanajaripa bica tajari. Pohuajine Diocca huadie noppineni ticappinamananijine jarahi. Pina madijacca dodosse toquejenarideni pohuadeni dossedecca huadie noppineni cappinamanajarissa tiquinanijine jerani. Dio Corimejinea Diocca ejedeni iquejenajaropaji. Pohuajine naqui Diodsa: —Abi —inajaro. <sup>16</sup> Dio Corimejinena ibodidsa ima ahuato tajaro: Pajissa Diocca ejedeni iquejenajaro. <sup>17</sup> Nadsama Diocca ejedeni iquejenadsapi pocca daniji bicani iadsa tojanitohui. Huapima Djojine pocca ejedeni Jesocristodsa tojajaropi iadsa naqui tojanitohui. Pajissa Cristo pohua tedseje ocasserani edsapi nidsa dsotode pocca cacahuehedsa bacco inadsa pohua tedseje pocca deni tojehedsa ia naqui imadinitohui.

### *Diocca deni tojehe Pohua dsibehinema qqui inanitohui*

<sup>18</sup> Ohua obodi huatodsapi ajijaro namidsa imadidsa ocasserani eraha najaropi jicaca tani. Nidsa memehuajina Diocca deni tojehe Pohua dsibehinema qqui inahitohui. Pocca deni tojehe iadsa tojanitohui. Najarona iadsa denima bica tajaro. <sup>19</sup> Dio inahatoridsajari huapimadsa Diocca ejedeni iquejenajaro ahuatocqquri inanijine ia qquidepa najoramanahi. Pocca nahatonaja huapimapa najaro qquide tohui inacomamanajari. <sup>20</sup> Aja Dio inahatoridsajari huapimapa poccadeni biquehe onihi onihi cajiridsamanaporaha poccadeni ima totabaccorajaropi pohuadenijine jerani. Aja Dio Pohua inahatoridsajari huapimapa Pohuana inajidsoridsajari. Pohuadenidsa

najidsohue ssonari, comehe ssonari, dsoqqeuehe ssonari najaropaji. Naraha poccadeni ima tobicanijine tohuini madimanajari. <sup>21</sup> Nidsa Dio pocca ejedenidenidsa pocca deni tojehe inaridsadsapi dsoqqeuehecca dacorehepi jicanitohui. Najaro deni tojehe Pohua inahatoridsajaridenidsa naqui inaridsadsapi dsoqqeuehe tappa inabaqquihitohui. <sup>22</sup> Nahatoqquri inani: Dio inahatoridsajari huapimapa pina amoneje ejedeni comene johua johua najarossa quinaha ocasserani ahuajonamanajaria jidapana ajijaropaji. <sup>23</sup> Iapi Dio Corime icajiraha ajijaro namidsa nahatoridsajarideni tedseje ocasserani eccani. Aji Dio Pohua Corime iadsa da inajaropi nidsa dsotode ima bicani icajinijine nahatoqquri inani. Naraha najaro ima bicanitohui imadidsapi icca ojiema imadicajaro. Nidsa dsotode najaro ima bicani iadsa tojadsapi Dio Pohuajine pocca ejedeni iquejenajaropi huapimadsa ahuate tanitohui. Pohuajine naco essire cacajiqquimeradsapi dsati tojanitohui. <sup>24</sup> Jesocristodsa pajissa inajaropi tossiejehe icajini. Nadsapi itedsejemacca ima bicanitohui imadijaro. Najaro qqui inadsapi denima tohuini inejeranitohui. <sup>25</sup> Naraha aji tohuini imadijaro qqui inejeraccadsapi mohuaradsa najarotohui imadijaro.

<sup>26</sup> Jehe, ima bicani tohuini imadidsapi ia acco camajaro. Najarossa najaro ocasserani edsa icca jeheniji tojaparidsapi Dio Corime ia acco cama tahi. Diodsa huatide inassamoqquidsapi naqui Dio Corime pohua ssa tocanacossadsa Diodsa atti jiraha icca ima huati toqquima tahi. <sup>27</sup> Diopa ibodi qqui taridsahi. Pohua Corimecca huatinaja nahato tajari. Pohua Corimepa Dio Pohua jipa tahicca nahato tadsa pocca ejedeni iquejenajaro icca ima Pohuadsa huati tahissa tataja najari.

### *Diocca deni tojehe icajinitohui*

<sup>28</sup> Icca madiedsapi ima onihi onihi naridsajaro. Ima ocassera tanicca naqui iadsa bacco bacco najaro. Naraha Dio Pohuajine ima huapima iadsa tojajarocca tassaqquidsapi iadsa ima bicani tojanijine nahatoqquri inajaro. Aja Pohuadsa huatideni huanacquiri najarideni huapimadsa nema inananitohui. Najaridenidsa huahua najari, pina Pohua bodi: —Ajima onanana —napojarissa inajaro. <sup>29</sup> Diopa najaridenidsa tahide nahato tapojari: —Pohuadenipa pina occa ejedenissa onanabaqquihitohui —napojari. Najaria aja Dio Pohua Bedipa imecotedeni huapimacca ato tojajaripaja. <sup>30</sup> Dio Attipa: —Occa ejedenissa onanabaqquihitohui —napojaria aja pohuadenidsa huahua najaripaja. Dio huahua inabaqquijari Jesocristodsa pajissa quinadsapa Dio Attipa: —Poccadeni imasiripi jicaridsani —najaripaja. Poccadeni imasiri jicaridsajaridenidsa pocca deni tojehe inaridsajaro.

<sup>31</sup> Ajijaro ima imittadsapi: —Jehe, ima bicani icajini —inajaro. Dio iadsa jipa tadsapa aja madija iadsa jiperaqquri najaridenicca imapi ponima tojajaro. <sup>32</sup> Diopa pocca ejedeni Jeso iadsa eccocco-jarajari. Icassiejeranijine eccoradsa dsoqqeuari. Pocca ejedeni iadsa da inadsapa ¿pocca biquehe onihi onihi iadsa eccoccpadseje? Nohuerani. Huapima iadsa da inaridsanitohui.

<sup>33</sup> ¿Nejecojarina Dio icattejidsa-baqquijaridenidsa: —Ticcadeni ima bica tejerani —nahijine pajirajari? Ssamo tahi. Dio Attipa: —Jesocristodsa pajissa quinajaridenicca imapi ohuadsa pajiranissa tani —najari. <sup>34</sup> ¿Nejecojarina Dio icattejidsa-baqquijaridenidsa: —Najidsohuehuaji ocasserani ahuanahitohui —nahijine pajirajari? Ssamo tahi. Jesocristopa itohui pajissa dsoqqeuari. Najarina pajissa nahatonijari. Toccamacossanidsapa Imehi Dio inori nahatonihuaji huittarijari. Nahihuaji huittaridsa Imehidsa huati huati nanaja najari, ia tohuacahua-baqquihijine.

<sup>35</sup> ¿Nejecojarina Cristocca tohuati huanehe iadsa inahuajinijine pajirajari? Nohuerahi. Cristo iadsa huati huana tadsapa iadsa apaja najarahitohui. Ocasserani edsa naqui Cristopa itohui huati cahanari cadsanapojari. Ima najo tanicadsa naco Cristopa itohui huati cahanari cadsanapojari. Nanajidso iquejenadsa, pemi imadidsa, iccoroje imadidsa, oppinehema imadidsa naqui Cristopa itohui huati



cahanari cadsanapojari. Idsoqquedsa naqui Cristopa iadsa nama dsanapojari. <sup>36</sup> Dio Atti dsodo nanidsapi ajima najaro:

—Dio, ticca imatohui disseraqquri inadsapi madija huajijiradsa ia jara jara quiquinanahi, ijicanijine.

Iapi pohuadenijine pina edede bani tojahijine dsodsoqque nahihuaji iaccamanajarissa inajaro

—nani nade Dio Atti dsodo nanidsa.

<sup>37</sup> Najaro ocasserehe onihi onihi naridsajaro huapima iadsa ssonariraha Cristo iadsa huati cahanari canadsapa iana deni iquejenajaro.

<sup>38</sup> Ajijaro imapi obodidsa nahato onani: Dio iadsa huati cahanari canadsapa ima onihi onihi najarojine Diocca tohuati huanehe iadsa inahuajinijine ssamo tani. Idsoqquedsa naqui ¿Diocca tohuati huanehe iadsa amossi napadseje? Diopa iadsa huati huanadsanapo tahi. Aji imadidsa naqui ¿Diocca tohuati huanehe iadsa amossi napadseje? Diopa iadsa huati huanadsanapo tahi. Aja Diocca dodosse tabaqquideni naco ¿Diocca tohuati huanehe iadsa inahuajimananijine pajiramanaco? Ssamogquiri nahi. Ajijaro dsamacca dacoraqquri najarideni naco ssamogquiri nahi. Satana naco pocca dodosse tabaqquidenima ssamogquiri nahi. Jidapanacca ima naqui ssamo tani. Itedsejemacca ima naqui ssamo tani. <sup>39</sup> Memehuaji madimanajarideni naco ssamogquiri nahi. Odi bodi huaji tanihuajicca naco ssamogquiri nahi. Dio inahatoridsajari ohuaha ohuaha quinajarideni naco Diocca tohuati huanehe iadsa inahuajimananijine nohuerahissa tahi. Ia Medsede Jesocristo itohui dsoqquejarijine Dio iadsa huati cahanari canahi ahuato inanajaropaji.

## 9

### *Diopa Isaraeri potemahi pocca madija toquejenahijine icattejidsabaqqujari*

<sup>1</sup> Cristocca madija ojadssapi pajissara huati onajaro. Omaidsa-gerani. Dio Corimejine obodi nahato tadsa pajissa huati onajaro. <sup>2</sup> Obodi qquedsehe omadi, obodi coma tehe omadi najaro. <sup>3</sup> Occa madija jodiodeni Jesocristodsa toquejenahijine tohuini onadsapi ohuara ohua ohuaccoradsa Diocca huadie ohuadsa ssonarina, onabote nani. Occa madija tocassiejerahijine Cristodsa epeje onadsa najidsohue jiquejeranihuaji ojanijine bica tani, onaraha ssamo tani. <sup>4</sup> Occa madija jodiodenipa idi Isaraeri potemahi. Najaridenina Dio pocca ejedenissa inanabaqqujari. Dio pocca dacorehe, pohua dsibehinema pohuadenidsa madiridsajari. Dio pohuadeni tedseje jehe canirejari. Pocca dossenijidsa madimanahijine Moisesidsa huati tajari. Dio Pohuadsa huatidsemanahijine naco mari icanabaqqujari. Pohuadeni tedsejemacca ima bicani huapi tani huati tapojari. <sup>5</sup> Occa madija jodiodeni potapojaridenipa Abarahao, Isahaca, Jacobo quinajari. Najarideni potemahidenidsana Cristo-Mesia tossonajari. Pohuapa Dio. Huapima Cacahuade tojajari. Pohuadsa etidsedsanaponijine bica tani. Pajissa nema nana.

<sup>6</sup> ¿Naraha Dio Pohua huati tapojaricca ima bicani pohuadenidsa inapajiranissa tejerajaroqui? Nohuerani. Imapi ajima najarona paji: Isaraeri potemahi huapimapa pajissa Diocca madija quejena-jarahi. Motana Dio pocca madija. <sup>7</sup> Abarahao potemahi huapima naco pocca ejedeni pajissacca quejena-jarahi. Motana pocca ejedeni pajissacca quejenajari. Diopa Abarahoadsa huati tapojari: —Ticca ejedeni Isahaca potemahidsana: “Tia tipotemani” onanitohui –najari Dio. <sup>8</sup> Najaro ima imittajaropi: Abarahao potemahi huapimapa Diocca madija toquejena-jarahi. Aja Dio huati tadsa tossonajari potemahidsana: —Occa madija –najari. <sup>9</sup> Aja Dio Abarahoadsa huati tapojaripa ajama najari: —Huajano ohuahadsa occajonapomadsana ticca amoneje Sara ejedeni cajinitohui –napojari.

<sup>10</sup> Nadsapa Saracca ejedeni Isahaca pocca amoneje Rebeca icajidsa inajidsapi idsonidsa ejedeni papamade cajijaro. Imehidenipa icca idi Isahaca pohua ojarihi. <sup>11-12</sup> Ejedeni papamade tocattoja-jaraccadsapa ima bicani inanamana-jeraccani, ima tabaccora tanicca naqui inanamana-jeraccani naraha Diopa pohuadeni tedsejemacca ima Rebecadsa huati tapojari: —Tahidecca tossojaripa dsotodeccadsa medse tojahitohui —napojari. Dio Pohua jipa tahicca inanaridsanijine madija icattejidsabaqqujari. Tohuideni huahua najaripa madija pohuadeni inanamanajarojine jerani. <sup>13</sup> Dio Atti dsodo nanidsapi ajima najaro: —Ohuapi Jacobodsa ohuati huana tajaro. Esahopa ohuattajojari —nahi nade Dio.

<sup>14</sup> Najaro ima imittadsapi ¿ibodidsa nejecoma inani? Dio pocca tocattejidsaniji pajiranissa tejerani ¿inanijinequi? ¡Nohuerani! Diojine pajiranissa tani. <sup>15</sup> Diopa Moisesidsa huati tajari: —Ohua madija ocattejidsa-baqquijaridenidsana occa acco camehe onanaridsanitohui. Najaridenidsana ohuati huana tanitohui —najari. <sup>16</sup> Dio iadsa huati huana tajaripa ia tohuini inajarojine jerani, idsepe ijinissa tajarojine jerani. Dio Pohua huati huana tajarijine. <sup>17</sup> Pina dsama Ejitocca tamine icattejidsajaricca imassa najaro. Dio Atti dsodo napojarodsa ima anijaro. Diopa taminedsa ajama napojari: —Tiadsa ossonaridsa occa dacorehe ahuato onananijine tia tamine onanajaro. Nema onajaropi dsama huapimadsa otahimari mittaridsamanahijine —nahi nade. <sup>18</sup> Najaro imadsapi iadsa ahuato tani: Dio Pohua jipa tadsa madijadsa: —Occa —nadsapa najaridsana huati huana tajari. Naraha Dio jipera tadsa madijadsa: —Occa —najaradsapa Pohuajine madija paja tohuiborihi dsanapo tahi.

<sup>19</sup> Najaro ima nahatoto tinadsapi ajima tiquinanitide: —Dio Pohua jipa tahicca ima madijajine cacajiqquimerani ssamo tadsapi ¿nejecotohui Diopa Pohuadsa iboqquri najaridenidsa: “Ticcadeni ima tabaccora tani” nanaja najari? —tiquinanitidija. <sup>20</sup> Naraha nema tiquinejeraji. Tiadenipi madijaraha ¿nejecotohui Diodsa tettideni nema najaro? Ajina dsipapi attini caji-jeraraha poni nanahatodedsa: —¿Nejecotohui ohua tinahatodsa ajima onajaro? —¿nanijinequi? <sup>21</sup> Naraha dsipa nanahatodena ssiqui jarorodsa pohua jipa tahicca ihinahato najaro. Najaro ssiqui jarorodsa dsipa bicani inahato, dsamatapa tabottojine inahato naneje najaro.

<sup>22</sup> Dio naco pina dsipa nanahatodessa naha Pohua jipa tahiccara ihinana najaro. Ajana Pohuapa: —Madija Ohuadsa iboqquri najaridenidsa occa huadie onassonarina, nani occa dacorehe ahuato onananijine —najari. Najarideni nanajidso toquejena-dsanapohuijine inanajorabaqqujari. Diopa nama nahijine jipa taraha pohuadeni inajidsobaqquihijine najoccahi. Mohuaradsa poccadeni imasiri inahanaccani. <sup>23</sup> Pohuapa najocadsama iadsa huati canahari canadsa ia tonassiajabaqquihijine ia tonanajora-baqqujari. Pocca deni tojehe, pocca biquehe iadsa ahuato inananiijine tohuini nadsa nema inanajaro. <sup>24</sup> Ia motapi jodiodeni iquejenajaro, motapi jodio tiquejena-jerajaro huapima Dio pocca madija iquejenanijine ia huahua tabaqquijaripaja. <sup>25</sup> Najaroa aji Dio Atti cacomerabote Osea dsodo inapojarodsa ima ajima najaropaji:

—Occa madija quejena-jarajaridenidsa: “Occa madija” onanitohui.

Pohuadenidsa ohuati huanera tajarossa naporaha pohuadenidsa ohuati huana tanitohui.

<sup>26</sup> Nadsapi pohuadeni madimanahihuaji pohuadenidsa: “Occa tiquejena-jerani” onaporaha

najaro dsamadsa pohuadenidsa: “Dio camitta tajaricca ejedeni tiquejenani” quiquinanahitohui

—napohui nade Dio Atti Osea dsodo inajaro. <sup>27</sup> Dio Atti cacomerabote Isahiapa Isaraeri potemahi jodiodeni tahimari huati tapojari:

—Isaraeri potemahideni tohuapidsapa pina coridsa imenicca ssiqui potera tajaro jiquejerajarossa quinahitohui

naraha mota pamema nahana tocassiejerahitohui.

<sup>28</sup> Aja Dio Pohua huati tapojaricca inanabote nani.

Dsama huapimacca madijadsa najidsohue inanadsapi Pohuajine pohuadenidsa pajiranissa tanitohui –nahi nade.

<sup>29</sup> Isahia ima dsodo inapojaro naqui ajima najaro:

—Dio Dacorabote icca idideni potemahi mota ecahuabaqqui-jaradsapa

iapi pina odsa panani Sodomacca madija, Comoracca madija jicajarissa inanitohuiraha –nahi nade.

*Jodiodenipa: —Icca marinaja ecahuadsapi Diodsa ibicanijine –quinaraha*

<sup>30</sup> Ima nema nadsapi ¿nejecoma inanijine? Tahide jodio quejena-jarajaridenipa:

—Icca ima Diodsa tobicana –quinapo-jararaha Jesocristodsa pajissa quinadsapa Dio pohuadenidsa: —Ticcadeni imasiri ohuadsa nohuerani –najari. Nadsapi poccadeni ima Diodsa tobicajaro. <sup>31</sup> Naraha Isaraeri potemahi jodiodenipa poccadeni ima Diodsa tobicanijine Moisesicca marinaja inapajiramananijine disseraqquri naraha pajiramana-jarahi. <sup>32</sup> ¿Nejecotohui jodiodenipa Diodsa tobicamana-jarajari? Pohuadenipa ima bicani inanamanajarodsa Diodsa tobicamanahijine tohuini quinaraha najarodsa tobicamana-jarajari. Diodsa pajissa quinahissa tajarajari. Poccadeni imapi pina sibadsa madija cobara tocanirejarissa quinajari. <sup>33</sup> Najaropi Dio Atti dsodo napojarodsa ajima najaro:

—¡Ticattomama canaji! Odsa panani Siohuajipi siba ohuattajaro. Najaro sibapi madija inehedimabaqquihitohui.

Najaro sibadsa pajissa quinajaridenipa nidsa dsotode ponicca mamaisa tabaqqui toquejena-jarahitohui

–naponi nade Dio Atti dsodo nanidsa.

## 10

<sup>1</sup> Ohuemecotedeni, occa madija Isaraeri potemahi jodiodeni tocassiejerahijine obodi tohuini onajaro. Dio inassiajabaqquihijine Pohuadsa huati huati ohonanjaro. <sup>2</sup> Ohuapi poccadeni ima nahato onajaro. Pohuadenipa Diodsa disseraqquri naraha Diocca nahatohue pajissaccadsa bodideni huatohuissa tajarahi. <sup>3</sup> Dio Pohua ojarijarina madijacca ima inanabicanijine pajirahi pohuadenipa ssamoqquri najari. Poccadeni ima Diodsa bica tanijinepi poccadeni marinajadsara disseraqquri najari. Naraha Dio madija inanabica-baqquihijinecca imadsapa iboqquri najari.

<sup>4</sup> Moisesicca marinaja huapimapi Cristo inapajiranissa tadsapi jicajaro. Nadsapa madija Jesocristodsa pajissa quinajaridenicca ima Diodsa tobicajaro.

<sup>5</sup> Aja madija poccadeni ima Diodsa tobicanijine poccadeni marinajadsa disseraqquri najaridenicca imapi Moisesi dsodo inapojaro: —Ajijaro marinajassa inanadsa madijaripa najaro marinajadsara madihitohui –nahi nade. <sup>6-7</sup> Naraha icca ima Diodsa tobicanijinepi icca jehenijina paji. Pina Moisesicca dsodonijissa najaro tibodidenidsa ajima tiquinanitide: —¿Nejecojari memehuaji toccamacossahijine pajirahi? ¿Nejecojari nami odini huaji tanihuaji jicapojarideni madimanahidsa toccaronahijine pajirahi? –tiquinaraha nema tiquinejeraji. Cristotohui memehuaji jaijamacossajerani. Jicapojaridenihuaji naqui jaijarona-jerani. <sup>8</sup> Moisesicca dsodoniji onhipi ajima najaro: —Najaro ima tiadenidsa huajira tani. Tibodidenidsa ticajimanani, huati tiquinanijine tejeridenidsa najorani –nahi nade. Najaro imapi Jesocristodsa pajissa inadsa icca ima Diodsa tobicanijine. Najaroa aji mari mari ihinanajaropaji.

<sup>9</sup> Madijadsa tecomeramanadsapi: —Jesopa ohua Medsede, occa tamine deni tojahicca –tiquinaji. Tibodidenidsa naqui: —Jeso huatiaraha Dio inahatonijaripa pajissa

–tiquinadsapi ticassiejeranitohui. <sup>10</sup> Ibodi Jesocristocca imadsa pajissa inadsapi icca ima Diodsa tobicajaro. Madijadsa ecomeradsapi: —Jesopa ohua Medsede –inadsana Dio ia tonassiajajari.

<sup>11</sup> Dio Atti dsodo napojarodsapi ima ajima najaro: —Pohuadsa pajissa quinajari-denipa nidsa dsotode pocca mamaidsa tabaqqui toquejena-jarahitohui –nani nade.

<sup>12</sup> Najaria jodiodenipa, jodio quejena-jarajarideni tedseje najarissa caniqquimera-jaripaja. Ia Medsedepa pohua ojarijari, huapima Medsededeni. Madija pohuadsa huahua quinajarideni accode jipa tajari. Pocca biquehe jiquejeranicca pohuadenidsa dade jipa tajari. <sup>13</sup> Dio Atti dsodo nanidsapi ajima najaro: —Huapima ia Medsede onidsa huahua quinadsapa tocassiejerahitohui –nani nade Dio Atti dsodo nanidsa.

<sup>14</sup> Naraha ¿nejecoma quinadsa pohuadsa huahua quinahijine? Pohuadsa pajissa quina-jaradsapa pohuadsa huahua quinahijine ssamoqquri najari. ¿Nejecoma quinadsa pohuadsa pajissa quinahijine? Pohua tahimari mittamana-jaradsapa pajissa quinahijine ssamoqquri najari. Naraha ¿nejecoma quinadsa pohua tahimari mittamanahijine? Pohuadeni maride cappiramanadsapa pohua tahimari mittamana-jarajari. <sup>15</sup> Nadsapa ¿nejecoma nadsa pohuadeni maride tojahijine? Mamaride dossede nohueradsapa maride toja-jarahi. Najaroa aji Dio Atti dsodo napojarodsapi ajima najaro: —Madija ima bicani icassiejeranijinecca maride bacco nadsapa huatidsehe tojaridsani –nani nade.

<sup>16</sup> Naraha madija huapimapa icassiejeranijinecca ima bicanidsa pajissa quina-jarahi. Pina Dio Atti cacomerabote Isahia huati tajarissa najaro: —Ohua Medsede ¿nejecojarina icca imadsa pajissa najari? –napohui nade. <sup>17</sup> Nadsama Jesocristodsa pajissa quinahijinepa tahide pohua tahimari icassiejeranijinecca mittamanadsana pajissa quinajari.

<sup>18</sup> Naraha ohuattipi: ¿Isaraeri potemahidenipa najaro ima bicani mittamana-jaraco? onaraha mittamanahi. Dio Atti dsodo napojarodsapi ajima najaro: —Najaro imapi dsama nemanehedsa mittaridsamanajari.

Dsama huapima jicaqquinhuaji naqui bacco taridsajaropaji –nahi nade Dio Atti.

<sup>19</sup> Nadsapi ohuatti onihi naqui: ¿Najaro ima Isaraeri potemahidenipa bodidenidsa mittamanahissa tajaraco? onaraha nahatoqquri nahi. Moisesicca dsodonijidsa Dio Attipa:

—Isaraeri potemahi tiadenipi nidsa ticcadeni madija quejena-jarajaridenidsa ohuati huana tani qqui tiquinadsapi tedimananitohui.

Madija ohuadsa ssamoqquri najarideni ohuacahuabaqquihi qqui tiquinadsa naqui pohuadenidsa tedimananitohui –nahi nade.

<sup>20</sup> Dio Atti cacomerabote Isahia naco cappinera tadsa Dio Atti ecomerajaro:

—Madija ohuahadeni naco Otohui quina-jararaha Ohuadsa bacco toquinajari.

Otohui quina-jararaha occa ima pohuadenidsa ahuato onanajaro –nahi nade Dio.

<sup>21</sup> Isahiapa Isaraeridenicca ima onihi Dio huati tadsa ecomerajaro:

—Occa madija odinibaqquihijine huajjiradsa pohuadenidsa huahua ohonanaraha iboqquri nahi.

Poccadeni ima nebomanahijine jiperaqquri najari –nahi nade Dio.

## 11

### *Diopa Isaraerideni icattejidsabaqquijari*

<sup>1</sup> Jari, huati onana: ¿Diopa pocca madija Isaraeridenidsa huattajo taco? Nohuerahi. Aji ohuapi Isaraeri potemahi jodio ojani. Occa idipa Abarahao. Najari jinodi Benjamin potemahicca madija ojani. <sup>2</sup> Tahidedsama Diopa Isaraeri potemahidenidsa: —Occa madija –najonajaria aja jidapana pohuadeni ettajobaqqui-jarajaripaja. Dio Atti dsodo nanidsa Pohua Atti cacomerabote Eria tahimari nahatoqquri tiquinajaro.

Maittaccadsama Isaraeridenicca ima bica tejeradsa Eria Diodsa huati tajari: <sup>3</sup> — Ohua Medsede Dio, ticca madija Isaraeridenipa Tetti cacomeraqquri najarideni inajicaridsamanahi. Aji siba hua tamaroni Tiadsa dada toqquimacca naqui itaboridsamanani. Ohua naqui ohua inanadsoqqe-mananijine tohuini quinaraha ohua motta omadiccani -nahi nade Eria Diodsa. <sup>4</sup> Naraha Diopa Eriadsa huati tajari: — Madija mota 7 mil (7,000) quinaha ocajini, ohuattajobaqqui-jarajari. Pohnuadenipa dio pohnuamacca Bahao corimedsa huatidsemana-jarahi, pohnuadeni pitodsa jassi jassi tajarahi -nahi nade Dio Eriadsa. <sup>5</sup> Jidapana naco najarideni potemahi mota pamema naha Dio nebomana-jarajari. Diopa bica taja, huati huana taja najarijine icattejidsabaqquijari. <sup>6</sup> Dio bica tajarijine icattejidsa-baqquijaripa madija pohnuadeni inanamanajarojine jerani. Nassa pohnuadeni inanamanajarojine Dio icattejidsabaqquidsapa ettipi: —Dio bica tajarijine -inejeranitohuiraha.

<sup>7</sup> Nadsama ¿Isaraeridenicca imapi nejecoma najarona paji? Pohnuadenipa Diodsa bicaqquri nahijine tohuini quinaraha najaro ima bacco toquina-jarahi. Mota pamema naha Dio icattejidsa-baqquijaridenina Pohnuadsa bicaqquri najari. Motapa paja huaribodeni tosibarihi najari. <sup>8</sup> Dio Atti dsodo nanidsapi ajima najaro: —Diojine bodideni pina huada cojo tocanirejarissa quinajari.

Noccodeni modsi inanabaqquijari, qqui toquina-jarahijine.  
Huaribodeni moda inabaqquijari, mittamana-jarahijine.

Najaro ima huarionajaropi jidapana ajjaropaji  
-nani nade Dio Atti dsodo nanidsa.

<sup>9</sup> Tamine Dabi naco najaro ima Diodsa huati tajari:  
—Poccadeni jipaqquiedsa huahuatidsemana naraha  
poccadeni jipaqquepi pina tajapadsa ppiro tocanirejarissa nana.  
Nahi tohuedimamanadsapa nanajidso toquejenahijine.

<sup>10</sup> Noccodeni todsidsi-dsanapona, qqui toquina-jarahijine.

Idedeni jocadsamanaha nama dsanapomanana, ocasserani inahanamana-dsanaponijine -nahi nade Dabi.

### *Jodio quejena-jarajari tocassiejerahijinecca ima*

<sup>11</sup> Jari, huati onapomana: ¿Jodiodeni tohuedima-manajarissa quinajaripa Dio paja ettajobaqqurihi najarico? Nohuerahi. Pohnuadeni Diodsa iboqquri nadsapa aji icassiejeranijineccapi jodio quejena-jarajaridenidsana tojajaro. Najaro acconi Diojine jodiodeni huadimanadsa: —Ia naqui Diodsa iquejenani-pomana -quinahijine.

<sup>12</sup> Jodiodeni iboqquri nadsa poccadeni ima tossamodsapi madija ohuahadenidsana Diocca biquehe, pocca acco camehe tojaridsajaropaji. Nidsa jodiodeni Diodsa toquejenanihissa tadsapa madija huapimadsa ima bicani denima tojaridsanitohui.

<sup>13</sup> Naraha jodio tiquejena-jerajaro tiadenidsa huati onajaro. Diopa ohua cadossejari ohuadsa bica tadsa tiadeni maride dissera onajaro. <sup>14</sup> Najarodsa occa madija motadeni ima bicani ticajimanani qqui toquinadsa: —Jaho, iadsa toja naccaraho

-quinadsapa bodideni cacajiqquimera-manahijine. Tossiejehe naqui cajimanahijine, onajaro. <sup>15</sup> Jodiodeni huahuattaajo toquejenajaripa Diojine madija ohuahadenira Pohnuadsa cajonerara canajari. Nidsa jodiodenicca ima Diodsa tobicapomadsapi huatidsehe imeni tojanitohui. Pina madija huatiaraha camitemanjarissa quinahi-

tohui. <sup>16</sup> Ia jodiodeni icca imapi pina pancca imassa najaro. Trigo bono tahidecca pore quinapjaricadsa pan inahatodsapa sica nahi ime mota badsira taha Diodsa

da da ihinanajari. Najari pan ime mota Diodsa tojadsapa namanaha naco Diocca tojajari. Ahua oribo jabo naco Diodsa tojadsapa inine huapima Diocca tojaridsajari.

Nadsama icca idi potapojari Abarahaopa pina pan ime motassa, pina oribo jabossa najari. Pohnuapa Diodsa tojadsapa pohua potemahideni naco Diocca toquejenajari.

<sup>17</sup> Jodiodeni motapa pina huidsajacca oribo ininessa quinajari. Cacahuadepa oribo



inine mota ca ippiridsadsa manaco dsamacca oribo ininera nepi icadsana-ridsajari. Tiadeni Abarahao potemahi tiquejena-jerajaropi pina dsamacca oribo inine nepi cadsana-ridsajarissa tiquinajaro. Nadsapi oribo jabojinena camittaqquiri tiquinajaro. <sup>18</sup> Naraha: —Iana denima bicaqquiri inajaro, jodiodenipa ajamani toquejenahi –tiquejejerana. Tibodideni huatoji. Tiadenipi oribo inine tiquejenani. Tijinedenipa oribo camitta tajarahi. Pohua jabojinena camitta tajari.

<sup>19</sup> Tibodideni ajima tiquinanitide: —Jehe, jodiodenipa pina oribo inine ca top-  
piridsajarissa quinajari. Dio ettajobaqquidsapa iana pocca madija iquejenanijine ia  
nepi todsanabaqquijari –tiquinajaro. <sup>20</sup> Nema tiquinajaropi pajissaraha tibodideni  
huatoji. Pohuadeni pajissa quina-jaradsapa huahuattajo toquejenajari. Tiadenipi  
pajissa tiquinajarohne Diocca tiquejenajaropaji. Nadsama ipaji! —Iapi deni  
iquejenani –tiquejejeraji. Dio noppinera ticappinamanaji. <sup>21</sup> Diopa oribo inine  
ca toppi-jarahijine poni najaradsapa ca toppia jicajari. Paji, tiadenidsa pina  
najaridenidsassa inanarana.

<sup>22</sup> Nadsama tibodideni huatomanaji. Diopa huati huana tajari, bica tahi.  
Naraha Pohua naco najidso tahi. Pohuadsa iboqquiri najarideni ettajobaqquijari.  
Naraha tiadenidsa huati huana tajari. Pocca tohuati huanehedsara timadimana-  
dsanapoji. Nema tiquejejeradsapi pina ahua inine ca ippiridsajarissa tiquinanitohui.  
<sup>23</sup> Naraha jodio bodideni cacajiqquimera-manadsa poccadeni ima pajissa quina-  
jarajaricca nebomanadsapa Diodsa toquejenani-pomahitohui. Dio Dacorabotepa  
ahua oribo inine ca ippiridsapojari inaccanidsa nepi icadsanani-ridsapomahijine  
pajirahi. <sup>24</sup> Tiadenipi pina dsamacca oribo inine huidsajacca oribodsa nepi cadsana-  
ridsajarissa tiquinajaro. Naraha jodiodeni Diocca madija toquejenani-pomahijinepa  
Dio Pohuadsa denima bica tajaro. Pina huidsajacca oribo inine ca ippijari inaccanidsa  
pohua ededsa nepi icadsanani-ridsapomajarissa najaro.

### *Isaraeri potemahi jodiodeni naco tocassiejerahijine*

<sup>25</sup> Ohuemecotedeni, ajijaro imapi tahide madijadsa ahuatora taporaha timitta-  
mananijine huati onana, nani tibodidenidsa: —Iapi deni iquejenani –tiqueje-  
jeranijine. Najaro imapi Isaraeri potemahi jodiodeni mota huapi taha Diodsa  
tohuibomanajari. Naraha jodio quejena-jarajarideni tohuapihissa tadsana jodiodeni  
poccadeni ibohue nebomanahitohui. <sup>26</sup> Nadsana Isaraeri potemahi jodiodeni  
huapima tocassiejerahitohui. Najaro imapi Dio Atti dsodo napojarodsa ajima najaro:  
—Nidsa odsa panani Siocca ia Idinide ccajonahitohui.

Isaraeri potemahidenicca tabaccorehe inanamossinijine

–nahi nade Dio.

<sup>27</sup> Pohua Atti onihi naqui ajima najaro:

—Nadsana pohuadeni tedseje jehe icanirejaro

onapajiranissa tadsapi poccadeni imasiri onanamossinitohui

–nahi nade Dio.

<sup>28</sup> Jodiodeni motapa pina Diocca huadidenissa quinacchahi. Nema najaroa Jesocristo  
tahimari icassiejeranijinecca tiadenidsana tojajaro, ticassiejeranijine. Naraha Diopa  
jodiodeni potapojarideni icattejidsa-baqquipojarijine pohuadeni potemahitohui huati  
huana tahi paja naccahi. <sup>29</sup> Dio pocca danijipi idini-jerani. Madija huahua  
inabaqquipojarideni naco inebobaqqui-jarahi. <sup>30</sup> Tiadenipi tahide Diodsa iboqquiri  
tiquinapojaro. Naraha jidapana jodiodeni Pohuadsa tohuibomanadsapa tiadenidsana  
huati huana tajari. <sup>31</sup> Diopa jodiodenidsa najarossa inapomanijine. Jidapana  
Pohuadsa iboqquiri najarijine pocca tohuati huanehe tiadenidsa bacco tajaro. Nidsa  
dsotode pohuadenidsa naqui pocca tohuati huanehe ahuato inapomanitohui.

<sup>32</sup> Madija huapimapa najarissa caniqquimerajari. Ibohue cajiridsamanadsapa Dio

inebobaqqujari, ibohuecca imadsa madimanahijine. Dio nama nadsapa huapimadsa pocca tohuati huanehe ahuato inananijine.

<sup>33</sup> ¡A, Diocca biquehepi jiquejerani! Pocca nahatohue naqui jiquejerani. Pohua bodicca huatohue imittanijine ipajira-jerani. Pohua inananicca naqui qqui qqui inaraha imitta-jerani. <sup>34</sup> ¿Nejecojari ia Medsede bodi nahato tahi? Nohuerahi. ¿Nejecojari Dio bodi acco icamahijine pajirahi? Nohuerahi. <sup>35</sup> ¿Nejecojari pohua cajjaricca Diodsa da inadsa: —Dio ohuadsa debe nahi -nahijine pajirahi? Nohuerahi. <sup>36</sup> Memecca, namicca huapima aniridsajaripa Dio inahatoridsajari. Pocca dacorehedsa huapima ecahuaridsajari. Huapima aniridsajaridsa Diocca deni tojehe ahuato tajaro. Nadsapi Pohuadsa: —Tiapi deni tijani, denima bica tinani. Aja Tiassa najari ohuahapa nohuerahi -ihidsanapo nana. Pajissa nema nana.

## 12

### *ICCA MADIE DIODSA ECCORAJAROLCA IMA*

<sup>1</sup> Ohuemecotedeni, Dio iadsa huati cahanari canahi ahuato tajaro. Najarojine ohuatti bica tadsa tiadenidsa huati onana, ohuattissa tinanamananijine: Tiadeni tessiredenima Diodsa teccoramanaji. Tibodideni ssiaja, huire tadsa ticcadeni madie dsati Pohuadsa teccoramanadsapi Pohuatohuira timadimanaji. Nema tiquinadsapi tiadenidsa: —Jehe, ticcadeni daniji ohuadsa bica tani -najari. Najaropi Dio Pohuadsa pajissa tetidsemanajarolca ima pajiranissa tajaro. <sup>2</sup> Jidapapi ajijaro dsama huapimacca imassa tinanamanapoma-jeraji. Ajima tiquinanina bica tani: Tibodidenicca huatohue dsati tinanamanaji. Nema tiquinadsapi ticcadeni madie cacajiqquimeranijine, Dio jipa tahicca naqui ticahatteranijine. Najaropi bica tanicca ticahattera, Dio tinahatidsemanahijine ticahattera, pajiranissa tanicca tinanamananijine ticahattera nanitohui.

<sup>3</sup> Dio ohuadsa huati huana tajaria ohua cadossedsa tiadenidsa huati onajaro. Ponima: —Deni ojani, ohuana nahato onani -tiquinejeraji. Mohuaradsa Diojine nahatoto tinajarocadsa ticcadeni ima nattome tiquinaji. Jesocristodsa pajissa tiquinajaroma tibodideni huatoma-manaji. <sup>4</sup> Ia huapimapi essire imadijaro. Essire ojariedsa huanaridsanipi huapi tajaro. Naraha huapima najarossa nejerani. Nahatohue onihini onihini nehe cajiridsamanani. <sup>5</sup> Ia Jesocristocca iquejenajaro naqui najarossa inajaro. Huapi inaraha Jesocristodsa itassaqquidsapi pina pohua assire ojarijarissa inajaro. Iapi ojari ojari inaridsaraha imecotedeni huapimapi ijariqqujaro.

<sup>6</sup> Diopa iadsa nahatohue onihini onihini nehe da inaridsajaro. Pohua jipa tahicca madija ohuahadsa, ohuahadsa da inaridsajaro. Diojine nema nadsapi Pohua Atti huati iqquimanijine madijadsa nahatohue da inadsapi najaripa Pohua Atti huati iqquimaridsana. Pohua bodidsa: —Pajissa Dio ohuadsa huati tajari -nadsapa Dio Atti huati toqquimade tojahijine bica tahi. <sup>7</sup> Diocca nahatohue onihini madija bijideni acco icamabaqquihijine. Najaro nahatohue iadsa inanadsapi acco icamabaqquihissa tana. Madija mari icanabaqquihijine Dio iadsa inanadsa naqui madija inahatabaqquihijine disseraqquri inana. <sup>8</sup> Ettidsa madija bodi inahatidsehijine Dio iadsa inanadsa naqui disseraqquri inana. Madijadsa da inanijine Dio iadsa inanadsa naqui accora inadsa da inana. Quequeriqquimana najari cacahuade Dio iadsa inanadsa naqui disseraqquri inana. Tohuati nahanaqquri najarideni acco camade Dio iadsa inanadsa naqui etidsedsa acco icamabaqquina.

### *JESOCRISTOLCA MADIA TIQUEJENAJAROLCA AJIMA TIQUINAJI*

<sup>9</sup> Pajissara madija huapimadsa tetideni huanaqquri naji. Tabaccorehedsapi jiperaqquri tiquinaji. Ima bicanitohuina disseraqquri tiquinaji. <sup>10</sup> Jesocristodsa

jehe tiquinajaropi pina tia timecote tedseje tetideni cahanerajarossa tiquinaji. Timecotedeni bica tahicca cajimanapohuijine naco tetidsemanadsa: —Ohuapi dsotode -tiquinana. Timecote ima bicani inanadsa naqui pahuadsa: —Jehe, tijine bica tani -tiquinana. Nema ticanirere canadsapi bica tani.

<sup>11</sup> Tidsepedeni ijimananijinepi iboqquiri tiquinejeraji. Tibodideni huatidseri nadsa ia Medsededsa tidsepedeni ijimanana.

<sup>12</sup> Aji titedsejemadenicca ima bicanitohui timadimanadsapi huatidsehema timadimanaji. Ocasserani temanadsa naqui mohuaradsa tinahanamanaji. Diodsa huatide naqui tinebomana-jeraji.

<sup>13</sup> Jesocristodsa pajissa quinajarideni cappiramanadsa naco tiadenina pohuadenidsa da tiquinana. Madija ticcadeni odsadsa bacco najonamanadsa naco pohuadenidsa bicaqquiri tiquinaji. Pohuadenidsa: —Nija, jai tijedsimaji. Aja, tijipamanaji. Ajidsa ticahadijanijine bica tani -tiquinana.

<sup>14</sup> Madija tiadenidsa jara jara quinadsa naco tamassomana tejeraji. Ima bicani cajimanahijine Diodsara huati huati tiquinana.

<sup>15</sup> Titessedenidsa ima bicani tojadsapi pohuadeni tedseje tetidsemanaji. Titessedenidsa ima ocassera tanicca tojadsapi pohuadeni tedseje oji tiquinaji.

<sup>16</sup> Ticajonerara canadsa timadimanaji. —Ohuana deni ojan -tiquinejeraji. Pina timecote ajamani toquejenajaridenissa tiquinaji. —Ohuana denima nahato onajaro -tiquinejeraji.

<sup>17</sup> Madija tiadenidsa ima inanamanadsa naqui manaco pohuadenidsa ima tinanamana-jeraji. Ima bicani tinanamananijinera disseraqquri tiquinaji. Nadsapa madija huapima ticcadeni madie qqui toquinadsa: —Jehe, poccadeni ima bica tani -quinahijine. <sup>18</sup> Madija huapima tedseje ticajonerara canehe timadimananijine disseraqquri tiquinaji. <sup>19</sup> Ohuemecotedeni, tiadenidsa ohuati huana tani. Madijajine tiadenidsa ima ssonaridsapi: —Manaco -tiquinejeraji. —Ohuacconepa Diona inajidsobaqquihitohui -tiquinaji. Dio Atti dsodo nanipi ajima nani: —Poccadeni najidsohue manaconipi Ohuana pohuadeni onajidsobaqquihitohui -nani nade ia Medsede. <sup>20</sup> Pohua Atti dsodo nani onhipi ajima nani: —Tiadsa huadi tajari pemidsa naco jipahijine da tinajo. Bacco dsaridsa naco dse nahijine passo da ticanaji. Nadsapa jabojojsa tocomehidsapa pano tomacchui nahitohui -nani nade Dio Atti dsodo nanidsa. <sup>21</sup> Ima tabaccora tajaro tiadeni ajimani tonana-jeranijine disseraqquri tiquinaji. Ima bicani tinanamanadsapi tabaccorehena ajimani tojanijine.

## 13

### *Ajijaro dsamacca taminedeni attidenidsa iboraqquri tiquinaji*

<sup>1</sup> Ajijaro dsamacca taminedeni huapimapa Djotine dossehe cajimanajari. Dio tamine inana-jaradsapa tamine toja-jarahi. Najarojine madija huapimapa tamine-denidsa iboraqquri nahijine bica tani. <sup>2</sup> Naraha madija taminedenicca cacahuehedsa huattajoqquri najaridenipa Diocca dossenijidsa naco huattajoqquri najari. Najarojine pohuadenidsa najidsohue ssononari najaro. <sup>3</sup> Taminedenipa madija ima bicani tonanamanajarideni inajabojeri-baqquihijine jarahi. Madija ima tonanamanajaridenina inajabojeri-baqquihijine. Tamine noppinedeni ticappinamanajeranijinepi ima bicanira tinanamanaji. Nema tinanamanadsana ticcadeni taminepa tiadenidsa: —Ticcadeni ima bica tani -nahitohui. <sup>4</sup> Ticcadeni taminepa Djotine dsepe ijijari tiadeni cacahuade. Naraha tabaccorehe tinanamanadsapi ticappinamanaji. Taminepa pohuama dosse dosse najarajari. Diocca dosseniji cajidsapa madija ima inanamanajaro manaconipi pohuadenidsa inassonari tani. <sup>5</sup> Nema nadsapi taminedeni noppine ticappinamanadsa attidenidsa iboraqquri tiquinaji, nani tiadenidsa Diocca najidsohue ssonari-jeranijine, tibodideni bica tanijine. <sup>6</sup> Nema

nadsapi ticcadeni dsama ecahuamananijine taminedeni ticcadeni dsiniro motatohui huati toquinadsapa pohuadenidsa da tiquinaji. (Najaro dsiniro mota caria attidsapi: impuestos, quinajari.) Aji dsiniro inequeriqquimanajaropi taminedenicca tarabaidsa tojanijine. Dio jipa tadsa ticcadeni dsama cacahuade dsepedeni ihijimana najari.

<sup>7</sup> Madijadsa debe ticajimanadsapi pajiranissa tanicca da tiquinaji. Taminedsa dsiniro mota impuesto debe tiquinadsa naqui da tiquinaji. Impuesto onihitohui huati toquinadsa naqui da taqquimanaji. Tamine noppine ticappinamanadsa pohua atti naqui mohuaradsa timittamanaji. Pohuajine ima bica tadsa naqui pohuadsa: —Jehe, tijine bica tani –tiquinana.

### *Tohuati huanehe pajissacca*

<sup>8</sup> Madijadsa debe tidsanapomana tejeraji. Naraha debe ojarie ticajimana-dsanaponijinepi tohuati huanehe, aji tinoridenicca huapimadsa tetideni cahanerara canaridsanijine. Nema tinanamanadsapi Diocca dosseniji nemaneha tinapajiramananissa tajaro. <sup>9</sup> Diocca dosseniji Moisesidsa da inajaro motapi ajima najaro: —Madija ohuahacca amoneje tija tejeraji. Amoneje naqui maqquideje amoneje cajijari tinaja tajarajo. Madija naco tinanadsogque tajarajo. Tiboti tejeraji. Madija cajijaricca tohuini tejeraji –najaro. Diocca dosseniji mota denima huapi taraha huapima tassaqquidsa ojarie tojadsapi ajima najaro: —Tinorideniccadsa tetideni huanacquiri naji, pina tiadenidsa tetideni huanacquiri najarossa naji –nahi nade. <sup>10</sup> Tinorideniccadsa tetideni huanacquiri nadsapi pohuadenidsa ima tinanamana-jeranitohui. Tetideni cahanerara canehe timadimanadsapi Diocca dosseniji nemaneha tinapajiramananissa tajaro.

<sup>11</sup> Nema tiquinaji onajaropi icassiejeranijinecca huada huajirajonani. Tahide Jesocristodsa pajissa inapodsapi: —Ia tohuacmacossani-baqquihijinecca huada huaji taccani –inaporaha jidapapi huajira tani. Tibodideni huatomanaji. Ticahadijajarossa naporaha jidapapi nocco tiquejenaji. <sup>12</sup> Dsidsini jicajonani. Ssajajonani. Dsidsinicca imapi inebona. Pina eterobote ssiti coro inajarossa inana. Nadsapi ssajjanira edsana. Pina etero dsati edsajarossa inana. <sup>13</sup> Jidapapi mohuaradsa imadina, pina madija ssajjanidsa madimanajarissa inana. Comani eridsa-jerana. Mohua mohua inaridsa-jerana. Huananehe inana-jerana. Imecca tohuini inajarodsa imadi-jerana. Huadiedsa naqui ahuaji atti ahuaji atti inejerana. Madija cajijari acconi naqui edijerana. <sup>14</sup> Ajima tiquinanina bica tani: Ia Medsede Jesocristocca dacorehera tedsamanaji. Aji tibodidenidsa tohuini tiquinanica tabaccorehe naqui tinanamana-jeranijine ponide dacoco tijiraji.

## 14

### *Timecotecca imapi —Bica tejerani –taridsamana tejeraji*

<sup>1</sup> Madija Jesocristodsa jehe naraha pocca jeheniji japari tajaro tiadenidsa bacco nadsapa: —Iadsa tiqquedsimani bica tani –tiquinaji. Naraha pohua tedseje ahuaji huati ahuaji huati tiquinejeraji. <sup>2</sup> Aja imecotedeni motapa: —Bani huapima, dsamatapa huapima ijipani bica tani –quinaraha imecote ohuahadenicca jeheniji japari tadsapi: —Bani ijipani oppina tahi –quinajari. Nadsapa dsamatapara jijipamana najari. <sup>3</sup> Nadsama bani, dsamatapa huapima jipamanajaridenipa aja bani jipamana-jarajaridenidsa: —Ssamogquiri tiquinani –quina-jarana. Bani jipamana-jarajarideni naco pohuadeni imecotedenidsa: —Bani tijipamanadsapi ticcadeni ima bica tejerani –quina-jarana. Tetideni ajimamana tejeraji: Diopa timecotedeni huapimadsa: —Occa madija –najari. <sup>4</sup> Nadsama madija ohuahacca medsedsa: —Tijine bica tejerani –¿tiquinanijinequi? Najaropi ticcadeni ima jerani. Pohuajine ima bica tadsa, bica tejeradsa pohua medsedena pohuadsa huati tahijine. Najaro imassa

najaro timecotedenicca ima nattome tiquinani bica tejerani. Ia Medsede pohuana madijacca ima inanabicanijine pajirahi.

<sup>5</sup> Madija mota naco: —Iapi ajijaro huadadsara Diodsa etidsenijine bica tani –quinaraha mota attidenipa: —Huada huapima najarossa caniqquimerajaro. Hua-jijiradsa Diodsa etetidse najaro –quinajari. Madija pohua pohua bodidsa ima bica tanicca icattejidsadsapi najarossa inanani bica tani. <sup>6</sup> Imecotedeni motapa: —Ajijaro huadapi Diodsa etidsenijine icattejidsajaro –quinajari, Diodsa bica inanamananijine. Imecotedeni motapa bani, jijipa huapima jipamanajari. Diodsa bica inanamananijine nama quinadsapa Diodsa: —Ticca daniji bica tani –quiquinanajari. Imecotedeni motapa Diodsa bica inanamananijinepi dsamatapara jipamanadsa Diodsa: —Ticca daniji bica tani –quiquinanajari.

<sup>7</sup> Iapi ia tohuini inanicca tohuira imadi-gerani. Idsoqquenijine naqui ia tohuini inanicca gerani. <sup>8</sup> Imadiccadsapi ia Medsede inahatidsehijine imadijaro. Idsoqquedsa naqui pohuadsa imadinijine. Nema najaroa aji imadidsa, idsoqquedsa ia Medsedecca iquejenajaropaji. <sup>9</sup> Najarotohui Cristopa dsoqquejari. Nahatonidsapa madipomajari. Pohuapa jicajarideni, camittaqquiri najarideni Medsededeni tojajari.

<sup>10</sup> ¿Nejecotohui timecotedsa: —Ticca ima tabaccora tani –tiquinajaro? ¿Nejecotohui pohua ajamani tinanamanajari? Iapi huapima Dio tedsejema idomo huanitohui. Nanidsa icca ima huapima Pohuana icattemanitohui. <sup>11</sup> Dio Atti dsodo nanipi ajima najaro:

—Ohuapi pajissa omadini. Ohuatti naqui pajissa –nahi nade ia Medsede.

—Madija huapima otedsejema pohuadeni pitodsa jassi tahitohui.

Huapima attidenipa: “Tiana deni tijani, bica tinani” quinahitohui –nahi nade.

<sup>12</sup> Nidsa nanihuajipi ia huapima icca madiacca ima ia mottacca Diodsa ecomeranitohui.

### *Timecotecca ima tinassamomana tejerana*

<sup>13</sup> Nadsapi timecotedeni tedseje: —Ticca ima bica tejerani –ticanirere cana-gerana. Ajima tiquinanina bica tani: —Ohuemecote imasiridsa onehedima-jarahijine ohua ohuacahuana –tiquinaji. Timecotecca jeheniji tinassamo-geranijine tia tiara ticca madie tecahuaji, onajaro. <sup>14</sup> Ohuapi ia Medsede Jesocristocca ojajarojine obodidsa nahato onajaro: Dsamatapa, bani oppina tahicca nohuerahi. Naraha madija bodi: —Ajajari bani ojipanipi Diodsa oppina tahi –nadsa jipadsapa Diodsa bica tejerani. Pohuadsa pina imasirissa najaro. <sup>15</sup> Nadsapa timecotedsa oppina tahicca pohua qqui tadsa tijipadsapi jabojo tinanahitohui. Pohuadsa oppina tahicca tijipajaropi pohuadsa jipera tinajarossa najaro. Cristopa timecotetohui naco dsoqquejari. Paji tijipajarocca imadsa pocca jeheniji tinassamorana. <sup>16</sup> Cristojine tiadsa oppinera taraha madija ohuaha attidenipa: —Tijine bica tejerani –quinarana. Nama quina-jarahijine tia tecahuaji. <sup>17</sup> Diocca cacahuehepi ijipanicca, dse inanicca gerani. Pocca cacahuehepi Pohua Corime ia acco camadsa imasiri jirehe imadinissa tajaro, jonehedsa imadijaro, etidseri naridsajarona paji. <sup>18</sup> Jesocristocca medse iquejenadsapi najarossa inanadsa imadinijine. Nadsana Dio iadsa huatidsehitohui. Madija naco: —Bicaqquiri tiquinani –quinahitohui.

<sup>19</sup> Imecotedeni huapima icajonerara cananijine, icca jeheniji denima todacorani nanijine naqui disseraquiri inana. <sup>20</sup> Djotine timecote madihissa tajaricca ima tijipajarodsa tinassamo tejeraji. Iadsa jijipa oppina tahicca nohuerahi. Huapima bica tahi. Naraha ia ijipajarodsa imecotecca jeheniji tossamojarona Diodsa bica tejerani. <sup>21</sup> Icca ima bica tanijinepi imecote inehedima-jaradsana bica tani. Pohuadsa bani jipahijine oppina tadsapa najari bani ijipa-gerana. Dsedse inocco jano tanicca naqui dse inejerana. Imecote inehedimahijinecca ima onihi anidsa naqui najaro inana-gerana. <sup>22</sup> Tibodidsa: —Pajissa oppinera tahi –tadsapi najaro tibodidsara



nahato tinaji. Diopa tibodi nahato tahi. Madija pocca imajine pohua bodi ocassera tajaradsapa huatidsehema madijari. Pocca ima bica tani nahato tajari. <sup>23</sup> Naraha madijapa: —Ajajari ojipadsa ¿bica taqui? ¿Bica tejeraqui? Ssamo onani -nadsa jipadsapa Diodsa bica tejerani. Pocca jeheniji pajiranissa tejeradsa Diojine oppinera tahi ssamo tajari. Ssamo taraha nama naha jipadsapa pocca ima bica tejerani. Madija pohua bodidsa: —Ajima onanadsapi Diodsa tabaccora tani -naraha nama naha najaro ima inanadsapi imasiri cajijari.

## 15

### *Tinoridenicca tinahatidse-baqquimanahijine bica tani*

<sup>1</sup> Imecotedeni motapa Dio jipa tahicca ssamoqquiri najarijine poccadeni jeheniji japari tajaro. Naraha ia icca jeheniji dacoradsa pina acco icamabaquina. Poccadeni ssamohue mohuaradsa inahanana. Ia ia inahatidsenira ojari-jerana. <sup>2</sup> Ia huapima inoridenicca inahatidsebaqquihina bica tajaro. Poccadeni ima tobicanijine, poccadeni jeheniji naqui denima todacoranjine disseraqquri inana. <sup>3</sup> Cristopa pohua pohua nahatidsehijine bodi huato-jarajari. Nama najaripa Dio Atti dsodo napojarocca pohnadsa tojajaro. Najaropi ajima najaro: —Abi, Tiadsa tatamasso quinajaridenicca tamassohue ohuadsa naqui ssonarini -najari. <sup>4</sup> Maittaccadsama Dio Atti dsodo quinapojaropi icahatteranjine dsodo quinajaro. Najaro iadsa huarionajaro hua inadsapi ia acco camajaro, Diodsa disseraqquri inanijine. Imittadsa naqui etidsejaro. Nema nadsapi itedsejemacca ima bicani icajinitohui nahatoqquri inajaro. <sup>5</sup> Dio Pohnadsa disseraqquri inanijine, etidsenijine Pohnana iadsa inanajaro. Pohnapa tiadeni acco tocamabaquidsa timecotedeni tedseje ticajonerara canehe timadimananjine. Pina Jesocristocca madiessa tinanamananjine. <sup>6</sup> Nema tiquinadsapi tiadeni huapima tijariqquimanadsa tettideni ojariqquids a Medsede Jesocristocca Abi Diodsa jiri jiri titiquina nana.

### *Ima bicanipi jodio quejena-jarajaridenidsa bacco taridsajaro*

<sup>7</sup> Nadsama Jesocristodsa jehe quinajaridenidsa: —Itesse tiquejenani bica tani -ticanirere canaridsana, pina Cristo tiadenidsa: —Ohuadsa tiquejenaji -najarissa tinanamanaji. Nema tinanamanadsapi Diocca deni tojehe ahuato tinanamananitohui. <sup>8</sup> Tiadenidsa huati onajaro. Cristo jiodideni acco icamabaqquihijine ccajonajaripa Dio icca ididenidsa huati tapojaricca ima inapajiranissa taniijine ccajonajari. Pajissara huati huati najonajaria Cristojine ahuato tajaropaji. <sup>9</sup> Cristopa jodio quejena-jarajaridenitohui naco ccajonajari, Diocca tohuati huanehe qqui toquinadsa Pohnadsa huatidsemanahijine. Najaro imapi Dio Atti dsodo napojarodsa ajima najaro: —Jodio quejena-jarajarideni madimanahihuaji “Diopa bica tahi” onaridsanitohui. Tia oni deni tojajaro mittamanahijine naqui jiri jiri onaridsanitohui -napohui nade. <sup>10</sup> Dio Atti dsodo napojaro onihi naqui: —Jodio tiquejena-jarajarodeni Diocca madija tedseje Diodsa tetidseridsamanaji -napohui nade. <sup>11</sup> Dio Atti dsodo napojaro onihipi: —Jodio tiquejena-jarajarodeni ia Medsededsa tetidsemanadsa: “Bica tinani, deni tijani” titiquina nana. Dsama huapimacca madijadeni Pohnadsa huatidsemanadsa: “Bica tinani, deni tijani” quinana -napohui nade. <sup>12</sup> Dio Atti onihi Isahiajine dsodo najaro naqui: —Nidsaranibote Dsesse-Isahi potemahi tamine deni tojahicca tojahitohui. Jodio quejena-jarajarideni eahuabaqquihitohui. “Pohnajine itedsejemacca ima bicani tojanitohui” quinahijine -napohui nade Isahia.

<sup>13</sup> Itedsejemacca ima bicani jinede Diopa Pohuadsa pajissa tiquinajarodenidsa pocca huatidsehe, pocca jonehe inanaridsana. Titedsejemadenicca ima bicanitohui Pohua Corimecca dacorehema timadimanana, onajaro.

<sup>14</sup> Ohuemecotedeni, ticcadeni ima nahato onajaropi madija huapimadsa bicaqquiri tiquinani. Djojine nahatoqquiri tiquinajaro. Nema nadsapi timecote bodideni acco ticamabaqqui-manahijine tipajiramanani. <sup>15</sup> Naraha ajijaro ima teppedsa tibodideni acco ocamabaqquinijine ima onihi onihi dacoranicca tiadenidsa dsodo onajaro. Nahatoto tinaraha tetideni ajimamana-jeranijine. Nema onajaropi Dio ohuadsa huati huana tadsa ohua cadossejari. <sup>16</sup> Jodio quejena-jarajaridenidsa ima bicani tojanijine Jesocristodsa odsepe ijijaro. Pina poccadeni Diodsa dada toqquimadessa onadsa Diocca ima bicani icassiejeranijinecca mari ocanabaqquijari. Nema onadsapi pohuadenipa pina occa daniji Diodsa da onajarossa quinajari. Najaro danijipi Pohuadsa bica tajaro. Pohua Corime pohuadeni inahirebaqquidsapa Pohuadsa toquejenahissa tajari.

<sup>17</sup> Jesocristo ohua acco camadsapa Dio ohua cadossejaridsa odsepe ijinissa tajarojine ohuatidsejaro. <sup>18</sup> Ohuatidsedsapi ajijaro imara huati huati onaridsanitohui: Cristo ohua tonadacoradsapa jodio quejena-jarajarideni Diodsa iboraqquiri onanabaqquijari. Ohuatti mittamanadsa, occa madie naqui qqui toquinajarijine Jesocristodsa pajissa quinajari. <sup>19</sup> Dio Corimecca dacorehejine ocanahatoriri canani qqui toquinadsa naco pajissa quinajari. Nema onaridsadsapi Jesocristo tahimari icassiejeranijinecca odsa panani Jerosaredsama mari mari onaridsajaroa dsama Ilirihuaji bacco onahuajanijaropajide. <sup>20</sup> Ohuapi Jesocristo tahimari icassiejeranijinecca mittamanapo-jarajarideni mittamanahijine tohuini onadsa pohuadeni maride dissera onajarode. Nema onajaropi madija ohuahajine odsa canapirijarodsa odsepe ijinijine jerani. <sup>21</sup> Ojinepi pina Isahiajine Dio Atti dsodo napojarossa najaro:

—Pohua tahimari mittamanapo-jarajaridenipa noccodeni ssire-re nahitohui.

Pohua tahimari pohuadenidsa bacco tapo-jeraraha mittamanahitohui –napohui nade Dio Atti.

*Pabloa: —Romahuaji occana –najari*

<sup>22</sup> Madija Jesocristo tahimari mittamanapo-jarajaridenidsa odsepe ijijarojine tiadeni qquide occanijine tossamo-dsanapjarode. <sup>23</sup> Huajano huapi taha tiadeni qquide occana occana ohonanade. Naraha jidapapi ahuaicca dsama huapimadsa Jesocristo tahimari ohuacomera-ridsehe jicani. <sup>24</sup> Nadsapi dsama Españahuaji occadsa tiadenidsa ohuibocossaccanijine opajiradsapi nema onanitohui. Nanihuaji tiadeni qqui onabaqquidsa ohuatidsedsapi Españahuaji occanijine ohua acco ticamanana, onajaro, occa benehi pajiranissa tanijine. <sup>25</sup> Naraha tahidepi odsa panani Jerosarehuaji occaccanijine. Nanihuaji imecotedenidsa acco camehe dsojo onanijine. <sup>26</sup> Aja dsama Masedoniahuajicca, Acaiahuajicca imecotedenipa Jerosarecca imecotedeni cappiramanaha madimanajaridenidsa dsiniro dosse quinajaro. Pohuadenipa cappiramanajarideni acco camade jipaqquiri nadsa dsiniro da inaquimanajaro. <sup>27</sup> Pohuadeni tohuini quinadsapa huatidsemanadsa nama quinajari. Aja jodiodeni motajine jodio quejena-jarajarideni Jesocristo tahimaridsa toquejenajari. Najaro ima bicani pohuadenidsa tojajaro manaconipi pina jodiodenidsa debe cajimanajarissa quinajari. Najarojine jodio quejena-jarajarideni poccadeni dsiniro mota jodiodenidsa da quinajaro bica tani. <sup>28</sup> Najaro poccadeni da naqquinaja Jerosarehuaji dsojo onadsa bacco onadsapi nahicca Jesocristodsa toquejenajaridenidsa da onanissa tanijine. Nadsapi Españahuaji occanijine ojoppemanitohui. Nadsa occadsana tiadeni qqui onabaqquinitohui. <sup>29</sup> Nani ticcadeni odsa panani Romadsa bacco onadsapi Cristocca ima bicani ssema tiadenidsa bacco onanitohui.

<sup>30</sup> Ohuemecotedeni, ia Medsede Jesocristo onima tiadenidsa huati onana. Dio Corimecca tohuati huanehe iadsa inanajarodsa ohua acco ticamamanaji. Otohui Diodsa huati huati tiquinaji. Ticcadeni huatinaja occa huatinaja tadsajani pina ijariqquijarossa nadsa Diodsa huatide disseraqquri inana. <sup>31</sup> Dsama arobeni Jodeacca jehe quina-jarajaridenicca najidsohuedsa Dio ohua dsori tonanahijine Pohnadsa huati huati tiquinaji. Aja Masedoniadeni, Acaiadenicca acco camehe Jerosarecca imecotedenidsa da onadsapi huatidsemanadsa: —Jehe bica tani —quinahijine naqui huati huati tiquinaji. <sup>32</sup> Nema tiquinaji onajaropi Dio jipa tadsa occa ima toccanissa tanijine. Nadsapi ohuatidsedsa tiadenihuaji bacco onanijine. Tiadeni qqui onabaqquidsa obodi jassi nanijine naqui Diodsa huati huati tiquinaji. <sup>33</sup> Jonehe jinede Diopa tiadeni acco tocamabaqquina, onajaro. Pajissa nema nana.

## 16

### *Pablopa pohua tesse Romahuaji madimanajaridenidsa nija najari*

<sup>1</sup> Imecote Pebe tiadenidsa bacco tanitohui. Ponipi Secreahuajicca Jesocristodsa quequeriqquimana najarideni cacahuade. <sup>2</sup> Ia Medsede onima ponidsa nija tarid-samanaji. Poni ticatidsemanaji, pina Jesocristodsa iquejenajaro icatidserara cacana najarossa tiquinaji. Poni bijini acco ticamamanaji. Ponipi madija acco icamabaqquihi huapi tahi. Ohua naqui ohua acco camade.

<sup>3</sup> Prisiradsa, ponicca maqqui Aquiradsa naqui nija onajaro. Pohnadenipa ohua tedseje Jesocristo tahimari maride idsepe ijjarode. <sup>4</sup> Ohuadsa ima oppina tehe ssonaribote naraha ohua dsori inanamananijine pohnadenina pohnadeni ccaccoramanadsa topamajonabote najaride. Nadsapi pohnadenidsa: —Epejeni, ohuadsa tijinedeni bica tani —onajaro. Aja jodio quejena-jarajari Jesocristodsa quequeriqquid-samana najarideni huapima naco Prisiradsa, Aquiradsa huatidsemanadsa: —Tijinedeni ima bica tani —quinajari.

<sup>5</sup> Prisira, Aquiradenicca odsadsa quequeriqquimana najaridenidsa naqui nija onajaro. Otesse bicabote Epenetodsa naqui nija onajaro. Pohnapa dsama Asiahuajicca madija Jesocristodsa toquejenadsapa pohnana pajissa napojari.

<sup>6</sup> Mariadsa naqui nija onajaro. Ponipi tiadeni accode dsapani ijinissa tajaro.

<sup>7</sup> Adonicodsa, Joniadsa naqui nija onajaro. Pohnadenipa occa madija jodi-odeni. Ohuadsama toponi cocorodsa bedsajaride. Pohnadenipa Jesocristocca dodosse tabaqqui bicaca tajari. Jesocristodsa ojajeraccadsama pohnadenipa tahide Jesocristodsa toquejenapojaride.

<sup>8</sup> Otesse Apiriatodsa naqui nija onajaro. Ia Medsededsa iquejenadsapi pohnadsa ohuati huana tajaro.

<sup>9</sup> Urbanodsa naqui nija onajaro. Pohnapa itesse Jesocristo tahimari dsepe ijiridsajari. Estaquidsa naqui nija onajaro. Pohnadsa ohuati huana tajaro.

<sup>10</sup> Aperedsa naqui nija onajaro. Pohnadsapi ima ocassera taraha Jesocristodsa dissera tajaricca ima ahuato tajaro. Aristoborocca odsacca madjadsa naqui nija onajaro.

<sup>11</sup> Occa madija Herodiodsa nija onajaro. Narosisocca madija Jesocristodsa pajissa quinajaridenidsa nija onajaro.

<sup>12</sup> Trifenadsa, Trifosadsa nija onajaro. Pohnideni pamehepi ia Medsededsa dsapanideni ijimanajaro. Persidadsa naqui nija onajaro. Pohnidsa ohuati huana tani. Poni naqui ia Medsededsa dsapani ijijaro.

<sup>13</sup> Rofodsa naqui nija onajaro. Pohnapa Jesocristocca medse bica tajari. Pocca amidsa naqui nija onajaro. Ponipi pina occa amissa najaro.

<sup>14</sup> Asicrito, Frecote, Hermese, Patroba, Herma quinajaridenidsa nija onajaro. Imecotedeni pohnadenidsa quequeriqquimana najaridenidsa naqui nija onajaro.

<sup>15</sup> Pirorocodsa, Joriadsa nija onajaro. Nereo, pohua caripene, Oripa quinajari-denidsa naqui nija onajaro. Imecotedeni pohuadenidsa quequeriqquimana najari huapimadsa nija onajaro.

<sup>16</sup> Tiadeni naqui titesse jehe quinajarideni tedseje bacco ticaniredsapi nija tiquinadsa dama, ticahuajacossa titiquina naji, onajaro. Jesocristodsa toquejenajari quequeriqqui-ridsamana najarideni huapima tiadenidsa nija quinahi.

*Paji, marinaja onihi tiadeni tonehedima-baqquirana*

<sup>17</sup> Ohuemecotedeni, ticattomama canaji. Tiadenidsa huati onana: Timecotedeni motajine ticcadeni queriqquinajacca ima caroberidsarana. Poccadeni marinajapi pina ticahatterapojarocca marinajassa nejerani. Paji, poccadeni marinajadsa tiadeni tonehedima-baqquimanarana. Nadsapi pohuadenidsa tiajimanani naji, onajaro.

<sup>18</sup> Pohuadenipa ia Medsede Jesocristocca medse quejena-jarahi. Pohuadeni tohuini quinahiccadsara disseraqquri najari. Attideni naco bica tadsa huati huati quinaraha maidsamanajari. Nama quinadsapa madija ima nattomede ssamoqquri najarideni icamaidsabaqquimana tahi. <sup>19</sup> Naraha tiadenipi ia Medsededsa iboraqquri tiquinani titahimarideni madija mittaridsamanajari. Najarohne ohuatidsejaro. Nadsapi ima bicani tonanade nahatoqquri tiquinani ahuato tinanamanaji. Naraha ima tabaccora tajaro tonanadepi ssamoqquri tiquinana, onajaro. <sup>20</sup> Jonehe jinede Diopa pocca huadi Satana ajamani inanahijinecca huada bacco tabote nani. Pohuajine pina temoridenidsa ttai tinanaqquimanajarissa nahitohui. Ia Medsede Jesocristopa tiadenidsa ima bicani inanana, onajaro.

*Pablo pohua tessedeni naco romanodenidsa nija quinajari*

<sup>21</sup> Timoteo naco tiadenidsa nija nahi. Pohua tedsejepi Jesocristo tahimari idsepe ijijaro. Occa madija Rosio, Jasona, Sosipateo pohuadeni naco tiadenidsa nija quinahi.

<sup>22</sup> Ohuapi Tersio. Ohua naqui Jesocristocca madija tiadenidsa nija onajaro. Ajijaro ima teppepi Pablo huati huati tadsa dsodo onajaro.

<sup>23</sup> Caio naco tiadenidsa nija najari. Pocca odsadsana omadijaro. Pocca odsa Jesocristocca madijadsa accora tajari. Erasto naco tiadenidsa nija najari. Pohuapa ajijaro odsa pananicca dsinero cacahuade. Imecote Coarto naco tiadenidsa nija najari.

[ <sup>24</sup> Ia Medsede Jesocristopa tiadeni huapimadsa ima bicani inanana, onajaro. Pajissa nema nana. ]

*—Diodsa etidsena –najari Pablo pocca ima jicanicca*

<sup>25</sup> Diodsa etidsena. Pocca ima bicani icassiejeranijinecca mari mari ohonanajaropi tiadeni tonadacora-baqqujaro. Najaropi Jesocristo tahimari timittamanajaropaji. Maittaccadsama dsama nahatopo-jeraccadsama Djohne najoraporaha ahuatora tapojaro. <sup>26</sup> Naraha jidapanana tohuatojaro. Pina Dio Atti cacomeraqquri najarideni dsodo quinapjarossa, pina Dio madidsanapjaricca dossenijissa najaro Jesocristo tahimari dsama huapimacca madijadsa tojaridsajaro. Najarodsa pajissa quinadsapa pohuadsa iboraqquri nahijine.

<sup>27</sup> Diopa ojarijari. Pohuana nahato tajari. Pohuajine Jesocristo tahimari iadsa tojadsapi Dio Pohuadsa etidsedsa: —¡Bica tinani, deni tijani! –ihidsanapo nana. Pajissa nema nana. Epejeni.

## **Pablotenipa Corintodenidsa ima teppe tahidecca dosse quinajaro 1 Corintios**

Corintopi dsama Acaiacca odsa panani imeni. Passo imeni huajira tanidsa odsa panani tojajaro. Nadsapa dsama onihi, onihicca madija nahihuaji qquide jajahi toja najari. Nanidsa naqui canoa imeni huapi tani huana huana totoquina najaro. Todsepetaji huemani naqui eheccajonamana najaro. Corintocca madijapa dsepedeni sseqquiri najari. Madija huapi taha naco huananehe tohuira disseraqquri najari. Dio pajissacca ssamoqquri nahi. Pohuadeni cacahuade pohuamaccadsa disseraqquri najari.

Pablopa nahihuaji toccadsa Jesocristo tahimari icassiejeranijinecca mari ican-abaqquipojari. Huajano pamaha nahidsa madijari. Nadsapa Corintocca madija motapa Jesodsa jehe quinajari. Poccadeni quequeriqqui cajimanajari.

Dsotodepa Pablo dsama onihihuaji toccajari. Nahihuaji madidsa ajijaro ima teppe Corintodenidsa dosse inanijaro. Tahidepa Corintocca madija Jesodsa toquejenajari-deni poccadeni ima teppe Pablodsa dsodo quinapojaro. Nadsapa poccadeni dsodoniji ecomeranjine Pablo pohuadenidsa dsodo inajaro. Poccadeni ima bica tejerani quinahi mittadsa naco poccadeni ima icattemanijine dsodo inajaro.

### *Pablo, Sostene tedseje nija quinajari*

<sup>1</sup> Ohuemecotedeni, ohuapi Pablo tiadenidsa dsodo onajaro. Dio jipa tadsa Jesocristocca dodosse ojanijine ohuadsa huahua najaride. Ohuemecote Sostene tedseje tiadenidsa nija inajaro. <sup>2</sup> Odsa panani Corintohuajicca Diodsa tiquejenajaro titiqueriqqui nanihuaji tiadenidsa ajijaro ima dosse inajaro. Huapima Jesocristodsa pajissa tiquinadsapi pohuajine tibodideni tohuireridsajaro. Najarojine Diocca tiquejenajaropaji. Dio tiadenidsa huahua najaripa: —Ohuadsara tibodideni huatoni ojari naji –najari. Dsama huapimadsa madiridsamanajari Jesocristodsa pajissa quinajaridenidsa naco: —Ohuadsara tibodideni huatoni ojari naji –nanaja najari. Jesocristopa pohuadeni Medsede. Najari ojarihi ia Medsede. <sup>3</sup> Abi Dio, Pohua Bedi ia Medsede Jesocristo tedseje tiadenidsa ima bicani inanamanana. Poccadeni jonehe naqui tiadenidsa tojana, inajaro.

### *Ima bicanipi Cristojine*

<sup>4</sup> Ohuemecotedeni, titohuideni Diodsa huati huati onadsapi: —Jehe Abi Dio, epejeni. Tijine bica tani –ohonanajaro. Jesocristocca tiquejenadsapi Dio tiadenidsa ima bicani inanajaropaji. Najarojine Diodsa ohuatidsejaro. <sup>5</sup> Jesocristocca tiquejenadsapi Dio pocca biquehe huapima tiadenidsa inanajaroa Pohuajine pocca ima cacomerade nahatoqquri tiquinajaro. Pohuajine naqui Pohua Atti nahatoqquri tiquinajaropaji. <sup>6</sup> Aji tiadenidsa Jesocristocca ima ohuacomerapojaropi jidapana ticcadeni madiedsa ahuato tajaropaji. <sup>7</sup> Najaroa ia Medsede Jesocristo ccanipomahitohui timadimanac-cadsapi Diocca daniji dsori tineje cama-jejanitohui. <sup>8</sup> Ticcadeni jeheniji daco torani dsanaponijine Dio tiadeni tohuacahuabaqqi-dsanapodsapa ajicca dsama jicanicca huada bacco tiquinanjine. Nani ia Medsede Jesocristo ccanipomadsapa ima ticappiramananjine. <sup>9</sup> Diopa pocca huatinaja inapajiranissa dsanapojaro. Pohua Bedi ia Medsede Jesocristodsa tiquejenanjine titohuideni huahua najari.

### *Pohuadenira pohuadenira naridsamana-jarahijine*



<sup>10</sup> Ohuemecotedeni, ia Medsede Jesocristo onima tiadenidsa huati onana: Timecotedeni tedseje jehe ticanirere canaji. Tiadenira tiadenira taridsamana-jeraji, onajaro. Ticcadeni ima bica tanijinepi pina ticajonerara canadsa Jesocristodsara tibodideni ojaricquimananissa tadsa timadimanaji. <sup>11</sup> Ohuemecotedeni, ticcadeni ima Cloecca madija ohuadsa huati toquinahi omittajaropi: —Ticcadeni ima bica tejerani. Jehe ticanirenissa tejerani –quinahi omittadsa tiadenidsa huati onajaro. <sup>12</sup> Titessedeni mota attidenipa: —Iapi Pablocca iquejenani –quinaraha motapa: —Iapi Apolocca –quinajari. Ohuahadenipa: —Iapi Pedrocca –quinaraha ohuahadeni naco: —Iapi Cristocca –quinahi omittajaro. <sup>13</sup> Nema tiquinadsapi pina Cristo ticanarobe-manajarissa tinanamanajari. ¿Ohua Pablona ticcadeni imasiri manaconi ohua coba idsanamanajaro ttarane? Totopa naqui ¿ohua oni Pablodsa tiadeni topa todsanabaqqui-manajari ttarana? <sup>14-15</sup> Ohuapi tiadeni topa odsanabaqquijerajarojine Diodsa: —Jehe, tijine bica tani –onajaro. Tiadeni topa odsanabaqquid-sapi nassa madijapa: —Pablo pohua onima ia topa todsanabaqquijaride –quinahitohuiraha nohuerani. Naraha ticcadeni madija pamaha Crispo, Caio najaridenina topa odsanabaqquijaride. <sup>16</sup> Estepana naco pocca madijama topa odsanabaqquijaride. Madija ohuahadenipa nohuerahitide, ohuati ajimani. <sup>17</sup> Cristopa madija topade ohua cadosse-jarajari. Madija tocassiejerahijinecca ima ohuacomera-ridsanijinena ohua cadossejaride. Naraha najaro ima ohuacomera-ridsadsapi ajijaro namicca madijacca nahatohuedsa huati huati onejerade. Nassa ohuattina deni tojadsapi Jeso ahua porimacossanidsa dsoqquejaricca imapi ajimani tojanitohuiraha.

*Cristopa Diocca dacorehe caji, nahatohue caji najari*

<sup>18</sup> Najidsohuedsa toquejenahijinecca madijapa ahua porimacossanidsa Cristo dsoqquejari tahimari mittamanaraha: —Ponimaha –quiquinanajari. Naraha ia Diocca tossiejehedsa iquejenajaropi najaro imadsa: —Diocca dacorehea –inajaro. <sup>19</sup> Dio Atti dsodo napojaropi ajima najaro:

—Nidsa nahatoqquri najaridenicca nahatohuepi Ohuana onajicanitohui.

Pohuadeni bodicca tohuattehe naqui ojine tossamonitohui –nahi nade Dio.

<sup>20</sup> Nahatoqquri najarideni, mamaridedeni, madija ohuahadeni ajijaro dsamacca ima huatide nahatoqquri najarideni caji taraha ¿poccadeni nahatohuepi deni tojaniccaqui? Nohuerani. Ajijaro dsamacca nahatohuepi Djotine ponima tojajaro. <sup>21</sup> Dio Pohua bodi nahato tadsapa atti ajama najari: —“Iapi iara nahatohue icajini” quiquinanajaridenipa Ohuadsa bacco toquina-jarahitohui –najari. Pohuapa pocca ima bicani mari mari inajarodsa jehe quinajaridenina inassiajabaqquihijine jipa tajari. Najaro ima madija motadenidsapi pina ponimassa najaro.

<sup>22</sup> Aja jodiodenipa canahatori canehe ahuato tani qqui toquinahijine tohuini quinarari. Dsama Cresiacca madijadenipa tohuattehe huapi tani tocahatterahijine tohuini quinajari. <sup>23</sup> Naraha iapi ahua porimacossanidsa Cristo dsoqquejari tahimarira mari mari ihinaridsa najaro. Jodiodenipa najaro ima mittamanahijine jiperaqquri najari. Jodio quejena-jarajarideni naco najaro ima pohuadenidsa pina ponimassa najaro. <sup>24</sup> Naraha Dio ia huahua tabaqquijaripa aji jodio iquejenajaro, jodio quejena-jarajari, ia huapimadsa pocca ima ahuato tajaro. Cristopa Diocca dacorehe caji, pocca nahatohue caji najari. <sup>25</sup> Diocca nahatohuepi pohuadenidsa pina ponimassa naraha Diocca nahatohuena deni tojajaro. Madijacca nahatohuepi ajimani. Dio pocca dacorehe naqui pohuadenidsa pina japari tajarossa naraha pocca dacorehena denima dacorajaro. Madijacca dacorehepi ajimani.

<sup>26</sup> Ohuemecotedeni, tibodideni huatoma-manaji. Aja titiqueriqquimana nanidsa ajijaro dsamacca madija nahatoqquri najaridenipa huapi tajarahi. Tiadenidsa naco ajijaro dsamacca deni toquejenajarideni huapi tajarahi, taminedeni naco huapi tajarahi. Naraha Diopa nama naha pocca madija tiquejenanijine tiadeni huahua

tabaqquijari. <sup>27</sup> Ajijaro dsamacca madijapa madija ohuahadenidsa: —Ssamogquiri nahi -quiquinanaraha Diopa ssamogquiri najaridenina icattejidsabaqquijari. Dio nama najaripa madija: —Iapi iara nahatoqquri inani -quiquinanajarideni ajamani toquejenahijine. Ajijaro dsamacca madijapa madija ohuahadenidsa: —Japariqquri nahi -quiquinanaraha Diopa japariqquri najaridenina icattejidsabaqquijari. Dio nama najaripa madija: —Iapi dacoco ijirani -quiquinanajarideni ajamani toquejenahijine. <sup>28</sup> Diopa ajijaro dsamacca madija nenebo toquejenajarideni icattejidsabaqqui, huahuattajo toquejenajarideni icattejidsabaqqui, ajamani toquejenajarideni icattejidsabaqqui najari. Dio nama najaripa ajijaro dsamacca imadsa madija deni toquejenajarideni pohnama inanabaqquihijine. <sup>29</sup> Nema nadsapi madijapa Diodsa: —Ohuana bica onajaro. Ohua motta nahato onani -quinahijine ssamo tani. <sup>30</sup> Tahidepi aji Dio Pohnajine Jesocristodsa ijariqquijaropaji. Pohnajine naqui Cristodsa icahatterara canajaropaji. Cristojine icca ima Diodsa pajiranissa tajaro. Ibodi tonahirejari. Imasiridsa imadidsanapo-jeranijine ia todinibaqquijari. <sup>31</sup> Nadsapi pina Dio Atti dsodo napojarocassa inanana. Najaropi ajima najaro: —Tetidsemanadsapi: “Ojine bica tani, deni ojani” titiquina nejerana. “Ia Medsede Pohnajinena bica tani, pohnana deni tojajari” titiquina nanina bica tani -nahi nade Dio Atti.

## 2

### *Jesocristo ahua porimacossanidsa dsoqquejari tahimari*

<sup>1</sup> Ohuemecotedeni, Diocca pajissehe ahuatora tapojarocca tiadeni mari ocanabaqquinijine occadsapi ajijaro dsamacca deni toquejenajarideni attidenissa najarodsa huati huati onejerade. Nahatoqquri najarideni attidenissa najarodsa naqui tiadeni mari ocanabaqqui-jerade. <sup>2</sup> Tiadenidsa omadidsapi obodi ima onihi tohui onejerade. Jesocristo tahimarira odsepe ijina, onajarode. Aja ahua porimacossanidsa pohna dsoqquejari tahimarira huati huati ohonanajarode. <sup>3</sup> Tibaccodenihuaaji tiadeni maride ohuadsa naqui ocappinadsa ojaparidsapi tacca-cca ocanade. <sup>4</sup> Nadsama ohuattidsa jehe tiquinanijine tohuatti nahatohue cajiniccadsa tiadenidsa huati huati onejerade. Tiadenidsa huatide ojadsa, maride ojadsa naqui tohuatti najora taniccadsara huati huati ohonanade. Dio Corime ohua acco camadsa Diocca dacorehe ahuatoro onanajaroline occa marinajadsa jehe tiquinade. <sup>5</sup> Nema nadsapi Jesocristodsa jehe tiquinajaropi madijacca nahatohuejine jerani. Diocca dacorehejinena paji.

### *Diopa Pohna Corime dosse inajari, Dio pocca ima ia mari tocanabaqquihijine*

<sup>6</sup> Naraha jehenijirideni dacorajaroden maride iquejenadsapi tohuatti nahatohue cajiniccadsa mari icanabaqquijari. Najaro nahatohuepi ajijaro dsamacca jerani. Ajijaro dsama cacahuadedenicca ima jerani. Najaridenipa nidsa jicahitohui. <sup>7</sup> Aji mari mari inajarocca nahatohuepi Dio pocca. Pohnajine madijadsa ahuatora tapojaro. Nami nahato-jeraccadsama Dio tohuini nadsapa pocca ima inanajorapojaro, pocca deni tojehedsa iquejenanijine. <sup>8</sup> Najaro imapi ajijaro dsama cacahuadedeni mittamana-jarajari. Nassa Diocca ima mittamanadsapa ia Medsede bicabote deni tojajari inanadsoqquemana-jaranaja. <sup>9</sup> Naraha aji Dio Atti dsodo napojarodsapi ajima najaro:

—Dio inanajorapojaropi pina aja qqui toquinapo-jarajaricca, mittamanapojarajaricca, bodideni huatohuijine ssamogquiri napojaricca najaro ima bicani huapima Pohnadsa huatideni huanagquiri najaridenidsa inanajorapojaro -nani nade Dio Atti dsodo nanidsa.

<sup>10</sup> Dio Pohna Corime icadossedsa pocca ima iadsa ahuatoro inanadsapi imittajaro. Dio Corimena Dio Pohna inanajorapojarocca qqui qqui dsanapodsapa nahato tajari. Pohnapa Dio Pohna bodicca ima huapima nahato tahissa tajari.

<sup>11</sup> Madija huapi taraha ¿nejecojarina madija bodideni qquide nahato tajari? Nohuerahi. Madijapa pohua bodicca huatohuena nahato tahi ojari nahi. Najarossa najaro ¿madijapa Dio bodi qquide nahato tajarico? Nohuerahi. Dio Corimena Dio bodi qquide nahato tahi ojari najari. <sup>12</sup> Nadsama aji iadsa da inajaropi ajijaro dsamacca jerani. Dio Pohua Corimena iadsa da inajaro. Puhuapa iadsa bica tadsa Pohua Corime ia acco camajari, Dio pocca ima bicani iadsa inanajaro imittanijine. <sup>13</sup> Nadsapi Diocca ima bicani tiadeni mari icanabaqquinijinepi madijacca nahato-huedsa mari mari inejerani. Dio Corime ia mari tocanabaqquijaricca tohuattina tiadeni mari mari ihicanabaqqui najaro. Nema inajaropi Pohua Corime Atti deni tojaniccadsa huati huati ihinanajaro.

<sup>14</sup> Naraha Dio Corime cappiramanajaridenipa Pohua Corimecca marinajatohui quina-jarahi. Pohua Corimecca marinajapi pohuadenidsa pina ponima najaro. Mittamanahissa tajarahi. Dio Corime cajimanajaridenidsana pocca marinaja ahuaato tajaro. <sup>15</sup> Dio Corime cajimanajaridenipa ima huapima qquide nahatoqquri najari. Puhuadenipa: —Ajaropi bica tani, ajarona bica tejerani —quinahijine pajiramanahi. Naraha Dio Corime cappiramanajaridenipa aja Dio Corime cajimanajari bodideni huatohue ssamoqquri nahi. Puhuadenidsa naco: —Tijine bica tejerani —quinahijine ssamoqquri nahi. <sup>16</sup> Najaro imassa najaropi Dio Atti dsodo napojarodsa ajima najaro: —¿Nejecojarina ia Medsede bodi nahato tajari? ¿Madija ia Medsede mari icanahijinepa pajiraco? Nohuerahi —nani nade Dio Atti dsodo nanidsa. Naraha ia Dio Corime icajijarodeni ibodi huatohuepi pina Cristo pohua bodi huatohuessa najaro.

### 3

#### *Dio Atti maridedeni huapimapa Diodsa dsepedeni ijiridsamanajari*

<sup>1</sup> Ohuemecotedeni, tiadeni mari ocanabaqquipodsapi pina Dio Corime cajimanajari-denidsa huatidessa onejerade. Timittamananijine tipajiramana-jeradsapi tiadenidsa pina madija ajijaro dsamacca tohuini quinajaridenidsa huatidessa onajarode. Jesocristo tahimari tiadenidsa huati onadsapi pina ejedenidsa huatidessa onajarode. <sup>2</sup> Occa marinaja najora taniccadsara tiadeni mari ocanabaqquipojarode. Pina ejedeni dsamatapa jipade ssamo tadsa dsojora da quinajarissa najaro tiadenidsa nema onajarode. Naraha jidapana naqui nema tidsanapomanani paji naccani. Marinaja najo tanicca timittamananijine tipajiramana-jeraccani. <sup>3</sup> Aji tohuini tiquinaniccatohui disseraqquri tiquinaccajaro. Titessedeni cajimanajaricca acconi naqui tetedimana nani paji naccani. Titessedeni tedseje naqui ahuaaji atti ahuaaji atti titiquina nani paji naccani. Nema tiquinajarojinepi tohuini tiquinaniccatohui disseraqquri tiquinaccani, onajaro. Tijinedeni pina ajijaro dsamacca madijajinessa tinanamanajaropaji. <sup>4</sup> Nadsama tiadeni mota ojarria attipa: —Ohuapi Apolocca —naraha timecote ohuaha attipa: —Ohuapi Pablocca —nadsapa tijinedeni pina madija Dio Atti ssamoqquri najaridenicca imassa tinanamanajaropaji.

<sup>5</sup> Naraha tiadenidsa ohuattipi: ¿Pablopa nejecojari? ¿Apolopa nejecojari? ¿Iapi deni iquejenaniccaqui? ¡Nohuerani! Ia ipamehepi Diocca dodosse tabaqqui iqueje-najaro. Tiadeni mari icanabaqquijarojine ia Medsededsa pajissa tiquinajaropajide. Ia Medsede ia tocadossebaqquidsa idsepe ijijarode. <sup>6</sup> Ohua Dio Atti mari mari onapojarocca imapi pina tapa dappo onajarissa najarode. Apolo dsotode tiadeni mari tocanabaqquijaripa pina tapa moro tadsa dope ecahuajarissa najaride. Tapa napijaripa Diona inanapjarissa najaride. <sup>7</sup> Nadsama aja tapa dappode, cacahuade quinajaridenipa tapa moro inanamanahijine ssamomo tahi. Dio Puhua tapa inanapihijine nahato tahi ojarijari. <sup>8</sup> Aja tapa dappode, dope cacahuade quinajari-denipa najarissa caniqquimerajari. Poccadeni tarabaidsa manaconipi pohuadenidsa

Dio inapajiranissa tanitohui. Pina pahuadeni dsepedeni ijiridsamanajarissa nehe da inaridsanitohui. <sup>9</sup> Nadsama ohua Apolo tedsejepi Diodsa idsepe ihijiridsa najaro. Tiadenipi pina Diocca huidsajassa, pina odsa Dio icanahatojarossa tiquinajaro. <sup>10</sup> Ohuapi pina odsa nanahatode nahato tajarissa onajaro. Dio ohuadsa bica tadsa Pohuajine Jesocristo tahimari tiadeni mari ocanabaqquijaropi pina odsa ocanahatodsa huehuema ppa oppiridsajaro, ocanapiri najarossa najaro. Ojine odsa canapirijaropi Diocca dodosse ohuahana jaca icananijine, ohuahapa coba icananijine. Najaridenipa tiadeni maride toquejenajari pina odsa jaca icanamanajarossa, pina coba icanamanajarossa quinajari. Naraha jajacadedeni, cocobadedeni huapimapa dsepedeni panahissa tadsana bica tani. <sup>11</sup> Nadsama huehuema bicani ppa oppiridsehe najorajaropi Jesocristopaja. Madija ohuaha huehuema onihi ppa ippiridsanijinepi ssamo tani. <sup>12</sup> Nadsama aji huehuema bicabotedsa odsa canapirijaro icanahatomananijinepi orodsa, platadsa, siba huatini ccara tanicadsa inahatoridsamananitide. Madija ohuahapa pina tabladsa, bobadsa, dserodsa inahatoridsamananitide. <sup>13</sup> Naraha nidsa madija huapimacca ima cattemanijinecca huada bacco tadsapi Diopa dsippo jororonidsa madija huapimacca todsepe ijie ecataridsanitohui. Najaro jororonijine madijacca ima bica tajarocca, tabaccora tajarocca, ponimacca naqui Pohuadsa ahuaato tanitohui. <sup>14</sup> Madija dsepe ijijaricca jororonidsa diji tocana-jeradsapi manaconi cajihitohui. <sup>15</sup> Naraha ohuaha dsepe ijijaricca diji tocanadsapi huapima amossihuajanitohui. Pihuana oppinani ahuaraha tossiajahitohui. Pina madija pocca odsa diji tocanadsa joppa tadsa dsori tajarissa nahitohui.

<sup>16</sup> Tiadenipi ¿ajijaro ima ssamoqquiri tiquinaccaqui? Aji Jesocristodsa jehe tiquinajaropi Dio pocca mamadi tiquejenani. Aja Dio Corimepa tiadenidsa mamadiridsa najari. <sup>17</sup> Diocca mamadipi ssiaja, huire tani. Najaropi tiadeni. Madijapa Diocca mamadi inatabaccoradsapi manaco Dio najari madija inatabaccorahitohui.

<sup>18</sup> Nadsama tiadenipi tiadeni ticamaidsanimana tejeraji. Aja tiadeni mota bodidenipa: —Iapi ajijaro dsamacca nahatohue huapima nahatoqquiri inani —quiquina-naraha najaro ima nebomanahissa tadsa pina madija ssamobotessa quinana, nahi nahatohue pajissaccara tocahatterahijine. <sup>19</sup> Ajijaro dsamacca nahatoqquiri najaridenicca nahatohuepi Diodsa ponima tojajaro. Dio Atti dsodo nanidsapi ajima najaro:

—Madija ajijaro dsamacca nahatoqquiri najarideni poccadeni maidsehe najoramana-naraha Djojine poccadeni maidsehedsa pahuadenina tohuittani-manahitohui —nani nade Dio Atti dsodo nanidsa.

<sup>20</sup> Dio Atti dsodo nani onihi naqui:

—Ia Medsedepa ajijaro dsamacca nahatoqquiri najarideni bodideni huatohue nahato tajari. Pohuadsapi bodidenicca huatohue ponima tojajaro —nani nade Dio Atti dsodo nanidsa.

<sup>21</sup> Nadsama madijadsara tetidsemana tejeraji. Tettidenipi: —Ia maridena denima bica tajari. Pohuadsa iquejenadsapi deni iquejenajaro —tiquinanitide naraha nema tiquina tejeraji. Diopa huapima tiadenidsa da inajaro, tiadenidsa bica tanijine.

<sup>22</sup> Ohua Pablo, Apolo, Pedro inajaropi ticcadeni iquejenajaro. Ajijaro dsama huapimacca tiadenidsa tojajaro. Camittehe, dsoqquehe, jidapanacca ima, nidsa dsotodecca ima naqui najaro huapimapi ticcadeni. <sup>23</sup> Tiadenipi Cristocca. Cristopa Diocca. Epejeni.

## 4

*Jesocristocca dodosse tabaqqi dsepedeni ijimanajari tahimari*

<sup>1</sup> Tiadenipi icca ima tibodideni huatoma-manadsa ajima tiquinaji: —Pablodenipa Cristocca medse, pocca dodosse tabaqqui toquejenajari. Dio pocca ima bicani ahuatora tapojaro maride icadossebaqquijaria -tiquinaji, onajaro. <sup>2</sup> Nadsama dossehe cajimanajarideni pohuadeni dossedecca dosseniji inapajiramananissa tanijine. Nama nadsapa pohuadeni dossede, madija huapima naco pohuadenidsa: —Jehe, tijinedeni bica tani -quinahitohui. <sup>3</sup> ¿Nadsama ohuadsa nejecoma tiquinani? ¿Pina ohua dossedecca dossenijissa onanajaroqui? Occa marinaja tinocodsamanadsa naqui tiadenidsa bica teje, bica tejereje naraha najaropi ima bedeni. Ajijaro dsamacca ima cacattemadedeni occa ima icattemamanadsa naqui obodi huatoto cana-gerani. Aji ohua naqui: Ojine bica tani, bica tejerani, onejerani. <sup>4</sup> Obodi huatomadsapi: Ima ocappirani, onaraha ima ocajinitide. Ohua Medsedena obodicca ima nahato tajari. Pohuana obodicca, odsepe ijiecca nattomede pajirahi. <sup>5</sup> Nema najaroa ia Medsede ccanipoma-jaraccadsapa tiadenipi madijacca ima nattome tiquinejeraji. Titessedenidsa: —Tijinedeni tabaccora tani -tiquinejeraji. Nidsa ia Medsede ccanipomadsana pohua ssiejenedsa ima huapima ahuatoma-ridsanitohui. Aji ia huapima ibodicca ima ecomajaro pohuajine ahuatoma, ibodidsa tohuini inajarocca ahuatoma naridsanitohui. Nadsapa bica inanajarocadsa Diopa iadsa: —Tijinedeni bica tani -nahitohui.

<sup>6</sup> Ohuemecotedeni, aji Apolo tahimari huati, ohua otahimari huati onajaropi ticahatteradsa ticcadeni ima tobicanijine. Itahimaridsa ticahatteradsapi Diocca dosseniji dsodo nanidsa ima onihi tinaharimana-geranijine. Aji itahimaridsa ticahatteradsa naqui tiadeni maride ojaria deni tinanamana-jarahijine. Pina tiadeni maridedsa tetidsemanadsa: —Ia maridepa deni tojahi -tiquinadsapi ohuahapa ajamani tinanamajarari. <sup>7</sup> Naraha ¿nejecojarina titessedeni ajamani inanabaqquidsa tiadeni deni tonanabaqquijari? Naraha tiadeni huapimapi pina titessedenissa tiquinajaro. Huapima ticajimanajaropi Dio tiadenidsa da inaridsajaro. Pohuajine ticajimanadsapi: —Ia motta nahatoqquri inajarojine icajijaro -tiquina tejeraji.

<sup>8</sup> Tiadenipi pina sseqquiri najaridenissa tiquinajaro. Tohuini tiquinanicca huapima ticajimanani. Tiadeni acco icamabaqquinijineraha iadsa jiperaqquri tiquinajaro. Pina taminessa taridsamanajaro. ¡Jaho, tamine tiquejena naccaraho! Ia naqui tiadenidsama dossede iquejenanitohuiraha. <sup>9</sup> Obodidsapi: Jesocristocca dodosse tabaqqui iquejenajaropi Diojine dsotodehuaji iquejenajarossa inajaro. Pina todsepe toquejenajarideni jicahijinessa inanijine Dio ia tonanajora-baqquijari itidija, onajaro. Iapi pina jidsaqquri inajarossa inadsa ajijaro dsamacca madijadeni, Diocca dodosse tabaqqui memehuajicca tedseje ia qquide cattomama canajaripaja. <sup>10</sup> Aji iapi Jesocristodsa dissessera inajarojine iadsa: —Ssamocqquri nahi -quinaraha tiadenidsapa: —Jesocristocca nahatohue cajimanahi, nahatoqquri nahi -quiquinanajari. Iadsapa: —A, japariqquri nahi -quinaraha tiadenidsapa: —Dacoraqquri nahi -quiquinanajari. Ia ajamani tonanabaqqui-manaraha tiadenidsana: —Deni toquejenahi -quiquinanajari. <sup>11</sup> Icca imapi ajima najonajaro: pemi imadi, ibacco dsarie imadi, etero icappirehe imadi najonajaro. Madijajine huahuacca iquejena najonajaro. Imadinijine odsa icappirehe imadiridsa najaro. <sup>12</sup> Idsepe ijidsa naqui ja iquejenehe imadiridsajaro. Madija naco ia tototamasso-baqquimana naraha ima bicanira pohuadenidsa ehecomera najaro. Ia totonajidso-baqquimana nadsa naqui nema nehe ihinahana najaro. <sup>13</sup> Madija ia tototamasso-baqquimanadsa naqui mohuaradsa etti bica tadsa attideni ehecomera najaro. Ia huahuattajo tonanabaqquimanadsapa pina dsama nemanehicca basurassa inajonajaroa ajijaropaji.

<sup>14</sup> Nadsama aji tiadenidsa dsodo onajaropi ticappinamananijine gerani. Ticcadeni ima tobicanijine onadsa tiadenidsa dsodo onajaro. Tiadenipi pina occa ejedenissa tiquinajaro. Tiadenidsa ohuati huana tani. <sup>15</sup> Aja Jesocristo tahimari maride



tiadenidsa tohuapidsapa pina 10 mil quinahitide naraha tiadeni maride pina ticcadeni abissa najaripa huapi tajarahi. Aji ohuana pina ticcadeni abissa onajaro. Jesocristo tahimari icassiejeranijinecca tiadenidsa huati huati onajarojine pohnadsa jehe tiquinajarode. <sup>16</sup> Nema nadsapi tiadenidsa ajima onajaro: Pina aji occa madiessa tinanamanaji, onajaro.

<sup>17</sup> Nema onadsapi tiadenihuaji Timoteora dosse onajari. Pohnuapa ojine Jesocristodsa tojadsapa pina occa ejedenissa najari. Pohnadsa ohuati huana tani. Pohnuapa ia Medsede tahimaridsa dissera tajari. Occa marinaja pina Jesocristo mari mari naridsajarissa najaro tiadenidsa huati tahitohui, tibodideni huatomamananijine. Najaro marinajapi aji Jesocristodsa quequeriqquimana nahihuaji mari mari ohocanaridsabaqqui najarissa najaro. <sup>18</sup> Naraha motadeni attidenia: —Ia motta nahatoqquiri inani —quiquinanajari. Najaridenipa ohuadsa cappinamanajaradsa: —Pabloa ia qqquide ccajona-jarahitohui —quinajari. <sup>19</sup> Naraha nani tiadeni qqquide occabote nani. Ia Medsede jipa tadsapa occanitohui. Nidsa tiadenihuaji bacco onadsapi aja —Nahatoqquiri inani —quiquinanajaridenicca madie qqquide onaridsanitohui. Pohnuadenipa ima huatide nahatoqquiri naraha ¿pajissa Diocca dacorehema madimanajarico? onajaro. <sup>20</sup> Diocca cacahuehedsa iquejenadsapi ima huatidera nahato inani ojari-jerani. Diocca cacahuehepi pocca dacorehema imadijarona paji. <sup>21</sup> Nidsa tiadenihuaji occadsapi ¿ohuatti dacorajarodsa tiadeni onajidsobaqquijarossa onanijinequi? ¿Tohuati huanehema ohuatti bica tajarodsa tiadenidsa huati onanijinerane? Nadsapi ¿nejecorajarodsana jipaqqquiri tiquinani? onajaro.

## 5

### *Huananehe cajiari ettajomanahijine*

<sup>1</sup> Titiqueriqquini nanihuajicca madija ojaria huananehedsa madijaricca ima madija huapima nahatoqquiri nahi. Najaria aja imeni onihiraha pocca amoneje tojajaro. Nema najaro imapi tabaccora tani. Diodsa jehe quina-jarajaridenidsa naqui oppina tani. Naraha najaro ima tiadenidsa anini. <sup>2</sup> Jaho, tiadenipi: —Icca madie bica tani —titiquina naraha ¿nejecotohui pocca tabaccorehedsa oji tiquinejarajaro? Najari madijapa tiadenidsa qqqueqqquedsima najarahijine dosse tininemanajo, onajaro. <sup>3</sup> Ohuassire tiadenidsa huaji onaraha titohuideni obodi huatomadsapi jidseraqqquiri tiquinajaro. Pina tiadenidsa omadijarossa najaro. Nahicca madija imasiri tonanajari naco onacasserajaripaja. <sup>4</sup> Ia Medsede Jesocristo onima pocca ima ticattemamananijine tiqueriqquimanadsapi ohua naqui tiadenidsa oquejemajarossa nanitohui. Jesocristocca dacorehe naqui tiadenidsa aninitohui. <sup>5</sup> Najari maqqquideje imasiri tonanajaripa Satanadsa tinanamanajo. Nahi pohua assirepi amossi naraha nidsa ia Medsede Jeso ccanipomadsa pohua corimena tossiajahitohui.

<sup>6</sup> Nadsama najaro ima tiadenidsa anidsapi tetidsemanadsa: —Icca madie bica tani —tiquinani bica tejerani. Aja pan ssaja tahijine quequejemacca ima nahatoqquiri tiquinani. Trigo bono ria nahi imedsa quequejema badsira taha quejemadsapa ssajaja tahi. Najarossa najaro madija ojariacca imaraha huapimadsa ssaja taridsa tani. <sup>7</sup> Nadsama pocca imasiri ssaja taridsa-jeranijine tinebomanajo, pina jodio-denicca ejete Pascoa anidsapi pan ssaja tahijinecca quequejema inebomanajarissa tinanamanajo. Pina pan dsati quequejema jirahaccassa tiquinaji. Cristopa itohui dsoqqquejari. Pina icca edede bedi Pascoadsa dsoqqquejarissa najari. <sup>8</sup> Nema nadsapi pina Pascoacca ejetedsa etidsejarossa inana. Icca madie dsatidsa imadidsapi quequejema jadahi jiraha imadi-dsanapona. Najaro imapi tabaccorehe, imasiri nemaneheneboridsadsapi pajissehema, maidserehema Cristodsa etidsedsanapojaropaji.

<sup>9</sup> Nadsama aji occa ima teppe tiadenidsa dsodo onapojaropi ajima onajaro: Nahicca madija huananehedsa disseraqquri najaridenidsapi tiquejemamana tejeraji, onajarode. <sup>10</sup> Naraha ohuattipi: Jehe quina-jarajaridenidsa tiquejemamana tejeraji, onejerani. Ajijaro dsamadsa madimanajaridenipa huananehe cajimanajari. Madija ohuaha dsepetaji acconi huadiqquri najari. Todsepetajitohui, dsinirotohui maid-saqquri najari. Madija ohuahadenipa botijidede rajari. Siba nahatonidsa naco huahuatidsemana najari. Ajijaro dsamacca madijapa nama quinaraha pohuadenidsa iquejemajaro. Ajijaro dsama inebodsana pohuadenidsa iquejema-jerani-jerani najaropi ssamo tani. <sup>11</sup> Naraha ohuattipi ajima najaro: Madija: —Iapi timecotedeni iquejenani –quinaraha imasiridsa disseraqquri nadsapa najaridenidsapi tiquejemamana tejeraji, onajaro. Pina aja huananehe cajimanajarideni, dsinirotohui mamaidsamana najarideni, siba nahatonidsa huahuatidsemana najarideni. Pohuadeni tessedsa ima ponimacca huatijidede rajarideni, noccodeni janoqquri nahijine dsejidede rajarideni, bobotidedeni naco. Nama quinajaridenidsapi poccadeni odsahuaji bacco tidsimamana tejeraji. Pohuadenidsa naqui tijipamana tejeraji, onajaro. <sup>12-13</sup> Ohuapi Diodsa toquejena-jarajaridenicca ima cattemade ojajerani. Diona poccadeni ima icattemanitohui. Aji tiadeni Diodsa tiquejenajaropi ticcadeni ima tiadenina cacattema titicana naji. Nadsama nahicca imasiri tonanajaripa tiadenidsa quejema-jarahijine tinebomanajo, onajaro.

## 6

### *Jesocristocca quejena-jarajarihuaji ima cattemade jajahi toja najari*

<sup>1</sup> Nadsama timecotedeni ojariapa pohua imecote tedseje ima cajimanadsa ¿nejecotohui timecote Dioccaraha ajijaro dsamacca ima cacattemadehuaji pohua imecote iaccajari? Najaridenipa Diodsa jehe quina-jarahi. Diodsa jehe quinajaridenidsana poccadeni ima cattemade tohuededsimahijinena bica tajaro. <sup>2</sup> Tiadenipi ¿ajijaro ima ssamoqquri tiquinaccaqui? Nidsaranibote Diocca madija iapi dsama huapimacca madija imarideni icattemanitohui. Nidsa madija huapimacca ima cattemade tiquejenanijineraha ¿jidapanacca ima bedeni cattemadepi tipajiramana-jerajaroqui? <sup>3</sup> Ajaro ima naqui ssamoqquri tiquinanitide: Nidsaranibote Diocca dodosse tabaqqui memehuaicca imarideni naqui iana icattemanitohui. Djojine ipajiranissa tadsapi icca madiacca ima icattemanijine ipajirani. <sup>4</sup> Nadsama ajijaro dsamadsa timadimanaccadsa timecotedeni tedseje ima ticajimanadsapi ¿nejecotohuira ajijaro dsamacca ima cacattemadedenihuaji jajahi tija najaro? Najaridenipa Jesocristodsa titiqueriqqui nadsa tiadenidsa quejemamana-jarahi. <sup>5</sup> Aji tiadenidsa ohuatti nema onajaropi tijabojomananijine, onajaro. ¿Nahi tiadenidsapa madija ima cattemade nahato tajari nohuerajarico? ¡Anihitidija! <sup>6</sup> Naraha timecotedeni tedseje ticahadiredsa ima ticajimanadsapi ima cacattemadedenihuaji titiaccabaqquimana najari. Najaridenipa Diodsa jehe quina-jarajarideniraha.

<sup>7</sup> Naraha jehe quina-jarajaridenihuaji timecotedenidsa ima tinassonarimanadsapi ticcadeni imana totabaccorajaro. Nadsama ticcadeni ima totabaccorani noppinenipi pina ajima tinanamananina bica tani: Timecotedeni tiadenidsa ima inanamanadsapi nema nehe tinahanamanaji. Ticajijarocca nemanene timecote ibotidsa naqui: —Epejena, jehe quina-jarajaridenihuaji pohua ohuacca-jarana –tiquinaji. <sup>8</sup> Naraha tiadenipi nema tiquinejerani. Timecotedenidsa ima titinanamana najaro. Timecotedeni ticamajidsa-baqquimanadsa naco titibotimana najari.

<sup>9</sup> Tiadenipi ¿ajijaro ima ssamoqquri tiquinaccaqui? Tabaccorehe inanamanajarodenipa Diocca cacahuehehuaji toquejena-jarahitohui. Paji, madija tiadeni tocamajidsabaqqui-manarana. —Imasiri inanani oppinera tani –quiquinanaraha pajissa tiquinejeraji. Aja Diocca cacahuehehuaji madimana-jarahijinepa huapi

tajari. Pohnadenipa huananehecca disseraqquri najarideni, siba nahatonidsa huahuatidsemana najarideni, maqquideje madija ohuahacca amoneje ahajadedeni, amoneje maqqui cajiraha maqquideje ohuaha nanajadedeni, maqquideje pohuadeni tesse dsoto ahajadedeni naco Diocca cacahuehehuaji madimana-jarahitohui. <sup>10</sup> Aja bobotidedeni, dsepedeni ssegguiri nahijine tohuini quinajarideni, noccodeni janogguiri nahijine dsejidede rajarideni, madija pohuadeni tessedsa ima ponimacca huatijidede rajarideni, dsinirotohui mamaisadedeni naco Diocca cacahuehehuaji madimana-jarahitohui. <sup>11</sup> Tiadeni motapi najaridenissa tiquinaporaha Dio tiadeni tonahirebaqqujari. Pohuajine Pohuadsara tiquejenajaropaji. Ia Medsede Jesocristo pohuajine, icca Abi Dio Pohua Corimejine naco ticcadeni ima Diodsa tobicajaropaji.

### *Essirepi Diocca, ia ecahuanissa tanijine*

<sup>12</sup> Madija attidenipa: —Iadsa oppina tanicca nohuerani. Ia tohuini inanicca huapima inananijine bica tani –quiquinanahi titimittamana najaro. Naraha ohuatipi: Paji, tohuini tiquinanicca huapima tinanamananjine bica tejeranitide, onajaro. Ohuapi ohua tohuini onajarocca ohuadsa deni tojanijine jipera onani. Najarocca medse ojajeranijine ohua ohuacahuajaro. <sup>13</sup> Nadsama madija attideni onihi naqui ajima najaro: —Idsone badsinipi dsamatapajine, dsamatapapa idsone badsinicca –quiquinanajari. Naraha nidsa Diojine najaro pamehepi jicanitohui. Naraha essirepi pajissa huananehejine jerani. Essirepi ia Medsedecca. Ia Medsedepa essirecca. <sup>14</sup> Diojine ia Medsede nahatonidsapa ia naqui najarissa inanitohui. Dio pocca dacorehema ia tonahatonibaqquihitohui.

<sup>15</sup> Tiadenipi ¿ajijaro ima ssamoqquri tiquinaccaqui? Ia essire ojari, ojari inaridsaraha Cristo pohuadsa itassaqquidsapi pohua assire ojarijarissa inajaro. Ajina ¿Cristo pohua assire mota ojine amoneje huananaridsa tojahijineco? Nohuerani. Iapi nema inejerani. <sup>16</sup> Tiadenipi ajijaro ima ¿ssamoqquri tiquinajaro ttarane? Maqquideje amoneje huananaridsa tojadsapa poni tadsajani ojaria tojahitohui. Dio Atti dsodo nanidsapi: —Maqquideje amoneje tadsajani assiredeni pamaraha pina ojarijarissa quinajari –najaro. <sup>17</sup> Naraha madija ia Medsedecca toquejenadsapa pohuadeni corime ia Medsededsa ojariqquimanaha toquejenajari.

<sup>18</sup> ¡Huananehe tinanamana-jeranijine tiajimanani naji! Madija imasiri onihi onihi inanamanajaropi pohuadeni assiredsa tabaccorehe inanamana-jerani. Naraha huananehe inanamanajarona pohuadeni assiredsa imasiri inanamanajaro. Pohuadeni assire inatabaccoramanajaro. <sup>19</sup> Naraha tiadenipi ¿ssamoqquri tiquinajaroqui? Aji tessiredenipi Dio Corimecca mamadi. Diopa tiadenidsa Pohua Corime da inaridsajaro. Najaria tiadenidsa madiridsajaripaja. Tessiredenipi ticcadeni jerani. <sup>20</sup> Diopa ticasiejeranijine manaconi huatini ccara tajarodsa tiadeni mitta tabaqqujari. Nadsapi ticcadeni ima Diodsa bica tanijinepi tessiredeni tecahuamananissa taji. Dio Pohua jipa tahiccara tinanamanaji.

## 7

### *Cajicajicca imadsa bodideni huatoma-manahijine*

<sup>1</sup> Ima ohuadsa dsodo tiquinapojaropi ajima nade: —¿Maqquideje amoneje cajjaradsa madihi bica taqui? –tiquinade. Jidapanana najaro ima ohuacomerana. Jehe, maqquidejepa amoneje caji-jaradsa madihi bica tani. <sup>2</sup> Naraha huananehepi cajiridsani. Najaro noppineni amoneje titicajimaneri nanina bica tani. Ticcadeni amoneje ohogariri naji. Amoneje naqui maqquideje ticajimanadsapi ticcadeni maqqui ohogariri najo, onajaro. <sup>3</sup> Nadsama tecajiredsapi ticcadeni amonejedsa tiadeni accoraqquri tiquinana, ticcadeni ima bica tanijine. Amoneje naqui tecajiredsapi ticcadeni maqquidsapa tiadeni accoraqquri tiquinana, ticcadeni ima bica tanijine.

<sup>4</sup> Maqquideje amoneje tadsajani cacajiredsapa amoneje assiranipi ponicca jerani. Maqquina poni assirani jinede. Maqquideje naco pohua assirepa pocca jerani. Amonejena pohua assire jinede. <sup>5</sup> Nadsama maqquidejepa pocca amonejedsa pohua ccaccocco-jarana. Amoneje naqui ponicca maqquidsa poni ccaccocco-jarana. Naraha Diodsa huatidera ojari naccanijinepi ticca amoneje tadsajani jehe ticaniredsa ajaniji tinebocossamanaccani bica tani. Dsotodena ajaniji tidimamanapomana, onajaro. Nema tiquinejeradsapi Satana tiadenidsa ssonacossadsapa imasiri tinanamanarana, onajaro.

<sup>6</sup> Aji badsira tehe ajaniji tinebocossamanaccani bica tani onajaropi tiadeni odossebaqqui-jerani. —Nema inana –tiquinadsapi nema tiquinani bica tani, onajaro.

<sup>7</sup> Ohua ohuatti bodipi: Madija ohuahadenipa cajimanerahi pina ohuassa quinahina bica tani, onaraha Diona paja. Puhuana madijadsa pocca daniji onihi onihi da inaridsajaro. Madija motapa amoneje jiraha madimanahijine inapajirabaqqujari. Motapa amoneje inacajibaqqujari.

<sup>8</sup> Nadsama maqquideje tabiradeni, amoneje tabiradeni, aji maqqui dsoqquedsa tabira tocajamanajaro, maqquideje bedimeni dsoqquedsa tabira tocajamanajari quinajaridenipa cajimana-jaradsa pina ohuassa quinahina bica tani. <sup>9</sup> Naraha tabira pohua motta madihijine pajira-jaradsa amoneje tohuini nadsapa icajinijine bica tani. Amoneje naqui maqquideje tohui nadsapi icajihijine bica tani. Cajimana-jaradsa tohuini nacomehe dacoradsapi ocasserani ahuamanahitohui.

<sup>10</sup> Nadsama tecajirejarodenidsa ohuattipi: Ticanebore tejeraji, onajaro. Nema onajaropi ohuatti jerani. Ia Medsedecca dosseniji. Amoneje maqquideje cajijaropi ponicca maqqui inebo-jarahijine. <sup>11</sup> Naraha amoneje maqqui inebodsapa maqquideje jirehe cajirani madi-dsanapona, onajaro. Maqquideje jirehe madide jipera tadsapi ponicca maqqui tedseje poccadeni ima icattemamanadsa tohuacajireni-pomahijine bica tani. Maqquideje naco nama nahijine, pocca amoneje inebo-jeraniijine.

<sup>12</sup> Nadsama tiadeni motadsa naqui huati onajaro. Ajijaro imapi ia Medsedecca jerani. Ohua occa marinaja. Aji timecotedeni ojariacca amonejepi Jesocristocca jeraraha pohuadsa madi-dsanaponijine jipa tadsapi epeje, madina. Pocca amoneje inebo-jerana, onajaro. <sup>13</sup> Nadsama timecotedeni ojariacca maqqui Jesocristocca jararaha ponidsa madi-dsanapohuijine jipa tadsapa apaja, madina. Ponicca maqqui inebo-jarana, onajaro. <sup>14</sup> Nadsama Jesocristocca jarajaripa bedimeni jehe najarodsa madidsapa poccadeni cajinajacca ima Diodsa bica tani. Amoneje Jesocristocca jerajaro naqui ponicca maqqui jehe najaridsa madidsapi poccadeni cajinajacca ima Diodsa bica tani. Poccadeni ejedenideni naco pina madija Dio Atti ssamoqquri najaridenicca ejedenissa quinahitohuiraha nama quina-jarahi. Puhuadeni naco Diodsa bicaqquri najari. <sup>15</sup> Naraha Jesocristocca jerajaro ponicca maqqui jehe najari inebohijine tohuini nadsapi epeje, pohua inebojari. Maqquidsapi ima nohuerani. Puhuadsa cajinajacca ima jicani. Jesocristocca jarajari bedimeni jehe najaro inebohijine tohuini nadsapa apaja, poni inebojaro. Bedimenidsapi ima nohuerani. Ponidsa cajinajacca ima jicani. Diopa pocca madija mohuaradsa jonehema madimanahijine tohuini najari. <sup>16</sup> Tibodideni huatoma-manaji: Aja ticca maqqui Jesocristocca jarajari tedseje timadi-dsanapodsapi pahuapa Diodsa tojahitide. Ssamo tinani. Ticca amoneje Jesocristocca jerajaro tadsajani timadi-dsanapodsapi ponipi Diodsa tojanitide. Ssamo tinani.

*Dio iadsa huahua napodsa icca madie najarossa najarodsa imadi-dsanaponijine*

<sup>17</sup> Aji ticcadeni madiacca imapi pina tecajiredsa, tecajire-jeradsa naqui Dio tiadenidsa huahua napodsapa najarossa najarodsa timadimana-dsanapoji. Najaro imapi Jesocristodsa totoqueriqquimana nahihuaji huapimadsa huati onaridsajaro.

<sup>18</sup> Madija jodiodenicca huissinaja cajipojari Dio pohuadsa huahua nadsapa nama

naha madihijine bica tahi. Huissinaja cappirajari naco Dio pahuadsa huahua nadsapa nama naha madina. <sup>19</sup> Huissinaja ticajimaneje ticappiraneje najaro imapi ponimacca. Najaro imadsapi Diodsa ibica-jerajaro. Diodsa ibicanijinepi pocca dossenijidsa ibora inadsana bica tajaro.

<sup>20</sup> Nadsama tiadenipi Jesocristodsa tiquejenanijine Dio tiadenidsa huahua napodsapa ticcadeni madie najarossa najarodsa timadimana-dsanapoji. <sup>21</sup> Madijacca dodosse tijapojaro Dio tiadsa huahua nadsapa epeje, madijacca dodosse tijadsanapoji. Najaro imadsa tibodi huatoto cana-jeraji. Naraha tia dossede tia tappa tahijine jipa tadsa tiadsa apaja nadsapa tiara timadini bica tani. <sup>22</sup> Nadsama aja madijacca dodosse Jesocristodsa tojadsapa pina madija tappa tabaqquijaridenissa najari, pohua Medsede Jesocristodsa dsepe ijihijine. Madijacca dodosse toja-jarajari naco Jesocristodsa tojadsapa pina Jesocristocca dodossessa najari, pocca dossenijidsa ibora tahijine. <sup>23</sup> Diopa timanaconedeni huatini ccara tajarodsa tiadeni mitta tabaqquijari, pocca tiquejenanijine. Diocca dodosse tiquejenaropi madijacca dodosse tiquejenajeraji. <sup>24</sup> Ohuemecotedeni, aji Jesocristodsa tiquejenanijine Dio tiadenidsa huahua napodsapa ticcadeni madie najarossa najarodsa timadimana-dsanapoji, onajaro.

### *Tabiradenidsa, cajimanajaridenidsa naco Pablo huati tajari*

<sup>25</sup> Jidapana tabiradenicca ima huati onana. Najaro imapi ia Medsedecca dosseniji jeraraha pahuapa ohuadsa bica tadsa ohua tonahattajari. Nadsapi ohuattidsa pajissa tiquinanijine bica tani. <sup>26</sup> Jidapapi ajijaro dsamadsa ocasserani eridsajaro. Nema nadsapi maqquideje amoneje cajimana-jarajaridenipa nama dsanapomanahijine bica tani. Cajimanajarideni naco nama dsanapomanahijine bica tani, onajaro. <sup>27</sup> Amoneje ticajimanajarodenipi ticcadeni amoneje nebomana tejeraji. Amoneje ticappiramanajarodenipi amonejetohui taridsamana-jeraji, onajaro. <sup>28</sup> Naraha amoneje ticajinijinepi imasiri jerani. Amoneje tabiradeni dsohuatodeni naqui maqquideje cajimanani bica tani, imasiri jerani. Naraha tecajiredsapi paji, ajijaro dsamacca ocasserehe tiadenidsa ssonarinitohui. Najarojine occa ima tiadenidsa jidapana dsodo onajaro, tecajire-jeraccadsama timittamananijine, nani dsotodepi oji tiquinejeranijine.

<sup>29</sup> Ohuemecotedeni, aji huati huati onajarocca imapi ajima najaro: Iapi huajano huapi taha imadi-jerani. Nadsapa maqquideje amoneje cajimanajaridenipa pina aja amoneje cappiramanajaridenissa quinana. <sup>30</sup> Oji oji quinajarideni naco pina oji quina-jarajaridenissa quinana. Huatidsemaneri najarideni naco pina huatidsemanajarajaridenissa quinana. Todsepetaji mimittadedeni naco pina todsepetaji cappiramanajaridenissa quinana. <sup>31</sup> Ajijaro dsamacca biquehe cajimanajarideni naco pina najarodsa dsepedeni ijimana-jarajarissa quinana. Ajijaro dsama qqui inajaropi jicanitohui.

<sup>32</sup> Ajijaro dsamaccadsa tidsepedeni ijimanadsapi najarotohui tibodideni huatoto canajaro. Naraha najarotohui tibodideni huatoto cana-jeranijine tohuini onani. Maqquideje tabiradenipa ia Medsedsara dsepedeni ihijimana najari. Bodidenipa: —¿Nejecoma onanadsana Dio onahatidsehijine? —quiquinanajari. <sup>33</sup> Naraha amoneje cajimanajaridenipa ajijaro dsamaccatohui, poccadeni amoneje inahatidsebaqquimananijine tohui bodideni huahuatomana najari. <sup>34</sup> Nama quinadsapa pohuadeni bodicca huatohuepi carobejaro. Amonejedenicca ima naqui pina maqquidejeccassa najaro. Amoneje maqquideje cappiramanajarodenipi ia Medsedsara dsapanideni ihijimana najaro. Ponideni assiranima, bodinidenima Diodsara huahuatidsemana najaro. Naraha amoneje maqquideje cajimanajarodenipi ajijaro dsamaccatohui, ponidenicca maqqui inahatidsebaqquimanahijine tohui bodinideni huahuatomana najaro.



<sup>35</sup> Ticcadeni madie tiadenidsa najo tanijine huati onejerani. Tiadeni acco ocamabaqquini-jinena huati onajaro. Ia Medsededsa tidsepedeni ijimana-dsanapodsapi pohuadsa timadimananissa tanijine. Ima onihi tohuini tiquinejeradsapi Diotohuira disseraqquri tiquinanijine onadsa tiadenidsa dsodo onajaro.

<sup>36</sup> Dsabisso dsohuato icajinijine tohuini nadsapa imehidsa huati tapodsapa ponicca huajano bacco tadsapi cacajirehi bica tani. Najaropi imasiri jerani. <sup>37</sup> Naraha maqquideje ohuahapa: —Amoneje jirehe omadina -nadsapa amoneje jiraha madihi bica tani. Pohuadsa: —Amoneje ticajiji -quina-jaradsa, pohua cacahuahijine naco bodi nahato tadsapa pohua motta madina, onajaro. <sup>38</sup> Maqquideje amoneje cajidsa bica tani. Caji-jaradsa naco denima bica tani, onajaro.

<sup>39</sup> Nadsama amoneje maqqui cajijaropi ponicca maqqui madiccadsapa pohuadsa madidsanapocahijine, inebo-jarana. Naraha ponicca maqqui dsoqquedsa poni jipa tadsapi maqquideje ohuaha Diodsa jehe najari icajihhi bica tahi, onajaro. <sup>40</sup> Naraha amoneje ponicca maqqui dsoqquedsapa maqquideje ohuaha icajipoma-jaradsana denima bica tani. Nema nadsapi poni bodini bica tehe madi-dsanaponijine, onajaro. Ohuatti nema onajaropi Dio Corimejine obodi nahato tadsa huati onajaro.

## 8

### *Siba nahatonidsa bani da quinahicca ima*

<sup>1</sup> Jidapanana dsamatapa, bani naha siba nahatonidsa da da quiquinanajaricca ima ohuacomerana. Najaro imapi ia huapimadsa ahuato tani. Nahatoqquri inaraha paji, nahatohuepi ia deni tonana tani. Tohuati huanehena denima bica tani. Najaropi icca jeheniji tonadacora tani. <sup>2</sup> Madija atti: —Ohuapi ohuattajaro, huapima nahato onani -najaripa badsira tehera nahato tajari. <sup>3</sup> Naraha madija Diodsa huati huana tadsapa pohuadsa Dio nocco jidsera tajari.

<sup>4</sup> Nadsama siba nahatonidsa bani da tahicca jipade ¿oppina taqui? ¿Oppinera taqui? Najaro ima tiadenidsa ohuacomerana. Iapi pajissa nahatoqquri inani. Siba nahatonipi ajijaro dsama nemanehedsa camittehe cappirani, pajissa ia Cacahuade jerani. Diona ia Cacahuade ojarihi. <sup>5</sup> Naraha madija ohuahadenipa namidsa anijaricca, memedsa anijariccadsa naco: —Dio, dio -quiquinanajari. Najaro aji poccadeni ima pina dio huapi tajarissa, pohuadeni medsede huapi tajarissa inanamanajaripaja. <sup>6</sup> Naraha iadsapa Dio ojarihi icca Abi memehujicca. Pohuana huapima inahatoridsajari. Pohuadsa imadiridsajaro. Ia Medsedepa ojarihi Jesocristopaja. Pohuajinena huapima aniridsajaripaja. Najaro aji iapaji.

<sup>7</sup> Naraha imecotedeni motapa Djojine huapima nahatoridsajaricca ima ssamoqquri naccajari. Pohuadenipa Jesocristodsa toquejena-jaraccadsapa siba nahatonidsa: —Pajissa icca dio -quiquinanaccade. Jidapana naco siba nahatonidsa bani da quinahicca jipamanadsa bodidenipa: —A ¿pina siba nahatonidsa huahuatidsemana najaridenissa inajaroqui? -quinajari. Nadsapa bodideni japariqquri najarijine attidenipa: —Jaho, Diodsa ima oppina tanicca inanajaro -quinajari. <sup>8</sup> Nadsama icca ima Diodsa bica tanijinepi ijipajarocca imajine jerani. Bani ijipadsa ibica-jerani. Bani ijipa-jeradsa naqui itabaccora-jerani. <sup>9</sup> Nadsama siba nahatonidsa bani da tahicca oppinera tahi nahatoqquri tiquinaraha paji, najaro imadsa timecotedeni japariqquri najarideni imasiridsa toquejenarana, onajaro. <sup>10</sup> Aji nahatoqquri tiquinaradeni siba nahatonidsa bani dada quinahihuaji jipaqquedsa jai tijedsimadsapi aja timecote japari tajari jipade tiquejenani qqui tadsapa: —A, bani siba nahatonidsa dada tahicca jipade oppinera tanitide. Ohua naqui ojipana -nadsapa pohua naco nahihuaji jipade toqquedsimarana. <sup>11</sup> Nadsama tiadenipi: —Nahatoqquri inani, oppinera tani -tiquinaraha tijinedeni titesse japari tajaripa ima onihidsa bodi quejema-jaro. Cristopa pohuatohui dsoqqueraha tijinedenina pocca jeheniji tossamojaro.

<sup>12</sup> Nadsama tijinedeni timecotedeni japariqquri najari bodideni tossamoridsadsapi pohuadenidsa ima tinanamanajaro. Najaropi pina Cristodsa ima tinanamanajarossa najaro. <sup>13</sup> Ohuapi ajima onajaro: Ojipajarocadsaha ohuemecotedeni ojine imasiri inanamanadsapi ohuara bani huapima ojipapoma-jeranitohui, nahi ohuemecotedeni imasiridsa onehedimabaqqui-jarahijine.

## 9

### *Jesocristocca dodosse tabaqqui huapima cajiridsamanadsa naco bica tani*

<sup>1</sup> Tetideni huatoma-manaji. Ohuapi madijacca dodosse ojajerani. Ohuapi Jesocristocca dodossena ojajaro. Ia Medsede Jeso naco qqui onade. Najari pohuana ohua cadossedsa tiadeni mari ocanabaqquidsapi pohuadsa tiquejenajarode. <sup>2</sup> Imecote ohuahadeni mota attidenipa: —Pablopa Jesocca dodosse jarahi —quiquinanaraha tiadenipi ohuadsa: —Pablopa Jesocca dodosse —titiquina nanijine bica tani. Diocca tiquejenajarojinea Jeso ohua cadossejaricca ima ahuato tajaropaji.

<sup>3</sup> Madija ohuadsa atti atti quinajaridenidsapi ohuatti ajima najaro: <sup>4</sup> Ohua Jesocristocca dodosse ojajaro ojipanijinepi ohuemecotedeni ohuadsa dsamatapa, dsedse naha da quinahi ¿bica taqui? Jehe, bica tani. <sup>5</sup> Nadsama amoneje Diodsa pajissa najaro ocajidsa naqui ¿poni tadsajani Dio Atti maride icadaridsani bica taqui? Bica tani. Pina imecotedeni ohuaha Jesocristocca dodosse tabaqquissa, ia Medsedecca esodenissa, Pedrossa onani naqui bica taraha. <sup>6</sup> Aja pohuadeni naco poccadeni mamari tabaqquicca danijidsa madimanaraha ohua Bernabe tedsejepi najaro danijidsa imadi-jerani. ¿Naraha najarodsa imadinijine bica tejeraqui? Bica taraha. <sup>7</sup> Aja ¿soldadodenipa taminecca dsinirodsa dsama ecahuamana-jeraqui? Najarodsa dsama ecahuamanajaro. ¿Huidsajacca ppa nahi uva cacahuadepa uva bono jijipa najaraco? Jijipa nahi. ¿Edede cacahuade naco edede dsojorini dse dse najaraco? Dse dse nahi. <sup>8</sup> Naraha aji huati huati onajarocca imadsa: —Ajijaro dsamacca marinaja —titiquina nanitide. Naraha ajijaro dsamacca imaha ojari-jerani. Diocca dosseniji Moisesi dsodo inapojararo naqui najaro imassa najaro cajijaro. <sup>9</sup> Aji Moisesijine Dio Atti dsodo nanidsa ajima najaro: —Aroso jidsadsa trigo nocco catojahijine bohui ttai ttai nadsapa bohui bono ssoque tacossamana tajarajo. Pohua naco pocca ttainajadsa jipahijine —napohui nade Dio. Naraha ¿Diopa bohuidsara bodi huatojarico? Bohuidsara jarahi. <sup>10</sup> Najaro imapi itohui bodi huatodsa huati huati tajari. Najaro imassa najaropi madija huidsajadsa nocco dappo inadsapa, madija ohuaha bono pore inadsapa mota pohuadenidsa tojahijine dsepedeni ihijimana najari. <sup>11</sup> Ijine Jesocristo tahimari tibodidenidsa tojajaropi pina nocco dappo inajarissa najaro. Nadsapa dappo inadsapa bono naco pore inahi bica tahi. Najarossa najaroa tidsepedenitaji ticajimananicca mota iadsa da tiquinani bica tani. <sup>12</sup> Aja Dio Atti mamaride ohuahadenipa poccadeni madiejine ticcadeni da naqquinajadsa cacajimana najari. Naraha iana tahide tiadeni mari icanabaqquipojarode. Nema nadsapi ticcadeni da naqquinaja iadsa da tiquinanijine bica taraha iapi icca madiejine tiadenidsa huati huati inejerani. Tiadenidsa imadidsapi icappiraniccatohui tarabaidsa inajarojine ocasserani eraha nema nehe inahanade. Jesocristo tahimari icassiejeranijinecca tiadeni mari icanabaqquijaro tojidsani noppineni nema inajarode.

<sup>13</sup> Tiadenipi nahatoqquri tiquinani: Jerosaredsa jodiodenicca daniji Diodsa dada toqquimahuaji dsepedeni ijimanajaridenipa najaro danijidsa mamadimana najari. Najaria aja Diodsa da tahijinecca huahuanarihuaji dsepedeni ijimanadsapa aja Diodsa da quinajaricca dsamatapa mota, bani motapa pohuadeni naco jijipamana najari. <sup>14</sup> Najaro imassa najaro ia Medsedecca dosseniji. Pocca dodosse tabaqqui pohua tahimari icassiejeranijinecca maride dsepedeni ijimanadsapa poccadeni mamari

tabaqquicca da naqquinajadsa madimanahijine huati tajari. <sup>15</sup> Naraha ohua Dio Atti maride ojararopi manaconitohui onaridsa-jerade. Najaroa jidapana naqui ticcadeni da naqquinajatohui dsodo onejerani. Aji manaconi jirehe Dio Atti maride ojararopi occa huatidsehe. Najaro madijajine tossamo-jeranijinepi tahide pemi ohuatianina bica tani, onajaro.

<sup>16</sup> Ohuapi Jesocristo tahimari icassiejeranijinecca ohuacomera-ridsajaropi ohuatidseda: —Ohuana bica onajaro –onejerajaro. Jeso ohua cadossedsa pohuadsa odsepe ijijaro. Pocca dossenijidsa ibo onadsapi oppinehe ohuadsa ssonarirana, onajaro. <sup>17</sup> Nadsama ohua tohuini onadsa Jesocristo tahimari maride ojadapi: —Odsepe ijijaro manaconi –onanitohuiraha. Dio Pohuana ohua tocattejidsadsa ohua cadossejaride. Nadsama pocca dosseniji ohuadsa bica teje, bica tejereje naraha onebonijine ssamo tani. <sup>18</sup> Nema onadsapi ¿nejecora manaconi ocajinijine? Aji Jesocristo tahimari icassiejeranijinecca ohuacomera-ridsadsapi manaconi jirehe mari ocanabaqquijaridsana ohuatidsejaro. Najaro huatidsehepi pina occa marinaja manaconissa najaro. Odsepe ijijaro manaconi ohuadsa da quinanjine bica taraha najaro tohuini onejerani.

*Diocca daniji bicani iadsa tojanijine dissessera inana*

<sup>19</sup> Ohuapi madijacca dodosse ojarerani. Poccadeni dossenijidsa naqui odsepe ijijerani. Naraha madija denima Jesocristodsa toquejenahijine odsepe ijidsapi ohua ojine pina poccadeni dodossessa onajaro. <sup>20</sup> Occa madija jodiodeni Jesocristodsa toquejenahijine pohuadenidsa occaridsadsapi pina pohuadenijinessa onanajarode. Pohuadenipa Moisesicca marinajadsa toquejenaha madimanajari. Naraha ohuapi Jesocristojine Moisesicca marinajadsa omadi-jeraraha pohuadeni maride omadidsapi Moisesicca marinajassa onanadsa pohuadeni acco ocamabaqquijari, Jesocristodsa toquejenahijine. <sup>21</sup> Nadsama madija ohuaha Moisesicca marinaja ssamoqquri najarideni mari ocanabaqquidsapa pina pohuadenijinessa onanajarode. Moisesicca marinaja jirehe omadiridsajaro, Jesocristodsa toquejenahijine onadsa. Naraha ohuapi Diocca dosseniji onebo-jerararoa aji Jesocristocca marinaja ohuacahuaropaji. <sup>22</sup> Nadsama aja imecotedeni Jesocristodsa jehe quinaraha poccadeni jeheniji japari tajarodenidsa occaridsadsa naqui pina pohuadenijinessa onanajarode, Jesocristodsa toquejenahissa tahijine onadsa. Aji occa ima pina pohuadenijinessa onanani onajaropi aja madija huapima bodideni acco ocamaridsa-baqquihijine. Madija tocassiejeraja camahijine tohuini onadsa. <sup>23</sup> Nadsama aja occa madie nema onaridsajaropi Jesocristo tahimari icassiejeranijinecca madija huapimadsa tojaridsanijine, pocca ima bicani ohuadsa naqui tojanijine tohuini onajaro.

<sup>24</sup> Nadsama tiadenipi nahatoqquri tiquinani: Madija ittomedsa domo toccadsapa ojaria jicaqquinuhaji bacco tapojarina deni tojarari. Najarina ittome cacahuadecca daniji cajijari. Nadsapi tiadeni naqui daniji bicani ticajimananijine joppa tiquinaji, onajaro. <sup>25</sup> Aja madija ittometohui tahide najoramanapodsapa pohuadeni nattome quinapojari. Pohuadeni assire dacoraqquri nahijine tabaccora tanicca inebo-manadsa pohuadeni cacahuamanahissa tajari. Nama quinajaripa ittomedsa deni toquejenahijine tohuini quinajari. Naraha deni tojararidsa totaticca bebe appani cohuanira da quinajaro. Najaropi jicaca tanicaraha iapi Diocca daniji jicaquera tanicca icajinijine disseraqquri inajaro. <sup>26</sup> Nadsama ohuapi pajimaranihujira joppa onejerani. Diocca daniji ocajinijine paji joppa onarini dsanapojaro. Pina madija ittome onihidsa pohua tesse tedseje do caniredsa pohuama do, dsori, do, dsori najarissa onejerajaro. Ohuapi Dio Atti madijadsa onapajiranissa tajaro. <sup>27</sup> Ohueme ohuadsa ibora tanijine pina ohua odaqquinjarossa najaro. Diocca daniji bicani cajimanahijine madija mari ocanabaqquiridsaraha ohua ohuacahuanissa tejeradsapi Diocca daniji bicani dsori onarana.

## 10

### *Siba nahatonidsa huahuatidsemana najaripa bica tejerani*

<sup>1</sup> Ohuemecotedeni, tetideni ajimamana tejeraji: Maittaccadsama icca idideni Isaraeri potemahidenipa dsama huamoni ssono caji, siba caji tanihuaji jahiridsadsa Diojine meme essenì dopanidsa jahiridsajari. Coridsa imeni onini Macconi quiquinanajari Diojine carobedsa naco huapima jai tojeqquimajari quinade. <sup>2</sup> Aja Moisesi pohuadeni cacahuade tojadsa pohuadsa toquejenajarideni meme essenì dopanidsa jahiridsadsa, coridsa jippehuaji naco jai tojeqquimadsapa Moisesi tedseje totopa cajimanajarissa quinajari. <sup>3</sup> Dsamatapa naco huapima Diocca danijidsa jiparidsamanajari. <sup>4</sup> Passo naqui Diocca daniji. Sibadsa qquenajaro dse dse naridsamanajari. Najaro sibapi Cristo. Pohua qqì toquina-jararaha pohuadeni ecahuabaqqi-ridsajari. <sup>5</sup> Naraha najarideni mota huapi taha pohuadenijine Diodsa bica tejeradsa Dio Pohuajine jicajari. Dsama huamoni ssono caji, siba caji tanihuaji assiredeni poponeri naridsajaripaja quinade.

<sup>6</sup> Nadsapi najaro imaha ia mari tocanabaqquijaro, iapi pina aja pohuadeni ima tabaccora tajaro tohuini quinajarissa inejeranijine. <sup>7</sup> Tiadenipi dio pohuamaccadsa tetidsemana-jeraji. Ajana, poccadeni nahatonijidsa huahuatidsemana najaridenipa pina Dio Atti dsodo nanidsa dsodo napojarossa quinajari: —Madijadenipa jassi taridsadsa jipade toquejena, dsede toquejena nadsapa dsobide toquejena nanaja najari —nani nade Dio Atti dsodo nanidsa. <sup>8</sup> Ia huapimapi huananehedsa iquejenajerana. Ajana, pohuadenina huananehedsa toquejenadsapa Diojine 23 mil naha amadsati jicajaripaja. Pina pohuadenissa inejeranijine, onajaro. <sup>9</sup> Iapi Cristo nattome inajarana. Ajana, pohuadenipa jamimanadsa Dio nattome quinajari. —Diocca najidsohue iadsa nohueranitide —quinaraha Diojine motapa macca cca cca idseri nadsapa jicajaripaja. <sup>10</sup> Paji, tedimanadsa ponima Diodsa atti atti tiquinejeraji. Ajana, icca idideni Moisesidsa nacasseraqquri nadsa atti atti quinadsapa Diocca dodosse madija nanajicade ccaronadsa inajicaridsajaripaja.

<sup>11</sup> Najaro ima icca ididenidsa tojajaro huapimapi ia icahatteranijine. Maittaccadsama Dio Atti dsodo quinapojarideni icca ididenicca ima dsodo quinapojaropi poccadeni imadsa ibodi huatonissa tanijine. Pina poccadeni imassa inajeranijine. Najaro imapi dsama jicani tohuajiranicca huajanodsa imadijarodsa bacco najonajaropaji. <sup>12</sup> Nema nadsapi tettidenia: —Icca jeheniji dacorani. Iedimajeranitohui —tiquinanitide. Nema tiquinaraha paji, tiedimamanarana. Imasiri tinamanana-jeranijine tiadeni tecahuamananissa taji, onajaro. <sup>13</sup> Imasiri inanani-jine ibodidsa ahuatojaropi madija huapimadsa najarossa naridsajaro. Nadsama tiadenipi nahatoqquri tiquinaji: Pajissa Diopa tibodideni acco tocamabaqquihitohui. Imasiri dacoraniccadsa tiejidsamananijine tipajiramana-jeradsapi Diona ecossaponitohui. Imasiri tinamanananijine ahuatodsapi tiedimamana-jeranijine Dio tiadeni tonadacora-baqquihitohui.

<sup>14</sup> Nema nadsapi tiadenidsa ohuati huana tadsa huati onajaro: Ohuemecotedeni, aja siba nahatonidsa huahuatidsemana najaridenidsa tiajimanani naji, onajaro. <sup>15</sup> Aji tiadenipi ima mittade nahatoqquri tiquinani onadsapi tiadenidsa huati onajaro. Occa marinaja ¿bica taqui? ¿bica tejeraqui? Tibodidenidsa nattome tiquinaji. <sup>16</sup> Aji Jesocristocca jipaqqiecca dsedse equididsa Diodsa: —Epejeni, ticca daniji bica tani —inadsa dse dse ihinanajaropi pohua emene toccajaricca imadsa huapima ijariqquijaro. Aja pan icanaroberidsadsa ihijipa najaropi pohua pohua ime ccaccorajaricca imadsa huapima ijariqquijaro. <sup>17</sup> Iapi huapi inaraha pan ojariadsa ijipaqquijarojinea itassaqquijaro. Pina essire ojarijarossa inajaropaji.

<sup>18</sup> Nadsama Isaraeri potemahi jodiodenicca imadsa naqui tibodideni huatomanaji. Ajana, bani Diodsa da quinahicca jipamanadsapa najaro imadsa ojariqquimanajari.

Najaro imadsa naqui Diodsa huatidsemanajari. <sup>19</sup> Ohuatti nema onajaropi siba nahatonipi dacorehe cajini, onejerajaro. Siba nahatonidsa bani da quinahicca naco pohuama. Dacorehe cappirahi. <sup>20</sup> Ohuattipi ajima najarona paji: Madija Diodsa ssamoqquiri najarideni poccadeni daniji siba nahatonidsa da da quinajaripa Satanacca dodosse tocorimedenidsana da da quinajari. Icca Diodsa jarahi. Tiadenidsa huati onana: Tocatorimedenicca imadsapi tiquejemamana tejeraji, onajaro. <sup>21</sup> Ia Medsedecca jipaqqueicca dsedse dse tiquinahi natti tocorimedsa da tahicca dsedse dse tiquinanijinepi bica tejerani, oppina tani. Ia Medsedecca jipaqquedsara tijipamanani ojari nanijine. Tocatorimedenidsa huatidsemanajaricca jipaqquedsa tijipamananipi bica tejerani, oppina tani, onajaro.

<sup>22</sup> Ajina, tocorimedenidsa huatidsemanajarideni tedseje iquejemadsapi ¿ia Medsede Dio ia tocahadibaqquihijine tohuini inajaroqui? ¿Nejecojarina denima dacorajari? ¿Iana Pohuadsa denima dacoraqquiri inajarorane? ¡Nohuerani!

*Itessedsa eti huana tadsapi pocca jeheniji inassamo-geranijine*

<sup>23</sup> Madija attidenipa: —Iadsa oppina tanicca nohuerani —quiquinanahi titimittamana najaro. Naraha ohuattipi: Paji, tohuini tiquinanicca motapi tiadeni acco cama-geranitide, onajaro. Najaro tohuini tiquinanicca tiadenidsapi oppina tejeranitide naraha ticcadeni jeheniji, timecotedenicca jeheniji todacora-gerani. <sup>24</sup> Tiadenidsa bica tanicca tojanijinera tibodideni huatomana tejeraji. Madija ohuahadenidsa naqui bica tanicca tojanijine tibodideni huatomanaji.

<sup>25</sup> Aja bani dadadsa bani da tahicca huapima tijipamanahijinepa bica tahi. —¿Ajajari banipa siba nahatonidsa da quinapojariccaco? —tiquinejeraji. Najaro ima tibodideni huatomana tejerana. <sup>26</sup> Aji dsama nemanehipi ia Medsedecca. Ajijaro dsamadsa aniridsajari huapima naco ia Medsedecca. Najaro imapi Dio Atti dsodo nanidsa anijaro.

<sup>27</sup> Nadsama madija ohuaha Diocca jararaha tiadenidsa: —Jina, occa odsahuaji tijipamanaji —nadsapa jipaqqquiri tiquinadsa pocca odsahuaji tijipamanani bica tani. Jijipa tiadenidsa da quinadsapa ticappinamana-geradsa tijipamanaji. Tibodidenidsa: —¿Ajajari banipa siba nahatonidsa da quinapojariccaco? —tiquinejeraji. <sup>28</sup> Naraha madija ohuaha tiadenidsa jipajari attipa: —Ajajari banipa siba nahatonidsa da quinapojariccaha —nadsapa tijipamana tejerana, nahi pohua atti timittamanani ahuato tanijine, pohua naco tijinedeni bodi jabojo najarahijine. <sup>29</sup> Najari bani tijipamana-geraji onajaropi tibodideni jabojo nanijine jerani. Titessedeni bodi jabojo narana onadsa tiadenidsa huati onajaro. Obodipi: Jesocristojine huapima ohuadsa toppineradsapi ¿nejecotohui ohuemecote ohuadsa: —Tijine bica tejerani —nahijine? <sup>30</sup> Ohuapi ojipabote nadsa Diodsa: —Epejeni, tijine bica tani —onadsana ohojipa najaro. Naraha ¿nejecotohui ohuemecote ohuadsa: —Najari tijipadsapi bica tejerani —najari? <sup>31</sup> Naraha tiadenipi ajima tinanamananina bica tani: Tijipamanadsa, dse tiquinadsa, tidsepedeni ijimanajarodsa naqui Diocca biquehe, pocca deni tojehe madijadsa ahuato tinanamanaji, onajaro. <sup>32</sup> Madija ohuahadenidsa ticcadeni madie tabaccora tinanamana-geraji. Jiodideni, jodio quejena-jarajarideni, Diodsa quequeriqquimana najarideni naco ocasserani tinahuabaqquimana tajarajo. <sup>33</sup> Ohuapi ajima onajaro: Madija huapimadsa ima bicani onananijine dissera onajaro. Ohuadsara bica tanicca tojanijine tohuini onejerani. Madija ohuahadenidsa naqui bica tanicca tojanijine. Pohuadeni naco Jesocristodsa toquejenadsa tocassiejerahijine, onajaro.

## 11

<sup>1</sup> Nadsama tiadenipi pina aji occa madiessa tinanamanana. Ohuapi Cristocca madiessa onananijine dissera onajaro. Najarossa tiquinaji, onajaro.



*Diodsa quequeriqquimana nahihuaji amoneje tatinideni teppe quinanjine*

<sup>2</sup> Jehe ohuemecotedeni, ohuadsa tetideni ajimamana-jeradsapi occa marinaja tecahuamana-dsanapojarojine tiadenidsa ohuatidsejaro. Tijinedeni bica tani, onajaro. <sup>3</sup> Nadsama ajijaro ima naqui nahatoqquiri tiquinaji, onajaro: Aja Cristopa maqquidejedenicca tamine. Maqquidejedenipa poccadeni amonejecca tamine. Diopa Cristocca tamine. <sup>4</sup> Nadsama maqquidejedenipa Diodsa huati toquinahijine, pohuadeni bodidsa Dio Atti ahuatodsa huati iququma-mananjine naqui tatideni teppe nadsapa bica tejerani. Tatideni teppe nadsapa Cristo ajamani inanamanajari. <sup>5</sup> Amonejedeni naqui aji titiqueriqqui nanidsa Diodsa huati toquinanjine, ponideni bodinidsa Dio Atti ahuatodsa huati iququma-mananjine naqui tatinideni teppe nejeradsapi bica tejerani. Ponidenicca maqqui ajamani inanabaqquimanajari. Diodsa quequeriqquimana nahidsa tatinideni tepperani huati huati toquinadsapi pina tatinideni conani beri canehe ccohua tajarossa najaro. <sup>6</sup> Amoneje poni tatini teppede jipera tadsapi tatini conani beri ticanamanehe ccohua taji. Naraha amoneje attinipi: —Otati conani beri canehe ccohua tanipi oppina tani —nadsapi poni tatini teppe nadsana bica tani, onajaro. <sup>7</sup> Naraha maqquidejepa pohua tati teppe najarana. Djojine maqquidejepa pina Pohuassa inanajari, dosseniji cajijaripaja. Diocca deni tojehepi maqquidejedsa ahuatotojaro. Naraha amonejedsapi ponicca maqquicca deni tojehe ahuatotojaro. <sup>8</sup> Dio maqquideje inahatopojaripa amonejedsa inahatojarahi. Amonejena maqquidejedsa inahatojaro. <sup>9</sup> Dio maqquideje inahatopojaripa amoneje bijini accode tojahijine jarahi. Amonejena maqquideje biji accode tojanijine inahatojaro. <sup>10</sup> Nema najaroa amonejedenipi tatinideni teppe teppe quiquinana-jaropaji. Najaro totati teppe teppeda imapi Diocca dodosse tabaqqui memehuaajicca naco nahatoqquiri nahi. Amonejedeni tatinideni teppe nadsapi: —Icca maqquipa ia cacahuade —quinani ahuatotojaro. <sup>11</sup> Naraha ia Jesocristodsa iquejenajaro maqquideje nohueradsapa amoneje nohueranitohuiraha. Amoneje nohueradsapi maqquideje nohuerahitohuiraha. <sup>12</sup> Aji amoneje maqquidejedsa nahatopojaropi pajissa. Naraha ajijaro ima naqui pajissa: Maqquideje dsotodedeniccapa amonejedenidsa tossonamanajonajaria ajijaropaji. Ajijaro dsamacca huapimapa Dio Pohuana tahidsama inahatoridsapojari.

<sup>13</sup> Jari, tiadenipi ¿nejecoma tiquinani? ¿Amoneje tatini tepperani Diodsa huati huati tadsapi bica taqui? Tibodideni huatomanaji. <sup>14</sup> Naraha iapi ibodidsa nahatoqquiri inajaro: Maqquideje tati cone dequeradsapa: —A, jidsa tahi —ihinanajaro. <sup>15</sup> Naraha amoneje tatini conani dequequeradsapi: —A, tatini conani bica tani —ihinanajaro. Nadsama aji amoneje tatinideni conani dequejararopi Djojine nema quinajaro. Najaropi pina ponideni tatini tetteppessa najaro. <sup>16</sup> Naraha madija ojaria, pama itide najaro imadsa jehe najaradsapa apajana. Pohuara nahato tana. Diodsa quequeriqquimana nahihuajicca huapima ia naqui najaro imadsa jehe inajaro.

*Jesocristocca jipaqqie pohuadenijine totabaccorajaro*

<sup>17</sup> Jidapapi ticcadeni ima onihi tiadenidsa dsodo onajaro. Najaro ima omittadsapi ohuatidse-jerani. —Jehe, tijinedeni bica tani —onejerani. Najaro ticcadeni imapi ajima nani: Aji Diodsa titiqueriqquimana najaropi bica tanijineraha tijinedenina totabaccorajaro. <sup>18</sup> Tahidecca ticcadeni imapi ajima najaro: Ohuadsa huati huati quinahi omittajaropi aji tiqueriqquimanadsapi tiadenira tiadenira tataridsamana najaro. Najaro ima motapi pajissa nitide, onajaro. <sup>19</sup> Jehe, nadsama tiadeni mota tiadenira titiqueriqquimaneri naridsani bica tejeraraha nema tiquinadsapi Dio jipa tahicca tinamananehe timadimanani huapimadsa ahuatotojaro. <sup>20</sup> Nadsama aji tiadenira tiadenira titiqueriqquimana nanidsa titijipamana najaro jipaqqiepi pina ia Medsede Jesocristocca jipaqquessa nejerani. <sup>21</sup> Jipaqquietohui ticcadeni

dsamatapa teteccajonamana naraha ¿nejecotohuira tiadenipi ticcadeni dsamatapa titijipamanapo najaro? Timecotedeni mota dsamatapa accoqquri nadsapa titessedeni mota pepemimana najari. Dsedse naqui timecotedeni mota pohuadeni idimanadsapa noccodeni janocqquri nanaja najaripaja. <sup>22</sup> Aji jipehetohui dseniji tohui tiquinadsapi ticcadeni odsahuajina jipaniji tiadeni idimana, dseniji tiadeni idimana neneje naji. Tiadenipi pina Diodsa quequeriqquimana najarideni ajamani tinanabaqquimanajarissa tiquinajaro. Cappiramanajarideni naco tijinedeni cacap-pinamana najari. Nadsapi tiadenidsa ¿nejecoma onapadseje? ¿Tiadenidsa: —Jehe, bica tani –onanijinequi? ¡Nema onejeranitohui!

*Ia Medsedecca jipacquie*

*Mateo 26.26-29; Maraco 14.22-25; Roca 22.17-20*

<sup>23-24</sup> Ohuemecotedeni, ia Medsedecca jipacquiecca ima timittamananissa tanijine tiadenidsa huati omanipomajaro. Aji tiadeni mari ocanabaqquijaropi ia Medsede Jeso pocca mamari tabaqqui mari icanabaqquipojari ohuattajarode. Aja ia Medsede Jeso Joda pohua eccorahicca dsomedsa jipade toquejenadsa pan idi nadsapa Diodsa huati tajari: —Jehe Abi Dio, ticca daniji iadsa bica tahi –napodsana pan icanarobedsa pocca mamari tabaqquidsa huati tajari: —Ajaropi ohueme. Titohuideni ohua ohuaccoradsa odsoqquenijine. Nidsa ohua nohue ojiradsa naqui ohuadsa tetideni ajimamana nejeranijine nema titidsanapomana nana, onajaro –najari Jeso. <sup>25</sup> Nadsa ajarideni jicadsapa dse naridsamanahijine dsedse bodi cajih equidi nadsa pohuadenidsa huati tapomajari: —Ajajari dsedsecca imapi Dio madija tedseje jehe canirehijinecca ima dsati tojanijine. Nidsa ohua odsoqquedsa ohuemene toccadsapi najaro jehe canireniji dsati pajissa tojanitohui. Aji ohuemene toccajaropi tiadenidsa ima bicani tojanijine. Nadsama aja dsedse tiadenidsa da ocanajaripa nidsa ohua nohue ojiradsa tiadenira naqui dse dse titidsanapomana nana, nani otohui tetideni ajimamana nejeranijine –najari Jeso. <sup>26</sup> Nadsama aja ia Medsede Jesocristo dsoqquehicca ima eti ajimajeranijinepi pan apa apa ihinanajari, dsedse naco dse dse ihinanajaripaja. Nema inanadsapi pohua dsoqquehicca ima ahuato inanadsanapojaroa pohua ccanihi bacco inanijine, onajaro.

*Ajima inanadsana Jesocristocca jipacquie ijipani bica tani*

<sup>27</sup> Nadsama ia Medsede dsoqquehicca ima eti ajima-jeranijinecca pan pohuama ijipadsapa Jeso imedsa imasiri inanajaro. Dsedse naco pohuama dse inadsapa Jeso emenedsa imasiri inanajaro. <sup>28</sup> Nema inejeranijinepi ia Medsedecca jipacquiedsa ijipa-jeraccadsama dse inejeraccadsama tahide ibodidsa icca ima nattome inapodsana bica tajaro. <sup>29</sup> Nadsama ia Medsedecca jipacquiedsa naqui pohua pohua ime ccaccorajaricca imadsa eti huatopodsapa ijipadsapi bica tani. Najaro ima ibodi huatojeradsa apa inajari, dse inajari nadsapa Dio ia najidso tahi. <sup>30</sup> Aja titessedeni motapa pohuama jipamanajari, dse quinajari najarojinea comaqquri naja, ocasseraqquri naja, dsodsoqqueri naja camajaripaja. <sup>31</sup> Naraha iapi ijipa-jeraccadsama tahide ibodidsa icca ima nattome inapodsana bica tajaro. Nadsama ima icajidsapi Dio icattemanijine Pohuadsa ecomerapodsapa ijipadsana bica tani. Nema inanadsapi ia Medsedecca najidsohue iadsa nohueranijine. <sup>32</sup> Naraha icca ima bica tejeradsa ia Medsede ia najidsojaripa icahatteranijine. Nidsa dsotode Diocca najidsohue bacco tadsa naqui dsori icanirenijine. Ajijaro dsamacca madija Jesocristodsa jehe quina-jarajaridenipa najidsohue jiquejeranihuaji toquejenahitohui. Naraha iapi pohuadenidsa iquejema-jeranitohui.

<sup>33</sup> Jehe ohuemecotedeni, ima onih naqui. Aji ia Medsedecca jipacquiedsa tijipamananijine tiqueriqquidsapi: —Ohuaha ojipapona –tiquinejeraji. Timecotedenitohui timadimanaccana, nani huapima paji tijipamanarini nanijine, onajaro.

<sup>34</sup> Nadsama madija pemidsapa pocca odsahuaji jipapona, onajaro. Tijinedeni ia Medsedecca jipacquie bica tadsapi Dio tiadeni tonajidsobaqqui-jarahitohui.

Nadsama nidsa nanihuaji tiadeni qquide occadsana tiadeni tedseje ima onihi ocattemanitohui, onajaro.

## 12

### *Dio Pohua Corimecca nahatohue da inaridsajaropi onihi onihi naridsajaro*

<sup>1</sup> Ohuemecotedeni, aji ima onihi ohuadsa dsodo tiquinajaro jidapana tiadenidsa ohuacomeranijine. Jesocristodsa tiquejenajarodenidsa Dio Pohua Corimecca nahatohue onihi onihi nehe da inaridsajaro. Najaro ima timittamananissa tanijine onadsa tiadenidsa dsodo onajaro.

<sup>2</sup> Ticcadeni ima tahidecca nahatoqquri tiquinani: Jesocristocca tiquejena-  
jeraccadsapi siba nahatoni onihi onihi naridsajarodsa tetetidsemana naccade. Najaro  
siba nahatonipi attini cappiraraha tohuini disseraqquri tiquinapojarode. <sup>3</sup> Nema  
najaro jidapanana ajijaro ima timittamananissa tanijine tohuini onajaro. Aja madija  
Dio Corimecca dacorehe cajijaripa: —Jesopa tabaccora tahi -najarahi. Madija  
ohuaha Dio Corimecca dacorehe cappiradsapa: —Jesopa ia Medsede -nahijine ssamo  
tahi.

<sup>4</sup> Dio Pohua Corimecca nahatohue onihi onihi nehe iadsa da inaridsajaropi huapi  
taraha Dio Corimepa ojarihi. <sup>5</sup> Ia Medsededsa idsepe ijiniijinepi onihi onihi nehe  
iadsa da inaridsaraha ia Medsedepa ojarihi. Puhuadsara idsepe ijijaro. <sup>6</sup> Dio  
pocca dacorehe onihi onihi nehe iadsa da inaridsajaro naqui huapi taraha Diopa  
ojarihi. <sup>7</sup> Puhuapa Jesocristodsa iquejenajaro ojari ojari inajarodsa Pohua Corimecca  
nahatohue onihi onihi nehe da inaridsajaro. Aji iadsa tojaridsajarodsa Jesocristodsa  
ihiqueriqqui najaro huapima acco acco icananijine, onajaro.

<sup>8</sup> Dio Corimecca nahatohue da inaridsajaro ojariepi Jesocristodsa toquejenajarideni  
mota Puhuajine bodideni nahatoqquri najari. Diocca ima madija mittamanahissa  
tahijine huatide pajiramanahissa tajari.

Nahatohue onihi ohuahadenidsa da inaridsajaropi Puhuajine bodidenidsa ima  
ahuato tadsa huati huati toquinajari.

<sup>9</sup> Nahatohue onihi motadenidsa da inaridsajaropi jehenijirideni denima daco torani  
najaro.

Nahatohue onihi ohuahadenidsa da inaridsajaropi madija inanomibaqqui-  
ridsamanajari.

<sup>10</sup> Nahatohue onihi motadenidsa da inaridsajaropi Diocca dacorehema canahatori-  
mana canajari.

Nahatohue onihi motadenidsa da inaridsajaropi Dio pahuadenidsa huati tadsapa  
Pohua Atti huati iqqumaridsa-manajaro.

Nahatohue onihi motadenidsa da inaridsajaropi Puhuajine bodidenidsa ima  
pajissacca, maidsehecca nahatoqquri najari. (Pina madija canahatori canahi qqui  
toquinadsa nahatoqquri nadsapa: —Najaropi Dio Corimejine jerani -quina tahi.  
Madija ohuahacca nahatohue qqui toquinadsa naco bodideni nahatoqquri nadsapa:  
—Najaropi Dio Corimecca dossenijia -quina tahi.)

Nahatohue onihi motadenidsa da inaridsajaropi Dio Corimejine tohuatti jidsa  
tajarodsa huati huati totoquina najari.

Ohuahadeni naco tohuatti jidsa tajaro mittamanadsa Dio Corimejine poccadeni  
madija attidenidsa huati huati ihiquimamana najari.

Nahatohue onihi motadenidsa da inaridsajaropi Diocca dacorehema canahatori-  
mana canajari.

Nahatohue onih motadenidsa da inaridsajaropi Dio pohuadenidsa huati tadsapa Pohua Atti huati iqquimaridsa-manajaro.

<sup>11</sup> Ajijaro nahatohue huapimapi Dio Corime jipa tadsa Jesocristodsa toquejenajari motadenidsa da da ihinaridsa najaro. Dio Corimepa ojariraha Pohuana madija huapimadsa inanaridsajaro.

*Jesocristodsa ijariqquijaropi pina essirecca imassa najaro*

<sup>12</sup> Nadsama essiredsa huanaridsanipi huapi tani. (Pina inocco, eribo, itone, itati najaro.) Huapima essiredsa ojariqquidsapi ojarie tojajaro. Aji Cristodsa ijariqquijarocca ima naqui najarossa najaro. Huapi inaraha Cristo pohua assire ojariassa inajaro. <sup>13</sup> Nadsama aji ijariqquijaro jodiodeni, jodio jarajarideni, madijacca dodosse toquejenajarideni, madijacca dodosse toquejena-jarajarideni ia huapima Jesocristodsa iquejenapodsapi Dio Pohua Corime iadsa tojaridsajaripaja. Dio Corimejine huapima Cristodsa ijariqquijaropi pina Cristo pohua assire ojariassa inajaropaji.

<sup>14</sup> Essirepi poni motta jerani. Mota huanaridsani huapi tajaro. <sup>15</sup> Emori attini cajidsapi ajima naneje: —Ohuapi todsepe ojajerarajone tohuassirecca ojajerani -nanitohuiraha. Naraha emorina essire tohuaccade. Essire nebonijine ssamo tani. <sup>16</sup> Nadsama eribo naqui attini cajidsapi ajima naneje: —Ohuapi tonocco ojajerarajone tohuassirecca ojajerani -nanitohuiraha. Naraha eribona ima mimitta. Essire nebonijine ssamo tani. <sup>17</sup> Essire nemanehi inocco ojaridsapi tohuatti imittajeranitohuiraha. Essire nemanehi eribora ojaridsa naqui majo tahicca jissi inajarahitohuiraha. <sup>18</sup> Aji essiredsa huapima huanaridsajaroccapo Dio madija inahatopodsama Pohua jipa tahihuaji inahanaridsapojaro. <sup>19</sup> Aji essiredsa huanaridsajarora ojaridsapi essirepi nohueranitohuiraha. <sup>20</sup> Ajijaro imapi pajissa: Essiredsa huanaridsajaropi huapi taraha essirepi ojarijaro.

<sup>21</sup> Nadsama inocco attini cajidsapi idsepedsa: —Tiapi poni. Ohuana tohuassire ohuacahuajaro -nanijine ssamo tani. Aji itati naqui attini cajidsapi emoridsa: —Tiapi poni. Totati ohuana bica onajaro -nanijine ssamo tani. <sup>22</sup> Ajima najarona pajissa: Essire mota onihidsa: —Japari tani -inaraha najaro icajidsapi imadinissa tajaro. <sup>23</sup> Essire mota onihidsa naqui: —Ajimani tojanicca -inaraha najaropi ia inabicanijine. Naraha aji essirecca mota onih qquidepi oppina tani. Najaro ecahuanissa tanijine etero edsadsa ia qquide oppinera tani. <sup>24</sup> Nadsama aji essire mota qquide oppinera tajaropi inajima-jerani. Essirecca imapi Diojinena nema najaro. Aji essire ajimani tojajaro motapi Dio Pohuana inanabicajaro. <sup>25</sup> Jehe, essire motapi ponira ponira naridsa-jerani. Huapima ponideni cacahuamanani. Essire mota naqui ponidenira acco acco cana tani. <sup>26</sup> Aji essire mota naqui ocasserani ahuadsapi essire huapima ocasserani ahua tani. Essire mota ojarie inanabicadsa naqui essire nemanehi huapima huatidse tani.

<sup>27</sup> Nadsama tiadeni huapima Cristodsa tijariqquimanadsapi: —Cristo pohua assire tiquejenani -inajaro. Aji ojari ojari taridsamanajaropi Cristo assire mota tiquejenajaro. <sup>28</sup> Aja Jesocristodsa quequeriqqui najaridenicca ima bica tanijine dsepedeni ijimanahijinepa Diona pohuadenidsa inanaridsajaro.

Tahide motadenipa Jesocristocca dodosse tabaqqui toquejenahijine inanabaqquijari.

Dsotode ohuahadenipa Dio Atti huahuati toqquimade toquejenahijine inanabaqquijari.

Dsotode ohuahadeni naco Dio Atti maride toquejenahijine inanabaqquijari.

Ohuahadenipa canahatorimana canaridsahijine inanabaqqui,  
comaqquiri najarideni inanomibaqqui-manahijine inanabaqqui,  
madija bijideni acco camade toquejenahijine naco inanabaqqui najari.

Jesocristodsa quequeriqquimana najarideni dossede toquejenahijine naco inanabaqqui,

tohuatti onihi jidsa tajarodsa huati huati totoquina nahijine naco inanabaqqui najari.

<sup>29</sup> ¿Naraha huapimapa Jesocristocca dodosse tabaqqui toquejenahijineco? No-huerahi. ¿Huapima Dio Atti huahuati toqquimade toquejenahijineco? Nohuerahi. Huapima Dio Atti maride toquejena-jarahi. Huapima canahatorimana cana-jarahi.

<sup>30</sup> Huapima madija tonanomide nahatohue cajimana-jarahi. Tohuatti jidsa tajarodsa huatide huapima pajiramana-jarahi. Tohuatti jidsa tajaro huati toqquimade naco huapima nahatogquiri najarahi. Aji ia huapima Jesocristodsa iquejenajaropi Djojine idsepe ijinihijine Pohua Corimecca nahatohue onihi onihi da da ihinaridsa najaro.

<sup>31</sup> Tiadenipi Dio Corimecca nahatohue denima bica taniccatohui disseraqquri tiquinaji, onajaro.

Jidapapi ima denima bica taniccara tiadeni mari ocanabaqquina, onajaro.

## 13

### *Tohuati huanehecca imana denima bica tajaro*

<sup>1</sup> Tohuatti onihi huapima huatide nahato onadsa, Diocca dodosse tabaqqui memehuaajicca attideni huatide naqui nahato onadsapi occa ima Diodsa bica tanijineraha madijadsa ohuati huanera tadsapi occa ima Diodsa bica tejerani. Ohuattipi ponima tojanitohui. Pina beobeo tocatabaccoradsa mohuini jidsa tehe imittajarossa najaro.

<sup>2</sup> Aji Jesocristo tahimari ohuacomera-ridsajaro naqui nemaneha nahato onadsapi, otedsejemacca ima huapima nahato, tohuattehe huapima nahato onadsapi occa ima Diodsa bica tanijineraha madijadsa ohuati huanera tadsapi ponima nahatohue ocajijaro. Occa ima Diodsa bica tejerani. Occa jeheniji Diodsa dacoradsa ssono pajimaranihuaji toccanijine naqui huati onadsa toccanijine opajiradsapi occa jeheniji bica tanijineraha madijadsa ohuati huanera tadsapi occa ima Diodsa bica tejerani.

<sup>3</sup> Aji odsepetaji huapima ocajijarocca naqui tohuati nahanaqquri najaridenidsa da onehe jicadsapi occa ima Diodsa bica tanijineraha madijadsa ohuati huanera tadsapi occa ima Diodsa bica tejerani. Jesocristo tahimaridsa dissera onajarojine madija ohua inanadsoqqe-mananijine ohuassire ohuaccoradsa naqui occa ima Diodsa bica tanijineraha madijadsa ohuati huanera tadsapi occa ima Diodsa bica tejerani.

<sup>4</sup> Nadsama tohuati huanehepi ajima najarona paji: Ima iadsa ssonaridsa edijeradsa mohuaradsa inahanajaro. Madija tohuattattera tadsa naco huadie jirehe mari icanajari, mari icanapomajari, mari icamanipomajari najari. Huapimadsa bicaqquri inajaro. Amoneje acconi, todsepetaji acconi, tarabajidsa acconi naqui itessedenidsa edijerajaro. Ia ettidsa ia deni inana-jerajaro. Ihijine bica tadsapi: —Ohua motta nahato onani ojari onana -inejerajaro. <sup>5</sup> Tohuati huanehe icajidsapi tohuatti tabaccora tanicca, jidsehe tabaccora tanicca huatira inajaro. Accoqquri inejeranijine: —Ohua mottacca -inejerajaro. Tohuati huanehe icajidsapi huadi inejerajaro. Madija iadsa ima inanamanadsa naqui poccadeni ima ibodi huahuatomacca nejerajaro.

<sup>6</sup> Ima pajiranissa tejeraniccadsa, ima tabaccora taniccadsa etidse-jerajaro. Ima pajissaccadsana ehettidse najaro. <sup>7</sup> Tohuati huanehe icajidsapi itessejine bica tejeraraha nema nehe pohuadsa eti huana tajaro. —Itessepa bica tahi, maidsera tahi, madihissa tahi -inajaro. Pohuajine bica tejerani qquri inadsa naqui: —Nidsa pocca madie tobicanitohui -inajaro. Pohuajine ocasserani edsa naqui mohuaradsa inahananijine ipajirani.

<sup>8</sup> Tohuati huanehepi nema dsanaponitohui. Nidsa aji Djojine madijadsa ahuato tadsa huati huati totoquina najaripa nebomanahitohui. Aja madija tohuatti jidsa tajarodsa huati huati totoquina najari naco jicanitohui. Dio Corimejine tohuattehe



cajimanaraha najaro naqui amossi nanitohui. <sup>9</sup> Dio Corimejine nahatohue onihi onihi naridsajaro motara icajijaro. Nahato inanissa tejerani. Dio Atti huahuati toqquimadedeni naco itedsejemacca ima nemaneha nahatoqquiri najarahi. Djojine mota pohuadenidsa ahuato tajarora huati huati ihigquimamana najaro. <sup>10</sup> Najaro nahatohue icajipojaro huapimapi nidsa Djojine pajirahissa tahicca ccajonadsapa jicaridsanitohui.

<sup>11</sup> Nadsama ejedeni ojaponipi ejedenicca imara huati huati ohonanaccade. Obodi naqui ejedeni bodi huatojarissa onaccade. Ejedeni ijaponicca imara ohocattejidsa naccade. Naraha onapidsa obiji ccaradsapi ejedeni ojaponicca imapi onattihuaaji onanaridsehe jicajarode. Ajijaro namidsa imadiccadsapi Diocca ima nemaneha icahatteranissa tejeraccani pina ejedeni ijaponicca imassa inajaro. <sup>12</sup> Jidapanapi Diocca ima nemaneha imittanissa tejeraccani. Pina pipiridsa icorime qqui inajarossa najaro. Dsidsi tadsapi pipiridsa icorime qqui inaraha qqui inanissa tejerani. Naraha nidsa dsotodena Diocca ima nemaneha qqui inanissa tanitohui. Cristo pohua pano, assirema qqui inahitohui. Jidapapi Diocca ima motara nahato onajaro. Opajiranissa tejerani. Nidsa dsotodena pocca ima huapima nahato onanissa tanitohui. Pina Pohua ohuadsa nocco jidsera tajarissa nanitohui.

<sup>13</sup> Ima bicani jicaquera taniccapi 3 najaro. Ojariepi icca jeheniji. Diodsa pajissa idsanaponitohui. Ima onihipi itedsejemacca ima bicani tohuini imadidsanaponitohui. Ima onihi naqui tohuati huanehe nema dsanaponitohui. Aji ima 3 najaropi bicaqquiri naraha tohuati huanehena denima bica tajaro.

## 14

### *Tohuatti jidsa tajarodsa huatide*

<sup>1</sup> Tohuati huanehe ticajimananjine disseraqquri tiquinaji. Dio Corimecca nahatohue onihi onihitohui naqui disseraqquri tiquinaji. Pocca nahatohue ojariepi denima bica tajaro. Najaropi aji Dio Corimejine madija bodidsa Pohua Atti ahuatodsa huati iqquimajaro nahatohuena —Ohuadsa tojana –titiquina naji. <sup>2</sup> Aja madija Djojine tohuatti jidsa tajarodsa huati huati tajaripa Dio Pohuadsara huatide tojajari. Iapi pohua atti imitta-jerajaro. Dio Corimejine ima bicani huati huati taraha iadsa ahuatora tani. <sup>3</sup> Naraha madija ohuahapa Dio Atti pohua bodidsa ahuatorarocca huati iqquimadsapi pohua imecotedenicca jeheniji todacorani najaro, madija ihinahatidsebaqqi najari, madija huatideni ihinassonabaqqi najaripaja. <sup>4</sup> Nadsama aja tohuatti jidsa tajarodsa huati huati totoquina najaridenipa pohuadeni motta Diodsa poccadeni jeheniji todacorani najaro. Naraha madija Dio Atti huati iqquimaridsa-manadsana Diodsa quequeriqquimana najaridenicca jeheniji todacorani najaro.

<sup>5</sup> Tiadeni huapima tohuatti jidsa tajarodsa huati huati tiquinanipi ohuadsa bica tani. Naraha Dio Atti huati tiqqumaridsa-mananina ohuadsa denima bica tajaro. Najarona ima deni tojanicca. Tohuatti jidsa tajarodsa huatidepi ajimani. Naraha timecote tohuatti jidsa tajarodsa huati huati tadsa pohua atti huati toqquimade anidsapa bica tani. Nahi aja Diodsa quequeriqquimana najaridenicca jeheniji todacoranjine. <sup>6</sup> Ohuemecotedeni, nidsa tiadenihuaaji occadsa tohuatti jidsa tajarodsa tiadenidsa huati huati onadsapi ¿tiadeni acco camanjinequi? Acco cama-jerani. Ponimassa nanitohui. Naraha Dio ohuadsa ahuato inanajarocca huati onadsa, pocca nahatohue tiadenidsa huati onadsapi najarona tiadeni acco camanitohui. Pohua Atti huati oqquimadsa, marinaja bicani tiadeni mari ocanabaqqidsa naqui tiadeni acco camanitohui.

<sup>7</sup> Nadsama totore naqui camittehe cappiraraha mohuinipi ajie totoja najaro. Aja madija tire tire quinaja, tore tore quinaja nadsa naco mohuini jidsa tadsapi ajie mohuini imittanissa tejerani. <sup>8</sup> Soldado naco jadsirecca jei jei mohui mittamanadsapa

huapima jadsiretohui domo toccahijineraha jeihei mohui jidsa tadsapa domo toccajarahitohui. <sup>9</sup> Ticcadeni ima naqui najarossa najaro. Tettideni jidsa tajarodsa huati huati tiquinadsapi ¿nejecoma nadsa tettideni mittamanahijine? Tettideni mohuinipi ponima jojodedsa totocca najaro. <sup>10</sup> Aja madija dsama onihicca, dsama onihicca naco huapima attideni cajimanaridsajari. Tohuatti huapima aniridsajaropi ponima jerani. Pohuadeni atti camitterara cacana najari. <sup>11</sup> Naraha madija ohuadsa huati huati tadsa pohua atti omitta-jeradsapi pohua bodipa ohuadsa: —Ajaripa dsama onihicca madija -nahitohui. Ohua naqui pohuadsa: —Dsama onihicca madija -onanitohui.

<sup>12</sup> Nadsapi timecotedeni tedseje Dio Corimecca nahatohue onihi onihi naridsajaro tohuini tiquinadsapi Jesocristodsa quequeriqquimana najarideni jehenijirideni todacorani nanijineccara —Ocajina -titiquina naji, onajaro. Nema nanicca huemani ticajimananijine disseraqquri tiquinaji.

<sup>13</sup> Nadsama madija tohuatti jidsa tajarodsa huati huati taraha pohua atti tomittanjaradsapa Diodsa huati tana, nani pocca huatinaja pohua bodidsa ahuato tadsana pohua imecotedenidsa huati iqquimanijine. <sup>14</sup> Ohua naqui tohuatti jidsa tajarodsa Diodsa huatide ojadapi ocorimema huati huati onaraha omittani-jerani. <sup>15</sup> Najaro imapi ¿nejecoma onanani bica tajaro? onajaro. Naraha bica tanijinepi Diodsa huatide ojadapi ocorimema Pohuadsa huati huati onanijine, omittajaroccam Pohuadsa huati huati onanijine. Diodsa jiri jiri onadsa naqui ocorimema Pohuadsa jiri jiri onanijine, omittajaroccam Pohuadsa jiri jiri onanijine. <sup>16</sup> Tiadeni naqui ticorimedenima tohuatti jidsa tajarodsa Diodsa tetidsemanadsa: —Jehe Abi Dio, tijine bica tani -tiquinaraha aja timecotedeni tohuatti jidsa tajaro mittamanajarajardenipa tiadenidsama Diodsa: —Jehe, bica tani -quinahijine ssamo tani. <sup>17</sup> Aji tohuatti jidsa tajarodsa Diodsa huati huati tiquinani bica taraha najarodsaapi timecotedenicca jeheniji todacora-jeranitohui, onajaro. <sup>18</sup> Nadsama tiadeni motapi tohuatti jidsa tajaro ticajimanaraha tiadenipi ajimani huati tiquinajaro. Ohuana denima tohuatti jidsa tajarodsa huati huati onajaro. Najarojine Diodsa: —Jehe, epejeni, bica tani -ohonanajaro. <sup>19</sup> Aja Diodsa quequeriqquimana nahihuaji tohuatti jidsa tajaro 10 mil nehe huati huati onani opajiraraha ohuemecotedeni mittamanajarahitohui. Naraha aji tohuatti mittamanahissa tahicca 5 nehera huati onanijinena denima bica tajaro, onajaro.

<sup>20</sup> Ohuemecotedeni, najaro imadsa tibodideni huatomanadsapi pina ejedeni bodi huatojarissa tiquinejeraji. Tabaccorehe ssamoqquri tiquinana, pina ejedeni tossoned sati tabaccorehe ssamo tajarissa tiquinanijine bica taraha ima nattomede tiquejenadsapi pina madija jadahi bodi nahato tajarissa tiquinaji, onajaro. <sup>21</sup> Dio Atti dsodo nanidsapi:

—Nidsaranibote occa madijadsa dsama onihicca madija attidenidsa huati onanitohui. Dsama onihicca madijana pohuadenidsa Ohuatti ecomeramananitohui.

Naraha najarodsa naqui bodideni huato-jarahitohui. Ohuattissa inanamana-jeranitohui -napohui nade Dio.

<sup>22</sup> Nadsama najaro imadsa iattajaropi tohuatti jidsa tajarodsa huatidepi Diodsa jehe quina-jarajardenidsa pocca ima ahuato tanijine. Najaro imapi jehe quinajaridenidsa jerani. Naraha Dio Atti huati toqquimadepi Diodsa jehe quinajaridenidsa pocca ima ahuato tanijine. Najaro imapi jehe quina-jarajardenidsa jerani. <sup>23</sup> Diodsa titiqueriqqui nanidsa huapima tohuatti jidsa tajarodsa huati huati tiquinadsapi madija ohuaha pina tohuatti jidsa tajaro mittapo-jarajari itide, Diodsa jehe najarajari itide, nama najari Dio Atti mittade qquedsimadsa tettideni mittadsapa: —A, ajarajardeni madijapa bodideni tossamoridsajari -nahitohui. <sup>24</sup> Naraha aji titiqueriqqui nanihuaji huapima Dio Atti huati toqquimade tiquejenadsapi madija ohuaha pina tohuatti jidsa tajaro mittapo-jarajari itide, Diodsa jehe najarajari itide, nama najari Dio Atti mittade

qquedsimadsa tettideni mittadsapa: —A, ohuapi imasiri ocajini –nahitohui. Nadsapa pohua bodicca ima nattomede tojahijine. <sup>25</sup> Nama nadsapa pohua bodicca ima ecomajarocca pohuadsa ahuatomanitohui. Nahi Diodsa huatidsedsa pohua pitodsa huitta nadsa: —Diopa bica tahi, deni tojahi –nahijine. Diopa tiadenidsa pajissa anihi pohuadsa ahuato tahitohui.

*Tijinedeni titiqueriqqui nanicca mohuaradsa toccanissa tanijine*

<sup>26</sup> Ohuemecotedeni, aji huati huati onajaropi ajima najaro: Titiqueriqqui nahicca madija ajie nahatode nahato tadsapa jiri jiri nahijine. Ohuahapa Dio Atti mari mari nahijine. Ohuahapa Djoline pohuadsa ahuatomadsapi ecomeranjine. Ohuahapa tohuatti jidsa tajarodsa huati huati nahijine. Ohuahapa Dio Corimejine tohuatti jidsa tajaro mittadsapa huati iqquimanijine. Najaro ima huapimapi timecotedeni huapima jehenijirideni todacorani dsanaponijine, onajaro. <sup>27</sup> Aji tohuatti jidsa tajarodsa huatidepi madija pamaha, 3 quinahitide huati toquinahina bica tani. Denimapi poni. Tiadeni naqui huapima huati huatipi poni. Pina ajima tiquinaji: Madija ojaría huati taha jicadsa manaco ohuaha huati, jicadsa ohuaha huati, titiquina naji. Tohuatti jidsa tajarodsa huati huati toquinadsa naco madija ohuaha najaro tohuatti Dio Corimejine mittadsapa tettidenidsa huati iqquimani bica tani, onajaro. <sup>28</sup> Naraha madija tohuatti jidsa tajaro huati toqquimade nohueradsapa titiqueriqqui nanidsa tohuatti jidsa tajarodsa huati tiquina tejeraji. Tiadeni motta tibodidenidsara huati huati tiquinaji. Diodsa naqui tibodidenidsara huati huati tiquinaji, onajaro.

<sup>29</sup> Aji titiqueriqqui nanihuaji naqui Dio Atti huati toqquimade toquejenadsapa madija pamaha, 3 quinaha naco huatide toquejenahijine bica tahi. Nadsapa taharibomanajaridenipa huati huati toquinahi mittamanadsa pohuadeni bodidsa attideni nattome quinana. Pina: —¿Dio Attissa najaroqui? –quinahijine. <sup>30</sup> Nadsama madija ojaría Dio Atti huati toqquimade tojaraha nahidsa huittarijari bodidsa Djoline ima pohuadsa ahuatomadsapi huati taccahijine tahideccapa joma naccana. <sup>31</sup> Nema tiquinadsa Dio Atti huati toqquimade ojari ojari tiquinadsapi bica tani. Nahi Dio Atti tocahatteradsapa huapima catidserara canahijine. <sup>32</sup> Dio Atti huati toqquimadedenipa pohuadenidsa Djoline ahuatomajarocca mohuaradsa pohuadeni bodidsa ecahuamananjine pajiramanajari. Nama quinahijinepa pohuadeni tesse huatide tojaccadsapa tocadidire naccahijine. <sup>33</sup> Diopa tohuatti quejemama canadsa pina mohuanijissa najarocca jipera tajari. Pohua Atti mohuaradsa imittanijinena jipa tajari. Diopa jonehe jinede. Pohuadsa quequeriqquiridsa najarideni huapimapa nama quinahijine.

<sup>34</sup> Diodsa iqueriqquinidsa amoneje naqui atti quina-geradsa tocadidire naccanjine. Pina Diocca dosseniji dsodo nanidsa anijarossa quinanjine: —Amonejedenipi maqquidejedenidsa deni toquejena-gerana –nade. <sup>35</sup> Dio Atti mamaridecca marinaja mittamananissa tejeradsapi nidsa ponidenicca odsahuajina ponidenicca maqquidsa huati toquinadsana mittamananjine. Titiqueriqqui nanidsapi amonejedeni atti atti quinani bica tejerani.

<sup>36</sup> —Iadsana Dio Atti ahuatomapojarode –¿tiquinajaroqui? —Iadsana Dio Atti tojani ojari najaro –¿tiquinajaroqui? Nema nejerani. <sup>37</sup> Madijapa: —Dio Atti huahuati toqquimade ojani, Dio Corimejine nahato onani –nadsapa pajissa Dio Corimejine nahato tadsapa pohua bodidsa occa ima ahuato tanitohui. Ia Medsede pocca dosseniji ohuadsa ahuato inanadsapi tiadenidsa dsodo onajaro. <sup>38</sup> Naraha ia Medsedecca dosseniji dsodo onajarodsa madija pajissa najaradsapa apajana. Nadsapi pohua atti naqui timittamana tejeraji, onajaro.

<sup>39</sup> Nadsama ohuemecotedeni, Dio Atti huati toqquimade tiquejenanjine tohuini disseraqquri tiquinaji. Titesse tohuatti jidsa tajarodsa huati huati tadsa naco

tecossamana tejeraji. <sup>40</sup> Naraha titiqueriqqui nanicca ima huapima tijinedeni mohuaradsa toccanissa tana, onajaro.

## 15

### *Cristo nahatonijaricca ima*

<sup>1</sup> Ohuemecotedeni, tetideni ajima-jeranijine tiadenidsa huati omanijaro. Jesocristo tahimari icassiejeranijinecca tiadenidsa ohuaccorapojarode. Najaro imadsa jehe tiquinadsapi tinebomana nejerajaroa ajijaropaji. <sup>2</sup> Aji icassiejeranijinecca imadsa dissessera tinadsapi ticassiejerajaropaji. Naraha dissessera tinejeradsapi ponima jehe taridsamanajaro.

<sup>3</sup> Aji Jesocristo tahimari ohuattapojarocca tiadeni mari ocanabaqquijaropi denima bica tanicca. Najaropi ajima najaro: Cristopa icca imasiri manaconi dsoqquejari, pina Dio Atti dsodo quinapojarossa najaro. <sup>4</sup> Cristo huatiadsa ppa idsamanaraha huada 3 nadsapa nahatonijaride. Najaro naqui Dio Atti dsodo quinapojarodsa nema napojaro. <sup>5</sup> Nahatonidsapa Pedrodsaha ahuatoniopojari. Nahi dsotodepa pohua huatimadedeni 12 quinajaridenidsa ahuatoniopomajari. <sup>6</sup> Nahi dsotode naco pohuadsa jehe quinajari 500 quinajari, naraha denima itidija, najarideni huapima queriqquimanahidsa ahuatoniopomajari. Najarideni motapa ajijaro ima teppe dsodode ojadsa madimanahipaja naccahi. Naraha mota pamadema nahapa jicaridsapohui. <sup>7</sup> Nahi dsotode Satiacodsa naco ahuatoniopomajari. Nahi dsotode naco pocca dodosse tabaqqui huapimadsa ahuatoniopomajari.

<sup>8</sup> Nahi dsotode jicarihiccapa ohuadsa ahuatoniopomajari. Ohuapi pina ejedeni pohua tossonahicca huada bacco tajaraccaraha tossonapojarissa onajaro. Ohuapi Jesocristodsa jehe onapo-jeraraha ohuadsa ahuatodsana pocca ojajarode. <sup>9</sup> Nadsama Jesocristocca dodosse tabaqqui tahideccapa bicaqquri naraha ohuapi ajimani ojajarode. Tahidepi Jesocristodsa toquejenajarideni Dio Attidsa totoqueriqqui najarideni ohonajidsobaqqui naccade. Jesocristocca dodosse tabaqqui ojanijine bica onejeraraha Jeso pohuajinena pocca dodosse ojajarode. <sup>10</sup> Naraha Diopa ohuadsa bica tajari. Occa najidsohue epeje inanajarode. Ohua catidsedsapa pocca dodosse ojajaro. Pocca biquehe naqui ponima ohuadsa toja-jerani. Najaroinena Pohuadsa odsepe ijinissa tajaro. Nadsama motadenipa ajamani dsepedeni ijimanajari. Naraha ohuana denima odsepe ijijaro. Aji odsepe ijijaropi ojine jerani. Dio ohua acco camadsa odsepe ijiridsajaro. <sup>11</sup> Naraha: —¿Nejecojarina denima dsepe ijijari? —inejerana. Aji tiadeni mari ocanabaqquijaroa aja Jesocristocca dodosse tabaqquideni naco occa marinajassa najaro tiadenidsa mari mari quinajaripaja. Najaroa aji tiadenipi najarodsa pajissa tiquinajaropaji.

### *Jicajaridenipa Dio inahatonibaqquihitohui*

<sup>12</sup> Naraha icca marinajapi: —Cristopa dsoqqueraha Djojine nahatonijari —ihinanadsapi ¿nejecotohui tiadeni motaha: —Jicajaridenipa nahatonimana-jarahitohui —titiquina najaro? <sup>13</sup> Nassa nahatonie nohueradsapi Cristo naco nahatoni-jaranaja. <sup>14</sup> Cristo nahatoni-jaradsapa icca marinaja ponima tojanitohuiraha. Ticcadeni jeheniji naqui ponima tojanitohuiraha. <sup>15</sup> Pajissa nahatonie nohueradsapi icca marinaja aji: —Djojine Cristo nahatonijari —ihinanajaropi Diodsa maidsehe inananeje. Pajissa nahatonie nohueradsapi Cristo nahatoni-jaranaja. <sup>16</sup> Aji tettideni: —Jicajaridenipa nahatonimana-jarahitohui —titiquina nadsapi nassa Cristo naco nahatoni-jaranaja. <sup>17</sup> Pajissa Cristo nahatoni-jaradsapa ticcadeni jehenijipi ponima tojaneje. Ticcadeni imasiri naqui tiadenidsa nema dsanaponeje. <sup>18</sup> Nassa najaro ima pajissa tojadsapi aja Jesocristodsa jehe quinajari jicapojaridenipa paja amossihujarihi nanaja. <sup>19</sup> Cristo iadsa ima bicani inananijine tohuini imadijaro. Naraha ajijaro namidsara ima bicani

iadsa tojani ojari nadsapi pina tohuati nahanaqquiri najaridenissa inaraha iapi denima tohuati nahanaqquiri inaneje.

<sup>20</sup> Naraha Cristopa pajissa nahatonijari. Puhuapa pina huidsajacca bono tahidecca pore quinapojarissa najari. Cristo tahide nahatonipojarijine madija huapima naco dsotode nahatoniridsa-manahitohui. <sup>21</sup> Nadsama madija ojariacca imajine ajijaro namidsa dsoqqeche madijadsa tojajaro. Madija ojariacca imajine naqui madija dsoqquemanajaridenidsa nahatonie tojajaro. <sup>22</sup> Adana potemahi iquejenajarojine ihidsoqqe najaropaji. Cristodsa iquejenajaro naqui idsoqqueraha pohuajine imadipomanitohui. <sup>23</sup> Naraha iapi dsotode iquejenajaro. Cristona tahide nahatonipojari. Nidsa Cristo ccanipomadsapa ia huapima pocca iquejenajaro inahatoniridsanitohui. <sup>24-26</sup> Nani dsotodepi ajijaro dsama jicanicca ima tojanitohui. Nadsapa cacahuehe cajimana, dacorehe cajimana, nahatohue cajimana najarideni huapima Cristojine jicaridsahitohui. Cristo deni tojadsapa poccadeni dacorehe naqui inajicanitohui. Nadsapa pohuana memehujacca, namihuajicca huapima dossede tojahitohui. Huapima ecahuabaqqui-dsanapojaria pocca huadideni huapima ajamani inanabaqquihitohui. Pocca huadi jicahicca inajicadsapa madija denima dsoqquemanajarahitohui. Najaropi dsoqqeche jicajaro. Nadsapa Cristo pocca Abi Diodsa pocca cacahuehe da inanitohui. <sup>27</sup> Diojine Cristo deni tojadsapa huapima ajamani toquejenajari. Pina pohua amori bacconihuaaji toquejenajarissa quinajari. Naraha najaro ima timittamanadsapi: —¿Dio naco Cristodsa ajamani tojarico? —tiquinanitidija. Nohuerahi. Pohuajinena huapima Cristodsa toquejenajari. <sup>28</sup> Diopa huapima Pohua Bedi Cristodsa iboraqquiri inanabaqquidsapa Cristo naco Imehi Diodsa ibora tahitohui. Jehe, Diojinepa huapima Cristodsa toquejenajari. Nadsapa Diodsa huapima iboraqquiri najari. Puhuana dosse dosse nahi ojari najari.

<sup>29</sup> Nahatoniecca ima denima huati onana. Aja timecotedeni motapa poccadeni madija totopa jiraha jicajari onidenidsa totopa cajimanaraha ¿nejecotohui nama quinajari? Pajissa madija nahatonimana-jaradsapa nassa totopa jiraha jicajarideni naco nahatonimana-jaranaja. Nadsapa pohuadeni onidsa totopa cajimanajaripa ponima.

<sup>30</sup> Ia naqui ¿nejecotohui oppinehedsa imadiridsajaro? Nassa nahatonie nohueradsapi ponima oppinani eridsaneje. <sup>31</sup> Ohuemecotedeni, pajissa huati onajaro. Ohuapi huada huajijiradsa oppinehe onihi onihi onahanaridsajarojine odsoqquebote naridsajaro. Najaropi pajissa, pina pajissa tiadeni ia Medsede Jesocristodsa tiquejenadsa ohuatidsejarossa najaro. <sup>32</sup> Aji Epesodsa omadidsa naqui odsoqquenijine madija otohui inacomaridsamanajaro, pina dsomaji huadi tajarissa quinahi. Puhuadenidsa Dio Atti maride dissera onaraha poccadeni huadie onahanani manaconi ¿nejecora ocajijaro? Jicajarideni pajissa nahatonimana-jaradsapa ponima maride ocasserani ohuaridsaneje. Nadsapi aja madija ohuaha attideni: —¡Jari, ijipana! ¡Dse inana! Dsemassa onihi ijicadsapi nemarade —quiquinanajaridenissa inana.

<sup>33</sup> Paji, madija attideni nama nama quiquinanajaridenipa tiadeni tocamidsabaqqui-manarana. Aji ima titimittamana najaropi: —Madija madieri bica tajarajari titesse tojadsapa ticca madie bicani amossi nanitohui —quiquinanajari. <sup>34</sup> Tibodideni huatoma-mananissa taji. Ticcadeni imasiri naqui tinebomanaji. Diodsa ssamoqquiri najarideni tiadenidsa animanahi. ¿Najaridenijine ticomehimanajeraqui? onajaro.

### *Essire inahatoninicca imapi ajima najaro*

<sup>35</sup> Tiadeni motapi ajima tiquinanitide: —Jicajarideni nahatonimanahijinepa ¿nejecoma quinapadsaja? ¿Assiredeni naco nejecoma najarora cajimanapadsaja? —tiquinanitidija. <sup>36</sup> Apaja, tiadenipi ¿ssamoqquiri tiquinajarorane? Jari, dsamatapa nocco tahimaridsa tiadeni mari ocanabaqquina. Dsamatapa nocco ppa todsajaripa



nahi namidsa jadsiraha moro tajarina assire dsati tojajari. <sup>37</sup> Tapatohui inadsapa ede ppa ppa inajarajari. Noccona dappo dappo inajari, moro tahijine. Dsamatapa ohuaha nocco cajiridsajari naco najarissa naridsajari. <sup>38</sup> Nocco assirepa pohuara pohuara naridsajari, pina Dio Pohua jipa tajarissa inanajari. Dsamatapa moro tajari naco Djoline assire ohuaha ohuaha cajiridsajari. <sup>39</sup> Namidsa madimanajari assiredeni naco huapima najarissa naridsa-jarahi. Madijapa assire ohuaha. Bani assire ohuaha. Bani eppe cajihi assire ohuaha. Aba naco assire ohuaha naridsamanajari. <sup>40</sup> Memehuaajicca naco huapima assiredeni cajiridsamanahi. Aja namihuaajicca naco huapima assiredeni cajiridsamanahi. Aja memehuaajicca biquenedeni ohuaha. Aja namihuaajicca naco biquenedeni ohuaha naridsamanajari. <sup>41</sup> Maji ssiejenepa pina abadsico ssiejenessa najarahi. Abadsico ssiejene naco abadsico bedi ssiejenedenissa najarahi. Abadsico bedi ssiejenedeni naco ohuaha ohuaha naridsajari.

<sup>42</sup> Nadsama ia naqui nema inanitohui. Idsoqquedsa inahatonidsapi essire onihi dsatira icajinitohui. Idsoqquedsa essire ppa idsamanajaropi totabaccorara tanicca. Naraha inahatonidsapi essire totabaccorarera taniccana tojajaro. <sup>43</sup> Etiadsa essire ppa todsani jadsidsapi tohuajari nadsa tehe toja tani. Naraha inahatonidsapi bicanira tojanitohui. Ajijaro namidsa imadijarocca essirepi dacore-jerani. Naraha inahatonidsapi essire dacoranitohui. <sup>44</sup> Aji essire ppa ppa todsajaropi ajijaro namidsa imadijarocca. Naraha essire nahatonijaropi Diohuaji imadinijinecca. Dio madija assire namidsa madihijine inahatodsapa memedsa madihijinecca naco inahatojari.

<sup>45</sup> Dio Atti dsodo nanidsapi ajima najaro: —Tahidecca madija Adanapa namidsa madihijine Djoline camitta tajari —nani nade Dio Atti dsodo nanidsa. Naraha aja Cristo pohuadsa: Adana jicarihicca ihinanajaro pohuana memehuaaji madihijine pajirajari. Pohuapa camittehe jiquejeranicca da inajaro. <sup>46</sup> Essire tahideccapi memehuaaji imadinijinecca jerani. Essire tahideccapi namidsa imadijarocca. Dso-todeccana memehuaaji imadinijinecca. <sup>47</sup> Tahidecca madijapa ssiqui nahatojari, namidsa madijari. Dsotodecca madija memehuaajicca Cristo. <sup>48</sup> Ajijaro namidsa essire imadijaropi pina Djoline ssiquidsa madija inahatopojarissa inajaro. Nidsa memehuaajipi essire pina memehuaaji madijari Cristossa inanitohui. <sup>49</sup> Jidapapi pina madija ssiqui nahatojarissa inajaro. Nidsa dsotodena pina Cristo memehuaaji madijarissa inanitohui.

<sup>50</sup> Ohuemecotedeni, tiadenidsa huati onana: Aji namidsa imadidsa ime, emene icajijaropi Diocca cacahuehehuaji toja-jeranitohui. Pohua madihihuajipi totabaccorarera tani. Essire totabaccorara taniccapi nanidsa madinijine ssamo tani. <sup>51</sup> Naraha ajijaro ima tiadenidsa huati onanijinepi madija mittamanapo-jarahicca. Ahuatora taporaha jidapana tiadenidsa huati onajaro. Madija ia motapi idsoqque-jeranitohui. Naraha jicapojarari assiredeni, ia mota idsoqque-jerajaro essire huapima cacajiqquimeraridsanitohui. <sup>52</sup> Ajima nanitohui: Essirepi amadsati cacajiqquimeranitohui, pina inocco pari najarossa nanitohui. Nidsa jei jei jicahicca jei jei nadsapa aji namidsa imadijarocca ima jicanitohui. Nadsapa jicapojarideni nahatonimanahitohui, jicapoma-jarahijine. Nadsapa nahatonimanajari assiredeni, camittacquiri inaccajaro essire huapima cacajiqquimeranitohui. <sup>53</sup> Ajijaro namicca essire totabaccorara taniccapi totabaccorarera taniccara tojanitohui. Essire huatiaha taniccapi huatiehera taniccara tojanitohui. <sup>54</sup> Aji essire totabaccorara tanicca jica, huatiaha tanicca jica nadsapi totabaccorarera tanicca, huatiehera tanicca tojadsapi Dio Atti dsodo napojaro pajiranissa tanitohui: —Dsoqquehepi Diocca dacorehejine jicajaro, amossi najaro —nani nade. <sup>55</sup> Dio Atti dsodo nani onihidsa naqui: —Nija Dsoqquehe ¿nejecohuaji ticca dacorehe? Nija Dsoqquehe ¿nejecohuaji ticomene? —nani nade Dio Atti dsodo nanidsa. <sup>56</sup> Aji dsoqquehe comanipi imasiri. Najarojine madija paji idsoqquerinicca najidsohuedsa toquejenajaripaja. Diocca dosseniji tahideccapi

madija imasiri inanamanani pohnadenidsa ahuato inanajaro. <sup>57</sup> Nadsama ia Medsede Jesocristo pocca dacorehejine icca imasiri inanamossidsa idsoqquedsapi iadsa najidsohue nohueranitohui. Nema nadsapi Diodsa etidsedsa: —Jehe, epejeni. Tijine bica tani -ihinanajaro.

<sup>58</sup> Jehe ohuemecotedeni, tiadenidsa ohuati huana tani. Ima nema nadsapi dacoco tijiradsa nema tidsanapomanaji. Ia Medsedecca dossenijidsa tidsepedeni ijimanadsapi denima, denima tidisseramanani naji. Ajijaro imapi nahatoqquri tiquinani: Ia Medsedsa tidsepedeni ijjaropi ponima jerani. Pohnajine tiadenidsa ima bicani tojanitohui.

## 16

### *Da naqqinaja imecotedenidsa*

<sup>1</sup> Jidapapi imecotedeni Diodsa jehe quinajari acco ticamabaqqi-manahijine da naqqinaja tahimarini tiadenidsa huati onana. Pina aja dsama Carasiahuaji Diodsa quequeriqquimana najaridenidsa huati onaridsapojarossa tinanamananijine bica tani. <sup>2</sup> Najaroa aji semana tojapomanicca huada tahidecca domingo huajijiradsa da da taqquimananijine titicajimana najaro arobeni motapi tetecahuaridsamana naji, ticcadeni daniji tohuapinijine. Ticcadeni tarabajidsa manaconi badsira tadsapi arobeni badsira tehe tecahuamanaji. Ticcadeni tarabajidsa manaconi motaradsapi arobeni motarehe tecahuamanaji. Ticcadeni dsiniro da taqquimanapodsapi najorapodsana nani bacco onadsa odinijine. Nadsapi da naqquide tinajomananijine. <sup>3</sup> Titiqueriqqui nanicca imecotedeni naco ticattejidsa-baqquimanana, nani bacco onadsapi odsana panani Jerosarehuaji dosse onabaqquihijine. Ticcadeni da naqqinaja Jerosarehuaji iaccamananijine ima teppe naqui pohnadenidsa da onadsa iaccamananijine. Najaro ima teppedsa Jerosarecca imecotedeni nahatoqquri nahijine. <sup>4</sup> Ohua naqui nanihuaji occanitide, oqquejeranitide. Tiadenina paji. — Jehe ticcanijine bica tani -tiquinadsapi occanitohui. Pohnadeni naco ohuadsa jai tojahitohui.

### *Pablo pocca benehi najorapojari*

<sup>5</sup> Nidsa occa benehi occadsapi dsama Masedoniahuajia occaridsaponitohui. Masedoniadsa qqui onaridsehe jicadsapi nani Corintohuaji bacco onanitohui. <sup>6</sup> Nanihuaji bacco onadsapi tiadenidsa badsira tehe omadiccanitide. Denima omadiccana onadsapi dsadsajade onajicanitide. Dsadsajade onajicadsapi dsama onihihuaji occanijine obiji acco ticamamanana, onajaro. <sup>7</sup> Pina tiadeni qqui, oqqueqquima nanijinepi jipera onani. Tiadenidsa omadi naccanijinena tohuini onani. Ia Medsede jipa tadsapa nema onanitohui. <sup>8</sup> Naraha aji odsana panani Epesodsa omadiccani, jodiodenicca ejete Pentecostes onajicaccanijine. <sup>9</sup> Ajidsa ia Medsedecca dosseniji odsepe ijiniijine tohuabanissa tajaro. Ima bicani tojanijine nahato onani: Madija Diodsa toquejenana canahitohui. Ahuajicca madija mota huapi taha ohuadsa jiperaqquri naraha motana jipaqquiri najari.

<sup>10</sup> Nadsama Timoteo nahihuaji bacco tadsapa pohnadsa tetideni huanacquiri nana, nahi huatidsehijine. Pohnapa ia Medsedecca dossenijidsa dsepe ijijari pina ohuassa najari. <sup>11</sup> Timecotedeni mota naco pohnadsa: —Ponima ticcajonajaro -quinajarana. Pina acco ticamamanana, ohuadsa bacco najonahissa tahijine. Ohuapi ajidsa ohuemecotedeni tedseje pohnatohui imadiccani.

<sup>12</sup> Apolo naco imecotedeni tedseje tiadeni qquide nahi toccahijine huatide dissera onaraha toccade jipera tahi, najora-jaraccadsa. Nidsa najoradsana tiadeni qquide toccahitohui.

### *Pablocca ima jicanicca*

<sup>13</sup> Tetideni huatodsa jai tijaridsanissa taji. Jesocristocca imadsa dissessera tinadsa pocca imadsara jehe tidsanapomanaji. Cappineraqquri tiquinadsa Diocca dacorehema dacoco tijiraji. <sup>14</sup> Ticcadeni tohuati huanehema, huatidsehema tidsepedeni ihijiridsamana naji.

<sup>15</sup> Ohuemecotedeni, Estepanacca ima nahatoqquri tiquinani. Ticcadeni dsama Acaiahuaji Jesocristo tahimari icassiejeranijinecca mari ocanabaqquipodsapa Estepanana pocca madijama Jesocristodsa jehe quinapojaride. Dsotodena madija ohuahadeni Jesocristodsa toquejenaridsajaride. Estepanapa pocca madijama imecotedeni Jesocristodsa jehe quinajari bijideni accode disseraqquri najaride. <sup>16</sup> Nadsama tiadenipi Estepanadeni attidenidsa, aja imecotedeni pina Estepanassa quinajari attidenidsa naqui iboraqquri tiquinana, onajaro. Aja imecotedeni acco icamabaqquimanajarideni, aja Dio Atti mamaridedeni, najarideni huapima attidenidsa naqui iboraqquri tiquinana.

<sup>17</sup> Tiadenipi huajiji tinajarojine ohua acco ticamamananijine ssamo tani. Naraha Estepana, Fortonato, Acaico quinajarideni ohuahuaaji bacco quinadsapa ohuatidsejaro. <sup>18</sup> Puhuadenipa Dio Attidsa obodi acco icamamanajarojine ohuatidsejarode. Tiadeni naco tiadeni tonahatidse-baqquimanajari. Puhuadenidsa bicaqquri tiquinaji. Madija ohuahadeni pina najaridenissa quinajaridenidsa naqui tetetidsemana naji. — Puhuadenipa bicaqquri nahi -titiquina nana.

*Diodsa quequeriqquimana najarideni nija naridsamanajari*

<sup>19</sup> Nadsama aja dsama Asiahuajicca Diodsa quequeriqquimana nahihuaajicca huapimapa tiadenidsa nija quinajari. Aquira pocca amoneje Prisira tadsajani, poccadeni odsadsa quequeriqquimana najarideni naco ia Medsede onima nija quinajari. <sup>20</sup> Imecotedeni huapima naco nija quinajari. Tiadeni naqui titesse jehe quinajarideni tedseje bacco ticaniredsapi nija tiquinadsa dama, ticahuajacossa titiquina naji, onajaro.

<sup>21</sup> Aji ohua Pablo naqui tiadenidsa nija onajaro. Ajijaro ima jicaniccapi ohua odsepedsa dsodo onajaro.

<sup>22</sup> Ia Medsede Jesocristodsa jiperaqquri najaridenipa apaja, Dio inajidsobaqquina. ¡Nija, ia Medsede ticcaniji! onajaro.

<sup>23</sup> Jehe, ia Medsede Jesocristopa tiadenidsa ima bicani inanana, onajaro. <sup>24</sup> Jesocristocca tohuati huanehema tiadeni huapimadsa ohuati huana tani. Pajissa nema nana. Epejeni.

## Pablotenipa Corintodenidsa ima teppe dsotodecca dosse quinajaro 2 Corintios

Pablopa tahide odsa panani Corintohuaji toccapohuipa nahidsa huajano pamaha madijari. Dsotode naco nahihuaji Jesocristodsa toquejenajarideni qquide toccapomajari. Pohuadenidsa ima teppe dsodode naco dissera tajari, Dio Pohua jipa tahicca tochatterahijine.

Pocca ima teppe tahideccadsa: 1 Corintodenidsa, inajaro. Dsotode pocca ima teppe pohuadenidsa dsodo inapomajaro. Naraha najaro ima teppepi iadsa toja-jerani. Amossi nani. Najaro nattini ima teppe onihi dsodo inapomajaropi ajijaro. Ajaropi dsotodemaniccaraha ajarodsa: Corintodenidsa ima teppe dsotodecca, inajaro.

Ajijaro ima teppepi Pablo pohuadsa tojiperamanajari quinahi mittadsa pohuadenidsa dsodo inapomajaro. Aja pohuadeni quequeriqquimana nahihuaji maidsehe mamaridedeni jai tojedsimajari. —Pablopa Diocca dosseniji jarahi, pocca marinaja timittamana-jeraji –quinadsapa Pablodsa tojiperamanajari.

Nadsapa Pablo pohuadsa Dio pajissa huahua najaricca ima, Jesocristo tahimari mari mari najarijine ocasserani ahuaridsajaricca ima dsodo inajaro. Pohuadenidsa huati huana tadsa pocca marinaja bicani onihi onihi dsodo inajaro.

### *Pablo, Timoteo tedseje nija quinajari*

<sup>1</sup> ¿Nija, ohuemecotedeni? Ohuapi Pablo. Tiadenidsa dsodo onajaro. Dio jipa tadsa Jesocristocca dodosse ojajaro. Ohuemecote Timoteo tedseje tiadenidsa: —¿Nija, bicaqquri tiquinaqui? –inajaro. Ajijaro imapi nani dsama arobeni Acaiacca odsa panani Corintohuajicca Dio Attidsa titiqueriqquimana najarodenidsa dsodo inajaro. Najaro ticcadeni dsama arobenidsa Jesocristodsa jehe quinajari madiridsamanajaridenidsa naqui dsodo inajaro. <sup>2</sup> Icca Abi Dio, Pohua Bedi ia Medsede Jesocristo tedseje tiadenidsa ima bicani inanamana-dsanapona, inajaro. Poccadeni jonehe naqui tibodidenidsa tojadsanapona, inajaro.

### *Diopa ia acco tocamabaqqi tahi*

<sup>3</sup> Ia Medsede Jesocristocca Abi Diodsa etidsena. Pahuapa icca Abi iadsa huati cahanari canahi. Huajijiradsa ia acco acco tocamabaqqi najari. <sup>4</sup> Ocasserehe onihi, onihi iadsa ssonaridsapi Dio ibodi acco camajari. Nadsapi imecotedeni ocasserani ahuanadsa naco acco icamabaqqihijine ipajirani. Pina Dio ia acco tocamabaqqijarissa najaro imecotedeni acco icamabaqqijari. <sup>5</sup> Jesocristopa ocasserehe huapi tehe inahanajaro. Nadsapi ia naqui pina Cristo pohua ocasserani ahujarissa inajaro. Ocasserehe inahanani huapi taraha Jesocristocca iquejenajarojine Diocca acco camehe iadsa jiquejerani. <sup>6</sup> Aji ia ocasserehe inahanajaropi ponima jerani. Tibodideni acco icamabaqquinijine, tossiejehe ticajimananijine ocasserehe ihinahana najarode. Dio ibodi acco camadsapa ia naqui tibodideni acco icamabaqqijaro. Nema nadsapi ocasserehe pina iadsa ssonaridarossa najaro tiadenidsa ssonaridsapi mohuaradsa tinahanamananijine tipajiramananitohui. <sup>7</sup> Nadsama ocasserehe tinahanamanajaro pina ocasserehe inahanajarossa nadsapi Dio tiadeni acco tocamabaqqi hitohui. Pina ia acco tocamabaqqijarissa nahitohui. Najaro pajissa tojanijine nahatoto inajaro.

<sup>8</sup> Imecotedeni, dsama Asiahuaji jaijadsa ocasserani imeni inahanajarocca ima nahatoqquri tiquinanijine tiadenidsa dsodo onajaro. Najidsohue oppinabote iadsa

ssonaridsapi ipamajonabote nade. Iadsa tocasserani nadsapi: —Nidsa ajijaro najidsohue jicadsapi imadipomanitohui –inejerade. <sup>9</sup> Ibodidsa: —Pajissa ipamajonanitohui –inade. Naraha ipamajonanjine Dio ecossadsapi imadiccajaro. Nadsapi najaro oppinehejine iadsa ahuato tajaro: Madija iapi ia inassiajanijine ipajira-jerani. Diona nahato tahi ojari najari. Puhuapa huatiajarideni nahatonide. <sup>10</sup> Puhuapa dsoqqehe oppinabotedsa ia dsori tonanabaqquijari. Puhuadsa pajissa inadsapi nidsa dsotode paji idsoqquerinicca najidsohuedsa naco ia dsori tonanabaqquihitohui. Nadsapi etti: —Jehe, ia dsori tonanabaqqui-dsanapohuitohui –ihinanajaro. <sup>11</sup> Tiadeni naqui ia acco ticamabaqquimananjine Diodsa huati huati tiquinaji. Diodsa huatide huapi tadsapa Puhuadsa huatidsemanahi naco huapi tahitohui. Diopa ima bicani iadsa inananicca ima imecotedeni mittamanadsapa Puhuadsa: —Epejeni, tijine bica tani –quinahitohui.

*Pablopa Corintohuaji toccani-jarajaricca ima*

<sup>12</sup> Ohuemecotedeni, tiadenidsa imadidsapi imadinissa tade. Najarodsa etidsejaro. Ima icappirehe imadijaro. Etti naqui maidsehe jirehe huati huati inajaro. Madija huapimadsa naqui bicaqquiri inadsa nema inaridsajaro. Naraha icca madie bica tajaropi ibodi nahato tajarojine jerani. Dio iadsa huati huana tadsa ia acco tocamabaqquijarijinena imadinissa tajaropaji. <sup>13-14</sup> Occa ima teppe tiadenidsa dsodo onajaropi ima najo tanicca dsodo dsodo onejerani. Ima najora tanicadsa dsodo dsodo onajaro. Aji occa ima teppe timittamananissa tanijine jipa onaraha jidapana motara timittamanajaro. Nidsa dsotodena timittamananissa tanitohui. Nidsa ia Medsede Jesocristo ccanipomahicca huada bacco tadsa tiadenipi iadsa tetidsemananitohui. Pina jidapana ia tiadenidsa etidsejarossa tiquinanitohui.

<sup>15</sup> Iadsa tetidsemananjine nahato onadsapi tahide tiadeni qquide occapona, onade. Nema onadsa tiadeni qquide occani pamadsapi ima bicani naqui tiadenidsa onanani pamanijine. <sup>16</sup> Obodi huatodsapi ajima onade: Dsama Masedoniahuaji occadsapi nani tiadenidsa onajocana. Dsotodena Masedoniahuaji occa, omadi, occanipomadsapi tiadenidsa onajopomaccanjine, onajarode. Dsotode occa benehijine ohua acco ticamamanadsapi dsama Jodeahuaji occaninjine, onade. <sup>17</sup> Naraha tiadeni qquide occapoma-jeradsa joma onadsapi ohuadsa: —A ¿Pablopa bodi huatohuissa tajarajarico? –tiquinejeraji. Ohuapi pajissa tiadeni qquide tohuini onadsapi occana, onade. Aja madija ohuahapa: —Jehe, ajima onanana –naraha huada onihidsapi: —Poni, nema onejerana –nahi caji tahi. Tettideni ohuadsa: —¿Pablopa nama najarico? –tiquinarana. <sup>18</sup> Naraha ohuapi nema onejerani. Diopa occa ima nahato tajari: Ohuapi maidsera onani. Pina Dio maidsera tajarissa onajaro. Ohuapi jehe onanitide, poni onanitide onejerani. <sup>19</sup> Aji ohua, Silvano, Timoteo inadsa Dio Bedi Jesocristo tahimari tiadeni mari icanabaqquidsa ettipi: —Jesocristocca imapi pajissa nitide, pajissa jeranitide –inejerade. —Pohua tahimari nemanehipi pajissa –inajaro. —Puhuapa pohua attissa inanaridsajaro –ihinanajarode. <sup>20</sup> Jehe, Jesocristo pohuapa Imehi Dio huati tapojarissa inanajaro. Nema nadsapi Jesocristodsa iquejenarajine Abi Diodsa etidsedsa ettipi: —Pajissa nema nana –ihinanajaro. <sup>21</sup> Nadsama Dio Puhuajinena Jesocristodsa iqueriqquinijine icca jeheniji, ticcadeni naqui todacorani najaro. Puhuapa ia tocattejidسابaqquijari. <sup>22</sup> Nadsapi Pohua pocca iquejenani ahuato tanijinepi pocca nanajanodsa ia najanoridsajarissa najaro. Najaria aja Pohua Corime ibodidsa inanajari paja. Pohua Corime icajidsapi nidsa dsotode Pohua huati tapojaricca icajinjine nahatoqquiri inajaro.

<sup>23</sup> Ohuemecotedeni, omaidsa-jerani. Diopa obodi nahato tajari. Tiadenidsa pajissehera huati onejeradsapi Dio ohua najidsohui bica tani, onajaro. Aji tiadeni qquide Corintohuaji occapoma-jerajaropi tiadenidsa ohuati huana tadsa. Ohuatti oji ticanamananjine jipera onajarode. <sup>24</sup> Tiadenidsa naqui: —Ajima tiquinaji



-inanijine tohuini inejerani. Jesocristodsa jehe tiquinanissa tani nahatoqquri inajaro. Tetidsemananijinena tiadeni acco camade tohuini inajaro.

## 2

<sup>1</sup> Jehe, tiadeni oji onanabaqquinijine jipera onadsapi: ¡Epeje! Tiadenihuaaji occapoma-jeraccana, onajarode. <sup>2</sup> Ojine oji oji tiquinadsapi ¿nejecojaridenina ohua inahatidsemanapadseje? Nohuerahitohui. Tijinedenina ohohuatidse najaro. <sup>3</sup> Najarojine tiadenidsa occa ima teppe dosse onajarode. Nani oqquejerana onajaropi tijinedeni oji onanijine jipera onadsa. Tijinedeni ohuatidsenijinena bica tani. Nahato onani: ohuatidsedsapi tiadeni naqui tetidsemananitohui. <sup>4</sup> Naraha occa ima teppe dsodode ojadsa titohuideni obodi huatoto canadsapi: ¿Nejecoma quinahi? ohonanade. Obodi ocassera tadsa oji onade. Naraha occa ima teppe tiadenidsa dsodo onajaropi oji tiquinanijine jerani. Titohuideni ohuati huana tani nahatoqquri tiquinanijinena dsodo onajarode.

—*Ima tonanajaricca imadsa: “Epeje, eti ajimani” tiquinana –najari Pablo*

<sup>5</sup> Nadsama titiqueriqquimana nanicca ojariapa ohua oji tonanajaride. Ohuaha oji onani ojari-jerani. Tiadeni naqui pohuajine oji tiquinade. Naraha najaro ojiepi imeni jerani. Ojine ima denima tojanijine jipera onani. <sup>6</sup> Aja tiadeni mota pocca imajine huati ticanaqquimanajaripa epejena. Nanidsa jicana, onajaro. <sup>7</sup> Jidapapi pocca imadsa: —Epeje, eti ajimani –tiquinana. Nadsapa pohua bodi acco ticamamanajo, onajaro. Bodi ocassera tadsa madi-jararana. <sup>8</sup> Nadsapi ohuatti bica tadsa tiadenidsa huati onana, ohuattissa tinanamananijine. Pohuadsa tetideni huanagquiri nani ahuato tinanamanapomana, onajaro. <sup>9</sup> Najaro imatohui tahide tiadenidsa dsodo onapojarde ¿Ohuattidsa iboraqquiri naco? onadsa. Nahato onanijine tiadeni nattome onabaqquide. <sup>10</sup> Jehe, nadsapi najaricca imadsa, madija ohuahacca imadsa naqui: —Epeje, eti ajimani –tiquinadsapi ohua naqui poccadeni imadsa: —Epeje, ohuati ajimani –onajaro. Imecote ima cajidsapa nema onanitohui. Cristo obodi nahato tajari: nema onajaropi tiadenidsa ima ocassera tejeranijine. <sup>11</sup> Nema inadsapi Diocca huadi Satana iadsa deni toja-jarahitohui. Pocca ima nahatoqquri inani: ia tonehedima-baqquihijine najorajari.

—*Pabloa Troadehuaji madi-dsanapohuijine jipera tajari*

<sup>12</sup> Jehe, nadsama Jesocristo tahimari icassiejeranijinecca maride odsa panani Troadehuaji bacco onadsapi nahihuaicca madimanajarideni mari ocanabaqquihijine ia Medsedejine tohuabanissa tajarode. <sup>13</sup> Naraha nanidsa imecote Tito bacco onajaradsapa pohuatohui obodi huatoto canajarojine omadinissa tejerade. Nema onadsapi ohuemecotedenidsa: —Masedoniahuaji occaccana –onadsa nanihuaaji occajarode.

—*Pabloa Diodsa: —Epejeni, tijine bica tani –najari*

<sup>14</sup> Jehe, ima onihi, onihi caji taraha nema nehe Diodsa: —Epejeni, tijine bica tani –ihidsanapo nana, onajaro. Pohuajine Jesocristocca deni tojehedsa iquejenadsapi deni iquejenajaro. Pohuajine Jesocristo tahimari icassiejeranijinecca ecomeraridsapsapi dsama huapimadsa tojaridsajaro. Pina majo bicabote tojaribaqquijarissa najaro. <sup>15</sup> Iapi pina majo bicabote Cristo Diodsa da inajarissa inajaro. Pohua tahimaridsa idsepe ijjaropi Diodsa bica tajaro. Idsepe ijiridsajarojine tocassiejerahijinedenidsa, tocassiejera-jarahijinedenidsa bacco inaridsajaro. Pina majo bicabote toccabaqquidsa madijadsa bacco taridsajarissa inajaro. <sup>16</sup> Jesocristo tahimari tocassiejera-jarahijinedenidsapi pina majo tabaccora tajarissa najaro. Najari majopa dsoqquehejinecca. Naraha tocassiejerahijinedenidsapi pina majo bicabotessa najaro. Najari majopa camittehecca. Jesocristo tahimaridsa pajissa quina-jarajaridenidsapi

dsoqqehe jiquejeranicca tojanitohui. Pajissa quinajaridenidsa camittehe jiquejeranicca tojanitohui. Naraha ¿nejecojarina najaro ima inajaribaqquinijine maride pajirahi? <sup>17</sup> Aja Dio Atti mamaridedeni motapa manaconitohuira mari mari nanaridsamana naraha iapi nema inejerani. Jesocristodsa iquejenajaropi pajissa Dio Pohua Atti ponira huati inanissa tanijine imadijaro. Ia Dossede Diopa ia qqui tabaqquijari.

### 3

#### *Diocca dosseniji dsati tahimarini*

<sup>1</sup> Etti nema inadsapi tiadenidsa pina: —Iana bicaqquiri inajaro, deni iquejenani –¿inajarossa najaroqui? Tiadenidsa icca ima nema nanitide. Naraha iapi nema inejerani. Dio Atti maride ohuahadenipa tiadeni mari tocanabaqqui-manahijine tohuini quinadsapa pohuadeni tahimari ima teppedsa dsodo nani nohue nohue quiquinanapojaro, —Jehe poccadeni marinaja imittana –tiquinanijine. Naraha iapi nema inejerani. Etti naqui tiadenidsa: —Iadsa ima teppe dsodo tiquinaji, odsa panani onihihuaji madimanajaridenidsa nohue inanijine –inejerani. Ima teppe jirehe maride jaijaridsajaro. <sup>2</sup> Aji tiadenina icca ima teppessa tiquinajaro. Ticcadeni imapi ibodidsa pina dsodo najarossa najaro. Aja odsa panani onihihuaji madimanajaridenipa ticcadeni ima nemanehe nahatoqquiri najari. Ticcadeni madie bica tani qqui toquinadsapa pohuadenidsa ahuato tajaro: tiadeni mari icanabaqquinijine Dio ia tocadossebaqquijari. <sup>3</sup> Jesocristojine ticcadeni madie bica tajaro huapima qqui toquinajari. Najaro ticcadeni imapi pina Cristojine dsodo nani nohue inaridsajarossa najaro. Naraha najaro dsodo nanipi dsodsodo ppajaniccadsa jerani. Pina sibadsa dsodo najarossa nejerani. Dio camitta tajari Corimejine tibididenidsa dsodo inajarossa najaro.

<sup>4</sup> Jehe najaro imapi pajissa nahatoto inajaro. Jesocristocca iquejenajarojine Diodsa pajissa inanijine ipajirajaro. <sup>5</sup> Naraha Diodsa idsepe ijiniijine ia motta ipajirani inejerani. Diona idsepe ijiniijine iadsa inanajaro. <sup>6</sup> Pohuajine inajoranissa tadsapi pocca jehe canireniji dsatidsa idsepe ijijaro. Najaropi pina Dio pocca dosseniji tahidecca Moisesidsa da inajarossa nejerani. Najaro dosseniji tahideccadsara madija madimanadsapa dsoqqehe jiquejeraniccadsa toquejenajari. Naraha Diocca jehe canireniji dsatidsa madimanajaridenipa dsoqqehe jiquejeraniccadsa toquejenajarajari. Camittehe jiquejeranicca, madie dsati naqui Dio Corime pohuadenidsa da inaridsajaro.

<sup>7</sup> Diocca dosseniji tahideccapi Pohuajine bica tapojaro. Ssono tetepihuaji pocca deni tojehe, Pohua dsibehine ahuato inanadsa pocca dosseniji sibadsa dsodo inadsa Moisesidsa da inajaro. Najaro ssonodsa Dio dsibehine dacoradsapi Moisesi panodsa dsapa tajaro. Naraha Moisesi pano dsibehi taha qquedsippanidsapa Isaraeri potemahideni cappinamanajari. Pohuahuaaji qqui naja cama-jarajari. Pohua pano dsibehine bica taraha tohuatora-ra amossi najaro. Jehe Diocca dosseniji tahideccapi bica tajaro. Dacorehema ccajonaraha madijapa najarodsara madimanadsapa dsoqqehe jiquejeranihuaji toquejenajari. <sup>8</sup> Aji Diocca dosseniji dsati Pohua Corimecca dacorehema ccajonarajona denima bica tajaro. <sup>9</sup> Najaro imapi pajissa: Diocca dosseniji tahidecca madijadsa dsoqqehe inanajaropi bica taraha pocca dosseniji dsati madijadsa camittehe inanajarona denima bica tajaro. Pocca dosseniji dsatidsa iquejenadsapi Dio icca ima Pohuadsa inapajiranissa tajaro. <sup>10</sup> Nadsama Diocca dosseniji tahideccapi biquehe cajiporaha pocca marinaja dsaticca biquehena denima bica tajaro. <sup>11</sup> Diocca dosseniji tahidecca bica taraha pina Moisesi pano dsibehine jicajarossa najaro. Naraha pocca dosseniji dsaticca biquehe deni tojajarona nema dsanaponitohui.

<sup>12</sup> Diocca dosseniji dsatipi bica tehe nema dsanaponitohui nahatoto inadsa najaro dosseniji ecomeraridsanijine icappina-jerajaro. <sup>13</sup> Najaro dosseniji dsatipi inajima-jerani. Aja Moisesipa pohua pano dsibehine tohuatorani Isaraeri potemahideni qqui toquina-jarahijine pohua pano odsa najari quinahi nade. Naraha iapi pina Moisesissa inejerani. Diocca dosseniji dsati ecomeranipi ahuato tajaro. <sup>14</sup> Naraha Isaraeri potemahideni mittamanahijine huaribodeni sibaqquri najari. Pohnadenipa Diocca jehe canirenijicca dosseniji tahidecca hua hua quinaporaha huaribodeni sibaqquri najonamanajaria aja jidapana naco mittamana-jarajaripaja. Cristona ojarijari huaribodeni inassiajabaqquidsa mittamanahijine. <sup>15</sup> Jehe jidapana naco Moisesijine dsodo nanicca hua quinadsapa mittamanahijine bodideni pajiramana-jarajari. <sup>16</sup> Naraha madija bodi cacajiqquimeradsa ia Medsede Jesocristodsa pajissa nadsana mittahissa tahitohui. Pina pohua pano ohodsa idijarossa nadsapa qqui tahissa tahitohui. <sup>17</sup> Ia Medsede Pohua Corime naco pohnuassa caniqquimerajari. Pohua Corime iadsa madidsapa imasiridsa imadipojaropi jicani. <sup>18</sup> Najarojinea iapi pina Moisesi pohua pano odsa najarissa inejerajaro. Ia huapimapi pina pipirissa inadsa Diocca biquehe, pocca deni tojehe ahuato inanaridsajaropaji. Ia Medsedejine icca madie tobicadsanapojaro, pina pohnuassa inanijine. Dio Corime iadsa madidsapa ia acco tocamabaqqui-dsanapojari.

## 4

### *Pablotenipa Jesocristo tahimari ponira mari mari quinajari*

<sup>1</sup> Nadsama Diopa iadsa huati huana tadsa Pohnuadsa idsepe ijiniijine iadsa inanajaro. Najarojine ehetidse nadsapi: —Epeje, ineboqquna –inejerani. <sup>2</sup> Icca marinaja pajiranissa tadsapi icappinaniijine nohuerani. Ahuatoranidsa ima inana-jerani. Maidsehe mari mari inejerani. Nema naniccapi ettajojaro. Icca mamari tabaqqui icamaidsabaqqui-jarahi. Ijine Dio Atti tojidsa-jerani. Nohuerani. Diopa ia qqui tabaqquihi. Pajissara huati huati inajaro nahato tahi. Najarojinea madija huapima iadsa: —Maidseraqquri nahi –quinajari. <sup>3</sup> Aji Jesocristo tahimari icassiejeraniijinecca ecomeraridsajaropi ahuato taraha madija mota tocassiejera-jarahijinedenidsapi ahuatora tajaro. Pohnadenidsa pina dsidsi tajarossa najaro. <sup>4</sup> Najarideni Jesodsa jehe quina-jarajaripa ajijaro dsamacca dodossede Satana bodideni ecossabaqquidsanapojari. Nama quinadsapa Jesocristo tahimari icassiejeraniijinecca bodidenidsa tossiaja-jerajaro. Cristo bicabote, ssiaja tahi, Imehi Diossa najari tahimari mari mari inajaro mittamana-jarajari. <sup>5</sup> Iapi icca ima ehecomera nejerani. Ia Medsede Jesocristo pohua tahimarina ehecomera najaro. Pohnuadsa eti huanappaqquri nadsa tiadeni acco icamabaqquinijine imadijaro. <sup>6</sup> Diopa dsama inahatopodsama huati tajari: —Dsidsinidsa ssiajani tossiajaridsana –napodsapa ssiajani tossiajabaqquijaro. Ibodidsa naqui Pohua ssiejene inanajaro, pocca biquehe, pocca deni tojehe nahatoqquri inanijine. Najaro pocca biquehe, pocca deni tojehepi Jesocristo pohnuadsa ahuato tajaro.

### *Ocasserani eraha Jesocristodsa jehe idsanapojaro*

<sup>7</sup> Diopa ajijaro ima bicani iadsa inanajaropi pina todsepetaji huatini ccara tanicca dsipa ssiqui nepi nanidsa hua idsajarossa najaro. Iapi pina dsipassa inajaro. Essirepi dsoqqequeque tanicca, dacorejerani. Nema inadsapi madija huapimadsa ahuato tajaro: Diocca deni tojehe, pocca dacorehepi Pohua pocca. Icca jerani. <sup>8</sup> Nema nadsapi ima onihi, onihi iadsa ssonariraha iedima-jerani. Ima onihijine ibodi huatoto canaraha: —Cristodsa epeje inana –inejerani. <sup>9</sup> Ia tonajidso-baqquimanaraha Diopa ia nebo-jarajari. Ia tonajica-baqquimanahijine huahuacca iquejenaraha ia tonajica-baqquimanahijine pajiramana-jarajari. <sup>10-11</sup> Ahuaji jaija, ahuaqi jaija naridsadsa

najidsohue oppina tanicca inahanajaropi pina Cristo najidsohue inahanajarossa najaro inahanani huapima qqui toquinajari. Pohuadsa iquejenajarojine dsoqqeue iadsa huajira huajira naridsajaro. Nema inajaropi essire dsoqqeue taniccadsa Jesocristocca madie ahuato inanajaro. <sup>12</sup> Nadsapi najidsohue iadsa ssonaridsa idsoqqeubote idsoqqeubote naridsaraha nema nehe idsepe ijijarojine tiadenipi camittehe ticajimananitohui.

<sup>13</sup> Aji Dio Atti dsodo nanidsapi ajima najaro: —Diodsa pajissa onajarojine pocca ima huati huati onajaro –napojari tamine Dabi. Najarossa inajaropi Diodsa pajissa inadsa pocca marinaja dsati ecomeraridsajaro. <sup>14</sup> Ibodidsa nahatoto inajaro: Dio ia Medsede Jeso inahatonijaripa ia Jesodsa jehe inajarodeni ia tonahatonibaqquihitohui. Dsotode naco tiadeni, ia, huapima Pohua madihihuaji ia tohuaccamacossani-baqquihitohui.

<sup>15</sup> Aji ocasserani inahanajaro huapimapi ponima jerani. Tiadenidsa ima bicani tojanijinena inahanaridsajaro. Nadsapi tiadenidsa, madija ohuahadenidsa naqui Diocca tohuati huanehe tojaridsadsa madija huapi taha Diodsa: —Jehe Abi Dio, tijine bica tani –quinahitohui. Pocca deni tojehe, pocca biquehe naqui qqui toquinahitohui.

<sup>16</sup> Najarojinea etidse nadsapi: —Epeje, ineboqquina –inejerani. Iapi jadahi iquejenajonajaro. Essire tojapariraha ibodina huajijiradsa todacorani dsanapojaro.

<sup>17</sup> Ajijaro namidsa ocasserani ejaropi badsira tani, jicaca tani. Naraha najarojine Diocca biquehe, pocca deni tojehe jicaquera tanicca denima denima iadsa tojad-sanaponitohui. <sup>18</sup> Nadsapi inoccodsa qqui inajarocca, essiredsa inahanajarocca tohuira ibodi huahuatomacca nejerani. Nema naniccapi jicanitohui. Naraha qqui inejeranicca, dsotode tojanijineccapi jiquejeranitohui. Najaro tohuira imadijaro.

## 5

### *Essire dsati icajinijinecca ima*

<sup>1</sup> Ajijaro namidsa imadidsapi essire jicaca taniccadsa imadijaro. Pina ajijaro namicca odsa icanahatojarossa inadsa imadijaro. Pina benehijinecca odsa jicaca taniccadsa inajaro. Naraha nahatoqquri inani: Icca odsa namicca tocatabaccoradsapi memehujina odsa dsati icajinitohui. Najaropi madijajine canahatojarossa nejerani. (Najaropi essire dsati jicaquera tanicca icajinijine Diojine iadsa najorapojarocca ima.)

<sup>2</sup> Naraha ajijaro namicca essire jicaca taniccapi ocassera tajarojine ojiema imadijaro. Essire memehujiccanu tohuini inajaro. <sup>3</sup> Najaro essire dsati icajinijinepi pina etero edsajarossa nanitohui. Edsadsapi iccoroje jeranitohui. (Najaropi memehujajiccorime toccadsapi poni motta jerani, essire dsati icajinijinecca ima.) <sup>4</sup> Pajissa ajijaro namidsa imadiccadsapi essire jicaca taniccadsa imadijarojine oji oji idsanapojaro. Ocasserehepi iadsa ccanaja tajarossa najaro. Naraha essire jirehe imadinijine tohuini inejerani. Essire dsatina tohuini inajaro. Najaro icajidsapi jicaca tanicca inebonitohui. Camittehe jiquejeraniccadzana imadi-dsanaponitohui. <sup>5</sup> Najaro ima bicani nemanehi icajinijine Diopa ia tonanajora-baqquijari. Pohuapa pajissa najarossa inananitohui nahatoqquri inajaropi Pohua Corime iadsa da inaridsapojaropaji.

<sup>6</sup> Nema nadsapi ibodi icappina-jeradsa Diojine etidsedsanapojaro. Nahatoqquri inani: Essirema imadiccadsapi ia Medsede madihihuaji huaji inaccani. <sup>7</sup> Aji memehujajiccorime imadi-dsanaponijinecca iadsa najorajaro inoccodsa qqui inejeraccaraha ibodidsa nahato inadsapi pajissa inehe imadijaro. <sup>8</sup> Najarotohui etidsedsapi icappina-jerajaro. Ajijaro essire inebonijine tohuini inani, ia Medsedehuaji iccanijine. Ia Medsedehuaji imadi-dsanaponijine iadsa denima bica tajaro. <sup>9</sup> Nadsapi essirema imadiccadsa ia Medsede inahatidse-dsanapohuijine dissessa inajaro. Essire inebodsa memehujajiccorime imadidsa naqui nema idsanaponitohui. <sup>10</sup> Nidsa dsotode Cristo pohua baccorahuaji huapima idomo huadsapi icca ima cattemade tojahitohui. Nadsana ia essirema imadidsa ima inanajarocca huapima Cristo nattome inanitohui. Ima

bicani inanajaro manaconi, tabaccorehe inanajaro manaconi naqui huapima iadsa inananitohui.

*Diopa icca imadsa tojonehijinecca marinaja*

<sup>11</sup> Dio noppine icappinanijinepi bica tani. Pohnadsa iboraqquiri inanijine naqui bica tani. Najaro nahatoto inadsapi madija huapima Pohnadsa jehe quinahijine dissessera inajaro. Diopa ohua, Timoteo tedseje ibodi qqui tahissa tahi. Maidseraqquri inani nahato tahi. Tiadeni naqui maidseraqquri inani nahatoqquri tiquinanijine tohuini inani. <sup>12</sup> —Icca ima bicani, pajiranissa tani —inajaropi ia ipamehe iadsa etidsenijine jerani. Tiadenina iadsa tetidsemananijinena tohuini inani. Icca ima nahatoqquri tiquinadsapi aja ia ajamani tonanabaqqujari attidenidsa tecomeramananijine tipajiramananitohui. Najaridenipa: —Iana deni iquejenani, nahatoqquri inani —quinaraha madija panodenira qqui toquinajari. Madija bodidenicca ima ssamoqquri najari.

<sup>13</sup> Nadsama madija attideni iadsa: —Bodideni tossamomanajari —quinadsapa apaja, pohnadeni nama quinana. Aji idsepe ijjaropi Diona deni tojahijine. Madija ohuaha attideni naco iadsa: —Nahatoto tahi —quinadsapa tiadenidsa naqui bica tani.

<sup>14</sup> Cristopa itohui dsoqquejari, ia naqui pina pohua dsoqquejarissa inajaro. Najaro nahatoqquri inadsapi Cristocca tohuati huanehepi ia dosse dosse najarossa najaro. Najarodsa idsepe ijjonajaro ajjaropaji. <sup>15</sup> Cristopa huapima itohui dsoqquejari. Nadsapa pohnajine madie dsati cajimanajaridenipa pohnadeni tohuini quinahicca tohui madimana-jarahi. Cristo pohua tohuini nahicca tohuira madimanajari. Pohnapa pohnadenitohui dsoqque, nahatoni najari.

<sup>16</sup> Jidapapi Cristocca tohuati huanehe nahatoto inadsapi madijadenicca ima ajjaro namicca deni tojehedsa nattome inejerajaro. Tahide Cristodsa ssamoqquri inaccadsapi pohnadsa nema inade. —Pohnapa Dio Bedi, deni tojahi —inejerade. Naraha jidapapi pohnadsa nema inejerani. <sup>17</sup> Nadsama madija Cristocca tojajaripa Djotine dsati tojajari. Pocca madie naqui cacajiqquimerajaro. Pocca imabotedsa tojani-jarahi. Jidapapa madie dsati cajijari.

<sup>18</sup> Najaro madie dsatipi Diocca. Pohnapa iadsa huadi taporaha Cristo itohui dsoqquedsapa Pohna tedseje icajonerajaropaji. Dio iadsa huahua najaripa Pohnadsa idsepe ijninijine, madija mari icanabaqquidsa Pohna tedseje cajonerara canahijine.

<sup>19</sup> Cristo ahua porimacossanidsa dsoqquejarijine Diopa madijacca imasiri manaconi pohnadenidsa inana-jerani. —Ticcadeni imasiri ohuati ajimani —najari. Nama nadsapa pohnadeni tedseje cajonerara canajari. Najaro ima bicani ecomeraridsanijine ia tocadossebaqqujari. <sup>20</sup> Nadsama iapi Cristo tahimari totohuaccade iquejenani. Tiadenidsa huati inajaropi pina Dio tiadenidsa huati tajarissa najaro. Etti bica tadsa Cristo onima tiadenidsa huati huati inajaro: —Dio tedseje ticajonerara canaji —ihinanajaro. <sup>21</sup> Cristopa imasiri inana-jeraraha icca imasirijinena Cristopa imasiri ponissa nadsa Diocca huadie pohnadsa ssonarijaro. Dio nama najaria ia Cristodsa ijariqqujaro icca ima Pohnadsa pajiranissa tanijine.

## 6

<sup>1</sup> Nadsama Diodsa idsepe ijjaropi tiadeni acco camade imadijaro. Nadsapi ettissa tinanamananijine etti bica tadsa tiadenidsa huati inajaro: Dio pocca tohuati huanehe tiadenidsa ahuatoto inanadsapi ponima tinanamana tejeraji, inajaro. <sup>2</sup> Aji Dio Atti dsodo nanidsapi Pohna Attia:

—Jehe, tiadsa occa tohuati huanehe ahuatoto onananijinecca huada bacco tadsapi ohuadsa huahua tadsa omittanitohui.

Tia onassianijinecca huada bacco tadsapi tia acco ocamanitohui —nahi nade.



¡Pajissa! Jidapanana pocca tohuati huanehe ahuato inananijinecca huada bacco tani. ¡Jidapanana ia tonassiaja-baqquihicca huada bacco tajaro!

*Pablopa Diodsa dsepe ijidsa ocasserani ahuaridsajari*

<sup>3</sup> Diodsa idsepe ijidsapi icca madie bica tani madija qqui toquinahijine dissessera inajaro. Nema inejeradsapi Diocca dossehe idsepe ijijaro tossamorana. Madija attidenipa: —A, pohuadenijine bica tejerani —quina-jarahijine imadinissa tajaro. <sup>4</sup> Dio ia tocadossebaqquijaridsa idsepe ijijaropi madija huapimadsa ahuato tanijine jipapa inajaro. Nema nadsapi ima onihi onihi iadsa ssonariraha mohuaradsa inahanajaro. Imadinijinecca icappiradsa naqui mohuaradsa icappirehe imadijaro. Ima ocassera tanicca naqui nema nehe mohuaradsa inahanajaro. <sup>5</sup> Cocossirideni inahana, toponi cocorodsa ia hua todsimabaqquidsa inahana, mohuaniji tojaridsadsa iadsa ssonarimanahi inahana, tarabadsa najo taniccadsa idsepe ijiridsani inahana, dsome inocco bissani inahana, pemi naqui inahana naridsajaro. <sup>6</sup> Pajissa Dio ia tocadossebaqquijaridsa idsepe ijijaro ahuato tanijinepi imasiri jirehe imadijaro, Diocca pajissehe nahatoto inajaro, ima najo tanicca inahananijine nahatoto inajaro, huapimadsa joneqquiri inajaro, Dio Corime iadsa madijari, maidserehema madija huapimadsa eti huana tajaro. <sup>7</sup> Diocca ima bicani pajissara mari mari inajaro. Pocca dacorehe icajini iadsa ahuato tajaro. Icca ima Diodsa pajiranissa tajaropi pina jadsirejine icajijarossa najaro. Ia huadidedenidsa issonarinijine icaji, iadsa ssonarimanadsa naqui ibiquera-jeranijine icaji najaro. <sup>8</sup> Huada onihidsapa madija iadsa bicaqquiri najari. Iadsa: —Ajajaridenipa bicaqquiri nahi —quinajari. Naraha huada onihidsapa madija ohuaha iadsa jiperaqquiri najari. Iadsa: —Ajajaridenipa tabaccoraqquiri nahi —quinajari. Pajissa huati huati inajaroraha iadsa pina maidsaqquiri najaridenidsassa quinajari. <sup>9</sup> Iadsa nahatoqquiri naraha pina iadsa noc-codeni jidsaqquiri najaridenidsassa quinajari. Ecotabote naridsaraha camittaqquiri inaccani. Ia tonajidsobaqqui-manaraha ia nanadsoqquemana-jarahi. <sup>10</sup> Pina oji inajarossa naraha nema nehe Diodsa etidsejaro. Pina icappirajarossa naraha Diocca daniji ima bicani icajijaro. Ijine naqui Diocca daniji madija huapimadsa tojaridsajaro. <sup>11</sup> Jehe ohuemecotedeni Corintocca, imadsa-jeradsa ima mota naqui ecoma-jeradsa tiadenidsa huati huati inade. Ibodidsa icajijaro tiadenidsa inahabajarossa najaro. <sup>12</sup> Iapi tiadenidsa eti huanaqquiri naraha tiadenina iadsa tetideni huaneraqquiri najarossa tiquinajaro. <sup>13</sup> Nema nadsapi tiadenidsa pina occa ejedenidsa huati onajarossa najaro: Ohuadsa tetideni huanaqquiri naji. Pina tiadenidsa ohuati huana tajarossa tiquinana, onajaro.

*Essirepi Dio camitta tajaricca mamadi*

<sup>14</sup> Jehe, tiadenidsa ohuatti naqui: Jesocristodsa jehe quina-jarajaridenidsa tiqueje-mamana tejeraji. Aji ima bicani imasiri tadsajani quejemanijine ssamo tani. Pina ssiajani dsidsini tadsajani quejemanijine ssamo tajarossa najaro. <sup>15</sup> Najarossa najaro Jesocristo naco pocca huadi Satana tedseje cajonerahijine ssamo tahi. Jesocristodsa jehe najari naco aja Jesocristodsa jehe najarajari tedseje jehe canirehissa tahijine ssamo tahi. <sup>16</sup> Ia Diodsa jehe inajaro essirepi Dio camitta tajaricca mamadi iquejenajaro. Nema inadsapi madijacca dio pohuamaccadsa iquejenanijine ssamo tani. Ajana Dio Pohua Attipa:  
—Ohuapi pohuadenidsa omadinitohui;  
pohuadenidsa naqui occaridsanitohui.  
Ohuapi pohuadeni Cacahuade Dio ojanitohui  
Pohuadeni naco occa madija toquejenahitohui  
—napohui nade.

<sup>17</sup> Nama nadsapa Pohua Atti dsodo nani onihi naqui:

—Ohuadsa jehe quina-jarajaridenidsa huajiji tinaji.  
Oppina tahicca, jiperana onaniccadsa damamana tiquinejeraji.  
Nema tiquinadsapi tiadenidsa: “Jehe, Ohuadsa jai tijajonaji” onanitoahui.

<sup>18</sup> Ohuapi ticcadeni Abi ojanitoahui.

Tiadeni naqui occa ejedeni tiquejenanitoahui  
—nahi nade ia Medsede Dio Dacorabote.

## 7

<sup>1</sup> Ohuemecotedeni, tiadenidsa ohuati huana tani. Dio pocca madijadsa huati tapojaricca jidapana aji iadsa bacco najaropaji. Nema nadsapi ibodi huire tehe imadina. Essire inatabaccora-jeranijine ia ecahuana. Pina issicari-jeranijine obanidsa iccarihuajajarossa inana. Dio noppine icappinadsa imadinissa dsanapona. Ibodi huire, ssiaja tehe imadi-dsanaponijine Pohuadsara dissessera inana.

### *Corintohuaji madimanajari bodideni cacajiqquimeradsapa Pablo huatidsejari*

<sup>2</sup> Tiadenidsa huati omanipomana: ¡Iadsa jipaqquri tiquinapomaji! onajaro. Nadsa tiadenidsa icca ima pajiranissa tade. Tiadeni inajidsobaqqui-jerade. Maidseheda naqui tiadeni icamaidsabaqqui-jerade. Nohuerade. <sup>3</sup> Nema onajaropi ticcadeni ima bica tejerani, onejerani. Pina tahide tiadenidsa huati onajarossa najaro huati omanipomajaro: Titohuideni ohuati huana tajaro. Najaropi omadidsa, odsoqquedsa naqui tiadenidsa ohuati huana tajaropi nema dsanaponitoahui. <sup>4</sup> Tiadenipi ima tinapajiramananissa tajaro nahato onani. Ticcadeni ima bica tajarojine ohuatidsejaro. Ocasserani eraha nema nehe obodi bica tadsa ohuatidseni.

<sup>5</sup> Dsama Masedoniahuaji bacco inadsapi jassi inejerade. Ima ocassera tanicca jiquejerade. Ahuaji ima, ahuaaji ima naridsadsapi ibodi naqui icappinajarode.

<sup>6</sup> Naraha Diopa madija bodi ocassera tadsa huatidse-jarajari nahatidsede pajirajari. Pohuapa ia tonahatidsebaqquijaride, aja imecote Tito bacco najonadsa. <sup>7</sup> Tito qqqui inadsa pocca ima imittadsapi etidsede. Pohua attipa: —Corintocca imecotedenijine ohuatidsede —najari. Pohua atti naco: —Pablo, tia qqquide tohuini quinajari. Tiadsa ima ssonarijarojine titohui oji oji quiquinanajari. Tiadsa huatideni huanacquiri nadsapa titohui disseraqquri najari —nadsapa pohuajine denima ohuatidsejarode.

<sup>8</sup> Occa ima teppe tiadenidsa dsodo onajaro qqqui tiquinadsa oji tiquinani omittadsapi: Jaho ojine bica tejerajaro, onapode. Naraha jidapana nema onejerani. Aji oji tiquinajaropi badsira tani, huada huapi tejerade. <sup>9</sup> Jidapapi tijinedeni ohuatidseni. Aji oji tiquinajarojine jerani. Tibodideni cacajiqquimeradsa Diodsa tiquejenani-pomajarojinena ohuatidsejaro. Ticcadeni ojie ocassera taraha nema nehe tinahanamanajaropi Diodsa bica tani. Nema nadsapi occa ima teppe tiadeni tonajidsobaqqui-jerani nahato onani. <sup>10</sup> Jehe oji tiquinajarojine tibodideni cacajiqquimeradsa Diodsa tiquejenani-pomajaropi Diodsa bica tajaro. Najaro ojiedsapi: —Jaho ojiepi tabaccora tani —tiquinejeraji. Najaro ojiejine ticassiejeranitoahui. Naraha ajijaro namicca imadsa disseraqquri najarideni oji oji quinaraha dsoqquemanadsapa najidsohue jiquejeranihuaji toquejenahitoahui. <sup>11</sup> Aji ojie tinahanamanajaropi Dio jipa tahiccassa tinanamanajaro. ¡Ajina, qqqui! Tijinedeni ima bicani tojajaro. Ima tonanajari tiadenidsa qqquedsima-jarahijine teccocomanajaro. Ticcadeni ima tobicanijine tohuini tiquinajaro. Ima tonanajaricca imadsa tedimanajaro. Pocca imajine najidsohue tiadenidsa ssonarini noppineni ticappinamanajaro. Ohua qqqui tiquinapomanijine, ohuadsa ima jicanijine naqui tohuini tiquinajaro. Ima tonanajari pocca ima manaconi tonahanahijine naqui tohuini tiquinajaro. Nema tiquinadsapi ohuadsa ahua to tinanamanajaro: Ima tonanajaricca imadsa tiquejemamana-jerajaro. <sup>12</sup> Nema nanipi tiadenidsa occa ima dsodo onapojaropi ima tonanajari tinajidsomanahijine dsodo onani ojari-jerade. Pohuajine imecotedsa ima ssonarijaro acco ocamahijine

naqui dsodo onani ojari-jerade. Aji tiadenidsa pajissa itohui tibodideni huatoni paji naccani tiadenidsa ahuato tanijinena dsodo onajarode. Itohui tetideni ajimamanagerani Dio nahato tajari. <sup>13</sup> Najarojinena ibodi tobicajaro. Icca ojje eti ajimadsapi etidsejaro.

Ima onihi naqui Tito ticatidsemanahi imittadsapi denima etidsejaro. Ticcadeni ima pohnadsa bica tajaro. <sup>14</sup> Nadsama Titodsa ticcadeni ima huati onapode. Ohuattipi pohnadsa: —Corintocca Jesocristodsa jehe quinajaridenicca ima bica tadsa ohuatidsejaro —onapode. Nadsapa Tito tiadenihuaji toccadsa pajissa ticcadeni ima bica tani qqui tadsapa ohuatti dsori tejerani qqui tajari. Pina tiadenidsa pajissara huati huati onajarossa najaro Titodsa naqui pajissa huati onajaro. <sup>15</sup> Nadsapa Tito pohua attidsa iboraqquiri tiquinani pohua bodi huatomadsapa huatidsejari. Pohua noppine ticappinamanadsa naqui pohnadsa bicaqquiri tiquinade. Najarojine Titopa tiadenidsa denima huati huana tajari. <sup>16</sup> Tijinedeni pajiranissa tanijine tohuini tiquinani nahato onani. Najarojine tiadenidsa ohuatidsejaro.

## 8

### *Accoraqquiri najarideni cappiramanajaridenidsa da inaqquimananjine*

<sup>1</sup> Jehe ohuemecotedeni, jidapanana dsama Masedoniacca Jesocristodsa quequeriqquimana najaridenidsa Dio pocca biquehe, pocca tohuati huanehe inanaridsa-jarocca ima tiadenidsa huati onana. <sup>2</sup> Nahihuaajicca imecotedenipa ocasserani onihi onihi inahanamanaraha huatidsemaneri najari. Pohnadenipa cappiramanaha madimananaraha accoraqquiri nadsapa pina sseqquiri najaridenissa quinajari. <sup>3</sup> Pajissa onocodsas qqui onajarocca tiadenidsa huati onajaro. Pohnadenipa huatidsemaneri nadsa da inaqquimanajaro. Denima da quinanjine pajiramanajararaha denima da quinapomajaro. Madija ohuaha pohnadenidsa: —Nema tiquinaji —quina-jararaha. Pohnadeni tohuini quinadsa: —Jari, nema inana —quinajari. <sup>4</sup> Dsama Jodeahuaajicca Diodsa toquejenajarideni acco icamabaqqui-manahijine tohuini quinadsapa iadsa huatide disseraqquiri najari. Attidenipa: —Icca da naqquinaja pohnadenidsa dosse inanijine jehe tiquinaji —quinade. <sup>5</sup> Nadsama iapi poccadeni da naqquinajacca ima nahatoto inaporaha denima ima bicani inanamananjinepi ssamomo inapojaro. Aja pohnadenipa Diodsa pohnadeni ccaccoramanajari. Iadsa naco pohnadeni ccaccoramanajari, ettidsa iboraqquiri nahijine. Nama quinadsapa Dio Pohua jipa tahicca inanamananissa tajaro.

<sup>6</sup> Nadsama Masedoniacca Jesodsa jehe quinajarideni tahimarideni bica tadsapi Titodsa ajima inajaro: —Tito, Corintohuaji ticcanidsa poccadeni da naqquinaja tidipomaji —inade. Aja pohnapa tahide ticcadeni da naqquinaja idipode. Nadsapi najaro da naqquinaja bicabote jicanissa tanijine Tito dosse inanipomajari. <sup>7</sup> Tiadenipi ima bicani sseqquiri tiquinajaro. Diodsa jehe tiquinani dacorajaro. Dio Atti maride naqui nahatoqquiri tiquinajaro. Diocca dosseniji timittamananissa tajaro. Timecotedeni accode naqui disseraqquiri tiquinajaro. Ijine tohuati huanehe ticahatterajaroma timadimanajaro. Nema tiquinadsapi timecotedeni cappiramanajarideni acco camade naqui accoraqquiri tiquinani bica tani, onajaro.

<sup>8</sup> Naraha ohuatti nema onajaropi tiadenidsa dosse dosse onejerani. Jesocristodsa quequeriqquimana najari ohuahadenicca da naqquinaja tahimarini timittamananjine poccadeni ima dsodo onajaro. Aji poccadeni ima timittamanadsapi tiadeni naqui jipaqquiri tiquinadsa da taqquimana-pomanijine, onajaro. Accoraqquiri tiquinadsapi pajissa timecotedenidsa tetideni huanaqquiri nani ahuato tinamananitohui. <sup>9</sup> Tiadenipi ia Medsede Jesocristocca biquehe, pocca tohuati huanehe nahatoqquiri tiquinani. Pohnapa memehuaji madidsa huapima cajijari. Cappira-jaraha madihissa

tapojari. Naraha titohuideni namihuaji ccaronadsapa pina cappirajarissa naha madijarjine tiadenipi sseqquiri tiquinajaro.

<sup>10</sup> Aja huajano toccapojaridsa dsama onihicca Jesocristodsa quequeriqquimana najaridenicca da naqquinaja nohuerapoccadsa tiadenina tahide: —Imecotedeni acco icamabaqquina –tiquinadsapi tetidsemanadsa najaro ima tinahatomapojarode. Nadsama tiadenidsa ima bica tanijinepi obodi huatojarocca tiadenidsa dsodo onajaro.

<sup>11</sup> Aji ticcadeni da naqquinajapi tinequeriqquimananissa tana. Pina huajano toccapojaridsa tetidsemanadsa da taqquimanapojarossa tinanamanana jicanijine. Sseqquiri najarideni, badsira tehe cajimanajarideni naco pohuadeni cajimanahicca mota da quinana. <sup>12</sup> Madija cajidsa pajissa dade jipa tadsapa pocca danijidsa Dio jipa tajari. Madija cappiradsa da inejeradsa oppinera tani. Diopa cappirajaridsa: —Da tinaji –najarajari.

<sup>13</sup> Najaro da naqquinajacca imapi timecotedenidsara da tiquinadsa tiadenipi ticappiramana nanijine jerani. Tiadeni ticappiramana-jeradsa timadimana, pohuadeni naco cappiramana-jaradsa madimana nadsana bica tani. <sup>14</sup> Jidapana ticajimanadsa pohuadeni acco ticamabaqqui-manahijine tipajiramanaccani. Nidsa dsotode tiadeni naqui ticappiramanadsa manaco tiadeni acco tocamabaqqui-manahitohui. Ahuaji nema, ahuaaji nema inaridsadsapi huapimadsa pajiranissa tanitohui. <sup>15</sup> Pina Isaraeri potemahi jodiodeni tahimaridenissa najaro. Pohuadeni tapari memehuaajicca catojaridsajari inaccamanahi tahimari Dio Atti dsodo nanidsa ajima najaro: —Huemahi inaccamanajari pohuadenidsa mota toja-jarahi. Badsira taha inaccamanajari naco dsori taja cama-jarahi –nani nade Dio Atti dsodo nanidsa.

*Tito pohua tessedeni pamaha tedseje da naqquinajatohui Corintohuaji jai tojahijine*

<sup>16</sup> Diodsa ohuatidsedsa: —Jehe Abi, tijine bica tani –onajaro. Djojine Tito bodipa pina obodissa nadsapa pohua tedseje titohuideni dissessera inajaro. <sup>17</sup> Pohuapa tahide tiadeni qquide tohuini napojari. Tiadenihuaji toccahijine pohuadsa huati onadsapi amadsati: —Jehe, jipa onani –najari. Jidapana pohua jipa tadsa toccajari.

<sup>18</sup> Aja Titodsa imecote Jesocristodsa jehe najari ohuaha naco tiadenihuaji dosse inajari. Pohuapa Jesocristo tahimari icassiejeranijinecca maride nahato tajari. Jesocristodsa quequeriqquimana nahicca onihi onihi naridsajarocca imecotedeni pohuadsa jipaqquri najari. —Pohuapa bica tajari, Dio Atti maride nahato tajari –quiquinanajari. <sup>19</sup> Najari imecotepa iadsa toccahijine icattejidsa-manapojari. Aji huapimacca da naqquinaja Jerosarehuaji iaccadsapi ia acco tocamabaqquihijine. Najaro da naqquinaja imecotedenidsa da inadsapi Diodsa huatidsemanadsa: —Jehe Abi Dio, tijine bica tani –quinahijine. Imecotedeni acco camade jipaqquri inajaro naqui ahuaato tanijine. <sup>20</sup> Najaro da naqquinaja bicabote ididsapi iaccanissa tanijine tohuini inajaro. Inassamodsapi: —Tijinedeni bica tejerani –quinarana, inajaro. <sup>21</sup> Najarojine ticcadeni da naqquinaja iaccanissa tana, inajaro. Diodsa, imecotedeni huapimadsa naqui icca ima bica, pajiranissa tanijine tohuini inajaro.

<sup>22</sup> Pohuadeni pamahadsa imecote Jesocristodsa jehe najari ohuaha toccahijine dosse onajari. Pohua dsepe ijiridsahi onihi onihi qqui qqui odsanapodsapi pohuapa madija acco camade jipa tahi nahato onani. Ticcadeni ima mittadsapa tiadenihuaji toccade jipa tajari. Pohua atti naco: —Jehe imecotedeni Corintohuajiccapa pohuadeni attissa inanamananitohui –najari.

<sup>23</sup> Nadsama Titodsa madija attideni: —¿Ajaripa nejeco madija? –quinadsapa huati tiquinana: —Pablo huatimade, tiadeni acco camade Pablo pohua tedseje dsepedeni ijimanajari –tiquinana. Imecote pamahadsa naco: —¿Nejeco madijadeni? –quinadsapa ajima tiquinana: —Jesocristodsa quequeriqquimana najaridenicca dosseniji huedajonajari –tiquinana. Pohuadenipa Jesocristojine poccadeni madie bica tadsa madimanajari. <sup>24</sup> Nema nadsapi nahi tiadenihuaji bacco toquinadsapa

Diocca tohuati huanehema pohuadenidsa bicaqquiri tiquinana. Nema tiquinadsapi Jesocristodsa quequeriqquimana najarideni Titodenidsa tetideni huanaqquiri nani nahatoqquiri nahijine. Aji etti naqui: —Corintohuajicca Jesocristodsa jehe quinaridenipa bicaqquiri nahi –inajaro huati huati inaridsapojaro naqui pajissa tojajaro nahatoqquiri nahijine.

## 9

### *Jesocristodsa jehe quinaridenidsa da naqquinaja tahimarini*

<sup>1</sup> Nadsama Jerosarehuajicca Jesocristodsa jehe quinarideni acco ticamabaqqui-manahijine ticcadeni da naqquinaja tahimarini tiadenidsa huati onapode. Nadsapi ajijaro ima teppedsa: —Da tiquinaji –onapoma-jerani. <sup>2</sup> Pohuadeni accode jipaqquiri tiquinani nahato onapojarojine dsama Masedoniahuaji occaridsadsapi titahimarideni huati huati ohonaridsa najarode. Ticcadeni ima bica tajarojine ohuatidsedsa pohuadenidsa ajima onade: —Ohuemecotedeni dsama arobeni Acaiahuaji madimanageridenipa huajano toccapjaridsa imecotedeni Jerosarehuajicca acco icamabaqqui-manahijine najoramapode –onaridsajarode. Nadsapa imecotedeni Masedoniacca mota huapi taha ticcadeni ima bicani mittamanadsapa pohuadeni naco: —Jehe ia naqui imecotedeni Jerosarehuajicca acco icamabaqquina –quinaride. <sup>3</sup> Tiadenipi dade jipaqquiri tiquinani nahato onaraha tiadeni acco tocamabaqqui-manahijine imecotedeni 3 quinaha tiadenihuaji dosse onabaqquijari. Nema onajaropi da taqquimananjine tinajoramananissa tanitohui. Nadsana titahimarideni huati huati onaridsapojaro pajissa tojadsapi etti maidsehe toja-jeranitohui. <sup>4</sup> Nani tiadenihuaji occapomadsapi imecotedeni Masedoniacca naco ohuadsa jai tojahijine itide. Naraha ticcadeni da naqquinaja tinajoramana-jeradsa bacco inadsapi ¿nejecoma onapadseje? Ticcadeni imajine ohuatidseporaha ohuattissa tinanamana-jeradsapi obodi ocappinanissa nanitohui. Tiadeni naqui da taqquimana-jeradsapi ticappinamananissa narana, onajaro. <sup>5</sup> Najaro noppineni ocappinadsapi tiadenidsa huatide Titodeni dosse onabaqquipona, onajarode. Pohuadenipa tiadeni acco tocamabaqqui-manahitohui, ticcadeni da naqquinaja tinajoramanaponijine. Aji tahide tettidenipi: —Jehe da inaqqunitohui –tiquinapojaro tettidenissa tinanamanana, onajaro. Nema tiquinadsapi accoraqquiri tiquinani ahuato tanitohui. Naraha dade jiperaqquiri tiquinadsa ticcadeni da naqquinaja tinajorapo-jeradsapi ticcadeni accohue ahuato tanitohui.

<sup>6</sup> Ajijaro imadsa tibodideni huatoma-manaji: Madijapa ppa nahi nocco badsira taha dappo inadsapa bono badsira taha pore ina tahi. Huemahi dappo inadsapa bono huemahi pore ina tahi. <sup>7</sup> Madija pohua tesse accode jipa tadsapa bodi huatodsa: —Ajima nehe da onana –nadsa da inadsapi pocca ima Diodsa bica tani. Madija acco taraha da inadsapi pocca ima Diodsa bica tejerani. Madija dade jipera taraha madija ohuaha attijine da inadsa naqui pocca ima Diodsa bica tejerani. Dadecca ima Diodsa bica tajaropi madijapa bodi huatidsedsa da inadsana pohuadsa Dio huatidsejari. <sup>8</sup> Diopa tiadenidsa bica tanicca onihi onihi dade accora tajari. Ticappiramana-jeranijine tiadenidsa huemani da inadsapi madija ohuahadeni acco ticamabaqquihijine tipajiramananitohui. Tiadeni naqui ima bicani onihi onihi tinanaridsamananjine Dio tiadeni tonapajirabaqquihissa tahitohui. <sup>9</sup> Madija accora tajaricca imapi Dio Atti dsodo nanidsa ajima napojaro: —Cappiramanajaridenidsa dade accora tajari.

Ima bicani inanaridsajaropi nema dsanaponitohui –nani Dio Atti dsodo nanidsa. <sup>10</sup> Diopa ppa nahi nocco da inajari, ijipanijinecca naco da inajari. Najaro imassa najaropi ticappiramananicca Dio tiadenidsa da inaridsanissa tanitohui. Denima tiadenidsa da inadsapi cappiramanajaridenidsa



accoraqquri tiquinanitohui. Tijinedeni pina bono pore nahi huemajarissa nani-tohui. <sup>11</sup> Nema tiquinadsapi Diocca daniji bica tanicca sseqquri tiquinanitohui. Madija ohuahadenidsa naqui dade accoraqquri tiquinanitohui. Nadsapi ticcadeni da naqquinaja imecote cappiramanajaridenidsa dosse tiquinajaro dsojo inadsa pohuadenidsa da inadsapi pohuadenipa Diodsa huatidsemanahitohui. <sup>12</sup> Nadsapi Jerosarecca imecotedeni ticcadeni da naqquinaja cajimanadsapa pohuadeni cappiramanahicca mitta quinadsa huatidsemanahitohui. Diodsa naco huatidsemanadsa: —Jehe Abi Dio, tijine bica tani –quinahitohui. <sup>13</sup> Imecotedeni acco ticamabaqquimanadsapa Jesocristo tahimari icassiejeranijineccadsa iboraqquri tiquinajarojine ahuato tanijine. Aji pohuadenidsa, madija ohuahadenidsa naqui accoraqquri tiquinadsapi Diodsa huatidsemanadsa: —Jehe Abi Dio, tiana deni tijani, bica tinani –quinahitohui. <sup>14</sup> Pohuadeni naco tiadenidsa huatideni huanaqquri nadsapa titohuideni Diodsa huati huati quinahitohui. Diopa tiadenidsa pocca tohuati huanehe, pocca biquehe inanajarojine Pohuadsa: —Tijine bica tani –quinahitohui.

<sup>15</sup> Diocca daniji iadsa Pohua Bedi bicabote, deni tojajari. Etti denima bica tanicca huati inanijine ipajira-jerani. Diodsa etidsedsa: —Jehe epejena! Ticca daniji iadsa bica tani –inana.

## 10

### *Pablopa pajissa Jesocristocca dosseniji cajijari*

<sup>1</sup> Ohua Pablo ohuatti bica tadsa tiadenidsa huati onana, ohuattissa tinanamananijine. Aja tiadeni mota ohuadsa ima ponimacca huati huati quinahi omittajaro. Attidenipa: —Pablo ibaccodsa huadsapa inoppine cappina tade. Naraha huaji tanidsa madidsapa pohua atti dacoranicca dsodode cappinera tajari –quinajari ttarana. Nadsapi pina Cristo jone tajari, bica tajarissa onadsa tiadenidsa huati onana: <sup>2</sup> Ticcadeni ima ticattemamanapoji, onajaro. Nema tiquinadsapi nidsa tiadenihuaji occapomadsa tiadenidsa ohuadi-jeranitohui. Madija iadsa tatamasso quinajaridenidsa huatide occappina-jerani. Aja attideni: —Pablodenipa pina ajijaro namicca imatohui disseraqquri najaridenissa quinadsa pohuadeni tohuini quinahicca tohuira madimanajari –quiquinanaraha iapi nema inejerani. <sup>3</sup> Iapi pajissa ajijaro namicca madija iquejenani. Naraha aji icahadirejaropi pina ajijaro namicca madijacca jadsiressa nejerani. <sup>4</sup> Icca jadsirejinepi pina ajijaro namicca madijaccassa nejerani. Icca jadsirejinepi Diocca dacorehe icajijaro. Najarodsa imasiri tadsajani icahadirejaro. Imasiri dacoranicca pina siba sse nahuajanini dacorajarossa naraha Diocca dacorehejine barariridsehe jicajarossa nanitohui. Diocca dacorehedsa Jesocristodsa jiperaqquri najaridenicca maidsehe inajicanissa tanitohui. <sup>5</sup> Madijadenicca deni tojehe naqui inajicanitohui. Madijapa Diocca pajissehe tocahatterahijineraha pohuadeni deni totonanadedeni ecossamanajaro. Poccadeni deni tojehe inajicadsapi pohuadeni bodicca huatohue Cristocca pajissehedsa nattome inahitohui. Nadsapi pohuadeni bodicca huatohue maidsehe tojani ahuato tanitohui. Bodideni cacajiqquimeradsa Cristodsana tohuiboramanahijine, onajaro. <sup>6</sup> Tiadeni huapima Cristodsa iboraqquri tiquinanissa tanijine imadiccani. Nidsa Cristodsa iboraqquri tiquinanissa tadsapi aja motadeni Cristodsa ibobo tajaripa etti dacoradsa huati icanabaqquihijine inajorani. Pina inajidsobaqquijarissa nahitohui.

<sup>7</sup> Tiadenipi madija huapi qquidera ojarijaro. Madija bodicca ima ssamoqquri tiquinani. Aja madija attipa: —Ohuapi Jesocristocca dodosse ojajaro –nadsapa pohua bodi huatona: Ia naqui pina pohuassa inajaro, Jesocristocca dodosse tabaqqui iquejenani. <sup>8</sup> Aji ohua motta ohuattipi: —Ia Medsede Jesocristopa ohuadsa pocca dossehe denima inanajaro –onanijine jipera onaraha nema onanijine occappina-jerani. Pajissa Jesocristocca dossehe ocajijaro. Najaro dossehe ohuadsa inanajaro pi tiadeni mari

ocanabaqquinissa tanijine, ticcadeni jeheniji todacorani nanijine. Ticcadeni jeheniji jicanijine jerani. <sup>9</sup> Occa ima teppepi pina tiadeni huajo tonanabaqquinijinessa naraha najaro tohuini onejerani. <sup>10</sup> Aja ohuadsa jiperaqquiri najarideni attidenipa: — Pablocca marinaja pocca ima teppedsa dsodo inajaropi dacorani. Naraha pohua assire ibaccohuaji huadsapa atti japari tahi. Huatide ssamo tahi –quinajari. <sup>11</sup> Naraha attideni nama quinajaridenidsa: Paji, tibodideni huatomananissa taji, onajaro. Nidsa tiadenihuaji jaijadsa tibaccodenihuaji idomo huadsapi ohuatti dacoranitohui. Pina huaji tanidsa omadidsa occa ima teppe tiadenidsa dsodo onajarossa nanitohui.

<sup>12</sup> Madija ohuahadenipa poccadeni imadsara huatidsemanajari. —Iapi bicaqquiri inani. Ijine bica tani –quiquinanaraha iapi nema inanijine icappinajaro. Pohuadenipa poccadeni imadsara pohuadeni nattome tanimanajari. Nama quinajarijine poccadeni imapi jidsa tajaro. <sup>13</sup> Iapi icca ima jerajarodsa: —Ijine bica tani –inejerani. Naraha Diodsa idsepe ijiniijinepi Pohua ia tocadossebaqquijaridsana: —Ijine bica tani –inanijine oppinera tani. Pohua ia tocadossebaqquijarijine tiadenihuaji bacco inadsa tiadeni mari icanabaqquijarode. <sup>14</sup> Jehe, iana tahide tiadenihuaji Jesocristo tahimari icassiejeranijinecca tiadeni maride bacco inapode. Tiadenihuaji jaijapo-jeradsapi: —Corintohuaji ijine bica tani –inejeranitohuiraha. <sup>15</sup> Madija ohuaha dsepe ijijaridsa ettipi: —Ijine bica tani –inejerani. Pohua dsepe ijihihuaji idsepe ijijeradsapi icca ima jerani. Naraha tiadenidsana idsepe ijidsanaponijine jipapa inani. Ticcadeni jeheniji napi dsanapodsapi denima tiadenidsa idsepe ijidsanaponijine. <sup>16</sup> Timadimanani denihuaji Jesocristo tahimari icassiejeranijinecca maride jaijanijine naqui jipapa inani. Naraha mamaride ohuahadeni mari icanabaqquimanapohuihuaji jaijanijinepi tohuini inejerani. Nanihuaji madija ohuahadenijine Dio Atti tojaporaha najarodsa: —Ijine bica tani –inejeranijine.

<sup>17</sup> Nema onajaropi Dio Atti dsodo nanidsa ajima napojaro: —Madijapa pohuajine bica tadsa: “Ojine bica tani” najarana. Pohua atti: “Diojine bica tani” nadsana pohua atti Ohuadsa bica tani –nahi nade Dio. <sup>18</sup> Madija pajissa bica tajaripa: —Ohuana bica onani –najarahi. Ia Medsede Diona pohuadsa: —Bica tinani –nadsapa pajissa iadsa, Diodsa naco bica tajari.

## 11

### *Pablopa maidsehe mamaridedenidsa deni tojajari*

<sup>1</sup> Ohuemecotedeni, ohuattipi tiadenidsa pina obodi tossamojarossa nanitide. Naraha nema nehe ohuadsa tedimana-jeraji. Mohuaradsa ohuatti timittamanaccaji, onajaro. <sup>2</sup> Ia Medsederata tinajarimanahijine onadsa Diojine tecconedeni huadi onajaro. Ohuapi pina dsohuatocca abissa onajaro. Tiadenipi pina dsohuatossa tiquinajaro. Cristo tiadeni tocajibaqquihijine pohuadsa huati onapojarode: —Corintohuaji quequeriqquimana najaridenipa ticca toquejenana –onapode. Nema onajaropi pina dsohuato bica tajaro maqquidejedsa ssamo taccajarossa tiquinajaro Cristodsa tiadeni da onabaqquinijine tohuini onajaro. <sup>3</sup> Jesocristodsa jehe tiquinajaropi bica tade. Pohua ojarijaridsara disseraquiri tiquinade. Naraha madija ohuaha tiadeni tocamaidسابaqquihini noppine ocappinani. Pina maittaccadsama macca maidsehe nahatojide rabotepa Eba icamaidsajarossa najaroa maidsehecca marinajadsa pajissa tiquinadsapi ticcadeni jeheniji Cristodsa tojaparirana, onajaro. <sup>4</sup> Nema onajaropi tiadenidsa marinaja onihini bacco nadsa timittamananijine tohuini tiquinani. Aja Jeso tahimari onihini jidsa tajaro mari mari quinadsa mittade jipaqquiri tiquinajaro. Tocarime ohuaha pina Dio Corimessa najararaha tiadenidsa tojahijine jehe tiquinajaro. Madija tocassiejerahijine tahimari onihini naqui pina tahide timittamanapojarossa nejararaha najarodsa pajissa tiquinajaro. <sup>5</sup> Najari maidsehe mamaridedenipa: —Iapi Jesocristocca dodosse tabaqqui iquejenani –quinaraha

pohuadeni attidsa pohuadeni deni tonanamanajari. Naraha ohuapi pohuadenidsa ajimani ojajerani. <sup>6</sup> Aji ohuapi ima huatide ssamo onajaro nitide. Naraha obodidsa nahato onani: marinaja pajissaccapi dsori onana-jerani. Najaro marinaja pajissacca nahato onajaropi occa marinaja, occa madiedsa naqui tiadenidsa ahuato onanadsanapojaro.

<sup>7</sup> Tiadenidsa omadidsapi Jesocristo tahimari icassiejeranijinecca manaconi jirehe tiadeni mari ocanabaqquide. (Nadsapa motadeni attipa: —A, marinaja manaconi jireheccapi ponima —quiquinanajari. Naraha ohuapi occa tarabajidsa onihiccadsana omadijarode.) Nema onadsapi ohua ajimani onanajarossa nadsa Diocca ima bicani ticassiejeranijinecca tiadenidsa tojanijinena odsepe ijijarode. ¿Naraha nema onajaropi tiadenidsa bica tejeraqui? <sup>8</sup> Dsama onihicca Jesocristodsa quequeriqquimana najaridenicca dsiniro ohuadsa da quinajarodsa omadijarode. Najaro poccadeni da naqquinaja odijidsajarossa nadsa manaconi jirehe tiadeni maride odsepe ijijarode. <sup>9</sup> Tiadenihuaji omadidsa naqui ocappiradsapi: —Ohuadsa da tiquinaji —onejerade. Aja ohuemecotedeni Masedoniacca bacco quinajaridenina ocappiranicca ohuadsa da quinajarode. Tiadenidsa occa madie najo tejeranijinepi ticcadeni dsinirotohui huati huati onejerade. Jidapana naqui najarossa odsanaponitohui. Dsinirotohui huatira onani. <sup>10</sup> Aji manaconi jirehe tiadeni maride ojajarocca imapi ohuadsa bica tajaro. Najaro imadsa ohohuatidse najaro. Nadsapi dsama arobeni Acaia nemanehedsa occaridsanihuajicca madija occa huatidsehe joma inanamananijine ssamo tani. Pina Jesocristocca pajissehe nahato onajarossa najaro occa huatidsehepi nema dsanaponitohui nahato onajaro. <sup>11</sup> ¿Nejecotohui ohuatti nema onajaro? ¿Tiadenidsa jipera onajaroqui? Nohuerani. Diopa obodi nahato tahi: tiadenidsa jipa onani, titohuideni ohuati huana tajaro.

<sup>12</sup> Nema nehe manaconi jirehe tiadeni mari ocanabaqquinijine onadsapi najarossa onanadsanaponitohui. Nema onanadsapi maidsehe mamaridedenicca ima joma onananitohui. Attidenipa: —Ia naqui madija mari icanabaqqujari pina Pablotenissa inajaro —quinaraha dsinirotohuira mari mari quinajari. <sup>13</sup> Pohuadenipa Jesocristocca dodosse tabaqqui pajissacca attidenissa quinadsa tiadeni tocamajidsabaqqui-manajari: —Jesocristo ia tocadossebaqqujari —quinaraha maidsamanajari. <sup>14</sup> Naraha poccadeni maidsehedsa huajo inejerana. Maidsehe jinede Satana naco pohua najidsadsa pina Diocca dodosse memehujicca ssiaja tajarissa nadsa madija icamaidsabaqqui tahi. <sup>15</sup> Nama nadsapa Satanacca imadsa dsepedeni ijimanajarideni pohuadeni najidsamanadsa pina bicaqquri najarissa quinadsa madija ihicamaidsabaqqui najari. Naraha nidsa dsotodepa poccadeni tabaccorehe manaconi pohuadenidsa najidsosue tojanitohui.

*Pablopa Jesocristocca dodosse tojararijine ocasserehe onihini onihini inahanajaro*

<sup>16</sup> Tiadenidsa huati onapomana. Ohuadsa: —Pablopa bodi tossamojari —tiquinejeraji. Naraha tibodideni nema tiquinadsapi epeje. Pina madija bodi tossamojarissa onadsa otahimari bica tajaro denima huati onadsa timittamanaji. <sup>17</sup> Tiadenidsa otahimari huati onajaropi ia Medsede atti jerani. Ohua otahimarira huati huati onajaropi obodi tossamojarossa najaro nahato onani. <sup>18</sup> Mamaridedeni huapi taha tiadenidsa huati huati toquinadsa: —Ijine bica tani —quiquinanaraha pohuadenipa pohuadeni tahimarira huati huati totoquina najari. Nadsapi ohua naqui otahimarira huati onana, onajaro. <sup>19</sup> Tiadenipi nahatojidede tijiraraha madija bodideni tossamomanajaridenicca marinaja mittade jipaqquri tiquinajaro. <sup>20</sup> Poccadeni marinaja mittade jipaqquri tiquinaraha poccadeni tabaccorehe tinahanamanajaro. Pohuadeni attissa tinamananijine attideni dacoradsa tiadeni dosse dosse quiquinanaraha manaconi jirehe tidsepedeni ijimanajaro. Tidsepedenitaji, ticcadeni dsiniro inajicamanajaro. Tiadeni tocamajidsa-baqquimanajari. Pohuadeni deni

tonanamanadsapa tiadeni ajamani tonanabaqqui-manajari. Tipanodeni huahuacca totonanabaqquimana najari. Naraha poccadeni tabaccorehe tiadenidsa bica tanitide. <sup>21</sup> Jaho ocappinajarossa naraha nema nehe huati onana: ¡Iapi japarigquiri inajaro! Tiadenidsa pina najaridenijinessa inananijine ipajira-jerani. Pohnadenipa: —Ijine bica tani –quinahijine dsiraqquiri nadsapa ohua naqui otahimari huatide dsira onana. Pina madija bodi tossamojari huati huati tajarissa onaraha nema nehe huati onana. <sup>22</sup> Ajana, pohnadeni attipa: —Iapi pajissa Isaraeri potemahi jodio madija iquejenani –quinaraha ohua naqui jodio. —Jodiodeni atti ebreo nahatoqquiri inani –quinaraha ohua naqui najaro tohuatti ebreopi ohuatti. —Icca idipa Abarahao –quinaraha ohua naqui pocca madija ojani. <sup>23</sup> —Iapi Jesocristocca dodosse tabaqqi iquejenani –quinaraha ohuana denima. Aji ohuana denima onajaropi pina madija bodi tossamojari huati huati tajarissa onajaro. Pohnadenipa Jesocristodsa dsepedeni ijimanaraha ohuana denima. Toponi cocorodsa naco huedsamanaraha ohuana denima toponi cocorodsa ohuedseje naridsaponi najaro. Cocossi tonahana-manaraha ohuana denima cocossi onahanaridsajarode. Oppinehe onihi, onihijine odsoqquebote naridsade. <sup>24</sup> Jehe, ohuapi najidsohue onahanani huapi tade. Jodiodeni ohuadsa huadiqquiri najari attideni: —Pablopa tabaccora tahi –quiquinanadsa ohua cossi quinani 39 nehe onahanapojaro. Dsotode naqui ohua cossi quinani 39 nehe onahanapomade. Dsotode naco nama quinapomade. Huajano ohuahadsa nama, huajano ohuahadsa nama quinajaride. <sup>25</sup> Ahuadsa naqui ohua idamanani 3 nade. Sibadsa naqui ohua iquinaqquimanani ojaride. Ocasserehe onihi onahanajaro naqui Jeso tahimari mari ocanaridsabaqquihijine canoa imenidsa benehi occadsapi canoa imeni je tocanade. Benehi onihidsa occapomadsa naqui canoa imeni je tocanapomade. Dsotode occapomadsa naqui canoa imeni je tocanapomade. Ocasserehe onihi onahanajaropi coridsa imeni nocconidsa je ocanadsa otabodsapi dsome, onassiaja, maji ohuaccapoma nade. <sup>26</sup> Benehi ojani huapi tadsapi oppina tanicca onahanani huapi tade. Hueni ssahaha dacorabote oppinani ohuajaro. Bobotidedenijine oppinani ohuajaro. Occa madijadenijine oppinani ohuajaro. Madija ohuahadenijine naqui oppinani ohuajaro. Odsa pananihuaji naqui oppinani ohuaridsa nade. Odsa nohueranihuaji naqui oppinani ohuade. Coridsa imenidsa naqui oppinani ohuapomade. Jesodsa jehe quinaraha maidsamanajaridenijine ocasserani ohuadsanapojarode. <sup>27</sup> Tarabadsa imeni ocajidsa naqui onahanade. Tabaccora tanicca onihi, onihi ohuadsa bacco bacco dsanapojarode. Dsome ohuada-jerani naqui huapi tade. Pemi onahana, obacco dsarini onahana naridsade. Ssirini tojadsa naqui ocasserani ohuaridsa najarode. Occa etero ocajicadsa naqui ossirinissa tade.

<sup>28</sup> Jehe, ocasserehe huapi tehe onahanaridsaje naraha ima onihihuaji naqui obodi huatoto caneje najaro. Aja Jesocristodsa quequeriqquimana najari huapimadenitohui obodi huatoto cadsanapodsapi ¿nejecoma quinahi? ohodsanapo najaro. <sup>29</sup> Madija ojariacca jeheniji tojaparidsapa ohua naqui obodi tojaparijarossa najaro. Ohuahapa pohua tessejine imasiri inanadsapi ohuadijaro.

<sup>30</sup> Ohuapi ohua deni onananijine jipera onani. Naraha nema nehe ocasserani onahanaridsajarocca ima huati huati onaccana, otahimari japari onanicca tiadenidsa ahuato tanijine. <sup>31</sup> Ia Medsede Jesocristo Imehi Diopa omaidsa-jerani nahato tajari. Pohnadsa etidsedsanaponijine bica tani. <sup>32</sup> Aji ohuadsa ima ssonaripojaro tahimarini timittamanadsa japari onani nahatoqquiri tiquinanijine. Najaropi maittaccadsama odsa panani Damascohuaji omadidsa poccadeni tamine deni tojahi Aretacca dosseniji dsama cacahuadepa ohua dama quinanijine icadossebaqquijari. Pohnajine otohui odsa panani huapihuaji siba hua nahujaninicca noccobiji huapima ecahuaridsa-mananissa tajarode. <sup>33</sup> Naraha otessedeni ohua acco icamamanade. Odsa panani siba sse nahujanini memehuajicca noccobiji bedenihuaji ssaji cohuahidsa otessedeni

ohua inajimamanadsa ohua tappa icanaronamanade. Nadsapi todsepe ojanitohuiraha dsori onajarode.

## 12

### *Dio Pablodsa ahuato inanajaro, Pablo comani inahanajaro*

<sup>1</sup> Ohua motta otahimaridsa: —Bica onani, deni ojan —onadsapi Dio ohuadsa: —Jehe, tettiipi bica tani —¿nahijineco? Nohuerahi. Naraha nema nehe ohua Medsede ohuadsa ahuato inanajarocca, ohua tonahattajaricca ima naqui tiadenidsa ohuacomeranijine. <sup>2-3</sup> Maittaccadsama huajano jicahi 14 nadsapa Cristodsa jehe najari ojariapa Dio Corimejine pina pocca huadassa naraha pajissa qqui tajari. Dio Corime memehuaaji pohua iaccamacossadsapa Dio madihhuaaji bacco tajari. Assire iaccamacossajari itide, corime itide, ssamo onani. Naraha Diona nahato tajari. <sup>4</sup> Naraha pajissa nahato onajaropi memehuaajicca dsama bicanihuaaji Dio Corime najari iaccamacossadsapa ima bicani cacomehecca mittajari. Mittaraha najaro ima madijadsa ecomeranijine Dio ecossanissa tajaro. <sup>5</sup> Ohuapi pocca ima nahato onajarodsa ohuatidsenipi bica tajaro. Naraha ohua deni onanadsa ohuatidsenijinepi jipera onani. Ohuapi ajimani. Japari onajarodsana ohuatidsenijine jipa onajaro. <sup>6</sup> Naraha occa ima bicani huati huati onadsa naqui ponimacca jerani. Pajissara huati huati onanijineraha joma onajaro. Aji huati onani madija mittamanadsapa: —A, Pablopa nahatojide rajari —quinarana onadsa. Occa madiejine, ohuattijine madija ohua deni inanamananijine jipera onajaro. <sup>7</sup> Dio ohuadsa bica tanicca deni tojanicca ahuato inanajarodsana obodi: Jehe, deni ojan onanijineraha nema onejeranijine ocassera tanicca ohuadsa tojajaro. Najaro comanipi ohuassiredsa pina Satanajine atia coba idsanajarissa najaro. <sup>8</sup> Najaro comanijine ocasserani onahanadsanapo-jeranijine ohua Medsede Diodsa huati onajaro, huati onapomajaro, huati omanipomajaro naraha tomossi-jerani. <sup>9</sup> Naraha ohuadsa ohua Medsede attipa: —Tiadsa ohuati huana tajaro. Ocasserehe tinahananijine tia acco ocamanitohui. Occa dacorehepi madija japari tajaridsana denima ahuato tani —nade ohuadsa. Pohua atti nama nadsapa japari onaraha ohuatidsejaro. Japari onadsa Cristopa ohuadsa pocca dacorehe ahuato inanajaro. <sup>10</sup> Jehe, japari onadsa, ohua itamassomanadsa, ocappiradsa naqui ohuatidsejaro. Nanajidso ojadsa, najo tanicca onahanadsa naqui Cristodsa dissera onajarojine onahana-dsanapodsapi ohuatidsejaro. Nema onajaropi mijira onadsa obodina todacorani najaro.

### *Corintohuaaji Jesocristodsa quequeriqquimana najaridenitohui Pablo bodi huatojari*

<sup>11</sup> Ohua motta occa imara huati huati onadsapi pina madija bodi tossamojarissa onaraha ohuadsa tettideni joma tiquinadsa nema onajaro. Tiadenina otahimari tetecomeramana nanijine occa ima nahatoqquiri tiquinaraha. Aja maidsehe maridedenidsana disseraqqiri tiquinajaro. Najaridenipa ohua ajimani inanama-naraha epeje, pina ponimaccassa onajaro. Naraha pohuadenidsa ajimani ojajerani. <sup>12</sup> Ohuapi pajissa Jesocristo ohua cadossejari tiadenidsa ahuato onanaridsajaro. Aji Djoine ocanahatori canajaro, aji qqui tiquinapo-jerajarrocca naqui ahuato onanajaro. Ocasserehe ohuadsa ssonaridsa naqui mohuaradsa onahanani ahuato tajaropaji. <sup>13</sup> Ima ojariena ojine dsori tiquinajaro. Najaroa tiadenidsa dsinirotohui huati huati onejerade. Nema onadsapi pina tiadeni ajimani onanabaqquijarossa najaro. Aja Jesocristodsa quequeriqquimana najari ohuahadenidsapi dsinirotohui huati huati onade. Naraha tiadenidsapi occa madie najo tejeranijine nema onejerade. Naraha ojine tiadenidsa bica tejeradsapi: Epeje, ojine bica tejerani, onajaro. <sup>14</sup> Tahide tiadeni qquide occani pamade. Jidapana tiadeni qquide occapomanijine onajorani. Nani tiadenihuaaji bacco onapomadsa naqui occa madie tiadenidsa



najo tejeranijine ohuadsa da tiquinaji onejeranitohui. Ohuapi ticajimananicca tohuini onejerani. Titohuidenina onajaro. Ohuapi pina ticcadeni abissa onajaro. Ejedenipa imehideni cappiramanahicca mitta mitta quina-jarahi. Imehidenina bedideni cappiramanahicca mitta mitta quinajari. <sup>15</sup> Nadsapi ohua ocajiarocca nemanehi tiadenidsa dade jipa onani. Tiadenidsa ima bicani tojanijine ohuassire naqui tiadenidsa ohuaccorajaro. Tiadenidsa accora onaraha ticcadeni ima ohuadsa jidsa tajaro. Ohuapi titohuideni denima ohuati huana dsanaporaha tiadenina ohuadsa tetideni tohuanerajonajaro.

<sup>16</sup> Occa madie tiadenidsa najora tanijine ticcadeni dsinirodsa omadi-gerani naha-toqquiri tiquinaraha ohuadsa tiadeni mota attidenipa: —Pablopa maidsade nahato tajari. Ia tocamaidساباqquihissa tajari —quinajari. <sup>17</sup> Naraha ¿nejecora tiadenidsa onanadsa tiadeni ocamaidsabaqquijarotte? ¿Tiadenihuaji dosse onabaqquijari ojaria ticcadeni dsinirotohui tiadeni tocamaidساباqquijari ttarana? ¡Nohuerahi! <sup>18</sup> Aja huajano toccapjaridsa Titona tiadeni qquide toccahijine pohuadsa huati onadsa toccade. Pohuadsa imecote ohuaha naco dosse onajaride. ¿Naraha Titopa dsinirotohui tiadenidsa maidsajari ttarana? ¡Nohuerahi! Pohuapa pina ohuassa najari. Pohua bodi tohuini nahiccapa pina ohua obodi tohuini onaniccassa najaro. Ohua, Tito tedsejepi Jesocristocca marinajassa inanadsa imadijaro. Najarossa icanirejaro.

<sup>19</sup> Aji icca ima huati huati onajaropi tiadenidsa: —Icca ima dsori tejerani, tossamo-gerani —inaniijine gerani. Ia Jesocristocca dodosse iquejenajaropi tiadenidsa ima bicani tojanijinera huati huati inajaro. Dio etti mittahi nahatoqquiri inajaro. Ohuemecotedeni, tiadenidsa ohuati huana tani. Idsepe ijie huapimapi Jesocristodsa jehe tiquinajaro todacorani nanijine. <sup>20</sup> Titohuideni obodi huatojaro: ¿Tiadeni qquide occapomadsapi ticcadeni ima nejecoma napadseje? ohonanajaro. Ticcadeni ima bica tadsa nani bacco onaniijine tohuini onani. Tiadeni naqui ticcadeni imadsa ohuatidsenijine tohuini tiquinani. Naraha ticcadeni ima bica tejeranicca noppinenina ocappinajaro. Ticahadirere canadsa timadimananitide. Madija cajjaricca acconi tetedimana nanitide. Amadsati tedimanadsa ahuaji johua, ahuaji johua tiquinanitide. Accoqquiri tiquinadsa timadimananitide. Najaro noppineni ocappinajaro. Titedsenidsa tatamasso tiquinanitide. Ponimacca ima huatijidede tijiranitide. — Ohuana deni ojani, bica onani —titiquina nanitide. Tiqueriqquimanadsa ahuaji johua, ahuaji johua tiquinadsa ticcadeni ima toccanissa tejeranitide. Nema tinanamanadsapi ohuatidse-geranitohui. Tiadeni naqui tiadeni huati ocanabaqquidsa ohuadsa tetidsemana-geranitohui. <sup>21</sup> Jehe, nanihuaji bacco onanipomadsapi ticcadeni imajine Dio tedsejema ocomehi nani noppineni ocappinajaro. ¿Ticcadeni imajine oji oji odsanapopadseje? onajaro. Aji tiadeni mota huapi taha tahidedsama imasirima madimanajonajaria jidapana naco nebomana-jarahitide. Pohuadenipa tabaccorehe oppina tanicca tonanade disseraqquri naccahitide. Huananehe huapima ihinanarid-samana naccanitide. Ima tabaccora tanicca tonanade disseraqquri naccahitide, onadsa ocappinajaro.

## 13

*Pablocca ima nattome quinaraha pohuadenidsa: —Tiadeni tiadenira nattome tinanimanaji —najari*

<sup>1</sup> Tahide tiadeni qquide occani pamade. Jidapana tiadeni qquide occapomanijine onajorani. Nani tiadenihuaji bacco onapomadsapi ticcadeni ima cattedmade onajo-geranitohui. Tetideni ajimamana-geraji: Madija ima tonanadsapa pohuadeni noccodsa qqui toquinajarideni ima cacattedmadedsa huati toquinahi bica tani. Madija pamaha, 3 quinaha naco huati toquinadsa pajirani. <sup>2</sup> Nadsapi tahide ima ticajimanapjarodeni, aji tiadeni huapimadsa naqui ohuati timittamananissa taji, onajaro. Huajano

toccapojaridsa tiadeni qquide occadsapi ticcadeni imasiri tinebomananijine tiadeni huati ocanabaqquide. Jidapana huaji tanidsa omadidsa naqui ohuatti nema onapomajaro: ¡Imasiri tinebomanaji! Tinebomana-jeradsa bacco onapomadsapi ticcadeni imasiri mohuaradsa onahana-jeranitohui. Ohuatti dacoradsa tiadeni huati ocanabaqqui-pomanitohui. <sup>3</sup> Nema onajaropi occa ima nattome tiquinadsa: — ¿Pablopa pajissa Cristo atti huati huati tajarico? —titiquina najaro. Naraha Jesocristopa dacorajari. Ticcadeni imasiri manaconi tiadeni tonajidso-baqquihijine japari tajarajari. Pocca dacorehe tiadenidsa ahuato inanantohui. <sup>4</sup> Pohnapa pina japari tajarissa nadsa ahua porimacossanidsa dsoqquejari. Naraha Dio pocca dacorehe pohuadsa inanadsapi nahatonidsa camitta taha madijari. Ia naqui najarossa inajaro. Jesocristocca japarie icajiraha pocca iquejenadsapi Diocca dacorehe icajini. Najaro dacorehema tiadeni acco camade imadijaro.

<sup>5</sup> Tibodideni huatonissa taji. ¿Ticcadeni jeheniji dacoraqui? Jari, tiadeni nattome tinanimanaji. —¿Pajissa Jesocristo ohuadsa madico? —tiquinaji. Jesocristo tiadenidsa madi-jaradsapa ticcadeni jeheniji dsori taccani. <sup>6</sup> Icca ima nattome tiquinadsa naqui dsori inanani qqui tiquinejeranitohui. Pajissa Jesocristo iadsa madihi tiadenidsa ahuato tanijine nahato onajaro. <sup>7</sup> Diodsa huatide iquejenadsapi: —Abi Dio, imecotedeni Corintocca tabaccorehe inanamana-jeranijine bodideni acco ticamabaqquina —ihinanajaro. Najaro icca huatinajapi icca marinaja tossamoni noppineni icappinadsa jerani. Pajissa ticcadeni madie pajiranissa tanijine tohuini inadsa Diodsa huati huati inajaro. Aji tiadeni mari icanabaqquijaro pina dsori tajarossa nanitide naraha epeje, nema nehe, inajaro. <sup>8</sup> Diocca pajisseheda ima inananiijine ipajira-jerani. Diocca pajissehema timadimananijine tiadeni acco icamabaqquinijinena bica tani. <sup>9</sup> Nadsapi japariquiri inaraha etidsejaro. Jesocristodsa ticcadeni jeheniji todacorani nanijinena tohuini inajaro. Titohuideni Diodsa huati huati inajaropi ticcadeni ima Diodsa pajiranissa tanijine. <sup>10</sup> Najarojine aji timadimananihuaji occapoma-jeraccadsa occa ima teppe tiadenidsa dsodo onajaro, nani bacco onejeraccadsama ticcadeni ima ticattemamanaponijine. Nadsapi nani bacco onadsa ohuatti dacoradsa tiadeni huati ocanabaqqui-jeranitohui. Ia Medsede pocca dossehe ohuadsa inanajaropi ticcadeni jeheniji todacorani nanijine. Ticcadeni jeheniji jicanijine jerani.

### *Pablocca ima jicanicca*

<sup>11</sup> Jehe ohuemecotedeni Jesocristodsa jehe tiquinajaro, ajiaropi occa ima jicanicca. Diodsara tetetidsemana naji, onajaro. Ticcadeni ima ticattemamanaji, ticcadeni madie tobicanijine. Tibodideni acco acco ticanana. Timecotedeni tedseje jehe ticanirenissa taji. Ticajonerara canadsa timadimananissa taji. Nema tiquinadsapi Dio tiadenidsa madihitohui. Diopa tohuati huanehe jinede, jonehe jinede.

<sup>12</sup> Nani timadimananihuaji timecotedeni tedseje bacco ticaniredsapi nija tiquinadsa dama, ticahuajacossa titiquina naji, onajaro. Aji omadinicca imecotedeni naco huapima tiadenidsa nija quinajari.

<sup>13</sup> Ia Medsede Jesocristopa tiadenidsa ima bicani inanana, onajaro. Diocca tohuati huanehe naqui tiadenidsa tojadsanapona. Pohua Corime tibodidenidsa madi-dsanapona, onajaro. Epejeni.

## **Pablopa Carasiadenidsa ima teppe dosse inajaro Gálatas**

Jesocca dodosse Pablopa tahide dsama Carasiahuajicca odsa panani onihi onihi naridsajarodsa, odsa capamema najaro onihi onihi naridsajarodsa ccaridsadsapa Jeso tahimari icassiejeranijinecca mari mari naridsajari. Dsotode Pablo dsama onihi-huaji toccahi nattipa jodio madija Moisesicca marinajabote nebomana-jarajarideni Carasiahuaji maride toquejenaridsajari. Najaridenicca marinaja inapamamanajaro. Attidenipa: —Jesodsa jehe inajaro Moisesicca marinajadsa iboraqquiri inadsapi icassiejeranijine. Jodiodenicca huissinaja icajini naqui bica tani –quiquinanajari.

Najaro marinaja tahimarini Pablo mittadsapa ajijaro ima teppe dsodo inajaro. Pohua attipa: —Icassiejeranijinepi Jesocristodsa pajissa inani ojari nadsana icassiejeranitohui. Moisesicca marinajapi ia tonassiajanijine pajira-gerani –najari pocca dsodonijidsa.

Pocca dsodoniji denima naqui: Jesodsa jehe inadsapi Dio Pohua Corime iadsa da inajari. Pohua Corimecca dossenijidsa ibora inadsapi ia acco tocamabaqquijari, Diodsa imadinissa tanijine.

### *Pablo nija najari*

<sup>1</sup> ¿Nija ohuemecotedeni? Occa ima tiadenidsa dsodo onajaro. Ohuapi Pablo, Jesocristocca dodosse ojani. Madija atti tohuaccade ojajerani. Madijapa ohua dosse naridsade nohuerahi. Ohua dossedepa Jesocristo, pohua nahatonide Abi Dio tedseje. <sup>2</sup> Ohua, ohuemecotedeni ohuadsa madimanajarideni tedseje tiadenidsa dsodo inajaro. Nani dsama arobeni Carasiahuaji titiqueriqquirdsa najaro huapimadsa: —¿Nija, bicaqquiri tiquinaqui? –inajaro. <sup>3</sup> Aja icca Abi Dio, ia Medsede Jesocristo pohuadeni pamaha tiadenidsa ima bicani inanamana-dsanapona, inajaro. Poccadeni jonehe naqui tiadenidsa tojadsanapona, inajaro. <sup>4</sup> Jesocristopa icca imasiri manaconi dsoqquehijine pohua ccaccorajari. Nama najaripa ajijaro dsamacca ima tabaccora taniccadsa iquejenadsanapo-geranijine. Icca Abi Dio ia todinibaqquihijine tohuini napodsa: —Occa ejedeni Jesopa madijacca imasiri manaconi dsoqquehitohui –napode. <sup>5</sup> Abi Dio nama nadsapa Pohuadsa: —¡Bica tinani, deni tijani! –ihidsanapo nana, onajaro. Pajissa nema nana.

### *Jesocristo ia tonassiajabaqquijaricca imapi ojarijaro*

<sup>6</sup> Diopa huati cahanari canadsa titohuideni huahua najari. Aja ia Medsede Jesocristo itohui huati huana tadsa ia tonassiajabaqquihijinecca imadsa iboraqquiri tiquinaporaha amadsati pohua tahimari tinebomanajaro. Icassiejeranijinecca ima onihidsara tiquejenadsapi ojabojo najaro. <sup>7</sup> Icassiejeranijinecca ima onihi nohuerajaro. Naraha ticcadeni jeheniji mohua mohua quinajari caji tahi. Najaridenijinena ticcadeni ima tossamojaro. Pohuadenipa Jesocristo tahimari icassiejeranijinecca tojidsanijine tohuini quinajari. <sup>8</sup> Naraha icassiejeranijinecca ima tiadeni mari icanabaqquipojaropi pajissacca. Marinaja najarossa nejeranicca maride ccajonadsa tiadeni mari tocanabaqquidsapa timittamana-gerana. Madija ohuaha itide, ohua nitide, Diocca dodosse memehujicca ccaronajari itide icassiejeranijinecca ima onihi tiadeni mari tocanabaqquidsapa najari mamaridedsa Diocca najidsohue ssonarina, onajaro. <sup>9</sup> Pina tiadenidsa huati onapojarossa najaro tiadenidsa dsodo onapomajaropi: Jesocristo tahimari icassiejeranijinecca pina tiadeni mari icanabaqquiponiccassa nejerajaro tiadeni mari tocanabaqquidsapa najari mamaridedsa Diocca najidsohue ssonarina, onajaro. <sup>10</sup> Ohuatti nema onajaropi madija ohuadsa:

—Jehe, Pablopa bica tahi –quinahijine ¿tohuini onajaroqui? ¡Nohuerani! Diona ohuadsa: —Jehe Pablo, tijine bica tani –nahijinena tohuini onajaro. Ajina, madijara onahatidsebaqquina onadsapi Jesocristocca dodosse ojajeranitohuiraha.

*Pablopa Jesocristocca dodosse tojapohuicca ima*

<sup>11</sup> Ohuemecotedeni, ajijaro ima timittamananissa tana: Jesocristo tahimari icasiejeranijinecca tiadenidsa ohuacomerajaropi madija pohua bodidsa inahatojaro jerani. <sup>12</sup> Aji, ohuattajaropi madijajine ohuadsa toja-jerani. Madija ohua mari cana-jararaha Jesocristo pohuana najaro ima ohua tonahattajaride.

<sup>13</sup> Tiadenipi occa ima tahidecca timittamanapode. Tahidepi jodiodenicca marinajadsara dissera onapoccade. Occa ima timittamanapojaro naqui aja Diocca madija Jesocristodsa jehe quinajaridenidsa tabaccora onapojarode. Jesocristo tahimari nebomanahijine pohuadeni ohonajidsobaqquiridsa najaride. <sup>14</sup> Occa madija pina occa huajanossa quinajarideni tedseje jodiodenicca marinajadsa dissesera inarid-saporaha ohuana denima dissera onajaro. Icca ididenicca marinaja ohuacahuanissa tanijine denima dissera onajarode. <sup>15</sup> Naraha Diopa pocca dodosse ojanijine tahide ossona-jeraccadsama ohua tocattejidajari. Ohuapi bica onejeraraha ohuadsa huati huana tadsa otohui huahua najaride. Nadsana Pohuajine occa ima cacajiqquimerajaro. Pohua tohuini nadsa Pohua Bedi ohua qqui tonanajari. <sup>16</sup> Pohua Bedi Jesocristo ohua qqui tonanajaripa jodio quejena-jarajaridenihuaji pohua tahimari icasiejeranijinecca ohuacomera-ridsanijine. Diopa ohuadsa nama naraha Jeso tahimari ohuattanijine madijadeni tedseje imahaha icananijine pohuadenidsa oqquejeraccade. Nohueraccade. <sup>17</sup> Odsa panani Jerosarehuaji naqui oqquejeraccade. Nahidsa Jeso pocca dodosse tabaqqui toquejenahijine huahua inabaqquiipojarideni madimanaraha pohuadeni qquide occana onejeraccade. Ohuapi nani odsa panani Damascodsa bacco onapodsa Jeso qqui onaraha dsama Arabiahuajina occapojaro. Nanidsana omadidsanapoccade. Huada huapi tadsana Damascohuaji occanipomajarode.

<sup>18</sup> Nadsapa huajano 3 tossoqquimadsana Jerosarehuaji Pedro qquide oqquemoranijarode. Nahi Pedrodsa huada 15 nehe omadijarode. <sup>19</sup> Nahidsa naco ia Medsede Jeso pohua imecote Satiaco qqui onapojari. Naraha Jesocca dodosse tabaqqui ohuahadenipa qqui onabaqqui-jaraccade. <sup>20</sup> Diopa ohuatti mittahi, omaidsajerani. Ohuatti tiadenidsa dsodo onajaropi pajissa.

<sup>21</sup> Nani dsotodepi dsama arobeni Siriahuaji occajaro. Dsama arobeni Ciliciahuaji naqui occaridsajarode, Jesocristo tahimari maride. <sup>22</sup> Naraha imecotedeni dsama arobeni Jodeahuajicca Jesocristodsa quequeriqquimana najaridenipa ohua qqui toquina-jaraccade. <sup>23</sup> Pohuadenipa dsama onihicca madija otahimari huati huati dsadsanapomana nadsa mimittamana napojari. Attidenipa: —Najaria tahidepa Jesocristo tahimaridsa toquejenajarideni najidsode ccaccaridsapo najaride. Jesocristo tahimari icassiejeranijinecca jicanijine dissera taporaha jidapanana najaro ima ehecomeraridsa najaro –quinahi nade. <sup>24</sup> Nema onani otahimari mittamanadsapa Diodsa huatidsemanajari.

## 2

*Benehi tojajari Jerosaredsa bacco tahijine*

<sup>1</sup> Jehe, huaji tanihuaji omadidsapi huajano 14 naha omadijaro. Dsotodepi Jerosarehuaji oqquemorani-pomajarode. Najaro benehidsapi Bernabe, Tito tedseje ohuadsa tohuedemoranijaride. <sup>2</sup> Nanihuaji oqquemorani-pomajaropi tahide Diopa occaninijine bica tani ahuato inanadsa oqquemoranijaro. Nadsapi Jerosare bacco onanidsa Jesocristodsa jehe quinajari huapimadsa occa marinajacca ima huati onabaqquijaride. Ime jocohuideni pohuadenira queriqquimanadsa naco occa

marinajacca ima mittamanahissa tahijine huati onabaqquijaride. —Jodio quejena-jarajaridenidsa Jesocristo tahimari icassiejeranijinecca ohuacomera-ridsaniccapi ajima najaro -onade. Obodipi: Occa imadsa ¿nejecoma quinahi? onadsa huati onajarode. Ohuatti mittamanadsa ¿occa marinaja tahide ohuacomera-ridsaponicca pina ponimassa nejerattaqui? ¿Occa marinaja jidapanacca naqui ponimaqui? onaraha nohuerani. Pohnuadenidsa bica tade. <sup>3</sup> Aja otesse Tito ohuadsa ccaridsajaridsa naco bicaqquiri najari. Pohnuapa dsama Cresiahuaicca madijaraha pohnuadsa: —Jodiodenicca huissinaja ticajiji -quina-jarade. <sup>4</sup> Najaro huissinajacca imapi nohueraraha jodiode ni motapa najarotohui disseraqquri najari. Najaridenipa Jesocristodsa pajissa quinaraha maidsamanajari. Pohnuadenipa iqueriqquinidsa jahidsimajari, ia noccodsade. Jesocristo tahimarijine Moisesicca marinajadsa imadi-jeraraha najaridenina Moisesicca marinajadsa ia tonananibaqquihijine tohuini quinajari. <sup>5</sup> Jehe, najarideni mamaidsadedenipa disseraqquri naraha pohnuadeni attidsa ibobora inejerade. Nohuerade. ¡Jesocristo tahimari icassiejeranijinecca ojarinina pajissa! Carasiahuaji timadimanajarodenipi najarodsara pajissa tidsanapomanani bica tani, inajaro.

<sup>6</sup> Jehe, ohuapi nani Jerosaredsa Jesocristodsa jehe quinajari ime jocoहुuideni Jesocristo tahimari mari mari onajaro nattome quinaraha dsori onanani nohuerade. Attidenipa: —Ajima najaro naqui mari mari taji -quina-jarade. Ime jocoहुuideni quejenaraha ocappina-jerade. Aja Diodsapa deni toquejenajarideni, ajamani toquejenajarideni huapima najarissa caniqquimerajari. <sup>7</sup> Nadsama ime jocoहुuideni occa ima mittamanadsapa: —Jehe, bica tani -quinade. Aja jodio quejena-jarajaridenidsa Jesocristo tahimari icassiejeranijinecca ohuaccora-ridsanijine Dio ohua cadossejari pohnuadenidsa ahuato tajaro. Pohnuadeni attipa: —Pajissa Pablocca ima pina Pedro jodiode ni maride Dio icadossejarissa najaro -quinade. <sup>8</sup> Dio Pohnu ojarijarina Pedro dosse inajari, jodiode ni dsa Jesocristo tahimari eccoraridsanijine. Ohua naqui jodio quejena-jarajaridenidsa Jesocristo tahimari ohuaccora-ridsanijine ohua cadossejari.

<sup>9</sup> Jodio quejena-jarajarideni maride ojanijine Dio ohua cadossejaricca imapi aja Satiaco, Pedro, Huano quinajaridenidsa ahuato tajaro. Najaridenipa Jesocristodsa quequeriqquimana najarideni cacahuade deni toquejenahicca. Nadsama ohua, Bernabe tedseje jodio quejena-jarajaridenidsa maride icadaridsanijine pohnuadenidsa bica tadsapi idsepe cobo tabaqquidsa attidenipa: —Epeje. Tiadenipi jodio quejena-jarajaridenidsa tidsepedeni ijimananijine bica tani. Iana jodiode ni dsara idsepe ijiniijine -quinade. <sup>10</sup> Najaridenipa ima ojariera iadsa huati toquinade: —Aja Jerosarehuaicca imecotedeni mota cappiramanajaridenidsa tetideni ajimamana tejerana. Ticcadeni da naqquinaja mota pohnuadenidsa da da tidsanapomanana -quinade. Najaro imadsa: —Jehe, nema onana -onapodsama nema onanajonajaro.

### *Pablopa Pedro johua icanajari*

<sup>11</sup> Pedropa imadinicca odsa panani Atioquiahuaji ccasonadsa nahidsa pocca ima bica taporaha dsotode pohnuajine bica tejerani. Najaro qqui onadsapi madija huapima mittamanahijine pohnuadsa huati huati onajarode. <sup>12</sup> Aja Pedropa tahide jodio quejena-jarajaridenidsa jipade totoqquedsima napojari. Naraha dsotodepa imecotedeni Jerosarehuaicca Satiaco dosse inajonabaqquijari. Najarideni jahijonadsa Pedrocca ima tojidsajaro. Aja imecotedeni Jerosareccapa jodio quejena-jarajaridenidsa jajahi tojedsima najarajari. Pohnuadenidsapi huissinaja cappiramanajaridenidsa jipade oppina tajaro. Nadsapa najarideni noppine Pedro jodio quejena-jarajaridenidsa jipade nebojari. Nadsapa jodio quejenajari huissinaja cajimanajaridenihuajira jipade totoqquedsima najaride. <sup>13</sup> Nama nadsapa imecote Atioquiacca jodiode ni mota naco pina Pedrossa quinajari, jodio quejena-jarajaridenidsa tohuajimanajari. Bernabe naco najaridenidsama tohuajijari. <sup>14</sup> Nadsapi poccadeni ima bica tejerani



qqui onade. Naraha ima toccanissa tajaropi jodiodeni, jodio quejena-jarajarideni huapima Jesocristodsa jehe inadsapi pohuana ia tonassiajabaqquijari. Najarona pajissa icassiejeranijinecca ima. Aji poccadeni ima bica tejeradsapi Jesocristodsa quequeriqquimana najari huapima mittamanahijine Pedrodsa huati onajarode: —Tiapi jodioraha pina jodio quejena-jarajaridenissa tehe timadiccade. Jesodsa tijarajone Moisesicca marinaja tinebojarode. Nema taporaha ¿nejecotohui jidapapi: “Jodio quejena-jarajarideni Moisesicca marinajadsa iboraqquri nana” tajaro? Nema tanipi bica tejerani –onajarode.

### *Icassiejeranijinepi Jesocristodsara jehe inajaro*

<sup>15</sup> Iapi jodiodenidsa issonadsapi jodiodeni iquejenajaro. Iapi pina jodio quejena-jarajari imasiri sseqquiri najaridenissa inejerani. <sup>16</sup> Naraha ibodidsa nahatoqquri inajaro: Diocca dosseniji Moisesi dsodo inajarodsa iboraqquri inajaropi icca ima Diodsa pajiranissa tanijine pajira-jerani. Jesocristo tahimaridsa pajissa inadsana pohuajine icca ima Diodsa pajiranissa tajaro. Jesocristodsa pajissa inadsapi icca ima Diodsa pajiranissa tajarajone ia tonassiajabaqquijari. Nadsama icassiejeranijinepi Diocca dossenijissa inanajarajone jerani.

<sup>17</sup> Ettipi: —Jesocristodsa pajissa inadsa icca ima pajiranissa tanijine –inadsapi aja jodiodeni Diocca dossenijidsa disseraqquri najaridenipa iadsa: —Diocca dosseniji tahidecca tinebomanadsapi imasiri sseqquiri tiquinani –tiquinanajari. Naraha ¿Jesocristojine imasiri inanajaroqui? ¡Nohuerani! Imapi nema nejerani, onajaro. <sup>18</sup> Naraha ohuapi Diocca dosseniji tahidecca onebojaro odimanidsapi imasiri onanani ahuato tajaro. <sup>19</sup> Maittaccadsama Diocca dosseniji tahidecca ohuacahuadsapi occa ima Diodsa onapajiranissa tanijine ssamo tade. Naraha Jesocristocca ojadapi pohua tedseje ohua naqui ahua porimacossanidsa odsoqquejarossa najarode. Najaropi Diocca dosseniji tahideccadsa pina ohuatiajarossa najaro. Jidapapi Dio Pohua tohui nahiccara onananijine omadijaro. <sup>20</sup> Ohuapi Jesocristo tedseje ahua porimacossanidsa ipamajonajarossa nadsa occa madie jadanipi jicajaro. Jidapapa Cristona ohuadsa madijari. Nadsama ajijaro namidsa ohuassirema omadiccadsapi Dio Bedi Jesocristodsa jehe odsanapodsa omadijaro. Najarina otohui huati huana tajaride. Ohua tonassiajahijine dsoqquehedsa pohua ccaccorajaride. <sup>21</sup> Diopa itohui huati cahanari canadsa Pohua Bedi eccorajari, icca imasiri manaconi. Nadsapi pocca daniji bicani ohuattajonijine jerani. Aji, Moisesicca marinajadsa icassiejeranijine pajiradsapi nassa Jesocristopa pohuama dsoqquehitohuiraha. Naraha pohuama dsoqque-jarajari. Pajissa icassiejeranijinena itohui dsoqquejaride.

## 3

### *¿Diocca dosseniji Moisesi dsodo inajarodsa iboraqquri inanijinequi?*

<sup>1</sup> ¡Jaho! Tiadeni Carasiahuaji timadiridsa-manajarodenipi tibodideni huatomananijine ssamoqquri tiquinajaro. ¿Nejecojari attijine tibodideni tossamajaro? Nani tiadenihuaji Jesocristo ahua porimacossanidsa dsoqquejari tahimari ohuacomera-ridsapodsapi pina qqui tiquinajarissa najaride. Naraha jidapapi ima onihidsana tiquejenajaro. <sup>2</sup> Jari, ajijaro ohuatti ojarie tecomeramananijine tohuini onajaro. Aja Dio Pohua Corime tiadenidsa inanaridsajaripa ¿Moisesicca marinajadsa iboraqquri tiquinarajonequi? ¡Nohuerani! Jesocristo tahimari timittamanadsa pajissa tiquinadsana Dio Pohua Corime tiadenidsa inanaridsajaride. <sup>3</sup> ¿Nejecotohui timittamananissa tejerajaro? Aja Jesocristodsa jehe tiquinapodsama Dio Corime tiadeni acco tocamabaqquijari, Jesocristo tahimaridsa timadimananijine. Naraha ¿nejecotohui jidapapi ticcadeni ima tojidsajaro? Aji tettidenipi: —Icca ima Diodsa pajiranissa tanijine Moisesicca marinajassa inanana –tiquinaraha. Nema tiquinanipi

bica tejerani, onajaro. <sup>4</sup> Ajina ¿Jesocristo tahimaridsa jehe tiquinadsapi Dio tiadenidsa ima bicani inanajaropi ponimaqui? ¡Ponima jerani! <sup>5</sup> Jari, tibodideni huatoma-manaji: Diopa tiadenidsa Pohua Corime inanaridsajari, aja tiadenihuaji naco canahatori canaridsajari. Naraha ¿nejecotohui nama najaritta? ¿Moisesicca marinajadsa iboraqquiri tiquinajarojinequi? ¡Nohuerani! Jesocristo tahimari timittamanadsa jehe tiquinajarojinena nama najari.

<sup>6</sup> Jari, Abarahao tahimaridsa tibodideni huatoma-manaji. Abarahaopa Diodsa pajissa najarijine Dio Attipa: —Abarahaocca imapi ohuadsa bica tani —najari.

<sup>7</sup> Nadsama madija Diodsa pajissa quinajaridenipa pina Abarahao pajissa najarissa quinajari. Najaridenidsa: —Pajissa Abarahao potemahideni —ihinanajaro.

<sup>8</sup> Maittaccadsama Dio Atti dsodo napojarodsaja ajiaro ima ahuato inanapojaro: Jodio quejena-jarajarideni Diodsa pajissa quinadsapa poccadeni ima Diodsa tobicanitohui. Diopa pohnadenidsa: —Tiadenidsa ima nohuerani. Bicaqquiri tiquinani —nahitohui. Najaro ima bicani madija tocassiejerahijinecca Dio Abarahaodsaja huati tapojari: —Tipotemani dsotodeccajine ajiaro dsamacca madija huapimadsa ima bicani tojarid-sanitohui —napojari. <sup>9</sup> Nadsama Abarahaodsaja ima bicani tojararopi Diodsa pajissa najarijine. Najarossa najaroa madija huapima Diodsa pajissa quinajaridenidsa ima bicani tojaridsanitohui.

<sup>10</sup> Naraha madija attidenia: —Moisesicca marinajadsaja iboraqquiri inadsapi icca ima Diodsa tobicanitohui —quiquinanaraha najaridenipa tocassiejera-jarahitohui. Dio pocca najidsohue pohnadenidsa inananitohui. Najaro imapi Dio Atti dsodo nanidsa ajima najaro: —Diocca dosseniji nemanehedsa madija ibora tajarajaripa najidsohuedsa tojahitohui —nani nade. <sup>11</sup> Nadsapi iadsa ahuato tajaro: Madijacca ima Diodsa bica tajaropi Moisesicca marinajassa inanajarojine jerani. Icca ima Diodsa bica tajaropi Pohnadsa pajissa inadsana paji. Dio Atti dsodo nanidsa ajima najaro: —Madija bica tajari Diodsa pajissa najaripa najaro jehenijima madi-dsanapohuitohui —nani nade. <sup>12</sup> Naraha Diocca dosseniji tahidecca Moisesi dsodo inajarodsara madijaripa jeheniji jiraha madihitohui. Dio Atti dsodo nanidsapi ajima najaro: —Ajiaro dossenijissa inanadsa madijaripa najaro dossenijidsara madihitohui —nani nade.

<sup>13</sup> Naraha Cristopa ia todinibaqquihijine dsocquejari. Diocca dossenijissa inanadsa imadinijine ipajira-jeradsapi Dio pocca najidsohue iadsa inassonarinitohuiraha Cristodsana inassonarijaro. Pohnadsa tojararopi pina Moisesi dsodo inapojarocassa najaro: —Ahuadsa que tadsa dsocquejaripa Diocca najidsohue cajijari —nani nade.

<sup>14</sup> Cristo ia todinibaqquijaripa aja jodio quejena-jarajari pohnadsa jehe quinajarideni naco ima bicani cajimanahijine. Najaro ima bicani Dio Abarahaodsaja huati tapojarissa najaro pohnadenidsa tojanijine. Ima onihi naqui iapi Jesocristodsaja jehe inadsapi Dio Pohna Corime iadsa inanaridsajari, pina Pohna huati tapojarissa najaro iadsa da inajari.

*Dio pocca ima bicani inananijinecca ima huati tapojari, dsotodena pocca marinaja da inajaro*

<sup>15</sup> Ohuemecotedeni, ajiaro namidsa imadijarocca imadsa tiadeni mari ocanabaqquina. Madijapa pohna tesse tedseje —Jehe icanirena —quinadsapa poccadeni jehe canireniji papeodsaja dsodo quinajaro. Nadsapa najaro papeodsaja pohnadeni dsepe ppa quinadsapa madija ohuaha atti: —Najaro dsodonijipi poni, nebona —nahijine ssamo tani. Ima onihi inaharimananijine naqui oppina tani. <sup>16</sup> Najaro imassa najaroa Diopa tahide Abarahaodsaja huati tapojaricca cacajiqquimeranijine ssamo tani. Pohna Atti Abarahaodsaja: —Tiadsa, tipotemanidsa ima bicani onananitohui —napojari. Naraha Dio Atti dsodo nanidsapi: —Tipotemani huapimadsa —nejerajaro. Pohna potemahi ojariadsana dsodo najarode. Najaripa Cristo. <sup>17</sup> Najaro Dio huati

tapojaricca ima huati onajaropi ajima najaro: Abarahaopa Diodsa pajissa nadsa Dio Abarahao tedseje jehe canirehi quinade. Naraha dsotode huajano 430 naha tossoniquimadsana Dio pocca dosseniji Moisesidsa da inadsa dsodo inajaro. Naraha najaro dosseniji Dio Abarahao tedseje jehe canirejaricca ima inassamonijine pajirajerani. Dio Abarahaodsa huati tapojaricca ima naqui ponima inananijine pajirajerani. <sup>18</sup> Ajina, Dio pocca ima bicani icassiejeranijinecca Moisesicca marinajadsa iboraqquiri najaridenidsara da inadsapi nassa Dio Pohua Attissa inana-jeranitohuiraha. Pohua huati tapohuicca naqui ponima tojanitohuiraha. Dio Pohua huati tapojaricca danijipi manaconi jirehe Abarahaodsa da inajarossa najaro. Abarahao Diodsa ibora tajarijine jarahi. <sup>19</sup> Nadsapi tettidenia: —¿Nejecotohuira Diopa pocca dosseniji Moisesidsa da inajarotte? —tiquinanitidija. Najaropi madijadenicca imasiri pohnadenidsa ahuato tanijine. Abarahaodsa ima bicani huati tapojari nattinipi Dio pocca dosseniji da inajaro. Najaro dosseniji ecahuamana-jonajaropi Abarahao potemahi bicabote ojaría ccajonahi bacco tajaropaji. Nadsama Dio pocca dosseniji da inadsapi madijadenidsa huati tajarajari. Pocca dodosse tabaqquidsa huati tadsana pohnadenina Moisesidsa huati iqquma-manajaro. Nadsapa Moisesina madijadeni mari icanabaqqujari. <sup>20</sup> Naraha Dio Abarahaodsa huati tapodsapa Pohua Atti huati toqqumade jiraha huati tajari. Dio Pohua motta: —Ohuattissa nehe onananitohui —nahi nade Abarahaodsa.

*Dio pocca dosseniji da inajaropi Jesocristodsa bacco inanjine ia acco camajaro*

<sup>21</sup> ¿Nadsama Dio pocca dosseniji Moisesidsa da inajaropi Dio Pohua huati tapojaricca ima bicani inassamonijine pajiraqui? ¡Nohuerani! Nassa Moisesicca marinaja camittehe jiquejeranicca dade pajiradsapi najaro marinajadsa iboraqquiri inadsa icca ima Diodsa tobicanitohuiraha. <sup>22</sup> Naraha Dio Attidsa ima imittajaropi ia huapima imasiridsa pina todsepe iquejenajarossa najaro. Najaro imasiridsa ia tappa tabaqquihijinepa Jesocristona ojaríhi. Madija huapima pohnadsa jehe quinajaridenidsa Diocca ima bicani tojanitohui.

<sup>23</sup> Naraha Jesocristodsa jehe inejeraccadsapi Moisesicca marinajadsa imadijonarójine pina toponi cocorodsa edsajarossa inajarode. Najarodsa imadijonarodsa Jesocristo tahimari imittadsa jehe inadsapi iqqunenajarossa najarode. <sup>24</sup> Najaro imassa najaro huati onana, timittamananissa tanijine, onajaro. Moisesicca marinajapi Jesocristodsa bacco inanjine pina ia tonequebaqquijarossa najaro. Pina ejedeni cacahuade ejedeni inequeridsa-baqquijarissa najarode. Jesocristo tahimari icassiejeranijinecca imittadsa jehe inadsapi icca ima Diodsa tobicajaro. Iadsa Dio Attipa: —Bicaqquiri tiquinani —najari. <sup>25</sup> Naraha jidapana Jesocristodsa jehe inadsapi Moisesicca marinajapi pina ia cacahuadessa napoma-jerani.

<sup>26</sup> Jesocristodsa jehe tiquinadsapi Dio pocca ejedeni tiquejenajaro. <sup>27</sup> Pohnadsa jehe tiquinadsapi passodsa totopa ticajimanajarode. Nadsapi pohnadsa tijariqquimanajaro. Cristo pocca madiessa tinanamanehe timadimanajaro. <sup>28</sup> Tiadeni huapima Jesocristodsa jehe tiquinajaropi jodiodeni, jodio jarajarideni, medsedeni, medse jarajarideni, maqquidejedeni, amonejedeni huapima Jesocristodsa tijariqquimananissa tajaro. <sup>29</sup> Jesocristodsa tiquejenadsapi Abarahao potemahi tiquejenani. Nadsapi Dio Abarahaodsa ima bicani huati tapojaricca tiadenidsa naqui tojajaro.

## 4

*Diocca ejedeni iquejenani*

<sup>1</sup> Diocca ejedeni iquejenajaropi ajijaro namidsa imadijarocca imassa najarodsa tiadeni mari ocanabaqquina. Madija dsoqquedsapa dsepetaji pohna bedidsa totoja najaro. Pohna bedipa imehi dsepetaji nemanene cajihijineraha ehuera taccadsapa pina pocca madijacca medse tarabidsajinessa naha madicajari. <sup>2</sup> Ejedeni ehuera

taccadsapa pohua cacahuade caji, imehi dsepetaji cacahuade caji najari. Najari-denidsa madijonajaria aja imehi hua idsanahicca huajano bacco tajari. <sup>3</sup> Ia naqui tahide ajijaro namicca imadsa iboraqquiri inapodsapi pina madijacca medsessa inaccade. Pina aja ejedeni imehi dsepetaji pohuadsa tojanijine tohuini madijarissa inapode. <sup>4</sup> Naraha Dio pocca ejedeni Jesocristo madija iassa naha dosse inaron-ahijinecca huada bacco tadsa amonejedsa tossonajari. Moisesicca marinajadsa ibora tahijine tossonajaride. <sup>5</sup> Jehe, Moisesicca marinajadsa medse iquejenaporaha dsotodepi najaro marinajadsa ia todinibaqquihijine ccaronajaride Jeso. Nadsapa Dio iadsa: —Occa medsedeni –najarajari. —Occa ejedenideni –najari. <sup>6</sup> Nadsama Dio pocca ejedeni iquejenadsa naqui Pohua Bedi Corime iadsa madihijine ibodidsa dosse idsimajaride. Najarijinena ettipi: —Pajissa, Tiapi icca Abi Dio –inajaro. <sup>7</sup> Jidapapi medse tiquejena-gerani. Diopa tiadenidsa: —Occa ejedenideni –najari. Nadsapi pocca ejedeni tiquejenajarojine Dio Pohua pocca tiadenidsa inanaridsanitohui.

*Pablopa Jesodsa jehe quinajaridenicca ima jidsa tejeranijine mari icanabaqqujari*

<sup>8</sup> Jehe, tahide Diodsa ssamoqquiri tiquinapodsapi tiadeni cacahuade pohuamaccad-sara: —Ia cacahuade –titiquinapo najaro. Najari tiadeni cacahuade maidseheccadsa tiquejenapoccade. <sup>9</sup> Naraha jidapanana Diojine pocca ejedeni tiquejenadsapi Pohuadsa nahatoqquiri tiquinani. Dio Pohua naco tiadenidsa nahato tajari. Naraha ¿nejecotohui tiadeni cacahuadebotedsa tiquejenani-pomanijine? Najaripa pohuamacca. Dacorehe caji-jarahi. <sup>10</sup> Ima onihi naqui. Ejetecca disseraqquri tiquinajaro. Tettidenipi: —Ejete ecahuadsapi icca ima Diodsa bica tanijine –¿tiquinajaroqui? Pina ejetecca huada bacco tadsa najaro ejete tinanamana, abadsico cahittahicca ejete tinanamana, huadsajacca ppa nahi bono poredecca ejete tinanamana, huajano namanahacca ejete tinanamana najaro. <sup>11</sup> Nadsama ticcadeni ima tojidsadsapi ocappinadsa: —¿Jaho, ponima tiadeni maride odsepe ijjarottaqui? –ohonanajaro.

<sup>12-13</sup> Ohuemecotedeni, ohuassa tiquinaji, onajaro. Pina jodiodenicca marinajadsa medse oajerajarossa tiquinaji. Ohua naqui aji tiadenissa onajaro, jodio quejena-jarajaridenidsa ohoquejema nani nahatoqquiri tiquinani. Ohua qqui tiquinapodsapi naqui coma onaraha ohua tinacasseramana nejerade. Najaro comanijinea tiadenihuaji Jesocristo tahimari icassiejeranijinecca mari mari ohonanajaro nahatoqquiri tiquinajaro. <sup>14</sup> Occa comehe tiadeni nattome tabaqqujaro. Najarojine ohuadsa jiperaqquri tiquinanitohuiraha nema tiquinejerade. Ohua tettajomana-gerade. Tiadenidsa bacco odsimadsapi pina Diocca dodosse memehuaicca tiadenidsa bacco todsimajarissa onajaro. Ohuadsa bicaqquri tiquinade. Otohui tiquinadsa naqui pina Jesocristo pohuatohui tiquinajarossa nade. <sup>15</sup> Naraha nahato onani: Tahidepi otohui tetideni huanacquiri nadsa tipajiramanadsapi onocco tobicanijine tinocodenira tidinemanadsa ohuadsa da tiquinanitohuiraha. <sup>16</sup> ¿Naraha jidapapi ticcadeni huadi ojajaroqui? Pajissara tiadenidsa huati onadsapi ohuadsa tedimananitide, onajaro.

<sup>17</sup> Tiadenipi mamaridedeni ohuaha ticajimanani nahato onani. Najaridenipa poccadeni mamari tabaqqui tiquejenanijine disseraqquri najari. Naraha poccadeni imapi bica tejerani. Occa marinaja tinebomanadsa poccadeni marinajadsara disseraqquri tiquinanijine tohuini quinajari. <sup>18</sup> Madija ohuahadeni titohuideni disseraqquri nahijine bica tani, oppinera tani, poccadeni ima bica tadsa. Ohuadsa naqui disseraqquri tiquinanijine bica tani, onajaro. Nema tidsanapomanana. Tiadenidsa omadidsa omadi-geradsa naqui, onajaro. <sup>19</sup> A, otessedeni, tiadenipi occa ejedenissa tiquinani. Ticcadeni ima ohuadsa ocassera tadsapi pina amoneje poni bedi tossonahijine comene ahujarossa onajaro. Tiadenipi Jesocristo pohuassa tiquinanijine bacco tiquinejeradsapi ohuadsa ocassera-dsanapoccanitohui. <sup>20</sup> Jaho, jidapapi tiadenihuaji omadiccaraho, onajaro. Nassa tiadenihuaji omadidsapi ohuatti

bica tadsa tiadenidsa huati onanitoahiraha. Ajina, ticcadeni imajine ssamoni ohuadsa ¿nejecoma onanijine? onajaro.

*Acara, Sara tahimarinidenidsa iattana*

<sup>21</sup> Jari, tiadeni Moisesicca marinajadsa timadimana-dsanaponijine tohuini tiquinajaropi ohuatti tecomeramanaji: ¿Moisesicca marinaja hua quinadsa Abarahao tahimari titimittamana nejerattaqui? onajaro. <sup>22</sup> Aji maittaccadsama Moisesi dsodo inapojaropi ajima najaro: Abarahaopa bedi pamaha cajijari. Ohuahapa medse tojani bodinitaji. Ohuahapa pohua pocca amoneje medse tojani jerajaro bodinitaji quinajari. <sup>23</sup> Najarideni pamahapa Abarahao bedi quejenaraha medse tojani bodinitaji tossonajaripa pina ia huapima icca abijine ami jiadsa issonajarossa najari. Naraha Abarahao pocca amonejedsa tossonahijinena Dio Abarahaodsa: — Ojine ejedeni ticajimananitoahui –najari. Nadsapi Sara ccaraniraha ejedeni cajidsa tossonajari. Dio huati tapojari pajiranissa tajaro.

<sup>24</sup> Abarahaocca amoneje pamehe tahimarinidenidsa ima iattanijine ahuato tajaro. Amoneje pamehepi pina Diocca jehe canireniji pamehecca imassa quinajaro. Tahidepi amoneje medse tojanicca ima qqui inapona. Najaro amoneje oninipi Acara. Acarapi medseje najaro poni potemanideni naco medse toquejena-dsanapojari. Acaracca imapi pina Dio pocca madija tedseje ssono Sinahihuaji jehe canirejaricca imassa najaro. <sup>25</sup> Najaro ssonopi dsama onini Arabiahuaji huajaro. Nanihuaji Moisesi Diocca dosseniji dsodo inapojaro. Najaro dossenijidsa Diopa pocca madija tedseje jehe canirepojari. Nadsama odsa panani Jerosarehuaji madimanajarideni naco najaro jehe canirenijidsa iboraqquiri naccajari. Najaridenipa Moisesicca marinajadsa medse toquejenajarissa quinadsapa pina Acara tahimarinissa najaro cajimanajari. <sup>26</sup> Naraha Abarahao bedimeni medse tojani jerajaro Saracca imapi pina Diocca jehe canireniji dsaticca imassa najaro. Pina Jerosare dsati memehujicca imassa najaro. Najaro odsa pananipi icca odsa jiquejeranicca. Iapi Moisesicca marinajadsa medse iquejenajeradsapi Jerosare dsaticca madija iquejenajaro. Pina Saracca ejedenissa inajaro. <sup>27</sup> Najaro imapi Dio Atti dsodo nanidsa ajima najaro:

—Amoneje ccarani, tetidseri naji.

Ejedeni comene ssamo tinaraha pina tetti mohui tadsa jiri jiri taji.

Amoneje, tiapi nenebo tijaporaha ejedeni ticajinitohui.

Pina amoneje maqqui cajijarocca ejedenissa najarahitohui. Ticcapa potemahi denima huapi tahitohui

—nahi nade Dio Atti Isahia dsodo inajaro.

<sup>28</sup> Ohuemecotedeni, tiadenipi pina Saracca ejedeni Isahacassa tiquinajaro. Diopa: —Abarahao potemahi huapi tahitohui –napojaripa aji tiadeni paji. <sup>29</sup> Naraha maittaccadsama Abarahao madidsa pohua bedi tahidecca aja pina ia huapima icca abijine ami jiadsa issonajarossa najaripa pohua ohuaha nanajidso naridsajari quinade. Aja Abarahao bedi dsotodecca Dio Corimejine tossonajari Isahacapa bica taraha tahideccana huadi tajari. Jidapana najaro imassa najaro tojaridsajaroa Jesocristo tahimaridsa iquejenajarodeni nanajidso iquejenajaro, Moisesicca marinajadsa medse toquejenajaridenijine. <sup>30</sup> Naraha Dio Attipa ¿nejecoma najaritta? Jehe, Dio Atti Moisesi dsodo inajaropi: —Najaro amoneje medse tojani poni bedima dosse tininebaquijo. Nidsa imehi dsoqquedsapa pohua dsepetajibote medse tojani bedidsa toja-jeranijine. Amoneje medse tojani jerajaro bedidsana imehi dsepetajibote tojanijine –napohui nade. <sup>31</sup> Ohuemecotedeni, iapi pina medse tojani potemanissa inejerani. Jesocristo tahimaridsa jehe inadsapi Moisesicca marinajadsa medse iquejena-jerajaro. Iapi pina medse tojani jerajaro potemanissa inajaro.



## 5

*Jesocristojine Moisesicca marinajadsa medse iquejena-jerani*

<sup>1</sup> Jesocristopa Moisesicca marinajadsa imadidsanapo-jeraniijine ia tappa tabaqquijari. Nadsapi Jesocristo tahimaridsara disseraqquri tiquinaji. Moisesicca marinajapi tinebomanana, najarocca dodosse tiquejenanipoma-jeraniijine.

<sup>2</sup> Ohuapi Pablo. Ohuatti timittamananissa taji. Huissinaja ticappiramanaraha huissinaja tohuini tiquinadsapi tijinedeni Jesocristopa pohuamassa nahitohui. Nadsapi ticcadeni ima Diodsa tobicanijine Cristo tiadeni acco tocamabaqqui-jarahitohui, onajaro. <sup>3</sup> Tiadenidsa huati omanipomajaro: Jodio jarajari huissinaja cajijaripa Moisesicca marinaja nemanehessa inanadsanaponijine. Nama najaradsapa pahuadsa toppinanitohui. <sup>4</sup> Pajissa tibodidenipi: —Moisesicca marinajassa onanadsa ohua ojine Diodsa occa ima pajiranissa tanitohui —tiquinadsapi Jesocristodsa tiajimanajaro. Diocca tohuati huanehe tettajomanajaro. <sup>5</sup> Naraha icca ima Diodsa pajiranissa tanijine tohuini inadsapi Jesocristodsa pajissa inadsa Dio Corime ia acco camadsapa icca ima Diodsa tobicajaro. <sup>6</sup> Jesocristodsa iquejenanissa tadsapi huissinaja icajidsa icaji-jeradsa naqui Diodsapi najarossa caniqquimerajaro. Najaro huissinajacca imapi ponima tojajaro. Naraha ima pajissaccapi Jesocristo tahimaridsa jehe inanissa tajarona paji. Najaro jeheniji ahuato tanijinepi Diocca tohuati huanehema itessedenitohui eti cahanaridserara canadana bica tani.

<sup>7</sup> Jaho, tahidepi pajissehe tahimarini timittamanapodsa najarossa tinanamanapode. Naraha ¿nejecojari atti timittamanadsa ticcadeni iborehe tinebomanajarotte?

<sup>8</sup> Najaricca marinajapi Diocca dosseniji jerani. Dio tiadeni huahua tabaqquijaripa Pohua Bedi Jesocristodsa tiquejenanijine. <sup>9</sup> Ajana pan ssaja tahijine quequejema badsira taha icanejemadsapa pan namanaha ssaja tajari. Najaro imapi marinaja onihitahimarini. Aji maidsehecca marinajapi badsira taraha pajissacca marinajadsa quejemadsapi pajissacca tossamo tani. <sup>10</sup> Naraha obodidsa nahato onajaro: Ia Medsede tiadeni tohuacahua-baqquihissa tahi, marinaja onihidsa tiquejena-jeranitohui. Occa marinajadsara tiquejena-dsanaponitohui, onajaro. Naraha aja maidsehe tiadeni mari tocanabaqquidepa ¿nejecohuajicca? Ssamo onaraha nidsa dsotode Dio inajidsohuitohui nahato onani.

<sup>11</sup> Ohuemecotedeni, tibodideni huatoma-manaji. Tiadenidsa: —Huissinaja ticajimanaji —ohonaridsa nadsapi jodiodeni ohuadsa nacasseraqquri najarahitohuiraha. Jesocristo ahua porimacossanidsa itohui dsoqquejari tahimari mari mari onajarojine jodiodeni ohuadsa nacasseraqquri najari. <sup>12</sup> Naraha tiadenidsa mohua mohua quinajarideni: —Huissinaja ticajimanaji —quiquinanajaridenipa pohua pahuadeni dsoporira nemanehe huissi toppiccaraho, onajaro.

<sup>13</sup> Ohuemecotedeni, Dio titohuideni huahua nadsapa Moisesicca marinajadsa tiadeni tappa tabaqquijari. Jidapapi Moisesicca marinaja pina tiadeni dossedessa nejerani. Naraha tibodideni tohuini tiquinanicca tinanaridsamana tejeraji. Ajima tinanamanadsana bica tani: Dio pocca tohuati huanehedsara timecotedeni tedseje acco acco ticanaridserara canana, onajaro. <sup>14</sup> Diocca dosseniji nemanehe huati timanimananijinepi huapi taraha tassaqquinicca ojariepi: —Tinoridenicadsa tetideni huanacquiri naji, pina tiadenidsa tetideni huanacquiri najarossa naji —nahi nade. <sup>15</sup> Aji timecotedeni tedseje tatamasso ticanaridseradsa pina cca cca ticanaridserajarossa nadsapi paji, tijinedeni Jesocristodsa titiqueriqqui najaropi tossamorana, onajaro.

*Dio Corime ibodidsa madidsapa icca madie bica tanijine*

<sup>16</sup> Ohuemecotedeni, ohuattipi: Dio Corime tibodidenidsa madidsapa pocca dossenijidsa iboraqquri tiquinaji. Nema tiquinadsapi tibodidenicca tabaccorehe tohuini tiquinejeranijine, onajaro. <sup>17</sup> Ibodicca tabaccorehepi Dio Corimedsa huadi tajaro.

Manaco Dio Corimepa ibodicca tabaccorehedsa huadi tajari. Najaro ima pamehepi ibodidsa cacahadire najaro. Nadsapi Dio Corime tibodidenidsa madijarijine tohuini tiquinanicca tinanamananijineraha ecossa tani. <sup>18</sup> Dio Corimepa timadimananissa tanijine tiadeni dosse dosse nahitohui. Pocca dossenijidsa iboraqquiri tiquinadsapi Moisesicca marinajadsa timadimana-jerani.

<sup>19</sup> Ia huapima nahatoqquiri inani: Madija pohuadeni bodidsa tabaccorehe tohuini quinadsapa Dio jipera tahicca inanamana tani. Pina pocca amoneje jeraraha tohuini dissera tajari, ponicca maqqui jararaha tohui dissera tajaro, pohua tesse tedseje, poni tassani tadsajani huananehe oppina tanicca inanamanajaro, ima tabaccora tanicca tonanade dissera tajari. Najaro ima huapimadsa Dio jipera tajari. <sup>20</sup> Pina siba nahatonidsa, dsoppinejedenidsa naco: —Ia cacahuade –quinajari. Pina ttemode, tomade, caribajade tohuini disseraqqiri najari. Denimapi nacasserehe, tamassohue, pohua tessecaraha tohuini najari. Amadsati cahadirejari, ahuaji jipera ahuaji jipera naridsamanajari, pohuadenijine madija caroberidsamanajari. Najaro ima huapimadsa Dio jipera tajari. <sup>21</sup> Denimapi dsepe sse tajaricca acconi huadijari, nocco jano tajari, dsira taha ccaridsajari. Nema nanicca ima huapimapi tabaccora tajaro Diodsa. Naraha tiadenidsa paji, onajaro. Nanihuaji omadidsa tiadeni mari ocanabaqquipojarossa najaro tiadenidsa dsodo onapomajaro: Dio jipera tahicca tabaccorehe inanamanajarodenipa nidsa Jesocristo ccanipomadsa Diocca cacahuehehuaji toquejena-jarahitohui.

<sup>22</sup> Naraha Jesocristodsa iquejenadsapi icca ima pina ahua bicahi bonojide rajarissa najaro. Dio Corimejine ibono icajijaropi pina tohuati huanehe, huatidsehe, jonehe najaro. Jehe, Dio Corime ibodidsa madijarijinea iapi huapimadsa eti huanaqquiri najaro. Diocca huatidsehema imadijaro. Joneqqiri inadsa imadijaro, amadsati edijerajaro, etti bica tadsa huati huati inajaro. Ima bicanira inanajaro, Diodsara jehe idsanapojaro. <sup>23</sup> —Iana deni iquejenani –inejerajaro. Imasiri inana-jeranijine ia ecahuajaro. Najaro ima bicani huapimapi Dio Corimejine icajijaro. Najaro ima huapimadsa Dio naco, madija naco: —Tabaccora tani, oppina tani –quina-jarahi. <sup>24</sup> Nadsama Jesocristodsa iquejenajaropi pohua tedseje ahua porimacossanidsa ibodidsa tabaccorehe tohuini inanicca jicajaro. Imedsa tohuini inanicca, ibodi huatohue tabaccora tanicca huapima jicajaro. <sup>25</sup> Nadsapi Dio Corimejine icca madie cacajiqquimeradsapi pocca dossenijidsa iboraqquiri inana, onajaro. <sup>26</sup> Nadsapi etti: —Iana nahatoqquiri inani, deni iquejenani –inejerana. Itessedsa edijerana. Ettipi: —¿Tiapi ohuassa taqui? –inejerana. Itesse nahato tadsa pohua cajidsa naco pocca tohui ijami-jerana, onajaro.

## 6

### *Imecotedeni tedseje acco acco icananijine*

<sup>1</sup> Jehe ohuemecotedeni, Dio Corimecca dossenijidsa iboraqquiri tiquinajarodenipi timecote ojaría imasiridsa tohuedimadsapa acco ticamamanajo, onajaro. Diocca tohuati huanehema mohuaradsa timecote pina tinatehemani-manapomajo. Tiadeni naqui tiadeni tecahuamanaji. Tibodidenidsa: —Ia naqui tabaccora tanicca inanarana –tiquinana, onajaro. <sup>2</sup> Timecote ocasserani ahuadsapa acco ticamamanana. Manaco ocasserani temanadsa tiadeni acco tocamabaqquihijine bica tani. Timecotedeni tedseje ahuaji acco, ahuaji acco titicanaridsera nadsapi Jesocristocca marinajassa tinanamananijine, onajaro.

<sup>3</sup> Madijapa pohua bodidsa: —Nahato onani –naraha ssamo tadsapa pohua pohua tocamaidhani tahi. <sup>4</sup> Jari, ia huapima icca madijera nattome inana, onajaro. Ijine pajissa bica tadsapi najarodsa etidseni bica tani. Imecotedenicca madie nattome inejerana. Imecotedenijine qqui inadsa: —Ijinena denima bica tani –inejerana.

Nema inanipi pina: —Iana nahatoqquiri inani –inajarossa narana. <sup>5</sup> Ia ojari inehacca imapi ijine. Bica tadsa, bica tejeradsa naqui icca ima manaconi iadsa tojanitohui.

<sup>6</sup> Jehe, tiadeni maridejine Dio Atti ticahatteradsapi tiadeni maridedsa accoraqquiri tiquinana, onajaro. Ticajimananica huapima pohuadsa accoraqquiri tiquinanijinepi bica tani, onajaro.

<sup>7</sup> Paji, tiadeni ticamaidsanimanarana. Madija iapi Dio icamaidsahijine ipajirajerani. —Dio qqui tajarahi, icamaidsana –tiquinejerana, onajaro. Ppa nahi nocco ppa tiquinadsapa najari ppa nahi bonora pore tijidsamanahitohui. Aji ticcadeni imapi nocco ppadecca imassa najaro. <sup>8</sup> Tabaccorehe tinanamanadsapi dsoqqeche jiquejeraniccahuaji tiquejenanitohui. Naraha Dio Corime jipa tahiccara tinanamanadsapi camittehe jiquejeranica ticajimana-dsanaponitohui. <sup>9</sup> Nadsapi ima bicani inandsanaponijine ja iquejena-jerana. Ijapari-jeradsapi nidsa dsotode bono bicahi pore ijidsahitohui. Najari bonopa Dio pocca biquehe iadsa inananitohui. <sup>10</sup> Nadsapi ima bicani inananijine ipajiradsapi nema inanana, onajaro. Tahidepa imecotedeni Jesocristodsa jehe quinajarideni inanabicabaquippa, dsotodena madija huapima inanabicabaquina, onajaro.

### *Pablocca ima jicanicca*

<sup>11</sup> Occa dsodoniji qqui tiquinaji. Aji tiadenidsa dsodo onajaropi odsepedsa dsodo onajarojine pota tani. <sup>12</sup> Jehe, tiadenidsa jodio attidenipa: —Jari, tiadeni naqui iassa tiquinaji. Huissinaja ticajimanana –quinahi caji tahi. Naraha attideni nama quinajaridenipa pohuadeni tesse attideni: —Jehe, tijinedeni bica tani –quinahijine tohuini quinajari. Najaridenipa Jesocristo ahua porimacossanidsa dsoqqejeri tahimaridsa jehe quinaraha nanajidso toquejenahi noppineni cappinamanadsapa huissinajacca ima nebomana-jarajari. <sup>13</sup> Naraha huissinaja cajimanajaridenipa Moisesicca marinaja nemanehessa inanamana-jeraraha huissinaja ticajimananijine tiadenidsa disseraqquri nahi. Pohuadeni attipa: —Ettidsa huissinaja cajimanahi –quinahijine tohuini quinajari. <sup>14</sup> Naraha ohuapi otessedsa: —Ojine bica tani –onanijine jipera onani. Ia Medsede Jesocristo ahua porimacossanidsa dsoqqejeri tahimarira ohuacomeranijinena jipa onajaro. Pohua dsoqqejerijine ajijaro namicca tabaccorehepi pina huatiajarossa najaro ohuadsa. Najaro tabaccorehe onanapomanijine tohuini onejerani. Ponidsa pina ohuatiajarossa najaro. <sup>15</sup> Aja huissinaja cajijari, huissinaja cappirajari naco najarissa caniqquimerajari. Huissinajacca imapi ponima tojani. Naraha Jesocristodsa jehe inajaro imana ponima toja-jerani. Najarijinena ibodi dsati tojajaro. Najaro ima ojariena bica tajararo. <sup>16</sup> Nadsama ajijaro marinajassa inanamanajarodenidsa Dio pocca jonehe, pocca tohuati huanehe tojana, onajaro. Najaridenipa Diocca madija pajissacca.

<sup>17</sup> Jidapapi ohuadsa huadiqquri najarideni denima ohua inajidsomana-pomanijine jipera onani, onajaro. Ohuapi Jesocristocca dodosse ojajarojine najidsohue onahanaridsani ahuato tajararo. Aja ohuadsa jiperaqquri najaridenijine ohueme tobejomaroni.

<sup>18</sup> Jehe ohuemecotedeni, ia Medsede Jesocristopa tiadenidsa ima bicani inanana, onajaro. Pajissa nema nana. Epejeni.

## Pabloa Epesodenidsa ima teppe dosse inajaro Efesios

Epesopi dsama Asiahuajicca odsa panani. Pabloa nahidsa huajano 3 naha madijari. Nahidsa madidsa Jesocristo tahimari maride tojadsapa madija huapi taha Jesodsa toquejenajari. Najaro imapi Roca dsodo inajaro Jesocca dodosse tabaqqui tahimarideni capítulo 19'dsa, 20'dsa naqui anijaro.

Dsotode Pablo dsama onihihuaji madidsapa Epesocca madijadsa ajijaro ima dsodo inajaro. Dio pohuadenidsa huati cahanari canahicca ima denima tocahatterahijine, Dio jipa tahiccara inanamanadsa madimanahijine naqui dsodo inajaro.

Jesocristodsa iquejenadsapi icca madie dsati tojajaro. Imadinissa tanijinecca ima naqui Pablo dsodo inajaro.

Tabaccorehe jinede Satanapa iadsa dissera tajari, imasiri inananiijine. Pablocca dsodonijipi ia mari tocanabaqquijaro, dacoco ijiraniijine, imasiridsa iedima-geraniijine.

### *Pablo nija najari*

<sup>1</sup> ¿Nija ohuemecotedeni? Occa ima tiadenidsa dsodo onajaro. Ohuapi Pablo. Dio ohuadsa jipa tadsa Jesocristocca dodosse ojanijine otohui huahua najari. Jehe, nani odsa panani Epesodsa timadimanajaropi Diocca madija bicaqquri tiquinani, Jesocristodsa disseraqquri tiquinajardenidsa dsodo onajaro. <sup>2</sup> Icca Abi Dio, Pohua Bedi ia Medsede Jesocristo tedseje tiadenidsa ima bicani inanamana-dsanapona. Poccadeni jonehe naqui tibodidenidsa tojadsanapona, onajaro.

### *Jesocristodsa iquejenajarojine ima bicani iadsa anijaro*

<sup>3</sup> Diodsa etti ajima inana: —Jehe Abi Dio, bica tinani, deni tijani. Iadsa ima bicani tinanajaro -ihidsanapo nana. Diopa pajissa ia Medsede Jesocristocca Abi. Jesocristodsa iquejenajarojine ima bicani memehuai anijaro huapima iadsa da inajaro. Pohua Corimepa ibodidsa najaro ima bicani inanaridsajaro. <sup>4</sup> Diopa dsama inahatopo-geradsama itohui napojari. Pocca madija iquejenaniijine ia tocatte-jidsabaqquijari. Nama najaria Pohua Bedi Jesocristodsa pajissa inajarodeni ibodi ssi-ajaqquri nadsa Dio Pohuatohuira imadinissa dsanaponijine. Ia qqui tabaqquidsapa imasiri icappirani ia qqui tabaqquihitohui. Diopa iadsa huati huana tajari. <sup>5</sup> Diopa maittaccadsama: —Madija medse onanabaqquina, pina occa ejedenidenissa quinahi-jine -napojari nade. Nadsapi Pohua Bedi Jesocristodsa iquejenadsa Dio pocca madija iquejenajaro. Najaro imapi Diodsa bica tani. Pohua tohuini nadsa nema inanajaro. <sup>6</sup> Nadsama iapi: —¡Jehe Abi Dio, bica tinani, bica tinani! Iapi bicaqquri inejeraraha iadsa ima bicani tinanajaro. ¡Ticca tohuati huanehepi deni tojani! -ihinanajaro. Abi Diopa Pohua Bedi Jesocristodsa huati huana tajari. Najaridsa pajissa inadsapi iadsa ima bicani inanajaro. <sup>7</sup> Imasiri iadsa dacoraraha Dio itohui huati cahanari canadsa ia tappa tabaqquihijine pocca ejedeni eccorajari. Pohua emene toccajaropi icca imasiri manaconi tojajaro. Nadsapa Dio iadsa: —Ticcadeni imasiridsa epeje onani -najari. <sup>8</sup> Diopa nema inanajaropi iadsa pocca tohuati huanehe ahuato inanajaro. Memehujicca nahatohue, tohuattehe huapima naqui iadsa inanaridsajaro. <sup>9</sup> Diopa iadsa ima bicani inananiijine ecahuapojaropi tahide ahuatora taporaha jidapana iadsa ahuato inanajaro. Najaro imapi Pohua tohuini napodsa: —Occa ejedenidsa ajima onananitohui -napode. <sup>10</sup> Najaroa nidsa dsotode Pohua tohuini nahicca huada bacco tadsa pocca tonahatobaqquinaja huapima aja memehujicca, namihujicca naco huapima inatassaqquihitohui. Nadsapa Pohua Bedi Jesocristo huapimadsa deni inanadsapa pohuana huapima ecahuabaqquihitohui.

<sup>11</sup> Diopa Pohua jipa tahicca inananiijine tohuini nadsa najarossa inanajaro. Tahide madija iquejena-jeraccadsama Diopa: —Madija ocattejidsa-baqquihitohui, occa madija toquejenadsa pohuadenidsa occa daniji bicani da onabaqquinijine —napohui nade. Nadsapi Jesocristodsa pajissa inadsa Diocca madija iquejenajaro. Nadsapi Dio pocca daniji bicani huati tapojaricca iadsa inanaridsanitohui. <sup>12</sup> Dio Pohua tohuini nadsa tahide ia jodiidenina Jesocristodsa pajissa inapojaro. Diodsa etidsedsa Pohuadsa: —Jehe Abi Dio, bica tinani, deni tijani —ihinananiijine Dio ia tocattejidsabaqquijari. <sup>13</sup> Tiadenipi jodio tiquejena-jeraraha Jesocristo tahimari icassiejeraniijinecca timittamanadsapi pajissa tiquinajaro. Nadsapi tiadeni naqui Jesocristocca tiquejenajaro. Nadsana Dio pocca madija tiquejenajaro ahuato taniijine Pohua Corime dosse inaronajari. Pina tahide huati tapojarissa najari: —Nidsa Ocorime tiadenidsa onanaridsanitohui —napohui nade. <sup>14</sup> Dio Pohua Corime iadsa inanaridsajaripa pocca daniji bicani huati tapojaricca pajissa iadsa tojanitohui nahatoto inanijine. Najaro daniji bicanipi nidsa dsotode pocca madija idinibaqquia jicahissa tadsapa pocca daniji bicani huapimadsa da inaridsanitohui. Dio nama najaria madija Pohuadsa huatidsemanadsa: —¡Jehe Abi Dio, bica tinani, deni tijani! —quiquinanahijine.

*Pablopa Diocca nahatohuetohui Diodsa huati tajari*

<sup>15</sup> Ticcadeni ima omittaponidsama titohuideni Diodsa huati huati odsanapojaro. Aji ia Medsede Jesodsa pajissa tiquinanissa tajaro ima omittajaro. Diodsa toquejenajari huapimadsa naqui tetideni huanacquiri najaro quinahi omittadsa ohuatidsejaro. <sup>16</sup> Pajissa Diodsa huatide ojadapi titohuideni ohuati ajima-jerajaro. Diodsa huati onadsapi: —Jehe Abi Dio, epejeni. Tijine bica tani. Episodes jeheniji bica tadsa ohuatidseni —ohonanajaro. <sup>17</sup> Diopa ia Medsede Jesocristocca Abi bica tajari. Pohuadsa huati onadsa naqui: —Abi Dio, pohuadenidsa Ticorimecca tohuattehe, nahatohue tinanaridsaji —ohonanajaro. Pocca nahatohue tibodidenidsa inehemadsapi Diocca pajissehe tiadenidsa ahuato taniijine. Dio naco tiadenidsa tojidserara dsanapohuijine. <sup>18</sup> Diodsa ohuatti onihi naqui: —Abi Dio, pohuadeni tedsejemacca ima bicani bodidenidsa ahuato tinanaji —ohonanajaro. Diopa pocca madija tiquejenaniijine tiadeni huahua tabaqquijari. Itedsejemacca ima bicani iadsa tojanijine tohuini imadijaropi pajissa iadsa tojanitohui. Najaro nahatoqquri tiquinaniijine Diodsa huati huati ohonajaro. Dio Pohuadsa toquejenajaridenidsa pocca daniji bicani da inani nahatoqquri tiquinaniijine naqui Pohuadsa huati huati ohonajaro. <sup>19</sup> Dio pocca dacorehe naqui tiadenidsa ahuato taniijine Pohuadsa huati huati ohonajaro. Pocca dacorehepi motarani, jicaqqi-jerani. Najaro dacorehepi Pohuadsa pajissa inajarodenidsa anijaro. Najaro dacorehepi Dio Pohua dacoraja najari. <sup>20</sup> Diopa pocca dacoreheda Jesocristo dsoqqueraha inahatonijari. Memehuai iaccamacossanidsa deni inanadsapa Pohua inori nahatonihuaji inahittarijari. <sup>21</sup> Nahidsapa memehuaijica, namihuajica huapima dossede tojajari. Pocca dacorehe deni tojajaro. Pocca cacahuehe jiquejerajaro. Jidapana ajijaro dsamaccadsa deni tojajari. Nidsa dsotodecca dsama dsati ccajonajarodsa naco nama dsanapohuitohui. Pocca deni tojehe jiquejeranitohui. <sup>22</sup> Diopa memehuaijica, namihuajica huapima ajamani inanabaqquijari. Pohua Bedi Jesocristo deni inanadsapa huapima dossede deni tojajari. Ia naqui pocca iquejenajaro ia dossede tojajari, pina itatissa najari. <sup>23</sup> Ia Cristodsa ijariqquijaropi pina pohua assiressa inajaro. Iadsa pajirahissa taridsajari. Meme, nami huapimadsa naco pohuana pajirahissa taridsajari.

**2**

*Diopa iadsa huati cahanari canadsa ia tonassijabaqquijari*



<sup>1</sup> Tahidepi ticcadeni tabaccorehe, ticcadeni imasirijine Diodsapi pina tecotajarossa najarode. <sup>2</sup> Ticcadeni madie pina Diodsa toquejena-jarajaridenissa tiquinajarode. Ajijaro namicca imatohui disseraqquri tiquinadsapi Diocca huadi Satana attidsana iboraqquri tiquinajarode. Najaripa aja qqui inabaqqui-jarajarideni dossede toja-jaripaja. Puhuapa Diodsa iboqquri najaridenidsa naco dosse dosse najari. <sup>3</sup> Ia huapimapi tahide nema inapojaro. Diodsa iboqquri inajarode, ibodidsa tabaccorehe tohuini inaniccara ihinana najarode. Ime tohuini inanicca tabaccora taniccadsa disseraqquri inajarode. Imasirima issonajarojine Dio ia tonajidso-baqquidsapa pina madija huapima inajidsobaqquijarissa inanitohuiraha.

<sup>4</sup> Diopa tohuati huanehe sse tajari. Itohui huati cahanari canajari. <sup>5</sup> Imasiri sseqquri inajarojinepi pina ecotajarossa inaccade. Naraha Jesocristocca madija iquejenadsapi Diopa iadsa camittehe dsati da inajaro. Pocca tohuati huanehepi bica tani, deni tojani. Najaroma tiadenidsa huati cahanari canadsa tiadeni tonassiajabaqquijari. <sup>6</sup> Madija ia huapima pina ecotajarossa inaraha Diopa Jesocristo inahatonidsa ia naqui pohua tedseje ia tonahatonibaqquijari. Nadsapi memehuaji Dio Puhujine Cristo tedseje jassi inarinitohui. <sup>7</sup> Dio nama najaria nidsa dsotode pocca tohuati huanehe bicani iadsa inanani madija huapimadsa ahuato tanitohui. Aji icca ima Diodsa tobicajaropi Jesocristo puhujine. Nadsapa Dio iadsa huati cahanari canahi madija qqui toquinahitohui. Najaro ima naqui mittamanahitohui. <sup>8</sup> Abi Diopa titohuideni huati cahanari canajaria tiadeni tonassiajabaqquijari. —Jesocristo pajissa itohui dsoqquejari –tiquinadsapi tiadenidsa tossiejehe inanajaro. Tijinedeni jerani. Abi Dio tohuini nadsa manaconi jirehe tiadenidsa inanajaro. <sup>9</sup> Pajissa, Dio tiadeni tonassiajabaqquijaripa bicaqquri tiquinajarojine jerani. Ima bicani tinanamajarojine jerani. Najarojine madijapa: —Bica onajarojine Dio ohua tonassiajajari –njarahitohui. <sup>10</sup> Diopa tahide nahato tapojari: —Occa tonahatobaqquinaja ima bicanira inanamananitohui. Ohuattidsa madimanahissa tahitohui –nadsapa Puhua Bedi Jesocristo dosse inaronajari, puhujine inahatomanidsati iquejenanijine.

### *Jodiodeni, jodio quejena-jarajaridenima Cristodsa ijariqquijaro*

<sup>11</sup> Tiadenipi jodiodenissa tiquinehe tissonamana-jerajaropi jodio tiquejena-jerani. Huissinaja ticappiramanehe timadimanadsapi jodiodeni tiadenidsa: —Huissinaja jijiradedeni –quiquinanajari. Puhuadenipa najaro huissinaja cajimanadsapa puhuadeni canacanimanadsa: —Iapi huissinaja cajimanajarideni iquejenani –quiquinanajari. Nama quiquinanadsapa: —Iana Diocca madija iquejenani ahuato tani –quiquinanaraha assiredenidsara ahuato tajaro. Puhuadeni bodidenipa cacajiqquimera-jerajaro. Naraha tiadenipi tetideni ajimamana tejerana: Maittaccadsamapi Jesocristodsa nahatoqquri tiquinejeraccade. <sup>12</sup> Jesocristo jirehe timadimanaccade. Tiadenipi Isaraeri potemahi jodiodenidsa tiquejemamana-jeraccade. Diopa puhuadeni tedsejera jehe canirepojaride. Puhuadenidsara ima bicani onihi onihi huati tapojari. —Tiadenira onassiajabaqqunitohui –napohui nade Abi Dio. Naraha tiadenidsapa nama najarajari. Ajijaro namidsa timadimanaporaha ponima Dio jirehe timadimanadsapi: —Idsoqquedsa icassiejeranitohui –tiquinejeraccade. <sup>13</sup> Tiadenipi Diodsa huajiji tinaccade. Naraha jidapana Jesocristo puhujine Diodsa huajijira tinajaro. Puhua dsoqquedsa emene toccajarojinea tijariqquimanajaropaji.

<sup>14</sup> Jesocristo puhujine icajonerara canajaro. Ia jodiodeni, jodio tiquejena-jerajarodeni huapima ijariqquijaro. Aja jodiodeni, jodio quejena-jarajarideni tedseje ahuaji jipera, ahuaji jipera quinapojaricca imapi Jesocristojine jicajaro. Najaro imapi pina siba hua tamaroni dequerema huajaro idenihuaaji jodiodeni, ideni onihihuaaji jodio quejena-jarajarideni quinapojarissa najaro. Naraha Jesocristo najaro huattajohuecca ima inajicajaropi pina siba hua tamaroni dequerema huajaro inabararidsa tohuabajarossa najaro. <sup>15</sup> Diocca dosseniji Moisesi dsodo inapojaropi

huapi tajaro. Najarodsa jodiodeni madijonamanajari. Naraha Jeso ahua porimacossanidsa dsoqquedsapa najaro nebojaro. Nama nadsapa aja jodio Jesodsa pajissa quinajarideni, jodio quejena-jarajari pajissa quinajarideni tedseje inatassaquidsapa pohuadsa ojarigquimanajari. Nadsapa pohuadsa ojarigquimanajarideni huapima pohuajine cajonerara canajari.

<sup>16</sup> Jeso ahua porimacossanidsa dsoqquedsapa aja jodiodeni, jodio quejena-jarajariideni tedseje ahuaaji jipera, ahuaaji jipera quinajari ima pohuajine jicajaro. Jidapapa cajonerara canajari. Pohuadsa huapima tassaquimanahissa tadsapa pina pohua assire ojarijarissa quinajari. Pohuadsa pajissa quinajarideni huapima Dio tedseje cajonerajaripaja. <sup>17</sup> Jesocristo namihuaji ccaronajaripa ima bicani Dio tedseje icajoneranijinecca huati huati naridsajari. Jodio tiquejena-jerajaro Diodsa ssamoqquri tiquinapojarodenidsa najaro ima huati huati najari. Ia jodiodeni Diodsa nahatoqquri inajarodenidsa naco huati huati najari. <sup>18</sup> Jesocristo pohuajine ia jodiodeni, jodio tiquejena-jerajarodeni huapima pohuadsa pajissa inadsapi Abi Diodsa iajiranijine ipajirani. Pohua Corime ia huapimadsa anijaripa ojarijari. Najaripa ia acco tocamabaquidsa Diodsa huati inadsapi Pohuadsa ia tonahuajirabaquijari. <sup>19</sup> Jodio tiquejena-jerajaro tiadenipi pina dsama onihicca madijassa, pina dsama cappiramanajaridenissa tiquinaporaha jidapapi Jesocristodsa pajissa tiquinadsapi Diocca madija tedseje tiadeni naqui pocca odsacca madija tiquejenani. Tiadeni naqui Diodsa: —Abi —tiquinani. <sup>20</sup> Djojine Jesocristodsa tijariqquimanajaro. Jesocristo pocca dodosse tabaqquina Jeso pohua tahimari mari mari ihi-canabaquimana najari. Dio Atti cacomeraqquri najarideni naco pohua tahimari ehocomeramana nadsa timittamanadsapi pajissa tiquinajaro. Ima nema najaropi pina odsa canahatonijinecca imassa najaro. Odsa sibadsa canahatonijinepi tahide poni cahittanicca nami najorapojaro. Dsotodena siba hua tamarohujanidsapi odsa tocajajaro. Jesocristocca dodosse tabaqquideni, Dio Atti cacomeraqquri najarideni tedsejepa pina odsa cahittanicca namissa quinajari. Tiadenipi pina siba hua tamarohujaninissa tiquinajaro. Jesocristopa pina siba bicabotessa najari. <sup>21</sup> Pohuadsa jehe tiquinajarodenipi pohuadsa tijariqquimanajaro. Tiadeni acco tocamabaquijari, tibodideni denima tobicadsanaponijine. Tibodideni ssiaja, huire tadsa ia Medsede madidsahijine. Pina Dio pocca odsa bica tocanajarossa tiquinanijine. <sup>22</sup> Jehe Jesocristodsa tijariqquimanadsapi pina Dio madihijinecca odsassa tiquinajaro. Dio nahidsa madihijine Pohua Corime tiadenidsa inana-dsanapojari.

### 3

*Diopa Pablo dosse inajari, jodio quejena-jarajariideni Jesocristo tahimari mitta-manahijine*

<sup>1</sup> Ohuapi Pablo, Jesocristocca dodosse ojararopijinepi toponi cocorodsa ohuedsajaro. Jodio tiquejena-jerajarodeni Diocca madija tiquejenanijine tiadeni mari mari ohocanabaqqui naraha occa madija jodiodenina ohuadsa huadimanadsa ohua coro idsimamanajarode. <sup>2</sup> Occa ima timittamanadsapi jidapanana nahatoto tinani: Diocca tohuati huanehe tiadenidsa tojani tahimarini timittamananijine Dio ohua cadossejari. <sup>3</sup> Dio pocca ima bicani tahide madijadsa ahuatora taporaha Pohuajine ohuadsa tohuatojaro. Najaro ima badsira tehe tahidehuaji dsodo onapopa. <sup>4</sup> Najaro hua timanimanadsapi timittamananissa tanitohui. Nadsana: —Pajissa, Pablopa Diocca ima bicani Jesocristo tahimari nahato tajari —tiquinanitohui. <sup>5</sup> Najaro imapi tahide icca ididenidsama Djojine aniporaha pohuadenidsa ahuate inana-jerajaro. Naraha jidapapi Dio Pohua Corimejine aja pocca dodosse tabaqqui bicaqquri najaridenidsa, Pohua Atti cacomeraqquri najari bicaqquri najaridenidsa naco pocca ima bicani ahuate inana-jaropaji. <sup>6</sup> Aji Diocca ima bicani najoraporaha ahuatora

tapojaropi ajima najaro: Jesocristo pohuajine icassiejeranijinecca ima jodio quejena-jarajaridenidsa naqui bacco tajaro. Jodio quejena-jarajaridenipa jodiodeni tedseje Jesocristodsa pajissa quinadsapa pohuadsa ojariqquimanajari. Pina pohua assire ojarijarissa quinajari. Nama quinadsapa jodio quejena-jarajarideni, aja jodiodeni tedseje Jesocristodsa toquejenadsapa Diocca daniji bicani Pohua huati tapojaricca cajimanajari.

<sup>7</sup> Ohuapi bica onejeraraha Dio ohuadsa bica tadsa ohuadsa huati huana tajari. Pocca dacorehe ohuadsa inapajiranissa tadsa ohua cadossejari. Jesocristo tahimari icassiejeranijinecca madijadsa tojanijine maride ojaridsajaro. <sup>8</sup> Jesocristodsa toquejenajarideni mota huapi taha bicaqquiri naraha ohuapi bica onejerani. Occa ima jadanipi tabaccora tade. Ohuapi Diocca madija huapimadsa ajimani ojani. Nema onaraha Diona ohuadsa bica tajari. Ohua tocattejidsadsapa todsepe ijie bicani ohuadsa da inajarode. Najaropi aji jodio quejena-jarajaridenidsa Jesocristo tahimari icassiejeranijinecca ima bicani maride occaridsanijine. <sup>9</sup> Dio ia Nahatode Pohuajine maittaccadsama pocca ima bicani najoraporaha ahuatora tapoccade. Jidapana najaro ima tohuatodsapi madija huapima mittamanahijine maride ohua cadossejari. <sup>10</sup> Diopa nama najaria jidapana pocca madija Jesocristodsa quequeriqquimana najarideni Dio pocca nahatohue bicani jiquejeranicca ahuatoto inamananijine. Nadsapa memehuaji cacahuehe cajimanajarideni, pina Diocca dodosse tabaqqui taminedeni, pina inoccodsa qqui inabaqqui-jarajaridenicca taminedeni huapima Diocca nahatohue qqui toquinadsapa: —Pajissa, Diopa nahatojide rajari –quinahijine. <sup>11</sup> Dio nama nahijinepa dsama inahato-jeraccadsama: —Nidsa dsotode ajima onananitohui –napojari. Nadsapa ia Medsede Jesocristo ocasserani ahuadsa ia Tonassiajade tojadsapa Diocca ima najorapojarocca pajissa tojajaro. <sup>12</sup> Nadsapi Jesocristo ia Tonassiajadedsa pajissa inadsapi icappina-jeradsa Diodsa iajjressijaro. Pohuadsa huati inadsa ibodipi: —Pajissa etti mittahi –inajaro. <sup>13</sup> Nadsapi toponi cocoro onahanaraha Dio tinebomana-jarajo. Jodio tiquejena-jerajarodeni Jeso tahimari tiadenidsa tojanijine maride ojadssapi ohua coro idsimamanaraha pina tetidsemanaji. Aji ocasserani ohuajaropi tiadenidsa ima bicani tojanijine.

### *Pablopa Epesodenitohui Diodsa huati tajari*

<sup>14</sup> Jehe nadsama Dio iadsa ima bicani inanajaro obodi huatomadsapi opitodsa ohuittadsa Pohuadsa huati huati onajaro. <sup>15</sup> Memehuaji animanajarideni, namihuaji animanajarideni huapimapa Dio inahatobaqquijari, inajaro. <sup>16</sup> Diopa ojarihi bica taja, nahatojide raja nadsapa Pohuadsa huati onadsapi: —Abi Dio, Ticorimema ticca madija bodideni todacoramanahi nahijine ticca dacorehe tinanaridsaji –ohonanajaro. <sup>17</sup> Jesocristodsa pajissa tiquinadsa tibodidenidsa madihijine Diodsa huati huati onajaro. Diocca tohuati huanehema timadimananijine naqui Pohuadsa huatide dissera onajaro. Pina ahua jabo nami bodihuaji toqquedsimajarissa tiquinaji. Tijabodeni Diocca tohuati huanehedsa denima toqquedsima-dsanapodsapi Diodsa tetideni huana tanijine, timecotedenidsa naqui tetideni huana tanijine. <sup>18</sup> Tiadeni, ia inajaro huapima Diocca madija iquejenajaro. Diocca tohuati huanehe nahatoqquiri inanijine Pohuadsa huati huati onajaro. Jesocristo itohui huati cahanari canahi tahimari deni tojani. Pocca tohuati huanehepi motarani. Dsama nemanehedsa ijiridsajaro. <sup>19</sup> Pocca tohuati huanehe deni tojajarojinepi nahato inanissa tanijine ipajira-jeraraha tiadenidsa ahuatoto tanijine Diodsa huati huati onajaro. Pocca tohuati huanehe tiadenidsa tojidseradsapi Dio tiadenidsa anihissa tahijine, onajaro.

<sup>20</sup> Nadsapi Dio deni tojajaridsa etidsena. Pocca deni tojehe, pocca dacorehe nemanehapi ibodidsa anijaro. Najarodsa ima bicani inananiijine ipajirani. Tohuini inanicca Pohuadsa huati inadsapi iadsa inana tani. Naraha ibodi huatomajaropi ajimani. —Diopa ajama nahijine pajirahi –inanitide naraha Pohuapa denima

inananiijine pajirahi. <sup>21</sup> Ia huapima Jesocristodsa ihiqueriqqui najaropi Diodsa etidsedsa: —¡Abi Dio, bica tinani, deni tijani! —inanijine bica tani. Jidapanadsama nema idsanapona, onajaro. Pajissa nema nana.

## 4

### *Dio Corimejine ijariquijaro*

<sup>1</sup> Jehe ohuapi ia Medsede Jesocristo tahimari mari mari ohonaridsa najarojine toponi cocoro onahanajaro. Tiadenipi Dio pocca madija tiquejenaniijine tiadeni huahua tabaqqujari. Nadsapi timadimananissa taji. Ticcadeni madie pina Dio tohuini nahiccassa tinanamanana, onajaro. <sup>2</sup> Tibodidenidsa: —Ohuapi ajimani ojan —tiquinani bica tani. Jonegquiri tiquinadsa tettideni bica tadsa huati huati tiquinana. Timecotedeni tedseje tetideni cahanerara canadsa amadsati tedimana-jerana. Madija tiadenidsa nacassera tadsa naco pina mohuaradsa tinahanamanana, onajaro. <sup>3</sup> Dio Corime tiadeni acco tocamabaqquidsa tijariquimananissa taji. Najarossa tidsanapomananiijine disseraqquri tiquinaji. Ticajonerara canehe timadimanadsapi nema tidsanapomananiijine tipajiramananitohui.

<sup>4</sup> Ia huapima Jesocristodsa iquejenajaropi poadsa ijariquijaro. Pina pohua assire ojarjarissa inajaro. Dio Pohua Corime iadsa anijari naco ojarahi. Itedsejemacca ima bicani tohuini imadijaro naqui ojarini. Najaro iadsa tojanijine Dio ia tocattejidsabaqqujaripaja. <sup>5</sup> Ia Medsedepa ojarahi. Najaripa Jeso. Poadsara jehe inajaro. Poadsa iquejenani ahuato tanijinepi ojarini. Najaropi passodsa ia topa dsanajaro. <sup>6</sup> Icca Abi Diopa ojarahi. Pahuapa huapimacca Abi memehuaicca Poadsa iquejenajaro. Puhua ia tohuacahua-baqqujari, ia Cacahuade deni tojahicca. Pocca dosseniji Pohua tohuini nahicca ia cadossedsapa najarossa inana tani. Pahuapa huapimadsa madiridsajari.

### *Jesocristocca daniji idsepe ijiniijinecca onihi, onihi ibodidsa inanaridsajaro*

<sup>7</sup> Ia huapima ijariquijaroraha idsepe ijiniijinepi onihi onihi icajiridsajaro. Dio Pohua tohuini nahiccassa inanaridsaniijine Jesocristo ia huapimadsa da inabaqquiridsajarode. <sup>8</sup> Najaro imassa najaro Dio Atti dsodo nanidsa dsodo napojaro: —Memehuaaji toccamacossanidsapa pohua dsepedsa toquejenajarideni iaccamacossani-baqqujari.

Nadsapa pocca madijadsa pocca daniji da inabaqquiridsajaro —nani nade Dio Atti dsodo nanidsa.

<sup>9</sup> Naraha —Toccamacossanihi —inadsapi ¿ima nejecossa najaro? Jehe, najaro tohuattijine ibodi huatomajaropi tahidepa namihuaji ccaronapojari, inajaro. <sup>10</sup> Aja ccaronapojaripa Jesocristo. Najari pohua toccamacossanijaria memehuaaji madihi paja naccahi. Meme, nami huapimadsa Cristopa aniridsajari. <sup>11</sup> Nadsama madijadsa da inaridsajaropi dsepedeni ijimanahijine inanaridsajaro. Ohuahadenipa Jesocristo pocca dodosse tabaqqi toquejenahijine inanabaqqujari. Ohuahadenipa Dio Atti huati iqquima-mananiijine inanabaqqujari. Ohuahadenipa Dio Atti ecomeramariidsadsa Jesocristo poadsa jehe quinahijine dosse inabaqquiridsajari. Ohuahadenipa Diocca madija cacahuade toquejenahijine inanabaqqujari. Ohuahadenipa Dio Atti mamaride toquejenahijine inanabaqqujari. <sup>12</sup> Nama nadsapa Jesodsa toquejenajarideni inapajirabaqqujari, Diodsa dsepedeni ijimanahijine, imecotedeni acco icamabaqqi-manahijine. Nadsapi Jesocristo pohua assiressa inajarodeni icca jeheniji denima todacorani nanijine. <sup>13</sup> Icca jeheniji todacorani dsanapodsapi nidsa dsotode ia huapima Jesocristodsa jehe inajarodeni ijariquuinissa tanitohui. Dio Bedidsa innoco tojidseranissa tadsapi poadsa nahatoqquri inanitohui. Nadsapi denima denima Dio jipa tahicca icahattera-dsanapodsapi pina jadahideni nahatoqquri najarissa inanitohui. Diocca nahatohue icajinitohui. Icca madie

pajiranissa tanitohui. Pina Jesocristocca madie bica tajarossa nanitohui. <sup>14</sup> Icca jeheniji dacoradsa Diocca nahatohue icajidsapi ibodi huatohue pina ejedeniccassa nejeranitohui. Ejedenipa tocattera-jaraccadsa bodideni huatomanahissa tahijine pajiramana-jarahi. Pina jojodejine ppahua tajari ahuaji tocca, ahuaji tocca najarissa quinajari. Ejedenipa marinaja onihidsa, onihidsa toquejena tahi. Aja madija maidsehe huatide nahatoqquri najaridenipa ejedeni icamaidsabaqqui-manahijine pohuadenidsa najora tani. <sup>15</sup> Naraha iapi Diocca marinaja pajissaccadsana jehe inajaro. Najarodsa imadijaro. Imecotedenidsa eti huana tadsapi pohuadenidsa ima pajissara huati huati inajaro. Nema inadsapi icca madie tobicadsanaponitohui. Pina Jesocristocca madiessa nanitohui. Jesocristopa pocca iquejenajaro ia Dossede. Pina itati essire dosse dosse najarossa najaro. <sup>16</sup> Itati essire dosse dosse najaropi iccaridsanijine, idsepe ijiniijine, ijipanijine najaropaji. Essirepi ojariraha nanidsa tohuariridsanipi huapi tani. Pina idsepe, ibiji, emori, isso najaropaji. Huapima ojariqquidsapi essire dacorajaro. Najaro imassa najaropi ia huapima Jesocristodsa ijariqquidsapi idacorajaro. Idsepe ijie onihi onihi icajiraha imecotedeni tedseje acco acco icanadsapi pina essire napijarossa inajaro. Eti cahanerara canadsa naqui icca queriqquinaja todacorani najaro.

### *Jesocristojine madie dsati icajijaro*

<sup>17</sup> Jehe, nadsapi ohua Medsede ohua cadossedsapa pohua onima tiadenidsa huati onajaro. Ohuattissa tinanamanaji. Tahide timadimanapodsapi ticcadeni tabaccorehema timadimanaccade. Naraha jidapana Diocca tiquejenadsapi pina Diodsa toquejena-jarajaridenicca madiessa tinanamana-jeraji. Pohuadenipa pohuama madimana-dsanapojari. Bodideni huatomanahijine ssamoqquri najari. <sup>18</sup> Bodideni dsidsi tajarojine mittamana-jarahi. Dio Atti ssamoqquri nadsapa Diocca madie bicanidsa huatidsemana-jarajari. Bodidenidsa ibohue dacorajaro. <sup>19</sup> Najaro ibohue pohuadenidsa dacoradsapi tabaccorehe inanamananijine disseraqquri najari. Huananehe huapima ihinanaridsamana najaro. Najaro tabaccorehe pohuadeni idimanaraha epejena quina-jarajari. Denima tohuini dsanapomanajari.

<sup>20</sup> Naraha tiadenipi nema nanicca tabaccorehe Jesocristocca marinajadsa ticahattera-jerani. <sup>21</sup> Pocca marinaja pajissacca timittamanadsapi timadimananissa tanijinena ticahatterajaro. <sup>22</sup> Nadsapi najaro Jesocristocca marinaja ticahatteradsapi ticcadeni madie jadani aji tiadeni tohuini tiquinapojarooccapo tinebomanaji. Tabaccorehe tohuini tiquinajaropi tiadeni tocamaidssabaqquijaro. Najaro tabaccorehepi tiadeni tonatabaccorajaro. <sup>23</sup> Tibodideni tecajiqquimeramanaji. Diodsa: —Occa ima jadani tohuini onejeranijine obodi dsati tinanaji –tiquinaji. <sup>24</sup> Nadsapi Dio tibodideni dsati inanadsapi ticcadeni madie naqui dsati tojanitohui. Diopa pina pocca imassa nehe timadimananijine tiadeni acco tocamabaqquihitohui. Diocca imapi pajiranissa tajaro. Pihuapa imasiri cappirajari. Pocca pajisseheda timadimanadsapi pina Pohuassa tiquinanitohui.

<sup>25</sup> Jidapana dsati tiquejenadsapi denima timaidsamana tejeraji. Timecotedenidsa ima pajissara huati huati tiquinaji. Ia huapima Jesocristocca iquejenajaropi pina essire ojariqquijarossa inajaro.

<sup>26</sup> Tedimanadsapi imasiri tinanamana-jeraji. Tedimanaraha najaro huadadsa tetideni ssonani bica tani. <sup>27</sup> Ticcadeni jamie tinebomana-jeradsapi paji, imasiri totonanade Satanajine tabaccorehe tinanamamarana, onajaro.

<sup>28</sup> Madija boti tajaripa pocca botie nebona. Tarabadsa bica taniccadsa dsepe ijd-sapa cappira-jarahitohui. Cappiramanajaridenidsa da inahijine naco pajirahitohui.



<sup>29</sup> Tohuatti tabaccora taniccapi huati huati tiquinejeraji. Tohuatti bica taniccara huati huati tiquinaji. Nema tiquinadsapi timecotedeni bodideni acco ticamabaqquidsa jehenijirideni todacorani nanijine. Tettideni bica taniccara mittamanadsapa bodideni huatidsemanahijine. <sup>30</sup> Dio Corime oji tinanamana-jarahijine timadimananissa taji. Jesocristodsa jehe tiquinapodsama Dio Corimepa tiadenidsa anijonahi. Nadsapa nidsa dsotode Dio pocca madija inassiajabaqquihijinecca huada bacco tadsapi Pohua Corime anijaridenidsa: —Occa –nahitohui. Nadsapa najaridenina inassiajabaqquihijine.

<sup>31</sup> Ocasserani temanadsapi oji tidsanapomana tejeraji. Ticcadeni huadie denima dacoranicca naqui tinebomanaji. Huadie ajimanicca naqui tecahuamanadsanapojeraji. Amossinidsa atti atti tiquinajaro, tatamasso tiquinajaro naqui tinebomanaji. Tabaccorehe onihi onihi naqui tiadenidsa nohueranijine tinebomanaji, onajaro. <sup>32</sup> Tetideni cahanerara canadsa timecotedeni pina acco acco titicamabaqquimana najo. Timecote tiadenidsa ima bica tejeranicca inanadsa naqui poadsa: —Epeje, ohuadi-jerani –tiquinaji. Tiadeni naqui ima bica tejeranicca tinanamanadsapi timecotedeni tiadenidsa: —Epeje, ohuadi-jerani –quinahijine bica tani. Pina Diopa Pohua Bedi Jesocristodsa tiquejenadsapi tiadenidsa: —Epeje, ticcadeni imasiri ohuati ajimani –najarissa tiquinaji, onajaro.

## 5

### *Diocca madija madimanahissa tahijinecca ima*

<sup>1</sup> Jehe tiadenipi Diocca ejedeni tiquejenajaro. Pahuapa titohuideni huati cahanari canajari. Pocca ejedeni tiquejenadsapi Pahuajinessa tinanamanana, onajaro. <sup>2</sup> Pocca tohuati huanehema huapima tohuideni tetideni cahanariri canaji. Jesocristo itohui huati huana tadsapa pohua ccaccoradsa dsoqquejari. Najaro pocca danijipi Diodsa bica tajaro. Pina bani bedi Diodsa da tahi botta tadsa majo ocassa tajarissa najaro.

<sup>3</sup> Tiadeni Diodsa tiquejenajaropi huananehe huapima tinanamana tejeraji. Tettidenidsa naqui huananehecca huatide nohuerana. Tabaccorehe oppina tanicca onihi onihi Diocca madijadsa nohuerajaro. Madijacca tarabadsa acconi, todsepetaji acconi naqui tedimana tejeraji. Dsiniro, todsepetaji huemani tohuini tiquinejeraji. Diocca madija tiquejenadsa timadimananissa tanijinepi nema nanicca ima huapima huati tiquina tejeraji. <sup>4</sup> Ima ponima tabaccora tajaropi huati tiquina tejeraji. Tohuatti ponimacca, jidsehe tabaccora tanicca naqui huati tiquina tejeraji. Nema nanicca tohuatti tabaccora tajaropi Diocca madijadsa nohuerajaro. Tettideni bica taniccad-sara Diodsa tetidsemanana. —Jehe Abi Dio, bica tinani –tidsanapomana nanina bica tani. <sup>5</sup> Ajijaro ima nahatoqquri tiquinani: Huananehe inanamanajarodeni, tabaccorehe oppina tanicca inanamanajarodeni huapimapa Cristo, Imehi Dio tedseje poccadeni cacahuehedsa bacco toquina-jarahitohui. Denima tohuini quinajarideni naco pina dsiniro tohuini, pina todsepetaji tohuini quinajari, najarideni huapimapa Cristo, Imehi Dio tedseje poccadeni cacahuehedsa bacco toquina-jarahitohui. Nama quinajaridenipa pina siba nahatonidsa huatidsemanajarissa quinajari. Namicca tohuinira huatideni huanacquiri najari. Diodsa huatideni huanacquiri najarajari. <sup>6</sup> ¡Paji, madija tiadeni tocamidsabaqqui-manarana! Tohuatti ponimacca huati huati toquinadsapa pina: —Tabaccorehe tinanamanani oppina tejerani. Dio tiadeni tonajidsabaqqui-jarahitohui –quina tahi. Naraha najarideni attidenidsa pajissa tiquinejeraji. Dio Attidsa iboqquri najarideni huapimadsa Diocca najidsohue oppina tanicca ssonarinitohui. <sup>7</sup> Nama quinajaridenidsa tiquejemamana tejeraji. Pahuadenidsa tiajimanani nanina bica tani.

### *Ssijanidsa imadijaro*

<sup>8</sup> Jehe tabaccorehedsa timadimanapodsapi Dio jirehe timadimanajarode. Pina dsidsinidsa timadimanajarossa naraha Jesocristodsa tiquejenadsapi Dio tiadenidsa tojidserajari. Jidapapi ssiajanidsa timadimanadsapi pina Dio ssiejenedsa madimanajaridenissa tiquinana. <sup>9</sup> Nema tiquinadsapi Dio Pohua ssiejene tibodidenidsa tossiajabagquihitohui. Najaripa Pohua Corimejine biquehe tinanamanajaro, ticcadeni ima pajiranissa tajaro, pajissadsara timadimanajaro. <sup>10</sup> Dio Pohua jipa tahicca ticahatteraji. Puhuadsa bica tanicca nahatoto tinadsapi najarora tinanaridsamananijine. <sup>11</sup> Aja dsidsinidsa madimanajaridenipa ima bicani tonanade ssamoqquiri najari. Puhuadenipa ima ponimacca, tabaccora tanicca inanamanaraha tiadenipi pihuadenidsa tiquejemamana tejeraji. Pihuadenijine tabaccora tajaropi ahuato tinanamananina bica tani. Pina ssiajanihuaji joca tininebaqqui-manajarissa tiquinana. <sup>12</sup> Pihuadenipa ahuatorehedsa tabaccorehe inanamanajaro. Poccadeni tabaccorehecca ima ecomeranijinepi iadsa oppina tani. <sup>13</sup> Naraha tabaccorehe inanamanajarodsa Dio ssiejene ssonariridsadsapa poccadeni tabaccorehe nemaneha ahuato tanitohui. <sup>14</sup> Dio ssiejenejine huapima tohuatonissa tajaro. Najarojine maittaccadsama ajama quiquinanajari:

—¡Tedajaro nocco tijaji! ¡Tetiaraha ticamittemaniji!

Cristo pohua ssiejene tibodidsa ssiajaridsanitohui

–quiquinanajari, jiri jiri quinadsa.

<sup>15</sup> Nadsama timadimananissa tanijine tibodideni huatonissa dsanapona. Pina ssamoqquiri najaridenicca madiessa tiquinejerana. Nahatoqquiri najaridenissa tiquinana. <sup>16</sup> Jidapapi tabaccorehe caji taridsanidsa timadimanaccajaro. Naraha tiadenipi ima bicanira tinanamananijine tinajoramanehe timadimanaji. <sup>17</sup> Pina ssamoqquiri najaridenissa tiquinejeraji. Ia Medsede tohui nahiccara timittamananissa tanijine disseraqquri tiquinaji. <sup>18</sup> Tinoccodeni jano tanijine coma tanicca dsemana tejerana. Dse tiquinadsapi ticcadeni madie totabaccoranitohui. Ajima tiquinanina bica tani: Dio Pohua Corime tiadenidsa tojahijine Puhuadsa: —Ticorime ohuadsa tinanao –tiquinana. Nema tiquinadsana ima bicanira tinanamananijine Dio Corime tiadeni dosse dosse nahitohui. <sup>19</sup> Nama nadsapa timecotedeni tinahatidsebaqquimanahijine jiri jiri tiquinaji. Aji Dabicca jijiricca bica tani, aji Dio Atti dsodo nanicca jijiri naqui bica tani. Dio Corime tibodideni tonahattabaqquidsa naqui jiri jiri tiquinani bica tani. Tettideni, tibodideni nemanehema ia Medsede Jesocristodsa jiri jiri tiquinadsa naqui pihuadsa: —¡Bica tinani, deni tijani! –titidsanapomana naji. <sup>20</sup> Huajijiradsa ia Medsede Jesocristo onima Abi Diodsa: —Jehe, epejeni. Tijine bica tani –titidsanapomana nana. Nadsapi imadinicca huapima icajidsa, icappiradsa naqui Diodsa: —Jehe, epejeni –inani bica tani. Ima bica tanicca iadsa anidsa, ima ocassera tanicca anidsa naqui nema nehe Diodsa: —Jehe, epejeni –inani bica tani.

*Maqquidejepa bedimeni tadsajani madimanahissa tahijinecca ima*

<sup>21</sup> Jesocristodsa tetideni huanagquiri nadsapi pina Jesocristo pohua ajamani tonanajarissa tiquinaji. Timecotedeni tedseje tettidenidsa ahuaji ibora, ahuaji ibora tiquinaji.

<sup>22</sup> Amoneje maqquideje ticajimanajarodeni naqui ticcadeni maqqui attidsa iboraqquri tiquinana. Pina ia Medsede Jesocristo attidsa iboraqquri tiquinajarossa tiquinana. <sup>23</sup> Amoneje cajijaripa pocca amoneje dossede tojarari. Pina Jesocristo pihuadsa toquejenajarideni dossede tojararissa najari. Pihuadsa toquejenajaridenipa pina Jesocristo assiressa quinajari. Pohua naco pina pihuadeni tatissa najari. Pohua naco pihuadsa toquejenajarideni Tonassijade. <sup>24</sup> Nadsapi maqquideje cajimanajarodeni ponidenicca maqqui atti nemanehedsa iboraqquri nana. Pina Jesocristodsa quequeriqquimana najarideni pihuadsa iboraqquri najarissa quinanjine, onajaro.

<sup>25</sup> Maqquideje amoneje ticajimanajarodeni naqui ticcadeni amonejedsa tetideni huanacquiri naji. Pina Jesocristo pohuadsa iquejenajaro itohui huati huana tajarissa tiquinaji. Pihuapa itohui huati huana tadsa dsoqquejari. <sup>26</sup> Nama najaripa pocca madija ibicaridsanijine. Pohua attidsa ibodi inahirejaro. Tabaccorehe inebojaro ahuato tanijine naqui passodsa totopa icajijaro. <sup>27</sup> Icca ima huire, ibodi ssiaja tadsa icca ima pajiranissa tanijine. Pina etero bicabote obero tajarossa, casinaqqui-jerajarossa inanijine. Nidsa pohua ccanipomadsa pohua pocca iquejenajaro bicaqquri inadsa ia tohuaccamacossani-baqquihijine.

<sup>28</sup> Nadsama maqquideje amoneje cajjaripa pocca amonejedsara huati huana tana. Pina pohua pohua assiredsa huati huana tajarissa nana. Pocca amonejedsa huati huana najaripa pohua pohuadsa naco huati huana tajari. <sup>29</sup> Madijapa pohua assiredsa nacassera-jarajari. Pohua assiredsa huati huana tadsapa jijipa najari, pohua assire cacacahua najari. Jehe najaro imapi pina Jesocristopa pohuadsa toquejenajarideni ecahuabaqquijarissa najaro. <sup>30</sup> Ia huapima pohuadsa iquejenajaropi pina pohua assire namanahassa inajaro.

<sup>31</sup> Ima najarossa najaropi maittaccadsama Dio huati tajari: —Maqquideje pohua bedimenidsa tojadsapa imehi imenidenidsa nebo, pohuadenira madimanajari. Nadsapa pamaraha pina ojarijarissa quinajari —nahi nade Dio. <sup>32</sup> Najaro imapi assiredeni pamaraha pina assire ojarijarissa naha toquejenajari. Najaro cajicajicca imapi imitaporaha ahuatora taccade. Naraha jidapanana omittadsapi Jesocristodsa ijariqquijarocca imapi pina cajicajicca imassa najarona paji, onajaro. Najaro imapi ohuadsa bica tajaro. <sup>33</sup> Nadsama tiadenidsa huati omanipomajaro: Maqquideje amoneje cajimanajaridenipa poccadeni amonejedsara huatideni huanacquiri nana. Pina pohua pohuadenidsa huatideni huanacquiri najarissa nana. Amoneje maqquideje cajimanajarodeni naqui ponidenicca maqquidsara iboraqquri nana, onajaro.

## 6

### *Imehideni bedideni tedseje madimanahissa tahijinecca ima*

<sup>1</sup> Ejedenideni, tiadenipi ia Medsede tohuini nahiccara tinanamanani bica tanijinepi ticcadeni abi, ami attidenidsa iboraqquri tiquinaji. Najarona ima pajiranissa tajaro. <sup>2</sup> Dio Atti dsodo nanidsa ajima najaro: —Ticcadeni abi, amidenidsa tetideni huanacquiri naji —nahi nade Dio Atti. Najaro dossenijipi Dio pocca dosseniji 10 nehe Moisesidsa da inajarodsa anijaro. Najaro dosseniji ojarie da inadsapi ima bicani tadsajani huati tapojari. Nadsapi najaro dosseniji ecahuadsapi ima bicani iadsa tojanitohui. <sup>3</sup> Najaroa aji Pohua Atti: —Tiadeni onamadibaqquinissa dsanaponijine. Ajijaro namidsa timadimanadsapi jadahi tiquejenanissa tanitohui —nahi nade Dio Atti.

<sup>4</sup> Jehe, imehideni tiadeni naqui ticcadeni ejedeni tijinedeni huadimana-jarana. Madie bicani tocahatterahijine tedimana-jeradsa tinahattabaqquimanajo. Ticcadeni ejedeni Dio Pohua tohuini nahicca tocahatterahijinera mari mari titicanabaqquimana nana.

### *Madijacca dodosse tabaqquidenipa pohuadeni dossede tedseje madimanahissa tahijinecca ima*

<sup>5</sup> Nadsapi madijacca dodosse tiquejenajaro, tiadeni naqui ajijaro namicca tiadeni dossede attidsa iboraqquri tiquinaji. Pohua noppine ticappinamanadsa pohuadsa bicaqquri tiquinaji. Maidseraqquri tiquinadsa tidsepedeni ijimananissa taji. Pina Jesocristodsa tidsepedeni ijimanajarossa tiquinana. <sup>6</sup> Tiadeni dossede qqui tajaradsa naco tidsepedeni ijimananissa tana. Pina tiadeni qqui tadsassa tiquinaji. Pina Jesocristocca dodossessa tiquinana, Dio jipa tahicca titinanamana nanijine. Tiadeni dossede attidsa naqui iboraqquri tiquinana. Tibodideni bicaqquri nadsa: —Jehe,

ohua dossede attidsa ibora onana –tiquinana. <sup>7</sup> Nadsapi huatidsehema tibodideni bicaquuri nadsa tidsepedeni ijimanana. Nema tiquinadsapi tiadeni dossede madijaraha poadsa tidsepedeni ijimanadsapi pina ia Medsededsa tidsepedeni ijimanajarossa tiquinajaro. <sup>8</sup> Ajijaro ima nahatoquuri tiquinajaro: Nidsa ia Medsede Jesocristo ccanidsapa ima bicani tinanamanajaro manaconi tiadeni huapimadsa da inabaquunitohui. Nama nahitohui dodosse tiquejenajardenidsa, dodosse tiquejenajerajardenidsa naqui.

<sup>9</sup> Nadsama dodosededeni. Tiadeni naqui ticcadeni dodosse tabaqquidsa bicaquuri tiquinaji. Pina Jesocristodsa bicaquuri tiquinajarossa tiquinaji. Ticamaid-sabaquimana tajarajo. Jara tinabaquimana tajarajo. Tibodideni huatoma-manaji: ticcadeni dodosse tabaqqui poadeni Medsedepa tiadeni Medsede Jesocristo ojarihi. Pohuapa tiadeni Cacahuade memehuaji madijari. Pohua attipa: —Ajaridenipa dodosededeni toquejenajari, ajaridenipa dodosse toquejenajari –najarajari. Qqui inabaqquidsapa huapima najarissa canirejari.

*Diocca dacorehe icajidsapi imasiri iadsa deni toja-jeranjine*

<sup>10</sup> Ohuemecotedeni, jidapapi occa marinaja jicanicca tiadenidsa dsodo onajaro. Ia Medsedepa dacorajari. Pocca dacorehepi deni tojanicca. Najaro pocca dacorehema dacoco tijiraji. <sup>11</sup> Pina soldadossa tiquinaji. Soldadopa biquerahi noppine pohua cacahuahijine jadsirecca huedsajari. Tiadeni tecahuamananjinepi Diocca dacorehe ticajimanaji. Nema tiquinadsapi Satanacca maidsehedsa tiedimamana-jeranitohui. Dacoraquuri tiquinadsa tidomodeni huanitohui. <sup>12</sup> Imasiri deni toja-jeranjinepi jadsire inanajarossa najaro. Naraha icahadirenjinepi madija assire cajimana, tone cajimana najarideni tedseje jerani. Poadeni assire cappiramanajari qqui inabaqqui-jarajarideni tedsejena icahadirejaro. Najaridenipa tabaccorehe jinede Satanacca dodosse tabaqqui memehuaji jahiridsajari. Memehuaji madimanaraha ajijaro namidsa dacorehe cajimanajari. Poadenipa dsidsinidsa madimanajarideni ihicadosse-baqquimana najari, tabaccorehe inanamananjine. <sup>13</sup> Nadsama Satanacca dodosse tabaqquidsa jadsire tinanamananjinepi Diocca dacorehe nemaneha ticajimanana. Nadsana tabaccorehe ahuatodsa tiedimamana-jeranitohui. Imasiri tadsajani ticahadiredsapi dacoco tijiradsa tidomodeni huanitohui.

<sup>14</sup> Nadsama tiadenipi dacoraquuri tiquinaji. Pina soldadossa tiquinaji. Soldadopa etero jadsirejinecca huedsajari. Naraha tiadenipi Diocca pajissehe, pocca biquehe tedsamanaji. Najaro ima pamehe ticajimanadsapi imasiri tadsajani ticahadiredsa tidomo huanissa tanitohui. <sup>15</sup> Jesojine Dio tedseje icajonerajarocca ima bicani maride disseraquuri tiquinaji. Najaro ima tecomeraridsamananjine tinajoramanehe timadimanaji. <sup>16</sup> Imasiri tadsajani ticahadirenjinepi ticcadeni jeheniji dacorajaro pina soldadocca camatassa najaro. Soldadopa bobadsa biquerahi noppine ssapa, ccara tajari pohua tedsejema da inajari. Tiadeni naqui jehe tiquinanissa tadsapi tabaccorehe jinedecca boba jororone cajihiccadsa tibiqueramana-jeranitohui. Pocca maidsehe iadsa ssonarijaropi pina ia ssite najarissa najari. <sup>17</sup> Jeso tahimari icassiejeranjinecca ia tohuacahua-baqquijaropi pina soldado pohua tati cacahuahijine ccara tajari ettarijarissa najaro. Tabaccorehe tadsajani ticahadirenjine naqui Dio Pohua Corime Bicabote tibodidenidsa Pohua Atti inanajaro. Najaropi pina jadsirecca massito jadsira tocanajarossa najaro.

<sup>18</sup> Huajijiradsa Diodsa huati huati titiquina naji. Poadsa huatide tinebomana tejeraji. Dio Corime tibodideni acco tocamabaqquihitohui. Tetideni huatodsa tinoccodeni panehe timadimanaji. Pina soldado pocca huadi noppinedeni nocco panajarissa tiquinana. Tiadenidsa ima bica tadsa, ocassera tadsa naqui Diodsa huatide disseraquuri tiquinaji. Diodsa toquejenajarideni huapimatohui Diodsa huati huati titiquina naji.

<sup>19</sup> Otohui naqui Diodsa huati huati titiquina naji. Nani ocappina-jeradsa Jesocristo tahimari icassiejeranijinecca maride ojadsa tohuatti pajiranissa taniccadsa madija mari ocanabaqqui-ridsahijine. Najaro ima bicanipi tahide Diojine ahuatora taporaha jidapana Pohnajine tohuatojaro. <sup>20</sup> Najaro pohua tahimari mari onaridsanijine ohua Medsedepa ohua cadossejaride. Najarojine jidapapi todsepe ojajaro. Dio Pohnadsa huati huati tiquinaji, cappinehe ohuadsa nohueradsapi pocca dossehe onapajiranissa tanijine.

*Pablocca ima jicanicca*

<sup>21</sup> Tiquicopa imecote bicabote. Pohnapa aji omadinicca, nomi onanicca, odsepe ijiecca huapima tiadenidsa huati tahitohui. Pohnapa ia Medsede Jesocristodsa ibora tadsa pohua tahimari maride dissera tajari. <sup>22</sup> Pohnapa itahimari tiadenidsa huati tahijine tiadenihuaji dosse onajari. Pohna naco tiadeni tonahatidsebaqquidsa tibodideni acco tocamabaqquihitohui.

<sup>23</sup> Icca Abi Dio, ia Medsede Jesocristo tedseje aji tijariqquimanajaro tiadenidsa jonehe inanamanana. Huapimadsa huatideni cahanariri cadsanapona, onajaro. Pohnadenidsa jehe tidsanapomananijine naqui tibodideni inadacora-baqquimanana, onajaro. <sup>24</sup> Ia Medsede Jesocristodsa tetideni cahanariri canani dacoradsa tiadenidsa pocca biquehe tojadsanapona, onajaro.

Epejeni occa ima.

Ohua onipi Pablo.



## **Pablodenipa Piripodenidsa ima teppe dosse quinajaro Filipenses**

Piripopi dsama Masedoniacca odsa panani deni tojanicca. Pablopa nahihuaaji Jesocristo tahimari maride tojapojari, pohua tesse Sila tedseje. Madija mota Jesodsa jehe quinaraha motapa Pablodenidsa jiperaqquri najari. Pablo Sila tedseje damama quinadsapa inajidso-baqquimanajari. Toponi cocorohuaji cororo idsimamanajari. Najaro imapi dsotodena Roca dsodo inajaro, Jesocca dodosse tabaqqui tahimari capítulo 16'dsa anijaro.

Nadsapa Piripocca toponi cocorohuaji huedenadsapa dsama onihihuaaji huedarid-sajari, Dio Atti maride. Dsotode Pablo pohua motta Romahuaajicca toponi cocorodsa huedsadsapa Piripohuaji madimanajaridenidsa ajijaro ima teppe dsodo inajaro. Toponi cocorodsa ocasserani ahuaraha Diodsa huatidse-dsanapojari. Pocca dsodonijipi: Ocasserani eraha huajijiradsa Diodsara ehetidse najaro bica tani. Nanajidso iquejenaraha Jesocristodsa dissessera inanijine.

Pablo pohua Diodsa dissera tajari pohua tahimari dsodo inajaro. Dio jipa tahiccara inananjine tohuini najari. Najaro ima naquì Piripodenidsa dsodo inajaro, pohuadeni naco Dio jipa tahicca tocahatterahijine.

### *Pablo, Timoteo tedseje nija quinajari*

<sup>1</sup> ¿Nija imecotedeni? Ohuapi Pablo. Otesse Timoteo tedseje Jesocristocca medse iquejenani. Tiadenidsa: —¿Nija, bicaqquri tiquinaqui? —inajaro. Aji odsa panani Piripocca Diodsa tiquejenajarodeni Jesocristodsa tijariqquimanajaro tiadenidsa ima dsodo inajaro. Titiqueriqqui nanicca tiadeni maridedeni, tibijideni accodedeni huapimadsa naquì dsodo inajaro. <sup>2</sup> Aja icca Abi Dio tiadenidsa ima bicani inananjine, inajaro. Tiadenidsa icca Abi Diocca jonehe, ia Medsede Jesocristocca jonehe naquì tiadenidsa tojanijine, inajaro.

### *Pablopa Jesocristodsa jehe quinajaridenitohui Diodsa huati huati najari*

<sup>3</sup> Aji Piripodsa timadimanajaro tiadenidsa obodi huatodsa Diodsa ohuattipi: —Jehe, pohuadenipa bicaqquri nadsapa ohuatidseni —ohonanajaro. <sup>4</sup> Diodsa huati huati onadsa naquì Diopa tiadeni tohuacahua-baqquihitohui ohonanadsapi ohuatidsejaro. <sup>5</sup> Aji Jesocristo tahimari icassiejeranijinecca timittamanapodsama aji tiadeni ohua inadsa pohua tahimari deni tojanijine idsepe ijijaropaji. <sup>6</sup> Tiadenipi Jesocristodsa jehe tiquinapodsama Djojine tibodideni dsati tojajaro. Nadsama obodi nahato onajaropi Dio tiadeni acco tocamabaqqui-jonajaria Jesocristodsa paji jai tijarini dsanapodsapi nidsa Pohua ccanipomahicca huada bacco tiquinanitohui, onajaro.

<sup>7</sup> Tiadenidsa ohuati huana tadsa ajijaro ima obodi huatodsa huati onajaropi bica tani, onajaro. Najaroa aji todsepe ojadsa tiadenipi Djojine dacoco tijiradsa ohua acco ticamamanajaropaji. Nadsama dsama cacahuadedeni otohui huahua quinadsa occa ima: —Tabaccora tani —quinadsa naco occa ima mittamanahijine pohuadenidsa ohuacomerajarode: —Diocca ima Jesocristo tahimaripi tabaccora tejerani. Ima bicani icassiejeranijinecca —onade pohuadenidsa. Tahide todsepe ojajeraccadsama naquì tiadeni tedseje nema inaridsapode. Diocca dacorehe iadsa anidsanapojaro. <sup>8</sup> Diopa obodi nahato tajaria Jesocristocca tohuati huanehema tiadenidsa ohuati huana tajaropaji. <sup>9</sup> Ohuapi titohuideni Diodsa huati huati ohonajaro, tibodidenidsa Jesocristocca tohuati huanehe deni tojadsanaponijine. Nani

imecote Jesocristodsa pajissa quinajarideni tedseje tetideni cahanerara canadsapi ticcadeni tohuati huanehe madija huapimadsa tojaribaqquinijine. Nani Djojine tibodideni tohuattajaroma tetideni huanagquiri nanijine. Nadsapi Diocca marinaja tadsajani tibodideni huatonissa tadsa ima bicani ticattejidsamananijine. Najaro ima tadsajani madijadsa tetideni huanagquiri nanijine, ohonanajaro Diodsa. <sup>10</sup> Nani ima bicani tocattejidsade nahatoqquri tiquinanijine. Bica taniccatohui jipagquiri tiquinadsapi tibodideni tossajani nanijine. Ima bicani tinanamanadsapi nidsa Jesocristo ccaronapomadsa: —Ticcadeni ima tabaccora tani –najarahijine, onajaro. <sup>11</sup> Ticcadeni madiedsa Jesocristojine ima bicani huapi tehe ahuato tadsapi madija qqui toquinadsapa: —Jehe, Diopa nahato tahi, deni tojahi –quiquinanahijine, ohonanajaro Diodsa.

—*Occa camittehepi Jesocristocca. Aji namidsa omadiccadsa naqui pohuadsara ohuatidsena –najari Pablo*

<sup>12</sup> Jehe ohuemecotedeni, ajiaro ima timittamanaji: —Jesocristo tahimari jicanijine –quinadsa ohua nanajidso inanaridsamanajaropi aji Jesocristo tahimari icassiejeranijinecca deni tojaridsajaropaji. <sup>13</sup> Najaria tamine pocca odsahuaajicca soldadodeni naco occa ima nahatoto najaria aji Jesocristo tahimari mari mari onaridsajarojine todsepe ojaropaji. Najaria madija motadeni naco otahimari nahatoqquri najaripaja. <sup>14</sup> Najaria Jesocristodsa toquejenajaridenipa todsepe ojanu otahimari nahatoqquri najaripaja. Naraha ohuapi ocasserani ohuaraha ohuatidseni. Najaria aja mota huapimapa paja tohuatidsemanarihi najaripaja. —Iadsa naqui ia Medsedecca dacorehe anini. Ia naqui ima inahananijine ipajirani –quinajaripaja. Najaria aja poccadeni cappinehe jicadsapi Dio Atti denima mari icanaridsabaqqui-manajaripaja.

<sup>15</sup> Naraha Jesocristo tahimari maridedeni ohuahadenipa aji ohua Dio Atti mari ocanaridsabaqqujari acconia ohuadsa jiperaqquri najaripaja. Pohuadeni attipa: —Jidapapi iana deni iquejenanitohui –quiquinanajari. —Jidapapa Pablo coro todsimahi. Nadsana ettidsa madija huatidsemana-pomahitohui –quiquinanajari. Naraha Jesocristo tahimari maridedeni motapa bodideni bicaqquri nadsa Dio Atti maride toquejenaridsajari. Najaria Jesocristo tahimari maridepa denima todissesserahi najaripaja. <sup>16</sup> Ohuadsa huatideni huanagquiri najaripa: —Pablopa todsepe tojaraha iana Jesocristo tahimari ecomeranitohui –quiquinanajari. Bodideni nahatoqquri nadsa attidenipa: —Diopa Pablo icadossejari, Jesocristo tahimari icassiejeranijinecca deni tojanijine –quiquinanajari. <sup>17</sup> Naraha Dio Atti maridedeni mota pamahapa bodideni bicaqquri najararaha pohuadeni deni tonanamanahijine Jesocristo tahimari mari mari quiquinanajari. Occa cacahuehe aji Dio Atti mari mari onajaro acconi attideni ajama quiquinanajari: —Pablopa toponi cocorodsa ijine Jesocristo tahimari tojaridsani mittadsapa pocca cacahuehe acconi ojhitohui –quiquinanajari. <sup>18</sup> Naraha ohuapi epejena. Dio Atti maridedeni ohuahapa ohuadsa huatideni huanana taja, ohuahapa ohuadsa huatideni huananera taja naraha Jesocristo tahimari tojaridsani ima omittadsapi ohuatidsejaro. Jesocristo tahimari maride motadenia Jesocristocca deni tojehe ahuato inamananijine maride toquejenaridsajari. Naraha Jesocristo tahimari maride motapa pohuadeni deni tonanamanahijine maride toquejenaridsadsa naco epejena. Jesocristo tahimari tojaridsadsapi ohuatidseni.

<sup>19</sup> Jehe, ohuapi obodidsa nahato onajaro. Tiadenipi Dio ohua cacahuahijine Diodsa huati huati titidsanapomana najaro. Obodi nahato onajaro. Jesocristo corimepa ohua acco camahi, ohonanajaro. Nema nadsapi aji ima huapima ohuadsa anijaro tobicanitohui onadsa ohuatidsejaro. <sup>20</sup> Ohuapi Jesocristo tahimari huatide naqui ocappina-jejanitohui. Jidapana naqui ocassera tanidsa omdiraha Jesocristocca ima ohuacomera-dsanaponitohui. Nema onadsapi Jesocristocca nahatohue ohuadsa anini

madija ohuahadenidsa ahuato tanitohui, onajaro. —Jehe, Jesocristojine cappinajarajari –quinadsapa Jesocristo tahimari tossiejehecca mittamanahitohui. Pina aja Dio Atti mari mari ocanabaqquipojarissa onanabaqquina, onajaro. Jesocristocca deni tojehe ahuato dsanaponijine odsoqquedsa naqui bica tani. Ossiajaccadsa naqui bica tani, onajaro. <sup>21</sup> Occa camittehepi Jesocristocca daniji. Ajijaro namidsa omadicadsa naqui pohuadsara ohuatidse-dsanapoccani. Nidsa odsoqquedsa pohuahuaaji omadidsapi denima ohuatidsenitohui. <sup>22</sup> Naraha aji namidsa omadi-dsanapodsa Jesocristo tahimari ohuacomera-ridsanijine naqui bica tani. Nahi madija denima Jesocristodsa jehe quinadsapa tocassiejerahijine. Nadsama odsoqqueni naqui bica tani. Ossiajadsa naqui bica tani. ¿Nejecoma nanina bica tani? onajaro. <sup>23</sup> Ohuapi: Ajima onanina bica tani, onanijinepi ssamo onani. Odsoqquedsa naqui jipa onani. Odsoqquedsapi Jesocristohuaaji omadinijinena ohuadsa denima bica tani. Pohuahuaaji omadidsapi ajijaro namicca ocasserehe ohuadsa nohueranitohui, onajaro. <sup>24</sup> Naraha Jesocristo tahimari ticahatteranissa tejeraccani. Denima tiadeni maride omadi-dsanaponijinena bica tani. <sup>25</sup> Jehe, nema nadsapi obodi: Ajijaro namidsa Dio ohua namadi-dsanapoccahitohui nahato onani. Tiadenidsa omadi-dsanaponipi ticcadeni jeheniji todacorani nanijine. Pohuadsa tidacoramanani nadsapi tibodideni pocca huatidsehema denima tetidsemana-dsanaponitohui. <sup>26</sup> Jesocristocca marinaja denima tiadenidsa tojaridsadsa pohuadsa tetidsemanadsapi: —Jehe, Jesocristopa bica tahi –tiquinanitohui. Tiadenidsa omadipomadsapi Jesocristodsa denima tetidsemananitohui, onajaro.

<sup>27</sup> Nadsama ohuapi odsoqqueje odsoqquejereje nanitide. Tiadeni qquide naqui oqqueje oqquejereje nanitide onadsa tiadenira pina Jesocristocca marinajassa tinanamana-dsanapona, onajaro. Tiadenihuaaji bacco onadsa bacco onejeradsa naqui ticcadeni ima bicanira omittadsanaponijine. Tijinedeni ima ajima dsanaponina bica tajaro: Huapima tijariqquimanadsa Jesocristo tahimari icassiejeranijinecca tinebomana-geranijine acco acco ticanaji. Dacoco tijirehe nema tidsanapomanaji, nahi Diodsa jiperaqquiri najarideni attidenidsa tijaparimana-geranijine. <sup>28</sup> Tiadenidsa huadiqquiri najarideni noppinedeni ticappinamana-geraji. Nema tiquinadsapi pohuadenidsa ahuato tanitohui: Pohuadenipa najidsohue jiquejeranihuaji toquejenahitohui. Naraha tiadenipi ticassiejeranijine. Najaroa Diojinena paji. <sup>29</sup> Diopa tiadenidsa ima bicani inanajaro. Najaroa Dio Pohuajine tibodideni huatodsapi tettideni: —Jesocristopa occa imasiri manaconi dsoqquejari. Jidapapi pohuadsa pajissa onani –tiquinajaropaji. Diopa ima bicani onihi tiadenidsa inanajaro. Najaria aja Jesocristo ocasserani ahupajaripaja. Nadsama ia naqui Jesocristo tahimari tojaridsanijine ocasserani eridsadsa bica tani. Najaro imadsapi etidsejaro. <sup>30</sup> Tiadenipi pina aji ohuassa tiquinajaro. Jesocristodsa huadidi tajarideni tiadenidsa jara jara quiquinanahi. Aji poccadeni jarehe onahanapojarodsapi ja ojajerade ohua qqui tiquinade. Jidapana naqui poccadeni jarehe onahana-dsanaponicca ima timittamanajaropaji.

## 2

### *Jesocristo ajamani tojaraha deni tojarari*

<sup>1</sup> Aji Jesocristodsa tiquejenajaropi tiadeni tonahatidsebaqquihi. Pocca tohuati huanehe ticajiridsamanadsapi tibodideni ocassera taraha pohuajine tetideni ssonani nahatoqquiri tiquinajaropaji. Dio Corime tibodidenidsa tojadsa naco pohuadsa tijariqquimanajaro. Najaroa madija catidsede ticahattera, tohuati huanehe ticahattera najaropaji. Najaro ima huapima tiadenidsa tojadsapi ohuatidseni. <sup>2</sup> Denima ohua tinahatidsemananijinepi ajima tiquinaji: Aji Jesocristodsa tiquejenajaro huapima ticajonerara canadsa timadimanadsapi ohuatidsenitohui. Pocca tohuati huanehema

tetideni cahanerara canadsapi ohuatidsenitohui. Huapima jehe ticanirere canadsa: —Jesocristo tahimari ahuaato inanana -tiquinadsapi ohuatidsenitohui. <sup>3</sup> Naraha tibodideni: —Ohuana ima bicani onanadsa deni ojana -tiquinejeraji. Ima bicani tinanamananijinepi: —Diocca deni tojehera ahuaato dsanaponijinena bica tani -tiquinaji. Tettideni naqui: —Ohua motta Dio Attissa onananijine opajirani -tiquinejeraji. Tettidenipi: —Dio ohua acco camadsana opajirani -tiquinanina bica tani. —Ohuana denima nahato onajaro -tiquinejeraji. Timecotedeni naco tohuattehe cajiridsamanahi. —Pohuadeni naco deni tojehecca cajimanahijine bica tani -tiquinaji. <sup>4</sup> Tiadeni tiadenira tinanabicamananijine ojari-gerana. Timecotedeni naco pohuadeni tonanabicamanahijine acco ticamabaquimanajo.

<sup>5</sup> —Ohuapi ajimani ojani bica tani -tiquinadsapi tibodideni pina Jesocristo bodi huatomajarissa tiquinajaro. Nema tiquinani bica tani.

<sup>6</sup> Jesocristopa Diossa najari. Imehidsa madipodsama Imehicca deni tojehessa najaro cajijari.

Naraha pohuapa: —Ohuapi Abi Diossa onani. Deni ojani -najarajari. —Occa mamadi bicani onebo-gerana -najarajari.

<sup>7</sup> Nadsapa pocca deni tojehe inebocossa, pohua madihicca bicani inebocossa nadsa pina aja iassa naha amonejedsa tossonajaripaja.

Nadsapa pina medse dodosse tojajarissa naha tojajari.

<sup>8</sup> Pohuapa pina iassa naraha pohua tohuini nahicca inana-gerajaro.

Imehicca dossenijidsana ibora tajari. Najaria Imehi Attipa Bedidsa: —Madija tinassiajabacquina -najaripaja.

Imehi Attidsa ibora-dsanapojaria aja ahua porimacossanidsa inanadsoque-manajaripaja.

Nadsama porimacossanidsa dsodsoqquemana najaripa oppina tanicca. Najarodsapa madija bobotide, madija pohua tesse inanadsoquejaridenina, dsodsoqquemana najari.

Naraha Jesocristopa nama najararaha najaro porimacossanidsa inanadsoque-manajari.

<sup>9</sup> Najarodsapa ibora tadsapa Abi Dio Pohua Bedi Jesocristo deni inanajari. Memecca huapimadsa, namicca huapimadsa pohuana denima bica tajaripaja.

Najaria Abi Dio Pohua Bedi Jesocristo oni icanacansapsa madija huapimadsa Jesocristo onina deni tojaridsajaropaji.

<sup>10</sup> Nadsama nidsa dsama jicadsa Jesocristo oni mittamanadsapa memehuaji madiridsamanajarideni, namihuaji madiridsamanajarideni tedseje, nami bodihuaji animanajarideni naco aja Jesocristodsapa jehe quina-jarajarideni jicapojari, Satana pocca dodosse tabacquima,

huapima Jesocristocca dacorehejine cappinamanadsapa: —Jeso deni tijani -quinahijine pohuadeni pitodsapa jassi tahitohui.

<sup>11</sup> Nadsama huapimapa: —Jehe, Jesocristopa ia Medsede, huapimacca tamine -quinahitohui.

Abi Diodsa naco: —Bica tinani, deni tijani, tijani -quinahitohui.

*Jesocristodsapa toqejenajaridenipa ajijaro dsamacca dsidsinidsa pina jojororo ssiaja tajarissa quinajari*

<sup>12</sup> Ohuemecotedeni, tiadenidsa ohuati huana tani. Jesocristo tahimari huajijiradsa tiadeni mari mari ohocanabaquini nadsa iboraquiri tiquinade. Naraha jidapapi tiadenihuaji omadi-geradsa naqui denima Jesocristocca marinajadsara iboraquiri tiquinana. Pohuajine ticassiejeranijinepi madie dsati ticajimanani. Dio Corimepa tibodidenidsa madiridsahi. Diocca ejedeni tiquejenani. Najaro ima tossamogeranijine Dio noppine ticappinamanadsa mohuaradsa timadimananissa taji. <sup>13</sup> Aji

tibodideni ima bicani tohui tiquinajaropi Dio Puhajine. Puhuapa tiadeni acco acco totocamabaqqui najari, ima bicanira tinanamana-dsanaponijine. Dio Puhua jipa tahiccara tinanamananijinepi Puhuada bica tajaro.

<sup>14</sup> Nadsama Dio jipa tahicca tinanamanadsa, timadimananicca huapima tinanamansapi jamimana tejeradsa tidsepedeni ijimanaji. Timecotedeni tedseje ahuaji atti ahuaji atti tiquinejeraji. <sup>15</sup> Nahi Jesocristodsa jehe quina-jarajarideni tiadenidsa: —Tabaccoraqqui nahi —quina-jarahijine. Tibodidenidsa imasiri quejema-jerani ima ahua to taniijine, onajaro. Diocca ejedeni tiquejenajaropi tiadeni tecahuamananissa taji, imasiri tinanamana-jeraniijine. Naraha Jesocristodsa jehe quina-jarajaridenipa ajijaro namicca ima tohui quinadsapa tabaccoraqqui najari. Bodidenidsa huanehe ijijaro. Puhua denipa dsidsinidsa madiridsamanajari. Naraha tiadenipi pina abadsico bedi dsidsinidsa ssiaja tajarissa tiquinajaro. <sup>16</sup> Nani tijinedenina Jesocristo tahimari icassiejeraniijinecca ima ahuatoridsaponi nanijine. Nahi Cristo ccanipomadsa ticcadeni ima nahato onadsapi ohuatidsenitohui. Puhua Dio Atti mari ocanaridsabaqquide onejeraniijine. Jesocristodsa quequeriqquimana nahihuaaji ima cattemade ponima ja ojade onejeraniijine. <sup>17</sup> Jesocristodsa jehe tiquinajaro ticcadeni madie Diodsa teccoramanajaropaji. Najaroa ticcadeni da naqquinaja Diodsa da tiquinajarossa najaropaji. Diodsa tidsepedeni ihijimana najaro naqui Diodsa tetteccoramana najaropaji. Nadsama ohua naqui Jesocristo tahimari ohuacomera-ridsajaro acconi ohua inanadsoqqe-manadsa odsoqqeni bica tani. Occa madiepi pina occa daniji Diodsa dada onajarossa najaro. Nadsama ticcadeni daniji Diodsa deni-pajiranissa taniijinepi occa daniji, ticcadeni tadsajani quejemadsapi ohuatidseni. Occa huatidsehe tiadenidsa tojadsapi huapima etidsenitohui. <sup>18</sup> Jehe, ohuadsama tetidsemanaji, onajaro.

### *Timoteo Epafroditodeni tahimari*

<sup>19</sup> Jehe, ia Medsede Jesocristo jipa tadsa ticcadeni imatohui nahi Timoteo dosse onahitohui. Nidsa ahuaji ccanipomadsa ticcadeni ima huati nanidsana ohuatidsenijine. <sup>20</sup> Timoteopa pina obodissa najari. Tiadenidsa huati huana tajari. Madija ohuaha Timoteossa najari nohuerahi. Najarina titohuideni bodi huatodsanapojari. <sup>21</sup> Naraha imecotedeni motapa puhua deni poccadeni madieccara bodideni huatomanaajari. Puhua denidsara dsepedeni ijimanajari. Jesocristo tahimari tojaridsanijinepa bodideni huatomana-jarajari. <sup>22</sup> Naraha Timoteona Jesocristocca ima deni tojanijine dissera tajari. Pocca ima nahatoqqui tiquinajaro. Pocca madie bica tanicca tiadenidsa ahua to tade. Puhua tedseje Jesocristo tahimari icassiejeraniijinecca ecomeraridsadsapi ohua acco camajari. Pina dsabisso imehi biji acco icamajarissa najaride. <sup>23</sup> Timoteo tiadenihuaaji dosse onahijineraha obodipi nidsa oqquenanicca ima omittaccana, onajaro. Nahato onadsana puhua dosse onahitohui. <sup>24</sup> Naraha ohua naqui onajo-jerani. Tiadenihuaaji occabote nani. Ohua Medsede pajissa ohua acco camahitohui, onajaro.

<sup>25</sup> Nadsama imecote Epafrodito naco aji ohuedsanihuaaji dosse tajonamanajari obiji accode. Ajadsa madimanajarideni ohuahuaji jajahijona nadsapa Epafrodito tedseje mari mari ihicanabaqqui najari. Madija motapa Jesocristo tahimaridsa jidsa jidsa quiquinanaraha Epafrodito tedsejepi japariri inejerade. Diocca dacorehema Jesocristo tahimari ehecomera najaro. Naraha jidapapa tiadenihuaaji dosse onanibote nahi. <sup>26</sup> Puhua attipa: —Occa madija qqui onanibaqquina —nanaja najari. Epafrodito coma tahicca ima timittamanadsa puhuatohui oji oji tiquinajaro ima puhuada bacco najonadsapi titohuideni bodi huatoto canajari. <sup>27</sup> Puhua pajissa coma tadsa huatiabote najaride. Naraha Diopa puhuada huati huana tadsa inanomijaride. Diopa ohuada naco huati huana tajarijine: —Epafrodito dsoqqe-jarana —najari. Nassa dsoqquedsapa oji onajarojine denima obodi ocassera taneje onade.



<sup>28</sup> Nadsama Epafrodito naco tiadenihuaji dosse onanihijine jipa onani. Tiadenihuaji jidsera tanidsapa tetidsemananitohui. Nadsapi ohua naqui ticcadeni ojinijidsa obodi huatoto canejeranijine, tiadenidsa bacco tanidsapa, onajaro. <sup>29</sup> Tiadenihuaji bacco tanidsapa tetidsemanana. Puhuapa timecotedeni Jesocristocca. Madija pina Epafroditossa quinajarideni Jesocristo tahimari maride jahiridsahi caji tahi. Puhuadenidsa naqui tetetidsemana naji, attideni naqui timittamananissa taji. Tiadenihuaji bacco najonamanadsa naco acco acco titicamabaqquimana nana, onajaro. <sup>30</sup> Epafroditopa ohua acco camajari. Jesocristo tahimari maride dsepe ijidsa huatiabote najaride. Huaji tanidsa timadimanadsapi ohua acco ticamamananijine ssamo taraha Epafroditona ohuadsa dosse tajonamanadsapa pohana ohua acco camade tojajari. Puhuapa aji oppina tanidsa madiraha ohua acco camade bica tajaride.

### 3

#### *Jesocristojinena Diodsa bacco inanijine*

<sup>1</sup> Ohuemecotedeni, ia Medsede Jesocristodsa tetetidsemana naji. Occa marinaja tiadenidsa dsodo onapojarocca tiadenidsa dsodo omanipomajaro. Dsodode ohuadsa najo tejerani. Nani Jesocristocca marinaja tetideni ajimamana-jeranijine, nani ima onihidsa jiperaqquiri tiquinanijine. <sup>2</sup> Paji, tetideni huatoji. Jodiodeni motapa Jesocristodsa jehe tiquinajarocca ima tossamonijine titohuideni tonacomabaqquihi. Puhuadenipa tabaccoraqquiri nahi. Poccadeni marinajapi: —Huissinaja ticappiranadsapi ticassiejera-jeranitohui —quiquinanajari. Naraha najaropi pajissa jerani. Paji, puhuadenidsa pajissa tiquinadsapi ponima timedeni huissi nadsa biquerarana. <sup>3</sup> Naraha iana marinaja pajissaccadsa iquejenajaro. Ibodicca imasiri jeo tehe jicadsapi pina huissinajassa nehe icajijaro. Dio Corime ibodidsa madijarijine Dio Puhuadsa ehetidse najaropaji. Jesocristodsa iquejenajaropi etidseri neneje najaropaji. Ettipi: —Imedsa huissinaja icajijaroline icassiejeranitohui —inejerani. Jodiodenicca marinaja jadanipi dacorehe cappirani. Jesocristona dacorehe cajijari. <sup>4</sup> Naraha jodiodeni mota ima bicani cajimanadsapa: —Jehe, Diohuaji bacco onanijine opajirani —quinaraha ohuana ima denima bica tanicca ocajipojaro. Aji ima bica taniccadsa ibodi tobicadsapi nassa obodi tobicaponeje. <sup>5</sup> Nadsama otahimaripi ajima najaro: Ossonadsa huada 8 nadsapi huissinaja ocajijarode. Huissinaja ocajijaropi pina Diocca dosseniji tahideccassa najaro. Ohuapi Isaraeri potemahi ojani. Idi Isaraericca ejedeni Benjamin potemahidenia aji ohuapaji. Ohuapi pajissa jodio madija ojani. Occa abi, occa amideni naco jodiodeni. Jodiodeni atti ebreo nahatoqquiri inajaro. Nadsama marinaja onini pariseodsa jehe onadsa naqui Moisesicca marinaja tadsajani quejemaniccadsa dissera onapjarode. <sup>6</sup> Nadsama ohua jodiodenicca marinaja onapajiranissa tanijine dissera onadsapi Jesocristodsa quequeriqquimana najarideni ohonajidsobaqquiji najaride. Moisesicca marinaja, jodiodeni mamariri najari ohuacahuanissa tadsapi madija huapima otahimari mittamanadsapa: —Tijine dsori tejerani —quiquinanade. <sup>7</sup> Jehe, aji ima huapima ohuacahuapjaropi ohuadsa bica tade. Naraha Jesocristocca ojadsapi jidapana ima tahideccadsa: Deni tojanicca onejerani. Paji oneborini. <sup>8</sup> Aji ohuadsa ima deni tojapjaropi jidapana ohuadsa pina nohuerajarossa nani. Jesocristodsa ojajarocca imana ohuadsa denima bica tani ojari najaro. Jidapapi Jesocristo tohuina onadsapi occa ima tahideccadsa occa madija: —Bica tani —quiquinanajaripa oneboridsehe jicani. Pina dsamatapa tabotto nebojarissa nani. Jidapapi Jesocristodsa onocco tojidsera-dsanaponijine tohuini onajaro. <sup>9</sup> Jesocristocca ojadsapi puhuadsa omadi-dsanaponitohui. Tahidepi Diocca dosseniji jodiodenidsa anipojaro ohuacahuapjarode. Najarodsa obodi tobicanitohui ohonanaraha, ohua Jesocristocca ojajaropi Diocca dosseniji jodiodenidsa anipojaro jirehe puhuadsa ojajarode. Pocca ojadsapi pahuajine Diodsa bica onani. Jidapapi

ohuatti: Pajissa Jesocristo occa imasiri manaconi tojajari onajarojine ohuadsa Dio Attipa: —Occa Ejedenisda pajissa tadsapi ticca ima ohuadsa bica tani –najaripaja. <sup>10</sup> Nema najaro Jesocristodsa onocco tojidseranijine jipa onajaropaji. Puhuapa dsoqqueraha nahatonijari. Najaro nahatoniecca dacorehetohui onadsapi: Najaro dacorehe ocajina, onajaro. Jesocristo ocasserani ahujaridsa ohuati huana tadsapi ohua naqui pina pohua ocasserani ahujarissa onana, onajaro. Pina pohua dsoqquejarissa najaro onahananijine jipa onajaro. <sup>11</sup> Jesocristodsara dissera odsanapona onajaropi nidsa Diojine Jesocristodsa toquejenajarideni nahatonimanadsapa ohua naqui pohuadenidsama onahatoninijine, onajaro.

*Diocca madietohui idissesserani dsanapona*

<sup>12</sup> Ohuapi Jesocristocca madiedsa opajiranissa tanijinepi pocca nahatonietohui dissera, pocca dacorehetohui dissera, obodi tobicanissa tanijine tohuini dissera onaraha najaro ima huapima bacco onanissa tani onejerajaro. Naraha ohuapi Jesocristocca imatohui dissera onaccani. Tahidepi Jesocristo pohuajine Diodsa ojajaro. Puhuajine pocca dacorehe, pocca nahatonie, pocca biquehe ohuadsa tojajaro. Pohua tahimari mari ocanabaqquihijine naqui ohuadsa inanajaro. Nema odsanaponijine dissera odsanapona, onajaro. <sup>13</sup> Ohuemecotedeni, ohuapi Jesocristocca dossenijidsa opajiranissa tani onejerajaro. Occa ima tiadenidsa huati onana. Onattihuaajicca imapi ohuati ajimanissa tani. Jidapapi otedsejemacca ima Diocca madietohui onadsa odisserani najaro. <sup>14</sup> Ohuapi Diohuaji omadinitohui onadsa, ima bicani onananijinera obodi huatoni ojari najaro. Diohuajina Dio pocca daniji ohuadsa tojanijine, onajaro. Jesocristocca iquejenajaropi Dio itohui huahua najari, pocca madiedsa ipajiranissa tanijine. Nidsa Diohuaji bacco inadsapi pocca daniji camittehe jiquejeranicca iadsa tojanitohui.

<sup>15</sup> Aji huapima Jesocristo pohuadsa jehe inanissa tajaropi pohuajine ibodi tohuireridsadsa ibodi huatodsapi ajima inanina bica tani: Diocca madie tohuira idacorani nana. Timecotedeni motapa: —Iapi Jesocristodsa ipajiranissa tani. Icca madie denima ibicanijinepi nohuerani –quiquinanaraha Diona bodideni cacajiquimerahijine acco icamabaqquihitohui. Diocca madie tohuira denima todacocorahi nahijine. <sup>16</sup> Naraha iapi ajima inana: Pina aji Dio Atti imittaridsajarocca imassa inanadsa imadiridsana.

<sup>17</sup> Ohuemecotedeni, tiadenipi occa madiessa tinanamanaji. Najaroa aji ia Dio Atti maridepi Diotohuira idissesserani najaropaji. Madija poccadeni madie bica tani qqui tiquinadsapi najarossa tinanamanaji. <sup>18</sup> Nadsa tiadenidsa madija ohuahadenicca ima huati huati onapode. Poccadeni madijepi bica tejerani. Aja Jesocristo ahua porimacossanidsa dsoqquejaricca imadsapa jipepera tahi. Poccadeni ima tiadenidsa huati omanipomadsapi oji onabote nani. Paji, pohuadenissa tiquinejeraji. <sup>19</sup> Pohuadenipa poccadeni imadsa nama dsanapomanadsapa najidsohue jiquejeranihuaji toquejenahitohui. Pohuadeni tohuini quinajarina pina poccadeni diossa najaro. Najarodsara huatidsemanajari, pina jijipa tohuira, huananehe tohuira, dsedse coma tanicca tohuira quinajari. Pohuadenijine ima tabaccora taraha nama naha pohuadeni nanahatidsemana najari. Poccadeni imajine jabojerimanahina bica taraha naraha pohuadenipa najaro imadsa cappinamana-jarajari. Ajijaro dsamacca tohuira bodideni huahuatoma-mana najari. <sup>20</sup> Naraha iapi memehuaji Dio madihicca odsa pananicca madija iquejenani. Nahi memehuajicca ia Tonassiajadepa itohui ccaronapomahitohui. Najaripa ia Medsede Jesocristo. Pohuatohui imadijaro. <sup>21</sup> Nidsa Jesocristo ccanipomadsapa pohuajine ime cacajiquimeranitohui. Aji essirepi jadsidsi tani, imasiri icajije najaro. Naraha nidsa inahatonidsapi essire jadsidsira tanicca icajinitohui. Pina Jesocristo memehuaji pohua assire bicabote cajijarissa najaro icajinitohui. Jesocristopa dacorehe cajijari. Najaro pocca dacorehejine

namihuaicca, memehuaicca huapima dossede tojajari. Najaro pocca dacorehedsa essire cacajiquimeranitohui.

## 4

### *Ia Medsededsa tetetidsemana naji*

<sup>1</sup> Nadsama ohuemecotedeni, Jesocristodsa disseraqquri tidsanapomanaji. Titohuideni ohuati huana tani. Tiadeni qqui onabaqqui-ccaraho ohonanani naraha oqquena-jeraccani. Maittaccadsama Dio Atti tiadeni mari ocanabaqqui podsapi Jesocristo tahimaridsa jehe tiquinade. Pohua tahimaridsa timadimananissa dsanapodsapi ohuatidsejaro. Tiadenipi occa cacatidse tabaqqui tiquejenani. Najaroa pina mari mari onadsa occa marinaja manaconi ohuadsa tojajarossa tiquinajaropaji, Diojine.

<sup>2</sup> Ohuemecote Ebodia, Sitique, tiadenidsa naqui dsodo onajaro. Jesocristo pohua imecote tiquejenadsapi pina tipamehe jehe ticanirenissa taji. <sup>3</sup> Nadsama otesse Dio Atti maride tia tedseje ihicabera najarodsa dsodo onajaro. Ebodia, Sitique ponideni acco ticamabaqquiji, queberanissa tanijine. Jesocristo tahimari icassiejeranijinecca maride occaridsadsapi ponideni pamehe ohuinoridsa dsapanideni ijiridsamanajaro. Otesse Clemente, otesse ohuahadeni inadsa Dio Atti maride iquejenadsapi ponideni naqui ohua acco icamamanade. Pohuadeni oni huapimapi camittehe cajimana-dsanapohuijinecca papeodsa dsodo nani anini.

<sup>4</sup> Huajjiradsa ia Medsededsa tetetidsemana naji. Tiadenidsa huati omanipomajaro: Ia Medsededsa tetetidsemana naji, onajaro. <sup>5</sup> Ohuattipi tiadenidsa ajima onajaro: Joneqquri tiquinadsa timadimanaji. Nahi madija ohuaha attidenipa: —Pohuadenipa bicaqquri nahi —quiquinanahijine, onajaro. Ia Medsede ccanihi huajira tahi.

<sup>6</sup> Huapima ticappiramananica tohuira tibodideni huatoto cana-jeraji. Ocasserani temanajarodsa naqui tibodideni huahuatomacca nejeraji. Ima huapima tibodidenidsa ahuatomadsa naqui Diodsara huati huati titiquina naji. Diodsa huatide tiquejenadsa naqui Pohuajine bica tanicca ticajimanani tibodideni huatonissa taji. Nadsapi Pohuadsa: —Jehe, Tijine bica tani —titiquina naji. <sup>7</sup> Nema tiquinadsapi Dio tiadenidsa pocca jonehe da inaridsanitohui, tibodideni jassi nanijine. Pocca jonehepi deni tojanicca. Madija iapi pocca jonehecca ima nemanenehattanijine ipajira-jerani. Jesocristodsa tiquejenajaropi najaro jonehe tibodideni ecahua, tibodideni huatohue naqui ecahua najaropaji.

### *Bica tanicca tohuira tibodideni huatoma-manaji*

<sup>8</sup> Ohuemecotedeni, jidacca huati onajarocca ima tadsajani ajima tinanamanaji: Ima pajissaccadsara tibodideni huatoma-manaji. Imadinissa tanijineccara tibodideni huatoma-manaji. Pajiranissa tanicca imatohuira tibodideni huatoma-manaji. Ima bicani ponira tiadenidsa tojaridsanijine tibodideni huatoma-manaji. Ima bica tanicca tohuira tibodideni huatoma-manaji. Madija pocca madie toccanissa tajaro tohuira tibodideni huatoma-manaji. Ima bicani pina Diocca imassa najaro tohuira tibodideni huatoma-manaji. Dio ticcadeni imadsa huatidsehijine tibodideni huatoma-manissa taji. <sup>9</sup> Aji tiadeni mari ocanabaqquijaropi tiadenidsa tojaji. Tiadeni ocadossebaqquijaropi pina occa dossenijissa tinanamanaji. Pina occa ima timittamanajarossa tinanamanaji. Pina aji occa madie qqui tiquinajarossa tinanamanaji. Pina aji occa imassa tinanamanadsapi Diopa tiadeni jassi tonanabaqquihitohui. Pohuana jonehe jinede. Tiadenidsa madiridsahi.

### *Piripodsa madimanajaridenicca da naqquinaja Pablodsa*

<sup>10</sup> Ohuadsa tetideni huanana tajaroa ohua acco ticamamana-pomadsapi ohua Medsededsa ohuatidsejaropaji. Ticcadeni da naqquinaja naqui ohuadsa bacco bacco najona-jeraraha maittadsama onihina ohuadsa bacco napomajarode. Ohuadsa

tetideni ajimamanani onejerajaro. Canajocossa nadsa naqui nahato onajaro, ohua acco ticamamananijine tipajiramana-jerajaro nitide, ohonanajarode. <sup>11</sup> Tijinedeni ohuatidsenicca ima tiadenidsa huati onajaro. Naraha ocappirani, opajira-jerani onejerajaro. Ohuapi ohuatteje najaro. Ocajidsa, ocappiradsa naqui obodi ohohuatidse najaro. <sup>12</sup> Occa madiejine badsira tehe ocajidsa naqui nahato onani. Sse onadsa naqui nahato onajaro. Ima onihi onihi ohuacatama-ridsajarojine ohuattajaro. Ojira onani. Accara onehe omadidsa, pemi omadidsa naqui ohuatteje najaro nahato onani. Mota tojahi ohuadsa anidsa naco nahato onajaro. Ocappirehe omadidsa naqui ohuatteje najaro nahato onani. <sup>13</sup> Cristo ohua tonadacoraja najarijine ima onihi onihi ohuadsa tojadsapi opajirani. <sup>14</sup> Naraha ocasserani ohuani nahatoto tinadsapi ohuadsa tetideni huanana tani. Diodsa da da tiquinajarocca ohuadsa ticcadeni da naqquinaja dosse tajonamanadsapi tijinedeni ohuadsa bica tani.

<sup>15</sup> Jesocristo tahimari icassiejeranijinecca tiadeni mari ocanabaqquipodsama tetidsemanadsa ohua acco acco ticamajonamanajaro. Dsama arobeni Masedoniahuaji ojoppemadsa naqui odsa onihicca Jesocristodsa quequeriqquimana najaridenipa ohua acco icamamana-jerani. Naraha tiadeni Piripodsa titiqueriqqui najarodenina ohuadsa ticcadeni da naqquinaja da da tiquinajarode. <sup>16</sup> Odsa panani Tesaronicadsa omadidsa naqui occa madiejine ticcadeni da naqquinaja ohuadsa dosse tajonamanani ojari nejerade. <sup>17</sup> Ohuapi ticcadeni da naqquinaja tohuira obodi huatoni ojari nana onejerajaro. Ticcadeni biquehecca ima Diodsa tohuapinijinena jipa onajaro. Aji ticcadeni da naqquinajapi Diopa qqui qqui tahi. Tiadenipi pina Dio Puhuadsa tidsepedeni ijimanajarossa najaro. Nadsapi Dio pocca biquehe tiadenidsa tojanitohui.

<sup>18</sup> Nadsama ticcadeni da naqquinajapi Epafrodito ahujaji eccajonajaro. Najarodsapi occa madiejine mitta onaridsahi. Naraha mota tojaccani. Nadsama ohuadsa dosse tajonamanajaropi Diodsa pina majojo majoni bica tajarossa najaro. Ohuadsa tijinedeni bica tadsapi Diodsa naqui bica tani. Nadsapa Dio tiadenidsa huatidsehi. <sup>19</sup> Nadsapa icca Dio ticappiramananicca tiadenidsa da da ihinananitohui. Jesocristocca tiquejenadsapi pocca biquehe, pohua cajjaricca huapima tiadenidsa inanajorajaro. <sup>20</sup> Abi Dio Bicabotepa deni tojahi. Etti nema dsanaponitohui. Huapima Puhuadsa etidsedsanapona, onajaro. Pajissa nema nana.

### *Nija quinajari*

<sup>21</sup> Jesocristodsa toquejenajarideni huapimadsa nija onajaro. Aja ohuemecotedeni ohuahuaji madimanajarideni naco tiadenidsa nija quinajari. <sup>22</sup> Aji ohua omadini Romahuajicca Jesocristodsa toquejenajarideni huapima, romanodenicca tamine deni tojahicca dodosse tabaqqui mota Jesocristodsa toquejenajarideni naco tiadenidsa nija quinajari. <sup>23</sup> Ia Medsede Jesocristopa tiadenidsa ima bicani inanana, onajaro.

Epejeni, ohua onipi Pablo.

## **Pablotenipa Corosadenidsa ima teppe dosse quinajaro Colosenses**

Odsa panani Corosapi Epeso huajira tanidsa odsa panani tojajaro. Pablopa Epesohuaji madidsa Jesocristo tahimari mari icanabaqquijari. Nahi Corosacca madija ojaria, oni Epafra, Pablocca marinaja mittadsa Jesodsa jehe najari, quinahi nade. Dsotode pocca odsahuaji toccanidsa pohuana Corosacca madija mari icanabaqquijari, quinahi nade. Nadsapa madija mota huapi taha Jesodsa jehe quinajari.

Pablopa Corosahuajicca Jesodsa jehe quinajarideni maride tocca-jararaha pocca-deni ima mittadsa pohuadenidsa ajijaro ima teppe dosse inajaro. Aja mamaridedeni ohuaha Corosacca madija mari icanabaqquidsa pajissacca ima jeraraha mari mari quinajari. Poccadeni marinajadsa madija iboraqquiri nahijine disseraqquri najari. —Icca marinajadsana ticassiejeranijine –quinajari. Nadsapa Pablo najaro ima mittadsa pohuadenidsa ajijaro ima teppe dsodo inajaro.

Pocca dsodonijipi: Cristopa huapima inahatoridsajari. Pohuana huapimadsa deni tojajari. Pohuadsara pajissa inadsapi icassiejeranitoahui. Madie dsati naqui icajinitohui. Corosadenipa Dio jipa tahiccara inanamananijine pohuadenidsa dsodo inajaro.

### *Pablo, Timoteo tedseje nija quinajari*

<sup>1</sup> ¿Nija imecotedeni? Ohuapi Pablo. Dio jipa tadsa Jesocristocca dodosse ojajaro. Ohuemecote Timoteo tedseje tiadenidsa dsodo inajaro. <sup>2</sup> Ajijaro imapi nani odsa panani Corosahuaji Diocca tiquejenajarodenidsa dsodo inajaro. Tiadenipi imecotedeni. Jesocristodsa disseraqquri tiquinajaro. Icca Abi Dio tiadenidsa ima bicani inananiijine, inajaro. Dio pocca jonehe naqui tiadenidsa inananiijine, inajaro.

### *Pablopa Diocca toquejenajaridenitohui Diodsa huati huati tajari*

<sup>3</sup> Iapi huajijiradsa titohuideni Diodsa huati huati ihinanajaro. Ia Medsede Jesocristocca Abi Diodsa huati huati inadsapi etti ajima ihinanajaro: —Jehe Abi Dio, Corosahuaji madimanajaridenicca ima bica tadsapi Tiadsa etidseni –ihinanajaro Diodsa. <sup>4</sup> Aji tiadenipi Jesocristodsa jehe tidsanapomanani quinahi ima imittani. Aja Diocca toquejenajarideni huapimadsa naqui tetideni huanacquiri nani quinahi ima imittani. <sup>5</sup> Nema tiquinajaropi itedsejemacca ima bicani iadsa tojanitohui nahatoqquri tiquinajaro. Aji: —Iapi memehuaji imadinitohui –tiquinajarojinea Diocca toquejenajaridenidsa tetideni huanacquiri najaropaji. Pajissacca ima aji Jesocristo tahimari icassiejeranijinecca tiadeni mari tocanabaqquipodsama Jesocristopa memehuaji pocca madijadsa ima bicani inanajorajaro timittamanajaropaji. Nadsapi najaro imatohui timadimanajaro. <sup>6</sup> Ajijaro Jesocristo tahimariipi pina tiadeni mari tocanabaqquijarissa najaria dsama onihi onihidsa madiridsamanajarideni mittaridsamanadsapa Jesocristodsa toquejenajaripaja. Nadsapi ima bicani inanarid-samanajaro. Tiadeni naqui najarossa tiquinajaro. Dio titohuideni huati huana tahi ima timittamanadsapi pocca tohuati huanehedsa pajissa tiquinajarode. Nadsapi tiadeni naqui ima bicani tinanaridsamanajaropaji.

<sup>7</sup> Imecote bicabote Epafra pohuana Jesocristo tahimari tiadeni mari tocanabaqquijaride. Pohua naco Jesocristocca dodosse tojajari, iadsama dsepe ijijari. Epafropa Jesocristodsa dissera tadsapa tiadeni tonahattabaqquihijine dsepe ihiji najaride.

<sup>8</sup> Epafra pohuana titahimarideni iadsa huati nanidsa imittajarode. Tiadenipi



Jesocristocca toquejenajaridenidsa tetideni huanaqquiri nani naqui imittade. Dio Corimejine Cristocca tohuati huanehema tetideni cahanari canajaropaji.

<sup>9</sup> Nadsapi titahimarideni imittaponidsama titohuideni Diodsa huatide inebojerajaropaji. Dio Pohua jipa tahicca nahatoqquiri tiquinanissa tanijine inadsa Pohuadsa huati huati ihidsanapo najaro. Tiadenidsa Pohua Corimecca nahatohue, pocca tohuattehe huapima da inanijine inadsa Pohuadsa huati huati ihidsanapo najaro. <sup>10</sup> Jehe, Dio Corimecca tohuattehe ticajimanadsapi timadimananissa tanijine nahatoqquiri tiquinanitohui. Pina ia Medsede jipa tahiccassa tinanamananijine. Ima bicanira tinanamanadsapi ia Medsede huatidsehitohui. Tijinedeni ima bicani tojaridsadsapi tidsepedeni ijie huapima ahuato tanitohui. Pina ahua bono ocassa tahicca bonojide rajarissa tiquinanitohui. Nema tiquinadsapi Diodsa denima tinoccodeni tojidsera-dsanaponijine inadsa Pohuadsa huati huati ihidsanapo najaro.

<sup>11</sup> Diocca dacorehepi deni tojanicca. Najaro dacorehema tiadeni tonadacorabaqquihhi nahijine inadsa Pohuadsa huati huati ihidsanapo najaro. Nani ima ocassera tanicca tiadenidsa anidsapi dacoco tijiradsa mohuaradsa tinahanamananijine. <sup>12</sup> Tetidsemanadsa naqui tettideni Diodsa: —Abi Dio, epejeni, tijine bica tani —titiquina nanijine inadsa Pohuadsa huati huati ihidsanapo najaro. Diopa ia tonapajira-baqquihissa tadsa Pohua dsamari memehuaji ia tonamadi-baqquihitohui. Huapima pocca iquejenajaropi aji Pohuajine ibodi ssiaja tajaropaji. Najaroa aji pocca daniji bicani iadsa inanajorajaropaji. Nidsa Pohua madihihuaji Pohua ssiejenedsa bacco inadsapi iadsa da inanitohui, inajaro. <sup>13</sup> Dsidsinidsa imadipodsapi imasiri iadsa dacorapode. Naraha Dio ia joca toninebaqquidsa pocca ejedenicca cacahueheda ia tonanabaqquijaride. Diopa Pohua Bedidsa huati huana tajari. <sup>14</sup> Pohua Bedi Jeso dsoqquejarijine icassiejerajaro. Icca imasirijine iadsa najidsohue ssonarinitohuiraha pohuajine jicanissa tadsapi Diopa iadsa: —Epeje, ticcadeni imasiri ohuati ajimani —najaripaja.

*Jesocristo dsoqquejarijinea Dio tedseje icajonerajaropaji*

<sup>15</sup> Cristopa Dio Bedi. Pina Dio Pohuassa najari. Diopa innocodsa qqui inajarahi. Naraha Dio Pohua Bedi Jesocristo qqui qqui tojajaripa pina Dio Pohua qqui inajarissa najari. Cristopa nami nahato-geraccadsama madipojari. Aja huapima cajiridsajaripa dsotode inahatoridsajari. <sup>16</sup> Diojine Pohua Bedina huapima inahatoridsajari. Aja memehuaji aniridsajari inahato, aja namidsa aniridsajari inahato najari. Aja innocodsa qqui inaridsajari huapima inahato, aja innocodsa qqui inajarajari naco huapima inahato najari. Aja innocodsa qqui inajarajaridenicca taminedeni naco inahatobaqqui-ridsarari. Cacahuehe cajimana, dacorehe cajimana, nahatohue cajimana najarideni huapima pohuana pohuadeni nahatodedeni tojajari. Huapimapa pocca. <sup>17</sup> Cristopa dsama nahato-geraccadsama madipojari. Aja huapima anirid-samanajaripa pohuajine nahatoridsajari. Memecca, namicca huapimapa pohuana ecahuadsa aniridsahissa tajari. <sup>18</sup> Aja Cristopa pohuadsa ijariqquijaro ia Dossed. Pohuapa pina itatissa najari. Iapi pohua assiressa inajaro. Pohuapa nadsama madipojari. Pohuana dsoqqueheda tahide nahatonijari. Najaroa aji nahatoniecca ima pohuajine iadsa najorajaropaji. Nani pohua natti jaijamissanijine. Pohuana ima huapimadsa deni tojajari. <sup>19</sup> Dio Pohua jipa tadsa pocca nahatohue nemaneha, pocca deni tojehe nemaneha, pocca dacorehe nemaneha huapimapi Jesocristodsana anijaro. <sup>20</sup> Diopa memehuajicca, namihuajicca animanaridsajari huapima Pohua tedseje cajonerahijine jipa tajari. Nama nadsapa Pohua Bedi Cristo icadossejari, huapima inajonebaqquihijine. Cristopa ahua porimacossanidsa dsoqquedsapa pohua emene toccajari. Najarojinea icca imasiri jicadsapi Dio tedseje icajonerajaropaji.

<sup>21</sup> Tahidepi Diodsa jidsaqquri tiquinaccade. Tibodidenidsa Diodsa jiperaqquri tiquinaccade. Tabaccorehe tinanamanajarojine Diocca huadi tiquejenaccade.

<sup>22</sup> Naraha jidapapi Jesocristojine Diodsa tijonemanajaro. Aja Jesocristopa pohua assire pina essiressa najarodsa dsoqquehijine ocasserani ahujari. Nama najaria aja nidsa pohua Imehi Diohuaji ia tohuaccamacossani-baqquidsapa Imehidsa: — Ajaridenipa occa madija –nahitohui iadsa. Nahi Dio ia qqui tabaqquidsapa imasiri jirehe ibodi ssiajaqquri nehe ia qqui tabaqquihijine. Dio iadsa naco: — Tabaccoraqquri tiquinani –njarahitohui. Jesojine iadsa ima nohuereje najaro.

<sup>23</sup> Nema tiquinanijinepi Jesodsa paji jehe tidsanapomanarini naji. Aji pohua tahimari icassiejeranijinecca timittamanapojaro naqui tinebomana tejeraji. — Jesocristojine icassiejeradsapi Diodsa bacco inadsa etidsenitohui –titidsanapomana naji. Nad-sama pohua tahimari huati huati onajarona dsama huapimadsa ecomeraridsadsa tojaridsajaropaji. Ohua Pablo naqui Jeso ohua cadossedsa pohua tahimari maride ojaridsajaropajide.

*Pablopa Dio icadossedsa Jesocristodsa quequeri quimana najarideni cacahuade tojari*

<sup>24</sup> Tiadenidsa ohuati huana tadsa Dio Atti denima timittamananijine onadsa ocasserani ohuaraha ohuatidsejaro. Cristopa pohuadsa ojariqquimanahijine ocasserani ahujaripajade. Puhuadsa toquejenajaridenipa pina pohua assiressa quinajari. Ohua naqui pohuadsa toquejenajarideni acco ocamabaqquidsapa ocasserani ohujaropaji. Nema onajaropi ohua ocasserani ohujaro, aja Jeso ocasserani ahujar-icca tadsajani tassaqquidsapi pohuadsa ojariqquimanajarideni denima tobicamand-sanapohuitohui.

<sup>25</sup> Aja Dio ohua cadossejaripa aji Jesocristodsa tijariqquimanajarocca ima toccanissa tanijine cacahuade ojararopaji. Najaroa aji Dio Atti nemanehi onapajiranissa tadsa tiadeni mari ocanabaqquijaropaji.

<sup>26</sup> Najaro imapi tahide icca ididenidsama Djojine aniporaha pohuadenidsapi ahuatora taccade. Naraha jidapapi Dio pocca madija bicaqquri najaridenidsa ahuatora inanajaropaji.

<sup>27</sup> Dio Pohua tohuini nadsa pohuadenidsa ahuatora inanajaropi jodio quejena-jarajarideni naco pocca daniji bicani cajimanahitohui. Najaro imapi najoraporaha Djojine ahuatora tejeraccade. Aji Diocca ima bicani Pohua Bedi Jesocristo tibodidenidsa tojaridsajaripaja. Najarijina nidsa tinahatonimanadsapi bica tanidsa timadimananitohui. Diocca deni tojehe naqui tiadenidsa tojanitohui.

<sup>28</sup> Ajijaro ima Jesocristo tahimaripi iana eccoraridsajaro. Dio iadsa tohuattehe inanadsa madija huapima bodideni acco acco ihicamabaqqui najari. Dio ia tonahatabaqquidsapa naqui mari mari ihicanaridsabaqqui najari. Nadsapa nidsa aja mari icanabaqquijarideni huapimapa memehuaji Dio Pohua bacohuaji domo huadsapa aja Jesocristojine imarideni pajiranissa tani Dio qqui inabaqquihitohui.

<sup>29</sup> Najarotohui odsepe ijijaro. Ohuadsa najo taraha dissera onajaro. Cristo pocca dacorehema ohua tonadacoradsapi odsepe ijidsanapojaro.

## 2

<sup>1</sup> Nahatoqquri tiquinanijine tiadenidsa dsodo onajaro. Aji tiadenidsa Diocca ima bicani tojanijine odsepe ijjaropi ohuadsa najo taraha nema nehe dissera onajaro. Titohuideni, aji odsa panani Laodiseahuaji madimanajaridenitohui naqui, aja madija huapima ohua qqui toquina-jaraccajaridenitohui naqui dissera onajaro.

<sup>2</sup> Dio tibodideni tonahatidsebaqquihijine, pocca tohuati huanehema tibodideni ojariqquinissa tanijine naqui tohuini onajaro. Diocca ima bicani ahuatora taporaha jidapapi ahuatora tajaro timittamananissa tanijine naqui dissera onajaro. Najaro ima bicani Cristona paja. Puhuadsa tinoccodeni tojidsera-dsanapodsapi pohuadsa pajissa tiquinanissa tanijine titohuideni Diodsa huatide dissera onajaro.

<sup>3</sup> Cristodsapi tohuattehe huapima anijaro. Nahatohue onihi onihi naqui pohuadsa anijaro. Aji tohuattehe bicani, nahatohue onihi onihi naqui pina todsepetaji huatini

ccara tanicassa nani, ihinanajaro. Imittanijine bica tani. <sup>4</sup> Tiadenidsa nema onajaropi madija ohuahadeni tiadeni tocamaidsaabaqqui-manarana. Attideni bica tadsa huati huati toquinara maidsamanajari. <sup>5</sup> Ohuapi tiadenidsa omadi-jeraraha obodidsa jidseraqqiri tiquinadsapi pina tiadenidsa omadijarossa najaro. Najaro aji timadimananissa tanicca ima omittadsapi ohuatidsejaro. Aji Jesocristodsa jehe tidsanapomanani dacorani omittadsa naqui ohuatidsejarode.

### *Cristopa iadsa camittehe dsati da inajaro*

<sup>6</sup> Ia Medsede Jesocristo tahimari timittamanapodsapi pohnadsa jehe tiquinajarode. Nema tiquinadsapi pohnadsara timadimananissa dsanapoji. <sup>7</sup> Pohnadsa tidisseramanani dsanapona. Pina ahua jabo nami bodihuaji toccabaqquidsapa assire huahi dacorajarissa tiquinaji. Jesodsa tijabodeni denima napidsanapona. Ajijaro marinaja pajissacca tiadeni mari tocanabaqqui-manajarissa tinanamanaji, ticcadeni jeheniji dacoranijine. Huajijiradsa Diodsa naqui: —Jehe, epejeni. Tijine bica tani -titiquina naji.

<sup>8</sup> Paji, madija ima ponimacca huati toquinahi caji tahi. Pohnadenipa poccadeni imadsa jehe tiquinanijine titohuideni quinahi. Naraha attidenidsa jehe tiquinejeraji, onajaro. Poccadeni imapi pina pajissassa naraha maidsehe. Poccadeni ima huapimapi pina Jesocristo tahimari icassiejeranijineccassa nejerani. Poccadeni imapi pina ididenicca ima ponimacca huarijonajarossa najaro. Pohnadenipa ajijaro namicca dacorehe cajimanadsa: —Ajima tinamanadsapi ima bicani bacco tiquinanitohui -quiquinanaraha maidsamanajari.

<sup>9</sup> Cristopa madijassa naraha Diocca huapima pohnadsa anijaro. Diocca dacorehe, nahatohue, deni tojehe, biquehe huapima cajijari. <sup>10</sup> Nama nadsapa Cristona huapimadsa deni tojajari. Aja tocorime taminedeni dacorehe cajimanaraha Cristona najaridenidsa deni tojajari. Nadsama tiadeni Cristocca tiquejenajaropi pohnadsa tipajiramananissa tani. Pohna cajijari huapima naqui ticcadeni. <sup>11</sup> Cristocca tiquejenadsapi pohnajine ticcadeni imasiri jeo tehe jicajaro. Najaropi pina huissinajacca imassa najaro. Jodiodenipa Diocca madija toquejenahijine huissinaja cacajimana najari. Najaropi assiredenidsara ahuato tajaro naraha tiadenipi tibodidenina Cristojine tohuirejarona paji. <sup>12</sup> Nadsama totopa ticajimanajaropi pina Cristo tedseje ppa tidsamanajarossa najaro. Dio pocca dacorehedsa Cristo inahatonijaridsa pajissa tiquinadsapi Cristo pohna tedseje tinahatonimanajarossa tiquinajaro. <sup>13</sup> Tahide tibodidenicca imasirima timadimanapodsapi pina tecotajarossa naccade. Diocca madija tiquejena-jeraccade. Naraha jidapapi Djojine pina Cristo tedseje tinahatonimanajarossa tiquinadsapi camittehe dsati ticajimanajaropaji. Cristojine Dio icca imasiridsa: —Epeje, ohuati ajimani -najari. <sup>14</sup> Aji tahide Diocca dossenijidsa iboqqiri inajaropi pina Diodsa cuenta icajijarossa, pina Dio debe inajarissa najaro. Icca ibohue manaconipi Dio ia tonajidso-baqquihitohuiraha aja Jesocristo ahua porimacossanidsa coba idsanamanadsapa Djojine icca ibohue manaconi inajicajaro. Pina ahua porimacossanidsa coba idsanajarossa najaropaji. <sup>15</sup> Cristo ahua porimacossanidsa dsoqquedsapa Djojine tocorime taminedenicca dacorehe, poccadeni deni tojehe huapima inassamoridsajaropaji. Dio Pohnajine najarideni ajamani toquejenahi huapimadsa ahuato inanajaro. Pina jadsiredsa ajamani toquejenajarideni todsepe toquejenajarissa quinajari.

### *Ajijaro namidsa madimanajaridenicca marinaja tohuini tiquinejeraji*

<sup>16</sup> Jesocristo deni tojajaridsa tiquejenajaro. Nadsapa madija marinaja tahidecca ecahuamanajarodeni tiadenidsa atti atti quinadsa: —Poni, imitta-jerana -tiquinaji. Aji tijipamananiccadsa, dse tiquinaniccadsa atti atti quinadsa timittamana-jeraji.

Poccadeni marinaja tecahuamana-jeradsa pina poccadeni ejete jipaqqiecca, abad-sico dsaticca, jassinajacca huada najarodsa tiadenidsa atti atti quinaraha pohuadeni attideni timittamana-jeraji. <sup>17</sup> Nadsama najaro poccadeni marinaja maittaccadsama jodiodenidsa tojapojaropi corimani. Pina madija ccajonadsa majijine corime qqui inapodsapi dsotodena assire ccajonahi nahato inajarossa najaro. Najaro marinajapi jodiodenidsa Dio huati tadsa Jesocristotohui najoramanajari. Nidsa dsotodena Jesocristo pajissa assire ccajonajari. <sup>18</sup> Madija ohuahadeni naco tiadenidsa attidenipa: —Ssamoqquiri tiquinani. Jesojine ticassiejera-jeranitohui. Icca imana bica tani —quiquinanaraha: —Poni, imitta-jerana —tiquinaji. Paji, Diocca daniji bicani ticajimana-jerarana. Madija nama quinaridenipa mamaidsadedeni. Pohuadenipa pohuadeni ajamani tonanamanaraha dsotodepa: —Nahatoqquiri inani —quinaraji. Poccadeni ima onihi naqui Diocca dodosse tabaqquidenidsa huahuatidsemana najari. Poccadeni ima onihi naqui caji tani. —Ibodi huatodsa inoccodsa qqui ina tahi, pina icca huadadsa qqui inajarissa naha qqui ina tahi. Najarodsa tohuattehe onihi onihi iatta tani —quiquinanajari. Naraha aja pohuadenipa madijacca marinajadsara bodideni huatomanajarijine attideni: —Iapi deni iquejenani —quiquinanaraha pohuadeni attipi pajissa jerani. <sup>19</sup> Pohuadenipa Cristodsa quejena-jarahi. Naraha iana Cristodsa ijariqquidsapi pohuapa pina itatissa najari. Pohuana ijariqquinicca ia Dossede. Iapi pohua assiressa inajaro. Nadsama essirepi itone, essicone najaro tassaqquidsapi essire dacorajaro. Ojari nehe tojajaro. Jijipajine nanapi najaro. Najarossa najaro Cristo pohuadsa itassaqquidsapi daco ijirajaro. Cristo pohua attima, pocca dacorehema ihinapi najaro. Nema inanipi Dio Pohua jipa tajarissa inanajaro.

<sup>20</sup> Nadsama aji Cristocca tiquejenajaropi Cristo dsoqquedsapa tiadeni naqui pina Cristo pohua dsoqquejarissa tiquinajaropaji. Jidapapi ajijaro namicca tiquejena-jerani. Nadsapi ajijaro namidsa dacorehe cajimanajaridenicca marinajapi tiadenidsa nohuerajaropaji. Naraha ¿nejecotohui ticcadeni ima pina ajijaro namidsa madi-manajaridenicca marinaja tecahuamanajarossa najaro? Najaropi tinebomanaji.

<sup>21</sup> Ajijaro namidsa madimanajaridenicca marinaja onihi onihi najaropi pina: —Ajajari banipa oppina tahi, paji, dama tiquinejeraji —quiquinanajari. —Ajajari dsamatapa naco oppina tahi, paji, tijipamana tejeraji —quiquinanajari. —Oppina tahicca tidsepe tajodsa naco oppina tahi. Paji, ticcadeni ima tossamorana —quiquinanajari. <sup>22</sup> Naraha oppina tahi quiquinanajaricca pina bani, pina dsamatapa, nama nahicca huapimapa jicaca tahi. Najaro marinajapi madijacca marinaja.

<sup>23</sup> Poccadeni marinaja imittadsapi: —Jehe, nahatoqquiri najari —ina tani. Aja attidenipa: —Ajijaro marinaja ecahuadsapi icca ima Diodsa pajiranissa tanijine —quiquinanajari. Pohuadenipa pohuadeni ajamani tonanamanadsa: —Iapi dacorehe icappirani. Ssamoqquiri inani —quiquinanajari. Pohuadeni pohuadenijine pohuadeni assire ocasserani ahujaro. Pina pohuadeni nepemimanajari, pohuadeni ime nabiqueramanajari. Naraha najaro poccadeni marinajapi ibodi tobicanijine pajira-jerani. Tabaccora tanicca tohuini inajarocca inajicanijine pajira-jerani.

### 3

#### *Memehuajicca ima tohuira tiquinaji*

<sup>1</sup> Aji tiadenipi Cristodsa jehe tiquinapodsama ticcadeni imabote tinebomanadsapi pina Cristo dsoqquedsa nahatonijarissa tiquinajaropaji. Cristo pohua tedseje tina-hatonimanadsapi memehuaji aji Cristocca ima tohuira tiquinaji. Nahi memehuajipa Cristo Imehi Dio inori nahatonihuaaji huittarijari, Pohua tedseje dodossesse najari.

<sup>2</sup> Nani memehuajicca ima tohuira tibodideni huatomanehe timadimanaji. Aji namicca ima tohuipi tetideni huatomana-jeraji. <sup>3</sup> Tiadenipi pina aja Cristo pohua huatiajarissa tiquinajaro, ajijaro namicca denima tohuini tiquinejeranijine. Ticcadeni

camittehe dsatipi Cristodsa anijaro. Diona tiadenidsa ecahuajaro. <sup>4</sup> Ticcadeni camittehe dsati jinedepa Cristo pohuana paja. Nidsa pohua ccanipomadsapa pohua dsibehinema, pocca deni tojehema ccanihitohui. Tiadeni naqui pohuadsa jidsera tanimanapomanitohui. Nadsapi pocca deni tojehe tiadenidsa tojajaropi ahuato tanitohui.

*ICCA MADIE JADANICCA IMA, ICCA MADIE DSATICCA IMA*

<sup>5</sup> Ajijaro namicca ima aji tohuini tiquinanicca tiadenidsa aniraha tinajicamanaji. Maqquidejedeni, jidapapi amoneje onihi aja ajapi tinebomanaji. Aja dsabisso tabiradeni naco dsohuato ticaji-jerajaro aja ajapi tinebomanaji. Amoneje tiadeni naqui maqqui ticajimanaraha maqquideje ohuaha naja najapi tinebomanaji. Huananehe denima oppina tanicca naqui tinebomanaji. Aji tiadeni tohuini tiquinanicca tohui tiadeni dosse dosse nejeranijine tinebomanaji. Aji ima tabaccora tajaro tohuini tibodideni huahuatoma najaro naqui tinebomanaji. Madija dsepetaji qqui tiquinadsa naqui tohuini tiquinejeraji. Madijacca tarabaiadsa bica tanicca acconi naqui tedimana tejeraji. Nadsama aji dsiniro, todsepetaji huemani ticajimanadsa tetidsemanajaropi pina madija Dio pajissaccadsa huatidsemana-jaradsa pohuadeni cacahuade pohuamaccadsa huahuatidsemana najarissa tiquinarana. <sup>6</sup> Ajijaro namicca ima nema najarojinena Diocca huadie bacco nanitohui. Nidsa Dio Attidsa iboqquri najaridenidsana najidsohue oppina tanicca ssonarinitohui. <sup>7</sup> Tiadeni naqui Jesodsa jehe tiquinejeraccadsapi ajijaro namicca imadsa timadimanaccade. Ticcadeni madie jadani pina Dio Attidsa iboqquri najaridenicca madiessa tinanamanaccade. <sup>8</sup> Naraha jidapapi ima tabaccora tajaro huapima tinebomanaji. Huadie tinebomanaji. Madija tinajidsobaqquimana tajarajo. Madijadsa ima tinanamananijine naqui huatimana tiquinejeraji. Madija tamasso tamasso naqui tinebomanaji. Ima bica tejeranicca jidsehe naqui tinebomanaji. <sup>9</sup> Madija ohuaha tedseje maidsa maidsa ticanaridsera tejeraji. Nani aji ticcadeni madie jadani tinebomanadsapi pina aji eterobote coro tiquinajarossa najaropaji. Jicajaro. <sup>10</sup> Aji tiadenidsa madie dsati tojajaropi pina etero dsati tedsamanajarossa najaropaji. Nadsama aji tinahatomani-manadsapi Jesocristocca camittehe, pocca dacorehe tiadenidsa tojadsanapojaropaji. Najarojinea aji tiadeni Nahatode Diodsa ticahattera ticahattera dsanapodsapi aja tiadenidsa tojidsera-dsanapojaripaja, Dio Pohuassa tiquinanijine.

<sup>11</sup> Jidapapi Jesocristocca madiedsa tiquejenajaro, tibodideni dsati tojadsapi aja madija ohuaha ohuaha inaridsaraha Jesocristodsa ijariqquinissa tajaropaji. Jehe, aji tijariqquijaro motapa jodio quejena-jarajari, motapa jodiideni Cristodsa toquejenajari. Motapa huissinaja cajimanajari, motapa huissinaja cappiramanajari. Motapa dsama onihicca madija, motapa ssamoqquri najarideni. Motapa tarabaid-sajine medse toquejenajarideni, motapa medse toquejena-jarajarideni. Huapimapa Cristodsa toquejenaridsajaripaja. Pohuana ima huapimadsa deni tojajari. Pohuapa ia huapimadsa aniridsajari.

<sup>12</sup> Dio tiadeni tocattejidsabaqquijaripa pocca madija bicaqquri tiquinanijine. Diopa tiadenidsa huati huana tajari. Nema nadsapi tiadeni naqui madijadsa tetideni huanacqquri nadsa acco acco titicamabaqquimana najo. Bicaqquri tiquinadsa ima bicanira titinanamana naji. —Ohuana deni ojan —tiquinejeraji. Joneqquri tiquinadsa madijadsa catidseqquri tiquinaji. Tidsepedeni ijjarocca najo tadsa naqui nebomana tejeraji. Madija mari ticanamanadsa naco tohuatta-jaradsapa tedimana-jeradsa mohuaradsa mari ticanamanapomana, onajaro. <sup>13</sup> Madijajine tiadenidsa bica tejeranicca inanamanadsapi mohuaradsa tinahanamanaji. Tedimana-jeradsa: —Tijinedeni ohuadsa bica tejeraraha epeje ohuati ajimani —titiquina naji. Pohuadenidsa tijinedeni bica tejeradsa naqui nama quinadsana bica tani. Pina ia Medsede ticcadeni imasiridsa: —Epeje, ohuati ajimani —najarissa tiquinaji, onajaro.



<sup>14</sup> Tohuati huanehema timadimanaji. Ima bicani huapi taraha tohuati huanehena deni tojajaro. Eti cahanerara canadsana Cristodsa ijariqquinissa tajaro. <sup>15</sup> Cristocca jonehe tibodidenidsa deni tojana. Najaro jonehema timecotedeni tedseje timadiridsa-manaji. Nema tiquinanijine Dio titohuideni huahua najari, pina Jesocristo pohua assire ojarijarissa tiquinanijine. Nema nadsapi Dio Pohnadsa naqui: —Jehe, tijine iadsa bica tani –titiquina naji.

<sup>16</sup> Jesocristocca marinaja bicabote tibodidenidsa madi-dsanapona. Aji tiadeni huapima Diocca tohuattema titeddeni tedseje ahuaji mari, ahuaji mari titican-abagguimana najo. Diocca tohuattema naqui titeddeni tedseje ahuaji nahatidse, ahuaji nahatidse titiquina naji. Diodsa tetidsemanadsa naqui jiri jiri titiquina naji. Aji Dabicca jijiricca jiri jiri titiquina naji. Aji Dio Atti dsodo nanicca jijiri tojanidsa naqui jiri jiri titiquina naji. Dio Corimejine jijiri ticanahatomanadsa naqui jiri jiri titiquina naji. Jiri jiri titiquina nadsa naqui tibodideni: —Jehe Abi Dio, epejeni. Ticca daniji iadsa bica tani –titiquina naji. <sup>17</sup> Nadsama aji Jesocristodsa tiquejenajaro huati huati tiquinadsa naqui ima tibodideni tinajoramanadsapi: —Ohuapi Jesocristocca ojani, ima bicanidsara huati huati onana –titiquina naji. Tidsepedeni ijimanadsa naqui pina ia Medsede Jesodsa tidsepedeni ijiridsamanajarossa tiquinana. Ticcadeni madie naqui ia Medsede Jeso onima timadiridsa-manaji. Tidsepedeni ijimanadsa, huati huati tiquinadsa naqui Jesocristo pohua onima Abi Diodsa: —Jehe, epejeni. Tijine iadsa bica tani –titiquina naji.

*Jesocristodsa tiquejenajaropi ticcadeni madijadenidsa ajima tiquinadsana bica tajaro*

<sup>18</sup> Amoneje maqquideje ticajimanajarodeni, ticcadeni maqqui attidsa iboraqquri tiquinaji. Nani aji Jesocristodsa tiquejenanicca ima tijinedeni ahuato tanijine. <sup>19</sup> Maqquideje amoneje ticajimanajarodeni, tiadeni naqui ticcadeni amonejedsa tetideni huanagguiri naji. Ticcadeni amonejedsa tettideni ocassera tejeraji. Johua ticanamana tejeraji, onajaro.

<sup>20</sup> Ejedenideni, tiadeni naqui ticcadeni abi, ami attidenidsa iboraqquri tiquinaji. Nahi ia Medsede huatidsehijine. <sup>21</sup> Nadsama abi, ami tiadeni naqui ticcadeni ejedeni tijinedeni huadimana-jarana. Tijinedeni huadimanadsapa tettidenidsa paja tohuibomanarihi narana.

<sup>22</sup> Tarabidsajine medse tiquejenajaro, tiadeni naqui tiadeni dossede ajijaro namidsa madijari attidsa iboraqquri tiquinaji. Tarabidsa najo tanicca tiadeni tocadossebaqquidsna naqui pohua attidsa iboraqquri tiquinaji. Tiadeni dossede qqui tadsa, qqui tajaradsa naco tidsepedeni ijimananissa taji. Pohnadeni atti: —Jehe, tijine bica tani –quinahijine tohuini tiquinani ojari-jerana. Dio noppine naqui ticappinamanadsa tibodideni maidsera tadsa tidsepedeni ihijimana naji. <sup>23</sup> Tidsepedeni ijiridsamanadsa naqui madijadsa tidsepedeni ijiraha pina ia Medsededsa tidsepedeni ijimanajarossa najaro. Nadsapi tettideni ajima tiquinaji: —Cristodsa jehe onadsapi ojine bica tana, onajaro –titiquina naji. Tidsepedeni ijimananissa tadsapi ia Medsede tinahatidsemanahijine. <sup>24</sup> Ia Medsede Cristopa tiadeni Dossede pajissa deni tojahicca. Pohnadsa tidsepedeni ijimanajaro manaconi tiadenidsa tojanijine nahatoqquri tiquinani. Najaroa aji nidsa memehuaji bacco tiquinadsapi Diocca daniji bicani huati tapojaricca tiadenidsa da inaridsanitohui. <sup>25</sup> Naraha tabaccorehe inanamanajarodenipa poccadeni tabaccorehe manaconi pohnadenidsa tojanitohui. Ojariadsa itide, pamahadsa itide huati tohuanahi najarahitohui. Pocca najidsohue huapimadsa pajiranissa tanitohui.

## 4

<sup>1</sup> Nadsama dodossededeni, tiadeni naqui ticcadeni dodosse tabaqquidenicca tarabaidsa manaconi pohuadenidsa da tiquinanissa taji. Aja pohuadeni tarabaidsa quinahijine oppina tanicca, ssamo tanicca naqui dossemana tiquinejeraji. Tetideni ajimamana tejeraji: Tiadeni naqui tiadeni Dossedepa memehuaaji madihi. Nidsa dsotode najari pohuadsa tecomeramananitohui.

<sup>2</sup> Nadsama tiadeni huapimapi Diodsa huatide disseraqquri tiquinaji. Huatide tiquejenadsa naqui ima onihitohui tibodideni huatomana tejeraji. Dio Pohuadsa naqui: —Jehe, epejeni. Ticca daniji iadsa bica tani –titiquina naji. <sup>3</sup> Itohui naqui Diodsa huati huati tiquinaji, nahi Pohuajine madija bodideni najoramanapodsapa: —Jari, iadsa Jesocristo tahimari tecomeramanaji –quinahijine. Nani Jesocristo tahimari icassiejeranijinecca mari icanabaqquihijine, inajaro. Najaro ima tahide ahuatora taporaha jidapana iadsa tohuatojaro. Najaro ima ohuacomerajarojine toponi cocorodsa ohuedsajaropaji. <sup>4</sup> Dio Atti ecomeradsa madija mittamanahissa tahijinena bica tajaro. Nadsama Jesocristo tahimari ohuacomeradsa ojine ahuato tanijine naqui Diodsa huati huati titiquina naji.

<sup>5</sup> Diodsa jehe quina-jarajarideni tedseje bacco ticaniredsapi tibodideni huatonissa tadsa pohuadenidsa bicaqquri tiquinaji. Pohuadenidsa Dio Atti huati tiquinajine tinajomana tejeraji. —Jidapana pohuadenidsa Jeso tahimari huati onana –tiquinaji. <sup>6</sup> Aja Diodsa jehe quina-jarajarideni tedseje imahaha ticanadsa naqui tettideni bica tadsa pohuadenidsa huati huati titiquina naji, nahi Jesocristo tahimari tohui quinahijine. Tiadenidsa: —¿Jesocristocca imapi nejecoma najarona paji? –quinadsa naqui tibodideni najoradsa tettideni bica tadsa pohuadenidsa tetecomeramana naji.

### *Pablo pohua tessedeni nija naridsamanajari*

<sup>7</sup> Imecote Tiquico pohuadsa eti huana tajaro. Najarina tiadenihuaji dosse onadsa otahimari tiadenidsa huati tahitohui. Pohuapa obiji accode bica tade. Pohua tedseje ia Medsededsa idsepe ijijarode. <sup>8</sup> Pohuapa tiadenihuaji dosse onajari, itahimari tiadenidsa huati tahijine. Pohua naco tiadeni tonahatidsebaqquihitohui. <sup>9</sup> Imecote bica tajari Onesimo naco Tiquico tedseje tiadenihuaji tohuedahitohui. Onesimopa Jesocristodsa dissera tajari. Pohuapa titiqueriqquimana nahihuaajicca madija. Aji imadinihuajicca ima nemanehi tiadenidsa huati toquinahitohui.

<sup>10</sup> Nadsama aja otesse Aristacopa tiadenidsa nija nahi. Pohuapa ohua tedseje toponi cocorodsa ibedsajaro. Bernabecca madija Maraco naco tiadenidsa nija nahi. Aji Maraco tahimari timittamanapojaropi nidsa tiadenihuaji toccadsapa tinamadi-manahissa tana. <sup>11</sup> Aja otesse Jeso, oni ohuahapa Justo, najari naco tiadenidsa nija nahi. Najaridenipa jiodideni Jesocristodsa toquejenajari. Pohuadenipa ohuadsama Diocca cacahuehe tahimarini tojaridsanijine idsepe ijiridsajarode. Pohuadenipa obodi oji naraha ohuati inassonamanajarode. Naraha aja jodio Jesocristodsa toquejenajarideni motapa ohua tedseje dsepedeni ijimana-jarade.

<sup>12</sup> Otesse Epafra naco tiadenidsa nija nahi. Pohuapa Jesocristodsa ibora tadsapa pocca dossenijidsa dsepe ijijari. Aja Epafra nahi Jesocristodsa titiqueriqquimana nahihuaajicca ahuaaji ccajonajari. Titohuideni Diodsa huatide dissera tajari. Ticcadeni jeheniji Jesocristodsa pajiranissa tanijine nadsa Diodsa huati huati dsadsanapo najari. Jesocristodsa jehe tiquinani todacorani nanijine naco Diodsa huati huati dsadsanapo najari. Dio Pohua jipa tahiccadsa, pocca dossenijidsa iboraqquri tiquinajine naco Diodsa huati huati dsadsanapo najari. <sup>13</sup> Ohuapi Epafra ima nahato onadsa tiadenidsa huati onajaro. Pohuapa titohuideni bodi huatohua madijari. Aja odsa panani Laodiseahuaajicca Jesocristodsa toquejenajarideni tohui, aja odsa panani Hieraporihuaajicca tohuideni naco bodi huatohua madijari. <sup>14</sup> Roca naco tiadenidsa

nija nahi. Puhuapa icca jemedsi cacahuadeja najari, pohuadsa eti huanaqquri najaro. Dema naco tiadenidsa nija nahi.

<sup>15</sup> Nadsama ohuatti naqui aja imecotedeni Laodiseahuajicca Jesocristodsa toqueje-najaridenidsa naqui nija onajaro. Nipadsa naqui nija onajaro. Nipacca odsahuaji Jesocristodsa quequeriqquimana najaridenidsa naco nija onajaro. <sup>16</sup> Ajjaro occa ima teppe hua tiquinehe jicadsapi aja Laodiseahuaji Jesocristodsa quequeriqquimana najaridenidsa da tiqquima-manana, onajaro. Aji occa ima teppe onihí Laodiseahuaji dosse onapojaro naqui nanidsa hua quinehe jicadsapi aji timadimanani Corosahuaji bacco tadsapi hua tiquinana, onajaro. <sup>17</sup> Nadsama imecote Ariquipodsa naqui huati tiquinana: —Ia Medsede Dio tia cadossedsapa najarossa tinanaji. Dissera tinaji -tiquinana, onajaro.

<sup>18</sup> Ohuapi Pablo ajjaro ima teppe jicaniccana ohua odsepedsa dsodo onajaro. Tiadenidsa nija onajaro. Jehe, tetideni ajima tejerana, ohuapi toponi cocoro todsimadsa ohuedsaccani. Ohuapi tiadenidsa ohuati huana tadsapi ohuattipi: Diocca biquehe tiadenidsa tojadsanapona, onajaro.

Epejeni, ohua onipi Pablo.

## **Pablotenipa Tesaronicadenidsa ima teppe tahidecca dosse quinajaro**

### **1 Tesalonicenses**

Tesaronicapi dsama Masedoniacca odsa panani deni tojanicca, bica tajaro. Nahihuaji Pablopa Jeso tahimari icassiejeranijinecca maride toccajari. Tesaronicadenipa tahide Jesodsa ssamoqquiri napojari. Naraha dsotodena madija mota huapi taha Jesodsa jehe quinajari. Pablo huatimadedeni Silvano Timoteo tedseje maride toquejenajari. Maride toquejenahicca semana 3 nadsapa pohuadenidsa huadiqquiri najaridenijine mohuaniji ssonarijaro. Nadsapa Pablo Silvano tedseje damama quinahitohuiraha odsa panani Bereahuaji dsome dsaja tajari. Najari tahimaridenipa Rocana dsodo inajaro, Jesocca dodosse tabaqqui tahimarideni capítulo 17'dsa.

Dsotodena Tesaronicahuajicca Jesodsa jehe quinajari tahimarideni Pabloteni mittamanadsa pohuadenidsa ajijaro ima teppe dosse quinajaro. Tesaronicadenipa nanajidso toquejenaraha Jeso inebomana-jarajari. Poccadeni jeheniji dacorajaro. Nadsapa bodideni acco icamabaqqui-manahijine dsodo quinajaro. Diodsa madi-manahissa tahijine tocahatterahijine dsodo quinajaro.

Dsotode Pablotenipa Tesaronicahuaji madimanajaridenidsa ima teppe onihi dsodo quinapomajaro.

#### *Pablotenipa nija quinajari*

<sup>1</sup> ¿Nija imecotedeni? Ohua Pablo, Silvano, Timoteo inadsa tiadenidsa dsodo inajaro. Nani odsa panani Tesaronicacca Jesocristodsa jehe tiquinajaro titiqueriqquini najaro icca Abi Diodsa, ia Medsede Jesocristo pohuadeni pamahadsa tijariqquimanajarodenidsa icca ima dsodo inajaro. Abi Dio tiadenidsa ima bicani inanadsanapona, pocca jonehe naqui tiadenidsa inanadsanapona, inajaro.

#### *Tesaronicacca Jesocristodsa jehe quinajari tahimarideni tojaridsajaro*

<sup>2</sup> Diodsa huati inadsapi: —Jehe Abi Dio, epejeni. Tijine imecotedeni Tesaronicacca bicaqquiri nahi -ihinanajaro. Titohuideni ibodi huatoma-dsanapodsapi Diodsa huati huati ihidsanapo najaro. <sup>3</sup> Jehe, Diodsa huatide iquejenadsapi ticcadeni ima bicani eti ajima-jerajaro. Ticcadeni jeheniji dacorajaroa tidsepedeni ihijimana najaropaji. Diocca dossehedsa tidsepedeni ijimanadsa naqui tohuati huanehema tidsepedeni ihijiridsamana najaropaji. Ia Medsede Jesocristocca tossiejehetohui timadimanadsapi tiadenidsa ocasserani ssonariraha tinahanamananijine dacoraqquiri tiquinajaro. <sup>4</sup> Imecotedeni, Diopa tiadenidsa huati huana tadsa pocca cacatidse tabaqqui tiquejenajaro. Dio tiadeni tocattejidsabaqquijaricca ima nahatoto inajaro. <sup>5</sup> Nadsama aji ia naqui Jesocristo tahimari icassiejeranijinecca tiadeni mari mari ihicanabaqqui nade. Etti poni motta ojari-jerani. Dio Corimecca dacorehema mari mari ihinanajaro. Pohuajine Dio Atti tiadenidsa tojajaro. Jesocristo tahimaripi pajissa inadsa huati huati inajaro. Tiadenidsa imadidsa naqui icca madie qqui tiquinade. Iapi deni iquejenanijine idsepe ijijerade. Dio Atti tiadenidsa tojanijinena idsepe ijijarode.

<sup>6</sup> Tiadenipi pina aji icca madiacca imassa, pina aja ia Medsede tahimari timitamanajaro pocca madiacca imassa tinamanajaropaji. Najaroa aji Dio Atti timittamanadsa jehe tiquinadsapi Dio Corimejine tetidsemanajaropaji. Aji ocasserani teridsamanaraha Dio Corimejine Dio Attidsara tetetidsemana najaropaji. <sup>7</sup> Nema tiquinadsapi titahimarideni tojaridsajaro. Aja Jesocristodsa jehe quinajarideni ticcadeni dsama arobeni Masedoniadsa madimanajarideni, dsama arobeni Acaiahuaji madimanajarideni naco titahimarideni mittaridsamanajari. Nadsapa ticcadeni

imajine pohuadeni bodi todacorani nadsa attidenipa: —Ia naqui pina Tesaronicacca imecotedenissa inana -quinajaripaja. <sup>8</sup> Tijinedeni Jesocristocca marinaja Masedoniahuaji mittamana, Acaiahuaji mittamana najaripaja. Naraha nahidsaha mittamanahi ojari najarahi. Dsama huapimacca naco mittaridsamanahi. Aji Diodsa jehe tiquinanissa tajarocca imapi dsama huapima nahatoqquiri naridsahi. Nadsama aji dsama onihi onihi naridsanihuaji Dio Atti maride jaijaridsadsapi ticcadeni jeheniji tahimarini nahatoqquiri napojarijine huati inejerani pohuadenidsa. <sup>9</sup> Icca ima aji tiadenidsa bacco inaponicca ecomera-ridsanijineraha pohuadenina iadsa huati huati toquinade: —Aja Tesaronicahuaji Dio Atti mari ticanabaqquipodsa naco tiadenidsa bicaqquiri nade -quinajari. Aji ticcadeni siba nahatonidsa epeje tiquinanissa tajarocca ima naqui iadsa huati toquinade: —Poccadeni siba nahatonidsa: “Ia cacahuade” quiquinanaporaha jidapapa Dio pajissa camitta tajaridsana: “Ia Cacahuade” quinajari. Manaco najaridsana iboraqquiri najari -quinahi naqui imittade. <sup>10</sup> Dio Bedi memehuaaji ccaronapomahitohui tinajoramanajaro naqui iadsa huati toquinadsa imittade. Najaripa Jeso dsoqqueraha Imehi Djojine nahatonijari. Nidsa Diocca najidsohue oppina tanicca bacco tadsapi Jeso pohuajinena dsori icaniredsa icassiejeranitohui, inajaro.

## 2

### *Pablotenipa Tesaronicacca madija maride dsepedeni ijimanajari*

<sup>1</sup> Imecotedeni, tiadenipi icca ima nahatoqquiri tiquinani: Tiadenidsa imadidsapi ponima imadi-gerade. <sup>2</sup> Tahide tidsamaridenihuaji bacco inejeraccadsapi odsa panani Piripocca madija Dio Atti mari icanabaqquidsapa nahihuaicca madija motapa ia totamasso-baqquimana, ia tonajidso-baqquimana nade. Nadsama najaro imapi nahatoqquiri tiquinani. Aja tiadenihuaji naco madija mota: —Dio Atti imitta-gerana -quinadsapa iadsa huadiqquiri nade. Naraha Djojine cappineraqquiri inadsa pocca ima bicani icassiejeranijinecca tiadeni mari icanabaqquijarode. <sup>3</sup> Najaro ima bicani tiadeni mari icanabaqquidsa naqui pajiranissa inanade. Tabaccorehe inananijine tiadenidsa huati ineje cama-gerade. Maidsehedsa naqui tiadenidsa maidsa maidsa inejerade. <sup>4</sup> Dio jipa tahiccana huati huati ihinanajarode. Dio ia tonocodsabaqquidsa iadsa: —Ticcadeni ima bica tani -nanaja nade. Icca ima Dio Pohuadsa bica tadsapi Dio Pohuana ia tocadossebaqquidsa Jesocristo tahimari icassiejeranijinecca mari mari ihicanabaqqui najari. Aja madija iadsa huatidsemanahijine inadsa dissessera inejerani. Dio iadsa huatidsehijinena dissessera inajaro. Pohuana ibodicca ima qquide nahato tajari. Imajida-gerani nahato tajari. <sup>5</sup> Tiadeni naqui icca ima nahatoqquiri tiquinani: Tiadenidsa imadidsapi dsinirotohui tiadenidsa etti bicaca tadsa huati huati inejerade. Ticcadeni dsinirotohui naqui tiadenidsa ihmajidsa nejerade. Pajissa najaro tohuini inejerani Dio nahato tajari. <sup>6</sup> Tettideni naqui iadsa: —Bicaqquiri tiquinani, deni tiquejenani -tiquinanijine tohuini inejerade. Madija ohuahadeni naco attideni nama quinahijine tohuini inejerade. <sup>7</sup> Naraha iapi Jesocristocca dodosse tabaqqi iquejenadsapi tiadeni dossede ipajiraraha nema inejerade. Tiadenidsa imadidsapi mohuaradsa tohuati huanehema tiadeni mari mari ihicanabaqqui najarode. Pina amoneje ponicca ejedeni inanapihijine ecahuajarissa inajarode. <sup>8</sup> Tiadenidsa eti huana tadsa Diocca ima bicani icassiejeranijinecca tiadenidsa ecomeranijine jipapa inajarode. Najaro jipapa inadsapi ia essire eccoradsa ijicanijine naqui bica tani, inade. Etti nema inajaropi tiadenidsa eti cahanari canajaro.

<sup>9</sup> Imecotedeni, tiadenipi idsepe ijiecca ima tetideni ajima-gerani. Imadinicca icajinijine idsepe ijide dissessera inadsapi ssiaja idsepe iji, dsome naqui idsepe iji najarode. Nema inadsa Diocca ima bicani icassiejeranijinecca tiadeni mari



icanabaqquidsapi tiadenidsa icca madie najo tejeranijine ticcadeni dsinirotohui, ticcadeni dsamatapatohui huati huati inejerade. <sup>10</sup> Jehe, tiadenidsa imadidsapi ia qqui tinabaqquimanade. Dio naco ia qqui tabaqquide. Diotohuira inadsapi ia ecahuanissa tadsa imadijarode. Ima icappirehe imadide. Jesocristocca tiquejenajarodenidsa ima tabaccora tanicca inana-jerajaro. Nohuerade. <sup>11-12</sup> Icca ima onihi naqui nahatoqquri tiquinani. Tiadeni ihinahatidsebaqqi najaropi pina aja madija pocca ejedeni bodideni acco icamabaqquijarissa inanajarode. Oji oji tiquinadsa naqui tetideni ihinassonabaqqi nade. Aja Dio titohuideni huahua najaripa pocca cacahuehehuaji tiquejenanijine, Pohua dsibehine, pocca deni tojehe qqui tiquinanissa tanijine. Pohujine tiadenidsa ima nema nadsapi tiadenidsa: —Diodsa timadimananissa taji -ihinanajaro.

<sup>13</sup> Ticcadeni ima Diodsa huati huati ihinanadsapi: —Jehe, epejeni. Tijine bica tani -ihinanajaro. Aji Diocca marinaja tiadeni mari icanabaqquijarodsapi: —Madija attia -tiquinejerade. —Ajijaro marinajapi pajissa Dio Attia. Iadsa tojana -tiquinade. Dio Atti pajissaccara tiadeni mari icanabaqquijarode. Pohnadsa pajissa tiquinadsapi Pohua Atti tibodidenidsa tojajarojinea aji tibicamana-dsanapojaropaji. <sup>14</sup> Naraha imecotedeni, Diodsa pajissa tiquinadsapi ticcadeni dsamacca madijaraha tiadeni nanajidso totonana-baqquimana najari. Najaro imapi pina aja dsama arobeni Jodeahuajicca imecotedenicca imassa najaro. Jodiodeni Jesodsa jiperaqquri najaridenipa poccadeni madija Diodsa quequeriqquimana nahicca, aja Jesocristodsa jehe quinajarideni nanajidso ihinanabaqquimana najaride. <sup>15</sup> Aja jodiodenipa Jeso inanadsoqqe-manadsa pina aja poccadeni madija maittaccadsama Dio Atti cacomeraqquri najarideni ihinanadsoqqe-ridsamana najarissa inanamanajari. Najaria aja jidapana iadsa naco mohua mohua quiquinanajaripaja. Diodsa naco bicaqquri najaraha. Madija huapimadsa naco jiperaqquri nahi. <sup>16</sup> Nadsapi Jesocristo tahimari icassiejeranijinecca jodio quejena-jarajarideni mari icanabaqquihijineraha aja jodiodeni Jesodsa jiperaqquri najaridenina iadsa mohua mohua quiquinanajaripaja. Najaridenipa jodio quejena-jarajarideni Jesocristocca imadsa tocassiejerahijine jiperaqquri najari. Nadsapi poccadeni imasiri denima tojadsanapojaropaji. Najaro poccadeni imasirijinena Diocca huadie pohnadenidsa tojanitohui. Nidsa najidsohue oppina taniccapi pohnadenidsa ssonarinitohui.

*Pabloa: —Tesaronicahuaji occanipomana -najari*

<sup>17</sup> Imecotedeni, tiadenihuaji imadiporaha dsotode odsa onihihuaji jaijadsapi tiadenidsa iajijini nanicca huada tohuapini. Tiadeni qqui inabaqqui-jeraraha titohuideni eti huahuatoma najaro. Tiadeni qqui inabaqquipomanijine tohuini inadsa: —Jaijanipomana -ihinanajaro. <sup>18</sup> Tiadenihuaji jaijapomanijine tohuini inadsa icca benehi inajora inajora najaro. Aji ohua Pablo naqui tiadeni qquide occaninijine onajora onajora najaro. Naraha Diocca huadi Satanajine icca benehicca ima tossamo tossamo neneje najarode. <sup>19</sup> Tiadeni qquide bacco inadsapi etidsenijine tohuini imadijaro. Tiadenina icca huatidsehe. Nidsa Jesocristo ccanipomadsa ticcadeni imajine pohua tedseje etidsenitohui. <sup>20</sup> Ticcadeni ima ecomeradsapi: —Poccadeni ima bica tani -ihinanajaro. Pajissa tijinedenina ehetidse najaro.

### 3

<sup>1-2</sup> Odsa panani Atenahuaji imadidsapi: —¿Nejecoma quinahi? Qqui inabaqquipoma-ccaraho -ihinanajaro. Najaro iadsa tocasserani nadsa ticcadeni ima nahatoto inanijine: —Jari, Timoteora dosse inanina, iapi Atenadsa imadiccana -inajarode. Aja Timoteopa Diocca dodosseja najari. Iadsama Jesocristo tahimari icassiejeranijinecca mari mari nanaridsa nahi. Najarina nahi tiadenihuaji dosse inanijari, tibodideni acco tocamabaqquidsapi ticcadeni jeheniji todacorani nanijine.

<sup>3</sup> Timoteo nama nadsapa ima tiadenidsa ssonaridsapi tijaparimana-jeranitohui. Tiadenipi nahatoqquri tiquinani: Jesocristocca tiquejenadsapi ocasserani temanani-tohui. <sup>4</sup> Nadsama najaro imapi tiadenidsa imadidsa huati inapode: —Jesocristodsa tiquejenajarojinepi tiadenidsa ima ocassera tanicca ssonarinitohui –inade. Jidapapi najaro ima tiadenidsa pajissa tojani nahatoqquri tiquinajaropaji. <sup>5</sup> Nema nadsapi ticcadeni ima nahato onaccaraho onadsapi tiadenihuaji Timoteo dosse onanjaripaja. ¿Jesocristodsa ticcadeni jeheniji dacoraqui? ohonanajaro. Aja Diocca huadi Satanapa tiadeni tonehedima-baqquihijine dissera tahi. Naraha obodi: ¿Satanacca maidsehedsa toquejenaco? onadsa ocappinajaro. Nema tiquinadsapi aji tiadeni mari icanabaqquijaro ponima tojapadseje, onajaro.

<sup>6</sup> Naraha Timoteo timadimanani Tesaronicahuaji toccanidsa ahuaji ccanidsapa ticcadeni ima bicani huati nanijari. Aji Jesocristodsa ticcadeni jeheniji dacoranicca ima, aji tetideni cahanerara cananicca ima, aji ticcadeni huatidsehema iadsa tetideni ajimamana nejerajarrocca ima naqui huati nanijari. Ia qquide naqui tohuini tiquinani, pina ia tiadeni qqui inabaqquinijine tohuini inajarossa tiquinajaro naqui iadsa huati nanijaride. <sup>7</sup> Imecotedeni, iapi ima najo taniccadsa imadi, ocassera taniccadsa imadi naraha aji Jesocristodsa jehe tiquinanissa dsanapojarrocca ima iadsa bacco nanidsapi ibodi tobicaridsajaro. <sup>8</sup> Jesocristodsa ticcadeni jeheniji todacorani dsanapodsapi ia naqui denima etidsedsa imadijaro. <sup>9</sup> Nadsama Dio Puhajine ticcadeni ima bicani tojadsapi huatidsehe imeni icajini. Puhadsa etidsedsa: —Jehe, bica tani –inaraha ¿nejecojaro tohuatti denima bica tanicca Puhadsa huati inanijine pajirani? Onihi nohuerani. <sup>10</sup> Tiadeni qqui inabaqquipomanijine inadsa Diodsa huati huati ihinanadsapi dsome, ssiaja huati huati inajaro: —Abi Dio ¿ettidsa jehe taqui? Puhadeni qquide tohuini inani. Jesocristocca marinaja denima tocahatterahijine maride jaijanipomana –ihinanajaro.

<sup>11</sup> Tiadeni qquide jaijanipomanijinepi icca Abi Dio, ia Medsede Jesocristo tedseje ia acco tocamabaqqui-manahijine jipapa inajaro. <sup>12</sup> Ia Medsede tibodidenidsa tohuati huanehe denima inanadsanaponijine, inajaro. Puhajinena denima tetideni cahanerara cananijine, inajaro. Madija ohuahadenidsa naqui tetideni huanacquiri nanijine, pina aji ia tiadenidsa eti huana tajarossa tiquinanijine jipapa inajaro. <sup>13</sup> Ia Medsedejine tibodideni todacorani nanijine, inajaro. Nadsapi nidsa ia Medsede Jesocristo puhadsa toquejenajaridenima ccanipomadsapa icca Abi Dio bacchohuaji idomo huadsa aji tibodideni huireqquri nadsa imasiri jirehe timadimana-jonajaropi ahuato tanijine, inajaro.

## 4

### *ICCA MADIE AJIMA NADSANA DIO HUATIDSEJARI*

<sup>1</sup> Imecotedeni, jidapapi ia Medsede Jeso onima tiadenidsa huati inanissa tanijine. Tiadeni mari icanabaqquipojarossa tinanamanani Dio qqui tadsapa tiadenidsa huatidsehitohui, ihinanade. Jidapana nema tinanamanadsapi nema tinanamana-dsanapoji, inajaro.

<sup>2</sup> Tiadeni mari icanabaqquijarojine icca marinaja nahatoqquri tiquinani. Iapi Jesocristo ia tocadossebaqquidsa tiadeni mari icanabaqquijarode. <sup>3</sup> Dio Puhua jipa tahiccapi ajima najarona paji: Tibodideni ssiaja, huire tadsa imasiri jirehe timadimananijine. Nema tinanamananijinepi huananehecca tinanamana tejeraji. <sup>4</sup> Diopa aja maqquideje amoneje cajijaripa pocca amonejera inajari-dsanaponijine jipa tajari. Nani ticcadeni amonejedsa tetideni huanacquiri nadsa ticcadeni amoneje tecahuamananissa tanijine. <sup>5</sup> Nema tiquinadsapi pina aja Diodsa ssamoqquri najaridenissa tiquinejeranijine. Puhadenipa Diodsa ssamoqquri nadsa puhama tohuini quinadsa huananehedsa caji caji cacana najari. <sup>6</sup> Timecote Jesocristodsa jehe

najaricca amoneje, amoneje onihi naqui tijamana tejeraji. Timecotecca amoneje tijadsapi pina timecotedsa nanajidso tajarossa najaro. Nadsa tiadenidsa huati inapode: —Paji, nema najaro imapi oppina tani -ihinanapode. Nema najaro ima tinanamanadsapi Dio tiadeni tonajidso-baqquihitohui. <sup>7</sup> Diopa imasiri inananijine itohui huahua najarahi. Imasiri inana-geranijinena itohui huahua najari. Diopa ibodi huire, ssiaja tanijinena itohui huahua nanaja najari. <sup>8</sup> Ajijaro marinaja madija ettajomanadsapi madija atti ettajomana-jarahi. Dio Attina ettajomanajaro. Pina Dio Pohua Corime iadsa da inajari huahuattajo inamanajarissa najaro.

<sup>9</sup> Nadsama timecote Jesocristodsa jehe quinajarideni tedseje tetideni cahanerara cananica imapi nahatoqquri tiquinani, Dio Puhana tiadeni mari tocanabaqquipodsa. Nema nadsapi najaro ima tiadenidsa dsodo onejerani. <sup>10</sup> Najaroa aji dsama arobeni Masedoniahuajicca timecotedeni huapimadsa tetideni huanagguiri najaropaji. Naraha iapi tiadenidsa huati inajaro: Ticcadeni tohuati huanehe denima tinanamanaji, inajaro. <sup>11</sup> Mohuaradsa timadimananissa tanijine tibodideni huatonissa taji, inajaro. Pina ticcadeni imadsara tibodideni huatomanaji. Madija ohuahacca imadsa tiquejemamana tejeraji, inajaro. Mohuaradsa tidsepedeni ijiridsamananissa taji, inajaro. <sup>12</sup> Nema tiquinadsapi madija ohuahadeni ticcadeni ima bicani qqui toquinadsapa: —Pohuadeni cacahuade nahatoqquri nahi -quiquinanahijine. Tidsepedeni ijimananissa tadsa naqui ticappiramana-geranijine, inajaro.

### *Ia Medsede ccanipomahi tahimari*

<sup>13</sup> Imecotedeni, ssamoqquri tiquinegeranijine ticcadeni madija dsodsoqquemana najaricca ima tiadenidsa dsodo inajaro. Aja madija Jesocristodsa ssamoqquri najaridenipa poccadeni madija dsoqquedsa oji oji quinadsapa: —¿Icca madija qqui imanijarapadsaja? -quiquinanajari. Naraha tiadenipi pina pohuadenissa tiquinegeranijine Jesocristocca madija dsodsoqquemana najaridenicca ima timittamanaji. <sup>14</sup> Aja Jeso dsoqqueraha nahatonijaridsa pajissa inadsapi nahatoto inajaro. Najaria aja Jesodsa pajissa quinajari dsoqquemanagerideni naco pina Jeso Dio inahatonijarissa quinahitohui.

<sup>15</sup> Ajijaropi ia Medsedecca marinaja tiadenidsa huati inajaro. Ia Medsede ccanipomadsa imadinipaji nadsapi iaha tahide ia Medsededsa bacco inapo-geranitohui. Aja imecote jicapojaridenina pohuadsa bacco bacco toquinapohuitohui. <sup>16</sup> Jehe, ia Medsede ccaronahijinepa tahide memehuai atti mohui taha huahua nahi imittanitohui. Diocca dodosse tabaqquidenicca tamine naco huahua nahi atti imittanitohui. Diocca jejeidsa jei jei nahi naco imittanitohui. Nadsana Jesocristo memehuai ccaronadsapa pohuadsa pajissa quinapojari jicapojarideni tahide nahatonimanahitohui. <sup>17</sup> Dsotodena aji ia camittaqquri inajaro jicapojarideni tedseje huapima ia tohuaccamacossani-baqquihitohui. Meme essenima jajamacossanitohui. Meme napicossanidsa ia Medsede tedseje bacco bacco icananitohui. Nadsapi ia Medsede Jesocristodsa imadi-dsanaponitohui. <sup>18</sup> Nadsama najaro imadsa timecotedeni tedseje ticatidserara canana, onajaro.

## 5

### *Jesocristo ccanihitohui ibodi huatohue imadina*

<sup>1</sup> Naraha imecotedeni, aja Jeso ccanihicca huada tahimarini tiadenidsa huati onapode. Nadsapi dsodo onejerani. <sup>2</sup> Aja ia Medsede Jeso ccanihicca huada bacco tanicca imapi nahatoqquri tiquinani. Najaropi ajima napode: Eti ajimama canaraha ccanihitohui. Pina dsome bobotide icca odsadsa botide qquedsimahicca ima ssamo inajarossa nahitohui. <sup>3</sup> Jeso ccanihicca huada bacco tabote nadsapi madija

attidenipa: —Jidapapi jadsire tomossi, oppinehe tomossi najaro –quiquinanaraha amadsati pohnadenidsa oppina tehe ssonaridsapi dsori taja cama-jarahitohui. Pina ejedeni comahicca huada amonejedeni ssamoqquiri najarossa najaro. Amadsati tossonahijinecca huada bacco tadsa amonejepi ejedeni comene dsori teje cama-gerani. <sup>4</sup> Naraha imecotedeni, tiadenipi ssamoqquiri tiquinejerani. Dsidsinidsa timadimanajerani. Nidsa ia Medsede ccanihicca huada bacco tadsapi pina bobotidejine odsa jinede jabojo najarissa tiquinejeranitohui. <sup>5</sup> Diodsa tiquejenajaropi pina ssiajanidsa timadimanajarossa tiquinani. Dio ssiejene tiadenidsa ahuato tajaro. Iapi dsidsinidsa madimanajaridenissa inejerani. <sup>6</sup> Pina najarideni pohnama cahadijajarissa inejerana. Icca madie ecahuanissa dsanapona. Jesocristo tohuira ibodi huatohue imadina. <sup>7</sup> Aja Jesocristo ccanihitohui bodideni huato-jarajaridenipa dsidsinidsa madimanajari. Dsomepa cacahadija najari. Noccodeni janoqquiri nahijine tohui quinadsa naco dsomedsa coma tanicca dse dse quinajari. <sup>8</sup> Naraha iapi ssiajanicca madija iquejenajaropi innoco janoraqquiri nehe imadijaro. Ibodi huatohue imadijaro bica tani. Iapi pina soldado jadsiredsa biquera-jarahijine pohna bacco cacahuahijine ccara tanicca caji, pohna tati cacahuahijine ccara tanicca caji najarissa inana. Imasiri inana-geranijine ia ecahuanijinepi Diodsa icca jeheniji icaji, Diocca tohuati huanehe icaji najaro. Icassiejeranijine tohuini inajorehe imadijaropaji. <sup>9</sup> Dio ia tocattejidsabaqquijaripa ia tonajidso-baqquihijine jarahi. Dio ia tocattejidsabaqquijaripa ia Medsede Jesocristo ia tonassiaja-baqquihijinena paja. <sup>10</sup> Jesocristo itohui pohna ccaccoradsa dsoqquejari. Nama najaripa camitta inaccadsa, idsoqquedsa naqui pohnadsa imadinitohui. <sup>11</sup> Nadsama tiadenipi timecotedeni tedseje ticatidserara canaji. Ticcadeni jeheniji todacorani nanijine naqui acco acco titicana naji. Najarossa tinanamanajaropi nema tidsanapomanana, inajaro.

—*Ajima tiquinanina bica tani –quinajari*

<sup>12</sup> Imecotedeni, tiadenidsa huati inana. Tiadeni maridedenidsa bicaqquiri tiquinaji. Attidenidsa naqui pina titaharibobo canaji. Tiadeni maridedenipa ia Medsede Jesocristodsa tiquejenajaro cacahuade toquejenadsapa dsepedeni ijimanahissa tajari. Timadimananissa tanijine tibodideni acco acco totocamabaqquimana najari. <sup>13</sup> Dio Atti tiadeni mari tocanabaqquidsa naco: —Jehe, pohnadenipa iadsa bicaqquiri nahi –titiquina naji. Pohnadenidsa tetideni huanacqquiri naji, inajaro. Huapimadsa joneqquiri tiquinehe timadimanaji, inajaro.

<sup>14</sup> Imecotedeni, tiadenidsa denima huati inana. Madija dsepe ijihijine ibo tadsapa tettideni dacoradsa huati ticanamanajo, dsepe ijide ibora tahijine. Madija bodi ocassera tadsa Jesodsa: —Epeje onana –nabote nadsapa pohna tinahatidsemanajo, Jesodsa tojanijine. Madija pocca jeheniji tomijiradsa pohna bodi acco ticamamanajo, pocca jeheniji todacorani napomanijine. Madija huapimadsa joneqquiri tiquinaji. Pina madija tiadenidsa ima inassonaridsapi pohnadsa tedimana-geradsa mohuaradsa tinahanamanaji, inajaro.

<sup>15</sup> Madija tiadenidsa ima inanadsapi: —Manaco pohnadsa ima onanana –tiquinejeraji. Tabaccorehe tinanamana tejeraji. Ima bicanira tinanamananijine disseraqqiri tiquinaji. Timecotedenidsa, madija ohuaha huapimadsa naqui ima bicanira titinanaridsamana nana, inajaro.

<sup>16</sup> Huajijiradsa tetetidsemana naji. <sup>17</sup> Dio Pohnadsa ssiaja huati, dsome huati titidsanapomanana naji. <sup>18</sup> Aji ocasserani temanadsa, ima bicani tiadenidsa tojadsa naqui Diodsa huati huati titiquina naji. Pohnadsa: —Jehe, epejeni. Tijine bica tani –titiquina naji. Diopa aja Jesocristodsa jehe quinajarideni attideni nama quiquinanahijine jipa tajari.

<sup>19</sup> Dio Corime tiadenidsa madijaripa joma tinanamana-gerana. <sup>20</sup> Madija Dio Corimejine Dio Atti ecomeradsapi tettideni: —Majidsa majidsa najari –tiquinejerana.

<sup>21</sup> Madijadenicca marinaja huapima titaharibobo canadsa: —¿Pina Jesocristo tahirissa naqui? —titiquina nana. Najarossa nadsapi tibodidenidsa tojanijine bica tani.

<sup>22</sup> Naraha ima tabaccora taniccapi tibodidenidsa tinanamana tejeraji. Tiajimanani nanina bica tajaro.

<sup>23</sup> Dio Pahuana jonehe jinede. Dio Pahuana tibodideni tonahirebaqquihissa tahijine, inajaro. Dio Pahuana ticorimedeni, tibodideni, tessiredeni nehe ecahuanissa tajaro, imasiri ticappiramanene ia Medsede Jesocristo pohua ccanipomahi bacco tiquinanijine, inajaro. <sup>24</sup> Abi Dio titohuideni huahua najaripa maidsera tahi. Tiadenidsa Pohua Attissa inananitohui. Aji huati onajaropi tiadenidsa inananissa tanitohui.

*Huapimadsa: —Jesocca biquehe tiadenidsa tojana –quinajari*

<sup>25</sup> Imecotedeni, Dio ia acco tocamabaqquihijine itohui naqui Pahuadsa huati huati titiquina naji.

<sup>26</sup> Timecotedeni Jesocristodsa jehe quinajarideni huapima bacco bacco ticanadsapi nija tiquinadsa dama, ticahuajacossa titiquina naji, inajaro.

<sup>27</sup> Aja ia Medsedejine ohuatti ocajidsa tiadenidsa ajima onajaro: Timecotedeni huapimadsa ajijaro ima teppe hua taridsamanaji, onajaro.

<sup>28</sup> Ia Medsede Jesocristo tiadenidsa ima bicani inanana, inajaro. Epejeni. Ia onipi Pablo, Silvano, Timoteo inajaro.



## Pablodenipa Tesaronicadenidsa ima teppe dsotodecca dosse quinajaro

### 2 Tesalonicenses

Tesaronicapi dsama Masedoniacca odsa panani. Nahicca madija mota huapi taha Jesodsa jehe quinajari. Poccadeni quequeriqqui cajimanajari. Pablopa najaro odsa pananidsa tahide Jesocristo tahimari icassiejeranijinecca mari icanabaqquipojari. Naraha toccahi nattipa mamaride ohuahadeni ima pajissa jeranicca mari icanabaqquimanajari. Poccadeni marinajapi: —Jesocristo ccanipomajari –quinahi nade.

Najarojine Pablo, Silvano, Timoteo tedseje Tesaronicadenidsa ajijaro ima dsodo quinajaro, Jeso ccanihicca ima pajissara nahatoqquiri nahijine. Ajaropi poccadeni ima teppe dsotodecca pohuadenidsa dosse quinajaro.

#### *Pablodenipa nija quinajari*

<sup>1</sup> ¿Nija imecotedeni? Ohua Pablo, Silvano, Timoteo inadsa tiadenidsa dsodo inajaro. Nani odsa panani Tesaronicacca Jesocristodsa titiqueriqqui najaro icca Abi Dio, ia Medsede Jesocristo pohuadeni pamahadsa tijariqquimanajarodsa icca ima dsodo inajaro.

<sup>2</sup> Abi Dio, ia Medsede Jesocristo pohuadeni pamaha tiadenidsa ima bicani, poccadeni jonehe naqui tiadenidsa inanamana-dsanapona, inajaro.

#### *Jesocristo ccanipomadsapa ima ajima nanitohui*

<sup>3</sup> Imecotedeni, ticcadeni ima bica tadsapi titohuideni Diodsa huati huati ihinanajaro: —Jehe Abi Dio, bica tani. Imecotedeni Tesaronicahuaji madimanajaridenicca ima bica tadsa Tiadsa etidsejaro –ihinanajaro. Nema inanipi bica tani. Aji ticcadeni jeheniji Jesocristodsa todacorani-dsanaponicca ima imittani. Tetideni cahanerara canehe denima denima tidsanapomananicca ima naqui imittani. <sup>4</sup> Nadsapi titahimarideni Diocca madija quequeriqqui-ridsamana najaridenidsa huati huati ihinaridsa najaro. Ajima inajaro: —Tesaronicahuajicca imecotedeni Jesocristodsa jehe quinahissa tajari. Aja madija Jesocristodsa jiperaqquiri najari huadierideni pohuadenidsa ssonari ssonari nadsa naqui mohuaradsa inahanamana inahanamana najaro. Ocasserani ahuamanaraha Jesocristodsa disseraqquiri nahi –ihinaridsa najaro. <sup>5</sup> Jehe, nanajidso tiquejenaraha aji nanajidso tiquejenajarodsa Dio Puhuapa ima cattede pajirahissa tajari ahuaato inananitohui. Nidsa huapimacca ima cattede tojadsapa tiadenidsa: —Occa cacahueheda tiquejenana –nahitohui. Nadsama tiadenipi najarotohui najidsohue mohuaradsa titinahanamana najaropaji.

<sup>6</sup> Nidsa dsotode tiadeni najidsodepa Dio inajidsobaqquihitohui. Nema nadsapi madija tiadenidsa tabaccorehe inanamana najaro manaconi Dio inapajiranissa tanitohui. <sup>7</sup> Aji ocasserani temanajaropi Dio tiadeni jassi tonanabaqquihitohui. Ia naqui Diojine nema inanitohui. Najaro jassinajacca imapi nidsa ia Medsede Jesocristo memehuaaji nebodsa namihuaaji ccaronapomadsana iadsa tojanitohui. Puhuapa pocca dodosse tabaqqi dacoraqquiri najarideni tedseje jororoni imenima ccaronapomahitohui. <sup>8</sup> Nadsapa madija inajidsobaqquihitohui. Aja madija Diodsa noccodeni jidsaqquiri najarideni, aja ia Medsede Jesocristo tahimari icassiejeranijineccadsa iboqquiri najarideni naco inajidsobaqquihitohui. <sup>9</sup> Ia Medsede bacco nanidsapa poccadeni imasiri manaconi najidsohue jiquejeranihuaji madimana-dsanapohitohui. Ia Medsededsa huajiqquiri nadsa madimanahijine Dio dosse inabaqquihitohui. Nadsapa Jesocristocca deni tojehe, pohua dsibehine, pocca nahatohue qqii toquinarahitohui. <sup>10</sup> Naraha ia Medsede namihuaaji ccaronapomadsapa pocca madija

huapima pohuajine imarideni tobicajarideni pohuadsa: —Jehe, tiapi bica tinani, deni tijani –quinaja, huahaha huahaha canaja nahitohui. Aja Jesocristo pohuadsa pajissa quinajari huapima pohua qqui toquinadsapa: —A, ia Medsede dacorajari, bica tahi –quinahitohui. Nadsapi aji tiadeni naqui Jesocristo tahimari tiadeni mari icanabaqquipojarodsa pajissa tiquinajarojine pohuadsa tetidsemananitohui.

<sup>11</sup> Ajjaro ima huapima tiadenidsa tojanijine Diodsa huati huati ihinanajaro. Dio ticcadeni madie qqui tadsapa: —Occa huahua tabaqquinajapa ohuadsa disseraqqiri nahi. Ponima pohuadenidsa huahua onejerajaro –nahijine inadsa Diodsa huati huati ihinanajaro. Ima bicani tinanamananijine tohuini tiquinadsa naqui Dio pocca dacorehema ticcadeni ima bica tanijine inadsa Diodsa huati huati ihinanajaro. Diodsa jehe tiquinajarojine Pohuadsa tidsepedeni ihijimana najaro naqui ticcadeni ima toccanissa tanijine inadsa Diodsa huati huati ihinanajaro. <sup>12</sup> Nadsapi ticcadeni ima bicani nema tinanamanajarojine ia Medsede Jesocristo tahimari madija mittamanadsapa: —Jehe, pocca ima dacorani. Pocca nahatohue naqui pocca madijadsa qqui inani –quinahitohui. Manaco Jesocristo tiadenidsa: —Bicaqqiri tiquinani, occa madija tiquejenani –nahitohui. Jehe icca Dio, ia Medsede Jesocristo tedseje titohuideni huatideni cahanarimana canajarijine tiadeni tonapajira-baqquihissa tajaripaja.

## 2

### *Imasiri ssebote ahuatomahicca ima*

<sup>1</sup> Nadsama imecotedeni, ia Medsede Jesocristo ccanipomahicca ima, pohuadsa iqueriqquinijinecca ima naqui tibodideni huatomanissa taji, tibodideni tossamojeranijine. <sup>2</sup> Paji, aji Jesocristo ccanipomahicca ticahatterapojaropi tinebomana tejeraji. Aja madija attidenipa: —Ia Medsede ccanihicca huadapi bacco tani, bacco tani –quinadsapa tijabojomana-jeraji. —Dio Corimejine nahatoto inani –quinahitide naraha pohuama huati toquinajari. —Pablocca ima teppedsa qqui inade –quinadsa naco pohuadeni attidsa pajissa tiquinejeraji. Ohuapi najaro ima dsodo onejerade. <sup>3</sup> Imecotedeni, madija tiadeni tocamaisabaqqui-manadsa pohuadeni attidsa pajissa tiquinejerana. Nidsa ia Medsede ccanipomahicca huada bacco tejeraccadsama madija huapi taha Diodsa iboqqiri napohuitohui. Mohuaniji idimamana-ridsadsapa aja madija imasiri ssebote ahuatomahitohui. Naraha najaripa nidsa Diocca najidsohue jiquejeranihuaji tojahitohui. <sup>4</sup> Aja madija imasiri ssebotepa Diodsa huadi, aja Dio jararaha —Ia cacahuade –quiquinanajaridsa huadi, aja madija poccadeni nahatonijidsa huahuatidsemana najaridenidsa naco huadi tahitohui. Nadsama aja imasiri ssebote mamaidsade attipa: —Ohuana deni ojani, ojari onani –nanaja nahitohui. Nadsapa Diodsa dada toqqimahuaji toqquedsimadsa huittaridsapa: —Ohuana Dio ojani –nahitohui. <sup>5</sup> Tiadenidsa omadipodsa najaro ima tiadenidsa huati huati onapojaropi tetideni ajimamanajaroqui?

<sup>6</sup> Tiadenipi nahatoqqiri tiquinaponi, aja imasiri ssebote ahuato-jaraccahijine cacahuadepa madihi. Ahuatomahijinecca huada bacco tejeraccadsapi cacahuadejine ahuato-jaraccahi. <sup>7</sup> Naraha pocca ima tabaccora tanicca ahuatora taraha pohuajine madija huapi taha imasiri ihinahanamana nani qqui qqui idsanapojaropaji. Naraha imasiri deni toja-jeraccanijine cacahuadepa Diocca dosseniji madiccahi. Jidapana imasiri denima toja-jeranijine pohuana huacossajari. Naraha nidsa dsotode najari cacahuade Dio iaccamacossanidsa toccanidsapa imasiri denima ahuatomanitohui. Nadsapi ima oppina tehe tojaridsanitohui. <sup>8</sup> Nadsana imasiri ssebote ahuatomahitohui. Naraha dsotodepa ia Medsede Jesocrisrojine jicahitohui. Jesocristo pohua dsibehinema, pocca dacorehema ccaronapomadsapa pohua ajaridsa jappo nadsa

inanadsoqquehitohui. <sup>9</sup> Aja imasiri ssebote ahuatojaripa Satanacca dosseniji. Puhuapa Satanacca dacorehe cajijari. Pocca imadsa madija pajissa quinahijine canahatori canaraha maidsehe. <sup>10</sup> Imasiri onihidsa onihidsa ihicamidsabaqqui nahitohui. Nadsapa madija najidsohuedsa toquejenahijinedenipa pocca imatohui disseraqquri nahitohui. Jesocristo tahimari pajissaccadsa pajissa quinadsapa tocassiejerahijineraha ima pajissaccadsa jiperaqquri najari. <sup>11</sup> Najarojine Dio inebobaqquidsapa imasiri ssebote icamidsabaqquihitohui. Nadsapa pocca maidsehedsara pajissa quinahitohui. <sup>12</sup> Madija huapima ima pajissaccadsa pajissa quina-jarajarideni imasiridsa disseraqquri nadsapa Diojine najidsohuedsa toquejenahitohui.

### *Dio tiadenidsa huati cahanari canajaria aji ticassiejerajaropaji*

<sup>13</sup> Naraha imecotedeni, ia Medsedepa tiadenidsa huati huana tajari. Titohuideni huajijiradsa Diodsa huati huati ihinanajaro. Puhuadsa: —Abi Dio, Tesaronicadenidsa ticca ima tojadsapi bica tani –ihinanajaro. Diopa tahide ticassiejeranijine tiadeni tocattejidساباqquijopajaria aji ticassiejerajaropaji. Nadsapa Dio Corime tibodideni tonahiredsa, aji Jesocristo tahimari pajissaccadsa pajissa tiquinadsa naqui Diojine ticassiejerajaropaji. <sup>14</sup> Nadsapa Jesocristo tahimari icassiejeranijinecca tiadeni mari icanabaqquidsapi timittamanajarode. Najarodsa Diopa titohuideni huahua najari. Nidsa dsotodepi aja ia Medsede Jesocristo pohua dsibehine, pocca deni tojehe tiadenidsa tojanitohui.

<sup>15</sup> Nadsapi imecotedeni, Diodsa jehe tidsanapomananijine dissessera tinaji. Tiadeni mari icanabaqquijarocca, tiadenidsa dsodo inajarocca naqui tetideni ajimamana tejeraji, onajaro.

<sup>16</sup> Nadsama aja ia Medsede Jesocristo, Abi Dio tedseje iadsa huatideni huanana tajari. Puhuadeni pamaha bicaqquri nadsa ibodi acco acco totocamabaqquimana dsanapopajipaja. Puhuadenijine itedsejemacca ima bicani iadsa tojanijine nahatoqquri inehe imadijaropaji. <sup>17</sup> Puhuadeni pamahapa tibodidenidsa huatidsehe inaridsamananijine, inajaro. Puhuadenijine tibodideni todacorani nadsapi tettideni bica taniccadsara huati huati titiquina nanijine, ima bica taniccara tidsepedeni ihijiridsamana nanijine, inajaro. Jehe, najaro ima tiadenidsa tojanijinepi Diodsa huatide inebo-jerajaro.

## 3

### *Itohui Diodsa huati huati titiquina naji*

<sup>1</sup> Jari, imecotedeni, itohui Diodsa huati huati titiquina naji, aji ijine amadsati ia Medsede Jesocristo tahimari icassiejeranijinecca tojaribaqquinijine, inajaro. Pohua tahimari mittaridsamanadsapa: —Jehe, jidapapi iadsa ima bica tani –nanaridsamana nahijine, inajaro. Pina aji tiadenidsa Jesocristo tahimari bacco tapodsa jehe tiquinapoparossa nanijine, inajaro. <sup>2</sup> Ajijaro ima naqui Diodsa huati huati titiquina naji, aja madija tabaccoraqquri najarideni, madija Diodsa iboqquri najarideni naco ia tonajidsobaqqui-jarahijine, inajaro. Aja Jesocristodsa jehe quina-jarajaridenipa caji tahi. <sup>3</sup> Naraha ia Medsede tiadeni tonebobaqqui-jarahi. Puhuapa tiadeni tonadacoraqquihitohui. Pohua naco tiadenidsa imasiri jinede deni toja-jarahijine tiadeni tohuacahua-baqquihitohui. <sup>4</sup> Nadsama icca marinajassa tinanamanani ia Medsede ecahuajaropi nahatoto inajaro. Ia Medsedejine nema tidsanapomananijine naqui nahatoto inajaro. <sup>5</sup> Ia Medsede tiadeni tonahattabaqquidsapa Diocca tohuati huanehe tibodidenidsa ahuato tanijine jipapa inajaro. Tiadenidsa ocasserani ssonaridsa mohuaradsa tinahanamananijine ia Medsede Jesocristo pocca dacorehe tiadenidsa inananiijine naqui jipapa inajaro.

### *Madija dsepe ijidsana bica tani*

<sup>6</sup> Imecotedeni, ia Medsede Jesocristo onima tiadenidsa dsodo inajaro. Aja timecote Jesocristocaraha dsepe ijihijine jipera tahi qqui tiquinadsapa pohua tedseje ticabera tejeraji. Pocca madie pina icca marinaja tiadeni mari icanabaquipojarossa nejeradsapi tiadenidsa quejema-jarana, inajaro. <sup>7</sup> Nadsama pina aji icca madiessa tinanamananijine naqui nahatoqquiri tiquinani. Nani tiadenidsa imadidsapi idsepe ijirani imadini qqui tiquinejerade. Idsepe ijidsanapode. <sup>8</sup> Ticcadeni dsamatapa ihijipa najari naco manaconi jiraha ihijipa najarade. Itapari manaconidsa mita inahijine inadsapi tarabaidsa inajaro. Aji ssiaja, dsome naqui idsepe ihiji najaropajide. Tiadenidsa najo tejeranijine nema inajarode. <sup>9</sup> Aji Dio Atti tiadeni mari icanabaquijaroline ticcadeni da naqquinajatohui, ticcadeni dsamatapatohui tiadenidsa huati inadsa bica taraha nema inejerajaro. Idsepe ihiji najarodsa manaconi ihicaji najarode. Nadsapi idsepe ihiji nani qqui tiquinadsapi tiadeni naqui nema tiquinanijine, inajaro. <sup>10</sup> Nadsa tiadenidsa imadipodsa etti ajima ihinanade: —Madija dsepe ijihijine ibo tajaripa jipajarana. Pohua -ihinanade.

<sup>11</sup> Nadsama iapi aji tiadenihuaji timecotedeni pamahapa: —Tarabaidсарahi madimanajari -quinahi imittani. —Boronidsara ahuaji totohueda taja naridsajari. Odsadsa naco tohuededsimaja naridsapohui nanaja najari. Imara maji totohuacca-mana nahi -quinahi ima imittani. <sup>12</sup> Naraha pohuadenidsa icca ima dosse inajaro. Ia Medsede Jesocristo onima tiadenidsa huati inajaro: —Ponima jai tijaridsa-jeraji. Timadimananijineccatohuira tidsepedeni ihijimana naji -inajaro.

<sup>13</sup> Naraha imecotedeni, tiadenina ima bicani tinanamanajarodsa: —Najo tani, onebona -tiquinejerana. <sup>14</sup> Nadsama timecotedeni ojari itide, pama itide, icca marinaja dsodo inajarodsa ibobo tajari tiadenidsa queriqquidsapa tinoccodsa-baqquimanajo. Nama quinajaridenipa titohuimana tajarajo. Nahi tinoppinedeni cappinahijine. <sup>15</sup> Naraha najaripa ticcadeni huadi toja tajarajo. Puhuapa timecotedeni. Pina madihissa tahijine bodi acco ticamamanajo.

—*Diocca jonehera tiadenidsa tojaji -quinajari*

<sup>16</sup> Ia Medsede pohuapa jonehe jinede. Tiadenidsa ima ssonaridsa, ima nohueradsa naqui Diocca jonehera tiadenidsa tojadsanapona, inajaro. Diopa tiadeni tohuacahuabaqqui-dsanapohuitohui, inajaro.

<sup>17</sup> Jehe, ohua Pablo, ajjaropi ohua odsepedsa dsodo onajaro. Ajaropi jicanicca tiadenidsa nija onajaro. Aji occa ima teppe huapimadsa nema onanaridsajaro. Occa dsodoniji qqui tiquinadsapi: —Jehe, pajissa, ajjaropi Pablocca ima teppe -tiquinanijine, onajaro.

<sup>18</sup> Ia Medsede Jesocristopa tiadeni huapimadsa ima bicani inanana, inajaro. Pajissa imapi nema nani. Epejeni icca ima. Ia onipi Pablo, Silvano, Timoteo tedseje.

## **Pablopa Timoteodsa ima teppe tahidecca dosse inajaro**

### **1 Timoteo**

Timoteopa dsabisso tojapohuidsama Jesodsa jehe najari. Pablo huatimade tojadsapa pohuadsa ccaccaridsa najari. Pablo Timoteo mari icanadsa Jesodsa jehe najari, quinahi nade. Nama najaria Pablo Timoteodsa: —Occa ejedenissa nahi –nanaja najari. Pablodsa ccaridsajarijine Jeso tahimari tohuattahissa tajari. Dsama onihi, onihihuaji huedaridsadsa Jesocristo tahimari icassiejeranijinecca mamariri naridsajari.

Odsa panani Epesohuaji tohuedadsapa nahidsa Pablo Timoteo inebojari, pohuadeni maride tojahijine. Dsotodena ajijaro ima teppe pohuadsa dosse inajaro. Diodsa dsepe ijihissa tahijine dsodo inajaro. Jesodsa jehe quinajari maridedeni bicaqquri najarira icattejidsa-baqquihijine dsodo inajaro. Mamaridedeni biji accodedeni icattejidsa-baqquihijine naco dsodo inajaro. Najarideni nejecoma quinahijinecca ima pohuadsa dsodo inajaro.

#### *Pablo nija najari*

<sup>1-2</sup> ¿Nija Timoteo? Ohua Pablo tiadsa occa ima dsodo onajaro. Jesocristocca dodosse ojani. Dio Atti mari ocanabaqquiridsahijinepa Abi Dio, Pohua Bedi Jesocristo tedseje ohua dosse quinajaro. Diopa ia Tonassiajade, Pohua Bedi Jesocristopa itohui ccanipomahijine pohuatohui imadijaro.

Jehe Timoteo, Jesocristodsa jehe tadsapi pajissa pina occa ejedenissa tajaro. Nadsapi icca Abi Dio, ia Medsede Jesocristo tedseje tiadsa ima bicani inanamanana. Poccadeni tohuati huanehema tia acco icamamanana. Poccadeni jonehe naqui tiadsa tojana, onajaro.

#### *Maidsehecca mamaridedeni apaja quinahijine*

<sup>3</sup> Jehe Timoteo, tahide Masedoniahuaji occabote nadsa tiadsa huati onajaropi jidapana dsodo onapomajaro. Aji, odsa panani Epesodsa timadiccaji, marinaja maidsehecca mamaridedeni huati ticanabaqquina, denima mari quina-jarahijine, onajarode. <sup>4</sup> Madija ima jadani tohuini pohuadeni bodidsa huahuatomacca dsanapomana-jarahijine, pohuadeni potapojari tahimarideni tohuini naco bodideni huahuatomacca dsanapomana-jarahijine huati ticanabaqquina, onajaro. Najaro imatohui disseraqquri nadsa pohuama ahuaji huati ahuaji huati quinadsapa cahadirere cacana najari. Ima nema naniccapi Diocca pajissehedsa bacco toquinahijine ia acco cama-jerani. Madijapa Diocca pajissehe aji Dio ia tonassiajabaqquihijineccadsa bacco toquinahijinepa Jesocristodsa pajissa quinadsana bacco toquinahitohui.

<sup>5</sup> Jehe Timoteo, tiadsa dsodo onajaropi Diodsa toquejenjarideni huapima huatideni cahanerara canaridsahijine. Najaro tohuati huanehepi ibodi bicaqquri nadsa, ibodi ima bicani tohuira inadsa Diodsa pajissara jehe inanissa tadsapi eti cahanerara canaridsanijine, onajaro. <sup>6</sup> Naraha madija motadenipa najaro ima bicani nebomanajari. Manaco ima ponimaccara imahaha imahaha cacana najari. <sup>7</sup> Pohuadenipa: — Diocca dosseniji maride iquejenana –quinadsapa cappineraqquri nadsa mari mari quinaraha poccadeni marinaja tomittanimana-jarajari.

<sup>8</sup> Dio pocca dosseniji Moisesidsa da inajaropi bica tani nahatoqquri inajaro. Najaropi imadinissa tanijinecca marinaja. Mamaridedenipa Diocca dossenijidsa mari quinahissa tajarodsa iboraqquri inadsapi bica tani, onajaro. <sup>9</sup> Naraha Dio pocca



dosseniji da inajaropi aja madimanahissa tajaridenicca imajine jerani. Aja tabacco-raqquri najaridenicca imajinena pocca dosseniji da inajaro, poccadeni tabaccorehe ahuato inananiijine. Aja tabaccoraqquri najaridenipa pina: Diocca dossenijidsa iboqquri najarideni, huaribodeni sibaqquri najarideni, Diodsa nacasseraqquri najarideni, imasiri inanamanajarodeni, Dio noppine cappinamana-jarajarideni, Dio onidsa jajajidede rajarideni. Najaro tabaccorehe ahuato tanijine Dio pocca dosseniji da inajaro. Madija ohuahadeni naco pina poccadeni abi inanadsoqque-manajarideni, poccadeni ami inanadsoqque-manajarodeni, madija ohuahadeni inanadsoqque-manajarideni. <sup>10</sup> Aja huananehe inanamanajarodeni, pina pocca amoneje jeraraha tohuini dissera tajari, ponicca maqqui jararaha tohui dissera tajaro. Maqquidejeraha pohua tesse dsoto ajade dissera tajari, amoneje naqui poni tassani bequede dissera tajaro. Najaro tabaccorehe huapima ahuato tanijine Dio pocca dosseniji da inajaro. Madija ohuahadeni naco pina madija ibotibaqquimanadsa madija ohuahacca dodosse toquejenahijine manaconitohui da iqquimabaqqui-manajarideni, mamaisadedeni, ima cacattemade baccohuaji domo huadsa ima maidsehera huati toquinajarideni. Jehe, madija namajidede rajaricca imajine Dio pocca dosseniji da inajaro. Najaridenipa imadinissa tanijinecca marinaja bicanidsa iboqquri nadsapa ima oppina taniccara ihinanamana najaro. <sup>11</sup> Jehe, najaro marinaja bicabotepi Jesocristo tahimari icassiejeranijinecca tadsajani ojariqquijaro. Abi Dio Bicabote deni tojajaripa pocca dosseniji ohua cadossejaride, madija mari ocanabaqquiridsahijine, onajaro.

*Jesocristocca tohuati huanehe Pablodsa tojadsapi Pablo huatidsejari*

<sup>12</sup> Ohuapi ia Medsede Jesocristodsa: Jehe, tijine bica tani, onajaro. Aji pohua tahimari maride occaridsanijine ohuadsa pocca dacorehe inanadsapi ohuatidsejaro. Jehe, pohua attidsa ibora onanijine nahato tapodsapa ohua dosse tajari. <sup>13</sup> Ohuapi tahide pohuadsa tabaccora onaraha nema nehe pocca tohuati huanehe ohuadsa ahuato inanajaro. Tahide Jesocristodsa ojajeraccadsapi pohua tahimari jicanijine tohuini onadsa ohuatti tabaccora taniccadsa huati huati onade. Pocca madija naco ohonajidsobaqqui naccade. Pohua onidsa tatamasso ohonanaccade. Bica onejeraraha Diopa ohuadsa huati huana tadsa occa tabaccorehe manaconi ohua najidso-jarajari. Jesocristodsa jehe onejeraccadsa tabaccorehe onanaridsani ssamo onaccadsa Dio ohuadsa nama najari. <sup>14</sup> Nadsapi ia Medsede Dio pocca tohuati huanehe motarehe ohuadsa inanajaro. Pohuajine naqui Jesocristodsa jehe onanijine opajirajaro. Pohuajine pocca tohuati huanehe ohuadsa inanadsa naqui Pohuatohui ohuati huana tanijine opajirajaro.

<sup>15</sup> Ajijaro imapi pajissa tojani. Najaro imadsa madija huapima pajissa quinadsapa bica tani. Najaro imapi ajima najaro: Jesocristopa ajijaro namidsa ccaronajari, madija imasiri tonanamanajarideni inassiajabaqquihijine. Madija huapimapa imasiri inanaridsamanaraha ohuana denima ojine tabaccora tani onanajarode.

<sup>16</sup> Naraha Dio ohuadsa huati huana tadsa ohua najidso-jarajari. Ohuapi imasiri ssejide ojiraraha Jesocristopa occa imasiri mohuaradsa inahanajonajaro. Occa imasiri epeje inanajaropi madija huapimadsa pocca tohuati huanehe ahuato inanapojaro. Nadsapa dsotodedenicca: —Jehe, Cristopa icca imasiri epeje inananiijine jipa tahi —quinahijine. Najarideni Jesocristodsa jehe quinadsapa camittehe jiquejeranicca cajimanahitohui. <sup>17</sup> Abi Diopa icca tamine deni tojahi. Pohuapa jicaquera tahi, dsoqquequera tahi, ahuatora tahi. Pohuapa Dio ojari najari. Huajijiradsa ettipi Pohuadsa: —¡Epeje, Tiapi bica tinani! ¡Ticca deni tojehe nema dsanapona! —ihidsanapo nana, onajaro. Pajissa nema nana.

<sup>18</sup> Jehe Timoteo, tiapi pina occa ejedenissa tajarode. Ajidsa anipodsa Dio Corimejine Dio Atti huati toqquimadedenipa Diodsa tidsepe ijiniijinecca ima huati

toquinapodsa omittade. Poccadeni huatinaja tinapajiranissa tanijinepi Diodsa tidsepe ijinissa tana. Pina soldadossa taji. Tabaccorehe tadsajani ticahadirenijine daco tijiraji. <sup>19</sup> Jesodsara jehe tidsanapoji. Tibodicca ima bicani huahuatoma najarora tinanadsanapoji. Madija motapa nama quinahijine iboqquri najari. Puhuadeni bodideni huatohue bicanicca ettajomanadsapi tabaccorehera tohuini quinadsapa poccadeni jeheniji tossamojaro. <sup>20</sup> Nama quinajaridenipa huapi taraha pamahana onideni dsodo onajari: Imeneo, Arejadro quinajaridenina Dio onidsa tatamasso quinajari. Namajidede radsapa imasiri jinede Satanadsa onanabaqquinijari, Dio oni tamassode oppina tani tocahatterahijine.

## 2

### *Diodsa huatide toquejenahijinepa ajama quinana*

<sup>1</sup> Timoteo, Jesodsa jehe quinajarideni tedseje Diodsa huati tiquinadsapi ajima tiquinana, onajaro. Tahidepi madija huapimatohui Diodsa huati huati titiquina naji. Puhuadeni cappiramanahicca cajimanahijine, Dio puhuadeni ecahuabaqquihijine, puhuadeni acco icamabaqquihijine naco huati huati tiquinaji. Puhuadsa huati tiquinadsa naqui: —Jehe Abi Dio, tijine bica tani –titiquina naji, onajaro. <sup>2</sup> Dsama huapimacca taminedenitohui naqui Diodsa huati huati tiquinaji. Aja tamine deni toquejenajaridenitohui, tamine ohuahadenitohui naqui Diodsa huati huati tiquinaji. Poccadeni cacahuehe bica taniccara inanamanadsapi icca dsamadsa ima oppina tanicca nohueranijine. Ia naqui mohuaradsa imadidsa Diodsa iboraqquiri inadsapi madija ohuahadeni icca madie bica tani qqui toquinahijine. <sup>3</sup> Diodsa huati huati inanipi bica tani. Ia Tonassajade Dio huatidse tahi. <sup>4</sup> Puhuapa madija huapima tocassiejerahijine tohuini najari. Pocca pajissehe tocahatterahijine naco tohuini najari. <sup>5</sup> Diopa ojarijari. Pina pahuassa najari ohuaha nohuerahi. Icca ima Puhuadsa tobicanijinepi icca ima tonanabicade madija ojaria anihi. Madija ohuaha pina pahuassa najari nohuerahi. Najaria aja Jesocristopaja. <sup>6</sup> Jesocristopa dsogquehijine pohua ccaccoradsa icca imasiri manaconi dsogquejari. Najaro ima madija huapima mittaridsamanahijine Diojine ahuato inanadsa pajissa tojajaro, aji Diojine najoraponicca huada bacco tadsa, onajaro. <sup>7</sup> Najaropi Jeso pohua tahimari ohuacomera-ridsanijine otohui huahua nadsapa pohuajine pocca dodosse ojararo. Jodio quejena-jarajarideni pohua tahimaridsa pajissa quinahijine, pocca pajissehedsa naco jehe quinahijine mari ocanaridsabaqquihijine ohua dosse tajari. Pajissehera dsodo onajaro, omaidsa-jerani.

<sup>8</sup> Jehe, nadsama maqquidejedenidsa ohuatti ajima onani: Madija Diodsa to-queriqquimana nahihuaji toqueriqquidsapa Diodsa huati huati totoquina nana, onajaro. Diotohuira quinajari bodideni naco huireqquri najarina puhuadeni dsepe memehujaji Diodsa da tamacossamanana, onajaro. Huadie jirehe Diodsa huati huati totoquina nahijine, madija ohuaha tedseje naco ahujaji atti ahujaji atti quina-jaradsana Diodsa huati huati totoquina nana, onajaro. <sup>9</sup> Nadsama amonejedenidsa naqui ohuatti dsodo onajaro. Ponidenicca etero huedsamananicca imapi ajima najaro: Etero bica tanicca huedsamananipi bica tani. Naraha etero huatini ccara taniccapi huedsamana-jerana. Etero onihi naqui pina ponideni imani ahuato tanicca huedsamana-jerana. Ponideni tatini conani naqui icohuamana-jerana. Tomattocca dsibehi tanicca oro, huatini ccara tanicca perla naqui mattonideni huanadsapi jipera onani. Bicabote tohuini quinadsa ponideni bodinipi: —Ohua qqui toquinadsa: “Amoneje bicani” quinahijine –quinaraha najaropi Diodsa bica tejerani. <sup>10</sup> Amoneje attinidenipi: —Jehe, ohuapi Diocca ojani –quinajarodeni Dio Puhuadsa bicaqquiri nanijinepi ajima quinana: Ima bicanira inanaridsamanadsana bica tani. <sup>11</sup> Jehe, amonejedeni Dio Atti mittamananijinepi didi quinadsa taharibobo canana. Dio Atti

maride attidenidsa naqui iboraqquiri nana, onajaro. <sup>12</sup> Ohuatti onihi naqui: Amonejepi madija huapima queriqquimanahidsa maride toja-jerana, onajaro. Amonejepi maqquidejedenidsa deni toja-jerana. ¡Poni! Pina taharibo canadsa Dio Atti mittanissa taniijine, onajaro. <sup>13</sup> Ohuatti nema onajaropi Diopa Adana inahatopojari. Dsotodena Eba inahatojaro. <sup>14</sup> Adanapa Satanacca maidsehedsa tojapo-jarajari. Ebana pocca maidsehedsa tojapojaro. Ponipi Dio Attidsa ibora tejeradsapi imasiri inanajaro. <sup>15</sup> Nema najaroa amonejedeni ejedeni tocassonamanadsapi ocasserani ihinahanamana naraha Diopa amonejedeni inassiajabaqquinitohui. Jehe, ponideni tocassiejeranijinepi Diodsa jehe dsanapomanana. Madija huapimadsa huatinideni huanacquiri nana. Ima jirehe Diodsa madimananissa tana. Mohuaradsa ima bicanira ihinanamana nana. Nema quinadsapi tocassiejeranitohui, onajaro.

### 3

#### *Jesodsa jehe quinajarideni cacahuade toquejenahijinepa ajama quinahijine*

<sup>1</sup> Jehe, ima onihi pajissaccapi ajima najaro: Madija attipa: —Jehe, Jesodsa jehe quinajarideni cacahuade ojanijine tohuini onani –nadsapa cacahuehe bicani tohuini najari. <sup>2</sup> Nama nadsapa Jesodsa jehe quinajarideni cacahuadecca madie ajima nanina bica tani: Puhuapa madihissa tadsapa madija ohuaha attidenipa: —Pocca ima tabaccora tani –quina-jarahijine. Pocca amoneje naqui ojarini cajihijine. Huananehema madi-jarahijine. Nadsama huajjiradsa pohua bodi huatohuissa tana. Imasiri inana-jeranijine pohua cacahuade nahato, madide naco nahato tadsapa pohuadsa madija ohuaha attidenipa: —Puhuapa bica tahi, ima cappirahi –quiquinanahijine. Puhuadsa madija bacco najonadsa pohuadsa dsamatapa da inahijine, pocca odsadsa huadahijine naco bodi nanajorapo nana. Dio Atti maride naco nahato tana. <sup>3</sup> Dsedse coma tanicca dsejide rajarana. Pohua tesse naco inajidso-jarana. Johuahuera tadsa jone taha madihijine. Dsiniro huemani tohuini, todsepetaji huemani tohuini dissera tajarana. <sup>4</sup> Puhuapa pocca odsacca madija cacahuade nahato tana. Pohua attidsa pocca ejedenideni naco iboraqquiri nahijine. Pocca ejedenidenipa pohua noppine cappinaqquiri nadsa madimanahissa tahijine. <sup>5</sup> Naraha pocca odsacca madija cacahuade ssamo tadsapa ¿Diocca madija cacahuade nahato taco? Ssamo tahi. <sup>6</sup> Jesodsa jehe quinajarideni cacahuade tojahijinepa madija Jesodsa jehe dsatipa pohua. Nama nadsapa pohua atti: —Ohuana deni ojan –narana. Nama nadsapa manaco Diopa inajidsorana. Pina maittaccadsama Diodsa Satana attipa: —Ohuana deni ojararo, tiapi ajimani tijani –napojarissa najarahijine. <sup>7</sup> Nadsapa Jesodsa jehe quinajarideni cacahuade tojahijinepa pohua tahimari toccanissa tadsapi Jesodsa jehe quina-jarajarideni attidenipa: —Jehe, pohuapa madija bicahi, ima cappirahi –quinahijine. Naraha pocca madie nema nejeradsapi jehe quina-jarajarideni attidenipa: —A, pohuapa Jesodsa jehe quinajarideni cacahuaderaha pocca ima tabaccora tani –quinahitohui. Nadsama pohuajine pocca ima nema nadsapi pohuapa pina Satanacca maidsehedsa cobara tajarissa najari.

#### *Jesodsa jehe quinajarideni cacahuade biji accodedeni toquejenahijinepa ajama quinahijine*

<sup>8</sup> Jehe, Jesodsa jehe quinajarideni cacahuade biji accodedeni naco madija bicaqquiri najarina ticattejidsabaqquina. Madija attideni pohuadenidsa: —Bicaqquiri nahi, madimanahissa tahi –quiquinanadsapa pohuadeni attidsa naco iboraqquiri nahijine. Pohuadenipa maidseraqquri nahijine, attideni bica taniccara huati huati toquinahijine. Dsedse coma tanicca dsejidede rajarana. Dsiniro huemani tohuini disseraqquri najarana, maidsehedsa dsiniro denima cajimanahijine tohuini quina-jarana. <sup>9</sup> Pohuadeni bodi huireqquri nadsa Diocca pajissehedsa pajissa quinahissa

tana. Najaro pajissacca imapi tahide ssamoqquiri inaporaha jidapanana Diojine ahuato inanaridsajaro. <sup>10</sup> Naraha madija ticattejidsabaqqui-jaraccadsama pohuadeni tinoccodsa-baqquipojo. —¿Nejecojarina Jesodsa jehe quinajarideni cacahuade biji accode toquejenahijine pajirahi? —tana. Bicaqquiri nadsapa apaja, Jesodsa jehe quinajarideni cacahuade biji accode toquejenahijine bica tani. <sup>11</sup> Najarossa najaro bedimenideni naqui bicaqquiri nanijine. Nadsapi madija ohuahadeni ponidenidsa: —Jehe, bicaqquiri nani, madimananissa tani —quiquinanahijine. Ima ponimacca naqui huati huati nanaridsamana nejeranijine. Bodinideni huato-mananissa tehe madimanana. Ponideni attini naqui maidseraqquiri nani, huapima inapajira-mananissa tanipi bica tani. <sup>12</sup> Nadsama Jesodsa jehe quinajarideni cacahuade biji accodedeni naco poccadeni amoneje ohojariri nanina bica tani. Nadsapi pohuadenidsa huananehe tahimarini nohueranijine. Poccadeni ejedenideni, poccadeni odsacca cacahuade nahatoqquiri nana. <sup>13</sup> Nadsapa Jesodsa jehe quinajarideni cacahuade biji accodedeni tarabaidsa quinahissa tadsapa madija mota attidenipa: —Pohuadenijine bica tani —quinahijine. Nama quinadsapa madijapa pohuadeni attidenidsa iboraqquiri nahijine. Nadsama poccadeni tarabaidsa toccanissa tadsapi poccadeni jeheniji Jesocristodsa todacorani nanijine, cappinerehe naqui cajimanahijine.

#### *Diojine Jesocristo tahimari pajissacca iadsa ahuato tajaro*

<sup>14</sup> Jehe Timoteo, nani tia qquide occabote nani onaraha tahidepi ohuattira tiadsa dsodo onapojaro. <sup>15</sup> Nadsama tiahuaji occanijine denima onajodsapi occa imara qqui tinadsa aja Jesodsa jehe quinajarideni madimanahissa tahijinecca ima nahato tinanijine. Aji ia Diocca madija iquejenajaropi Dio camitta tajaridsa ihiqueriqqui najaro. Dio pocca pajissehe iadsa inanajaropi johuidso tejeranijine ecahuanissa tajaro. Nadsapi madija huapima Diocca pajissehedsa mari icanabaqquihissa tajari. <sup>16</sup> Jehe, pocca pajissehepi bica tani, deni tojani, inajaro. Tahidepi iadsa ahuatora taporaha jidapanana iadsa ahuato tajaro. Najaropi Jesocristo tahimaripaji. Najarodsa pajissa inajaro. Pina jiri jiri inajarossa najaro:

Pohuapa assire tojadsapa pina madija iassa naha tojajari.

Iadsa Dio Corime Attipa: —Dio Bedipa Imehi Attidsa ibora tajari. Pohuapa Imehidsa pocca ima inapajiranissa tajaro —najari.

Diocca dodosse tabaqqui memehujicca naco Dio Bedi qqui toquinahi.

Najari tahimari madija huapimadsa ecomeraridsajaro.

Nadsama ajijaro dsamadsa madimanajarideni pohua tahimaridsa pajissa quinajari.

Pohua naco Diojine memehujaji toccamacossanijari.

## 4

#### *Mamaidsadedenicca marinaja imitta-jerana*

<sup>1</sup> Dio Corimecca marinaja iadsa ahuato inanajaropi ajima najaro: Nidsa dsotode Jesocristodsa jehe quinajarideni motapa jehenijirideni tomijiradsapi Diocca pajissehe inebomananitohui. Mamaidsadedeni attidenidsana iboraqquiri nahitohui. Naraha najaro mamaidsadedenicca marinajapi Satanacca dodosse tocorimedenicca marinaja.

<sup>2</sup> Aja mamaidsadedenipa poccadeni marinaja pina pajissassa naraha maidsa maidsa quinajari. Poccadeni tabaccorehejine pohuadeni bodideni ccaracossa-ridsamanajari.

<sup>3</sup> Ajina mamaidsadedenicca marinajapi: —Cajicajipi poni —quiquinanajari. —Jijipa naco motapa oppina tahi, tijipamana tejeraji —quiquinanajari. Naraha najaro marinajapi pajissa jerani, tabaccora tani. Dsamatapa, bani huapimapa Dio inahatoridsajari. Jesocristodsa jehe inajaropi Diocca pajissehe nahatoqquiri inajaro. Nadsapa iadsa jijipa oppina tahicca nohuerahi. Diodsa ettipi: —Jehe, epejeni Abi Dio, ticca daniji ijipahijine bica tahi —inadsapi huapima ijipani bica tani. <sup>4</sup> Diocca

nahatonijipa huapima bica tahi. Pohuajine nahatoridsahi ettajo-jarana. Dio iadsa inanadsapi manaco Pohuadsa: —Jehe, ticca daniji iadsa bica tahi —inana. —Jipera onani, oppina tahi —inejerana. <sup>5</sup> Pocca daniji dsamatapa, bani naco ijipahijinepa Dio Pohuadsa huati inadsa Pohua Attijine icca jijipa tohuiredsapa ijipani bica tahi, onajaro.

*Jesocristocca medse bica tahijinepa ajama nana*

<sup>6</sup> Jehe Timoteo, aji tiadsa dsodo onajarocca marinajapi imecotedenidsa mari mari taridsadsapi najaro marinajadsa teribo ssiaja tadsa naqui Jesocristocca medse bicahi tjanitohui. Jesocristo tahimari pajissacatohui tibodi huahuatoma dsanapodsapi Diocca marinaja pajissacca tiattapojaro tinebo-jeradsa naqui ticca jeheniji denima todacorani nanitohui.

<sup>7</sup> Naraha ajijaro namicca ima, tohuatti ponimacca Dio Attissa nejerajaro timit-tadsapi: —Jehe pajissa —tejerana. Dio Attissa tinananiijinepi Pohuatohuira tibodi huahuato nana, Pohuadsara ibora tinanijine, onajaro. <sup>8</sup> Ajana madija tarabaidside dissera tadsapa pohua assire todacora, pohua biji todacora, pohua isso naco todacora tahi. Ccanajabote dsojode naco pajirahitohui. Najarossa najaro ima denima bica tajaropi Diodsa dissera inadsa Pohuadsa icca jeheniji todacoraniijine. Najaroa icca madie ajijaro namidsa bica tanijine. Nidsa memehuaji Diodsa imadidsa naqui icca madie denima bica tanijine. <sup>9</sup> Ajijaro ima tiadsa dsodo onajaropi pajissa. Najaro ima nemanehedsa madija huapima jehe quinana. —Pajissa jeranitide —quina-jarana, onajaro. <sup>10</sup> Najarojine ocasserani eraha nema nehe disseraqquri inadsa idsepe ijijaropaji. Abi Dio camitta tajaripa ia tonassiajabacquihiijine tohuini imadijaro. Pohuapa madija huapima Tonassiajade. Pohuadsa jehe quinajarideni inassiajabacquihitohui, pajissa.

<sup>11</sup> Jehe Timoteo, ajaro ima tiadsa dsodo onajaropi ticca mamari tabaqqui mari ticanabaqquidsa: —¡Aji occa marinajassa najarora tinanamanaji! —tana, onajaro.

<sup>12</sup> Naraha madija attideni tiadsa: —Dsabisso tijani. Ssamo tinani. ¿Tettidsa iboraqquri inanijinequi? —quinadsapa ticappina-jeraji. Attidenidsa naqui jehe tejerana, onajaro. Manaco ticca madiera denima bica tinanadsa Jesocristodsa jehe quinajarideni qqui toquinadsapa pina ticca madiessa inanamananitohui. Ima bicanira huati huati tinadsapi pohuadeni naco ima bicani huatide tocahatterahijine. Madija huapimadsa teti cahanari canadsapi pohuadeni naco tohuati huanehe tocahatterahijine. Diodsa ticca jeheniji dacorani qqui toquinadsapa poccadeni jeheniji todacoraniijine. Imasiri tinana-jeraniijine tia cacahuade nahato tinadsapi pohuadeni naco pohuadeni cacahuade tocahatterahijine. <sup>13</sup> Tiahuaji bacco onejeraccadsama ticca mamari tabaqqui titinequeriqquibaqqui nadsa pohuadenidsa Dio Atti hua hua tidsanapona. Dio Attidsa iboraqquri nahijine pohuadeni tinahatidsebaqquidsa mari ticanabaqquihissa tajo, onajaro. <sup>14</sup> Dio Atti maride nahato tinanijine Dio pocca nahatohue tiadsa da inajaropi teti ajima tejerana. Najaropi Jesodsa jehe quinajarideni cacahuadedeni titedsejemacca ima tiadsa ecomeramanade. Pohuadeni dsepedsa titatidsa bara quinadsa Diodsa huatide toquejenadsapa tiadsa inanajarode. Najaro Diocca daniji ticajijaropi tinebo tejerana, onajaro.

<sup>15</sup> Jehe Timoteo, ajijaro imassa tinananiijine dissera tinaji. Nema tadsapi Diodsa tidsepe ijie tobicadsanapodsapi najaro huapima qqui toquinahijine. <sup>16</sup> Ticca madie tecahuanissa taji. Dio Atti naqui mari tanissa taji. Nema tidsanapodsapi tia, ticca mamari tabaqquima Diojine ticassiejeraniijine, onajaro.

**5**

*Jesodsa jehe quinajaridenidsa pina ia imecotessa inaridsana*



<sup>1</sup> Timoteo, tetti bica tadsa ticca mamari tabaqqui mari ticanabaqquina. Jadahideni ima cajimanadsapa pohuadenidsa johua tejerana. Pina ticca abi noppine ticap-pinarossa tadsa mohuaradsa pohuadenidsa huati tinanissa taji. Dsabissodenidsa naqui pina timecotedsa huati tinajarossa tadsa mohuaradsa pohuadenidsa huati tinaji. <sup>2</sup> Jadanideni mari ticanabaqquidsa naqui pina ticca ami mari ticanajarossa tadsa mohuaradsa mari ticanabaqquiji. Dsohuatodenidsa naqui pina timecotedsa huati tinajarossa tadsa mohuaradsa ponidenidsa huati tinaji. Ponidenidsa naqui ima tinana-jeranijinepi tia tecahuanissa taji, onajaro.

*Tabira tocajamanajarodeni acco icamabaqquinijine*

<sup>3</sup> Jehe Timoteo, amoneje maqqui dsoqquejari tabira tocajadsa ponicca madija nohueradsapa bijinideni acco ticamabaqquina, onajaro. <sup>4</sup> Naraha tabira tocajani bedideni animana, jinodideni animana nadsapa pohuadenina tahide imenideni, midinideni cacahuade tocahatterana. Ajina, ponipi tahide poni bedi, poni jinodideni naco badsiraqquri nadsa ecahuabaqquijari. Nadsapi dsotode poni naqui tabira tocajadsa cappira-jeranijine poni bedideni, jinodideni ponidsa huatideni huanacquiri nana, onajaro. Nema inanamananipi bica tani. Dio naco pohuadenidsa huatidse tahi. <sup>5</sup> Amoneje tabira tocajamanajarodeni pajissa ponideni accode cappiramanadsapi ponideni bodini: —Dio ohua acco camahitohui –quiquinanajaro. Dsome, ssiaja Diodsa huati huati dsadsanapomana najaro. <sup>6</sup> Naraha tabira tocajamanajaro motadenipi Dio jirehe madimanajaro. Ponidenipi namicca ima tohui, aji ponideni tohuini quinanicca tohuira madiridsamanadsapi ponidenicca madiepi pina huati-jarossa najaro. Aji Diocca camittehe jiquejeranicca cappiramanajaro. <sup>7</sup> Jehe Timoteo, ticca mamari tabaqqui tocahatterahijine najaro ima mari ticanabaqquina. Pocca-deni madija amoneje tabira tocajajaro cacahuade tocahatteradsapa madija ohuaha attideni pohuadenidsa: —A, Diocca madijaraha poccadeni madija tabira tocajajaro cacahuade jiperaqquri nahi –quina-jarahijine. <sup>8</sup> Naraha madija pohua pocca madija cacahuade jipera tadsapa bica tejerani. Aja pocca odsadsa madimanajarideni naco ecahuabaqquihijine jipera tadsapa pocca jeheniji pina nohuerajarossa najaro. Pocca ima tabaccora tani, pina Jesodsa jehe najarajaricca imassa naraha denima tabaccora tani, onajaro.

<sup>9</sup> Nadsama Jesodsa titiqueriqquimana najarodeni amoneje Jesodsa jehe quinajaro tabira tocajamanajarodeni acco acco titicamaridsa-baqquimana nanijinepi oninideni dsodo tiquinaji. Nadsama huajano 60 cajimanajaro, denima huajano cajimanajaro najarodenira oninideni dsodo tiquinaji. Naraha ponidenicca huajano 60 bacco tejerajaropi oninideni dsodo tiquinejeraji. Nadsama oninideni dsodo tiquinanijinepi ponidenicca madie ajima nanina bica tani: Amoneje tahide ponicca maqqui dsoqque-jaraccadsama najaridsara madinissa tapojaro. <sup>10</sup> Poni dsapani ijjaropi ima bicani inanaridsani madija huapimadsa ahuato tajaro. Pina ponicca ejedeni inanapihissa tajari, pina ponidsa madija bacco quinadsa naco itapabaqquihijine nanajorapo najaro. Jesodsa jehe quinajarideni acco camade jipa tajaro, amorideni ssahuade naqui ibora tajaro. Madija nanajidso toquejenajarideni naco acco acco ihicanabaqqui najari. Ima bicanidsa dsapani ijidsanaponijine dissera tajaro. Najarossa najarora oninideni dsodo tiquinaji, onajaro.

<sup>11</sup> Naraha amoneje ponidenicca huajano ajamani pina 60 bacco tajararaha tabira tocajajaropi oninideni dsodo tiquina tejeraji. Najarodenipi maqquideje ohuaha cajimanapomanijine tohuini quinadsapi Cristodsa dsapanideni ijimananijine nebo-mananitohui. <sup>12</sup> Nema quinajarodenipi tahide attinideni: —Jehe, Cristodsara odsepe ijiniijine –quinaporaha dsotodepi ponideni attinidenissa inanamana-jerajaro. Nadsapi ponidenijine ponidenidsa ima ssonarijaro. <sup>13</sup> Ponidenipi dsapanideni ijiniijine tohuibomanadsa odsa onihihujira qquide jahiridsajidede rajaro. Naraha najaro

imaha ojari-jerani. Imarinideni onhipi huajijiradsa ima ponimacca huati huati nanaridsamana najaro. Ponidenipi madija ohuahadenicca imadsa ssonacossamanagero. Ima bica tejeranicca naqui huati toqquimajidede rajaro. <sup>14</sup> Najaro noppineni ohuattipi: Amoneje dsohuato tabira tocajamanajarodenipi maqquideje cajimanapomanijine bica tani. Ejedeni naco cajimanapomanijine bica tani. Ponidenicca odsa naqui ecahuamananijine bica tani. Ponidenicca madie bica tadsapi iadsa jiperaqquri najaridenipa Jesocristodsa iquejenajarodenidsa ima inassonarimananijine ssamo tani. <sup>15</sup> Nema onajaropi tabira tocajamanajaro motadenipi Jesocristodsa jehe quinaporaha nebomanadsa Satanadsana toquejenajaro.

<sup>16</sup> Jehe, nadsama amoneje Jesocristodsa jehe nadsapi ponicca madija tabira tocajamanajarodeni acco icamanijinepi bica tani. Pina poni midini tabira tocajadsa, imeni tabira tocajadsa, onihideni tabira tocajamanadsa naqui acco icamabaqquinijine bica tani. Nema nadsapi Jesocristodsa quequeriqquimana najarideni ponideni acco camade dsepedeni ijimana-jarahijine. Naraha tabira tocajamanajarodeni bedi cappiramana, bedeni cappiramana, jinodi cappiramana nadsapi najarodenina Jesocristodsa quequeriqquimana najarideni acco acco ihicamabaqquimana nanijine, onajaro.

*Jesodsa jehe quinajarideni cacahuadedenicca marinaja denima anini*

<sup>17</sup> Jehe Timoteo, ima onihi naqui: Jesodsa jehe quinajarideni cacahuadedenipa poccadeni cacacahua tabaqqui ecahuabaqqui-manahissa tadsapa pohuadenidsa da da dsadsanapomana nahijine. Dio Atti maride dsepedeni ijimanadsapa pohuadenidsa denima da da dsadsanapomana nana, onajaro. <sup>18</sup> Najarossa najaro Dio Atti dsodo nanidsa ajima najaro: —Aroso jidsadsa trigo nocco catojahijine bohui ttai ttai nadsapa bohui bono ssoque tacossamana tajarajo. Pohua naco pocca ttainajadsa jipahijine -napohui nade Dio. Pohua Atti onihi dsodo napojaro naqui: —Tatarabaidssadenipa poccadeni tarabadsa manaconi cacajimana nana -napohui nade.

<sup>19</sup> Madija ojarria itide tiadsa huati tadsapa: —Jesodsa jehe quinajarideni cacahuadepa ima inanani -nadsapa amadsati pajissa tejeraji. Naraha madija pamaha itide, denima huatimade tojari nahitide tiadsa huati toquinadsapa: —Pajissa inoccodsa qqui inani -quinadsana timittadsa pajissa tana. <sup>20</sup> Nadsapa pocca ima nebojaradsa Dio Atti mamarihuaji Jesodsa jehe quinajarideni huapima mittamanahijine huati ticanajo. Nema tadsapi tijine huapima imasiri inanamananijine noppineni cappinamanahitohui, onajaro.

<sup>21</sup> Jehe Timoteo, ohuatti Dio mittahi, Pohua Bedi Jesocristo naco mittahi, Dio pocca dodosse tabaqqui toquejenahijine icattejidsa-baqquijarideni naco mittamanahi. Nadsapi tiadsa ajima onajaro: Occa marinaja tiadsa dsodo onajaropi nemanehetecahuanissa taji. Madija ojariadsa teti huana tani ojari nejeraji. Pina titesse ima cajidsa naco: —Najaripa otesse, huati ocana-jarana -tejeraji. Nama naha huati ticanajo. Madija huapimadsa ima tijine pajiranissa tana, onajaro.

<sup>22</sup> Madija Jesodsa jehe quinajarideni cacahuade tojahijine ticattejidsahijinepa tahide pocca ima tibodi huatonissa taji. Amadsati pohuadsa bara tadsa Diodsa huati tina-jeraccana. Aja ticattejidsajari imasiri inanadsapi tiadsa naqui ima ssonarirana. Paji, madija ohuahacca imasiridsa tiquejema tejerana, onajaro.

<sup>23</sup> Tiadsa ohuatti onihi naqui: Huajijiradsa tidstone coma tadsapi passo ponira dse tejeraji. Nomi tinanijinepi uva ppejene ssicatahi naco badsira taha dse tana, onajaro.

<sup>24</sup> Ajijaro ima teti ajima tejeraji: Madija motadenipa imasiri inanamanadsapi Diocca najidsohuehuaji bacco toquina-jaraccadsama poccadeni imasiri ia huapima nahatoqquri inaponi. Naraha motadenipa ahuatoranidsa imasiri inanamanadsapi huapima ssamoqquri inaccani. Naraha nidsa Dio Pohua baccohuaji huapima

idomo huadsana ahuatoranidsa ima inanamanajarocca Diojine ahuato tanitohui. <sup>25</sup> Najarossa najaroa ima bicanicca naqui ahuatonidsa inanamanadsapi huapima qqui toquinahi. Naraha ima bicanicca ahuatoranidsa inanamanadsapi nidsaranibote najaro naqui Diojine ahuato tanitohui.

## 6

### *Madijacca dodosse toquejenajari Jesodsa jehe quinajarideni ajama quinana*

<sup>1</sup> Jehe Timoteo, madijacca dodosse toquejenajari Jesodsa jehe quinajaridenidsa ajima onajaro: Tiadeni dossede attidenidsa iboraqquri tiquinaji. Pohnadeni noppine ticappinamanadsa mohuaradsa tiadeni dossededeni attideni tecomeramana naji. Nema tiquinadsapi tiadeni dossededeni Dio oni itamassomana-jarahitohui. Icca mari-najadsa naqui ima inassonarimana-jeranitohui. <sup>2</sup> Tiadeni dossededeni Jesodsa jehe quinadsa naco tettidenipi: —A, ohua dossedepa Diocca madija tojadsa ohuemecote tojahi. Pohna attidsa ibora onejerana –tiquinejeraji. Jesocristojine timecote tojajari. Diopa pohnadsa huati huana tahi. Pohnadsa denima bicaqquri tiquinaji. Pohnadsa tarabadsa tiquinanissa taji. Nema tiquinadsapi timecote acco ticamamanajaripaja.

### *Madija maidsehe mamaridedenipa ssamoqquri najari*

Jehe Timoteo, ajijaro marinaja ticca mamari tabaqqui tinahattabaqquihissa tajo, onajaro. <sup>3</sup> Aja madija marinaja onihi mari mari najaripa ia Medsede Jesocristo tahimari pajissaccassa nejerajaro mari mari nadsapa pocca marinajapi maidsehecca. Aji Diodsa imadinissa tanijinecca marinajassa nejerajaro mari mari nadsa naco pocca marinajapi maidsehecca. <sup>4</sup> Najari maidsehe mamaride pohna bodipa: —Occa marinaja deni tojani. Ohuapi nahato onani –naraha pohna bodipa ssamo tahi. Madija namajide rajaripa madija ohuaha tedseje ima ponimacca ahuaaji huati ahuaaji huati quinahijine tohuini najari. Naraha najaro imapi bica tejerani. Pocca ima nema nadsapi pohna tedseje imahaha canajarideni pohnajine pohnadeni tessecca nahatohue acconi cahadirejari, nanacassera canajari, catamassore canajari, pohnadeni bodidenidsa maidsani huahua quinajari. <sup>5</sup> Pohnadenipa cahadirere cacana najari. Huadieje bodideni tossamomanajari. Diocca pajissehe pohnadenidsa tohuatorajarossa najaro. Pohnadeni bodi naco: —Diodsa iquejenadsapi idsepe sseqquri nanitohui –quinaraha najaropi pajissa jerani.

<sup>6</sup> Diodsa iquejenadsapi manaconi bicani icajini. Naraha najaro manaconipi pina dsinero imenissa, todsepetajissa nejerani. Najaroa aji Diotohuira dissera inadsapi pocca daniji huemeje huemejereje naraha najarodsa etidsedsa: —Jehe, epejeni, bica tani –inajaro. <sup>7</sup> Ajijaro dsamadsa issonadsapi idsepetaji jirehe issonajaro. Idsoqquedsa naqui idsepetaji dsojo inejerahitohui. <sup>8</sup> Nadsapi jidapana imadiccadsama ijipanijine icaji, edsanijine icaji nadsapi najarodsa etidsena, onajaro. <sup>9</sup> Naraha madija motadenipa dsepedeni sseqquri nahijine tohuira madimanadsapa tabaccorehe inanamana tani. Nama quinadsapa imasiri inanamanadsapi Satanacca maidsehedsa todsepe toquejenajarissa quinajari. Ssamoqquri nadsapa bica tejeranicca tohuini, oppina tanicca tohuini, ponimacca tohuini quinajari. Nama quinadsapa pohnadenijine tabaccorehe pohnadenidsa ssonarajaro. Poccadeni ima naqui tossamoridsajaro. Najaridenipa Diocca najidsohuedsa toquejenahitohui. <sup>10</sup> Dsinero huemani tohuini inacomadsapi tabaccorehe onihi onihi inanaridsa tani. Madija motapa dsinero tohuini, todsepetaji tohuini quinadsa Diodsa tohuajimanadsapa poccadeni jeheniji inebomanajaro. Pohnadenidsa ocasserehe bacco nadsapi pina boba imedsa jaro canajarissa najaro. Tabaccorehe pohnadeni bodidsa jaro todsimadsapi oji oji dsanapomanajari.

### *Jesocristodsa jehe tadsapi ticca madie ajima nanijine*

<sup>11</sup> Naraha Timoteo, Diocca madija tijani. Pohnadsa tidsepe ijidsapi ima tabaccora taniccadsa tiajini naji. Ticca madie Diocca dossenijidsa pajiranissa tanijinepi dissera tinaji. Diodsa ibora tinadsapi Jesodsa jehe tidsanaponijine dissera tinaji. Diodsa teti huana, madija huapimadsa teti huana tanijine naqui dissera tinana. Ocasserehe tiadsa ssonariraha oji tejeradsa tinahanaji. Jone tinehe timadinijine naqui dissera tinaji. <sup>12</sup> Ia Medsede Jesocristo tahimari deni tojanijine daco tijiraji. Pina madija ittomedsa tahide bacco tapohuijine dissera tajarissa taji. Camittehe jiquejeranicca ticajinijine Dio titohui huahua najaride. Najaro camittehe bacco tinanijine daco tijiraji. Najaroa ima bicani tecomeraridsapodsa huapima mittamanajaripajade. <sup>13</sup> Jehe Timoteo, Diopa huapima madiridsamanajarideni camitta inanabaqqujari. Jesocristopa tamine Ponsio-Pirato bacchohuaji huadsa pocca ima bicani ecomerajarode. Najarideni pamahapa ohuatti nahatoto tadsa tia ocadossejaro: <sup>14</sup> Occa marinaja nemanehedsa ibora tinaji. Tijine cacajiqquimera-gerana. Nema tadsapi madija ohuahadenipa: —Tijinepi pajiranissa tejerani -quina-jarahitohui. Ia Medsede Jesocristo ccani-jaraccadsama denima maride nema tidsanapoji. <sup>15</sup> Jehe, Jesopa Djotine huada najoraponicca bacco tadsa pajissa ccanipomahitohui. Diopa huapima Cacahuade ojarihi. Pohua tohuira etidsedsapi bica tani. Taminedeni huapi taraha pohnana huapimacca tamine deni tojahi ojarihi. Medse cajiridsamanahi huapi taraha pohnana ia Medsede deni tojahi ojarihi. <sup>16</sup> Dio Pohua ojarijari naco jica-jarajari. Pohua madihihuajipi pohua ssiejene dsibehi tajarojine iajiressinijinepi ipajira-gerani. Madija iapi innocodsa Pohua qqoi inajarahi. Qqoi inahijine ipajira-gerani. Najaridsa ettipi: —iDiopa bica tahi, epeje! -ihidsanapo nana. Diopa ia Cacahuade deni tojahi nama dsanapohui, onajaro. Pajissa nema nana.

### *Madija dsepedeni sseqquiri najarideni ajama quinahijine*

<sup>17</sup> Nadsama Jesodsa toquejenajari dsepedeni sseqquiri najarideni naco ajijaro dsamacca todsepetaji cajimana, dsiniro cajimana nadsapa: —Iapi bicaqquri inani, deni iquejenani -quina-jarahijine huati ticanabaqquijo. Pohnadenipa huemani cajimanadsapa: —Najarodsana imadi-dsanaponijine ipajirani -quina-jarahijine naco huati ticanabaqquijo. Ajana pohnadeni dsepetaji amadsati amossi nani caji tani. Naraha: —Diona ia tohuacahuabaqqui-dsanapohuijine pajirahi -quinahijinena bica tani. Ia huapimapi Diocca danijidsa imadijaro. Icappira-geranijine iadsa accora tajari. Nema nadsapi madija dsepedeni sseqquiri najarideni Dio Pohnadsana huatidsemanahi ojari nana, onajaro. <sup>18</sup> Nadsapa pohnadeni mari ticanabaqquidsa naqui ajima taji: Madija dsepedeni sseqquiri najaridenipa ima bicanira inanamananijine disseraqquri nana. Accoraqquri nahijinepa bodideni najoramanaha madimanana. Nadsapa pohnadeni cajimanahicca accoraqquri nadsa cappiramanajarideni acco icamabaqqui-manahijine da da quinahijine, onajaro. <sup>19</sup> Nema inanamanadsapi pina manaconi imeni memehuaji inahapimanajarossa najaro. Najaropi nidsaranibote pohnadenidsa tojadsapi amossi nejeranitohui. Camittehe jiquejeranicca naqui pohnadenidsa tojanitohui.

### *Timoteodsa Pablocca marinaja jicanicca*

<sup>20</sup> Jehe Timoteo, Diocca marinaja tiadsa da inajaro tecahuanissa taji. Madijapa tiadsa: —Ssamo tinani, iana nahatoto inani -quinadsapa najarideni tedseje imahaha ticana-geraji. Tia tedseje tohuatti ponimaccadsa ahuaji huati ahuaji huati quinahijineraha poni taji. —Ibodi nahatoqquri inani -quinaraha pohnadeni bodicca huatohuepi ponimacca. Diocassa nejerani. <sup>21</sup> Pohnadeni bodi huatohue ponimacca tohuini quinadsapa Diocca marinajadsa tohuajimanajari. Jesodsa poccadeni jeheniji tossamojaro.

Jehe Diopa tia ticca mamari tabaqquma tiadenidsa ima bicani inanana, onajaro. Epejeni occa ima. Ohua onipi Pablo.



## Pablopa Timoteodsa ima teppe dsotodecca dosse inajaro 2 Timoteo

Timoteopa odsa panani Epesohuaji madijari. Nahicca Jesodsa jehe quinajari-denidsa Dio Atti maride tojajari. Pablo Romahuajicca toponi cocorodsa huesdsadsapa ima teppe dosse inapomajaro Timoteodsa. Pablopa Timoteo bodi inahatidsehijine pohuadsa dsodo inajaro. Jesocristodsa pajissa dsanapohuijine, tabaccorehedsa tohuajihhi nahijine naco dsodo inajaro. Diodsa dsepe ijihissa tahijine, Epesodenidsa Dio Atti maride dissera tahijine naco dsodo inajaro.

### *Pablo nija najari*

<sup>1</sup> ¿Nija Timoteo? Ohua Pablo tiadsa occa ima dsodo onajaro. Dio jipa tadsa Jesocristocca dodosse ojararo. Ohuapi Jesocristo tahimaridsa jehe inadsa camittehe jiquejeranicca icajijaro tahimarini madija mari ocanaridsabaqquihijinepa Abi Dio, Pohua Bedi Jesocristo tedseje ohua dosse quinajaro.

<sup>2</sup> Jehe Timoteo, tiadsa ohuati huana tani. Jesocristodsa jehe tadsapi ohuadsa pina occa ejedenissa tajaro. Nadsapi tiadsa ohuattia: Icca Abi Dio, ia Medsede Jesocristo tedseje tiadsa ima bicani inanamanana. Poccadeni tohuati huanehema tia acco icamanana. Poccadeni jonehe naqui tiadsa tojana, onajaro.

### *Jesocristo tahimari ecomeraridsanijine*

<sup>3</sup> Diodsa: Jehe, epejeni, tijine bica tani, onajaro. Dio Pohuadsa ibora onani. Pina occa idideni Diodsa iboraqquri nadsa dsepedeni ihijimana najarissa onajaro. Ohua naqui obodi huire tadsa Diodsa odsepe ijijaro. Nema onadsapi dsome ssiaja, dsome ssiaja Diodsa huatide ojadapi titohui ohuati ajima-geradsa huati huati ohonanajaro. <sup>4</sup> Otohui oji oji tade. Najaro obodidsa ohuati ajima-gerani. Tia qqui omaninijine tohuini onani. Tia qqui omanidsapi ohuatidsenitohui. <sup>5</sup> Jesocristodsa pajissa jehe tanissa tajaro nahato onani. Tahidepi ticca ini Roida, ticca ami Eonise jehe quinapojaro. Najarodenicca jehenijissa tajaro Jesodsa jehe tani nahato onani.

<sup>6</sup> Nema nadsapi teti ajima-geranijine ohuatti tiadsa ajima onajaro: Dio pocca daniji bicani tahide tiadsa da inapojarodsa dissera tinaji. Pina dsippo tinajadaripomajarossa tinanaji. Najaropi Dio Atti maride tipajiranissa tanijine odsepedsa tia bara onadsa Diodsa huati onadsapi tiadsa tojade. <sup>7</sup> Dio Pohua Corime iadsa da inaridsajaripa icappinanjine jerani. Ibodi cappina-geradsa daco ijiranijine, tohuati huanehema madijadsa eti cahanari cananijine, Diocca dacorehema ia ecahuanissa tadsa imasiri inana-geranijine naqui Dio iadsa da inajaro. <sup>8</sup> Nadsama madija ohuahadenidsa ia Medsede Jesocristo tahimari tecomeradsa naqui comehi tina-geradsa mari tican-abaqquiridsana. Aji ohua toponi cocorodsa ohuedsani tahimarini timittadsa naqui ticomehi tejerana. Aji ohuapi Jesocristo tahimari mari mari onaridsajarojine todsepe ojarode. Tia naqui Jesocristo tahimari icassiejeranijinecca tecomeraridsajarojine ocasserehe tinahanaraha nema nehe oji tejeraji. Pina tetidseri naridsana, onajaro. Dio tibodi inadacora-dsanaponitohui. <sup>9</sup> Diopa ia tonassiajabaqquijari. Pohuadsa bicaqquri inanijine ia tocattejidsabaqquijari. Najaropi ia ijine jerani. Dio iadsa huati cahanari canadsa: —Madija onassiajabaqquina –napojari. Nama najaria maittaccadsama dsama inahato-geraccadsama iadsa huati cahanari canapodsapa Jesocristo iadsa da inahijine najorapojari. <sup>10</sup> Pocca tohuati huanehe iadsa ahuato inananjinepa ia Tonassiajade Jesocristo iahuaji dosse inaronajari. Jeso dsoqquedsa

nahatonidsapa paji idsoqquerinicca dsoqquehe inassamojaro. Pohua tahimari icassiejeranijineccapi camittehe jiquejeranicca iadsa ahuato inanajaro.

<sup>11</sup> Najaro ima bicani ohuacomera-ridsanijinepi Dio otohui huahua nadsa Pohuajine pocca dodosse ojararo. Pohua tahimari mari ocanabaqqui-ridsahijine ohua dosse tajari. <sup>12</sup> Nema nadsapi jidapana ocasserehe onahanaraha comehi onehe omadijerani. Ajina, Jeso pohuadsa jehe onapodsama maidsera tahi nahato onajaro. Ajijaro ima naqui nahato onani: Aji Jesocristo pohua tahimari icassiejeranijinecca ohuadsa ahuato inanajaropi tossamo-geranijine pohuana cacahuade pajirajari. Ecahuad-sanapodsapi pohua ccanihicca huada bacco tanitohui.

<sup>13</sup> Jehe Timoteo, Jesocristo tahimari pajissacca tia mari ocanapojaropi tinebo tejeraji. Cristodsa jehe tidsanapodsapi pocca tohuati huanehema teti huana tehe timadi-dsanapoji. <sup>14</sup> Jesocristo tahimari icassiejeranijinecca tecahuanissa taji. Dio Corime tibodidsa madijaripa tia acco camadsapa nema tinananijine, onajaro.

*Pablo inebomanaraha pohua tesse ojaria pohua acco icamajari*

<sup>15</sup> Jehe Timoteo, ajijaro ima timittapojaropi nahato tinani. Najaropi aji dsama Asiahuaji madimanajari Jesodsa jehe quinajaridenipa onoppine tocomehimanadsa ohua inebomanajarode. Nama quinajaridenipa huapi taraha pamahana onideni dsodo onajari: Fijero, Eremojene quinajari. <sup>16</sup> Naraha otesse ojaria onipa Onesiporo pohuana huajijiradsa ohua acco acco cacana nadsapa obodi inahatidsejaro. Najarojine ohuattipi: Diopa pocca tohuati huanehe acco camehema Onesiporocca odsahuaji madimanajaridenidsa inananitohui, onajaro. Toponi cocorodsa ohuedsaraha najaro noppineni comehi tajarade. <sup>17</sup> Pohuapa odsa panani Romahuaji bacco najonadsapa otohui qquide dissera tadsa ohua bacco tajaride. <sup>18</sup> Nama nadsapa obodipi: Nidsaranibote Diohuaji idomo huadsa naqui Dio Onesiporodsa huati huana tadsapa pohuadsa camittehe jiquejeranicca inananitohui, onajaro. Tia naqui pocca ima nahato tinani. Pohuapa tahide odsa panani Epesohuaji imadidsa obiji accode dissera tade.

## 2

*Jesocristocca dodosse tijadsapi pina soldado ibora tajarissa taji*

<sup>1</sup> Timoteo, tiapi pina occa ejedenissa tani. Jesocristocca tohuati huanehema daco tijiraji. <sup>2</sup> Madija huapima occa marinaja mittamanadsapa tia naqui ohuatti timittade. Najaro marinajapi Diotohui disseraqquri najaridenidsa maride tijaji. Pohuadeni naco pajiramanadsapa madija ohuahadeni mari icanaridsabaqqui-manahijine, onajaro.

<sup>3</sup> Ocasserani tiadsa bacco tadsapi nema nehe tinahanaji, onajaro. Jesocristocca dodosse tijadsapi pina soldado ibora tajarissa taji. <sup>4</sup> Madija soldado tojararipa soldado jarajaridenicca madiacca imadsa quejema-jarajari. Pohua dossedecca dossenijidsara ibora dsanapojari, pohua dossede inahatidsehijine. <sup>5</sup> Najarossa najaro Jesocca dodossepa pina madija ittomedsa joppa tajarissa nahijine. Ittome cacahuade attissa inanadsa tahide bacco nanipodsapa manaconi cajijari. Naraha ittome cacahuade attissa inana-geradsapa manaconi caji-jarajari. <sup>6</sup> Jesocca dodossepa pina madija huidsaja ppade dissera tajarissa nahijine. Tarabaidside ibora tadsapa pohuana tahide ppa nahi bono cajipohuitohui. <sup>7</sup> Jehe, najarideni tahimaridenidsa tibodi huatonissa taji. Ia Medsede Jesocristopa ima huapima timittanissa tanijine tia acco camahitohui.

<sup>8</sup> Tibodi huatomaji: Jesocristopa dsoqqueraha nahatonijari. Pohuapa tamine Dabi Potemahi. Najari tahimari icassiejeranijinecca mari mari onaridsajaro. <sup>9</sup> Najari tahimarijine ocasserani onahanaridsajaro. Pina tabaccorehe tonanamanajaridenissa onehe cadenadsa ohua jore quinadsapi ohua coro idsimamanajaro. Naraha Dio Attipi

jore quinanjine ssamo tani. <sup>10</sup> Nadsapi oji onejeradsa ocasserehe huapima onahanajaropaji. Nema onajaropi Dio icattejidsa-baqquipojarideni Jesocristo tahimari icassiejeranijinecca mittamanadsa pajissa quinadsapa Dio inassiajabbaqquihitohui, Dio Pohua ssiejenema Pohuadsa madimana-dsanapohuijine.

<sup>11</sup> Ajijaro imapi pajissa tojani:

Iapi Cristo pohua tedseje ecotajarossa nadsapi nidsa dsotode Cristo pohua tedseje imadinitohui.

<sup>12</sup> Ocasserehe inahanadsapi nidsa dsotode pohua tedseje dsama huapima dossede iquejenanitohui.

Ettipi: —Jesocristocca ojajerani -inadsapi manaco Jeso iadsa: —Occa madija tija-jerani -nahitohui.

<sup>13</sup> Iapi ettissa inana-jeradsapi imajidsa tani. Naraha pohuapa pajissehera pohua attissa inanadsanaponitohui.

Pohua attissa inana-jeranijinepi ssamo tani.

### *Dio Atti maride bica tahijine ajama nana*

<sup>14</sup> Jehe Timoteo, ticca mamari tabaqquipa occa marinaja huatideni ajamamana-jarahijine pohuadenidsa huati huati tinaji. Pohuadeni attidenidsa cahadirere cana-jarahijine pohuadenidsa: —Diopa etti mittahi, ticahadirere cana-jeraji -taji. Najaro huadiejinapi ima tobica-jeranitohui. Najaro huadie mittamanadsapa poccadeni jeheniji tossamorana, onajaro. <sup>15</sup> Diocca dodosse bica tinanijinepi ibora tinadsa tidsepe ijinissa taji. Dio tinahatidsedsapa tiadsa: —Jehe, bica tinani -nahitohui. Pina tatarabadsade dissera tajarissa taji. Tarabadsa tanissa tadsapi tia dossedsa ticappina-jeranitohui. Dio Atti pajissara dsori tejeranijine mari tanissa taji. <sup>16</sup> Madija tohuatti ponimacca aji Dio Attissa nejeranicca ima huatide toquejenadsapa titaharibo tejerana. ¡Tiajini naji! Madijapa ima nema nanicca imahaha canadsapa Diodsa tohuajimanahitohui. Pohuadenijine ima denima totabaccoranitohui. <sup>17</sup> Madijapa ponimacca Dio Attissa nejeranicca ima mari mari nadsapa poccadeni marinaja pina dsamacoma tohueme jadsidsissa najaro. Denima tomotadsapi madija totabaccoraridsamana tahi. Najaro imadsa toquejenajaridenipa Imeneo, Pireto quinajari. <sup>18</sup> Najaridenipa Diocca ima pajissacca inebomanadsa ima onihira mari mari quinajari. Poccadeni marinajapi: —Jesodsa jehe inajaropi jidapana ibodira inahatonijaro. Nidsa essire idsoqquedsapi inahatoni-jeranitohui -quinaraha najaropi jidsa tani. Najaridenijine Jesodsa jehe quinajarideni mota poccadeni jeheniji tossamobote nani. <sup>19</sup> Naraha Diocca ima pajissaccadsa pajissa inanissa tadsapi marinaja maidseheccadsapi pajissa inejeranitohui. Ajina, Dio Atti dsodo nanidsa ajima najaropi: —Ia Medsede Diopa Pohuadsa toquejenajaridenidsa nahato tajari -nani nade. Onihi naqui ajima najaro: —Madija huapima attideni: “Ia Medsede Diocca madija ojan” quinajaridenipa tabaccorehedsa tohuajimanahi nana -nani nade Dio Atti dsodo nanidsa.

<sup>20</sup> Madija dsepe sse tajaricca odsa imenidsapi todsepetaji onihi onihi caji tajaro. Pina huatini ccara tanicca oro nahatoni, dsibehi tanicca plata nahatoni caji tajaro. Todsepetaji onihi naqui pina ahua nahatoni, dsipa nahatoni caji tajaro. Huapima najorehe aniridsajaro motapi obara, bica tanicajine, pina jijipajine najorajaro. Motapi oba tanicajine, pina ocoja cacahittajine najorajarossa najaro. <sup>21</sup> Najaro imapi madija pocca imasiri inebodsa bodi huire taha madi-dsanapodsapa Diodsa bica tajari. Pina todsepetaji bica tanicassa najari. Diodsa dsepe ijihijine najora, ima bica tanicara inananjine najora najari.

<sup>22</sup> Dsabissondeni tohuini quinahicca tohuini tejeraji. Poccadeni tabaccorehedsapi tiajini naji. Ticca madie Diodsara pajiranissa tanijine dissera tinaji. Jesodsa jehe najaropi tinebo tejeraji. Diodsa teti huana, madija huapimadsa teti huana tehe timadiji. Jone

tinehe timadi-dsanapona. Ia Medsedecca madija bodideni huireqquri najarideni tedseje imasiri jirehe nema tidsanapomanaji, onajaro. <sup>23</sup> Ima ponimacca pina madija pohua bodicca huati tajari timittaraha pajissa tejeraji. ¡Poni! tana. Nahato tinani ima nema naniccapi huadie toja tani. <sup>24</sup> Ia Medsedecca dodossepa johuahuera tahina bica tahi. Madija huapimadsa pohua atti bica tadsa huati huati tahijine. Madija mari icanabaqquihijine naco nahato tana. Pohuadsa madija nacasseraqquri nadsa naco mohuaradsa inahananijine. <sup>25</sup> Diodsa iboqquri najarideni naco mohuaradsa mari icanabaqqui-dsanapona. Nama nadsapa Diojine bodideni cacajiqquimerahijine itide. Nadsana marinaja pajissaccadsara pajissa quinahijine. <sup>26</sup> Diojine bodideni huatomahissa tadsapa Satanacca maidsehe inebomananijine. Satana dsepedsa toquejenadsapa pohua tohui nahicca inanamanaraha Dio tappa inabaqquihitohui.

### 3

#### *Dsama jicabote nadsa madimanajaridenicca ima*

<sup>1</sup> Jehe Timoteo, dsama jicabote nanicca ima nahato tinanijine tiadsa dsodo onajaro. Nidsa dsama jicani tohuajiradsapi imadinissa tanijine najo tanitohui. <sup>2</sup> Madijapa poccadeni ima tohuini disseraqquri nahitohui. Dsinirotohui naco disseraqquri nahitohui. Madija attidenipa —Ojine ima pajiranissa tani —quinahitohui. Bodideni naco: —Ohuana bica onani, ohuana deni ojani —quinahitohui. Madijapa attideni tabaccora tadsa atti atti quinahitohui. Imehideni attidenidsa naco iboqquri nahitohui. Imenidenidsa, Diodsa naco: —Epejeni, tijine bica tani —quina-jarahitohui. Dio Pohua noppine cappinamana-jaradsapa Dio onidsa jaja quinahitohui. <sup>3</sup> Huatideni huaneraqquri nahitohui. Puhuadeni tesse tedseje cahadiredsapa poccadeni ima epeje inanamana-jeranitohui. Madija ohuahacca ima totabaccoranijine naqui pohuama huatijidede rahitohui. Puhuadenipa imasiri inanamana-jeranijine huhuadeni cacahuade ssamoqquri nahitohui. Madijapa huadiqquri nadsa huhuadeni tessedsa najidsoqquri nahitohui. Puhuadenipa ima bica tanicadsa jiperaqquri nahitohui. <sup>4</sup> Puhuadeni tessedeni ima oppina tanicadsa ehccora-baqquimana nahitohui. Bodideni huatomamana-jaradsa madimanahitohui. Pina imasiri inanamanadsapi bodideni: —Ojine bica tejerani —quinahijine ssamoqquri nahitohui. Attidenipa: —Ohuana bica onani, nahatojide ojirani —quinadsapa huhuadeni bodidsa madija ohuaha ajamani inanabaqquimanajarissa quinahitohui. Puhuadenipa Diotohui quina-jaradsapa aji namicca ima huhuadeni tohuini quinahicadsara huahuatidsemana nahitohui. <sup>5</sup> Inoccodsa qqui inabaqquidsapa pina Diodsa disseraqquri najarissa quinaraha Diocca dacorehe ettajomanani poccadeni madiedsa ahuato tanitohui.

Nadsapi najaridenidsa tijini naji, onajaro. <sup>6</sup> Puhuadeni motapa tabacorehe tohuini quinadsa odsa onihidsa, odsa onihidsa madiridsamanajarideni icamaidsabaqqui-manahijine jone todsimamanaja naridsapohui najari. Puhuadenipa amoneje bodinideni japariqquri najarodenidsa bacco todsimamanadsapa icamaidsabaqqui-manajaro. Najaro amonejedenipi imasiri sseqquri najaro. Ponideni tohuini quinanicca imapi pina ponidenidsa joca joca najarossa najaro. Imasiri inanamananijine najoramanehe madimanajaro. <sup>7</sup> Ponidenipi poccadeni marinaja tocahattera-dsanaporaha marinaja pajissaccapi mittamana-jerajaro. <sup>8-9</sup> Aja amonejedsa maidsa maidsa quinajaridenipa marinaja pajissacca ecossamananitoahiraha pajiramana-jarajari. Puhuadenipa tabacorehe tohuinira bodideni huahuatoma-mana najari. Nama quinadsapa Jesocristodsa jehe quina-jaradsa Diopa huhuadenidsa: —Occa quejena-jarahi —najari. Naraha mamaidsadedenicca marinajapi deni toja-jeranitohui. Madija poccadeni marinajadsapi denima jehe dsanapomana-jarahitohui. Poccadeni maidsehe huapimadsa ahuato tadsapi: —A, huhuadenipa ima pajissacca ssamoqquri naha —quinahitohui. Aja huhuadenipa pina

maittaccadsama oppinaqquri najari dsoppinejedeni Janese, Jamebredenissa quinari. Poccadeni nahatohuedsa Moisesicca ima inassamomananijine disseraqquri naraha pajiramana-jarajari.

*Jesocristo tahimaridsara dissera tidsanapoji, najari Pablo*

<sup>10</sup> Naraha Timoteo, tiana occa marinaja timittadsanapojaro. Occa madie naqui qqui tidsanapojaro. Diodsa odsepe ijidsanaponijine dissera onani naqui nahato tinani. Jesocristodsa jehe onajaro naqui tiadsa ahuato tajaro. Najo tanicca naqui mohuaradsa nema nehe onahanani nahato tinani. Madijatohui ohuati cahanari canani naqui nahato tinani. Ocasserehe ohuadsa ssonaridsa daco ojirani naqui tiadsa ahuato tajaro. <sup>11</sup> Aji odsa panani Atioquiadsa, Iconiodsa, Listaradsa naqui nanajidso onahanaridsani nahato tinani. Naraha ohua Medsedepa ohua tonassiajajaride. <sup>12</sup> Aji ocasserani ohuajaropi ohuadsa ojari-jerani. Madija Jesocristodsa madimanahissa tahijine disseraqquri najarideni huapimapa ocasserani inahanamananitohui. Pajissa nema nanitohui. <sup>13</sup> Naraha tabaccoraqquri najarideni, mamaisadedeni naco denima tabaccorehe inanamaneje dsanaponi nanitohui. Madija icamaisa-baqquimanaraha pohuadenidsa naqui maidsehe ssonarinitohui. Tabaccorehejine poccadeni ima totabaccora-dsanaponitohui.

<sup>14</sup> Pohuadenipa nama quinaraha Timoteo tiana Jesocristo tahimari tia mari icanajarodsa pajissa tade. Najarodsa pajissa tidsanapoji, onajaro. Tia maridedeni nahato tinani: maidseraqquri inani. <sup>15</sup> Ejedeni tijapodsama Dio Atti dsodo nani tiattadsapi tohuattehe ticajijonajaro nahato tinani. Najaro tohuattehe ticajidsapi Jesocristodsa jehe tadsa najarojine Dio tia tonassiajajari. <sup>16</sup> Dio Atti nemanehe dsodo naniccapi Dio Pohuajine bodideni nahatoqquri nadsa dsodo quinarajo. Najaro iadsa tojajaropi bica tani. Ia acco camanijine pajirani. Ajijaro Dio Attipi pajissehe ia mari cananijine pajirani. Icca imasiri ahuato inanajaro. Icca imasiri cattemanijine pajirani. Icca madie Diodsa bica tanijine ia mari canajaro. <sup>17</sup> Madija Diocca tojajari Pohua Atti tohuattadsapa Pohuadsa dsepe ijihijine najorahissa tajari. Bica tanicca huapima inananiijine pajirahissa tajari.

## 4

<sup>1</sup> Jehe Timoteo, Jesocristo ccanipomadsa tamine tojadsapa madija huapima ec-ahuabaqquihitohui. Nadsama camittaqquri najaridenicca ima icattema, jicamanapojaridenicca ima icattema nahitohui. Nama nadsapa Dio, Jesocristo tedseje ohuatti nahatoto tadsa tia ocadossejaro: <sup>2</sup> Dio Atti mari mari taridsaji. Huajijiradsa maride tijaridsanijine tibodi titinajorapo naji. Madija Dio Atti mittade jipaqquiri nadsapa mari ticanabaqquina. Jiperaqquri nadsa naco nama naha mari ticanabaqquina. Madija ima tonanadsa naco mohuaradsa huati ticanahissa tajo: —Ima tinanajarodsa epeje taji –tana. Madija pohua bodi cacajiqquimerahijine naco mari ticanajo, ima bicani tohuira pohua bodi huatohuijine. Tohuattahijine najo tadsa naco nama naha mohuaradsa mari ticanajo. <sup>3</sup> Naraha nidsa dsotodepi marinaja bicani tohuini quina-jaradsapa mittamana-jarahitohui. Madijapa pohuadeni tohuini quinahic-cara mittamanahijine mamaride ohuahatohui naridsamanadsapa pohuadeni maride inahapimanahitohui. Naraha mamaridedenipa poccadeni mamari tabaqqi hu-atidsemanahijinera mari mari ihicanabaqqi nahitohui. <sup>4</sup> Marinaja pajissacca inebomanadsapi ima ponimaccara mittamanahijine tohuini quinahitohui. <sup>5</sup> Naraha tibodi huatonissa dsanaponijine daco tijiraji. Ocasserehe tiadsa ssonaridsa naqui nema nehe tinahanaji. Jesocristo tahimari icassiejeranijinecca madija huapimadsa tecomeraridsanijine dissera tinaji. Ia Medsedecca dossehedsa tidsepe ijidsa naqui tinapajiranissa taji, onajaro.



<sup>6</sup> Naraha ohuapi ajijaro nami onebobote nani. Odsocquenicca huada tohuajirajonani. Occa dsoqquehepi pina occa daniji Diodsa da onajarossa nanijine onajorani. <sup>7</sup> Dio Pohnadsa odsepe ijijaropi pina madija ittomedsa tahide bacco nahuajanihijine joppade dissera tajarissa onajaro. Jassi onejeradsa dissera onajaro. Dio ohua cadossejari onajicanissa tajaro. Jesocristo tahimaridsa jehe onajaro onebojeradsa najarodsara dissera odsanapojaro. <sup>8</sup> Nadsama pina jojoppade tahide bacco nahuajanipodsa manaconi bicabote pohnadsa da quinajarissa najaro naqui Dio pocca daniji bicani ohuadsa da inanitohui. Najaro danijipi Diodsa bicaququiri najaridenidsa tojanitohui. Nidsa ia Medsede ima cattemade pajirahissa tajari pohua baccohuaji idomo huadsapi Dio pocca daniji ohuadsa da inanitohui. Ohuadsa da inajaropi ohuadsa ojari-geranitohui. Pohnadsa huatideni huanaququiri najari, pohua ccanihitohuira najoramanajarideni huapimadsa da inaridsanitohui.

*Pablo Timoteodsa huahua najari, pocca etero, pocca papeo eccajonanjine*

<sup>9</sup> Jehe Timoteo, tinajo-geradsa ohua qquide huassinaja ticcajonaji. <sup>10</sup> Otessedeni ohuadsa madimanaraha Cresetepa dsama arobeni Carasiahuaji toccajari. Otesse Tito naco dsama arobeni Daomasiahuaji toccajari. Demapa otesseraha ajijaro namicca ima tohuini nadsa ohua nebodsapa odsa panani Tesaronicahuaji toccajari. <sup>11</sup> Otesse ojaria Rocana ohuadsa ojari najari. Nadsapa itesse Maraco qqui tadsa teccajonajo, onajaro. Pohnapa Diodsa odsepe ijidsa ohua acco camahijine bica tahi. <sup>12</sup> Otesse Tiquicopa odsa panani Epesohuaji dosse onajari. <sup>13</sup> Ticcajonadsapi occa etero motaranicca ssirinijine dsojo tajonana. Nani odsa panani Troadehuaji otesse Caopocca odsadsa onebode. Jehe, occa papeo naqui tohuini onani huapima teccajonaji, onajaro. Aja bani eterodsa dsodo nani pico dsanihiccana denima tohuini onani, onajaro.

<sup>14</sup> Aja ppejodsa dsepe ihijide onipa Arejadro ohuadsa tabaccorehe imeni inanajaro. Naraha ohuattipi: Epeje, pohua tabaccorehe inanajaro manaconipi Diona pohnadsa inananitohui, onajaro. <sup>15</sup> Pohnapa icca marinajadsa jipera tadsa huacossanjine dissera tahi. Paji, tiadsa naco nama narana, onajaro.

<sup>16</sup> Tahide aji odsa panani Romahuaji bacco onajonaponipi occa ima cattemanijine ima cacattemade baccodenuhuaji ohuadsa otessedeni huapima ohua acco icamamanagerade. Ohua inebomanadsapi ohua accode nohuerade. Naraha ohuapi pohnadenidsa ohuadi-gerajaro. Ohua inebomanajaro manaconi Dio pohnadeni inajidsobaququina onejerani. <sup>17</sup> Otessedenipa ohua acco icamamanageraraha ohua Medsedepa ohua nebo-gerajari. Pina ohuinoridsa huajarissa nadsa pocca dacorehema ohua tonadacoradsapa pohua tahimari icassiejeranijinecca jodio quejena-gerajarideni huapimadsa ohuacomeranissa tajarode. Jehe, odsocquebote naraha Dio ohua idinijari. Pina dsomaji ajaridsa ohua idinedsa ohua tonassiajararissa najarode. <sup>18</sup> Nadsapi obodidsa ajima onajaro: Tabaccorehe huapimadsa ohua Medsedena ohua tonassiajahitohui. Pocca cacahuehe memehuajicadsa bacco onanijine ohua cacahuahissa tahitohui, ohonanajaro. Huajijiradsa ettipi: —¡Tiapi bica tinani! ¡Deni tijani! —ihidsanapona, onajaro. Pajissa nema nana.

*Pablocca ima jicanicca*

<sup>19</sup> Jehe Timoteo, otesse Prisiradsa, ponicca maqqui Aquiradsa naqui nija onajaro. Otesse Onesiporodsa, pocca madijadsa naco nija onajaro. <sup>20</sup> Otesse Erastopa odsa panani Corintodsa ibode. Otesse Trofimopa coma tadsa odsa panani Miretodsa onebojaride. <sup>21</sup> Jehe Timoteo, ahujaji ticcajonanjine tinajo tejeraji. Dsadsajade bacco tejeradsama ticcajonani bica tani. Ahujaji madimanajarideni Eoboro, Podete, Rino, Claudia, imecotedeni huapima naco tiadsa nija quinajari.

<sup>22</sup> Jehu Timoteo, ia Medsede Jesocristo tiadsa madidsanapona. Dio tiadeni huapimadsa ima bicani inanana, onajaro. Epejeni.

## Pablopa Titodsa ima teppe dosse inajaro Tito

Tahidepa Tito, Pablo tedseje dsama onihi, onihihuaji huedaridsajari, Dio Atti maride. Nadsapa dsama Cretahuaji bacco toquinadsapa Pablo Tito inebojari, nahi Cretacca madija Jesodsa jehe quinajarideni maride tojahijine. Cretapi passo noconidsa dsama huittidsacossajaro onini. Najaro passo imeni oninipi Mediterráneo.

Tito Cretadsa madidsapa Pablo pocca ima teppe pohuadsa dosse inajaro. Jesodsa toquejenajarideni nejecoma quinahijinecca ima dsodo inajaro. Pohuadeni marideni nejecoma quinahijinecca ima dsodo, poccadeni mamari tabaqqi ecahuabaqqi-manahijine nejecoma quinahijinecca ima naqui dsodo inajaro.

### *Pablo nija najari*

<sup>1</sup> ¿Nija Tito? Ohuapi Pablo. Ohuapi Diocca medse ojani. Bedi Jesocristocca dodosse ojararo. Jesocristopa ohua cadossejaria aji pohua tahimari ohuacomera-ridsadsapi pohuadsa jehe quinahijine. Diopa tahide nahato tapojaria aja madija icattejidsabaqquijaripaja. Najarideni Dio pocca pajissehe tocahatterahijine pohuadeni mari ocanabaqquihijine ohua cadossejari. Jehe, Diocca pajissehepi Dio Pohuadsa imadinissa tanijine ia mari tocanabaqquijaro. <sup>2</sup> Pocca pajissehe icahatteradsapi camittehe jiquejeranicca icajinijine tohuini imadijaro. Diopa maidsera tahi. Najaro ima tojanijinepi maittaccadsama Dio huati tapojari. <sup>3</sup> Jehe, najaro ima dsati bicanipi jidapana Dio inanajorapojarocca huada bacco tadsa iadsa ahuato inanajaropaji. Najaro Pohua tahimari mari ocanabaqquihijine ia Tonassijade Dio ohua dosse naridsajaripaja. —Ohuatti tecomeraridsaji -najaripaja ohuadsa. <sup>4</sup> Tito, tiadsa occa ima dsodo onajaro. Aji ohua tia tedseje: —Pajissa Jesocristopa ia Tonassijade -inadsapi tiapi pina occa ejedenissa tajaro. Icca Abi Dio, ia Tonassijade Jesocristo tedseje tiadsa ima bicani inanamanana. Tibodidsa naqui poccadeni jonehe tojana, onajaro.

### *Titopa Cretahuaji Jesodsa jehe quinajarideni ecahuaridsabaqquijari*

<sup>5</sup> Jehe Tito, aji passo nocconidsa dsama huittidsacossajaro oninipi Creta, iapi nanidsa Dio Atti tojaridsanijine idsepe ijijarode. Najaro ima jiquejeraraha ohuapi occajarode. Nani Cretadsa tia onebojaropi tiana najaro ima tinajicanijine, aja Jesodsa jehe quinajarideni cacahuadedeni ticattejidsabaqquihijine tia mari ocanajarode. Cretahuajicca odsa onihi onihi naridsajarocca aja Jesocristodsa quequeriqqui-ridsamana nahihuajicca cacahuade toquejenahijine ticattejidsaridsajo, onajarode. <sup>6</sup> Nadsama Jesodsa jehe quinajarideni cacahuade tojahijinepa bica tajarira ticattejidsajo. Nahi madija ohuaha attideni pohuadsa: —Pocca ima tabaccora tani -quina-jarahijine. Amoneje ojarini cajijarina ticattejidsajo. Aja madija pohua bedideni Jesodsa jehe quinajarira ticattejidsajo. Madija ohuahadeni pohua bedidenidsa: —Pohuama madimanajari, iboqqiri nahi -quina-jarahijine. Aja madija bedideni madimanahissa tajarira ticattejidsajo. <sup>7</sup> Nadsama Jesodsa jehe quinajarideni cacahuade tojahijinepa madihissa tajarina ticattejidsajo. Nahi Diocca imadsa dsepe ijihissa tahijine. Aja madija pohua deni totonana najaripa pohua. Huadi tajari naco pohua. Dsedse coma tanicca tohuini najari naco pohua. Pohua tessecca najidso tajari naco pohua. Maidsehedsa dsiniro cacaji najari naco pohua. Todsepetajitohui mamaidsa najari naco pohua. <sup>8</sup> Nadsama aja Jesodsa jehe quinajarideni cacahuade ticattejidsajaripa madija ohuaha pocca odsadsa bacco najonadsapa: —¿Nija, bica tinaqui? ¿Tipemiqui? —nahina bica tahi. Pohuapa ima bica taniccadsa huahuatidse nadsana bica tajari.

Pohua bodi huatomahissa tadsa ima bicanira tocattejidsade nahato tajarina bica tajari. Pohuapa imari borocco, Diodsa huati huana, Diodsa dissera, imasiri inana-jeraniijine pohua cacahuahissa tajarina bica tajari. Madija nama najarina Jesodsa jehe quinajarideni cacahuade tojahijine ticattejidsajo, onajaro. <sup>9</sup> Nadsama Jesodsa jehe quinajarideni cacahuade tojahijinepa aja Jeso tahimari pajissacca pohua mari icanamanapojaridsa dissera tajarina bica tahi. Nahi pohuajine pocca marinaja Dio Atti pajiranissa tadsapi pocca mamari tabaqquicca jeheniji todacorani nanijine. Nahi pocca marinaja ettajomanajaroden naco pocca marinajadsa: —Jehe, pajissa –quinahijine.

<sup>10</sup> Jehe Tito, Jeso tahimari pajissacca maride dissera tahijine tohui onajaropi nahi tiadsa quequeriqqui najarideni motapa Jeso tahimaridsa tohuibomanahi huapi tahi. Pohuadenipa ima ponimaccara huati huati totoquina nadsapa madija ihicamaisa-baqquimana najari. Najaridenipa jiodideni mota Jesodsa jehe quinaraha poccadeni marinaja aja huissinaja cajimanahijinecca nebomana-jarajari. <sup>11</sup> Najaridenipa denima mari quina-jarahijine joma tinanabaqquijo. Ajana, poccadeni marinajajinepi madija ohuaha ohuaha poccadeni odsacca madijama ssamoni ahuamanahi. Poccadeni marinaja tabaccora taraha najarodsa dsiniro cacajimana najari. <sup>12</sup> Ajina, maittaccadsamacca ima pohuadeni tahimarissa najaro Cretadenicca madija ojaria ima nahatojide rabote huati tapojaripa: —Occa madija Cretadenipa maidsajidede rahi. Pohuadeni tessecca naco huadiqquri nahi. Pina bani huadi tajarissa quinahi. Tarabaidseraqquri naraha jipajidede rahi –nahi nade. <sup>13</sup> Jehe Tito, pohua attipa pajissa. Nadsapi ticca madijadsa tetti dacorehema huati ticanabaqquijo: —Paji, marinaja maidsehecca maridedeni caji tahi. Tiadeni tocamaisabaqquihijine tohuini quinajari. Jeso tahimari pajissaccadsara jehe tiquinaji –tana, onajaro. Daco tijiraji. Tetti mittamanadsapa poccadeni jeheniji todacorapomanijine. <sup>14</sup> Nadsapa jiodidenicca ima ponimacca nebomanahijine. Jeso tahimari pajissacca ettajomanajaro attideni naco nebomanahijine. <sup>15</sup> Ajijaro imapi nahatoqquri inani. Najaria aja madija Djijine bodideni huireqquri najaridenidsapa huapima oppinera tahi. Pina jipamanahicca, pina dama quinahicca, pina qqui toquinahicca huapima bodideni huireqquri najaridenidsapa bica tahi. Naraha aja Jesodsa jehe quina-jarajaridenipa bodideni tabaccoraqquri nadsapa pohuadenidsa bica tahicca nohuerahi. Huapima pohuadenidsa oppina tahi. Pohuadeni bodicca tabaccorehejine ima bicanira icattejidsamananijine ssamoqquri najari. Bodideni ima bicanitohui huahuatomanana najarajari. <sup>16</sup> Pohuadeni attipa: —Diodsa jehe inani –quiquinanaraha poccadeni madiesa pohuadenijine ima ahuato tani: Diodsa jehe quina-jarahi. Pohuadenipa Diodsa tohuajari nadsiqquri nahi. Dio Pohua Attidsa naco iboqquri nahi. Pohuadenipa ima bicani inanamananijine ssamoqquri najari.

## 2

### *Dio Attira mari icanabaqquihijine*

<sup>1</sup> Naraha Tito, tiana madija mari ticanabaqquidsapa Diocca marinaja pajiranissa taniccama pohuadeni mari ticanabaqquijo. <sup>2</sup> Jadahideni ajama quinahijine mari ticanabaqquijo. Mohuaradsa madimanana. Nahi madija ohuahadeni madierideni qqui toquinadsapa: —Jehe, poccadeni ima bica tani –quinahijine. Bodideni huatoma-manahissa tadsa ima bicanira tocattejidsade nahatoqquri nahijine. Pina aji Diocca imassa najarora icattejidsamananijine. Jadahidenipa Jesodsa jehe quinahissa tahijine. Diocca tohuati huanehema huapimadsa huatideni huanagguiri nahijine. Ima ocassera tanicca naqui mohuaradsa inahanamana-dsanaponijine.

<sup>3</sup> Najarossa najaro amoneje jadanideni naqui mari ticanabaqquiji. Dio noppine cappinamanadsa madimananissa tanijine. Madija pohuama inatabaccoramanahijine

ima ponima huati huati nanaridsamana nejeranijine. Dsedse coma tanicca naqui tohuini quina-geranijine. Ponidenicca madiedsa ima bicani ahuato inanamananijinena bica tajaro. <sup>4</sup> Jehe, amoneje imani joconi toquejenapjaropi ajijaro imadsa dsotodenicca mari icanabaqquimananijine bica tani. Ponidenicca maqquidsa, ponidenicca ejedenidsa naqui huatinideni huanagquiri nadsa inamadibaqquimanahissa tahijine. <sup>5</sup> Bodinideni huatoma-mananissa tadsa ima bicani tocattejidside tocahatteranijine. Maqquideje ohuaha tohui quina-geranijine. Ima bica tejeraniccatohui bodinideni huahuatoma-mana nejeranijine. Ponidenicca odsa bica tanijine cacahuadera tocahatteranijine. Ponideni attinideni bica tadsa ponideni tassani acco acco ihicamaridsabaqquimana nanijine. Ponidenicca maqqi attidenidsa naqui iboraqquiri nanijine. Jehe, najaro ima tocahatteradsapi madija ohuaha ponidenicca madie qqi toquinadsa: —Dio Attipi tabaccora tani -quinahijine ssamo tani.

<sup>6</sup> Jehe Tito, najarossa najaro dsabissodeni naco bodideni huatoma-manahissa tahijine mari ticanabaqquijo, aji ima bicanira tocattejidside tocahatterahijine. <sup>7</sup> Tito, tia naqui timadinissa taji, ticca madie pohuadenidsa ahuato tanijine. Nahi dsabissodeni ticca madie qqi toquinadsapa: —Ia naqui nema inana -quinahijine. Mari ticanabaqquidsa naco maidsehe jirehe, jidsehe jirehe, pajissara Dio Atti ponira mari ticanabaqquijo. <sup>8</sup> Ticca marinaja bica tadsa tinapajiranissa taji. Nahi ticca marinajadsa: —Bica tejerani, pajiranissa tejerani -quina-jarahijine. Nadsapa madija ticca marinajadsa jiperaqquiri najarideni tiadsa ima inanamananijineraha pohuadenipa cappinamanahitohui. Tetti pajiranissa tadsapi iadsa ima inanamananijine ssamomo tahitohui.

<sup>9</sup> Nadsama aja madijacca dodosse mamadimani najarideni naco ajama quinana: Pohuadeni dossede attidenidsa iboraqquiri nahijine. Huatidsehema dsepedeni ihijimana nahijine. Pohuadeni dossede attidsa naco tossonidsimamana-jarahijine. <sup>10</sup> Botimana-jarana. Maidsamana-jaradsa pohuadeni dossede atti inapajiramananissa tana. Nahi poccadeni madie qqi toquinadsapa: —Ia Tonassiajade Diocca marinaja bica tani -quinahijine.

<sup>11</sup> Jehe, Dio madijadsa huati cahanari canahi ahuato inanajaro. Najarodsa madija huapima tocassiejerahijine pajirani. <sup>12</sup> Dio iadsa huati cahanari canajaricca imapi ia mari canajaro, aji ibodicca imasiri inebonijine, ajijaro namicca ima tohuini inajaro inebonijine. Ajijaro namidsa imadidsa icca madie bica tanijine naqui ia mari canajaro. Ibodi huatomanissa tadsa ima bicanira tocattejidside icahattera, icca ima Diodsa pajiranissa tanijine icahattera, Dio Pohua tohuira dissera inanijine icahattera najaropaji. <sup>13</sup> Jehe, Diocca tohuati huanehema imadidsapi Jesocristo ccanipomahicca huadatohui imadijaro. Aja icca Dio Bicabote ia Tonassiajade Jesocristo ccanipomad-sapa pohua dsibehinema pocca deni togehema ahuato taha ccanipomahitohui. Najaro pajissa tojadsapi etidsenitohui. <sup>14</sup> Jesopa itohui huati huana tadsa pohua ccaccorajari. Tabaccorehe huapima inanaridsehe imadiporaha ia todinibaqquihijine dsoqquejari. Pocca iquejenani ojari nanijine ia tonahirebaqquijaripaja. Pocca iquejenajaropi ima bicani tonanade disseraqquiri inanijine.

<sup>15</sup> Jehe Tito, aji ima huapima ojine dsodo onajarodsa mari ticanabaqquijo. Pina aji Dio Attissa inanamananijine tinahatidsebaqquijo. Aji Dio Attissa inanamanajeradsapi tetti dacorehema huati ticanabaqquijo. Pohuadenidsa: —Najaro imapi bica tejerani -tana. Madija tia ajimani inanamana-gerana. Nama quina-jarahijine ticappina-geradsa daco tijiraji.

### 3

*Jesodsa toquejenajaridenipa ajama quinahijine*



<sup>1</sup> Ticca mamari tabaqqui bodideni huatoma-manahijine pohnadenidsa huati tinaji, aja tamine attidenidsa, dsama cacahuade attidenidsa naco iboraqquri nahijine. Poccadeni dsama cacahuadedenicca marinajassa inanamananijine, ima bicanidsa dsepedeni ijimanahijine dosse dosse quinadsa naco: —Jehe, acco camade jipaqquri inani –quinahijine mari ticanabaqquijo. <sup>2</sup> Ticca mamari tabaqqui naco madijadsa tatamasso quina-jarana. Joneqquri nana, pina ahuaji huati ahuaji huati quina-jarahijine. Bicaqquri nadsa attideni bica tahijine. Bodidenipa: —Ohuapi deni ojajerani –quinadsa naco madija huapima accode iboraqquri nahijine, onajaro.

<sup>3</sup> Ia naqui tahidepi ponima imadiridsaccade. Diodsa ssamoqquri, iboqquri inaccade. Aji ia tohuini inanicca dodosse iquejenarossa inaccade. —Jehe, ima nema najarona bica tani –ihinanaridsa naccade. Tabaccoraqquri inaccade. Itesse dsepetaji acconi huadiqquri ihinanaccade. Aji ia huapima naqui ahuaji jipera ahuaji jipera inaridsaccade. <sup>4</sup> Naraha aja ia Tonassiajade Dio Pohnana madija huapimadsa huati huanajide radsapa pocca biquehe, pocca tohuati huanehe dsama huapimacca madijadsa ahuaato inaridsajaropaji. <sup>5</sup> Diopa ia tonassiajabaqquijari. Naraha najaropi ia bica inanajarojine jerani, Diona itohui huati huana tajarijine. Ia tonassiajabaqquihijine Pohnana ibodi inahiredsa ibodi dsati tojadsapi Dio Corimejine madie dsati icajijaro. <sup>6</sup> Diopa Pohna Bedi Jesocristodsa Pohna Corime da inadsa manaco Jesocristo ia Tonassiajadena iadsa da inaridsajaripaja. Dio iadsa accora tadsa Pohna Corime namanaha iadsa inaridsajaripaja. <sup>7</sup> Dio nama najaripa iadsa huati cahanari canarijine. Iapi bicaqquri inejeraraha icca imasiri manaconi iadsa tojajeranijine ia todinibaqquijari. Nadsama aji pocca camittehe jiquejeranicca tohuini imadijaropi iadsa inanajorajaropaji.

<sup>8</sup> Nadsama Tito, aji tiadsa ima dsodo onajaropi pajissa. Ajijaro imadsa Diodsa jehe quinajarideni maride dissera tinaji, onajaro. Nahi ima bicanidsa dsepedeni ijiridsamanadsa madija naco acco icamaridsabaqqui-manahijine. Najaro imapi bica tani. Najaro imadsana madija huapima tobicaridsamanahijine. <sup>9</sup> Naraha ima ponimacca nebomanana. Ididenicca ima jadani naco huati nimanimana-jarana. Najaro naqui ima ponimacca. Moisesicca marinajadsa jehe canire-jaradsa huadi huadi cacana najari naco nebomanana. Najaro ima ponimaccapi bica tejerani. Najarodsapa madija tobicamana-jarahitohui.

<sup>10</sup> Ticca mamari tabaqqui ojariajine Jesocristodsa quequeriqquimana najarideni carobemanabote nadsapa pohnadsa huati tinaji, pocca ima nebohujine. Mitta-jaradsapa pohnadsa huati timanipomaji. Naraha mitta-jaradsapa pohna tinebomanajo, tiadenidsa qquedsimapoma-jarahijine. <sup>11</sup> Madija namajide rahipa pohna atti tabaccora tanicca huatide nebo-jaradsapa nahatoqquri tiquinani: bodi tabaccora tajari. Pohnapa imasiri inanajarojine pohna huahuattajo tojaripaja.

### *Tito pohna tedsejemacca ima nahato tapohujine Pablo dsodo inajaro*

<sup>12</sup> Nadsama ohua naqui nidsa dsadsajadedesapi otesse Artema itide, otesse Tiquico itide tiahujaji dosse onahitohui. Nahi tiahujaji bacco tadsapa manaco tiapi odsa panani Nicoporihujaji ohua qquide ticcajonanijine dissera tinaji. Nidsa dsadsajadedesapi nanidsa omadinitohui. <sup>13</sup> Nadsama aja ima cacattemade Sena, pohna tesse Apolo tedseje naco poccadeni benehidsa cappiramanana-jarahijine acco ticamabaqquijo, onajaro. <sup>14</sup> Icca mamari tabaqqui naco ima bicani inaridsamananijine tocahatterana, onajaro. Madija cappiramanadsa acco camade iboraqquri nahijine tocahatterana. Nama quinadsapa pohnama madiridsamana-jarahijine. Ima bicanidsara dsepedeni ijimana-dsanapohujine, onajaro.

*Pabloa huapimadsa nija naridsajari, —Diocca ima bicani tiadenidsa tojana –najari*

<sup>15</sup> Nadsama Tito, aja madija huapima ohuadsa madimanajaridenipa tiadsa nija quinajari. Aja timadinihuajicca itessedeni Jesodsa toquejenajari huapimadsa naco nija inajaro. Dio tiadeni huapimadsa ima bicani inanana, onajaro. Epejeni. Ohua onipi Pablo.

## **Pabloa Piremaodsa ima teppe dosse inajaro Filemón**

Piremaopa Pablo pohua tesse Jesodsa jehe najari. Pohuapa Corosahuaji madijari. Pocca odsadsa naco Jesocristodsa jehe quinajarideni quequeriqquimana najari. Pohuapa dsepe sse tajari. Tarabaidasajine medsedeni cajijari.

Piremaocca medse ojaria onipa Onesimo. Najaripa pohua medsededsa huatirahi huaji tanihuaji joppa tajari. Odsa panani Romahuaji Pablodsa bacco tadsapa Jeso tahimari mittadsa jehe najari. Nadsapa pocca ima icattemanijine —Ohua medsededsa occanina -najari.

Ajjjaro ima teppe Pablo dsodo inajaropi Piremao pocca medse Onesimo inajidso-jarahijine. Pablo Onesimodsa huati huana tadsapa Piremaodsa dsodo inajaro, Piremaopa Onesimocca imadsa: —Epeje, ohuati ajimani -nahijine.

### *Pablo nija najari*

<sup>1</sup> ¿Nija Piremao? Tiadsa occa ima dsodo onajaro. Ohuapi Pablo Jesocristo tahimari mari mari ohonanajarojine toponi cocorodsa ohuedsajaropaji. Jehe Piremao, imecote Timoteo tedseje tiadsa nija inajaro. Tiapi itesse bica tinade. Titohui eti huana tani. Jesocristo tahimari maride tia inadsa idsepe ijjarode. <sup>2</sup> Ticca odsahuaji Dio Atti mittamanahijine totoqueriqqui najaridenidsa naqui nija inajaro. Aji imecote Apia ponidsa naqui nija inajaro. Imecote Ariquipo, Jesocristo tahimari maride ihicaberaridsa najaridsa naqui nija inajaro. <sup>3</sup> Icca Abi Dio, ia Medsede Jesocristo tedseje tiadenidsa ima bicani inanamanana. Poccadeni jonehe naqui tiadenidsa tojana, inajaro.

### *Pabloa Piremaotohui Diodsa huati huati tajari*

<sup>4</sup> Jehe Piremao, titohui Diodsa huati huati onadsapi: —Abi Dio, epejeni, tijine bica tani -ohonanajaro. <sup>5</sup> Nema onajaropi tijine ima bica tani quinahi omittajaro. Ia Medsede Jesodsa jehe tanissa tajaro. Diodsa toquejenajarideni huapimadsa teti huana tajaro. Najarojinea Diodsa ohuatidsejaro. <sup>6</sup> Ticca jeheniji pina icca jehenijissa najaro. Jesocristo iadsa huati huana tajarijine iadsa ima bicani inanajaro. Najaro pocca daniji huapima timittanissa tanijine Diodsa huati huati odsanapojaro. <sup>7</sup> Jehe ohuemecote, Diodsa toquejenajarideni huapimadsa teti huana tadsa bodideni acco ticamabaqquidsapa huatidsemanajari. Najaro ima omittadsapi ohua naqui ohuatidsejaro. Obodi tobicani napomani.

### *Pabloa Piremaodsa: —Ohuattissa tinanana -najari*

<sup>8</sup> Jehe Piremao, tiapi bica tinajarojine ajjaro ima tiadsa dsodo onajaro. Jesocristocca dodosse ojararojine ohuatti ocajiraha tiadsa dosse dosse onejerani. <sup>9</sup> Ajima onanina bica tani: Diocca tohuati huanehema tiadsa huati onajaro, ohuattissa tinananijine jipa onadsa. Ohuapi Pablo jadahi ocajani. Jesocristo tahimaridsa dissera onajararojine jidapapi toponi cocorodsa ohuedsani. <sup>10</sup> Ohuattidsa jehe tadsapi ohuemecote Onesimodsa bica tinana, onajaro. Aji toponi cocorodsa Onesimo bacco nadsa Jesocristo tahimari mari ocanadsapa Jesodsa jehe najaride. Nadsapa pina occa ejedenissa najari, onajaro.

<sup>11</sup> Tahidepa tarabaidasajine ticca medse tojaporaha tiadsa dsepe ijihissa tajarajari. Naraha jidapapa dsepe ijihissa tahijine ibora tahi. Tiadsa bica tahijine, ohuadsa naco bica tahi. <sup>12</sup> Pohuapa tihuaji dosse onanipomajari. Pohuapa obonoccoricca. Tia naqui pohuadsa bica tinana, pina ohuadsassa tana, onajaro. <sup>13</sup> Ohuapi Jesocristo tahimari icassiejeranijinecca mari mari ohonaridsa najarojine toponi cocorodsa

ohua coro idsimamanajaro. Nanidsa ohuedsadsa obiji acco ticamanijine tohuini onaraha nohue tijiradsapi Onesimona ohua accode tojajaride. Puhuapa ohuadsa madi-dsanapohuijine tohuini onaraha. <sup>14</sup> Tiana paji. Tetti omittejeraccadsapi ssamo tani. Ohua tohuini onanicca tohuini onejerani. Tia jipa tinaniccana paji. Naraha ohuattidsa jipera tinadsapi epeje, poni, onajaro. <sup>15</sup> Jehe Piremao, ticca medse Onesimo tiadsa nebojaripa tiadsa tojanipomahijine itide. Jidapapa ticca tiadsa nama dsanapohuijine. <sup>16</sup> Naraha jidapapa pina tiadsa medse tojapodsassa najarahi. Medse ohuahadenipa ajamani toquejenaraha puhuapa denima bica tahi. Jidapapa pahuadsa pina imecotedsa eti huana tajarossa inana, onajaro. Ohuapi pahuadsa ohuati huana tani, naraha tiana denima pahuadsa teti huana tanijine. Puhuapa ticca medseraha ia Medsedecca tojadsapa timecote tojajari.

<sup>17</sup> Jehe ohuadsa: —Ohuemecote —tadsapi Onesimo ticca odsahuaji bacco tanidsapa pahuadsa: —¡Jehe ohuemecote, tiqquedsimaniji! —tana. Pina ohuadsa: — ¡Jehe, tiqquedsimaji! —tajarossa tana, onajaro. <sup>18</sup> Nadsama tiadsa tabaccorehe inanapodsapi ohuadsa huati tinaji. Pocca ima cattemade jipa onani. Tia debe nadsa naco ohuadsana huati tinaji. <sup>19</sup> Ohuapi Pablo, aji odsepedsa dsodo onajaropi pina ohuattissa onananitohui. Pocca debe paca onanijine. Naraha tibodi huatomaji. Occa marinajajine Jesocristocca tijadsapi pina ohua debe tajarossa najaro. <sup>20</sup> Jehe ohuemecote, ia Medsededsa ibora tinadsapi pina ohuattissa tinanana. Jesocristodsa iquejenajaropi pina imecotessa inaridsajaro. Nadsapi ohua tinahatidsena, onajaro.

<sup>21</sup> Jehe, occa ima tiadsa dsodo onajarodsa ibora tinanijine nahato onani. Onesimodsa ohuattissa tinananitohui. Ohuattissa naraha tiapi denima bica tinananitohui. <sup>22</sup> Nadsama nani tiahujaji omadinijine naqui otedsejema tinanajorapona. Jehe, otohui Diodsa huati huati titiquina nana. Diojine toponi cocorodsa oqquenadsapi tiadeni qquide occanitohui, onajaro ohuatti.

### *Pablocca ima jicanicca*

<sup>23</sup> Jehe imecote Epafrapa tiadsa nija najari. Pohua naco Jesocristo tahimaridsa tojajarijine ohua tedseje toponi cocorodsa ibedsajaro. <sup>24</sup> Ibiji accodedeni Maraco, Aristaco, Dema, Roca quinajarideni naco tiadsa nija quinajari.

<sup>25</sup> Nadsapa ia Medsede Jesocristo naco tiadenidsa ima bicani inanana, inajaro. Epejeni.

## **Tohuatti ebreo cajimanajaridenidsa ima teppe dosse inaridsajaro**

### **Hebreos**

Jodiodenipa Isaraeri potemahi. Poccadeni ididenipa Abarahao, Isahaca, Jacobo quinajarideni. Pohuadeni atti oninipi ebreo. Pohuadenidsa naco: ebreodeni, quiquinanajari.

Ajijaro ima dsodode onipa ssamo inani. Dio Atti nahatoqquiri najarideni attidenipa: Pablojine jeranitide, quinajari. Jodiodeni Jesodsa jehe quinajarideni nanajidso toquejenadsa Jeso inebomanabote nadsa ajijaro ima dsododepa pohuadenidsa dsodo inajaro. Jeso inebomana-jarahijine dsodo inajaro. Ima onihipi: Moisesicca marinaja ia tonassiaja-baqquinijine pajira-gerani. Jesocristodsa pajissa inajaron denima bica tajaro. Najarodsana icassiejeranijine pajirani, najari pocca dsodonijidsa.

Maittaccadsama jodiodenipa poccadeni imasiri manaconi tojahijine bani bedi bicahi inanadsoqqe-manadsa emene Diodsa da da quiquinanajari. Najaro bani bedi emene dada Jesocristojine nebojaro jodiodeni mittamanahissa tahijine pohuadenidsa dsodo inajaro.

#### *Diopa iadsa huati tahijine Pohua Bedi dosse inaronajari*

<sup>1</sup> Maittaccadsama Diopa Pohua Atti cacomeraqquiri najaridenidsana huati tadsa najaridenina icca ididenidsa huati huati ihiquimamana najaro. Diopa pocca dosseniji, madija pohuadeni tedsejemacca ima ahuato inanajaropi onihi onihi inanajaro. Naraha Pohua Attidsa huati tahi ojari-gerani. Pohua Atti cacomeraqquiri najaridenicca huadadsa naqui ahuato inanajaro, bodideni naco inahattabaqqujari.

<sup>2</sup> Naraha jidapana dsama jicanicca tohuajiradsa iadsa huati tahijinepa Pohua Bedi dosse inaronajaride. Najarina iadsa Imehi Atti huati huati ihiquima najarode. Jehe, Pohua Bedipa tahide Imehi tedseje meme, nami, huapima aniridsajaricca inahatomanapojari. Nadsama Diopa Pohua Bedina cacahuade inanajari. Huapima jinede tojajaripaja. <sup>3</sup> Jehe, najari Dio Bedijinena Imehi Diocca dacorehe, deni tojehe, canahatori canehe iadsa ahuato tajaro. Pohuapa pina Imehi Diossa najari. Nahato tajari. Bica tajari. Meme, nami, huapima aniridsajaricca pohua atti dacorajarodsa: —Anidsanapona —nadsa pohuajine anidsanapojari. Nadsama itohui dsoqquehijine ibora tadsapa pohua emenejine ibodicca imasiri sse naridsadsa ibodi tohuirejaro. Dsotode Djojine deni tojadsapa memehuaji toccamacossanidsa Dio Bicabote inori nahatonihuaaji huittarijari.

#### *Diojine Pohua Bedi deni tojadsapa Diocca dodosse tabaqqi memehuajicca ajamani toquejenajari*

<sup>4</sup> Jehe, Dio Bedi Imehi inorihuaaji huittarijaripa Diocca dodosse tabaqqi memehuajicadsa deni tojajari. Najarossa najaro Dio Pohua Bedi oni icanacanjariipa pocca dodosse tabaqqi onidenidsa deni tojajaro. <sup>5</sup> ¿Diopa pocca dodosse tabaqquideni ojariadsa ajama najarico?

—Tiapi occa Ejedeni tijani.

Jidapana Ohuapi ticca Abi ojani —¿najarittaco?

Nohuerahi. Pohua Bedidsana nama najari nade.

Pohua Atti pocca dodossedsa:

—Ohuapi pocca Abi ojanitohui.

Pohua naco occa Ejedeni tojahitohui —¿najarittaco?

Nohuerahi. Pohua Bedi tahimari huati tapodsana nama nahi nade Abi Dio.



<sup>6</sup> Pocca Ejedeni tahidecca pina madija iassa naha tossonahijine iahuaji dosse inaronajari. Nadsapa Pohua Attipa:

—Occa dodosse tabaqqui huapimapa occa Ejedenidsa: “Deni tijani” quinana. Pohuadsana huahuatidsemana nana, onajaro –nahi nade Dio.

<sup>7</sup> Diopa pocca dodosse tabaqqui tahimarideni huati tadsa naco Pohua Attipa:

—Occa dodosse tabaqqui pina jojode dacorajarossa, pina jororoni ppocorajarossa onanaridsabaqquijari –nahi nade Dio.

<sup>8</sup> Naraha Pohua Bedi tahimari huati tadsapa:

—Tiapi Dio tijani. Ticca cacahuehe nema dsanaponitohui.

Ticca cacahuehepi dacorajaro, pajiranissa dsanaponitohui.

<sup>9</sup> Ima bicani, pajiranissa tanicca tohuinira tajaro.

Ima tabaccora taniccadsa jipera tinajaro.

Nema tajaropi Ohuapi ticca Abi Dio tia ocattejidsajaro, tamine tijanijine.

Titessedenidsa tia deni onanajaro.

Tiadsara huatidsehe deni tojanicca onanajaro –nahi nade Dio.

<sup>10</sup> Pohua Bedi tahimari denima huati tadsa naco ajama najari:

—Jehe ohua Medsede, tiapi ajijaro dsama nohueraccadsama timadipojaro.

Tiana nami tinahato, meme tinahato najarode.

<sup>11</sup> Nidsa najaropi huapima jicaridsanitohui. Naraha tiana timadi-dsanaponitohui.

Aja tinahatoridsajari huapimapa pina etero jadani tocajadsa tojorarajarossa nahitohui.

<sup>12</sup> Nadsapi domo taqquininitohui, pina etero jadani domo taqquinijarossa nanitohui.

Pina etero jadani inebodsa onihira edsajarossa najaro.

Najarossa nanitohui aji tinahatoridsajari huapimapa cacajiqquimerahitohui.

Naraha tiana nema tidsanaponitohui. Jadahi ticaja-jeranitohui –nahi nade Dio.

<sup>13</sup> Diopa pocca dodosse tabaqquideni ojariadsa naco: —Deni tijani –¿najarittaco?

Nohuerahi. Naraha Pohua Bedidsana Atti ajama najari:

—Ohuineri nahatonihuaji tittariji. Ohua tedsejepi tohuatti dacorajaro ticajiji.

Nidsaranibote tia huadidedenipa ajamani onanabaqquihitohui. Poccadeni dacorehepi onajicanitohui –nahi nade Dio.

<sup>14</sup> Aja, pocca dodosse tabaqqui assiredeni qqui inabaqqui-jarahi. Pina madija iassa quina-jarahi. Dio pocca madija tocassiejerarideni acco camadedeni ahuaji dosse, ahuaji dosse ihinaridsabaqqui najari. Najaridenipa bicaqqui naraha ajamani toquejenajari. Dio Pohua Bedina deni tojajari, onajaro. Epejeni.

## 2

### *Diocca dosseniji dsati icassiejeranijinecca eti ajima-jerana*

<sup>1</sup> Jehe, Dio Bedipa Imehicca dodosse tabaqquidenidsa deni tojajari. Nema nadsapi marinaja pajissacca imittapojaro eti ajima-jerana, onajaro. Najaro eti ajimadsapi pina Diocca jahui bicani inebodsa pajimaranihuaji huere inajarossa inarana. ¡Paji! Nema inejerana. <sup>2</sup> Maittaccadsama Dio pocca dodosse tabaqqui memehuaajicca inahattabaqquidsana Moisesidsa huati toqquimamanajari. Najaro Diocca dosseniji pajissaccapi dacorehe cajini. Madija najarodsa iboqqui nadsa tabaccorehe inanamanadsapi Dio inajidso-baqquijari. <sup>3</sup> Jidapapi Diocca dosseniji dsati icassiejeranijinecca iadsa anini. Najaropi denima bica tajaro. Naraha najaro ettajodsapi Diocca najidsohue ¿dsori inapadseje? ¡Dsori inejeranitohui! Ia Medsede pohuana tahide najaro dosseniji bicani madija mari mari ihicanabaqqui najari. Dsotodepa najaro dosseniji mittamanajarideni ia mari tocanabaqqui-manadsa pajissa tojani iadsa ahuato inanamanajarode. <sup>4</sup> Dio naco pocca dosseniji dsati pajissa tojani iadsa ahuato inanajarode. Aji qqui inapo-jerajaro ahuato inanajaropi huapi tade.

Aja comacquiri najarideni ihinanomibacqui najari, canahatoriri canaridsajari, pohua jipa tajaridsa naco Pohua Corime ihinanaridsa najaride.

*Jesopa pina iassa nadsa imecote tojajari, ia tonassijabaquihijine*

<sup>5</sup> Nidsaranibote Dio dsama dsati inanadsapi najarodsa imadinitohui. Naraha Diopa pocca dodosse tabacqui memehuaiccadsa: —Najaro dsama dsaticca tamine tiquejenaji –najarajari. <sup>6</sup> Pohua Bedina najaro dsama dsaticca tamine tojahitohui. Najaro imapi Dio Atti dsodo napojarodsa anijaro:

—Abi Dio, Tiana deni tijani. Ia madijapi ajimani iquejenani.

Naraha ¿itohui teti huatomajaroqui? ¿Nejecotohui iadsa bica tinajaro?

<sup>7</sup> Tijinepa ticca dodosse tabacqui memehuaicca deni toquejenaccahi. Ia madijapi ia ajimani tinanabaquicajaro.

Naraha dsotodepi ia deni tinanabaquinitohui. Ticca deni tojehe, ticca biquehe iadsa tinanaridsanitohui.

<sup>8</sup> Nema tinanadsapi tijine memehuaicca, namihuaicca huapima naco iadsa ajamani toquejenahitohui. Iana poccadeni tamine iquejenanitohui –nani Dio Atti dsodo nanidsa.

Jehe, madija ojariapa huapimadsa deni tojadsapa huapima pohua attidsa iboraquiri nahitohui. Pohua attidsa ibo tahijine nohuerahitohui. Jidapapi najaro deni tojehe pohuadsa toja-jeraccani. Huapimapa pohua attidsa iboraquiri najaraccahi. <sup>9</sup> Najari madija ojaría deni tojajaripa Jeso. Puhuana deni tojaporaha Djojine ajamani tojaccajari. Puhuapa Dio Bediraha pina madijassa naha tojadsapa Dio pocca dodosse tabacqui memehuaiccana deni toquejenaccajari. Nadsama Dio iadsa huati cahanari canadsa Pohua Bedi Jeso dsoqquehijine eccorajari, huapima pohuadsa jehe inajaro ia tonassijabaquihijine. Jesopa dsoqquehe inahanadsa jidapapa Djojine deni tojajari. Huapima pohuadsa iboraquiri inanijine Dio pocca deni tojehe, pocca biquehe pohuadsa inanajaro. Jehe, najari Jeso pohua tahimari jidapana iadsa ahuato tani, onajaro. <sup>10</sup> Memecca namicca huapimapa Dio pocca. Puhuajine nahatoridsapojari, Puhuajine anidsanapojari. Pohua Bedidsa jehe quinajarideni pocca deni tojehedsa toquejenahijine tohuini najari. Najarojine Jeso ocasserani inahanadsa dsoqquehijine Imehi Dio ecossa-jerajaro. Nama nadsapa Dio Pohua Bedi Jesocristo madija Tonassijade tojahijine inapajirahissa tajari.

<sup>11</sup> Jeso pohuajine imarideni tohuirejaridenipa Abi Dio ojariadsa: —Abi –quinajari. Jeso naco Dio Bedi tojajari. Nama nadsapa Jeso iadsa: —Ohuemecotedeni –nahijine cappina-jarajari. <sup>12</sup> Najaro imapi Dio Atti dsodo napojarodsa anijaro, pina Jeso Imehidsa huati huati tajarissa najaro:

—Abi Dio, ticca ima ohuemecotedenidsa huati huati onanitohui.

Tetti jijirihuaji iqueriqquidsa pohuadeni mittamanahijine:

“Abi Diopa bica tahi, bica tahi” jiri jiri onanitohui –najari.

<sup>13</sup> Dio Atti dsodo nani onihidsa naqui:

—Ohuapi Diodsara pajissa onanissa dsanaponitohui –najari.

Dio Atti dsodo nani onihidsa naqui:

—Ohuapi aji, Diocca ejedenideni ohuadsa inanabaquijari tedseje idomo huajaro –najari.

Jehe, najaro ima Dio Atti cacomerabote dsodo inajaropi pina Jeso pohua Imehi Diodsá huati huati tajarissa najaro.

<sup>14</sup> Nadsama Diocca ejedeni iapi essire icaji, itone icaji, emene icaji najaro. Jeso naco pina madija iassa naha tossonadsapa assire caji, tone caji, emene caji najari. Nama nadsapa dsoqquehijine pajirajari. Dsoqquedsapa Diocca huadidsa deni tojajari. Aja Diocca huadi Satanapa tahide madija paja inajicarihijine pajiraraha Jesojine pocca dacorehe tossamojaro. <sup>15</sup> Jeso pohua ccaccoradsa dsoqquedsapa

ia acco tocamabaqquijari, paji idsoqqueri-jeranijine. Tahidepi dsoqquehe paji idsoqquerinicca noppineni icappinehe imadi-dsanaporaha nema idsanapo-jeranijine ia tappa tabaqquijari. <sup>16</sup> Jesopa Diocca dodosse tabaqqui memehuaicca acco camade ccajona-jarajari nahatoqquiri inajaro. Abarahao potemahi iquejenajaro ia acco camadena ccajonajari. <sup>17</sup> Puhuapa pina iassa najarijine ia acco camade pajirahissa tajari. Nama nadsapa pohua pohua ccaccoradsa dsoqquedsapa icca daniji Diodsa tojajari. Najaria icca imasiri manaconi tojajari. Pahuadsa pajissa inadsapi Diopa iadsa: —Epeje, tiadsa ohuadi-jerani. Ticca imasiri ohuati ajimani –najari. Najarojine —Jesopa icca daniji Diodsa dada toqquimade deni tojahicca –inajaro. Puhuapa iadsa huati huana, Imehi Diodsa huati huana tajari. Maidsera tajari, Imehi Diodsa dissera tajari. <sup>18</sup> Pina iassa nadsa ocasserani ahujaride. Satanapa imasiridsa inannahijine pahuadsa dissera taraha Jesopa dacoradsa imasiri inana-jerajaro. Nama nadsapa ia acco camade nahato tajari. Satanajine tohuini inanicca ahuatodsa imasiri inana-jeranijine Jesocca acco camehe iadsa pajiranissa tajaro.

### 3

#### *Moisesipa ajamani, Jesocristona deni tojajari*

<sup>1</sup> Jehe ohuemecotedeni, Diopa pocca madija Pahuadsa bicacquiri tiquinanjine tiadeni tocattejidsabaqquijari. Nema nadsapi Jesodsa tibodideni huatonissa taji, onajaro. Pahuadsa jehe inadsapi pohua tahimari ehecomera najaro. Puhuapa Imehi Diocca dosseniji ccaronajari, iadsa Imehi tahimari huati tahijine. Pohua naco icca ima huahuati toqquimade deni tojahicca. Icca ima Imehidsa huati huati tajari, inajaro. <sup>2</sup> Puhuapa madija cacahuade tojahijine Imehicca dossehedsa ibora tajari. Nama nadsapa pocca ima pina Moisesicca imassa najaro. Moisesi naco Diocca dossehedsa ibora tadsapa Diocca madija cacahuade tojajari. Aji Diocca madija inajaropi Diocca odsacca ihinanajaro. <sup>3</sup> Aji icca odsapi nanahatode cajijaro. Odsa bica tocanadsapi: —Odsa bicani –inajaro. Naraha nanahatodena denima bica tajari. Najaro imassa najaro: —Moisesipa bica tahi –inaraha Jesona denima bica tajari. Puhuapa Moisesidsa deni tojajari. <sup>4</sup> Nadsama odsa huapimapi nanahatodena ihinahatomana najaro. Naraha dsama huapimadsa aniridsajaripa Dio Puhua inahatoridsajari. <sup>5</sup> Moisesipa Dio Attidsa ibora tadsapa Diocca odsacca madija cacahuade tojajari. Naraha puhuapa Diocca medse. Moisesi madidsa dsepe ijijaripa Diojine pohua noccodsa qqui tajari, mittajari najaro Diocca madijadsa ehecomera najaro. Najaropi nidsa dsotode Dio pahuadenidsa huati tahijine ehecomerapo najaro. <sup>6</sup> Naraha Jesocristopa Dio Bedi. Imehi Attidsa ibora tadsapa pina Moisesissa najari. Diocca odsacca madija cacahuade deni tojahicca tojajari. Nadsama ia Jesodsa jehe idsanaponissa tadsa ia tonassijabaqquihijine tohui imadijaro naqui Diocca odsacca madija iquejenajaro.

#### *Dio Pohua Attidsa iboraquiri inadsapi pocca dsama bicanihuaji jassi inanitohui*

<sup>7</sup> Jehe, ettipi: —Diocca madija iquejena-dsanapona –inadsapi Dio Corimejine dsodo naniccadsa iboraqquiri inana. Najaroa aji: —Jidapapi Dio tiadenidsa huahua nahi timittamanadsapi <sup>8</sup> teribodeni sibaquiri nejerana.

Pina maittaccadsama ticcadeni idi Isaraeri potemahidenissa tiquinejerana. Pahuadenipa huaribodeni sibaquiri nadsa Dio Attidsa tohuibomanajari. Dsama huamoni ssono caji, siba caji tanihuaji madiridsamanadsa Dio jipera tahicca ihinanaridsamana nadsapa Pohua nattome quinajarissa najari.

<sup>9</sup> Pohua Attipa: “Huajano 40 naha ohuacahuabaqquidsa ocanahatoriri canani qqui qqui dsanapomanaraha

'Dio ia tohuacahuabaqqui-jarahi' quinajari.

Attideni nama quinadsapa pina Ohua nattome quinajarossa najaro.

<sup>10</sup> Nama quinadsapa pohuadenidsa ohuadidsa Ohuattipi:

Jaho, Ohuadsa bodideni huato-jaradsa ima onihi tohuira dsanapomanajari.

Occa marinaja ssamoqquiri najari, onajaro.

<sup>11</sup> Nadsapi occa huadiema Ohuattipi: Najaridenipa occa dsama bicanihuaji onamadibaqquidsa jassi quinahijineraha

nahihuaji jai tojedsima-jarana, onajaro" nahi nade Dio

-nani nade Dio Atti dsodo nanidsa.

<sup>12</sup> Paji ohuemecotedeni, tibodidenidsa tabaccorehe tecahuamana-jeraji. Tibodidenidsa jehe tiquinanissa tejeradsa naqui Dio camitta tajari Pohuadsa tiajimanarana.

<sup>13</sup> Ajima tiquinanina bica tani: Huajijiradsa tiadenira ticatidserara canaji. Aji jidapana Dio tiadenidsa huahua nahi paja naccadsa: —Dio Atti imittana -ti-tiquina nadsa acco acco ticanaridserara canaji. Nema tinanamanadsapi imasiri tiadeni tocamaidabaqqui-jeranitohui. Diodsa naqui tibodideni tohuibo-jeranitohui.

<sup>14</sup> Jesocristodsa iquejenanijinepi pohuadsa jehe idsanaponijine. Pina tahide pohuadsa jehe inadsama najarossa inajonehe dissera idsanapodsa pohua ccanihicca huada bacco inadsapi pohuadsa iquejena-dsanaponitohui. <sup>15</sup> Pina aji dsodo onapojarossa najaro Dio Atti dsodo onapomajaro:

—Jidapapi Dio tiadenidsa huahua nahi timittamanadsapi teribodeni sibaqquiri nejerana.

Pina maittaccadsama ticcadeni idi Isaraeri potemahidenissa tiquinejerana.

Pohuadenipa huaribodeni sibaqquiri nadsa Dio Attidsa tohuibomanajari -nani nade

Dio Atti dsodo nanidsa.

<sup>16</sup> ¿Nejecojaridenia Dio Atti mittamanaraha Pohua Attidsa tohuibomanajaritta? Isaraeri potemahi dsama Ejitohuaji Moisesi iaqquenabaqquijaridenina paja.

<sup>17</sup> ¿Nejecojaridenia huajano 40 naha Dio pohuadenidsa huadi-dsanapojaritta? Isaraeri potemahi tabaccorehe inanamanajarodenina paja. Poccadeni tabaccorehe manaconipi dsama huamoni ssono caji, siba caji tanihuaji dsodsoqqueri narid-samanajari. <sup>18</sup> ¿Nejecojaridenidsa Dio Attipa: —Jaho, najaridenipa occa dsama bicanihuaji onamadibaqquidsa jassi quinahijineraha nahihuaji jai tojedsima-jarana

-najaritta? Isaraeri potemahideni Dio Attidsa tohuibomanajaridenina paja. <sup>19</sup> Pajissa pohuadeni tahimari nahatoqquiri inani. Diopa dsama onini Canahadsa pohuadeni jassi inanabaqquihijineraha Pohuadsa jehe quina-jarajarijine jai tojedsima-jarajari quinade.

## 4

*Dio pocca jassinaja aninihuaji ia jassi tonanabaqquidsa ia tonamadibaqqui-dsanapohuijine*

<sup>1</sup> Diocca jassinaja aninihuaji jassi inanijine iadsa tohuabaccani. Nanihuaji jaijedsimanijinepi mohuaradsa imadina, onajaro. Mohuaradsa imadi-jeradsapi ojarria dsori taja camarana. <sup>2</sup> Pajissa iadsa Diocca ima bicani anijaropi ia mari tocanabaqquimanadsa imittajarode, pina Isaraeri potemahideni mittamanapojarissa najaro. Pohuadenipa najaro ima bicani mittamanaporaha ponima inanamanajaro. Pamahapa pajissa quinaraha motapa pajissa quina-jarajari. <sup>3</sup> Iana pajissa inadsapi Diocca jassinaja aninihuaji bacco inajaro. Naraha Pohuadsa pajissa quina-jarajaridenidsapa Dio Attia:

—Nadsapi occa huadiema Ohuattipi: Najaridenipa occa dsama bicanihuaji onamadibaqquidsa jassi quinahijineraha nahihuaji jai tojedsima-jarana, onajaro -nani nade Dio.

Najaro jassinajacca imapi Dio Pohua meme, nami huapima nahatode tojadsapa huada 6 nehe dsepe ijijari. Inahatoridsehe jicanissa tadsa jassi najari. <sup>4</sup> Aji huada 7'cca imapi Dio Atti dsodo nanidsa ajima najaro:

—Dio dsepe ijia jicahissa tadsa huada ssiajapa jassi najari.

<sup>5</sup> Jassinajacca imapi iadsa ahuato tajaro, Dio Atti dsodo nanidsa dsodo napojaro. Ajidsa dsodo onapomajaro:

—Najaridenipa occa dsama bicanihuaji onamadibaqquidsa jassi quinahijineraha nahihuaji jai tojedsima-jarana –nahi nade Dio.

<sup>6</sup> Diocca ima bicani aji dsama bicanihuaji jassi quinahijinecca ima mittamanapojaridenipa Dio Pohua Attidsa iboqquri nadsa nahihuaji jai tojedsima-jarajari. Naraha dsotodedeniccana Diocca jassinaja aninihuaji jassi quinahijine pohuadenidsa tohuaba-dsanapoccani. <sup>7</sup> Diopa madija jassi inanabaqquihijine jipa tajari. Najarojine pocca jassinaja aninihuaji huada onihidsa jai tojedsimahijine najorapomajaro. Maittaccadsama Dio Atti Dabicca jijiridsa dsodo nani anijarossa najaro dsodo onapomajaro:

—Jidapapi Dio tiadenidsa huahua nahi timittamanadsapi teribodeni sibaqquri nejerana.

Aja Dio Attipa: —Jidapana –nadsapa pocca jassinaja madijadsa tohuabaccani iadsa ahuato tajaro. <sup>8</sup> Nadsama aja Moisesi biji accode Josohuena Isaraeri potemahideni dsama Canahahuaji iaqquedsimabaqquijari. Najaro dsama bicanidsa bacco todsimanaraha jassi quinahissa tajarahi. Diocca jassinaja pajissaccadsa toquejena-jarajari. Nadsapa dsotodedeniccana jai tojedsimahijine huada onihi najorapomajaro. <sup>9</sup> Najaro imapi ia Dio pocca madija iquejenajarodsa pocca jassinaja anipaji naccajaro. <sup>10</sup> Ia huapima Diocca jassinajadsa iquejenadsapi jassi inanissa tanitohui. Nanidsapi idsepe ijipoma-jeranitohui. Pina tahide dsama nahatoponi Dio Pohua dsepe jicadsa jassi najarissa inanitohui. <sup>11</sup> Nadsapi najaro Diocca jassinajadsa iquejenanijine disseraqquri idsanapona. Icca madija dsori taja cama-jarahijine. Pina tahidedenicca Diodsa iboqquri nadsa dsori tocanirejarissa quina-jarahijine, onajaro.

<sup>12</sup> Dio Attipi dacorehe caji, camittehe caji najaro. Pina jadsirecca massito cajadsireqquimerajarossa najaro. Najaro massitopi bani imedsa jaro tocadsimadsa tone tohuarihidsa tajo tahijine pajira, appone ahuatohuijine tone icanarobehijine pajira najaro. Najarossa najaro Dio Atti ibodidsa toqquedsimadsapi icca ima nattome inajaro. Ibodi huatohue, ibodidsa tohuini inanicca huapima bica tanicca, tabaccora tanicca ahuato inajaro. <sup>13</sup> Jehe, Dio huapima inahatoridsajaripa huapima qqui tahissa tajari. Pohua qqui tajarahijine inajimahi ssamo tani. Icca ima naquí Pohuadsa ahuato tajaro. Nidsa icca ima ecomeraniijinepi Pohua baccohuaji idomo huanitohui.

### *Jesopa icca ima Diodsa huahuati toqquimade deni tojahicca*

<sup>14</sup> Dio Bedi Jesopa Imehi madihihuaji toccamacossanidsapa jidapana memehuaji madijari. Pohuapa icca ima Imehi Diodsa huahuati toqquimade deni tojahicca. Ohuaha pina pohuassa najari nohuerahi. Pohuadsara pajissa inadsa pohuatohui disseraqquri idsanapona. <sup>15</sup> Aja icca ima Diodsa huahuati toqquimade deni tojahicca Jeso pina iassa naha namidsa madidsapa imasiri totonanade nattome inajari. Pina ia nanattome najarissa najari. Imasiri totonanade attia: —¿Jesopa ohuatidsa ibora taco? ¿Ibo tarana? –naraha Jesopa Imehi Diodsara ibora tadsa imasiri inana-jerajaro. Nama nadsapa iadsa huati huana tahi. Ibodi mijira tani nahato tadsa ia acco camade jipa tahi. <sup>16</sup> Pohuadsa iajiressina. —Jesopa dacorahi, ia acco tocamabaqquihijine pajirahi –inana. Pohuapa bica tahi. Iapi bica inejeraraha iadsa huati huana tahi. Iadsa ima anidsapi imasiri inana-jeranijine pohuadsa huati inadsapi ia acco tocamabaqquihitohui.



## 5

*Diopa tahide madijadsara huahua huahua nanajona najari, Pohnadsa dada toqquimade deni tojahicca toquejenahijine*

<sup>1</sup> Maittaccadsama Isaraeri potemahidenicca Diodsa dada toqquimade deni tojahicca tojahijine Dio Pohnana madija ojari ojari naha ihicattejidsa najonajari. Najaricca cacahuehepi ajima najaro: Tahidepi madijadenicca ima Diodsa huati huati ihicquima najaro. Onihipi: —Abi Dio, Tiapi bica tinani —quinahijine poccadeni daniji Diodsa da da ihicquima najaro. Onihipi imasiri manaconi bani bedi emene Diodsa da da ihicquima najaro. <sup>2</sup> Diodsa dada toqquimadepa Diodsa dsepe ijiraha pohua naco madijaja najari. Diodsa ibora tahissa tahijine pohnadsa naqui najo tani. Nama nadsapa Dio Atti mittamanahissa tajarajaridenidsa huati huana tadsapa mohuaradsa huati huati ihicanabaqqi najari. <sup>3</sup> Diodsa ibora tahissa tahijine pohnadsa najo tadsapi pohua naco imasiri inana tani. Nadsapa madijadenicca imasiri manaconi Diodsa dade tojadsapa pohua pocca imasiri manaconi naqui da da ihicquima najaro.

<sup>4</sup> Nadsama madijapa pohua tohuini nadsa: —Ohuana Diodsa dada toqquimade, imarideni huahuati toqquimade deni tojahicca ojana —najarajari. Nohuerahi. Dio Pohnana madija icattejidsajari, Pohnadsa dada toqquimade, imarideni huahuati toqquimade tojahijine. Pina maittaccadsama Moisesi imecote Araocca imassa najaro. Isaraeri potemahidenicca daniji Diodsa dada toqquimade tojahijinepa Dio Pohnana icattejidsajari. <sup>5</sup> Jesocristo naco pohua tohuini nadsa: —Ohuana Diodsa dada toqquimade, imarideni huahuati toqquimade deni tojahicca ojana —najarajari. Dio Pohnana Bedi icattejidsajari, najaro cacahuehe deni tojanicca cajihijine. Nadsapa Bedidsa Atti ajama najari:

—Tiapi occa Ejedeni tijani.

Jidapana ticca Abi ojani, onajaro —napohui nade.

<sup>6</sup> Dio Atti dsodo nanicca onihidsa naqui huati tapomajari:

—Tiapi madijacca daniji Ohuadsa dada toqquimade, imarideni huahuati toqquimade nema tidsanaponitohui.

Pina Ohuadsa dada toqquimade Merequisedecassa tanitohui —nahi nade Dio.

<sup>7</sup> Jesocristopa ajijaro namidsa madicadsa huajijiradsa Imehi Diodsa huati huati tajari. Ocasserani ahuadsa ojiema Imehidsa huati huati tajari. Bodi qquedsadsa naco atti mohui tadsa huahua najari. Imehipa dacorehe cajijari. Pohua Bedi dsoqquehedsa inassiajahijine pajirahi. Naraha Jesopa Imehi Attidsa ibora tadsa: —Epeje Abi, jipa tinanicadsana ibora onajaro —najari. Nadsapa Imehi Pohua Bedicca iborehe qqui tadsa Bedicca huatinaja mittajari. <sup>8</sup> Nadsama Dio Bedi Jesocristopa ocasserani ahua-jarahijine pajiraraha nama naha ocasserani ahujari. Nama najaripa Imehi Dio Attidsa ibora tahijine tohuattajari. <sup>9</sup> Pocca iborehe Diodsa pajiranissa tadsa Diodjine madija Tonassiajade tojahijine inapajirahissa tajari. Huapima pohnadsa iboraqqiri najaridenidsa tossiejehe jiquejeranica inanaridsajaro. <sup>10</sup> Dio Pohnajine naco madijacca daniji Pohnadsa dada toqquimade, imarideni huahuati toqquimade deni tojahicca tojajari. Pina maittaccadsama Diodsa dada toqquimade Merequisedecassa nahijine najaro cacahuehe Bedidsa inanajaro.

*Diocca dosseniji najo tanicca naqui iattana*

<sup>11</sup> Jehe, nadsapi najaro ima tiadenidsa denima dsodo onanijineraha najo tani. Tohuatti najora tanicadsa dsodo onanijine pajira-jerani. Tiadeni naqui timittamananijine najoqqiri tiquinani. <sup>12</sup> Ajina, huajano huapi taha Jesodsas jehe tidsanapomanaraha ¿pohua tahimari maride tipajiramaqu? Ssamoqqiri tiquinani. Diocca marinaja najora tanicca timittamananissa tejeradsapi: —Najarora imittapomana

-titiquina najaro. Jaho ¿nejecotohui marinaja najora tanicca tohuinira tidsanapomanajaro? Nema tiquinadsapi pina ejedeni tobaccocassa tiquinajaro. Ejedeni tobaccocapa dsamatapa jipade pajiramana-jarahi. Dsojora tomi tomi quinajarissa tiquinajaro. <sup>13</sup> Aja dsojodsara madimanajaridenipa ejedeni. Pohuadenipa ima bicani tocattejidsade ssamoqquiri, ima tabaccora tanicca huattajode ssamoqquiri najari. <sup>14</sup> Naraha dsamatapa jipade pajiramanajaridenipa jadahideni. Pohuadenipa bodideni tocahatteradsa ima bicani tocattejidsade nahatoqquiri, ima tabaccora tanicca huattajode nahatoqquiri najari. Jadahidenipa Diocca dosseniji najo tanicca mittade pajiramanajari.

## 6

### *ICCA JEHENIJI INEBONIPi OPPINA TANI*

<sup>1</sup> Jehe, Diocca marinaja denima icahatterana, pina jadahideni tocahattera-dsanapojarissa inana, onajaro. Jesocristodsa jehe inapodsapi Diocca marinaja najora tanicca iattapojaro. Naraha: —Najarora imittadsanapona -inejerana. Aji marinaja tahidecca imittapojaropi ajima najaro: Icca imasirijinepi dsoqqehe jiquejeranicca najidsohuedsa iquejenanijineraha icca imasiri inebodsa Diodsa jehe inadsapi icassiejeranitohui. <sup>2</sup> Onhipi Jesodsa jehe inani ahuate tanijinepi totopa icajijaro. Onhipi Dio Corime tojaridsahijine tatidenidsa bara quinadsa Diodsa huati huati toquinajari. Onhipi nidsa dsotode jicajarideni Djojine nahatonimanahitohui. Dsotodeccapi madija huapimacca ima cattemade Dio Pohua bacchohuaji idomo huadsa imasiri cajimanajaridenipa Dio ettajobaqquidsa najidsohue jiquejeranihuaji toquejenahitohui. <sup>3</sup> Jehe, najaro marinaja huapimapi icahatterapojaro. Jidapana Dio ia acco tocamabaqquidsa denima denima icahattera-dsanapodsapi pocca marinaja najo tanicca naqui imittanitohui.

<sup>4</sup> Naraha madija mota denima tocahatterahijine jiperaqquiri najaripa Diodsa jehe quinaporaha dsotode: —Epejena, Dio onebona -quinajari. Najaridenipa Diodsa jehe quinapodsa Diocca pajissehe pohuadenidsa ahuate tajaro. Diocca daniji bicani pohuadenidsa tojajaro. Diocca madija tedseje Dio Corimecca dacorehe nahatoqquiri najari. <sup>5</sup> Dio Atticca biquehe naqui nahatoqquiri najari. Jesocristocca dacorehe cajimanapodsapa Jeso ccaronapomadsa pocca dacorehe ahuate tanitohui nahatoqquiri najari. <sup>6</sup> Naraha Dio inebomanadsapa pina Diocca daniji ttai ttai inanamanajarossa najaro. Pina Dio Bedi ahua porimacossanidsa coba idsanamana-pomajarissa najari. Pohuadenijine jehe quina-jarajardeni Jeso jaja icanaqquimanajari. Madija nama quinajaripa Diodsa toquejenani-pomahijine ssamo tani. <sup>7</sup> Madija nama quina-jaridenipa pina huidsajacca nami tabaccora tajarossa quinajari. Aji huidsajacca nami bicanipi passo ccadsa ppaja tojadsa ppa nahi moro tahissa tajari. Nadsapa huidsaja jinede bono huemahi cajihitohui. Nadsapi najaro huidsajacca nami Diocca biquehe cajijaro, inajaro. <sup>8</sup> Naraha huidsajacca nami bica tejeradsapi passo ccadsa ppaja tojaraha cotihi, dsero ssacaca taniccara moro taridsajaro. Nadsapa huidsaja jinede bono cappirahitohui. Nadsapi inebonitohui. Najaro huidsajacca nami Diocca najidsohue cajijaro, inajaro. Najarossa quinahitohui madija naco pina huidsajacca nami tabaccora tajarossa quinajaridenipa Diocca najidsohue cajimanahitohui.

### *DIocCA HUATINAJADSA JEHE INAJAROPi DACORAJARO*

<sup>9</sup> Ohuemecotedeni, tiadenidsa ohuati huana tani. Tiadenidsa Dio inebomanahicca ima dsodo onaraha obodidsa nahato onajaro: Tiadenipi pina najaridenissa tiquinejerani. Dio tinebomana-jarahitohui. Jesocristo tahimari icassiejeranijineccadsa pajissa tiquinajaro. Najarodsa disseraqquri tidsanapomanani nahato onajaro.

<sup>10</sup> Diopa maidsera tahi. Pocca imapi borocco tani. Ticcadeni ima huati ajama-jarahitohui. Pohuadsa tetideni huanacquiri nani ahuato tani. Aji pocca tohuati huanehema timecotedeni Jesodsa jehe quinajari acco acco titicanabaqquimana najon-ajaria jidapana ajijaropaji. <sup>11</sup> Nadsama najarossa tinanamana-dsanaponijine tohuini onajaro. Timadimanadsama Diocca tohuati huanehema timecotedeni acco camade nema tidsanapomanajaroa tijicaqquini bacco tiquinana, onajaro. Nema tidsanapomanadsapi tibodidenidsa nahatoqquiri tiquinanitohui: Dio huati tapojaricca tohuini timadimanajaropi pajissa tiadenidsa tojanitohui, onajaro. <sup>12</sup> Timijiramana tejeraji, Diodsara disseraquiri tiquinaji, onajaro. Aja Diodsa jehe quinahissa tajaridenipa mohuaradsa Pohua huati tapojariccatohui madimanajari. Nidsa dsotode Pohua huati tapojaricca pohuadenidsa tojanijine nahatoqquiri najari. Nadsama tiadenidsa ohuattipi: Pina pohuadenissa tiquinana, onajaro. Disseraquiri tiquinadsapi ima bicani Dio huati tapojaricca tiadenidsa tojanitohui.

<sup>13</sup> Maittaccadsama Diopa Abarahaodsa ima bicani tojanijine huati tahijinepa tahide ajama najari: —Ohua onima tiadsa huati onajaro. Omaidsa-jerani. Tiadsa Ohuattissa onananitohui -napojari. Nama najaripa deni tojahicca ohuaha nohuerajarijine Dio Pohua onidsara huati tajari. <sup>14</sup> Nadsama Pohua Atti Abarahaodsa ajama najari:

—Pajissa tiadsa ima bicani onananitohui. Ojine tipotemani huapi tahitohui -nahi nade Dio.

<sup>15</sup> Nadsapa Abarahao Dio pohuadsa huati tajaricca tohui mohuaradsa madijari. Dsotode Dio pohuadsa huati tapojarissa nehe tojajaro.

<sup>16</sup> Aja madija pohua atti: —Pajissara huati onana -nadsapa deni tojajari onima huati huati tajari. Pina Dio onima huati tadsa: —Dio ohuatti nahato tahi. Ohuattissa onana-jeradsapi ohua najidsohui bica tani -najarissa najari. Nama nadsapa pohua attissa inanani ahuato tajaro. Mittamanajarideni pohua attidsa: —¿Pajissaqui? ¿Pajissa jerarane? -quina-jarahijine. —Pajissa huati tajari -quinahijine. <sup>17</sup> Najaro imassa najaro Dio huati tadsa pocca huatinaja cajimanajarideni nahatoqquiri nahijine Pohua Attipa: —Ohua onima huati onajaro. Ohuattissa onananijine pajissa -najari. Nama najaria Pohua Atti mittamanajaridenipa: —¿Pajissaqui? ¿Pajissa jerarane? -quina-jarajari. Attidenipa: —Jehe, Diopa pajissa huati tajari. Pohua Attissa inanananitohui -quinajari. Pocca huatinaja cacajiqquimera-jerani pohuadeni nahatoqquiri najari. <sup>18</sup> Jehe, Dio iadsa huati tadsapa: —Tiadenidsa ajima onananitohui -nadsapa pocca huatinaja cacajiqquimeranijine ssamo tani. Pohua Atti: —Ohua onima huati onajaro, omaidsa-jerani -nadsa naco cacajiqquimeranijine ssamo tani. Diopa maidsera tahi. Pohuana ia tohuacahua-baqquihijine tohuini inadsapi Pohuadsa iquejenajaro. Pajissara huati tajaricca ima imittadsapi etidsejaro. Pohua huati tapojaricca iadsa pajissa tojanijine tohuini imadijaro. <sup>19</sup> Nadsama Diocca huatinajadsa: —Jehe, pajissa iadsa tojanitohui -inajaro. Najaro jehenijipi dacorajaro. Pina ahua canoa ssoossoque cadsana dappo todsani dacorajarossa najaro. Dappo dsananissa tadsa canoa tocatabo-jerajaro. Icca jeheniji najarossa nadsapi Dio madihihuaji jaijedsimajarossa najaro. Pina Diodsa dada toqquimade deni tojahicca imassa najaro. Pohuapa dada toqquima bodihuaaji totoqquedsima najari, Diodsa dade, Diodsa huatide. Huahuacossa etero sibabote idenihuaji, aja Dio anihihuaji bica tanicca quiquinanahihuaji Diodsa totoqquedsima najari. <sup>20</sup> Najarossa najaro Jesopa Imehi madihihuaji toqquedsimapojari. Najaropi ia Diohuaji bacco inanijine jahine inahabajaro. Nama nadsapa pohuana icca daniji Diodsa dada toqquimade, icca ima huahuati toqquimade deni tojahicca nama dsanapohuitohui. Pina Merequisedeca Diodsa dada toqquimade nama dsanapojarissa nahitohui.

### *Merequisedeca tahimari*

<sup>1</sup> Merequisedecapa maittaccadsama madijari. Odsa panani onini Saremecca tamine. Puhuapa Dio deni tojajaridsa dsepe ijijari. Pocca madijacca daniji Diodsa dada toqquimade tojajari. Abarahao naco nahihuaji madiridsadsa dsama onihicca dsama onihicca taminedenicca madijadsa jadsire inanajaro. Cahadiremanadsa taminedeni inajicaridsadsapa Abarahaodenina deni toquejenajari. Jadsire jicadsa Abarahaodeni jahinidsapa tamine Merequisedeca toccajari, Abarahao bacco ijid-sahijine. Bacco ijidsadsapa pohua tedseje Diodsa huatidsemanajari. Abarahaodsa ima bicani tojanijine Merequisedecapa Diodsa huati tajari. <sup>2</sup> Aja Abarahaodenipa jadsiredsa deni toquejenadsa pohuadenijine jicajari dsepedenitaji huapi tehe eccan-imanajaro. Bani bedi, madija poccadeni medse tarabaidasajine naco eccanimanajari. Nadsapa Abarahao pohuadsa tojajari mota Merequisedecadsa da inajari. (Najaro caria attidsapi: décima, quinajari.) Nadsama Merequisedeca pohua onicca imapi: Tamine imari bicabote, quiquinanajari. Pocca odsa panani onini Sareme naqui: Jonehe, quiquinanajari. Nadsapa Saremecca tamine tojajarijine pohuadsa naco: Jonehecca tamine, quiquinanajari. <sup>3</sup> Pohua tahimari mota nahato inaraha motapi ssamoqquiri inani. Pohua imehi oni, imeni onini, biridideni oni, midinideni onini naqui ssamoqquiri inani. Pohua tossonahicca huada, dsoqquehicca huada naqui ssamoqquiri inani. Nama nadsapa pohua tahimaripi pina Dio Bedi tahimarissa najaro. Diodsa dada toqquimade nama dsanapohuitohui.

<sup>4</sup> Jehe, nadsama Merequisedeca deni tojajari tahimaridsa tibodideni huatonissa tana. Icca idi Abarahaopa jiodideni iadsa deni tojajari. Naraha pohuadsa tojajaricca mota Merequisedecadsa da inajaripa pina Merequisedecadsa: —Deni tijani –najarissa najari. <sup>5</sup> Merequisedecapa Moisesi tossona-jaraccadsama tahide madipojari. Abarahao jinodi Rebi tossona-jaraccadsa naco Merequisedecapa madipojari. Dsotode nidsaranibotena Moisesidsa Dio pocca dosseniji da inajaro. Najaro Diocca dossenijidsa Rebi potemahidenipa Diodsa dada toqquimade toquejenajari. Pohuadenipa Abarahao potemahi, pohuadeni imecotedeni huapima naco Abarahao potemahi. Naraha Rebi potemahidenina pohuadeni imecotedeni cajimanajaricca mota nanaccade toquejenajari. <sup>6</sup> Nadsama Merequisedecapa Rebi potemahi jararaha Abarahao cajijaricca mota idijaro. Diopa tahide Abarahaodsa huati tapodsa pocca biquehe pohuadsa tojapojaro. Naraha dsotode Merequisedecapa Abarahaocca daniji ididsa Abarahaodsa ima bicani tojanijine Diodsa huati tajari. <sup>7</sup> Nama nadsapa Merequisedeca pohuana Abarahaodsa deni tojahi ahuato tajari. Najaro imapi ia huapima nahatoqquiri inani. Madija pohua tessedsa Diocca biquehe tojanijine huati tajaripa deni tojajari. Diocca biquehe pohuadsa tojajarona ajamani tojajari.

<sup>8</sup> Jidapana Rebi potemahi Diodsa dada toqquimadedenipa madija cajimanajaricca mota ihinaccamana najari. Naraha najaridenipa madija quejenaja najari. Dsoqque-mana tahi. Naraha madija cajimanajaricca mota nanaccade ojariapa pohua dsoqque-hicca imapi ssamoqquiri inani. Najari Merequisedecapa madicajari, quiquinanajari. <sup>9</sup> Ima onihi naqui. Rebi potemahi madija cajimanajaricca mota nanaccade toqueje-najarideni tossonamana-jaraccadsa Abarahaopa Merequisedecadsa pohua cajijaricca mota da inapojari. Nema nadsapi etti: Pohuadeni naco Merequisedecadsa pohuadeni cajimanajaricca mota da quinajari, inajaro. <sup>10</sup> Etti nema inajaropi pohuadenipa tossonamana-jaraccaraha pohuadeni potapojari Abarahaodsama Merequisedecadsa da quinajari, inajaro.

### *Rebi potemahidenicca cacahuehepi cacajiquimerajaro*

<sup>11</sup> Diopa pocca dosseniji Isaraeri potemahidenidsa da inadsapi Rebi potemahi Arao, pohua potemahidenina najaro dosseniji ecahuamanajaro. Nadsapa poccadeni madija Diocca dossenijidsa iboraqquiri nahijine maride toquejenajari. Poccadeni madija

imasiri inanamanadsapi poccadeni imasiri manaconi Diodsa da da ihiquimamana najaro. Imarideni naqui Diodsa huati huati ihiquimamana najaro.

Nama nama quiquinanaraha poccadeni cacahuehejine madijadenicca ima Diodsa pajiranissa taniijine pajira-jerani. Nadsapa Dio Attia: —Ohuadsa dada toqquimade ohuahara tojana. Pina Merequisedecassa nana –najari. Nadsapi Pohuajine najaro cacahuehepi cacajiqquimerajaro. Pohuadsa dada toqquimade ohuahapa Arao potemahideni jarahi. <sup>12</sup> Nadsapi Rebi potemahi, Arao potemahidenicca cacahuehe cacajiqquimeradsapi Diocca dosseniji naqui cacajiqquimerajaro. Nadsapa Arao potemahideni Diodsa dsepedeni ijie nebojaro. <sup>13-14</sup> Nadsapa madija ohuahana Diodsa dada toqquimade tojahijine toqquedsimajari. Najaripa ia Medsede Jeso pohua tahimari huati huati onajaro. Pohuapa Rebi potemahideni jarahi. Najaripa Isaraeri bedi Joda potemahi. Tahidepa Joda potemahideni Diodsa dada toqquimade toquejenahijine Moisesi huati tajarajari. Nadsapa najaridenipa Diodsa dade dsepedeni ijimana-jarajari. Nohuerajari.

<sup>15</sup> Naraha Diodsa dada toqquimade dsati pina Merequisedecassa najari toqquedsimadsapa najaro cacahuehe cacajiqquimerani imittani ahuato tajaro. <sup>16</sup> Diocca dosseniji tahideccadsa Rebi potemahidenira Diodsa dada toqquimade toquejenajari. Naraha Diodsa dada toqquimade dsatipa Diocca dosseniji tahideccassa najaraha. Najari dada toqquimade dsatipa dacorehe cajijari. Pohuapa madie jiquejeranicca cajijari. <sup>17</sup> Pocca ima Dio Atti dsodo nanidsa ajima najaro:

—Tiapi madijacca daniji Ohuadsa dada toqquimade, imarideni huahuati toqquimade nema tidsanaponitohui.

Pina Merequisedeca Ohuadsa dada toqquimade nama dsanapojarissa tanitohui –nhi nade Dio.

<sup>18</sup> Nema nadsapi Diocca dosseniji tahideccapi nebojaro. Tojaparidsapi ponima tojajaro. <sup>19</sup> Jehe, najaro marinaja Moisesi dsodo inapojaropi madijadenicca ima Diodsa inapajiranissa taniijine pajira-jerani. Najaro marinaja tahidecca pajira-jeradsapi jidapana ima onihi tohui imadijaro. Najaropi denima bica tani. Najarodsa icca ima Diodsa tobica tani. Nadsapi Pohuadsa iajiressinijine ipajirani.

### *Jesopa Diodsa dada toqquimade pajirahissa tajari*

<sup>20</sup> Diodsa dada toqquimade dsati tojahijinepa Dio Pohua Bedidsa Atti ajama najari: —Pajissara tiadsa huati onajaro. Ohuattissa onananitohui –napojari. Nama nadsapa najaro cacahuehe pohuadsa tojajaro. Naraha tahidedenicca dada toqquimadedenipa najaro cacahuehe cajimanahijine Dio pohuadenidsa huati tajarajari. Pina pocca marinajara da inajaro. <sup>21</sup> Pohua Bedi ia Medsededsana: —Pajissara tiadsa huati onajaro. Ohuattissa onananitohui –napojari. Najaro imapi Dio Atti dsodo nanidsa dsodo napojaro:

—Ohuapi Dio. Pajissara huati onajaro. Ohuatti cacajiqquimera-jeranitohui.

Tiapi madijacca daniji Ohuadsa dada toqquimade, imarideni huahuati toqquimade nema tidsanaponitohui –nhi nade Dio.

<sup>22</sup> Dio Atti nama najaripa Jesona icca daniji Diodsa dada toqquimade tojajari. Pohuadsa jehe inadsapi Diodsa ia tonapajira-baqquihissa dsanapojari. Manaco Diopa iadsa: —Jehe, occa ejedeni tiquejenani –najari. Ima nema najaropi: jehe canireniji dsati, inajaro. Najaropi denima bica tajaro. Tahidecca jehe canirenijipi ajimani tojajaro. <sup>23</sup> Tahidecca Diodsa dada toqquimade toquejenahipa huapi tajari. Ohuaha ohuaha najonamanajari. Dsoqquedsapa ohuaha toja, dsoqquedsapa ohuaha toja najonamanajari. Dsodsoqquemeneri najonajarijine ojaria madi-dsanapodsa dsepe ijidsanapohuijine ssamo tani. <sup>24</sup> Naraha Jesopa dsoqque-jarahi. Dsoqquejaradsapa Diodsa dada toqquimade ohuaha nohuerahitohui. Pohuana najaro cacahuade tojahi ojari dsanapohuitohui. <sup>25</sup> Nama nadsapa pohuadsa jehe inadsapi



pohuajine Diodsa iajressijaro. Icassiejera-dsanaponijine naqui pohuana pajirahi. Pohuana madidsanapojari. Itohui Diodsa huati huati dsanapohuitohui, ia acco tocamabaqquihijine.

<sup>26</sup> Nadsapa Jeso pohuana icca daniji Diodsa dada toqquimade, icca ima Diodsa huahuati toqquimade deni tojahicca iadsa pajirahissa tajari. Puhuapa ima bicanira cajijari. Pehuadsa ima nohuerajaro. Imasiri cappirahissa tajari. Puhuapa imasiri cajimanajaridenidsa quejemaraha Imehi Dio pohuara inanajari. Idimacossanidsa deni inanajari. Nadsapa memehuaji madimanajarideni huapimadsa deni tojajari. Ohuaha pina pohuassa najari nohuerahi. <sup>27</sup> Puhuapa pina Diodsa dada toqquimade deni toquejenahiccassa najarajari. Najaridenipa huada huajijiradsa bani bedi inanadsoqqe-manadsa Diodsa da da ihiquimamana najari. Tahidepi poccadeni imasiri manaconina da da quiquinanapojaro. Dsotodena madija huapimacca imasiri manaconi da da quiquinanajaro. Naraha Jesopa nama najarahi. Puhuapa huada ojariedsa madija huapimacca imasiri manaconi da inajaropi pohua ccaccoradsa ahua porimacossanidsa inanadsoqqe-manajari. Pocca danijipi ojarijaro. Onihi nema napoma-jeranitohui. Pohua emene icca imasiri manaconi tojajaropi pajiranissa dsanapojaro. <sup>28</sup> Dio pocca dosseniji Moisesidsa da inajaropi Pehuadsa dada toqquimade, imarideni huahuati toqquimade toquejenahijinepa madijara icattejidsabaqquijari. Naraha madijadenipa japariqquiri nahi. Dio Attidsa iboraqquiri nahissa tahijine pajiramana-jarajari. Naraha dsotode Moisesicca marinaja nattinipi Dio Pohua Bedina icattejidsajari, dada toqquimade deni tojahicca tojahijine. Pohua Atti Bedidsa: —Pajissara tiadsa huati onajaro. Ohuattissa onananitohui —nadsapa Dio Pohua Bedi Jeso inapajirahissa tadsa madijacca daniji dada toqquimade, imarideni huahuati toqquimade deni tojahicca tojadsanapojari.

## 8

*Jesopa icca daniji Diodsa dada toqquimade, icca ima huahuati toqquimade deni tojahicca*

<sup>1</sup> Ima onihi onihi tiadenidsa huati onaraha ima bicani deni tojaniccapi ajima najaro: Icca daniji Diodsa dada toqquimade, icca ima huahuati toqquimade deni tojahicca icajini. Najaripa Jeso. Djojine huapimadsa deni tojadsapa memehuaji madijari. Dio Bicabote inori nahatonihuaji huittarijari. <sup>2</sup> Puhuapa Diodsa huahuatidsemana nahicca odsadsa dsepe ijijari. Najaropi Dio tadsari pajissacca. Ia Medsede Dio Pohuana Pohua tadsari icanahatojaro. Madijajine jerani.

<sup>3</sup> Nadsapa ajijaro namicca Diodsa dada toqquimade deni tojahicca huapimapa Dio pohuadeni icattejidsabaqquijari, Dio tadsarihuaji dsepedeni ihijimana nahijine. Aja Diodsa dada toqquimade deni tojahiccapa madija Diodsa huatidsemanadsa poccadeni da naqquinaja Diodsa da da ihiquimamana najaro. Madijadenicca imasiri manaconi bani bedi naco da da ihiquimamana najari. Nadsapa icca daniji dada toqquimade deni tojahicca Jeso naco icca imasiri manaconi Diodsa da inanijine cajijari. <sup>4</sup> Jesopa ajijaro namidsapa icca daniji dada toqquimade toja-jarahi. Nohuerahi. Ajijaro namidsapa Diodsa dada toqquimade animanahi. Najaridenina madijadenicca da naqquinaja Diodsa da da ihiquimamana najaro. Pina Moisesicca marinajassa inanamanajaro. <sup>5</sup> Puhuadenipa ajijaro namidsa Dio tadsarihuaji dsepedeni ijimanajari. Najaro odsapi memehuajiccassa naraha namihuajiccapi assirani jerani. Memehuajiccana assirani. Namihuajicca canahatojaropi corimani nahatoqquiri inanijine Dio huati tajari. Pohua tadsari Moisesi icanahatonijine icadossedsa Atti ajama najari: —Ssono Sinahihuaji timadidsa occa odsa tiadsa nohue ocanade. Najarossa najaro ticanahatoji. Tibodi huatonissa tadsa pina tia mari ocanajarossa tinanaji —nahi nade Dio Moisesidsa. Nadsapi najaro Dio

tadsari canahatohue cajicadsapi nahidsa Diodsa dada toqquimadedeni dsepedeni ijimanajari. Naraha najarideni dsepedeni ijimanajaripa pina memehuai Jeso dsepe ijijarissa nejerani. <sup>6</sup> Diopa Pohua Bedi Jesodsana cacahuehe denima bica tanicca da inajaro. Ajijaro namidsa Diocca dosseniji tahidecca ecahuamanajaropi ajimani. Najaro Diocca dosseniji tahideccadsa madija: —Jehe, iboraqquiri inana –quinadsapa pohuadenidsa ima bicani tojanijine Dio huati taporaha najaro naqui ajimani tojajaro. Dio tedseje jehe icanirenijinecca ima dsati Jesojine tojajaropi ima denima bica tanicca iadsa anijaro. Pocca jehe canireniji dsati denima bica tajaropi Dio Pohua huati tapojaricca denima bica tajarojine. Najaroa aji Jesocristo icca daniji Diodsa dada toqquimade, icca ima huahuati toqquimade deni tojahiccapa icca ima Diodsa pajiranissa tanijine ia tonapajira-baqquihissa tahitohui.

<sup>7</sup> Diopa pocca dosseniji tahidecca Moisesidsa da inadsapi Isaraeri potemahidenidsa huati tajari: —Ohuattidsara iboraqquiri tiquinaji –nadsa madija attidenipa: —Jehe, Tettidsa iboraqquiri inanitohui –quinajari. Dio tedseje jehe canirejari. Naraha najaro pocca jehe canireniji madijacca imasiri inajicanijine pajira-jevani. Nassa pajiranissa tadsapi Dio pocca jehe canireniji: —Onihira tojana –najarahitohuiraha. <sup>8</sup> Naraha pocca marinajadsa iboraqquiri nahijine pajiramana-jarahi qqui qqui tadsapa Pohua bodi: —Jaho, occa jehe canirenijidsa madija tobicamanahissa tahijine pajira-jevani nahato onani –najari. Nadsapa Pohua Attia:

—Nidsa occa jehe canirenijicca ima dsati onananijinecca huada bacco tanitohui –nani nade Dio.

—Najaro huadadsapi Isaraeri potemahideni, Joda potemahideni, najarideni huapimadsa occa jehe canirenijicca ima dsati onananitohui.

<sup>9</sup> Aji jehe canirenijicca ima dsati onananijinepi pina occa jehe canireniji tahidecca pohuadeni potapojaridenidsa onanapojarossa nejeranitohui.

Najaridenipa dsama Ejitocca madijadsa nanajidso toquejenadsanapo-jarahijine odinibaqquijaride.

Pina pohuadeni dsepedenidsa mari odsanabaqquidsa joca oninebaqquijarissa najaride.

Nadsapi occa marinaja pohuadenidsa da onadsa Ohua tedseje jehe icanireraha tohuibomanadsapa onebobaqquijaride –nani nade Dio.

<sup>10</sup> —Occa marinajadsa iboraqquiri nahijine pajiramana-jarahi qqui onadsa Ohuattipi: Isaraeri potemahidenidsa occa jehe canirenijicca ima dsatira onanana, onajaro –nani nade Dio.

—Nadsama occa jehe canireniji dsatipi ajima nanijine:

Pohuadeni bodidsa onananitohui, pina pohuadeni bodidsa dsodo onajarossa nanitohui, huatideni ajamamana-jarahijine.

Pohuadeni Cacahuade Dio ojanitohui, pohuadeni naco occa madija toquejenahitohui.

<sup>11</sup> Nadsana pohuadeni tessé Ohuatti mittamanahijine mari mari quina-jarahitohui.

Pohuadeni imecotedenidsa, poccadeni madija huapimadsa: “Ia Medsede Dio Atti ticahatteraji” quina-jarahitohui.

Madija huapima Ohuadsa noccodeni jidseraqquri nahitohui. Ohuatti naqui mittamanahissa tahitohui.

Ajamani toquejenajarideni, deni toquejenajarideni huapima Ohuatti mittamanahissa tahitohui.

<sup>12</sup> Pohuadenitohui ohuati huana tadsa poccadeni tabaccorehe sse onadsapi nohueranitohui.

Poccadeni imasiridsa: “Epeje, ohuati ajimani” onadsapi najarodsa obodi huatomapoma-jevanitohui –nani nade Dio.

<sup>13</sup> Nadsama Dio pocca jehe canireniji dsati tahimarini huati tadsapa Pohuajine jehe canireniji tahideccapi jadani tojajaro. Nadsapi najaro jehe canireniji jadani tojadsapi ponima tojajaro. Amossi nabote nani.

## 9

### *Maittaccadsama Diodsa huatidsemanadsa ajama quinajari*

<sup>1</sup> Isaraeri potemahideni Diodsa: —Jehe, Tettidsa iboraqquiri inanitohui –quinadsapa najaropi Diocca jehe canireniji tahidecca tojajaro. Nadsapa Dio Pohuadsa huatidsemanahijine tocahattehahijinepa marinaja huapi tehe pohuadenidsa da inajaro. Pina Pohuadsa imarideni huati iqquima-mananijinecca marinaja, pina madijacca daniji Pohuadsa da iqquima-mananijinecca marinaja najaro. Najaro marinaja huapimapi Diodsa huatidsemanahijinecca. Diodsa huahuatidsemana nahicca odsa ajijaro namicca oninipi: —Dio tadsari –quiquinanajari. <sup>2</sup> Nadsama Dio tadsaripi bani etero ssequi nahi ahua dappo nahuajaninidsa ssoque nahuajanijari. Najaro bodidsa coba canahuajanini icanahatomanajaro. Najaro coba canahuajanini dsotorinihuajipi etero siba tanicca huacossajaro. Huahuacossa que tani tahidehuajipi: —Dio anihihuaji bica tanicca –quiquinanajari. Najarodsa aniridsahipa jojororo pinine orocca ani, Diodsa da tahijinecca pan huahuanari ani najaro. <sup>3</sup> Nadsapi huahuacossa idenihuajipi denima bica tajaro. Najaro oninipi: —Dio anihihuaji denima bica tanicca –quiquinanajari. <sup>4</sup> Huahuacossa bacconihuaji Diodsa da tahijinecca huahuanari badsira tocanajaro cahittidsajaro. Najaro huahuanaripi huapini nemanehi orodsa nepi canajaro. Nanidsa nahatohui majo bicabote tohuessidsapa majo totocabaqqui najari. Nani idenihuajicca bodidsa naqui Dio tedseje jehe canirehicca baho cahittidsajaro. Najaro bahopi huapini nemanehi orodsa nepi canajaro. Bodidsapi coripissa najaro oro nahatoni anijaro. Najarodsa memehujicca pan oni mana cahittidsajari. Araocca dsodsojo moro tanicca naqui nanidsa podsajaro. Dio tedseje jehe canirehicca dosseniji siba pamehedsa dsodo nani naqui codidsajaro. <sup>5</sup> Diocca baho tetepinidsapi Diocca dodosse tabaqqi memehujicca corime oro nahatoni pamaha barijari. Baccodeni cacatteqquimeradsa eppedeni da caniredsapa baho tetepini odsa icanamanajaro. Pohuadeni pamahapa Diocca deni tojehe cajimanajari. Naraha jidapapi Dio tadsari bodidsa aniridsajarocca ima denima dsodo onejerani, onajaro.

<sup>6</sup> Nadsama Dio tadsari bodicca aniridsajaro huapima najorehe jicanissa tadsapi bodi tahidecca aji Dio anihihuaji bica tanicca quiquinanahihuaji Diodsa dada toqquimadedeni jajahi tojedsima najari huajijiradsa. Nahidsa Diodsa huatidsemanadsapa dsepedeni ihijimana najari. Pina jojororo tohuesside, majojo tohuesside, Diodsa huatide najaro. Huahuacossa etero sibabote bacconihuaji nama nama dsadsanapomana najari. <sup>7</sup> Naraha huahuacossa idenihuaji Dio anihihuaji denima bica tanicadsa toqquedsimadepa Diodsa dada toqquimade deni tojahicca pohua motta ojari naha totoqquedsima najari. Huada ojariedsa toqquedsima, huajano ohuahadsa naco najaro huada bacco tapomadsapi toqquedsimapoma, huajano ohuahadsa toqquedsimapoma nanaja najari. Nama nama dsadsanapo najari. Nahihuaji toqquedsimadsapa bani bedi bicabote emene dsojo dsojo ihicadsima najaro, Dio madija huapimacca imasiridsa: —Epeje, ohuati ajimani –nahijine. Madija huapimacca imasiri manaconijine dsojo icadsimadsapi pohua pocca imasiri manaconijine naqui dsojo icadsimajaro. Madija ssamoqquiri nadsa ima inanamanajarocca imasiri manaconijine naqui Diodsa da da ihinanajaro. <sup>8</sup> Nadsapi Dio Corimejine iadsa ima ahuato tajaro: Najaroa aji Dio anihihuaji bica tanicadsa Diodsa dada toqquimade dsepedeni ijimanaccadsapa aja Dio anihihuaji denima bica tanicapi madija huapimadsa huacossaccajaro. Diodsa dada toqquimade deni tojahicca pohua

motta totoqquedsima naccajari. Nema nadsapi madija huapima Dio anihihuaaji jai tojedsimahijine tohuaba-jeraccani. <sup>9</sup> Aji Dio anihihuaaji madija jai tojedsimahijine huacossaccajaropi ia mari canajaro: Diodsa huatidsemanadsa poccadeni daniji onihi onihi da da ihiquimamana naraha najarojine poccadeni ima Diodsa inapajiranissa tanijine ssamo tani. Madija huapimacca imasiri manaconi bani bedi naco da da ihiquimamana naraha najarodsa bodideni tohuirenijine pajira-jerani. <sup>10</sup> Diocca dosseniji tahideccassa inanamanadsapi poccadeni daniji pina jijipa, dsedse, oqui, bani najari da da quiquinanajari. Ima oppina tanicca cajimanadsa naco poccadeni ima toppineranijine Diocca dossenijissa ihinanamana najaro. Dio pocca dosseniji cacajiquimera-jeraccadsa nama nama nanajonamana najari. Najaro dossenijipi amossiniccara, huapideniccara, assiredeniccara inanabicabaqquijari. Naraha bodideni tobicahijine jerani.

### *Jesocristo pohua emene da inajaropi pajiranissa dsanapojaro*

<sup>11</sup> Naraha jidapapa Jesocristo iadsa anihi. Puhuapa icca daniji Diodsa dada toqquimade, icca ima huahuati toqquimade deni tojahicca. Puhuana icca ima Diodsa inanabicanijine pajirahi. Puhuapa memehuaajicca Dio anihihuaaji toqquedsimajari. Nanihuaajipi Dio tadsari bani etero ssequi nahiccassa nejerani. Madija icanahatomana-jerani. Ajijaro dsamacca jerani. Memehuaajiccapi denima bica tani. Pajiranissa tani. <sup>12</sup> Jesocristo nahihuaaji toqquedsimadsapa edede jidsadsa chivo emene dsojo icadsima-jarajari. Bohui bedi bicabote emene naco dsojo icadsima-jarajari. Puhua pohua emenena da inanijine toqquedsimajari. Toqquedsimahi ojarihi. Nidsa dsotode pohua emene dade toqquedsimapoma-jarahitohui. Puhua emene da inajaropi pajiranissa dsanaponitohui. Nama nadsapa imasiri manaconi najidsohue iadsa ssonari-jeranijine ia todinibaqquidsapa tossiejehe jiquejeranicca iadsa inanajaro.

<sup>13</sup> Diocca dosseniji tahidecca aniccadsapi madija ima oppina tanicca inanadsapi Diodsa dada toqquimahuaji toqquedsimade oppina tani. Naraha bani bedi emene dissa naridsa assire ppaja tojadsana pocca ima tobica tani. Ima onihi oppina tanicca toppineranijinepi edede jidsadsa chivo emenedsa huissa inarijari. Ima onihi oppina tanicca toppineranijinepi bohui maqqui emenedsa huissa inarijari. Ima onihi oppina tanicca aji madija huatiahi assire bara inadsapa bohui dsohuato jierani botta tani ononi passodsa quejemadsa ima cajijari tetepihuaaji dissa dissa narijari. Nadsapa assire ppaja tojadsa pocca ima toppinera tani. Nama nama quiquinanadsa assiredeni tohuiremanadsapa Diodsa dada toqquimahuaji jai tojedsimapomahijine toppinera-manapomajari. <sup>14</sup> Nadsama najaro marinajassa inanamanadsa bani bedi emenejine assiredeni tohuiremanadsapa dacorehe cajini ahuato tajaro. Naraha Jesocristo emenena dacorehe denima cajijaro. Dio Puhua Corime camitta taha nama dsanapojari Jeso inadacoradsa icca daniji bicabote tojahijine pohua ccaccorajari Imehi Diodsa. Jesopa ima cappirajari, bodi huire tajari. Icca imasiripi najidsohue jiquejeranihuaji ia tohuaccanitohuiraha Jeso emene toccajarojine icca imasiri sse inajaro. Ibodi inahirejaro. Nema nadsapi icca Dio camitta tajari Attidsa iboraqquiri idsanaponijine ipajirajaro.

### *Diocca jehe canireniji dsati*

<sup>15</sup> Jehe, Jesocristo pohua ccaccoradsa pohua emene toccajarojine puhuana Diocca jehe canireniji dsati iadsa inanajaro. Aji Diocca jehe canireniji tahideccadsa madija iboqquiri nadsapa imasiri ihinanamana najaro. Najaro imasiri manaconi Jeso dsoqquejaripaja. Nama nadsapa Dio pocca madija toquejenahijine icattejidsabaqquigarideni pocca biquehe jiquejeranicca cajimana-dsanapohuitohui. Pina Dio Puhua huati tapojarissa inanaitohui. <sup>16-17</sup> Nadsama Jeso dsoqquejarijine Diocca

biquehe iadsa tojajaropi pina madija dsoqquedsa pohua dsepetaji bedidenidsa tojajarocca imassa najaro. Aja madija dsepe sse tajaripa dsoqque-jaraccadsama ima inanajorapojaro. Pohua dsepetajipi bedidenidsa tojanijinecca ima papeodsa dsodo inajaro. (Cariacca oninipi: testamento.) Naraha dsepe sse tajari madiccadsapa najaro ima pina ponimassa najaro. Dsoqquedsana pajissa tojajaro. Nadsana bedidenidsa pohua dsepetaji tojajaro. <sup>18</sup> Najaro imassa najaro Dio pocca jehe canireniji tahidecca madijadsa inanapodsapi bani bedi inanadsoqque-manadsa emene toccadsana Diocca jehe canireniji pohuadenidsa pajissa tojajaro. <sup>19</sup> Moisesipa Diocca dosseniji nemanehedsa madija mari icanabaqquia jicadsapa ajama najari: Bohui bedi emene, edede jidsadsa chivo emene passodsa icanejemajaro. Nadsapa bani emene huihuissa inahatojari. Edede cone maccohuidsana coro todsippani macco tajarocca ahua tere tajari oni isopo ininedsa ssoque idsanajaro. Nadsapa huihuissa cote bani emene passodsa quejemanidsa edsippa nadsa Diocca dosseniji dsodo nani huissa huissa naridsajari. Pohuadsa queriqquimanajarideni naco huissa huissa inariridsabaqquijari. <sup>20</sup> Huissa huissa naridsadsa huati huati tajari: —Aji bani emenecca imapi Diocca jehe canireniji tiadenidsa pajissa tojajaro. Pohua Attidsa iboraqquiri tiquinanijine jehe tiquinapa –najari. <sup>21</sup> Nadsapa Dio tadsarihuaji naco Moisesi huissa huissa naridsajari. Najaro odsa bodicca naqui huissa inariridsajaro, pina oro nahatoni jojororojine, nahatohui majo bicabote tohuessidsa majo toccabaqquiniijinecca huahuanari, huahuanari panjine najaro. Diodsa huatidsemanahijinecca huapima toppineranijinepi bani emene huissa huissa naridsadsa tohuireridsajaro. <sup>22</sup> Nadsama najaro bani emenecca imapi iadsa ahua tojaro: Diocca dossenijidsa huapima toppineranijinepi bani emenedsana tohuirejaro. Diocca dossenijidsa imasiri tomossinijine naqui bani emene toccadsana Dio najaro imasiridsa: —Epeje, ohuati ajimani –najari. Jehe, maittaccadsama bani emene toqquejeradsapi poccadeni imasiri tohuirenijine ssamo taccade.

*Jesocristocca danijipi imasiri inajicanijine pajiranissa tajaro*

<sup>23</sup> Jehe, nadsama memehuajicca Dio tadsaripi assirani. Namidsa anijarocca odsapi corimani. Najaro odsa bodidsa aniridsajari huapima Diodsa tohuirenijine bani bedi emene huissa inariridsamanadsa tohuireridsajaro. Naraha memehuajicca assirani aja Dio madihihuaji pajissacca tohuireridsanijinepi bani bedi emene pajirajerani. Nanihuajicca tohuirenijinepi denima bica taniccana pajirani. <sup>24</sup> Jesocristopa aji namihuajicca —Dio anihihuaji bica tanicca –quiquinanajaridsa toqquedsimajarajari. Najaropi madija icanahatomanajaro. Dio tadsari pajissacca corimanira. Pohuapa memehuaji pajissa Dio madihihuajina toqquedsimajari, nahidsa icca ima Imehidsa huati tadsapa Imehi: —Epejena, ohuati ajimani –nahijine. <sup>25</sup> Pohuapa Dio madihihuaji toqquedsimadsa naco huajijiradsa pohua emene toccanijine pohua ccaccaccora najarajari. Aja namidsa madijari Diodsa dada toqquimade deni tojahiccapa madijacca imasiri manaconi bani emene dsojo dsojo ihicadsama najaro. Dio anihihuaji huada ojariedsa toqquedsima, huajano ohuahadsa naco huada ojariedsa toqquedsimapoma, nama nama dsanapojari. Pohua emene jeraraha Diodsa da da ihiquima najaro. Naraha Jesocristopa nama najarajari. <sup>26</sup> Huajano huajijiradsa pohua emene toccanijine pohua ccaccaccora najonadsapa nassa dsama nahatoponidsama dsoqquehe tonahanajonanaja. Naraha jidapana dsama jicanicca huada tohuajiradsa iadsa ccaronajari. Dsoqquehejine pohua ccaccorahi ojarahi, icca imasiricca dacorehe inajicanijine. Nama nahi ojari nadsapa apaja. Nama napomajarahitohui.

<sup>27</sup> Madija ia naqui idsoqquenitohui. Idsoqqueraha idsoqqueni ojarinitohui. Najaro nattinipi madija huapimacca ima cattemade Dio baccohuaaji idomo huadsa ia tocattejidsabaqquihitohui. Pohuadsa toquejenajaridenidsa pocca biquehe da inanitohui, Pohuadsa toquejena-jarajaridenidsapi pocca najidsohue inassonarinitohui. <sup>28</sup> Jesocristo



naco dsoqquehi ojarijari. Imasiri manaconi pohua ccaccorajari. Pohuajine icca imasiri jicaridsajarodenipi huapi inani. Nidsa ccanipomadsapa icca imasiri manaconi dsoqquepoma-jarahitohui. Pohuatohui imadijaro ia tonassiajabaqquihijinena ccanipomahitohui.

## 10

### *Diocca dosseniji tahideccapi icca ima inapajiranissa tanijine pajira-jerani*

<sup>1</sup> Cristo imasiri manaconi tojahijine tahimaripi pina ajijaro imassa najaro. Aja madija ccajonadsa majijine corime qqui inapodsapi dsotodena assire ccajonahi nahato inajaro. Diocca dosseniji Moisesidsa da inapojaropi corimani. Diocca daniji denima bicabote dsotode ccajonanijinepi assirani. Najaro assirani pajissa toजारopi Jesona paja. Nadsama najaro Diocca dosseniji tahideccapi madija imarideni inapajiranissa tanijine pajira-jerajaro. Madija tahidedenicca Diocca dosseniji ecahuamanadsapi poccadeni imasiri manaconi bani bedi emene da iqquimamananijine Dio tadsarihuaji jajahi toja najari. Huajano ojari ojari bani bedi emene da da ihiquimamana naraha najaro danijipi imarideni inapajiranissa tejerajaro.

<sup>2</sup> Najaro Diocca dosseniji tahideccadsa bodideni tohuirenissa tanijine pajiradsapi nassa pohuadeni bodidsa: —Ojine tabaccora tani. Imasiri ocajini —quinapomajarana. Aja bani bedi emene dada naco nebomananaja. <sup>3</sup> Naraha ajijaro imana pajissa. Pohuadenipa huajano ojari ojaridsa imasiri manaconi bani bedi emene da da dsadsanapomana najarijine bodideni huatohua madimanajari. Bodidenipa: —Imasiri icajini —quiquinanajari. <sup>4</sup> Jehe, nadsapa bani bedi emene poccadeni imasiri manaconi dada nebomana-jararaha najarodsa poccadeni imasiri jicanijine pajira-jerajaro.

<sup>5-6</sup> Nama nadsapa Cristo namihuaji madide ccaronabote nadsa Imehi Diodsa huati tajari:

—Jehe Abi, Tiapi madijadenicca imasiri manaconi bani bedi emene da da ihiquimamana nahijine tohuini tejerajaro.

Jijipa bicahi da da ihiquimamana nahijine naco tohuini tejerajaro.

Bani bedi bicahi siba hua tamaronidsa botta botta quinahijine naco tohuini tejerajaro. Daniji onihi onihi imasiri manaconi tojanijine caji taraha najaro naqui tohuini tejerajaro. Nohuerajaro.

Naraha poccadeni imasiri manaconi ojanijine ohua pina pohuadeni assiredenissa tinanajarode.

<sup>7</sup> Nadsama ohuattipi: Abi Dio, ohuapi aji ohuani.

Pina otahimari Tetti dsodo nanidsa anijarossa onananijine occaronajaro.

Tia tohuini tanicca onananijine tohuini onajaro

—nahi nade Cristo atti Dabi pocca jijiridsa dsodo inajarodsa.

<sup>8</sup> Diocca dossenijipi madija poccadeni imasiri manaconi bani bedi da da ihiquimamana nahijine icadossebaqquipojari. Naraha Cristo huati tajaripa: —Abi Dio madija nama quinahijine jipera tahi —najari. <sup>9</sup> Pohua atti naco: —Ohuapi aji ohuani. Tia tohuini tanicca onananijine occaronajarode —nahi nade Imehi Diodsa. Pohua atti nama najaripa imasiri manaconi bani bedi dade inajicajaro. Manaco pohuajine onihi dsatira inanajaro. <sup>10</sup> Jesocristopa ibora tadsa Dio Pohua jipa tahicca inanajaro. Pohua ime ccaccoradsapa icca imasiri manaconi tojararo. Pocca danijipi ojarijaro. Onihi nohueranitohui. Pohua emene icca imasiri manaconi toजारopi pajiranissa dsanapojaro. Nama najaria Dio pocca madija bicaqquri inanijine ia tonanabica-baqqujari.

<sup>11</sup> Nadsama Diodsa dada toqquimadedenipa huada huajijiradsa dsepedeni ihijimana najari. Huajijiradsa imasiri manaconi bani bedi emene Diodsa da da

ihicquimamana naraha najaropi imasiri inajicanijine pajira-jerani. <sup>12</sup> Naraha Jesocristo imasiri manaconi da inajaropi ojarijaro. Najaropi pajiranissa tehe nema dsanaponitohui. Nahi dsotodepa Jeso Imehi Dio madihihuaji toccamacossanidsa deni tojehe cajijarijine Dio Pohua inori nahatonihuaji huittarijari. <sup>13</sup> Nahidsapa Imehi Dio huati tapojari tohui madijari. Aja tahide Imehi Attipa: —Nidsaranibote tia huadidedenipa ajamani onanabaqquihitohui. Poccadeni dacorehe onajicanitohui —nahi nade. Najaro huada bacco tanitohui madijari. <sup>14</sup> Pocca daniji imasiri manaconi tojajaropi ojarijaro. Najarodsa Diocca madija tobicamanajaridenicca ima Diodsa pajiranissa dsanapojaro. <sup>15</sup> Najaro ima pajissa tojanijine Dio Corime iadsa ahuato inajararo. Dio Pohua Atti dsodo nanidsa ajima najaro:

<sup>16</sup> —Occa dossenijidsa iboraqquri nahijine pajiramana-jarahi qqui onadsa Ohuattipi: Isaraeri potemahidenidsa occa jehe canirenijicca ima dsatira onanana, onajaro —nahi nade Dio.

—Nadsama occa jehe canireniji dsatipi ajima nanijine:

Pohuadeni bodidsa onananitohui. Pina pohuadeni bodidsa dsodo onajarossa nanitohui, huatideni ajamamana-jarahijine.

<sup>17</sup> Pohuadenidsa: Epeje, ticcadeni imasiri ohuati ajimani. Ticcadeni tabaccorehedsa obodi huatomapoma-jeranitohui, onajaro —nahi nade Dio.

<sup>18</sup> Nadsama poccadeni imasiridsa Dio huati ajamadsapa imasiri manaconi bani bedi emene dade jicajaro. Najaro ima jicadsapi denima nohueranitohui.

### *Diodsa iajiressina, Pohuadsa jehe idsanapona*

<sup>19</sup> Jehe ohuemecotedeni, Jesocristo dsoqquedsa pohua emene toccajarojine Dio anihihuaji jaijedsimanijine toppinerani. Toppineradsapi jidapana icappina-jeradsa Diodsa iajiressinijine ipajirani. <sup>20</sup> Jeso dsoqquehijine pohua assire ccaccoradsapa Diodsa bacco inanijine icca jahui inahabajaro. Aji maittaccadsama Dio anihihuaji denima bica tanicca quiquinanahihuaji etero siba tanicca huacossajaro. Najaro huahuacossa inahabajarossa najaro Jesopa jahui dsati camittehe icajinijinecca iadsa inahabajaro. <sup>21</sup> Pohuapa icca daniji Diodsa dada toqquimade, icca ima huahuati toqquimade deni tojahicca. Diocca odsacca madija Cacahuade tojajari. <sup>22</sup> Nadsama ia Cacahuade Jeso icca jahui inahabadsapi Dio Pohuadsa iajiressina, onajaro. Ibodi maidsera inadsa Diodsara pajissa inanissa tadsa Pohuadsa iajiressina. Jeso emenejine ibodi tohuiredsapi tabaccorehe jirehe Diodsa iajiressina. Icca imasiri jicani ahuato tanijine naqui passodsa ia essire topa dsanadsapi Diodsa iajiressina, onajaro. <sup>23</sup> Diopa maidsera tahi. Ima bicani iadsa inananiijine huati tapojaripa pajissa najarossa inananiitohui. Nadsapi etti johuidso tejeradsa: —Pajissa nitide, pajissa jeranitide —inejerana. Ettipi: —Jehe, Dio Pohua Attissa inananiitohui. Pocca biquehe iadsa inananiitohui, pajissa —inana. Nema inadsapi najaro tohui imadina. Nadsapi dacoco ijirana, najarodsa pajissa idsanaponijine. <sup>24</sup> Jari, tibodideni huatoma-manaji. ¿Nejecoma inadsa imecote bodideni acco icamabaqquihijine? Pina huatideni cahanerara canahijine, ima bicanira inanamananiijine naqui bodideni acco acco ihicamabaqqui nana. <sup>25</sup> Ima onihi naqui Dio Pohuadsa ihiqueriqqui dsanapojaro inebo-jerana. Pina aja motadeni neneboqquimana najaridenissa inejerana. Iapi huajijiradsa icatidserara canaridsana. Ia Medsede ccanibote nahi. Dio madija huapimacca ima icattemanijinecca huada bacco tabote nani. Nema nadsapi denima icatidserara canaridsana, onajaro.

<sup>26</sup> Ohuemecotedeni, icca imasiri manaconi Jeso dsoqquejari tahimari pajissa tojani nahatoqquri inajaro. Naraha najaro ima bicani pina ponimassa inanadsa imasiri inana-dsanapodsapi nidsa Dio iadsa: —Jehe, occa ejedeni Jesojine ticcadeni imasiri jicajaro —najarahitohui. Imasiri nema inajararo manaconi da inanijinepi onihi nohuerajaro. <sup>27</sup> Nadsapi ima oppina tanicca iadsa anitohui. Diocca najidsohue

jororoni ppocorajaro iadsa naqui ssonarinitohui. Najaro najidsohuedsa pocca huadideni huapima inajicaridsahitohui. <sup>28</sup> Eti ajima-jerana. Diocca dosseniji Moisesidsa da inajaropi dacorajaro. Madija najaro dossenijidsa ibo tadsa imasiri inanani qqui toquinadsapa ima cacattemadehuaji pohua joca quina tahi. Nadsapa madija ima tonanajari ima cacattemade baccohuaji inahuamanadsa aja qqui toquinajarideni pamaha, 3 nahitide pocca ima huati toquinajari. Nadsapa ima cacattemade atti: — Jehe, dsoqquena –nadsapa huatideni huaneraqquiri nadsa inanadsoqquemana tahi. <sup>29</sup> Nadsapi najaro imasiri inanajaro manaconi oppina tani inaraha Dio Bedi ettajohui manaconipi denima oppina tani. Madijapa Jeso ttai ttai inanajarissa nadsapa pohuadsa najidsohue oppina tanicca ssonarinitohui. Aji Jeso emene toccajarojine Dio pocca jehe canireniji dsati iadsa tojajaro. Najarojine icca imasiri jicadsapi icca ima Diodsa tobicajaro. Dio Corime iadsa huati huana tadsa ia accode jipa taraha madijapa Jeso emene ponima inanadsapi Dio Corimedsa naco ima inanajaro. Nidsa dsotode najaripa najidsohue cajihitohui. <sup>30</sup> Najaro ima nahatoqquiri inajaropi Dio Atti dsodo nanidsa dsodo napojaro:

—Tabaccorehe inanamanajaro manaconipi Ohuana paji. Ohuana pohuadenidsa tabaccorehe manaconi onassonarinitohui –nahi nade Dio.

Pohua Atti naco:

—Ohuapi pohuadeni Cacahuade Dio. Occa madija ocattejidsa-baqquihitohui. Bicaqquiri najaridenidsa occa biquehe da onanitohui, tabaccoraqquiri najaridenipa onajidsobaqquihitohui –nahi nade Dio.

<sup>31</sup> ¡Jaho, Dio camitta tajari dsepedsa iquejenanipi oppina tani! Pocca najidsohue inahananijine ipajira-jerani.

<sup>32</sup> Tibodideni huatoma-manaji. Tahide Jesocristo tahimari timittamanapodsapi pohuadsa tiquejenajarojine ima ocassera tanicca onihi onihi tiadenidsa ssonari ssonari najarode. Naraha dacoco tijiradsa tinahanamana tinahanamana najarode. —Epejena, Dio onebona –titiquina nejerade. <sup>33</sup> Tiadeni motapi tamassohue tinahanamanajaro, najidsohue naqui tinahanamanajaro. Tiadeni nama tonanabaqquimanadsapa madija huapima qqui qqui totoquina najari. Titedsedenidsa tabaccorehe inanamanadsa naqui pohuadeni tedseje ocasserani temanajaro. <sup>34</sup> Jesodsapa jehe quinajarideni toponi cocorohuaji huedsamanadsapa tohuideni tetideni huanacquiri nadsa acco acco titicamabaqquimana nade. Tidsepedenitaji inaccamanadsa naqui tetidsemanadsa: —Epeje, tinaccamanaji –tiquinade. Titedsejemadenicca ima nahatoqquiri tiquinadsapi: —Epejeni, memehuajina denima bica tanicca, jicaquera tanicca icajinitohui –titiquina nade.

<sup>35</sup> Nadsapi tiadenidsa ohuattipi: Diodsa jehe tiquinajaropi tinebomana-jeraji. Diodsa jehe tiquinanissa dsanapodsapi Diocca daniji bica tanicca tiadenidsa tojanitohui. <sup>36</sup> Dacoco tijiraji, Dio Pohua tohuini nahiccassa tinanamana-dsanaponijine. Ocasserani temanadsapi nema nehe tinahanamanaji. Nema tiquinadsapi Dio Pohua huati tapojaricca ima bicani tiadenidsa inananitohui. <sup>37</sup> Aja Jeso ccanipomahijinecca imapi Dio Atti dsodo nanidsa ajima najaro:

—Itohui ccanipomahijinepa pajissa ccanibote nahi. Ccanide najo-jarahitohui.

<sup>38</sup> Occa madija bica tajaripa pohua bodidsa: “Pajissa Dio Pohua Attissa inananitohui” najari. Najaro jehenijima madi-dsanapohuitohui.

Naraha dsotode Ohua nebodsapa pocca imabotedsa todsodonidsapa pohuadsa ohuatidse-jeranitohui –nahi nade Dio.

<sup>39</sup> Naraha iapi pina poccadeni imabotedsa todsodoni-manajaridenissa inejerani. Najaridenipa Dio inajidsobaqquihitohui. Naraha iana Diodsa jehe inanissa tadsapi Dio ia tonassijabaqquihitohui.

# 11

## *Diodsa jehe quinahissa tajari tahimarideni*

<sup>1</sup> Diodsa jehe inanissa tadsapi: —Diopa Pohua Attissa inananijine pajirahi –inajaro. Nema inadsapi pajissa iadsa tojanijine tohuini imadijaro. Iadsa huati tapojaricca qqui inejeraccaraha nidsa iadsa tojanijine ibodidsa nahatoqquri inajaro.

<sup>2</sup> Maittaccadsama icca idideni Diodsa jehe quinahissa tadsapa Dio pohuadenidsa: —Tiadenipi ohuadsa bicaqquiri tiquinani –najari quinade. <sup>3</sup> Ia naqui Diodsa jehe inanissa tadsapi Dio Pohuajine meme nami huapima inahatoridsapojaro nahatoqquri inajaro. Pohuajine nahatoridsani qqui inajaro huapimapi nohueraporaha Pohua Attidsa inahatoridsajaro.

<sup>4</sup> Maittaccadsama Abeopa Diodsa jehe nahissa tajari. Nama nadsapa pocca daniji Diodsa da inajaropi bica tajaro. Naraha pohua imecote Cainocca danijipi bica tejerajaro. Abeocca danijipi denima bica tajarojine Diopa: —Jehe, pocca daniji ohuadsa tojana –najari. Nadsapa Dio Atti naco: —Abeopa bica tahi. Pocca ima naqui pajiranissa tani –najari quinade. Nadsama Abeopa maittaccadsama dsoqqueporaha pocca jehenijina iadsa huati huati dsanaponipaji najaro.

<sup>5</sup> Maittaccadsama Enoco naco Diodsa jehe nahissa tadsapa huatia-jarajari. Camitta taha Dio iaccamacossanijari. Nadsapa ajijaro namidsa assire bacco quina-jarajari. Pohua tahimari Dio Atti dsodo nanidsa dsodo napojaropi Enoco Diodsa ibora tadsa pohuajine Dio huahuatidse nadsapa Dio pohua iaccamacossanijari quinahi nade. <sup>6</sup> Ia naqui Diodsa jehe inejeradsapi ijine Dio huatidsehijine ssamo tani. Madija Diodsa tohuajiressihijine tohuini nadsapa tahide pohua bodi: —Jehe, Dio anihi. Pohuatohui quinajaridenidsa pocca biquehe da ina tani –napodsana Diodsa tohuajiressihijine pajirahi.

<sup>7</sup> Maittaccadsama Nohue naco Diodsa jehe nahissa tajari. Pohuadsa oppinehe tahimarini Dio huati tajari: —Najarodsa huapima onajicaridsahitohui –najari. Madija huapimapa nema nanicca qqui toquinapo-jararaha Nohuena: —Pajissa Diopa Pohua Attissa inananihohui –najari. Nadsama Nohuepa pocca madija tocassiejerahijine canoa imenibote icanahatojaro, pina Dio pohua icadossejarissa inanajaro. Dio Attidsa pajissa nadsapa ajijaro namicca madijadenidsa: —Dio Attidsa pajissa tiquinejeradsapi tijicanitohui –najari. Dio naco Nohuedsa: —Ohuadsa pajissa tanissa tadsapi tia onassijanitohui –najari. Nadsapi ppani ccajonadsa Nohue pocca madijapa tocassiejerajari. Naraha madija huapimapa Diocca najidsohuedsa tojicajari.

<sup>8</sup> Maittaccadsama Abarahao naco Diodsa jehe nahissa tajari. Pohuadsa Dio huahua nadsapa Pohua Attidsa ibora tajari. Pohuadsa Dio Attipa: —Ajijaro dsama tinebodsas ticcaji. Dsama onihi tiadsa nohue onanitohui. Najaro dsama tiadsa, tipotemanidenidsa da onanitohui –najari. Nadsapa pohua toccahihuaji ssamo taraha pocca dsama inebodsas toccajari. <sup>9</sup> Abarahaopa Dio Attidsa jehe najarijine Dio huati tapojaricca dsamahuaji bacco tadsapa pocca toja-jeraccaraha nahidsa madijari. Najaro dsamacca madija pocca madija jararaha pohuadenidsa quejemamanaha madimanajari. Abarahaopa pocca odsas coros ssequi nahidsa madiridsajari. Pohua bedi Isahaca, pohua jinodi Jacobo naco nama naridsamanajari. Najaridenidsa naco Dio huati tapojari: —Tiadenidsa ajijaro dsama da onanitohui –napojari quinade. <sup>10</sup> Abarahaopa odsas nema naniccadsas madiridsapojari nidsa dsotode memehuaajicca odsas panani bicani totabaccorarera taniccadsas madihijine tohuini bodi huato-dsanapojari. Najaro odsas pananipi Dio nahato tadsas inahatojaro.

<sup>11</sup> Abarahaopa Diodsa jehe nahissa tajarijine pocca amoneje Sara tadsajani ejedeni jiraha jadahi tocajamanahissa taraha Dio Pohuajine ejedeni cajimanajari. Abarahaodsas Dio Attipa: —Ojine tipotemani tohuapihitohui –najari. Nadsapa Abarahao pohua bodidsas: —Diopa Pohua Attissa inananihohui. Dsori tejeranitohui –nadsas

pohuadsa Diocca dacorehe inanadsapi ejedeni cajimanajari. <sup>12</sup> Nadsapa Abarahao jadahi tocajahissa taraha bedi cajidsapa najari potemahidenina tohuapijari. Pina abadsico bedi huapi tajarissa quinajari, pina passo imeni inidicca ssiqui nemanehessa quinajari. Tohuapi-dsanapodsapa onideni hua quinahijine ssamo tani.

<sup>13</sup> Abarahao, Isahaca, Jacobodenipa Dio pohuadenidsa huati tapojaricca qqui toquina-jaradsa jicapojari. Qqui toquina-jararaha bodideni: —Dio iadsa Pohua Attissa inananitohui -quinajari. Pohuadenipa huaji tanidsa ccajonani qqui toquinajarissa quinadsa attidenipa: —Nidsaranibote iadsa bacco najonanitohui -quinadsapa huatidsemanajari. Pohuadeni bodidsa nahatoqquiri nadsapa: —Ajijaro dsamadsa imadiraha dsama onihicca madijassa inajaro. Ajijaropi icca dsama jerani. Ajijaro dsamadsapi issoniqquimanitohui -quinajari. <sup>14</sup> Jehe, madija attideni nama quinajari-denipa iadsa ima ahuato inanamanajaro. Pohuadenipa poccadeni dsama tojanijine tohui qqui naridsamanaccajari. <sup>15</sup> Abarahaodenipa poccadeni dsamabote tohuini bodideni huahuatoma-mana najarajari. Poccadeni dsamabote tohuini quinadsapa jai tojanihijine pajiramanaraha. <sup>16</sup> Pohuadenipa memehuaji Dio madihicca dsama denima bica tanicca tohuini quinajari. Nama quinajarijine Diopa Pohuadsa: —Abarahaodenicca Dio -quiquinanahijine comehi tajarajari. Nama nadsapa odsa panani memehuajicca pohuadenidsa inanajorajaro.

<sup>17-18</sup> Abarahaopa Diodsa jehe nahissa tadsapa Pohua Attidsa ibora tajari. Dio Abarahaodsapa huati tapojari: —Ticca ejedeni Isahaca potemahidenidsana: “Abarahao potemahideni” onanitohui -napojari. Naraha dsotode Abarahaocca jeheniji nattome inajaro. Pohua Attipa: —Abarahao, ticca ejedeni ohuadsa ticca daniji teccorajo. Ohuadsa da tadsa ono tojahissa tahijine -najari. Nadsapa Abarahao pocca ejedeni ojariraha Diodsa eccorajari, ono tojahijine. <sup>19</sup> Abarahaopa nahato tajari: —Diopa madija dsoqquejari inahatonihijine pajirahi -najari. Nadsapa Abarahao bodi nama najarijine pocca ejedeni tossiajajari. Nadsapa pocca ejedeni dsoqque-jararaha pohua tahimariipi pina dsoqque nahatoni najarissa najari, inajaro.

<sup>20</sup> Maittaccadsama Isahaca naco Diodsa jehe nahissa tadsapa pohua bedi pamaha Jacobo Esaho tedsejemadenicca ima huati tajari: —Diopa tiadenidsa ima bicani inananitohui -najari. <sup>21</sup> Jacobo naco Diodsa jehe nahissa tadsapa pohua dsoqquehicca huada tohuajirajonadsa pohua jinodi Josecca ejedeni pamaha pohuadeni tedsejemadenicca ima huati tajari: —Diopa tiadenidsa ima bicani inananitohui -najari. Nadsapa pocca pidsodsapa pohua tocahuejidsa nadsa Diodsa huatidsejari.

<sup>22</sup> Jose naco Diodsa jehe nahissa tadsapa pohua dsoqquehicca huada tohuajirajonadsa pohua imecotedeni aja Isaraeri potemahideni quiquinanajaridenidsa pohuadeni tedsejemacca ima huati tajari: —Jidapana Ejitohuaji timadimanaccaraha nidsa dsotodepi Diojine jai tijeninenitohui. Nadsapi otone naqui dsojo tinanimanana, icca abicca dsamabote Canahadsana ppa tidsanimananijine -napohui nade huatia-jaradsama.

<sup>23</sup> Maittaccadsama Moisesicca abi amideni naco Diodsa jehe quinahissa tadsapa poccadeni ejedeni inajimamanajari. Pohuadenipa: —Dio icca ejedeni ecahuahitohui -quinadsapa dsama Ejitocca taminecca dosseniji noppineni cappinamanajarajari. Taminecca dossehepi: —Isaraeri potemahidenicca ejedeni maqquideje tossonamanadsapa totojica nana -nanaja najari quinade. Naraha Moisesi tossonadsapa pocca abi amideni: —Icca ejedeni bica tahi, dsoqque-jarana -quinadsapa abadsico huatimade tocajari naha inajimamanajari.

<sup>24</sup> Moisesi biji ccaradsapa Diodsa jehe nahissa tajari. Tossnapohuipa Ejitocca tamine benedicca medse tojaporaha napidsapa pohuadsa: —Tamine benedicca medse -quinahijine jipera tajari. <sup>25</sup> Pohuadsa ajijaro namicca imapi imasiri. Najarodsapa huatidsehijine jipera tajari. Najaropi jicaca tani nahato tajari. Pohuapa



Diocca madijadsama najidsohue tonahanahijinena pohuadsa bica tajaro. <sup>26</sup> Moisesipa Diocca madija tedseje pohuadeni Idinide Cristo ccajonahi tohui madimanajari. Najarojine ocasserehe inahanamanajaro. Naraha Moisesipa pohuadsa Diocca biquehe tojanitohui nahato tapojari. Najaro tohuira madidsapa dsama Ejitocca biquehe tohuini najarajari. Diocca biquehena pohuadsa denima bica tajaro. <sup>27</sup> Moisesipa Diodsa jehe nahissa tadsa Ejitodsa nebodsapa toccajari. Ejitocca taminecca huadie noppineni cappina-jarajari. Diocca dossenijissa inananijinena dissera tajari. —Epeje onana –najarajari. Ia Cacahuade Dio ahuatora taraha Moisesipa pina Dio qqui tajarissa nadsa pocca dossenijidsa ibora tajari.

<sup>28</sup> Moisesipa Diodsa jehe nahissa dsanapodsapa ejete Pascoa inahatopojaro. (Pascoa ettidsapi: Dio tossoniqquimajari, inajaro.) Moisesipa pocca madija Isaraeri potemahideni icadossebaqquijari, poccadeni noccobiji inidicca ahuadsa edede emene sse naridsamanahijine. Nama quinadsapa Diocca dodosse memehujicca madija nanajicade ccajonadsa poccadeni ejedeni maqquideje tahidecca inajica-jarajari. Poccadeni odsadsa tossoniqquimajari. Naraha dsama Ejitocca madijadenicca odsadsa edede emene nohueradsapa huapimacca ejedeni maqquideje tahidecca inajicajari.

<sup>29</sup> Dsotode Isaraeri potemahideni Diodsa jehe quinahissa tajari. Dsama Ejitodsa jahininedsa jai tojadsapa coridsa imeni onini Mar Rojocca passo Djotine carobedsa nami joco tadsapa jai tojeqquimahissa tajari. Naraha Ejitocca soldadodenipa coridsa bacco toquinadsa: —Jina, nema nehe qquidso inabaqquina –quinadsapa huapima je tocaniredsa tojicajari.

<sup>30</sup> Isaraeri potemahideni Diodsa jehe quinahissa dsanapodsapa Pohua Attidsa iboraqquri najari. Nadsapa odsa panani Jeriocca siba hua nahuajanini idenihuaji jai huajani, jai huajani, jai huajani dsanapodsapa huada 7 nehe bacco tadsapi Djotine siba hua nahuajanini barari-ridsadsa cojo nahuajanijaro. <sup>31</sup> Rahaba naqui huananariraha Diodsa jehe nanissa tadsapi odsa panani Jeriocca madija Diodsa iboqquri najaridenidsama dsoqque-jerajaro. Ponipi aja Isaraeri potemahideni pamaha Jericohuaji noccodsade huedajonapodsapa pohuadeni acco icamabaqquijari. Nadsapa siba hua nahuajanini Djotine bararidsa cojo nahuajanidsapi Isaraeri potemahideni jai tojedsimadsapa Jeriocca madija huapima inajicabaqqui-manaraha Rahaba ponina dsori tajaro.

<sup>32</sup> A, Diodsa jehe quinahissa tajarideni huapi tade. Najarideni huapima tahimarideni dsodo onanijine opajira-jerani. Pina Jedeo, Baraca, Sason, Jepete, Dabi, Samohue quinajaridenicca, Dio Atti cacomeraqquri najaridenicca naqui huapima tahimarideni bica tade. <sup>33</sup> Najarideni huapimapa Diodsa jehe quinahissa tajari quinade. Ohuahadenipa jadsiredsa dsama onihicca madijadsa deni toquejenajari. Ohuahadenipa pina Dio Attissa inanamanadsa imarideni icattemamanadsa inapajiramananissa tajaro. Ohuahadenipa Dio huati tapojarissa najaro pohuadenidsa tojajaro. Ohuahadenipa dsomaji ajarideni pina moda inaridsajarissa nadsa dsori tocanirejari. <sup>34</sup> Ohuahadenipa dsippo jororoni ppocoraraha pohuadenidsa pina ohuijarossa nadsa imedeni camana-jarajari. Ohuahadeni naco jadsirecca massitodsa dsoqquemanahitohuiraha dsori tocanirejari. Ohuahadenipa tojaparimanaraha Djotine todacoremani-manajari. Todacoramansadsa jadsire inanamanadsapi poccadeni huadidenidsa deni toquejenajari. <sup>35</sup> Amonejedeni naqui Diodsa jehe quinahissa tadsa ponidenicca madija dsoqquemanadsapa Djotine camitemani-manajari.

Ohuahadenipa todsepe toquejenadsa najidsohue ihinahanamana najaro. Dio inebomanadsa nanajidsodedeni tappa inabaqquimanahijineraha najaro tohuini quina-jarajari. Bodideni nahatoqquri napodsapa: —Epeje, idsoqquedsapi inahatoninitohui. Nadsana madie denima bica tanicca icajinijine –quinajari. Najarotohui mohuaradsa najidsohue ihinahanamana najaro. <sup>36</sup> Ohuahadeni naco

momohua inanabaqquimanajari, itacossimanajari, bijideni, issodeni cadenadsa jore inaridsabaqquidsa toponi cocorodsa coro coro ihidsimabaqquimana najari. <sup>37</sup> Ohuahadenipa sibaadsa iquinabaqqui-manadsapa tojicajari. Ohuahadenipa huihuissidsa huissi ippiridsamanadsa tojicajari. Ohuahadenipa jadsirecca massitodsa itahuajinamanadsa tojicajari. Ohuahadenipa etero cajicamanadsa edede etero, cabra etero ssequi quinadsa huehuedsamana najari. Cappiramanahissa tajari. Nanajidso toquejenadsapa tohuati nahanaqquiri najari. <sup>38</sup> Diodsa jehe quinahissa tajaridenipa ajijaro dsamacca madija tabaccoraqquiri najarideni tedseje quejemamanahijine ssamo tani. Nadsapa Diodsa jehe quinajaridenipa dsama huamonihuaji, ssono caji tanihuaji jajahi tojabaqquirdsa najari. Odsa cappiramanadsapa ssonocca odidsa mamadiridsamana najari.

<sup>39</sup> Najarideni huapima Diodsa jehe quinahissa tadsapa Dio pohuadenidsa: — Bicaqquiri tiquinani –najari. Dio nama naraha pohuadeni madimanadsa Pohua huati tapojaricca nemanehipi pohuadenidsa da inejerajaro. <sup>40</sup> Pohua huati tapojaricca ima pohuadenidsa da inejerajaropi itohui bodi huatojari. Iadsa naqui Pohua huati tapojaricca inananihohui. Aja Diodsa jehe quinapojaridenipa jicaporaha iadsama Dio huati tapojaricca cajimanahitohui. Nadsana pohuadeni, ia huapima itassaqquidsa Pohua huati tapojari bicabote iadsa tojaridsanissa tanitohui.

## 12

### *Jeso tohuira icattomama canana*

<sup>1</sup> Jehe, Diodsa jehe quinapojaridenipa huapi tade. Najaridenipa jicaporaha pina inoridsa domodeni huahuajanijarissa nadsa poccadeni jeheniji iadsa nohue quinajaro. Nadsapi ia naqui pohuadenissa inananihijine ajima inana: Icca jehenijidsa mohua mohua najaropi inebona. Imasiri naqui inebona. Ajijaro namidsa imadiccadsama Diodsa jehe inanissa tadsa imadi-dsanapona. Dacoco ijirana. Pina madija ittomedsa joppa tajarissa inana. Joppade diarahijine pocca etero huapicca ssiti, ohuaha ccanaja tahicca inebo nadsa joppa tajari. <sup>2</sup> Pohua tedsejemara tocattadsa paja joppa tarihi nadsapa jicaqquinihuaji bacco tajari. Ia naqui Jeso tohuira icattomama canana. Pohuapa icca jeheniji jinede. Pohuapa tahide Diodsa: —Jehe Abi, Tettissa tinananihijine tipajirani –napojari. Pohuajine icca jeheniji pajiranissa tajaro. Jesopa Imehihuaji toccamacossanidsapa huatidsehe imeni cajihitohui nahato tapojari. Najarojine ahua porimacossanidsa dsoqqeue inahanajaro. Aji ahua porimacossanidsa idsoqquenijinepi oppina taraha pohuapa cappina-jaradsa pohua ccaccorajaride. Nadsapa pajissa nahatonidsa Imehihuaji toccamacossanidsapa madija cacahuade tojahijine Dio Pohua inorihuaji huittaritari.

<sup>3</sup> Nadsama Jeso ocasserani ahujari tahimari tibodideni huahuatoma naji. Imasiri ssequiri najarideni pohuadsa tabaccorehe inanamanaraha nama naha tonahanajari. Tiadeni naqui tabaccorehe tinahanamanadsapi: —Tocasserani nani. Ohuapi epejena –tiquinejeraji. <sup>4</sup> Jesopa tabaccorehe tonahanadsa dsoqqeje. Naraha tiadenipi tabaccorehe tinahanamanadsa tidsoqqeje cama-jeraccani. Nadsapi dacoco tijiraji, onajaro.

### *Diopa pocca ejedeni johua icanabaqqui tahi*

<sup>5</sup> Tiadenipi Dio pocca ejedeni tiquejenaraha pocca ima huati tapojaricca tetideni ajimamanajaro. Najaropi Dio Atti dsodo nanidsa dsodo napojaro: —Dsabisso, tiadsa ohuati huana tani.

Ima bica tanicca tiattanihijine tia Medsede tia mari canadsapa: “Omittejerana, poni” tejeraji.

Tia johua canadsa naco oji tejeraji.

<sup>6</sup> Ia Medsedepa madijadsa huati cahanari canadsapa mari icanabaqqui tahi.

Najaridenidsana: “Occa ejedenideni” najari.

Tabaccorehe inanamanadsapi johua icanabaqqui tahi.

Inahattabaqquihijine inajidsobaqqui tahi

–nani nade Dio Atti dsodo nanidsa.

<sup>7</sup> Nadsapi tiadenidsa Diocca najidsohue ssonaridsapi mohuaradsa tinahanamanaji. Diopa tiadenidsa: —Occa ejedenideni –nadsa ticahatteranijine tiadeni johua tocanabaqquijari. Jari, tibodideni huatoji. Ejedeni tabaccorehe inanadsapa çimehi johua icana-jaraco? Johua icana tahi. <sup>8</sup> Diopa pocca ejedeni tocahatterahijine huapima johua icanabaqqui tahi. Naraha Dio tia johua cana-jaradsapa pocca ejedeni tija-jerani. Tiapi pina ejedeni imehi huajimacca bedissa tajaro. <sup>9</sup> Ia naqui tahide ejedeni iquejenadsa aja namicca icca abidenipa tabaccorehe inanani qqui toquinadsa, mittamanadsa naco ia johua tocanabaqquimana tade. Nadsapi icca abideni noppine icappinadsa attidenidsa iboraqquiri inade. Ejedeni nama quinahijine bica tani. Nadsapi ia naqui icca Abi memehuaaji madijari noppine icappinadsa Pohua Attidsa iboraqquiri inadsana denima bica tajaro. Nema inadsapi camittehe jiquejeranicca icajinitohui. <sup>10</sup> Ejedeni iquejenaponipi namicca icca abidenipa: —Ajima inadsana icca ejedeni madimanahissa tahijine bica tani –quinadsapa iadsa johua johua quinaraha poccadeni johuaniji pajiranissa tejerajaro. Naraha Abi Diocca johua canehena pajiranissa tajaro. Najarodsa ibicadsanapodsapi ibodi tohuirenijine, pina Pohua bica tajari bodi huire tajarissa inanijine. <sup>11</sup> Naraha johuaniji iadsa ssonaridsapi etidse-jerani. Ocassera tani. Naraha icca tabaccorehe nebode iattadsapi icca madie tobicanitohui. Joneqquiri inehe imadidsa ima bicanira inanadsanaponijine.

### *ICCA MADIE BICA TANIJINE DISSESSERA INANA*

<sup>12</sup> Icca madiepi pina ittomedsa joppa inajarossa najaro. Joppa tiquinadsa ja tiquejenadsapi tipitodeni tojapariraha nema nehe denima joppade dacoco tijiraji. Najaro imapi Diodsa paji jehe tiquinarini dsanaponijine dacoco tijiraji. <sup>13</sup> Jahui bicanihuaajira jai tijaji. Nadsapa tinattideni jodsi jodsi tamissamanajarideni jai tojamissahissa tahijine. Amorideni piti toquinapoma-jaradsapa tonomimanahijine. Najaro imapi ticcadeni jeheniji toccanissa tadsapi madija ohuahadeni naco pina ticcadeni jehenijissa quinahijine.

<sup>14</sup> Madija huapimadsa joneqquiri tiquinehe timadimananijine disseraqquri tiquinaji. Tibodideni huire tadsa, imasiri jirehe timadimananijine naqui disseraqquri tiquinaji. Tibodideni huire tejeradsapi ia Medsede Dio qqui tiquinajarahitohui. <sup>15</sup> Timecotedeni Diodsa jehe quinajari acco ticamabaqquimanana, Diodsa apaja quina-jarahijine. Apaja quinadsapa Diocca daniji tohuati huanehe dsori tocanirehitohui. Dio Attidsa bodi nacassera tajaripa tiadenidsa quejema-jarana. Najaripa pina ahua bidabote jabo bidenessa najari. Pocca nacasserehe tiadenidsa dsapa torana. <sup>16</sup> Aja maqquideje amoneje huananehe cajimanajarideni naco tiadenidsa quejemamana-jarana. Madija Dio noppine cappinamana-jaradsa Diocca dosseniji ponima inanamana tani. Najarideni naco tiadenidsa quejemamana-jarana. Pina maittaccadsama Esaho Diocca dosseniji ecahua-jeradsa ponima inanajarossa quinadsapa bica tejerani. Esahopa tahide tossonapojari. Nama nadsapa imehi dsoqquedsa dsepetajipi pohuadsana tojanijineraha Esaho pemihissa tadsa jijipa manaco pocca esodsa da inajaro. <sup>17</sup> Dsotodepa Esaho imehidsa huati tajari: —Abi, otedsejemacca ima bicani ohuadsa huati tinaji –naraha imehipa bedi attidsa huattajo tajari. Esahopa najaro tohuini oji oji naraha pohuadsa tojanijine ssamo tajaro.

### *DIODSA IAJIRESSINIJINECCA IMA*

<sup>18</sup> Tiadeni Diodsa tiajiressimanajaropi pina maittaccadsama Isaraeri potemahideni ssono oppina tanihuaji tohuajiressimanajarissa nejerani. Pohnadenipa ssono Sinahihuaji toqueriqquijari, nahidsa Dio Moisesidsa huati tahijine. Najaro ssono tetepidsapi jororoni, dsidsini, essenì sohue tajaro, jojode ccahuajanini canajaro ani najaro. Aja Isaraeri potemahi pohnadeni noccodsa qqui toquinajari huapima pohnadenidsa oppina tajaro. <sup>19</sup> Tiadeni Diodsa tiajiressimanajaropi pina Isaraeri potemahideni mohuini oppinabote mittamanajarissa najaro timittamana-jerani. Pohnadenipa jeihei mohui dacorajari jei jei nadsa Dio huati huati tajari Atti mohuini oppina tajaro mittamanajari. Pohnadenidsa oppina tadsa oji oji quinadsapa Moisesidsa huati toquinajari: —¡Apaja tinanajo! Denima huati huati tajarana. Imittanijine oppina tani -quinajari nade. <sup>20</sup> Dio pocca dosseniji mittamanadsa naco najarossa inanamananijine pajiramana-jarajari. Pocca dossenijipi ajima najaro: —Madija ajijaro ssono tajodsa, bani bedi naco ssono tajodsapa sibadsa, huahuajinadsa titinanadsoqquemana nana -najari nade Dio. <sup>21</sup> Pohnadeni huapimapa oppina tanicca qqui toquinadsa cappinamanajari. Moisesi pohua naco cappinadsa attipa: —¡Ocappinajaro, ohuìssò tacca-cca canani! -najari nade.

<sup>22</sup> Naraha tiadeni Diodsa tiajiressimanajaropi ssono Siohuaji tiqueriqquijarossa najaro. Najaropi memehujicca odsa panani Jerosare dsati onini. Najarodsapa Dio camitta tajari madijari. Nahidsa pocca dodosse tabaqqi memehujicca huemahi queriqquidsa Pohnadsa huahuatidsemana najari. <sup>23</sup> Jesodsa jehe quinajari memehujaji quequeriqquimana najaridenihuaji tiajiressimanajaro. Diopa pohnadenidsa: —Occa madija, occa ejedeni tahidedenicca -najari. Pohnadeni oni Dio pocca papeodsa dsodo nani anijaro. Diodsa tiajiressimanajaropi huapimacca ima cattemade tojahijine. Madija bicaqqiri najarideni jicapojari corimedenedsa naqui tiajiressimanajaro. Dio Pohnajine pajiramanahissa tadsa Pohnahuaji madimanajari. <sup>24</sup> Icca ima tonanabicate Jesotohui tiajiressimanajaro. Pohnajinea Diocca jehe canireniji dsati iadsa tojajaro. Jeso pohua emenedsa naqui tiajiressimanajaro. Jeso itohui dsoqquedsa pohua emene toccajaropi icca ima tohuirenijine Diodsa huati tajaro: —Poccadeni imasiridsa epeje taji -najaro. Najaropi iadsa bica tajaro. Naraha Abeo emene toccajaropi najarossa nejerani. Imasiri inajicanijine pajira-jerani. Pohua emenepi: —Ohuaccone -najarora huati tajaro Diodsa.

*Paji, Dio Atti tettajomananipi oppina tani*

<sup>25</sup> Nema nadsapi Dio tiadenidsa huati tadsapa timittamananissa taji. Pohua Atti tettajomana-jeraji. Ajana maittaccadsama madimanajaridenipa Moisesi pohnadenidsa Dio Atti huati huati tajariraha ettajomanadsapi Diocca najidsohue dsori tocanire-jarajari. Nema nadsapi Dio memehujaji iadsa huati naronadsa Atti ettajodsapi pocca najidsohue denima oppina tanicca dsori icanire-jeranitohui. <sup>26</sup> Maittaccadsama ssono Sinahidsa Dio huati huati tajari Atti mohuini dacorajarojinepi nami dsadsa najaro quinade. Naraha jidapana Pohua Atti iadsa anijaropi ajima najaro:

—Nidsa ojine nami dsadsa napomanitohui. Naraha nami dsadsa nani ojari-jeranitohui. Meme naqui ojine dsadsa nanitohui -nahi nade Dio Pohua Atti cacomerabote Ajeojine dsodo nanidsa anijaro. <sup>27</sup> Aja Pohua Atti: —Ojine nami dsadsa napomanitohui -najaripa pocca nahatonaja meme, nami huapima aji jidapana qqui inanicca aniridsajaropi amossihuajanitohui. Nadsapi Dio pocca cacahuehe ahuatora taniccana iadsa anidsanaponitohui. <sup>28</sup> Pocca cacahuehe iadsa inanaridsajaropi jicaquera tanitohui. Najarotohui Dio Pohnadsa etidsena. Pohnadsa: —Epeje, tijine bica tani -inana, onajaro. Pohnadsa icappinadsa icca madiema, ibodima Pohnadsa etidsedsa: —¡Bica tinani, deni tijani! -inana, onajaro. Nema inadsana Pohnadsa bica tajaro. <sup>29</sup> Diopa pina jororoni dacorajarossa najari.

Tabaccorehe huapima inajicanissa tanitohui. Najarojine Pohuadsa: —Deni tijani -inajaro.

## 13

### *Dio inahatidsehijine ajima inana*

<sup>1</sup> Jesodsa jehe quinajarideni huapimapa timecotedeni. Najarideni tedseje tetideni cahanerara canajaropi tinebomana tejerana, onajaro. <sup>2</sup> Ajijaro marinaja naqui tetideni ajimamana tejerana: Madija pohuadenidsa tinoccodeni jidsaqquri najari ticcadeni odsadsa bacco najonamanadsa pohuadenidsa bicaqquri tiquinaji. Pohuadenidsa: —Nija, jai tijedsimaji. Aja, tijipamanaji. Ajidsa ticahadijanijine bica tani -titiquina nana, onajaro. Itesse ohuahadenipa nama nama quiquinanadsapa tahide ima ssamoqquri naraha Diocca dodosse tabaqqi memehuajicca naco poccadeni odsadsa jai tojedsima tahi.

<sup>3</sup> Nadsama madija toponi cocorodsa domo huedsajaridenitohui tibodideni huahuatoma-mana naji. Pina pohuadeni tedseje ocasserani tinahanamanajarossa tiquinaji. Madija nanajidso toquejenajaridenitohui naqui tetideni ajimamana tejeraji. Nidsa dsotode tiadeni naqui pohuadenissa tiquinanijine nitide.

<sup>4</sup> Cajicajicca imapi Diodsa bica tani. Nema nadsapi maqquidejedeni amoneje ticajimanadsapi tecajirenissa taji. Amonejedeni maqquideje ticajimanadsapa tecajirenissa taji. Nebohuepi poni. Maqquidejedeni, amoneje ticajimanadsapi ponira tinajarimanaji. Amonejedeni, maqquideje ticajimanadsapa pohuara tinajarimanajo. Najaro marinaja tecahuamana-jeradsapi huananehe tinanamanajaro. Huananehepi maqquideje amoneje cajiraha amoneje onihi aja ajapi poni. Amoneje maqquideje cajiraha maqquideje ohuaha naja najapi poni. Tabiradeni naco pohuama aja aja canaridserajaripa poni. Huananehe onihi, onihi naqui tinebomanaji. Nidsa dsotode Dio madija huapimacca ima cattemade tojadsapa huananehe cajimanajaridenidsa: —Ticcadeni ima tabaccora tani -nadsa inajidsobaqquihitohui.

<sup>5</sup> Dsiniro huemani ticajimanadsa timadimananijine tohuinira tibodideni huato tejeraji. Aji ticajimanajarodsa: —Epeje, najarodsa imadini pajirani, bica tani -tiquinaji. Diotohuira denima tibodideni huatomanaji. Pohua Attipa: —Tia onebojerani. Tiadsa epeje onejeranitohui -nahi nade Pohua Atti dsodo nanidsa. <sup>6</sup> Nema nadsapi ia naqui tamine Dabicca dsodonijidsa pajissa inadsa huati huati ihmami najaro. Najaropi:

—Ohua Medsede ohua acco camajari. Ocappina-jeranitohui.

¿Madijapa ohua tonatabaccora-manahijine pajiramanaco?

Nohuerahi. Pajiramana-jarahi

-nahi nade Dabi atti pocca jijiridsa anijaro.

<sup>7</sup> Tiadeni maridedenitohui tibodideni huahuatoma-mana naji. Pohuadenipa Dio Attidsa tiadeni mari mari totocanabaqquimana najari. Pohuadenipa ima bicanira inanamana-ridsadsapi poccadeni madie bica tade. Najaro poccadeni madie tetideni ajimamana-jeradsapi pina poccadeni jehenijissa nehe timadimanana, onajaro. <sup>8</sup> Jesocristopa cacajiqquimera-jarahitohui. Pohuapa maittaccadsama nama najonajaria jidapana naco nama najari. Nidsa dsotode naco nama dsanapohuitohui.

<sup>9</sup> Nadsapi marinaja pina Jeso tahimarissa nejeranicca timittamanadsapi najarodsa pajissa tiquinejeraji. Marinaja jidsa tanicca anidsa naqui: —Imittana -tiquinejeraji. Tibodideni Diodsa jehe tiquinani todacorani nanijinepi Dio iadsa huati cahanari canahi tahimarina paji. Najarona ibodi tobicanijine pajirani. Naraha marinaja onihi pina: —Ajajari jijipapa tijipamana tejeraji, oppina tahi -quiquinanajaricca marinajapi tibodideni tobicanijine pajira-jerani.



<sup>10</sup> Maittaccadsamacca Diodsa dada toqquimadedenipa Dio anihihuaji denima bica tanicca quiquinanahihuaji bani emene dsojo dsojo ihicadsimamana najaro, poccadeni madijacca imasiri manaconi. Naraha jidapana icca imasiri manaconipi Jeso emene toccajarona paji. Najaropi aja dada toqquimadedenidsa nohuerani. Pohnadenipa najaro Jesocca daniji iadsama cajimana-jarahi. <sup>11</sup> Maittaccadsama poccadeni imasiri manaconi bani emenepa Diodsa dada toqquimade deni tojahiccana Dio anihihuaji denima bica tanicca quiquinanahihuaji dsojo dsojo ihicadsimamana najaro. Naraha assirepa pohnadeni madimanahi amossinihuaji dsojo ininemanadsa botta botta quiquinanajari. <sup>12</sup> Dsotode naqui pina najarossa inanamanajaro. Jeso naco odsa panani Jerosare amossinihuaji iaqquenamanadsa ahua porimacossanidsa coba id-sanamanadsa ocasserani ahujari. Pohna emene toccajaropi madija pohnadsa toquejenajari imarideni inahirejaro. <sup>13</sup> Jari, ia naqui Jeso tedseje odsa panani amossinihuaji jaijenana. Ia naqui pina pohna ocasserani ahujarissa najaro inahanana. <sup>14</sup> Ajijaro namidsapi odsa panani anidsanaponijinecca icappirani. Jina, memehuajicca odsa panani jicaquera tanicca tohuira jaijana. Nani bacco inanijine disseraqquri inana. <sup>15</sup> Nadsapi: —Jesocca iquejenajaro —inadsapi huajijiradsa Diodsa ehetidse nana. —Jehe Abi Dio, epejeni. Tijine bica tani —idsanapona, onajaro. Najaropi icca daniji Diodsa bica tajaro. <sup>16</sup> Ajijaro naqui tetideni ajimamana tejeraji: Ima bicanira tinanamana-dsanapoji. Ticajimananica mota naqui cappiramanajaridenidsa da da titiquina naji. Najaro icca danijipi Diodsa bica tani. Pina maittaccadsama Dio inahatidsemanahijine bani da da quiquinanajarissa najaro.

<sup>17</sup> Tiadeni maridedeni attidenidsa iboraqquri tiquinaji. Pohnadenipa tiadeni cacahuade jassi quina-jarahi. Pohnadenipa ajijaro ima nahatoqquri napojari: Nidsa dsotode Dio bacchohuaji idomo huadsa poccadeni cacahuaniji tahimarini Diodsa ecomeramananitohui. Nema nadsapi pohnadenidsa tijinedeni bica tadsapi huatidsemanahitohui. Naraha pohnadeni oji tinanabaqquimanadsa tiadeni cacahuade tonacassera-manadsapa ima bicani dsori ticanirenitohui.

<sup>18</sup> Itohui Diodsa huati huati titiquina naji. Iapi ibodidsa ima nohuerani nahatoqquri inani. Imadinissa dsanaponijine disseraqquri inajaro. <sup>19</sup> Tiadeni qquide ocanaorani-pomanijine tohuini onadsa Diodsa huati huati tiquinaji, onajaro, denima onajo-jeranijine.

### *Occa dsodoniji jicanicca*

<sup>20</sup> Jonehe jinede Diopa Pohna Bedi ia Medsede Jeso dsoqqueraha Pohnajine nahatonijari. Jesopa edede cacahuade bicahi. Iapi pocca edede iquejenajaro ia tohuacahua-baqqujari. Pohna emene toccajarojine Dio pocca jehe canireniji dsati jiquejeranicca iadsa inahatojaro. <sup>21</sup> Najari Dio Pohna tiadeni tonapajira-baqquihissa tana, ticcadeni ima huapima naqui inabicanissa tana, nani Pohna jipa tahicca tinanamana-dsanaponijine, onajaro. Dio pocca madija bicaqquri inanijine ia tonadacora-baqquina, onajaro. Jesocriso pocca iquejenadsapi Dio iadsa nema inanadsanaponitohui. Pohnadsa: —¡Bica tinani, deni tijani! —ihidsanapo nana, onajaro. Pajissa nema nana.

<sup>22</sup> Jehe ohuemecotedeni, ajijaro ima teppe tiadenidsa dsodo onajaropi ticcadeni jeheniji todacorani nanijine. Aji ojine dsodo nanipi huapi tejerani. Pamema nani. Najaro hua tiquinanissa taji. —Hua nani najo tani —tiquinejeraji.

<sup>23</sup> Imecote Timoteocca ima nahatoqquri tiquinanijine naqui tiadenidsa dsodo onajaro. Jidapapa toponi cocorodsa qquenajari. Huassinaja bacco nanidsapa nahi tiadenihuaji ohuadsa toccahitohui. Naraha bacco nani-jaradsapa ohua motta nani occanitohui.

<sup>24</sup> Tiadeni maridedeni huapimadsa nija onajaro. Jesodsa jehe quinajarideni huapimadsa naqui nija onajaro. Dsama Itariacca madija naco tiadenisa nija quinajari.

<sup>25</sup> Dio tiadenisa ima bicani inanadsanapona, onajaro. Epejeni occa ima.

## Satiacocca ima teppe Santiago

Ajjaro ima teppe dsododepa Satiaco. Jeso tahimari dsodo naniccadsa madija onideni Satiaco cacanimanahi 4 quinajari. Ojariapa Jesocca dodosseraha najaripa ajjaro ima dsodo inejerani. Jeso ohuaha Satiaco Dsodse bedina ajjaro ima dsodo inajaro quinahi nade.

Satiacopa Isaraeri potemahi jodio madijadenidsa dsodo inajaro. Pocca dsodonijipi: Jesodsa jehe quinajaridenipa ima bicanira inanamananina bica tani. Jesodsa jehe najari ima bicani inana-jeradsapi pocca jeheniji ponima tojanitohui. Pocca dsodoniji onihipi: Iadsa ima onihi, onihi ssonaridsapi mohuaradsa inahananina bica tani. Ima ocassera tanicca ssonariraha Diodsa etidsedsanaponijine, najaro.

### *Satiaco nija najari*

<sup>1</sup> ¿Nija ohuemecotedeni? Ohuapi Satiaco tiadenidsa dsodo onajaro. Abi Diocca medse, ia Medsede Jesocristocca medse ojani. Aji Isaraeri bedi 12 quina-jari potemahi tiquejenajaro dsama huapimadsa timadiridsa-manajarodenidsa: — ¿Bicaqquri tiquinaqui? —onajaro.

### *Dissessera inana, icca jeheniji paji toccarini nanijine*

<sup>2</sup> Jehe ohuemecotedeni, tiadenidsa ima onihi ssonari, ima onihi ssonari naraha tettidenipi: —Epeje. Nema nehe ohuatidseni -tiquinanina bica tani, onajaro.

<sup>3</sup> Ajaropi nahatoqquri tiquinani: Tiadenidsa ima ssonarijaropi ticcadeni jeheniji ahua to tanijine tiadeni nattome tabaqqijaro. Ima ocassera taraha mohuaradsa Diocca dacorehema tinahanamanadsapi tidacoramanani nanitohui. <sup>4</sup> Nadsapi Diocca dacorehema ima tonahanade tichatteranijine disseraqquri tiquinaji. Nema tiquinadsapi ticcadeni jeheniji Jesocristodsa pajiranissa tanitohui. Diodsa tidsepedeni ijimanani dsori tiquinejeranitohui.

<sup>5</sup> Tibodideni ssamoqquri tiquinadsapi Diocca nahatohuetohui Puhuadsa huati tiquinaji. Diopa tiadenidsa da inanitohui. Puhuapa huapimadsa accora tajari. Tiadenidsa: —Poni. Ssamoqquri tiquinani -najarahitohui. <sup>6</sup> Naraha Diodsa huati tiquinadsa naqui tibodideni pajissa tiquinanissa tadsa huati huati titiquina naji. Tibodideni: —¿Diopa iadsa da inapadseje? ¿da inejerapadseje? —tiquinejeraji. Aja madija bodi nama najaripa pina coridsa imenicca passo jojodejine quehemama canajarossa quinajari. <sup>7</sup> Madija bodi nama nadsapa: —Nidsa Dio ohuadsa da inanitohui -najarana. Diopa puhuadsa da inejeranitohui. <sup>8</sup> Nama najaripa pohua bodi huatohue pamajaro. Diodsa pajissa nahissa tajaradsapa pohua bodicca ima cacajiqquimera dsanapojaro.

<sup>9</sup> Ohuemecotedeni, tiadeni motapi ticappiramanajaro. Ajimani tiquejenaraha tetidsemanaji. Diodsana deni tiquejenani. <sup>10</sup> Naraha ohuemecotedeni tiadeni mota tidsepedeni sseqquri nadsapi Dio tiadeni ajamani tonanabaqqijari. Naraha Diodsa tetidsemanaji. Puhuadsa tiquejenanipi ima denima bica tajaro. Aja dsepedeni sseqquri najaripa madimanadsanapo-jarahitohui. Pina dsero mohuenissa quinajari jicahitohui. <sup>11</sup> Maji ppocoradsa dsero dseqquri nadsapi mohueni catoja tani. Dserocca biquehepi amossissi tani. Najarossa najaroa madija dsepedeni sseqquri najaripa denima cajimanahijine dsepedeni ihijimana naraha amossihuajahitohui.

### *Ima ocassera tanicca inahananijine iattana*

<sup>12</sup> Madijapa ima ocassera tanicca pohnadsa ssonari, ssonari naraha mohuaradsa Diocca dacorehema inahanadsapi Dio pohnadsa huatidsehe da inajaro. Dio pohnadsa: —Jehe, tijine bica tani —nadsapa camittehe jiquejeranicca da inanitohui. Najaropi Dio huati tapojari, aja: —Madija ohuadsa huatideni huanacquiri najaridenidsa da onanitohui —napojari. <sup>13</sup> Nadsama tibodidsa ima tabaccora tanijine tia ticadossenidsapi: —Dio ohua cadossejari —tejerana. Diopa ima tabaccora tajaro tohuini najarajari. Nohuerahi. Diopa tabaccorehetohui ia totocadossebaqqi najarahi. <sup>14</sup> Naraha madija pohua bodidsa tabaccorehe inananiijine ahuatomsadsapi pohua tohuini nadsa tabaccorehe inananiijine pohua cacadosse najari. <sup>15</sup> Ibodi tabaccorehe tohuini dissera tadsapi imasiri inana tani. Naraha imasiri inanasanapodsapi dsoqqehe jiquejeraniccadsa imadi-dsanaponitohui.

<sup>16</sup> Ohuemecotedeni, tiadenidsa ohuati huana tani. Paji, tia tiadeni ticamaidsanibaqquimana-jeraji. <sup>17</sup> Huapima bica tanicca, pajiranissa tajaro iadsa tojajaropi Dio memehuaji madijari da inaridsajaro. Diopa ssiajani jinede. Pohnadsapi dsidsini nohuerajaro. Pohnapa apaja nama dsanapojari. Cacajiqquimera-jarahi. <sup>18</sup> Dio jipa tadsapa ajima inajararo: Pohua Atti pajissehe ponira ia mari tocanabaqquidsapa iadsa camittehe dsati inajaropaji. Nama najaripa pocca madija Pohnadsa bicaqqiri inaniijine. Pocca nahatonaja huapima Pohnadsa bicaqqiri naraha iana Pohnadsa denima bicaqqiri inajaropaji.

### *Diocca dosseniji ecahuanissa tajarocca ima*

<sup>19</sup> Ohuemecotedeni, tiadenidsa ohuati huana tani. Occa marinaja tetideni ajimamana-jeraji. Tiadeni huapima ima timittamananissa tanijine teribodeni ssiajqquiri nadsapi bica tani. Mohuaradsa tibodideni huatonissa tapodsana huati huati tiquinani bica tani. Amadsati tedimana-jerani naqui bica tani, onajaro. <sup>20</sup> Aja madija huadi tajaripa Dio Pohua jipa tahicassa inana-jerani. <sup>21</sup> Nadsapi ajijaro namicca tabaccorehe onihi, onihi najaro huapima tineboridsamanaji. Mohuaradsa Dio Attidsara iboraqqiri tiquinana. Dio Atti timittamana, Jesocristo tahimari timittamana najaroa tibodidenidsa madidsajaropaji. Najaro Jesocristo tahimaripa tiadeni tonassijabaqquihijine dacorajari.

<sup>22</sup> Nadsama Dio Atti teribodenidsa timittamanani ojari-jerana. Dio Atti timittamanadsa Pohua Attissa tinamananina bica tani. Pohua Atti ponima timittamanadsapi tiadenira tiadeni ticamaidsanimanarana. <sup>23</sup> Madijapa Dio Atti mittaraha najarossa inana-jeradsapi pocca ima pina pipiridsa pohua pano qqui tajarissa najari. <sup>24</sup> Pipiridsa pohua pano qqui taraha piti nahujanidsapa huati ajama najarissa najari. <sup>25</sup> Naraha madija Dio Atti mittadsa huati ajama-jaradsapa bica tahi. Jesocristo ia todinibaqquihijinecca marinaja iadsa pajiranissa tajaro. Madijapa najaro marinajadsa bodi huatoma huatoma nadsa najarossa inanadsapi pohua dsepe ijjaridsa Dio pohnadsa ima bicani inanitohui.

<sup>26</sup> Madija pohua bodi: —Ohuapi Diocca ojani —naraha pohua ebenodsa imasiri huatide apaja najaradsapa pohua tocamaidsanijari. Pocca jeheniji Diodsa ponima tojajaro. <sup>27</sup> Naraha madija Diodsa jehe nahissa tajaripa ajijaro dsamacca imasiridsa quejema-jarajari. Ejedeni medse toquejenajari, amoneje tabira tocajamanajaro ocasserani ahuananadsapa acco camade jipa tajari. Madija nama najaripa icca Abi Diodsa bica tajari.

## 2

### *Tohuati huanehecca marinaja*

<sup>1</sup> Ohuemecotedeni, ia Medsede deni tojajari Jesocristo bicabotedsa pajissa tiquina-jaropi ¿madija huapimadsa bicaqqiri tiquinaqui? Madija ojariadsa bicaqqiri

tiquinaraha ohuahadsa najarossa tinanamana-jeradsapi ticcadeni ima bica tejerani. <sup>2-3</sup> Aji titiqueriqqui nanihuaaji madija etero bicani huedsa, tod-sepecca oro nahatoni bicani sse tajari qquedsimadsapa pohuadsa: —Aji huihuittari bicanidsa tittariji –tiquinanitide. Naraha madija eterori jorara taha qquedsimajaridsapi: —Nanidsa teji. Namidsa naqui tittani bica tani –tiquinanitide. <sup>4</sup> Nema tiquinadsapi ticcadeni ima bica tejerani. Tiadenipi tibodideni bica tejerarajone titessedeni ticattejidsa-baqquimanajari.

<sup>5</sup> Ohuemecotedeni, tiadenidsa ohuati huana tani. Ajijaro ima timittamananissa taji: Diopa ajijaro dsamacca madija tohuati nahanaqquiri najaridenina icattejidsabaqqu-jari, poccadeni jeheniji dacoranijine, pocca cacahuehe pohuadenidsa tojanijine. Pocca cacahuehepi Pohuadsa huatideni huanacquiri najaridenidsa tojajaro, pina Pohua huati tapojarissa najaro. <sup>6</sup> Naraha tohuati nahana tajari tiadenidsa qquedsimadsapa ajamani tinanamanajari. Jari tibodideni huatoji. Madija dsepedeni sseqquiri najaripa ¿tiadeni tocamadsabaqquimana-jaraco? ¿Ima cacattemadehuaaji naco tiadeni tohuaccabaqquimana-jaraco? <sup>7</sup> Pohuadeni mota naco ¿Jesocristo onidsa tatamasso quina-jaraco? Pohua oni bicabotedsa tiadeni tocanacani-baqquimanaraha pohuadenidsana denima bicaquiri tiquinajarorane.

<sup>8</sup> Aji Diocca dosseniji deni tojaniccapi ajima najarona paji: —Tinorideniccadsa tetideni huanacquiri naji, pina tiadenidsa tetideni huanacquiri najarossa naji –nahi nade Dio Atti. Nema tiquinadsana ima bicani tinanamanajaro. <sup>9</sup> Naraha madija ticattejidsa-baqquimanadsa ojariadsa tetideni huanacquiri naraha ohuahadsa tetideni huaneraquiri nadsapi imasiri ticajimanajaro. Diocca dosseniji dsori tinanamanajaro.

<sup>10</sup> Nadsama madija Diocca dosseniji ecahuaraha mota ojarie dsori inanadsapi Diocca dosseniji nemaneha dsori inanajarossa najaro. Nadsapa ima cajijari. <sup>11</sup> Aja Dio Pohua ojarijari huati tajaripa: —Madija ohuahacca amoneje tija tejeraji –najari. —Madija tijine ahua-jeraji –najari naco huati tajari. Nadsapa madija pohua tessecca amoneje ijajeraraha madija inanadsoqquedsapa Diocca dosseniji dsori inanajaro. <sup>12</sup> Nidsa Dio madija huapimacca ima cattemade tojadsapa imasiridsa ia tappa tabaqquihijinecca marinajadsa icca ima nattomede tojahitohui. Nema nadsapi huati huati tiquinani bica tanijine tettideni tecahuamananissa taji. Tidsepedeni ijimanadsa naqui ima bicanira tinanamanaji. <sup>13</sup> Aji tiadeni madija ohuahadsa tetideni huaneraquiri nadsapi manaco tiadenidsa Dio huati huanera tadsa: —Ticcadeni ima bica tejerani –nahitohui. Naraha madija ohuahadsa tetideni huanacquiri nadsana Diopa huati huana tajari. Nidsa Dio madija huapimacca ima cattemade tojahijinecca huada bacco tadsapi tiadenidsa: —Ticcadeni ima ohuadsa bica tani –nahitohui.

### *Ima bicani inanajarodsa icca jeheniji ahuato inananiijine*

<sup>14</sup> Ohuemecotedeni, tettidenipi: —Iapi Jesocristodsa jehe inajaro –tiquinaraha ima bicani ahuato tinanamana-jeradsapi ticcadeni jeheniji ponimassa najaro. Ponima Jesocristodsa jehe tiquinadsapi ¿ticassiejerapadseje? Nohueranitohui. <sup>15-16</sup> Pina timecotedeni Jesocristodsa jehe quinajari maqquideje itide, amoneje nitide ojaria etero cappira, dsamatapa cappira naha madijaridsa tiadeni ojaria atti ajama nahitide: —Epeje, ticcaniji. Diona tia acco camahitohui. Ssiri tani, ticca etero onihira tiedsaniji. Tipemini, tijipanissa taji –najari. Pohua atti bica taraha pohua imecote cappirahicca da inajaradsapa pocca jeheniji ponima tojajaro. <sup>17</sup> Madija atti nama najaripa Jesocristodsa jehe nahira ojarijari. Pocca madiedsa ima bicani inana-jeradsapi pocca jeheniji huatiajarossa najaro.

<sup>18</sup> Timecotedeni ohuaha pohua tessedsa ajama nahitide: —Tiapi Jesocristodsa jehe tanira ojari najaro. Naraha ohuapi ima bicani ohonana najaro –najari. Naraha ohua



Satiaco ohuattipi: Jari, ticca jeheniji ohuadsa ahuateo tinanaji. Ima bicani tinana-jeradsapi ticca jeheniji qqui onejerani. Naraha ohuapi ima bicani onanajarodsa occa jeheniji ahuateo onanajaro. <sup>19</sup> Tiapi: —Diopa ojarihi. Ohuaha nohuerahi —tanipi bica taraha tocorimedeni naco: —Diopa ojarihi. Ohuaha nohuerahi —quiquinanajari. Naraha Diocca najidsohue noppineni cappinamanadsapa tacca-cca-cca quinanajari. <sup>20</sup> ;Tiapi ssamo tina-jeraji! Ajijaro ima tiattaji. Jesocristodsa jehe taraha ima bicani tinana-jeradsapi ticca jeheniji ponima tojajaro.

<sup>21</sup> Maittaccadsama icca idi Abarahaopa pocca ejedeni Isahaca Diodsa da inahijine eccorajari. Pocca ejedeni siba hua tamaroni tetepidsa ibaridsa inanadsoqquehijineraha pohuadsa Dio huahua najari: —;Pohua, tinanadsoqque-jarajo! —najari. Abarahaocca iborehe Diodsa ahuateo tadsapi: —Ticca ima bica tani ohuadsa —najari Dio. <sup>22</sup> Nadsama Abarahaocca imadsa icahatterani: Pohua inananiccadsa pocca jeheniji ahuateo inanajaro. Pohuajine pocca jeheniji Diodsa pajiranissa tajaro. <sup>23</sup> Abarahao nama napojaripa Dio Atti dsodo naniccadsa ahuateo tajaro. Najaropi ajima najaro: —Abarahao Diodsa jehe nahissa tadsapa pohuadsa Dio Attipa: “Ticca ima bica tani ohuadsa” najari —nani nade Dio Atti dsodo nanidsa. Abarahao pohuadsa naco: —Dio Pohua tesse —quiquinanahi nade. <sup>24</sup> Jidapana timittamanani: Madijacca ima Diodsa bica tajaropi Diodsa jehe najari ojari-jerani. Pohua inananiccadsa pocca jeheniji ahuateo inanajaro. Nadsana Diopa: —Pocca ima bica tani ohuadsa —najari.

<sup>25</sup> Amoneje huananari Rahabacca ima naqui pina Abarahaocca imassa najaro. Diocca madija Isaraerideni pamaha ponicca dsamahuaji noccodsade huedajonadsapa pohuadeni acco icamabaqquijari. Topamajonahijineraha ponicca odsa bodihuaji inajimabaqquijari. Tohuedanipomahijine naco jahui onihi dsopi icanabaqquijari. Nadsapi ponicca acco camehe Diodsa bica tadsapi Pohua Attipa: —Ponicca ima ohuadsa bica tani —najari.

<sup>26</sup> Jehe, ajijaro ima huapimapi pina essirecca imassa najaro. Jassi jassi inejeradsapi essire huatiajaro. Najarossa najaro etti: —Jesocristodsa jehe onajaro —inaraha Dio jipa tahiccassa inana-jeradsapi icca jeheniji huatiajaro.

### 3

#### *Ebenocca ima*

<sup>1</sup> Ohuemecotedeni, tiadenidsa Dio Atti maridedeni huapi tajarana. Nahatoqqui tiquinani: Ia Dio Atti maridedeni ima inanadsapi nidsa dsotode Dio madijacca ima cattemade tojadsapa icca ima manaconi pina madija ohuahadenidsassa nejerani-tohui. Iadsapi denima oppina tanicca inanani-tohui. <sup>2</sup> Madija ia huapimapi ima bica tejeranicca inana tani. Naraha madija ojaria pohua atti ecahuanissa tadsa, tabaccora tanicca huati tajaradsapa najarina bica tajari. Pocca ima pajiranissa tajaro. Nama najaripa pohua ebenodsa pohua assiredsa naco imasiri inana-jeranijine pohua cacahuade nahato tajari.

<sup>3</sup> Nadsama bojo naqui. Ajarinidsa ppejo badsira tajaro oro tajarodsa ia tohuini inanihuaji joca inadsapi poni assirani nemanehi nanihuajina toccajaro. <sup>4</sup> Coridsa imenicca canoa imenibotedsa naqui ibodi huatona. Etero huenacossa nadsa jojode ssonaridsapi totohuacca najaro. Ahaccadepa ahaccarini badsira tajarodsa acca acca najari. Canoa imenidsa jojode dacorehe ssonariraha ahaccade pohua tohuini nahihuaji acca icanadsapi nahihuajina totohuacca najaro. <sup>5</sup> Najarossa najaro ebenocca ima naqui. Ebeno badsira taraha ima imeni totonana najaro. Dsippo naqui jororoni badsira taraha najarojine dsama imeni diji tanijine pajirani. <sup>6</sup> Aji ebenopi pina dsipossa najaro, oppina tani. Imedsa tohuariraha imasiri ijijarojine essire nemanehi inatabaccora tani. Najidsohue jiquejeranicca jororoni ebeno iessidsapi diji dsanapo tani. Nema nadsapi icca madie nemanehi totabaccora tani.

<sup>7</sup> Madija iapi bani huapima ette ija tahi. Bani eppe cajihi, macca, passo abari naco ette ijahijine pajirahi. <sup>8</sup> Naraha ebenopi imasiri sse tajarojine pina bani huadi tajarissa najaro. Ette ijaniijine ipajira-gerani. Pina macca ino comenessa najaro, toponi nanadsocque tani. <sup>9</sup> Ebenodsa ia Medsede Abi Diodsa etidsedsapi: —Bica tinani -inajaro. Naraha Dio pina Pohuassa naha madija inahatobaqquijaridenidsa huadi inadsapi: —Tabaccoraqquri tiquinani -ina tani. <sup>10</sup> Ejeri poni ojariraha najarodsa ima bicani qquna, ima tabaccora tanicca qquna nani caji tani. Jaho, ohuemecotedeni, nema nanipi bica tejerani. <sup>11</sup> Aji sibacca passo qqunajarodsa ¿passo bicani, passo bida tajaro tadsajani qquna taqui? Nohuerani. <sup>12</sup> Najaro imassa najaro oribo bonopa ahua iquieradsa cahua-jarahi. Iquiera bono naco uva ededsa cahua-jarahi. Ohuemecotedeni, sibacca passo qqunajarodsa passo saho cajinicca passo bicani tadsajani qquna-gerani. ¡Nohuerani!

### *Tohuatehe Diocca daniji*

<sup>13</sup> ¿Nejecojari tiadenidsa Djojine nahato taha madijari? Pajissa nahato tadsapa pocca madiedsa ahua to inanana. Djojine nahatoqquri tiquinadsapi ima bicani tinanamanaji. Joneqquri tiquinadsa: —Ohuapi ajimani ojan -titiquina naji. <sup>14</sup> Naraha tibodidenidsa madija cajjaricca acconi huadiqquri, ticcadeni amonejedsa tetideni huatoqquri nadsapi tibodideni pina bida tajarossa najaro. Tiadeni deni tinanamananijine tohuira disseraqquri tiquinadsa naqui bica tejerani. Nadsapi: —Ijine bica tani -tiquinejeraji. Tiadenipi pajissacca tohuatehe ticappiramanani. <sup>15</sup> Ticcadeni tohuatehepi Diocca daniji gerani. Ajijaro dsamacca tohuatehe tica-jimanajaro. Tibodidenicca huatohuepi madija bodidenicca. Diocca huadi Satanajine naqui tibodideni huatoridsajaro. <sup>16</sup> Nadsama madija cajjaricca acconi huadiqquri, ticcadeni amonejedsa tetideni huatoqquri nadsa, tiadeni deni tinanamananijine tohuira disseraqquri tiquinadsapi tiadenidsa ima tabaccora tajaro caji tanitohui. Tabaccorehe onihi onihi naqui tojaridsanitohui. <sup>17</sup> Naraha Djojine nahatoqquri tiquinajaropi tibodideni ssiajaqquri nehe imasiri jirehe timadimananissa tajaropaji. Joneqquri tiquinadsa mohuaradsa timadiridsa-manajaropaji. Djojine nahatoqquri tiquinadsapi madjadsa bicaqquri tiquinajaro, madija ohuaha attidenidsa jehe tiquina tani, timecotedenidsa tetideni cahanariri canajaro. Madija huapimadsa najarossa tinanamanajaro. Ojariadsa: —Tiapi poni -tiquinejerajaro. Maidseraqquri tiquinajaro. Ima bicani tinanamanani huapi tani. <sup>18</sup> Madija totonajonede tiquejenadsapi pina jonehe ppa tiquinajarossa najaro. Moro tadsapi bononi cajjararo. Najaropi ima bicani pajiranissa tanicca tohuapiridsajaro.

## 4

### *Ajijaro namicca imatohuira huatideni huanaqquri najari*

<sup>1</sup> Tetideni huatoji. ¿Nejecojine ticahadirere cacana najaro? Tabaccorehe tohuini tiquinajarocca tibodidenidsa huadi huadi najarojine ticahadirere cacana najaro. <sup>2</sup> Madija ohuahacca tohuini tiquinaraha tiadenidsa toja-geradsapi tijinedeni ahuanijine tohuini tiquinajaro. Todsepetaji acconi nitide, amoneje acconi nitide, tohuini tiquinanicca onihi nitide, najaro acconi tedimanadsa ticahadirere canajaro.

Tohuini tiquinanicca tohui Diodsa huati tiquinejeradsapi ticappiramanajaropaji. <sup>3</sup> Pohuadsa huati tiquinadsa naqui tiadenidsa da inejerani, ticcadeni huatinaja bica tejeradsa. Tabaccorehe tohuini tiquinanicca tohui, tetidsemananijine tohuira huati huati tiquinadsapi tiadenidsa da inejerani. <sup>4</sup> Jaho, ima onihitohui jai tijaridsajaropi pina amoneje maqquideje ohuahatohui ccaridsajarossa tiquinajaro. ¿Nahatoqquri tiquinejerajaroqui? Ajijaro namicca ima tohuini tiquinadsapi poni tassani tiquejenajaro. Nadsapi Diocca huadi tiquejenajaro. <sup>5</sup> Dio Atti dsodo nanipi ponima

jerani. Pohua Atti dsodo nanidsa ima imittajaropi: Dio Pohuajine icorime icajijaro. Najaro pocca danijidsa huati huana tajari. Ima onihidsa iquejenadsapi eccone huadi tajari. <sup>6</sup> Nadsapa iadsa huati cahanari canadsa ima onihidsa iejidsanijine ia acco tocamabaqquijari. Najarojine Dio Atti dsodo nanidsapi ajima najaro:

—Aja “Deni iquejenani, iana nahatoqquri inani” quiquinanajaridenidsa Diopa jipera tajari.

Naraha ajamani toquejenajaridenidsana Pohuapa bica taja, huati cahanari canaja najari –nani nade Dio Atti dsodo nanidsa.

<sup>7</sup> Nadsapi Diodsa iboraqquri tiquinaji. Pocca huadi Satanadsa tiejidsamananijine dacoco tijiraji. Nadsapa Satana tinoppinedeni joppa tahitohui. <sup>8</sup> Dio Pohuadsa huajiraqquri tiquinaji. Manaco Diopa tiadenidsa huajira tahitohui. Ticcadeni imasiri tinebomanaji. Pina tidsepedeni ssahua tiquinajarossa tiquinaji. Ticcadeni imapi pamajaro: Diodsa tetideni huanagguiri, ajijaro namicca imadsa tetideni huanagguiri najaropi bica tejerani. Tibodidenicca ima tinahiremananijinepi ajijaro namicca ima tinebomanadsa Diotohuira tetideni huanagguiri naji. <sup>9</sup> Tibodideni cacajiqquimeradsapi: —Jaho, ojine ima tabaccora tani –tiquinaji. Tibodideni huanacossadsa jadsirema oji oji tiquinaji. Jaja tiquineri naridsajaropi tinebomanadsa tinoccodeni ppajanira toccaji. Ticcadeni huatidsehe tinebomanadsa oji oji tiquinaji. <sup>10</sup> Ticattedsamanaadsa ia Medsede Diodsa huati tiquinaji: —Iapi ssamoqquri inani, ajimani iquejenani –tiquinaji. Nadsana tiadeni tonatehemabaqquidsa tiadeni deni tonanabaqquihitohui.

*Timecotedsa: —Ticca ima bica tejerani –tiquinejeraji*

<sup>11</sup> Ohuemecotedeni, timecotedenicca ima: —Tabaccora tani –tiquinadsa ahuaji huati ahuaji huati tiquinejeraji. Timecotedenidsa ima tabaccora tanicca huati tiquinadsapi Diocca dosseniji: —Tinorideniccadsa tetideni huanagguiri naji –najaro-dsa tettidenipi: —Diocca dosseniji tabaccora tani –tiquinajarossa najaro. Nadsapi Diocca dossenijidsa iboqquri tiquinani ahuato tajaro. <sup>12</sup> Dio Pohuana ojarijari pocca marinaja inahatodsa iadsa da inajaro. Pohuana pocca marinajadsa icca ima nattomede pajirajari. Madija inassiajabaqquihijine pajira, madija najidsohue jiquejeranihuaji inanabaqquihijine pajira najari. Tiadenipi Diossa tiquinejerani. Timecotedsa: —Ticca ima bica tejerani, tabaccora tani –tiquinanijine bica tejerani.

*Itedsejemacca ima ssamomo inani*

<sup>13</sup> Tettidenipi: —Jidapana, dsemassa nitide, odsa pananihuaji jaijadsa huajano ojaria nanidsa imadidsa idsepe ijidsapi dsiniro sseqquiri inana –tiquinanitide. Nema tiquinajarodenidsa huati onana. Titaharibobo canaji. <sup>14</sup> Titedsejemadenicca ima ssamoqquri tiquinani. Madija iapi pina dsidsidsamassacca essenin ahuato, amadsati amossi najarossa inajaro. <sup>15</sup> Naraha tettidenipi: —Dio jipa tadsa imadidsa idsepe ijinijine –titiquina nadsana bica tani. <sup>16</sup> Naraha tiadenipi: —Ia motta nahatoto inani –jidede tijirani. Nema tiquinanipi pina: —Dio jirehe nahatoto inani –tiquinajarossa najaro. Najaropi tabaccora tajaro. <sup>17</sup> Ima bicani tinanamananijine nahatoqquri tiquinaraha nema tinanamana-jeradsapi imasiri tinanamanajaro.

## 5

*Dsiniro, todsepetaji sseqquiri najaridenicca ima*

<sup>1</sup> Titaharibobo canaji, tidsepedeni sseqquiri najaro tiadenidsa huati onana. Tiadenidsa ima tabaccora tanicca ssonaridsapi ocasserani temananitohui. Najaro noppineni oji oji tiquinaji, johua johua tiquinaji. <sup>2</sup> Tidsepedenitajipi jadsinitohui. Ticcadeni etero naqui poni maccanijine ssari nanitohui. <sup>3</sup> Ticcadeni oro, dsiniro naqui tecahuamanaraha botedsapi ponima tojajaro. Dsama jicanicca

huada tohuajirajonaraha dsiniro tinehemamanajaro. Ticcadeni dsiniro botejarodsa accoqquri tiquinani ahuato tajaro. Nidsa najidsosue jiquejeranihuaji Dio tiadeni dosse tabaqquidsapa ticcadeni dsiniro botejaropi pina dsipossa najaro timedeni inacanitohui. <sup>4</sup> Ticcadeni dsinirojine ticcadeni accohuecca ima Diodsa ahuato tajaro. Aja madija ticcadeni huidsajadsa dsepedeni ijimanaraha poccadeni tarabadsa manaconi pohuadenidsa da tiquinejeradsapi najaro manaconitohui tiadenidsa huati huati quinahi Dio Dacorabote mittajari. <sup>5</sup> Nadsama tidsepedeni sseqquri najarodeni ajijaro namidsa timadimanaccadsa huapima bica tanicca ticajimanajaro. Tohuini tiquinanicca najarossa tinanamanajaro. Todsepetaji tinehemamanajaropi pina bohui tapa tapa quinadsa tohuimajarissa najaro. Bohui tohuimajaripa ssamo taraha inanadsoqqe-manahitohui. Najarossa najaro tiadeni naqui tijicanitohui. <sup>6</sup> Tiadenipi madija ima cappiramanajaridenidsa tetideni huaneraqquri najaro. Pohuadenipa joneqquri najari, pohuadeni acco camamanahijine cappiramanaraha pohuadenidsa ponima ima tinassonarimanadsa tinajicamanajari.

### *Ima ocassera taraha mohuaradsa inahananijine*

<sup>7</sup> Naraha ohuemecotedeni, tiadenipi ia Medsede Jesocristo ccanihicca huada bacco tiquinanijine mohuaradsa timadimana-dsanapona. Pina huidsaja ppappadessa tiquinaji. Pohuapa passo ccantohui mohuaradsa madicajari, pocca ppa nahi moro tahissa tahijine. Bono jadadsa pore inahijine tohui naco mohuaradsa madicajari. <sup>8</sup> Tiadeni naqui dacoco tijiradsa mohuaradsa timadimanaccaji. Ia Medsedepa ccantibote nahi.

<sup>9</sup> Ohuemecotedeni, timecotejine bica tejeradsapi pohua tahimari madija ohuahadsa huati tiquinejeraji. —Pohuajine tabaccora tani –tiquinadsapi nidsa ia Medsede ima cattemade tojadsapa: —Tettideni bica tejerani –nahitohui. Diopa madija imarideni cattemade ccantibote nahi. <sup>10</sup> Ohuemecotedeni, Dio Atti cacomeraqquri najarideni ia Medsede onima huati huati naridsamanadsapa ocassereheda madimanaraha mohuaradsa dsepedeni ihijimana najari. Tiadeni naqui pina pohuadenissa tinanamananijine disseraqquri tiquinaji. <sup>11</sup> Aja ocasserehe tonahanamanajari tahimari-denidsa ibodi huatodsapi: —Huatidsehe imeni cajimanahi. Diopa pohuadenidsa ima bicani inananitohui –ihinanajaro. Tiadenipi madija oni Jobocca ima nahatoto tinani. Jobopa ocasserani ahuaraha mohuaradsa tonahanajari. Najaro ocasserehe jicadsana Diojine tonomijari, bica tanicca naco cajipomajari. Pohua tahimaridsa Diocca tohuati huanehepi ahuato tajaro. Ia Medsede Diopa ocasserani ahuanajaridenidsa huati cahanari canajari.

<sup>12</sup> Ohuemecotedeni, tettidenissa tinanamananijine huati tiquinadsapi: —Ohuattipi pajissa, meme oninidsa huati onajaro –tiquinejeraji. Tettideni onihi naqui: —Ohuattipi pajissa, ajijaro nami oninidsa huati onajaro –tiquinejeraji. Tettidenidsa ima onihi tinaharimanani naqui bica tejerani. Pajissara huati tiquinaji. Jehe tiquinadsapi pajissara jehe tiquinaji. Poni tiquinadsa naqui pajissara poni tiquinaji. Nema tiquinadsapi Dio tiadeni tonajidsobaqqi-jarahitohui.

### *Diodsa huati huati inanijinecca ima*

<sup>13</sup> ¿Nejecojari tiadenidsa bodi ocassera tajari? Najaripa Diodsa huati huati tana, acco icamahijine. ¿Nejecojari bodi huatidsejari? Najaripa Diodsa jiri jiri nana. <sup>14</sup> ¿Nejecojari coma tajari? Najaripa Jesodsa jehe quinajarideni cacahuadedeni huahua tajonabaqqiijo. Jahijonadsapa coma tajari tatidsa oqui sse quinadsa tonomihijine Diodsa huati huati toquinana, ia Medsede Jeso onima. <sup>15</sup> Bodideni: —Pajissa Diopa pajirahi –quinadsa coma tajari tonomihijine Diodsa huati huati toquinadsapa tonomi tahi. Aja coma tajari imasiri inanapjarodsa naco Diopa pocca imasiridsa: —Epeje, ohuati ajimani –nahitohui.

<sup>16</sup> Nadsapi Diocca tonanomie tohuini tiquinadsapi ticcadeni imasiri timecotedenidsa tecomeramanaji. Poccadeni naqui tiadenidsa ecomeramananijine. Tocanomirehijine timecotedenitohui Diodsa huati huati tiquinaji. Pohuadeni naco titohuideni Diodsa huati huati toquinahijine. Madija bica tajari Diodsa huatide dissera tadsapa pocca huatinaja dacorehe cajijari. <sup>17</sup> Maittaccadsama Dio Atti cacomerabote Eria naco pina iassa naraha pocca dsamadsa passo qquejeranijine Diodsa huatide dissera tadsapa Diopa pina Eria attissa inanajaro. Huajano 3 denima abadsico 6 canaha passo qquejerajaro. <sup>18</sup> Dsotode Eria passo ccapomanijine Diodsa huati tapomadsapa passo ccapomajaro. Nadsapi nami tobicapomadsa ppa nahi bono cajiridsapomajari, quinahi nade.

*Imecotedeni acco icamabaquihijine*

<sup>19</sup> Ohuemecotedeni, timecote ojaría Diocca pajissehedsa huere tojidsadsapa Diodsa tinananimanapomajo. <sup>20</sup> Nadsama tiadenipi nahatoto tinaji: Madija imasiridsa ccaridsadsapa dsoqquehe jiquejeranihuaji tojahijineraha pocca imasiri nebohijine acco ticamamanadsa Diodsa tojadsapa tinassiajamanajari. Dio naco pocca imasiridsa: —Epeje, ohuati ajimani -nahitohui.



## **Pedrocca ima teppe tahidecca**

### **1 Pedro**

Pedropa Jesocca dodosse. Ajijaro ima teppepi dsama Asiahuaaji madiridsamana-jaridenidsa dsodo inajaro. Najaridenipa jodiodeni Jesodsa jehe quinajari. Nanajidso toquejenadsapa dsama onihi, onihihuaaji madimanahijine domo toccajari.

Pedropa najarideni bodideni acco icamabaqquihijine dsodo inajaro. Jesocristocca toquejenajarijine ocasserehe pohnadenidsa ssonariraha Pedro pocca dsodonijidsapi: Nema nehe ima bicanira tinanamana-dsanapona. Diodsara tetidsemanaji, najari.

#### *Pedro nija najari*

<sup>1</sup> ¿Nija ohuemecotedeni? Ohuapi Pedro, Jesocristocca dodosse ojajaro. Tiadenipi Diocca tocatejidsabaqquinaja tiqnejenajaro. Jesocristodsa jehe tiquinajarodeni ticcadeni dsamadsa timadimanaporaha tiadeni totamohuabaqqui-manadsa tijarib-aqquimanajarode. Nadsapi dsama Pontohuaaji, Carasiahuaaji, Capadosiahuaaji, Asiahuaaji, Bitiniahuaaji timadiridsamanajarodenidsa occa ima dsodo onajaro. <sup>2</sup> Abi Diopa maittaccadsama nahato tapodsa: —Occa madija tiqnejenanijine –nadsa tiadeni tocatejidsabaqquipojari. Pohua Corimejine tibodideni inahireridsajaro. Jesocristo pohua emene toccajarojine naqui ticcadeni imasiri tomossijaro. Nadsapi tibodideni huireqquri nadsa Pohua Attidsa iboraqquri tiquinanijine tipajiramanani.

Occa Abi Dio tiadenidsa ima bicani inanadsanapona. Tibodidenidsa naqui pocca jonehe tojadsanapona, onajaro.

#### *Dio ia tonassijabaqquihijine tohuini imadijaro*

<sup>3</sup> Diopa ia Medsede Jesocristocca Abi. Pohnadsa etidsedsa etti: —Abi Dio bica tinani, deni tijani! –inana, onajaro. Pohnapa itohui huati cahanari canadsa Pohnajine ibodi dsati tojajaro. Pina issonapomajarossa inajaro. Jesocristo dsoqquedsa nahatonijarijine etti: —Ia naqui idsoqqueraha inahatonidsa imadipomanitohuia –inajaro. <sup>4</sup> Najaro tohuini imadijaropi pajissa iadsa tojanitohui. Memehuaaji Dio Pohna madihidsapi iadsa inananijnecca Pohnana ecahuajaro. Najaro iadsa da inanijinepi bica tanicca ponira. Totabaccoranijine ssamo tani, jicanijine naqui ssamo tani. <sup>5</sup> Tiadeni Diodsa pajissa tiquinajaropi Dio pocca dacorehedsa tiadeni tohuacahuabaqqui-dsanapojari. Pocca dacorehedsa timadimanadsapi nidsa dsama jicanicca huada bacco tadsa pocca tossiejehe najorapojaro tiadenidsa tojanitohui.

<sup>6</sup> Najarotohui tetidsemaneri naraha ajijaro dsamadsa timadimanaccadsapi ocasserehe tinahanamanaccanitohui. Naraha nema nehe tetidsemaneri nana. <sup>7</sup> Ticcadeni jehenijipi pina orossa najaro. Tiadenidsa ocasserehe ssonarajaropi ticcadeni jeheniji nattome najaro. Najaropi pina dsippodsa oro nattome najarossa najaro. Oropi dsippo ppoconijine totabaccora-jerani. Bica tehe toja tani. Ticcadeni jeheniji naqui ocasserehedsa nattome nadsa dacoradsapi pina oro bica tajarossa najaro. Naraha oropi ajimani, jicaca tani. Ticcadeni jehenijina denima bica tajaro. Jicaquera tani. Jesodsa disseraqquri tiquinadsapi nidsa Jesocristo jidsera nanidsapa Diopa tiadenidsa huatidsedsa ajama nahitohui: —Jehe, bicaqquri tiquinani. Ticcadeni jeheniji ponima toja-jerani. Occa deni tojehe, occa dacorehe tiadenidsa tojaji –nahitohui Abi Dio.

<sup>8</sup> Tiadenipi Jesocristo qqui tiquinapo-jararaha pohnatohui tetideni huanacqquri najaro. Jidapana naco pohua qqui tiquina-jararaha pohnadsa pajissa tiquinajaro. Nema nadsapi tibodidenidsa huatidsehe imeni anijaro. Najaro huatidsehapi pina ajijaro namicca huatidsehessa nejerani. Najaro huatidsehe tecomeramananijine

naqui tettidenidsa pajira-jerani. <sup>9</sup> Jehe, Jesocristodsa jehe tiquinajarojinepi Dio tiadeni tonassiajabacquihihito. Najarotohui tetidsemaneri najaro.

<sup>10</sup> Maittaccadsama Dio Atti cacomeraqquri najaridenipa Dio madija inassiajabacquihihinecca ima mittamanahissa tahijine tohuini quinadsa Dio Atti dsodo napojarocca hua hua nimanimanacca najari. Icassiejeranijinecca ima ehecomerarid-samana nadsa naqui: —Dio madijadsa huati cahanari canadsa pocca tossiejehe da inanitohui —quiquinanajari. <sup>11</sup> Naraha Cristo-Mesia namihuaji ccarona-jaraccadsa Pohua Corimepa Dio Atti cacomeraqquri najaridenidsa pocca ima ahuato inanapojaro: —Tiadeni Idinide Cristo-Mesia ajijaro namidsa ocasserani ahuahitohui. Dso-todepa Dio pocca dacorehe, pocca deni tojehe pohnadsa inanitohui —napojari. Naraha Cristo-Mesia tahimari pohnadsa ahuato tanijine disseraqquri najari. Attidenipa: —¿Nejecojari madijadsana Mesia tojapadsaja? ¿Nejecoma nadsa Mesia ccajonapadsaja? —quiquinanajari. <sup>12</sup> Cristo-Mesia tahimari ecomeramana-pojaropi pohnadeni madimanadsa tojanijine jerani, dsotodedeniccadsana tojanijine. Djojine pohnadsa ahuato inanapojaropi tiadenidsana pajissa tojajaropaji. Aja Dio memehuaaji madijari Pohua Corime namihuaji dosse inaronadsa Pohua Atti maridedeni bodidenidsa tojaridsajaripajade. Nadsapa pocca dacorehema Jesocristo tahimari icassiejeranijinecca tiadeni mari mari totocanabaqquimana najaride. Diocca dodosse tabaqqi memehuaajicca naco najaro ima bicani qqii toquinahijine tohuini najonamanajari.

*Imasiri jirehe timadimananijine Dio tiadeni tocattejidsabaqqijari*

<sup>13</sup> Jehe, icassiejeranijinecca ima timittamanadsapi najarotohui tinajoramanehe timadimanaji. Ima bicani tinanamananijine tibodideni huatonissa taji. Nidsa Pohua Bedi Jesocristo jidsera nanidsapa Dio pocca biquehe onihi onihi tiadenidsa da inanitohui. Najarotohui tibodideni najorana, onajaro. <sup>14</sup> Tahidepi Jeso tahimari icassiejeranijinecca ssamoqquri tiquinadsa tabaccora tanicca tohuini tiquinehe timadimanaporaha jidapapi nema tiquinejeraji. Dio Attidsara iboraqquri tiquinaji. Pina ejedeni imehideni attidsa iboraqquri najarissa tiquinanijine, onajaro. <sup>15</sup> Diopa pocca madija tiquejenanijine tiadeni tocattejidsabaqqijari. Pohnapa imasiri ssamo taja najari. Pohua bodipa ssiaja huire tajari. Nema nadsapi tiadeni naqui tibodideni ssiaja huire tadsa imasiri jirehe timadimanaji. <sup>16</sup> Aji Dio Pohua Atti dsodo nanidsapi ajima nani: —Tibodideni ssiaja huire tadsa imasiri jirehe timadimanaji. Pina Ohuassa tiquinaji. Ohuatti nema onajaropi obodi ssiaja huire tajaro. Imasiri ssamo onani —nahi nade Dio.

<sup>17</sup> Diopa nidsaranibote madijacca ima cattemade tojadsapa aja madija ima tabaccora tanicca inanamanajarodeni ojariadsa itide, pamahadsa itide huati tohuanahi najarahitohui. Aja madija ima tabaccora tanicca inanamanajarodeni huapimadsa najidsohue inassonarinitohui. Naraha bica tanicca inanamanajarodenidsana pocca daniji bicani inanitohui. Nadsapi Dio Pohnadsa: —Icca Abi Dio —tiquinadsapi ajijaro namidsa timadimanaccadsama Pohua noppine ticappinamanadsa Pohua Attidsara iboraqquri tiquinaji. <sup>18</sup> Tiadenipi ticcadeni ididenicca madie ponimaccadsa timadimanapojaro. Naraha najaro tinebomananijine Dio tiadeni todinibaqqijari. Nahatoqquri tiquinani: Dio tiadeni todinibaqquihijinepa timanaconedeni huatini ccara tanicca oro da inejerani. Plata da inejerani. Oro, platapi jicaca tani. <sup>19</sup> Aji timanaconedenipi Jesocristo emene bicabotena da inajaro. Pina edede bedi bicabote imasiri manaconi tojahijine Diodsa da da quiquinanajarissa najari. <sup>20</sup> Jesocristopa dsama nahato-jeraccadsama madija Idinide tojahijine Dio inanajorapojari. Jidapanana dsama jicanijine tohuajirajonadsa tiadeni todinibaqquihijine ajijaro namidsa ccaronajari. <sup>21</sup> Pohnapa tibodideni acco camadsa Diodsa jehe tiquinajaro. Djojine Jesocristo nahatonidsapa Dio pocca deni tojehe, pocca dacorehe pohnadsa

inanajaro. —Ia naqui ia tonahatonibaqquihitohui —tiquinadsapi Dio Pohnadsa pajissa tiquinanissa tajaro.

<sup>22</sup> Jidapana tiadenipi Diocca ima pajissaccadsa iboraqquri tiquinajarojine tibodideni tohuireridsajaro. Nema nadsapi Jesodsa jehe quinajari timecotedeni toquejenajaridenidsa pajissehera tohuati huanehedsa tetideni huanaqquri naji. Naraha tettidenidsara tetideni huanaqquri nani ojari-jeraji. Tetideni cahanari canadsa timecotedeni tedseje acco acco titicanaridsera naji, onajaro. <sup>23</sup> Tibodideni Djotine cacajiqquimeradsapi pina tissonamana-pomajarossa najaro. Pina ticcadeni abi, amidenijine madija tiquejenadsa tissonamanapojarossa nejerani. Ticcadeni abidenipa jicahitohui. Naraha Diopa dsoqqe-jarahi. Pohna Attipi camittehe da inajaro. Pohna Atti cacajiqquimera-jevani, nema dsanaponitohui. Najarojine tibodideni dsati tojajaro. <sup>24</sup> Najaro ima Dio Atti dsodo nanidsapi ajima nani:

—Madija huapimacca madiepi pina dserossa najaro.

Madijacca biquehe naqui pina mohuecca biquehessa najaro.

Dseropi amadsati dseqqueri nadsa jica tani.

Mohue naco amadsati dseqqueri nadsa catojaha jica tahi.

Madija naco pina najaro imassa quinajari. Madimanadsanapo-jarahi. Cacotadsapa jicahitohui.

<sup>25</sup> Naraha Dio Attipi cacajiqquimera-jevani, nema dsanaponitohui

—naponi nade Pohna Atti dsodo nanidsa.

Jehe, najaro Jesocristo tahimari icassiejeranijinecca tiadeni mari tocanabaqqumanadsa pajissa tiquinajaro.

## 2

<sup>1</sup> Nadsapi Dio Attijine tibodideni dsati tojadsapi ticcadeni tabaccorehe nemanehetinebomanaji. Maidsehe naqui tinebomanaji. Tettideni bica taniccadsa huati huati titiquina naraha ticcadeni madiepi tettidenissa nejerani. Najaro maidsehe naqui tinebomanaji. Madija pohna cajijari acconi naqui tedimana tejeraji. Ima ponimacca huapima huati huati naqui tinebomanaji. <sup>2</sup> Dio Atti pajissacca ponira tohuina disseraqquri tiquinaji. Pina ejedeni tossonedtsati imeni dsojorinitohui dissera tajarissa tiquinaji. Huajijiradsa Pohna Attira titimittamana naji. Nema tiquinadsapi Diodsa ticcadeni jeheniji todacoranitohui. Tossiejehe naqui ticajimananitohui. <sup>3</sup> Jehe, ia Medsedecca biquehe pajissa tecatamamanadsapi pohnapa bica tahi nahatoqquri tiquinani.

### *Jesocristopa pina siba bicabotessa najari*

<sup>4</sup> Nadsapi ia Medsede Jesocristodsa tajiramanaji. Pohnapa pina siba camitta tajarossa najari. Madijapa ettajomanaraha Diodsapa bica tajari. Pohnapa Diocca tocatejidsaniji, huapimadsa deni tojahijine. <sup>5</sup> Tiadeni naqui Diocca daniji camittehe dsati ticajimanadsapi pina siba camitta tajarossa tiquinani, Dio pocca odsa canahatonijine. Najaro odsapi tibodidenina paji. Najarodsa Dio Pohna Corime madidsajari. Tiadeni naqui pina Diodsa dada toqquimadedenissa tiquinajaro. Aji ticcadeni danijipi Dio Pohnadsa tetetidsemana najaro, Pohna Attidsa iboraqquri tiquinajaro najarona paji. Najarodsana Dio huatidsejari. Jesocristodsa pajissa tiquinajarojine ticcadeni daniji Diodsa pajiranissa tani. <sup>6</sup> Aja Jesocristopa pina siba bicabotessa najari. Dio Atti dsodo nanidsa ajima najaro:

—¡Ticattomama canaji! Siba bicabote ocatejidsadsa odsa panani Siodsa ohuattani.

Najarodsa odsa canahatodsapi daco cajiranijine.

Najaro sibadsa pajissa quinajaridenipa nidsa dsotode ponicca mamaisa tabaqqui toquejena-jarahitohui

—naponi nade Dio Atti dsodo nanidsa.

<sup>7</sup> Jehe, pohnadsa pajissa tiquinadsapi pohnapa tiadenidsa pina siba bicabotessa najari. Naraha pohnadsa pajissa quina-jarajaridenipa ettajomanajari. Pina Dio Atti dsodo naponiccassa inanamanajaro. Najaropi ajima najaro:

—Odsa sibadsa icanahatomananiijine nanahatodedenipa siba ojariepi ettajomanajaro. Naraha dsotodepi najaro sibana odsa daco cajiranijine tojajaro.

<sup>8</sup> Dio Atti dsodo nani onihi naqui:

—Najaro sibapi madija inehedimabaqquihitohui

–naponi nade Dio Atti dsodo nanidsa.

Jehe, Diopa nama napojaria aja madija Jesocristo tahimaridsa pajissa quina-jaradsapa pina sibadsa tohuedima-manajarissa quinahitohui. Diopa nama quinahijine tahide nahato tapodsapa pohnadeni tedsejemacca ima inanajorapojaro.

<sup>9</sup> Naraha tiadenipi Diocca tocattejidساباquinaja tiquejenajaro. Diopa ticcadeni tamine deni tojajari. Tiadenipi pina Diodsa dada toqquimadedenissa tiquinajaro, Dio pocca dossenijidsa tidsepedeni ijimanadsanaponijine. Pocca madija tiquejenajaro. Pohnadsara iboraqquiri tiquinajaro. Tiadenidsa: —Occa madija, occa todini-baqquinaja –najari Dio. Tahidepi dsidsinidsa timadimanaporaha jai tijenaniijine tiadeni huahua tabaqquijari. Dio tiadeni nama tonanabaqquijaripa Pohna ssiejene bicabotedsa timadimananiijine. Pohna tahimari bicabote deni tojanicca tecomeraridsamananiijine. <sup>10</sup> Tahidepi ponima timadiridsa-manaporaha jidapanana Diocca madija tiquejenajaro. Tahidepa Dio tiadenidsa huati tohuana-jararaha jidapapa tiadenidsa huati cahanari canahi.

#### *Diopa timadimananissa tanijine tohuini najari*

<sup>11</sup> Ohuemecotedeni, titohuideni ohuati huana tani. Ajaro dsamadsapi timadimanadsanapo-jeranitohui, pina dsama onihihuaji jai tijajarossa najaro. Nema nadsapi tiadenidsa ohuati ajima onajaro: Tibodidenicca tabaccorehe ahuatodsapi poni tiquinaji. Najaro tabaccorehepi tibodidenicca jeheniji inassamorana. <sup>12</sup> Ajaro dsamadsa timadimanadsapi Diodsa jehe quina-jarajarideni tedseje timadimananissa taccaji. Attideni tabaccora tadsa titahimarideni huati huati toquinadsapa: —Imasiri sseqquiri tiquinani –quinahitide naraha ima bicanira tinanamana-dsanapodsapi qqui toquinahitohui. Nadsapa nidsa dsotode Dio madija huapimacca ima cattemade tojadsapa aja ticcadeni madie bicani qqui toquinapojari attidenipa: —Diopa bica tahi, bica tahi –quinahitohui.

<sup>13</sup> Ia Medsededsa tijinedeni ima bica tanijinepi ajima tiquinaji: Madija cacahuade deni huapima attidenidsa iboraqquiri tiquinaji. Ticcadeni dsama cacahuade attidsa iboraqquiri tiquinaji. Pohnapa tamine deni tojajari. <sup>14</sup> Pocca dodosse tabaqqi dosse inaridsabaqquijari attidenidsa naqui iboraqquiri tiquinaji. Pohnadenipa cacahuade toquejenaridsadsapa madija tabaccorehe inanamanajarodeni inajidsobaqquimana tahi. Naraha ima bicani inanamanajarodenidsana: —Jehe, tiadenipi bicaqquiri tiquinani –quinajari. <sup>15</sup> Diopa timadimananissa tanijine tohuini najari. Nema tiquinadsapi Diocca dosseniji ssamoqquiri najarideni ticcadeni madie bica tani qqui toquinadsapa joma quinahitohui.

<sup>16</sup> Pina madija tappa tabaqquihissa tiquinadsa timadimanaji. Tahidepi imasiridsa timadimanaporaha tiadeni tappa tabaqquijaro. Imasiri tiadeni tappa tabaqquiraha tettideni: —Tabaccorehe onanani oppinera tani –tiquinejeraji. ¡Poni! Diodsara iboraqquiri tiquinadsa timadimanaji. <sup>17</sup> Timadimananissa tadsa madija huapimadsa bicaqquiri tiquinaji. Timecotedeni aja Jesocristodsapa jehe quinajaridenidsa tetideni huanacquiri naji. Dio noppine ticappinamanadsa Pohna Attissa tinanamanaaji. Tamine deni tojahicca noppine naqui ticappinamanadsa pohna attidsa iboraqquiri tiquinaji, onajaro.

*Tiadenidsa najidsohue ssonariraha mohuaradsa tinahanamananiijine*

<sup>18</sup> Ajjaropi madijacca dodosse tarabaidasajine tiquejenajarodenidsa dsodo onajaro: Tiadeni dossede attidenidsa iboraqquiri tiquinaji. Tettideni bica tadsa pohuadenidsa huati huati tiquinaji. Dodossededenipa bicaqquiri naja bicaqquiri najaraja camajari. Naraha bicaqquiri najari attidenidsa, aja huadiqquiri najari attidenidsa naqui iboraqquiri tiquinaji, onajaro. <sup>19</sup> Ajima tiquinanina bica tajaro: Diodsa ibora tinadsa tabaccorehe tinana-jeraraha tiadsa najidsohue ssonaridsapi mohuaradsa tinahanajaro. <sup>20</sup> Naraha aji tabaccorehe tinanajarojine tiadsa najidsohue ssonaridsa mohuaradsa tinahanaraha ¿Dio tiadsa: —Jehe, bica tinani –nahijineco? Nohuerahi. ¿Madija naco tiadsa: —Jehe, bica tinani, daco tijirani –quinahijineco? Nohuerahi. Najaropi tia tabaccorehe tinanajaro manaconi. Naraha aji ima bica tinanajarojine najidsohue tiadsa ssonaridsa mohuaradsa tinahanadsapi tijine Dio huatidsehitohui. <sup>21</sup> Diocca madija tiquejenadsapi ocasserehe tiadenidsa ssonariraha mohuaradsa tinahanamananijine Dio tiadeni tocattejidsabaqquijari. Jesocristopa titohuideni ocasserani ahuapojari. Pocca madiedsa Dio jipa tahicca nohue inajaro. Nadsapi pina pohuajinessa tinanamananijine disseraqqquiri tiquinaji. <sup>22</sup> Puhuapa imasiri inana-jerani. ¡Nohuerajaro! Madijadeni icamaidsabaqqui-jarajari. ¡Nohuerahissa tajari! <sup>23</sup> Itamassomanadsa naco pohuapa tatamasso najarade. Najidsohue tonahanadsa naco manaco pohuadenidsa jara jara najarade. Imehi Diodsa: —Abi, ohua tecahuaji –nanaja nadsapa didi najari. Dio Puhuana madija huapimacca ima cattermade nahato tajari. Puhuajine pajiranissa tajaro. <sup>24</sup> Jesocristo pohua assiredsa icca imasiri ssonaridsapi ahua porimacossanidsa dsoqqquejari. Nama nadsapa pohuajine iapi imasiridsa ecotajaro. Madie bica taniccadsana imadijaro. Puhuapa biquerajarijine iapi ibicajaro. <sup>25</sup> Tahide tiadenipi pina edede jano toquejenajarissa tiquinajaro. Tiadeni Cacahuadedsa huajiqquiri tiquinaraha jidapanana Jesocristodsa jai tijaqquinijaro. Puhuapa edede cacahuadessa najari. Nocco panadsa tiadeni tohuacahua-baqquijari.

### 3

*Amoneje maqquideje cajimanajaro, maqquideje amoneje cajimanajarideni madi-manahissa tahijine*

<sup>1-2</sup> Jehe, tiadenidsa occa ima onihipi ajima najaro: Amonejedeni maqquideje ticajimanadsapi ticcadeni maqqui attidsa iboraqquiri tiquinaji. Ticca maqqui Jesocristodsa jehe najarajaridsa timadidsa naqui pohua attidsa ibora tinaji. Puhuadsa Jesocristo tahimari huati tinanitide, huati tina-jeranitide naraha ticca madie bica tani qqui tadsapa pohua naco Jesocristodsa jehe nahitide, onajaro.

<sup>3</sup> Jehe amonejedeni, tessiredeni bica tanijine tohuinira tiquinejeraji. Bicaqquiri tiquinanijinepi pina titatideni conani ticohuamanajaro, dsibehi tanicca oro nahatoni timattodenidsa huanajaro, etero huatini ccara tanicca tedsamanajaropi Diodsa ponimassa najaro. <sup>4</sup> Bicaqquiri tiquinanijinepi tibodidenina paji. Tettideni bica tadsa joneqqquiri tiquinana. Najaro biquehepi totabaccorarera tani. Najarona Diodsa denima bica tajaro. <sup>5</sup> Maittaccadsama Dio Attidsa iboraqquiri najarodenicca biquehepi ponideni bodinina paji. Diodsa jehe quinanissa tadsapi ponidenicca maqqui attidsa naqui iboraqquiri najaro quinade. <sup>6</sup> Maittaccadsama amoneje madijaro Sara nema napojaro. Ponicca maqqui Abarahao attidsa ibora tajaro. Puhuadsa: —Ohua medsede –naneje najaro quinade. Nadsapi tiadeni naqui bica taniccara tinanamanadsapi pina Sara potemanissa tiquinanitohui. ¡Ticappinamana tejeraji! onajaro.

<sup>7</sup> Maqquideje tiadeni naqui amoneje ticajimanadsapi ticcadeni amoneje tec-ahuamananissa taji. Tibodideni huatona: Ponidenipi pina tiadenissa quina-jerani. Ponidenicca dacorehepi ajimani, tiquinana. Nadsapi ponidenidsa bicaqquiri



tiquinaji, onajaro. Diopa ponidenidsa pocca daniji bicabote da inanitohui, pina tiadenidsa da inajarossa nanitohui. Najaro camittehe jiquejeraniccapi ticca amonejedsa, tiadsa tojanitohui. Jehe, poni tadsajani timadimananissa tadsapi Diodsa huati tiquinadsa tettideni mittahitohui.

*Ima bicani inanaraha ocasserehe iadsa ssonari tani*

<sup>8</sup> Jehe, tiadeni huapimapi ticajonerara canadsa timadimananissa taji. Tibodideni ojaricquinissa tadsa jehe ticanirere canaridseraji. Tetideni cahanerara canadsa pina timecotedenidsa tetideni huanacquiri najarossa tiquinaji. Huapimadsa bicaquiri tiquinaji. —Ohuapi deni ojani -tiquinejerana, onajaro. <sup>9</sup> Nadsama madija tiadenidsa tabaccorehe inanamanadsa naqui manaco pohuadenidsa tabaccorehe tinanamanajeraji. Tiadeni totamasso-bacquirimanadsa naco manaco titamassobacquirimana-jarajo. Ajima tinanamananina bica tani: Pohuadenidsa ima bicanira tinanamanaji. Tettideni bica tadsa pohuadenidsa huati huati titiquina nana. Nema tinanamanadsapi Dio tiadenidsa ima bicani inanitohui. Najarojine tiadeni tocattejidsabacquirari. <sup>10</sup> Jehe, najaro imapi Dio Atti dsodo napojarodsapa ajima najaro:

—Madijapa ajijaro namidsa madihissa tahijine tohuini najari, pocca madie bica tadsa huatidsehema madihijine tohuini najaripa imasiri huatira, maidsehe huatira tana.

<sup>11</sup> Najaripa tabaccorehedsa tohuajihina nana. Ima bicanira ihinanaridsa nana. Madija huapimadsa jone taha madina.

<sup>12</sup> Ia Medsedepa ima bicanira inanamanajarodeni ecahuabacquirari. Diodsa huati toquinadsa naco poccadeni huatinaja mittahitohui.

Naraha madija tabaccorehe inanamanajarodenidsapa Dio jipera tadsa pohuadenidsa huadibote najari  
-naponi nade Dio Atti dsodo nanidsa.

<sup>13</sup> Jari, tibodideni huatomanaji: Ima bicani tinanamananijinera dissessera tinadsapi ¿nejecojari tiadenidsa tabaccorehe inananiijine pajirahi? <sup>14</sup> Naraha ima bicani tinanamanajarojine ocasserani temanadsapi Dio tiadenidsa ima bicani inanitohui. Madija noppinedeni ticappinamana tejeraji. Ocasserehe tiadenidsa ssonaridsa naqui tijabojomana tejeraji. <sup>15</sup> Pina tibodidenidsa ajima tiquinaji: —Jesocristo, tiapi ohua Medse. Tiadsara ibora odsanaponijine -titiquina nana. Madija tiadenidsa attideni: —¿Timadinissa tadsapi nejecora ticajinijine tohuini timadijaro? -quinadsapa pohuadenidsa tecomeramananijine tibodidenidsa najorapodsapi pohuadenidsa tecomeramana naji, onajaro. <sup>16</sup> Tecomeramanadsa naqui tohuati huanehema, tettideni bica tadsa huati huati titiquina nana. Jehe, Jesocristodsapa jehe tiquinadsapi tibodideni huirequiri nehe timadimanana, imasiri tinanamana-jeranijine. Nema tiquinadsapi imasiri huahuatidedenipa tiadenidsa ima inanamanaraha pohuadeni atti pajissa toja-jeradsapi pohuadenina cappinamanahitohui.

<sup>17</sup> Dio jipa tadsapa ocasserehe tiadsa ssonaridsa tinahananitohui. Tabaccorehe tinanajarojine ocasserehe tinahanadsapi epeje, tijine tabaccora tadsa. Naraha ima bicani tinanajarojine ocasserehe tinahanadsapi epeje, tijine Diodsa bica tajaro.

<sup>18</sup> Jesocristopa icca imasiri manaconi ocasserani ahuadsa dsoqquejari. Dsoqquehi ojariraha pohuajine imasiri manaconi pajiranissa tehe nema dsanaponitohui. Pohuapa imasiri cappiraraha imasiri inanamanajarodenitohui ocasserani ahujari. Nama najaripa Diodsa ia bacco inanijine. Pohuapa pina madijassa nadsa assire dsoqqueraha pohua corime Diodsa tomadinipomajari. <sup>19</sup> Pohua corimepa jicapojarideni corimedeni maride toccajari. Najaridenipa najidsohuedsa toquejenahijine Dio icahacossabacquirari. <sup>20</sup> Pohuadenipa maittaccadsama Nohue madicadsa madimanapojari. Dio Attidsa iboquiri najari. Naraha Diopa huadi-jaradsa bodideni

cacajiqquimerahijine mohuaradsa tohuideni madicajari. Nohue canoa imeni-bote cobade tojaccadsapa Dio pohuadenitohui madiraha bodideni cacajiqquimera-jaradsapa ppanidsa tojicajari. Naraha madija 8 quinahana canoa imenibote passodsa tocatabomacossajarodsa tocassiejerajari. <sup>21</sup> Najaro imapi pina icassiejeranijinecca imassa najaro. Jidapana iapi Jesodsa jehe inadsa passodsa totopa icajijarojine Diocca najidsohue dsori icanirenitohui. Passodsa ia topa dsanajaropi essire obani toccanijine jerani. Ibodi cacajiqquimeradsa Diodsa huati inadsa ettipi: —Abi Dio, ojine tabaccora tajarodsa: “Epeje, ohuati ajimani” taji. Nani obodi bica, huire tanijine –inadsana totopa icajijaro. Jesocristo nahatonijarijine Dio ia tonassiajabacquiari. <sup>22</sup> Jesocristo nahatonidsapa memehuaaji toccamacossanijari. Huapimadsa deni tojadsapa Dio inori nahatonihuaji huittarijari. Nahidsa huittaridsapa Diocca dodosse tabaqqi memehuaajicadsa dosse dosse najari. Ahuatoraqquiri najarideni deni tojehe cajimana, dacorehe cajimana naraha najaridenidsa naco Jesocristo dosse dosse najari.

## 4

### *Diodsara disseraqquri tiquinaji*

<sup>1</sup> Jehe, Jesocristopa pohua assiredsa ocasserehe imeni inahanajaro. Nema nadsapi tibodidenidsa tinajoramanadsa ajima tiquinaji: —Pina Jesocristossa onanijine ocasserehe ohuadsa ssonaridsa nema nehe onahanana –tiquinaji. Ocasserehe mohuaradsa tinahanamanadsapi tabaccorehe tinebomanani ahuato tajararo. <sup>2</sup> Nadsapi ajijaro namidsa timadimanaccadsapi tabaccora tanicca tohuini tiquinejeradsa timadimananitohui. Dio Pohua tohuini nahiccara titinanamana nanitohui. <sup>3</sup> Tahide timadimanapodsapi Diodsa jehe quina-jarajaridenicca tabaccorehessa tinanamanadsa timadimanapoccade. Pina tessiredeni totabaccoranijinecca tohuini titiquina najaro. Ticcadeni amoneje jeraraha tohuini tiquinajaro, ticcadeni maqqui jararaha tohui tiquinajari. Najaro huananehe tohuini titiquina najaro. Huananehe onihi tabaccora tanicca naqui tohuini titiquina najaro. Tinoccodeni jano tanijine tohuini titiquina najaro. Ejete tabaccora tanicca tohuini titiquina najaro. Dsoppinejedsa, siba nahatonidsa naqui: —Ia cacahuade –titiquina najaro. Najaro imapi Diodsa denima tabaccora tani. <sup>4</sup> Naraha jidapanana ticcadeni madie dsatipi aja tabaccorehe tohuini quinajaridenidsa jidsa tani. Pohuadeni tedseje tiquejemamana-jeradsapi attideni tabaccora tadsa titahimarideni huati huati quiquinanajari. <sup>5</sup> Naraha tabaccorehe inanamanajarodenipa Diodsa poccadeni tabaccorehe ecomeramananitohui. Diopa madimanaccajaridenicca ima, dsoqquemanapojaridenicca ima huapima cattemade najorajari. <sup>6</sup> Nama nadsapa Jesocristo pohua pohua tahimari icassiejeranijineccadsa jicamanapojarideni mari icanabaqquijari. Diopa dsoqqueheda assiredeni inajidsobaqqipojaripa madija huapima dsoqquehe tonahanajonamanajari. Naraha Jesodsa jehe quinajari corimedenipa Diodsa madimana-dsanapohuitohui.

<sup>7</sup> Ajijaro dsamapi jicani tohuajirajonani. Nema nadsapi tibodideni huatomamananissa tadsa tiadeni tecahuamanaji, imasiri tinanamana-jeranijine. Diodsa huatide naqui disseraqquri tiquinaji. <sup>8</sup> Ima deni tojaniccapi tetideni cahanerara canaridsanijine. Najaro tohuati huanehepi imasiri inajica tani. <sup>9</sup> Ticcadeni odsahuaji madija bacco najonadsa naco pohuadsa tettideni tabaccora tadsa huati tiquina tejeraji. —Nija, ticcamacossaji. Tijipaji –tiquinanina bica tani.

<sup>10</sup> Diopa tiadenidsa ima bicani inanajaro. Pohua Corimecca nahatohue onihi onihi da inaridsadsapi ticajiridsamanajaro. Najaro daniji bicani ponima tinanamana-jerana. Najarodsa timecotedeni acco camade nahatoqquri tiquinana. Acco acco ticanaridseradsapi Diocca biquehe huapimadsa ahuato tanijine. <sup>11</sup> Madija maride nahatoqquri tiquinadsapi pina Dio Attissa najarora mari mari titiquina naji. Madija bijideni accode nahatoqquri tiquinadsapi Diocca dacorehema acco

ticamabaqquimanajo. Nema tiquinadsapi madija huapima qqui toquinadsa: —Jehe, Jesocristojine nama quinajari –quinahitohui. Nadsana pohuadeni naco Diodsa huatidsemanadsa: —Jehe, Diopa bica tahi, bica tahi –quinahitohui. Pajissa, Diopa bica tajari. Dacorehe cajihi. Nama dsanapohuitohui. Pajissa nema nana.

*Tiadenidsa ocasserehe ssonaridsapi ticappinamana tejeraji*

<sup>12</sup> Ohuemecotedeni, titohuideni ohuati huana tani. Tiadenidsa ocasserehe ssonarijaropi pina dsippossa najaro. Ticcadeni jeheniji nattome najaro. Diopa tiadenidsa ocasserehe ssonarinijine ecossa-jeradsapi tinahanamananitoahui. Naraha tijabojomana tejerana. —¿Nejecotohui Jesocca ojaraha ohuadsa ima ssonarijaro? –tiquina tejeraji. <sup>13</sup> Pina tetidsemanaji. Jesocristo naco ocasserani ahujari. Pina tiadeni tinahanamanajarossa najaro inahanapojaro. Nidsa pohua ccanipomadsa pocca deni tojehe ahuateo inanadsapi tetidsemaneri nanitoahui. <sup>14</sup> Nadsama Jesocristo onidsa tiquejenarajine madija tiadenidsa attideni tabaccora tadsa atti atti quinadsa naco nema nehe tetidsemanaji. Dio tiadenidsa ima bicani inanajaro. Dio Corime Dacorabote tiadenidsa tojadsapa madi-dsanapohuitohui.

<sup>15</sup> Aji ocasserani tinahanamanajarocca ima huati huati onajaropi tabaccorehe tinanamanajaro manaconi jerani. Madijapa tabaccorehe inanaridsamanani caji tani. Pina ijine ahujari, botijari, imasiri tonanajari, madija ohuahacca imadsa quejemajari. Nama quinajaridenidsapi najidsohue ssonari tani. Naraha tiadenipi nema tiquinejeraji. ¡Poni! onajaro. <sup>16</sup> Naraha Cristocca madija tiquejenarajine ocasserani tinahanamanadsapi ticappinamana tejeraji. Pina Diodsara tetidsemanadsa Pohuadsa: —Jehe, epeje, bica tani! Jesocca ojajarajine ocasserani ohujaro –titiquina nana, onajaro.

<sup>17</sup> Dio madija huapimacca ima cattemade tojahijinecca huada bacco tani. Tahidepi ia pocca madija iquejenajaro icca imaha icattemaponitohui. Aji jidapana iadsa najidsohue ssonari najaropi ajimani ocassera taraha nidsa dsotode Dio madija inassiajabaqquihijinecca imadsa iboqquiri najaridenidsana najidsohue denima op-pina tanicca ssonarinitohui. A, pohuadenipa najaro najidsohue inahanamananijine pajiramana-jarahitohui, onajaro. <sup>18</sup> Dio Atti dsodo napojarodsapi ajima najaro: Diodsa iboraqquiri najarideni tocassiejerahijinepa najo taraha nema nehe inahanamanajaro. Naraha Diodsa iboqquiri najarideni, aja imasiri sseqquiri najarideni tocassiejerahijinepa pohuadenidsa denima najo tani. ¡Pohuadenidsapi ssamo tani! <sup>19</sup> Nema nadsapi tiadenidsa ajima onajaro: Dio ecossanijine jipera tadsa tiadenidsa ocasserehe ssonariraha nema nehe bicanira tinanamana-dsanapona. Diopa tiadeni Nahatode. Pohuadsa: —Abi Dio, ohua tecahuaji –tiquinadsapi tiadeni tohuacahua-baqquihitohui. Pohuapa Pohua Attissa inanajaro.

## 5

*Jesocristodsa jehe quinajarideni madimanahissa tahijine*

<sup>1</sup> Ajijaro imapi Jesodsa jehe quinajarideni cacahuadedenidsa dsodo onajaro. Ohuapi pina pohuadenissa onajaro, jehe quinajarideni cacahuade ojaní. Ohuapi Jesocristo ocasserani ahua hi onocodsá qqui onajarocca ohohuacomeraridsa najaro. Nidsa pohua ccanipomadsa pocca deni tojehe tojaridsadsapi pohuadenidsa, ohuadsa naqui tojanitohui. Nema nadsapi pohuadenidsa ajima onajaro: <sup>2</sup> Ticcadeni mamari tabaqqi Jesodsa jehe quinajarideni tecahuabaqqi-manahissa tajo. Dio Pohuajine pocca madija cacahuade tiquejenajaro. Tibodidenipi: —Pohuadeni cacahuade jipera onaraha ohua icadossemanadsade –tiquinejeraji. Pohuadeni cacahuade iboraqquiri tiquinana, pina Dio jipa tahiccassa tinanamanana. Tibodideni naqui: —Dsiniro huemani ohuadsa tojadsana pohuadeni cacahuade ojanijine –tiquinejeraji. Tibodideni bicaqquiri nadsa pohuadeni acco acco titicanabaqquimana nana, onajaro.

<sup>3</sup> Tibodidenipi: —Ohuana pohuadenidsa deni ojana –tiquinejeraji. Pina ajima tiquinanina bica tani: Bicaqquiri tiquinadsa timadimananissa taji. Nadsapa ticcadeni mamari tabaqqui ticcadeni madie qqui toquinadsa pina ticcadeni madiessa quinahijine. <sup>4</sup> Nema tiquinadsapi ia Cacahuade deni tojahicca Jesocristo ccanipomadsapa pocca deni tojehe tiadenidsa inanaridsanitohui. Najaro pocca daniji bicanipi jiquejeranitohui.

<sup>5</sup> Dsabissodeni tiadeni naqui Jesodsa jehe quinajarideni cacahuade attidenidsa iboraqquiri tiquinaji, onajaro. Huapima tiadeni deni tinanamana-jeradsa mohuaradsa timecotedenidsa ahuaji ibora ahuaji ibora tiquinana. Aji Dio Atti dsodo napojarodsapi ajima najaro:

—Diopa madija: “Ohuana deni ojani, nahatojide ojirani” quinajaridenidsa jipera tahi. Naraha madija: “Ohuapi ajimani ojani” quinajaridenidsana huati huana tadsa acco icamabaqqui tahi.

<sup>6</sup> Nadsapi tibodideni: —Ohuapi ajimani ojani –titiquina nadsapi Dio Dacorabotedsa iboraqquiri tiquinaji. Nadsapi nidsa dsotode Dio Pohua jipa tahicca huada bacco tadsana Pohuapa tiadeni deni tonanabaqquihitohui. <sup>7</sup> Diopa titohuideni huati cahanari canajarijine tiadeni tohuacahuabaqqui-dsanapojari. Nadsapi Pohuadsa tettideni: —Abi Dio, obodi huatoto cananicca tinahireji. Pina ocappinanicca, oji onanicca, ocappiranicca naqui huapima obodidsa nohueranijine epeje tinanaji –titiquina nana, onajaro.

<sup>8</sup> ¡Paji, tinocodeni panaji! Diocca huadi, ticcadeni huadi naco Satanapa pina dsomaji imehibotessa najari. Ia quino nahijine totororo naridsajari. Tibodideni huatoma-mananissa taji, Satana tiadeni tonatabaccorabaqqui-jarahijine.

<sup>9</sup> Dacoraqquiri tiquinadsa ticcadeni huadidsa tiejidsamanaji. Diodsara disseraqquri tiquinaji, ticcadeni jeheniji todacorani nanijine. Ajijaro imapi nahatoqquri tiquinani: Timecotedeni dsama huapimadsa madiridsamanajari naco tiadenissa quinajari. Ocasserehe ihinahanamana najaro.

<sup>10</sup> Jidapana ocasserehe tinahanamanaccani. Naraha nidsa jicadsapi Dio tiadeni tonabicabaqquihissa tahitohui. Ticcadeni jeheniji inapajiranissa tanitohui. Tibodideni inadacora-baqqunitohui. Jesodsa disseraqquri tiquinanijine tiadeni acco tocamabaqquihitohui. Abi Diopa huati cahanari canadsa pocca cacahuehe bicanidsa imadi-dsanaponijine ia tocattejidsabaqquijari. Jesocristo tedseje Diocca deni tojehedsa imadi-dsanaponitohui. <sup>11</sup> Pocca dacorehe nema dsanaponitohui. Pajissa nema nana.

### *Imecotedeni ohuaha naco tiadenidsa nija quinajari*

<sup>12</sup> Ohuemecote Silvanopa bica tajari. Jesocristodsa dissera tahi. Pohuapa ohua acco camadsa ajijaro ima badsira tehe tiadenidsa dsodo onajaro, tibodideni acco ocamabaqquinijine onadsa. Dio titohuideni huati cahanari canahi pajissa nahatoqquri tiquinanijine tiadenidsa dsodo onajaro. Pohuapa tiadenidsa ima bicani inanadsapi pocca tohuati huanehe ahuato inanajaro. Najaro pocca tohuati huanehedsa disseraqquri tiquinaji, onajaro.

<sup>13</sup> Odsa panani Romahuaji Jesodsa jehe quinajaridenipa tiadenidsa nija quinajari. Pohuadenipa Dio icattejidsabaqquijari, pocca madija toquejenahijine. Pina Dio tiadeni tocattejidsabaqquijarissa quinajari. Ohuemecote Maraco naco tiadenidsa nija najari. Pohuapa pina occa ejedenissa najari.

<sup>14</sup> Ohuatti onihi naqui: Tiadeni naqui titesse jehe quinajarideni tedseje bacco ticaniredsapi tetideni huanehema nija tiquinadsa dama, ticahuajacossa titiquina naji, onajaro.

Jesocristodsa tiquejenajaro huapimadsa Diocca jonehe tojaridsana, onajaro. Epejeni, occa ima. Ohua onipi Pedro.

## **Pedrocca ima teppe dsotodecca**

### **2 Pedro**

Pedropa jodiodeni Jesodsa jehe quinajaridenidsa ima teppe onihi dsodo inapomajaro. Pocca ima teppedsa mari icanabaqquijari, poccadeni jeheniji todacorani nanijine. Diodsa madimanahissa tahijine naco mari icanabaqquijari. Ima onihipi Jesocristo ccanipomahicca ima dsodo inajaro.

#### *Pedro nija najari*

<sup>1</sup> ¿Nija ohuemecotedeni? Ohuapi Ssino-Pedro, Jesocristocca dodosse ojararo. Pocca marinaja mari ocanabaqqui-ridsahijine ohua cadossejari. Nadsapi occa ima teppe tiadenidsa dsodo onapomajaro. Jesocristopa icca Dio, ia Tonassiajade. Puhuapa tiadenidsa bica tajari, pocca ima tiadenidsa pajiranissa tajaro. Puhujinena pohuadsa pajissa tiquinajaro, pina ia pohuadsa pajissa inajarossa tiquinajaro. <sup>2</sup> Diodsa tinoccodeni tojidsera-dsanaponijine, ia Medsede Jesodsa naqui tinoccodeni tojidsera-dsanaponijine titohuideni Diodsa huati huati odsanapojaro. Puhuapa tiadenidsa ima bicani inanadsanapona. Tibodidenidsa naqui pocca jonehe tojadsanapona, onajaro.

#### *Diopa icca madie bica tanijine ibodi acco tocamabaqquijari*

<sup>3</sup> Dio pocca dacorehedsa ibodi acco tocamabaqquijari, icca madie Pohuadsa inananiijine. Pohua jipa tahiccassa inananiijine naqui ia tonapajira-baqquihissa tajari. Dio ibodi acco tocamabaqquijarijine Jesodsa nahatoqquri inajaro. Jesopa pocca deni tojehe, pocca biquehe icajiniijine ia huahua tabaqquijari. <sup>4</sup> Diopa pocca dacorehema Pohua huati tapojaricca ima bicani iadsa da inajaro. Najaro pocca danijipi deni tojanicca, bica tani. Najaro iadsa tojaropi pina Dio Pohuassa inanijine, ajijaro namicca tabaccorehe tohuini inajarocadsa naqui dsori icanirenijine. <sup>5</sup> Nema nadsapi ticcadeni jeheniji todacorani nanijine disseraqquri tiquinaji. Ima bicanira tinanamanaji. Ima bica tanicca, Dio jipa tahicca nahatoqquri tiquinaniijinepi Diocca tohuatthetohui disseraqquri tiquinaji. <sup>6</sup> Tibodidenidsa tohuini tiquinanicca tabaccorehedsa poni tiquinaniijine ticahatteraji. Ima ocassera taniccadsa, ima najo taniccadsa tedimana-jeradsa mohuaradsa tonahanade ticahatteraji. Ticcadeni madie Diodsa tinanamanadsapi Pohua jipa tahiccassa tinanamanaji. <sup>7</sup> Ticcadeni madie denima bica tanijinepi timecotedeni Jesodsa jehe quinajaridenidsa bicaqquri tiquinaji. Nema tiquinadsapi madija huapimadsa naqui tetideni huaqquri naji.

<sup>8</sup> Jehe, najaro ima bicani onihi onihi ticahatteradsa, ticcadeni madie Diodsa tobi-cadsanapodsapi ticcadeni jeheniji ponima toja-jeraniijine. Ia Medsede Jesocristodsa nahatoqquri tiquinadsapi pajissa ticcadeni madiedsa ahuaato tanitohui. <sup>9</sup> Naraha madija Jesodsa jehe naraha ima bicani tohuattattera tajaripa pocca madie Diodsa tobica-jerajaro. Pina mitta-jarajarissa najari. Puhuapa pocca imasiri tahidecca Dio epeje inanapojaro huati ajamajari. <sup>10</sup> Ohuemecotedeni, Diopa Pohuadsara iboraqquri tiquinaniijine tiadeni huahua tabaqquijari. Pocca madija tiquejenaniijine tiadeni tocattejjidsabaqquijari. Pajissa pocca madija tiquejena-dsanaponijine tohuini tiquinadsapi denima tidisseramanani naji. Nema tiquinadsapi imasiridsa tiedimamana-jeranitohui. <sup>11</sup> Nadsapi nidsa dsotode Diocca cacahuehe jiquejeranic-cadsa bacco tiquinadsapi Dio huatidsedsa noccobiji nemanehi tiadenidsa icanahabanitohui. Nanidsa jai tijedsimadsapi ia Medsede, ia Tonassiajade Jesocristopa tiadeni tohuacahuabaqqui-dsanapohuitohui.

<sup>12</sup> Jehe, ticcadeni jeheniji todacoraniijinecca ima timittamanapode. Najaro marinaja pajissacca tiadeni mari tocanabaqquidsa pajissa jehe tiquinanissa taraha tetideni



ajima-jeranijine tiadeni maride dissera onanitohui. <sup>13</sup> Ajijaro namidsa omadic-cadsama najaro marinaja pajissacca tetideni ajima-jeranijine tiadeni mari mari odsanapoccanijine bica tani, onajaro. <sup>14</sup> Ia Medsede Jesocristo pajissa ohuadsa ahuato inanajaropi ajijaro namidsa occa madie jicabote nani. <sup>15</sup> Nadsapi occa marinaja tetideni ajimamana-jeranijine dissera odsanapoccani. Odsocqueni nattini naqui najarodsa tibodideni huatomamana-dsanaponijine, onajaro.

*Jesocristocca deni tojehe qqui toquinajari tahimarideni*

<sup>16</sup> Aji ia tiadeni maridepi ia Medsede Jesocristocca dacorehe tahimarini, pohua ccaronapomahijine tahimari naqui tiadeni mari icanabaqquijaro. Najaro marinajapi ponima maidsehecca ima inahatomanajarossa nejerani. Ia Medsedecca deni tojehe pajissa inoccodsa qqui inajarora tiadenidsa ecomerajaro. <sup>17</sup> Iapi Abi Dio Pohua Bedi Jeso deni inanahi qqui inade. Dio pocca deni tojehe, pocca biquehe Pohua Bedidsa inanadsapi Pohua Atti ajama najaride: —Ajajaripa occa ejedeni. Pohuadsa ohuati huana tajaro. Pohuadsa ohuatidseri najaro —najaride Dio. <sup>18</sup> Ia Jesodsa ssono bicanihuaji jaijemorarajara memehuaaji Dio Atti mohuini mittaronani imittajarode.

<sup>19</sup> Nema nani qqui onadsapi Dio Atti cacomeraqquiri najaridenicca dsodoniji icajijarodsa: —Pajissa jeranitide —onejerajaro. Najarodsa pajissa onanissa tajaro. Najaro poccadeni dsodoniji tetideni ajimamana-jeradsa tibodidenidsa dacoraji. Poccadeni dsodonijipi pina jojororo dsidsinidsa ssiaja-dsanapojarissa najaro. Pina ssiajacca abadsico bedi cassiajajonadsapa ssiejene tossiajabaqquijarissa nanitohui nidsa ia Medsede Jesocristo ccanidsapa pocca biquehe tiadenidsa tojanitohui. <sup>20</sup> Ajijaro marinaja timittamananissa taji. Aji Dio Atti cacomeraqquiri najaridenicca dsodonijidsa: —Pajissa Djojine dsodo quinajaria —tiquinaji. —Madija pohuadeni bodicca ima dsodo quinajari —tiquejeraji. <sup>21</sup> Jehe, Dio Atti cacomeraqquiri najarideni Dio Atti ehecomeraridsamana najaropi pohuadeni tohuini quinahicca jerani. Pohuadeni bodidsa: —Ajima onanana —quina-jarahi. Dio Corime pohuadeni bodideni acco icamabaqquidsana Dio Pohua jipa tahiccara ehecomeraridsamana najaro.

## 2

*Maidsehe mamaride tahimarideni*  
*Jodacca 4-13*

<sup>1</sup> Maittaccadsama Isaraeri potemahideni madimanapodsapa maidsehe huahuatidedeni pohuadenidsa animanahi quinade. Pina Dio Atti cacomeraqquiri najaridenissa quinaraha mamaidsadedeni. Jidapana timadimanadsa naco tiadenidsa maidsehe mamaridedeni bacco quinahitohui. Tiadeni mari tocanabaqqui-manadsapa pina marinaja pajissaccassa naraha maidsehe quejemajaro. Poccadeni marinaja tabaccora tajarojine ticcadeni jeheniji totabaccoranitohui. Ia Medsede Jesopa pohuadeni inassiajabaqquihijine dsoqquejari. Naraha pohuadsa: —Ia tonassiajabaqquihijine pajirahi —quina-jarajari. Nama quinaadsapa pohuadenidsa najidsohue amadsati bacco tanitohui. <sup>2</sup> Maidsehe mamaridedenicca madiepi tabaccora tajaro. Pohuadeni tohuini quinahiccadsara disseraqquiri najari. Madija mota huapi taha poccadeni maidsehedsa toquejenadsapa pina poccadeni madiessa quinahitohui. Najaridenijinepa madija ohuahadeni naco Jesocristo tahimari pajissaccadsa attideni tabaccora tadsa atti atti quinahitohui. <sup>3</sup> Maidsehe mamaridedenipa dsinirotohui disseraqquiri nahi. Pohuadeni tiadeni tocamaidسابaqqui-manadsa ticcadeni dsiniro pohuadenidsa totoja nanitohui. Naraha tahidedsama poccadeni ima tabaccora tani Dio nahato tapodsapa najidsohue oppina tanicca pohuadenidsa inanajorapojaro. Nidsa pocca huadie tojadsapi dsori tocanire-jarahitohui.

<sup>4</sup> Maittaccadsama naco Diocca dodosse tabaqqui memehuaajicca mota imasiri tonanamanadsapa poccadeni imasiridsa Dio: —Epejena, ohuati ajimani —najarajari.

Paja ettajobaqquiridsapa najidsohue jiquejeranihuaaji hua idsimajari. Cadenadsa bijideni jore naha dsidsini oppina tanidsa inamadibaqquijari. Nidsa madija huapimacca ima cattemanijinecca huada bacco tadsana najidsohue denima oppina tanicca cajimanahitohui. <sup>5</sup> Najaro imassa najaro naqui maittaccadsama ajijaro dsamadsa madimanapojarideni tabaccorehedsa disseraqquri nadsapa Dio poccadeni imasiridsa: —Epejena, ohuati ajimani –najarajari. Nadsapa ppani imeni dosse inadsa tojicajari. Najaro ima tojadsapi Nohuena Dio inassiajajari. Puhuapa madija Diodsa madimanahissa tahijine mari mari ihicanabaqqui naraha ja quina-jarajari. Naraha pocca madija 7 quinajaridenina pahuadsa tocassiejerajari.

<sup>6-8</sup> Dsotode odsa panani Sodoma, Comoradsa madimanajarideni naco Dio inajicajari. Najaro ima tojadsapi Rotena Dio inassiajajari. Madija huapimapa pahuadeni tohuini quinahicca tabaccorehedsa madimanaraha Rotepa Diodsa madihissa tajari. Madijadenicca tabaccorehe pahuadsa ocassera taraha nama naha madijari. Poccadeni tabaccorehe qqui tajari, mittajari dsadsanapo nadsapa bodi oji naha madijari. Nadsapa najarideni naco Dio inajidso-baqquijari. Poccadeni odsa panani Sodoma, Comora naqui huapima madijama Diojine diji tocanirehissa tadsapa ononedenira tojajaro. Diojine nema najaropi dsotodedenicca tabaccorehedsa madimanajarideni bodideni huatoma-manahijine. —Pajissa, Diopa imasiri tonanamanajarideni inajidsobaqqui tahi. Iadsa naco nama narana –quinahijine, onajaro.

<sup>9</sup> Jehe, ia Medsede Diopa Pahuadsa disseraqquri najaridenidsa ima ocassera tanicca inatappanijine nahato tajari. Tabaccorehe inanamanajaroden naco inajidsobaqquihijine nahato tajari. Puhujine najidsohuedsa madimana-dsanapodsapa nidsaranibote madija huapimacca ima cattemanijinecca huada bacco toquinahitohui.

<sup>10</sup> Aja madija tabaccorehe pahuadeni tohuini quinahiccadsa disseraqquri najarideni, aja Dio Attidsa iboqquri najarideni, aja cacahuehe cajimanajari attidenidsa iboqquri najarideni huapimadsapi najidsohue denima oppina tanicca ssonarinitohui. Aja maidsehe mamaridedenipa huaribodeni sibaqquri najari. Cappineraqquri nadsapa: —Ohuana nahato onajaro, deni ojani –quinajari. Diocca dodosse tabaqqui memehujicadsa naco tamassode cappineraqquri najari. <sup>11</sup> Naraha Diocca dodosse tabaqqui manaco maidsehe mamaridedenidsa tatamasso quina-jarajari. Puhuadenipa deni toquejenajari, denima dacoraqquri naraha Dio bacchohuaji maidsehe mamaridedeni tahimarideni huati toquinadsapa attideni tabaccora taniccadsa huati toquina-jarajari.

<sup>12</sup> Maidsehe mamaridedenipa bodideni huatohuijine ssamoqquri najari. Pina banidenissa quinajari. Puhuadeni tohuini quinahicca tohuira disseraqquri nadsapa pahuama madimanajari. Ima pajissacca mittamanahissa tajaradsapa najaro imadsa attideni tabaccora tadsa atti atti quinajari. Najaridenipa jicahitohui. Pina bani tocatojadsa madimanaraha madijajine dsodsoqquemana najarissa quinahitohui. <sup>13</sup> Puhuadenijine madija ocasserani ahuamanajari manaco pahuadeni naco ocasserani imeni ahuamanahitohui. Cappineraqquri nadsa ahuatonidsa pahuadeni tohuini quinahicca tabaccorehe ihinanaridsamana najaro. Nama quinadsa huatidsemanaraha ssamoqquri najari. Aji tiqueriqquimananidsa naco tiadenidsama jai tojedsimaraha poccadeni imadsara huatidsemanajari. Puhuadenijine ima tabaccora tani qqui tiquinadsapi ticomehimanajaro.

<sup>14</sup> Puhuadenipa amoneje qqui toquinadsa tohuini inacomamanadsapi pina ijamana-jarossa najaro. Imasiri tonanade neboboraqquri najari. Aja jehenijirideni japari tajaroden icamaidساباqqui-manadsapa imasiridsa toquejenani tahi. Puhuadeni bodidsa tohuini inacomamananicca puhuadenidsa tojanijine nahatoqquri najari. Namajidede rajaripa pajissa Dio inajicahitohui. <sup>15</sup> Diocca jahui bicanidsa huere tojidsamanadsapa pina jano toquejenajarissa quinajari. Poccadeni imapi pina

Baramicca imassa najaro. Baramipa Behoro bedi, maittaccadsama madipojari. Najaripa Dio Atti cacomeraboteraha dsiniro cajihijine tohuini nadsa tabaccorehe tonanajari. <sup>16</sup> Naraha Dio johua icanajari. Najaro imapi ajima najaro: Baramipa pocca bojo idenidsa huittaridsa toccaraha Diojine pocca bojo attini pina madija attissa nadsa pohnadsa huati huati tajaro. Najarojine Baramipa pocca tohuaribo sibehe inebojaro.

<sup>17</sup> Maidsehe mamaridedenipa pina passo odinicca sse tajarossa quinajari. Pina meme essenì jojodejine ponima toccajarossa quinajari. Poccadeni maidsehe manaconipi dsidsini oppina taniccadsa madimana-dsanapohuitohui. <sup>18</sup> Attideni deni tojaniccadsa huati huati toquinaraha pohnama huati huati toquinajari. —Ia tohuini inanicca inananipi oppinera tani —quiquinanajari. Pohnadenijine madija imasiri cajimanajaridenidsa tohuajimane-dsati pa tabaccorehedsa toquejenanijari. <sup>19</sup> —Marinaja jirehe timadimanani bica tani. Tohuini tiquinanica tinanamanani oppinera tani —quiquinanaraha pajissa jerani. Pohnadenipa tabaccorehecca dodosse toquejenaja najari. Najaro tabaccorehe pohnadeni dossede tojajarojine pohnadeni tonatabaccoramanahitohui. Aja madijapa pohnadeni dossede tabaccorehe dsapanidsa toquejena tahi quiquinanade. <sup>20</sup> Jesodsa jehe quinajarideni mota naco tabaccorehecca dodosse toquejenanipoma tahi. Tahide ia Medsede, ia Tonassiajade Jesocristodsa tocatteradsapa ajijaro namicca tabaccorehe inebomanajaro. Naraha dsotode tabaccorehedsa toquejenanipomadsa imasirijine jore naquimanadsapa ponicca dodosse toquejenanipomajari. Madija nama quinajaripa poccadeni madie tahidecca tabaccora tajaropi ajimani. Naraha dsotodeccapi denima tabaccora tajaro. <sup>21</sup> Jaho, Diocca madie bicani tocattera-jaradsapa epeje. Ssamocquiri najarijine poccadeni madie bica tejerani. Naraha Diocca madie bicani tocatteraraha dsotode nebomanadsapa poccadeni madie dsotodeccapi denima tabaccora tajaro. <sup>22</sup> Nadsapi ajijaro ima pamehe pajissa inanamanani ahuato tajaro: Ettepa tocapi, tocca naraha ccanipomadsapa pocca capie tojipanijari. Poroco naco japi naraha amadsati jarorohuaji toccanidsapa dehuede tojapomajari. Poccadeni tabaccorehedsa toquejenanipomahipa tabaccora tajaro.

### 3

#### *Ia Medsede Jesocristo ccanipomahi tahimari*

<sup>1</sup> Jehe ohuemecotedeni, titohuideni ohuati huana tani. Ajijaro occa ima teppepi pina tahideccassa najaro, tiadeni acco ocamabaquini jine tohuini onadsa. Ohuattidsa tibodideni huatonissa tanijine onadsa dsodo onapomajaro. <sup>2</sup> Aji maittaccadsama Dio Atti cacomeraquiri najarideni huati toquinapojaricca naqui tibodideni huatomamanaji. Aja ia Medsede, ia Tonassiajade Jesocristocca dossenijipi pocca dodosse tabaqqi ia tiadenidsa ecomerajaro naqui tibodideni huatomamanaji, onajaro.

<sup>3</sup> Tahidepi ajijaro ima tetideni ajima tejeraji: Dsama jicani tohuajirajonadsapi madija tabaccora taniccadsa disseraquiri najarideni bacco quinahitohui. Najaridenipa pohnadeni attidsa tiadeni tohuattajo-baquimanahitohui. <sup>4</sup> Attideni ocassera tadsa ajama quinahitohui: —Jesocristo pohna ccanipomahicca ima huati huati taporaha ajana ¿ccanico? Ccani-jarahi. Ajina, dsama nahatoponidsama icca idideni jicajonaja najonapohui nahi. Dsamapi jicanijine ssamo tani. Nema dsanaponitohui —quinahitohui. <sup>5</sup> Madija attideni nama quinajaridenipa ssamocquiri najari. Maittaccadsama meme, nami Dio inahatopojaro tahimarini bodideni huatomamanahijine jiperaquiri najari. Diopa Pohna Attidsa: —Passo, titassaquini jini nami ahuatonijine —nadsapa nema naraha pajissa quina-jarajari. <sup>6</sup> Dsotode naqui Dio Pohnajine passo ppanimadsapi dsamadsa madimanapojari huapima je tocaniredsa jicajari. <sup>7</sup> Naraha jidapana aji qqui inajaro meme, namipi Diocca dossenijidsa jororonijine diji tehe jicanitohui. Najaro najidsohuepi Dio Pohna ecahuaccani. Nidsa madija

huapimacca ima cattemanijinecca huada bacco tadsana Dio Pohnadsa iboqquri najarideni inajidsobaqquidsapa meme, nami naqui diji tehe jicanitohui.

<sup>8</sup> Jehe ohuemecotedeni, tiadenidsa ohuati huana tani. Ajijaro ima naqui tetideni ajima tejeraji: Diodsapa huajano 1,000 (mil) nahapa pina huada ojariessa najari. Huada ojarie naqui pina huajano 1,000 (mil) ssa najaro. <sup>9</sup> Ia Medsede Diopa nama naraha madija mota attidenipa: —Dio Pohna huati tapojarissa inananijine najo tahi. Ajana, Jesocristo ccanihicca huada tonajoni –quinajari. Naraha Diopa najo-jarahi. Mohuaradsa titohuideni madicajari. Pohnapa madija huapima paja jicarihiijine jipera tajari. Ojaria dsoqquehiijine naco jipera tajari. Pohnapa madija huapima bodideni cacajiqquimeradsa Pohnadsa toquejenahijine tohuini najari.

<sup>10</sup> Naraha ia Medsede ccanipomahicca huada pajissa bacco tadsapi pina bobotide icca odsadsa amadsati bacco nadsa ijabojo najarossa nanitohui. Mohuini oppinabote dacorehema tomohuidsapi meme amossi nanitohui. Memehujajicca maji, abadsico, abadsico bedi naco diji taridsaha jicahitohui. Dsama nemanehi najidsohue tojadsapi ponidsa cajiridsajari huapima diji taridsaha jicadsapa amossihuajahissa tahitohui.

<sup>11</sup> Nadsama meme, nami jicani tahimarini timittamanadsapi ¿nejecoma tiquinani bica tani? Aji najidsohue tiadenidsa toja-jeranijinepi Diodsara ibobora tinadsa imasiri jirehe timadimananissa taji, onajaro. <sup>12</sup> Jehe, ia Medsede ccanipomahicca huada bacco tanijine tohuini tiquinadsapi najaro huada tonajodsanapo-jeranijine Diodsara tidsepedeni iimanadsanapoji. Dio dsama inajicanicca huada bacco tadsapi jororoni ppocorabotejine memehujajicca maji, abadsico, abadsico bedi naco huapima diji taridsadsa ssahuemadsapa amossihuaja-ridsahitohui. <sup>13</sup> Naraha ia Dio pocca madija iquejenajaropi Dio Pohna huati tapojaricca meme dsati bicani, nami dsati bicani tohuini inajorehe imadijaro. Najaro dsama dsatidsapa madija bicaqquri najaridenira imasiri jiraha madimanahissa tahitohui.

<sup>14</sup> Ohuemecotedeni, titohuideni ohuati huana tani. Najaro ima huapima tojanitohui timadimanaccadsapi Diocca joneheda timadimana, imasiri jirehe timadimana nanijine disseraqquri tiquinaji. Nadsapi Dio bacchohuaji tidomo huadsa bicaqquri, huireqquri tiquinehe tiadeni qqui tabaqquihiijine. <sup>15</sup> Tetideni ajima tejeraji: Ia Medsede Diopa icassiejeranijine tohuini nadsa mohuaradsa itohui madicajari. Najaro imapi imecote bicahi Pablo naco Djotine nahatohue cajidsa tiadenidsa dsodo inapode. <sup>16</sup> Pablopa pocca ima teppe huapimadsa najaro ima dsodo inaridsapojaro. Pocca dsodoniji motapi imittaraha motapi imittanijine najo tani. Najarojine Diodsa ssamoqquri najarideni, aja jehenijirideni japari tajarodeni naco Pablocca marinaja mittamanahissa tajaradsapa pohnadenijine tojidsajaro. Aji Dio Atti dsodo nanicca naqui najarossa inamanajaro. Pohnadenijine marinaja bicani tojidsajarojine Dio inajidsobaqquihitohui.

### *Pedrocca marinaja jicanicca*

<sup>17</sup> Ohuemecotedeni, titohuideni ohuati huana tani. Jidapapi najaro ima nahatoto tinani. Najaro ima toja-jeraccadsama tetideni huatomanehe timadimanaji. Nema tiquinejeradsapi aja tabacorehe totonanadedeni poccadeni maidseheda tiadeni joca tanibaqquimanarana. Diodsa jehe tiquinanissa tajaro dacoraraha huere tijidsamanarana. <sup>18</sup> Naraha ia Medsede, ia Tonassijade Jesocristodsa tinocodeni tojidseranissa tanijinepi disseraqquri tidsanapomanaji. Pocca tohuati huaneheda ticcadeni madie tobica-dsanapoji. Jidapana, dsotode naqui pohnadsa etidseda: — ¡Bica tinani! ¡Deni tijani! –ihidsanapo nana, onajaro. Pajissa nema nana. Epejeni.

## Huanocca ima teppe tahidecca

### 1 Juan

Huanopa Jesocca dodosse tabaqqui ojaría. Ajijaro ima teppepi Jesodsa jehe quinajaridenidsa dsodo inajaro. Pohuadenidsa: —Occa ejedenissa tiquinajaro –najari. Huano dsodo inajaropi Diopa ssiaja tahi, Pohua Bedi Jesocristo naco imasiri cappirahi, najari. Pocca dsodoniji onhipi: Imecotedeni tedseje eti cahanerara cananina bica tani. Diodsa imadinissa tanijinepi imasiri jirehe imadina, najari.

Huanocca dsodonijipi 5 nani. Tahideccapi Jeso tahimari. Dsotodeccapi ajijaro ima teppepaji. Ima teppe onihi naqui dsodo inajaro. Dsotode ima teppe onihi dsodo inapomajaro. Dsotode jadahi tocajadsa naco Apocalipsis dsodo inajaro.

#### *Jesocristopa Dio Atti camittehecca*

<sup>1</sup> ¿Nija imecotedeni? Tiadenidsa Dio Atti camittehecca ima dsodo inajaro. Najaripa dsama toja-jeraccadsama madipojari. Jidapana naco madihi paja nahi. Iapi pohua atti imittade. Assire naco qqui inade. Pohuadsa jaijaridsadsa innocodsa qqui idsanapode. Idsepedsa naco huapi bara inade. Najaripa Dio Atti camittehecca. <sup>2</sup> Diopa najaro camittehe iadsa nohue inajarode. Najaro camittehe qqui inajaropi aji ecomeraridsajaropaji. Tiadenidsa naqui najaro camittehe jiquejeranicca tahimarinini huati inajaropaji. Najaro camittehepi Abi Diodsa anipojaro. Najaro iadsa ahuatojarode. <sup>3</sup> Nadsama aji qqui inajaro, imittajaro tiadenidsa huati inajaropi iadsa tijariqquimananijine. Pina ia Abi Diodsa ijariqquijarossa, Pohua Bedi Jesocristodsa naqui ijariqquijarossa tiquinanijine. <sup>4</sup> Aji ima dsodo inajaropi ticcadeni huatidsehe pajiranissa tanijine.

#### *Diopa ssiaja tahi*

<sup>5</sup> Aja Jesocristo ia mari tocanabaqquijaricca imaha aji tiadenidsa huati inajaropaji: Diopa ssiaja tahi. Pohuadsapi dsidsini nohuerani. <sup>6</sup> Ettipi: —Diocca iquejenani –ihinanaraha dsidsinidsa jaijaridsadsapi imajadsajaro. Pajissehe imittaraha najarossa inana-jerani. <sup>7</sup> Naraha ssiajanidsa jaijaridsadsapi pina Dio ssiaja taha madijarissa inanijine. Nadsapi imecotedeni tedseje ijariqquijaropaji. Dio Bedi Jesocristo emene naqui icca imasiri huapima inanamossi-dsanapojaro.

<sup>8</sup> Ettipi: —Imasiri ocappirani –inadsapi ia icamajadsa tani. Pajissehe iadsa nohuerani. <sup>9</sup> Naraha nahatoqquri inani: Diopa maidsera tahi. Pocca imapi toccanissa tajaro. Pohuadsa icca ima ecomeradsa: —Occa ima tabaccora tani. Imasiri ocajini –inadsapi Diopa icca imasiridsa: —Epejena, ohuadi-jerani –najari. Icca tabaccorehe sse inajaro. <sup>10</sup> Pohua Attipa: —Madijapa imasiri cajiridsamanajari –najari. Naraha ettipi: —Ohuapi imasiri ocappirani –inadsapi pina: —Diopa mamajadsade –inajarossa najaro. Nema inanadsapi ibodidsa Dio Atti nohuerani ahuato tani.

## 2

#### *Jesocristopa icca ima cacattemade*

<sup>1</sup> Ohuemecotedeni, tiadenipi occa ejedenissa tiquinajaro. Ajijaro ima tiadenidsa dsodo onajaro, imasiri tinanamana-jeranijine onadsa. Naraha imasiri tinanamana tani. Imasiri tinanamansapi ticcadeni ima cacattemadepa Abihuaji anihi. Najaripa Jesocristo. Pohuapa imari pajiranissa tajaro. <sup>2</sup> Aja Jesocristo itohui pohua ccaccoradsa dsocquejaripa icca tabaccorehe inanamossidsa Diodsa ibicanijine. Icca imasiri



manaconi tojajaripa ia motta ojari inanicca manaconi toja-jarahi. Madija dsama huapima madiridsamanajaridenicca imasiri manaconi tojajari pohuapa.

*Diocca dossenijidsa iboraqquiri inana*

<sup>3</sup> Diocca dossenijidsa iboraqquiri inadsapi nahatoqquiri inajaro: Pajissa Diopa iadsa jidsera tajari. <sup>4</sup> Naraha madija ohuaha attidenipa: —Diodsa nahatoqquiri inani –quinaraha Diocca dosseniji ecahuamana-jeradsapi maidsamanajari. Pajissehepi pohuadenidsa anijerani. <sup>5</sup> Madijapa Diocca dossenijissa inanamanajarodenina Dio Pohuadsa huatideni huanacquiri najari. Poccadeni tohuati huanehepi Diodsa pajiranissa tajaro. Ijine ima bicani nema nadsana nahatoqquiri inajaro. Pajissa iapi pocca iquejenajaro. <sup>6</sup> Madija attipa: —Diocca ojani –nadsapa pocca madie pina Jesocca madiessa nadsana bica tani.

<sup>7</sup> Ohuemecotedeni, titohuideni ohuati huana tani. Diocca dosseniji tiadenidsa dsodo onajaropi dsati jerani. Aji tahide timittamanapojarocca tiadenidsa dsodo onapomajaro. Pocca dosseniji anipojaropi: —Timecotedenidsa tetideni huanacquiri naji –najaro anijonajaropi timittamanani paji naccani. <sup>8</sup> Naraha aji jidapana tiadenidsa Diocca dosseniji dsodo onajaropi dsati. Najaro dossenijipi Jesocristodsa ahuato, iadsa ahuato tajaropaji. Dsidsinipi tohuatorajonani. Ssiajani pajissaccana tossiajaridsajonani.

<sup>9</sup> Madija attidenipa: —Iapi ssiajanidsa imadijaro –quiquinanaraha pohuadeni imecotedsa nacasseraqquiri nadsapa dsidsinidsa madimanahipaja naccajari. <sup>10</sup> Pohuadeni imecotedsa huatideni huanacquiri naha madimanadsana pajissa ssiajanidsa madimanajari. Ssiajanidsa madimanadsapa pohuadeni imecotedsa imasiri inanamana-jeranitohui. <sup>11</sup> Naraha pohua imecotedsa nacassera tajaripa dsidsinidsa madijari. Dsidsinidsa ccaridsajari. Pohua jahine ssamo tahi. Dsidsinijine pina nocco sirissa najari.

*Ajijaro dsamacca imasiri inebonicca ima*

<sup>12</sup> Ohuemecotedeni, occa ejedenissa tiquinajaro. Tiadenidsa dsodo onajaropi Jesopa ticcadeni imasiri manaconi tojajarijine Dio ticcadeni imasiri epeje inanajaropaji. <sup>13-14</sup> Jadahideni, tiadenidsa naqui dsodo onajaro. Aja Dio dsama inahatopo-jeraccadsama madijaripa Jeso pohuadsa tinoccodeni jidseraqquiri nani. Dsabis-sodeni, dsohuatodeni, tiadenidsa naqui dsodo onajaro. Dio Atti tibodidenidsa anijaro. Dacoraqquiri tiquinani. Aja Diocca huadi Satanapa ajamani tinanamanajari. Tiadenina deni tiquejenajaro.

Jehe ohuemecotedeni, tiadeni huapima Abi Diodsa nahatoqquiri tiquinani. Najaro aji tiadenidsa occa ima dsodo onajaropaji. <sup>15</sup> Ajijaro dsamacca imatohuira tetideni huanacquiri nejeraji. Ajijaro dsamacca innocodsa qqui inajarotohuipi tetideni huanacquiri nejeraji. Ajijaro dsamacca imatohuira timadimanadsapi ticcadeni ima ahuato tajaro: Diodsapi tetideni huanacquiri nejerani. <sup>16</sup> Ajijaro dsamadsa imadijarocca imapi ajima najaro: Aji timedenicca tohuini, aji tinoccodenidsa qqui tiquinajarocca tohuini, aji tettidenipi: —Odsepe sse tana. Ohuana deni ojana –tiquinajaro tohuini tiquinaraha najaro ima huapimapi Djoline jerani. Najaro huapimapi ajijaro dsamacca ima. <sup>17</sup> Naraha ajijaro dsamapi jicanitohui. Ajijaro dsama nemanehicca tabaccorehe tohuini quinahicca naqui jicanitohui. Naraha madija Dio Pohua tohuini nahiccara inanamanajarodenipa Pohuadsa madimanasanapohuitohui.

*Cristodsa huadiqquiri najarideni*

<sup>18</sup> Ohuemecotedeni, occa ejedenissa tiquinajaro. Dsama jicanicca huada tohuajirajonani. Cristo ccanibote nadsapa pohuadsa huadi tajari ccajonahitohui. Najaro imapi timittamanapode. Jidapana naco Cristodsa huadiqquiri najaridenipa

ahuatoma-ridsamanahi. Najaropi nahatoqquiri inani: Dsama jicanicca huada bacco tajaro. <sup>19</sup> Pohuadenipa iadsa quequeriqquimana naraha ia tonebobaqquijari. Pajissa iadsama Jesocristocca toquejenadsapa nassa iadsa quequeriqquimanasanapohuitoahiraha iadsa quejemamana-jaradsapa poccadeni ima iadsa ahuaato tajaro: Pohuadenipa imecote quejena-jarahi.

<sup>20</sup> Naraha tiadenipi pina pohuadenissa tiquinejerani. Cristo tiadenidsa Dio Corime da inaridsadsapa tibodidenidsa madijari. Najari Dio Corimejine Diocca pajissehe nahatoqquiri tiquinajaropaji. <sup>21</sup> Pajissacca ima tiadenidsa jidsera tadsapi aji tiadenidsa dsodo onajaropaji. Pajissehecca ima ssamoqquiri tiquinani onejerajaro. Tiadenipi nahatoqquiri tiquinani pajissehepi maidsehe jerani. <sup>22</sup> ¿Nejecojarina mamaisade? Aja madija atti: —Jesopa Cristo-Mesia jarahi —nanaridsa najarina mamaisade. Najaripa Cristodsa huadi tajari. Abi Diodsa: —Pajissa madihi —najarajari. Pohua Bedi Jesocristodsa naco: —Pajissa madihi —najarajari. <sup>23</sup> Nadsama aja madija attideni: —Jesopa Dio Bedi jarahi —quiquinanajaridenipa Dio jiraha mamadimana najari. Naraha aja madija attideni: —Jesopa Dio Bedi —quiquinanajaridenina Abi Diocca ejedeni toquejenajari.

<sup>24</sup> Jehe, Dio Bedi tahimari timittamanapode. Najaropi tibodidenidsa tecahuamananissa taji. Aji timittamanapojarrocca naqui tibodidenidsa aninipaji nadsapi Abi Diodsa, Pohua Bedidsa tijariqquimana-dsanaponitohui. <sup>25</sup> Jehe, najaropi Jesocristo toccamacossani-jaraccadsama iadsa huati tapojaride: —Ohuadsa tiquejenadsapi camittehe jiquejeranicca ticajimana-dsanaponitohui —nade iadsa.

<sup>26</sup> Ajijaro ima tiadenidsa dsodo onajaropi nahatoqquiri tiquinaponijine: Madija tiadeni tocamaisa-baqquimanahijine animanahi. <sup>27</sup> Naraha Jesocristopa tiadenidsa Dio Corime da inaridsajaripa tiadenidsa madihipaja nahi. Najaria aja tiadeni mari tocanabaqquijaripaja. ¿Nejecotohui madijacca marinaja onihi timittamananijine? Dio Corimena ima huapima tiadeni mari tocanabaqquijari. Pajissara huati huati tajari, maidsa-jarajari. Aja Dio Pohua Corime tiadeni mari tocanabaqquipojaricca marinajadsa disseraqquri tiquinaji, Cristodsa timadimana-dsanaponijine.

### *Diocca ejedeni iquejenajarocca ima*

<sup>28</sup> Ohuemecotedeni, occa ejedenissa tiquinajaro. Jidapapi Jesocristo pohuadsa timadimananissa dsanapoji. Nani nidsa Jeso pohua ccaronapomadsa tibodideni cappina-jeranijine. Pohua qqui tiquinadsa comehiqquri tiquinejeranijine. <sup>29</sup> Jesocristopa ima bicani pajiranissa inanajaro. Najaro pocca ima nahatoqquiri tiquinadsapi aja madija ima bicani pajiranissa inanamanadsapi Diocca madija toquejenahi nahatoqquiri tiquinajaro.

## 3

### *Diocca ejedeni iquejenajarocca ima denima aniccani*

<sup>1</sup> ¡Qqui! Abi Diopa itohui huati cahanari canajarijine madija iadsa: —Diocca ejedeni —quiquinanajari. Nadsapi pajissa pocca ejedeni iquejenajaro. Naraha ajijaro dsamacca madija huapimapa Diodsa noccodeni jidsaqquri napoja najaria iadsa naco noccodeni jidsaqquri najaripaja. <sup>2</sup> Ohuemecotedeni, titohuideni ohuati huana tani. Jidapapi Diocca ejedeni iquejenani. Naraha itedsejemacca ima denimapi ssamoqquiri inaccani. —¿Iapi pina nejecossa inapadseje? —inaraha najaro imapi iadsa ahuaato tejeraccani. Naraha ajijaro imana nahatoqquiri inajaro: Nidsa Jesocristo iadsa ahuatoni-pomadsa pohua qqui inahissa tadsapa iapi pina pohuassa inanitohui. <sup>3</sup> Nadsama aja madija attideni: —Jeso ahuatoni-pomadsapa pina pohuassa inanitohui —quiquinanajaripa pohuadeni cacahuamanahissa tajari,

bodideni huireqquiri nahijine. Pina Jeso pohua imasiri cappira, bodi huire tajarissa quinahijine.

<sup>4</sup> Naraha aja madija imasiri ihinanamana najaropi Diocca dossenijidsa iboqquiri najari. ¿Imasiripi nejecoma najaro? Imasiripi aji Diocca dossenijidsa huattajo inajaron a imasiri. <sup>5</sup> Naraha tiadenipi nahatoqquiri tiquinani: Aja Jesocristopa icca imasiri inajicanijine namihuaji ccaronajari. Pihuapa imasiri cappiraja najari. <sup>6</sup> Nadsapa pahuadsa madimanahissa tajaridenipa imasiri jiraha madimanajari. Naraha imasiridsa disseraqquiri najaridenipa Jesodsa noccodeni jidsaqquiri najari. Pahuadsa bodideni ssamoqquiri najari. <sup>7</sup> Ohuemecotedeni, occa ejedenissa tiquinajaro. Paji, madija ohuaha tiadeni tocamaisabaqquirana. Ima pajissapi ajima najaron a paji: Jesocristopa ima bicani ponira pajiranissa tehe cajijari. Aja madija ima bicani pajiranissa inanamanadsapi pina Jesojinessa inanamanajaro. Pahuadenipa Dio inapajirabaqquihissa tapoja najari. <sup>8</sup> Naraha madija imasiri totonanadedenipa Diocca huadi Satanacca madija. Satanapa tahide imasiri inanajonajaro a jidapana ajijaropaji. Najaricca tabaccorehe inajicanijine Dio Bedi ccaronajari.

<sup>9</sup> Nadsama Djojine dsati iquejenadsapi imasiri ihinana nejerajaropaji. Diocca daniji madie bicani icajijaro. Diocca ejedeni iquejenadsapi imasiri inanadsanaponijine ssamo tani. <sup>10</sup> —¿Nejecojaridenina Diocca ejedenideni? ¿Nejecojaridenina Diocca huadi Satanacca ejedenideni? —titiquina naraha nahatoqquiri tiquinanijinepi ajima najaron a paji: Madija ima bicani ihinanamana nejerajarodenipa Diocca ejedeni quejena-jarajari. Madija pahuadeni imecotedenidsa huatideni huaneraqquiri najarideni naco Diocca ejedeni quejena-jarajari. Najaridenina Diocca huadi Satanacca ejedeni quejenajari.

### *Eti cahanerara canana*

<sup>11</sup> Ajijaro marinajapi tahide mari mari quinapodsa timittamanajonajaro a jidapana timittamanani paji naccani. Najaropi eti cahanerara cananijinecca marinaja. <sup>12</sup> Iapi pina Caino huati huanera tajarissa inejerana. Cainopa Satanaccaja najari. Najaria aja pohua imecote inanadsoqquejaripaja. ¿Nejecotohui pohua imecote inanadsoqquejaritta? Pohua imecotepa pina Diocca dossenijissa inanadsapi ima bicani inanajaro. Naraha Cainopa pina Diocca dossenijissa inana-jeradsapi tabaccorehe inanajaro.

<sup>13</sup> Ohuemecotedeni, tiadenidsa ohuattipi ajima onajaro: Ajijaro dsamacca imadsa madimanajaridenipa tiadenidsa nacasseraqquiri nadsa huajo ticanire tejerana, onajaro. <sup>14</sup> Aji imecotedsa eti huana tadsapi icca ima ahuato tajaropaji. Iapi paji idsoqquerinicca dsoqquehe inebodsapi camittehe jiquejeraniccadsana imadijaro. Naraha aja madija pohua imecotedsa huati huanera tajaripa pina huatiahi madi-dsanapojarissa najari. <sup>15</sup> Nadsama aja madija pohua imecotedsa nacassera tajaripa pina pohua imecote inanadsoqquejarissa najari. Nadsama tiadenipi nahatoqquiri tiquinani: Aja madija pohua tesse inanadsoqquedsapa Diocca camittehe jiquejeran-icca pohua bodidsa nohueraha madijari. <sup>16</sup> Jesopa pocca madie iadsa eccoradsapi itohui dsoqquejaripaja. Najarojinea aji tohuati huanehe icahatterajaropaji. Nema nadsapi ia naqui imecotedeni tocassiejerahijinepa iana ia eccorani bica tani. <sup>17</sup> Tiadenidsa dsepe sse tajari ojaria aniraha pohua imecote cappirahi qqui tadsa acco icama-jaradsapa ¿pohua bodidsa Diocca tohuati huanehe cajico? Caji-jarahi. <sup>18</sup> Ohuemecotedeni, occa ejedenissa tiquinajaro. Iapi ettidsara eti huana tani ojari nejerana. Aji idsepe ijijaroma imecotedenidsa eti huana tana. Pajissa Diocca tohuati huanehe icajidsapi icca madiedsa ahuato inanana, onajaro.

### *Diodsa huatide icappina-jeranijine*

<sup>19</sup> Nadsama imecotedenidsa eti huana tadsapi pajissehe jinedecca iquejenani nahatoqquiri inajaro. Diodsa huatide naqui ibodi cappina-jeranijine. <sup>20</sup> Ibodipi

iadsa: —Imasiri ticajini -na tani. Naraha icappina-jerana. Ibodipi ajimani, Diona deni tojahi. Diopa ima huapima nahato tajari. Ibodicca ima naco nahato tajari. <sup>21</sup> Ohuemecotedeni, titohuideni ohuati huana tani. Ibodipi iadsa: —Imasiri ticajini -nejeradsapi Diodsa icappina-jerajaropaji. <sup>22</sup> Pohuadsa huati inadsa naqui icca huatinaja iadsa da da inajaropaji. Icca huatinaja iadsa toजारोपी पोका दossenijidsa iboraqquri ineje, Pohua jipa tajarissa inaneje najarojine. <sup>23</sup> Dio pocca dossenijipi ajima najaro: —Occa ejedeni Jesocristodsa jehe tiquinaji -najari. —Timecotedeni tedseje tetideni cahanerara canaji -najari iadsa. <sup>24</sup> Pocca dossenijidsa iboraqquri inadsapi pohuadsa imadijaro. Pohua naco iadsa madijaripaja. Aja Pohua Corime iadsa da inaridsajaripa najarijine Dio iadsa madihi nahatoqquri inajaropaji.

## 4

### *Mamaidsadedenidsa nahatoqquri tiquinanijine*

<sup>1</sup> Ohuemecotedeni, titohuideni ohuati huana tani. Madija tiadenidsa huati huati tadsa pohua attipa: —Ohuapi Dio Corimejine Dio Atti huati huati onajaro -nadsapa pohua attidsa pajissa tiquinejeraccadsa tinocodsamanaccao. —¿Pohua bodidsa Dio Corime anico? ¿Ani-jaraco? -titiquina nana. Madija mamaidsadepa dsama huapimadsa ijiridsahi. Pohuadeni attipa: —Dio Corimejine huati huati ihinanajaro -quiquinanaraha mamaidsamana najari. <sup>2</sup> Tiadenipi poccadeni ima nahatoqquri tiquinaji: Aja madija Dio Corime cajimanajari attidenipa: —Jesocristopa Dio Bedi. Pohuapa pina madijassa naha tossonajari -quiquinanajaridenina pajissehe cajimanajari. <sup>3</sup> Naraha aja Dio Corime cappiramanajaridenipa: —Jesopa Dio Bedi jarahi -quiquinanajari. —Pina iassa naha tossonajari -quiquinana-jarajari. Pohuadenipa Jesodsa huadiqquri najari. Pohuadeni bodipa pina Cristodsa huadi tajari bodissa quinajari. Nadsama aja Cristodsa huadi tajari ccajonahitohui quiquinanahipa timittamanapode. Jidapana naco pohuapa ajijaro dsamadsa madihi.

<sup>4</sup> Ohuemecotedeni, occa ejedenissa tiquinajaro. Tiadenipi Diocca tiquejenarajine mamaidsadedenidsa deni tiquejenani. Aja tiadenidsa Dio madijarina dacorajari. Ajijaro dsamacca madijapa ajamani toquejenahi. <sup>5</sup> Pohuadenipa ajijaro dsamacca imatohuira madimanajari. Nama quinajarijine ajijaro dsamacca imara huati huati totoquina najaripaja. Nadsapa ajijaro dsamacca madija Diocca quejenajarajidenipa poccadeni ima mittade jipaqquri najaripaja. <sup>6</sup> Naraha iapi Diocca iquejenajaro. Madija Diodsa nocco jidsera tajaripa icca marinaja mittajari. Naraha Diocca jarajaripa icca marinaja mitta-jarajari. Nama nadsapa iadsa ahuato tajari: Aja icca marinaja mittajaripa pohua bodidsa pajissehe cajijarijine pajissara huati huati tajari. Naraha icca marinaja mitta-jarajaripa pohua bodidsa maidsehe dacorajarojine maidsehera huati huati tajari.

### *Diodsa eti huana tadsapi imecotedsa naqui eti huana tanijine*

<sup>7</sup> Ohuemecotedeni, tiadenidsa ohuati huana tani. Iapi itessedeni tedseje eti cahanerara canaridsana. Tohuati huanehepi Diocca iadsa ccajonajaro. Tohuati huanehe cajimanajaridenipa Diocca ejedeni quejenajari. Pohuadenipa Diodsa noccodeni jidseraqquri najari. <sup>8</sup> Naraha tohuati huanehe cappiramanajaridenipa Diodsa noccodeni jidsaqquri najari. Diopa tohuati huanehe jinede. <sup>9</sup> Diopa iadsa huati huana tadsa pocca tohuati huanehe iadsa ahuato inanajaro. Najaria aja Pohua Bedi ojariraha namihuaji dosse inaronajari, icassiejeranijine. <sup>10</sup> Iapi Diodsa eti huanaqquri napo-jeraraha Diopa iadsa huati huana tadsa Pohua Bedi iadsa dosse inaronajari. Bedipa itohui pohua ccaccoradsapa icca imasiri manaconi toजारोपी. Najarona tohuati huanehe pajissacca.

<sup>11</sup> Ohuemecotedeni, titohuideni ohuati huana tani. Dio iadsa huati cahanari canad-sapa ia naqui itessedeni tedseje eti cahanerara canaridsana, onajaro. <sup>12</sup> Madijapa Dio qqui toquinaja cama-jarahi. Naraha eti cahanerara canadsana Dio iadsa madijari. Pocca tohuati huanehe iadsa anini ahuato tajaro. <sup>13</sup> Nadsama Dio Pohua Corime iadsa da inajarojine Dio iadsa madihi nahato, manaco Diodsa imadini nahato inajaropaji. <sup>14</sup> Aja Jeso innocodsa qqui inajari tahimari ijine ahuato tanijine inadsa pohua tahimari huati huati inajaropaji: Abi Diopa pocca Ejedeni dosse inaronajari, dsama huapimacca madija Tonassiajade tojahijine. <sup>15</sup> Nadsapa madija attia: —Jesopa pajissa Dio Bedi –najarina Diodsa madijari. Dio naco pahuadsa madijari.

<sup>16</sup> Diopa iadsa huati cahanari canahi nahatoqquiri inajaro. Najarodsa pajissa inajaro. Diopa tohuati huanehe jinede. Tohuati huanehema imadijaropi Diodsa imadijaro. Dio naco iadsa madiridsajari. <sup>17</sup> Pajissa imecotedenidsa eti huana tadsapi ajijaro ima nahatoqquiri inapojaro: Nidsa madija huapimacca ima cattemanijinecca huada bacco tadsapi Dio pocca quejena-jarajaridenidsa najidsohue inassonarinitohui. Naraha iapi icappina-jezanitohui. Nema inajaropi pina Jesocristo ajijaro namidsa madidsassa inajaro. <sup>18</sup> Tohuati huanehe anidsapi cappinehe nohuerani. Tohuati huanehe iadsa pajiranissa tadsapi ibodicca cappinehepi toqquena tani. Naraha Diocca najidsohue noppineni icappinadsapi Diocca tohuati huanehe iadsa pajiranissa tejeraccani ahuato tajaro.

<sup>19</sup> Aji Diodsa eti huanagquiri najaropi Dio Pohuana iadsa huati huana tapojari. <sup>20</sup> Naraha madija attipa: —Ohuapi Diodsa ohuati huana tani –naraha pohua imecotedsa nacassera tajaripa mamaisade. Najaripa pohua imecote pohua noccodsa qqui taraha Diopa qqui tajarajari. Pohua imecotedsa huati huanera tadsapa Dio qqui tajarajaria huati huana tahijinepa ssamo tajaripaja. <sup>21</sup> Ajijaro marinajapi Jesocristo ia mari tocanabaqquijaride: —Diodsa tetideni huanagquiri nadsapi timecotedenidsa naqui tetideni huanagquiri nana –najaride iadsa.

## 5

### *Ajijaro dsamacca imadsa deni iquejenajaro*

<sup>1</sup> Etipi: —Jesopa pajissa ia Idinide Cristo-Mesia –inadsapi Diocca ejedeni iquejenajaropaji. Iapi imehidsa eti huanagquiri nadsapi pocca ejedenidenidsa naqui eti huanagquiri najaropaji. <sup>2</sup> Diodsa eti huanagquiri nadsa pocca dossenijissa inanadsapi nahatoqquiri inajaro: Diocca ejedenidenidsa naqui eti huanagquiri najaro. <sup>3</sup> Diodsa eti huanagquiri nadsapi pocca dossenijissa inana tani. Pocca dossenijipi najo tejerani. <sup>4</sup> Diocca ejedeni iquejenadsapi iana deni iquejenajaro. Ajijaro dsamacca imapi ajimani tojani. Jesocristodsa jehe inanissa tadsapi iana deni iquejenajaro. <sup>5</sup> ¿Nejecojaridenina ajijaro dsamacca imasiridsa deni toquejenahijine nahatoqquiri najari? Aja madija: —Jehe, Jesopa Dio Bedi –quiquinanajaridenina paja.

### *Jeso tahimari ecomeramanani 3 najaro*

<sup>6</sup> Jesocristo ajijaro namidsa ccaronadsa pohua tahimari pajissa tojaridsajaro nahatoqquiri inanijinepi ima 3 nehe ahuato tajaro. Ima ojariepi passocca. Najaria Jesopa passodsa totopa cajijari. Naraha passocca ima ojari-jezani. Ima onihipi pohua emenecca. Najaria aja Jeso dsoqquedsa pohua emene toccajari. Ima onihipi naqui Dio Corime Jeso tahimari iadsa ahuato inanajarocca. Pahuapa pajissara huati huati tajari. <sup>7</sup> Nadsapi Jeso tahimari 3 najaro ecomeramanajaro. <sup>8</sup> Dio Corimesa nahatoqquiri inajaro. Jeso passodsa totopa cajijaricca naqui nahatoqquiri inajaro. Jeso dsoqquedsa pohua emene toccahicca naqui nahatoqquiri inajaro. Aji ima 3 najaropi najarossa naridsajaro. Jesopa Cristo-Mesia Dio Bedi. <sup>9</sup> Madija pohua



noccodsa qqui tajaricca ima huati tahi imittadsapi pohuadeni attidsa pajissa ina tani. Naraha Dio pocca ima iadsa ecomerajaron denima bica tajaro. Aji Dio iadsa ima ecomerajaropi pocca Ejedeni tahimari. <sup>10</sup> Dio Bedidsa pajissa inadsapi pocca ima ibodidsa madidsajaro. Naraha madija aja Dio Pohua Bedi tahimari huati huati tajaridsa pajissa quina-jaradsapa pina Diodsa maidsani huahua quinajarissa najari. <sup>11</sup> Aji iadsa Dio pocca ima ecomerajaropi camittehe jiquejeranicca iadsa da inajaro. Najaro camittehe jiquejeraniccapi Dio Bedidsana anijaro. <sup>12</sup> Dio Bedidsa iquejenadsapi camittehe jiquejeranicca icajini. Naraha Dio Bedidsa iquejena-jeradsapi camittehe jiquejeranicca icappirani.

*Huanocca ima jicanicca*

<sup>13</sup> —Jesopa pajissa Dio Bedi -tiquinajarodenidsa ajijaro ima dsodo onajaro, camittehe jiquejeranicca ticajimanani nahatoqquiri tiquinanijine. <sup>14</sup> Diodsa pajissa inanissa tadsapi ajijaro ima nahatoqquiri inajaro: Dio Pohua jipa tahicca Pohuadsa huati huati inadsapi pajissa icca huatinaja mittahi. <sup>15</sup> Nadsapi icca huatinaja mittahi nahatoqquiri inadsapi icca huatinaja icajini nahatoqquiri inajaro.

<sup>16-17</sup> Tabaccorehe huapimapi imasiri. Imasiri onihhi onihipi Dio epeje inananijine jipa tahi. Nadsapi timecote imasiri inanani qqui tiquinadsapi pohuatohui Diodsa huati huati titiquina naji, nahi Dio pocca imasiri epeje inanadsa pohuadsa camittehe da inanijine. Naraha imasiri onihipi Diodsa denima tabaccora tajaro. Najaropi Dio epeje inananijine jipera tahi. Madija najaro imasiri tonanadsa Diopa pocca imasiridsa epeje inana-jeranitohui. Nidsa pohua dsoqquedsapa najidsohue jiquejeranihuaji paja tojarahitohui. Timecote najaro imasiri aji Dio epeje inananijine jipera tahicca inanani qqui tiquinadsapi pohuatohui Diodsa huati tiquinaji onejerajaro.

<sup>18</sup> Naraha iapi nahatoqquiri inajaro: Aja Diocca ejedeni toquejenajaridenipa imasiridsa madimana-jarahi. Najaridenipa Dio Bedi ecahuabaqquijari, nahi Satana inajidsobaqqui-jarahijine. <sup>19</sup> Nadsama iapi Diocca ejedeni iquejeneje najaro ibodi nahatoqquiri inajaro. Naraha dsama nemanhecca madija motapa Diocca huadi Satana attidsara iboraqquiri najari. <sup>20</sup> Ima onihhi naqui nahatoqquiri inajaro: Dio Bedi iadsa ccaronajaripa ibodidsa tohuatehe da inajarojinea Diopa iadsa jidsera tajaripaja. Diopa pajissa ojari najari. Pohuana Dio. Iapi najaridsa imadi-dsanapojaro. Iapi pocca Ejedeni Jesocristodsa imadijaro. Najarina pajissa Dio Pohua ia Cacahuade. Najaripa camittehe jiquejeranicca jinede. <sup>21</sup> Ohuemecotedeni, occa ejedenissa tiquinajaro. Paji, siba nahatonidsapi: —Ia cacahuade -tiquina tejeraji. Aja Diodsara: —Ia Cacahuade ojarihi -tiquinaji, onajaro.

## Huanocca ima teppe dsotodecca 2 Juan

Jesocca dodosse tabaqqui Huanopa pohua imecotedeni Jesodsa jehe quinajari-denidsa dsodo inapomajaro. Pohuadenidsa: —Ia huapimapi eti cahanerara canana -najari.

Ima onihi naqui dsodo inajaro, aja mamaisadedenicca maidsehedsa pajissa quina-jarahijine.

### *Diocca pajissehe icajidsapi eti cahanerara canajaropaji*

<sup>1</sup> ¿Nija ohuemecotedeni? Ohuapi Jesodsa jehe quinajarideni cacahuade ojani. Dio Attidsa titiqueriqqui najarodeni huapima Diocca tocattejidsabaqquinaja tiqiejenajaro. Diocca pajissehedsa iquejenajarojine tiadenidsa ohuati huana tajaro. Ohua ojari onejerani, aji ia huapima Diocca pajissehedsa nahatoqquiri inajaropi tiadenidsa eti huanacquiri najaropaji. <sup>2</sup> Diocca pajissehe ibodidsa anijarojinea tiadenidsa eti huanacquiri najaropaji. Pocca pajissehe ibodidsa anidsanaponitohui.

<sup>3</sup> Abi Dio, Pohua Bedi Jesocristo tedseje tiadenidsa ima bicani inanana. Poccadeni tohuati huanehe, poccadeni jonehe naqui tiadenidsa inanaridsana, onajaro. Nadsapi Diocca pajissehedsa timadimanadsapi timecotedenidsa tetideni huanacquiri nehe timadimanijine.

<sup>4</sup> Ticcadeni madija mota Diocca pajissehedsa madimanahissa tahi qqui onadsapi ohuatidsejaro. Poccadeni ima nema nadsapi pina Abi Dio ia tocadossebaqquijarissa quinajari. <sup>5</sup> Ohuemecotedeni, titohuideni ohuati huana tani. Jidapapi tiadenidsa huati onana, ohuattissa tinanamananijine. Ia huapimapi eti cahanerara canana, onajaro. Najaro marinajapi dsati jerani, aji Jesocristocca ima icahatterapodsama najaro marinaja imittapode. <sup>6</sup> Tohuati huanehepi ajima najarona paji: Pina Diocca dosseniji huapimassa inanaridsajarona paji. Dio pocca dosseniji timittamanapodsama pocca tohuati huanehema timadiridsa-manaji.

### *Maidsehe mamaridedenicca ima*

<sup>7</sup> Naraha ajijaro dsamadsapi mamaisade caji taridsahi. Pohuadenipa: — Jesocristo Diodsa madipojaripa pina madijassa naha tossona-jarahi -quinajari. Madija nama najaripa mamaisade tojjari. Najaripa Cristodsa huadi tajari. <sup>8</sup> Paji, mamaisadedenipa tiadeni tocamaisabaqqui-manarana. Poccadeni imadsa pajissa tiquinadsapi aji Diodsa tidsepedeni ijimanajarocca manaconipi pocca daniji bica tanicca ticajimana-jerarana, onajaro. Naraha pina Jesocristocca marinajassa najaro ima bicanira tinanaridsamanadsana nidsa Diodsa tidsepedeni ijimanajarocca manaconipi Diocca daniji bica tanicca tiadenidsa tojanissa tanitohui.

<sup>9</sup> Naraha madija: —Iapi denima nahatoqquiri inani -quinajaridenipa Jesocristocca marinajadsa poccadeni ima inaharimana tani. Jesocristocca marinaja nebomanadsapa pohuadeni bodidsa Dio madidsa-jarahi. Naraha madija Jesocristocca marinajassa inanamana-dsanapodsapa pohuadeni bodidsa Dio madidsajari. Pohua Bedi naco pohuadeni bodidsa madidsajari. <sup>10</sup> Nadsama tiadenihuaaji madija bacco najonadsa marinaja onihi pina Jesocristocca marinajassa nejerajaro mari mari nadsapa pohuadsa: —¿Nija, bica tinaqui? -tiquinejeraji. —Occa odsadsa tiqquedsimaji -tiquinejeraji. <sup>11</sup> Aja madija nama najaridsa: —Nija, tiqquedsimaji -tiquinadsapi pina pohua acco ticamamanajarissa tiquinajaro. Pocca tabaccorehedsa naqui tiqiejemamanajaro.

—Tiadeni qquide occana -najari Huano

<sup>12</sup> Ima onihi onihi tiadenidsa dsodo onanitoahiraha ajiaro ima teppedsa dsodo onejerani, onajaro. Nidsa tiadeni qquide occana, onajaro. Nadsana tiadeni qqui onabaqquidsana occa ima tiadenidsa huati onanitoahui. Nadsana icatidserara cananitoahui, onajaro.

<sup>13</sup> Timecotedeni ahuajicca Dio Attidsa totoqueriqqui najarideni, pina tiadenissa quinajari Diocca tocatteljidsabaqquinaja toquejenajari tiadenidsa nija quinajari. Epejeni.

## Huanocca ima teppe dsotodemanicca

### 3 Juan

Jesocca dodosse Huanopa pohua tesse Caiodsa dsodo inajaro. Caiona Jesocristo tahimari maridedeni acco icamabaqquidsapa pohuadsa: —Tijine ohuatidseni –najari Huano. Mamaridedeni denima acco ticamabaqquidsa Dio Atti denima mari mari naridsamanahitohui, najari.

Ima onihi naqui dsodo inajaro, aja madija oni Diotrepecca ima bica tejerani naraha madija ohuaha Demetriona ima bicani inanajaro, najari.

#### *Caiocca imapi bica tajaro*

<sup>1</sup> ¿Nija Caio? Otesse bica tinade, tiadsa dsodo onajaro. Ohuapi Jesodsa jehe quinajarideni cacahuade ojani. Diocca pajissehecca imadsa jehe tadsapi tiadsa ohuati huana tajaro.

<sup>2</sup> Jehe ohuemecote, tiadsa ohuati huana tani. Titohui Diodsa huati huati onajaro. Diodsa jehe tanissa tadsapi ohuatidsejaro. Ticca madeicca ima huapima naqui toc-canissa tanijine Diodsa huati huati ohonanajaro. Nomi tinehe timadi-dsanaponijine naqui Diodsa huati huati ohonanajaro. <sup>3</sup> Jesodsa toquejenajarideni ahuaji bacco najonamanadsa ticca ima huati najonamanadsapa ohuatidsejaro. —Imecote Caiopa Diocca pajissehedsa dissera tahi –quinahi ima omittajarojine ohuatidsejaro. <sup>4</sup> Jehe Caio, tiapi pina occa ejedenissa tajaro. Jesodsa toquejenajari pina occa ejedenissa quinajaridenipa pajissehedsa madimanahissa tajari ima omittadsapi ohuatidseri najaro. Huatidsehe onihi aniraha ajijaro huatidsehena ohuadsa denima bica tajaro.

<sup>5</sup> Ohuemecote, tiadsa ohuati huana tani. Jesodsa toquejenajarideni acco acco titicamabaqqui nadsa tijine ima pajiranissa tajaro, pina Diocca dossenijissa tinanajaro. Imecote huaji tanihuaji madimanajarideni Jesocristo tahimari mari mari nanaridsamana najaridenidsa tinocco jidsa taraha tiahuaaji bacco bacco toquinadsa pohuadeni acco acco titicamabaqqui nadsapa tijine bica tani. <sup>6</sup> Najarideni icca Dio Attidsa ihiqueriqqui nanihuaji ticca ima huati nanimanajari: —Caiopa iadsa huati huana tajari –nanimanajari. Nadsapa pohuadeni tiahuaaji bacco toquinapomadsapa poccadeni benehi denima jai tojapomahijine acco ticamabaqquipomana. Cappiramanahicca pohuadenidsa da tinadsapi Dio jipa tajari. <sup>7</sup> Aja pohuadenipa Jeso tahimari madija mittaridsamanahijine maride jai tojajari. Naraha Diodsa jiperaqquri najarideni naco —Mamaridedeni acco icamabaqquina –quinaraha mamaridedenipa poccadeni danijidsa: —Jehe, iadsa –quina-jarajari. <sup>8</sup> Naraha ia Jesocca iquejenajarona pohuadeni acco icamabaqquihijine bica tani. Nadsana icca danijijine najari mamaridedeni Diocca pajissehe denima mari mari naridsamanahitohui, onajaro.

#### *Diotrepecca imapi bica tejerani, naraha Demetriocca imana bica tajaro*

<sup>9</sup> Ohuapi Dio Attidsa titiqueriqqui najaro tiadenidsa ima dsodo onaporaha madija oni Diotrepepa occa imadsa jehe najarajari. Pohua bodipa: —Ohuana ajararideni dossede ojani –nanaja najari. Naraha bica tejerani. <sup>10</sup> Diotrepe pohuajine ima nema nadsapi nidsa nanihuaji bacco onadsa pohuadsa huati onanitohui, onajaro. Ajana, pohuapa maidsehe huati huati naridsadsapa iadsa ima inanadsanapojaro. Denima ima inanadsa naqui, imecotedeni huaji tanihuaji madimanajari pohuadsa bacco bacco totoquina naraha Diotrepe attipa pohuadenidsa: —Nija, jai tijedsimaji –nanaja najarajari quinade. Dio Attidsa quequeriqqui nahihuaji bacco toquinadsa naco nahihuajicca imecotedeni motapa: —Jehe, iadsa jahidsimana –quinaraha

Diotrepepa pohua tessedeniraha pohuadenidsa huadi tajari. Pohua atti: — Tiadenipi pohuadenidsa: “Iadsa jai tijedsimaji” tiquinejeraji. Nema tiquinadsapi tiadeni naqui icca Dio Attidsa ihiqueriqqui nanihuaji tiquejemamana tejeraji –nadsa ettajobaqquijari.

<sup>11</sup> Ohuemecote, tiadsa ohuati huana tani. Pina aja Diotrepecca tabaccorehessa najaropi tinana-jerana, onajaro. Dio jipa tahiccara tinanana, onajaro. Jehe, madija ima bicani tonanajaripa Diocca tojahi ahuato tahi. Naraha madija tabaccorehe tonanajarina Diocca toja-jarahi ahuato tahi, onajaro. <sup>12</sup> Aja ima bicani tonanajari ojaria onipa Demetrio. Madija huapima attidenipa: —Demetriopa madija bica tahi –quiquinanajari. Pohua bodidsa pajissehe cajijari ahuato tajaro. Ia naqui: — Demetriopa bica tahi –ihinanajaro. Iapi ima pajissa huati huati inajaro nahato tinani.

—*Occa dsodoniji tiadsa jicani –najari Huano*

<sup>13</sup> Ima onihi onihi tiadsa dsodo onanitohuiraha ajijaro ima teppedsa dsodo onejerani, onajaro. <sup>14</sup> Nidsa tia qquide occana, onajaro. Onajo-jeranitohui. Tia qqui onadsana occa ima tiadsa huati onanitohui.

<sup>15</sup> Jehe, Diocca jonehema timadi-dsanapoji.

Itessedeni huapima ajadsa madimanajarideni tiadsa nija quinajari. Tia naqui itessedeni nahihuaji madimanajarideni huapimadsa nija taridsana, onajaro.

Epejeni.



## Jodacca ima teppe Judas

Joda Satiacodenipa ia Medsede Jeso ohuahadeni. Ajijaro ima teppepi Jodana Jesocristodsa toquejenajaridenidsa dsodo inajaro. Pohnadenidsa: —Paji, tabacco-raqquri najarideni tiadeni tocamaidساباqqui-manarana -najari. Poccadeni jeheniji dacoranijine naqui pohnadenidsa dsodo inajaro.

### *Joda nija najari*

<sup>1</sup> ¿Nija ohuemecotedeni? Ohuapi Joda, Satiaco imecote ojani. Ohuapi Jesocristodsa odsepe ijijaro. Ajijaro ima teppe tiadenidsa dsodo onajaro. Abi Dio tiadenidsa huati huana tadsapa tiadeni huahua tabaqqujari, Jesocristodsa tiquejenanijine. Jesocristopa tiadeni Cacahuade tojajari. <sup>2</sup> Diopa tiadenidsa bica dsanapona. Pocca jonehe, pocca tohuati huanehe naqui denima tiadenidsa tojadsanapona, onajaro.

### *Maidsehe mamaride tahimarideni*

#### *2 Pedrocca 2.1-7*

<sup>3</sup> Ohuemecotedeni, titohuideni ohuati huana tani. Jesocristocca tossiejehe ia huapimadsa da inaridsajaro tahimarini tiadenidsa dsodode jipa onaraha ima onihi anidsapi najaro imara tiadenidsa dsodo onajaro. Dio pocca marinaja pajissacca iadsa da inajaropi nema dsanaponitohui. Najarodsa icassiejeranijine. Aji Jesocristodsa iquejenajaropi najaro marinajadsa pajissa inajaro. Najaro marinaja tecahuamananissa taji. Najarodsa ima onihi inaharinijine bica tejerani. Madijajine cacajiqquimera-jeranijine dacoraqquri tiquinadsa poni tiquinaji, onajaro. <sup>4</sup> Ohuatti nema onajaropi ssamoqquri tiquinaraha madija tiadenidsa jai tojedsimajaripa pina titededenissa quinaraha tiadeni tocamaidساباqqui-manajari. Najaridenipa tabaccoraqquri najari. Attidenipa: —Diopa iadsa huati huana tahi. Icca tabaccorehe manaconi ia tonajidsobaqqui-jarahitohui. Ia tohuini inanicca inanani oppinera tani -quiquinanajari. Najaridenipa ia Maride, ia Medsede Jesocristo ojari najaridsa huattajoqquri najari. Diopa najaridenidsa najidsohue oppina tanicca inanajorajaro. Najaro imapi maittaccadsama Dio Atti dsodo napojarodsa dsodo quinapojaro.

<sup>5</sup> Diopa pajissa madija inajidsobaqqui tahi nahatoqquri tiquinaporaha tibodideni huatoma-mananijine tiadenidsa huati onapomajaro. Maittaccadsama Isaraeri potemahidenipa dsama Ejitocca madijadenijine nanajidso toquejena-dsanaporaha ia Medsede Dio idinibaqquidsa dsama onihihuaaji iaccanibaqqujari. Naraha dsotode potemahideni motapa: —Pajissa, Diopa ia Cacahuade -quina-jaradsa Dio Pohnana inajicabaqqujari quinade. <sup>6</sup> Dio pocca dodosse tabaqqui memehuaajicca mota naco pocca najidsohue tonahanamanajari quinade. Tahide Dio Pohna inoridsa huapima madimanadsapa cacahuehe cajimanapojari. Naraha motadenipa poccadeni cacahuehe Diocca danijiraha pohnadenidsa pina ponimassa nadsa inebomanajaro. Nadsapa Dio Pohnajine cadenadsa bijideni jore naha dsidsini oppinabotedsa madimanajari. Nama dsanapomanadsapa nidsa madija huapimacca ima cattemanijinecca huada bacco toquinahijine. Nadsana najidsohue denima oppina tanicca cajimanahitohui. <sup>7</sup> Najaro imassa najaro naqui odsa panani Sodomacca madija, Comoracca madija, nahi huajira tanicca odsa panani bedeni caji taridsajarocca madija huapimapa tabaccoraqquri najari. Huananehe onihi onihidsa disseraqquri najari. Huananehe jidsa, oppina tanicca naqui inanamanajaro. Nama quinadsapa Djotine jororoni jicaquera tanicahuaji madimanajari. Poccadeni imadsapi dsotodedenicca

bodideni huatoma-manahijine. —Paji, iadsa naco nama narana –quinahijine, onajaro.

<sup>8</sup> Diocca najidsohue madija imasiri tonanamanajaridenidsa ssonarini ahuato taraha tiadenidsa jai tojedsimajaridenipa nama naha poccadeni tabaccoreheda disseraqquri najari. Pohnadenipa: —Icca huadadsa qqui inajarossa inanani bica tani –quiquinanadsa najarossa inanamanajaro. Poccadeni huananehe, poccadeni tabaccorehe onihi onihidsa pohnadeni assire inatabaccoramanajaro. Ia Medsede Diodsa, pocca dossenijidsa naco huattajoqquri najari. Diocca dodosse tabaqqi memehua-jiccadsa naco tatamasso quiquinanajari. <sup>9</sup> Naraha Diocca dodosse tabaqquidenicca tamine Miqueopa nama najarahi. Maittaccadsama Moisesi dsoqquedsa Diocca huadi Satanapa Moisesi assire accone Miqueo tedseje cahadiredsapa ahuaji huati, ahuaji huati quinajari. Naraha Miqueopa Dio noppine cappinadsa Satanadsa tatamasso najarajari. Pohna atti ajima najarora huati tajari: —Ohua Medsede Diona tia najidsohuitohui –najari nade Miqueo. <sup>10</sup> Naraha mamaisadedenipa ima mittamanahissa tajaradsapa najaro imadsa attideni tabaccora tadsa atti quinajari. Pina banidenissa quinajari. Bodideni huatohuijine ssamoqquri nadsa pohnadeni tohuini quinahicca tohuira disseraqquri najari. Najarojinena pohna pohnadeni tonatabaccora-manajari.

<sup>11</sup> ¡Jaho, najaridenipa huahuattajo toquejenahitohui! Pohnadenipa pina maittaccadsama Cainocca ima tabaccora tapojarossa inanamanajaro. Dsinirotohui naco disseraqquri nadsapa pina maittaccadsamacca Dio Atti cacomerabote Baramissa quinajari. Poccadeni ibohuejine pina maittaccadsama Core pocca madijama jicaporarissa quinahitohui.

<sup>12</sup> Timecotedeni tedseje tetideni cahanerara canadsa titijipaqqumana naraha tiadenidsa mamaisadedeni quejemamanadsapa pohnama huatidsede, jipade, dsede tohuira quinajari. Diodsa cappineraqquri, tiadenidsa cappineraqquri nadsapa pohnadenijine ticomehimanajaro. Pohnadenipa pohnadenidsara bodideni huatohui ojari najari. Pina meme essenii passo ccani jirehe jojodejine ponima toqqueqqumajarossa, pina ahua bononora tajarissa quinajari. Pohna bonohuicca abadsico bacco tocanaraha bono-jarajaripa huatiajarissa najari. Pina jaboma dsoppa jeo nadsa huatiajarissa quinajari. <sup>13</sup> Pohnadenipa coridsa imenicca passo jojodejine jadsirema ssoda ssoda najarossa quinajari. Poccadeni tabaccorehepi pina ssabojani ssiquihuaaji tojadsa ahuato tajarossa najaro. Pohnadenipa pina abadsico bedi jano tocajadsa dsidsini oppina tanihuaaji tocajajarissa dsanapomanajari.

<sup>14</sup> Maittaccadsama Adana potemahi 7'cca Enoco naco Djojine mamaisadedeni tahimari huati tapojari. Pohna attipa:

—¡Ticattomama canaji! Ia Medsede pocca dodosse tabaqqi memehuaajicca sibema pohnadsa jahironahi qqui onahi. <sup>15</sup> Pohnapa madija huapimacca ima cattemade tojahijine ccaronajari. Huapima tabaccoraqquri najaridenicca imasiri manaconi pohnadenidsa najidsohue inassonarinitohui. Aja Dio Pohnadsa attideni tabaccora taniccadsa atti quinajari manaconipi ia Medsede inajidsobaqquihitohui –nahi nade Enoco.

<sup>16</sup> Mamaisadedenipa huapima pohnadenidsa ocassera tadsapa atti atti nanarid-samana najari. Madijadsa naco ssamoni hua quinaja naridsapohui najari. Attideni dacoradsa pohnadeni deni totonanamana najari. Pohnadeni tohuini quinahicca tohuira mamadimana najari. Tohui quinahicca cajimanahijinepa madijadsa attideni bica tadsa huati huati toquinadsa pohnadenidsa totoja najaro.

### *Jodacca marinaja jehe quinajaridenidsa*

<sup>17</sup> Naraha tiadenipi pina mamaisadedenissa tiquinejerani. Ohuemecotedeni, titohuideni ohuati huana tani. Aja ia Medsede Jesocristocca dodosse tabaqqi

tiadenidsa huati toquinapohuicca tetideni ajima tejerana. <sup>18</sup> Attidenipa: —Dsama jicabote nadsapi madija attideni tabaccora taniccadsa jijidsade caji tahitohui. Najari-denipa tabaccorehe tohuira madimanahitohui –quinade tiadenidsa. <sup>19</sup> Najaridenijine ticahadirere cananitohui. Pohuadeni tohuini quinahicca tabaccorehe tohuinira bodideni huahuato najari. Pohuadenipa Dio Corime cappiramanaja najari.

<sup>20</sup> Naraha tiadenipi nema tiquinejeraji. Ohuemecotedeni, titohuideni ohuati huana tani. Dacoraqquiri tiquinadsa ticcadeni jeheniji bicani poniradsa disseraqquiri tiquinaji. Dio Corime tibodideni acco camadsa Diodsa huati huati titiquina nana, onajaro. <sup>21</sup> Diocca tohuati huanehema tiadeni tecahuamananissa tana. Ia Medsede Jesocristopa itohui huati cahanari canadsa iadsa camittehe jiquejeranicca da inanitohui. Najaro ima tohuira timadimana-dsanapoji, onajaro.

<sup>22</sup> Timecotedenicca jeheniji japari tajarodenidsa tetideni huanacquiri nana. Bodideni acco ticamabaqquimanadsapa poccadeni jeheniji todacorani nanijine. <sup>23</sup> Madija ohuahadeni najidsohue jiquejeranihuaji toquejenaraha tocassiejerahijine acco ticamabaqquimanajo. Pina dsippo jororo cananidsa madija ssonidsanaraha tidimoranimanadsapa dsori tinanamanajarissa tiquinaji. Madija ohuahadeni naco poccadeni tabaccorehedsa disseraqquiri nadsapa ticcadeni tohuati huanehema acco ticamabaqquimanana. Naraha paji, poccadeni tabaccorehe tiadenidsa dsapa tejeranijine tiadeni tecahuamananissa tana. Poccadeni tabaccorehedsa jiperaqquiri tiquinaji, onajaro.

*Jodapa jicanicca dsodode tojadsapa Diodsa huatidsejari*

<sup>24</sup> Diopa pajirahi. Icca jeheniji tossamo-jeranjine ia tohuacahuabaqquid-sanapojari. Pocca dacorehejine Pohua ssiejene bicabotedsa huireqquiri inehe idomo huadsapi huatidsehe imeni icajinitohui.

<sup>25</sup> Nema nadsapi ia Tonassiajade Diodsa etidsena. Diopa ojarihi. Ohuaha nohuerahi. Ia Medsede Jesocristojine icassiejerajaropaji. Dio Pohuadsa: —Icca Tamine bicabote deni tijani, daco tijirani –inajaro. —Huapima Dossede tijajaro. Tiapi tahidedsama nema tajonajaroa jidapana nema tani paji nani. Nema tidsanaponitohui –inajaro Diodsa. Pajissa nema nana. Epejeni.

## **Jesocristopa Huanodsa itedsejemacca ima ahuato inanajaro Apocalipsis**

Jesocca dodosse Huano jadahi tocajadsapa dsama bedeni onini Patimo passo imenidsa huittidsacossajarodsa madijari. Aja Romanodenicca tamine Jesocristo tahimaridsa jipera tadsa Huano dama inadsa Patimohuaji dosse inajari. Nahi Patimohuaji madijaripa pina toponi cocorodsa huedsajarissa najari. Nahidsa madidsapa pina pocca huadassa nadsa Dio Corime itedsejemacca ima pohuadsa ahuato inanajaro. Nadsapa Huano pohua qqui tajaricca dsodo inajaro.

Ajijaro imapi Jesocristodsa jehe quinajaridenidsa dsodo inajaro. Motapa Romanodenicca nanajidso toquejenajari. Motapa tojicajari, mota tocassiejerajarideni ajijaro ima mittamanadsapa poccadeni jeheniji todacorani nanijine pohuadenidsa dsodo inajaro. Ia naqui Romanodenicca nanajidso iquejena-jeraraha ajijaro ima imittadsapi icca jeheniji todacorani nanijine pajirani.

Ajijaro imapi Djojine Huanodsa ahuato inanajarocca imittani. Jeso ccanibote nadsapa ajijaro dsamadsa tojaridsa-ponijinecca ima dsodo inajaro. Dsama jicanicca naqui ima dsodo inajaro.

Huano qqui tajaripa bica tanicca, oppina tanicca, jidsa tanicca, ijabojo nanicca. Pohua qqui tajari huapimapi jidsa taraha ima deni tojanicca cajini.

Ajijaro imadsapi Jesodsa: Edede Bedi, najari. Pohuadsa nama najaripa tahide jodiodeni poccadeni imasiri manaconi edede bedi Diodsa da da quiquinanapojari. Jesopa huapimacca imasiri manaconi tojadsa pohuadsa: Edede Bedi, nanaja najari Dio.

Ajijaro imadsapi Diocca huadi Satanapa ajamani tojahi ahuato tajari. Jesona deni tojajari. Pohuana huapimacca tamine tojadsa memecca namicca dossede tojajari.

*Jesocristojine Huanodsa jidapanacca ima ahuato, nidsa dsotodecca ima ahuato inanajaro*

<sup>1</sup> Diona Jesocristodsa itedsejemacca ima ahuato inanapojaro. Manaco Jesocristopa pocca medsedenisda ahuato inananiijine. Ajijaro ima iadsa ahuato inananiijine Jesocristo pocca dodosse memehuajicca dosse inaronadsapa ohuadsa huati tajari. Pohuajine qqui onajaro. Ohuapi Huano, Jesocristocca medse ojan. <sup>2</sup> Aji huapima ohua qqui onajaropi pajissa huati onajaro. Aji dsodo onajaropi pajissa Dio Atti Jesocristojine ohuadsa ahuato inanajaro.

<sup>3</sup> Ajijaro ima Djojine ahuato tajarocca madija huapima mittamanahijine hua hua najaripa huatidsehema madihitohui. Mittamanajarideni naco aji dsodo naniccassa inanamanajarodeni naco huatidsehema madimanahitohui. Djojine ahuato inana-jaropi tohuajirajonani.

*Huanopa Jesocristodsa quequeriqquimana najari 7 najarodsa dsodo inajaro*

<sup>4</sup> Ohuapi Huano. Ajijaro occa imapi aji Asiahuajicca odsa panani 7 nanihuajji Jesocristo tahimaridsa titiqueriqquimana najarodenidsa dsodo onajaro. Diopa madihi. Nadsama madipojari. Nidsa ccajonahitohui. Ccajonadsapa tiadenidsa ima bicani inanaridsana. Pocca jonehe inanaridsana, onajaro. Dio Pohua dosse dosse nanaja nahicca huihuittari tadsajanima Pohua Corime 7 quinaha domo huajari-deni naco tiadenidsa ima bicani inanaridsamanana. Poccadeni jonehe tiadenidsa inanaridsamanana, onajaro. <sup>5</sup> Jesocristo naco tiadenidsa najarossa inanaridsana, onajaro. Pohuapa Dio Atti nahato tadsa pajissara huati huati tajari. Pohuana tahide

nahatonipojari. Puhuapa dsama huapimacca tamine deni tojajari. Huapimadsa dosse dosse najari. Jesocristo iadsa huati huana tajari. Imasiridsa imadiraha pohua emene toccajarojine icca imasiri inajicaridsajaro. <sup>6</sup> Puhuajine pocca cacahuanijidsa iquejenajaro. Puhuajine pocca Abi Diodsa idsepe ijijaro. Diodsa dada toqquimade, huahuati toqquimade iquejenajaro. Nadsapi Jesocristodsa etetidse nana. ¡Puhuapa bica tahi, deni tojahi! Pocca nahatonaja huapima ecahuadsanaponijine pocca deni tojehe pajiranissa tajaro. Apaja puhuapa nama dsanapohuitohui, inana, onajaro. Pajissa nema nana.

<sup>7</sup> ¡Ticattomama canaji!

Jesocristo meme essenima ccaronahi qqui tiquinahitohui.

Madija huapima qqui toquinahitohui.

Aja Jesocristo pohua nanadsoqquededeni naco qqui toquinahitohui.

Dsama huapimacca madijapa pahuatohui oji oji quinahitohui.

Jehe, pajissa nema nana.

<sup>8</sup> Ia Medsede Dio Attipa: —Ohuapi Dio Dacorabote. Tahidedsama omadipojaroa aji jicaqquini bacco onanitohui –nade ia Medsede attipa. Puhuapa madihi. Nadsama madipojari. Nidsa ccajonahitohui.

### *Huanodsa Jesocristo ahuatajari*

<sup>9</sup> Ohuapi Huano timecotedeni ojani. Titedsejedeni Diocca cacahuehedsa iquejenajaro. Madija Dio Attidsa jiperaqquri najaripa ia totonajidso-baqquimana najari. Naraha Jesocristojinepi ima inahananijine ipajirani.

Ohuapi passo nocconidsa dsama huittidsacossani Patimodsa ohua inebomanadsapi pina toponi cocorodsa ohuedsajarossa najaro. Dio Atti maride ojaridsadsa, Jesocristo tahimari ohuaccora-ridsadsapi Pahuadsa jiperaqquri najaridenijine todsepe ojajaro. <sup>10</sup> Ia Medsedecca huada domingodsa Dio Corimecca dacorehe ohuadsa ahuatomadsa mohuini dacorehema ohuedehuaji omittajaro. Atti mohui pina jejiei mohui dacorajarissa nadsa omittajaro. <sup>11</sup> Atti ajama najari: —Ajijaro huapima tiadsa nohue onajaropi papeodsa dsodo taji. Aji dsama Asiahuajicca Jesocristodsa quequeriqquimana nahi 7 naridsajarodsa ima dosse tinaridsanijine. Odsa panani Epesohuaji, Esmirnahuaji, Peacamohuaji, Tiatirahuaji, Saradisiohuaji, Piradeopihahuaji, Laodiseahuaji dosse tinaridsaji –nade atti mohui tadsa. <sup>12</sup> ¿Nejecojari atti? onadsa piti onahuajanidsa qqui onanaja jojororo pinine dsibehi tajari orocca 7 quinaha qqui onajari. <sup>13</sup> Qqui onanaja jojororo pinine cacahueri nahi nocconidsa pina madija bedissa naha hua canajari. Pocca etero dequerajaro amoridsa bacco tajaro. Puhua biji mete ssooque dsibehi tajaro pina orossa najaro. <sup>14</sup> Tati conepi nopo tajaro. Pina edede bedi nopenhui conessa, pina ssono tetepinicca ssirini nophonissa najaro. Puhua noccopa pina dsippo jororonissa najaro. <sup>15</sup> Puhua amori naqui dsibehi tajaro. Pina ccara tahicca onini bronco dsippo ppoconidsa tojadarijaro, dsotode jiti nadsa todsibehijarossa najaro. Puhua atti dacorajaro, pina passo dacorehema ssahaha canajarossa najaro. <sup>16</sup> Puhua dsepe nahatoniccadsa abadsico bedi 7 canaha cajijari. Puhua ajaridsapi jadsirecca massito cajadsireqquimera najarossa najaro qquenajaro. Pano naco dsibehi tajari pina maji itetepidsa ssiejene dacorajarissa najari.

<sup>17</sup> Qqui onadsapa pina ohuatijarossa najaro. Puhua amorihuaji ohuedimadsa oponajaro. Naraha pohua dsepe nahatoniccadsa ohua bara nadsa huati tajari: —Ticappina-jeraji. Ohuapi tahidedsama omadipojaroa aji jicaqquini bacco onanitohui –nade. <sup>18</sup> —Ohuapi camitta onani. Odsoqqueporaha onahatonidsapi omadi-dsanaponitohui. Ohuapi pipico ocajini. Najaripa dsoqquemana-pojarideni corime cacahuabaqquihicca pipico –nade Jesocristo ohuadsa. <sup>19</sup> Nadsapa ohua cadossejari: —Aji huapima qqui tinajarocca dsodo taji. Aji jidapana tojaridsajarocca dsodo, nidsa



dsotode tojanijinecca dsodo taji. <sup>20</sup> Aja abadsico bedi 7 canaha odsepe nahatoniccadsa qqui tinajari, jojororo pinine orocca 7 naha qqui tinajaricca ima ahuatora taraha imapi ajima najaro: Aja abadsico bedi 7 canajaripa otahimaridsa quequeriqquimana najari 7 najaro cacahuade toquejenajaridenicca ima. Aja jojororo pinine 7 najari naco otahimaridsa quequeriqquimana najari 7 najaro -nade Jeso ohuadsa.

## 2

*Odsa panani Epesocca Jesocristodsa quequeriqquimana najaridenidsa Jesocristo pohua atti dosse inajaro*

<sup>1</sup> Jesocristo ohuadsa huati dsanapojari: —Epesohuaji otahimaridsa quequeriqquimana najari cacahuadedsa dsodo taji -nade. —Ohuapi odsepe nahatoniccadsa abadsico bedi 7 canaha ocajijaro. Jojororo pinine orocca 7 naha cacahuari naridsajari qquide naqui occaridsajaro, nahi taji, onajaro. <sup>2</sup> Ticcadeni madie ohuadsa ahuate taridsajaro. Dio tiadeni tocadossebaqquijaridsa tidsepedeni ijimanadsapi dacoco tijiradsa tidsepedeni ijimanajaro. Otahimaridsara disseraqquri tiquinajaro. Ticcadeni ima onihi naqui nahato onani. Najaropi tabaccorehe inamanajarodeni tettajobaqqui-manajari. Madija mota maidsamanadsa attidenipa: “Tapi Jesocristocca dodosse tabaqqui iquejenani” quinaraha poccadeni ima nattome tiquinadsapi tijinedeni poccadeni maidsehe ahuate tinamanajaro. <sup>3</sup> Otahimari tinebomananijine madija tiadeni tonajidso-baqquimanaraha tinebomana-gerani. Ticcadeni ima occa marinajassa nanijine jahohoraqquri tiquinajaropaji.

<sup>4</sup> —Naraha ticcadeni ima motapi jipera onani. Tahidepi ohuadsa tetideni huanacquiri nadsa ohuadsa tetidsemaneri naporaha dsotodepi ticcadeni huatidsehe ajimani tojani. <sup>5</sup> Tibodideni huatoma-manaji. Aji ohuadsa tetidsemanapojarocca ima tetideni ajimamana tejeraji. Tibodideni cacajiqquimera-pomaji. Ohuadsa tetideni huanacquiri napomaji. Nema tiquinejeradsapi nanihuaji occadsa ticcadeni jojororo pinine odinihitohui. <sup>6</sup> Naraha ticcadeni ima onihipi bica tani. Nicolaitadenicca ima tabaccora taniccadsa jiperaqquri tiquinani. Ohua naqui Nicolaitadenicca imadsa jipera onani.

<sup>7</sup> —Dio Corimepa otahimaridsa quequeriqquimana najaridenidsa huati huati tajari. Aji huapima titiqueriqquiridsa nanihuaji teribodeni ticajimanadsapi Pohua Atti timittamananissa taji, onajaro. Aji occa dacorehema timadimanadsa ohuadsa jehe tiquinajaro tinebomana-geradsapi nidsa Diocca dsama bicanihuaji ahua bono camittehecca tijipamananijine tiadenidsa da onaridsahitohui -nade Jeso.

*Odsa panani Esmirnacca Jesocristodsa quequeriqquimana najaridenidsa Jesocristo pohua atti dosse inajaro*

<sup>8</sup> Jesocristo ohuadsa huati dsanapojari: —Esmirnahuaji otahimaridsa quequeriqquimana najari cacahuadedsa dsodo taji -nade. —Ohuapi tahidedsama omadipojaroa aji jicaqquni bacco onanitohui. Odsogqueraha onahatonidsapi omadijaro. <sup>9</sup> Aji ohuapi nemanene nahato onani. Najidsohuedsa timadimanani nahato onani. Todsepetaji ticappiramanene timadimanajaro naqui nahato onani. Naraha pajissa tiadenipi Diocca daniji bicabote onihi onihi nehe ticajimanani. Tiadenidsa jiperaqquri najarideni tiadeni tototamasso-baqquimana najari nahato onani. Najarideni attidenipa: “Tapi jodiodeni, Diocca madija iquejenajaro” quiquinaraha najaropi pajissa gerani. Ima pajissapi pohuadenipa Satanacca medse toquejenajari. <sup>10</sup> Nidsa otahimari acconi ocasserani temanadsapi ticappinamana tejerana. Satanajine tiadeni mota pamahapa toponi cocorodsa toquejenahitohui. Nama nahijinepa tiadeni huapima tiadeni nattome tabaqquihitohui. Huada 10 nehe

pohuajine ocasserani temanaraha otahimaripi tinebomana tejeraji. Disseraqquri tid-sanapomanaji. Otahimari tinebomana-jeradsa tidsoqquemanani bacco tiquinadsapi tiadenidsa occa camittehe jiquejeranicca da onanitoahui.

<sup>11</sup> —Dio Corimepa otahimaridsa quequeriqquimana najaridenidsa huati huati tajari. Aji huapima titiqueriqquiridsa nanihuaji teribodeni ticajimanadsapi Pohua Atti timittamananissa taji, onajaro. Aji occa dacorehema timadimanadsa ohuadsa jehe tiquinajaro tinebomana-jeradsapi tidsoqquemanaraha dsoqquehe dsotodeccapi tinahanamana-jeranitoahui, onajaro –nade Jeso.

*Odsa panani Peocamocca Jesocristodsa quequeriqquimana najaridenidsa Jesocristo pohua atti dosse inajaro*

<sup>12</sup> Jesocristo ohuadsa huati dsanapojari: —Peocamohuaji otahimaridsa quequeriqquimana najari cacahuadedsa dsodo taji –nade. —Ohuapi jadsirecca massito cajadsireqquimera najaro ocajini. <sup>13</sup> Aji ohuapi ticcadeni madie nemaneha nahato onani. Timadimananihuajipi Satanacca ima dacoraraha ohua onipi tinebomana-jerajaro. Ohuadsa jehe nahissa tajari oni Antipas tinoridenidsa inanadsoqquemanaraha ohuadsa jehe tiquinajaropi tinebomana-jerani. Nahi tiadenihuajipa Satana dosse dosse naraha ohua tinebomana-jerani.

<sup>14</sup> —Naraha ticcadeni ima motapi jipera onani. Tiadenihuaji madija motapa maittaccadsama madijari Baramicca marinaja nebomana-jarahi. Aja Baramipa Isaraerideni imasiri inanamananijine dsama Moabacca tamine Baraca inahattajari. Pocca marinajapi ajima napojaro: Siba nahatonidsa da tahicca bani Isaraerideni jipamanahijine oppinera tani. Huananehe inanamananijine naqui oppinera tani, najari.

<sup>15</sup> —Nahidsa naco madija mota Nicolaitadenicca marinaja nebomanahijine jiper-aqquri najari. <sup>16</sup> Tibodideni tecajiqquimeraji, najaro ima pamehe tiadenidsa nohueranijine. Ticcadeni ima tecajiqquimera-jeradsapi tiadenihuaji occanitoahui. Baramicca, Nicolaitacca marinaja cajimanajarideni ocahadibaqquihitohui. Ohuajaridsa ohuatti qqenajaro pina jadsirecca massitossa najaro pohuadenidsa ssonarinitohui.

<sup>17</sup> —Dio Corimepa otahimaridsa quequeriqquimana najaridenidsa huati huati tajari. Aji huapima titiqueriqquiridsa nanihuaji teribodeni ticajimanadsapi Pohua Atti timittamananissa taji, onajaro. Aji occa dacorehema timadimanadsa ohuadsa jehe tiquinajaro tinebomana-jeradsapi tiadenidsa pan oni mana memehuaji tonajimahicca tijipamananijine da onaridsahitohui. Siba noponi naqui tiadenidsa da onaridsanitoahui. Najaro sibadsapi tiadeni oni dsati dsodo nani cajiridsani. Najaro tiadeni onipi tiadenira nahatoqquri tiquinajaro –nade Jeso.

*Odsa panani Tiatiracca Jesocristodsa quequeriqquimana najaridenidsa Jesocristo pohua atti dosse inajaro*

<sup>18</sup> Jesocristo ohuadsa huati dsanapojari: —Tiatirahuaji otahimaridsa quequeriqquimana najari cacahuadedsa dsodo taji –nade. —Ohuapi Dio Bedi ojan. Onoccopi pina dsippo jororonissa najaro. Ohuamori naqui dsibehi tajaro. Pina ccarara onini bronca jiti nani todsibehijarossa najaro. <sup>19</sup> Ima huapima tinanamana-jaro naqui nahato onani. Otohui tetideni huanacquiri nadsa ohuadsa tetidsemanani nahato onani. Ticcadeni jeheniji dacorani nahato onani. Ohuadsa tidsepedeni ihijimana najaro. Najo taniccadsa iboraqquri tiquinani nahato onani. Jidapapi denima nema tidsanapomanani naqui nahato onani.

<sup>20</sup> —Naraha ticcadeni ima motapi jipera onani. Najaropi amoneje Jesabeocca ima. Poni attinipi: “Ohuapi Dio Atti cacomerabote” naraha maidsajaro. Ponicca marinajajine occa madija huananehedsa toquejenaridsajari. Ponijine siba

nahatonidsa da tahicca bani naco jijipamana najari. <sup>21</sup> Ohuapi poni bodini cacajiqquimeranijine tohuini omadi omadi dsanaporaha bodini cacajiqquimeranijinepi jipera tajaro. Ponicca huananehe nebonijine jipera tajaro. <sup>22-23</sup> Naraha jidapapi ojine coma tehe porinitohui. Ponicca ejedeni naco onajicahitohui. Nidsa poni ajadedeni naco bodideni cacajiqquimera-jaradsa, poccadeni imasiri nebomana-jaradsapa pohuadeni naco comacquiri nadsa ocasserani ahuamanahitohui. Nadsama otahimaridsa quequeriqquimana najari huapima bodideni huatoma-manadsapa occa ima nahatoquiri nahijine. Ohuapi madija attideni nahato, bodidenicca ima nahato onajaro. Imasiri tinanamanajaro manaconi tiadenidsa onananitohui.

<sup>24</sup> —Naraha Tiatirahuaajicca tiadeni mota aji Jesabeocca marinajadsa tiquejena-jeradsapi, aja “Satanacca marinaja deni tojanicca ahuatora tani” quiquinanaridsa tiquejena-jeradsa naqui tiadenidsa ima oppina tanicca huati onejeraraha ima ojariena huati onajaro. <sup>25</sup> Ticcadeni ima bicani tecahuamana-dsanapona, occanipomanihuaji bacco tiquinanijine. <sup>26</sup> Aji occa dacorehema timadimanadsa, ohuadsa jehe tiquinajaro tinebomana-jeradsa naqui, aji ohua jipa onanicca tidsepedeni ijimanadsapi nema tidsanapomanajaroa occanini bacco tiquinanitohui. Nadsapi dsama onihi onihi naridsajarocca madija dossede tiquejenanijine tiadenidsa dacorehe onananitohui. <sup>27</sup> Maittaccadsama occa Abipa ohuadsa: “Dsama nemanehedsa madiridsamanajaridenicca tamine tijanitohui. Pina tamine dacorabote pocca dsodsojo ccanajabotedsa dsipa idadsa bararijarossa tinanabaquihitohui” napode ohuadsa. <sup>28</sup> Naraha cacahuehe najarossa najaro tiadenidsa naqui onanaridsadsapi dsama huapima tecahuaridsa-mananitohui. Tiadenidsa ima onihi bica tanicca naqui onanaridsanitohui. Madija huapima ticcadeni deni tojehe qqui toquinahitohui. Pina ssiajajonanicca abadsico bedi ssiejene dacorajarissa tiquinanitohui.

<sup>29</sup> —Dio Corimepa otahimaridsa quequeriqquimana najaridenidsa huati huati tajari. Aji huapima titiqueriqquiridsa nanihuaji teribodeni ticajimanadsapi Pohua Atti timittamananissa taji -nade Jeso.

### 3

*Odsa panani Saradisiocca Jesocristodsa quequeriqquimana najaridenidsa Jesocristo pohua atti dosse inajaro*

<sup>1</sup> Jesocristo ohuadsa huati dsanapojari: —Saradisiokuaji otahimaridsa quequeriqquimana najari cacahuadedsa dsodo taji -nade. —Aji ohuapi Dio Corime 7 naha ocaji, abadsico bedi 7 canaha ocaji najaro. Ohuatti tiadenidsa ajima onajaro: Ticcadeni ima huapima nahato onani. Madija ohuahadeni ticcadeni madie qqui toquinadsa attidenipa: “Jesocristo tahimaridsa huahuatidsemana nahi” quinaraha ohuapi pajissa nahato onani: Ohuadsa tetideni ajimamanabote nani. Pina tecotajarossa najaro. <sup>2</sup> ¡Jari, tinocodeni ssire-re napomaji! Titiqueriqqui nanicca ima jicabote nani. Tidacoramanani napomaji. Ticcadeni madiicca ima nahato onani: Occa Abi Diodsa tidsepedeni ijjaropi tijinedeni toccanissa tejerani.

<sup>3</sup> —Nadsama tiadenipi tibodideni huatoma-mananissa taji. Aji occa marinaja tiadeni mari tocanabaquipojarissa tinanamanapomaji. Ticcadeni ima tecajiqquimera-manapomadsa Diodsa tiquejenanipomaji. Nema tiquinejeradsapi tiadeni onajidsobaquinitohui. Pina tetideni ajimama canaraha tiadenidsa bobotide bacco dsimajarissa onanitohui, onajaro.

<sup>4</sup> —Naraha tiadeni Saradisiocsa titiqueriqqui najaro motadeni ajijaro dsamacca imasiridsa toquejenanipoma-jarahi. Poccadeni imapi pina poccadeni etero tohobajerajarossa najaro. Nidsa ohuadsa madimanadsapa pohuadenidsa etero noponi da onaridsanitohui. Bicaququiri najarijine ohuadsa etero noponidsa jahiridsahitohui. <sup>5</sup> Occa dacorehema timadimanadsa imasiridsa deni tiquejenadsapi nidsa

dsotode etero noptoni tedsaridsamananitoahui. Diocca papeo camittehe cajimana-dsanapohuijineccadsa tiadeni oni dsodo nani sse onaridsa-jeranitoahui. Nidsa occa Abi pocca dodosse tabaqquideni tedseje baccodenihuaaji tidomo huadsa: “Ajaridenipa occa madija” onanitoahui.

<sup>6</sup>—Dio Corimepa otahimaridsa quequeriqquimana najaridenidsa huati huati tajari. Aji huapima titiqueriqquiridsa nanihuaaji teribodeni ticajimanadsapi Pohua Atti timittamananissa taji -nade Jeso.

*Odsa panani Piradeopiacca Jesocristodsa quequeriqquimana najaridenidsa Jesocristo pohua atti dosse inajaro*

<sup>7</sup> Jesocristo ohuadsa huati dsanapojari: —Piradeopiahuaaji otahimaridsa quequeriqquimana najari cacahuadedsa dsodo taji -nade. —Ohuapi pajissa. Obodi ssiaja, huire tajaro. Maittaccadsamacca tamine Dabicca pipico ocajini. Najari pipicodsa Jerosare dsaticca noccobiji ohuacahuajaro. Madija Diodsa memehuaaji madimanahijine jehe onadsapi jai tojedsimahitohui. Jehe onejeradsapi jai tojedsimarahitohui. <sup>8</sup> Ohuapi aji huapima tidsepedeni ijiridsamanajarocca nahato onani. Nidsa Dio madihihuaaji tiadenidsa: “Jai tijedsimaji” onanitoahui. Nanihuaajicca noccobiji tiadenidsapi tohuabani. Madija ohuaha ecossanijine ssamo tani. Tiadenipi dacoco tijira-jeraraha ohuattidsa iboraqquiri tiquinani. Madijajine nanajidso tiquejenadsa naqui ohua oni tinebomana-jerani.

<sup>9</sup>—Titohuideni ohuati huana tani. Nidsa mamaidsadedeni ojine tibaccodenihuaaji pohuadeni pitodsa jassi tahitohui. Nama onanabaqquidsapa tiadenidsa ohuati huana tani pohuadenidsa ahuato tanitohui. Najari jodiode ni mota attidenipa: “Iapi jodiode ni, Diocca madija iquejenajaro” quiquinanaraha pajissapa Diocca huadi Satanacca medse toquejenajari.

<sup>10</sup>—Tiadenidsa huati onapojaropi: “Ocasserani temanaraha mohuaradsa tinahanamanana” onapode. Nadsama ohuatti tecahuamananissa tadsa aja dsama huapimacca madija ima ocassera tanicadsa nattome onabaqquidsapa tiadeni dsori onanabaqquinitohui. <sup>11</sup> Occanibote nani. Ticcadeni ima bicanipi tecahuamananissa taji. Ohuadsa disseraqquiri tiquinadsapi Diocca daniji bicani ticajimananitoahui. Paji, ticcadeni jeheniji madija inassamomanarana. Diocca daniji pohuadenijine dsori ticanirerana. <sup>12</sup> Occa dacorehema timadimanadsa, imasiridsa deni tiquejenadsapi nidsa dsotode occa Abi Dio madihihuaaji timadimananitoahui. Ojine tiadenipi pina memehuaajicca Pohuadsa dada toqquimacca odsa pininissa tiquinanijine. Nanidsapi jai tijena-jeranitoahui. Occa Abi Dio oni tiadenidsa dsodo, Pohua madihihuaajicca odsa panani onini naqui dsodo onaridsanitoahui. Najaro odsa panani oninipi Jerosare dsati. Najaropi occa Abi Diojine memehuaajicca namihuaaji bacco naronanitoahui. Ohua oni dsati naqui tiadenidsa dsodo onaridsanitoahui.

<sup>13</sup>—Dio Corimepa otahimaridsa quequeriqquimana najaridenidsa huati huati tajari. Aji huapima titiqueriqquiridsa nanihuaaji teribodeni ticajimanadsapi Pohua Atti timittamananissa taji -nade Jeso.

*Odsa panani Laodiseacca Jesocristodsa quequeriqquimana najaridenidsa Jesocristo pohua atti dosse inajaro*

<sup>14</sup> Jesocristo ohuadsa huati dsanapojari: —Laodiseahuaji otahimaridsa quequeriqquimana najari cacahuadedsa dsodo taji -nade. —Ohuapi pajissa. Aji huati huati onajaropi pajissa qqui onajaro imara huati huati ohonanajaro. Huapima Abi Dio inahatoridsajaripa ojine tojaridsajari. Nadsama ohuatti tiadenidsa ajima onajaro: <sup>15</sup> Ticcadeni ima huapima tinamanajararo nahato onani. Ohuadsa jehe tiquinajaropi tinebomana-jeraraha ohuadsa tetidsemana-jerani naqui nahato onani. Jaho, ohuadsara tetidsemaneri naccaraho. Tiadenipi pina bani ppejene

ppocora-jarajarissa, pina passo nahui tejerajarossa tiquinajaro. Nema naniccapi dse nanijine ocassera tajaro. <sup>16</sup> Pina passo nahui tejerajarossa tiquinajaropi tiadeni capiri onanitohui. Ticcadeni ima ocassera tadsapi tiadeni ohuattajo-baqqunitohui. <sup>17</sup> Naraha tettidenipi: “Tapi ima bicani sseqquiri inani. Ijine icca ima toccanissa tani. Icappira-jerani” titiquina naraha tibodideni huatonissa tejerani. Ima pajissapi ssamoqquri tiquinani. Ticcadeni imapi bica tejerani. Tohuati nahanaqquri tiquinani. Ticappiramananissa tajaro. Pina madija nocco sirissa tiquinajaro. Pina etero jiraha ccorojedeni madimanajarissa tiquinajaro.

<sup>18</sup> —Nadsapi tibodideni acco ocamabaqquinijine tiadenidsa huati onana: Aji ohua ocajjarocca mitta tiquinaji. Nadsana ima bicani ticajimananijine. Najaroa ima bicanipi pina oro dsippo ppocoradsa todsibehidsapi huatini ccara taniccassa najaro. Aji ticcorojedeni noppineni ticappinamanadsapi etero noptoni ocajjaro mitta tiquinaji. Najaro tedsamanadsapi ticcorojedeni ahuate tejeranijine. Aja tonococca jemedsi ocajjaro naco mitta tiquinajo, tinoccodeni sse tiquinadsapi tinoccodeni ssire taridsanijine, onajaro.

<sup>19</sup> —Ohuapi madijadsa ohuati huana tadsa imasiri inanamanadsapi ohuatti dacorehema pohuadenidsa: “Nema tiquinejeraji” ohonanajaro. Poccadeni ima tobicanijine naqui mari mari onajaro. Ohuadsara tetidsemanaji. Ohuadsara disseraqquri tiquinaji. Tibodideni cacajiqquimeradsa Diodsa tiquejenanipomaji. <sup>20</sup> Ohuapi noccobijidsa huahua onajaro. Madija ohuatti mittadsa noccobiji icatabojidsadsapi pohuadsa oqquedsimanitohui. Oqquedsimadsapi pohua tedseje ijipanitohui. Pohua naco ohuadsama jipahitohui. <sup>21</sup> Ohuapi imasiridsa deni ojajarojine occa Abi dosse dosse nahihuaji ohuittarijaro. Tiadeni naqui imasiridsa deni tiquejenadsapi nidsa dsotode ohua dosse dosse onanihuaji tiadenidsa: “Jassi tinariji” onanitohui.

<sup>22</sup> —Dio Corimepa otahimaridsa quequeriqquimana najaridenidsa huati huati tajari. Aji huapima titiqueriqquiridsa nanihuaji teribodeni ticajimanadsapi Pohua Atti timittamananissa taji –nade Jeso.

## 4

### *Memehuari Diodsa huatidsemanajari*

<sup>1</sup> Aja Jesocristo pohuadsa quequeriqquimana najaridenidsa ima huati tahi jicani nattinipi qqui onaneje memehuari pina noccobiji tohuabajarossa nehe qqui onajaro. Atti naco dacorajari pina jei jei mohui omittapojarossa najaro omittapomajaro. Nadsapa ohuadsa huati tajari: —Ahuaji ticcamacossaji. Jidacca qqui tinajaro nattini dsotode tojanijinecca ima tiadsa nohue onana –nade.

<sup>2</sup> Nadsapi Dio Corimecca nahatohue ohuadsa ssonaridsa qqui onaneje meme Dio dsamarihuaji deni tojahicca huihuittari bicabote qqui ocanajaro. Najaro huihuittaridsa huittari canahi qqui onajari. <sup>3</sup> Aja huittarijaripa ohuadsa ahuate tajari. Pohuapa dsibehi tajari. Dsibehine pina siba huatini ccara tanicca dsibehinissa najari. Pina diamante dsibehinissa, pina robi dsibehinissa najari. Pohua huittarihi tetepidsa naqui meme janoni porimacossani qqui onajaro. Janonipi pina siba esemeraoda dsibehinissa najaro. <sup>4</sup> Pohua huittarihihuaji qqui onadsapi cacahuadedeni 24 quinaha jassi tariridsajari. Dodossededenicca huihuittari bicaqquri najarodsa jassi nahujanijari. Poccadeni etero nopoqquri najaro. Pohuadeni tatidsa tamine taticca oro nahatoni huittariridsajaro. <sup>5</sup> Pohua huittarihidsa ssissiede ssiehe canajaro, ttotorode ttororo canajaro. Mohuini onihi naqui qqunaridsajaro. Pocca huihuittari bicabote tadsajanima jojororo 7 naha jororo canaridsajari. Najari jojororopa Dio Corime ahuatoridsajari. <sup>6</sup> Nani pocca huihuittari bicabote tadsajanimapi pina coridsa imenissa naraha ccara tajaro. Tocassiejeqquimera najaro, pina siba cristaossa najaro.



Nahi Pohua huittarihi inoridsa naco camittaqquri najarideni 4 quinaha huahueri nahujanijari. Pohua baccohuaji, pohua idehuaji, pohua ppari nahatonihuaji, pohua ppari ssamohuaji naridsamanajari. Camittehe cajimanajari assiredenidsapi noccodeni ijiridsajaro. Pahuadeni tedsejema qquide nahatoqquri, pahuadeni nattiuhaji qquide nahatoqquri najari. <sup>7</sup> Najarideni ojaria tahideccapa pina dsomaji. Ohuahapa pina bohui. Ohuahapa pina madija pano. Ohuahapa pina ssibiri imehibote meme toccajarissa najari. <sup>8</sup> Aja 4 quinajaridenipa eppedeni 6 naha cajiridsamanajari. Assiredenidsa noccodeni ijiridsajaro. Eppedeni bodihuaji naqui noccodeni ijiridsajaro. Nadsama pahuadenipa ssiajama jijiri, dsomema jijiri dsadsanapomana najari. Pahuadeni attipa:

—Ia Medsede Diopa bicabote. Bodi ssiaja tahi, huire tahi ojarihi.

Pohuana dacorabote ojarihi.

Pohuapa nadsama madipojari. Madihipaja nahi. Nidsa ccajonahitohui –quiquinanajari.

<sup>9</sup> Aja deni tojahicca huihuittari bicabotedsa huittari canajaripa madidsanapojari. Najaridsa camittehe cajimanajaridenipa huati toquinajari: —Ticca nahatohue deni tojani, tiadsa etidsejaro, iadsa tijine bica tani, inajaro –quiquinanajari. <sup>10</sup> Najaro huati huati totoquina nadsapa cacahuadedeni 24 quinajari aja Madidsanapojari tedsejema pahuadeni pitodsa jassi tadsa Pahuadsa huatidsemanajari. Pahuadsa huatidsemanadsa pahuadeni taticca oro nahatoni pohua huittarihi tedsejema hua inaqquimanajari. Nadsapa attideni ajama quinajari:

<sup>11</sup> —Ia Medsede icca Dio, Tiadsa etidseni bica tani.

Tiana dsama huapimadsa cajiridsajaripa tinahatoridsajari.

Tia tohuini tadsa tijine huapima nahatoridsajari.

Najarojine madija huapima tiadsa: “Bica tinani, deni tijani” quinahijine bica tani, inajaro –quinade.

## 5

### *Edede Bedi papeo pico naqquni idijaro*

<sup>1</sup> Nadsapa deni tojahicca huihuittari bicabotedsa huittari canahihuaji qqui onaneje pohua dsepe nahatoniccadsa papeo pico naqquni dsojo tojidsajari. Bodihuaji dsodo, huapihuaji dsodo najaro. Nepi tamaroni 7 nehe cajijaro. <sup>2</sup> Diocca dodosse dacorabote ojaria qqui onajari. Pohua atti mohui tadsa huati tajari: —¿Nejecojarina ima jijirade bicabote deni tojajari? Najarina papeo pico naqquni nepi nacossaridsani ssoja ijidsadsa inahabanijine bica tahi –nahi omittade. <sup>3</sup> Naraha aja memehujicca, nami-hujicca, nami bodihujicca naco papeo pico naqquni inahabamananijine huapima pajiramanaja cama-jarahi. Bodicca ima qqui quinanijine naqui pajiramanaja cama-jarahi. <sup>4</sup> Nadsapi oji oji onade. Jaho, madija ima jijirade bicabote deni tojajari papeo pico naqquni inahabanijine nohuerahi. Qquide naco pajiramanaja cama-jarahi, onade. <sup>5</sup> Naraha nahihuaji cacahuadedeni jassi nahujanijari 24 quinajari ojaria ohuadsa huati tajari: —Oji tejeraji, aja Isaraeri bedi Joda potemahi dacorehe cajijari pina dsomajissa najari. Najaripa Isaraeridenicca tamine Dabi Potemahi. Pohuana dsogquehedsa deni tojajari. Papeo pico naqquni inahabanijine pajirahi. Pohuana nepi nacossanicca 7 nehe ssoja ijidsaridsanijine bica tahi –nade ohuadsa. <sup>6</sup> Nadsapa deni tojahicca huihuittari bicabotedsa huittari canahihuaji qqui onanaja Edede Bedi Jeso pina inanadsoque-manapojarissa naraha hua canajari. Pohuapa camittehe cajimanajarideni 4 quinajari, cacahuade 24 quinajari domodeni huahi nocconidsa huajari. Aja ori 7, nocco 7 najaripa Dio Corime 7 naha dsama huapimadsa qquide jahiridsahijine Dio dosse inabaqqujari. <sup>7</sup> Nadsapa Edede Bedipa papeo pico naqquni idinijine deni tojahicca huihuittari bicabotehuaji toccajari. Nahidsa

huittarijari dsepe nahatoniccadsa papeo dsojo ijidsajaro idijaro. <sup>8</sup> Najaro papeo ididsapi camittehe cajimanajarideni 4 quinajari, cacahuadedeni 24 quinajari tedseje Edede Bedi pohua tocattahihuaaji pohuadeni pitodsa jassi tajari. Pohuadenipa titire oni arpa cajimanajari. Pohuadeni dsepedsa tasao oro nahatoni bodidsa nahatohui majo bicabote caji naha dsojo dsojo tojidsamaneri najari. Majo bicabote tohuessidsa jami-mi canajaripa Diocca madija Pohuadsa huati huati totoquina nahicca ima. <sup>9</sup> Pohuadenipa ajie dsati jiri icanamanadsapi ajama quinajari:

—Tiana bicabote deni tijani ojari tajaro. Papeo pico naqquni tidijaro bica tani. Nepi tamaroni 7 nehe cajiraha ssoja tijidsanijine bica tani.

Tiana tia inanadsoqqe-manadsa temene toccajarodsa Diodsa toquejenahijine mitta tinabaqquijaride.

Aja madija dsama onihi onihidsa madiridsamanajarideni mota, tohuatti onihi onihi cajiridsamanajarideni mota, huapideni onihi onihi cajiridsamanajarideni mota tijine Diodsa toquejenaridsajari.

<sup>10</sup> Tijinepi Abi Diocca cacahuehedsa tamine toquejenaridsajari.

Tijinea Abi Diodsa dsepedeni ihijimana najari. Pohuadsa huahuati toqquimade toquejena, dada toqquimade toquejena najari. Pohuadsa jiri jiri quiquinanajaripaja.

Aji namihuaaji madimanajarideni huapima dossede toquejenaridsahitohui –quinade, jiri jiri quinadsa.

<sup>11</sup> Nadsapi qqui onaneje deni tojahicca huihuittari bicabote cahittarinihuaaji Diocca dodosse tabaqqui memehuaajicca huapima attideni omittajaro. Nahi huihuittari cahittarinihuaajipi camittehe cajimanajarideni domo huahuajani, cacahuadedeni naco domo huahuajani nahi idedenihuaaji Diocca dodosse tabaqqui qqui onabaqquiraha siba tahi. <sup>12</sup> Najaridenipa jiri jiri quinadsa attideni mohui taha ajama quinajari:

—Edede Bedi dsoqquepojaripa deni tojajari.

Pohuana huapimadsa dosse dosse nahi pajirahi, bica tahi.

Dsama huapimacca biquehe pohuadsa tojanijine bica tani.

Pohuana bodi nahato tahi ojari nahi.

Pocca dacorehe deni tojani bica tani.

Huapima attidenipa: “Tiana icca Tamine deni tojahicca.

Ticca deni tojehe nema dsanapona” quinana, inajaro.

Pohuadsa etidsedsa: Tiana bica tinani, deni tijani, inanijine bica tani –quinade.

<sup>13</sup> Nadsapa Diocca nahatonaja huapima attideni omittajaro. Memehuaajicca, namihuaajicca, nami bodihuaajicca, passo imenicca jiri jiri quinadsa ajama quinajari:

—Deni tojahicca huihuittari bicabotedsa huittari canajaridsa,

Edede Bedi pohuadsa naco etidsejaro.

Pohuadenidsa etidsedsa: Tiadenina icca Tamine deni tiquejenanicca.

Ticcadeni deni tojehe nema dsanapona, inajaro.

Ticcadeni dacorehe deni tojani, bica tani, inajaro.

Najaro ima bicani nemanehipi tiadenidsa nema dsanaponitohui, inajaro –quinade.

<sup>14</sup> Nadsapa camittehe cajimanajarideni attidenipa: —¡Pajissa nema nana! –quinade.

Nadsapa cacahuade 24 quinajarideni pohuadeni pitodsa jassi tadsa deni tojahicca huihuittari bicabotedsa huittari canajaridsa huatidsemanajari. Edede Bedidsa naco huatidsemanajari.

## 6

### *Papeo pico naqquni nepi tamaroni 7 najaro*

<sup>1</sup> Ocattoma cananeje papeo pico naqquni nepi tamaroni 7 najaro tahidecca Edede Bedi ssoja ijidsani qqui onade. Nadsapa camittehe cajimanajarideni 4 quinajari ojaría jadsirema huahua nahi omittade. Pohua atti mohuini pina ttottorode mohuinissa

nadsa: —Nija, ahuaji ticcajonaji –najari. <sup>2</sup> Nadsapa bojo nopohui qqenahi qqui onajari. Najari idesda huittarijaripa ssissite caji nade. Nadsapa tamine taticca pohuadsa da quinadsa toccajari, jadsiredsa deni tojaridsahijine.

<sup>3</sup> Nadsapa papeo nepi tamaroni dsotodecca Edede Bedi ssoja ijidsajaro. Nanaja camittehe cajimanajarideni ohuaha huahua nahi omittade: —Nija, ahuaji ticcajonaji –najari. <sup>4</sup> Nadsapa bojo ohuaha macco tajari qqenajari. Najari bojo idesda huittarijaridsa dacorehe da inajaro, dsama huapimadsa jonehe inajicaridsanijine. Pohuajine madija jadsire inanamanadsa ahuaji tojica, ahuaji tojica naridsamanahijine. Pohuadsa jadsirejine massito imenibote naqui da icanade.

<sup>5</sup> Nadsapa papeo nepi tamaroni onih 3'cca Edede Bedi ssoja ijidsajaro. Nanaja camittehe cajimanajarideni ohuaha huahua nahi omittade: —Nija, ahuaji ticcajonaji –najari. Nanaja bojo sohuehi qqenahi qqui onajari. Najari bojodsa huittarijaripa ccanajani nanattome cajide. <sup>6</sup> Camittehe cajimanajarideni domo huahi nocconidsa tohuatti mohuini omittajaropi ajima najaro: —Huada ojarinicca tarabajidsa manaconipi aroso jidsadsa trigo kilo ojaria pajirahitohui. Najarossa najaro huada ojarinicca tarabajidsa manaconipi aroso jidsadsa cebada kilo 3 naha pajirahitohui. Naraha ahua bono oribo oquine, uva ppejene naco huati ccara tadsapa pohuama sso tiquina tajarana –nade.

<sup>7</sup> Nadsapa papeo nepi tamaroni onih 4'cca Edede Bedi ssoja ijidsajaro. Nanaja camittehe cajimanajarideni ohuaha huahua nahi omittade: —Nija, ahuaji ticcajonaji –najari. <sup>8</sup> Nanaja bojo huessehi qqenahi qqui onajari. Idesda huittarijari onipa Dsoqqeche. Pohua nattiuhaji ohuaha ccajonajaripa dsoqquemana-pojarideni corime cacahuade. Najarideni pamahadsa dacorehe da quinajaro. Madija dsama nemanehedsa madimanajarideni mota inajidso-baqquimanahijine. (Najari mota caria attidsapi: cuarta parte, quinajari.) Jicahijinepa jadsiredsa tojica, pemidsa tojica, dsamacomadsa tojica, bani huadi tajarijine tojica nahitohui.

<sup>9</sup> Nadsapa papeo nepi tamaroni onih 5'cca Edede Bedi ssoja ijidsajaro. Nanaja Diodsa da tahijinecca huahuanari dopanidsa jicapojari corimedeni qqui onabaqquide. Najaridenipa Dio Attidsa disseraqquri najari, aja Jesocristo tahimari huati huati nanaridsamana najarijine tojicajari. <sup>10</sup> Nadsapa attideni mohui tadsa huati toquinajari: —Ia Medsede Dio, Tiana deni tijani. Tibodipi ssiaja, huire tani. Tia huati tinadsapi Tetti pajiranissa tinananitohui. ¿Nejecoma nadsa namihuaji madiridsa-manajaridenicca ima ticattemanijine? ¿Nejecoma nadsa emene toccajaro manaconi ia nanadsoqquededeni tinajidsobaqquihijine? –quinade. <sup>11</sup> Nadsapa etero noponi huedsamanahijine pohuadenidsa da inaridsajaro. Pohua Attipa: —Jassi tiquinaccaji. Timecotedeni pina tiadenissa quinajari Jesocrisocca dossenijidsa dsepedeni ijimanaccajari. Nidsa pina tiadeni tijicapojarossa quinacchitohui. Najaridenitohui badsira tehe timadimanaccaji –nade Dio.

<sup>12</sup> Nadsapa papeo nepi tamaroni onih 6'cca Edede Bedi ssoja ijidsajaro. Ocattoma cananeje dsama nemanehede dsadsa najaro. Majipa todsidsijari. Pina etero sohueni madija dsoqquehitohui oji quinadsa huedsamanajarissa najaro. Abadsico naco tocamaccojari, pina tohuemenessa canade. <sup>13</sup> Memehujicca abadsico bedi naco namihuaji catojaridsajari. Pina ahua iquiera bono biridsati jojode dacorabotejine catojaridsajarissa nade. <sup>14</sup> Meme naqui pina papeo pico-co-co naqquijarossa nadsa amossi nade. Ssono imeni huapima naqui pajimaranidsana tojaridsajaro. Passo imeni nocconidsa dsama huihuittidsacossieri najaro naqui pajimaranidsana tojaridsade.

<sup>15</sup> Nadsapa dsama huapimacca taminedeni, dsama cacahuadedeni, soldado dossededeni, huapimapa ssonohujicca siba odinihuaji pohuadeni tonajimaridsamana, ssonohujicca siba imeni caji tanihuaji naco pohuadeni tonajimaridsamana

nade. Aja todsepetaji sseqquiri najarideni, deni toquejenajarideni huapima naco nama quinade. Aja madijacca dodosse toquejenajarideni, madijacca dodosse toquejena-jarajarideni huapima naco ssonohuaji pohuadeni tonajimaridsamanade. <sup>16</sup> Cappinamanadsa attidenipa: —¡Ssono, siba iadsa cojo nariccaraho! Bodi iquejenadsapi deni tojahicca huihuittari bicabotedsa huittari canajari ia qqui tabaqqui-jarahijine. Aja Edede Bedicca najidsohue oppinabotedsa ahuatoraqquri inanijine. <sup>17</sup> Jidapanana Edede Bedi Jeso pohua Imehi tedseje poccadeni najidsohue imeni tojanijinecca huada bacco tani. Najaro najidsohuepi issiajanijine ipajira-jerani –quinade.

## 7

### *Isaraeri bedi 12 quinajarideni potemahi Dio inajanoridsajari*

<sup>1</sup> Najaro jicadsapi Diocca dodosse tabaqqui 4 quinaha nami jicaqquinihuaji huahueri naridsahi qqui onabaqquide. Ohuahapa maji ccajonahihuaji hua, ohuahapa maji toccahihuaji hua, ohuahapa arobenihuaji hua, ohuahapa arobeni onihihuaji hua naridsamanade. Najaridenipa jojode 4 nehe ecossamanajaro, namidsa jappoppo canaridsa-jeraniijine. Passo imeni naqui jene torani nanijine, ahua eppe naco jene torahi nahijine jojode joma inanamanajaro. <sup>2</sup> Pohuadenipa dacorehe cajimanajari, nami, passo inajidsoridsa-mananijine. Nadsapa Diocca dodosse ohuaha maji ccajonahihuaji ccajonahi qqui onajari. Najaripa Dio Camittehe cajijaricca nanajano dsojo najonajari. Nadsapa Diocca dodosse tabaqqui 4 quinaha huahueri nahujanijaridenidsa jadsirema huahua nade. <sup>3</sup> Pohua atti ajama najari: —Aji nami, passo, ahua tinajidsomana-jeraccaji. Nidsa icca Diocca medsedeni assaridenidsa najanoridsaccana –nade.

<sup>4</sup> Nadsapa madija najanoridsamanahi onideni omittajaro: 144 mil (144,000) quinade. Najaridenipa Isaraeri pohua potemahi. Pocca ejedeni 12 quinajaridenicca madija. (Caria attidsapi: 12 tribus, quinajari.) <sup>5-8</sup> Isaraeri bedi potemahideni najanoridsamanahipa ajama quinajari:

Joda potemahi 12 mil (12,000),  
 Robano potemahi 12 mil,  
 Cado potemahi 12 mil,  
 Asera potemahi 12 mil,  
 Netari potemahi 12 mil,  
 Manase potemahi 12 mil,  
 Simeo potemahi 12 mil,  
 Rebi potemahi 12 mil,  
 Isacara potemahi 12 mil,  
 Dsaborona potemahi 12 mil,  
 Jose potemahi 12 mil,  
 Benjamin potemahi 12 mil quinaha najanoridsamanade.

### *Madija panahicca eterorideni nopoqquri najaridenicca ima*

<sup>9</sup> Najaro ima jicadsapi ocattoma cananeje madija panahicca qqui onabaqquide. Qqui onabaqquiraha onocco ssonaqqui nade. Madija dsama onihi onihidsa madirid-samanajarideni mota, huapideni onihi onihi cajiridsamanajarideni mota, tohuatti onihi onihi cajiridsamanajarideni mota naco qqui onabaqquijaride. Deni tojahicca huihuittari bicabote cahittarinihuaji, Edede Bedi tedsejema huapima domodeni huajari. Eteroridenipa nopoqquri najaro. Diodsa huatidsemanadsa birijari eppe dsojojo dsojojo canade. <sup>10</sup> Attideni mohui tadsa huahua quinade: —Icca Dio deni tojajaripa pocca huihuittaridsa huittaritari. Najaripa ia Tonassiajade.

Edede Bedijine naqui icassiejerajaro –quinade.

<sup>11</sup> Nahi deni tojahicca huihuittari bicabote cahittarini tadsajanima camittehe cajimanajarideni domo huahuajani, aja cacahuadedeni domo huahuajani, nahi idedenihuaji Diocca dodosse tabaqquideni huapima domo huahuajani najari. Najarideni huapimapa Diocca huihuittari tadsajanima pohuadeni pitodsa jassi tadsa tocattedsamanaadsa assarideni namidsa bacco tadsapa Diodsa huatidsemanajari.

<sup>12</sup> Attidenipa ajama quinajari:

—¡Pajissa nema nana!

Dio, Tiadsa etidsedsa: Tiana deni tijani, inajaro.

Ticca deni tojehe nema dsanaponitohui.

Tiana nahato tinani ojari tani.

Tijine bica tani, icca Tamine deni tijani ojari tani.

Ticca dacorehe deni tojani, bica tani.

Tiadsa icca huatidsehe nema dsanaponitohui, inajaro.

¡Pajissa nema nana! –quinade.

<sup>13</sup> Nadsapa cacahuade 24 quinajarideni ojaria ohuadsa huati tajari: —Aja eterorideni nopoqqiri najaridenipa ¿nejecojarideni? ¿Nahato tinaqui? ¿Nejecohuajicca jahijonajari? –nade. <sup>14</sup> Naraha manaco pohuadsa huati onade: —Tiana nahato tinani –onade. Nadsapa ohuadsa huati tapomade: —Ajajaridenipa namidsa ocasserani imeni tonahana-manaraha Jesocristo tahimari nebomana-jarajari. Edede Bedi Jeso pohua emene toccajarojine poccadeni tabacorehe tomossijaro. Najaria aja etero noponi cajimanajaripaja. <sup>15</sup> Najaria aja Diocca huihuittari bicabote tadsajanima huapima domodeni huajaripaja. Diodsa dada toqquimacca odsahuaji huatidsemanadsapa dsome dsepedeni ijimana, ssiaja dsepedeni ijimana najari. Deni tojahicca huihuittaridsa huittari canajaripa pohuadeni cacahuade pohuadenidsa madiridsahitohui. <sup>16</sup> Nadsapa pemimana-jarahitohui, baccodeni naco dsarimana-jarahitohui. Maji ppoconejne imedeni camana-jarahitohui. Ppoconi naqui pohuadenidsa ocassera tejeranitohui. <sup>17</sup> Najaro ima tojanijinepi aja Diocca huihuittari bicabote tadsajanima Edede Bedi huajarina pohuadeni ecahuabaqquihitohui. Pina edede cacahuade pocca edede ecahuabaqquijarissa nahitohui. Passo bicani camittehecca sibadsa qqenajarocca dse dse dsanapomanahijine pohuadeni eccaridsabaqquihitohui. Poccadeni ojiepi Dio inajicanitohui. Noccodeni ppejene sse inaridsadsapa denima oji quina-jarahitohui –nade cacahuade ojaria atti.

## 8

### *Nepi tamaroni jicanicca ssoja ijidsajaro*

<sup>1</sup> Papeo pico naqquni nepi tamaroni 7 najaro jicarinicca Edede Bedi ssoja ijidsadsapi memehuaji madimanajarideni huapima maji ojaria tocadidire najari. (Caria attidsapi: media hora, quinajari.) <sup>2</sup> Dsotodepa Dio Pohua tedsejema pocca dodosse tabaqqui memehuajicca 7 quinaha domo huahuajanihi qqui onabaqquijari. Pohuadenidsa jeihei 7 naha da inaridsajari.

### *Nahatohui majo bicabote*

<sup>3</sup> Dsotode Diocca dodosse ohuaha ccajonajari, nahatohui majo bicabote totohuesicca huahuanari tadsajanima huajari. Pohua dsepedsa tasao oro nahatoni majo bicabotejne dsojo icajidsajari. Nadsapa pohuadsa nahatohui majo bicabote huapi taha da quinajari, iessihijine. Iessidsapa essene majo Diodsa pajissa quinajaridenicca huatinaja tadsajani Diodsa bacco bacco tajaro. Nadsapa huihuittari bicabote tadsajanima totohuesicca huahuanari oro nahatoni tetepinidsa iessijari. <sup>4</sup> Nadsapa Diocca dodosse dsepedsa dsojo icajidsajari majo bicabote jamimine aja Diodsa pajissa



quinajaridenicca huatinaja tadsajani toccamacossadsa Diodsa bacco tajaro. <sup>5</sup> Nadsapa Diocca dodosse tasao dsojo icajidsajaridsa majo bicabote tothuessicca dsippo ononi jadarini inajijaro. Nadsapi namihuaji quissa inaronaneje oppina tehe tojaridsajaro. Ttororo caneje, mohuini jidsa tehe tomohuiridseje, ssiehe caneje, namihuaji naqui nami dsadsa neje najaro.

### *Jejeidsa jei jei quinajari*

<sup>6</sup> Nadsapa Diocca dodosse tabaqqui <sup>7</sup> quinajari jejei <sup>7</sup> naha cajimanajaridenipa najoramanajari, jei jei quinahijine. <sup>7</sup> Nadsapi Diocca dodosse tahidecca jei jei nanaja passo ccara tojani, dsippo jadarini tohuemene quejemehe quissa inaronajaro. Najarojine nami arobeni diji tadsapi ahua mota diji, dsero nemanehe diji taridsajaro. (Arobenipi caria attidsa: tercera parte, quinajari.)

<sup>8</sup> Nadsapa Diocca dodosse dsotodecca jei jei nanaja jororoni imeni pina ssono imenissa najaro coro inaronadsapi passo imenidsa ssonippajaro. Nadsapi passo imeni arobeni tohuemene tojaridsajaro. <sup>9</sup> Passo imeni abari mota jica, canoa imeniboteca mota tojica, canoa bedenicca mota tojica najari.

<sup>10</sup> Nadsapa Diocca dodosse 3'cca jei jei nanaja abadsico bedi mota cajirajari memehuaaji diji tocanaha jororone motarehema cassonajari. Nami arobenidsa cassonadsa hueni motadsa, passo sibadsa qqunenajaro motadsa cassonipparidsajari. <sup>11</sup> Abadsico bedi mota cajirajari onipa: Bidabote. Najarijine passo motapi tobidaridsajaro. Najaro passo dse quinadsapa madija huapi taha cacotaridsajari.

<sup>12</sup> Nadsapa Diocca dodosse 4'cca jei jei nanaja maji arobe totabaccora, abadsico arobe tocatabaccora, abadsico bedi mota totabaccoraridsa najari. Nadsapa huapima arobe ohuiridsajari. Najarojine ssiajani arobenipi tossiajani nejerani. Dsome arobeni naqui tossiajani nejerani. <sup>13</sup> Dsotode meme napicossanidsa ssibiri potajari toccahi qqui onajari. Toccadsa atti mohui tahi omittajaro. Pohua atti ajama najari: —¡A, jaho! Namicca madijapa tohuati nahanaqqui nahitohui. Nidsa Diocca dodosse tabaqqui ohuahadeni 3 quinajari jei jei quinadsapa ima denima oppina tanicca tojanitohui —nade ssibiri potajari.

## 9

### *Diocca dodosse 5'cca jei jei najari*

<sup>1</sup> Nadsapa Diocca dodosse 5'cca jei jei nanaja memehuaajicca abadsico bedi namidsa cassonadsa cahittahi qqui ocanajari. Najaripa Diocca dosseniji. Pohuadsa nami odini huaji tanicca pipico da inajari. <sup>2</sup> Nami odini huaji tanicca noccobiji itabojidsaneje odi bodihuaajicca essenii qqunenajaro. Pina dsippo imenibote jororoni essenissa najaro. Najaro meme ijidsapi tosohueni nadsa maji amossi najari. <sup>3</sup> Najaro essenidsa sese ahuatoma-manadsapa namihuaji jahironana canaridsajari. Nadsapa nami huapimadsa ijiridsajari. Madija itahuajina-manahijine comenedeni dacorehe cajiridsamanajari. Pina dsorima ssidede orissa naha pohuadenidsa da inaridsajaro. <sup>4</sup> Pohuadeni dossede attipa: —Dseropi tinajidsomana-jeraji, moro taridsahicca tinajidsomana-jarajo, ahua appani naqui tinajidsoridsamana-jeraji. Naraha madija assaridenidsa Diocca nanajano cappiramanajaridenira tinajidsoridsa-baqquimanajo. <sup>5</sup> Naraha tijinedeni ahua-jeraji, onajaro —najari. Nadsapa abadsico 5 canaha pohuadeni comene madijadsa inaridsamanadsapi pina dsorima ssidede comene ahuamanajarissa quinahitohui.

<sup>6</sup> Nidsaranibote najaro ima tojadsapi madija ocasserani ahuamanadsa attidenipa: —Ijica naccaraho —quinahitohui. Naraha dsogquehe pohuadenidsa huaji tanitohui.

<sup>7</sup> Sese huapimapa pina bojo jadsiretohui najoramanajarissa quinajari. Tatidenid-sapi oro nahatoni pina tamine taticcassa najaro huittariridsajaro. Panodenipa

pina madija pano naridsamanajari. <sup>8</sup> Tatideni conepa pina amoneje tatinideni conanissa quinajari. Inodeni naco pina dsomaji inossa quinajari. <sup>9</sup> Pohnadeni assire cacahuamanahijinepa ppejo nahatoni ccarabote jadsirejinecca huedsamanajari. Eppedeni mohui naco pina nami jojoppade bojocca huapi tehe jadsiretohui domoni toccajaro mohuini dacorajarossa najaro. <sup>10</sup> Dsoporidenidsa naco pina dsorima ssidede ori comenessa naha cajiridsamanajari. Najaridsa abadsico 5 canaha madija inajidsobaqqui-manahijine. <sup>11</sup> Sesedenipa tamine cajimanahi. Pohnuapa nami odini huaji tanicca cacahuade. Pohnua oni jodiodeni atti ebreodsapa: Abadón, quiquinanajari. Dsama Cresiaccia madija attidenidsapa: Apolión, quiquinanajari. (Najaripa: Toponi nanajicade, inajaro.)

<sup>12</sup> Nadsapi ima oppinabote tahidecca jicaraha denima pamehe dsoriri taccani.

### *Diocca dodosse 6'cca jei jei najari*

<sup>13</sup> Nadsapa Diocca dodosse 6'cca jei jei nanaja tohuatti omittajaro. Dio bacchohuaji huahuanari oro nahatoni orini 4 najaro nocconidsa tohuatti mohuini qquenajaro.

<sup>14</sup> Najaro tohuattipi Diocca dodosse 6'cca jei jei najaridsa ajima najaro: —Diocca dodosse tabaqqui memehujicca 4 quinajarideni hueni imehi Eoparatehuaji ssoque toppidsa ecahuabaqquijari. Jahiridsahijine tappa tinabaqquijo –najaro.

<sup>15</sup> Nadsapa Diocca dodosse tabaqqui 4 quinajarideni tappa inabaqquijari. Madija mota inajicaridsa-manahijine jai tojajari. Pohnuadenipa najaro imadsa dsepedeni ijiridsa-manahijinepa najoramanojari. Aja pohnuadeni dsepe ijihijinecca maji, huada, abadsico, huajano bacco tadsa dsepedeni ijimanajari. <sup>16</sup> Poccadeni soldado bojo idedsa jassi tarijaridenipa 200 millones (200,000,000) quinajari.

<sup>17</sup> Najaropi Dio Corimejine onoccodsa ahuato tajaro. Aja bojodsa jassi tarijaridenipa ajama quinaha qqui onabaqquide. Pohnuadeni bacco cacahuamanahijine ppejo nahatoni ccarabote cajiridsamanajari. Baccodeniccapi pina dsippo jororoni macco tajarossa najaro, pina meme sohuenissa najaro, pina azufre huesse tajarissa najari cajimanajari. Bojo tatidenipa pina dsomaji tatissa quinajari. Pohnuadeni ajaridsapi dsippo jororoni qquena, dsippo essenii qquena, azufre majo tabaccora tajari qquena najari. <sup>18</sup> Aja bojo ajaridenicca 3 naha qquenajari comenejine madija mota cacotaridsajari. Najaropi dsippo jororoni, dsippo essenii, azufre majo tabaccora tajari comenejine. <sup>19</sup> Bojocca dacorehepi pohnuadeni ajaridsa, pohnuadeni dsoporidsa najaro. Bojo dsoporidenipa pina maccassa naridsamanajari. Dsoporideni cotanidsa pina macca tatissa naha cajimanajaridsa comene inanaridsamanajaro.

<sup>20</sup> Naraha madija dsippo jororoni, dsippo essenii, azufre majo tabaccora tajaridsa cacota-jarajari motadenipa bodideni cacajiqquimera-jarajari. Tabaccorehe inamanajarocca nebomana-jarajari. Aja Satanacca dodosse tocorimedenidsa huatidsede nebomana-jarajari. Pohnuadeni cacahuade pohnuamacca pina ccarara bicabote oro, plata, bronco nahatoni, siba, ahua nahatoni naqui huapimapi qquide ssamoqqui, mittamanahijine ssamoqqui, jahiridsahijine ssamoqqui naraha najaridsa huahuatidsemana najari nebomana-jarajari. <sup>21</sup> Madija nanadsoqquede, caribajade, huananehe, botie naco nebomana-jarajari.

## 10

### *Diocca dodossepa papeo bedeni dsojo tojidsajari*

<sup>1</sup> Nadsapa memehujaji qqui onanaja Diocca dodosse dacorabote ohuaha meme essenima quejemaha ccaronajari. Pohnua tatidsa meme janoni porimacossanissa najaro cajijari. Panopa pina maji ssiejenessa najari. Issopa pina dsippo jororoni pamajarossa najaro. <sup>2</sup> Pohnua dsepedsa papeo pico naqquini bedeni dsojo ijidsajaro. Pohnua amori nahatoniccapi passo imeni tetepidsa cahari, amori ssamohujiccapi

namidsa cahua nadsa huajari. <sup>3</sup> Jadsirema johua nadsapa pohua atti mohuini pina dsomaji huahuade huahua najari mohuinissa najaro. Aja pohua johua nanaja ttotorode 7 nehe tomohuiridsadsapi attinideni omittajaro. <sup>4</sup> Ttotorode attini jicadsapi attinideni dsodo onanitoahiraha memehujicca atti omittajaro. Ajama najari: —Ttotorode attini timittajaropi tia motta tibodidsa tecahuaji. Dsodo tejeraji -najari.

<sup>5</sup> Naraha aja passo tetepidsa amori cahari, namidsa amori cahua nadsa huajaripa pajissara huati tahijine pohua dsepe nahatonicca memehujicca da icanajaro. <sup>6</sup> —Aji huati onajaropi Dio Pohua onima pajissara huati onajaro. Diopa nadsama madijonajari. Meme inahato, nami inahato, passo imeni inahato najaro. Aja Dio Pohua inahatoridsajarodsa madiridsamanajari naco Dio Pohua inahatoridsajari. Ohuattipi pajissa. Ima jicanijinepi najo-jeranitohui. <sup>7</sup> Diocca dodosse jicarihicca jei jei nadsapa Diocca ima ajijaro dsamacca madijadsa ahuato inanapo-jeraccajaro ahuato inananoitohui. Najaro imapi Diona Pohua Atti cacomeracquiri najarideni mari icanabaquipojari -najari.

<sup>8</sup> Aja memehujicca atti omittapojari ohuadsa huati tapomajari: —Jari, passo imeni tetepidsa amori cahari, namidsa amori cahua najaridsa ticcaji. Pohua dsepecca papeo pico naquini tohuabajaro tidiji -najari. <sup>9</sup> Nadsapi Diocca dodossehuaji occajaro. Papeo pico naquini bedenitohui pohuadsa huati onajaro. Nadsapa ohuadsa huati tajari: —Aja, ajijaro papeo tijipaji. Tejeridsapi majona tajaro. Pina jidsi oquinessa nanitohui. Naraha tidsonedsana tobidani nanitohui -najari.

<sup>10</sup> Nadsapi Diocca dodosse dsepecca papeo pico naquini bedeni odidsa ojipajaro. Ohuajaridsapi majona tajaro. Pina jidsi oquinessa naraha ohuidsonedsana tobidani najaro. <sup>11</sup> Nadsapa ohuadsa ajama najari: —Madija huapimadsa, aja dsama onihini onihidsa madiridsamanajaridenidsa, tohuatti onihini onihini cajiridsamanajaridenidsa, taminedenidsa naqui Dio pohuadenidsa inananoijine tahimari huati tinaridsapomajari -najari.

## 11

### *Dio Atti cacomerabote pamahacca ima*

<sup>1</sup> Nadsapa ohuadsa nanattome huenicca bobassa najari da inajari. Nadsapa ohuadsa da inajaripa ohuadsa huati tajari: —Titehemadsa ticcaji, Jerosarecca Diodsa dada toquimacca odsa nattome, Diodsa da tahijinecca huahuanari nattome taji. Nahicca madija Diodsa huatidsemanajari hua taridsajo. ¿Nejecoma quinaha animanajari? -najari. <sup>2</sup> —Naraha Diodsa dada toquimacca boronipi nattome tejeraji. Najaro boronipi jodio quejena-jarajaridenidsa tojani. Najaridenipa abadsico 42 canaha Diocca odsa panani bicabotedsa madimanadsapa pohuadenijine totabaccoranitohui. <sup>3</sup> Nadsapa Dio Atti cacomerabote pamaha ocadossebaquihitohui. Etero jidsa tanicca pina madija ocasserani ahuamanadsa huedsamanajarissa najaro huedsamanadsa huada 1,260 nehe (abadsico 42 canaha) nama quinahitohui Dio Atti ehcomeramana nanitohui -najari.

<sup>4</sup> Aja Dio Atti cacomerabote pamahapa pina ahua onini oribo pamahassa quinarari. Pina jojororo pinine capamahassa quinarari. Ia Medsede dsama nemaneha Cacahuade tedsejema huatide bajari. <sup>5</sup> Madija attidenipa: —Dio Atti cacomerabote pamaha inajidsobaquina -quinaraha manacora pohuadeni ajari jororoni qquenajarodsa pohuadeni jarade diji tocaniredsapa ono toquejenahissa tahitohui. Nama quinadsa pohuadeni najidsode tohuini quinarideni tojicahitohui. <sup>6</sup> Dio Pohujine nahatohue cajimanadsapa memecca passo ecossamanajaro. Abadsico 42 canaha Dio Atti cacomerade toquejenadsapa pohuadenijine namihuaji passo qquejerajarpaji. Dio Pohujinea nahatohue onihini onihini cajimanadsapa pohuadenijine passo

tohuemene tojajaro. Ocasserehe onihi, onihi naqui dsama nemanehedsa inanarid-samanajaro. Pohuadenipa: —Ijine madija ocasserani ahuamanana -quinadsapa nema inanamana-dsanapojaropaji.

<sup>7</sup> Dio Atti ecomera-ridsamanajaro jicanissa tadsapi bani siri imehi jidsabote nami odini huaji tanihuaji qquenadsapa pohuadenidsa ssonarihitohui. Pohuana deni tojadsapa inapamajonahitohui. <sup>8</sup> Nadsapa ia Medsede ahua porimacossanidsa coba idsanamanadsa dsoqquehicca odsa pananica jahuidsa assiredeni pparahi codahitohui. Najaro odsa panani oninipi Jerosare naraha onini ponimacca hua quinajarona: Imasiri sseqquiri najaridenicca odsa panani Sodoma, quiquinanajari. Onini onihi naqui: Diodsa iboqquri najaridenicca dsama Ejito, quiquinanajari. <sup>9</sup> Nahidsa huada 3 denima huada arobeni assiredeni codajari qquide madija jahijonana canahitohui. Madija panahicca ohuaha ohuaha naridsamanajarideni mota, madija huapideni onihi onihi cajiridsamanajarideni mota, tohuatti onihi onihi cajiridsamanajarideni mota, dsama onihi onihidsa madiridsamanajarideni mota jahijonana canahitohui. Najarideni huapimapa ppa idsabaqquimana-jarahijine eccocobaqqui-manahitohui. <sup>10</sup> Dio Atti cacomeraqquri najarideni pamahapa ajijaro dsamacca madijadenidsa oppinehe imeni inanaridsamanajarojine pohuadenidsa nacasseraqquri najari. Nadsapa topamajonajarijine madijapa huatidsemaneri nahitohui. Catidserara canadsapa pohuadeni dsepetaji pohuadeni tessedsa manaconi jirehe ahuaaji da, ahuaaji da quinahitohui.

<sup>11</sup> Naraha huada 3 denima huada arobeni jicadsapi Diojine camitemani-manadsa totehema-manajari. Nadsapa madija huapima cattomama canajarideni cappinamanahissa tajari. <sup>12</sup> Nadsapa aja Dio Atti cacomeraqquri najarideni pamahapa memehuaajicca atti mohui dacoraha mittamanajari. Pohuadeni pamahadsa: — ¡Nija, ahuaaji ticadamacossaji! -najari. Nadsapa pohuadeni huadide cattomama canaraha meme essenima quejemamanaha tohuedamacossajari. <sup>13</sup> Naneje amadsati namidsadsa imeni tojadsapi odsa panani mota barari-ridsadsapi catojaridsajaro. Najarojine madija 7 mil (7,000) quinaha jicajari. Nadsapa tocassiejerajaridenia cappinamanadsa: —Memehuaaji madijaripa Dio dacorahi, deni tojahi -quinajari.

<sup>14</sup> Nadsama ajijaro dsamacca madijadsa ima oppina tajaro pamehe jicaporaha nidsa onihi tojapomaccanitohui.

### *Diocca dodosse 7'cca jei jei najari*

<sup>15</sup> Diocca dodosse tabaqqui 7'cca jei jei nanaja memehuaaji attideni mohuiqquri naha huati huati toquinajari:

—Jidapapi dsama huapima ia Medsede Diocca cacahuehe toja, Cristo-Mesiacca cacahuehe toja najaro.

Pohuadenina dossede nama dsanapomanahitohui -quinajari.

<sup>16</sup> Nadsapa cacahuadedeni 24 quinaha Dio tedsejema taminedenicca huihuittaridsa jassi tarijaridenipa pohuadeni pitodsa jassi tadsa tocattedsa-ridsamanadsa panodeni namidsa bacco taridsadsapa Diodsa huatidsemanajari. <sup>17</sup> Nadsa attidenipa:

—Ia Medsede Dio Tiapi dacorabote ojari tani.

Tiapi nadsama timadipojaropi timadi-dsanapojaro.

Tiadsa etidsejaro, ima bicani tinanani.

Aji ticca dacorehe huapimadsa tijine ahuaato tinanaridsajaro.

Jidapapi dsama huapima dossede tijajaro.

<sup>18</sup> Nadsapi dsama onihi onihi naridsajarocca madija tiadsa huadimanajari.

Naraha jidapanana ticca huadie tojaridsanijinecca huada bacco tani.

Nadsapa jicamanapojaridenicca ima pohuadenidsa huati tinadsapi poccadeni imasiri manaconi pohuadenidsa najidsohue tinassonari-ridsanitohui.

Naraha ticca medse Tetti cacomeraqquiri najaridenidsapi manaconi bicabote da tinaridsanitohui.

Tiadsa toquejenajari huapimadsa naqui da tinaridsanitohui. Najaro manaconi bicabote da tinaridsajaropi ajamani toquejenajaridenidsa, deni toquejenajari-denidsa aja huapima tinoppine cappinamanadsa Tettidsa iboraqquiri najari-denidsa tinanaridsanitohui.

Jidapana naqui ajijaro dsama inatabaccoraridsa-manajarodenicca tabaccorehe manaconipi pohuadeni tinajicahitohui –quinajari cacahuade 24 quinajarideni.

<sup>19</sup> Nadsama memehujicca Diodsa dada toqquimacca noccobiji tohuabajaro. Najaro bodidsapi Moisesicca madija Dio Pohua tedseje jehe canirejaricca baho cahato najaro. Nadsapi ssiehe canaridsajaro, mohuini imeni tomohuiridsajaro. Ttottorode ttororo canaridsajaro, nami naqui dsadsa najaro. Passo ccara tojani naqui jadsirema catojaridsajaro.

## 12

### *Amonejicca ima, Huama imehibotecca ima*

<sup>1</sup> Ima nahatoqquiri inanijine memehujicca ahuatojaro. Ponicca eteropi pina maji ssiejenessa nehe huadsajaro. Abadsico tetepidsa huarijaro. Tatinidsa tamine taticca huittarijaridsa abadsico bedi 12 canaha cajihuajanijari. <sup>2</sup> Najaro amonejepi idsonidsa ejedeni huittidsajari. Tossonahijine comadsapa johua johua najaro. <sup>3</sup> Dsotode naqui memehujicca ima onihi nahatoqquiri inanijine ohuadsa ahuatojaro. Qqui onanaja pina huama imehibotessa naraha jidsa tajari. Macco tajari. (Caria attidsapa: dragón, quinajari.) Tatipa 7, ori 10 najari. Tati 7 najarodsa tamine taticca huittariridsajari. <sup>4</sup> Nadsapa huama imehibotepa abadsico bedi mota (Caria attidsapa: tercera parte, quinajari) pohua dsoporidsa jadsirema johue inaronabaqquidsapa namihuaji hua inaronabaqquijari. Nadsapa huama imehibote amoneje idsoni comajaro tadsajanima huajari. Ejedeni tossonadsapa amadsati jipahijine najorajari. <sup>5</sup> Naraha ponicca ejedeni maqquideje bedi tossonadsapa madijari. Najaripa nidsa dsotode dsama huapimacca tamine dacorabote tojahitohui. Pocca dsodsojo ccanaja tajaridsa pocca madija dosse dosse nahitohui. Naraha ponicca ejedenipa todinimacossanijari. Nahi Dio Pohua huittarihidsa dossede huittarijari. <sup>6</sup> Naraha imenipi dsama huamoni ssono caji, siba caji tanihuaji joppa tajaro. Aji poni joppa tanihuaji madinijinepi Djotine najorapojaro. Nanihuajipi taparini cajidsanaponijine huada 1,260 nehe madijaro.

<sup>7-8</sup> Dsotodepi meme napicossanidsa jadsire tojani qqui onajaro. Diocca dodosse tabaqquidenicca tamine Miqueopa pocca dodosse tabaqqui tedseje huama imehibotedsa jadsire inanamanajaro. Huama imehibotepa pocca dodosse tabaqquima Miqueocca dodosse tabaqqui tedseje cahadiremanaraha huamadenipa deni toquejenahijine pajiramana-jarahi. Memehujicca madimana-pomahijinepa jicani. <sup>9</sup> Nadsapa huama imehibote cco inaronamanajari. Najari huama imehibotepa maittaccadsama pina maccassa naha ahuatopojari. (Najarina Adana Ebadeni icamaidsa-baqquipojari.) Pohua oni ohuahapa: Diocca huadi Satana, quiquinanajari. Pohua, pocca dodosse tabaqquima namihuaji hua inaronamanadsapa namidsa catojaronajari. Nama nadsapa dsama huapimacca madijadsa maidsa maidsa nanaridsa najari.

<sup>10</sup> Nadsapi memehujicca tohuatti mohuini omittajaro attipa:

—Jidapanana ia Medsede ia tonassijabaqquihicca ima bacco tani.

Jidapanana Diocca dacorehe, pocca cacahuehe iadsa ahuato tani.

Dio pocca Cristo-Mesia pohua dosse dosse nahicca ima bacco tani.

Ajana, imecotedeni tahimari pohuama huatijide rabote Satanapa coro inaronajari.



Dsome, ssiaja, dsome, ssiaja icca Abi Dio tedsejema imecotedenicca ima huati huati nanaja naraha jidapapi pocca ima jicani.

<sup>11</sup> Imecotedenipa deni toquejenajari. Satanapa ajamani tojahi.

Edede Bedi Jeso dsoqquedsa emene toccajarijine, pohua tahimari ecomeraridsa-manajarojine naco deni toquejenajaripaja.

Pohuadenipa dsoqquehe noppineni cappinamana-jarajari.

“Idsoqquedsa naqui bica tani. Dio inebo-jarahitohui” quiquinanajari.

<sup>12</sup> Nadsama memehuaji timadimanajaro huapimapi tetidsemaneri naji.

Naraha aji namihuaji timadimanajaro, passo imenihuaji timadimanajarodenipi tohuati nahanaqquiri tiquinani.

Tiadenidsa ima oppina tehe tojaridsanitohui.

Diocca huadipa tiadenidsa huadihijine toccaronajari.

Pocca ima jicabote nani nahato tadsapa huadie imeni cajijari

–najari memehuaji tohuatti mohuini omittajaro.

<sup>13</sup> Huama imehibote bodi huatodsapa: —A, namihuaji ohua coro naronajariraha –najari. Nadsapa amoneje ejedeni maqquideje bedi cajije najaro inanadsoqqueni-

jine qquidso qquidso naridsajari. <sup>14</sup> Naraha amoneje huaji tani toccanijinepi pina ssibiri imehibote eppessa najari capamaha da quinajari. Nadsapi poni

madinijine dsama huamoni ssono caji, siba caji tanihuaji huama huaji tahihuaji toccanijine appani cajijaro. Nanidsapi poni ecahuamana-dsanapodsa huajano 3

denima huajano arobedsa madinijine. <sup>15</sup> Naraha huama imehibotepa amoneje toccanijine najorani qqui tadsa pohua ajaridsa passo motarema capiri inajaro, hueni

tocajadsa totabonijine. <sup>16</sup> Naraha namipi amoneje acco icamajaro. Nami odini tohuabajaro. Pina ajarini cajijarossa najaro. Nadsapi huenicca passo nemanehe

dappi idsimajaro. <sup>17</sup> Nadsapa huama imehibote amonejedsa denima huadi tadsapa poni potemanidsa jadsire inananijine toccajari. Aja Diocca dossenijidsa iboraqquiri

najari, Jesocriso tahimaridsa disseraqquri najaridenidsa jara jara najari. <sup>18</sup> Nadsapa huama imehibote passo imenicca ssiquidsa huajari.

## 13

### *Bani siri jidsabote passo imenidsa qqumorajari*

<sup>1</sup> Ocattoma cananaja bani siri imehi jidsabote passo imenidsa qqumorajari. Tati 7, ori 10 naha cajijari. Ori huapimadsa tamine tatidenicca huittariridsajari. Bani siri

tati huapimadsa tohuaoni tabaccora tanicca dsodo naridsajaro. Tohuaonipi Diodsa ocassera tani. Pina Dio onidsa tatamasso najarissa najaro. <sup>2</sup> Bani siri jidsabote qqui

onadsapa assire pina dsomaji jano potahissa naraha amoripa pina bani siri imehi oso amorissa najari. Pohua ajari naco pina dsomaji huahuade ajarissa najari. Huama

imehibotepa bani siri jidsabotedsa pocca dacorehe da inajaro. Pocca huihuittari bicabote naqui pohuadsa da icanajaro. Najarodsa huittaridsa dossehe dacoraniccadsa

dossedede tojahijine huama imehibotecca dossehe bani siri jidsabotedsa da inajaro. <sup>3</sup> Bani siri jidsabote tati 7 naraha tati ojariepi biqueradsa pina dsoqquejarossa

najaro. Naraha bejorini ccaqquidsapi camittemanijaro. Nadsapa dsama huapimacca madija huajo caniredsa pohuatohui disseraqquri najari. <sup>4</sup> Huama imehibotedsa

huatidsemanajari, aja bani siri jidsabotedsa pocca dossehe da inajarojine. Bani siri jidsabotedsa naco huatidsemanajari. Pohuadeni attipa: —Bani siri jidsabotepa

dacorajari. Pina aja pohuassa najari nohuerahi. ¿Nejecojarina pohuadsa ssonaridsa deni tojahijine pajirahi? –quinajari.

<sup>5</sup> Bani siri jidsabotepa Diodsa tatamasso nadsapa: —Dio nohuerahi, ohuana huapimadsa deni ojani ojari onani –nanaja najari. Naraha Diopa bani siri jidsabote

dossedede tojahijine ecossa-geraccajaro. Abadsico 42 canaha dossehe tojjaccajari.

<sup>6</sup> Nadsapa atti tabaccora tadsa Diodsa atti atti dsanapojari. Dio oni ajimani inanajaro. —Diocca mamadi tabaccora tani —nanaja najari. Memehuari madimanajaridenidsa naco tatamasso najari. <sup>7</sup> Nadsapa bani siri jidsabotecca ima huacossa-jeradsapi Diodsa toquejenajarideni tedseje cahadiremana-dsanapojari. Deni tojadsapa motapa inajicaridsajari. Nadsapa madija huapideni onihi onihi cajiridsamanajarideni, tohuatti onihi onihi cajiridsamanajarideni, dsama onihi onihidsa madiridsamana-jarideni naco bani siri jidsabote pohuana dosse dosse najari. <sup>8</sup> Ajijaro namidsa madiridsamanajarideni camittehe cajimana-dsanapohuijinecca papeodsa onideni dsodo nani nohuerajaripa bani siri jidsabotedsara huatidseridsa-manajari. Najaro papeo dsodo nanipi dsama nahatoponidsama Edede Bedi Jeso pohuana ecahuajaro. Pohuana camittehe issiajanicca icajiridsanijine dsoqquejari.

<sup>9</sup> Teribodeni ticajimanadsapi ohuatti timittamananissa taji. Bani siri jidsabote tamine tojadsapa Diocca madija ajama quinahitohui:

<sup>10</sup> Diocca madija toponi cocorodsa hua todsimahijinepa itadamamanadsa hua todsimahitohui.

Diocca madija huahuajinadsa itahuajinamanahijine naco huahuajinadsa tojicahitohui.

Najaro ima tojadsapi Diocca madijapa ajama quinahitohui: Oppinani ahahuamana naraha Diocca dacorehema mohuaradsa ihinahanamana nanitohui. Ocasserani ahahuamana naraha Diodsa jehe quinahi nebomana-jarahitohui.

### *Bani siri ohuaha namidsa qquenajari*

<sup>11</sup> Qqui onapomanaja bani siri ohuaha namidsa qquenajari. Ori pamajari, pina edede bedi orissa najari. Naraha pohua attipa pina huama imehibote attissa najari. <sup>12</sup> Pohuapa tahidecca bani siri jidsabotecca dossehe cajijari. Nadsapa namihuaji dossede tojadsa aja tahidecca bani siripa cattade huajari. Nadsapa bani siri dsotodeccana namidsa madiridsamanajarideni huapima tahidecca bani siridsa huatidsemanahijine icadossebaqqujari. Aja pohuadsa huatidsemanajaripa tati biqueradsa dsoqqueraha bejo ccaqquidsa camittemanijari. <sup>13</sup> Bani siri dsotodecca naco canahatori canajari. Pohuajine memehuari jororoni ccaronadsa namidsa bacco naronajaro. Madija huapima qqui toquinajari. <sup>14</sup> Namihuajicca madija icamaidsabaqquihissa tajari. Tahidecca bani siri jidsabote cattade huahihuaji canahatoriri canadsa madija huapima pocca maidsehedsa pajissa quinajari. Pohuadeni icadossebaqquidsapa tahidecca bani siri jidsabote corime sibadsa inahatomanajaro. Najari bani siripa massito jadsira tocanajarodsa tati biqueraraha madicajari. <sup>15</sup> Naraha bani siri dsotodeccadsa dacorehe da inadsapi tahidecca bani siri corime camitta inanajari. Camittemanidsana atti cajidsapa pohua corimedsa huatidsemanajarideni huapimapa jicaridsahijine icadossebaqqujari. <sup>16</sup> Nadsapa bani siri dsotodeccana denima ima inanajaro. Madija huapima tahidecca bani siricca nanajanodsa inajanoridsahijine icadossebaqqujari. Ejedeni, jadahi, dsepe sseqquri najarideni, cappiramanajarideni, madijacca dodosse toquejena-jarajarideni, madijacca dodosse toquejenajarideni huapima inajanoridsajari. Motapa dsepedeni nahatonihuaji inajanoridsa, motapa assaridenidsa inajanoridsa najari. <sup>17</sup> Aja bani siri jidsabotecca nanajano madija motapa pohua oni dsodo nani cajiridsamanajari. Motapa pohua onicca numero dsodo nani cajiridsamanajari. Madija pocca nanajano cappiramanadsapa mitta quinahijine ssamo, da quinahijine ssamo tanitohui.

<sup>18</sup> Ajijaro ima nahatoqquri tiquinanijinepi madija Diocca nahatohue cajijari bodi nahato tararina bani siri jidsabotecca numero inatassaqquina. Pocca numeropi madijadenicca. Najaro numeropi 666 najaro.

## 14

### *Edede Bedi 144 mil quinajarideni tedseje*

<sup>1</sup> Nadsapa ocattoma cananaja Edede Bedi Jeso ssono Siodsa hua canahi qqui onade. Pohnadsa madija 144 mil (144,000) quinaha domo huajari. Assaridenidsa dsodo nanipi Edede Bedi Jeso oni, Imehi oni cajimanajari qqui onajaro. <sup>2</sup> Nadsapi memehuaaji mohuini bica tehe omittajaro. Pina hueni huapima ssahaha canajarossa najaro. Pina ttottorode dacorabote mohuinissa najaro. Pina titirededeni huapi taha tire tire quinajari mohuissa najari. <sup>3</sup> Nadsapa 144 mil quinaha ajie dsati jiri jiri quinajari. Pohnadenipa Diocca huihuittari bicabote tadsajanima aja camittaqquiri najari <sup>4</sup> quinajari tedsejema, cacahuadedeni 24 quinajarideni tedsejema jiri jiri quinajari. Madija ohuahadenipa poccadeni ajie tocahatterahijine ssamoqquiri naraha 144 mil quinajaridenira najaro ajie jiride nahatoqquiri najari. Najaridenipa ajijaro namidsa madimanaporaha Dio idinibaqqipojari. <sup>4</sup> Poccadeni ima ssiaja tajaro. Huananehe jirehe madimanajari. Amonejedsa ssamoqquiri najari. (Najaro imapi dio pohnamaccadsa huatidsemana-jarajari.) Edede Bedi Jesodsa disseraqquiri nadsapa pohnadsara ahuaaji jai toja, ahuaaji jai toja naridsajari. Najaridenipa namicca madija mota Dio idinibaqqipodsa Pohnadsa toquejenahissa, Edede Bedi Jesodsa toquejenahissa tahijine pina madijadenicca daniji bicabote Diodsa toजारissa quinajari. <sup>5</sup> Pohnadenipa maidsehe huatiraqquiri najari. Imasiri cappiramanaha madimanajari.

### *Diocca dodosse tabaqqui 3 quinajaridenicca ima*

<sup>6</sup> Nadsapi Diocca dodosse ohuaha qqui onade. Memehuaaji ccahuajadsa Dio ia tonassiajabaqquihijinecca ima eccahuajajaro, namidsa madimanajaridenidsa huati taridsahijine. Aja madija dsama onihni onihidsa madiridsamanajaridenidsa huati, madija huapideni onihni onihni cajiridsamanajaridenidsa huati, tohuatti onihni onihni cajiridsamanajaridenidsa naco huati naridsahijine. <sup>7</sup> Nadsapa pohua atti mohui tadsa huati tajari: —Dio noppine ticappinamanaji. Diodsa: “Tiana deni tijani” tiquinaji. Dsama huapimacca madijacca imasiri manaconi najidsohuepi Dio Pohnajine tojabote nani. Pohnana meme inahato, nami inahato, passo imeni inahato, passo sibadsa qqnenanacca inahato naridsajaro. Pohnadsara tetidsemanaji –najari.

<sup>8</sup> Dsotode Diocca dodosse ohuaha toccamissajari. Pohna attipa: —¡Odsa panani deni tojanicca Babironiapi jicani, jicani! –najari. —Najaro odsa pananacca madijajinepi dsama huapimacca madija Diodsa huatideni ajamamanadsa Babironiadenicca huananehedsa toquejenaridsajari. Babironiadenipa Diodsa iboqquiri nadsa poccadeni ibohuepi dsama huapimacca madijadsa dsapa taridsajaro. Pina noccodeni janoqquiri nahijine dsedse coma tanicca da icanabaqquijarissa najaro –najari.

<sup>9</sup> Dsotode Diocca dodosse 3'cca toccamissadsa atti mohui tadsa huati tajari: —Bani siri jidsabotedsa, pohua corime nahatohuidsas madija huahuatidsemana najaridenipa Diocca najidsohue inahanamananitohui. Bani siricca nanajano cajimanahijine iboraqquiri nadsapa assaridenidsa cajimana, dsepedenidsa cajimana najaridenipa Diocca najidsohue inahanamananitohui. <sup>10</sup> Pohnadenidsa Dio huadidsapa najidsohue imeni najorajari. Diocca dodosse tabaqqui, Edede Bedi tedseje pohnadeni cattomama canahihuaaji Dio nanajidso inanabaqquidsa jororoni azufre quejemanicca inahanamananitohui. <sup>11</sup> Najaridenipa bani siri jidsabotedsa, pohua corime nahatohuidsas huahuatidsemana najari. Bani siricca nanajano cajimana-jarahijine poni quina-jaradsa pohnadenipa dsippo jororonijine ocasserani ahuanadsapa dsome, ssiaja, dsome, ssiaja jassi quina-jarahitohui –najari.

<sup>12</sup> Najaro ima tojadssapi Diocca madijacca ima ahuatito tanitohui. Diocca madijapa oppinani ahahuamana naraha Diocca dacorehema mohuaradsa ihinahanamana

nanitohui. Najaridenipa Diocca dosseniji inapajiramananissa tajaro. Jesocristodsa naco disseraqquri najari.

<sup>13</sup> Nadsapa memehuaaji atti omittajaro. Ohuadsa ajama najari: —Ajijaro ima bicani dsodo taji –najari. —Aji jidapanaccadsama ia Medsede Jesocristodsa toquejenajari-deni jicamanapodsapa pohuadenidsa ima bicani tojanitohui –najari.

Nadsapa Dio Corime attipa: —Jehe, najarideni tojicadsapa jassi quinahitohui. Najo tanicca dsepedeni ihijimana najaro jicani. Aja Diodsa dsepedeni ijimanadsa pohuadenijine ima bicani toजारoma memehuaaji jai tojamacossahitohui –najari.

### *Namihuaajicca bono naccadecca ima*

<sup>14</sup> Nadsapi ocattoma cananeje meme essenì nopo tani qq̄ui onajaro. Najaro essenì tetepidsa huittarijaripa pina madijassa naha qq̄ui onajari. Pohua tatidsa tamine taticca oro nahatoni huittarijaro. Pohua dsepedsa massito jocabadsani jadsira tocanehè dsojo icajidsajaro. <sup>15</sup> Diocca dodosse ohuaha Diodsa dada toqqumahuaji qq̄uenajari. Pohuapa aja meme essenì noponi tetepidsa huittarijaridsa jadsirema huati tajari: —Ticca massito jocabadsanidsa bono huissi tippiridsajo. Jidapanana dsama huapimacca bono jadabote tojahi, naccahi bica tahi –najari. <sup>16</sup> Nadsapa dsotode meme essenì noponi tetepidsa huittarijaripa nami tetepidsa pocca massito da icanadsa bono tajoppiridsadsapa inaccajari.

<sup>17</sup> Nadsapa Diocca dodosse ohuaha memehuaajicca Diodsa dada toqqumahuaji qq̄uenajari. Najari naco dsepedsa massito jocabadsani jadsira tocanehè dsojo icajidsajaro. <sup>18</sup> Nadsapa memehuaaji Diodsa da tahijinecca huahuanari cahittarinihuaji Diocca dodosse ohuaha naco qq̄uenajari. Pohuapa dsippo jororoni jinede. Nadsapa aja massito jocabadsani jadsira tocanehè dsojo tocajidsajaridsa atti mohui tadsa huati tajari: —Namicca ppa nahi uva bono jadabote tojahi. Ticca massito jocabadsani jadsira tocanajarodsa uva dsepema namanaha huissi tippiridsadsa tinaccaridsajo –najari.

<sup>19</sup> Nadsapa Diocca dodosse nami tetepidsa pocca massito da icanadsa namicca uva bono huapima tajoppiridsadsapa inaccajari. Nadsapa uva ppejene tojahijine siba odini imenibotedsa hua idsajari. Nahidsa uva ttai ttai najaricca imapi Diocca huadie madijadsa tojanijinecca ima. <sup>20</sup> Nadsapa odsa panani huapihuaji uva ttai ttai nadsa ppejene toccajari. Najari ppejene toccajaripa madija emenedeni uva ttaittadsa qq̄uenajaro. Pina hueni tocadsajajarissa najaro. Bojo huahi dequeraraha ajaridsa bacco tajaro. (Najaropi 1 metro y medio.) Emenedeni toccabaqq̄uini huaji tani. Nattome inadsapi 300 kilometrossa nehe toजारo.

## 15

### *Diocca dodosse tabaqq̄ui 7 quinajari Dio icadossebaqq̄uidsa najidsohue 7 najaro najoramanajari*

<sup>1</sup> Memehuaaji qq̄ui onaneje itedsejemacca ima onihi denima jidsa tehe ahuatoni qq̄ui onadsapi huajo onajaro. Diocca dodosse tabaqq̄ui 7 quinaha ahuatomanajaripa najidsohue oppina tanicca 7 nehe madijadsa tojaridsanijine najoramanajari. Najaro najidsohuepi jicanicca. Nidsa najaro najidsohue 7 nehe tojaridsani nattinipi Diocca huadie jicanitohui.

<sup>2</sup> Nadsapi coridsa imenissa najaro naqui qq̄ui onajaro. Pina siba cristaossa najaro tocassiejeqq̄uimera naraha jororoni quejemajaro. Nani coridsassa najarodsa madija domodeni huarijaripa Diocca daniji titire oni arpa dsojo dsojo tojidseri najari. Najaridenipa bani siri jidsabotecca imadsa dsori tocaniredsa deni toquejenajari. Bani siri jidsabotedsa pohua corimedsa naco jehe quina-jarajari. Pohua onicca numero

pohuadenidsa nohuerani. <sup>3</sup> Nadsapa titire arpadsa tire tire quinadsapa Diocca medse Moisesicca ajie, Edede Bedi Jesocca ajie jiri jiri quinajari. Ajiepi ajima canajaro:

—Jehe Abi Dio, nahatojide tijirani.

Tinahatoridsajari huapimapa bica tahi.

Tiapi ia Medsede dacorabote tijani.

Ticca cacahuehepi toccanissa tani.

Ticca ima huapimapi pajissehe ponira.

Dsama nemanehedsa madiridsamanajarideni cacahuade ojari tajaro.

<sup>4</sup> Jehe ia Medsede Dio, nidsa huapima tinoppine cappinaridsa-manahitohui.

Huapimapa Tiadsa: “Bica tinani, deni tijani” quinahitohui.

Tiana ojari tani. Tibodi ssiaja, huire tani.

Ticca ima pajiranissa tajaro qqui toquinadsapa

dsama nemanehedsa madiridsamanajarideni Tiadsa huatidsemanahijine jahijonana canahitohui –quinajari, jiri jiri quinadsa.

<sup>5</sup> Najaro poccadeni ajie jicadsa ocattoma cananeje memehujicca Diodsa dada toqquima bodihuaji tohuabajaro. <sup>6</sup> Najaro Diodsa dada toqquima bodihuaji Diocca dodosse tabaqqui 7 quinaha jai tojenajari. Pohuadenipa najidsohue oppina tanicca 7 najaro cacahuadedeni. Etero onini lino bica tajaro, nopo, dsibehi tajaro huedsamanajari. Ssoquerideni orocca biji metedenidsa bacco tajaro.

<sup>7</sup> Nadsapa camittaqquiri najari 4 quinajarideni ojariapa Diocca dodosse tabaqqui 7 quinajaridenidsa tasao orocca pohuadenidsa da icanaridsajari. Najari tasaodsapi Dio camitta taha madi-dsanapojaricca huadie tojaridsanijine najidsohue comabote ijiridsajaro.

<sup>8</sup> Nadsapi memehujicca Diodsa dada toqquima bodihuajipi Djojine pocca deni tojehe, pocca dacorehe ahuato inanajaro. Pina dsippo essenissa najaro ijiridsajaro. Nanihuajipi toqquedsimade ssamo taccani. Aja tasao 7 canajaricca najidsohue comabote tojaridsanijine namihuaji Diocca dodosse tabaqqui 7 quinajari sso inaronamanehe jicadsana toqquedsimade toppineranitohui.

## 16

### *Tasao 7 canajaridsa najidsohue ijiridsanicca ima*

<sup>1</sup> Nadsapa Diodsa dada toqquima bodihuaji atti mohui dacoraha omittajaro. Pocca dodosse tabaqquidsa huati tajari: —¡Jari, jai tijaji! Jidapanana ojine ticcadeni tasaodsa najidsohue oppina tanicca ijiridsajarodsa onajidsobaqquihijine namihuaji sso tinaronaridsamanaji –najari.

<sup>2</sup> Nadsapa Diocca dodosse tahidecca toccajari, pocca tasaocca namihuaji sso inaronajaro. Nadsapa namihuaji madija huapima bani siri jidsabote janoma jahiridsajari pohua corime nahatohuidsas: —Ia cacahuade –quiquinanajaridenipa joro jadsidsi comene dacorahicca inahanamanajari.

<sup>3</sup> Nadsapa Diocca dodosse dsotodecca naco pocca tasaocca passo imenihuaji sso inaronajaro. Nadsapi passo tohuemene tojjajaro. Pina madija pohua tessejine dsoqquedsa emene toccabaqquijarossa najaro. Nadsapa passo abari huapima cacotaridsajari.

<sup>4</sup> Dsotode Diocca dodosse 3’cca naco pocca tasaocca sso inaronadsapi huenicca passo, bijinicca passo, sibadsa qquenajarocca passo naqui tohuemene tojaridsajaro.

<sup>5</sup> Nadsapa Diocca dodosse passo cacahuade atti omittadsapi ajama najari:

—Jehe ohua Medsede Dio, tibodipi ssiaja, huire tajaro.

Jidapana naqui timadini, Tiapi dsama tinahato-jeraccadsama timadipojaro.

Madija tinajidsobaqquidsapa tijine pajiranissa tani.

<sup>6</sup> Pohuadenijine ticca madija Tiadsa bicaqquri najarideni jicaridsajari.



Tetti cacomeraqquiri najarideni naco inajicaridsa-manadsapa emenedeni toccaridsa-jaro.

Jidapapa manaco tohuemene dse quinahijine pohuadenidsa da tinajaro.

Najaropi poccadeni ima manaconi –najari.

<sup>7</sup> Nadsapi Diodsa da tahijinecca huahuanarihuaji tohuatti mohuini qqenani omittajaropi ajima najaro: —Jehe ohua Medsede, Tiapi Dio Dacorabote, ticca pajissehema poccadeni ima nattome tadsapi tijine pajiranissa tanitohui –nade tohuatti mohuini.

<sup>8</sup> Diocca dodosse 4'cca naco pocca tasaocca majidsa sso inarijaro. Nadsapa maji icadossejari, pohua ppocone dacoradsa madija camanahijine. <sup>9</sup> Madija huapima camanahissa taraha Diodsa bodideni cacajiqquimera-jarahi. Pohuadsa: —Deni tijani, nahatojide tijirani –quina-jarahi. Najidsohue comabote epeje inananijine Dio pajiraraha Pohua onidsa tatamasso quinajari.

<sup>10</sup> Nadsapa Diocca dodosse 5'cca naco pocca tasaocca bani siri dossede tojahijinecca huihuittaridsa sso inaridsapi pocca cacahuehe nemanehetodsidsijaro. Nadsapa pohuadenidsa comani dacoradsa pohuadeni ipoma inodeni dsaqui tocanamanajari.

<sup>11</sup> Comaqqquiri naraha poccadeni tabaccorehe nebomana-jarajari. Imedeni jadsijaro comani ahuamanadsapa Dio memehuaaji madijaridsa tatamasso quinajari.

<sup>12</sup> Nadsapa Diocca dodosse 6'cca naco pocca tasaocca hueni imehi Eoparatedsa sso inaronadsapi sse tocanajari. Tada tocanadsapa maji ccajonahihuaajicca taminedeni poccadeni madijama jahiqquimahijine pajiramanajari.

<sup>13</sup> Nadsapi ocattoma cananaja huama imehibote ajaridsa qqenahi qqui, bani siri jidsabote ajaridsa qqenahi qqui, bani siri ohuaha maidsehe mamaride ajaridsa qqenahi qqui onajaripa tocorime siri 3 quinaha pina torocacassa naha qquenaridsajari. <sup>14</sup> Najaridenipa Satanacca dodosse tabaqqquideni. Pohuadenipa canahatorimana canajari. Dsama huapimacca taminedeni madiridsamanahihuaaji jai tojabaaqquijari, jadsiretohui inequeriqqui-baqqquimanaridsahijine. Diocca huadie imeni tojaridsanijinecca huada bacco tadsapi taminedeni poccadeni soldadodenima Diodsa jadsire inamananijine. Najaro huadadsa Dio Dacorabote deni tojahitohui.

<sup>15</sup> Najaro imapi Jesocristo ia mari tocanabaqqquidsa ajama napode: —Pina ticca odsadsa bobotide qquedsimahijinecca huada ssamoqqquiri tiquinajarossa nanitohui. Ohua occanipomanicca huada ssamoqqquiri tiquinani. Nadsapi tibodideni huatomananissa tadsa tiadeni tecahuaridsamanaji. Pina ticcadeni eteroma tinoccodeni barijarossa tiquinaji. Nema tiquinadsapi ima bicani ticajimananitohui. Naraha otohui timadimana-jeradsa occanipomadsapi pina madija ccoroje cappinajarissa tiquinanitohui –nade.

<sup>16</sup> Nadsama Satanacca dodosse tabaqqquidenipa ajijaro dsamacca taminedeni huapima poccadeni madijama inequeriqquimanajari. Aja inequeriqquimanahihuaajicca dsama onini jiodideni atti ebreodsapi: Aramajedo, quinajari. <sup>17</sup> Nadsapa Diocca dodosse 7 quinajari jicahicca pocca tasaocca jappopponihuaaji sso inajaro. Nadsapi memehuaajicca Diodsa dada toqqquimahuaji atti mohui ahuatojaro. Nahi Diocca huihuittari bicabote cahittarinihuaaji pohua atti mohui tehe qquenajaropi: —¡Jidapapi jicani! –najari. <sup>18</sup> Nadsapi ssissiede ssiehe canajaro. Mohuini jidsa tajaro naqui tomohuiridsajaro. Ttottorode naqui ttororo canajaro. Nadsapi nami jadsirema dsa dsa najaro. Madija ajijaro dsamadsa madimanapodsama namidsadsa caji taporaha ajijaro namidsadsapi denima dacorajaro. <sup>19</sup> Nadsapi namidsadsa dacorajarojine odsa panani deni tojanicca Babironia nocconidsa huacca nadsapi arobeni 3 nehe tojajaro. Dsama onihi onihi naridsajarocca odsa panani naqui tohuedimaridsajaro. Diopa Babironiacca ima huati ajama-jaradsa pocca najidsohue dacorajaro ponidsa inanjaro. Pocca huadie poni dse inanjarojine. <sup>20</sup> Passo imenidsa dsama

huihuittidsacosseri najaro, ssono huapima naqui amossi naridsajaro. <sup>21</sup> Nadsapi memehuaajicca passo ccara tojani pina sibassa najaro naqui catojaronajaro. Bedeni jerani, pina 40 kilossa najaro. Najaropi madijadsa catojariridsajaro. Nadsapa Diodsa tatamasso quinajari, najaro najidsohue pohuadenidsa oppina tadsa.

## 17

### *Amoneje huananehe imeni cajjaropi Diocca najidsohuedsa tojanitohui*

<sup>1</sup> Nadsapa Diocca dodosse tabaqqui 7 quinajari tasao cajimanajarideni ojariapa ohuahuaaji ccajonadsa huati tajari: —Nija, ticcajonaji. Tiadsa ima ahuate onanana -najari. —Aji amoneje passo tetepidsa huittarijaropi huananari. Ponicca imasiri manaconi Dio inajidsonicca ima qqui tinanijine -najari. <sup>2</sup> —Jehe, dsama huapimacca tamededeni poccadeni madijama ponicca huananehedsa toquejenaridsajari. Pina noccodeni janoqquri nahijine dsedse coma tanicca dse naridsamanajarissa najaro -najari. (Ponicca huananehecca imapi: Diodsa huatideni ajamamanadsa dio pohuamaccadsa huahuatidsemana najari.)

<sup>3</sup> Nadsapa Dio Corime itedsejemacca ima ohua qqui tonanajari. Dsama huamoni ssono caji, siba caji tanihuaaji Diocca dodosse ohua tohuaccajari. Nadsapi nanihuaaji qqui onaneje bani siri maccohuidsa amoneje huittarini qqui onajaro. Bani siripa tati 7, ori 10 najari. Pohua huapidsa dsodo nani ijijaro. Najaro dsodo nanipi oppina tani, Diodsa tabaccora tajaro. <sup>4</sup> Bani siri idedsa huittarijaropi etero bicani sohueni macconi quejemani huedsajaro. Mattonicca, huaribonicca, bijinicca, issonicca huapima oro nahatoni cajijaro. Siba bedeni bicabote, perla noponi oro tadsajani quejemani cajidsamaro canajaro. Poni dsapanidsa dsedse oro nahatoni dsojo tojidsajaro. Ponicca dsedsedsa ijijaripa ponicca huananehecca ima. Diodsa ima oppina tanicca, tabaccora tanicca ijinissa tajaro. (Najaro imapi ponicca tabaccorehe, dio pohuamaccadsa huatidsejarocca ima.) <sup>5</sup> Assarinicca dsodo nanipi imittanijine ssamo inaccani. Najaropi ajima najaro: Odsa panani imeni Babironiapi huananehe jinede. Ponicca marinajajine ibohue, tabaccorehe tojaridsadsapi dsama huapimadsa ima tohuajari nadsa tehe tojaridsajaro. <sup>6</sup> Qqui onadsapi obodidsa nahato onajaro: Ponipi nocconi jano tajaro. Diocca madija emenedeni, Jesocristo tahimari ecomeramanadsa inajicaridsamanajari emenedeni naqui dse nadsapi nocconi jano tajaro.

Najaro ima qqui onadsapi ojabojo najaro. <sup>7</sup> Nadsapa Diocca dodosse ohuadsa huati tajari: —¿Nejecotohui tijabojo najaro? Aji amonejecca ima ahuatora taraha tia onahattana. Aja bani siri tati 7, ori 10 najari pohua idedsa amoneje huittaridsa eccaridsajarocca ima naqui ahuatora taraha tia onahattana -najari. <sup>8</sup> —Aja bani siri qqui tinajaripa tahide madiporaha jidapapa pocca ima jicani. Naraha pohuapa nidsa nami odini huaji tanicadsa qquenahi ojarihitothui. Qquenahi nattipa coridsa imeni jororo cananihuaji pohua dsoqquehicca ima inahana-dsanaponitohui. Nadsapa ajijaro dsamacca madija tahide dsama nahatoponidsama camittehe cajimana-dsanapohuijinecca papeodsa onideni nohuerajarideni bani siri qqui toquinadsapa bodideni jabojo quinahitohui. Najari bani siripa madipojari, jidapapa madi-jarahi, nidsa dsotode canajoranipomadsa madija inajabojobaqquihitohui -najari Diocca dodosse ohuadsa.

<sup>9</sup> Nadsapa denima huati huati tajari: —Ajijaro ima timittanissa tanijine najo tani. Diocca tohuattehe cajjarina mittahitohui -najari. —Aja bani siri tati 7 najaricca imapi ssono 7 najarodsa amoneje huittarijaro. Tati 7 najaricca ima onihi naqui tamine 7 quinajari. <sup>10</sup> Najari tamededeni mota 5 quinajaridenicca cacahuhepi jicapojaro. Ohuahapa jidapana dsama cacahuade tojaccahi. Ohuahapa nidsa dsotode dsama cacahuade tojahitohui. Naraha najari tamine dsama ecahuaridsadsapi huajano huapi

tजारहितohui. <sup>11</sup> Bani siri tahide madiporaha jidapana nohueraccajaripa tamine 8'cca tojahitohui. (Caria attidsapi: octavo, quinajari.) Tamine 7 quinajaridenidsa quejemaporaha nidsa dsotode tamine 8'cca tojadsapa coridsa imeni jororo cananihuaji pohua dsoqquehicca ima inahana-dsanaponitohui.

<sup>12</sup> —Bani siri ori 10 naha qqui tinapojaripa tamine 10 quinajaricca ima. Najaridenicca cacahuehepi nohueraccani. Nidsa dsotode bani siri tedseje dossehe cajimanadsapa maji ojariara dossede toquejenahitohui. <sup>13</sup> Nadsapa tamine 10 quinajarideni poccadeni dacorehe, poccadeni cacahuehepi bani siridsa inanamananijine jehe canirere canahitohui. <sup>14</sup> Najaridenina poccadeni madijama Edede Bedidsa jadsire imeni inanamananitohui. Naraha Edede Bedipa dacorehe deni tojanicca cajijarijine inajicahitohui. Pohuadsa toquejenajaridenipa Dio icattejidsa-baqqujari. Pohuadsa disseraqquri najari. Tamine huapi taraha Edede Bedi Jesopa huapimacca tamine deni tojahicca ojarijari. Madija medse totonanadedeni naco huapi taraha pohuapa huapima Medsededeni deni tojajari –najari.

<sup>15</sup> Nadsapa Diocca dodosse denima ohua mari canajari. Pohua attipa: —Aji passo qqui tinajaro tetepidsa amoneje huananari huittari canajarrocca imapi madija huapideni onihi onihi cajiridsamanajarideni, madija ohuaha ohuaha naridsamanajarideni, tohuatti onihi onihi cajiridsamanajarideni, dsama onihi onihidsa madiridsamanajaridenicca ima najaro. <sup>16</sup> Nadsama bani siripa pohua ori tamine 10 quinajarideni tedseje amoneje huananari ettajomananitohui. Ponicca etero ssiti quinadsapi ccorojani inebomananitohui. Poni imani naqui jipamanahitohui, dsippodsa coro idsanamanadsapi ono tojanitohui. <sup>17</sup> Tamine 10 quinajaripa ssamoqquri naraha Dio Pohua jipa tahicca inanamananijine, bodideni inanajorabaqqujari. Pohuadenipa: “Bani sirina deni tojahi ojari nana” quinadsa jehe canirere canajari. Nadsapa bani siridsara iboraqquri dsanapomanajaria Dio Pohua huati tapojaricca ima jicani bacco toquinahitohui. <sup>18</sup> Nadsama amoneje huananari qqui tinajaropi odsa panani imenicca ima. Najaro odsa pananipi dsama onihi onihi naridsajarrocca taminedenidsa dossede tojajaro –najari Diocca dodosse ohuadsa.

## 18

### *Odsa panani imeni Babironia jicanissa tajaro tahimarini*

<sup>1</sup> Ima qqui onapojaro jicadsapi Diocca dodosse ohuaha memehuaji ccaronahi qqui onajari. Dossehe dacoranicca cajijari. Pohua dsibehinejinepi nami huapima tossiajabaqquijaro. <sup>2</sup> Nadsapa pohua atti mohui dacoradsa huahua najari:

—¡Babironia jicani, jicani! –najari. —Babironia odsa panani deni tojanicca jicani. Jidapapa Babironiadsa Satanacca dodosse tabaqqui tocorimedenira madimanahi. Abaridsa, mori, eppe cajih oppina tahicca huapima madimanahi.

Bani siri huadi tahicca naco madimanahi.

<sup>3</sup> Aji Babironia jicajaropi dsama huapimacca madija ponicca huananehedsa toquejenaridsajari.

Noccodeni janoqquri nahijine dsedse coma tanicca dse inanaridsa-baqqujarissa najaro.

Dsama huapimacca tamine Diodsa iboqquri najarideni ponicca huananehedsa toquejenajari.

Ponicca madija todsepetaji bicabote tohui disseraqquri, jijipa huaticcara tahicca tohui disseraqquri najarijine

dsama huapimacca dadadedeni Babironiadsa pohuadeni dsepetaji da da quinadsapa dsiniro tosseridsamanajari.

Najaro ima huapimajine Babironia jicajaro

–najari Diocca dodosse atti.

<sup>4</sup> Nadsapi memehuaji atti onihi omittadsapi ajima najaro:

—Occa madija Babironiadsa timadimanajaropi ponicca imasiridsa tiquejemamana-  
jeranijine jai tijenaji.

Babironiadsa najidsohue ssonarinitohui.

Najaro najidsohue dsori ticanirenijine huajiji tinaji.

<sup>5</sup> Babironiaccas madija imasiri inanamanapojaropi inehemamanajaro.

Pina ssono dequerajaro memehuaji bacco tajarossa najaro.

Poccadeni ima tabaccora tajaro Dio huati ajama-jarajari.

<sup>6</sup> Babironiapi madija inajidso-baqquijari manaco ponidsa najarossa nehe tojanitohui.

Pina ponijinessa nehe denima oppina tehe tinanamanaji.

Madijadsa imasiri inanaridsajaropi pina dsedse bidabote dse inanabaqquijarissa  
najaro.

Manaco ponidsa denima oppina tehe dse tinanamanaji.

<sup>7</sup> Coma tanijine tinajidsomanaji. Ponipi: “Ohuapi deni ojani” naneje najaro.

Poni dsapanitaji bicabote tohuini disseraqquri dsanapomanajari manacopa ponidsa  
comani imeni tinanamana-dsanapoji.

Poni bodinidsa: “Ohuapi ajidsa omadijaro, tamine deni tojanicca ojajaro.

Tabira ocaja-jerani. Nanajidso ojajeranitohui” najaro.

<sup>8</sup> Poni attini nema nadsapi Dio Dacorabote attia: “Babironia onajicana” nadsapa  
ponidsa najidsohue imeni amadsati ssonarinitohui.

Ponicca madija huapi taha comabotedsa cacotaridsahitohui.

Motapa ocasserani ahuamanahitohui. Motapa pemimanahitohui.

Nadsapi Babironia diji tehe jicanissa tanitohui

–najari Diocca dodosse.

<sup>9</sup> Nidsa dsama huapimacca tamine, aja Babironiaccas huananehedsa toquejenajari,  
pohuadeni tohuini quinahiccadsa toquejenajari huapimapa odsa panani diji tadsa es-  
seni toccamacossani qqui toquinadsapa oji oji quinahitohui. Pohuadenipa ponitohui  
oji oji quinahitohui. <sup>10</sup> Pohuadenipa Babironiadsa najidsohue ssonarijaro noppineni  
cappinamanadsapa huajima cattomama canahitohui. Pohuadeni attipa:

—¡Jaho! Babironia tiapi icca odsa panani deni tojanicca dacorabote tijaraha  
amadsati ticca imasiri manaconi najidsohue tiadsa bacco tajaro –quinahitohui.

<sup>11</sup> Nadsapa dsama huapimacca dadadedeni naco pohuadeni dsepetaji mittade  
nohueradsapa ponitohui oji oji quinahitohui. <sup>12</sup> Nadsama Babironia bica taccadsa  
pohuadeni dsepetaji eheccajonamana najaropi oro, plata, siba bedeni huatini ccara  
tanicca, onihipi perla noponi bicabote, etero bicani onihi onihi nehe pina lino, seda,  
macconi purpura, denima macco tajaro naqui eheccajonamana najaro. Ahua majoni  
bicabote cajinicca, elefante ino nahatohui, ahua huatini ccara tanicca nahatoni,  
ppejo onini bronce nahatoni, ppejo onini hierro nahatoni, siba sseque tajaro onini  
marmol nahatoni naqui eheccajonamana najaro. <sup>13</sup> Dsamatapa quequejema canela,  
dsamatapa quequejema majo tahicca ohuaha ohuaha naco huemahi eheccajonamana  
najari. Ahua majiconi tohuessidsa majo bica tajari, ahua onihi majiconi mirra  
eheccajonamana najari. Majojo, uva ppejene, ahua bono oribo oquine, harina  
nappori tahicca, aroso jidsadsa trigo naco eheccajonamana najari. Bohui, bojo  
todsepetaji jojorede, edede, bojo madija jojorede, nami jojoppade bojo joca joca  
ihicana najaro, madija naco ibotibaqquimanadsa manaconedenitohui da quinahijine  
eheccajonamana najari. <sup>14</sup> Naraha Babironia jicadsapi dadadedeni ponidsa ajama  
quinahitohui:

—Jidapapi ahua bono ocassabote tohuini tanicca ticappiranissa tani.

Aji tia ticajjarocca huapima bicabote paji jicarihe nema dsanaponitohui –quinahito-  
hui.

<sup>15</sup> Nadsapa dadadedeni Babironiadsa pohuadeni dsepetaji da da quinapodsa dsiniro sseqqiri napojaridenipa ponidsa najidsohue oppina tehe ssonarijaro noppineni cappinamanahitohui. Nadsapa huaji tanidsa domo huadsa oji oji quinahitohui.

<sup>16</sup> Pohuadeni atti ajama quinahitohui:

—Jaho, Babironiapi odsa panani deni tojaniccaraha jicajaro. Tohuati nahana tani.

Najaro odsa pananipi pina amoneje poni nabicajarocca imassa najaro.

Etero bicabote lino huedsa, onihi purpura huedsa, onihi macconi huedsa najaro.

Poni nehebedsodsapi oro, siba bedeni dsibehi tajaro, perla naqui mattonidsa, huaribonidsa, bijinidsa, issonidsa cajijaro.

<sup>17</sup> Jehe poni bodini huato-jeraraha amadsati najidsohue bacco tajaro.

Ponicca dsiniro jica, bicabote jica najaro –quinahitohui dadadedeni.

Nadsapa canoa imenibote jinededeni, pohuadenidsa jahijonajarideni, canoa imeni ahaccadedeni, passo imenihuaji tatarabaidssadedeni huapimapa huajima cattomama canahitohui. <sup>18</sup> Babironia diji tani essenitoccamacossani qqui toquinadsa johua johua quinahitohui. Pohuadeni attipa: —¡Odsa panani deni tojanicca najarossa najaro nohuerani, nohuerani! –quinahitohui. <sup>19</sup> Nadsapa ojiejine ocasserani ahuamanahi ahuato tanijine pohuadeni tatidsa ssiqui huira narimanadsa jadsirema oji oji quinahitohui. Oji quinadsa attidenipa:

—¡Jaho, Babironiapi deni tojaniccaraha tohuati nahana tani!

Babironiadsapa dsiniro sseqqiri naha madimanajari.

Pohuadenijine passo imenicca canoa imeni jinededeni dsiniro huemani cajirid-samanajari.

Naraha huada ojarie amadsati jicani –quinahitohui.

<sup>20</sup> ¡Nadsapi memehuaji timadimanajarodenipi ajijaro odsa panani jicajarodsa tetidsemanaji!

Jesocristocca dodosse tabaqqui, Dio Atti cacomeraqqiri najarideni, Diodsa tiquejenajaroden huapima tetidsemanaji.

Ponijine nanajidso tiquejenaridsapojaro manaconi jidapanana Dio inajidsojaro.

<sup>21</sup> Nadsapa Diocca dodosse dacorabotepa siba imeni idimacossa najaro. Najaro sibapi imenibote pina aroso jidsadsa trigo ririassa najaro. Najaro siba imeni passo imenidsa coro idsippadsa pohua attipa:

—Babironia tiapi odsa panani deni tijaniccaraha ajijaro sibassa tanitohui.

Paji amossi taridsapi tia qqui quinapoma-jeranitohui –najari.

<sup>22</sup> —Nadsama ticca jahui huapimadsapi titire oni arpa mohui todidi, totore mohuini todidi, jejei mohui todidi nadsapa madija mittamanapoma-jarahitohui.

Ticca tatarabaidssadedeni naco amossihuahitohui.

Trigo riria mohuini naqui todidi nanitohui.

<sup>23</sup> Tiadsa jojororo ssiejene naco nohuerahitohui.

Cacajirehicca ejete mohuini nohueranitohui.

Ticca todsepetaji dadadedeni dsama huapimadsa deni toquejenaraha jicanitohui.

Tiapi dsama huapimacca madija ticamaidsabaqqui-ridsajaripa

pina dsoppineje madija icamaidsabaqquijarissa tajarojine paji amossi tarinitohui –najari.

<sup>24</sup> Jehe, najaro odsa pananidsapi Dio Atti cacomeraqqiri najarideni inajicarid-samanajari. Diocca madija toquejenajarideni naco inajicaridsamanajari. Aja dsama huapimacca madija ijinedeni ahuamanadsa emenedeni toccaridsajarojine Babironiadsa Diocca najidsohue ssonarijaro.

## 19

*Memehuaji huatidsehe tojaridsajaro*



<sup>1</sup> Nadsapi Babironia diji tehe jicani nattinipi memehuaaji madija huapima attideni mohui tehe omittajaro. Pohnadeni attipa:

—¡Areroia, ia Medsede Diopa bica tahi! Pohnapa tossiejehe jinede.

Ima huapimadsa deni tojajari. Pohnana denima dacorahi ojarijari.

<sup>2</sup> Diopa pajissehedsa ima nattome inadsapi Pohnajine pajiranissa tajaro.

Babironiaccia huananehe dsama huapimadsa dsapa taridsajaro manaconipi ponidsa ssonarinitohui.

Ponijine Diocca medse emenedeni toccaridsajari manaconedeni naco najidsohue oppina tajarodsa Dio inajicajaro –quinajari.

<sup>3</sup> Nadsapa huati toquinapomajari:

—¡Areroia, ia Medsede Diopa bica tahi!

Babironiapi diji tehe jicaraha essenitoccamacossanipi nebo-jeranitohui –quinajari.

<sup>4</sup> Nadsapa cacahuadedeni 24 quinajari, camittehe cajimanajari 4 quinajarideni tedseje Diocca huihuittari bicabote tadsajanima pohnadeni baccohuaaji domodeni pona nadsa Diodsa huatidsemanajari. Pohnadeni attipa:

—¡Pajissa nema nana! ¡Areroia, ia Medsede Diopa bica tahi! –quinajari.

<sup>5</sup> Nadsapa Diocca huihuittari bicabote cahittarinihuaaji tohuatti omittajaropi ajima najaro:

—Huapima Pohnadsa medse tiquejenajaro icca Diodsa jiri jiri tiquinaji.

Huapima Pohnadsa tidsepedeni ijijaro,

Pohna noppine cappinaqquri tiquinajaro, aji deni tiquejenajarodeni, ajimani tiquejenajarodeni naqui

Diodsa jiri jiri tiquinaji –najari.

### *Edede Bedi cacajirehicca ejete*

<sup>6</sup> Nadsapi memehuaajicca madija huapima attideni mohuini omittaneje bica tajaro, pina hueni ssahaha canajarossa najaro. Mohuini onihi naqui pina ttottorode mohuini dacorajarossa najaro. Attidenipa:

—¡Areroia, ia Medsede Dio dacorabotepa deni tojahi!

Jidapana huapima ecahuabaqquihijine pocca cacahuehe bacco tani.

<sup>7</sup> ¡Etidsena, etidseri nana! Diodsa: “Deni tijani, bica tinani” inana.

Jidapanana Edede Bedi cacajirehicca huada bacco tani.

Pocca amoneje tojanijinepi najorani.

(Najaropi pocca madija najoramanajari, pohnadsa madimanahijine.)

<sup>8</sup> Etero huadsadsa najoranjinepi ponidsa etero onini lino bica tajaro, nopo, dsibehi tajaro da inajaro.

Najaro etero bicanicca imapi Diocca madija toquejenajarideni bodideni inahirebaqquidsa Pohnadsa madimanahissa tajari –quinajari.

<sup>9</sup> Nadsapa Diocca dodosse ohuadsa huati tajari: —Dsodo taji: Edede Bedi Jesopa pocca madijadsa huahua najari, pocca cajicajicca jipaqquedsa jai tojedsimahijine. Jai tojedsimajaridenipa huatidsehe imeni cajimanahitohui –najari. Nadsapa denima huati tajari: —Aji huati huati onajaropi Dio Atti pajissacca –najari.

<sup>10</sup> Nadsapi Diocca dodosse baccohuaaji opitodsa ohuitta nadsa pohnadsa ohuatidsemenijineraha ohuadsa huati tajari: —Ohuadsa nema tejeraji. Ohua naqui Diocca medse ojani. Pina tia timecotedeni tedseje Jesocristo tahimaridsa disseraqquri tiquinajarossa onani. Diodsara tetidseji –najari.

Aji Jesocristo tahimari bicabotepi Dio Pohna Atti cacomeraqquri najaridenidsa inanadsana ehecomeramana najonaropaji.

### *Bojo nopenhidsa huittarijicca ima*

<sup>11</sup> Nadsapi qq̄ui onaneje meme tohuabadsa bojo nopohui ahuatōjari. Najari bojodsa huittarijari Pajissehe Jinede. Puhuapa maidsera tajari. Dsama ecahuadsa, jadsire inanadsa naqui pohuajine pajiranissa tajaro. <sup>12</sup> Puhua nocco dsibehi tajaro. Pina dsippo jororonissa najaro. Puhua tatidsapa tamine tatidenicca huapi taha tassaqquidsa huittarijari. Puhua oni dsodo nani cajiraha pohua motta nahato tahi ojari najari. <sup>13</sup> Pocca eteropi tohuemenedsa ibedsippani macco tajaro huedsajari. Puhua onipa Dio Atti. <sup>14</sup> Pocca madija memehuajicca jajadsirededeni pohua natti jai tojamissajari. Poccadeni etero onini lino bica tajaro, nopo, obero tajaro huedsamanadsa bojo nopohuidsa huihuittariri naridsajari. <sup>15</sup> Puhua ajaridsa qq̄uenajaropi pina massito cajadsire-qq̄uimerajarossa najaro. Najarodsa dsama huapimacca madija inajidsoridsa-baqq̄uihijine. Dsama huapimacca tamine dacorabote tojadsapa pohua atti dacoradsa madija dosse dosse nahitohui. Puhuajinepa Dio Dacoraboteca huadie tojani qq̄ui toquinahitohui. Puhuapa Diodsa iboqq̄ui najarideni ttai idsanacossabaqq̄uidsa mere huajahissa tahitohui. Pina uva ppejene tocchijine ttai ttai quinajarissa nahitohui. <sup>16</sup> Pocca eterodsa, pohua panaccodsa naqui dsodo nanicca imapi: —Tamine huapi taraha Jesona tamine deni tojahi ojarihi. Medse cajimanahi huapi taraha Jesona ia Medse deni tojahi ojarihi —najaro dsodo nani.

### *Bojo nopohuidsa huittarijari deni tojari*

<sup>17</sup> Nadsapa qq̄ui onanaja Diocca dodosse majidsa huarihi qq̄ui onajari. Puhuapa meme abari banicca jipaq̄ui najari meme napicossanidsa jahiridsajaridenidsa jadsirema huahua najari: —¡Nija, jai tijajonaji! Diocca jipaq̄ue imenibotedsa tijipamananijine tiqueriq̄uimanaji —najari. <sup>18</sup> —Tijipamananijinepi tamine imedeni, soldadodenicca tamine imedeni, jadsirecca dacoraqq̄ui najari imedeni, bojo imedeni, bojodsa huihuittaride imedeni, madijacca dodosse toquejena-jarajari imedeni, madijacca dodosse toquejenajari imedeni, ajamani toquejenajari imedeni, deni toquejenajari imedeni naco tijipamananitohui —najari.

<sup>19</sup> Nadsapa qq̄ui onanaja bani siri jidsabote, dsama huapimacca taminedeni, poccadeni soldadodenima jadsire inanamananijine queriq̄uihi qq̄ui onabaqq̄uijari. Aja bojo nopohuidsa huittarijari ssonarimanahijine, pocca soldadodenidsa naco ssonarimanahijine najoramanaha domo huajari. <sup>20</sup> Cahadiredsapa bojo nopohuidsa huittarijarina pocca madija tedseje bani siri jidsabote dama quinajari. Bani siri ohuaha maidsehe mamaride naco dama quinajari. Najari bani siri jidsabote tocattahiuaji canahatori canapojari. Najari naco madija icamaidsabaqq̄uidsapo bani siri jidsabote janodsa inajanoridsapojari. Najari pohuajine naco bani siri jidsabote corimedsa huatidsemanapojari. Nadsapa najari bani sirideni pamahapa camittaqq̄ui naraha coridsa imeni azufre jororo cananidsa cororo todsippajari. <sup>21</sup> Nadsapa bojodsa huittarijari pohua ajaricca massito cajadsireqq̄uimera najarodsa bani siricca soldadodeni inajicajari. Nadsapa meme abari madija imedeni jipamanadsa accaraq̄ui najari.

## 20

### *Huajano 1,000 nahicca ima*

<sup>1</sup> Nadsapa qq̄ui onapomanaja Diocca dodosse nami odini huaji tanicca pipicoma ccaronajari. Cadena imehibote naco pohua dsepedsa dsojo inaronajari. <sup>2</sup> Najari Diocca dodossepa huama imehibote dama inadsa jore inaq̄uijari, huajano 1,000 (mil) naha ccaridsa-jarahijine. Najari huama imehibotepa maittaccadsama pina maccassa naha ahuatopojari. (Najarina Adana Ebadeni icamaidsabaqq̄uipojari.) Puhua onipa Satana, Diocca huadi najari. <sup>3</sup> Nadsapa nami odini huaji tanihuaji coro idsimadsa noccobiji ecossanissa tajaro, qq̄uena-jarahijine. Noccobiji huapihuaji modsassa

najarodsa nepi inacossajaro. Nadsapa huajano 1,000 naha dsama huapimacca madija icamaidsabaqqui-jarahijine. Huajano 1,000 naha jicadsana tappa inadsapu huada pamehe ccaridsadsa madijadsa maidsa maidsa naridsapomacchahitohui.

<sup>4</sup> Qqui onanaja tamedenicca huihuittaridsa jassi tariridsajari qqui onabaqquijari. Puhuadenipa ima icattemamananijine Diocca dossehe cajimanajari. Nahidsa naco madija mattodeni ca ca tojidsamaneri napojarideni qqui onabaqquijari. Najaridenipa Jesocristo tahimari nahatoqquiri najarideni Dio Atti ecomera-ridsamanajarojine inajicabaqqui-manapojari. Puhuadenipa bani siri jidsabotedsa, pohua corimedsa naco huahuatidsemana najarade. Bani siricca nanajano assaridenidsa, dsepedenidsa cajimana-jarajari. Najarideni nahatonimanahi qqui onabaqquijari. Nadsapa huajano 1,000 naha Cristo tedseje dsama huapima dossede toquejenaridsajari. <sup>5</sup> Ajijaropi madija tahide nahatoni-manapojaridenicca ima. Naraha tojicapojarideni motapa nahatonimana-jaracchahitohui. Huajano 1,000 naha jicadsana nahatonimanahitohui. <sup>6</sup> Madija nahatoni-manapojaridenidsa Diocca biquehe tojajaro. Puhuadeni bodi ssia-jacquiri, huireqquri najari. Dsoqqehe dsotodecca puhuadenidsa nohueranitohui. (Najaropi najidsohue jiquejeranicca tonahanamanadsanapo-jarahitohui.) Nadsapa Diodsa, Cristodsa dsepedeni ijimanahitohui. Diodsa huahuati toqqumade toquejena, dada toqqumade toquejena nahitohui. Huajano 1,000 naha Cristo tedseje dsama huapima dossede toquejenaridsahitohui.

#### *Diocca huadi Satana nanajidso tojahicca ima*

<sup>7</sup> Satanapa huajano 1,000 naha odi huaji tani bodidsa huedsaraha najari huajano jicadsapa tappa tadsa qquenahitohui. <sup>8</sup> Qquenadsapa dsama onihi onihidsa madiridsamanajarideni huapima ahuajicca, ahuajicca icamaidsa-baqquiridsahitohui. Najaridenidsa: Cohuajicca madijadeni, Macocahuajicca madijadeni quiquinanajari. Najarideni Satana inequeriqquibaqquijari, jadsire inanamananijine. Huapi taja najari. Pina ssiqui potera tajaro hua inanijine ssamo tajarossa quinajari. <sup>9</sup> Nadsapa jadsiretohui quinajarideni jahijonana canajari. Dsama nemanehedsa ijimanajari. Diocca madija madimanahihuaaji ijihuaajani-manajari. Diocca cattaniji pocca odsa panani bicabote denihuaajina cottaja-huajanimanaha jica najari. Naraha jororoni ppocorabote Dio dosse inaronajaro. Jadsiretohui jahijonajarideni diji tocanirea jicajari. <sup>10</sup> Diocca huadi Satana madijadsa maidsa maidsa naridsapojari manaconipa coridsa imeni azufre jororo cananihuaji coro todsippajari. Nahihuajipa bani siri jidsabote, bani siri ohuaha maidsehe mamaride tedseje cororo todsippapojari. Nahidsapa dsome, ssiaja, dsome, ssiaja ocasserani ahuamana-dsanapohuitohui.

#### *Diocca huihuittari bicabote nopo tocanajarodsa ima cattemade tojajari*

<sup>11</sup> Nadsapa qqui onanaja pocca huihuittari bicabote nopo tocanajarodsa Dio huittarihi qqui onajari. Nahidsa huittaridsa pohua tedsejemapi meme tohuatorara amossi, nami tohuatorara amossi nadsapi nohuerade. <sup>12-13</sup> Ocattoma cananaja dsoqquemana-pojarideni Dio tedsejema domodeni huajari. Nahihuajipa deni toquejenajarideni domo hua, cappiramanajarideni domo hua najari. Aja pas-sodsa je tocanirejarideni, dsamadsa jicajarideni, dsoqquemana-pojarideni huapima Diocca huihuittari bicabote tadsajanima domodeni huajari. Nadsapa dsoqquemana-pojaridenicca ima papeodsa dsodo napojaro itaboridsajaro. Aji puhuadenijine ima bicani inanaridsamanajaro, ima tabaccora tanicca inanaridsamanajaro naqui papeodsa dsodo naridsajarodsa ima cattemade tojajari. Nadsapi pina puhuadeni ima inanaridsamanajarossa nehe manaconi puhuadenidsa inanajaro. Papeo onihi naqui itabojaro. Najaro papeopi madija camittehe cajimana-dsanapohuijinecca. <sup>14-15</sup> Madija puhuadeni oni camittehe cajimana-dsanapohuijinecca papeodsa nohueradsapa coridsa jororo cananidsa hua todsippajari. Dsoqqehe coridsa imeni jororo

cananihuaji coro todsippajaro. Dsoqquehecca cacahuehe naqui coro todsippajaro. Najaro coridsa imeni jororo canajarrocca imapi dsoqquehe dsotodecca.

## 21

### *Meme dsati, nami dsati najaro tahimarini*

<sup>1</sup> Nadsapi qqui onapomaneje meme dsati, nami dsati qqui onajaro. Aji tahidecca meme, nami najaropi amossi najaro. Passo imeni naqui amossi najaro. <sup>2</sup> Dio pocca odsa panani bicabote Jerosare dsati qqui onade. Dio Pohua tedsejema memehuaaji ccaronade. Jerosarepi pina amoneje maqqui cajinijine najorajarossa najaro, bicaridsaponi nade. <sup>3</sup> Nadsapi memehuaaji Deni tojahicca huihuittari bicabote cahittarinihuaji tohuatti mohui tehe omittajaro: —Jidapapa Dio madijadsa madihi. Puhuadenidsa madi-dsanapohuitohui. Madija huapima Diocca cacahueheda toquejenahitohui. Diopa puhuadeni Cacahuade tojadsanapohuitohui. <sup>4</sup> Puhuapa inocco ppajani sse inanitohui, denima oji inejeranijine. Iadsa Dio madidsapa dsoqquehe nohue, ojie nohue, ettima oji oji inajaro nohue, coma inajaro naqui nohueranitohui. Aji ima huapima namidsa caji tapojaropi jicanitohui –nade.

<sup>5</sup> Nadsapa aja Deni tojahicca huihuittaridsa huittari canajari Attipa: —Ohuapi huapima dsati onanaridsahi –nade. Pohua Atti onihi naqui: —Ajijaro ima dsodo taji. Ajijaro imapi pajissa. Imapi pina ajijarossa nehe tojanitohui –nade. <sup>6</sup> Nadsapa ohuadsa huati tajari: —Ajijaro ima huati onajaropi tojanissa tehe jicani. Ohuapi Ohua. Ajijaro dsama nahatopo-jeradsama omadipojaro. Nidsa dsotode ajijaro dsama jicaraha Ohuapi omadi-dsanaponitohui. Madija bacco dsaridsapa passo camittehecca qqenajaro dse nahijine puhuadsa da onanitohui. Puhuadsa: Manaconi, onejeranito-  
<sup>7</sup> Aji occa dacorehema timadimanadsa Ohuadsa jehe tiquinajaro tinebomana-  
 jeradsapi jidacca huati huati onapojaro huapima tiadenidsa tojaridsanitohui. Ohuapi ticcadeni Dio ojanitohui. Tiadenipi occa ejedeni tiquejenanitohui. <sup>8</sup> Naraha Ohuadsa toquejena-jarajaridenipa najidsohue cajimanahitohui. Aja madija: “Jesocristopa ohua Idinide” quinahijine huatide cappinaqquri najari, madija Jesocristodsa pajissa quina-jarajarideni, ima tabaccora taniccadsa disseraqquri najarideni, madija pohua tesse nanadsoqquede dissera tajari najidsohue cajimanahitohui. Aja huanane-  
 hecca disseraqquri najarideni, dsoppinejedeni, siba nahatonidsa huahuatidsem-  
 ana najarideni, mamaidsadedeni naco najidsohue cajimanahitohui. Najarideni huapimapa coridsa imeni azufre jororo cananihuaji hua todsippahitohui. Najaropi dsoqquehe dsotodecca –nade. (Nanidsapi najidsohue jiquejeranicca tonahanamana-  
 dsanapohuitohui.)

### *Jerosare dsati tahimarini*

<sup>9</sup> Nadsapa Diocca dodosse tabaqqui memehuaajicca 7 quinaha tasaodsa najidsohue oppina tanicca cajiridsamanapojari ojaría ccajonadsa ohuadsa huati tajari: —Aji ticcajonaji, Edede Bedicca amoneje tojanijine najorajaro tia qqui onanana –nade.

<sup>10</sup> Nadsapi Dio Corimejine ima ohuadsa ahuato tajaro. Pina occa huadassa nadsa qqui onajaro. Ocattoma cananeje Diocca dodosse ssono dequeranihuaji ohua tohuaccajari. Nanihuaji ohuadsa ahuato inanajaro. Memehuaaji Dio pocca odsa panani bicabote Jerosare Dio Pohua tedsejema ccaronani qqui onade. <sup>11</sup> Najaro odsa pananipi Dio pocca deni tojehe, pohua ssiejenejine dsibehi tajaro. Najaro dsibehinipi pina siba huatini ccara tanicca diamante dsibehinissa najaro. Ssiaja tajaro pina cristaossa najaro. <sup>12</sup> Odsa panani huapihuajipi siba hua nahujanini dequerajaro. Motarema ccahuajanijaro. Noccobiji 12 nehe cajijaro. Najaro noccobijidsa Diocca dodosse tabaqqui ojari ojari naha huahueri naridsajari. Noccobijidsa onideni dsodo naridsajaropi jodiodenicca idi ojaría oni Isaraeri bedi 12 quinajari onideni. <sup>13</sup> Maji

ccajonahihuaajipi noccobiji 3 nehe cajijaro. Maji toccahihuaaji naqui noccobiji 3 nehe cajijaro. Arobenihuaaji naqui noccobiji 3 nehe cajijaro. Arobeni onihihuaaji naqui noccobiji 3 nehe cajijaro. <sup>14</sup> Odsa pananicca siba hua nahuajanijaro tocadacorate siba imeni 12 nehe cajijaro. Najaro siba 12 najarodsapi Edede Bedi Jeso pohua huatimadedeni 12 quinajari onideni dsodo naridsani qqui onade.

<sup>15</sup> Aja Diocca dodosse ohuadsa huati tajaripa nanattome orocca dsibehi tajaro dsojo inajari. Najarodsada odsa panani, noccobiji, hua nahuajanini naqui nattomede tojaridsajari. <sup>16</sup> Nadsama odsa panani dequeranihuaajipi pina bijini matanihuajissa caniqquimerajaro. Diocca dodosse odsa panani nattome inadsapi 2 mil, 200 kilometros (2,200) cajijaro. Dequeranihuaaji najarossa, bijini matanihuaji najarossa, tetepihuaaji najarossa caniqquimerajaro. <sup>17</sup> Nadsapi hua nahuajanini nattome inadsa sibanipi 65 metros. Najaro nanattomepi ajijaro nami nanattomedsa Diocca dodosse nattome inajaro.

<sup>18</sup> Odsa panani huapihuaajicca hua nahuajanijaropi diamantedsa nahatojaro. Odsa pananipi oro poniradsa canahatojaro. Najaro oropi pina jojo ssiaja tajarissa najaro, tocassiejqquimera najaro. <sup>19</sup> Aji odsa pananicca hua nahuajanijaro tocadacorate siba imeni 12 quinajarodsapi siba bedeni dsibehini bicabote nepi naridsajaro. Siba bedeni janonipi onihi onihi naridsajaro. Oninipi ajima najaro: Tahidecca siba imenidsapi diamante dsibehi tajaro ijiridsajaro. Dsotodeccadsapi sapiro sohue tajaro ijiridsajaro. Onihi 3'ccadsapi acata macconi janoni cajini ijiridsajaro. Onihi 4'ccadsapi esemeraoda sohueni ssiaja tajaro ijiridsajaro. <sup>20</sup> Onihi 5'ccadsapi onise sohue tajaro noponidsa quejemajaro ijiridsajaro. 6'ccadsapi robi macco tajaro ijiridsajaro. 7'ccadsapi crisolito huesse tajaro ijiridsajaro. 8'ccadsapi berilo macconi, sohueni, huesseni ijiridsajaro. 9'ccadsapi topasio macco-cco najaro ijiridsajaro. 10'ccadsapi crisoprasa sohueni huesse tajaro ijiridsajaro. 11'ccadsapi jasinto sohueni ijiridsajaro. 12'ccadsapi amatista sohueni idira tajaro ijiridsajaro. <sup>21</sup> Aji noccobiji 12 najaropi perla noponi dsibehi tajaro 12 nehe huacossaridsajaro. Perla ojariepi noccobijidsa ojari ojari naridsajaro. Odsa pananicca jahui huapimapi dsibehini oro ponira ijijaro, tocassiejqquimera najaro.

<sup>22</sup> Najaro odsa pananidsapi Diodsa dada toqquima odsa qqui onejerani. Dio Atti mamari naqui nohuerajaro. Naraha ia Medsede Dio Dacorabotena nahidsa madijari. Edede Bedi Jeso naco nahidsa madijari. Iqueriqquidsa etidsenijinepi pohuadeni pamahadsana ehetidse nanijine. <sup>23</sup> Diocca odsa pananidsapa maji nohue, abadsico ssiejene nohuerahi. Ssiaja taridsajaropi Dio pocca deni tojehe, Pohua ssiejene paji. Edede Bedi naco pina jojorossa najari, pohua ssiejene ssiaja taridsajari. <sup>24</sup> Aji dsama onihi onihi naridsajarocca madija huapimapa najaro odsa panani ssiajanidsa madimanahitohui. Dsama onihi onihicca taminedeni naco poccadeni biquehe deni tojanicca Diodsa da quinanjine najaro odsa pananihuaaji dsojo idsimamanahitohui. <sup>25</sup> Noccobiji tohuabehe nema dsanaponitohui. Dsomepi nohuerani. Ssiaja ponira nema dsanaponitohui. <sup>26</sup> Dsama huapimacca madija poccadeni biquehe deni tojanicca Diodsa da quinanitohui. Poccadeni dsamacca biquehe naqui da quinanitohui. <sup>27</sup> Najaro odsa pananihuaajipi Dio jipera tahicca nohueranitohui. Madija imasiri totonanadedenipa jahidsima-jarahitohui. Madija mamaidsadedeni naco jahidsima-jarahitohui. Aja Edede Bedicca papeo camittehe cajimana-dsanapohuijineccadsa onideni dsodo naridsajaridenira jahidsimahi ojarhitohui.

## 22

<sup>1</sup> Nadsapa Diocca dodosse huene bicahi ohua qqui tonanajaripa passo ssahua tajaro, tocassiejqquimera najaro. Najaropi passo camittehecca. Dio, Edede Bedi pohuadeni pamahacca huihuittari cahittarinidsa passo qqjenajaropi huene tocajajari. <sup>2</sup> Najari



huenipa odsa pananicca jahui nocconi motta tohuaccajari. Ahua camittehecca hueni inididsa ahuaaji hua, jippehuaji hua najari. Abadsico cajari cajari bobono najari. Huajano ojariadsa bono cajjaripa 12 najari. Najari ahua eppepa dsama huapimacca madija nomiqquiri naha madimana-dsanapohuijine. <sup>3</sup> Najaro odsa pananihuajipi tabaccorehe nohue, Diocca najidsohue naqui nohueranitohui. Nanidsapi Dio, Edede Bedi pohuadeni pamahacca huihuittari cahittarinitohui. Diocca medse huapima pohuadeni pamahadsa huatidsemanahitohui, jiri jiri quiquinanahitohui. <sup>4</sup> Dio Pohua assire qqui quinahitohui. Pohua oni pocca medse huapima assaridenidsa dsodo naridsanitohui. Najaro imapi Dio Pohua pocca toquejenajari. <sup>5</sup> Nanidsapi dsome nohueranitohui. Nahihuaji madija madimanajaridenipa jojororo tohui, maji ssiejene tohui quina-jarahitohui. Ia Medsede Diona huapimadsa ssiaja inanaridsanitohui. Nadsapa Dio pocca medsedeni huapima dossede toquejena-dsanapohuitohui.

### *Jesocristo ccanipomahicca imapi huajira tani*

<sup>6</sup> Nadsapa Diocca dodosse ohuadsa huati tapomajari: —Ajijaro imapi pajissa. Imapi pina ajijarossa nehe tojanitohui. Ia Medsede Diopa Pohua Atti cacomeraququiri najaridenidsa Pohua Atti inanaridsapojaro. Najari Diopa ohua dosse naronajari. Ohuapi pocca dodosse, pocca medsedenidsa pohuadeni tedsejemacca ima tojabote nanicca ahuato onananijine occaronajaro -nade ohuadsa.

<sup>7</sup> Ia Medsede Jeso attipa: —Occanibote nani -najari. —Diocca ima itedsejemacca ajijaro papeodsa dsodo nanidsa ibora tajaripa occa biquehe pohuadsa onananitohui -nade.

<sup>8</sup> Ohuapi Huano, aji jidapanacca, itedsejemacca Diojine huapima ohuadsa ahuato inanadsa omittajaro, qqui onajaro. Najaro jicadsapi Diocca dodosse ohuadsa huati huati tajari baccohuaji opitodsa ohuittajaro, pohuadsa ohuatidsenijine. <sup>9</sup> Naraha pohua attipa: —Nema tejeraji. Ohuapi Diocca medse ojani. Pina tiassa, pina timecotedeni Dio Atti cacomeraququiri najaridenissa onajaro. Aja madija huapima ajijaro ima papeo dsodo nanidsa iboraququiri najaridenissa onehe Diocca medse ojani. Diodsara tetidseji -nade.

<sup>10</sup> Pohua atti onihi naqui: —Diocca ima ajijaro papeodsa dsodo najaropi madija hua hua quinahijine ahuatoranidsa tecahua tejeraji. Ajijaro ima dsodo nanicca tojanijinepi huajira tani. <sup>11</sup> Najaro ima tohuajiradsapi madija tabaccora tajari, bodi oba tajari naco poccadeni tabaccorehe inanamanaccanijine. Apaja, bodideni cacajiqquimerahijine pajiramana-jarahi. Naraha madija bica tajari, bodi huire tajari naco ima bicani inanamana-dsanaponijine bica tani -nade Diocca dodosse ohuadsa.

<sup>12</sup> Ia Medsede Jeso attipa: —Jehe, occanibote nani. Ima bicani inanaridsa-manajarodenipa najarossa nehe pohuadenidsa da onaridsanitohui. Naraha ima tabaccora tanicca inanaridsa-manajarodenipa najarossa nehe pohuadenidsa da onaridsanitohui. <sup>13</sup> Ohuapi ohua. Ajijaro dsama nahatopo-jeradsama omadipojaro. Nidsa dsotode ajijaro dsama jicaraha ohuapi omadi-dsanaponitohui -nade Jeso.

<sup>14</sup> Nadsapa madija pina poccadeni etero ssahua quinararossa nadsa bodideni tohuireridsadsapa Dio pocca biquehe pohuadenidsa inanaridsanitohui. Najaridenipa ahua bono camittehecca jipamanahi bica tahi. Diocca odsa pananicca noccobijidsa jai tojedsimahi naco bica tahi. <sup>15</sup> Naraha aja madija Jesocristodsa pajissa quina-jarajarideni, dsoppineje doridsa disseraquiri najarideni, huananehedsa disseraquiri najarideni, ijinedeni ahumanajarideni, siba nahatonidsa huahuatidsemana najarideni, maidsehedsa disseraquiri najarideni, pohua tesse mamaisadedeni, najarideni huapimapa Diocca odsa pananidsa jai tojedsima-jarahitohui.

<sup>16</sup> —Ohuapi Jeso, otahimaridsa titiqueriququiridsamana najarodenidsa occa dodosse memehuaajicca dosse onaronajari, najaro ima nemanene timittamananijine -nade.

—Ohuapi maittaccadsama Isaraeri potemahidenicca tamine Dabi Potemahi ojani. Ohuapi pina dsidsidsamassacca abadsico bedi ssiaja tocanajarissa onajaro -nade Jeso.

<sup>17</sup> —Nija, ticcajonaji -quinahi Dio Corime, Edede Bedicca amoneje tadsajani. (Najaro amonejecca imapi Jesocristodsa ihiqueriqqui najarocca ima.) Madija ajijaro ima mittamanajarideni naco: —Jehe, ticcajonaji -quinana. Passotohui bacco dsarijari dsede jipa tadsapa ccajonana, passo camittehecca manaconi jirehe dse nahijine.

<sup>18</sup> Diojine ahuatojaro itedsejemacca imapi ajijaro papeodsa dsodo nani mittamanageridenidsa ohuatti ajima onajaro: Madijapa ajijaro imadsa ima onihi inaharini oppina tani. Ima onihi tonaharidedsapa Dio pohuadsa ima oppina tanicca inassonar-initohui. Ajijaro papeodsa dsodo nanicca ima oppina tanicca pohuadsa tojanitohui.

<sup>19</sup> Nadsama madija ohuaha itedsejemacca ima ajijaro papeodsa dsodo nanicca mota inebodsapi manaco Dio pohuadsa ahua bono camittehecca eccocchuitohui. Odsa panani Jerosare naqui pohuadsa eccocconitohui.

<sup>20</sup> Ajijaro ima huapimapi Jesocristo huati tajaricca. Iadsa pohua attipa: —Pajissa, occaninijine huajira tani -nade.

Nadsapi ia etti: —Pajissa nema nana. Ia Medsede Jeso ticcaniji -inajaro.

<sup>21</sup> Ia Medsede Jesocristo tiadeni huapimadsa ima bicani inanana, onajaro. Pajissa nema nana. Epejeni.